



精華編五九冊  
經部禮類

# 儒藏



北京大學《儒藏》編纂中心



## 《儒藏》精華編凡例

一、中國傳統文化以儒家思想爲中心。《儒藏》爲儒家經典和反映儒家思想、體現儒家經世做人原則的典籍的叢編。收書時限自先秦至清代結束。

二、《儒藏》精華編爲《儒藏》的一部分，選收《儒藏》中的精要書籍。

三、《儒藏》精華編所收書籍，包括傳世文獻和出土文獻。傳世文獻按《四庫全書總目》經史子集四部分類法分類，大類、小類基本參照《中國叢書綜錄》和《中國古籍善本書目》，於個別處略作調整。凡單書已收入入選的個人叢書或全集者，僅存目錄，並注明互見。出土文獻單列爲一個部類，原件以古文字書寫者一律收其釋文文本。韓國、日本、越南儒學者用漢文寫作的儒學著作，編爲海外文獻部類。

四、所收書籍的篇目卷次，一仍底本原貌，不選編，不改編，保持原書的完整性和獨立性。

五、對入選書籍進行簡要校勘。以對校爲主，確定內容完足、精確率高的版本爲底本，精選有校勘價值的版本爲校本。出校堅持少而精，以校正誤爲主，酌校異同。校記力求規範、精煉。

六、根據現行標點符號用法，結合古籍標點通例，進行規範化標點。專名號除書名號用角號（《》）外，其他一律省略。

七、對較長的篇章，根據文字內容，適當劃分段落。正文原已分段者，不作改動。千字以內的短文一般不分段。

八、各書卷端由整理者撰寫《校點說明》，簡要介紹作者生平、該書成書背景、主要內容及影響，以及整理時所確定的底本、校本（舉全稱後括注簡稱）及其他有關情況。重複出現的作者，其生平事蹟按出現順序前詳後略。

九、本書用繁體漢字豎排，小注一律排爲單行。

《儒藏》精華編第五九冊

經部 禮類

通禮之屬

儀禮經傳通解〔南宋〕朱熹黃榦

.....

# 目錄

儀禮經傳通解並續卷第總目	一
校點說明	一
宋嘉定癸未刊儀禮經傳通解續序	一
宋嘉定癸未刊儀禮經傳通解續序	二
儀禮經傳通解卷首	一
乞修三禮劄子	一
篇第目錄	二
儀禮經傳通解卷第一	一
士冠禮第一	一
冠義第二	二四
儀禮經傳通解卷第二	三三
士昏禮第三	三三
昏義第四	五八
儀禮經傳通解卷第三	七六

內則第五	七六
儀禮經傳通解卷第四	一一〇
內治第六	一一〇
儀禮經傳通解卷第五	一二八
五宗第七	一二八
親屬記第八	一五一
儀禮經傳通解卷第六	一五六
士相見禮第九	一五六
士相見義第十	一六九
投壺禮第十一	一七〇
儀禮經傳通解卷第七	一七七
鄉飲酒禮第十二	一七七
鄉飲酒義第十三	二〇四
儀禮經傳通解卷第八	二一三
鄉射禮第十四	二一三
鄉射義第十五	二六一
儀禮經傳通解卷第九	二六六
學制第十六	二六六

學義第十七	二八三	大學第二十八	三九三
儀禮經傳通解卷第十	二八八	儀禮經傳通解卷第十七	四〇四
弟子職第十八	二八八	中庸第二十九	四〇四
少儀第十九	二九一	儀禮經傳通解卷第十八	四二六
儀禮經傳通解卷第十一	三〇一	保傳第三十	四二六
曲禮第二十	三〇一	踐阼第三十一	四三四
儀禮經傳通解卷第十二	三三一	儀禮經傳通解卷第十九	四四一
臣禮第二十一	三三一	五學第三十二	四四一
儀禮經傳通解卷第十三	三四九	儀禮經傳通解卷第二十	四五五
鐘律第二十二	三四九	燕禮第三十三	四五五
鐘律義第二十三	三六一	燕義第三十四	四八三
儀禮經傳通解卷第十四	三七三	儀禮經傳通解卷第二十一	四八五
詩樂第二十四	三七三	大射儀第三十五	四八五
禮樂記第二十五	三七九	大射義第三十六	五二九
儀禮經傳通解卷第十五	三八六	儀禮經傳通解卷第二十二	五三一
書數第二十六(闕)	三八六	聘禮第三十七	五三一
儀禮經傳通解卷第十六	三八七	聘義第三十八	五九五
學記第二十七	三八七	儀禮經傳通解卷第二十三	六〇五

公食大夫禮第三十九	六〇五
公食大夫義第四十	六二五
諸侯相朝禮第四十一	六二六
諸侯相朝義第四十二	六三八
儀禮集傳集註卷第二十四	六三九
覲禮	六三九
朝事義	六五六
儀禮集傳集註卷第二十五	六五九
曆數	六五九
卜筮(闕)	六七四
儀禮集傳集註卷第二十六	六七五
夏小正	六七五
月令	六八六
儀禮集傳集註卷第二十七	七二四
樂制	七二四
樂記	七三八
儀禮集傳集註卷第二十八	七五八
王制之甲(分土)	七五八

儀禮集傳集註卷第二十九	七六七
王制之乙(制國)	七六七
儀禮集傳集註卷第三十	七八五
王制之丙(王禮)	七八五
儀禮集傳集註卷第三十一	七九四
王制之丁(王事)	七九四
儀禮集傳集註卷第三十二	八一三
王制之戊(設官)	八一三
儀禮集傳集註卷第三十三	八二九
王制之己(建侯)	八二九
儀禮集傳集註卷第三十四	八四二
王制之庚(名器上)	八四二
儀禮集傳集註卷第三十五	八五五
王制之辛(名器下)	八五五
儀禮集傳集註卷第三十六	八七五
王制之壬(師田)	八七五
儀禮集傳集註卷第三十七	九〇七
王制之癸(刑辟)	九〇七

儀禮經傳通解續卷第一	九二五	儀禮經傳通解續卷第十	一三九三
喪服一	九二五	喪服制度十	一三九三
儀禮經傳通解續卷第二	一〇〇八	儀禮經傳通解續卷第十一	一四二二
士喪禮上二	一〇〇八	喪服義十一	一四二二
儀禮經傳通解續卷第三	一〇九〇	儀禮經傳通解續卷第十二	一四四四
士喪禮下三	一〇九〇	喪通禮十二	一四四四
儀禮經傳通解續卷第四	一一四二	儀禮經傳通解續卷第十三	一四八四
士虞禮四	一一四二	喪變禮十三	一四八四
儀禮經傳通解續卷第五	一一六九	儀禮經傳通解續卷第十四	一五二五
喪大記上五	一一六九	弔禮十四	一五二五
儀禮經傳通解續卷第六	一二四八	儀禮經傳通解續卷第十五	一五五〇
喪大記下六	一二四八	喪禮義十五	一五五〇
儀禮經傳通解續卷第七	一二九七	儀禮經傳通解續卷第十六	一五九六
卒哭祔練祥禫記七	一二九七	喪服圖式目錄	一五九六
儀禮經傳通解續卷第八	一三二八	儀禮經傳通解續卷第十七	一六九九
補服八	一三二八	特性饋食禮一	一六九九
儀禮經傳通解續卷第九	一三四三	儀禮經傳通解續卷第十八	一七四二
喪服變除九	一三四三	少年饋食禮二	一七四二

儀禮經傳通解續卷第十九	一七七〇
有司徹	一七七〇
儀禮經傳通解續卷第二十	一八〇九
諸侯遷廟	一八〇九
儀禮經傳通解續卷第二十一	一八一二
祭法	一八一二
儀禮經傳通解續卷第二十二	一八三五
天神	一八三五
儀禮經傳通解續卷第二十三	一九一七
地示	一九一七
儀禮經傳通解續卷第二十四	一九六二
百神	一九六二
儀禮經傳通解續卷第二十五	二〇〇七
宗廟	二〇〇七
儀禮經傳通解續卷第二十六	二一七六
因事之祭	二一七六
儀禮經傳通解續卷第二十七	二三一九
祭統	二三一九

儀禮經傳通解續卷第二十八	二四三一
祭物	二四三一
儀禮經傳通解續卷第二十九	二五七五
祭義	二五七五

# 儀禮經傳通解

〔南宋〕

朱熹  
黃榦  
撰

王貽樸  
徐德明  
校點





# 目錄

儀禮經傳通解並續卷第總目	.....	一
校點說明	.....	一
宋嘉定癸未刊儀禮經傳通解續序	.....	一
宋嘉定癸未刊儀禮經傳通解續序	.....	一
儀禮經傳通解卷首	.....	一
乞修三禮劄子	.....	一
篇第目錄	.....	二
儀禮經傳通解卷第一	.....	一
士冠禮第一	.....	一
冠義第二	.....	二四
儀禮經傳通解卷第二	.....	一
士昏禮第三	.....	一
昏義第四	.....	五八
儀禮經傳通解卷第三	.....	七六

內則第五	.....	七六
儀禮經傳通解卷第四	.....	一一〇
內治第六	.....	一一〇
儀禮經傳通解卷第五	.....	一二八
五宗第七	.....	一二八
親屬記第八	.....	一五一
儀禮經傳通解卷第六	.....	一五六
士相見禮第九	.....	一五六
士相見義第十	.....	一六九
投壺禮第十一	.....	一七〇
儀禮經傳通解卷第七	.....	一七七
鄉飲酒禮第十二	.....	一七七
鄉飲酒義第十三	.....	二〇四
儀禮經傳通解卷第八	.....	二一三
鄉射禮第十四	.....	二一三
鄉射義第十五	.....	二六一
儀禮經傳通解卷第九	.....	二六六
學制第十六	.....	二六六

學義第十七	二八三	大學第二十八	三九三
儀禮經傳通解卷第十	二八八	儀禮經傳通解卷第十七	四〇四
弟子職第十八	二八八	中庸第二十九	四〇四
少儀第十九	二九一	儀禮經傳通解卷第十八	四二六
儀禮經傳通解卷第十一	三〇一	保傅第三十	四二六
曲禮第二十	三〇一	踐阼第三十一	四三四
儀禮經傳通解卷第十二	三〇一	儀禮經傳通解卷第十九	四四一
臣禮第二十一	三三一	五學第三十二	四四一
儀禮經傳通解卷第十三	三四九	儀禮經傳通解卷第二十	四五五
鐘律第二十二	三四九	燕禮第三十三	四五五
鐘律義第二十三	三六一	燕義第三十四	四八三
儀禮經傳通解卷第十四	三七三	儀禮經傳通解卷第二十一	四八五
詩樂第二十四	三七三	大射儀第三十五	四八五
禮樂記第二十五	三七九	大射義第三十六	五二九
儀禮經傳通解卷第十五	三八六	儀禮經傳通解卷第二十二	五三一
書數第二十六(闕)	三八六	聘禮第三十七	五三一
儀禮經傳通解卷第十六	三八七	聘義第三十八	五九五
學記第二十七	三八七	儀禮經傳通解卷第二十三	六〇五

公食大夫禮第三十九	六〇五
公食大夫義第四十	六二五
諸侯相朝禮第四十一	六二六
諸侯相朝義第四十二	六三八
儀禮集傳集註卷第二十四	六三九
覲禮	六三九
朝事義	六五六
儀禮集傳集註卷第二十五	六五九
曆數	六五九
卜筮(闕)	六七四
儀禮集傳集註卷第二十六	六七五
夏小正	六七五
月令	六八六
儀禮集傳集註卷第二十七	七二四
樂制	七二四
樂記	七三八
儀禮集傳集註卷第二十八	七五八
王制之甲(分上)	七五八

儀禮集傳集註卷第二十九	七六七
王制之乙(制國)	七六七
儀禮集傳集註卷第三十	七八五
王制之丙(王禮)	七八五
儀禮集傳集註卷第三十一	七九四
王制之丁(王事)	七九四
儀禮集傳集註卷第三十二	八〇三
王制之戊(設官)	八〇三
儀禮集傳集註卷第三十三	八二九
王制之己(建侯)	八二九
儀禮集傳集註卷第三十四	八四二
王制之庚(名器上)	八四二
儀禮集傳集註卷第三十五	八五五
王制之辛(名器下)	八五五
儀禮集傳集註卷第三十六	八七五
王制之壬(師田)	八七五
儀禮集傳集註卷第三十七	九〇七
王制之癸(刑辟)	九〇七

儀禮經傳通解續卷第一	九二五	儀禮經傳通解續卷第十	九三
喪服一	九二五	喪服制度十	九三
儀禮經傳通解續卷第二	〇〇八	儀禮經傳通解續卷第十一	四二
士喪禮上二	〇〇八	喪服義十一	四二二
儀禮經傳通解續卷第三	〇九〇	儀禮經傳通解續卷第十二	一四四四
士喪禮下二	〇九〇	喪通禮十二	一四四四
儀禮經傳通解續卷第四	一四二	儀禮經傳通解續卷第十三	一四八四
士虞禮四	一四二	喪變禮十三	一四八四
儀禮經傳通解續卷第五	一六九	儀禮經傳通解續卷第十四	一五二五
喪大記上五	一六九	弔禮十四	一五二五
儀禮經傳通解續卷第六	二四八	儀禮經傳通解續卷第十五	一五五〇
喪大記下六	二四八	喪禮義十五	一五五〇
儀禮經傳通解續卷第七	二九七	儀禮經傳通解續卷第十六	一五九六
卒哭祔練祥禫記七	二九七	喪服圖式目錄	一五九六
儀禮經傳通解續卷第八	二二八	儀禮經傳通解續卷第十七	一六九九
補服八	二二八	特性饋食禮一	一六九九
儀禮經傳通解續卷第九	四三	儀禮經傳通解續卷第十八	一七四二
喪服變除九	四三	少年饋食禮二	一七四二

儀禮經傳通解續卷第十九	一七七〇
有司徹	一七七〇
儀禮經傳通解續卷第二十	一八〇九
諸侯遷廟	一八〇九
儀禮經傳通解續卷第二十一	一八一二
祭法	一八一二
儀禮經傳通解續卷第二十二	一八三五
天神	一八三五
儀禮經傳通解續卷第二十三	一九一七
地示	一九一七
儀禮經傳通解續卷第二十四	一九六二
百神	一九六二
儀禮經傳通解續卷第二十五	二〇〇七
宗廟	二〇〇七
儀禮經傳通解續卷第二十六	二一七六
因事之祭	二一七六
儀禮經傳通解續卷第二十七	二二一九
祭統	二二一九

儀禮經傳通解續卷第二十八	二四三一
祭物	二四三一
儀禮經傳通解續卷第二十九	二五七五
祭義	二五七五



## 校點說明

朱熹（一一三〇—一二〇〇），字元晦，一字仲晦，號晦庵，又號晦翁，別稱紫陽，南宋徽州婺源（今江西婺源）人。生於南劍州尤溪（今福建尤溪）。朱熹以北宋二程思想為基礎，吸收北宋其他理學家的思想，建立了集兩宋理學之大成的理學體系。

《儀禮經傳通解》（以下簡稱《通解》）是朱熹晚年親自主持編纂的一部禮制方面的鴻篇巨製，也是他的絕筆之作。《通解》全書由前三十七卷與續二十九卷組成。此書既是彙集古代禮制記載的集大成之作，也是朱子禮學思想最主要、最集中的代表性著作。因此，此書在古代禮制研究與朱子禮學思想研究上都有着重要的地位與價值。

朱熹對禮經禮制的研究古今兼及，研究與實用

並重。到了晚年，朱熹深感以往具體的、零散的探討尚不足以表達他禮學思想的全體，於是就着手修纂一部綜合性禮書。以《儀禮》為主，廣採其他經籍，纂成完備的儀禮之書。慶元二年（一一九六）開始，兩年之後，除《喪》、《祭》二禮外，其他各禮都已初具規模，朱熹親自審定。禮書的編纂正順利進行的時候，慶元六年三月初九，朱熹辭世。這時禮書還沒有全部完成。二十多年後，朱熹被尊為儒家的新聖人，他未完成的《儀禮經傳通解》也終於問世了。嘉定十年（一二一七），《通解》在南康道院首次刊出，共三十七卷，內容有《家禮》五卷、《鄉禮》三卷、《學禮》十一卷、《邦國禮》四卷、《王朝禮》十四卷。其中前二十三卷經朱熹審定，後十四卷因未經裁定，在標目上用「集傳集註」，以示區別。嘉定十二年，弟子黃榦開始審定《喪》、《祭》部分的稿本，但十三年黃榦也去世了。嘉定十六年，《通解》的續二十九卷問世。其中，前十五卷經黃榦審定，而後十四卷則屬未定之稿。但不管怎麼說，《通解》終於有



了完本。黃幹去世後，楊復對續二十九卷的後十四卷進行審定。到紹定四年（一二三一），後十四卷也刊出了。至此，《通解》終於出齊了全書六十六卷的審定本。

《通解》一書，自宋嘉定十年刊行起至清末，歷代都有刊本流行。宋代版本除上述嘉定十六年刊本外，另著錄有宋淳祐刊本、宋寶祐刊本等，惜今均未見。元代版本有明確年代標識的僅一部，即《愛日精廬藏書志》卷四載影寫元刊本一部，亦未見。今存元明遞修本有三，兩種藏國家圖書館，一種藏南京圖書館。南圖所藏為前三十七卷（其中卷八至卷十及卷二十三配明鈔本）的全本，也是目前所能見到的年代僅晚於宋代的本子。明代版本可分刊本與鈔本兩大類。刊本中可知明確年代者有正統刊本，正德刊本，正德、嘉靖間刊本，嘉靖刊本，今均未見。另各種書目著錄年代不明的明代刊本不少，但大多皆只收經傳正文而盡棄注疏。鈔本所見有國圖藏明鈔本，殘存九卷；國圖藏元明遞修本卷八

至卷十及卷二十三凡四卷；天一閣藏明鈔本，存二冊，據卷首王似等序，知鈔宋寶祐本，然文字錯訛特甚。清刊《通解》為多，有：（一）清康熙刊本，上圖藏。（二）呂氏寶誥堂刊本，為清代通行之本，多存宋本之貌，但版刻不甚精良，留墨甚多。（三）乾隆十五年（一七五〇）聚錦堂刊梁萬方改訂本，因改動過大，歷來頗受指摘。（四）清乾隆刊本，上圖藏。（五）清《四庫全書》本，與宋本較近。（六）清光緒十四年（一八八八）上海點石齋編《經學輯要》本，南圖等藏。（七）光緒十七年賀瑞麟《西京清麓叢書》本，版刻甚精，且加校勘，但有臆改處。（八）清光緒二十三年、二十四年廣雅書局朱、墨兩次印本。（九）上海樂善堂刊三十七卷本，《廣雅書院藏書目錄》著錄，今未見。另有多種不明年代、刊地、刻者的清刊本，國圖、南圖、上圖等有藏。日本版本：日本寬文九年（一六六九）刊前三十七卷本，國圖藏。朝鮮版本：朝鮮銅活字本（年代不詳），北京大學圖書館藏。

此次整理《通解》，得到臺北「中央圖書館」的支援，採用該館所藏宋本（前三十七卷係宋嘉定十年刊本，續二十九卷係宋嘉定十六年刊本）為底本。對校前三十七卷用南圖藏元明遞修本（簡稱「元明本」）、國家圖書館藏日本寬文九年刊本（簡稱「寬文本」）、華東師範大學圖書館藏清賀瑞麟《西京清麓叢書》本（簡稱「賀本」），續二十九卷用清呂氏寶誥堂刊本（簡稱「呂本」）、賀本。參校用呂本、影印文淵閣《四庫全書》本。

本書的整理，得到國家圖書館、南京圖書館、上海圖書館、臺北「中央圖書館」、寧波天一閣藏書樓、華東師範大學圖書館等諸方面的幫助以及胡邦彥先生的指點，謹表示衷心的感謝。

校點者 王貽樑 徐德明



宋嘉定癸未刊儀禮經傳通解續序

〔宋〕陳 宓

朱文公先生所編禮書已刻於南康，獨《喪》、《祭》二門屬勉齋黃先生補而足之。宓假守延平，將刻之郡庠，適南康張侯處以書來索。蓋延平本無此書，刻此二門則無始；南康已有此書，刻此二門則有終。於是歸其書於南康，俾得爲全帙云。嘉定癸未七月初吉，朝奉大夫權知南劍州軍州兼管内勸農事借紫陳宓謹書。

宋嘉定癸未刊儀禮經傳通解續序

〔宋〕張 處

南康舊刊朱文公《儀禮經傳》與《集傳集註》，而《喪》、《祭》二禮俄空焉，蓋以屬門人勉齋黃榦，俾之類次而未成也。處來南康，

聞勉齋已下世，深恨文公之志不終。士友間有言勉齋固嘗脫稿，今在南劍陳史君處，欲全此書，索之南劍可也。南劍知之，果以其書來，且並遺刻者數輩至，於是鋟木，更一年而後畢。是雖《喪》、《祭》二門，而卷帙多前書三分之一，以是刊造之日長。點勘之功，鄉貢進士楊用爲多。又助以王鎮圭、童居欽、

黃嵩三君，披閱精彊，錯亂脫字往往無之。處生不爲晚，而不能一識文公。文公不可得而見，得見勉齋者斯可矣，又復失之。分符星渚，乃文公遺愛之地，高山仰止，惓惓興懷，茲又得全其所欲述之書，以畢其平日傳授之志，豈非幸歟？第閑習禮度，不如式瞻儀刑；諷味遺言，不如親承音旨。誠有如古人之論，撫卷爲之三歎也。嘉定癸未孟秋上澣，四明張處識。

## 儀禮經傳通解卷首

### 乞修三禮劄子

臣聞之：六經之道同歸，而禮樂之用爲急。遭秦滅學，禮樂先壞。漢晉以來，諸儒補緝，竟無全書。其頗存者，三禮而已。《周官》一書，固爲禮之綱領，至其儀法度數，則《儀禮》乃其本經，而《禮記·郊特牲》、《冠義》等篇乃其義疏耳。前此猶有三禮、通禮、學究諸科，禮雖不行，而士猶得以誦習而知其說。熙寧以來，王安石變亂舊制，廢罷《儀禮》而獨存《禮記》之科，棄經任傳，遺本宗末，其失已甚。而博士諸生又不過誦其虛

文，以供應舉。至於其間亦有因儀法度數之實而立文者，則咸幽冥而莫知其源。一有大議，率用耳學臆斷而已。若乃樂之爲教，則又絕無師授。律尺短長，聲音清濁，學士大夫莫有知其說者，而不知其爲闕也。故臣頃在山林，嘗與一二學者考訂其說。欲以《儀禮》爲經，而取《禮記》及諸經史雜書所載有及於禮者，皆以附於本經之下，具列註疏諸儒之說，略有端緒。而私家無書檢閱，無人抄寫，久之未成。會蒙除用，學徒分散，遂不能就。而鐘律之制，則士友間亦有得其遺意者，竊欲更加參考，別爲一書，以補六藝之闕，而亦未能具也。欲望聖明，特詔有司，許臣就祕書省關借禮樂諸書，自行招致舊日學徒十餘人，踏逐空閒官屋數間，與之居處，令其編類。雖有官人，亦不繫銜請俸，但乞逐月量支錢米，以給飲食、紙札、油燭之費。其

抄寫人，即乞下臨安府差撥貼書二十餘名，候結局日量支犒賞，<sup>①</sup>別無推恩，則於公家無甚費用，而可以興起廢墜，垂之永久。使士知實學，異時可為聖朝制作之助，則斯文幸甚。取進止。

先君所著《家禮》五卷、《鄉禮》三卷、《學禮》十一卷、《邦國禮》四卷、《王朝禮》十四卷，今刊於南康道院。其曰《經傳通解》者凡二十三卷，蓋先君晚歲之所規定，是為絕筆之書，次第具見於目錄。惟《書數》一篇闕而未補，而《大射禮》、《聘禮》、《公食大夫禮》、《諸侯相朝禮》八篇，則猶未脫藁也。其曰《集傳集註》者，此書之舊名也，凡十四卷，為《王朝禮》，而《卜筮篇》亦闕，餘則先君所草定而未暇刪改者也。今皆不敢有所增益，悉從其藁。至於《喪》、《祭》二

禮，則嘗以規模、次第屬之門人黃榦，俾之類次。它日書成，亦當相從於此，庶幾此書始末具備。顧念先君蚤歲即嘗有志於是書，昨在經筵嘗具奏，欲請於朝，乞招致生徒，置局編次而不果上，然其著述之旨意具存此篇。今謹繕錄如右，讀者當有以識其心之所存矣。禮闕樂壞千有餘年，今幸討論，粗見端緒。而天不假之年，使不克究其大全，而所就者止此。嗚呼已矣，其可為千古之恨也夫！嘉定丁丑八月甲子日，孤在泣血謹記。

### 篇第目錄序題

《漢書·藝文志》：《禮古經》五十六

①「賞」，原作「設」，據呂本、四庫本、賀本改。

卷，《經》十七篇。后氏、戴氏。○今按：此即今《儀禮》也。「十七」，本作「七十」，臨江劉敞云：當作「十七」。計其篇數則然，今從之。永嘉張淳曰：漢初未有《儀禮》之名，疑後漢學者見十七篇中有儀有禮，遂合而名之也。《記》百三十一篇。七十子後學者所記也。《明堂陰陽》三十三篇。古明堂之遺事。《王史氏》二十一篇。七十子後學者。《曲臺后倉》九篇。如淳曰：行禮射于曲臺，后倉爲記，故名曰《曲臺記》。《明堂陰陽說》五篇。《周官經》六篇。《周官傳》四篇。王莽時，劉歆置博士。師古曰：即今《周官禮》也，亡其《冬官》，以《考工記》充之。劉歆曰：「《易》曰：『有夫婦父子君臣上下，然後禮義有所錯。』而帝王質文世有損益，至周，曲爲之防，事爲之制，故曰『禮經三百，威儀三千』」。今按：「禮經」、「威儀」，《禮器》作「經禮」、「曲禮」，而《中庸》以「禮經」爲「禮儀」。鄭玄等皆曰：經禮，即《周禮》三百六十篇。曲禮，即今《儀禮》冠、昏、吉、凶。其中事儀三千，以其有

委曲威儀，故有二名。獨臣瓚曰：《周禮》三百，特官名耳。經禮，謂冠、昏、吉、凶。蓋以《儀禮》爲經禮也。而近世括蒼葉夢得曰：「經禮，制之凡也，曲禮，文之目也。先王之世，二者蓋皆有書藏于有司，祭祀、朝覲、會同則大史執之以涖事，小史讀之以喻衆，而鄉大夫受之以教萬民，保氏掌之以教國子者，亦此書也。」愚意禮篇三名，《禮器》爲勝。諸儒之說，瓚、葉爲長。蓋《周禮》乃制治立法，設官分職之書，於天下事無不該攝，禮典固在其中，而非專爲禮設也。故此志列其經傳之目，但曰《周官》而不曰《周禮》，自不應指其官目以當禮篇之目，又況其中或以一官兼掌衆禮，或以數官通行一事，亦難計其官數以充禮篇之數。至于《儀禮》，則其中冠、昏、喪、祭、燕、射、朝、聘自爲經禮大目，亦不容專以曲禮名之也。但曲禮之篇未見于今何書爲近，而三百、三千之數，又將何以充之耳？又嘗考之，經禮固今之《儀禮》，其存者十七篇。而其逸見於它書者，猶有《投壺》、《奔喪》、《遷廟》、《霽廟》、《中雷》等篇。其不可見者，又有古經增多三十九篇，而《明堂陰陽》、《王史氏記》數十篇，及河間獻王所輯禮樂古事，多至五百餘篇，儻或猶有逸在其間者，大率且以《春官》所領五禮之日約之，則



其初固當有三百餘篇亡疑矣。所謂曲禮，則皆禮之微文小節，如今《曲禮》、《少儀》、《內則》、《玉藻》、《弟子職》篇所記事親事長、起居飲食、容貌辭氣之法，制器備物、宗廟宮室、衣冠車旗之等。凡所以行乎經禮之中者，其篇之全數雖不可知，然條而析之，亦應不下三千有餘矣。若或者專以經禮爲常禮，曲禮爲變禮，則如《冠禮》之不醴而醢用酒、殺牲而有折俎、若孤子、冠母不在之類，皆禮之變，而未嘗不在經禮篇中，坐如尸、立如齊、毋放飯、毋流歃之類，雖在《曲禮》之中，而不得謂之變禮，其說誤也。及周之衰，諸侯將踰法度，惡其害己，皆滅去其籍，自孔子時而不具，至秦大壞。漢興，魯高堂生傳《士禮》十七篇。訖孝宣世，后倉最明。戴德、戴聖、慶普皆其弟子，三家立於學官。今按：此即上文誤作七十篇者。《禮古經》者，出於魯淹中及孔氏，<sup>①</sup>蘇林曰：淹中，里名也。○今按：「及孔氏」，舊注屬下句。劉敞云：孔氏安國所得壁中書也，當屬上句。今按：此即上文五十六卷者，其讀當從劉氏。與

十七篇文相似，多三十九篇。今按：「與」，本作「學」。「十七」，本作「七十」。劉敞云：「學」當作「與」，「七十」當作「十七」。五十六卷除十七，正多三十九。其說是也。蓋上文《經》七十篇「本註」后氏、戴氏，又言「高堂生傳《士禮》十七篇，后倉、二戴，皆其弟子」，則彼所謂后、戴之禮即是傳此高堂生之所得，而今號《儀禮》者也。況劉氏所考於所增多篇數適合，而上文經曰又別無高堂生十七篇之禮，其證甚明。賈公彥疏亦云：古文十七篇與高堂生所傳相似。是唐初時《漢志》猶未誤也。故知此誤錯三字，皆當從劉氏說。及《明堂陰陽》、《王史氏記》所見，多天子、諸侯、卿大夫之制，雖不能備，猶瘡倉等推《士禮》而致於天子之說。」師古曰：瘡，與愈同。愈，勝也。○今按：諸記自「一百三十一篇」以下，與經文本不相雜，疑今亦多見於本篇後記及二戴之記、《孔子家語》等書，特不可考其所自耳。又張淳云：「如歆所言，則高堂生所得獨爲《士禮》。而今《儀禮》乃有

①

「出於」至「孔氏」，宋本原脫，據呂本、四庫本、賀本補。

天子、諸侯、大夫之禮居其大半，疑今《儀禮》非高堂生之書，但篇數偶同耳。」此則不深考於劉說所訂之誤，又不察其所謂《士禮》者，特略舉首篇以名之。其曰推而致於天子者，蓋專指冠、昏、喪、祭而言，若燕、射、朝聘，則士豈有是禮而可推耶？○賈公彥曰：「戴

德、戴聖與劉向《別錄》十七篇次第，皆《冠禮》第一，《昏禮》第二，《士相見》第三。白茲以下，《大戴》即以《士喪》、《既夕》、《士虞》、《特牲》、《少牢》、《有司》、《鄉飲》、《鄉射》、《燕禮》、《大射》、《聘禮》、《公食》、《覲禮》、《喪服》爲次，《小戴》則以《鄉飲》、《鄉射》、《燕禮》、《大射》、《士虞》、《喪服》、《特牲》、《少牢》、《有司》、《士喪》、《既夕》、《聘禮》、《公食》、《覲禮》爲次，皆尊卑吉凶，先後雜亂，故鄭說不從之。唯劉向《別錄》《大射》以上七篇與《小戴》同，而其下乃以《聘》、《食》、《覲禮》、《喪服》、《士喪》、《既

夕》、《士虞》、《特牲》、《少牢》、《有司》爲次，皆尊卑吉凶次第倫敘，故鄭用之也。」又曰：「《儀禮》之次，賤者爲先，故以《士冠》爲先，無大夫冠禮，諸侯冠次之，天子冠又次之。其《昏禮》亦士爲先，大夫次之，諸侯次之，天子爲後。諸侯鄉飲酒爲先，天子鄉飲酒次之。《鄉射》、《燕禮》已下皆然。又以《冠》、《昏》、《士相見》爲先後者，以二十而冠，三十而娶，四十強而仕，即有摯見鄉大夫、見國君之等。又爲鄉大夫、州長行鄉飲酒、鄉射之事已下，先吉後凶，凶盡則又行祭祀，吉禮也。」

### 士冠禮第一

意求之。

陸德明《釋文》曰：「冠，古亂反。」下以

家禮一之上

鄭玄《目錄》曰：「童子任職居士位，

年二十而冠。

疏曰：言童子居十位者，据下《昏禮》、

《相見禮》皆士身所行，故知此是士身自加冠也。又据

《曲禮》云「二十曰弱冠」，故知年二十而冠也。孔穎達

云：冠之所起，按《略說》云「古人冒而句頤」，註云：「謂

三皇時以冒覆頭句頤繞項。」《世本》云：「黃帝造流冕。

蓋前此以羽皮爲冠，至是乃用布也。主人玄冠朝

服，則是仕於諸侯。句。天子之士，朝服皮

弁素積。今按：諸侯朝服以日視朝，天子皮弁以日視

朝，皆君臣同服，故謂此篇言「主人玄冠朝服」，則是仕於

諸侯而爲士者。若天子之士，則其朝服當用皮弁素積，

不得言玄冠朝服也。鄭氏本文如此，今見疏義。而《釋

文》乃以「天子」二字加于「諸侯」之上，則舛謬而無文理

矣。溫本亦誤，今定從疏。古者四民世事，士之

子恒爲士。疏曰：四民世事，見《齊語》。引之者，見

此爲士自加冠法。若士之子四十強而仕，何得有二十爲

士自加冠也？○今按：此說不可曉，竊詳鄭意，似謂士

之子雖未仕，然亦得用此禮爾。疏恐誤也。冠於五

禮爲嘉禮，大、小《戴》及《別錄》皆此爲第

一。」疏曰：《周禮·春官》五禮之目曰：吉、凶、賓、軍、

嘉。其「以嘉禮親萬民」之一曰：「以昏冠之禮親成男

女。」是冠屬嘉禮也。今仍舊次，而於其文頗有

所釐析云。如取三屨以合於《陳器服》章之次，諸辭

各附於本章之下，增女笄一節自《雜記》而來，出後記以

入後篇之類。

## 冠義第二

### 家禮一之下

此《小戴記》第四十三篇，蓋漢儒所造

以釋冠禮之義者也。《家語·冠頌篇》略

見天子、諸侯、大夫之禮，《小戴·曾子問》

中有變禮，《春秋》內外傳有事證，今皆以

附於後，定爲第二，而遞改下篇之次云。

## 士昏禮第三

### 家禮二之上

鄭《目錄》云：「士娶妻之禮，以昏爲

期，因而名焉。必以昏者，陽往而陰來，日入二商爲昏。疏曰：商謂商量，是漏刻之名。案馬

氏云：日未出，日沒後皆云：「刻半，前後共五刻。今云

三商者，據整數而言。譙周云：太昊制嫁娶儷皮爲禮，是昏禮所起也。○今按：《周禮·媒氏》：「凡男女白成

名以上，皆書年、月、日、名焉。令男三十而娶，女二十而嫁。」又按：孔子曰「霜降逆女，冰泮殺止」，而《媒氏》

又言「中春之月，令會男女」，此皆昏禮之大期也。《左傳》云「國君十五而生子」，是人君早娶，所以重繼嗣也。

昏於五禮屬嘉禮。《大》、《小戴》及《別錄》，此皆第二。今頗釐析之而定爲第三。

後皆放此，不復重出。

## 昏義第四

### 家禮二之下

此《小戴》第四十四篇，蓋漢儒所造以釋昏禮之義者也。今以《郊特牲》、《坊記》、《曾子問》及《詩》、《春秋》內外傳、《白

虎通義》、《說苑》所說昏禮之義及其變節，合之以爲此篇。

## 內則第五

### 家禮三

此《小戴》第十二篇，蓋古經也。鄭氏以爲記男女居室事父母、舅姑之法，以閨門之內禮儀可則，故曰《內則》。今按：此必古者學校教民之書，宜以次於《昏禮》，故取以補經而附以傳記之說云。

## 內治第六

### 家禮四

古無此篇，今取《小戴·昏義》、《哀公問》、《文王世子》、《內則》篇及《周禮》、《大戴禮》、《春秋》內外傳、《孟子》、《書大傳》、《新序》、《列女傳》、《前漢書》、賈誼《新書》、《孔叢子》之言人君內治之法者，創爲

此記，以補經闕。

五宗第七

家禮五

古無此篇，今取《小戴·喪服小記》、《大傳》、《曾子問》、《內則》、《文王世子》、《檀弓》、《曲禮》篇及此經《喪服傳》、《春秋》內外傳、《家語》、《白虎通義》、《書大傳》、《孔叢子》等書之言宗子之法以治族人者，創為此篇。

親屬記第八

家禮六

此即《爾雅》之《釋親》篇，《白虎通義》所謂「親屬記」者也。以其具載閨門三族親戚之名號，故列於此。而《通義》所釋，亦因以附焉。

士相見禮第九

鄉禮一之上

鄭《目錄》曰：「士以職位相親，始承摯相見之禮。《雜記》會葬禮曰：『相見也，反哭而退；朋友，虞祔而退。』」疏曰：經亦有大夫及庶人見君之禮，亦有士見大夫之法，而以上相見爲首，故以名篇。其天子之孤卿大夫士與諸侯之孤卿大夫士執摯既同，相見之禮亦無別。又云：送葬之禮，恩厚者退遲，恩薄者退疾。引之者，證有執摯相見之義也。士相見於五禮屬賓禮，大、小《戴》及《別錄》皆第三。」疏曰：案《周禮·大宗伯》五禮，賓禮之別有八：春朝、夏宗、秋覲、冬遇、時會、殷同，六者是五等諸侯見天子兼有自相朝覲之禮；時聘曰問，殷覲曰視，二者是諸侯使臣出聘天子及自相聘之禮，並執玉帛而行，無執禽摯之法。此屬直新升爲士大夫之等，同國執禽摯相見及見君之禮，亦是賓主相見之法，故屬賓禮也。今出其見君者數條入《臣禮》

篇，而取《曲禮》、《少儀》、《玉藻》諸篇言相見飲食之禮者附之。

### 士相見義第十

#### 鄉禮一之下

古無此篇，劉敞補亡。今以《白虎通義》附其後。

### 投壺禮第十一

#### 鄉禮二

此《小戴》第四十篇，第記主人與客燕飲投壺之禮，鄭氏以爲實《曲禮》之正篇，其事與射爲類，於五禮宜屬嘉禮。疏曰：案《周禮·大宗伯》云「以嘉禮親萬民」下有「以賓射之禮親故舊朋友」，故知屬嘉禮也。今取《大戴》及《少儀》合之，以繼《士相見禮》之後。

### 鄉飲酒禮第十二

#### 鄉禮三之上

鄭《目錄》云：「諸侯之鄉大夫三年大比，獻賢者、能者於其君，以禮賓之，與之飲酒。」疏曰：凡鄉飲酒之禮，其名有四：此賓賢能，一也；六十者坐，五十者立侍，是黨正蜡祭飲酒，二也；州長春秋習射于序，先行鄉飲酒，三也；又有鄉大夫士飲國中賢者，<sup>①</sup>用鄉飲酒，四也。其《王制》云「習鄉尚齒」，即是黨正飲酒法。○呂大臨曰：鄉人凡有會聚，皆當行此禮，恐不止四事。《論語》載「鄉人飲酒，杖者出，斯出矣」，亦指鄉人而言之。鄉飲酒於五禮屬嘉禮，《大戴》此乃第十，《小戴》及《別錄》此皆第四。<sup>②</sup>今略取《少儀》一二附記下云。

① 大夫一上，原有「士」字，據四庫本、賀本刪。

鄉飲酒義第十三

鄉禮三之下

此《小戴》第四十五篇，亦漢儒所造以釋鄉飲酒之義者也。上篇所陳乃鄉大夫將興其賢能而賓之之禮，此義中第五章兼有黨正正齒位之事。鄭說已見上篇。孔穎達以爲吉禮，非也。今以《周禮》考之，唯祭祀爲吉禮，其飲食、賓射、燕饗皆屬嘉禮，則上篇鄭云嘉禮爲是，而孔說誤也。《射義》放此。今附於本篇之次。

鄉射禮第十四

鄉禮四之上

鄭《目錄》云：「州長春秋以禮會民而射於州序之禮。謂之鄉者，州，鄉之屬，鄉大夫或在焉，不改其禮。」疏曰：鄭註「州長」以下，《周禮·州長》職文也。《周禮》又云「五州爲鄉」，是

州屬鄉也。鄉雖管五州，然鄉大夫或它居一州之內，則當來臨此射禮，故州長所行而名鄉射也。又鄉大夫既興賢者能者，而以鄉射之禮五物詢衆庶亦如此禮，故亦名爲鄉射。云「不改其禮」者，雖鄉大夫在，其禮仍依州長射禮也。然此經鄉大夫射于庠，云「堂則由楹外」，又云「堂則物當楣」，又云「大夫用兕中」，其禮與上射於序別。而云「不改」者，大射，卿大夫上射先行鄉飲酒禮，及未旅而射，爲不改耳，其實亦有少異也。射於

五禮屬嘉禮。《大戴》十一，《小戴》及《別錄》皆第五。」今案：此篇與上篇成宿飲燕之節略同，它經之註似此者多不重出，而鄭于此註各詳具之，是後諸篇亦復放此，蓋恐後人因事檢閱者不能一一通貫，故不憚其繁複耳。至于疏家復詳言之，則爲冗長，故今獨存註文。而疏無異義者，不復載也。

鄉射義第十五

鄉禮四之下

此《小戴》第四十六篇，亦漢儒所造以釋鄉射之義者也。今取其言鄉黨習射詢

衆庶者爲此篇，而出其言天子、諸侯將祭選士者爲《大射義》，見後篇。

### 學制第十六

#### 學禮一之上

古無此篇。此類今以家塾黨庠遂序皆爲鄉學，則其禮之次宜有以見其設教導民之法，故集諸經傳創立此篇，以爲此類之首。

### 學義第十七

#### 學禮一之下

此篇亦古所無，今集諸經傳凡言教法之意者補之，以釋上篇之義。

### 弟子職第十八

#### 學禮二

此《管子》之全篇，言童子入學受業事

師之法。今分章句，參以衆說，補其註文，以附于經。

### 少儀第十九

#### 學禮三

此《小戴記》之第十七篇，言少者事長之節，註疏以爲細小威儀，非也。今釐其雜亂，而別取它篇及諸書以補之。

### 曲禮第二十

#### 學禮四

此《小戴記》之第一篇，言委曲禮儀之事，所謂「曲禮三千」者也。其可隨事而見者，已包在經禮二百篇之內矣。此篇乃其雜碎首尾出入諸篇，不可隨事而見者，故合而記之，自爲一篇。而又多爲韻語，使受者得以諷於口而存諸心。蓋《曲禮》之記也，戴氏編禮時已亡逸，故特因其首章



之幸存者而雜取諸書所引與它記之相似者以補續之。然其文亦多錯亂，不甚倫貫，今頗釐而析之。

臣禮第二十一

學禮五

古無此篇。今按：事親事長、隆師親友、治家居室之法各有成篇，獨臣事君三綱之大，其法尤嚴，乃獨無所聚而散出於諸書，學者無所考焉。今掇其語，創為此篇。

鐘律第二十二

學禮六之上

古無此篇。今以六藝次之，凡禮之通行者，已略見上諸篇矣。此後當繼以樂，而《樂經》久已亡逸，故取《周禮》鄭註、《太史公》、《淮南子》、前、後《漢志》、杜佑《通

典》之言律呂相生、長短均調之法，創為此篇，以補其闕。

鐘律義第二十三

學禮六之下

古亦無此篇。今取闕

詩樂第二十四

學禮七

古亦無此篇。而大樂遺聲其絕久矣，今取世傳唐開元十二詩譜補之，以粗見其仿佛，然亦未知其果有以合於古之遺聲否也。

禮樂記第二十五

學禮八

古無此篇。今取諸記中通論禮樂大指者合為此篇，以通釋禮樂之義。

書數第二十六今闕

學禮九

古無此篇。今案：六藝之射已略見上《鄉射》及下《大射》篇，御法則廢不可考矣。唯書數日用所須，不可不講，故取許氏《說文解字》序說及《九章算經》爲此篇，以補其闕，然亦不能詳也。

學記第二十七

學禮十

《小戴》第十八篇，言古者學校教人傳道授業之次序與其得失興廢之所由，蓋兼大小學而言之。舊註多失其指，今考橫渠張氏之說，并附己意，以補其註云。

大學第二十八

學禮十一

《小戴》第四十二篇，專言古者大學教

人之次第，河南程氏以爲孔氏之遺書者也。秦漢以來儒者既失其傳，故其舊文舛錯爲甚，而訓說亦多不能得其微意。今推本程氏，既緒正之，仍別爲之章句。讀者宜盡心焉，則聖賢之學可漸而進矣。

中庸第二十九

學禮十二

《小戴》第三十一篇。程氏以爲孔門傳授心法，而其書成於子思，其言大抵與《大學》相發明。故熹聞之先君子，嘗以爲《大學》者此篇之戶庭，而此篇則《大學》之闢奧也。然道既失傳，說者類皆不能得其微指。今亦本程氏，別爲章句。讀者熟復而深味之，則聖賢傳付之密旨，庶乎其有以自得之矣。

保傅第三十

學禮十三

漢昭帝詔曰「通《保傅傳》，文穎以爲賈誼所作，即此篇也。今在《大戴禮》爲第四十八篇，其詞與誼本傳疏語正合。其言教天子、輔少主之道至詳悉而極懇切矣，故自當時即以列於《孝經》、《論語》、《尚書》之等而進之於君，蓋已有識其言之要者矣。後之君子，有愛君憂國之深慮者，其可以不之省哉？」

踐阼第三十一

學禮十四

此《大戴》第五十九篇。自此以下序題並闕。

五學第三十二

學禮十五

燕禮第三十三

邦國禮一之上

燕義第三十四

邦國禮一之下

大射儀第三十五

邦國禮二之上

大射義第三十六

邦國禮二之下

聘禮第三十七

邦國禮三之上

聘義第三十八

邦國禮三之下

公食大夫禮第三十九

邦國禮四之上

公食大夫義第四十

邦國禮四之下

諸侯相朝禮第四十一

邦國禮五之上

諸侯相朝義第四十二

邦國禮五之下

## 儀禮經傳通解卷第一

### 士冠禮第一

#### 家禮一之上

傳曰：夫禮始於冠，本於昏，重於喪祭，尊於朝聘，和於射鄉，此禮之大體也。夫，音扶。朝，直遙反。○始，猶根也。本，猶幹也。鄉，鄉飲酒。<sup>①</sup>

### 經一

士冠禮。○筮于廟門。筮，市例反。廟，古「廟」字。○筮者，以蓍問日吉凶於《易》也。冠必筮，日於廟門者，重以成人之禮成子孫也。廟，謂禰廟。不於堂者，嫌蓍之靈由廟神。○蓍，音尸。禰，乃禮反，父廟也。○疏曰：蓍，草之靈者，《易·說卦》云「幽贊於神明而生蓍」是也。《易》者，《周禮·太卜》：「掌三《易》，一曰《連山》，二曰

《歸藏》，三曰《周易》。」筮得卦，以《易》辭占吉凶也。《周易》筮法：用四十九蓍，分之爲二而掛一，揲之以四，歸奇於扚，再扚而爲一變。合掛扚得五若四爲少，得九若八爲多，三變而成一爻。三變皆少則爲九，而謂之老陽；三變皆多則爲六，而謂之老陰；兩多一少則爲七，而謂之少陽；兩少一多則爲八，而謂之少陰；皆畫地記之。九重、六交、七單、八拆，至十八變則得六爻而成一卦。老者變而少者不變也。不筮月者，《夏小正》云：「二月，綏多士女，冠子取妻時也。」既有常月，故不筮也。又曰：經唯言父子兄弟，不言祖孫，鄭兼言孫者，家事統於尊，若祖在則爲冠主，故兼孫也。又曰：凡《儀禮》之內單言廟者，皆是禰廟。若非禰廟，則以廟名別之，如《聘禮》言「先君之桃」，又言「祖廟」是也。若天子諸侯，皆冠於始祖之廟，故季武子云「以先君之桃處之」。桃，謂遷主所藏始祖廟也。大夫雖無冠禮，然有幼而冠者，亦當與士同在禰廟也。主人玄冠朝服，緇帶素鞶，即位于門東，西面。朝，直遙反，注同，後「朝服」放此。緇，側其反。鞶，音畢，蔽膝也。

① 「酒」下，賀本有「○昏義」。

○主人，將冠者之父兄也。玄冠，委貌也。朝服者，十五升布衣而素裳也。衣不言色者，衣與冠同也。筮必朝服，尊著龜之道也。緇帶，黑緇帶也。士帶博二寸，再緇四寸，屈垂三尺。素鞶，白鞶也，長三尺，上廣一尺，下廣二尺，其頸五寸，肩革帶博一寸。天子與其臣，玄冕以視朔，皮弁以日視朝。諸侯與其臣，皮弁以視朔，朝服以日視朝。凡染黑，五人爲緇，七人爲緇，玄則六人與？又曰：古者田狩而食其肉，衣其皮，先以兩皮如鞶以蔽前後。及後世聖人易之以布帛，猶存其蔽前，示不忘古，尊祭服異其名曰黻。○緇，白陵反。繅，音了。長，直亮反。廣，古曠反，凡度長短廣狹者皆放此。視，一作「眡」，音同。弁，皮彥反。緇，側留反。與，音餘。○疏曰：云「素裳」者，雖經不言裳，然裳與鞶同色，既云素鞶，故知裳亦積白素絹爲之也。又云「衣不言色」者，禮之通例，衣冠同色。其色異者，經即別言之，下云「爵弁服」、「純衣」是也。又云「筮必朝服，尊著龜之道」者，此決冠時，主人入廟服玄端爵鞶。此筮於廟門，亦當服玄端而不服之，乃服朝服，是尊著也。然下文宿賓爲期亦朝服者，自是尋常相見所服耳，非特以此相尊敬也。其《特牲》、《少牢》、《筮日與祭同服者，著龜不可尊於先祖也。又云「士黑緇帶」者，謂以黑飾白緇帶也。《玉藻》曰

「士練帶，率下裨」，又言「士緇裨」。率與絳同，謂緇緝也。裨，飾也。蓋以練孰白緇單作帶體，其廣二寸，而緇緝其兩邊，又以緇飾其垂下之兩末與兩邊也。「再緇四寸，屈垂三尺」者，帶之垂者必反屈向上，又垂而下。大夫則裨其屈與垂者，士則惟裨其向下垂者而不裨其屈者也。又云「頸五寸」，亦謂廣也。頸中央，肩兩角皆上接革帶，肩與革帶廣同。此鞶即黻也，祭服謂之黻，朝服謂之鞶也。鞶，屨同色，此素鞶則白屨也。又引天子諸侯視朔視朝之服者，以在朝君臣同服，故以此證玄冠朝服是諸侯之士也。又云「染黑」以下，《周禮·鍾氏》文，無六人之文，故云「與」以疑之。有司如主人服，即位于西方，東面北上。有司，群吏有事者，謂主人之吏，所自辟除，府史以下也，今時卒吏及假吏皆是也。○辟，必亦反。卒，子忽反。假，古雅反。○疏曰：士雖無臣，皆有屬吏、胥徒及僕隸，故云「群吏」也。「府史以下」，謂《周禮》三百六十官之下皆有府史胥徒，不得君命，主人自辟除，去役賦，補置之者。卒吏、假吏，又舉漢法爲證也。筮與席，所卦者，具饌于西塾。饌，直轉反。塾，音孰。○筮，所以問吉凶，謂著也。所卦者，所以畫地記爻，《易》曰：「六畫而成卦。」饌，

陳也。具，俱也。西塾，門外西堂也。○畫，音獲。爻，戶交反。○疏曰：「畫地記爻」者，依七、八、九、六之爻，用木畫地記之，《少牢》云：「卦者在左」，「卦用木」是也。今則用錢，其法同耳。布席于門中，闌西闕外，西面。闕，魚列反。闕，音域。○闕，門槩也。闕，闕也。古文「闕」爲「槩」，「闕」爲「槩」。○槩，其月反。闕，苦本反。槩，魚列反。槩，子六反。○疏曰：《漢書》云高堂生傳《儀禮》十七篇，是今文也。至武帝之末，魯恭王壞孔子宅，得古《儀禮》五十六篇，其字皆以篆書，是爲古文也。古文十七篇與高堂生所傳者同，而字多不同。鄭注《禮》之時，以今、古二字並之，從其強者。以所從者在經，而於注內疊出其所不從者。若二字俱合，則兩從而互見之也。筮人執筴，抽上韝，兼執之，進受命于主人。筴，初革反。韝，音獨。○筮人，有司主三易者也。韝，藏筴之器也，今時藏弓矢者謂之韝丸也。兼，并也。進，前也，自西方而前。受命者，當知所筴也。○疏曰：筴，即蓍也，《曲禮》曰：「筴爲筴」是也。按《少牢》云：「左執筴，右抽上韝，兼與筴執之，東面受命於主人」，與此同也。又云：「今時謂之韝丸者，見以皮爲之也。言「上韝」者，其制有上下，下者從下向上

承之，上者從上向下韝之也。宰自右少退，贊命。宰，有司主政教者也。自，由也。贊，佐也。命，告也。佐主人告所以筴也。《少儀》曰：「贊幣自左，詔辭自右。」○今按：所贊之辭未聞，下疏云「文不具也」，蓋當云：某有子某，將以來日某加冠於其首，庶幾從之。筮人許諾，右還，即席坐，西面，卦者在左。還，音旋，後放此。○即，就也。東面受命，右還北行就席。卦者，有司主畫地識爻者也。○識，音志。○疏曰：筴法已見上。按《少牢》：「得主人命訖，史曰諾，西面於門西，抽下韝，左執筴，右兼執韝以擊筴。遂述命，乃釋韝，立筴。」此亦宜然。但彼卿大夫禮，有述命，此士禮略，故不述命耳。又按《三正記》：「大夫蓍五尺，故立筴；士之蓍三尺，當坐筴。」亦與彼異也。卒筴，書卦，執以示主人。卒，已也。書卦者，筮人以方寫所得之卦也。○疏曰：方，版也。主人受眊，反之。反，還也。○還，音環。筮人還，東面旅占，卒，進告吉。旅，衆也。還與其屬共占之。古文「旅」作「𡳿」。○𡳿，力居反。○疏曰：卜筴之法，《洪範》七，稽疑云：「擇建立卜筮人，三人占，從二人之言。」

又《金縢》云：「乃卜三龜，一習吉。」則天子諸侯卜時，三龜並用，於玉、瓦、原三人各占一兆也，筮時《連山》、《歸藏》、《周易》亦三易並用。夏、殷以不變爲占，《周易》以變者爲占，亦三人各占一易。卜筮皆三占從二，三吉爲大吉，一凶爲小吉，三凶爲大凶，一吉爲小凶。又《喪禮》亦云「與其屬共占」，彼注云：其屬，「謂掌《連山》、《歸藏》、《周易》者」。又卜葬曰云「占者三人」，注云：「占者三人，掌玉兆、瓦兆、原兆者也。」《少牢》大夫禮亦云「三人占」。則鄭意大夫卜筮同用一龜、一易，三人共占之矣。○今按：《少牢》禮無此文，未詳何據。若不吉，則筮遠日，如初儀。遠日，旬之外。○疏曰：《曲禮》云：「旬之內曰近某日，旬之外曰遠某日。」彼據吉禮。士旬內筮，故云近某日，《特性》旬內筮日是也。大夫以上禮旬外筮，故言遠某日，《少牢》筮旬有一日是也。《少牢》又云：「若不吉，則及遠日，又筮日如初。」鄭注云：「及，至也。遠日，後丁若後己。」言至遠日又筮日如初，明不并筮。則前月卜來月之上旬，上旬不吉，至上旬又筮中旬，中旬不吉，至中旬又筮下旬，下旬不吉則止，不祭祀也。《特性》不言及，則可上旬之內筮，不吉，則預筮中旬，中旬不吉，則又預筮下旬，又不吉，則止。若此，冠禮亦先近日。《士冠禮》亦於上旬之內預筮，三旬

不吉，則更筮後月之上旬。以其祭祀用孟月，不容人他月。若冠子，則年已二十不可不冠，故容人後月也。此注所云「遠日旬之外」，白是當月上旬之內筮，不吉，更筮中旬，與《曲禮》文意小不同也。○橫渠張載曰：「祭之筮日，若再不吉則止。識日而祭，更不筮。據《儀禮》，唯有筮遠日之文，不云三筮。筮日之禮，只是二筮，先筮近日，後筮遠日。不從，則直諏用下旬遠日，蓋亦足以致聽於鬼神之意，而祀則不可廢。」徹筮席，徹，去也，斂也。○去，起呂反。宗人告事畢。宗人，有司主禮者也。

### 右筮日。

主人戒賓，賓禮辭，許。戒，警也，告也。賓，主人之僚友。古者有吉事，則樂與賢者歡成之；有凶事，則欲與賢者哀戚之。今將冠子，故就告僚友使來。禮辭，一辭而許也。再辭而許曰固辭。三辭曰終辭，不許也。○疏曰：同官爲僚，同志爲友。廣戒僚友，使來觀禮也。主人再拜，賓答拜。主人退，賓拜送。退，去也，歸也。○疏曰：按《鄉飲酒》：「主人戒賓，賓拜辱，主人答拜。乃請賓，賓禮辭，許。主人再拜，賓答拜。主人退，賓拜辱。」《鄉射》亦然，皆與此文不同。此經文不具，當依

彼文爲正。但此不言拜辱者，亦是不爲賓已故也。

右戒賓。○辭：戒賓曰：「某有子

某，將加布於其首，願吾子之教之也。」吾

子，相親之辭。吾，我也。子，男子之美稱。古文「某」

爲「謀」。○稱，尺證反，下「之稱」、「美稱」同。○疏

曰：布，謂緇布冠也。賓對曰：「某不敏，恐不

能共事，以病吾子，敢辭。」共，音恭。○病，猶

辱也。古文「病」爲「秉」。主人曰：「某猶願吾

子之終教之也。」賓對曰：「吾子重有命，

某敢不從。」重，直用反，下同。○敢不從，許之辭。

○疏曰：周公設經，直見行事，恐失次第，不言其辭。

今行事既終，乃總見之也。○今按：諸辭本總見經後，

故疏云爾。今悉分附本章之左，以從簡便。

前期二日，筮賓，如求日之儀。前期三日，

筮賓，筮其可使冠子者，賢者恒吉。《冠義》

曰：「古者冠禮，筮日筮賓，所以敬冠事。敬冠事所以重

禮，重禮所以爲國本。」○疏曰：前期三日，謂正加冠日之

前空二日之外也。「筮賓」者，謂於前所戒賓之中筮取吉者爲加冠之正賓也。凡取人之法，宜先筮之，今以其賢恒白吉，<sup>①</sup>故先戒而後筮。然既知其賢，又必筮之者，取其慎重冠禮事，故鄭引《冠義》爲證也。又命筮雖無文，宰贊蓋云：主人某爲適子某加冠，筮某爲賓，庶幾從之。上章筮日與此皆不言命辭者，文不具也。○今按：前已廣戒衆賓，此又擇其賢者筮之，吉則宿之以爲正賓，不吉則仍爲衆賓，不嫌於預戒也。

### 右筮賓。

乃宿賓，賓如主人服，出門左，西面再拜，主人東面答拜。宿，進也。宿者必先戒，戒不必

宿。其不宿者爲衆賓，或悉來或否。主人朝服。○爲，于

僞反。○疏曰：此云「乃宿賓」，謂擯者傳主人辭人以告賓

也。又曰「宿者必先戒」，若上文已戒賓，今又宿之也。「戒

不必宿」，即所戒之賓除正賓及贊冠者外，但戒使知之而

已，後更不宿也。<sup>②</sup>云「不宿者爲衆賓或來或否」者，此決

①「自」，原作「日」，據元明本、寬文本、賀本改。

②「後」，原作「從」，據元明本、寬文本、賀本改。



正賓與贊冠者戒而又宿，不得不來也。知「朝服」者，自上章朝服筮日至此無改服之文故也。○今按：此云「宿賓」，言主人往而宿之，以目下事，<sup>①</sup>如篇首言筮日于席門，後亦多有此例也。主人方往宿時，擯者固當入告，然此言乃爲主人發，不爲擯者發也。又按：「不宿者爲衆賓或悉來或否」，鄭注本謂正賓或時不來，則將不得成禮，故雖已戒之而又宿之，欲其必來。其非正賓則不更宿，蓋但使爲衆賓，雖不悉來，亦無闕事也。<sup>②</sup>疏與音皆非是，「爲」只合作如字讀，「賓」字句絕。乃宿賓，賓許，主人再拜，賓答拜。主人退，賓拜送。乃宿賓者，親相見，致其辭。宿贊冠者一人，亦如之。贊冠者，佐賓爲冠事者，謂賓若他官之屬，中士若下士也。宿之以筮賓之明日。○疏曰：佐賓爲輕，故不筮也。言中士、下士者，<sup>③</sup>據主人與賓皆是上士也，贊者皆降一等取之。若賓主皆是下士，則亦取下士爲之，禮窮則同也。○今按：佐賓雖輕，亦必擇其賢而習禮者爲之，不來則亦有闕，故并宿之，使必來也。

右宿賓。○辭：宿曰：「某將加布於

某之首，吾子將蒞之，敢宿。」賓對曰：「某敢不夙興。」蒞，音利。○蒞，臨也。今文無「對」。

厥明夕，爲期于廟門之外。主人立于門東，兄弟在其南，少退，西面北上。有司皆如宿服，立于西方，東面北上。厥，其也。宿服，朝服。○疏曰：「厥明夕」，謂宿賓贊之明日向莫時也。「爲期」，爲加冠之期也。擯者請期，宰告曰：「質明行事。」擯，必勿反。○擯者，有司佐禮者，在上人曰擯，在客曰介。質，正也。宰告曰：旦日正明行冠事。○介，音界。告兄弟及有司，擯者告也。○疏曰：上文兄弟有司皆已在位，此復告者，禮取審慎之義也。告事畢，宗人告也。擯者告期于賓之家。

右爲期。

夙興，設洗，直于東榮，南北以堂深。水在洗東。直，音值。深，申鳩反，凡度淺深曰深，後並放此。○夙，早也。興，起也。洗，承盥洗者棄水器也，士用

①「目」，原作「自」，據元明本、寬文本、賀本改。  
②「闕」，原作「門」，據元明本、寬文本、賀本改。  
③「下」，原作「上」，據元明本、寬文本、賀本改。

鐵。榮，屋翼也。周制，自卿大夫已下，其室爲夏屋。水器，尊卑皆用金疊，及大小異。○盥，音管。夏，戶雅反，後同。疊，力回反。○疏曰：洗者，盥手洗爵之時，恐水穢地，所以承其棄水之器也。「士用鐵」，漢制也，大夫則用銅，諸侯用白銀，天子用黃金也。榮，即今之搏風。謂之榮者，言與屋爲榮飾。又言翼者，與屋爲翅翼也。「夏屋」者，《匠人》：「夏后氏世室，殷人重屋，四阿。」鄭云：四阿，四注。殷人始爲四注，則夏后重屋但兩下爲之，不四注矣，故兩下屋名爲夏屋。而鄭注《檀弓》又曰：「夏屋，今之門廡也。」兩下爲之。亦舉漢制以況之也。又曰：卿大夫以下，其室兩下，而周之天子，諸侯皆四注。故《燕禮》之洗「當東雷」，鄭以爲「人君爲殿屋」；《喪大記》「升自東榮」，鄭以爲天子諸侯當言東雷也。金疊，亦漢制。然經直言水不言疊，唯《少牢》云「設疊水於洗東，有料」，鄭注云：「設水用疊，沃盥用料，禮在此也。」此經之內或有尊無洗，或尊洗皆有而又不言設之者，文不具也。○今詳：注文「疊」下「及」字恐誤。陳服于房中西墉下，東領北上。墉，牆。○疏曰：冠時先用卑服。北上，使也。爵弁服，纁裳，純衣，緇帶，韎韐。纁，許云反。韎，音妹，又毋

八反。韐，古洽反，又音閣。○此與君祭之服，《雜記》曰：「士弁而祭於公。」爵弁者，冕之次，其色赤而微黑，如爵頭然，或謂之緇，其布三十升。纁裳，淺絳裳。凡染絳，一人謂之纁，再入謂之緇，三人謂之纁，朱則四人與？純衣，絲衣也，餘衣皆用布，唯冕與爵弁服用絲耳。先裳後衣者，欲令下近緇，明衣與帶同色。韎韐，緇韐也。士緇韐而幽衡，合韋爲之。士染以茅蒐，因以名焉。今齊人名韐爲韎韐。韐之制似韐。冠弁者不與衣陳，而言於上，以冠名服耳。今文「纁」皆作「熏」。○纁，七絹反。染，如琰反。下二字同。頰，且貞反。令，力呈反。近，附近之近。緇，音溫，又烏本反。韐，音弗。幽，於糾反。茅，芒交反，又音妹。蒐，所留反。韐，七見反。○疏曰：士禮，玄端自祭，以爵弁服助君祭，故云與君祭之服也。凡冕以木爲體，長尺六寸，廣八寸，以三十升麻布衣之，上玄下纁，前後有旒，低前一寸二分，故取其俛而謂之冕。其爵弁制大同，唯爲爵色而無旒，又前後平，故不得爲冕，而其尊卑則次於冕也。用布升數，蓋取冠倍之義，朝服十五升，故其冕爲三十升也。染絳之法，見《爾雅》。三染皆爲淺絳。四人爲朱，毛傳乃謂之深纁。至五人爲緇，七人爲緇，爲染黑法，乃見於《考工記》。蓋以纁入黑則爲紺，以紺入黑則爲緇，是其色亦多而

黑少，故以爵頭爲喻也。「朱則四人與」者，蓋言以纁入赤則爲朱，以無正文，故「與」以疑之也。鄭解「純」字或爲「絲」，或爲「緇」者，古「緇」字以才爲聲，故「緇」、「紂」二字並行，而「紂」多誤爲「純」，鄭皆望經爲注也。韋者，韋旁著合，故謂「合韋爲之」，又以韋染之，故曰韋韋也。韋制已見上注，韋亦如之，但有飾，無飾爲異耳。《明堂位》云：「有虞氏服韋，夏后氏山，殷火，周龍章。」鄭云：「後王彌飾，天子備焉。諸侯火而下，卿大夫山，士韋而已。」是士無飾，不得單名韋，一名韋韋，一名韋韋，故鄭云「韋之制似韋」也。鄭《詩》注曰「韋，天子純朱，諸侯黃朱，士緇韋」者，《玉藻》文也。皮弁服，素積，緇帶，素鞶。此與君視朔之服也。皮弁者，以白鹿皮爲冠，象上古也。積，猶辟也，以素爲裳，辟蹙其要中。皮弁之衣用布亦十五升，其色象焉。○辟，必亦反，下同。要，一遙反。○疏曰：《玉藻》云：「諸侯皮弁，聽朔於太廟。」象上古「者，謂三皇時以白鹿皮冒覆頭，鉤領遠項，所謂「未有麻絲，衣其羽皮」者。素，白繒也。《喪服》注云：「祭服、朝服，辟積無數。」唯喪服裳幅三衽有數耳。玄端，玄裳，黃裳，雜裳可也；緇帶，爵鞶。此莫夕於朝之服。玄端即朝服

之衣，易其裳耳。上士玄裳，中士黃裳，下士雜裳。雜裳者，前玄後黃。《易》曰：「夫玄黃者，天地之雜也，天玄而地黃。」士皆爵韋爲鞶，其爵同。不以玄冠名服者，是爲緇布冠陳之。《玉藻》曰：「鞶，君朱，大夫素，士爵韋。」○莫，音暮。朝，直遙反。夫玄之夫，音扶。○疏曰：以其但正幅，故得端名。言「莫夕於朝之服」者，《玉藻》大夫士朝玄端，謂所以聽其家私朝之服也。士向莫之時，又以此服夕於君所，其卿大夫之夕於君，則自當朝服也。然《左傳》云：「百官承事，朝而不夕。」則無事時亦可不夕也。「朝服之衣」者，指上章筮日之朝服。「易其裳」者，彼素裳而此易以三等之裳也。所引《玉藻》之文，彼注以爲玄端之鞶，鞶同裳色。士裳三等，爵亦雜色，故同用之。若然，則大夫之玄端素鞶，則當爲素裳，乃與朝服不異，禮窮則同也。又曰：不言革帶者，大帶所以束衣，革帶所以繫鞶及佩，舉鞶則有革帶可知，故略不言也。○今詳：注「其爵同」三字未詳。緇布冠缺項，青組纓屬于缺；緇纁，廣終幅，長六尺；皮弁筮；爵弁筮；緇組紃，纁邊；同篋。缺，依注音類，去藥反，又音跬，又屈絹反。項，於講反。組，音祖。屬，章玉反，注同。纁，山買反，舊

山綺反。筭，音雞。紘，音宏。篋，苦協反。○缺，讀如有頰者弁之頰。緇布冠，無筭者，著頰，圍髮際，結項中，隅爲四綴，以固冠也。項中有繩，亦由固頰爲之耳。今未冠筭者著卷幘，頰象之所生也。滕，薛名齒爲頰。屬，猶著。纁，今之幘梁也。終，充也。纁，一幅長六尺，足以幘髮而結之矣。筭，今之簪。有筭者屈組爲紘，垂爲飾。無筭者纁而結其條。纁邊，組側赤也。同篋，謂此以上凡六物。隋方曰篋。○「著頰」、「著卷」之著，丁略反。綴，丁衛反。緇，紀屈反。卷，去圓反。齒，古內反。猶著之著，直略反。幘，本作「𦏧」，土刀反。簪，側金反。上，時掌反。隋，他果反，狹而長。○疏曰：頰、項，注皆無正文，約漢制及以義言之耳。云「結項中」，謂於項上結之也。云「隅爲四綴以固冠」者，既武以下別有頰項，明於首四隅爲綴，上綴於武，然後頰項得安穩也。云「項中有繩，亦由固頰爲之」者，頰之兩頭皆爲繩，別以繩穿繩中結之，然後頰得牢固也。漢時卷幘之狀，今不審知，必以布帛圍繞髮際爲之也。云「纁，今之幘梁」，亦舉漢法以況，至今久遠，亦未審其狀也。既云幘髮，又云結之，則是幘訖乃爲紘也。二弁之筭，天子、諸侯用玉，大夫、士用象，有筭謂之弁。「屈組爲紘」者，謂以一條組於左筭上繫定，繞頤下右相向上，仰屬於筭屈

繫之，有餘則因垂爲飾。必屈繫者，擬解時易爲繫屬之也。「無筭」，謂緇布冠。「纁而結其條」者，條即組也，謂以二條組爲纁，兩相屬於頰而下垂，乃於頤下結之也。「組赤側」者，以緇爲中，以纁爲邊側而織之也。「六物」，謂頰項青組纁爲一物，纁爲二物，二弁，筭，紘各一，通爲六物也。隋，謂狹而長也。櫛實于簪。櫛，莊乙反。簪，音丹。○簪，筭也。○筭，音嗣。○疏曰：鄭注《曲禮》云「圓曰簪，方曰筭」，而此云一物者，舉其類也。蒲筵二，在南。筵，席也。○疏曰：二者，一冠一體也。側尊一甌，醴，在服北。有筐實勺、觶、角、枬，脯醢，南上。甌，亡甫反。筐，方尾反。勺，上若反。觶，之豉反。枬，音四。醢，音海。○側，猶特也，無偶曰側。置酒曰尊。側者，無玄酒。服北者，纁裳北也。筐，竹器如簠者。勺，尊升所以斟酒也。爵三升曰觶。枬，狀如匕，以角爲之者，欲滑也。南上者，筐次尊，籩豆次筐。古文「甌」作「廡」。○簠，力呈反。簠，九于反，又音拘，挹也。廡，音武。○疏曰：勺，即《少牢》所謂料也。《韓詩外傳》曰：「一升曰爵，二升曰觶，三升曰觥，四升曰角，五升曰散。」對文有異，散文則通，故鄭以爵名觥也。爵弁、皮弁、緇布冠各

一匱，執以待于西坫南，南面東上。賓升則東面。匱，素管反。坫，丁念反。○爵弁者，制如冕，黑色，但無纁耳。《周禮》：「王之皮弁，會五采玉珎，象邸，玉笋。諸侯及孤卿大夫之冕，皮弁，各以其等爲之。」則士之皮弁又無玉象邸飾。緇布冠，今小吏冠其遺象也。匱，竹器名，今之冠箱也。執之者，有司也。坫在堂角。古文「匱」爲「簋」，「坫」爲「檐」。○纁，音早。珎，音其。邸，丁禮反。簋，素管反，又音纂。檐，以占反。○疏曰：上文直舉冠以表服，冠實不陳，故彼注略而此注詳也。爵弁，制已見上。纁，合五采絲爲繩，垂於延之前後，以貫旒玉者也。會，縫中也。珎，讀如綦，謂結也。皮弁之縫中每貫結五采玉十有二以爲飾。邸，下抵也，以象骨爲之，各以其等，見《周禮》注中，此不備載者，但欲見士之皮弁無玉象之飾耳。緇布冠，士爲初加之冠，冠訖則敝之不用，庶人則常著之，故《詩》云「臺笠緇撮」，是庶人以布冠常服者。以漢之小吏亦常服之，故舉爲況也。「坫在堂角」者，坫有二文，若《明堂位》云「崇坫」、《論語》云「反坫」，則在廟中，以九圭反爵。此所言者，則據堂角爲名耳。屨，夏用葛。玄端黑屨，青絢纁純，純博寸。屨，九具反。絢，其于反。

纁，于力反。純，章允反。○屨者順裳色，玄端黑屨，以玄裳爲正也。絢之言拘也，以爲行戒，狀如刀衣鼻，在屨頭，纁，縫中紉也，純，緣也。三者皆青。博，廣也。○縫，扶用反。紉，音旬。緣，以絹反。○疏曰：「屨順裳色」者，禮之通例，衣與冠同，屨與裳同也。「以玄裳爲正」者，以上士之服爲正，不取下二等也。「絢爲行戒」者，以拘者自拘持之意也。「縫中紉」，謂牙底相接之縫中有條紉也。緣，謂繞口緣邊也。博寸，謂純之廣也。素積白屨，以魁柎之，緇絢纁純，純博寸。魁，苦回反。柎，方于反。○魁，蜃蛤。柎，注也。○蜃，上忍反。蛤，音閤。○疏曰：魁即蜃蛤，一物也，煨爲炭灰用之。柎，注，謂塗注於上使色白也。爵弁纁屨，黑絢纁純，純博寸。爵弁屨以黑爲飾，爵弁尊，其屨飾以纁次。○纁，戶內反。○案《冬官》畫纁之事云：①青與白相次，赤與黑相次，玄與黃相次。鄭云：「此言畫纁六色所象及布采之第次，纁以爲衣。」又云：「青與赤謂之文，赤與白謂之章，白與黑謂之黼，黑與青謂之黻。」鄭云：「此言刺繡采所用，繡以爲裳。」

①「案」上，賀本有「疏曰」二字。

此是對方爲續次，比方爲繡次。按鄭注《屨人》云：「複下曰舄，禪下曰屨。」又注云：「凡舄之飾如續之次，凡屨之飾如繡之次也。」者，即上黑屨以青爲絢總純，白屨以黑爲絢總純，則白與黑、黑與青爲繡次之事也。今次爵弁繡屨，繡，南方之色赤。不以西方白爲絢總純，而以北方黑爲絢總純者，取對方續次爲飾。舉舄者，尊爵弁是祭服，故飾與舄同也。冬，皮屨可也，疏曰：冬時寒，許用皮，故曰「可也」。春宜從夏，秋宜從冬，舉冬、夏者，以寒暑極時爲言也。不履總屨。總，音歲。○總屨，喪屨也。縷不灰治曰總。○疏曰：《喪服》有「總衰四升有半」，明總屨亦是喪屨。又斬衰冠六升，傳曰「鍛而勿灰」，則總衰四升半不灰可知。言此者，見大功未可以冠子，恐人遂以冠子，故於屨末因禁之也。三屨不與服同陳者，屨在下，不宜與服同列也。○今按：此三屨以下本在辭後記前，今移附此。然經既不言屨所陳處，注疏亦無明文，疑亦在房中，故既加冠而適房改服，即得并易屨而出也。但不知的在何處，疑服既北上，則或各在其裳之南也。

### 右陳器服。

主人玄端爵韠，立于阼階下，直東序，西

面。阼，才故反。○玄端，士人廟之服也。阼，猶酢也。

東階，所以答酢賓客也。堂東西牆謂之序。○酢，才各反。

○疏曰：《特牲》士禮祭服用玄端，此亦士之加冠在廟，故與祭同服。直，當也，謂當堂上東序牆也。兄弟畢袵

玄，立于洗東，西面北上。袵，之忍反，又之慎反，

又音真。○兄弟，主人親戚也。畢，猶盡也。袵，同也。玄

者，玄衣、玄裳也，緇帶韠。位在洗東，退於主人。不爵韠者，降於主人也。古文「袵」爲「均」也。○疏曰：玄衣玄裳

而緇帶韠，是同玄也。主人當東序，洗當東榮，兄弟又在洗東，是退於主人也。○今按：「袵」，古文作「均」，而鄭注訓

同，《漢書》字亦作「杓」，則是當從「均」、「杓」爲是矣。但疏乃云當讀如《左傳》「均服振振」一也，則未知其以「袵」字爲

「均」耶，抑以「袵」音爲「振」也？《集韻》又釋「杓」爲「戎衣偏袷」，今亦未詳其義，姑記此以俟知者。擯者玄端，

負東塾。東塾，門內東堂。負之，北面。○疏曰：擯者，

是中士若下士，當服黃裳、雜裳，故別言玄端，不言如主人服也。○今按：三者玄端一也，主人玄裳爵韠，兄弟玄裳

緇韠，擯者黃裳或雜裳而同用爵韠也。將冠者采衣，

紒，在房中，南面。紒，音介。○采衣，未冠者所服。

《玉藻》曰：「童子緇布衣，錦緣，錦紳，并紐，錦束髮，皆朱錦也。」紒，結髮。古文「紒」爲「結」。○緣，以絹反。紐，女

九反。○疏曰：紳，大帶之垂者，并其紐，皆以錦飾之。束

髮，總也。童子尚華，故衣此。○今按：《漢書》「髻」亦作

「結」。又以上下章考之，則房戶宜當南壁東西之中，而將

冠者宜在所陳器服之東，當戶而立也。

### 右即位。

賓如主人服，贊者玄端從之，立于外門

之外。外門，大門外。○疏曰：賓與主人尊卑同，故得同

服。擯者告，告者，出請入告。主人迎，出門左，

西面再拜，賓答拜。左，東也。出以東爲左，人以東

爲右。主人揖贊者，與賓揖，先入。贊者賤，揖之

而已。又與賓揖，先入道之，贊者隨賓。○道，音導。每

曲揖。周左宗廟，入外門，將東曲，揖。直廟，將北曲，又

揖。○疏曰「周左宗廟」者，《祭義》與《小宗伯》俱有此文，

對「殷右宗廟」也。入大門而東，則主人在南，賓在北，俱東

向，爲一曲。至廟門則主人在東，賓在西，俱北向，爲一曲。

爲當將曲之時，賓主皆相見，故皆一揖。通下將入廟門揖，

爲三也。至于廟門，揖入。三揖，至于階，三

讓。入門將右曲，揖，將北曲，揖，當碑，揖。○碑，彼宜

反。○疏曰：碑是庭中之大節，故宜揖。主人升，立

于序端，西面。賓西序，東面。主人、賓俱升，立

相鄉。○鄉，許亮反，又作「嚮」。○疏曰：不拜至者，冠子

非爲賓客，故異於鄉飲酒之等也。贊者盥于洗西，

升，立于房中，西面南上。盥於洗西，由賓階升也。

立於房中，近其事也。南上，尊於主人之贊者。古文「盥」

皆作「澆」。○近，附近之近。澆，戶管反。○疏曰「盥於洗

西」者，按《鄉飲酒》，主人盥於洗北，南面，賓盥於洗南，北

面：各由其從來之便也。贊亦從外來，但卑，不可與賓並，

故在洗西，東面，又向賓階爲便。注又以其與主贊並立於

房中，恐由階階，故明其同於賓客也。知與主贊並立者，以

言「南上」則非一人，又與主贊俱是執勞役之事者也。近

其事者，以其物皆在房中，故不立於堂上，而先入房並立，

以近其事也。又主人尊敬賓之贊者，故位在南，面西，居上

也。○今詳：贊者西面，則負東墉，而在將冠者之東矣。

## 右迎賓。

主人之贊者筵于東序，少北，西面。主人之贊者，其屬中士若下士。筵，布席也。東序，主人位也。適子冠於阼，少北，辟主人。○適，丁歷反。辟，音避。將冠者出房，南面。南面立于房外之西，待賓命。○疏曰：知在「房外之西」者，以房外之東南當阼階故也。○今按：此疏則阼階切近東序之西，正當房戶之東壁矣。贊者奠纚、笄、櫛于筵南端。贊者，賓之贊冠者也。奠，停也。古文「櫛」爲「節」。○疏曰：前章六物同篋，櫛實於篋，今將用之，故取置席南。不言餘物及篋、簪者，皆來可知也。又凡言主人之贊者，即加「主人」字，今此不言，故知是「賓之贊者也」。賓揖將冠者，將冠者即筵坐，贊者坐，櫛，設纚。即，就。設，施。○疏曰：此二事皆勞役之事，故贊者爲之也。賓降，主人降。賓辭，主人對。主人降，爲賓將盥，不敢安位也。辭對之辭，未聞。○爲，於僞反。賓盥卒，壹揖壹讓，升。主人升，復初位。揖讓皆壹者，降於初。古文「壹」皆

作「一」。○疏曰：初位，東序端也。賓筵前坐，正纚，興，降西階一等。執冠者升一等，東面授賓。正纚者，將加冠宜親之。興，起也。降，下也。下一等，升一等，則中等相授。冠，緇布冠也。○疏曰：按《匠人》：天子之堂九尺，賈、馬以爲傍九等爲階，諸侯堂宜七尺，則七等階，大夫堂宜五尺，則五等階，士宜三尺，則三等階。故鄭以中等解之也。賓右手執項，左手執前，進容，乃祝，坐如初，乃冠，興，復位。贊者卒。祝，之又反。○進容者，行翔而前，鵠焉，至則立祝。坐如初，坐筵前。興，起也。復位，西序東面。卒，謂設缺項，結纓也。○鵠，七良反。○疏曰：「右手執項」，謂冠後耳，非頰項也。翔，謂行而張拱也。「鵠」與「踰」同，容貌舒揚也。冠者興，賓揖之，適房，服玄端爵韞，出房，南面。復出房南面者，一加禮成，觀衆以容體。○復，扶又反。○疏曰：以其去童子之服，著成人之服，使衆觀知也。○今按：觀，示也，宜古喚反。

右始加。○辭：始加，祝曰：「令月吉日，始加元服。今按：諸辭皆當以古音讀之，其



韻乃叶。服，蒲北反。○令，吉，皆善也。元，首也。棄爾幼志，順爾成德。今按：順，占與「慎」通用。壽考惟祺，介爾景福。」祺，音其。福，叶筆肋反。①○爾，女也。既冠爲成德。祺，祥也。介，景，皆大也。因冠而戒，且勸之。女如是則有壽考之祥，大女之大福也。○女，音汝，下同。

賓揖之，即筵坐，櫛，設筭。賓盥，正纁如初。降二等，受皮弁，右執項，左執前，進祝，加之如初，復位。贊者卒紼。如初，爲不見者言也。卒紼，謂繫屬之。○見，賢遍反。屬，音燭。○疏曰：冠者坐訖，當脫纁布冠乃更櫛也。筭有二種：一是紒內安髮之筭，一是冕弁固冠之筭。此未加冠而設筭，明是安髮筭也，纁布冠亦宜有之。彼言設纁而不言設筭，恐與上文兩弁之筭相亂。又此章但言設筭而不言設纁，則亦可互見矣。其皮弁固冠之筭，則賓加弁時自設之可知。云「不見者」，謂上章所有而此章不言者也。興，賓揖之。適房，服素積素鞞，容，出房，南面。容者，再加彌成，其儀益繁。

右再加。○辭：再加曰：「吉月令辰，乃申爾服。服，叶蒲北反。○辰，子且也。申，重也。敬爾威儀，淑慎爾德。眉壽萬年，永受胡福。」福，叶筆勒反。○胡，猶遐也，遠也，遠無窮。古文「眉」作「麋」。

賓降三等，受爵弁，加之，服纁裳、韎韐，其他如加皮弁之儀。降三等，下至地。他，謂卒紼、容、出。徹皮弁、冠、櫛、筵，入于房。徹者，贊冠者、主人之贊者爲之。○疏曰：冠，纁布冠也。爵弁則服之以受禮，見母兄弟姊妹，故不徹也。賓贊者徹櫛，主贊者徹筵，以其先設還遣之也。

右三加。○辭：三加曰：「以歲之正，以月之令，咸加爾服。服，叶蒲北反。○正，猶善也。咸，皆也，皆加女之三服，謂纁布冠、皮弁、爵弁也。兄弟具在，以成厥德。厥，其。黃者無疆，受天之慶。」者，音苟。慶，叶音羌。○黃，

①「肋」，賀本作「勒」。

黃髮也；耆，凍梨也：皆壽徵也。疆，竟。○竟，音敬，又音景。○疏曰：「黃髮」，白而復黃也。「凍梨」，面如凍梨之色也。

筵于戶西，南面。筵，主人之贊者。戶西，室戶

西。贊者洗于房中，側酌醴，加枌，覆之，面葉。洗，盥而洗爵者，《昏禮》曰房中之「洗在北堂，直室東隅」。篚在洗東，「北面盥」。側酌者，言無爲之薦者。

面，前也。葉，枌大端。贊酌者，賓尊不入房。古文「葉」爲「揭」。○疏曰：凡洗爵者先盥，此經不具，故注明之。又

引《昏禮》者，明房中有洗，以洗爵也。「無爲之薦」者，言還是此贊者自薦脯醢，無他人也。「面葉」者，贊者面葉授賓，賓得面枌授冠者，冠者得之面葉，扱醴而祭也。賓揖，

冠者就筵，筵西，南面。賓受醴于戶東，加枌，面枌，筵前北面。枌，彼命反。○戶東，室戶東。

今文「枌」爲「柄」。○疏曰：以冠者在室戶西，賓自至房戶取醴，贊者酌醴出向西授賓也。冠者筵西拜受觶，

賓東面答拜。筵西拜，南面拜也。賓還答拜於西序之位。東面者，明成人與爲禮，異於答主人。○疏曰：「異於

答主人」者，按《鄉飲酒》，賓於西階上北面答主人拜。薦脯醢，贊冠者也。冠者即筵坐，左執觶，右祭脯醢，以枌祭醴三，興。筵末坐，啐醴，捷枌興。降筵坐，奠觶，拜，執觶興。賓答拜。啐，七內反。捷，初洽反，又作「插」，又作「扱」。○捷枌，扱枌於醴中。其拜皆如初。古文「啐」爲「呼」。○疏曰：「祭醴三」者，如《昏禮》始扱一祭，又扱再祭也。此啐醴不拜既爵者，以其不卒爵故也。

右醴冠者。今按：醴，依下章注當作「禮」，謂

以醴禮之也。

○醴辭曰：「甘醴惟厚，嘉薦令芳。嘉，善也。善薦，謂脯醢芳香也。拜受祭之，

以定爾祥。承天之休，壽考不忘。」休，美也。不忘，長有令名。

冠者奠觶于薦東，降筵，北面坐，取脯，降自西階，適東壁，北面見于母。見，賢遍反，下及注，入見，「如見」，「見于君」，「贊見」與「見姑」，「見母」

① 「面」，原作「西」，據寬文本、賀本改。

同。○薦東，薦左。凡奠爵，將舉者於右，不舉者於左。適東壁者，出闔門也。時母在闔門之外，婦人入廟由闔門。○闔，音韋，宮中小門也。○疏曰：「薦左」，據南面爲正也。「將舉」者，謂若《鄉飲酒》、《鄉射》是也。「不舉」者，此章及《昏禮》醴婦是也。闔門，見《雜記》，彼注云：「宮中之門曰闔門，爲相通者」是也。母拜受，子拜送，母又拜。婦人於丈夫，雖其子猶俠拜。○俠，古浹反。

### 右冠者見母。

賓降，直西序，東面。主人降，復初位。初位，初至階讓升之位。冠者立于西階東，南面，賓字之，冠者對。對，應也。其辭未聞。○應，應對之應。○疏曰：《冠義》云：「冠而字之，成人之道也。」見於母，母拜之，似字訖乃見母，其實未字先見母，既字乃見兄弟，急於母，緩於兄弟也。記人以下有兄弟之等皆拜之，故退見母於下，使文近也。

### 右字冠者。○字辭曰：「禮儀既備，

令月吉日，備，叶筆力反。昭告爾字。爰字孔嘉，字，叶音滋。嘉，叶居之反。○昭，明也。爰，於

也。孔，甚也。髦士攸宜。宜之于假，假，占雅反，叶音古。○髦，俊也。攸，所也。于，猶爲也。假，大也。宜之，是爲大矣。○今按：「假」恐與「嘏」同，福也，注說非是。永受保之，曰伯某甫。」仲、叔、季，唯其所當。伯、仲、叔、季，長幼之稱。甫，是丈夫之美稱，孔子爲尼甫，周大夫有嘉甫，宋大夫有孔甫，是其類。甫，字或作「父」。○長，丁丈反。父，音甫。○疏曰：「某甫」者，若云尼甫、嘉甫也。伯、仲、叔、季，若兄弟四人，則依次稱之。逾其數者，<sup>①</sup>夏、殷質，則積仲；周文，則積叔，若管叔、蔡叔是也。殷質，二十造字之時，便兼伯、仲、叔、季稱之。周文，造字時未呼伯仲，至五十乃加而呼之，故《檀弓》云：「幼名，冠字，五十以伯仲，周道也。」若孔子始冠但字尼甫，至年五十乃稱仲尼是也。○今按：《檀弓》孔疏云：「人年二十，冠而加字，如曰伯某甫者。年至五十，耆艾轉尊，則又舍其某字而直以伯仲別之。與此賈疏不同，疑孔說是。」

賓出，主人送于廟門外。不出外門，將醴之。

①「逾其數者」四字，原脫，據賀本補。

請醴賓，賓禮辭，許，賓就次。此「醴」當作「禮」，禮賓者，謝其自勤勞也。次，門外更衣處也，以帷幕簾席爲之。○處，昌慮反。○疏曰：此當爲上於下之禮，不得以用醴之故，便名曰醴。如周禮，天子禮諸侯用鬯，亦不名爲鬯賓，故鄭破醴爲禮也。次者，舍之名。云「更衣處者，以行禮衣服或與常服不同，故須人次更易也。《聘禮》云「次以帷」，《周禮》注云帷「以布爲之」，此士卑，故或用簾席也。○今按：醴冠者章言醴者，皆指其物而言，故注不改字。此醴與醴冠者之醴同義，故改之。下章醴賓亦此義，故不重出。

### 右賓出就次。

冠者見于兄弟，兄弟再拜，冠者答拜。見贊者，西面拜，亦如之。見贊者西面拜，則見兄弟東面拜，贊者後賓出。○後，戶豆反。○疏曰：兄弟位在東方，贊者則賓之類，故東面也。「亦如之」者，言贊者先拜而冠者答之也。贊者後出，亦當就次待禮也。人見姑姊，如見母。人，人寢門也，廟在寢門外。如見母者，亦北面，姑與姊亦俠拜也。不見妹，妹卑。

右冠者見兄弟姑姊。疏曰：不見父與賓者，蓋冠畢則已見可知，故不言。

乃易服，服玄冠、玄端、爵韠，奠摯見于君，遂以摯見于鄉大夫、鄉先生。摯，亦作「贊」，音至。○易服不朝服者，非朝事也。摯，雉也。鄉先生，鄉中老人爲卿大夫致仕者。○疏曰：以爵弁是助祭之服，不可服見君與先生等，故易服也。玄端則兼玄冠矣，今更言者，以初冠時服玄端爲加緇布冠之服，緇布冠，冠而弊之，故易玄冠，以配玄端也。鄉先生，即《鄉飲》所謂先生，《書傳》所謂父師也，亦有士之少師。鄭以經但言鄉大夫，故略不言也。

### 右奠摯於君及鄉大夫、鄉先生。

乃醴賓以壹獻之禮。壹獻者，主人獻賓而已，即燕無亞獻者。獻，酢、酬，賓、主人各兩爵而禮成。《特性》、《少牢饋食》之禮獻尸，此其類也。士禮一獻，卿大夫三獻。禮賓不用柶者，沛其醴。《內則》曰：「飲，重醴清糟，稻醴清糟，黍醴清糟，梁醴清糟。」凡醴事，賓者用糟，文者用清。○少，詩照反。沛，子禮反。糟，子曹反。○疏曰：此「醴」亦當爲「禮」，文不具也。《特性》、《少牢》主人

獻尸，主婦亞獻，爲二獻，此則主人獻賓而已，故無亞獻。《鄉飲酒》未有燕，<sup>①</sup>故知獻後有燕。主人獻賓，賓酢主人。主人將酬賓，先自飲訖乃酬賓，賓奠而不舉，是賓、主人各兩爵而禮成也。《昏禮》舅姑饗婦以一獻之禮，婦酢舅而奠酬，是備有酬酢也。《特牲》、《少牢》各一爵而有亞獻，此賓、主各兩爵而無亞獻，雖少不同，義類同也。「士禮一獻」者，《左傳》季孫宿云「得貺不過三獻」，又《郊特牲》云「三獻之介」，亦謂卿大夫也。《大行人》云：「上公九獻，侯伯七獻，子男五獻。」是以大夫三獻，士一獻，此其差也。「體賓不用柶者，沛其體」者，體子則不沛，故用柶也。飲，目諸飲也。重，倍也。糟，醇也。清，沛也。致飲有此二種，皆重設之，稻醴以下是也。「質者用糟」，謂若體子之類是也。○今按：注不言改字，說見上，非不具也。主人酬賓，束帛、儷皮。儷，音麗。○飲賓客而從之以財貨曰酬，所以申暢厚意也。束帛，十端也。儷皮，兩鹿皮也。古文「儷」爲「離」。○飲，於鳩反。○疏曰：凡酬幣之法，尊卑獻數多少不同。及其酬幣，唯於奠酬之節一行而已。《春秋》：「秦后子出奔晉，享晉侯，歸取酬幣，終事八反。」杜注云：「備九獻之儀，始禮自齋其一，故續送其八酬酒幣。」彼

九獻之間皆有幣，春秋之代奢侈之法，非正禮也。贊者皆與，贊冠者爲介。與，音預。○贊者，衆賓也。皆與，亦飲酒爲衆賓。介，賓之輔，以贊爲之，尊之。飲酒之禮，賢者爲賓，其次爲介。○今詳：贊者，謂主人之贊者也，恐字誤作「衆賓」耳。賓出，主人送于外門外，再拜，歸賓俎。一獻之禮，有薦有俎，其牲未聞。使人歸諸賓家也。

右體賓。今按：此章以上，正禮已具，以下皆禮之變。

若不醴，則醕用酒。醕，子召反。○若不醴，謂國有舊俗可行，聖人用焉不改者也，《曲禮》曰「君子行禮，不求變俗」。祭祀之禮，居喪之服，哭泣之位，皆如其國之故，謹修其法而審行之是也。酌而無酬酢曰醕。醴，亦當爲「禮」。○疏曰：上文適子冠於阼，三加訖，一醴於客位者，周法也。此不醴而醕用酒者，夏、殷法也。「酌無酬酢曰醕」，唯據此文而言。醴亦無酬酢而不名醕者，醴是太

①「末」，賀本作「未」。

古之物，質，宜無酬酢。酒則宜有酬酢，故以其無酬酢而名醕，取醕盡之義也。○今按：不醕而醕，乃當時國俗不同有如此者，如魯、衛之幕有繆布，祔有離合，皆周禮，自不同，未必夏、殷法也。記注所云，若以杞、宋二代之後及他遠國未能純用周禮者言之，則或可通，然亦未有明文可考也。此注又言改字者，上下文異，故須別出也。尊于房

戶之間，兩甌，有禁。玄酒在西，加勺，南枋。

房戶間者，房西、室戶東也。禁，承尊之器也。名之爲禁者，因爲酒戒也。玄酒，新水也，雖今不用，猶設之，不忘古也。○疏曰：上文醕不言禁者，醕非飲醉之物，故不設戒也。此用酒，酒是可飲之物，恐醉，因而禁之，故云「因爲酒戒」。上古無酒，今雖有酒，猶設之，是「不忘古也」。洗，

有筐在西，南順。洗，庭洗，當東榮，南北以堂深。

筐，亦以盛勺，陳於洗西。南順，北爲上也。○盛，音成。

○疏曰：用醕之時，醕尊在房，故洗亦在房。今醕用酒，與常飲酒同，故洗亦當在庭。北爲上者，席據識之先後爲首尾。此筐亦云上者，應亦有記識爲上下也。始加，醕用脯醢。賓降，取爵于筐，辭降如初。卒洗，

升酌。始加者，言一加一醕也。加冠於東序，醕之於戶

西，同耳。始醕亦薦脯醢。賓降者，爵在庭，酒在堂，將自酌也。辭降如初，如將冠時降盥，辭主人降也。凡薦出自東房。○疏曰：「將自酌」者，決前用醕時，贊者酌以授賓，賓不親酌，此則賓親酌酒洗爵，故有升降也。○今按：「始

加」二字，乃疊見前始加緇布冠一章之禮。「醕用脯醢」，乃題下事，其實賓答拜後乃薦之也。賓升酌時，冠者猶在出房南面之位。冠者拜受，賓答拜如初。贊者筵於

戶西，賓升，揖冠者就筵，乃酌，冠者南面拜受，賓授爵，東面答拜，如醕禮也。於賓答拜，贊者則亦薦之。冠者升

筵坐，左執爵，右祭脯醢，祭酒，興。筵末坐，啐酒，降筵拜。賓答拜。冠者奠爵于薦東，立于筵西。冠者立俟賓命，賓揖之，則就東序之筵。○

疏曰：此與用醕行事一同，但立於席西爲異耳。俟賓命者，爲更加皮弁也。○今按：此正醕禮也，下兩醕及後章三醕，凡言如初者，皆謂如此禮也。徹薦、爵，筵尊不徹。徹薦與爵者，辟後加也。不徹筵尊，加可相因，由便也。○使，婢面反。○疏曰：下文云，加皮弁，如初儀。

再醺，攝酒，其他皆如初，是除酒相因外，薦爵皆更設而後加，卒設於席前，故云「辟後加也」。

加皮弁，如初儀。

再醺，攝酒，其他皆如初。攝，猶整也。整酒，謂撓

之。今文「攝」爲「聶」。○撓，奴高反。聶，女輒反。○疏

曰：撓，謂撓攪添益整頓，示新也。一醺徹脯醢，爲辟再醺

之脯醢。至再醺，不言徹脯醢者，以三醺上唯加俎，不加籩

豆，故不徹薦，直徹爵而已。祝辭三醺不言嘉薦，直言籩

豆，是明文也。○今按：此「如初儀」者，如前再加一章之

儀也，下條放此。「再醺，攝酒，其他皆如初」，言唯攝酒異

於始醺，其他皆如之也。加爵弁，如初儀。三醺，

有乾肉折俎，噲之，其他如初。折，之設反。噲，

才計反。○乾肉，牲體之脯也。折其體以爲俎。噲，嘗之。

○疏曰：噲，謂至齒嘗之。按：下「若殺」再醺不言攝，<sup>①</sup>此

經再醺言攝，三醺不言攝，則再醺之後皆有攝，互文以見義

也。又《周禮·膳人》鄭注云：「大物解肆乾之謂之乾肉，

若今梁州烏翅矣。薄析曰脯，捶之而施薑桂曰股脩。」若

然，乾肉與脯脩別。言若今梁州烏翅者，<sup>②</sup>或爲豚解而七

體以乾之，謂之乾肉，及用之將升於俎，則節折爲二十一

體，故總名「乾肉折俎」也。○陳祥道曰：肱骨三：肩、臂、

肱也。<sup>③</sup>股骨三：肱、胛、股也。脊骨三：正脊、挺脊、橫脊

也。胛骨三：代脊、長脊、短脊也。正脊之前則肱也，肱之

上則髀也。然則左右肱之肩、臂，肱與左右股之肱、胛、股

而爲十有二，脊骨三，與左右肱骨六而爲九。<sup>④</sup>二股正祭

不薦於神尸主人之俎，兩髀不升於主人主婦之俎，肱不升

於吉祭之俎，則祭之所用者，去髀、肱而二十有一，去二股

而爲十九矣。《國語》曰：「禘郊之事，則有全胙。王公立

飫，有房胙，親戚燕飲，有般胙。」則全胙，豚解也，房胙，體

解也，般胙，骨折也。《士喪禮》特豚四髀去蹄，兩肱脊，

《既夕》鼎實，羊左肱，亦如之。然則四髀者殊左右肩、髀而

爲四，<sup>⑤</sup>又兩肱一脊而爲七，<sup>⑥</sup>此所謂豚解也。若夫正祭，

則天子、諸侯有豚解、體解。《禮運》曰：「腥其俎，熟其般

體其犬、豕、牛、羊。」腥其俎謂豚解而腥之爲七體，熟其般

①「下」，原作「不」，據元明本、寬文本、賀本及下文改。

②「若」，原作「之」，「鳥」，原作「鳥」，據元明本、寬文本、賀本改。

賀本改。

③「肩」，原作「肱」，據元明本、寬文本、賀本改。

④「肱」，原作「股」，據元明本、寬文本、賀本改。

⑤「肩」，原作「有」，據元明本、寬文本、賀本改。

⑥「肱」，原作「肱」，據元明本、寬文本、賀本改。

謂解之爛之爲二十一體是也。大夫、士有體解無豚解，以其無朝踐獻腥之禮故也。○今按：豚解之義，陳說得之。二十一體，則折脊爲三：曰正脊，曰脰脊，曰橫脊，兩肋各三：曰代脊，曰長脊，曰短脊，凡六；兩肱各三：曰肩，曰臂，曰臑，凡六；兩股各三：曰髀，曰肫，曰胙，凡六，通爲二十一體。凡牲與腊，方解剖時皆是如此，但牲則兩髀以賤而不升於正俎耳。故《少牢》禮具列自髀以下凡二十一體，但髀不升耳，而鄭氏注云「凡牲體之數備於此」。初不及他體也，況此言腊則又不殊賤也。而《周禮·內饗》及此經《昏禮》兩疏皆言二十一體，乃不數兩髀而不計其數之不足，蓋其疏略。至《少牢》疏及陳祥道，乃去髀而以兩股足之，蓋見此經後篇猶有脰及兩股可以充數，然欲盡取之，則又衍其一，故獨取兩股而謂脰非正體。若果如此，則股亦非正體，又何爲而取之耶？此其爲說雖巧而近於穿鑿，不可承用。○又按：初儀見上，三醢唯攝酒及有乾肉折俎臠之爲異，其它皆如始醢也。北面取脯，見于母。

右醢。○醢辭曰：「旨酒既清，嘉薦

亶時。亶，丁但反。時，一作「肯」。○亶，誠也。古文「亶」爲「瘡」。○瘡，丁但反。始加元服，兄弟具

來。孝友時格，永乃保之。」來，叶力之反。

○善父母爲孝，善兄弟爲友。時，是也。格，至也。永，長也。保，安也，行此乃能保之。今文「格」爲「嘏」。凡醢者不祝。○嘏，古雅反。○疏曰：凡醢，謂庶子冠者。

再醢曰：「旨酒既涓，嘉薦伊脯。涓，思吕反。

○涓，清也。伊，惟也。乃申爾服，禮儀有序。

祭此嘉爵，承天之祜。」祜，音户，與「序」並上聲。

○祜，福也。三醢曰：「旨酒令芳，籩豆有

楚。旨，美也。楚，陳列之貌。咸加爾服，肴升

折俎。肴升折俎，亦謂豚。承天之慶，受福無

疆。」慶，叶音羌。

若殺，則特豚，載合升，離肺實于鼎，設

扃鼎。殺，如字。肺，芳味反。扃，古螢反，鼎杠也。鼎，

亡歷反，鼎覆也。○特豚，一豚也。凡牲皆用左胖，煮於鑊

曰亨，在鼎曰升，在俎曰載。「載合升」者，明亨與載皆合左

右胖。離，割也。割肺者，使可祭也，可啻也。今文「扃」爲

「鉉」。古文「鼎」爲「密」。○胖，普半反。鑊，戶郭反。亨，

普庚反。鉉，玄犬反。○疏曰：此論夏、殷殺牲醢子之事



也。「若」者，不定之辭也。升載之法，載在後，升在前。今先言載，後言升，又合字在載升之間者，通言之，欲見在俎在簠俱曰合也。肅者，以茅覆鼎，長則束其本，短則編其中。肩，牛鼎大肩長三尺，臠鼎小肩長一尺，皆依漢禮而知。今此豚鼎當用小肩也。周禮，《少牢》、《特牲》、《鄉飲》、《鄉射》皆用右胖，唯《虞禮》喪祭反古故用左，此云用左胖，或據夏、殷之法也。《特牲》云「亨於門外」，注云「亨以簠」，是簠爲亨也。《昏禮》合升側載，《特牲》卒載加匕，《少牢》升羊實於一鼎，是在鼎曰升，在俎曰載也。然在俎亦謂之升，如云升羊載右胖是也。○陳氏曰：豚則吉凶皆合升，用成牲則升其胖而去髀，吉升右而凶升左。脊脅六而肱股五，爲十一體也。○疏又曰：凡肺有二種：一者舉肺，一者祭肺。就舉肺之中，復有三稱：一名舉肺，爲食而舉；二名離肺，《少儀》云「三牲之肺，「離而不提心」也；三名臠肺，以齒臠之；此三者皆據生人爲食而有也。就祭肺之中，亦復有三稱：一者謂之祭肺，爲祭先而有之，二者謂之付肺，切之使斷，三者謂之切肺，名雖與付肺異，實則同也；三者皆爲祭而有。○今按：付，亦作「刊」，疑即「切」字寫誤爲「耳」。始醯，如初。亦薦脯醢，徹薦爵，筵尊不

徹矣。○初，謂前章之始醯也。①再醯，兩豆：葵菹、羸醢，兩簋：栗、脯。羸，力禾反。○羸醢，蟬醢。今文「羸」爲「蟬」。○蟬，音移。蟬，音俞，音由。蝸，力禾反，又古華反。○疏曰：此增數者爲有殺牲，故盛其饌也。按鄭注《周禮·醢人》云：「細切爲醢，全物若臠爲菹。」作醢及臠者，先膊乾其肉，乃後菹之，雜以梁糲及鹽，漬以美酒，塗置甕中，百日則成矣。是作醢及菹之法也。○今按：再醯唯攝酒加簋豆爲異，不言如初者，可知也。三醯，攝酒如再醯，加俎，臠之，皆如初，臠肺。攝酒如再醯，則再醯亦攝之矣。加俎臠之，「臠」當爲「祭」，字之誤也。祭俎如初，如祭脯醢。○疏曰：祭先之法，祭乃臠之，又不宜有二臠，故注破加俎之臠爲祭也。○今按：初，謂上章之始醯也。上章及此三醯兩節，但皆攝酒臠俎爲異，而其它皆如初，則祭已在其中矣，故注於上章三醯初不改字，於此蓋誤改之，疏又妄爲之說，皆非也。但上章之俎無肺，而此有肺，故又特言所臠者肺而不嫌於複出，則此臠字當從本文爲是。陸氏亦云臠讀如字。

①「初」上，賀本有「今按」二字。

嘖肺，釋上「嘖之」爲嘖肺也，凡言之法多此類。卒醺，

取籩脯以降，如初。

### 右殺。

若孤子，則父兄戒宿。父兄，諸父諸兄。○疏

曰：「諸父諸兄」，非己之親父兄也。冠之日，主人紒

而迎賓，拜，揖，讓，立于序端，皆如冠主，禮

于阼。冠主，冠者親父若宗兄也。古文「紒」爲「結」。今

文「禮」作「體」。凡拜，北面于阼階上。賓亦北

面于西階上答拜。若殺，則舉鼎陳于門外，

直東塾，北面。孤子得申禮，盛之。父在，有鼎不陳於

門外。○疏曰：凡陳鼎在外者，賓客之禮也；在內者，家私

之禮也；是在外者爲盛也。

右孤子冠。疏曰：周公作文於此乃見之者，

欲見周與夏、殷孤子冠禮皆同。其與上異者，乃記

之耳。

若庶子，則冠于房外，南面，遂醺焉。房

外，謂尊東也。不於阼階，非代也。不醺於客位，成而不

尊。○疏曰：適子，周冠一體，夏、殷三醺。庶子無文，周

當一醺，夏、殷當三醺。又庶子醺不見祝辭，即前注云「凡

醺者不祝」也。○今詳：疏說恐非。蓋一醺以酒者，正也。

其用醴與三醺，爲適而加耳。庶子，則皆一醺以酒足矣。

### 右庶子冠。

冠者母不在，則使人受脯于西階下。疏

曰：按《內則》云「舅沒則姑老」，若死當云「沒」，不得云「不

在」，且母死則不得使人受脯。今言「不在」者，或歸寧，或

疾病也。使人受脯，爲母生在，於後見之也。○今詳：經

云「不在」，恐兼存、沒而言，若被出而嫁亦是也。蓋主人若

非宗子，則固有無主婦者。此云「使人」，未必母使之也。

又《昏禮》使者授人脯之後，又執以反命，則此使人受脯之

### 右母不在。

女子十有五年許嫁，笄而字。雖未許

嫁，年二十而笄，禮之，婦人執其禮。雖未許

嫁，年二十亦爲成人矣。禮之，酌以成之，<sup>①</sup>言婦人執其

①「之」，原作「人」，據賀本改。

禮，明非許嫁之笄。○疏曰：賀瑒云：十五許嫁而笄，則主婦及女賓爲笄禮。主婦爲之著笄，而女賓以醴禮之也。未許嫁而笄，則婦人禮之，無女賓，不備儀也。○今按：賀說得之，然有未盡。許嫁笄，則主婦當戒外姻爲女賓，使之著笄而遂禮之。未許嫁而笄，則不成女賓，而自以家之諸婦行笄禮也。燕則髻首。髻，音權。○既笄之後去之，猶若女有髻紛也。○髻，丁果反。○疏曰：既未許嫁，雖已笄，猶以少者處之。故既笄之後，尋常在家燕居，則復去笄而分髮爲髻紛也。

右女子笄。《雜記》補。○此篇之末本有《記》

一章，今考之，皆見於《家語·邾隱公》篇，而彼詳此略，故今於此刪去，而取彼文修潤，以附《冠義》記，說見《昏禮》篇。

## 冠義第二

### 家禮一之下

傳曰：「禮之所尊，尊其義也。」言禮所以尊，尊其有義也。失其義，陳其數，祝史之事也。故其數可陳也，其義難知也。知其義

而敬守之，天子之所以治天下也。」言政之要盡於禮之義。○今按：此蓋秦火之前，典籍具備之時之語，固爲至論。然非得其數，則其義亦不可得而知矣。況今亡逸之餘，數之存者不能什一，則尤不可以爲祝史之事而忽之也。①

凡人之所以爲人者，禮義也。禮義之始，在於正容體，齊顏色，順辭令。言人爲禮，以此三者爲始。容體正，顏色齊，辭令順，而后禮義備，以正君臣，親父子，和長幼。言三始既備，乃可求以三行也。君臣正，父子親，長幼和，而后禮義立。立，猶成也。故冠而后服備，服備而后容體正，顏色齊，辭令順。言服未備者，未可求以三始也。童子之服采衣紛。故曰：冠者，禮之始也。是故古者聖王重冠。古者冠禮筮日筮賓，所以敬冠事，敬冠事所以重禮，重禮所

① 「也」下，賀本有「○郊特牲」。

以爲國本也。國以禮爲本。故適子冠於阼，以著代也；醮於客位，加有成也；三加彌尊，喻其志也；冠而字之，敬其名也。著，張慮反。○阼，謂東序少北，近主位也。適子冠於阼。若不醮，則醮用酒於客位，敬而成之也。戶西爲客位。庶子冠於房戶外，又因醮焉，不代父也。冠者初加緇布冠，次加皮弁，次加爵弁，每加益尊，則志益大也。「敬其名」者，重以未成人之時呼之也。○今按：此本無「適子」字，「加有成也」在「彌尊」字下，「冠而」上有「已」字，「敬其名」作「成人之道」，蓋傳誦之訛也。《家語》以爲孔子之言，亦有誤字。今以後記，《郊特牲》文更定，後因不復重出。見於母，母拜之；見於兄弟，兄弟拜之；成人而與爲禮也。玄冠、玄端，奠摯於君，遂以摯見於鄉大夫、鄉先生，以成人見也。鄉先生，同鄉老而致仕者。服玄冠、玄端，異於朝也。○孔疏曰：按《儀禮》，廟中冠子，以酒脯奠廟訖，子持所奠酒脯以見於母，母拜其酒脯。重從尊者處來，故拜之，非拜子也。○今按：疏說非，本文正意恐不然也。成人之者，將責成人禮焉

也。責成人禮焉者，將責爲人子、爲人弟、爲人臣、爲人少者之禮行焉。將責四者之行於人，其禮可不重與？行，下孟反。○言責人以大禮者，已接之不可以苟。○今按：首句「之」字疑衍。故孝弟忠順之行立而后可以爲人，可以爲人而后可以治人也，故聖王重禮。故曰：冠者，禮之始也，嘉事之重者也。是故古者重冠，重冠故行之於廟，行之於廟者，所以尊重事。尊重事而不敢擅重事，不敢擅重事，所以自卑而尊先祖也。治，直吏反。○嘉事，嘉禮也，冠屬嘉禮。○今按：此篇所引禮文皆見於前篇，注疏已具，今不復出，後篇放此。○邾隱公既即位，將冠，使大夫因孟懿子問禮於孔子。子曰：「其禮如世子之冠。」今按：此下本有「冠於阼」以下四句，與上章同而有誤字，又與上下文無所屬，疑記者妄附益之，今刪去。雖天子之元子，猶士也，其禮無變，天下無生而貴者故也。」鄭曰：皆由下升。○今按：此明世子之

冠猶上禮也，然疑句上有「懿子問世子之冠如何」一節及「子曰」字，今亡。句下有「無大夫冠禮」一節，今錯在後記及《郊特牲》篇中，然亦有闕文。此下舊有「行冠事必於祖廟，以裸享之禮將之，以金石之樂節之」，係《左傳》文，又有「所以自卑而尊先祖，示不敢擅」一節，已見上文，皆與此上下文不相屬，亦記者妄附，必損益之然後下文意乃相屬。懿子曰：「天子未冠即位，長亦冠乎？」孔子曰：「古者王世子雖幼，其即位則尊爲人君，人君治成人之事者，何冠之有？」懿子曰：「然則諸侯之冠異天子與？」王肅曰：「怪天子無冠禮而諸侯之冠如世子之冠，故問之。」孔子曰：「君薨而世子主喪，是亦冠也已，人君無所殊也。」王曰：「諸侯亦人君，與天子無異。」懿子曰：「今邾君之冠非禮也。」王曰：「懿子言諸侯無冠，則邾君之冠非也。」孔子曰：「諸侯之有冠禮也，夏之末造也。」鄭曰：「造，作也。自夏初以上，諸侯雖父死子繼，年未滿五十者亦服士服，行士禮，五十乃命也。至其衰末，上下相亂，篡殺所由生，故作公侯冠禮以正君臣也。」

《坊記》曰：「君不與同姓同車，與異姓同車不同服，示民不嫌也。以此坊民，民猶得同姓以殺其君。」有自來矣，今無譏焉。王曰：「言有所從來，故今無所譏。」天子冠者，武王崩，成王年十有三，而嗣立，周公居冢宰攝政以治天下。明年夏六月既葬，王曰：《周書》曰：「歲十有二月，武王崩，元年六月葬。」冠成王而朝于祖，以見諸侯，示有君也。周公命祝雍作頌，曰：「達而勿多也。」本篇作「達而未幼」，今從《大戴記》。○鄭曰：「辭多則史，少則不達。」祝雍辭曰：「使王近於民，王曰：「常得民之心也。」遠於年，王曰：「言壽長。」嗇於時，嗇，愛也。愛於時，不以無事棄日也。惠於財，施舍不吝也。親賢而任能。」其頌曰：「令月吉日，王始加元服，去王幼志，心是袞職。」袞，天子之盛服。袞職，謂天子之職業也。「是」字本闕，今補。或曰：當作「一心」。欽若昊天，王曰：「欽，敬。若，順。」六合是式。王曰：「天地四方謂之六合，言爲之法式。」率爾祖考，永永無

極。」此周公之制也。」今按：「天子冠者」至此一節，

懿子不問而夫子自言，疑非本文。懿子曰：「諸侯之

冠，其所以爲賓主，何也？」孔子曰：「公冠，

則以卿爲賓，公自爲主迎賓，揖，升自阼，立

于席北。公堂深，<sup>①</sup>異於上。今按：《大戴》無「北」字。

其醴也，則如士，饗之以三獻之禮，鄭曰：饗賓

也，士於賓以一獻之禮。○今按：《大戴禮》無「其醴也」三

字。無介，鄭曰：於饗而贊冠者退爲衆賓者，君禮於臣

本無介。無樂，鄭曰：亦饗時也。冠者成人代父，始宜

盡孝子之感，不可以歡樂取之。孔子曰：「取婦之家，三日

不舉樂，思嗣親也。」然則冠禮不舉樂可也。<sup>②</sup>《春秋左氏

傳》曰以金石之樂節之，謂冠時爲節也。皆玄端。鄭

曰：君臣同服。既醴，降自阼。諸侯非公而白

爲主者，其所以異，皆降自西階。今按：《大戴》

作「其餘白爲主者，其降也自西階以異，其餘皆公同也」。

但爲主而降西階，未詳其義。玄端與皮弁，王曰：玄

端，緇布冠之服。皮弁，白服其服也。○今按：《大戴》作

「公玄端與皮弁皆鞞」。異朝服素鞞。王曰：朝服素

鞞，示不忘古。○今按：《大戴》無「異」字，疑或是「皆」字。

公冠四加玄冕祭。王曰：公冠四加玄冕，祭服。鄭

注《大戴禮》曰「四」當爲「三」，「玄」當爲「衮」字之誤。孔疏

曰：諸侯尚四加，則天子當五加衮冕也。○今按：本文但

言玄端、皮弁、玄冕，而不言爵弁，則三加，鄭說爲是。而諸

侯玄冕以祭，則當從本文。唯天子三加其衮冕與？其

酬幣于賓，則束帛乘馬。王曰：已冠而饗，既饗，與

賓幣，謂之酬幣。○今按：《大戴》作「朱錦采四馬，其慶

也」，鄭注云：其慶賓也如是。天子擬焉。太子與

庶子，其冠皆自爲主，其禮與士無變，饗食賓

也皆同。」王曰：擬諸侯禮。○今按：此一節見於《大戴

記》者，與此文小異，今從其長者。「無介」乃饗時事，本篇

在「卿爲賓」之下，又無「無樂皆玄端」五字及注「又天子以

下」至「冠皆」十二字，本篇作「王太子庶子之冠擬焉皆天

① 「公」，原作「八」，據元明本、寬文本、賀本改。

② 「不」，原作「一」，據寬文本、賀本改。

子」，今悉從《大戴》。蓋如此即略與上文天子之冠相應，但亦非懿子所問為可疑耳。懿子曰：「始冠，必加緇

布之冠，何也？」孔子曰：「示不忘古。太古

冠布，齊則緇之。其緇也，吾未之聞。緇，如誰

反，下同。○唐、虞以上曰太古。重古，始冠冠其齊冠。

《雜記》曰：「大白，緇布之冠，不緇。」大白，即白布冠，今喪冠也。齊則緇之者，鬼神尚幽闇也。緇，纓飾。太古質，蓋

亦無飾，非時人緇，故云未聞之於古。○上，時掌反。○疏

曰：皇氏云：齊則緇之，亦謂祭前。若祭時，自著祭服，則

「有虞氏皇而祭」是也。太古吉凶同服，三代改制，齊冠有牟追之等，則以白布為喪冠，當自夏禹以下也。今則冠

而幣之可也。」孔疏曰：後世不復用之以為齊冠，但初

加暫用，冠罷則弊棄之也。○賈疏曰：冠而弊之，據上而

言，若庶人則猶著之，故《詩》云「彼都人士，臺笠緇撮」。是

庶人用緇布冠籠其髮以為常服也。懿子曰：「三王

之冠，其異何也？」孔子曰：「周弁，殷冏，夏

收，一也。冏，況甫反。○弁，名出於槃。槃，大也，言

所以自光大也。冏，名出於幘。幘，覆也，言所以自覆飾

也。收，言所以收斂髮也。齊所服而祭也，其制之異未聞。

○槃，畔干反。幘，火吳反。○疏曰：此條蓋論第三所加

之冠，指爵弁而言也。槃、幘、收斂之義，無正文，皆鄭以意

解之。○孔疏曰：齊及祭時所服也。若三命以下，齊、祭

同冠，四命以上，齊、祭則異。三王共皮弁、素積，質

不變。○疏曰：此條論第二所加之冠，自天子達於士，以

其質素，故三王同之，無所改易也。委貌，周道也；

章甫，殷道也；毋追，夏后氏之道也。或謂委

貌為玄冠，委猶安也，言所以安正容貌。章，明也。殷質，

言以表明丈夫也。甫，或為「父」，今文為「斧」。毋，發聲

也。追，猶堆也。夏后氏質，以其形名之。三冠皆所常服

以行道也，其制之異同未之聞。○孔疏曰：此一條論始加

之冠，三代常所服者，皆用緇布。但周為委貌之形，殷為章

甫之形，夏為毋追之形，為不同耳。此云委貌，而《儀禮》記

稱玄冠，故云「或」也。行道，謂養老、燕飲、燕居之服。

○《家語·冠頌》。○今按：此章與《儀禮》後《記》、《郊特

牲》、《公冠篇》多同，今從其長者。○始冠緇布冠，自

諸侯下達，冠而敝之可也。疏曰：從諸侯達諸士，

始冠皆用之。玄冠朱組纓，天子之冠也。緇布

冠續綏，諸侯之冠也。續，戶內反，注「繪」同。○皆

始冠之冠也。玄冠，委貌也。諸侯緇布冠有綏，尊者飾也。

續，或作「繪」。綏，或作「蕤」。○疏曰：諸侯緇布冠，唯續

綏爲異，其頰項、青組纓等皆與上同。○《玉藻》。○無

大夫冠禮而有其昏禮，古者五十而后爵，何

大夫冠禮之有？據時有未冠而命爲大夫者。周之

初禮：年未五十而有賢才者，試以大夫之事，猶服士服，行

士禮。二十而冠，急成人也。五十乃爵，重官人也。大夫

或時改取，有昏禮是也。○疏曰：大夫始仕者二十已冠，

訖五十乃爵，命爲大夫，故大夫無冠禮。然按《喪服》，大夫

爲兄弟之長殤，降服小功，鄭云：謂爲士若不仕者。明其

或亦爲大夫，則不爲殤而降也。蓋《小記》云丈夫冠而不爲

殤，此兄殤者，既有德行，年未二十而得爲大夫，則是大夫

亦不以二十而始冠也。若諸侯，則魯襄公年十二而冠，事

見《左傳》。若天子，則《尚書》啟金縢時，成王年十五而云

「王與大夫盡弁」，則知天子亦十二而冠矣。若天子之子，

則《祭法》有「天子下祭殤五」之文，是年十九以下尚爲殤，

故知二十乃冠也。○《後記》。○今按：此一節疑本亦《邾

隱公章》內語，說已見上。疏引《喪服》之文，見「大夫而有

兄殤」。又其兄若爲大夫，則不降服，則知其身與兄皆未二

十矣，是不必五十乃爲大夫也。蓋其得爲大夫之時，已治

成人之事，或已因喪而冠，如《家語》所說人君之例，故不待

二十而冠也。賈意當是如此，而詞不別白，故爲刪潤而發

明之。然此亦爲繼世爲大夫者言耳，非謂以賢才而選者

也。孔穎達云天子之子皆早冠，<sup>①</sup>以其有下祭殤五，蓋謂

若不早冠，則無玄孫之殤矣。諸侯之子則二十而冠，以其

有適長殤之文也。與賈說不同，未知孰是。○繼世以

立諸侯，象賢也。象，法也。爲子孫能法先祖之賢，

故使之繼世也。以官爵人，德之殺也。殺，猶衰也。

德大者爵以大官，德小者爵以小官。死而謚，今也。

古者生無爵，死無謚。今，謂周衰，記之時也。占，

謂殷，殷士生不爲爵，死不爲謚。周制以士爲爵，死猶不爲

謚耳，下大夫也。今記之時，士死則謚之，非也。謚之，由

魯莊公始也。<sup>②</sup>○今按：此於冠義無所當，疑錯簡也。然

疏義亦非是，此蓋《老子》「不尚賢」、「貴因任」之意。言上

①「云」，元明本、寬文本、賀本作「曰」。

②「也」下，賀本有「同上」。



古之時，民各推其賢者奉以爲君，沒則復奉其子以繼之。其後遂以爲諸侯。然其子之立也，但象似其賢而已，非故擇賢而立之也。至於中古，乃在上者擇人任官而爲之爵等，此則德之衰殺，不及上古之時矣。又至於周而有謚法，則生而有爵者，死又加謚，此則又其殺也。上古民自立君，故生無爵。中古未有謚法，故雖有爵而無謚，又以申言古今之變也。○曾子問曰：「將冠子，冠者至，揖讓而入，聞齊衰大功之喪，如之何？」齊，音咨。衰，七雷反。○冠者，賓及贊者。孔子曰：「內喪則廢，外喪則冠而不醴，徹饌而埽，即位而哭。如冠者未至，則廢。饌，上戀反。埽，悉報反。○內喪，同門也。不醴，不醴子也。其廢者喪成服，因喪而冠。○疏曰：內喪，謂同大門內之喪。加冠在廟，廟在大門之內，吉凶不可同處，故聞喪則廢。外喪，謂大門外之喪。喪在它處，可以加冠也。但平常吉時三加之後，設醴以禮冠者之身。今既有喪，故直三加而已，醴及饌具，未聞喪之先既已陳設，今皆徹去。又埽除冠之舊位，使清潔更新，乃即位而哭。如賓及贊者未至，則廢而不冠也。如將冠子

而未及期日，而有齊衰、大功、小功之喪，則因喪服而冠。」廢吉禮而因喪冠，俱成人之服。及，至也。○疏曰：吉冠是吉時成人之服，喪冠是喪時成人之服，今既有凶，廢吉禮而因喪冠，故云俱成人之服也。「除喪不改冠乎？」疏曰：曾子疑除喪之後，更改易而行吉冠之禮。孔子曰：「天子賜諸侯，大夫冕弁服於太廟，歸設奠，服賜服。於斯乎有冠醺，無冠醴。酒爲醺。冠禮，醴重而醺輕。此服賜服，酌用酒，尊賜也。不醴，明不爲改冠，改冠當醴之。○疏曰：諸侯，大夫幼弱未冠，總角從事。至當冠之年，因朝天子，天子賜之或弁或冕之服於太廟之中，歸設奠祭於己宗廟，但服所賜之服，更不改冠。但使人酌酒以飲己而無酬酢，皆以榮君之賜，更不用醴以禮受服者之身。言因喪而冠，不可除喪更改爲吉冠也。又曰：醴是古之酒，故爲重。醺用酒是後代之法，故爲輕。○《曾子問》。○父沒而冠，則已冠埽地而祭於禰，已祭而見伯父、叔父，而后饗冠者。」饗，謂禮之。○《曾子問》。○以喪冠者，雖三年之喪可也。既冠於次，人哭踊

三者三，乃出。冠，古亂反。三者之三，息暫反。○疏曰：每哭一節而三踊，如此者三，凡爲九踊。知非其冠月，待變除卒哭而冠者，二月「綏多士女」，是冠用二月。假令正月遭喪，則一月不得因喪而冠，必待變除受服之節乃可冠矣。大功之末，可以冠子，可以嫁子。父小功之末，可以冠子，可以嫁子，可以取婦。己雖小功，既卒哭，可以冠，取妻。下殤之小功則不可。取，七住反，又如字。○此皆謂可用吉禮之時。父大功卒哭而可以冠子，嫁子，小功卒哭而可以取婦，己大功卒哭而可以冠子，小功卒哭而可以取妻，必偕祭乃行也。下殤小功，齊衰之親，除喪而後可爲昏禮。凡冠者，其時當冠，則因喪而冠之。○《雜記》。○魯襄公九年十二月，晉悼公以諸侯之師伐鄭而還，公送晉侯，晉侯以公宴于河上，問公年。季武子對曰：「會于沙隨之歲，寡君以生。」沙隨，在成十六年。晉侯曰：「十二年矣，是謂一終，一星終也。歲星十二歲而一周天。國君十五而生子，冠而生子，禮也。冠，成人之服。故必冠而後生子。君可以

冠矣。大夫盍爲冠具？」武子對曰：「君冠，必以裸享之禮行之，裸，謂灌鬯酒也。享，祭先君行，將也。以金石之樂節之，以鐘磬爲舉動之節。以先君之祧處之。諸侯以始祖之廟爲祧。今寡君在行，未可具也，請及兄弟之國而假備焉。」晉侯曰：「諾。」公還，及衛，冠于成公之廟，成公，今衛獻公之曾祖。從衛所處。假鐘磬焉，禮也。《春秋左氏傳》。○晉趙文子冠，韋昭注：文子，趙盾之孫，趙朔之子趙武也。冠，謂以士禮始冠。見樂武子，武子曰：「美哉！武子，樂書也。禮既冠莫贊於君，遂以贊見於鄉大夫先生。美哉，美成人也。昔吾逮事莊主，莊，莊子，趙朔之謚。大夫稱主。趙朔嘗將下軍，樂書佐之。華則榮矣，實之不知，請務實乎。」榮者，有色貌。實之不知，華而不實也。見范文子，文子，范燮。文子曰：「而今可以戒矣！夫賢者寵至而益戒，不足者爲寵驕。智不足者，得寵而驕。故興，王賞諫臣；逸，王罰之。先王

疾是驕也。」見韓獻子，獻子，晉卿韓厥。獻子曰：「戒之，此謂成人。成人在始與善。始與善，善進善，不善蔑由至矣。蔑，無也。始與不善，不善進不善，善亦蔑由至矣。如草木之產也，各以其物。物，類也。人之有冠，猶宮室之有牆屋也，糞除而已，又何加焉。」糞除，喻自修潔。見智武子，武子曰：「吾子勉之！」武子，晉卿，荀首之子荀贍。成子之文，宣子之忠，其可忘乎！吾子勉之，有宣子之忠，而納之以成子之文，事君必濟。」濟，成也。見張老而語之，張老，晉大夫張孟。張老曰：「善矣！從欒伯之言，可以滋；滋，益也。范叔之教，可以大；韓子之戒，可以成。物備矣，志在子。物，事也。人事已備，能行與否，在子之志。智子之道善矣，道，訓也。是先主覆露子也。」先主，謂成、宣。露，潤也。○《國語》。

儀禮經傳通解卷第一終

## 儀禮經傳通解卷第二

### 士昏禮第三

#### 家禮二之上

#### 經二

昏禮。○下達，納采用鴈。采，七在反。

○達，通達也。將欲與彼合昏姻，必先使媒氏下通其言，女氏許之，乃後使人納其采擇之禮。《詩》云：「取妻如之何？匪媒不得。」昏必由媒交接紹介，皆所以養廉恥。納采而用鴈爲摯者，取其順陰陽往來。○疏曰：「下達」者，男爲上，女爲下，取陽唱陰和之義，謂以言辭下通于女氏也。「納采」，言始相采擇也。《周禮》六摯，大夫執鴈，士執雉。此昏禮無問尊卑皆用鴈者，取其木落南翔，冰泮北徂，能順陰陽往來，以明婦人從夫之義也。○陸佃曰：若逆女之類，自天子達是也。大夫有昏禮而無冠禮，則冠禮

不下達矣。○今按：「下達」之說，注、疏迂滯不通，陸氏說爲近是。蓋大夫執鴈，士執雉，而士昏下達納采用鴈，如大夫乘墨車，士乘棧車，而士昏親迎乘墨車也。注、疏知乘墨車爲攝盛，而不知「下達」二字本爲用鴈一事而發，言自士以下至於庶人皆得用鴈，亦攝盛之意也。蓋既許攝盛，則雖庶人不得用匹。又昏禮摯不用死，故不得不越雉而用鴈爾。今注、疏既失其指，陸於「下達」之義雖近得之，然不知其與用鴈通爲一義，則亦未爲盡善也。主人筵于户西，西上，右几。主人，女父也。筵，爲神布席也。户西者，尊處，將以先祖之遺體許人，故受其禮於廟也。席西上，右設几，神不統於人，席有首尾。○爲，于僞反。處，昌慮反。○疏曰：「户西」是賓客之位，故爲尊處。《記》云：凡行事，「受諸廟」。鄉射、燕禮之等設席皆東上，神尊不統於人，取地道尊右之義，故席西上而几在右也。《公食》記蒲筵萑席「皆卷自末」，是席有首尾也。使者玄端至。使，所吏反，注「使者」同。○使者，夫家之屬，若群吏使往來者。玄端，士莫夕之服，又服以事其廟。有司緇裳。○莫，音暮。○疏曰：按《士冠》，贊者於中，下士差次爲之，此云夫家之屬，亦當然。如主人是上士，則屬是中士，

主人是中士，則屬是下士；主人是下士，則屬亦當是下士，禮窮即同也。《士冠禮》玄端，上莫夕於朝之服，又以玄端祭廟，今使者亦於主人廟中行事，故云「又服以事其廟」也。上士玄裳，中士黃裳，下士雜裳。此緇裳即玄裳，乃據主人是上士而言。蓋《士冠》云「有司如主人服」，則三等上之有司亦如主人服也。擯者出請事，入告。擯者，有司佐禮者。請，猶問也。禮不必事，雖知猶問之，重慎也。○疏曰：按《士冠禮》，有司並是主人之屬及群吏，故知此擯者亦有司也。在主人曰擯。主人如賓服，迎于門外，再拜。賓不答拜，揖入。門外，大門外。不答拜者，奉使不敢當其盛禮。○疏曰：大夫唯有寢門、大門，廟在寢門外之東，此下有「至于廟門」，明此是大門外可知也。又上卑，無君臣之禮，故賓雖屬吏，直言不答拜。若於諸侯，則言辟，以君尊故也。至于廟門，揖入。三揖，至于階，三讓。入三揖者：至內室，將曲，揖；既曲，北面揖；當碑，揖。○疏曰：入門，賓主將欲相背，故須揖。賓主各至堂塗，北面相見，故亦須揖。碑在堂下，三分庭之一，在北，是庭中之節，故亦須揖。三者，禮之大節，尊卑同，故《鄉飲》、《鄉射》、《聘》、《食》皆有此三揖之法。主

人以賓升，西面。賓升西階，當阿，東面致命。主人阼階上，北面再拜。阿，棟也。入堂深，示親親。今文「阿」爲「廢」。○廢，居委反。○疏曰：賓使者也。禮之通例，賓主敵者，賓主俱升，若《士冠》與此文是也。若《鄉飲酒》、《鄉射》皆主尊賓卑，故初至之時，主人升一等，賓乃升，至卒洗之後亦俱升。唯《聘禮》則公升二等，賓始升也。凡上之廟，五架爲之，棟北一楣，下有室戶，中脊爲棟，棟南一架爲前楣，楣前接簷爲廢。棟在室外，故賓得深入當之也。授于楹間，南面。授於楹間，明爲合好，其節同也。南面，並授也。○疏曰：「楹間」，謂兩楹之間。賓以鴈授主人於楹間者，明和合親好，令其賓主遠近節同也。凡賓主敵者，授于楹間；不敵者，不於楹間。是以《聘禮》賓觀大夫云「受幣于楹間」，敵也。公受玉於中堂與東楹之間，至禮賓及賓私觀皆云當東楹，是尊卑不敵，故不於楹間也。今使者不敵而於楹間，故云明合好也。賓降出，主人降，授老鴈。老，群吏之尊者。○疏曰：大夫家臣稱老。《喪服》公士大夫以貴臣爲室老。

右納采。○記：疏曰：凡言「記」者，皆是記經不備，兼記經外遠古之言。鄭注《燕禮》云：「後世衰

微，幽，厲尤甚，禮樂之書，稍稍廢棄。」蓋自爾之後有記乎，未知定誰所錄也。○今按：《記》文本附全經之後，今依辭例分以附于本章之左。士昏禮，凡行事，

必用昏昕，受諸禰廟。用昕，使者。用昏，婿也。

○婿，悉計反，從「士」從「胥」，俗作「婿」，①女之夫。○

疏曰：「用昕使者」，謂男氏使向女家納采、問名、納吉、納徵，請期五者，皆用昕，即《詩》所謂「旭日始旦」也。昏，親迎時也。經但言戶西，故《記》復指言其處也。

○宗子無父，母命之；親皆没，己躬命之。

宗子者，適長子也。命之，命使者。母命之，在《春秋》

「紀裂繻來逆女」是也。躬，猶親也。親命之，則「宋公

使公孫壽來納幣」是也。言「宗子無父」，是有有父者。

禮：七十老而傳，八十齊喪之事不及。若是者，子代其

父為宗子，其取也，父命之。○適，丁狄反。長，丁丈

反。繻，音須。齊，側皆反。○疏曰：《喪服小記》云：

「繼別為宗，繼禰者為小宗。」大宗、小宗，皆是適妻所生

長子也。命使者，謂納采已下五者之使者也。《公羊

傳》曰：裂繻，紀大夫，「昏禮不稱主人」。何休云：「為

養廉遠恥也。」又云：「然則曷稱？」稱諸父兄師友。宋

公使公孫壽來納幣，則其稱主人何？辭窮也。辭窮

者，無母也。休注云：「禮：有母，母當命諸父兄師友，

稱諸父兄師友以行。宋公無母，莫使命之，辭窮，故自

命之，自命之則不得不稱使。」又云：「然則紀有母乎？

曰有。有則何以不稱母？母不通也。」休又云：「禮：

婦人無外事，但得命諸父兄師友以行耳。母命不得達，

故不得稱母通使，文所以遠別也。」此注之文，似母親

命，蓋略言之，其實但使子之父兄師友命之也。○今

按：言宗子無父，則是有有父之宗子，如老而傳、齊喪不

及者，其子雖代父主家，至於遣使定昏，則猶父命之，無

父然後母命之也。支子則稱其宗，支子，庶昆弟

也。稱其宗子命使者。○疏曰：「稱其宗」者，謂命使者

當稱宗子以命之，以大、小宗皆然也。弟則稱其

兄。弟，宗子母弟。○疏曰：以上文支子謂庶昆弟，故

知此弟宗子同母弟也。○辭無不腆，無辱。腆，

善也。賓不稱幣不善，主人不謝來辱。摯不用死。

摯，鴈也。○疏曰：死謂雉，今禮用鴈，故云「不用死」

①「婿」，原作「婿」，據元明本、寬文本、賀本改。

也。昏辭曰：「吾子有惠，貺室某也。」昏辭，

賓者請事告之辭。吾子，謂女父也。稱有惠，明下達。

貺，賜也。室，猶妻也。某，婿名。○貺，音況。妻，七

計反。○疏曰：賓者出門請事，使者告之也。某有

先人之禮，使某也請納采。」某，婿父名也。某

也，使名也。對曰：「某之子蠢愚，又弗能

教。吾子命之，某不敢辭。」蠢，失容反。○對

曰者，賓出納賓之辭。某，女父名也。吾子，謂使者。

今文「弗」爲「不」，無「能」字。致命，曰：「敢納

采。」疏曰：此使者升堂致命於主人之辭。若然，亦當

有主人對辭，如納徵。不言之者，文不具也。問名，賓

在門外問名，主人許。無辭者，納采、問名同使，故略不

言也。此下納吉、納徵、請期之等，皆有門外賓與賓者

傳辭，及升堂致命，主人對辭。而或不言者，文不具耳。

賓者出請，不必賓之事有無。○疏曰：主人不知

賓有事無事，故使賓出請也。賓執鴈，請問名，主人

許。賓入授，如初禮。問名者，將歸卜其吉凶。古

文「禮」爲「禮」。○疏曰：此一使兼行納采、問名，二事相

因也。入門、升堂、授鴈，與納采禮同，故云「如初禮」也。

右問名。○記：問名，主人受鴈，還，

西面對。賓受命乃降。受鴈于兩楹間，南面，還

于阼階上，對賓以女名。○疏曰：先阼階上北面再拜，

進，南面受鴈于兩楹間，還于阼階上，對賓以女名也。○

辭：問名曰：「某既受命，將加諸卜，敢請

女爲誰氏？」某，使者名也。誰氏者，謙也，不必其主

人之女。○疏曰：納采則知女之姓矣，今問爲誰氏者，

謙，不敢必其主人之女，或是所收養外人之女也。蓋名有

二種：一者是名字之名，三月之名是也；一者是名號之

名，若以姓氏爲名之類也。故本云「問名」而云「誰氏」者，

婦人不以名行，不問三月之名也。對曰：「吾子有

命，且以備數而擇之，某不敢辭。」卒曰某氏，

不記之者，明爲主人之女。○疏曰：若他女，主人終卒對

客之辭當云「某氏」，主人之女舊知之，故不對也。

賓者出請，賓告事畢。入告，出請醴賓。

此「禮」亦當爲「禮」。禮賓者，欲厚之。○疏曰：《士冠》禮

賓，禮已從禮，故此云「亦」也。賓禮辭，許。禮辭，一

辭。○疏曰：鄉已行納采，問名之禮，賓主之情已通，故略行一辭而已。主人徹几改筵，東上，側尊甌醴于房中。甌，亡甫反。○徹几改筵者，鄉爲神，今爲人。側尊，亦言無玄酒，側尊於房中，亦有簠有籩豆，如冠禮之設。○鄉，許亮反。爲，于僞反。○疏曰：於禮神坐，徹去其几，改設其筵，將以授賓。「東上」者，統於主人也。下云「酌醴加角枬」，明有簠盛之；又云「薦脯醢」，則有籩豆可知。冠禮尊南上，則此尊與簠等，亦南上可知也。主人迎賓于廟門外，揖讓如初。升，主人北面再拜，賓西階上北面答拜。主人拂几授校，拜送。賓以几辟，北面設于坐，左之，西階上答拜。拂，音弗。校，胡飽反。辟，房益反，注同。○拂，拭也。拭几者，尊賓新之也。校，几足。辟，逡遁。古文「校」爲「枝」。○拭，音式。逡，七旬反。遁，音旬。○疏曰：「如初升」者，如納采時三揖三讓也。主人再拜者，拜賓至此堂也，《飲》、《射》、《食》、《燕》皆云「拜至」是也。按《有司徹》：「主人西面，左手執几，縮之，以右袂推拂几三，二手橫執几，進授尸于筵前。」注云：此外拂之也。凡行禮，

敵者皆若此。卑於尊者，則內拂之，鄭云「內拂几，不欲塵坻尊者」是也。凡有几者，賓重也，其無几者，賓輕也。云「以几辟」者，賓卑也，不云者，賓尊也。《聘禮》云宰夫「奉兩端以進」，《有司徹》云「尸進，二手受于手間」，故凡授几，設几之法，卑者以兩手執几兩端，尊者則以兩手於几間執之，或受其足，皆橫受之。及其設之，皆旋几縱執，乃設之於坐南，北面陳之。位爲神則右之，爲人則左之爲異。不坐設之者，几輕故也。贊者酌醴，加角枬，面葉，出于房。枬，音四。○贊，佐也，佐主人酌事也。贊者亦洗酌，加角枬，覆之，如冠禮矣。出房南面，待主人迎受。古文「葉」作「揭」。○疏曰：《冠禮》云：「贊者洗于房中，側酌醴，加枬，覆之。」主人受醴，面枋，筵前西北面。賓拜受醴，復位。主人阼階上拜送。枋，彼命反。○主人西北面疑立，待賓即筵也。賓復位於西階上北面，明相尊敬。此筵不主爲飲食起。○疑，魚乙反。爲，于僞反，下「巾爲」，「蓋爲」同。○疏曰：此主人將授酒醴，于筵前待賓，即筵前乃授之，與下賓即筵別也。「不主爲飲食起」者，但此筵爲行禮，故拜及啐皆於西階也。贊者薦脯醢，薦，進。賓即筵坐，左執觶，祭脯醢，以



柶祭醴三，西階上北面坐，啐醴，建柶興，坐奠觶，遂拜，主人答拜。觶，之豉反。啐，七內反。

○即，就也。左執觶，則祭以右手也。凡祭于脯醢之豆間，必所爲祭者，謙敬，示有所先也。啐，嘗也。嘗之者，成主人意。建，猶扱也。興，起也。奠，停也。○扱，初洽反。

○疏曰：因事曰遂。因「建柶興，坐奠觶」，不復興，遂因坐而拜。「祭以右手」，《鄉射》篇文也。《冠禮》等篇脯醢在籩豆之間，此注不言籩者，省文。「示有所先」，謂先世造此食者也。賓即筵，奠于薦左，降筵，北面坐取脯，

主人辭。薦左，籩豆之東。降，下也。自取脯者，尊主人之賜，將歸執以反命。辭者，辭其親徹。○疏曰：下贊禮婦「奠于薦東」，注云：「升席奠之。」明升席南面奠，此亦然也。必南面奠者，取席之正也。賓降，授人脯，出，

主人送于門外，再拜。人，謂使者從者，授于階下西面，然後出去。○從，才用反，後「從者」皆同。○疏曰：鄭以賓位在西，授脯文在出上，故知西階下西面授之，然後出也。

右醴賓。○辭：醴曰：「子爲事故，

至於某之室。某有先人之禮，請醴從者。」爲，于僞反。○言從者，謙不敢斥也。今文「於」爲「于」。

對曰：「某既得將事矣，敢辭。」將，行。

「先人之禮，敢固以請。」主人辭。固，如故。

「某辭不得命，敢不從也。」賓辭也。不得命者，

不得許己之命。○記：祭醴，始扱壹祭，又扱

再祭。賓右取脯，左奉之，乃歸，執以反

命。奉，芳勇反。○反命，謂使者問名、納吉、納徵、請

期，還報于壻父。○疏曰：禮成於三，故祭醴之時，始扱

壹祭，及又扱則分爲兩祭，是爲二也。又先用右手取得

脯，乃用左手兼奉之，以降授從者於西階下，乃歸，執以

反命。納采與問名同使，親迎又無使者，故據此四者而

言。○辭：凡使者歸，反命曰：「某既得將

事矣，敢以禮告。」告禮所執脯。主人曰：

「聞命矣。」

納吉，用鴈，如納采禮。歸卜於廟，得吉兆，

復使使者往告，婚姻之事於是定。○復，扶又反。○疏曰：不云如問名者，問名賓不出大門，故此云「如納采」也。

又云：凡卜筮皆於禰廟，未卜時恐有不吉，婚姻不定，故納吉乃定也。

右納吉。○辭：納吉曰：「吾子有貺

命，某加諸卜，占曰吉，使某也敢告。」貺，賜也。賜命，謂許以女名也。某，婿父名。對曰：「某之子不教，唯恐弗堪。子有吉，我與在，某不敢辭。」與，音預，注同。○與，猶兼也。古文「與」爲「豫」。○疏曰：夫婦一體，夫既得吉，婦吉可知，故云我兼在吉中也。

納徵，玄纁束帛，儷皮，如納吉禮。纁，許

云反。儷，音麗。○徵，成也，使使者納幣以成昏禮。用玄纁者，象陰陽備也。束帛，十端也，《周禮》曰：「凡嫁子娶妻，人幣純帛無過五兩。」儷，兩也。執束帛以致命，兩皮爲庭實。皮，鹿皮。今文「纁」皆作「熏」。○純，側其反。○疏曰：納徵不用鴈，以其自有幣帛可執故也。《周禮》注云：「納幣用緇，婦人陰也，凡娶禮必用其類。五兩，十端也。必言兩者，蓋取配合之義。士大夫以玄纁束帛，天子加以穀圭，諸侯加以大璋。」庶人用緇，故云陰也。此兼玄纁束帛，故云象陰陽備。陽奇而陰偶，三玄而二纁也。其

大夫無冠禮而有昏禮，若試爲大夫及幼爲大夫者，依士禮。若五十而爵改娶者，大夫昏禮，玄纁及鹿皮則同於士。餘有異者，無文以言也。

右納徵。○記：納徵，執皮，攝之，內

文，兼執足，左首。隨人，西上，參分庭一在南。攝，之涉反，注及下同。○攝，猶辟也。兼執足者，左手執前兩足，右手執後兩足。左首，象生。《曲禮》曰：「執禽者左首。」隨人，爲門中阨狹。西上，中庭位併。○辟，必亦反。爲，于僞反。阨，於賣反。狹，音洽。○疏曰：按經直云「納徵」，如授鴈之禮。至於庭實之皮，無可如者，故此特記之。又云：「執皮」者，二人相隨而入，至庭北面，皆以西爲左，一手執兩足，毛在內，故云「內文」。執生禽者，左其首，此與之同，故云「象生」，亦取婦人生息之義也。《匠人》云天子「廟門容大扃七个」。注云：「扃長三尺，七个二丈一尺。」此士廟門降殺甚小，故云「門中阨狹」。而執皮者又橫執之，故二人相隨乃可以入，不得並行也。至中庭則稍寬，故得俱北面西上也。賓致命，釋外足見文。主人受幣。士受皮者自東出于後，自左受，遂坐

攝皮，逆退，適東壁。見，賢遍反，下注「婦見」皆

同。○賓致命，主人受幣，庭實所用爲節。士，謂若中士、下士、不命者，以主人爲官長。自，由也。○長，丁丈反。○疏曰：經云「釋外足」者，據人北面以足向上執之，足遠身爲外，受之則文見也。又云「士受皮者取皮自東方出于後，自左受」者，謂自東方出于執皮者之後，至于左北面受之也。又云「逆退」者，二人相隨，自東而西，今以後者先向東行也。注又言賓堂上致命時，庭中執皮者北面釋外足見文，主人堂上受幣時，主人之土於堂下受取皮也。○按：此疏引經文「皮者」下有「取皮」二字，今本無之，未詳孰是。○疏又曰：諸侯之士，國皆二十七人。按《周禮·典命》，侯伯之士一命，子男之士不命。國皆分爲三等：上九，中九，下九。《周禮》官皆有官長，其下皆有屬官，今言「士，謂若中士、下士、不命者」，據上士爲官長者言也。若主人是中士，則士是下士；若主人是下士，則士是不命之士，府史之屬。此不命與子男之士不命者亦異，彼雖不得君簡策之命，仍得人君口命爲士，此則不得君命，是官長自辟除者也。按《既夕》：宰舉幣是士之府史，則庭實胥徒爲之。○皮

帛，帛可制。皮帛，儷皮束帛也。○疏曰：「帛可制」者，可制爲衣物，此亦是教婦以誠信之義也。○納幣

一束，束五兩，兩五尋。納幣，謂昏禮納徵也。

十個爲束，貴成數。兩兩者合其卷，是謂五兩。八尺曰尋，一兩五尋，則每卷二丈也，合之則四十尺。今謂之匹，猶匹偶之云與？○卷，音眷。與，音餘。○此一節

係《雜記》補。○辭：納徵曰：「吾子有嘉命，

貺室某也。某有先人之禮，儷皮束帛，使

某也請納徵。」致命曰：「某敢納徵。」對

曰：「吾子順先典，貺某重禮，某不敢辭，

敢不承命。」典，常也，法也。○疏曰：「吾子有命」

以下至「請納徵」，是門外向擯者辭也。「某敢納徵」者，是升堂致命辭也。「對曰」者，是堂上主人對辭也。餘

見納采。○女子許嫁，笄而醴之，稱字。許

嫁，已受納徵禮也。笄女之禮，猶冠男也，使主婦女賓

執其禮。○疏曰：女子許嫁，謂年十五已上至十九已下。按《曲禮》「女子許嫁，纓」，此文不具也。《雜記》

云：「女雖未許嫁，年二十而笄，禮之，婦人執其禮。」以

其禮輕，故無主婦女賓，使婦人而已。又許嫁者用醴禮之，不許嫁者當用酒醴之，敬其早得禮也。禮之稱字，與男子冠禮之稱字同。祖廟未毀，教于公宮三

月。若祖廟已毀，則教于宗室。祖廟，女高祖爲君者之廟也。以有總麻之親，就尊者之宮，教以婦德、婦言、婦容、婦功。宗室，大宗之家。○疏曰：此謂諸侯同族之女將嫁之前教成之法。經直云「祖廟」，鄭知「女高祖爲君者之廟也，以有總麻之親」者，以其諸侯立五廟，大祖之廟不毀，親廟四，以次毀之，經故云「未毀」與「已毀」，皆是據高祖之廟而言，故云「祖廟，女高祖爲君者之廟也」。共承高祖，是四世總麻之親；若三世共曾祖，是小功之親；若共祖，是大功之親；若共禰廟，是齊衰之親，則皆教于公宮。今直言「總麻」者，舉最疏而言親者，自然教于宮可知也。「婦德、婦言、婦容、婦功」，說見《昏義》記。云別子爲祖，繼別爲宗，謂別子之世適長子族人來宗事之者，謂之宗者，收族者也。高祖之廟既毀，與君絕服者則皆于大宗之家教之。又小宗有四，或繼禰，或繼祖，或繼曾祖，或繼高祖，此等至五代皆還不就之教者，小宗卑故也。○張子曰：

「祖廟未毀，教于公宮。」則知諸侯於有服族人亦引而親之如家人然。

請期，用鴈。主人辭，賓許，告期，如納徵禮。請，音情，又七井反。○主人辭者，陽倡陰和，期日宜由夫家來也。夫家必先卜之，得吉日，乃使使者往，辭即告之。○和，戶卧反。○疏曰：壻之父使使納徵訖，乃卜婚日，得吉日，使使往女家告。男家執謙，故遣使者請。若云期由女氏，女氏知陽倡陰和，當由男家出，故主人辭之。使者既見主人辭，遂告主人期日也。

右請期。○辭：請期曰：「吾子有賜命，某既申受命矣。惟是三族之不虞，使某也請吉日。」三族，謂父昆弟、己昆弟、子昆弟。虞，度也。不億度，謂卒有死喪。此三族者，己及子皆爲服期，期服則踰年，欲及今之占也。《雜記》曰：「大功之末，可以冠子嫁子。」○度，大各反。億，於力反。卒，七忽反。期，音基。○疏曰：大功之喪服內不廢成禮，若期親內則廢，故舉合廢者而言。「父昆弟」，則伯

① 「基」，原作「基」，據賀本改。

叔及伯叔母；「己昆弟」，則己之親兄弟；「子昆弟」，則己之適子、庶子；皆己之齊衰期服之內親也。對曰：「某既前受命矣，唯命是聽。」前受命者，申前事也。曰：「某命某聽命于吾子。」曰某，壻父名也。對曰：「某固唯命是聽。」使者曰：「某使某受命，吾子不許，某敢不告期。」曰某日。某，吉日之甲乙。對曰：「某敢不敬須。」須，待也。

期，初昏，陳三鼎于寢門外東方，北面北上。其實特豚，合升去蹄。舉肺脊二，祭肺二，魚十有四，腊一肫，髀不升，皆飪。設扃。去，起吕反，注同。肫，音純，又之春反。髀，步米反。飪，而甚反。扃，古營反。髀，亡狄反。○期，取妻之日。鼎三者，升豚、魚、腊也。寢，壻之室也。北面，鄉內也。特，猶一也。合升，合左右胖升于鼎也。去蹄，蹄甲不用也。舉肺脊者，食時所先舉也。肺者，氣之主也，周人尚焉。脊者，體之正也，食時則祭之，飯必舉之，貴之也。每皆二者，夫婦各一耳。凡魚之正，十五而鼎，減一爲十四

者，欲其敵偶也。腊，兔腊也。肫，或作「純」。純，全也，凡腊用全。髀不升者，近竅，賤也。飪，孰也。扃，所以扃鼎。覆之。古文「純」爲「鈞」，「髀」爲「脾」。今文「扃」作「鉉」，「髀」皆作「密」。○鄉，許亮反。胖，音判。飯，扶晚反。近，附近之近。竅，苦弔反。扃，音江。脾，必爾反，又毗支反。鉉，胡猷反。○疏曰：「東方」、「北面」，是禮之正，此及《少牢禮》所云是也。《特牲》：「陳鼎于門外」，當門而不在東方者，辟大夫也。此不辟者，重昏禮，攝盛也。命士以上，父子異宮，故壻別有寢。若不命之士，父子同宮，雖大院同居，其中亦隔別，各有門戶，故經總云「寢門外」也。「合升」，以夫婦各一，故左右胖俱升。若祭，則升右也。去蹄甲者，以其踐地，穢惡也。云「舉肺脊」、「祭肺」者，下文「祭薦黍稷肺」即祭肺也。「授肺脊，皆食以淸醬，皆祭舉，食舉也」，即「舉肺脊」也。祭時二肺俱有，生人唯有舉肺，皆祭。今此得有「祭肺」者，記論娶婦「玄冕齊戒，鬼神陰陽也」，故與祭祀同二肺也。又云「脊，體之正」者，一身之上，體總有二十一節，前有肩、臂、臑，後有肫、膈、脊，在中央有三脊：正、脰、橫脊，而取中央正脊故也。特性，少牢，魚皆十五，此欲其敵偶，故減其一，而夫婦各有七也。又此鬼神陰陽，故同祭禮。若生人，則公食大夫，一命者七

魚，再命者九魚，三命者十有一魚。天子諸侯無文，或諸侯十三魚，天子十五魚也。腊，少牢用麋，則上用兔可知。凡牲體用一胖腊，則左右體脅相配共為一體，故《特牲》、《少牢》曰「腊用全」也。設洗于阼階東南。洗，所以承盥洗之器棄水者。○盥，音管。饌于房中，醯醬二豆，菹醢四豆，兼巾之；黍稷四敦，皆蓋。饌，仕戀反。醯，呼西反。敦，音對。○「醯醬」者，以醯和醬，生人尚饗味。「兼巾之」者，六豆共巾也。巾為禦塵，蓋為尚溫。《周禮》曰：「食齊視春時。」○食，音嗣。齊，才計反，下同。大羹湑在饗。大羹，並如字。湑，去急反。饗，七亂反。○大羹湑，煮肉汁也。大古之羹無鹽菜。饗，火上。①《周禮》曰：「羹齊視夏時。」今文「湑」皆作「汁」。○大，音泰。○疏曰：「湑」與「汁」一也。《左傳》云「大羹不致」，《記》云「大羹不和」，謂不致五味，不和鹽菜也。唐虞以上曰大羹，三王以來更有鋼羹，則致以五味。雖有鋼羹，猶存大羹，不忘古也。引《周禮》者，證大羹須熱，故在饗，臨食乃取也。尊于室中北墉下，有禁。玄酒在西，綌冪，加勺，皆南枋。墉，音容。綌，去逆反。勺，上灼反。○墉，牆也。禁，所以廢甌者。玄酒，不忘古也。

綌，羸葛。今文「枋」作「柄」。○疏曰：甌，見《士冠禮》，廢承之也。名禁者，因為酒戒也。神農時雖有黍稷，未有酒醴，以水為玄酒而已。《記》又云「後聖有作，以為醴酪」，據黃帝以後而言也。尊于房戶之東，無玄酒。篚在南，實四爵合盃。盃，音謹。○無玄酒者，略之也。夫婦酌於內尊，其餘酌于外尊。合盃，破匏也。四爵兩盃，凡六，為夫婦各三酌。②一升曰爵。○匏，白交反。酌，以刃反。○疏曰：上文夫婦之尊有玄酒，此尊酌贊醢御，③故無玄酒，略之也。《韓詩外傳》云：「一升曰爵，二升曰觚，三升曰觶，四升曰角，五升曰散。」

### 右陳器饌。○記：腊必用鮮，④魚用

鮒，必殽全。鮒，音附。○殽全者，不餒敗，不剝傷。

○餒，奴罪反。○疏曰：鮮，取夫婦日新之義；鮒，取夫婦相依附也；全，取夫婦全節無虧之理；此並據同牢時

- ①「上」，原作「工」，據元明本、寬文本、賀本改。
- ②「醢」，原作「酌」，據元明本、寬文本、賀本改。
- ③「醢」，原作「醢」，據元明本、寬文本、賀本改。
- ④「腊」，原作「脂」，據元明本、寬文本、賀本改。

也。○父醯子，醯，子召反。○子，壻也。○疏曰：

女父禮女用醴，又在廟。父醯子用酒，又在寢。不同者，父禮女，以先祖遺體許人以適他族，婦人外成，故重之；男子直取婦入室，無不反之，故輕之。知醯子不在廟者，若在廟，則應筵于戶西，以布神位，今不言，則在寢可知也。命之辭曰：「往迎爾相，承我宗事。相，息亮反。○相，助也。宗事，宗廟之事。勛帥以敬先妣之嗣，若則有常。」勛，許玉反。○

勛，勉也。若，猶女也。勛帥婦道以敬其為先妣之嗣。女之行則當有常，深戒之。《詩》云：「大姒嗣徽音。」○女，音汝，下同。大，音泰。○疏曰：「為先妣之嗣」者，謂婦入室使代姑祭也。子曰：「諾。唯恐弗堪，不敢忘命。」

主人爵弁，纁裳，緇施，從者畢玄端，乘墨車，從車二乘，執燭前馬。施，以豉反。乘，繩證反。○主人，壻也，壻為婦主。爵弁而纁裳，玄冕之次。大夫以上親迎冕服。冕服迎者，鬼神之。鬼神之者，所以重之親之。纁裳者，衣緇衣。不言衣與帶而言施者，空其

文，明其與施俱用緇。施，謂緣。施之言施，以緇緣裳，象陽氣下施。從者，有司也。乘貳車，從行者也。畢，猶皆也。墨車，漆車，士而乘墨車，攝盛也。執燭前馬，使從役持炬火居前燎道。①○上，時掌反，後，以上「放此。迎，魚正反，下同。衣緇衣，上於既反，下如字。緣，以絹反，下同。炬，音巨。燎，音照。○疏曰：親迎向女家，女父稱主人，男稱壻。未至女家，仍據男家而言，故云主人是壻，為婦主。下親迎至男家，壻還稱主人也。鄭注《周禮·弁師》云：「二命之大夫玄冕無旒，士變冕為爵弁。」是冕之次也。

云大夫以上白祭用朝服，助祭用玄冕，士家自祭用玄端，助祭用爵弁。今士親迎用爵弁，是用助祭之服以為攝盛，則卿大夫親迎當用玄冕攝盛也。其助祭之服，若上公有孤之國孤絺冕，卿大夫同玄冕，侯伯子男無孤之國卿絺冕，大夫玄冕也。孤、卿、大夫、士為臣卑，復攝盛，故取助祭之服以親迎。若天子諸侯則尊矣，不須攝盛，宜用家祭之服以迎，則天子當服衮冕，而五等諸侯皆玄冕。是以《記》云：「玄冕齋戒，鬼神陰陽也，將以為社稷主。」以社稷言之，據諸侯而說也。其於孤卿雖絺冕以助祭，至於親迎只用玄冕，臣

①「道」，原作「前」，據元明本、寬文本、賀本改。

不得過君也。○今按：孔疏云五冕通玄，<sup>①</sup>故合稱玄冕。<sup>②</sup>恐其說爲是。○又云：「乘貳車」者，士雖無臣，其僕隸皆曰有司，今使乘貳車從壻，然大夫以下乃有貳車。今士有之者，亦攝盛也。按《周禮·巾車》，王之車有玉路、金路、象路、革路、木路，諸侯則白金路以下有差，孤乘夏篆，卿乘夏纁，大夫乘墨車，士乘棧車，庶人乘役車。墨車，以革鞮之，革上又有漆飾。棧車，則不革鞮而但漆之者也。今士乘大夫墨車，爲攝盛，則庶人當乘棧車，大夫當乘夏纁，卿當乘夏篆。已上有木路，質而無飾，不可使孤乘之，禮窮則同，還乘夏篆，尊不攝盛也。諸侯天子亦不假攝盛，自乘本車。然玉路祭祀，不可以親迎，當乘金路矣。以攝言之，士之子冠與父同，則昏亦同，但尊適子，皆與父同，庶子宜降一等也。婦車亦如之，有綌。綌，昌占反。○亦如之者，車同等，士妻之車，夫家共之。大夫以上嫁女，則自以車送之。綌，車裳幃，《周禮》謂之容。車有容，則固有蓋。○共，音恭。○疏曰：婦車之法，自士以上至孤卿，皆與夫同，有綌爲異。至于王后及三夫人，諸侯三公夫人皆當乘翟車，九嬪與孤妻同用夏篆，世婦與卿大夫妻同用夏纁，女御與士妻同用墨車也。其諸侯夫人姪娣及二媵并姪娣，依次下夫人以下一等爲差也。《巾車》云有容蓋。容，

蓋，相配之物，此既有綌之容，明有蓋可知。至于門外，婦家大門之外。○疏曰：下「揖入」乃至廟，廟在大門內，故知此大門外也。主人筵于戶西，西上右几。主人，女父也。筵，爲神布席。○爲，于僞反。○疏曰：以先祖之遺體許人，將告神，故女父先于廟設神席，乃迎壻也。女次，純衣纁袖，立于房中，南面。袖，如占反。○次，首飾也，今時髮也，《周禮·追師》掌「爲副，編次」。純衣，絲衣。女從者畢袵玄，則此衣亦玄矣。袖，亦緣也。袖之言任也，以纁緣其衣，象陰氣上任也。凡婦人不常施袖之衣，盛昏禮，爲此服。《喪大記》曰復衣「不以袖」，明非常。○髮，皮義反。追，丁回反。編，必連反。袵，之忍反。○疏曰：不言裳者，以婦人之服不殊裳也，《內司服》注云「婦人尚專一，德無所兼，連衣裳不異其色」是也。此純衣即祿衣，<sup>③</sup>是士妻助祭之服，尋常不用纁爲袖，今用之，故云盛昏禮爲此服。王后已下，初嫁皆有袖也。姆纁笄、

①「孔」，原作「義」，據賀本改。

②「合」，原作「摠」，據元明本、寬文本、賀本改。

③「此純衣即」四字，原脫，據賀本補。



宵衣，在其右。姆，亡候反，又音母。纁，山賈反。○

姆，婦人年五十無子，出而不復嫁，能以婦道教人者，若今時乳母。纁，綰髮。笄，今時簪也。纁，亦廣充幅，長六尺。宵，讀爲《詩》「素衣朱綃」之綃，魯《詩》以綃爲綺屬也。姆亦玄衣，以綃爲領，因以爲名，且相別耳。姆在女右，當詔以婦禮。○綃，他刀反。綃，音消。別，彼列反。○疏曰：婦人有七出，其六則無德行而不可教人。惟無子者不廢婦道，故使爲姆教女，因從女之夫家也。《喪服》占者大夫子有三母：子師、慈母、保母。其慈母闕，乃令有乳者養子，謂之爲乳母，死爲之服緦麻。師教之，乳母直養之而已。漢時乳母則選德行有乳者爲之，并使教子，故引之以證也。纁以綃爲之，以綃髮而紒之。女有纁有次，姆有纁而無次也。綃衣亦與純衣同，是緣衣用綃爲領，故因得名綃衣也。《詩》云「朱綃」，又云「朱襺」。《爾雅》云：「黼領謂之襺。」襺既爲領，明綃亦領可知。姆在女右者，《少儀》云「詔辭自右」，地道尊右之義也。女從者畢袵玄，纁笄，被纁黼，在其後。纁，苦迴反。黼，音甫。○女從者，謂姪婦也，《詩》：「諸娣從之，祁祁如雲。」袵，同也，同玄者，上下皆玄也。纁，禪也。《詩》云「素衣朱襺」，《爾雅》云「黼

領謂之襺」，《周禮》曰「白與黑謂之黼」。天子諸侯后、夫人狄衣，卿大夫之妻刺黼以爲領，如今偃領矣。士妻始嫁，施禪黼於領上，假盛飾耳。言被，明非常服。○姪，大結反，又丈一反。娣，大計反。禪，音丹。襺，音博。刺，七亦反。○疏曰：「姪婦」者，古者嫁女必姪婦從，謂之媵也。袵，讀從《左氏》「均服振振」，一也，故云「上下皆玄」，不殊裳也。纁，讀如《詩》「褰衣」之褰，故爲禪。黼，謂刺之在領爲黼文，名謂之襺也。黼乃白黑色爲之，于衣上則畫之，於領上則刺之。男子冕服衣畫而裳繡，婦人領雖在衣，亦刺之矣。士妻于衣領上別刺黼文，故謂之被。大夫以上，則刺之而不別被之矣。○今按：袵字說見《冠禮》。主人玄端迎于門外，西面再拜，賓東面答拜。賓，增。○疏曰：門外，大門外也。主人揖入，賓執鴈從，至于廟門，揖入，三揖，至于階，三讓。主人升，西面。賓升，北面奠鴈，再拜稽首，降出。婦從，降自西階。主人不降送。賓升奠鴈拜，主人不答，明主爲授女耳。主人不降送，禮不參。○爲，于僞反。○疏曰：「奠鴈再拜」，當在房外當楣北面。何休云：「夏后氏逆於庭，殷人逆於堂，周人逆於戶。」後代漸文，迎

於房者，親親之義也。納采、問名、納吉、納徵，請期皆言主人拜，獨於此不言，明壻拜爲授女，不爲主人，故主人不答也。禮，賓主宜各一人，今婦既送，故主人不參也。壻御婦車，授綏，姆辭不受。壻御者，親而下之。綏，所以引升車者，《曲禮》曰：「僕人之禮，必授人綏。」○疏曰：御車，僕人禮。姆辭不受，謙也。婦乘以几，姆加景，乃驅，御者代。乘，如字，下《記》同。○乘以几者，尚安舒也。景之制蓋如明衣，加之以爲行道禦塵，令衣鮮明也。景，亦明也。驅，行也。行車輪三周，御者乃代壻。今文「景」作「憬」。○令，力呈反。憬，音景。○疏曰：「乘以几」，謂登車時也。《既夕禮》：「明衣裳用布，袂屬幅，長下膝。」景之制無正文，故云「蓋如明衣」。此嫁時尚飾不用布，蓋以禪縠爲之。《詩》云：「衣錦褰衣，裳錦褰裳。」衣裳用錦而上加禪縠焉，爲其文之大著也。此不用錦，不爲文大著，故云禦風塵也。壻乘其車先，俟于門外。壻車在大門外，乘之先者，道之也。男率女，女從男，夫婦剛柔之義自此始也。俟，待也。門外，壻家大門外。○道，音導。○疏曰：命士已上，父子異宮，故云「壻家大門外」。若不命之士，父子同宮，則「大門」父之大門

外也。

右親迎。○辭：賓至，擯者請，對曰：「吾子命某，以茲初昏，使某將，請承命。」賓，壻也。「命某」，某，壻父名。茲，此也。將，行也，使某行昏禮來迎。對曰：「某固敬具以須。」○記：父醴女而俟迎者，母南面于房外。女既次純衣，父醴之于房中，南面，蓋母薦焉，重昏禮也。女奠爵于薦東，立于位而俟壻。壻至，父出，使擯者請事。母出南面房外，示親授壻，且當戒女也。○疏曰：舅姑共饗婦，姑薦脯醢，故知父母醴女亦母薦脯醢。按《士冠》禮子與醢子及此篇禮賓，禮婦皆奠爵于薦東，明此亦奠薦東也。女出于母左，父西面戒之，必有正焉。若衣若笄，母戒諸西階上，不降。必有正焉者，以託戒之使不忘。○疏曰：母初立房西，女出房，母行至西階上乃戒之也。「託戒」者，謂託衣笄恒在身而不忘，持戒亦然也。○辭：父送女，命之曰：「戒之敬之，夙夜毋違命。」夙，早也，早起夜臥。命，舅姑之教命。古文「毋」爲

「無」。○疏曰：父戒之，使無違舅命，母戒之，使無違姑命。注有「姑」字，傳寫誤也。母施衿結帨，

曰：「勉之敬之，夙夜無違宮事。」衿，其鳩反。帨，舒銳反。○帨，佩巾。○疏曰：宮事，謂姑命婦之事。庶母及門內施鞶，申之以父母之命，

命之曰：「敬恭聽，宗爾父母之言。夙夜無愆，視諸衿鞶。」鞶，步干反。愆，去連反。○庶

母，父之妾也。鞶，鞶囊也。男鞶革，女鞶絲，所以盛帨巾之屬，爲謹敬。申，重也。宗，尊也。愆，過也。諸，

之也。示之以衿鞶者，皆託戒使識之也。不示之以衣笄者，尊者之戒，不嫌忘之。「視」乃正字，今文作「示」，

俗誤行之。○盛，音成。重，直用反。識，申志反。○壻授綬，姆辭曰：「未教，不足與爲禮也。」

姆，教人者。○記：婦乘以几，從者二人坐持几，相對。持几者，重慎之。○疏曰：此几謂將

上車而登，若王后則履石，大夫，諸侯無文。

婦至，主人揖婦以入。及寢門，揖入，升自西階。媵布席于奧。夫人于室，即席。婦

尊西，南面，媵、御沃盥交。媵，以證反。奧，烏報

反。御，依注，音訝，下並同。○升自西階，道婦入也。媵，

送也，謂女從者也。御，當爲「訝」。訝，迎也，謂壻從者也。

媵沃盥盥於南洗，御沃婦盥於北洗。夫婦始接，情有廉恥，

媵、御交道其志。○道，音導。○疏曰：賓客常禮，主人在

東，賓在西。今主人與妻俱升西階，故云「道婦入也」。「女

從者」，姪婦也。「壻從者」，以其與婦人爲盥，非男子之事，

謂夫家之賤者也。「沃盥交」者，南北有二洗，夫婦與媵御

南北交相沃盥也。贊者徹尊罍，舉者盥，出除

罍，舉鼎入，陳于阼階南，西面北上，匕俎從

設。執匕者，執俎者從鼎而入，設之。匕，所以別出牲體

也。俎，所以載也。○別，彼列反。○疏曰：執匕俎，舉鼎

各別人者，吉禮尚威儀故也，喪禮則舉者兼執之，凶禮略

也。《特牲禮》：右人于鼎北，南面，匕肉出之，左人于鼎西

俎南，北面承取肉載于俎，遂執俎而立以待設。此與之同

也。凡牲體有肩、臂、肫、肫、肫、脊、脅之等，于鼎以次別匕

出之，載者依其體別以次載之於俎，故云「別出牲體也」。

北面載，執而俟。執俎而立，俟豆先設。匕者逆

退，復位于門東，北面西上。執匕者事畢逆

退，由便。至此乃著其位，略賤也。○疏曰：《士冠禮》未行事即言兄弟及擯者之位，此陳鼎時不見執匕者位，至此乃著其位也。贊者設醬于席前，菹醢在其北，俎人，設于豆東，魚次，腊特于俎北。豆東，菹醢之東。○疏曰：下文醬東有黍稷，故知在菹醢東也。贊設黍于醬東，稷在其東，設滂于醬南。饌要方也。○疏曰：豆東兩俎，醬東黍稷，是其要方也。設對醬于東，對醬，婦醬也，設之當特俎。○疏曰：壻東面，設醬在南爲右，婦西面，則醬在北爲右。皆以右手取之爲便，故知「設之當特俎」東也。菹醢在其南，北上，設黍于腊北，其西稷，設滂于醬北。御布對席，贊啟會，卻于敦南，對敦于北。會，古外反。卻，去逆反。○啟，發也。今文「啟」作「開」。古文「卻」爲「給」。○疏曰：菹在醬南，其南有菹有醢。若壻醢在菹北，從南向北陳，爲南上。此從北向南陳，亦醢在菹南，爲北上也。滂，即大羹滂。上設壻滂於醬南，在醬黍之南，特俎出於饌北。此設婦滂于醬北，在特俎東，饌內則不得要方。上注云「要方」者，據大判而言耳。卻，仰也，謂仰于地

也。壻東面，以南爲右，婦西面，以北爲右，取便也。贊告具。揖婦，即對筵，皆坐，皆祭，祭薦、黍、稷、肺。贊者西面告饌具也。壻揖婦，使即席。薦，菹醢。○疏曰：「西面告」者，以主人東面。凡單云「薦」者，皆據籩豆而言也。贊爾黍，授肺脊，皆食以滂醬，皆祭舉、食舉也。爾，移也。移置席上，使其食也。皆食，食黍也。以，用也。用者，謂用口啜滂，用指啜醬。古文「黍」作「稷」。○啜，昌悅反。啜，子闔反。○疏曰：「爾」訓爲近，謂移之使近人也。《玉藻》云「食坐盡前」，謂臨席前畔，則不得移黍于席上。此鬼神陰陽，故從祭祀法也。舉，謂舉肺，以其舉以祭以食，故名肺爲舉。三飯，卒食。飯，扶晚反，注及下同。○卒，已也。同牢示親，不主爲食起，三飯而成禮也。○爲，于僞反。贊洗爵，酌醕主人，主人拜受。贊戶內北面答拜，醕婦亦如之，皆祭。醕，漱也。醕之言演也，安也。漱，所以潔口，且演安其所食。醕酌內尊。○漱，所又反。演，以善反。○疏曰：《特牲》注云：「醕，猶衍也，欲頤衍養樂之。」此不言獻皆云醕，直取其潔，故注云「漱所以潔口」。

演安其所食」，亦頤衍養樂之義。以下文云贊「酌于戶外尊」，故知此夫婦酌內尊也。贊以肝從，皆振祭，臠肝，皆實于菹豆。臠，才計反。○肝，肝炙也。飲酒，宜有肴以安之。○炙，之夜反。卒爵，皆拜。婦拜，見上篇見母章，此篇婦見，奠菜二章及《內則》「女拜尚右手」下。贊答拜，受爵。再醕如初，無從。三醕用盃，亦如之。亦無從也。○疏曰：自「贊洗爵」至「受爵」，皆同再醕也。贊洗爵，酌于戶外尊。人戶，西北面奠爵，拜，皆答拜。坐祭，卒爵，拜，皆答拜，興。贊酌者，白酢也。○疏曰：言「皆」者，夫婦也。三醕乃酌外尊自酢者，略賤者也。既合盃乃用爵，不嫌相襲爵，明更洗餘爵也。主人出，婦復位。復尊西南面之位。○疏曰：按下文云「主人說服于房」，則此時亦向東房矣。婦人不宜出復入，故因舊位而立也。乃徹于房中，如設于室，尊否。徹室中之饌設于房中，為媵御餽之。徹尊不設，有外尊也。○為，丁偽反。主人說服于房，媵受；婦說服于室，御受。姆授巾。說，吐活反。○巾，所以自潔清。今文，說一作

「稅」。○稅，詩銳反。○疏曰：媵受，御受，與沃盥同，亦交接有漸之義。御衽于奧，媵衽良席在東，皆有枕，北止。衽，而甚反。○衽，卧席也。婦人稱夫曰良。《孟子》曰：「將觀良人之所之。」止，足也。古文「止」作「趾」。○觀，占遍反。○疏曰：「衽于奧」，主于婦席，使御布婦席，使媵布夫席，此亦示交接有漸之義。《曲禮》云「請衽何趾」，鄭云「卧問趾」，明衽卧席也。布同牢席，夫在西，婦在東。今乃易處者，前者示陰陽交會有漸，今取陽往就陰也。主人入，親說婦之纓。說，吐活反。○人者，從房還入室也。婦人十五許嫁，笄而禮之，因著纓，明有繫也。蓋以五采為之，其制未聞。○著，丁略反。○疏曰：纓有一：《曲禮》云：「女子許嫁，纓。」注云：「繫纓，有從人之端也。」即此說纓之纓也；《內則》云：「男女未冠笄者，總角衿纓。」此幼時纓也。皆與男子冠纓異，故云「其制未聞」。燭出，昏禮畢，將卧息。媵餽主人之餘，御餽婦餘，贊酌外尊醕之。外尊，房戶外之東尊。○疏曰：賤不敢與主人同酌內尊也。媵侍于戶外，呼則聞。為尊者有所徵求。今文「侍」作「待」。○疏曰：不

使御侍于戶外者，以女爲主也。

右婦至。○記：婦入寢門，贊者徹尊

罍，酌玄酒，三屬于尊，棄餘水于堂下階間，加勺。屬，音燭，注同。○屬，注也。玄酒，澆水

貴新，昏禮又貴新，故事至乃取之。注于尊中。○澆，舒銳反。○疏曰：於外器中酌取此澆水，注于玄酒尊中。注，禮成於三也。

夙興，婦沐浴，纚笄宵衣以俟見。見，賢遍

反，注及下皆同。○夙，早也，昏明日之晨。興，起也。俟，待也，待見於舅姑寢門之外。古者命士以上，年十五，父子異宮。○疏曰：「纚笄宵衣」，《特牲》主婦宵衣也。不著純衣纚衽者，彼嫁時之盛服，今已成昏，故退從此服也。命士以上，十五以後乃異宮。不命之士，父子同宮，雖俟見，不得言舅姑寢門之外。質明，贊見婦于舅姑。席于

阼，舅即席。席于房外，南面，姑即席。質，平

也。房外，房戶外之西。古文「舅」皆作「咎」。○疏曰：此鄭知「房外」是「房戶外之西」者，以其舅在阼，阼當房戶之東。若姑在房戶之東，即當舅之北，南面向之，不便。又見下《記》云：「父醴女而俟迎者，母南面于戶外，女出于母

左。」以母在房戶西，故得女出於母左，是以知此房外亦房戶外之西也。婦執筭棗栗自門入，升自西階，

進拜，奠于席。筭，音煩。○筭，竹器而衣者，其形蓋

如今之筭簞簾矣。進拜者，進東面乃拜。奠之者，舅尊不敢授也。○衣，於既反。簞，芼居反。簾，音盧。舅坐撫

之，興，答拜，婦還又拜。還又拜者，還於先拜處

拜，婦人與丈夫爲禮則俠拜。○俠，占洽反。○疏曰：「先

拜處」者，謂前東面拜處也。「婦人與丈夫爲禮則俠拜」者，

謂若《上冠》冠者見母，母拜受，子拜送，母又拜。母於子尚

俠拜，則不徒此婦於舅而已，故廣言之。降階，受筭

脩，升進，北面拜，奠于席。姑坐，舉以興，

拜，授人。脩，丁亂反。○人，有司。姑執筭以起，答婦

拜，授有司徹，舅則宰徹之。○疏曰：必見舅用棗栗，見姑

以脩脩者，按《春秋》夫人姜氏入，「大夫宗婦覲，用幣」。

《公羊傳》云：「見用幣，非禮也。然則曷用？棗栗云乎？」

脩脩云乎？」棗栗，取其早自謹敬。脩脩，取其斷斷自修也。

右婦見。○記：筭，緇被纁裏，加于

橋。舅答拜，宰徹筭。裏，音里。○被，表也。

筭有衣者，婦見舅姑，以飾爲敬。橋，所以展筭，其制未聞。今文「橋」爲「鎬」。○鎬，戶老反。○婦見舅

姑，兄弟、姊妹妹皆立于堂下，西面北上，是見已。見，賢遍反，注同。○婦來爲供養也。其見

主於尊者，兄弟以下在位，是爲已見，不得特見。○供，恭用反。養，羊尚反。○疏曰：堂下，舅姑之堂下東邊

西向，以北爲上，近堂爲尊也。「是見已」者，舅姑在堂上，婦自南門而入，人則從於夫之兄弟、姊妹妹前度，因

以是即爲相見，不復更別詣其室見之也。見諸父各就其寢。旁尊也，亦爲見時不來。○疏曰：諸父，謂

夫之伯叔也。既是旁尊，則婦于明日乃各往其寢而見之，不與舅姑同日也。○《雜記》。

贊醴婦，醴，當爲「禮」。贊禮婦者，以其婦道新成，親厚之。席于戶牖間，室戶西，牖東，南面位。

○疏曰：禮子、禮婦、禮賓客皆於此，尊之故也。側尊甌

醴于房中，婦疑立于席西。疑，魚乙反。○疑，正立自定之貌。○疏曰：以禮未至，故疑然自定而立以待事

也。若行禮之間而立，則云立，不云疑立也。贊者酌

醴，加枲，面枋，出房，席前北面。婦東面拜受。贊西階上北面拜送，婦又拜，薦脯醢。

婦東面拜，贊北面答之，變于丈夫始冠成人之禮。○冠，古亂反，下「猶冠」、「冠子」同。○疏曰：「面枋，出房」者，以

其即席，故面枋。《冠禮》贊授賓則面葉，賓授子乃面枋也。《冠禮》禮子與此禮婦俱在賓位。彼南面授醴者，以向賓

拜，此東面者，以舅姑在東，亦面之拜也。婦升席，左執觶，右祭脯醢，以枲祭醴三，降席，東面坐，

啐醴，建枲，興，拜。贊答拜，婦又拜。奠于薦東，北面坐取脯，降，出，授人于門外。奠于

薦東，升席奠之，取脯降出授人，親徹，且榮得禮。人，謂婦氏人。

氏人。

右醴婦。○記：婦席薦饌于房。醴

婦，饌婦之席薦也。○疏曰：醴婦時唯席與薦，無俎，其

饌婦并有俎，俎則不饌于房，從鼎升于俎，人設于席前。今據醴婦時而言也。

舅姑入于室，婦盥饋。饋，其位反。○饋者，

婦道既成，成以孝養。○養，于亮反。特豚，合升，側

載，無魚腊，無稷，並南上。其他如取女禮。

取，七住反。○側載者，右胖載之舅俎，左胖載之姑俎，異

尊卑。並南上者，舅姑共席于奧，其饌各以南爲上。其他，

謂醬清菹醢。女，謂婦也，如取婦禮同牢時。今文「並」當

作「併」。○併，步頂反。○疏曰：自「側載」以下，「南上」

以上，與取女異。彼有魚腊并稷，此則無魚腊與稷，彼男

東面，女西面別席，其醬醢菹，夫則南上，婦則北上，今此舅

姑共席東面，俎及豆等皆南上，是其異也。周人尚右，故知

「右胖載之舅俎，左胖載之姑俎」，以「異尊卑」也。婦贊

成祭，卒食，一醕，無從。贊成祭者，授處之。今文

無「成」也。○疏曰：授處，謂授之又處置，令知在於豆間

也。席于北墉下。墉，牆也，室中北牆下。○疏曰：

此席將爲婦餞之位。婦徹，設席前如初，西上。

婦餞，舅辭，易醬。婦餞者，即席將餞也。辭易醬者，

嫌滓汙。○滓，七內反，本或作「染」，如琰反。汚，污穢之

汚。○疏曰：「舅辭易醬」者，舅尊故也。「西上」者，亦以

右爲上也。言「將」者，事未至，至下文，婦餞姑之饌，乃始

餞耳。又云，嫌滓汙者，以其醬乃以指嘔之，滓汙也。婦

餞姑之饌，御贊祭豆、黍、肺，舉肺、脊，乃食。

卒，姑醕之，婦拜受，姑拜送。坐祭，卒爵，姑

受奠之。奠之，奠于筐。○疏曰：不餞舅餘者，以舅尊，

嫌相襲。「贊祭」，贊婦祭也。取女有筐，此亦如之也。婦

徹于房中，媵御餞，姑醕之。雖無娣，媵先，

于是與始飯之錯。古者嫁女，必姪娣從，謂之媵。

姪，兄之子。娣，女弟也。娣尊姪卑。若或無娣，猶先媵，

客之也。始飯，謂舅姑。錯者，媵餞舅餘，御餞姑餘也。古

文「始」爲「姑」。○從，才用反。○疏曰：媵有二種，若諸

侯有二媵外，<sup>①</sup>別有姪娣。《公羊傳》曰：「媵者，諸侯娶一

國，則一國往媵之。」諸侯夫人自有姪娣，并二媵各有姪娣，

則九女是媵，與姪娣別也。若大夫，士無二媵，即以姪娣爲

媵。今言「雖無娣」者，言雖無娣而唯有姪，亦先醕，此姪之

爲媵者也。舅姑始飯，而媵餞舅餘，御餞姑餘，交錯之

義也。

①「有二」，原作「則有」，據賀本改。



## 右婦饋。

舅姑共饗婦以一獻之禮。舅洗于南洗，

姑洗于北洗，奠酬。以酒食勞人曰饗。南洗在庭，北

洗在北堂。設兩洗者，獻酬酢以潔清為敬。奠酬者，明正

禮成，不復舉。凡酬酒皆奠于薦左，不舉，其燕則更使人舉

爵。<sup>①</sup>○勞，力報反。○疏曰：此饗與上盥饋同日為之，以

《昏義》云「厥明」，是容大夫以上或異日，故知此士同日也。

此亦于舅姑寢堂之上，與禮婦同在客位也。云「共饗婦」

者，舅獻而姑薦也。姑無洗爵之事，而設北洗為姑洗，則是

舅獻姑酬，共成一獻，仍無妨姑薦脯醢也。以《鄉飲酒》之

禮約之，席在室戶外西，舅酌酒于阼階獻婦，婦西階上受

飲，畢，又酢舅，乃姑先酌自飲，畢，更酌酒以酬婦，婦受

爵，<sup>②</sup>奠于薦左，不舉爵，正禮畢也。又云「燕則更使人舉

爵」者，按《燕禮》：獻酬訖，別有人舉旅行酬也。舅姑先

降自西階，婦降自阼階。授之室，使為主，明代己。

○疏曰：《曲禮》云：子事父母，「升降不由阼階」。阼階是

主人尊者升降之處，今舅姑降自西階，婦降自阼階，是授婦

以室之義也。「授之室」，《昏義》文。歸婦俎于婦氏

人。言俎，則饗禮有牲矣。婦氏人，丈夫送婦者，使有司

歸以婦俎，當以反命于女之父母，明得其禮。○疏曰：按

《雜記》云大饗「卷」牲之俎歸于賓館，是賓所當得也。饗

時設几而不倚，爵盈而不飲，肴乾而不食，故歸俎。此饗

婦，婦亦不食，故歸之也。經雖不言牲，既言俎，俎所以盛

肉，故知有牲。此「婦氏人」即上婦所授脯者也。

右饗婦。○記：婦席薦饌于房，注，疏

已見禮婦。饗婦，姑薦焉。舅姑共饗婦，<sup>③</sup>舅獻

爵，姑薦脯醢。婦洗在北堂，直室東隅，筐在

東，北面盥。洗在北堂，所謂北洗。北堂，房中半以

北。洗南北直室東隅，東西直房戶與隅間。○疏曰：房

與室相連，房無北壁，故得北堂之名，故云「洗在北堂」

也。云「北堂房半以北」者，<sup>①</sup>以其南堂是戶外半以南，

①「更」，原作「受」，據元明本、寬文本、賀本改。

②兩「婦」字，原作「姑」，據賀本改。

③「姑」，原作「姓」，據元明本、寬文本、賀本改。

④「北者」，原作「此春」，據元明本、寬文本、賀本改。

得堂名，則堂是戶外之稱，則知房半以北謂之北堂也。①

知房無北戶者，《燕禮》、《大射》皆云羞膳者升自北階，立于房中。不言入房，是無北壁，亦無戶，是以得設洗直室東隅也。「直室東隅」者，南北之節也。「直房戶與隅間」者，東西之節也。婦酢舅，更爵，自薦。更爵，男女不相因也。○疏曰：謂舅姑饗婦時，舅獻姑薦，今婦酢舅，婦自薦之也。不敢辭洗，舅降則辟于房，不敢拜洗。辟，音避。○不敢與尊者為禮。○疏曰：此當在婦酢舅之上，今在此者，欲見酬酒洗時亦不辭故也。凡婦人相饗，無降。姑饗婦人送者于房，無降者，以北洗筐在上。○疏曰：婦人有事不下堂，舅姑饗婦及姑饗婦人送者皆然。○庶婦則使人醺之，婦不饋。醺，子召反。○庶婦，庶子之婦也。使人醺之，不饗也。酒不酬酢曰醺，亦有脯醢。適婦酌之以醴，尊之，庶婦酌之以酒，卑之；其儀則同。不饋者，共養統于適也。○適，丁狄反，下同。共，九用反。○疏曰：其儀則同者，適婦用體于客位，東面拜受醴，贊者北面拜送。今庶婦雖于房外之西，亦東面拜受，醺者亦北面拜送也。庶婦但不饋耳，不言不見，明亦以束

栗殿脩見舅姑也。

舅饗送者以一獻之禮，酬以束錦。送者，

女家有司也。爵至酬賓，又從之以束錦，所以相厚。古文「錦」皆作「帛」。○疏曰：此一獻依常饗賓客法。尊無送卑之法，大夫嫁女，遣臣送之，士無臣，故有司送之也。「古文錦皆為帛」，此不從者，禮有玉錦，非獨此文，則禮有贈錦之事也。姑饗婦人送者，酬以束錦。婦人送者，隸子弟之妻妾。凡饗，速之。○疏曰：《左氏傳》云「士有隸子弟」，上卑無臣，自以其子弟為僕隸。尊無送卑，故知婦人送者是隸子弟之妻妾也。《聘禮》饗食速賓，知此亦速之也。凡速者，皆就館召。下注云「就賓館」，是賓自有館也。「婦人送」者，亦當有館。男子則主人親速，其婦送者則婦人迎客不出門，當別遣人速之。若異邦，則贈丈夫送者以束錦。贈，送也。就賓館。○疏曰：《公羊傳》云：「大夫越境逆女，非禮也。」鄭注《喪服》亦云：「古者大夫不外娶。」今言「異邦」得外娶者，以大夫尊，外娶則外交，故不許。上卑不嫌，容有外娶法，故有異邦送客也。贈

① 兩「北」字，原作「此」，據元明本、寬文本、賀本改。

賄之等皆就館，故知此亦就館也。

### 右饗送者。

婦人三月，然後祭行。入夫之室三月之後，於

祭乃行，謂助祭也。○疏曰：此據舅在無姑或舅沒姑老者，若舅在無姑，三月不須廟見，則助祭。按《內則》云「舅沒則姑老」者，謂姑六十亦傳家事，任長婦。婦人三月廟見，祭菜之後，亦得助祭也。此亦謂適婦，其庶婦無此事也。

### 右祭行。《記》補。

若舅姑既沒，則婦人三月乃奠菜。沒，終

也。奠菜者，以筐祭菜也，蓋用菹。○菹，音謹。○疏曰：

必三月者，三月一時天氣變，婦道可成也。此言舅姑俱沒者，若舅沒姑存，則當時見姑，三月亦廟見舅。若舅存姑沒，婦人無廟可見，或更有繼姑，自然如常禮也。按《曾子問》云：「三月而廟見，擇日而祭於廟。」鄭云：「謂舅姑沒者

也，婦有供養之禮，猶舅姑存時盥饋特豚于室。」此言奠菜，即彼祭于廟，一也。「用菹」者，取謹敬。亦因《內則》有菹、

苴、芬、榆供養，故疑之也。席于廟奧，東面，右几。

席于北方，南面。席，考妣之席。北方，墻下。○疏

曰：按《周禮·司几筵》云「每敦一几」，鄭注云：「周禮，雖

合葬及時同在殯，皆異几，體質不同，祭于廟，同几，精氣合。」又《祭統》云「設同几」，同几即同席，此即祭于廟中而

別席者。此既席見，若生時見舅姑，舅姑別席異面，是以今亦異席別面，象生，不與常祭同也。祝盥，婦盥于門

外。婦執筭菜，祝帥婦以入。祝告，稱婦之

姓曰：「某氏來婦，敢奠嘉菜于皇舅某子。」

帥，道也。人，入室也。某氏者，齊女則曰姜氏，魯女則曰

姬氏。來婦，言來為婦。嘉，美也。皇，君也。○疏曰：洗

在門外，祝與婦就而盥之者，此亦異于常祭。象生見舅姑，

在外沐浴，乃入舅姑之寢，故洗在門外也。「祝帥婦以入」

者，象《特牲》陰厭祝先主人入室也。「某子」者，言若張子、

李子也。婦拜扱地，坐奠菜于几東席上，還，

又拜如初。扱，初洽反。○扱地，手至地也。婦人扱

地，猶男子稽首。○疏曰：以手至地謂之扱地，婦人肅拜

為正，手不扱地，今重其禮，故扱地也。蓋稽首者，拜頭至

地，男子拜中之重。今之扱地，則婦人之重拜，故以相況

也。鄭司農云：稽首，是臣拜君之拜。肅拜，但俯下手，今

時掙是也。婦降堂，取筭菜人。祝曰：「某氏

來婦，敢告于皇姑某氏。」奠菜于席，如初禮。降堂，階上也。室事交乎戶，今降堂者，敬也。於姑言敢告，舅尊於姑。○疏曰：此爲設于北坐之前以見姑也。「降堂」者，在階上也。「室事交乎戶，堂事交乎階」，《禮器》文。今此是室事，當交于戶，乃交于階，故言敬也。婦出，祝闔牖戶。凡席無事則閉之。○疏曰：先牖後戶者，先闔牖後闔戶也。無事則閉之，以鬼神尚幽闇也。老醴婦于房中，南面，如舅姑醴婦之禮。因于廟見禮之。○疏曰：舅姑生時見訖，舅姑使贊醴婦于寢之戶牖之間，今舅姑沒者，使老醴婦于席之房中，其禮則同，使老及處所則別也。壻饗婦送者，丈夫、婦人，如舅姑饗禮。疏曰：舅姑存，舅姑自饗送者，如上文。今舅姑沒，故壻兼饗丈夫、婦人，如舅姑饗禮，并有贈錦之等。右奠菜。

若不親迎，則婦入三月然後壻見，曰：「某以得爲外昏姻，請覲。」見，賢遍反，注下除「相見」並同。覲，音狄。○女氏稱昏，壻氏稱姻。覲，見也。○疏曰：必三月者，亦如三月婦廟見，一時天氣變，婦道

成，故見外舅姑。自此至「敢不從」，並是壻在婦家大門外，與攬者請對之辭。男曰昏，女曰姻者，義取壻昏時往娶，女則因之而來。及其親，則女氏稱昏，男氏稱姻，義取送女者昏時往男家，因得見之故也。主人對曰：「某以得爲外昏姻之數，某之子未得濯漑於祭祀，是以未敢見。今吾子辱，請吾子之就宮，某將走見。」濯，丈角反。漑，古代反。○主人，女父也。以白造緇曰辱。○造，七報反。○疏曰：「濯漑」者，前祭之夕濯漑祭器，以其自此以前未廟見，未得祭祀，故未敢相見也。「就宮」者，使壻還就家也。以潔白之物造置于緇色器中，<sup>①</sup>是汙白色。猶今賓至己門，亦是屈辱也。對曰：

「某以非它故，不足以辱命，請終賜見。」非它故，彌親之辭。命，謂將走見之言。今文無「終賜」。對曰：「某以得爲昏姻之故，<sup>②</sup>不敢固辭，敢不從。」不言外，亦彌親之辭。古文曰：外昏姻。主人出

① 「器」，原作「之」，據元明本、寬文本、賀本改。

② 「以得」，原作「得以」，據元明本、寬文本、賀本改。

門左，西面。壻入門，東面。奠摯，再拜，出。

出門，出內門。入門，入大門。出內門不出大門者，異于賓客也。壻見于寢。奠摯者，壻有子道，不敢授也。摯，雉也。○疏曰：「壻見于寢」者，《聘禮》凡見賓客及親迎皆于寢，壻見外舅姑，非賓非親迎，故知在適寢也。凡執摯相見，皆親授受，此獨奠之，象父子之道質，故不親授也。擯

者以摯出，請受。欲使以賓客禮相見。○疏曰：按

《聘禮》，賓執贄入門右，從臣禮，辭之，乃出，由門左西向北面，從賓客禮，此亦然也。壻禮辭，許，受摯，入。

主人再拜受，壻再拜送，出。出，已見女父。○疏

曰：「受摯，入」者，亦如《聘禮》受摯乃更西入也。又云「出，已見女父」者，以其相見訖，擬出更與主婦相見也。

見主婦，主婦闔扉，立于其內。扉，音非。○主

婦，主人之婦也。見主婦者，兄弟之道，宜相親也。闔扉者，婦人無外事。扉，左扉。○疏曰：《爾雅》：「母與妻之黨為兄弟。」故知主婦于壻者，兄弟之道也。《士喪禮》云：

「闔東扉，主婦立于其內。」東扉即左扉也。壻立于門

外，東面。主婦一拜，壻答再拜。主婦又拜，

壻出。必先一拜者，婦人于丈夫必俛拜。主人請醴，

及揖讓入，醴以一獻之禮。主婦薦，奠酬，無

幣。及，與也。無幣，異于賓客。○疏曰：主人與壻揖讓

而入寢門，升堂醴壻也。《冠》、《昏》、《燕》、《射禮》酬賓皆

有幣，故云「異于賓客」也。壻出，主人送，再拜。

右壻見婦之父母。《記》補。

## 昏義第四

## 家禮二之下

天地合而后萬物興焉。疏曰：天氣下降，地

氣上騰，天地合配則萬物生焉，若夫婦合配則子胤生焉。

夫昏禮，萬世之始也。取於異姓，所以附遠

厚別也。取，音娶。遠，于萬反。別，兵列反，下注皆同。

○同姓或取，<sup>①</sup>多相褻也。○疏曰：「取異姓」者，所以依附

相疏遠之道，厚重分別之義，不欲相褻，故不取同姓也。

幣必誠，辭無不腆，誠，信也。腆，猶善也。○疏曰：

①「取」，原作「則」，據元明本、寬文本、賀本改。

誠者，謂勿令濫惡，使可裁制。賓之傳辭，無白謙退，云幣不善，不許飾也。告之以直信。直，猶正也。此二者所以教婦正直信也。信，事人也；信，婦德也。事，猶立也。○疏曰：人有是身，非信不立。婦人之德，尤在貞信。壹與之齊，終身不改，故夫死不嫁。齊，謂共牢而食，同尊卑也。齊，或爲「醮」。男子親迎，男先於女，剛柔之義也。天先乎地，君先乎臣，其義一也。迎，魚敬反，下同。先，悉薦反，下及注同。○先，謂倡道也。○倡，昌亮反。道，音導，下「先道」同。執摯以相見，敬章別也。言不敢相褻也。摯，所奠鴈也。○疏曰：章，明也。壻親迎先奠鴈，後乃與婦相見，是先行敬，以明夫婦禮有分別，不妄交親。男女有別，然後父子親；父子親，然後義生；義生，然後禮作；禮作，然後萬物安。言人倫有別，則氣性醇也。無別無義，禽獸之道也。言聚麀之亂類也。○麀，音憂。壻親御授綬，親之也。親之也者，親之也。言已親之，所以使之親己。敬而親

之，先王之所以得天下也。先王，若大王、文王。○大，音泰。出乎大門而先，男帥女，女從男，夫婦之義由此始也。先，如字。○先者，車居前也。①婦人，從人者也。幼從父兄，嫁從夫，夫死從子。從，謂順其教令。夫也者，夫也。夫也者，以知帥人者也。知，音智。○夫之言丈夫也。夫，或爲「傳」。玄冕齊戒，鬼神陰陽也。將以爲社稷主，爲先祖後，而可以不致敬乎？玄冕，祭服也。陰陽，謂夫婦也。○疏曰：玄冕，謂助祭服也。著祭服而齊戒親迎，是敬此夫婦之道如事鬼神也。妻爲內主，故有國者是爲社稷內主也。始此嗣廣後世，故云先祖後也。士昏以爵弁，是士服之上者，則天子以下皆用上服。共牢而食，同尊卑也，故婦人無爵，從夫之爵，坐以夫之齒。爵，謂夫命爲大夫，則妻爲命婦。器用陶匏，尚禮然也。此謂大古之禮器也。○大，

①「車居」，原作「居車」，據元明本、寬文本、賀本改。

音泰。○疏曰：共牢之時，俎以外，其器但用陶匏而已。三王作牢用陶匏。言大古無共牢之禮，三王之世作之，而用大古之器，重夫婦之始也。厥明，婦盥饋，舅姑卒食，婦餼餘，私之也。私之，猶言恩也。○疏曰：其明，謂共牢之明日也。食餘曰餼，謂舅姑食竟以餘食與之也。舅姑降自西階，婦降自阼階，授之室也。明當為家事之主也。昏禮不用樂，幽陰之義也。樂，陽氣也。幽，深也，欲使婦深思其義，不以陽散之也。○疏曰：陽是動散，用樂則令婦志意動散，不能深思陰靜之義以修婦道也。昏禮不賀，人之序也。序，猶代也。○程氏曰：「昏禮不用樂，幽陰之義」，此說非是。昏禮豈是幽陰，但古人重此大禮，嚴肅其事，不用樂也。「昏禮不賀，人之序也」，此則得之。○《郊特牲》。○昏禮者，將合二姓之好，上以事宗廟，而下以繼後世也，故君子重之。是以昏禮納采、問名、納吉、納徵、請期，皆主人筵几於廟，而拜迎於門外；入，揖讓而升，聽命於廟，所以

敬慎重正昏禮也。好，呼報反。○聽命，謂主人聽使者所傳壻家之命。○疏曰：「問名」者，問其女之所生母之姓名，故《昏禮》云「為誰氏」，言女之母何姓氏也。○今按：此說與《儀禮》後《記》疏義不同，未詳孰是。父親醮子而命之迎，男先於女也。子承命以迎，主人筵几於廟，而拜迎于門外。壻執鴈入，揖讓升堂，再拜奠鴈，蓋親受之於父母也。降出，御婦車，而壻授綬，御輪三周，先俟于門外。婦至，壻揖婦以入，共牢而食，合卺而醕，所以合體同尊卑，以親之也。合，音閤，又如字。○酌而無酬酢曰醕。醕之禮如冠醕與？其異者于寢耳。壻御婦車輪三周，御者代之，壻自乘其車先道之歸也。共牢而食，合卺而醕，成婦之義。○與，音余。○疏曰：所以必命迎者，欲使男往迎之，女則從男而來，是男子先迎，女從後至也。「拜迎于門外」者，壻來親迎而以敵禮待之也。卺，謂半瓢，以一瓠分為兩瓢謂之卺。壻之與婦各執一片以醕，故云「合卺而醕」。「同尊卑」，謂共牢也。「所以合體同尊卑」者，欲使壻之親婦，婦亦親壻，所以體同為一。

不使尊卑有殊也。敬慎重正而後親之，禮之大體，而所以成男女之別而立夫婦之義也。男女有別，而後夫婦有義；夫婦有義，而後父子有親；父子有親，而後君臣有正。故曰：昏禮者，禮之本也。言子受氣性純則孝，孝則忠也。○疏曰：所以昏禮爲禮本者，昏姻得所則受氣純和，生子必孝，事君必忠。孝則父子親，忠則朝廷正，是昏禮爲諸禮之本也。○今按：此義已見首章。夙興，婦沐浴以俟見。質明，贊見婦於舅姑，婦執筭，棗栗殷脩以見。贊醴婦，婦祭脯醢，祭醴，成婦禮也。成其爲婦之禮也。贊醴婦，當作禮，聲之誤也。舅姑入室，婦以特豚饋，明婦順也。以饋明婦順者，供養之禮，主于孝順。○疏曰：士昏，故有特豚饋于舅姑。若大夫以上，非唯特豚而已。厥明，舅姑共饗婦以一獻之禮，奠酬。舅姑先降自西階，婦降自阼階，以著代也。言既獻之，而授之以室事也。降者，各還其燕寢，婦見及饋饗于適寢。《昏禮》不言厥明，此

言之者，容大夫以上禮多，或異日。○適，丁歷反。上，時掌反。○疏曰：此以士爲主，亦兼明大夫，故「厥明」饗婦。若士，婦見舅姑之日，即舅姑饗婦，不待厥明。「著代」者，謂阼階是舅姑所升之處，今婦由阼階而降，是著明代舅姑之事也。「適寢」者，謂舅姑之適寢也。成婦禮，明婦順，又申之以著代，所以重責婦順焉也。婦順者，順於舅姑，和於室人，而後當於夫，以成絲麻布帛之事，以審守委積蓋藏。當，丁浪反，下注同，下注「和當」亦同。委，於僞反。積，子賜反。藏，才浪反。○室人，謂女妯、女叔、諸婦也。當，猶稱也。後言稱夫者，不順舅姑，不和室人，雖有善者，猶不爲稱夫也。○妯，音中。稱，尺證反，下同。○疏曰：「以審守委積蓋藏」者，言以此詳審保守家之所有委積掩蓋藏聚之物也。室人，是在室之人，非男子也。女妯，謂壻之姊。女叔，謂壻之妹。諸婦，謂娣姒之屬。是故婦順備而後內和理，內和理而後家可長久也，故聖王重之。順備者，行和當事成審也。○行，下孟反。○疏曰：行，是順于舅姑。和，謂和于室人。當，謂當于夫事。成



審者，「成絲麻布帛之事，以審守委積蓋藏」也。是以古者婦人先嫁三月，祖廟未毀，教于公宮。祖廟既毀，教于宗室。教以婦德、婦言、婦容、婦功。教成祭之，牲用魚，芼之以蘋藻，所以成婦順也。先，悉薦反。芼，莫報反。蘋，音頻。藻，音早。○謂天子、諸侯同姓者也，嫁女必就尊者教成之。教成之者，女師也。祖廟，女所出之祖也。公，君也。宗室，宗子之家也。婦德，貞順也。婦言，辭令也。婦容，婉婉也。婦功，絲麻也。祭之，祭其所出之祖也。魚、蘋藻，皆水物陰類也。魚爲俎實，蘋藻爲羹菜，祭無牲牢，告事耳，其齊盛用黍云。君使有司告之宗子之家，若其祖廟已毀，則爲壇而告焉。○婉，紆免反。婉，音晚。齊，音咨。○疏曰：祖廟、公宮、宗室，說見上篇。教之三月，其教已成，祭女所出祖廟而告之。以爲未嫁之前先教四德，又祭而告，欲使嫁而爲婦，奉遵此教而成和順也。天子當言王宮，今經云「公宮」，知兼天子者，若天子公邑官家之宮耳，非專謂諸侯公宮也，謂公之宮也。此《昏義》雖記士昏禮之事，自此以下廣明天子以下教女及婦之義，故此經教女舉貴者而言之。注言「女所出之祖」，當謂高祖以下也。①天子雖七

廟，②親廟止自高祖以下，與諸侯同也。云「公，君也」者，天子、諸侯皆稱君。云「宗室，宗子之家」而不云大宗、小宗，則大宗、小宗之家悉得教之。與大宗近者，于大宗教之；與大宗遠者，于小宗教之。此記謂君之同姓，若君之異姓，亦有大宗、小宗，其族人嫁女，各於其家也。祭君之廟，應用牲牢，今俎唯魚，以其告祭，故不用牲也。不用正牲，則無稻粱。既以蘋藻爲羹，則當有齊盛，而士祭特牲黍稷，故知此亦用黍也。公族「教於宗室」者，使有司告之。若卿大夫以下，則女主之而宗子掌其禮也。「爲壇而告」者，謂與宗子或同曾祖。假令宗子爲士，只有父、祖廟，曾祖、高祖無廟，則爲壇於宗子之家而告焉。此注或有作「壇」者，誤也。蓋《祭法》適士二廟一壇，則曾祖爲壇也；大夫三廟二壇，則高祖及高祖之父爲壇。唯宗子爲中士、下士，但有一廟無壇，則爲壇而告之耳。○此以上係本文。疏言教于小宗之家，亦與前篇義異。以下係補。○魯哀公問於

孔子曰：「禮，男必三十而有室，女必二十而

①「當」，原作「常」，據元明本、寬文本、賀本改。

②「雖七」，原作「以下」，據元明本、寬文本、賀本改。

有夫也，豈不晚哉？」孔子曰：「夫禮言其極也，不是過也。男子二十冠，有爲人父之端；女子十五許嫁，有適人之道。於此而往，則爲昏矣。群生閉藏乎陰，而爲化育之始。陰爲冬也，冬藏物而爲化育始。故聖人因時以合偶男女，窮天數也。窮，極也。霜降而婦功成，嫁娶者行焉。季秋霜降，嫁娶者始于此，《詩》云：『將子無怒，秋以爲期』也。冰泮而農桑起，婚禮而殺於此。殺，所界反。○泮，散也。正月農事起，蠶者採桑，婚禮始殺，言未止也。至二月農事始起，會男女之無夫家者奔者，期盡此月故也。《詩》云：『上如歸妻，迨冰未泮。』言如欲使妻歸，當及冰未泮散之盛時。男子者，任天道而長萬物者也。知可爲，知不可爲；知可言，知不可言；知可行，知不可行者也。是故審其倫而明其別，謂之知，所以效匹夫之聽也。任，如深反。長，丁丈反。別，彼列反。○聽，宜爲「德」。女子者，順男子之教而長其理者也。

爲男子長養其理分。是故無專制之義而有三從之道，幼從父兄，既嫁從夫，夫死從子。言無再醮之端。始嫁言醮，禮無再醮之端，言不改事人，首章所謂夫死不嫁也。教令不出于閨門，事在供酒食而已，無閨外之非儀也。閨門，限婦人以貞專，無閨外之威儀，《詩》云：「無非無儀，唯酒食是議。」<sup>①</sup>孟子之母曰：婦人之職，精五飯，晷五漿，養舅姑，縫衣裳而已。故有閨門之修而無閨外之志。不越境而奔喪，事無擅爲，行無獨成。參知而後動，可驗而後言。晝不遊庭，夜行以火。所以效匹婦之德也。」孔子遂言曰：「女有五不取：逆家子也，亂家子也，世有刑人子也，世有惡疾子也，喪父長子也，此五者皆不取也。○今按：何休作「喪婦長女」，下同。逆家子者，謂其逆德也；何休曰：廢人倫也。亂家子者，謂其亂倫；何休曰：類不正也。世有刑人子

①「議」，原作「儀」，據寬文本、賀本改。

者，謂其棄於人也；有惡疾子者，謂其棄於天也；喪父長子，謂其無受命也。何休曰：無教戒也。婦有七出三不去，七出者：不順父母

出，無子出，淫僻出，惡疾出，<sup>①</sup>嫉妬出，多口舌出，竊盜出。

不順父母出者，謂其逆德也；無子者，謂其絕世也；淫僻者，謂其亂族；嫉妬者，謂其亂家；惡疾者，謂其不可供粢盛；多口舌者，謂其離親；竊盜者，謂其反義。三不去者：謂其有所取無所歸，一也；何休「取」作「受」，又云：不窮窮也。與共更三年之喪，二也；

更，工行反。○何休曰：不忘恩也。先貧賤後富貴，

三也。何休云：賤取貴不去，不背德也。<sup>②</sup>凡此聖人

所以順男女之際，重婚姻之始也。」「《家語》。

○子云：「夫禮，坊民所淫，章民之別，使民

無嫌，以為民紀者也。」淫，猶貪也。章，明也。嫌，

嫌疑也。故男女無媒不交，無幣不相見，恐男

女之無別也。重男女之會，所以遠別之於禽獸也。有

幣者必有媒，有媒者不必有幣。仲春之月，會男女之時，不必待幣。以此坊民，民猶有自獻其身。獻，猶進也。○疏曰：謂民之女人猶有自進其身以求男者也。取

妻不取同姓，以厚別也。厚，猶遠也。故買妾

不知其姓，則卜之。妾言買者，以其賤，同之於衆物

也。上庶之妾恒多凡庸，有不知其姓者。以此坊民，

魯《春秋》猶去夫人之姓曰「吳」，其死曰「孟子卒」。吳，大伯之後，魯同姓也。昭公取焉，去「姬」曰

「吳」而已。至其死，亦略云「孟子卒」，不書夫人某氏薨。

孟子，蓋其且字。○疏曰：《春秋》之例，吳女亦當云「夫人

姬氏至自吳」，魯則諱其姬姓而不稱，但云謂之吳孟子，是

當時之言有稱「吳」也。禮：非祭，男女不交爵。

交爵，謂相獻酢。○疏曰：唯祭之時乃得交爵，《特牲饋食

禮》曰：主婦獻尸，尸酢主婦。是交爵也。以此坊民，

陽侯猶殺繆侯而竊其夫人，同姓也，以貪夫人之

①「惡疾」，原作「疾惡」，據元明本、寬文本、賀本改。

②「背」下，原有「責」字，據元明本、寬文本、賀本刪。

色，至殺君而立。其國未聞。○疏曰：陽侯、繆侯，是兩君之謚，未聞何國。**故大饗廢夫人之禮。**大饗，饗諸

侯來朝者也。夫人之禮，使人攝。○疏曰：王饗諸侯及諸侯自相饗，同姓則后，夫人親獻，異姓則使人攝獻。繆侯所饗，蓋同姓之國。自其見殺之後，遂廢夫人親出饗賓之禮，並使人攝也。此經云，非祭不交爵者，謂異姓也。寡婦

之子，不有見焉，則弗友也，君子以辟遠也。

有見，謂睹其才藝也。同志為友。故朋友之交，主人

不在，不有大故，則不入其門。大故，喪疾。以

此坊民，民猶以色厚於德。子云：「好德如

好色。」此句似不足，《論語》曰：「未見好德如好色。」疾

時人厚于色之甚而薄于德也。諸侯不下漁色，謂不

內取于國中，內取國中為下漁色。昏禮始納采，謂采擇

其可者也。國君而內取，象捕魚然，中網取之，是無所擇。

故君子遠色以為民紀，故男女授受不親。不

親者，不以手相與也。《內則》曰：非祭非喪，不相授器。

其相授，則女受以筐。①其無筐，則皆坐奠之而後取之。

御婦人則進左手。御者在右，前左手則身微借之。

○疏曰：御者之禮，婦人於車上左廂，御者在婦人之右。「進左手」，謂左手在前轉身向右，微借婦人。姑、姊、

妹、女子子已嫁而反，男子不與同席而坐。

女子十年而不出也，嫁及成人可以出矣，猶不與男子共席

而坐，遠別。寡婦不夜哭。嫌思人道。婦人疾，問

之，不問其疾。嫌媚，略之也，問增損而已。以此坊

民，民猶淫佚而亂於族。亂族，犯非妃匹也。昏

禮：壻親迎，見於舅姑，舅姑承子以授壻，恐

事之違也。舅姑，妻之父母也。妻之父為外舅，妻之母

為外姑。父戒女曰「夙夜無違命」，母戒女曰「毋違宮事」。

○疏曰：恐此女人於昏事乖違，故親以女授壻也。以此

坊民，婦猶有不至者。不至，不親夫以孝舅姑也。

《春秋》成公九年春二月，伯姬歸于宋，夏五月，季孫行父如

宋致女。是時宋其公不親迎，恐其有違而致之也。○《坊

記》。○衛公使其大夫求婚於季氏，桓子問禮

於孔子，子曰：「同姓為宗，有合族之義，故

①「受」，原作「授」，據元明本、寬文本、賀本改。

繫之以姓而弗別，綴之以食而弗殊，君有食族人之禮，雖親盡不異之。殊食，多少也。雖百世婚姻不得通，周道然也。」桓子曰：「魯、衛之先，雖寡兄弟，今已絕遠矣，可乎？」孔子曰：「固非禮也。夫上治祖禰，以尊尊也；下治子孫，以親親也；旁治昆弟，所以敦睦也；此先王不易之教也。」《家語》。○《白虎通義》曰：娶妻不先告廟者，示不必安也。昏禮請期，不敢必也。遣女於禰廟者，重先人之遺支體也，不敢自專，故告禰也。去不辭，誠不諾者，蓋恥之重去也。婦人三月然後祭行，<sup>①</sup>舅姑既沒，亦婦人三月莫采于廟。三月一時，物有成者，人之善惡可知知也，然後可得事宗廟之禮。未廟見而死，歸葬于女氏之黨，示未成婦也。夫有惡行，妻不得去者，地無去天之義也。天子、諸侯一娶九女何？重國家、廣繼嗣也。娶九女，亦足以承君之

施也。九而無子，百亦無益也。《王度記》曰：「天子諸侯一娶九女。」娶一國則兩國媵之，皆以姪娣從也。或曰：天子娶十二女，法天有十二月，萬物必生也。必一娶何？防淫佚也。爲其棄德嗜色，故一娶而已，人君無再娶之義也。備姪娣從者，爲其不相嫉妬也。一人有子，三人共之，若己有之也。不娶兩娣何？傳異氣也。娶三國女何？異類也。恐一國血脈相似，俱無子也。姪娣年少，猶從適人者，明人君無再娶之義。還待年於父母之國，未任答君子也。娶妻卜之何？卜女之德，知相宜否。人君及宗子無父母，自定娶者，卑不主尊，賤不主貴也。大夫功成受封，得備八妾者，重國家、廣繼嗣也。不更娉大國者，不忘本適也。天子、諸

① 入，原作、人，據元明本、寬文本、賀本改。

侯之世子，皆以諸侯禮娶，與君同，示無再娶之義也。不娶同姓者，重人倫，防淫佚，恥與禽獸同也。外屬小功以上，亦不得娶也。王者嫁女，必使同姓諸侯主之何？婚禮貴和，不可相答，爲傷君臣之義，亦欲使女不以天子尊乘諸侯也。必使同姓者，以其同宗共祖，可以主親，故使攝父事也。卿大夫一妻二妾者何？尊賢重繼嗣也。不備姪娣何？北面之勢不足盡人骨肉之親。士一妻一妾何？下卿大夫也。婦人所以有師何？學事人之道也。學一時，足以成矣。與君有總麻之親者，教于公宮三月，與君無親者，各教于宗廟宗婦之室。國君取大夫之妾、士之妻老無子而明於婦道者又祿之，使教宗室五屬之女。大夫、士皆有宗族，自於宗子之室學事人也。女必有傅姆何？尊之也。○魯師春姜曰：「夫婦人以順從爲務，貞慤爲首，

故婦人事夫有五：平旦纚笄而朝，則有君臣之嚴；沃盥饋食，則有父子之敬；報反而行，則有兄弟之道；受期必誠，則有朋友之信；寢席之交，而後有夫婦之際。」《列女傳》。

○《白虎通義》作，婦人學事舅姑，不學事夫。漱櫛纚笄總而朝，君臣之道也；惻隱之恩，父子之道也；會計有無，兄弟之道也；閨闈之內，衽席之上，朋友之道也。與此小異，今併著之。○司空季子曰：「昔少典娶于有

嬌氏，生黃帝、炎帝。嬌，音喬。○賈侍中曰：少典，

黃帝之先。有嬌，諸侯也。炎帝，神農也。虞唐云：少典，黃帝、炎帝之父。韋昭曰：神農，三皇也，在黃帝前，黃帝滅其子孫耳，明非神農可知也。言生者，謂帝本所出也。

內傳：高陽、高辛各有才子八人。謂其裔子耳。賈君得之。黃帝以姬水成，炎帝以姜水成，姬、姜，水

名。成，謂所生長以成功也。成而異德，故黃帝爲

姬，炎帝爲姜，異姓則異類，雖近，男女相及，以生民也。謂有屬名。相及，嫁娶也。同姓雖遠，

男女不相及，畏黷敬也。畏黷類其類。黷則生

怨，怨亂毓災，災毓滅性。毓，生也。是故娶妻避其同姓，畏亂災也。」《國語·晉語》。○劉向曰：親迎，其禮奈何？曰：「諸侯以履三兩加琮，大夫、庶人以履二兩加束脩二。」曰：「某國寡小君使寡人奉不珍之琮，不珍之履，<sup>①</sup>禮夫人貞女。」夫人曰：「有幽室數辱之產，未諭於傅姆之教，得承執衣裳之事，敢不敬拜祝。」祝答拜，夫人受琮，取一兩履以履女，正笄衣裳而命之曰：「往矣，善事爾舅姑，以順爲宮室，無二爾心，無敢回也。」女拜，乃親引其手授夫于戶。夫引手出戶，夫先行女從，拜辭父于堂，拜諸母于大門。夫先升輿執轡，女乃升輿。轂三轉，然後夫下先行。大夫、士、庶人稱其父曰：「某之父，某之師友，使某執不珍之履，不珍之束脩，敢不敬禮某氏貞女。」母曰：「有草茅之產，未習於織紵紡績之事，得奉箕帚之事，敢不敬

拜。」《說苑》。○周靈王求后于齊，齊侯問對于晏桓子，桓子對曰：「先王之禮辭有之，天子求后于諸侯，諸侯對曰：『夫婦所生若而人，不敢譽，亦不敢毀，故曰若如人。妾婦之子若而人。』言非適也。無女而有姊妹及姑姊妹，則曰：『先守某公之遺女若而人。』」疏曰：《釋親》云：「父之姊妹爲姑。」樊光曰：《春秋傳》云姑姊妹，然則古人謂姑爲姑姊妹。蓋父之姊爲姑姊，父之妹爲姑妹。《列女傳》：梁有節姊妹入火取其兄子。是謂父妹爲姑妹也。後人從省，故單稱爲姑也。○襄公十一年《春秋左氏傳》。○國君取夫人之辭曰：「請君之玉女與寡人共有敝邑，事宗廟社稷。」此求助之本也。言玉女者，美言之也，君子於玉比德焉。○《祭統》。○左氏曰：凡公女嫁于敵國，姊妹則上卿送之，以禮於先君；公子則下卿送之。於大國，雖

①「履」，原作「履」，據寬文本、賀本改。下「取一兩履」之「履」亦同改。

公子亦上卿送之。於天子，則諸卿皆行，公不自送。於小國，則上大夫送之。疏曰：昏以相敵爲耦。先以敵國爲文，然後於大國、小國辨其所異。姊妹於敵國猶上卿送之，於大國則上卿必矣。蓋以禮於先君，不以所嫁輕重。雖則小國，亦使上卿送也。《周禮》序官唯有中大夫無上大夫，《王制》曰「諸侯之上大夫卿」，上大夫即卿也。而此云上大夫者，諸侯之制三卿五大夫，五人之中又復分爲上下。《左傳》曰「次國之上卿當大國之中，中當其下，下當其上大夫」。小國之上卿當大國之下卿，中當其上大夫，下當其下大夫」是也。○桓公三年《春秋左氏傳》。○凡諸侯嫁女，同姓媵之，異姓則否。必以同姓者，參骨肉重至親，所以息陰訟。○成公八年《春秋左氏傳》。○公羊子曰：諸侯娶一國，則二國往媵之，以姪娣從。何休曰：言往媵之者。禮：君不求媵。二國自往媵夫人，所以一夫人之尊。姪者何？兄之子也。娣者何？女弟也。諸侯一聘九女，諸侯不再娶。必以姪娣從之者，欲使一人有子，二人喜也，所以防嫉妬，令重繼嗣也，因以備尊尊。

親親也。九者，極陽數也。不再娶者，所以節人情，開媵路。○莊公十九年《春秋公羊傳》。○鄭公子忽如陳逆婦媵，陳鍼子送女，先配而後祖。鍼子曰：「是不爲夫婦。誣其祖矣，非禮也，何以能育？」鍼，其廉反。○杜預曰：鍼子，陳大夫。禮：逆婦必先告祖而後行。故楚公子圍稱「告莊、共之廟」。鄭忽先逆婦而後告廟，故曰先配而後祖。○疏曰：先配後祖，多有異說。賈逵以配爲成夫婦也。禮齊而未配，三月廟見然後配。按《昏禮》，親迎之夜，衽席相連，是士禮不待三月也。禹娶塗山，四日即去，而有啟生焉，亦不三月乃配，是賈之謬也。鄭衆以配爲同牢食也，按《昏禮》，婦既入門即設同牢之饌，其間無祭祀之事，是鄭之妄也。鄭玄以祖爲軼道之祭也，先爲配匹而後祖道，言未去而行配。按：傳先言人于鄭，乃云先配而後祖，寧是未去之事。若未去，陳鍼子亦不必待送女而後譏之也。此三說皆滯，故杜引楚公子圍事，以爲先逆婦而後告廟，然此時忽父見在，告廟當是莊公之事。而譏忽者，圍亦人臣而自告廟，不言稟君之命，知逆者雖受父命，當自告廟，故忽後祖亦自告也。或曰：公子圍告廟者，專權自由耳，非正也。○隱公



八年《春秋左氏傳》。○今按：此說與《儀禮》及《白虎通義》不同，疑《左氏》不足信，或所据者當時之俗禮而言，非先王之正法也。○《春秋》：魯莊公夫人姜氏

入，大夫宗婦覲，用幣。御孫曰：「男贄，大者玉帛，小者禽鳥，以章物也；女贄不過榛栗棗脩，以告虔也。今男女同贄，是無別也。

男女之別，國之大節也，而由夫人亂之，無乃不可乎？」莊公二十四年《春秋左氏傳》。○《白虎

通義》曰：婦人之贄以棗栗脩者，婦人無專制之義，御衆之任，交接辭讓之禮，職在供養饋食之間，其義一也。故后，夫人以棗栗脩脩者，凡肉脩，陰也；棗取其朝早起，栗，戰慄自正也。○曾子問曰：「昏禮既納幣，

有吉日，女之父母死，則如之何？」吉日，取女之吉日。○取，七住反，下「取婦」、「取女」同。孔子

曰：「壻使人弔。如壻之父母死，則女之家亦使人弔。必使人弔者，未成兄弟。○疏曰：以夫婦

有兄弟之義，故下云「不得嗣爲兄弟」。或據壻于妻之父母有總服，故得謂之爲兄弟也。父喪稱父，母喪稱母。

禮宜各以其敵者也。父使人弔之，辭云：「某子聞某之喪，某子使某如何不淑。母則若云：「宋蕩伯姬，聞姜之喪，伯姬使某如何不淑。凡弔辭一耳。父母不在，則稱伯父、世母。弔禮不可廢也，伯父母又不在，則稱叔父母

也。壻已葬，壻之伯父致命曰：「某之子有父母之喪，不得嗣爲兄弟，使某致命。」女氏許諾而弗敢嫁，禮也。必致命者，不敢以累年之喪使人

失嘉會之時。○疏曰：壻之伯父致命女氏，必待已葬者，俟哀情稍殺，始兼他事，不待踰年者，不可曠年廢人昏嫁也。壻免喪，女之父母使人請，壻弗取而後嫁之，禮也。請，請成昏。○疏曰：壻免喪之後，則應

迎婦，必須女之父母請者，以壻家既葬致命于己，壻既免喪所以須請也。女之父母死，壻亦如之。」女免喪，壻之父母亦使人請，其已葬時，亦致命。○疏曰：男氏許諾而不敢娶，女家不許壻而后別娶，陽唱陰和。壻之父母使人請昏，而女家得有不許者，亦以彼初葬訖致命于己故也。

曾子問曰：「親迎女在塗，而壻之父母死，如之何？」孔子曰：「女改服，布深衣，縞總以趨喪。迎，魚敬反，下同。縞，占老反。○布深衣縞總，婦人始喪未成服之服。○疏曰：深衣，謂衣裳相連，前後深遂。縞，白絹也。總，束髮也，長八寸。《士喪禮》注：「始死，婦人將斬衰者去笄而纚，將齊衰者骨笄而纚。」至將斂，齊衰，婦人亦去笄纚而髻。皆不云縞總，彼文不備也。女在塗，而女之父母死，則女反。」奔喪服期。○期，居宜反，下同。○疏曰：女子子在室，為父箭笄髻，衰三年。今既在塗，非復在室，故知服期。但在室之女，父卒，為母亦三年。今既在塗，故為父母同，皆期也。於時女亦改服，布深衣，縞總，反而奔喪。」「如壻親迎，女未至而有齊衰大功之喪，則如之何？」孔子曰：「男不入，改服於外次。女入，改服於內次。然後即位而哭。」齊，音咨。衰，七雷反。○不聞喪即改服者，昏禮重于齊衰以下。○疏曰：男，謂壻也，不入大門改其親迎之服，服深衣於門外之次。女，謂婦也，入大門改其嫁服，亦深衣于門內之次。然後就喪位而哭，

謂于壻室。皇氏以為就喪家也。然曾子不問小功者，《雜記》云小功可以冠子取婦，明小功輕，不廢昏禮，待昏禮畢乃哭也。若女家齊衰大功之喪，皇氏云：女不反歸，其改服，即位與男家親同也。《禮運》云：「三年之喪與新有昏者，期不使。」又《王制》云：「齊衰大功，三月不從政。」是昏禮重于齊衰以下也。此謂在塗聞齊衰大功廢昏禮。若婦已揖遜入門，內喪則廢，外喪則行昏禮，約《士冠禮》之文。然昏禮重于冠，故《雜記》云「大功之末可以冠子，小功之末可以取妻」也。曾子問曰：「除喪則不復昏禮乎？」復，猶償也。○償，音尚。○疏曰：復是反覆之義，故為償也。曾子以初昏遭喪不得成禮，除喪之後，豈不酬償更為昏禮乎？孔子曰：「祭，過時不祭，禮也，又何反於初？」重喻輕也。同牢及饋饗，相飲食之道。○飲，於鳩反。食，音寺。○疏曰：過時不祭，謂四時常祭也。謂祭重而昏輕，重者過時尚廢，輕者不復可知。○孔子曰：「嫁女之家，三夜不息燭，思相離也。離，力智反。○親骨肉也。取婦之家，三

①「士」，原作「上」，據元明本、寬文本、賀本改。

日不舉樂，思嗣親也。重世變也。○疏曰：所以不舉樂者，思念己之取妻，嗣續其親，則是親之代謝，所以悲哀感傷，重世之改變也。三月而廟見，稱來婦也。

擇日而祭於禰，成婦之義也。」謂舅姑沒者也。必

祭成婦義者，婦有共養之禮，猶舅姑存時盥饋特豚於室。

○疏曰：昏禮奠菜之後，更無祭舅姑之事，此云「祭于禰」

者，正謂奠菜也，則廟見奠菜、祭禰是一事也。若舅姑偏有

沒者，庾氏云：昏夕厥明即見其存者，以行盥饋之禮，至三

月不須廟見亡者。崔氏云：厥明盥饋於其存者，三月又廟

見於其亡者。未知孰是。

○曾子問曰：「女未廟見而死，則如之何？」孔子曰：「不遷於祖，

不祔於皇姑，婿不杖、不菲、不次，歸葬於女

氏之黨，示未成婦也。」遷，朝廟也。婿雖不備喪禮，

猶爲之服齊衰也。○疏曰：將反葬於女之黨，故其柩不遷

移朝于婿之祖廟。祔祭之時，又不得祔於皇姑廟也。皇

大也，君也。稱皇者，尊之也。菲，草屨也。不次，謂不別

處止衰次也。婿爲妻合服齊衰，杖而菲屨，及止衰次。今

未廟見而死，故以未得舅姑之命而殺其禮，示若未成婦。

然其實已成婦，但以示其不敢自專耳。其女之父母則爲之降服大功，以其非在家，婿已爲之服齊衰期，非無主也。

○曾子問曰：「取女有吉日而女死，如之

何？」孔子曰：「婿齊衰而弔，既葬而除之。

夫死亦如之。」未有期三年之恩也，女服斬衰。○疏

曰：所以既葬除者，婿於女未有期之恩，女於婿未有三年

之恩，以婿服齊衰，故知女服斬衰。○衛世子共伯蚤

死，其妻守義。父母欲奪而嫁之，誓而弗許，

故作詩以絕之。其伯，僖侯之世子。其《詩》曰：

「汎彼柏舟，在彼中河。髮彼兩髦，實維我

儀。之死矢靡它。母也天只，不諒人只！髮，

徒坎反。髦，音毛。它，湯河反。只，音紙。○興也。中

河，河中。髮，兩髦之貌。髦者，髮至眉，子事父母之飾。

儀，匹也。之，至。矢，誓。靡，無也。至己之死，信無它

心。只，語助辭。諒，信也。箋云：兩髦之人，謂共伯也。

實是我之匹，故我不嫁也。禮：世子昧爽而朝，亦櫛纓笄，

總拂髦，冠綏纓。言柏舟則在彼中河，兩髦則實我之匹。

雖至於死，誓無他心。母之於我，覆育之恩如天罔極，而何

其不諒我之心乎？不及父者，疑時獨母在，或非父意耳。汎彼柏舟，在彼河側。髮彼兩髦，實維我特。之死矢靡慝。母也天只，不諒人只！」慝，他得反。○興也。慝亦匹也，慝，邪也。○魯寡陶嬰者，

魯門之女也。少寡，養幼孤，無強昆弟，紡績爲產。魯人或聞其義，將求焉。嬰聞之，恐不得免，作歌明己之不更二也。其歌曰：

「悲夫，黃鵠之早寡兮七年不雙，宛頸獨宿兮不與衆同。夜半悲鳴兮想其故雄，天命早寡兮獨宿何傷。寡婦念此兮泣下數行，嗚呼哀哉兮死者不可忘。」<sup>①</sup>飛鳥尚然兮況於貞良，雖有賢雄兮終不重行。」魯人聞之，曰：「斯女不可得已！」遂不敢復求。嬰寡，終身不改。《列女傳》。○梁寡高行者，梁之寡婦也。其爲人榮於色而美於行，夫死早寡不嫁，梁貴人多爭欲娶之者不能得。梁王聞之，使相聘焉。高行曰：「妾聞婦人之義，壹往而不

改，以全貞信之節。今忘死而趨生，是不信也；貪貴而忘賤，是不貞也。棄義而從利，無以爲人。」乃援鏡持刃以割其鼻，曰：「妾已刑矣，所以不死者，不忍幼弱之重孤也。」於是相以報王，大其義而高其行，乃復其身，尊其號曰「高行」。《列女傳》。○陳寡孝婦者，陳之少寡婦也。年十六而嫁，未有子。其夫當行戍，夫且行時屬孝婦曰：「我生死未可知，幸有老母，無他兄弟，儻吾不還，汝肯養吾母乎？」婦應曰：「諾。」夫果死不還，婦養姑不衰，慈愛愈固，紡績以爲家業，終無嫁意。居喪三年，其父母哀其年少無子而早寡也，將取而嫁之。孝婦曰：「妾聞之：信者，人之幹也；義者，行之節也。妾幸得離襁褓，受嚴命而事夫。夫且行時屬妾以其老

①「忘」，原作「志」，據元明本、寬文本、賀本改。

母，既許諾之。夫受人之託，豈可棄哉？棄託不信，背死不義，不可也。」母固欲嫁之，孝婦不從，因欲自殺，其父母懼而不敢嫁也，遂使養其姑也。二十八年，姑死葬之，終奉祭祀。淮陽太守以聞漢孝文皇帝，高其義，貴其信，美其行，使使者賜之黃金四十斤。復之，終身無所與，號曰「孝婦」。《列女傳》。○諸侯出夫人，夫人比至于其國，以夫人之禮行。至，以夫人人。比，必吏反。○行道「以夫人之禮」者，棄妻致命其家，乃義絕，不用此為始。○疏曰：「出夫人」，謂夫人有罪，諸侯出之，令歸本國。使者將命曰：「寡君不敏，不能從而事社稷宗廟，使使臣某敢告於執事。」主人對曰：「寡君固前辭不教矣，寡君敢不敬須以俟命。」○前辭不教，謂納采時也。此辭實在門外，摯者傳焉，賓人致命如初，主人卒辭曰「敢不聽命」。○摯，必刃反。○疏曰：送夫人歸者，將行，君命以告夫人之國君。禮尚謙退，不欲指斥夫人所犯之罪，故引過自歸。有司官陳器皿，主人有司

亦官受之。器皿，本其所賁物也。律：弃妻界所贍。○疏曰：使者使從已來有司之官陳夫人嫁時所賁器皿之屬以還主國，主國亦使有司官領受之也。並云「官」者，明付受悉如法也。○此以上三節，諸侯禮也。妻出，夫使人致之曰：「某不敏，不能從而共粢盛，使某也敢告於侍者。」主人對曰：「某之子不肖，不敢辟誅，敢不敬須以俟命。」使者退，主人拜送之。共，音恭。粢，音咨。盛，音成。辟，音避。○肖，似也。不肖，言不如人。誅，猶罰也。○此一節，卿大夫以下之禮也。如舅在則稱舅，舅沒則稱兄，無兄則稱夫。言弃妻者父兄在則稱之命，當由尊者出也，唯國君不稱兄。○疏曰：凡遣妻必稱尊者之命，若夫之父在，則稱父名「使某來告」也。不稱母者，婦人之名不合外接於人也。主人之辭曰：「某之子不肖。」如姑姊妹亦皆稱之。姑姊妹見棄，亦曰「某之姑、某之姊若妹不肖」。○《雜記》。○今按：此兩節通禮也。○曾參後母遇之無恩，而供養不衰，及其妻以藜烝

不熟，因出之。人曰：「非七出也。」參曰：「藜烝，小物耳，吾欲使熟而不用吾命，況大事乎？」遂出之，終身不娶妻。其子元請焉，參告其子曰：「高宗以後妻殺孝己，尹吉甫以後妻放伯奇，吾上不及高宗，中不比吉甫，庸知其得免於非乎？」《家語》。

儀禮經傳通解卷第二終

## 儀禮經傳通解卷第三

## 內則第五

## 家禮三

后王命冢宰，降德于衆兆民。后，君也。

德，猶教也。萬億曰兆。天子曰兆民，諸侯曰萬民。《周禮》冢宰掌飲食，司徒掌十二教。今一云冢宰，記者據諸侯也。諸侯并六卿爲三，或兼職焉。○疏曰：君謂諸侯，王謂天子。蓋雖以諸侯爲主，而雜以天子言之，故又稱王及兆民也。飲食、教令，所掌各有別官，今此篇內既有飲食，又有教令，則篇首當云命冢宰、司徒，今惟一云「冢宰」，不言司徒者，是記者據諸侯并六卿爲三，司徒或兼冢宰之事也。意疑面不定，故稱「或」焉。○今按：注疏言諸侯司徒兼冢宰是也，但此上言后王之命，則冢宰寔天子之冢宰耳。蓋《周禮》太宰掌建邦之六典，而二曰教典，則教民雖司徒之職，而冢宰無所不統，故以其重者言之。其在諸侯，則

亦天子之宰施典於邦國，而諸侯承之以教其民。白不害於冢宰爲司徒之兼官也。子事父母，雞初鳴，咸盥漱，櫛、緹、笄、總、拂髦、冠、綏、纓、端、韞、紳、搢笏。盥，音管。漱，所救反，徐素遭反。櫛，側乙反。緹，所買反，徐所綺反。笄，占兮反。總，子孔反。髦，音毛。綏，耳佳反。韞，音必。紳，音申。搢，徐音箭，又音晉。笏，音忽。○咸，皆也。緹，韞髮者也。總，束髮也，垂後爲飾。拂髦，振去塵著之。髦，用髮爲之，象幼時髦，其制未聞。綏，纓之飾也。端，玄端，士服也，庶人深衣。紳，大帶，所以自紳約也。搢，猶扱也，扱笏於紳。笏，所以記事也。○韞，吐刀反。去，起呂反。著，丁略反，下及注同。髦，多果反。扱，本又作「捷」，又作「插」，初洽反，徐采協反。○疏曰：盥謂洗手，漱謂漱口，此據年稍長者也。緹者，《冠禮》云「緹纚長六尺」。盧云：所以裹髻承冠，以全幅纚而用之。笄者，熊氏謂：此安髻之笄，以緹韞髮作髻，既訖，橫施此笄於髻中，以固髻也。故《士喪禮》云「笄用桑，長四寸，綏中」是也。綏中，謂殺其中使細，非固冠之笄，故文在冠上也。總者，裂練緇爲之，束髮之本，垂餘於髻後，以爲飾也。冠，玄冠也。綏纓者，結之領下以固冠。

綏則其結之餘者，散而下垂以爲飾也。玄端，士祭服，見《特牲禮》。又云深衣，則是服之最下者，庶人亦是人之賤者，故知服深衣也。鞞見《冠禮》。紳，笏之制，則備於《玉藻》矣。此經所陳，皆依事先後。櫛訖加緹，緹訖加笄，笄訖加總，然後加髻著冠，冠畢然後服玄端著鞞，又加大帶也。○纁，山綺切。纁，一尤切。左右佩用：白佩也。

必佩者，備尊者使令也。○令，力呈反。左佩紛帨、

刀、礪、小礪、金燧，紛，芳云反。帨，始銳反。礪，許

規反，本或作「礪」，音同。燧，音遂。○紛帨，拭物之中也，

今齊人有言紛者。刀礪，小刀及礪髻也。小礪，解小結之

礪，貌如錐，以象骨爲之。金燧，可取火於日。○髻，力工

反。○疏曰：皇氏云：左旁用力不便，故佩小物。知小刀

者，與小礪連文也。右佩玦、捍、管、璫、大礪、木

燧。捍，戶旦反。璫，時世反，徐作「滯」。○捍，謂拾也，

言可以捍弦也。管，箏彊也。璫，刀鞞也。①木燧，鑽火

也。○彊，苦侯反。鞞，②必頂反。○疏曰：皇氏云：以右

廂用力爲便，故佩大物。玦，當作「決」，以象骨爲之，著於右手大指，所以鉤弦開體。拾，以皮爲之，著於左臂以遂弦，故亦名遂也。刀鞞之刀，大於左廂刀也。皇氏云：晴

則以金燧取火於日，陰則以木燧鑽火也。倜，本又作

「幅」，彼力反。○倜，行滕。○滕，徒登反。屨，著綦。

綦，其記反，注及下同。○綦，屨繫也。○疏曰：皇氏云：

屨頭施繫，③以爲行戒。或云：屨上有繫，以結於足也。○

今按：或說是爲行戒者絢也，見《冠禮》注。婦事舅姑

如事父母，雞初鳴，咸盥漱，櫛、緹、笄、總，衣

紳。笄，今簪也。衣紳，衣而著紳。○簪，徐側林反，又作

南反。○疏曰：此論女事父母，婦事舅姑之事也。婦人之

笄，《喪服》所謂女子吉笄，二寸者也。但婦人之笄與男子

固髻之笄不同，乃《冠禮》皮弁、爵弁之笄，故鄭以簪解之

也。衣，謂玄綃衣。○今按：婦人不冠，則所謂吉笄即爲

固髻之用，亦名爲簪，而非如二弁之簪矣。左佩紛帨、

刀、礪、小礪、金燧，右佩箴、管、線、纁，施繫

表，大礪、木燧。箴，之林反。線，又作「綫」，息賤反。

①「鞞」，原作「鞞」，據文意改，下「刀鞞」同。

②「鞞」，原作「鞞」，據文意改。

③「繫」字原脫，據元明本、寬文本、賀本補。



續，音曠。繫，字又作「繫」，同步千反。表，陳乙反，又作「軼」。○繫，小囊也。繫表言施，明爲箴管線續有之。○囊，奴郎反，又作「囊」，徐音託。爲，于僞反。○疏曰：熊氏云：表，刺也。以針刺表而爲繫囊，故云繫表也。餘物皆不言施，獨於箴管線續之下而言施繫表，明爲四物而施矣。衿纓、綦屨，衿，其鳩反。○衿，猶結也。婦人有纓，示繫屬也。○疏曰：《昏禮》注云：婦人十五許嫁，笄而禮之，因著纓是也。以適父母、舅姑之所。適，之及所，下氣怡聲，問衣燠寒，疾痛苛癢，而敬抑搔之，燠，於六反。苛，音何。癢，以想反。搔，素刀反。○怡，說也。苛，疥也。抑，按。搔，摩也。①○說，音悅。疥，音界。○疏曰：苛疥者，以其苛與癢共文，故知苛疥也。出入則或先或後而敬扶持之。先後之，隨時便也。○便，婢面反。進盥，少者奉槃，長者奉水，請沃盥，盥卒授巾。少，詩召反，後皆同。奉，芳勇反，本或作「捧」。長，丁丈反，後皆同。○槃，承盥水者。巾以帨手。問所欲而敬進之，柔色以溫之。溫，又作「溫」，又作「愠」，同於運反。○溫，藉也，承

尊者必和顏色。○藉，字夜反。○疏曰：藉者，所以承藉於物。言子事父母，當和柔顏色承藉父母，若藻藉承玉然。醴、酒、醴、芼羹、菽、麥、蕡、稻、黍、粱、秣，唯所欲。醴，之然反。醴，羊支反。芼，毛報反。蕡，又作「麡」，扶云反，徐扶畏反。粱，音良。秣，音述。○醴，粥也。芼，菜也。蕡，熬臬實。○粥，之六反，又羊六反。熬，五羔反。臬，思里反。○疏曰：醴既爲粥，粥是薄者，則醴爲厚者。《公食禮》：「牲皆有芼，牛藿、羊苦、豕薇」，用菜雜肉爲羹也。棗、栗、飴、蜜以甘之，芼、芡、粉、榆、兔、蕘、滫、瀡以滑之，脂、膏以膏之。飴，羊之反。芼，音謹。芡，音凡。粉，扶云反。兔，音問。蕘，又作「蕘」，苦老反。滫，思酒反。瀡，音髓。滑，胡八反。膏之，古報反。○謂用調和飲食也。芡，蕘類也，冬用芼，夏用芡。榆白曰粉。兔，新生者。蕘，乾也。秦人溲曰滫，齊人滑曰瀡也。○調，如字，又徒弔反。和，如字，又胡卧反。溲，所九反。○疏曰：《士虞禮》：「夏用葵，冬用芡」，鄭注云：「芡，蕘類也，乾則滑。夏秋用生葵，

①「搔」，原作「瘙」，據元明本、寬文本、賀本改。

冬春用乾苳。此經苳、苳相對，故知「冬用苳，夏用苳」也。  
《庖人》云共「蠃、薤之物」，蠃、薤相對。此經以免對薤，薤既是乾，故知免爲新生也。免、薤於《周禮》據肉爲言，熊氏、皇氏皆云此則以苳苳等爲免薤，其義或然。言以此數物滷灑之，令柔滑也。凝者爲脂，釋者爲膏。以膏沃之，使之香美。此等總謂調和飲食也。父母、舅姑必嘗之而后退。敬也。○男女未冠笄者，雞初鳴，咸盥漱，櫛、緹、拂髦；總角、衿纓，皆佩容臭。盥漱，櫛、緹、拂髦；總角、衿纓，皆佩容臭。冠，占亂反。○總角，收髮結之。容臭，香物也，以纓佩之，爲迫尊者給小使也。○爲，于僞反。○疏曰：女子笄乃著纓，此未笄而有纓者以佩容臭，與彼異也。臭謂芬芳，庾氏云：臭物可以修飾形容，故曰容臭。○今按：注言佩容臭「爲迫尊者」，蓋爲恐身有穢氣觸尊者，故佩香物也。昧爽而朝，朝，直遙反，下「而朝」同。○後成人也。○後，如字，徐胡豆反，下同。問何食飲矣。若已食則退，若未食則佐長者視具。具，饌也。○凡內外，雞初鳴，咸盥漱，衣服，斂枕簟，灑掃室堂及庭，布席，各從其事。衣，如字，又於既反。簟，徒

點反。灑，本又作「洒」，所買反，又所賣反。掃，素報反。○斂枕簟者，不欲人見已褻者。簟，席之親身也。孺子蚤寢晏起，唯所欲，食無時。孺，如樹反。○孺子，小子也，又後未成人者。○由命士以上，父子皆異宮。昧爽而朝，慈以旨甘，日出而退，各從其事，日入而夕，慈以旨甘。異宮，崇敬也。慈，愛敬進之。日出乃從事，食祿不免農也。○父母、舅姑將坐，奉席請何鄉；將衽，長者奉席請何趾，少者執牀與坐。奉，芳勇反。鄉，許亮反。衽，而鳩反，又而甚反。○將衽，謂更卧處。御者舉几，斂席與簟，縣衾篋枕，斂簟而襜之。襜，音獨。○須卧乃敷之也。襜，輶也。○疏曰：早日親起之後，侍御之人則奉舉其几以進尊者，使馮之。斂在下席與上襯身之簟，又縣其衾，以篋貯其枕也。簟既襯身，恐其穢汗，故以襜輶之，席則否。父母、舅姑之衣衾、簟席、枕几不傳，杖屨祇敬之，勿敢近。傳，丈專反。○傳，移也。○疏曰：尊者服御之重，彌須恭敬，故祇敬之

勿敢偏近也。敦、牟、卮、匱，非餽莫敢用。敦，音

對，又丁雷反。牟，木侯反。卮，音支。匱，羊支反，又以氏

反。餽，音俊。○餽乃用之。牟，讀曰整也。卮、匱，酒漿

器。敦、牟，黍稷器也。○整，字又作「整」，木侯反。○疏

曰：敦，今之杯盂也。《隱義》曰：「整，土釜也。」今以木爲

器，象土釜之形。卮，酒器也。匱，盛水漿之器。與恒食

飲，非餽莫之敢飲食。餽乃食之。恒，常也，旦夕之

常食。○疏曰：父母舅姑所服用之物，子婦不得輒用；

所恒飲食之饌，不得輒食。衣衾、簟席、枕几，侍御之人停

貯常處，子婦不得輒更傳移令嚮他處。○父母在，朝

夕恒食，子婦佐餽，婦皆與夫餽也。○疏曰：子婦，

謂長子及長子之婦。佐餽者，食必須盡，以父母食不能盡，

故子婦佐助餽食之使盡，勿使有餘，恐再進。既食恒

餽。每食進而盡之，未有原也。○疏曰：木，無也。原，

再也。無使有餘而再設也。父没母存，冢子御食，

群子婦佐餽如初。御，侍也，謂長子侍母食也。侍食

者不餽，其婦猶皆餽也。○疏曰：冢子無父，故得侍母而

食。冢婦既不侍食，故云「猶皆餽」也。旨甘柔滑，孺

子餽。○在父母、舅姑之所，有命之，應「唯」

敬對，進退周旋慎齊。唯，于癸反，徐伊水反。齊，

側皆反。○齊，莊也。升降出入揖遊，不敢噦噫、

嚏咳、欠伸、跛倚、睥視，不敢唾涕。噦，於月

反。噫，於界反。嚏，音帝。咳，苦愛反。欠，丘劒反。伸，

音申。跛，彼義反。倚，於義反，又其寄反。睥，大計反。

視，如字，徐市志反。唾，吐卧反。涕，本又作「洟」，同吐細

反。○睥，傾視也，《易》曰：「明夷睥于左股。」○疏曰：睥

爲旁視也。寒不敢襲，癢不敢搔。襲，謂重衣。不

有敬事，不敢袒裼。袒，音但。裼，思歷反。○今

按：此言必有敬事乃敢袒裼，無故而然，則反爲不敬，故不

敢也，與下句爲一例。不涉不擻。擻，居衛反。○擻，

揭衣也。○揭，起例反，又起列反，一音起言反。○疏曰：

言於尊所，不因涉水，不敢揭衣。褻衣衾，不見裏。

見，賢遍反，下同。○爲其可穢。○爲，于僞反。父母唾

涕不見。輒刷去之。○刷，色劣反。冠帶垢，和灰

請漱；衣裳垢，和灰請澣。漱，悉侯反。澣，本又

作「浣」，戶管切。○手曰漱，足曰澣。和，漬也。○漬，似

賜反。○疏曰：冠帶尊，故以手漱之，用力淺也。衣裳卑，故以足澣之，用力深也。此漱、澣對文爲例耳，散則通也。衣裳綻裂，紉箴請補綴。綻，字或作「綻」，直莫反。裂，又作「列」。紉，女陳反，徐而陳反。箴，之林反。綴，丁劣反，又丁衛反。○綻，猶解也。五日則燂湯請浴，三日具沐。其閒面垢燂燂請澣，足垢燂湯請洗。燂，詳廉反，潘，芳煩反。澣，音悔。○潘，米瀾也。○瀾，力旦反。少事長，賤事貴，共帥時。共，猶皆也。帥，循也。時，是也。禮皆如此也。○子婦孝者敬者，父母、舅姑之命勿逆勿怠。今按：此謂不可變節以傷尊者平日慈愛之心也。若飲食之，雖不耆，必嘗而待。飲，於鳩反。食，音嗣。耆，市志反。○待後命而去也。○去，起呂反，又作「而食之」。加之衣服，雖不欲，必服而待。待後命釋藏也。○疏曰：尊者加已衣服，已雖不欲，必且服之而待後命而藏去也。加之事，人代之，已雖弗欲，姑與之，而姑使之，而後復之。今按：「弗欲」者，慮以自逸而違

命。「姑與」、「姑使」者，嫌於怨懟而必爭。○懟，直類反。子婦有勤勞之事，雖甚愛之，姑縱之，而寧數休之。縱，本又作「從」，足用反。○不可愛此而移苦於彼也。子婦未孝未敬，勿庸疾怨，庸之言用也。姑教之，若不可教而後怒之，怒，譴責也。○譴，弃戰反。不可怒，子放婦出而不表禮焉。表，猶明也。猶爲之隱，不明其犯禮之過也。○爲，于僞反。○父母有過，下氣怡色，柔聲以諫。諫若不人，起敬起孝，說則復諫。說，音悅。○子事父母，有隱無犯。起，猶更也。不說，與其得罪於鄉黨州閭，寧孰諫。子從父之令，不可謂孝也。《周禮》曰：二十五家爲閭，四閭爲族，五族爲黨，五黨爲州，五州爲鄉也。○疏曰：犯顏而諫，使父母不說，其罪輕。畏懼不諫，使父母得罪於鄉黨州閭，其罪重。二者之間，寧可純孰殷勤而諫，若物之成熟然，不可使父母得罪也。父母怒，不說而撻之流血，不敢疾怨，起敬起孝。撻，吐達反。○撻，擊也。○父母有婢子若庶子、庶孫，

甚愛之。雖父母沒，沒身敬之不衰。婢子，所通賤人之子。子有二妾，父母愛一人焉，子愛一人焉，由衣服飲食，由執事，毋敢視父母所愛，雖父母沒，不衰。由，白也。子甚宜其妻，父母不說，出。宜，猶善也。子不宜其妻，父母曰「是善事我」，子行夫婦之禮焉，沒身不衰。○父母雖沒，將爲善，思貽父母令名，必果；將爲不善，思貽父母羞辱，必不果。貽，以之反。○貽，遺也。果，決也。○遺，以季反。○舅沒則姑老，謂傳家事於長婦也。○傳，丈專反。冢婦所祭祀賓客，每事必請於姑，婦雖受傳，猶不敢專行也。介婦請於冢婦。介，音界，注及下同。○以其代姑之事。介婦，衆婦。舅姑使冢婦，毋怠。雖有勤勞，不敢解倦。○倦，本又作「勑」，其卷反。不友無禮於介婦。衆婦無禮，冢婦不友之也。善兄弟爲友，娣姒猶兄弟也。○今按：此句之義未詳，注說恐未然也。或疑「友」當作「敢」。舅姑若使介婦，毋敢敵耦於冢婦，雖

有勤勞，不敢掉臂。○掉，徒弔反。○陸氏曰：《隱義》云：齊人以相絞訐爲掉臂。崔公：北海人謂相激事爲掉臂也。不敢並行，不敢並命，不敢並坐。下冢婦也。命爲使令。○下，戶嫁反。令，力呈反。○凡婦不命適私室，不敢退。婦侍舅姑者也。婦將有事，大小必請於舅姑。不敢專行。子婦無私貨，無私畜，無私器，不敢私假，不敢私與。畜，許六反，又許久反，又敕六反。○家事統於尊也。婦或賜之飲食、衣服、布帛、佩帨、茝蘭，則受而獻諸舅姑。舅姑受之，則喜如新受賜。茝，昌改反，香草也，又作「芷」，昌以反。○或賜之，謂私親兄弟。若反賜之，則辭。不得命，如更受賜，藏以待乏。待舅姑之乏也。不得命者，不見許也。婦若有私親兄弟，將與之，則必復請其故，賜而後與之。復，扶又反。

右事親事長。○記：凡爲人子之禮：冬溫而夏清，昏定而晨省，定，安其牀衽

也。省，問其安否何如。○疏曰：冬溫夏清，四時之法也。「昏定晨省」，一日之法也。定，安也。晨，旦也。應卧當齊整牀衽，使親體安定之後退。至明日，既隔夜，早來視親之安否何如。先昏後晨，兼示經宿之禮。熊氏云：晨省者，同宮則雞初鳴，異宮則昧爽而朝。○今按：此二句雖有四時、一日之異，然一日之間正當隨時安處省察其或溫或清之宜也。在醜夷不爭。醜，衆也。夷，猶儕也。四皓曰：「陛下之等夷。」○疏曰：貴賤相臨，則有畏懼；朋儕等輩，喜爭勝負，亡身及親，故誠之以不爭。○夫爲人子者，三賜不及車馬。三賜，三命也。凡仕者，一命而受爵，再命而受衣服，三命而受車馬，車馬而身所以尊者備矣。卿、大夫、士之子不受，不敢以成尊比踰於父。天子、諸侯之子不受，自卑遠於君。○疏曰：言爲人子，雖受三命之尊，終不敢受車馬。命是榮美，光顯祖父，故受也；車馬是安身，身安不關先祖，故不受也。○今按：《左氏傳》魯叔孫豹聘於王，王賜之路，豹以上卿無路而不敢乘。疑此「不及車馬」亦謂受之而不敢用耳。若天子之賜，又爵秩所當得，豈容獨辭而不受耶？故州閭鄉黨

稱其孝也，兄弟親戚稱其慈也，僚友稱其弟也，執友稱其仁也，交遊稱其信也。不敢受重賜者，心也如此而五者備有焉。○疏曰：親言族內，戚言族外。慈者，篤愛之名。兄弟，內外通稱。弟者，事長次第之名。僚友，同官者也。執友，執志同者也。交遊，汎交也。結交遊從本資信合，故稱信也。○夫爲人子者，出必告，反必面。告，古毒反。○告，面同耳。反言面者，從外來，宜知親之顏色安否。所遊必有常，所習必有業，緣親之意欲知之。恒言不稱老。廣敬。○疏曰：老是尊稱，稱老是自尊大，非孝子卑退之情。或云：子若自稱老，則明父母爲甚老而感動之也。○爲人子者，居不主奧，坐不中席，行不中道，立不中門。謂與父同宮者也，不敢當其尊處。室中西南隅謂之奧。道有左右。中門，謂棖闥之中央。《內則》曰：「由命士以上，父子皆異宮。」○疏曰：主，猶坐也。室嚮南，戶近東南角，則西南隅隱奧無事，故名爲奧，當推尊者居之，以就閒樂，故人子不敢處之也。一席四人，則席端爲

上。今不云上席而言中者，共坐則席端爲上，獨坐則席中爲尊。尊者宜獨，不與人共，則坐常居中，故卑者坐不得居中。尊者常正路而行，故卑者不得也。門中有闌，闌傍有棖。棖闌之中是尊者所行，故人子不得當之而立也。四事皆謂與父同宮者爾。若命士以上，則父子異宮，則不禁。蓋有命既尊，各有臣僕子孫，應敬已故也。食饗不爲槩，槩，量也。不制待賓客饌具之所有。○疏曰：大夫、士或相往來，設於饗食，制設饌具，事由尊者所裁，子不得輒豫限量多少也。祭祀不爲尸。尊者之處，爲其失子道，然則尸，卜筮無父者。○疏曰：尸代尊者之處，故人子不爲也。○以上《曲禮》。○父命呼，「唯」而不「諾」，手執業則投之，食在口則吐之，走而不趨。至敬。○疏曰：命，謂遣人呼，非謂自喚也。應之以「唯」而不稱「諾」，「唯」恭於「諾」也。趨，疾趨也，但急走往而不暇疾趨也。○《玉藻》。○聽於無聲，視於無形。恒若視之將有教使然。○疏曰：謂雖不聞父母之聲，不見父母之形，然常想像視聽，似見形聞聲，而將有教使

已然也。不登高，不臨深，不苟訾，不苟笑。爲其近危辱也。人之性，不欲見毀訾，不欲見笑，君子樂然後笑。○疏曰：苟，且也。相毀曰訾。不樂而笑爲苟笑。彼雖有是非，而已苟譏毀訾笑之，皆非彼所欲，必反見毀辱，故孝子不爲也。孝子不服閭，不登危，懼辱親也。服，事也。閭，冥也。不於閭冥之中從事，爲卒有非常，且嫌失禮也。男女夜行以燭。○父母存，不許友以死，爲忘親也，死爲報仇讎。○疏曰：親存須供養，<sup>①</sup>則孝子不可死也。若許友報仇怨而死，<sup>②</sup>是忘親也。親亡，則得許友報仇，故《周禮》有「主友之讎，視從父兄弟」。不有私財。疏曰：家事統於尊，財關尊者，故無私財。<sup>③</sup>○《曲禮》。○未仕者不敢稅人，如稅人則以父兄之命。不專家財也。稅，謂遺子人。○《檀弓》。○親在，行禮

①

「供」，原作「恭」，據寬文本、賀本改。

②

「報」，原作「執」，據寬文本、賀本改。

③

「無私財」三字，原脫，據賀本補。

於人稱父。人或賜之，則稱父拜之。事統於尊。○《玉藻》。○父子不同席。異尊卑也。

○《曲禮》。○父母有疾，冠者不櫛，行不翔，

憂不爲容也。言不惰，憂不在私好。○疏曰：情，情

訛不正之言。琴瑟不御，憂不在樂。食肉不至

變味，飲酒不至變貌，憂不在味。○疏曰：猶許

食肉，但不許多耳。少食則味不變，多食則口味變也。

笑不至矧，怒不至詈，憂在心難變也。齒本曰

矧，大笑則見。疾止復故。自若常也。○《曲禮》。

○親老，出不易方，復不過時。不可以憂父母

也。易方，爲其不信己所處也。復，反也。○疏曰：若

敢往甲，則不得往乙。若敢云日中還，則不得過中也。

親癢，色容不盛，此孝子之疏節也。癢，在詣

反。○言未爲至孝也。王季有疾，文王色憂，行不能正

履。○疏曰：言如文王乃爲至孝，今但色容不盛，乃孝

子疏簡之節耳。○父没而不能讀父之書，手

澤存焉爾。母没而杯圈不能飲焉，口澤之

氣存焉爾。圈，起權反。○孝子見親之器物，哀惻

不忍用也。圈，屈木所爲，謂厄匱之屬。○疏曰：書有

父平生所持手之潤澤存在焉，故不忍讀。杯圈有母平

生口飲潤澤之氣存在焉，故不忍用。不能者，謂不能忍

爲此事。○以上《玉藻》。○爲人子者，父母存，

冠衣不純素。爲其有喪象也。純，緣也，《玉藻》

曰：「縞冠玄武，子姓之冠也。縞冠素紕，既祥之冠也。」

《深衣》曰：「具父母，衣純以青。」○疏曰：冠純，謂冠飾

也。衣純，謂衣領緣也。《禮》：「具父母，大父母，冠衣

純以纁。具父母，則純以青。」故親存者不得純素也。

又曰：縞冠者，薄絹爲之。玄武者，以黑繒爲冠卷也。

姓，生也，孫是子所生，故謂孫爲子姓。父有服未畢，子

雖已除，猶未全吉也，故縞冠玄武。玄武是吉，縞冠爲

凶，明吉凶兼服也。何胤云：繒裏卷武也。祥之日朝服

縞冠，祭後則縞冠素紕。何胤云：素紕謂緣冠兩邊。①

此皆爲素而凶也。孤子當室，冠衣不純采。早

喪親，雖除喪不忘哀也，謂年未三十者。三十壯有室，

①「兩」，原作「刑」，據元明本、寬文本、賀本改。



有代親之端，不爲孤也。當室，適子也。《深衣》曰：「孤子衣純以素。」○疏曰：《深衣》云「孤子衣純以素」，則嫡庶悉然。今云「當室」，則以嫡子代親既備，嫌或不同，故特引《深衣》以證凡孤子悉同也。○《曲禮》。○曾

子曰：「孝子之養老也，樂其心，不違其志，樂其耳目，安其寢處，以其飲食忠養之。孝子之身終。終身也者，非終父母之身，終其身也。是故父母之所愛亦愛之，父母之所敬亦敬之，至於犬馬盡然，而況於人乎！」賤喻貴也。<sup>①</sup>○曾子曰：「孝有三：大孝尊親，其次弗辱，其下能養。」公明儀問於曾子曰：「夫子可以爲孝乎？」曾子曰：「是何言歟！是何言歟！君子所謂孝者，先意承志，喻父母於道。參直養者也，安能爲孝乎？」公明儀，曾子弟子。○疏曰：大孝尊親，一也，即是下文云「大孝不匱，聖人爲天子者」也。尊親，嚴父配天也。其次弗辱，二也，謂賢

人爲諸侯及卿、大夫、士也，各保社稷、宗廟、祭祀，不使傾危以辱親也，即與下文「中孝用勞」亦爲一也。其下能養，三也，謂庶人也，與下文云「小孝用力」爲一。能養，謂用天分地以養父母也。先意，謂父母將欲發意，孝子則預前逆知父母之意而爲之，是先意也。承志，父母已有志，己當奉承而行之。「諭父母於道」者，或在父母意先，或在父母意後，皆曉諭父母將歸於正道也。

○曾子曰：「身也者，父母之遺體也。行父母之遺體，敢不敬乎？居處不莊，非孝也；事君不忠，非孝也；涖官不敬，非孝也；朋友不信，非孝也；戰陳無勇，非孝也。五者不遂，戕及於親，敢不敬乎？」遂，猶成也。亨孰羶薌，嘗而薦之，非孝也，養也。今按：亨，即烹炙之字，俗加火作「烹」，非是。君子之所謂孝也者，國人稱願然曰：「幸哉，有子如此！」所謂孝也已。然，猶而也。衆

①「也」下，賀本有「○本篇」。

之本教曰孝，其行曰養。養可能也，敬爲難；敬可能也，安爲難；安可能也，卒爲難。父母既沒，慎行其身，不遺父母惡名，可謂能終矣。仁者，仁此者也；禮者，履此者也；義者，宜此者也；信者，信此者也；強者，強此者也。樂自順此生，刑自反此作。」○曾子曰：「夫孝，置之而塞乎天地，溥之而橫乎四海，施諸後世而無朝夕。推而放諸東海而準，推而放諸北海而準，推而放諸南海而準，推而放諸北海而準。無朝夕，言常行無輟時也。放，猶至也。準，猶平也。○疏曰：置，謂措置也。塞滿天地，言上至天，下至地。溥，布也。橫乎四海，言廣遠也。○今按：準，猶齊也，言無不同也。《詩》云：『自西自東，自南自北，無思不服。』此之謂也。」○曾子曰：「樹木以時伐焉，禽獸以時殺焉。夫子曰：『斷一樹，殺一獸，不以其時，非孝

也。』夫子，孔子也，曾子述其言以云。孝有三：小孝用力，中孝用勞，大孝不匱。勞，猶功也。思慈愛忘勞，可謂用力矣；尊仁安義，可謂用勞矣；博施備物，可謂不匱矣。思慈愛忘勞，思父母之慈愛己而自忘己之勞苦。父母愛之，嘉而弗忘；父母惡之，懼而無怨；無怨，<sup>①</sup>無怨於父母之心。父母有過，諫而不逆。順而諫之。父母既沒，必求仁者之粟以祀之，此之謂禮終。」喻貧困猶不取惡人物以事亡親。○樂正子春下堂而傷其足，數月不出，猶有憂色。門弟子曰：「夫子之足瘳矣，數月不出，猶有憂色，何也？」樂正子春曰：「善如爾之問也！善如爾之問也！吾聞諸曾子，曾子聞諸夫子曰：『天之所生，地之所養，無人爲大。疏曰：言天地

①

「無」上，賀本有「嘉或作喜惡鳥路反」凡八字。

生養萬物之中，無如人最爲大，故《孝經》云「天地之性，人爲貴」是也。父母全而生之，子全而歸之，可謂孝矣；不虧其體，不辱其身，可謂全矣。曾子聞諸夫子，述曾子所聞於夫子之言。○疏曰：非直體全，又須善名得全。能不虧損，形體得全，不損辱其身，是善名得全也。故君子頃步而弗敢忘孝也。『今予忘孝之道，予是有憂色也。』頃，當爲「跬」，聲之誤也。予，我也。○疏曰：頃，跬也，謂一舉足。君子於一舉足之間，不敢忘父母也。言念之恐有損傷。壹舉足而不敢忘父母，壹出言而不敢忘父母。壹舉足而不敢忘父母，是故道而不徑，舟而不游，不敢以先父母之遺體行殆；壹出言而不敢忘父母，是故惡言不出於口，忿言不反於身。不辱其身，不羞其親，可謂孝矣。『徑，步邪趨疾也。忿言不反於身，人不能無忿怒，忿怒之言當由其直，直則人服，不敢以忿言來也。』○疏曰：正道平易，於身無

損傷，邪徑險阻，或於身有患。乘舟則安，浮水則危。以其不忘父母之遺體，故不敢以先父母遺餘之體而行歷危患處。○以上《祭義》。○單居離問於曾子曰：「事父母有道乎？」單居離，曾子弟子也。曾子曰：「有，愛而敬。父母之行，若中道則從，若不中道則諫，諫而不用，行之如由己。且俯從所行而思諫道也。從而不諫，非孝也。同父母之非，不匡諫。諫而不從，亦非孝也。徒以義諫而行不從。孝子之諫，達善而不敢爭辨。爭辨者，作亂之所由興也。《內則》曰：『父母有過，下氣怡色，柔聲以諫。諫若不入，起敬起孝，說則復諫也。』由己爲無咎則寧，謂順諫。由己爲賢人則亂。謂爭辨賢與無咎，互相足。孝子無私樂，父母所憂憂之，父母所樂樂之。孝子唯巧變，故父母安之。若夫坐如尸，立如齊，弗訊不言，齊，謂祭祀時。訊，問也。言必齊色，嚴敬其色。此成人之善者也，未

得爲人子之道也。」爲人父之事。單居離問

曰：「事兄有道乎？」曾子曰：「有，尊視

之以爲己望也，謂儀象也。兄事之不遺其

言。奉其所令。兄之行若中道，則兄事之；

兄之行若不中道，則養之。養，猶隱之。養

之內，不養於外，則是越之也；養之外，不

養於內，則是疏之也。是故君子內外養之

也。」單居離問曰：「使弟有道乎？」曾子

曰：「有，嘉事不失時也。謂冠、娶也。弟之

行若中道，則正以使之；正以使之，以弟道。

弟之行若不中道，則兄事之。且以兄禮敬之。

誦事兄之道，若不可，然後舍之矣。」屈事兄

之道，然猶不變，則怒罰之。曾子曰：「夫禮，大

之由也，不與小之自也。言大者得自由也。飲

食以齒，以長幼也。力事不讓，辱事不齒，執

觴觚杯豆而不醉，和歌而不哀。觴，器也。實

之曰觴。杯，盤、盞、盆、盞之總名也。豆，醬器，以木曰

登。夫弟者，不衡坐，不苟越，不干逆色，趨翔周旋，俛仰從命，不見於顏色，未成於弟也。」《大戴》。

飯：日諸飯也。黍、稷、稻、粱、白黍、黃

粱、稭、稭。稭，思呂反。稭，側角反。○孰穫曰稭，生

穫曰稭。黍，黃黍也。○疏曰：下云白黍，則上黍是黃黍

也。下言黃粱，則上粱是白粱也。按《玉藻》：諸侯朔食四

簋，黍、稷、稻、粱，天子則加以麥、苽爲六。又曰：樵是斂

縮之名，以生穫，故其物縮斂也。稭既對樵，故爲熟穫。

膳：目諸膳也。臠、臠、臠、牛炙、醢、牛臠、

醢、牛臠、羊炙、羊臠、醢、豕炙、醢、豕臠、芥

醬、魚臠、雉、兔、鶉、鶉。臠，音香。臠，許云反。

臠，許堯反。牛炙，章夜反。芥，徐姬邁反。○此上大夫之

禮，庶羞二十豆也。以《公食大夫禮》饌校之，則「臠」、「牛

炙」間不得有「醢」，「醢」衍字也。又以「鶉」爲「鴛」也。

○疏曰：《公食禮》云：「臠一，謂牛臠也。臠二，謂羊臠

也。」原作「一」，據元明本、寬文本、賀本改。

也。臠<sup>三</sup>，謂豕臠也。牛炙四，炙牛肉也。此四物共爲一行，最在於北，從西爲始。醢<sup>五</sup>，謂肉醬也。牛臠六，謂切牛肉也。醢<sup>七</sup>，牛臠八。此四物又爲第二行陳之，從東爲始。羊炙九，羊臠十，醢<sup>十一</sup>，豕炙<sup>十二</sup>，此四物爲第三行陳之，從西爲始。醢<sup>十三</sup>，豕臠十四，芥醬十五，魚臠十六，此四物爲第四行陳之，從東爲始。以上十六豆是下大夫之禮也。雉十七，兔十八，鶩十九，鶩二十，此四物爲五行陳之，從西爲始。此是上大夫所加。《釋鳥》云：「鴛，鴛母。」某氏云謂鴛。①皇氏、賀氏云：鴛，蝙蝠。其義未聞。

飲：目諸飲也。重醴，稻醴清、糟，黍醴清、糟，梁醴清、糟。重，直龍反。清糟，子曹反，徐徂到反。○重，陪也。糟，醇也。清，泔也。致飲有醇者，有泔者，陪設之也。○泔，子禮反。○疏曰：此稻、黍、梁三醴各有清糟，以清糟相配重設，故云重醴。《周禮·漿人》云：「清醴醫醴糟」，注云：「物有清有糟」是也。或以醴爲醴，釀粥爲醴。黍醴，醴，粥。漿，酢醢。○酢，七故反。臠，才戟反。水，清新。醢，梅漿。○醢，本又作「臠」，於紀反，徐於力反。濫。濫，力暫反。○以諸和水也。以《周禮》六飲校之，則濫，涼也。紀，呂之閒名諸爲濫。○疏

曰：《漿人》有「涼」，注云：「涼，今寒粥，若糗飯雜水也。」諸者，衆雜之辭，謂以諸雜糗飯之屬和水也。○又曰：按《漿人》六飲，一曰水，則此經「水」一也；二曰漿，則此經「漿」一也；三曰醴，則此經「重醴」一也，但用清耳；四曰涼，則此經「濫」一也；五曰醫，則此經「或以醴爲醴」一也；六曰醢，則此經「黍醴」一也。六飲之外，此經有「醢」，鄭司農之意，醢與醫爲一物，康成以醢爲梅漿者，見下文云「調之以醢醢」及「若醢醢」，則醢是醢之類也。又云「獸用梅」，故知梅漿也。酒：目諸酒也。清、白。白，事酒、昔酒也。○疏曰：事酒、昔酒二者俱白，故以「白標之，配清酒則三酒也。此無五齊者，五齊是祭祀獻神所飲，非人常用故也。②羞：目諸羞也。糗餌、粉醢。糗，起九反，又昌紹反。餌，音二。醢，讀曰饗，又作「餼」，之然反，又之善反。○糗，擣熬穀也，以爲粉餌與資，此記似脫。《周禮》羞籩之實：糗餌、粉資。羞豆之實：醢食、糝食。此醢當爲餼，以稻米與狼臠膏爲餼是也。○擣，又作「搗」，丁老反。

①「鴛」，原作「鴛」，據元明本、寬文本、賀本改。

②「常」，原作「當」，據元明本、寬文本、賀本改。

資，又作「案」，自私反。糝，西感反。臠，呂六反，徐又音燭。○疏曰：按《周禮》鄭注云：「合蒸曰餌，餅之曰資。」此二物皆粉稻米、黍米爲之。糝者，搗粉熬大豆也，爲餌、案之黏著，故以粉糝搏餌，以粉搏案也。《周禮》「粉」下有「資」，今無者，記人脫漏，更以「醢」益之。醢者，《周禮》羞豆之實自當作糝，若黍醢則是粥，非膳羞之用，此「醢」與「糝食」文連，則是糝類，八珍內作糝與餼，其事亦相連，故云「此醢當爲餼」。且餼雖雜以狼臠膏，亦粥之般類也。食：食，音嗣，下同。○食，飯也，目人君燕食所用也。

蝸醢而苾食、雉羹，絕句。麥食、脯羹、雞羹，絕句。折稊、犬羹、兔羹，和糝不蓼。蝸，力戈反。

苾，音孤，又作「菰」。折，之列反。稊，音杜，徐他古反。和，胡卧反。糝，三敢反。蓼，音了。○菰，彫胡也。稊，稻也。凡羹齊宜五味之和，米屑之糝，蓼則不矣。此脯，所謂析乾牛羊肉也。○齊，才計反，下文同。析，星歷反，下同。○疏曰：以蝸爲醢，苾米爲飯，雉爲羹，三者味相宜，其餘皆然。折稊，謂細折稻米爲飯。此等之羹，只宜以五味調和。米屑爲糝，不須加蓼。濡豚包苦實蓼，濡雞醢醬實蓼，濡魚卵醬實蓼，濡鼈醢醬實蓼。濡，

音而，下同。包，伯交反。醢，音海，一作「醢」，呼兮反，次下句同。卵，依注音鯢，古門反。○凡濡，謂亨之以汁和也。苦，苦茶也，以包豚殺其氣。卵，讀爲鯢。鯢，魚子，或作「攔」也。○疏曰：言濡豚之時，包裹豚肉以苦菜，殺其惡氣，又實之以蓼。魚則以子爲醬。濡雞、濡鼈，加醢及醬而皆實之以蓼。凡言「實蓼」者，皇氏云：謂破開其腹，實蓼於其腹中，又更縫而合之。脰脩蚺醢，脰，丁亂反。蚺，直其反。○脰脩，捶脯施薑桂也。蚺，蚺蜍子也。○捶，徐之藥反。蚺，音毗。蜍，又作「蚺」，①音浮。○疏曰：言食脰脯之時，以蚺醢配之。脯羹兔醢，麋膚魚醢，魚膾芥醬，麋腥醢醬，桃諸、梅諸、卵鹽。卵，力管切。○自蝸醢至此二十六物，似皆人君燕所食也，其饌則亂。膚，切肉也。膚，或爲「胖」。卵鹽，大鹽也。○胖，音判。○疏曰：脯羹，即上析脯爲羹，以免醢配之。麋膚，謂麋肉外膚食之，以魚醢配之。腥，謂生肉，食麋生肉之時，還以麋醢配之。此云「麋腥」，即上「麋膚」，謂孰也。食桃諸、梅諸之時，以卵鹽和之。王肅云：諸，菹也，即今之

①「蚺」，原作「蜍」，據賀本改。

藏桃、藏梅也。欲藏之時，必先稍乾之，故《周禮》謂之乾擦。又曰「自蝸醢至此二十六物」者，皇氏云：蝸，一也。菰食，二也。雉羹，三也。麥食，四也。脯羹，五也。雞羹，六也。折稌，七也。犬羹，八也。兔羹，九也。濡豚，十也。濡雞，十一也。濡魚，十二也。濡鼈，十三也。自此以上，醢之與醬皆和調濡漬雞豚之屬，爲他物而設之，故不數矣。自此以下，醢及醬各自爲物，但相配而食，故數之。殷脩，十四也。蜾醢，十五也。脯羹重出。兔羹，十六也。麋膚，十七也。魚醢，十八也。魚膾，十九也。芥醬，二十也。麋腥，二十一也。醢，二十二也。醬，二十三也。桃諸，二十四也。梅諸，二十五也。卵鹽，二十六也。按《周禮》云諸侯相食皆鼎簋十有二，其正饌與此不同，其食臣下則《公食大夫禮》與此又異，故疑是人君燕食也。按上陳庶羞有臠、臠、臠，依牲大小先後而陳，此則不依牲之次第，又飯食在簋，醢羹之屬在豆，是上下雜亂，故云「其饌則亂」也。云「膚切肉」者，以其與醢醬俱在豆，故爲切肉。若其正膚，則在俎也。卵鹽，形似鳥卵，故云「大鹽也」。凡食齊視春時，飯宜溫也。羹齊視夏時，夏，戶嫁反，下放此。○羹宜熱也。醬齊視秋時，醬宜涼也。飲齊視冬

時。飲宜寒也。凡和，春多酸，夏多苦，秋多辛，冬多鹹，調以滑甘。多其時味以養氣也。○疏曰：依經方：春不用食酸，夏不用食苦，四時各減其時味也。與此不同者，經方所云，謂時氣壯者，減其時味以殺盛氣，此經所云食以養人，恐氣虛羸，故多其時味以養氣也。牛宜稌，羊宜黍，豕宜稷，犬宜粱，鴈宜麥，魚宜苽。言其氣味相成。○疏曰：此亦與上文折稌、犬羹等例不同者，此據尊者正食，上據人君燕食以滋味爲美也。春宜羔豚，膳膏薺；夏宜牀鱸，膳膏臊；秋宜犢麋，膳膏腥；冬宜鮮羽，膳膏膾。薺，音香。牀，其居反。鱸，又作「牀」，所求反。臊，素刀反。麋，音迷。腥，音星。膾，升然反。○此八物四時肥美也。爲其大盛，煎以休廢之膏，節其氣也。牛膏薺，犬膏臊，雞膏腥，羊膏膾。牀，乾雉也。鱸，乾魚也。鮮，生魚也。羽，鴈也。○爲，于僞反。大，音泰。○疏曰：上文「食齊視春時」皆《周禮·食醫》、《庖人》之文。牛中央土畜，春東方木，木克土，木盛則土休廢。犬屬西方金，夏南方火，火剋金，火盛則金休廢。雞屬東方木，秋西方金，金剋木，金盛

則木休廢。羊屬南方火，冬水王，水尅火，水盛則火休廢。《周禮》鄭注云：「羔豚，物生而肥。犢與麋，物成而充。膳，鱸燂熟而乾，魚鴈水涸而性定。」此八物者，得四時之氣尤盛，爲人食之弗勝，是以用休廢之脂膏煎和膳之。義與此同。《士相見禮》云：冬執雉，夏執鴈。故知鴈爲乾雉。《周禮·籩人》云：「臠，鮑魚、鱸，鱸與鮑相對，鮑爲濕魚，故知鱸是乾魚也。鱸既爲乾魚，故鮮爲生魚也。《月令》云：「季冬獻魚」，又《王制》云：「獺祭魚，然後虞人入澤梁」，<sup>①</sup>是冬魚成也。羽族既多，而冬來可食者唯鴈，故知「羽，鴈也」。宜，《周禮》作「行」，謂行用。此云宜，謂氣味相宜，其事同也。牛脩、鹿脯、田豕脯、麋脯、麇脯，<sup>②</sup>麋、鹿、田豕、麇皆有軒，雉、兔皆有芼。麇，九倫反，又作「麋」，又作「麇」，下「田豕麇」同。軒，依注音憲，下同。○脯，皆析乾其肉也。軒，讀爲憲，謂霍葉切也。芼，謂菜釀也。軒，或爲「胖」。○疏曰：麋、鹿、田豕、麇等，非但爲脯，又可腥食。腥食之時，皆以藿葉起之而不細切，故云皆有軒。牛唯可細切爲膾，不宜大切爲軒，故不言之。雉羹、兔羹，皆有芼菜以和之也。爵、鷄、蜩、范、蜩，音條。范，音犯。<sup>③</sup>○蜩，蟬也。范，蜂也。○蜂，又作

「蜩」，蟲，芳凶反。芝栢、菱、棋、棗、栗、榛、柿、瓜、桃、李、梅、杏、柤、梨、薑、桂。芝，音之。栢，音而，又作「橘」。菱，音陵。棋，音矩。榛，側巾反。<sup>④</sup>柿，音侯。柤，側加反。○菱，芰也。棋，枳棋也。柤，梨之不臧者。自牛脩至此三十一物，皆人君燕食所加庶羞也。《周禮》天子羞用百有二十品，記者不能次錄。○芰，其寄反。枳，居氏反。○疏曰：庾蔚云：無華葉而生者曰芝栢。盧氏云：芝，木芝也。王肅云：無華而實者名栢，皆芝屬也。庾又云：鄭云凡三十一物，則芝栢應是一物也。今春夏生於木，可用爲菹，其有白者不堪食也。賀氏云：栢，輒棗。芝，木槿也。以爲二物，與鄭注不同。柤是梨屬，其味不善，故云不臧也。云三十一物者，牛脩一、鹿脯二、田豕脯三、麋脯四、麇脯五、麋軒六、鹿軒七、田豕軒八、麇軒九、雉芼十、兔芼十一、爵十二、鷄十三、蜩十四、范十五、芝栢十六、菱十七、棋十八、棗十九、栗二十、榛二十一、柿二十

- ① 「虞」，原作「魚」，據元明本、寬文本、賀本改。  
 ② 「麇脯」二字，原脫，據賀本補。  
 ③ 「犯」，原作「范」，據賀本改。  
 ④ 「巾」，原作「南」，據寬文本、賀本改。



二、瓜二十三、桃二十四、李二十五、梅二十六、杏二十七、相二十八、梨二十九、薑三十、桂三十一。以下文云「大夫燕食有膾無脯」，《周禮》正羞唯有棗、栗、榛、桃，故知此是人君燕食所加庶羞也。天子庶羞則不止此，作記之人不能依次條錄也。大夫燕食有膾無脯，有脯無膾。士不貳羹載。庶人耆老不徒食。尊卑差也。膾，春用蔥，秋用芥。豚，春用韭，秋用蓼。芥，芥醬也。脂用蔥，膏用齏。齏，戶界反，俗本多作「薺」，非也。○脂，肥凝者，釋者曰膏。三牲用薺，和用醢。薺，魚氣反。和，戶卧反，注皆同，又如字。醢，呼兮反。○薺，煎菜莢也，《漢律》、《會稽獻焉》，《爾雅》謂之楸。和用醢者，畜與家物自相和也。○會，古外反。稽，古今反。楸，色八反。畜，許又反，又許六反。○疏曰：賀氏云：今蜀郡作之，九月九日取菜莢，折其枝，連其實，廣長四五寸，一升實可和十升膏，名之薺也。獸用梅。亦野物自相和。鶉羹、雞羹、鴛、釀之蓼。釀，謂切雜之也。鴛在羹下，烝之不羹也。魴、鰕、烝，絕句。讀魴、鰕、烝，絕句。雞燒，絕句。○疏曰：雞，鳥之小者。

火中燒之，然後調和。雉，絕句。一讀「雉雞」為句。○疏曰：雉文在下，或烝，或燒，或羹，無定。薺，無蓼。魴，音房。鰕，音敍。雞，字又作「鷄」，仕俱反，又匠俱反。燒，如字，一音焦。○薺，蘇荏之屬也。燒煙於火中也。自膾用蔥至此，言調和菜釀之宜也。○作，而甚反。調，徒弔反。○疏曰：魴、鰕、雞，三者，調和惟以蘇荏之屬，無用蓼。不食雞鰕。狼去腸，狗去腎，狸去正脊，兔去尻，狐去首，豚去腦，魚去乙，鰕去醜。去，起呂反，下並同。尻，苦刀反。腦，奴老反。○皆為不利人也。雞鰕，伏乳者。乙，魚體中害人者名也。今東海鰕魚有骨名乙，在目傍，狀如篆乙，食之鰕人，不可出。醜，謂鰕竅也。○為，于偽反，下「皆為」同。伏，扶又反。乳，而樹反。鰕，音容。篆，直轉反。鰕，又作「鰕」，古猛反，又上孟反。竅，苦叫反。肉曰脫之，魚曰作之，棗曰新之，栗曰撰之，桃曰膽之，粗梨曰攢之。膽，丁敢反。攢，再官反，本又作「攢」。○皆治擇之名也。○疏曰：皇氏云：脫，謂治肉，除其筋膜，取好處。李巡曰：去其骨。郭云：剥其皮也。作之，《爾雅》作「斲之」，郭注云：「謂削鱗也。」棗易有塵埃，恒治拭之使新。栗，蟲好

食，數數布陳撰，省視之。桃多毛，拭治去毛，令色青滑如膽也。或曰：膽謂苦，桃有苦如膽者，擇去之。攢之者，恐有蟲，故一一攢看其蟲孔也。牛夜鳴則廕，羊冷毛而毳，羶；狗赤股而躁，臊；鳥鵠色而沙鳴，鬱；豕望視而交睫，腥；馬黑脊而般臂，漏；雞尾不盈握，弗食。舒鴈翠，鵠鵠胖，舒鳧翠，雞肝，鴈腎，鵠奧，鹿胃。廕，音由。冷，音零。毳，昌銳反。躁，早報反。鵠，本又作「鵠」，劉昌宗音普保反，徐芳表反，又普表反。沙，如字，一音所嫁反，注同。睫，音接。腥，依注作「星」，《字林》音先定反。般，音班。臂，又作「擘」，必避反，徐方避反。漏，依注音蠅，力侯反。鵠，胡篤反。鵠，吁驕反。胖，音判。鵠，音保。奧，於六反。胃，音謂，字又作「胃」，同。○亦皆為不利人也。廕，惡臭也。《春秋傳》曰：「一薰一廕。」冷毛毳，毛別聚旃不解者也。赤股，股裏無毛也。鵠色，毛變色也。沙，猶嘶也。鬱，腐臭也。望視，遠視也。腥，當為「星」，聲之誤也。星，肉中如米者。般臂，前脰般般然也。漏，當為「蠅」，如蠅蛄臭也。舒鴈，鵠也。翠，尾肉也。鵠鵠胖，謂脅側薄肉也。舒鳧，鵠也。鵠奧，脾胝也。鵠，或為「鵠」也。○薰，

許云反，或作「煮」，又作「葷」。解，胡買反。嘶，音西，字又作「斯」，音同。腐，扶甫反。脰，胡定反。蛄，音姑。鵠，五何反。鵠，音木。脾，扶移反。胝，昌私反。○疏曰：此一節與《周禮》文同。牛好夜鳴，則其肉廕臭。冷，謂毛本稀冷。毳，謂毛頭毳結。羊若如此，其肉羶氣。躁，謂舉動急躁。狗若如此，其肉臊惡。鵠，謂色變無潤澤。沙，謂鳴而聲嘶。鳥若如此，其肉腐臭。腥，謂肉結如星。望視，謂豕視望揚。交睫，謂目睫毛交。豕若如此，則其肉似星也。黑，謂脊黑。般臂，謂前脰色般般然。馬若如此，則其肉如蠅蛄臭也。雞，謂小鳥。凡鳥尾盈一握，然後堪食。若其過小，不堪食也。鵠，鴨也。脾胝，謂藏之深奧處。雞尾至鹿胃八物，①亦不可食，皆為不利人也。肉腥，細者為膾，大者為軒。腥，音星，《字林》作「胜」，云「不熟也」，先丁反。○言大切，細切異名也，膾者必先軒之，所謂轟而切之也。○轟，本又作「攝」，又作「牒」，皆之涉反，下同。或曰：麋、鹿、魚為菹，麕為辟雞，野豕為軒，兔為宛脾。切蔥若齏，實諸醢以柔之。麕，九

①「雞」，原作「鵠」，據元明本、寬文本、賀本改。

倫反。辟，必益反，徐芳益反。宛，丁晚反。脾，婢支反。醢，徐呼兮反，本或作「醢」。○此軒，辟雞，宛脾皆菹類也。醢菜而柔之以醢，殺腥肉及其氣。今益州有鹿痿者，近由此爲之矣。菹，軒蟲而不切，辟雞，宛脾蟲而切之。軒，或爲「胖」。宛，或作「鬱」。○痿，於僞反。益州人取鹿殺而埋之地中令臭，<sup>①</sup>乃出食之，名鹿痿是也。近，附近之近。○疏曰：凡大切，若全物爲菹，細切者爲臠。其牲體大者菹之，其牲體小者臠之。用此麋鹿魚野豕爲菹，麋兔爲臠也，故鄭注《醢人》云：「細切爲臠，全物若脾爲菹。」《少儀》曰：「麋鹿爲菹，野豕爲軒，皆脾而不切。麋爲辟雞，兔爲宛脾，皆脾而切之。」是菹大而臠小也。《少儀》不云魚，此云魚者，記者異聞也。蔥若齏置之醋中，悉皆濡孰，故云柔之。

### 右飲食。

爲宮室，辨外內，男子居外，女子居內。深宮固門，閭寺守之，男不入，女不出。此一節自後章「謹夫婦」下移入。<sup>②</sup>○閭，掌中門之禁也。寺，掌內人之禁令也。男不言內，女不言外。謂事業次序。非祭非喪，不相授器。祭嚴喪遽，不嫌也。

○疏曰：祭與喪時得相授器者，祭是嚴敬之處，喪是促遽之所，於此之時，不嫌男女有淫邪之意。其相授，則女受以筐。其無筐，則皆坐奠之而後取之。筐，非鬼反。○奠，停地也。外內不共井，不共湑浴，不通寢席，不通乞假。男女不通衣裳，內言不出，外言不入。湑，彼力反。○湑，浴室也。男子入內，不嘯不指，夜行以燭，無燭則止。嘯，依注音叱，尺失反。○嘯，讀爲叱。叱，嫌有隱使也。○疏曰：常事以言語處分，是顯使人也。如有姦私，恐人知聞，不以言語，但諷叱而已，故云嫌有隱使也。女子出門，必擁蔽其面，夜行以燭，無燭則止。擁，猶障也。○障，音章。道路，男子由右，女子由左。地道尊右。○男女不雜坐，不同櫨枷，不同巾櫛，不親授。嫂叔不通問，諸母不漱裳。外言不入於櫨，內言不出於櫨。女子許嫁，纓，

<sup>①</sup>「益」，原作「者」，據元明本、寬文本、賀本改。

<sup>②</sup>「後章」，原作「從草」，據元明本、寬文本、賀本改。

非有大故，不入其門。姑、姊、妹、女子子已嫁而反，兄弟弗與同席而坐，弗與同器而食。施，羊支反。枷，又作「架」，徐音稼，古本無此字。櫛，側乙反。嫂，又作「姦」，素早反。漱，悉侯反。梱，又作「闕」，苦本反。○皆爲重別防淫亂。不雜坐，謂男子在堂，女子在房也。施，可以枷衣者。通問，謂相稱謝也。諸母，庶母也。漱，澣也。庶母賤，可使漱衣，不可使漱裳。裳賤，尊之者，亦所以遠別。外言，內言，男女之職也。不出入者，不以相問也。梱，門限也。女子許嫁繫纓，有從人之端也。大故，宮中有災變若疾病，乃後人也。女子有宮者，亦謂由命士以上也，《春秋傳》曰：「群公子之舍，則已卑矣。」女子十年而不出嫁，及成人可以出矣，猶不與男子共席而坐，亦遠別也。○別，彼列反，下及注同。澣，戶管反。○疏曰：諸母，謂父之諸妾有子者。衣，謂盛服。裳，卑褻也。欲尊崇於兄弟之母，故不可使漱裳也，又欲遠別也。男子單稱子，女子重言子者，按鄭注《喪服》云：重言女子子，「別於男子也」。○《曲禮》。

右男女之別。○傳：孔子適季氏，康子晝居內寢。孔子問其所疾，康子出見

之，言終，孔子退。子貢問曰：「季孫不疾而問諸疾，禮與？」孔子曰：「夫禮，君子不有大故，則不宿於外；大故，謂喪憂。非致齋也，非疾也，則不晝夜處於內。是故夜居於外，雖弔之可也；晝居於內，雖問其疾可也。」《家語》。○公父文伯之母敬姜者，季康子之從祖叔母也。康子往焉，闕門而與之言，闕，闕也。門，寢門也。皆不踰闕。闕，門限也。皆，二人也。敬姜不踰闕而出，康子不踰闕而入，傳曰：「婦人送迎不出門，見兄弟不踰闕」是也。祭悼子，康子與焉。悼子，穆伯之父，敬姜先舅也。與，與祭也。酢不受，徹俎不宴，禮：祭，主人獻賓，賓酢主人。不受，敬姜不親受也。祭畢徹俎，又不與康子宴飲。宗不具不繹，繹，又祭也。唐尚書云：祭之明日也。昭謂：天子諸侯曰繹，以祭之明日。卿大夫曰賓尸，與祭同日。此言繹，通言之也。賈侍中云：宗，宗臣，主祭祀之禮。不具，謂宗臣不具

在，則敬姜不與繹也。繹不盡飫則退。說云：飫，

宴安私飲也。昭謂：立曰飫，坐曰宴。言宗具則與繹，

繹畢而飲，不盡飫禮而退，恐有醉飽之失，皆所以遠嫌

也。孔子聞之曰：「男女之別，禮之大經。」

公父氏之婦，動中禮，趣度於禮矣。」《國

語·魯語》。

禮始於謹夫婦。不敢縣於夫之樞，不敢

藏於夫之篋笥，不敢共湑浴。縣，音玄。樞，

音輝。施，以支反。○竿謂之施。樞，杙也。○竿，音干。

杙，音弋。○疏曰：《爾雅》云：「櫨，謂之杙。」李巡曰：

「杙，謂櫨杙也。」又云：「在牆者謂之樞。」郭云：「植曰樞，

橫曰施。」夫不在，斂枕篋簟席，褥器而藏之。

不敢褻也。少事長，賤事貴，咸如之。咸，皆也。

右夫婦之別。○傳：白季使，過冀，

見冀缺耨，其妻饁之。饁，域輒反。○白季，晉

臣也。冀，晉邑。耨，鋤也。野饁曰饁。○疏曰：耨，耘

苗也。①饁，饋也。孫炎曰：「饁，野之饋也。」敬，相

待如賓。與之歸，言諸文公曰：「敬，德之

聚也。能敬必有德。德以治民，君請用

之。臣聞之，出門如賓，如大賓。承事如

祭，常謹敬也。仁之則也。」僖公三十三年《春秋左

氏傳》。②

夫婦之禮，唯及七十同藏無間。間，閒，廁

之間，皇如字。○衰老無嫌。及，猶至也。故妾雖老，

年未滿五十，必與五日之御。與，音預。○五十

始衰，不能孕也。妾閉房不復出御矣。此御謂侍夜勸息也。

五日一御，諸侯制也。諸侯取九女，姪娣兩兩而御，則三日

也。次兩媵，則四日也。次夫人專夜，則五日也。天子十

五日而一御。○復，扶又反。③姪，大結反。娣，大計反。

媵，羊證反，又繩證反。○疏曰：此經據妾言之，五十以上

則不與。然則妻雖五十以上猶得與也。夫人及二媵各有

姪娣，凡六人，故三日也。夫人、姪娣卑於兩媵。若望前，

①「耘」，原作「芸」，據賀本改。

②下「三」字，原作「四」，據元明本、寬文本、賀本改。

③「復扶又反」四字，原在上文「與音預」下，據寬文本、賀本移此。

卑者在前，尊者在後，望後乃反之。天子御法，按《九嬪》注云：「女御八十一人當九夕，世婦二十七人當三夕，九嬪九人當一夕，三夫人當一夕，后當一夕，亦十五日而徧云。自望後反之。」將御者，齊漱澣，慎衣服，櫛，緹，笄，總角，拂髦，衿纓，綦履。齊，爭皆反，下皆同。澣，音浣。○其往如朝也。角，衍字也。拂髦，或爲「縹髮」也。○朝，直遙反。縹，居蚪反。雖婢妾，衣服飲食必後長者。後，胡豆反。○人貴賤不可以無禮。妻不在，妾御莫敢當夕。辟女君之御日也。○辟，音避。

右御妻妾。○傳：《荀子》曰：霜降

逆女，冰泮殺內，十日一御。楊倞曰：此蓋誤

耳，當爲「冰泮逆女，霜降殺內」，故《詩》曰：「土如歸妻，

迨冰未泮。」殺，滅也。內，謂妾御也。十日一御，即殺

內之義。冰泮逆女，謂發生之時合男女也。霜降殺內，

謂閉藏之時禁嗜慾也。《月令》在十一月，此云霜降，荀

卿與《呂氏》所聞異也。鄭云：歸妻，謂請期也。冰未

泮，正月中以前，二月可成昏矣，故曰冰泮逆女。○今

按：《荀子》本文與上篇孔子對哀公語同，楊氏之說恐未

必然。然其言霜降閉藏，十日一御者，似亦有理，故特

存之。○晉平公有疾，叔向問於子產，子產

曰：「僑聞之，君子有四時：朝以聽政，聽

國政。晝以訪問，問可否。夕以修令，念所施。

夜以安身。於是乎節宣其氣，宣，散也。○疏

曰：以時節宣散其氣也。節，即四時是也。凡人形神有

限，不可久用。神久用則竭，形大勞則敝，不可以久勞

也。神不用則鈍，<sup>①</sup>形不用則痿，不可以久逸也。固當

勞逸更遞，以宣散其氣。朝以聽政，聽政久則疲，疲則

易之以訪問，訪問久則倦，倦則易之以修令，修令久則

怠，怠則易之以安身，安身久則滯，滯則又易之以聽政。

以後事改前心，則亦所以散其氣也。勿使有所壅

閉湫底，以露其體。湫，子小反，徐音秋，又在酒

反。底，丁禮反。○湫，集也。底，滯也。露，羸也。壹

之則血氣集滯而體羸露。○羸，劣危反。○疏曰：壅，

①「鈍」，原作「銳」，據賀本改。

謂障而不使行，若土壅水也。閉，謂塞而不得出，若閉門戶也。湫，謂氣聚。底，謂氣止。服虔云：湫，著也。底，止也。①言人之養身，當須宣散其氣，勿使氣有壅閉集滯以羸露其形體也。若其壹之，則血氣集滯，使不得宣散，氣不散則體羸露也。肥則膚肉厚，骨不見，瘦則肌膚薄，故體羸露。羸露，是露骨之名，其義與裸相近。裸，露形也。羸，露骨也。茲心不爽，而昏亂百度。茲，此也。爽，明也。百度，百事之節。○疏曰：形之與神，相隨而有，形以神為主，神以形為宅。形彊則神彊，形弱則神弱，神常隨形而盛衰也。既露其體，則神識亦弱，致使此心不明，照察失宜，而昏亂百事之節度也。今無乃壹之，同四時也。則生疾矣。」叔向曰：「善哉！肸未之聞也，此皆然矣。」晉侯求醫於秦，秦伯使醫和視之，曰：「疾不可為也！是謂近女室，疾如蠱。」近，附近之近。蠱，音古。○蠱，惑疾。○疏曰：蠱者，心志惑亂之疾，若今昏狂失性，其疾名之為蠱。公惑於女色，失其常性，如彼惑蠱之疾也。非鬼非

食，惑以喪志。喪，息浪反。○惑女色而失志。良臣將死，天命不祐。」祐，音又。○良臣不匡救君過，故將死而不為天所祐。公曰：「女不可近乎？」對曰：「節之。先王之樂，所以節百事也，故有五節。五聲之節。遲速本末以相及，中聲以降。五降之後，不容彈矣。降，音絳，下及注同，或音戶江反。彈，徒丹反，又徒旦反。○此謂先王之樂得中聲，聲成五降而息也。降，罷退。○疏曰：劉炫云：言五降而息罷退者，五聲一周，聲下而息，前聲罷退以待後聲，非作樂息也。於是有煩手淫聲，惛惛心耳，乃忘平和，君子弗聽也。惛，吐刀反，下同。惛，音因。○五降而不息，則雜聲並奏，所謂鄭、衛之聲。○疏曰：劉炫云：五聲皆降，則聲一成。曲既未成，當更從上始，不以後聲來接前聲，而容手妄彈擊，是為煩手，所擊非復正聲，是為淫

①「底」字，原脫，據賀本補。「止」，原作「正」，據元明本、寬文本、賀本改。

聲。物亦如之。言百事皆如樂，不可失節。至於煩，乃舍也已，無以生疾。舍，音捨，注同。○煩不舍則生疾。君子之近琴瑟，以儀節也，非以惛心也。爲心之節儀，使動不過度。天有六氣，謂陰、陽、風、雨、晦、明也。降生五味，謂金味辛、木味酸、水味鹹、火味苦、土味甘，皆由陰陽風雨而生。○疏曰：杜解以爲五味是五行之味，六氣共生五行，非一氣生一行也。或以爲雨爲木味、風爲土味、晦爲水味、明爲火味、陽爲金味，而陰氣屬天而不爲五味之主，非杜意也。發爲五色，辛色白，酸色青，鹹色黑，苦色赤，甘色黃。發，見也。○見，賢遍反。徵爲五聲，白聲商，青聲角，黑聲羽，赤聲徵，黃聲宮。徵，驗也。○「聲徵」之徵，張里反。淫生六疾。淫，過也。滋味聲色所以養人，然過則生害。六氣曰陰、陽、風、雨、晦、明也，分爲四時，序爲五節。六氣之化，分而序之，則成四時，得五行之節。○疏曰：六氣並行，無時止息，但氣有溫暑涼寒，分爲四時，春、夏、秋、冬也。序此四時以爲五行之節，計一年有三

百六十五日，序之爲五行，每行七十二日有餘，土無定方，分主四季，每季之末，有十八日爲土王之日也。過則爲菑：陰淫寒疾，菑，音災，下同。○寒過則爲冷。陽淫熱疾，熱過則喘渴。○喘，昌哀反。風淫末疾，末，四支也。風爲緩急。○疏曰：人之身體，心腹爲本，四支爲末，故以末爲四支，謂手足也。風疾人身，則四支有緩急。雨淫腹疾，雨濕之氣爲洩注。○洩，息列反。晦淫惑疾，晦，夜也。爲宴寢過節，則心惑亂。明淫心疾。明，晝也。思慮煩多，心勞生疾。○思，息利反。○疏曰：過即淫也。陰陽風雨有多時有少時，晦明則天有常度，無多少時也。今言淫者，謂人受用此氣有過度者也。陰陽風雨雖各以其氣與人爲病，若其能自防護，受之不多，則得無此病也。其晦明天氣不以病人，但人用之過度則亦爲病。晦是夜也，夜當安身，女以宣氣，近女過度則心惑亂也。明是晝也，晝以營務，營務當用心，思慮煩多，則心勞敝也。陰陽風雨當受之有節，晦明當用之有限，無節無限必爲菑害，故其過則爲菑也。女，陽物而晦時，淫



則生內熱惑蠱之疾。女常隨男，故言陽物。家道

常在夜，故言晦時。今君不節不時，能無及此

乎？「出告趙孟，趙孟曰：「誰當良臣？」

對曰：「主是謂矣。主相晉國，於今八年，

晉國無亂，諸侯無闕，可謂良矣。和聞之，

國之大臣，榮其寵祿，任其大節。有菑禍

興而無改焉，相，息亮反。○改，改行以救菑。○

行，下孟反。必受其咎。今君至於淫以生

疾，將不能圖恤社稷，禍孰大焉？主不能

禦，吾是以云也。」咎，其九反。禦，本亦作「御」，

魚呂反。○云主將死。趙孟曰：「何謂蠱？」對

曰：「淫溺惑亂之所生也。溺，乃狄反。○溺，

沈沒於嗜慾。○嗜，時志反。於文，皿蟲為蠱。

皿，命景反，《說文》讀若猛，《字林》音猛。○文，字也。

皿，器也。器受蟲害者為蠱。穀之飛亦為蠱。穀

久積則變為飛蟲，名曰蠱。在《周易》，女惑男，

風落山謂之蠱䷑。巽下艮上，蠱。巽為長女，為

風。艮為少男，為山。少男而說長女，非匹，故惑。山

木得風而落。○巽，音遜。艮，古恨反。長，丁丈反，下

同。少，詩照反，下同。說，音悅。皆同物也。」物，

謂類也。趙孟曰：「良醫也。」厚其禮而歸

之。贈賄之禮。○昭公元年《春秋左氏傳》。

姙子者，寢不側，坐不邊，立不蹕，不食

邪味，割不正不食，席不正不坐，目不視邪

色，耳不聽淫聲，夜則令瞽誦《詩》道正事。

蹕，當作「跛」，音庇。○《列女傳》。①

右胎教。○傳曰：姙子之時，必謹所

感。心感於物，則其子形音肖之。故姙者

能謹於此，則生子形容端正，才識必過人

矣。此之謂胎教。②

妻將生子，及月辰，居側室。側室，謂夾之

① 「列女傳」三字，原在下行「右胎教」下，據賀本及全書慣例移此。

② 「教」下，賀本有小字注文「列女傳」三字。

室，次燕寢也。○夾，古洽反，又古協反。○疏曰：夫正寢之室在前，燕寢在後，側室又次燕寢之旁，故謂之側室。妻既居側室，則妾亦當然也，故《春秋傳》曰「趙有側室曰穿」，是妾之子也。生子不於夫正室及妻之燕寢，必於側室者，以正室、燕寢尊故也。及月辰，謂生月之辰初朔之日也。夫使人日再問之，作而自問之。妻不敢見，使姆衣服而對。至于子生，夫復使人日再問之。見，賢遍反，下及注同。姆，音茂，《字林》亡又反，

音母，亡久反。○作，有感動。夫齊，則不入側室之門。齊，側皆反。○若始時使人問。子生，男子設弧於門左，女子設帨於門右。表男女也。弧者，示有事於武也。帨，事人之佩巾也。三日接子，大夫少牢，士特豕，庶人特豚，其非豕子，則皆降一等。接，依注音捷，字妾反，下同。○接，讀爲捷，捷，勝也。謂食其母，使補虛強氣也。○食，音嗣，下注「食子」、「食乳」皆同。○疏曰：接，王肅、杜預並以爲接待之義，鄭讀爲捷，爲補虛強氣者。以婦人初產，必困病虛羸，當產三日之內，必未能以禮相接，應待負子之後。今三日

而爲之，故知補虛強氣宜速故也。始負子，男射女

否。始，有事也。負之，謂抱之而使鄉前也。○鄉，許亮

反。○今按：射，謂以桑弧蓬矢六射天地四方。鄭云：

桑弧蓬矢，本大占也。天地四方，男子之所有事也。○大，

音泰。餘義見《內治》篇。異爲孺子室於宮中，特埽

一處以處之。擇於諸母與可者，必求其寬裕慈

惠、溫良恭敬、慎而寡言者，使爲子師，其次

爲慈母，其次爲保母，皆居子室。諸母，衆妾也。

可者，傳御之屬也。子師，教示以善道者。慈母，知其嗜慾

者。保母，安其居處者。○疏曰：此人君養子之禮，兼大

夫、士也。大夫之子有食母，食，音嗣。○選於傳御

之中，《喪服》所謂乳母也。士之妻自養其子，賤不敢

使人也。它人無事不往。爲兒精氣微弱，將驚動也。

○爲，于僞反。○凡接子擇日。雖三日之內，尊卑必

皆選其吉焉。○今按：此與上章不同，或別記異聞也。

○二月之末，擇日剪髮爲髻，男角女羈，否則

男左女右。髻，丁果反，徐大果反。○髻，所遺髮也。

夾凶曰角。午達曰羈。○凶，音信，又思忍反。○疏曰：三月剪髮，所留不剪者謂之鬚。云凶者，是首腦之上縫，故《說文》云：十，其字象小兒腦不合也。夾凶兩旁，當角之處留髮不剪也。《儀禮》注云：「一縱一橫曰午。」剪髮留其頂上，縱橫各一，交相通達，故云午達。羈者，隻也。文雖據大夫、士、天子、諸侯之子亦當然也。是日也，妻以子見於父，貴人則為衣服，由命士以下皆漱澣。見，賢遍反。○貴人，大夫以上也。由，自也。男女夙興，沐浴衣服，具視朔食。朔食，天子太牢，諸侯少牢，大夫特豕，士特豚也。夫人門，升自阼階，立于阼，西鄉。妻抱子出自房，當楣立，東面。楣，音眉。○人門者，人側室之門也。大夫以下，見子就側室，見妾子於內寢，辟人君也。○疏曰：上文云「妻將生子，居側室」至此，未有妻出之文，則知此謂入側室之門。但側室在燕寢之旁，亦南嚮，故有阼階、西階。但卿、大夫之室唯有東房，妻抱子出東房，當楣立，東面，與夫相對也。見適妻子「就側室」，則此文是也。云「見妾子於內寢」者，<sup>①</sup>見下文。內寢，適妻寢也。人君則見適子於路

寢，見庶子於側室，故云辟人君也。姆先相曰：「母某敢用時日，<sup>②</sup>祗見孺子。」相，息亮反。○某，妻姓，若言姜氏也。祗，敬也，或作「振」。○疏曰：「姆先相」者，傅姆在母之前而相佐也。孺，稚也。夫對曰：「欽有帥。」父執子之右手，咳而名之。咳，戶才反，字又作「孩」。○欽，敬也。帥，循也。言教之敬，使有循也。執右手，明將授之事也。○疏曰：咳，謂以手承子之咳也。妻對曰：「記有成。」遂左還授師，還，音旋。○記，猶識也，識夫之言使有成也。師，子師也。○疏曰：妻對既訖，遂左向迴還，轉身西南，以子授子師也。子師辯告諸婦諸母名，辯，音遍。○後告諸母，若名成於尊。○疏曰：諸婦，謂同族卑者之妻。諸母，同族尊者之妻。後告諸母，欲名成於尊。妻遂適寢。復夫之燕寢。夫告宰名，宰辯告諸男名，書曰「某年某月某日某生」而藏之。宰，謂屬吏也。《春秋》書

① 「見」，原作「是」，據元明本、寬文本、賀本改。

② 「母」字，原脫，據賀本補。

桓六年「九月丁卯，子同生」。○疏曰：此經所陳謂卿、大夫以下，故以名偏告同宗諸男也。若諸侯，既絕宗，則不告諸男也。此舉諸男，舉其卑者，卑者尚告，則告諸父可知。此既據卿、大夫以下而引《春秋》者，欲證明子生年月日之事也。藏之，謂藏之家之書府。宰告閭史，閭史書

爲二，其一藏諸閭府，其一獻諸州史。州史

獻諸州伯，州伯命藏諸州府。四閭爲族，百家也。

閭胥，中士一人。五黨爲州，州二千五百家也。州長，中

大夫一人也。皆有屬吏。獻，猶言也。○疏曰：州伯，則

州長也。州府，是州長之府藏。夫人食如養禮。養，

羊尚反。○夫人，已見子入室也，其與妻食如饋舅姑之禮

也。○疏曰：養禮，即《士昏禮》婦盥饋舅姑之禮也。以下

文云妾生子及三月之末見子之禮「如始入室」，明知此亦如之也。○凡名子，不以國，不以日月，不以隱

疾，不以山川。此一節文不足，今取《曲禮》移入。

○此在常語之中，爲後難諱也，《春秋傳》曰：名，終將諱之。隱疾，衣中之疾也，謂若黑臀、黑肱矣。疾在外者，雖不得言，尚可指擿，此則無時可辟，俗語云「隱疾難爲醫」也。○疏曰：杜氏《春秋》注云：「不以本國爲名。」他國即

得爲名，如衛侯晉、晉侯周是也。日月，甲、乙、丙、丁也，殷

家得以爲名者，殷質，不諱名故也。然《春秋》魯僖公名申、

蔡莊公名甲午者，亂世不能如禮也。按傳又云「不以官」，

「不以畜牲」，「不以器幣」，此記文略耳。傳云「以官則廢

職，以山川則廢主，以畜牲則廢祀，以器幣則廢禮。晉以僖

侯廢司徒，宋以武公廢司空，先君獻、武廢二山」是也。大

夫、士之子，不敢與世子同名。尊世子也。其先

世子生，亦勿爲改。○疏曰：衛襄公名惡，其大夫有齊惡，

是先生者不改也。○妾將生子，及月辰，夫使人

日一問之。子生三月之末，漱澣夙齊，見於

內寢，禮之如始入室。君已食，徹焉，使之特

餼，遂入御。內寢，適妻寢也。禮，謂已見子，夫食而使

獨餼也。如始入室，始來嫁時，妾餼夫婦之餘，亦如之。既

見子可以御，此謂大夫、士之妾也。凡妾稱夫曰君。○疏

曰：凡宮室之制，前有路寢，次有燕寢，次夫人正寢。卿、

大夫以下，前有適室，次有燕寢，次有適妻之寢，但夫之燕

寢在外，亦名外寢。適妻寢在內，故名內寢也。《昏禮》，夫

婦同牢之後，媵餼夫餘，御餼婦餘，彼謂正妻。若妾始來，

夫婦同食，初來之妾特餒其餘。今妾已見子之後，夫婦共食，令生子之妾特餒其餘，亦如始來時也。大夫之妻見子之後，夫人食乃進御。此文云見子遂入御，妾禮異於正妻也。○庶人無側室者，及月辰，夫出居群室。

其問之也與子見父之禮，無以異也。夫雖辟之，至問妻及見子禮同也。庶人或無妾。○疏曰：以無側室，妻在夫寢，妻將生子，故夫出辟之。若有側室，則妻在側室，夫自居正寢，不須出居群室也。○凡父在，孫

見於祖，祖亦名之，禮如子見父，無辭。見子

於祖，家統於尊也。父在則無辭。有適子者無適孫，與見庶子同也。父卒而有適孫則有辭，與見冢子同。父雖卒，

而庶孫猶無辭也。○適，丁歷反，下及注同。○疏曰：適

子既在，其孫猶為庶孫，無所傳重故也。若所生適子，其父既卒，則適孫與長子相似，謂有傳重之事，故有告戒之辭也。若庶孫父卒，見祖亦無辭也。○由命士以上及

大夫之子，旬而見。旬，依注音均。○旬，當為「均」，

聲之誤也。有時適、妾同時生子，子均而見者，以生先後見之。既見乃食，亦辟人君也。《易·說卦》「坤為均」，今亦

或作「旬」也。○疏曰：均，謂均齊也。雖先生者先見，後生者後見，然同是未食之前，故云均而見。○今按：此說疑鄭失之。旬如字，謂十日也。別記異聞，或不待三月也。冢子未食而見，必執其右手；適子、庶子已食而見，必循其首。天子、諸侯尊，別世子。雖同母，禮則異矣。未食、已食，急正緩庶之義也。○別，彼列反，

下同。○疏曰：此謂天子、諸侯未與后、夫人禮食而先見冢子，是急於正也。先與后、夫人禮食之後，然後始見適子、庶子，是緩於庶也。必以手撫循其頭首，示恩愛之情也。○今按：此承上文記大夫禮，而又別其冢、適、庶子之異同也。冢子之禮仍與前章同，唯適子、庶子為異耳。

### 右生子。

幼子常視母誑。誑，九況反。○視，今之「示」

字。小未有所知，常示以正物以正教之，無誑欺。○疏曰：小兒恒習效長者，長者恒示以正事，不宜示以欺誑，恐即學之。故曾子兒啼，妻云：「兒莫啼，吾當與汝殺豕。」兒聞輒止，妻後向曾子說之，曾子曰：「勿教兒欺。」即殺豕食

兒，是不誑也。又曰：古者觀視於物及以物視人，<sup>①</sup>皆作「示」旁著「見」。後世以物示人單作「示」字，故鄭舉今以辨古，詳已見《昏禮》篇。○《曲禮》補。子能食食，教以右手；能言，男「唯」女「俞」。男鞶革，女鞶絲。食食，上如字，下音嗣。唯，于癸反。俞，以朱反。鞶，步干反。○俞，然也。鞶，小囊，盛帨巾者。男用韋，女用繒，有飾緣之，則是鞶裂與？《詩》云「垂帶如厲」，紀子帛名裂繻，字雖異，意實同也。○盛，音成。緣，于絹反。裂，音列，或音厲。與，音餘。厲，音列。六年，教之數與方名。方名，東、西、南、北。七年，男女不同席，不共食。蚤其別也。○別，彼列反。八年，出入門戶及即席飲食，必後長者，始教之讓。後，胡豆反。○示以廉恥。九年，教之數日。數，所主反。○朔望與六甲也。十年，出就外傅，居宿於外，學書計，衣不帛襦袴。禮帥初，朝夕學幼儀，請肄簡諒。襦，又作「褕」，音儒。袴，苦故反。肆，又作「肆」，以二反。○外傅，教學之師也。不用帛為襦袴，

為大溫傷陰氣也。禮帥初，遵習先日所為也。肆，習也。諒，信也。請習簡，謂所書篇數也。請習信，謂應對之言也。○大，音泰。○疏曰：請，為請於長者。肆，習也。簡，謂篇章簡策也。諒，信也，謂言語信實也。十有二年，學樂，誦《詩》《舞》《勺》。成童，舞《象》，學射御。勺，章略反。○先學《勺》，後學《象》，文武之次也。成童，十五以上。○疏曰：熊氏云：《勺》、《象》也。《象》，文舞也。成童，謂十五以上。舞《象》，謂用干戈之小舞也。以其年尚幼，故習文武之小舞也。二十而冠，始學禮，可以衣裘帛，舞《大夏》，惇行孝弟，博學不教，內而不出。冠，古亂反。衣，於既反。行，如字，又下孟反。弟，音悌。○《大夏》，樂之文武備者也。內而不出，謂人之謀慮也。○疏曰：二十成人，血氣強盛，無慮損傷，故可以裘帛也。《大夏》是禹樂，禪代之後，在干戈之前，文武俱備，故二十習之也。「博學不教」者，唯須廣博學問，未可為師教人。「內而不出」者，唯蘊畜

① 下「視」字，原作「示」，據元明本、寬文本、賀本改。

其德於內，未可出言爲人謀慮也。三十而有室，始理

男事，博學無方，孫友視志。孫，音遜。○室，猶

妻也。男事，受田給政役也。方，猶常也。至此，學無常

在，<sup>①</sup>志所好也。孫，順也，順於友，視其所志也。○好，呼

報反。四十始仕，方物出謀發慮，道合則服

從，不可則去。去，如字。○方，猶常也。物，猶事也。

○疏曰：言年壯仕官，行其常事，無所謙遜，出其謀計，發

其思慮，以爲國也。○今按：方，猶比也。五十命爲大

夫，服官政，統官之政也。七十致事。致其事於

君而告老。<sup>②</sup>凡男拜，尚左手。左，陽。○女子

十年不出，恒居內也。姆教婉婉聽從。婉，紆晚

反，徐紆願反。婉，音晚，徐音萬。○婉，謂言語也。婉之

言媚也。媚，謂容貌也。執麻枲，治絲繭，織紵組

紃，學女事以共衣服。枲，思里反。繭，古典反。

紃，女金反，又如林反。組，音祖。紃，音巡。共，音恭。○

紃，條也。○條，他刀反。○疏曰：組，紃，俱爲條也。皇

氏云：組，綬也。然則薄闇爲組，似繩者爲紃。觀於祭

祀，納酒漿、籩豆、菹醢，禮相助奠。相，息亮

反。○當及女時而知。○今按：納，謂奉而入之。十有

五年而笄，笄，古今反。○謂應年許嫁者。女子許嫁笄

而字之，其未許嫁，二十則笄。○應，應對之應。二十而

嫁。有故，二十三而嫁。故，謂父母之喪。聘則

爲妻，聘，問也。妻之言齊也。以禮見問，則得與夫敵

體。奔則爲妾。妾之言接也。聞彼有禮，走而往焉，以

得接見於君子也。奔，或爲銜。○見，賢遍反。銜，古

「縣」字，本又作「御」，魚據反。凡女拜，尚右手。右，

陰也。

右教子。○記：婦人吉事，雖有君

賜，肅拜。爲尸坐，則不手拜，肅拜。爲喪

主，則不手拜。肅拜，拜低頭也。手拜，手至地也。

婦人以肅拜爲正，凶事乃手拜耳。爲尸，爲祖姑之尸

①「學」字，原脫，據賀本補。

②「老」，原作「者」，據元明本、寬文本、賀本改。

也。《士虞禮》曰：「男，男尸。女，女尸。」爲喪主不手拜者，爲夫與長子當稽顙也。<sup>①</sup>其餘亦手拜而已。雖，或爲「唯」。或曰：爲喪主則不手拜，肅拜也。○《少儀》。○今按：《昏禮》「奠菜扱地」，與此說不同。

男女異長，各白爲伯、季也。男子二十冠而

字，冠，占亂反。○成人矣，敬其名。女子許嫁笄而

字。以許嫁爲成人。男女非有行媒不相知名，謂

媒往來傳昏姻之言，乃相知姓名。非受幣不交不親。

重別有禮，乃相繼固。○別，彼列反。○疏曰：幣，謂聘之

玄纁束帛也。故日月以告君，《周禮》凡取判妻人子

者，媒氏書之以告君，謂此也。○疏曰：妻是判合，故云

判也。人子者，謂容媵及姪娣不聘者也。既非判合，但廣

於子胤而已，故云「人子」。齊戒以告鬼神，齊，側皆

反。○《昏禮》，凡受女之禮，皆於廟爲神席以告鬼神，爲此

也。○疏曰：《昏禮》注云「將以祖先之遺體許人」，不敢

不告也。爲酒食以召鄉黨僚友，會賓客也。以厚

其別也。別，彼列反。○厚，重慎也。取妻不取同

姓，故買妾不知其姓則卜之。取，七住反，本亦作

「娶」。○爲其近禽獸也。妾賤，或時非媵，取之於賤者，世無本繫。○繫，音計，又戶計反。寡婦之子非有見

焉，弗與爲友。見，賢遍反。○辟嫌也。有見，謂有奇

才卓然，衆人所知。○辟，音避，本亦作「避」。○此一節

《曲禮》補。

右冠笄嫁取。

儀禮經傳通解卷第三終

①「稽」，原作「啟」，據賀本改。



## 儀禮經傳通解卷第四

### 內治第六

#### 家禮四

古者天子后立六宮、三夫人、九嬪、二十七世婦、八十一御妻，以聽天下之內治，以明章婦順，故天下內和而家理。天子立六官、三公、九卿、二十七大夫、八十一元士，以聽天下之外治，以明章天下之男教，故外和而國治。故曰：天子聽男教，后聽女順；天子理陽道，后治陰德；天子聽外治，后聽內職。教順成俗，外內和順，國家理治，此之謂盛德。嬪，毗人反。治，直吏反，下及注除「后治陰德」皆同。

○天子六寢，而六宮在後，六官在前，所以承副施外內之政也。三夫人以下百二十人，周制也。三公以下百二十人，

似夏時也。合而言之，取其相應有象天數也。內治，婦學之法也。陰德，謂主陰事陰令也。○應，如字，音「應對」之應。○疏曰：案《宮人》云「掌王之六寢之修」，注云：「路寢一，小寢五。」是天子六寢也。六宮在王之六寢之後，亦大寢一，小寢五。其九嬪以下，亦分居之。其三夫人雖不分居六宮，亦分主六宮之事，或二宮則一人也，或猶如三公分主六卿之類也。六卿之官在王六寢之前，其三孤亦分主六官之職，總謂之九卿，故《考工記》云「外有九室，九卿朝焉」是也。《九嬪》「掌婦學之法」。《內宰》「掌王之陰事陰令」，注云：「陰事，謂群妃御見之事。陰令，為王所求為於北宮也。」若縫人、女御掌王宮縫線及絲枲織紵之等，皆是王之所求所為者。云「北宮」者，以王六寢在南，后六宮在北故也。是故男教不修，陽事不得，適見於天，日為之食；婦順不修，陰事不得，適見於天，月為之食。是故日食則天子素服而修六官之職，蕩天下之陽事；月食則后素服而修六官之職，蕩天下之陰事。故天子之與后，猶日之與月，陰之與陽，相須而後成者也。適，

音責，下注同。見，賢遍反，下注同。爲，于僞反，下文皆同。蕩，徒浪反。○適之言責也。食者，見道有虧傷也。蕩，蕩滌去穢惡也。○滌，直歷反，又杜亦反。去，起呂反。穢，紆廢反。○今按：曆法：周天三百六十五度四分之度，左旋於地，一晝一夜則其行一周而又過一度。日月皆右行於天，一晝一夜則日行一度，月行十三度十九分度之七，故日一歲而一周天，月二十九日有奇而一周天。又逐及於日而與之會，一歲凡十二會。會則月光都盡而爲晦，已會則月光復蘇而爲朔，朔後晦前各十五日。日月相對，則月光正滿而爲望，晦朔而日月之合東西同度、南北同道，則月揜日而日爲之食，望而日月之對同度同道，則月亢日而月爲之食，是皆有常度矣。然王者修德行政，用賢去姦，能使陽盛足以勝陰，陰衰不能侵陽，則日月之行雖或當食而月常避日，故其遲速高下必有參差，而不正相合、不正相對者，所以當食而不食也。若國無政，不用善，使臣子背君父，妾婦乘其夫，小人陵君子，夷狄侵中國，則陰盛陽微，當食必食，雖曰行有常度，而實爲非常之變矣。天子修男教，父道也；后修女順，母道也。故曰：天子之與后，猶父之與母也。故爲天王服斬

衰，服父之義也；爲后服資衰，服母之義也。

衰，七雷反。資，依注作「齊」，音咨，本又作「齋」者，同。○

父母者，施教令於婦子者也，故其服同。資，當爲「齊」，聲之誤也。○《昏義》。○《內宰》：掌書版圖之

灋，以治王內之政令，均其稍食，分其人民以居之。稍，所教反。○版，謂宮中閤寺之屬及其子弟錄

籍也。圖，王及后、世子之宮中吏官府之形象也。政令，謂

施閤寺者。稍食，吏祿廩也。人民，吏子弟。分之，使衆者

就寡，均宿衛。以陰禮教六宮，鄭司農云：陰禮，婦人

之禮。六宮，後五前一。玄謂：六宮，謂后也，婦人稱寢曰

宮，隱蔽之言。后象王立六宮而居之，亦正寢一、燕寢五。

教者不敢斥言之，謂之六宮，若今稱皇后爲中宮矣，《昏禮》

母戒女曰：「夙夜毋違宮事。」以陰禮教九嬪，教以婦

人之禮。不言教夫人、世婦者，舉中省文。以婦職之

法教九御，使各有屬，以作二事，正其服，禁

其奇衰，展其功緒。奇，紀宜反。衰，似嗟反。○婦

①「齋」，原作「齊」，據賀本改。

職，謂織紵組紃縫線之事。九御，女御也，九九而御於王，因以號焉。使之九九爲屬，同時御又同事也。正其服，止踰侈。奇衺，若今媚道。展，猶錄也。緒，業也。① ○《九

嬪》：掌婦學之灋，以教九御婦德、婦言、婦容、婦功，各帥其屬而以時御敘于王所。婦德，

謂貞順。婦言，謂辭令。婦容，謂婉婉。婦功，謂絲枲。白

九嬪以下，九九而御於王所。九嬪者，既習於四事，又備於從人之道，是以教女御也。教各帥其屬者，使亦九九相與從於王所息之燕寢。御，猶進也，勸也，進勸王息亦相次敘。

凡群妃御見之法，月與后妃其象也，卑者宜先，尊者宜後。

女御八十一人當九夕，世婦二十七人當三夕，九嬪九人當一

夕，三夫人當一夕，后當一夕，亦十五日而徧云，自望後反

之。○婉，於阮反。婉，音晚。○按：鄭注引《孝經援神契》，

疏以爲孔子所作者，妄矣。歐陽子嘗請於朝，欲於疏義中悉

行刪去而不果從，今遵用之。○已上《周禮》。

### 右內職。

《易》曰：「正其本，萬物理。失之毫釐，差之千里。」故君子慎始也。《春秋》之元，

《詩》之《關雎》，《禮》之《冠》、《婚》，《易》之乾、坤，皆慎始敬終云爾。素誠繁成，今按：四字未詳，恐有闕誤。賈誼《新書》無「誠繁」二字。謹爲子

孫娶婦，賈誼《新書》作「婚娶嫁女」。② 必擇孝悌世

世有行義者，如是則其子孫慈孝，不敢姪暴，

黨無不善，三族輔之。故曰：鳳皇生而有仁

義之意，虎狼生而有貪戾之心。兩者不等，

各以其母。嗚呼，戒之哉！無養乳虎，將傷

天下，故曰素成。胎教之道，書之玉版，藏之

金匱，置之宗廟，以爲後世戒。《大戴禮記》。

右謹始。○傳：周襄王將以翟女爲

后，富辰諫曰：「不可！夫婚姻，禍福之階

也。階，梯也。利內則福由之，利外則取禍。

今王外利矣，樹利於翟。其無乃階禍乎？

①「也」下，賀本有「杜子春云二事謂絲枲之事」凡十一字。

②「娶」，原作「妻」，據賀本改。

昔摯、疇之國也。由大任，摯、疇二國，任姓，奚仲仲虺之後，大任之家也。大任，王季之妃，文王之母。《詩》云：「摯仲氏任。」又曰：「思齊大任，文王之母。」杞、繒由大妣，杞、繒二國，妣姓，夏禹之後，大妣之家也。大妣，文王之妃，武王之母也。齊、許、申、呂，由大姜，四國皆姜姓，四岳之後，大姜之家也。大姜，大王之妃，王季之母。陳由大姬，陳，媯姓，舜後。大姬，周武王之女，成王之姊。傳曰：以元女大姬配虞胡公而封諸陳。是皆能內利親親者也。內利，內行七德。親親，以申固其家。昔鄆之亡也由仲任，鄆，姁姓之國，仲任氏之女爲鄆夫人。唐尚書云：鄆爲鄭武公所滅，非取任氏而亡也。昭謂：幽王爲西戎所殺，而《詩》言「褒姁滅之」，明禍有所由也。密須由伯姑，伯姑，密須之女也。傳曰：密須之鼓，闕鞏之甲。此則文王所滅而獲鼓甲也。《大雅》云：「密人不恭，敢拒大邦。」不由嫁女而亡。《世本》云：「密須，姁姓。」鄆由叔姁，鄆，姁姓之國。叔姁，同姓之女，爲鄆夫人。昭謂：《公羊傳》曰：「先鄭伯有善乎鄆公。」

者，通於夫人以取其國。」此之謂也。聃由鄭姬，聃，姬姓，文王之子聃季之國。鄭女爲聃夫人，同姓相娶，猶魯公娶於吳，亦其瀆姓，所以亡也。息由陳媯，息，姬姓之國。陳媯，陳女，爲息侯夫人。蔡哀侯亦娶於陳，息媯將歸，過蔡，蔡哀侯止而見之，<sup>①</sup>弗賓，媯以告息侯，導楚伐蔡。蔡侯怨，因稱息媯之美於楚子，楚子遂滅息，以息媯歸。鄧由楚曼，鄧，<sup>②</sup>曼姓。楚曼，鄧女，爲楚武王夫人，生文王。過鄧而利其國，遂滅鄧而兼之。羅由季姬，羅，熊姓之國。季姬，姬氏之女，爲羅夫人。廬由荆媯，廬，媯姓之國。荆媯，廬女，爲荆夫人。荆，楚也。是皆外利離親者也。外利，行淫辟求利於外，不能親親，以亡其國。夫翟，隗姓也，無列於王室，列，位次也。豺狼之德，不可厭也。禮：新不閒舊。閒，去聲。○閒，代也。王以翟女閒姜、任，非禮，且棄舊

①

「止」，原作「立」，據賀本改。

②

「鄧」，原作「楚」，據元明本、寬文本、賀本改。

也。姜氏、任氏之女世爲王妃、嬪，今以翟女代之，爲棄舊也。其無乃禍階乎？」王弗聽。《國語·

周語》。

○孔子侍坐於哀公，哀公曰：「敢問人道誰爲大？」孔子愀然作色而對曰：

「君之及此言也，百姓之德也，固臣敢無辭而對：人道政爲大。」愀然，變動貌也。①作，猶

變也。德，猶福也。辭，讓也。

公曰：「敢問何謂

爲政？」孔子對曰：「政者，正也。君爲

正，則百姓從政矣。君之所爲，百姓之所從也。君所不爲，百姓何從？」言君當務於

正。公曰：「敢問爲政如之何？」孔子對

曰：「夫婦別，父子親，君臣嚴，三者正則庶物從之矣。」別，彼列反。○庶物，猶衆事也。

公曰：「寡人雖無似也，願聞所以行三言之道，可得聞乎？」無似，猶言不肖。孔子對

曰：「古之爲政，愛人爲大。所以治愛人，禮爲大；所以治禮，敬爲大；敬之至矣，

大昏爲大。大昏至矣！大昏既至，冕而親迎，親之也。親之也者，親之也。是故君子興敬爲親。舍敬，是遺親也。弗愛不

親，弗敬不正，愛與敬，其政之本與！」迎，逆敬反，下同。爲，于僞反。舍，音捨。與，音餘，下同。

○大昏，國君娶禮也。至矣，言至大也。興敬爲親，言相敬則親。○疏曰：人爲國本，是以爲政之道，愛人爲

大。人有禮則生，而所以治理愛人，非禮不可，故「禮爲大」。禮以敬爲主，故「治禮者敬爲大」也。敬有大小，

若敬至極，大昏爲大。上親猶自也，下親親愛也。冕服自迎者，欲親此婦也，故云親之也。興起敬心，爲欲相

親也，若捨去敬心，是遺棄相親之道也。孔子遂言

曰：「內以治宗廟之禮，足以配天地之神明；出以治直言之禮，足以立上下之敬。

物恥則足以振之，國恥則足以興之。」故

①「貌」，原作「皂」，據元明本、寬文本、賀本改。  
②「則」字，原脫，據賀本補。

爲政先乎禮，禮其政之本與！」宗廟之禮，祭宗廟也。夫婦配天地，有日月之象焉。《禮器》曰：「君在阼，夫人在房，大明生於東，月生於西，此陰陽之分，夫婦之位也。」直，猶正也。正言，謂出政教也。《記》曰「天子聽外治，后聽內職」是也。物，猶事也。事恥，臣恥也。振，猶救也。國恥，君恥也。君臣之行有可恥者，禮足以救之，足以興復之。○分，扶問反。行，下孟反。公曰：「寡人願有言然。」冕而親迎，不已重乎？」已，猶大也。怪親迎乃服祭服。○大，音泰。孔子愀然作色而對曰：「合二姓之好，以繼先聖之後，以爲天地宗廟社稷之主，君何謂已重乎？」好，呼報反。○今按：天地，蓋通天子言之。公曰：「寡人固。」王肅云：絕句。不固，安得聞此言乎？寡人欲問，不得其辭，請少進。」今按：固，鄙固也，言由其鄙固，故有「不已重乎」之問。然向使不固，則不發此問而不得聞此言矣。請少進，欲其詳言以曉已。孔子曰：「天地不合，萬物不生。大昏，萬世之嗣也，君

何謂「已重」焉？」孔子遂言曰：「昔三代明王必敬妻子也，蓋有道焉。妻也者，親之主也，敢不敬與？子也者，親之後也，敢不敬與？」與，音與。○疏曰：妻所以供粢盛，奉祭祀，與親爲主者也。是故君子無不敬也，敬身爲大。身也者，親之枝也，敢不敬與？不敬其身，是傷其親，傷其親，是傷其本，傷其本，枝從而亡。三者，百姓之象也。王肅云：言百姓所法而行。身以及身，子以及子，妃以及妃，君修此三者，則大化愾乎天下矣！妃，芳非反。愾，許乞反，又許氣反。鄭無「大化」二字。王肅云：愾，滿。昔大王之道也如此，國家順矣。」大，音泰，注同。○鄭曰：大王居幽，爲狄所伐，乃曰：「土地所以養人也，君子不以其所養害所養。」乃去之岐。是言百姓之身猶吾身也，百姓之妻子猶吾妻子也，不忍以土地之故而害之，去之岐而王迹興焉。王肅云：大王出亦姜女，入亦姜女，國無繇

民，愛其身以及人之身，愛其子以及人之子，愛其妃以及人之妃，故曰大王之道。○今按：二說皆通，今兩存之。○爾，彼貧反。公曰：「敢問何謂敬身？」

孔子對曰：「君子過言則民作辭，過動則民作則。君子言不過辭，動不過則，百姓不命而敬恭，若是則可謂能敬其身。能敬其身，則能成其親矣。」則，法也。民者，化君者也。君之言雖過，民猶稱其辭；君之行雖過，民猶以為法。故不可不謹。公曰：「敢問何謂成親？」

孔子對曰：「君子者，人之成名也。百姓歸之名，謂之君子之子，則是成其親為君子也，是為成其親之名也已。」疏曰：言己若能敬身，則百姓歸己善名，謂己為君子所生之子，是己之修身使其親有君子之名也。孔子遂言曰：「古之為政，愛人為大。不能愛人，則不能有其身；不能有其身，則不能安土；不能安土，則不能樂天；不能樂天，則不能成其

身。」樂，音洛。○王肅曰：天，道也。○今按：不能有其身，謂不能持守其身而陷於非僻。安土，謂安其所處之位而無外求。樂天，謂樂循天理。王說近之。公

曰：「敢問何謂成身？」孔子對曰：「夫其行己不過乎物，<sup>①</sup>謂之成身。不過乎物，合天道也。」此依《家語》。《戴記》唯有「不過乎物」四字。以下句推之，《家語》為是。○鄭曰：物，猶事

也。公曰：「君子何貴乎天道也？」孔子對曰：「貴其不已也。如日月東西相從而不已也，是天道也；不閉而能久，是天道也；無為而物成，是天道也；已成而明之，是天道也。」此亦依《家語》。「而能」二字，《戴記》作「其」，非是。○王肅云：不閉常通而能久，言無極。○今按：《戴》本、鄭說皆誤，今不取。公曰：「寡人蠢愚冥煩，子志之心也。」蠢，始容反。

① 上「其」字，原脫，據賀本補。

冥，莫亭反。志，依注音識，徐音試。○「煩」字，王肅讀屬下句，今從鄭。○志讀爲識，識，知也。冥煩者，言不能明理。此事子之心所知也，欲其要言使易行。○易，以鼓反。孔子蹴然辟席而對曰：「仁人不過乎物，孝子不過乎物，是故仁人之事親也如事天。事天如事親，此謂孝子成身。」蹴，子六反，又在育反。○蹴然，敬貌。物，猶事也。事親，事天，孝敬同也。《孝經》曰：「事父孝，故事天明。」舉無過事，以孝事親，是所以成身。公曰：「寡人既聞此言也，無如後罪何？」既聞此言也者，欲勤行之也，無奈後日過於事之罪何？爲謙辭。孔子對曰：「君之及此言，是臣之福也。」善哀公及此言。此言，善言也。○《哀公問》。○今按：此一章與《家語》小異，今從其長者。

古者后、夫人將侍君，前息燭後舉燭。至于房中，釋朝服，襲燕服，然後入御於君。朝服，展衣，君在堂。雞鳴，太師奏雞鳴于陛下，奏，白也。陛，階也。然後夫人鳴佩玉于房中，告

去也，然後應門擊柝告辟也。應門，朝門。辟，啟也。然後少師奏質明于陛下，質，正也。然後夫人入庭立，君出朝。《尚書大傳》。

右后、夫人侍君。○傳曰：自古聖王必正妃匹，妃匹正則興，不正則亂。昔夏之興也以塗山，其亡也以末喜；殷之興也以有嬖，其亡也以妲己；周之興也以太姒，其亡也以褒姒；此其著者也。《詩》云：「關關雎鳩，在河之洲。窈窕淑女，君子好逑。」言后妃說樂君子之德，無不和諧，又不淫其色，慎固幽深，若雎鳩之有別焉，然後可以風化天下也。夫雎鳩之鳥，猶未嘗見其乘居而匹處也，鳥獸尚然，而況於人君乎！故夫婦有別則父子親，父子親則君臣敬，君臣敬則朝廷正，朝廷正則王化成。君臣、父子、夫婦三者，天下之大綱紀也。三者治則治，三者亂則亂。此



《關雎》爲《詩》首，<sup>①</sup>重人道之始於此也。

○周宣姜后賢而有德，事非禮不言，行非禮不動。宣王嘗早卧而晏起，后，夫人不出於房。姜后既出，乃脫簪珥，待罪於永巷，使其傅母通言於王曰：「妾不才，妾之淫心見矣，至使君王失禮而晏朝，以見君王之樂色而忘德也。夫苟樂色必好奢，好奢必窮樂。窮樂者，亂之所興也。原亂之興，從婢子起。婢子生亂，當服其辜，敢請婢子之罪，唯君王之命。」王曰：「寡人不德，寔自生過，從寡人起，非夫人之罪也。」遂復姜后而勤於政事，早朝晏退，繼文武之迹，興周室之業，卒成中興之名，爲周世宗。《列女傳》。○匡衡曰：妃匹之際，生民之始，萬福之原。婚姻之禮正，然後品物遂而天命全。遂，成也。孔子論《詩》以《關雎》爲始，言太上者民之父母，太上，居尊上之

位者。后，夫人之行不侔乎天地，則無以奉神靈之統而理萬物之宜。侔，等也。故《詩》曰：「窈窕淑女，君子好仇。」<sup>②</sup>窈窕，<sup>③</sup>幽閒也。仇，匹也。言能致其貞淑，不貳其操，情欲之感無介乎容儀，介，繫也，言不以情欲繫心而著於容儀也。宴私之意不形乎動靜，形，<sup>④</sup>見也。夫然後可以配至尊而爲宗廟主。此綱紀之首、王教之端也。自上世以來，三代興廢，未有不由此者也。《匡衡傳》。○宋伯姬者，魯宣公之女，成公之妹也。既嫁於恭公，十年，恭公卒，伯姬寡三十五年。至景公時，伯姬之宮夜失火，左右曰：「夫人少避火。」伯姬曰：「婦人之義，保傅不俱，夜

①

②

③

「雎」，原作「以」，據元明本、寬文本、賀本改。

「窈」字，原脫，據賀本補。

「形」，原作「刑」，據寬文本、賀本改。

不下堂，待保傅來也。」保母至矣，傅母未至也，左右又曰：「夫人少避火。」伯姬曰：「婦人之義，傅母不至，夜不可下堂。越義求生，不如守義而死。」遂逮於火而死。○楚昭貞姜者，齊侯之女，楚昭王之夫人也。王出遊，留夫人漸臺之上而去。<sup>①</sup>王聞江水大至，使使者迎夫人。曰：「王與宮人約令，召宮人必以符。今使者不持符，妾不敢行。」使者曰：「水方大至，還而取符，則恐後矣。」夫人曰：「妾聞之：貞女之義不犯約，勇者不畏死，<sup>②</sup>守一節而已。妾知從使者必生，留必死也。然棄約越義而求生，不若留而死耳。」於是使者反取符，未還則水大至，臺崩，夫人流而死。○齊孝孟姬者，華氏之長女，齊孝公之夫人也。公遊取琅邪，華孟姬從，車奔，姬墮，車碎，孝公使駟馬立車載姬以歸。姬使

侍御者舒帷以白障蔽，而使傅母應使者曰：「妾聞妃后踰闕必乘安車輜輶，下堂必從傅母保阿，進退則鳴玉環佩，內飾則結紉綢繆，野處則帷裳壅蔽，所以正心壹意，自斂制也。今立車無輶，非所敢受命也；野處無衛，非所敢久居也；二者失禮多矣。夫無禮而生，不若早死。」使者馳以告公，更安車，及則已自經矣。以上《列女傳》。

青史氏之記曰：古者胎教之道，王后腹之七月，而就宴室。宴室，夾室，次宴寢也，亦曰側室。自王后已下有子曰震，女史皆以金環止御。王后比七月就宴室，夫人、婦嬪即以三月就其側室，皆閉房而處也。王后以七月為節者，君聽天下之內政，自諸侯以下同之也。○賈誼《新書》「七月」作「十月」，「宴室」作「羹室」。太師持銅而御戶左，太宰持升而御戶右，太卜持

①「漸臺」，原作「者必」，據元明本、寬文本、賀本改。  
②「不」，原作「也」，據元明本、寬文本、賀本改。

著龜而御堂下，諸官皆以其職御於門內。比三月者，王后所求聲音非禮樂，則太師撫樂而稱不習。所求滋味者非正味，則太宰荷升不敢煎調，而曰：「不敢以待王太子。」《新書》「升」作「斗」，「荷」作「倚」，「待」作「侍」。○《大戴記》。

### 右胎教。

太子生而泣，太師吹銅曰「聲中某律」，太宰曰「滋味上某」，太卜曰「命云某」，然後爲王太子。賈誼《新書》。○國君世子生，告于君，接以大牢，宰掌具。接，讀爲捷。○注、疏並見前篇。三日，卜士負之，吉者宿齋，朝服寢門外，詩負之。射人以桑弧蓬矢六，射天地四方，射天地之射，食亦反。○詩之言承也。桑弧蓬矢，本大古也。天地四方，男子所有事也。○承，如字，徐音「拯救」之拯。大，音泰。○疏曰：詩，持也，承也，謂以手承下抱負之。蓬者，禦亂之草。①桑者，衆木之本。「天地四方，男子所有事」者，謂上事天，下事地，旁禦四方之難也。保受乃負之。代士也。保，保母。宰醴負子，賜

之束帛。禮，當爲「禮」，聲之誤也。禮，以一獻之禮酬之以幣也。○疏曰：還用上禮也。卜士之妻、大夫之妾，使食子。食子，不使君妾適，妾有敵義，不相褻以勞辱事也。士妻、大夫之妾，謂時自有子。○適，本亦作「嫡」，丁匿反。○凡接子擇日，注見前篇。冢子則大牢，天子世子也。冢，大也，冢子猶言長子，通於下也。國君世子亦大牢。皆謂長子。其非冢子，則皆降一等。謂冢子之弟及衆妾之子生也，天子、諸侯少牢，大夫特豕，士特豚，庶人猶特豚也。○疏曰：「庶人猶特豚」者，蓋以禮窮而與士同也。異爲孺子室於宮中，特掃一處以處之。擇於諸母與可者，必求其寬裕慈惠、溫良恭敬、慎而寡言者使爲子師，其次爲慈母，其次爲保母，皆居子室。此人君養子之禮也。諸母，衆妾也。可者，傳御之屬也。子師，教示以善道者。慈母，知其嗜欲者。保母，安其居處者。士妻食乳之而已。○食，音嗣。○疏曰：此文雖據諸侯，其實

①「草」，原作「章」，據元明本、寬文本、賀本改。

兼大夫、士也。○今按：《列女傳》「可」作「阿」，即所謂阿保也，《後漢書》有阿母。詳此經文，鄭作注時字猶未誤也。他人無事不往。注已具前篇。三月之末，擇日翦髮爲髻，男角女羈，否則男左女右。音注已具前篇。世子，則君沐浴朝服，夫人亦如之。皆立于阼階西鄉，世婦抱子升自西階，君名之，乃降。子升自西階，則人君見世子於路寢也，見妾子就側室。凡子生皆就側室。諸侯夫人朝於君，次而祿衣也。○祿，通亂反。○疏曰：既著朝服，又東西階相對，故知路寢也。卿、大夫妻將生子，居側室，此經云「世婦抱子升自西階」，不出自房而自外人，是夫人將生子亦就側室也。蓋內寢是君所常居之處，夫人不可於此生子故也。《內司服》注云：展衣，后「以禮見王及賓客之服」。祿衣，御于王之服。諸侯夫人亦如之。此既在路寢，合服展衣，云祿衣者，此謂見子若訖則當御，故服進御之服，異於尋常以禮見君也。「次」者，首飾次第髮爲之，《少牢禮》「髮鬋是也」。○今按：人君見世子之時，其名子入食之禮應亦略與大夫、士同，但記文不具也。適子、庶子見於外寢，撫其首，咳而名之。禮帥初，無辭。適，丁歷

反，注及下同。○此適子謂世子弟也。庶子，妾子也。外寢，君燕寢也。無辭，辭謂欽有帥、記有成也。○疏曰：大子之弟見於外寢，庶子側室，但撫首、咳名無辭之事與世子之弟同，故與適子連文，同云見於外寢，其實庶子見於側室也。燕寢當在內而云外寢者，對側室而爲外耳。「禮帥初」，謂禮儀與前文見世子同也。○今按：下文方說庶子，此「庶子」字宜爲衍字，或是適子之次者名爲適子庶子也。公庶子生，就側室。三月之末，其母沐浴，朝服見於君，擯者以其子見。君所有賜，君名之，衆子則使有司名之。擯者，傅姆之屬也。人君尊，雖妾不抱子。有賜於君，有恩惠也。有司，臣有事者也。魯桓公名子，問於申繻也。○食子者三年而出，見於公宮則劬。食，音嗣。○劬，勞也。上妻、大夫之妾食國君之子，三年出歸其家，君有以勞賜之。①

右生子。○傳：周太姜者，王季之母，有呂氏之女也。太王娶以爲妃，生太

① 「賜」，原作「閔」，據元明本、寬文本、賀本改。又賀本此句下有「○以上內則」。

伯、仲雍、王季，至於成童，靡有過失。太王謀事必於太姜，遷徙必與太姜。君子謂太姜廣於德教。太任者，文王之母，摯任氏之中女也，王季娶以爲妃。太任之性敦一誠莊，惟德之行。及其有娠，目不視惡色，耳不聽淫聲，口不出敖言。生文王而明聖，太任教之以一而識百，卒爲周宗。君子謂太任能胎教。太姒者，武王之母，禹後有莘姒氏之女也，在郃之陽，在渭之涘，仁而明道。文王嘉之，親迎于渭，造舟爲梁。及人，太姒思媚太姜、太任，旦夕勤勞以進婦道。太姒號曰「文母」，文王治外，文母治內。太姒生十男，長曰伯邑考，次曰武王發，次周公旦，次管叔鮮，次蔡叔度，次曹叔振鐸，次霍叔武，次成叔處，次康叔封，次聃季載。太姒之所以教誨扶持十子者，自少及長未嘗見邪僻之事，常以正道檢柙之。

及其長，文王繼而教之，卒成武王、周公之德。武王后曰邑姜，太公之女也。妊成王於身，立而不跛，坐而不差，笑而不諠，獨處而不倨，雖怒而不詈，胎教之謂也。<sup>①</sup>

古之聖帝將立世子，則帝自朝服昇自阼階上，西鄉。妃抱世子自房出，東鄉。太史奉書而上堂，當兩階之間，北面立，曰「世子名曰某」者三。帝執禮稱辭，命世子曰「授太祖、太宗與社稷於子」者三。其命也，妃曰「不敢」者再，於三命曰「謹受命」，拜而退。太史以告太祝，太祝以告太祖、太宗與社稷。太史出以告太宰，太宰以告州伯，州伯命藏之州府。凡諸貴以下至於百姓男女，無敢與世子同者。賈誼《新書》。

右立世子。○傳曰：勢明則民定而

①，也，下，賀本有小字注文，列女傳三字。

出於一道，故人皆爭爲宰相而不姦爲世子，非宰相尊而世子卑也，不可以智求，不可以力爭也。今以爲知子莫如父，故疾死置後者恣父之所。以此使親戚不相親，兄弟不相愛，亂天下之紀，使天下之俗失，開尊敬而不讓，其道莫經於此。疾死置後復以嫡長子，如此則親戚相愛而兄弟不爭，此天下之至義也。以此防民，百姓猶有爭爲君者。賈誼《新書》。○周王子朝曰：「先王之命：『王后無適，則擇立長。年鈞以德，德鈞則卜。』王不立愛，公卿無私，古之制也。」昭二十六年《春秋左氏傳》。○穆公問於子思曰：「立太子有常乎？」答曰：「有之，在周公之典。」言周典有之。公曰：「昔文王舍適而立其次，文王舍其嫡長伯邑考而立次子武王發。微子舍孫而立其弟，微子舍其孫廩而立其弟衍微仲。是何法也？」子思曰：「殷人

質而尊其尊，故立弟；周人文而親其親，故立子，亦各其禮也。文質不同，其禮則異。文王舍適立次，權也。」以武王賢，故用權而立之。公曰：「苟得行權，豈唯聖人，唯賢與愛立也。」子思曰：「聖人不以權教，權者，見機而作，非可爲常教。故立制垂法，順之爲貴，若必欲犯，何有於異？」脫不順其法，違而犯之，亦何有異於用權。公曰：「舍賢立聖，舍愚立賢，何如？」言或舍其賢子而立其聖子，舍其愚子而立其賢子，如何？子思曰：「唯聖立聖，其文王乎！不及文王者，則各賢其所愛，不殊於適，何以限之？」言有不及文王者能推其所愛之賢者而立之，亦無殊於立嫡矣。必不能審賢愚之分，請父兄群臣卜於祖廟，亦權之可也。」脫不能審其賢愚，則於廟卜其吉而立之，亦權之義也。○《孔叢子》。○晉里克曰：「太子奉冢祀社稷之粢盛，粢，音咨。盛，音成。○冢，

大也。以朝夕視君膳者也，朝，如字，又張遙反。

膳，市戰反。○膳，廚膳。①○疏曰：膳之言善也。《禮

記》曰：「文王之爲世子，食上必在視寒煖之節，食下問所

膳。命膳宰，然後退。」故曰冢子。君行則守，有

守則從，從曰撫軍，守曰監國，古之制也。」

守，手又反。從，才用反。○閔公二年《春秋左氏傳》。

世子之記曰：朝夕至于大寢之門外，問

於內豎曰：「今日安否何如？」朝，直遙反，舊如

字，下朝夕同。豎，上主反。○朝夕，朝朝暮夕也。世子之

禮亡，此存其記。○朝朝，下直遙反。內豎曰：「今日

安。」世子乃有喜色。其有不安節，則內豎以

告世子，世子色憂不滿容。內豎言復初，然

後亦復初。朝夕之食上，世子必在視寒煖之

節；食下問所膳。羞必知所進以命膳宰，然

後退。上，時掌反。○羞必知所進，必知親所食。若內

豎言疾，則世子親齊玄而養。齊，側皆反。養，羊

尚反。○親，猶白也。養疾者齊玄，玄冠，玄端也。膳宰

之饌，必敬視之。疾者之食，齊和所欲或異。○齊，才

細反。和，胡卧反。疾之藥，必親嘗之。試毒味也。

嘗饌善，則世子亦能食；善，謂多於前。嘗饌寡，

世子亦不能飽。以至于復初，然後亦復初。②

右世子之記。○傳曰：文王之爲世

子，朝於王季日三。朝，直遙反。三，如字，又息

暫反。○三皆曰朝，以其禮同。雞初鳴而衣服，

至於寢門外，問內豎之御者曰：「今日安

否何如？」衣，徐於既反，又如字。○內豎，小臣之

屬，掌外內之通命者。御，如今小史直日者。③內豎

曰：「安。」文王乃喜。孝子恒兢兢。及日中

又至，亦如之。又，復也。○今按：此文王之爲，非

禮之制。○復，扶又反。及莫又至，亦如之。莫，

①「膳」，原作「也」，據賀本改。

②「初」下，賀本有小字注文「文王世子」四字。

③「者」，原作「矣」，據賀本改。

音聲。莫，夕也。其有不安節，則內豎以告文

王，文王色憂，行不能正履。節，謂居處故事。

履，蹈地也。言不但不滿容而已。○蹈，徒報反。王季

復膳，飲食安也。然後亦復初。憂解。○解，胡賈

反。食上，必在視寒煖之節；上，時掌反。煖，乃

管反。○在，察也。食下，問所膳。問所食者。命

膳宰曰：「未有原。」應曰：「諾。」然後退。

末，亡曷反。○末，猶勿也。原，再也。勿有所再進，為

其失飪臭味惡也。退，反其寢。○為，于偽反。飪，而審

反。○疏曰：食上，謂獻饌。食下，謂食畢徹饌而下。文

王問進食之人，其父所膳何食，膳宰答畢，文王又命成膳

宰云。言在後進食之時，皆須新好，無得使前進之物而有

再進。失飪，謂孰爛過節。其寢，私寢也。武王帥而

行之，不敢有加焉。庶幾程式之。帥，循也。文

王有疾，武王不說冠帶而養。說，他活反。養，

羊尚反。○言常在側。文王一飯亦一飯，文王

再飯亦再飯。飯，扶晚反。○欲知氣力箴藥所勝，亦

言非但能食不能飽而已。○箴，本亦作「鍼」，之林反。勝，

音升。○《文王世子》。

齊桓公會諸侯于葵丘，初命曰：「誅不

孝，毋易樹子，毋以妾為妻。」僖公九年葵丘之會，陳

牲而不殺，讀書加于牲上，明天子之禁。樹，立也。已立世子，

不得擅易。初命三事，所以修身正家之要也。○《孟子》。

右齊家。○傳：宋文帝太子劭、次子

始興王濬並多過失，數為上所詰責，因相

與共為巫蠱呪詛上。事聞，上驗問得實，

尚未忍誅，但遣使切責之。劭、濬不悛，上

乃欲廢劭而誅濬，議久不決。侍中王僧綽

言於上曰：「當斷不斷，反受其亂。願以

義割恩，略小不忍，毋使難生意表，取笑千

載。」上不能用。劭、濬遂共謀逆，弑帝於

合殿，仗主卜天與死之。江州刺史武陵王

駿起兵赴難，<sup>②</sup>誅劭及濬，遂即帝位，是為

① 「亡」，原作「曰」，據元明本、寬文本、賀本改。

② 「江」，原作「荆」，據賀本改。



孝武帝。《資治通鑑》宋文帝元嘉三十年。○晉獻

公獲驪戎之女驪姬，嬖，將以為夫人，卜

之，不吉，弗聽，立之，生奚齊，其娣生卓

子。驪姬欲立奚齊，乃使太子申生居曲

沃。既與中大夫成謀，乃謂太子曰：「君

夢齊姜，必速祭之。」大，音泰。驪，力知反。卓，

敕角反。○齊姜，太子母，言求食。太子祭于曲

沃，歸胙于公。胙，才故反。○胙，祭之酒肉。公

田，姬寘諸宮六日。公至，毒而獻之。寘，

之豉反。○毒酒經宿輒敗，而經六日，明公之惑也。

公祭之地，地墳。與犬，犬斃。與小臣，小

臣亦斃。墳，扶粉反。斃，婢世反。○疏曰：《晉語》

云：「公田，驪姬受胙，乃寘燭於酒，寘革於肉。公至，召

申生獻，公祭地，地墳，申生恐而出。驪姬與犬肉，犬

斃，飲小臣酒，亦斃。」此傳既略，當如《國語》也。革，鳥

頭也。姬泣曰：「賊由太子。」太子奔新城，

公子重耳謂之曰：「子盍言子之志於公

重耳，申生異母弟，欲使言見譖之意。世子曰：「不可。君安驪姬，是我傷公之心也。」言其意則驪姬必誅也。○疏曰：《左傳》云：「太子曰：君非姬氏，居不安，食不飽。君老矣，吾又不樂。」謂我若自理，驪姬必誅，姬死之後，公無復歡樂也。曰：「然則盍行乎？」行，猶去也。世子曰：「不可。君謂我欲弑君也，天下豈有無父之國哉？吾何行如之？」弑，音試。○言人有父，則皆惡欲弑父者。○惡，烏路反。使人辭於狐突曰：「申生有罪，不念伯氏之言也，以至于死，申生不敢愛其死。突，徒忽反。○辭，猶告也。狐突，申生之傅，舅犯之父也。前此者獻公使申生伐東山皋落氏，狐突謂申生欲使之行，今言此者，謝之。伯氏，狐突別氏。○疏曰：狐是摠氏，伯、仲者是兄弟之字。雖然，吾君老矣，子少，國家多難，少，詩召反。難，乃旦反。○子，謂奚齊。伯氏不出而圖吾君，圖，猶謀也。不出為君謀國家之政，然則白皋落氏反後，狐

突懼乃稱疾。○爲，下僞反。伯氏苟出而圖吾君，申生受賜而死。」賜，猶惠也。再拜稽首，乃卒。既告狐突乃雉經。○經，如字，徐占定反。○疏曰：雉，牛鼻繩也，《周禮》作「絰」，言申生以牛繩自縊也。或謂雉性耿介，被人所獲，必自屈折其頭而死。是以爲恭世子也。言行如此，可以爲恭，於孝則未之有。○疏曰：孝子不陷親於不義，而申生不能自理，遂陷父有殺子之惡，雖心存孝而於理終非，故不曰孝，但謚爲恭。《謚法》曰：「敬順事上曰恭。」○此章兼取《左氏傳》、《檀弓》之語。○漢高祖欲以趙王如意易太子，太子太傅叔孫通諫曰：「昔者晉獻公以驪姬故廢太子，立奚齊，晉國亂者數十年，爲天下笑。秦以不早定扶蘇，胡亥詐立，自使滅祀，此陛下所親見。今太子仁孝，天下皆聞之。呂后與陛下攻苦食啖，啖，當作「淡」，謂無味之食也。言其攻擊勤苦之事，而食無味之食也。其可背哉？陛下必

欲廢適而立少，臣願先伏誅，以頸血汙地。」高帝曰：「公罷矣，吾特戲耳。」通曰：「太子天下本，本壹搖天下震動，奈何以天下戲？」高帝曰：「吾聽公。」及上置酒，見留侯所招客從太子入見，遂無易太子志矣。《叔孫通傳》。○魯公子荆之母嬖，必計反。○荆，哀公庶子。將以爲夫人，使宗人鬻夏獻其禮。鬻，許斬反。夏，戶雅反。○宗人，禮官也。對曰：「無之。」公怒曰：「女爲宗司，立夫人，國之大禮也，何故無之？」對曰：「周公及武公娶於薛，女，音汝。○武公，放也。孝，惠娶於商，孝公，稱。惠公，弗皇。商，宋也。○稱，尺證反，又如字。自桓以下娶於齊，桓公始娶文姜。此禮也則有。若以妾爲夫人，則固無其禮也。」哀公二十四年《春秋左氏傳》。

儀禮經傳通解卷第四終

# 儀禮經傳通解卷第五

## 五宗第七

## 家禮五

別子爲祖，諸侯之庶子，別爲後世爲始祖也。謂之別子者，公子不得禰先君。又若始來在此國者，後世亦以爲祖也。○疏曰：別子，謂諸侯適子之弟。蓋諸侯之適子，適孫繼世爲君，而第二子以下不得禰先君，別於正適，故稱別子也。「爲祖」者，謂此別子子孫爲卿、大夫，立此別子爲其後世之始祖也。又云「又若始來在此國者」，此謂非君之親，或是異姓始來此國者，故亦謂之別子，以其別於在本國不來者。繼別爲宗，別子之世長子爲其族人爲宗，所謂百世不遷之宗。又曰：別子之世適也，族人尊之，謂之大宗，是宗子也。○長，丁丈反，下同。爲其之爲，于僞反，下「爲其」同。○疏曰：謂別子之世世長子恒繼別子，與族人爲百世不遷之大宗，族人雖五世外與之絕族者，皆

爲之齊衰三月。繼禰者爲小宗。禰，乃禮反。○別子庶子之長子，爲其昆弟爲宗也。謂之小宗者，以其將遷也。又曰：父之適也，兄弟尊之，謂之小宗。又曰：小宗有四，或繼高祖，或繼曾祖，或繼祖，或繼禰。先言「繼禰」者，據別子子弟之子也。○疏曰：禰，謂別子之庶子。以庶子所生長子繼此庶子，與兄弟爲小宗，服之以本親之服，以其五世則遷，比大宗爲小，故云小宗。然則小宗所繼非「獨云「繼禰者」，蓋小宗雖四，初皆繼禰爲始，據初爲元，故云「繼禰」也。有百世不遷之宗，有五世則遷之宗。遷，猶變易也。○疏曰：百世不遷，謂大宗也。五世則遷，謂小宗也。○《大傳》。

傳曰：百世不遷者，別子之後也。宗其繼別子之所自出者，百世不遷者也。五世而遷者，繼高祖者也。宗其繼高祖者，五世則遷者也。繼別子，別子之世適也。繼高祖者，亦小宗也。小宗有四，皆至五世則遷，與大宗凡五。○今按：「之所自出」四字疑衍，注中亦無其文，至作疏時方誤爾，今不取。○適，丁歷反，下文及注皆同。○

疏曰：「別子之世適」，謂是別子適子適孫世世繼別子者也。「五世」者，謂上從高祖，下至玄孫之子，此玄孫之子則合遷徙，不得與族人爲宗，故云「有五世則遷之宗」。但記文要略，唯云「繼高祖」，其實是繼高祖者之子也。鄭云「皆至五世則遷」者，是皆五世不復與四從兄弟爲宗，各自隨近而相宗也。先云「繼禰者」，文承上繼別爲大宗之下，則從別子言之。別子子者，別子之適子。弟之子者，別子適子之弟所生子也。弟則是禰，其長子是小宗，故云「繼禰爲小宗」，因別子而言也。繼高祖者與三從兄弟爲宗，或有繼曾祖者與再從兄弟爲宗，或有繼祖者與同堂兄弟爲宗，或有繼禰者與親兄弟爲宗。族人一身凡事四宗，與大宗爲五宗也。○《小記》、《大傳》互文。是故祖遷於上，宗易於下。尊祖故敬宗，敬宗所以尊祖、禰也。宗者，祖、禰之正體。○疏曰：四世之時尚事高祖，至五世之時，謂高祖之父，不爲加服，是「祖遷於上」。四世之時仍宗三從族人，至五世不復宗四從族人，各自隨近爲宗，是「宗易於下」。宗是先祖正體，尊崇其祖，故敬宗子。所以敬宗子者，尊崇祖禰之義也。○《小記》。庶子不

祭，明其宗也。今按：此依《大傳》文，直謂非大宗則不得祭別子之爲祖者，非小宗則各不得祭其四小宗所主之祖禰也。其《小記》則云：「庶子不祭禰，明其宗也。」又云：「庶子不祭祖，明其宗也。」文意重複，似是衍字。而鄭氏曲爲之說，於「不祭禰」則曰：「謂宗子、庶子俱爲下士，得立禰廟也，雖庶人亦然。」明其尊崇以爲本也。於「不祭祖」則云：「禰則不祭矣，言不祭祖者，主謂宗子、庶子俱爲適士，得立祖禰廟者也。凡正體在乎上者，謂下正猶爲庶也。」族人上不戚君，下又辟宗，乃後能相序。而疏亦從之，上條云：「禰適故得立禰廟，故祭禰，禰庶故不得立禰廟，故不得祭禰。明其有所宗也。」下條云：「庶子、適子俱是人子，並宜供養，而適子烝嘗，庶子獨不祭者，正是推本崇適，明有所宗也。」又云：「父庶即不得祭父，何假言祖而言不祭祖，故知是宗子、庶子俱爲適士，適士得立二廟，自禰及祖是適宗子，得立祖廟祭之而已。是祖庶雖俱爲適士，得自立禰廟，而不得立祖廟祭之也。正體謂祖之適也，下正謂禰之適也。雖正爲禰適，而於祖猶爲庶，故禰適謂之爲庶也，五宗悉然。」今姑存之，然恐不如《大傳》語雖簡而事反該悉也。○張子曰：宗子既祭其祖禰，支子不得別祭，所以

嚴宗廟合族屬，故曰庶子不祭祖，明其宗也。○《大傳》。庶子不得爲長子斬，不繼祖與禰，故也。爲，于僞反。長，丁丈反。○「得」字，《小記》無之。「斬」字，《大傳》作「三年」，義皆有未盡者，今互取之。○尊先祖之正體，不二其統也。言不繼祖禰，則長子不必五世。○疏曰：馬季長注《喪服》云：「此爲五世之適，父乃爲之斬也。」而鄭注此云：「言不繼祖禰，則長子不必五世矣。」庾氏云：「用恩則禰重，用義則祖重。父之與祖各有一重，故至己承二重而爲長子斬。若不繼祖，則不爲長子斬也。」如庾氏此言，則父適一世承重，則爲長子三年也。鄭注《喪服》云：「此言爲父後者，然後爲長子三年。」則是父之適子即得爲長子三年。此經云「必爲父適祖適，乃得爲長子斬」者，但禮有適子者無適孫，雖已是祖正，若父猶在，則己未成適。未成適則不得重長。重長必是父沒後者，故云「爲父後者，然後爲長子三年」也。然己身雖是祖庶，而是父適，則應立廟，立廟則己長子傳重。當祭而不爲斬者，以是祖庶厭降，故不敢服斬，且死者其父見在，父自供祭。○《小記》、《大傳》。庶子不祭殤與無後者，殤與無

後者從祖祔食。殤，音傷。祔，音附。○不祭殤者，父之庶也。不祭無後者，祖之庶也。此二者當從祖祔食，而已不祭祖，無所食之也。其牲物而宗子主其禮焉，祖庶之殤則自祭之。凡所祭殤者，唯適子耳。無後者，謂昆弟諸父也，宗子之諸父無後者爲禋祭之。○所食之食，音嗣。共，音恭。禋，音善，又徒單反。○疏曰：云「不祭殤者，父之庶也」者，謂己是父之庶子，及餘兄弟亦是父之庶子，庶子所生之適子爲殤而死者，不得自祭之。以己是父庶，不合立父廟，故不得自祭其子殤也。殤尚不祭，成人無後，不祭可知。云「不祭無後者，祖之庶也」者，己是祖庶，不合立祖廟，故兄弟無後者不得祭之。己若是曾祖之庶，亦不得祭諸父無後者。諸父無後，當於曾祖之廟而祭。己是曾祖庶，不合立曾祖之廟，故不祭之。此不云曾祖者，兼之也。此無後者，身並是庶，若在殤而死，則不合祭也。殤與無後者，當從死者之祖而祔食。祖廟在宗子之家，故己不得祭，祖無處食之，故但令殤者之親共其牲物，而宗子掌其禮，四時皆隨宗子之家而祭，但牲牢不同。故《曾子問》注云：「凡殤，特豚也。」祖庶之殤「者，謂己於祖爲庶，故謂己子爲祖庶之殤。己是父適，得立父廟，故自祭子殤

在於父廟也。昆弟，謂己之昆弟。己是祖庶，祭無後昆弟，當就祖廟，己無祖廟，故不祭。諸父當於曾祖之廟，己無曾祖之廟，故亦不祭。宗子諸父當於宗子曾祖之廟。若宗子是士，無曾祖廟，故諸父無後者爲禋祭之。若宗子爲大夫，得立曾祖廟者，則祭之於曾祖廟，不於禋也。若宗子有太祖者，不立曾祖廟，亦祭之於禋。《祭法》先壇後禋，今祭之於禋者，皇氏云：以其無後，賤之也。○《小記》。有小宗而無大宗者，有大宗而無小宗者，有無宗亦莫之宗者，公子是也。公子有此三事也。公子，謂先君之子，今君昆弟。○疏曰：「有小宗而無大宗者」，謂君無適昆弟，遺庶兄弟一人爲宗領公子，禮如小宗是也。「有大宗而無小宗者」，君有適昆弟，使之爲宗以領公子，更不立庶昆弟爲宗是也。「有無宗亦莫之宗者」，公子唯一，無他公子可爲宗，是有無宗，亦無他公子來宗於己，是亦莫之宗也。言唯公子有此三事，他無之也。公子有宗道。公子之公，爲其士大夫之庶者，宗其士大夫之適者，公子之宗道也。公子不得宗君，君命適昆弟爲之宗，使之宗之，是公子之宗道也。所宗者適，則如大宗，死爲之齊衰九月，其

母則小君也，爲其妻齊衰三月。無適而宗庶，則如小宗，死爲之大功九月，其母妻無服。公子唯己而已，則無所宗亦莫之宗。○己，音紀。○疏曰：「公子之公」，公，君也，是適兄弟爲君者也。「爲其士大夫之庶」者，蓋君之庶兄弟爲士大夫，所謂公子者也。「宗其士大夫之適者」，言君爲此公子士大夫庶者，立此公子士大夫適者爲宗也。此適者，君之同母弟，適夫人所生也。○《大傳》。○《白虎通義》曰：宗者何謂也？宗，尊也。爲先祖主也，宗人之所尊也。古者所以必有宗何也？所以長和睦也。大宗能率小宗，小宗能率群弟，通其有無，所以統理族人者也。宗其爲始祖後者爲大宗，此百世不遷之宗也。宗其爲高祖後者，五世而遷者也。高祖遷於上，宗則易於下。宗其爲曾祖後者爲曾祖宗，宗其爲祖後者爲祖宗，宗其爲父後者爲父宗。以上至高祖宗皆爲小宗，以其轉遷，別於大宗也。別子者，自與其子孫爲祖，繼別者各自爲宗。小宗有四，大宗

有一，凡有五宗，人之親所以備矣。

支子不祭，祭必告於宗子。不敢自專。謂

宗子有故，支子當攝而祭者也。五宗皆然。○疏曰：支子，庶子也。祖禰廟在適子之家，而庶子賤，不敢輒祭之也。若宗子有疾，不堪當祭，則庶子代攝可也，猶宜告宗子然後祭。○程子曰：占所謂「支子不祭」者，惟使宗子立廟主之而已。支子雖不祭，至於齊戒致其誠意，則與主祭者不異。可與，則以身執事；不可與，則以物助，但不別立廟為位行事而已。後世如欲立宗子，當從此義。雖不祭，情亦可安。若不立宗子，徒欲廢祭，適足長惰慢之志，不若使之祭，猶愈於已也。○《曲禮》下。

傳：曾子問曰：「宗子為士，庶子為大夫，其祭也如之何？」孔子曰：「以上牲祭於宗子之家，貴祿重宗也。上牲，大夫少牢。○

疏曰：宗子是士，合用特牲。今庶子為大夫，若祭祖禰，當用少牢之牲，就宗子之家而祭。注云「貴祿」者，謂用大夫之牲也。「重宗」者，謂宗廟在宗子之家也。若庶子是宗子親弟，則與宗子同祖禰廟，當以上牲於宗子之家而祭祖禰也。若庶子為大夫，得祭曾祖而不合立廟，

則崔氏云：當寄曾祖廟於宗子之家。若己是宗子從父庶子兄弟，父之適子，唯得於家自立禰廟，其祖及曾祖亦於宗子之家寄立之。若己是宗子從祖庶兄弟，父祖之適，則立祖禰廟於己家，則亦寄立曾祖之廟於宗子之家。皆已供上牲，宗子為祭。此大夫者，謂諸侯大夫，下文云「宗子有罪，居于他國」，則可見也。祝曰：

「孝子某，為介子某薦其常事。」為，于僞反。

○介，副也。不言庶，使介若可以祭然。○疏曰：宗子祭時，祝告神辭云。孝子，謂宗子也。某是宗子之名。介子某，介子謂庶子為大夫者，介，副也，某是庶子名也。薦其歲之常事，<sup>①</sup>告神止稱宗子，而庶子實在祭位也。又曰：庶子，卑賤之稱，介是副貳之義，介副則可祭也。若宗子有罪，居于他國，庶子為大夫，其祭也，祝曰：「孝子某，使介子某執其常事。」此之謂宗子攝大夫。○疏曰：記云士不攝大夫，士攝大夫惟宗子也。攝主不厭祭，不旅，不假，

①「常」，原作「當」，據元明本、寬文本、賀本改。

不綏祭，不配。厭，本又作「壓」，於黠反，注下皆同。綏，注作「墮」，同許垂反，注同。○皆辟正主。厭，厭飫神也。厭有陰有陽：迎尸之前，祝酌奠，奠之且饗，是陰厭也；尸謖之後，徹薦俎敦設於西北隅，是陽厭。此不厭者，不陽厭也。不旅，不旅酬也。假，讀爲嘏，不嘏，不嘏主人也。不綏祭，謂辟主人也。綏，《周禮》作「墮」。不配者，祝辭不言「以某妃配某氏」。○辟，音避，下同。飫，於去反。謖，色六反，起也。敦，音對，又束論反。嘏，古雅反。○按：「謂辟主人」，今本「辟」皆作「今」，以疏考之，當改作「辟」。○疏曰：注云「厭有陰有陽」者，約《少牢》、《特牲》禮文。祝酌奠於銅南，祝奠訖，且復以辭饗告神也。是室奧陰靜之處，故云陰厭。尸謖之後，佐食徹尸之薦俎設於西北隅，得尸明白之處，故曰陽厭。《特牲》云旅酬之後無算爵，無算爵之後，祝告利成，尸起，主人降，佐食徹尸薦俎，設於西北隅，所謂陽厭。今庶子攝主不爲此陽厭，庶子攝主不敢備禮，故於祭末不爲陽厭之祭，謙退，似若神未厭飫然也。旅酬，《特牲》禮云：受嘏之後，嗣子舉奠訖，賓坐取薦南之爵，酬長兄弟，長兄弟酬衆賓，衆賓酬衆兄弟，所謂旅酬也。嘏，是主人受福。綏，是將欲受福，先爲綏

祭。《特牲》、《少牢》云：祝出迎尸，尸入即席坐，而執祝前之觶，而祝命尸綏祭，尸取菹揆于醢，祭于豆間及祭黍稷肺等，是謂尸綏祭也。尸酢主人，主人拜受爵，上佐食取黍稷肺授主人，此所謂綏祭也。又云：主人左執爵，祝與二佐食取黍以授尸，尸執以命祝，祝受以東北面嘏于主人曰：「皇尸命工祝，承致多福無疆于女孝孫。」所謂嘏也。不配者，《少牢》禮云：司宮筵于奧，設饌酌奠，主人再拜稽首，祝曰：「孝孫某敢用柔毛剛鬣，嘉薦普淖，用薦歲事于皇祖伯某，以某妃配某氏，尚饗。」此所謂配也。攝主不敢備禮，略言皇祖而已。但據此次第，凡祭皆先祝而配，次綏祭，次嘏，次旅，末乃厭祭。今記文乃從末至初，以攝主非正，故逆陳之也。布奠於賓，賓奠而不舉。布奠，謂主人酬賓，奠觶於薦北。賓奠，謂取觶奠于薦南也，<sup>①</sup>此酬之始也。奠之不舉，止旅。○觶，之鼓反，《字林》音支。○疏曰：《特牲》禮云：受嘏之後，主人獻賓，賓酢主人，主人又獻衆賓訖，主人酌西方之尊以酬賓，主人奠爵于賓之

①「南」，原作「角」，據元明本、寬文本、賀本改。



薦北，賓取爵，東面奠于薦南，後乃舉之以酬兄弟也。今攝主，故主人布奠，賓直奠之，而後不復舉以酬兄弟，此即不旅酬之事。而別言者，以上文是主人之事，此論賓禮有闕也。止旅，謂止旅酬之事而不爲也。不歸肉，歸，如字，又其位反。○肉，俎也。諸與祭者留之共燕。○與，音預。○疏曰：歸，饋也。正祭，諸助祭之賓客各使歸俎，今攝主不敢饋俎肉，但留之共燕。其辭于賓曰：『宗兄、宗弟、宗子在他國，使某辭。』辭，猶告也。宿賓之辭，與宗子爲列，則曰宗兄若宗弟，昭穆異者，曰宗子而已。其辭若云：宗兄某在他國，使某執其常事，使某告。○疏曰：宿，讀爲肅，肅，進也。○曾子問曰：『宗子去在他國，庶子無爵而居者，可以祭乎？』孔子曰：『祭哉。』有子孫存，不可以乏先祖之祀。○疏曰：孔子既許其祭，以無正文得祭，故云祭哉。「哉」者，疑而量度之辭。「請問其祭如何？」孔子曰：「望墓而爲壇，以時祭。」不祭于廟，無爵者賤，遠辟正主。○遠，于萬反。○疏曰：宗子雖有廟在宗子之家，庶子

無爵，遠辟正主，不得就宗子之廟而祭，唯可望所祭者之墓而爲壇，以四時致祭也。據鄭此言，「宗子去在他國」謂有爵者，以經云「庶子無爵而居」，明宗子是有爵。其去他國，謂有罪者。若其無罪，則以廟從，本國不得有廟，故《喪服小記》注云：「宗子去國，乃以廟從，謂無罪也。」若宗子死，告於墓而後祭於家。言祭于家，容無廟也。○疏曰：宗子既死，庶子無所可辟，當云告于墓而後祭于宗子之家。今直云祭於家，是容宗子無爵，其家無廟，而祭于庶子之家。或云：祭於宗子之家，一是庶子無爵，不合立廟；二是宗子無罪居他國，以廟從，本家不復有廟也。宗子死，稱名不稱孝。孝，宗子之稱，不敢與之同其辭，但言子某薦其常事。○疏曰：不言介者，蓋宗子在，得言介子某。今宗子既死，身又無爵，故不得稱介也。身沒而已。」至子可以稱孝。○疏曰：其不稱孝者，唯庶子之身終沒而已。其庶子死，則其適子祭庶子之時可以稱孝也。○呂大鈞曰：此宗子死，庶子尚在，雖有宗子之適子，未得主祭，故庶子主之。祝辭止曰「子某薦其常事」而已，不言介，明無所助也。若庶子皆死，則宗子之子乃主

之，故曰「身沒而已」。今之無宗子者，宜亦倣此。子

游之徒有庶子祭者，以此，以，用也，用此禮祭也。若義也。若，順。今之祭者不首其義，

故誣於祭也。首，本也。誣，猶妄也。○孔子

曰：「有陰厭，有陽厭。」言祭殤之禮，有于陰厭

之者，有于陽厭之者。○疏曰：「有於陰厭之者」，謂適

殤也。「有於陽厭之者」，謂庶殤也。曾子問曰：

「殤不祔祭，何謂陰厭陽厭？」祔，依注音備，

本或作「附」，同。○祔，當爲「備」，聲之誤也。言殤乃

不成人，祭之不備禮，而云陰厭陽厭乎，此失孔子指也。

祭成人，始設奠於奧，迎尸之前謂之陰厭。尸謾之後，

改饌於西北隅，謂之陽厭。殤則不備。○奧，烏報反。

○疏曰：曾子既問孔子云「有陰厭，有陽厭」，不解孔子

之旨，謂祭殤者一祭之中有此兩厭，故問也。注以「祔

當爲備」者，《小記》云：「殤與無後者從祖祔食。」今云不

祔，與記文乖，又備，祔聲相近，故云「誤也」。孔子

曰：「宗子爲殤而死，庶子弗爲後也。」族人

以其倫代之，明不序昭穆立之廟，其祭之就其祖而已。

代之者主其禮。○疏曰：注以經云庶子既不爲後，宗子

理不可闕，故知族人以其倫代之。倫，謂輩也，謂與宗

子昭穆同者則代之。又以殤死無爲人父之道，故不序

昭穆，不得與代之者爲父也。但宗子存時，族人凡殤

死者，宗子主其祭祀，今宗子殤死，明代爲宗子者主其

禮也。此宗子是大宗，族人但是宗子兄弟行，無限親

疏，皆得代之。其吉祭特牲。尊宗子從成人也。

凡殤則特豚，自卒哭成事之後爲吉祭。○疏曰：士

祭成人特牲，今尊宗子，故從成人之禮也。凡殤則降

宗子之殤，故用特豚。記曰「卒哭曰成事」，以吉祭易

喪祭。熊氏云：殤與無後者，唯祔與除服一祭則止。

此言吉祭者，唯據一祭也。庾云：吉祭通四時常祭。

然不知何時當止，未有聞焉。經云「吉祭特牲」，則喪

祭之時降用特豚也。祭殤不舉，無所俎，無玄

酒，不告利成，所，音其。○此其無尸及所降也，

其他如成人。舉肺脊、所俎、利成，禮之施於尸者。○

疏曰：《特牲》、《少牢》之尸將食舉肺脊，今此無尸，故

不舉肺脊也。《特牲》、《少牢》之上佐食設所俎，初載

心舌所者，敬也，主人敬尸之俎，蓋所是尸所食歸餘之

俎，以其無尸，故無胙俎也。若祭成人，則有玄酒，今祭殤既略，故無玄酒，是降也。《特牲》、《少牢》之無算爵，祝東面告利成，利猶養也，謂供養之禮成也，今無所可告，故不告也。是謂陰厭。是宗子而殤祭之於奧之禮。小宗爲殤，其祭禮亦如之。○疏曰：注知此指大宗者，以何休云：「小宗無子則絕，大宗無子則不絕，重適之本也。」唯在殤而死，乃不得爲後，若成人而死，則得立子孫爲後。若立兄弟爲後，則不可。故《公羊》譏仲嬰齊是公孫歸父之弟，當云公孫嬰齊，而云仲嬰齊者，爲歸父之後，譏其亂昭穆，故云仲也。凡殤與無後者，祭於宗子之家，當室之白，尊于東房，是謂陽厭。」凡殤，謂庶子之適也，或昆弟之子，或從父昆弟。無後者，如有昆弟及諸父。此則今死者皆宗子大功之內親共祖禰者。言祭于宗子之家者，爲有異居之道也。無廟者爲禋祭之，親者共其牲物，宗子皆主其禮。「當室之白，尊於東房」，異於宗子之爲殤。當室之白，謂西北隅得戶明者也。明者曰陽。凡祖廟在小宗之家，小宗祭之亦然。宗子之適亦爲凡殤，過此以往，則不祭也。祭適者，天子下祭五，諸侯下祭

三，大夫下祭二，士以下祭子而止。○疏曰：凡殤，謂非宗子之殤。無後者，謂庶子之身無子孫爲後者。不敢在成人之處，故於室之明處而設尊於東房，以明是陽，故爲陽厭也。又注云「庶子之適」一句，與下文「昆弟之子」、「從父昆弟」二句爲總。云「昆弟之子」者，謂宗子親昆弟所生之適子也。其昆弟是庶子，昆弟所生者是適也。云「或從父昆弟」者，謂宗子之從父兄弟也。宗子之父是適，諸父是庶，諸父所生之適子亦是庶子之適也。如，而也。而有昆弟，謂宗子之親，庶兄弟與宗子同祖，今既無後，祭之當於宗子祖廟。諸父，謂宗子諸父並是庶子，與宗子同曾祖，祭之當於宗子曾祖之廟也。凡殤有二：一是昆弟之子，祭之當於宗子父廟；二是從父昆弟，祭之當於宗子祖廟。其無後者亦有二：一是昆弟無後，祭之當於宗子祖廟；二是諸父無後，祭之當於宗子曾祖之廟。凡殤得祭者，以其身是適故也。「無後者」，成人無後則祭，若在殤而死則不祭，以其身是庶故也。從父兄弟，是宗子大功親也。昆弟、諸父，是宗子期親。諸父及從兄弟，共祖者也，昆弟之子，共祖者也。據士禮，適十二廟，有祖有禰，下士祖禰共廟，故鄭限以祖禰同者，唯大功之內親也。禮，大功以上同

居，命主以上則父子異宮，故云「有異居之道」。若祭諸父當於曾祖之廟，宗子是士，無曾祖廟，故爲禪祭之。推此而言，大夫立三廟，無大祖者，其祭諸父得於曾祖廟也。其立大祖廟者，其祭諸父當於曾祖廟。曾祖無廟，亦爲禪祭之。大功有同財之義，其經營祭事，牲牢之屬，親者主爲之。又牲牢視親者之品命，故云親者共其牲物。就宗子之家，故宗子皆主其禮。以宗子之殤祭於室奧，今祭凡殤乃於西北隅。又《特牲》成人之禮尊於室戶東，上文宗子之殤除不舉肺等四事，其餘皆與祭成人同，則其尊亦設於室戶東，今祭凡殤乃尊於東房。皆異於宗子之殤也。宗子之適子，父雖是適，其子殤死亦爲凡殤，以其更無別文，故知與凡殤同也。此謂宗子身殤，及宗子昆弟之子及從父昆弟并宗子適子等，唯此等殤死祭之，過此以外皆不祭也。「祭適」以下並《祭法》文，義具彼注。○《曾子問》。①

適子、庶子，祇事宗子宗婦，適，丁歷反。

○祇，敬也。宗子，大宗。○疏曰：適子，謂父及祖之適子，是小宗也。庶子，謂適子之弟。宗子，謂大宗子。宗婦，謂大宗子之妻。雖貴富，不敢以貴富人宗子

之家。雖衆車徒，舍於外，以寡約人。人，謂人宗子家。子弟猶歸器，衣服、裘衾、車馬，則必獻其上而後敢服用其次也。猶，若也。子弟若有功德，以物見饋賜，當以善者與宗子也。○疏曰：歸，謂歸遺也。若非所獻，則不敢以入於宗子之門，謂非宗子之爵所當服也。不敢以貴富加於父兄宗族。加，猶高也。若富，則具二牲，獻其賢者於宗子。賢，猶善也。○疏曰：善者獻宗子使祭之，不善者私用自祭也。夫婦皆齊而宗敬焉，齊，側皆反。○當助祭于宗子之家。終事而後敢私祭。祭其祖禰。

○疏曰：此文雖主事大宗子，其大宗之外，事小宗子者亦然。○呂大臨曰：宗子既祭其祖禰，則支子不得別祭，所以嚴宗廟合族屬，故曰庶子不祭祖與禰，明其宗也。若己爲宗子而弟有子，其弟既死，其子欲祭，其父必從祖祔食，祭于宗子之家乎？將就其宮而祭，使其子自主之乎？從祖祔食，祭于宗子之家，止謂殤與無後。蓋殤與無後，必宗

①「曾」上，賀本有「並」字。

子主之爲可。若有後者，亦使宗子主之，則是子有不得事其父矣。傳曰：「子不私其父，則不成爲子。」故兄弟生而異宮，所以盡子之私養，及其沒也，反不得主其祭，於義可乎？蓋異宮者必祭於其宮，使其子主祭。其祭也，必告于宗子而後行，不得而專，所以明其宗也。宗子有祭，必先與焉，卒祭而後祭其父，故曰：「支子不祭，祭必告於宗子。」又曰：「終事而後敢私祭」，若非異宮，則禮有所不得申。禮不得申，則雖祔食于祖廟，亦可以安，所謂不得已焉者也。○《內則》。

傳：孔子曰：「宗子雖七十，無無主

婦。族人之婦，不可無統。非宗子，雖無主婦

可也。」疏曰：宗子，大宗子也。凡人年六十無妻者不

復娶，以陽道絕故也。而宗子領宗男於外，宗婦領宗女

於內，昭穆事重，不可廢闕，故雖年七十亦猶娶也。然

此謂無子孫及有子而幼者，若有子孫，則傳家事于子

孫，故曰七十老而傳也。○《曾子問》。○宗室有

事，族人皆侍終日。大宗已侍於賓奠，然

後燕私。謂卿、大夫以下。宗室，大宗子之家也，《禮

志》云：「別子爲祖，繼別爲大宗，繼禰爲小宗。」賓，僚

友，助祭也。燕私者何也？祭已而與族人

飲，不醉而出，是不親也；醉而不出，是渫

宗也；出，猶去也。出而不止，是不忠也。

忠，厚。親而甚敬，忠而不倦，若是，則兄弟

之道備。備者，成也。成者，成於宗室也。

故曰：飲而醉者，宗室之意也；德將無

醉，族人之志也。是故祀禮有讓，德施有

復，義之至也。復，反也。○《書大傳》。○上治

祖禰，尊尊也；下治子孫，親親也。旁治

昆弟，合族以食，序以昭繆，別之以禮義，

人道竭矣。繆，音木。○治，猶正也。繆，讀爲穆，

聲之誤也。竭，盡也。○繆，莫侯反。○疏曰：上主尊

敬，故云尊尊。下主恩愛，故云親親。旁治昆弟之時，

合會族人以食之禮，又次序族人以昭穆之事也。言此

三事，皆分別之以禮義，使人之道理竭盡於此矣。

○《大傳》。四世而緦，服之窮也。五世袒

免，殺同姓也。六世親屬竭矣。免，音問。

殺，色界反。○四世，共高祖。五世，高祖昆弟。六世以外，親盡無屬名。○疏曰：四世，謂上至高祖，下至己兄弟，同承高祖之後爲族兄弟也。爲親兄弟期，一從兄弟大功，再從兄弟小功，三從兄弟總麻而服盡也。五世，謂共承高祖之父者也。服袒免而無正服，減殺同姓也。六世，謂共承高祖之祖者也。不復袒免，同姓而已，故云親屬竭矣。○《大傳》。親親以三爲五，以五爲九，上殺，下殺，旁殺，而親畢矣。殺，色界反。○己，上親父，下親子，三也。以父親祖，以子親孫，五也。以祖親高祖，以孫親玄孫，九也。殺，謂親益疏者，服之則輕。○疏曰：上殺者，服父三年，服祖期，曾祖宜大功，高祖宜小功，以遠而恩疏，故略從三月一等，又不可以大功、小功旁親之服加至尊，故爲齊衰也。下殺者，謂父服子，宜報以三年，<sup>①</sup>而首足不宜一等，故降服期，而孫九月，曾孫、玄孫一等三月也。旁殺者，世父叔父，宜九月，以加而爲期也，從世父叔父小功五月，族世父叔父總麻三月也。祖期，而祖之兄弟小功五月，族祖總麻三月也。又曾祖本應五月，其兄弟爲族曾祖，故三月也。又兄弟期，同堂兄弟九月，從祖兄弟

小功五月，族之昆弟總麻三月。此外無服，是發兄弟而旁殺也。又父爲子期，而兄弟之子以報而加爲期，同堂兄弟之子五月也，族兄弟之子總也。又爲孫大功，兄弟之孫小功，同堂兄弟之孫總麻，其外無服矣。曾祖爲曾孫三月，爲兄弟曾孫亦爲三月，皆旁殺也。自此以外，悉無服矣，故云親畢。且五屬之親，若同父則期，同祖則大功，同曾祖則小功，同高祖則總麻，高祖外無服，亦是畢也。○《小記》。自仁率親，等而上之至于祖，自義率祖，順而下之至于禰，是故人道親親也。言先有恩。○疏曰：自，用也。仁，恩也。率，循也。親，謂父母也。等，差也。義，主斷割也。親親故尊祖，尊祖故敬宗，敬宗故收族，收族故宗廟嚴，宗廟嚴故重社稷，重社稷故愛百姓，愛百姓故刑罰中，刑罰中故庶民安，庶民安故財用足，財用足故百志成，百志成故禮俗刑，禮俗刑然後樂。<sup>②</sup>

①「三」，原作「二」，據元明本、寬文本、賀本改。

丁仲反。樂，音洛。①○收族，序以昭穆也。嚴，猶尊也。《孝經》曰：「孝莫大於嚴父。」百志，人之志意所欲也。刑，猶成也。○疏曰：「親親故尊祖」者，以己上親於親，親亦上親於祖，以次相親，去己高遠，故云尊祖。而祖既高遠，無由可尊，宗是祖之正胤，故敬宗。族人既敬宗子，故宗子亦收族人。若族人散亂，骨肉乖離，則宗廟祭享不嚴。若收之，則親族不散，昭穆有倫，則宗廟之所以尊嚴也。「宗廟嚴故重社稷」，此以下並立宗之功也。始於家邦，終於四海，若能先嚴宗廟，則後乃社稷保重也。百姓，百官也。百官當職，更相匡輔，則刑罰皆得中也。上無淫刑濫罰，故庶民安也。庶民各安其業，故財用得足也。財用既足，所以君及民人百志悉成，是謂「倉廩實知禮節，衣食足知榮辱」也。刑亦成也，天下既足，百志又成，則禮節風俗於是而成，所以長為民庶所樂而不厭也。《詩》云：「不顯不承，無斃於人斯。」此之謂也。斃，音亦。○斃，厭也。言文王之德不顯乎？不承成先人之業乎？言其顯且承之，人樂之無厭也。○厭，於豔反，下同。○疏曰：此《周頌·清廟》之篇。言今尊祖敬宗，人皆願樂，

亦無厭倦，故云「此之謂也」。○今按：承，尊奉也。斯，語辭。言文王之德，豈不顯乎，豈不承乎信乎，其無有厭斃於人也。○《大傳》。

### 庶子之正於公族者，教之以孝悌、睦友、

子愛，明父子之義、長幼之序。弟，大計反，又作

「悌」，下「孝弟」同。長，丁丈反。○正者，政也。庶子，司

馬之屬，掌國子之倅，為政于公族者。○倅，七對反。○疏

曰：政，謂主其政令也。《周禮》：諸子，下大夫二人，屬夏

官司馬。諸侯謂之庶子，職掌與諸子同，故《周禮》注云：

「或曰庶子。」倅，副也。國子是公、卿、大夫、士之副貳也，言

副貳於父也。其朝于公，內朝則東面北上，臣

有貴者以齒。朝，直遙反。○內朝，路寢庭。○疏

曰：以下文司士所掌為外朝，則知此內朝是路寢庭也。

其在外朝，則以官，司士為之。外朝，路寢門之外

庭。司士，亦司馬之屬也，掌群臣之班，正朝儀之位也。

○疏曰：公族在于外朝，與異姓同處位次之時，則以官之

上下，不復以年齒也。「司士為之」者，謂司士之官主為朝

①「音洛」，原作「待洛反」，據元明本、寬文本、賀本改。

位之次。外朝位既司土主之，則內朝庶子主之也。其在宗廟之中，則如外朝之位，宗人授事，以爵以官。宗人，掌禮及宗廟也。以爵，貴賤異位也。以官，官各有所掌也，若司徒奉牛，司馬奉羊，司空奉豕。其登餽、獻、受爵，則以上嗣。餽，音俊。○上嗣，君之適長子，以《特牲饋食禮》言之。受爵，謂上嗣舉奠也。獻，謂舉奠洗爵酌人也。餽，謂宗人遣舉奠盥，祝命之餽也。大夫之嗣無此禮，辟君也。○盥，音管。○疏曰：以《特牲》言之，則先受爵而後獻，獻而後餽。今此經先云「餽」者，以餽爲重。舉重者從後以嚮先，逆言之也。登，謂登堂。無事之時，嗣子在堂下，餽時登堂，獻時亦登堂，受爵之時亦登堂，此一登之文包此三事。又曰：注言「舉奠」，謂嗣子也，名此嗣子爲舉奠也。庶子治之，雖有三命，不踰父兄。治之，治公族之禮也，唯於內朝則然。其餘會聚之事，則與庶姓同。一命齒於鄉里，再命齒於父族，三命不齒。不齒者，特爲位，不在父兄行列中。○行，戶剛反。○疏曰：「庶子治之」，謂治此公族朝於內朝之時也。既不計官之大小，故雖有三命之貴，而列位不得踰越

在無爵父兄之上也。然此句應承前文「臣有貴者以齒」之下，其外朝既云司土爲之，則內朝自然庶子治之也。所以在此者，當是簡札遺脫。鄭不言者，略耳。其公大事，則以其喪服之精麤爲序，雖於公族之喪亦如之，以次主人。大事，謂死喪也。其爲君雖皆斬衰，序之必以本親也。主人，主喪者。次主人者，主人恒在上，主人雖有父兄，猶不得下齒。○爲，于僞反。衰，七雷反。○疏曰：精麤，謂衰服布縷精麤也。衰，麤者在後，精者在後，非但公喪如此，雖於公族之內有死喪之事，相爲亦如之。「以次主人」者，謂雖有庶長父兄尊於主人，亦必位於主人之下，使主人在上居喪主。雖族人父兄尊，然主人亦不得下而與之序齒列焉。若公與族燕，則異姓爲賓，同宗無相賓客之道。膳宰爲主人，君尊，不獻酒。公與父兄齒。親親也。族食，世降一等。親者稠，疏者稀。○稠，直由反。○疏曰：族食，謂與族人燕食也。族人既有親疏，燕食亦隨世降殺也。假令本是齊衰一年四會食，若大功則一年三會食，小功則一年二會食，緦麻則一年一會食，是世降一等也。○其在軍，則守於



公禰。謂從軍者。公禰，行主也，行以遷主言禰，在外親

也。○疏曰：公禰，謂遷主，載在齊車隨公行者也。庶子

官既從在軍，故守於公齊車之行主也。遷主而呼爲禰者，

既在國外，欲依親親之辭。公若有出疆之政，疆，居

良反。○謂朝覲會同也。庶子以公族之無事者守

於公宮，正室守太廟，守，如字，又手又反。○正室，

適子也。太廟，太祖之廟。○疏曰：無事，謂不從行及無

職事者。適子，謂公、卿、大夫之適子也。《公羊傳》云：

「周公稱太廟。周公是魯之始祖，故知餘國皆然也。諸

父守貴宮貴室，謂守路寢。○疏曰：以下云下宮，上

云太廟，此「貴宮貴室」既非太廟，又非下宮下室，唯當路寢

也。指其院宇謂之宮，指其所居處謂之室。諸子諸孫

守下宮下室。下宮，親廟也。下室，燕寢。或言宮，或

言廟，通異語。○疏曰：親廟，謂高祖以下。云，或言宮，

則下宮也。「或言廟」，則太廟也。故《春秋》云「立武宮」，

傳曰：群公稱宮。《明堂位》云：「武公之廟，武世室也。」是

通異語也。又解正室適子，不云世子，則是卿、大夫之適

子，而此諸父子孫亦謂卿、大夫之諸父子孫矣。不云諸兄

諸弟者，蓋諸兄從諸父，諸弟從子孫也。○五廟之孫，

祖廟未毀，雖爲庶人，冠、取妻必告，死必赴，

練祥則告。冠，占亂反。取，七喻反。○赴，告於君也。

實四廟孫而言五廟者，容顯考爲始封子也。族之相爲

也，宜弔不弔，宜免不免，有司罰之。爲，于僞

反。免，音問，注及下同。○弔，謂六世以往。免，謂五世

至于贈賻承含，皆有正焉。贈，方鳳反。賻，音附。

承，依注音贈。含，胡暗反。○承，讀爲贈，聲之誤也。正，

正禮也。○疏曰：贈、賻、含、襚，皆贈喪之物。贈，車馬。

賻，財帛。含，珠玉。襚，衣服。總謂之贈。贈，送也。

○公族其有死罪，則磬于甸人。甸，大遍反。

○不於市朝者，隱之也。甸人，掌郊野之官。縣縊殺之曰

磬。○縣，音玄。縊，一智反。其刑罪則纖剕，亦告

于甸人。纖，音鍼，之林反，徐音殲。剕，之免反。告，依

注作「鞠」，久六反。○纖，讀爲殲，刺也。剕，割也。宮，

割、臠、墨、劓、剕，皆以刀鋸刺割人體也。告，讀爲鞠，讀書

用法曰鞠。○刺，七亦反，下同。臠，賴忍反。劓，魚器反。

鋸，音據。○疏曰：謂族人犯刑罪者，欲纖刺剕割之時，

亦鞠讀刑法之書於甸人之官也。公族無宮刑。宮，

割，淫刑。獄成，有司讞于公，其死罪則曰：

「某之罪在大辟。」其刑罪則曰：「某之罪在

小辟。」讞，魚列反。辟，婢亦反。○成，平也。讞之言白

也。辟，亦罪也。公曰：「宥之。」宥，音又。○宥，寬

也，欲寬其罪出於刑也。有司又曰：「在辟。」公又

曰：「宥之。」又，復也。有司又曰：「在辟。」及

三宥，不對，走出，致刑于甸人。對，答也。先者

君每言宥，則答之以將更寬之。至於三，罪定不復答，走往

刑之，為君之恩無已。公又使人追之曰：「雖然，

必赦之。」有司對曰：「無及也。」罪既正不可宥，

乃欲赦之，重刑殺其類也。反命于公。白已刑殺。公

素服不舉，為之變。如其倫之喪，無服，為，于

僞反。○素服，於凶事為吉，於吉事為凶，非喪服也。君雖

不服，臣卿大夫死則皮弁錫衰以居，往弔當事則弁絰，於

士蓋疑衰，同姓則總衰以弔之。今無服者，不往弔也。倫，

謂親疎之比也。素服亦皮弁矣。○比，必利反。○今按：

傳文此「素服」下脫「居外不聽樂」五字。○疏曰：譙周

曰：此素服，著素冠。非鄭義也。親哭之。不往弔，為

位哭之而已。君於臣，使有司哭之。○今按：傳文此亦脫

「於異姓之廟」五字，當補之。○以上並《文王世子》。

傳曰：公族朝於內朝，內親也。謂以宗

族事會。○疏曰：此言公族所以朝于內朝者，欲使親在

其內也。雖有貴者以齒，明父子也。疏曰：欲

明父子昭穆之本恩。外朝以官，體異姓也。體，

猶連結也。○疏曰：外朝主尊別，不得以私恩為異，是

欲與異姓相連結以為體也。宗廟之中以爵為

位，崇德也。崇，高也。○疏曰：爵以德序，而廟中

行禮時，是先祖尊嚴之所，所主在德，不可私恩，故列爵

為位也。宗人授事以官，尊賢也。官各有能。

登餼受爵以上嗣，尊祖之道也。上嗣，祖之正

統。喪紀以服之輕重為序，不奪人親也。

紀，猶事也。○不奪人本親之恩，故輕重為序也。公

① 「不」上，元明本、賀本有，疏曰「二字」。

與族燕則以齒，而孝弟之道達矣。以至尊不白異於親之列。○疏曰：君上存親而與族人燕會，則民有親屬者豈得相遺棄，此孝弟之道達於下也。其族食世降一等，親親之殺也。殺，色界反。○殺，差也。○差，初佳反。戰則守於公廩，孝愛之深也。行主，君父之象。○疏曰：載主將行，示不自專，是孝也；使守而尊之，是愛也；乃是孝愛之深也。正室守太廟，尊宗室，而君臣之道著矣。以其不敢以庶守君所重。○疏曰：用適子守太廟，是尊於宗及廟之室故也。臣下不敢以庶賤之人守君所重，是君臣之道著明也。諸父諸兄守貴室，子弟守下室，而讓道達矣。以其貴者守貴，賤者守賤。上言父子孫，此言兄弟，互相備也。○疏曰：貴者守貴，賤者守賤，賤者讓於貴，貴者不相陵犯，是讓道達也。五廟之孫，祖廟未毀，雖及庶人，冠、取妻必告，死必赴，不忘親也。疏曰：君不以貴仍統於親，故族人有事告赴，是不忘親也。親未絕而列於庶人，賤無能也。疏曰：既與君有親而

有為庶人者，賤其無能也。敬弔臨賻賵，睦友之道也。臨，如字，又力鳩反。○疏曰：言君敬重弔臨賻賵不使闕失者，是君親睦和友之道也。古者庶子之官治而邦國有倫，邦國有倫而衆鄉方矣。治，直計反。鄉，許亮反。○鄉方，言知所鄉。○疏曰：此結庶子官義也。不待第九條而先在此結者，第九是罪惡之事，不宜與相連也。倫，理也。公族之罪，雖親，不以犯有司，正術也，所以體百姓也。犯，猶干也。術，法也。○疏曰：有司，獄官也。術，法也。公族之親有罪，公宜赦之而猶在五刑者，國立有司之官，以法齊治一切，今不可以私親之罪而干壞有司之正法也。刑于隱者，不與國人慮兄弟也。疏曰：隱，隱僻之處，謂甸師也。弗弔，弗為服，哭于異姓之廟，為忝祖，遠之也。為，于偽反。遠，于萬反。○疏曰：為其犯罪忝辱先祖，於公法合疏遠之也。素服居外，不聽樂，私喪之也，骨肉之親無絕也。疏曰：骨肉之親雖犯

刑戮，無斷絕之理也。公族無宮刑，不翦其類也。翦，割截也。○《文王世子》。○魯人有同姓

死而弗弔者，人曰：「在禮，當免不免，當弔不弔，有司罰之，如之何子之無弔也？」

答曰：「吾以其疏遠也。」子思聞之曰：

「無恩之甚也。昔者季孫問於夫子曰：季孫，季康子肥。『百世之宗，有絕道乎？』子

曰：『繼之以姓，義無絕也。故同姓爲宗，

合族爲屬，雖國子之尊，國子，諸侯、卿、大夫之

子。不廢其親，所以崇愛也。是以綴之以

食，序列昭穆，萬世婚姻不通，忠篤之道然

也。』《孔叢子·雜訓》。

君有合族之道，族人不得以其戚戚君，

位也。君恩可以下施，而族人皆臣也，不得以父兄子弟

之親自戚於君。位，謂齒列也，所以尊君別嫌也。○別，彼

列反。○疏曰：合族者，言設族食燕飲，有合會族人之道也。○《大傳》。

傳：有若問於孔子曰：「國君之於同

姓，如之何？」孔子曰：「皆有宗道焉，故

雖國君之尊，猶百世不廢其親，所以崇愛

也。雖於族人之親，而不敢戚君，所以謙

也。」戚，親也，尊敬君，不敢如其親也。○《家語》。

○宣王欲得國子之能導訓諸侯者，賈侍中

云：國子，諸侯之嗣子。或云：國子，諸侯之子，欲使

訓導諸侯子也。昭謂：國子，同姓諸姬也。凡王子弟，

謂之國子。導訓諸侯，謂爲州伯者也。樊穆仲曰：

「魯侯孝。」穆仲，仲山父之謚，猶魯叔孫穆子謂之穆

叔。王曰：「何以知之？」對曰：「肅恭明

神而敬事耆老，耆，凍梨也。賦事行刑，必問

於遺訓遺訓，先王之教也。而咨於故實。咨，謀

也。故實，故事之是者。不干所問，不犯所咨。」

王曰：「然則能訓治其民矣。」乃命魯孝公

於夷宮。命爲侯伯也。夷宮，宣王祖父夷王之廟。

古者，爵命必於祖廟。○《國語·周語》。○周襄王

將以狄伐鄭，富辰諫曰：「不可。富辰，周大夫。大上以德撫民，大，音泰。無親疏也。其次親親，以相及也。先親以及疏，推恩以成義。昔周公弔二叔之不咸，故封建親戚以藩屏周。藩，方元反。○弔，傷也。咸，同也。周公傷夏殷之叔世疏其親戚，以至滅亡，故廣封其兄弟。○疏曰：鄭衆、賈逵皆以：叔爲管叔、蔡叔，傷其不和睦而流言作亂，故封建親戚。鄭玄《詩箋》亦然，獨馬融、杜預以爲夏、殷叔世。○今按：鄭衆、賈逵義是。管、蔡、郕、霍、魯、衛、毛、聃、郛、雍、曹、滕、畢、原、鄆、郇、文之昭也。郕，音成。聃，乃甘反。雍，於用反，注同。鄆，音風。郇，音荀。○十六國皆文王子也。管國在滎陽京縣東北。蔡在今汝南上蔡縣。郕國，東平剛父縣西南有郕鄉。霍國，今在永安縣東北，有霍太山。魯在兗州曲阜縣。衛國在汲郡朝歌縣。郛國，濟陰城武縣東南有北郛城。雍國在河內山陽縣西。曹國，今在濟陰定陶縣。滕國在沛國公丘縣東南。畢國在長安縣西北。原國在沁水縣西。鄆國在始平鄆

縣東。郇國，解縣西北有郇城。毛、聃闕。○沁，七鳩反。邶、晉、應、韓、武之穆也。邶，音于。○四國皆武王子。河內野王縣西北有邶城。晉國在太原晉陽縣，河東聞喜縣。應國在襄陽城父縣西南。韓國在河東郡界。凡、蔣、邢、茅、胙、祭，周公之胤也。蔣，將丈反。茅，亡交反。胙，才故反。祭，側界反。○胤，嗣也。凡，汲郡共縣東南有凡城。蔣在弋陽期思縣。邢國在東平襄國縣。高平昌邑縣西有茅鄉。東郡燕縣西南有胙亭。祭國。召穆公思周德之不類，故糾合宗族于成周而作詩，召，上照反，注同。糾，居黝反。○類，善也。糾，收也。召穆公，周卿士，名虎。召，采地，扶風雍縣東南有召亭。周厲王之時，周德衰微，兄弟道缺，召穆公于東都收會宗族，特作此周公之樂歌《常棣》，詩屬《小雅》。○按：《詩》家言正《雅》爲周公所作，富辰亦嘗引之，以爲周公之詩。今此說乃不同，必有一誤。杜氏蓋強說也。曰：『常棣之華，鄂不韡韡。凡今之人，莫如兄弟。』棣，大計反。鄂，五各反。不，方九反。韡，

韋鬼反。○常棣，棣也。不，豈不也。鄂鄂然，華外發。韓韓，光明貌。此燕兄弟之樂歌，故言常棣之華，則其鄂然而外見者，豈不韓韓乎？凡今之人，則豈有如兄弟者乎？其四章曰：『兄弟鬩于牆，外禦其侮。』鬩，呼歷反。禦，魚呂反，下同。侮，亡甫反，《詩》作「務」。○鬩，訟爭貌。言內雖不和，若外有異族之侵，則必同心禦之矣。如是，則兄弟雖有小忿，不廢懿親。懿，美也。今天子不忍小忿以棄鄭親，其若之何？庸勳，親親、暱近、尊賢，德之大者也。暱，女乙反。○庸，用也。暱，親也。即聾、從昧、與頑、用鬪，姦之大者也。棄德崇姦，禍之大者也。聾，鹿工反。鬪，魚巾反。○崇，聚也。鄭有平、惠之勳，平王東遷，晉、鄭是依；惠王出奔，號、鄭納之，是其勳也。又有厲、宣之親，鄭始封之祖桓公友，周厲王之子，宣王之母弟。棄嬖寵而用三良，七年殺嬖臣申侯，十六年殺寵子子華也。三良，叔詹、堵叔、師叔，所謂尊賢。

○堵，丁古反，又音者。於諸姬爲近，道近常暱之。四德具矣。耳不聽五聲之和爲聾，目不別五色之章爲昧，心不則德義之經爲頑，口不道忠信之言爲鬪，狄皆則之，四姦具矣。周之有懿德也，猶曰『莫如兄弟』，故封建之。當周公時，故言周之有懿德。其懷柔天下也，猶懼有外侮。扞禦侮者，莫如親親，故以親屏周，召穆公亦云。今周德既衰，於是乎又淪周，召以從諸姦，無乃不可乎？淪，羊朱反。○變周、召親兄弟之道。民未忘禍，王又興之，前有子頹之亂，中有叔帶召狄，故曰民未忘禍。其若文、武何？言將廢文、武之功業。○僖公二十四年《春秋左氏傳》。○晉麗姬之亂，詛無畜群公子，麗，力知反。詛，則慮反。○詛，盟誓。○疏曰：服虔云：麗姬與獻公及諸大夫詛無畜群公子，欲令其子專國。杜雖不注，義似不然。若麗姬爲此，姬死即應復常，何得比至於今國無公族？蓋爲奚齊。

卓子以庶篡適，晉國創其爲亂，不用復畜公子。案檢傳文及《國語》，文公之子雍在秦，樂在陳，黑臀在周，襄公之孫談在周，則是晉之公子悉皆出在他國，是其因行而不改也。自是晉無公族。無公子，故廢公族之官。

○疏曰：公族之官，掌教公之子弟。孔晁注《國語》云：

「公族大夫，掌公族及卿大夫子弟之官。」是卿之適子屬公族也。及成公即位，乃宦卿之適而爲之田，以爲公族。適，丁歷反，本又作「嫡」。○宦，仕也。爲置田邑，以爲公族大夫。○爲置，<sup>①</sup>于僞反。又

宦其餘子，亦爲餘子，餘子，適子之母弟也。亦

治餘子之政。○疏曰：庶子爲妾子，知餘子則是適子之母弟也。言亦爲餘子，則知餘子之官亦治餘子之政令，主教卿大夫適妻之次子也。下云庶子爲公行，不云教庶子，然則卿大夫之妾子亦是餘子之官教之矣。其庶

子爲公行。行，戶郎反，注及下同。○庶子，妾子

也，掌率公戎行。○疏曰：下文趙盾自以庶爲旄車之族，即公行也。晉於是有公族、餘子、公行。皆官名。○《春秋》宣公二年《左氏傳》。○樂伯請公

族大夫，樂伯，樂武子。公族大夫，掌公族與卿之子弟。公曰：「荀家惇惠，荀家，晉大夫。荀會文敏，荀會，荀家之族。壓也果敢，壓，樂書之子桓子。無忌鎮靜，無忌，韓厥之子公族穆子。鎮，重也。靜，安也。使茲四人者爲之。茲，此也。夫膏粱之性難正也，膏，肉之肥者。粱，食之精者。言食肥美者率多驕放，其性難正。故使惇惠者教之，教之道藝。使文敏者導之，導其志行。使果敢者諗之，諗，告也，告得失。使鎮靜者修之。修治其氣性。惇惠者教之，則徧而不倦；倦，懈也。文敏者導之，則婉而入；婉，順也。果敢者諗之，則過不隱；鎮靜者修之，則壹。壹，均一也。使茲四人者爲公族大夫。」《國語·晉語》。○宋昭公將去群公子，樂豫曰：「不可。公族，公室之枝葉

①「置」字，原脫，據元明本、寬文本、賀本補。

也。若去之，則本根無所庇廕矣。葛藟猶能庇其本根，去，起呂反，下及注同。庇，必利反，又悲位反，下同。廕，本又作「蔭」，於鳩反。藟，本又作「藟」，力軌反。○葛之能藟蔓繁滋，以本枝蔭庇之多。○蔓，音萬。故君子以爲比，比，必爾反。○謂詩人取以喻九族兄弟。況國君乎？此諺所謂「庇焉而縱尋斧焉」者也。縱，放也。必不可。君其圖之！親之以德，皆股肱也，誰敢攜貳？若之何去之？不聽。穆、襄之族率國人以攻公。穆公、襄公之子孫，昭公所欲去者。○文公七年《左氏傳》。

天子建德，立有德以爲諸侯。因生以賜姓，因其所由生以賜姓，謂若舜由嬀汭，故陳爲嬀姓。○嬀，九危反。○疏曰：《陳世家》云：「陳胡公滿者，虞帝舜之後也。昔舜爲庶人時，居于嬀汭，其後因爲氏姓，姓嬀氏。武王克殷，得嬀滿，封之于陳。」案《世本》，帝舜姚姓，傳稱虞思妻少康以二姚。及胡公不淫，故周賜之姓，是胡公始姓嬀耳。《史記》以爲胡公之前已姓嬀，非也。胙之土而

命之氏。報之以土而命氏曰陳。○疏曰：胙，訓報也。有德之人必有美報。報之以土，謂封之以國。名以爲之氏，則國名是也。《周語》曰：「帝嘉禹德，賜姓曰姒，氏曰有夏，胙四岳國，賜姓曰姜，氏曰有呂。」亦與賜姓曰嬀，命氏曰陳其事同也。諸侯以字爲謚，因以爲族。諸

侯位卑不得賜姓，故其臣因氏其王父字。○疏曰：以字爲族者，謂公之曾孫以王父之字爲族也。諸侯之子稱公子，公子之子稱公孫，公子、公孫繫公之常言，非族也。公孫之子不復得稱公曾孫，如無駭之輩，直以名行。及其死也，則賜之族，而以其王父之字爲族。無駭，公子展之孫，故爲展氏也。官有世功，則有官族，邑亦如之。謂取其舊官、舊邑之稱以爲族，皆稟之時君。○疏曰：舊官，謂若晉之士氏。舊邑，若韓、魏、趙氏。○隱公八年《春秋左氏傳》。

傳曰：黃帝之子二十五人，其同姓者二人而已，唯青陽與夷鼓皆爲己姓。己，居里反。○此二人相與同德，故俱爲己姓。青陽，金天氏帝少皞也。青陽，方雷氏之甥也。夷鼓，彤



魚氏之甥也。方雷，西陵氏之姓。彤魚，國名。《帝

繫》曰：「黃帝娶於西陵氏之子曰嫫祖，實生青陽。」姊妹

之子曰甥。聲雷、嫫同。嫫，或作「繫」。其同生而

異姓者，四母之子別爲十二姓。凡黃帝之

子二十五宗，唐尚書曰：「繼別爲小宗。非也。繼別

爲大宗，別子之庶孫乃爲小宗耳。其得姓者十四

人爲十二姓。得姓，以德居官而賜之姓也。謂十四

人而二人爲姬，二人爲己，故十二姓。姬、酉、祁、

己、滕、葺、任、荀、僖、姁、嫫，依是也。唯

青陽與蒼林氏同于黃帝，故皆爲姬姓。二

十五宗唯青陽與蒼林德及黃帝，同姓爲姬也。○《國

語·晉語》。○今按：上言青陽與夷鼓皆爲己姓，後又

言青陽與蒼林皆爲姬姓，青陽一人而二姓，殊不可曉。

疑蒼林即夷鼓，己蓋指黃帝，言與黃帝同爲姬姓，非下

文十二姓中之己氏也。然與其後十四人之數又不同，

不知何故抵牾如此。要之，此等傳記之言皆難盡信。

今存於此，聊廣異聞耳。

○衛公使其大夫求婚

於季氏，桓子問禮於孔子。子曰：「同姓

爲宗，有合族之義，故繫之以姓而弗別，綴

之以食而弗殊。君有食族人之禮，雖親盡不異之。

殊，食多少也。雖百世，婚姻不得通，周道然

也。」桓子曰：「魯、衛之先，雖寡兄弟，今

已絕遠矣，可乎？」孔子曰：「固非禮也。

夫上治祖禰，以尊尊也；下治子孫，以親

親也；旁治昆弟，所以敦睦也；此先王不

易之教也。」《家語》。○《白虎通義》曰：族

所以九何？九之爲言究也，親疎恩愛究

竟也。人所以有姓者何？所以崇恩愛，

厚親親，遠禽獸，別婚姻也。故紀世別類，

使生相愛，死相哀，同姓不得相娶者，皆爲

重人倫也。姓，生也，人所稟天氣所以生

者也。所以有氏者何？所以貴功德，賤

伎力。或氏其官，或氏其事，問其氏即可

知其德，所以勉人爲善也。或氏王父字何？所以別諸侯之後，爲興滅國、繼絕世也。諸侯之子稱公子，公子之子稱公孫，公孫之子各以其王父字爲氏。故魯有仲孫、叔孫、季孫，楚有昭、屈、景，齊有高、國、崔也。人必有名何？所以吐情自紀，尊事人者也。子生三月，則父名之於祖廟。於祖廟者，謂子之親廟也，明當爲宗廟主也。一說名之於燕寢。名者，幼少卑賤之稱也，質略，<sup>①</sup>故於燕寢。<sup>②</sup>人所以有字何？冠德明功，敬成人也。所以五十乃稱伯仲者，長幼之序也。稱號所以有四何？法四時，用事先後長幼兄弟之象也，故以時長幼號曰伯仲叔季也。適長稱伯，伯禽是也。庶長稱孟，魯大夫孟氏是也。男女異長，各自有伯仲，法陰陽，各自有終始也。婦姓以配字何？明不娶同姓也。

## 親屬記第八

## 家禮六

### 雜補經<sup>③</sup>

父爲考，母爲妣。郭璞曰：《禮記》云：「生曰

父、母、妻，死曰考、妣、嬪。」今世學者從之。按《書》曰：「大傷厥考心」，事厥考厥長，「聰聽祖考之彝訓」。《蒼頡篇》曰：「考妣延年。」《書》曰：「嬪于虞。」《詩》曰：「聿嬪于京。」《周禮》有九嬪之官。明此非死生之異稱矣。其義猶今謂兄爲舅，妹爲媼，即是此例。父之考爲王父，父之妣爲王母。加王者，尊之。王父之考爲曾祖王父，王父之妣爲曾祖王母。曾，猶重也。曾祖王父之考爲高祖王父，曾祖王父之妣爲高祖王母。高者，言最在上。父之世父、叔父爲從祖祖父，父之世母、叔母爲從祖祖母。從祖而

①「質」，原作「寡」，據賀本改。

②「於」字，原脫，據元明本、賀本補。

③句下原有「一」字，據元明本、寬文本、賀本刪。

別世統異故。<sup>①</sup>父之舅弟，先生爲世父，後生爲叔父。舅，公渾反。○世有爲嫡者嗣世統故也。○疏

曰：繼世以嫡長，先生於父則繼世者也，故曰世父。《說文》「叔」作「𢇛」，許慎曰從上小，言尊行之小也。男子先

生爲兄，後生爲弟。男子謂女子先生爲姊，

後生爲妹，父之姊妹爲姑。此脫一句，在下文。

父之從父舅弟爲從祖父，父之從祖舅弟爲族

父，從祖父之子相謂爲從祖舅弟，今本皆脫此

句。族父之子相謂爲族舅弟，族舅弟之子相

謂爲親同姓。從，才用反，下同。○同姓之親無服屬。

○疏曰：記云「親者，屬也」，鄭注云：「有親者服，各以其屬

親疏。」此經言親同姓者，謂五世之外，比諸同姓猶親，但無

服屬爾。兄之子，弟之子，相謂爲從父舅弟。

從父而別。○此句合在「姑」之下，「從祖父」之上。子之

子爲孫，孫，猶後也。○疏曰：言繼後嗣也。《廣雅》

云：「孫，順也。」許慎云：「從子，從系，續也。」言順續先

祖之後也。孫之子爲曾孫。曾，猶重也。曾孫之

子爲玄孫，玄者，言親屬微昧也。玄孫之子爲來孫，言有往來之親。來孫之子爲舅孫，舅，後也。

《汲冢竹書》曰：「不窋之舅孫。」○疏曰：《釋言》文。《東哲傳》曰：太康元年，汲郡民盜發魏安釐王冢，得竹書，漆字

科斗之文。不窋，后稷之子也。舅孫之子爲仍孫，

仍，亦重也。仍孫之子爲雲孫。言輕遠如浮雲。王

父之姊妹爲王姑，曾祖王父之姊妹爲曾祖王

姑，高祖王父之姊妹爲高祖王姑。父之從父

姊妹爲從祖姑，父之從祖姊妹爲族祖姑。父

之從父舅弟之母爲從祖王母，父之從祖舅弟

之母爲族祖王母。父之兄妻爲世母，父之弟

妻爲叔母。父之從父舅弟之妻爲從祖母，父

之從祖舅弟之妻爲族祖母。父之從祖祖父

爲族曾王父，父之從祖祖母爲族曾王母。父

之妾爲庶母。祖，王父也。舅，兄也。今江東

①「統一」，原作「統」，據元明本、寬文本、賀本改。

人通言舅。○《爾雅》。

### 右宗族。

母之考爲外王父，母之妣爲外王母。母之王考爲外曾王父，母之王妣爲外曾王母。異姓，故言外。母之舅弟爲舅，母之從父舅弟爲從舅，母之姊妹爲從母。從母之男子爲從母舅弟，其女子子爲從母姊妹。《爾雅》。

### 右母黨。

妻之父爲外舅，妻之母爲外姑。謂我舅者，吾謂之甥，然則亦宜呼壻爲甥，《孟子》曰「帝館甥於貳室」是。姑之子爲甥，舅之子爲甥，妻之舅弟爲甥，姊妹之夫爲甥。四人體敵，故更相爲甥。甥，猶生也。今人相呼蓋依此。妻之姊妹同出爲姨。

同出，謂俱已嫁，《詩》曰：「邢侯之姨。」女子謂姊妹之夫爲私。《詩·衛風·碩人》篇曰：「譚公維私。」○疏曰：孫炎云：「私，無正親之言。」男子謂姊妹之子爲出。《春秋公羊傳》曰：「蓋舅出。」女子謂舅弟之子

爲姪。《春秋左氏傳》曰：「姪其從姑。」謂出之子爲離孫，謂姪之子爲歸孫，女子子之子爲外孫。女子同出，謂先生爲姪，後生爲娣。同出，謂俱嫁事一夫。《公羊傳》曰：「諸侯娶一國，二國往媵之，以姪娣從。娣者何？弟也。」此即其義也。○娣義已詳見《昏禮》。女子謂兄之妻爲嫂，弟之妻爲婦。猶今言新婦也。○疏曰：嫂，猶叟也，老人之稱。長婦謂稚婦爲娣婦，娣婦謂長婦爲姪婦。今相呼先後或云妯娌。○疏曰：《廣雅》云：「娣姪，妯娌。娣姪，先後也。」世人多疑娣姪之名皆以爲兄妻呼弟妻爲娣，弟妻呼兄妻爲姪。《喪服》：「娣姪婦報」，《傳》曰：「娣姪婦者，弟長也。」以弟長解娣姪，言娣是弟，姪是長也。《公羊傳》亦云：「娣者何？弟也。」是其以弟解娣，自然以長解姪。長謂身之年長，非夫之年長也。此篇乃謂婦之長稚，不言夫之大小。《左傳》穆姜謂聲伯之母爲姪，叔向之嫂謂叔向之妻爲姪，二者皆呼夫弟之妻爲姪，豈計夫之長幼乎？故賈逵、鄭玄及杜預皆云：「兄弟之妻相謂，謂長者爲姪。」知娣姪之名不計夫之長幼也。○今按：此篇所指，皆姪娣相對之定名。同事一夫，則以生之先後爲長少。各事一夫，則以夫

之長幼爲先後，所謂從夫之爵，坐以夫齒者是也。單舉則可通謂之姒，蓋相推讓之意耳。疏說恐非是。○《爾雅》。

右妻黨。

婦稱夫之父曰舅，稱夫之母曰姑。姑舅在，則曰君舅、君姑；沒則曰先舅、先姑。《國語·魯語》曰「吾聞之先姑」。謂夫之庶母爲少姑，夫之兄爲兄公，今俗呼兄鐘，語之誤耳。夫之弟爲叔，夫之姊爲女公，夫之女弟爲女妹。今謂之女妹是也。子之妻爲婦，長婦爲嫡婦，衆婦爲庶婦。女子子之夫爲壻，壻之父爲姻，婦之父爲婚。父之黨爲宗族，母與妻之黨爲兄弟。母妻之黨爲兄弟，疏已詳見《昏義》。婦之父母，壻之父母相謂爲婚姻，兩壻相謂爲亞。《詩》曰：「瑱瑱姻亞。」今江東人呼同門爲僚壻。婦之黨爲婚兄弟，壻之黨爲姻兄弟。占者皆謂婚姻爲兄弟。嬪，婦也。《書》曰：「嬪于虞。」謂我舅者，吾謂之甥也。《爾雅》。

右婚姻。○傳：《白虎通義》曰：三

綱者何謂也？謂君臣、父子、夫婦也。六紀者何謂也？謂諸父、兄弟、族人、諸舅、師長、朋友也。故君爲臣綱，父爲子綱，夫爲妻綱。又曰：敬諸父兄，六紀道行，諸舅有義，族人有序，昆弟有親，師長有尊，朋友有舊。何謂綱紀？綱者，張也；紀者，理也。大者爲綱，小者爲紀，所以張理上下，整齊人道也。人皆懷五常之性，有親愛之心，是以綱紀爲化，若羅網之有紀綱而萬目張也。君臣、父子、夫婦，六人也，所以稱三綱何？一陰一陽謂之道，陽得陰而成，陰得陽而序，剛柔相配，故六人爲三綱。六紀者，爲三綱之紀者也。師長，君臣之紀也，以其皆成己也。諸父兄弟，父子之紀也，以其有親恩連也。諸舅

朋友，夫婦之紀也，以其皆有同志爲紀助也。○謂之舅姑何？舅者，舊也；姑者，故也。舊、故之者，老人之稱也。謂之姊妹何？姊者，咨也；<sup>①</sup>妹者，末也。謂之兄弟何？兄者，況也，況父法也；弟者，悌也，心順行篤也。稱夫之父母謂之舅姑何？尊如父而非父者，舅也；親如母而非母者，姑也；故稱夫之父母爲舅姑也。

儀禮經傳通解卷第五終

①「咨」，原作「恣」，據賀本改。

## 儀禮經傳通解卷第六

### 士相見禮第九

#### 鄉禮一之上

#### 經三

士相見之禮。○贊，冬用雉，夏用脤，左頭奉之，曰：「某也願見，無由達，某子以命命某見。」贊，本又作「摯」，音同。脤，其居反。奉，芳勇反，下同。見，賢徧反。凡卑於尊曰見，敵而曰見，謙敬之辭也，下以意求之，他皆倣此。○贊，所執以至者，君子見於所尊敬，必執贊以將其厚意也。士贊用雉者，取其耿介，交有時，別有倫也。雉必用死者，為其不可生服也。夏用脤，備腐臭也。左頭，頭，陽也。無由達，言久無因緣以自達也。某子，今所因緣之姓名也。以命者，稱述主人之意。今文「頭」為「脤」。○耿，古幸反。介，音界。別，彼列反。為，于偽反。脤，音豆。○疏曰：倫，類也。交接有時，至

於別後則雌雄不雜，謂春交秋別也。士之義亦然。又云「雉必用死」者，《尚書》云「死」，鄭云：「上執雉也，義取耿介，為君致死也。脤，乾雉也，《周禮·庖人》云「夏行脤」是也。左頭，以從陽也，《曲禮》云「執禽者左首」是也。云「無由達」者，謂久無紹介中間之人達彼此之意，雖願見，無由得與主人通達相見也。某子，是紹介中間之人姓名。命某，是賓之名命某來見主人也。按《少儀》，始見君子者，辭曰「某固願聞名於將命者」，謂以卑見尊。云某固願見於將命者，謂「敵」者。此兩上相見，亦是敵者之辭也。○又曰：凡執贊之禮，唯有新升為臣，及聘朝，及他國君來，主國之臣見，皆執贊相見。常朝及餘會聚皆執笏，無執贊之禮。又執贊者，或平敵，或以卑見尊，皆用贊。尊無執贊見卑之法。《檀弓》云哀公執贊見己臣周豐者，彼謂下賢，非正法也。○今按：古者笏以記事指畫而搢之腰間，故漢、魏以前不見有言執笏者，至晉始言執手版。今疏云朝會執笏，未知何所考也。主人對曰：「某子命某見，吾子有辱，請吾子之就家也，某將走見。」有，又也。某子命某往見，今吾子又自辱來，序其意也。走，猶往也。今文無「走」。○疏曰：走，取急往之意，非走驟也。

賓對曰：「某不足以辱命，請終賜見。」命，謂請吾子之就家。主人對曰：「某不敢爲儀，固請吾子之就家也，某將走見。」不敢爲儀，言不敢外貌爲威儀，忠誠欲往也。固，如故也。今文「不爲非」。古文云，固以請也。○疏曰：固爲堅固，堅固則如故。賓對曰：「某不敢爲儀，固以請。」言如固請終賜見也。今文「不爲非」。主人對曰：「某也固辭，不得命，將走見。聞吾子稱贊，敢辭贊。」不得命者，不得見許之命也。走，猶出也。稱，舉也。辭其贊，爲其大崇也。古文曰「某將走見」。○大，音泰，下同。○疏曰：凡賓主相見，唯此新升爲士有摯，又本不相識，故有摯爲重。對重相見則無摯爲輕，是以辭之也。賓對曰：「某不以贊不敢見。」見於所尊敬而無贊，嫌太簡。○疏曰：此上相見雖是平敵，然不問爵之大小，唯以相尊敬爲先後，故雖兩士，亦須以摯相見。若無摯相見，是則太簡略也。主人對曰：「某不足以習禮，敢固辭。」言不足習禮者，不敢當其崇禮來見已。賓對曰：「某也不依於贊不敢見，固以請。」言依於贊，謙

自卑也。今文無「也」。主人對曰：「某也固辭，不得命，敢不敬從。」出迎于門外，再拜，賓答再拜。主人揖，入門右，賓奉贊入門左。主人再拜受，賓再拜送贊，出。右，就右也。左，就左也。受贊於庭，既拜受，送則出矣，不受贊於堂，下人君也。今文無「也」。○下，退嫁反。○疏曰：凡門，出則以西爲右，以東爲左；入則以東爲右，以西爲左；依賓西主東之位也。以不言升，故知在庭也。主人請見，賓反見，退。主人送于門外，再拜。請見者，爲賓崇禮來，相接以矜莊，歡心未交也。賓反見，則燕矣。下云「凡燕見於君」至「凡侍坐於君子」，博記反見之燕義。臣初見於君，再拜，奠贊而出。○疏曰：云「賓反見則燕矣」者，《上冠》禮賓，《上昏》納采之等，皆有禮賓、饗賓之事，明此行禮，主人留必不虛，宜有歡燕，故云則燕矣。諸文留賓多是禮賓之事，此不行禮賓而云燕者，以其事重，故爲禮賓，此直當身相見，其事輕，故直有燕矣。凡燕見於君者，或反見，或本來侍坐，非反見，下注云「此謂特見圖事」，❶非立賓主之

❶「謂」，原作「請」，據元明本、寬文本、賀本改。



燕」是也。侍坐於君子，是侍坐法，非燕見之禮也。鄭欲見自「燕見於君」以下皆反見燕法，其中仍有臣見于君，莫摯而出，君亦當遣人留之燕也。若然，下有他邦之人則還摯，雖不見反燕，臣尚燕，他邦有燕可知，但文不具也。○今按：注云廣說反燕義者凡四章，本皆在此篇後。一，燕見於君，今入《臣禮》篇。二，凡言「」，凡視，今在本處。侍坐於君子，今入《少儀》篇。

右請見。○記：凡執幣者不趨，容彌

蹙以爲儀。不趨，主慎也，以進而益恭爲威儀耳。

今文無「容」。○疏曰：按《小行人》合六幣，玉、馬、皮、

圭、璧、帛，皆稱幣。下文別云執玉，則此幣謂皮馬享幣

及禽贄皆是。凡趨有二種：有疾趨，行而張足曰趨「是

也；有徐趨，則下文「舒武舉前曳踵」是也。此云「不

趨」者，不爲疾趨，又不爲徐趨，但徐疾之間爲之，故「以

進而益恭爲威儀」也。執玉者，則唯舒武，舉前

曳踵。踵，諸勇反。○唯舒者，重玉器，尤慎也。武，

迹也。舉前曳踵，備躡也。今文無「者」。古文「曳」

作「拙」。○躡，音致。躡，其業反。拙，以制反。○疏

曰：「唯舒」者，按《玉藻》云執龜玉不趨，爲重玉器，尤慎

也。此篇直見以禽贄相見之禮，無執玉朝聘之事，而云「執玉」者，因執贄兼見之也。○今按：注疏以「舒」字絕句，陸佃曰：容彌蹙同，唯武則舒，然則讀「武」字絕句矣。其說近是。此以上本記，以下補記。○開始見

君子者，辭曰：「某固願聞名於將命者。」

見，賢偏反，下文注除注「相見」並同。聞，如字，徐音

問，注皆同。○君子，卿、大夫若有異德者。固，如故

也。將，猶奉也。即君子之門而云願以名聞於奉命者，

謙遠之也。①重則云固。奉命傳辭出入。○謙，音謙，

本又作謙。遠，于萬反。重，直用反。傳，丈專反。○

疏曰：將命，謂傳辭出入，通客主之言語者也。若初辭，

則不云固。不得階主。階，上進者，言賓之辭不得

指斥主人。○疏曰：階是等級，升階必上進，故以階爲

上進。敵者曰：「某固願見。」敵，當也。願見，

願見於將命者，謙也。○疏曰：雖云願見，亦應云願見

於將命者，因上已有，故此略之。「固」字義如前。罕

見曰「聞名」，罕，希也。希相見，雖於敵者，猶爲尊

①「謙」，原作「謙」，據元明本、寬文本、賀本改。

主之辭，如於君子。○疏曰：始來禮隆，故尊卑宜異；重來禮殺，故宜同也。蓋尊而希相見，宜同於始來；敵而希相見，其辭重於始來也。亟見曰「朝夕」，亟，去冀反。○亟，數也。於君子則曰：「某願朝夕聞名於將命者。」於敵者則曰：「某願朝夕見於將命者。」誓曰「聞名」。誓，無目也。以無目，辭不稱見。○《少儀》。○凡與客人者，每門讓於客。下賓也。敵者迎於大門外，《聘禮》曰：君，迎賓於大門內。○下，退嫁反。○疏曰：「凡」者，通貴賤之辭。謂天子五門，諸侯三門，大夫二門，每門讓於客，自謙下敬於賓也。客至於寢門，則主人請入為席。為，猶敷也，雖君亦然。○疏曰：寢門，最內門也。主人饗已應正席，今客至門，方請先人數席者，一則自謙，不敢逆設席以招賢，一則重慎，宜更視之。然後出迎客，客固辭，又讓先人。○疏曰：鋪席竟，然後出迎客。禮有三辭：一曰禮辭，再曰固辭，三曰終辭。固辭者，客再辭不先人也。主人肅客而入。肅，進也。進客，謂道之。○道，音導。○疏曰：客以再辭，故主人進導

客也，《公食大夫禮》曰：「公揖入，賓從」是也。主人入門而右，客人入門而左。右就其右，左就其左。主人就東階，客就西階。客若降等，則就主人之階。降，下也。謂大夫於君，士於大夫也，不敢輒由其階，卑統於尊，不敢自尊。○疏曰：降等則不敢亢禮，故就主人階，是繼屬於主人。按《聘禮》云：公迎賓，賓不就主人階。以己奉君命，不可苟下主人也。若見主國大夫，則入門右。鄭注云：「見，私事，雖敵猶謙，為若降等然也。」主人固辭，然後客復就西階。復，音服。復其正。主人與客讓登，主人先登，客從之，拾級聚足，拾，依注音涉。級，音急。○拾，當為「涉」，聲之誤也。級，等也。涉等聚足，謂前足躡一等，後足從之併。○躡，女攝反。併，步頂反。○疏曰：賓主至階各讓，不先登也。讓必以三，三竟而客不從，故主人先登。客從之者，言主人先升至第一級，客乃升，中較一級，故云從之。《公食禮》云：公升二等，賓升一是也。連步以上。上，時掌反，下皆同。○重蹉跌也。連步，謂足相隨不相過也。○蹉，本亦作

「差」，同「七河反」。跌，大結反。過，古卧反。○疏曰：「拾級聚足連步以上」，此上階法也。謂每階先舉一足，而後足併之，不得後過前也。上，上堂也。在級未入堂，後足不相過，故云連步而上堂也。上於東階，則先右足。上於西階，則先左足。近於相鄉敬。○鄉，許亮反。○席南鄉北鄉，以西方爲上；東鄉西鄉，以南方爲上。鄉，許亮反。○布席無常，此其順之也。上，謂席端也。坐在陽則上左，坐在陰則上右。○疏曰：東西設席，南鄉北鄉，則以西方爲上頭也。南北設席，東鄉西鄉，則以南方爲上頭也。蓋坐在陽則貴左，坐在陰則貴右。南坐是陽，其左在西。北坐是陰，其右亦在西。東坐是陽，其左在南。西坐是陰，其右亦在南也。然此乃據平常布席如此，若禮席則或不然也。若非飲食之客，則布席，席間函丈。函，胡南反。丈，如字，丈尺之丈。○謂講問之客也。函，猶容也。講問宜相對，容丈足以指畫也。飲食之客布席於牖前。丈，或爲「杖」。○畫，胡麥反。牖，羊九反。○疏曰：函，容也。既來講說，則所布兩席中間相去使容一丈之地，足以指畫也。《記》云：侍

坐於大司成，遠近間三席。席之制三尺三寸三分寸之一，則三席是一丈，故鄭云「容丈」也。「丈或爲杖」者，王肅以爲古人講說用杖指畫，故使容杖也。主人跪正席，雖來講問，猶以客禮待之，異於弟子。客跪撫席而辭。撫之者，答主人之親正席。○疏曰：撫，謂以手按止之也。辭，不聽主人之正席也。客徹重席，主人固辭。重，直龍反。○徹，去也。去重席，謙也。再辭曰固。○疏曰：《禮器》云：「諸侯三重，大夫再重。」又《鄉飲酒》之禮：「公三重，大夫再重。」是尊者多，卑者少，故主人爲客設多重席，客謙而自徹也。尊卑有數，而客必徹之者，既言講說，本以德義相接，不以尊卑爲用也。客踐席乃坐。客安，主人乃敢安也，講問宜坐。○疏曰：客起徹重席，主人止之，故客還履席將坐，主人乃坐也。主人不問，客不先舉。客自外來，宜問其安否無恙及所爲來故。○《曲禮》。○凡進食之禮，左殽右載，食居人之左，羹居人之右。殽，戶交反。載，側吏反。食，音嗣。○皆便食也。殽，骨體也。載，切肉也。食，飯屬也。居

人左右，明其近也。殽在俎，載在豆。○便，婢而反。近，如字。○疏曰：熟肉帶骨而饔曰殽，純肉切之曰載。骨是陽，故在左，肉是陰，故在右。食飯燥爲陽，故居左，羹濕是陰，故居右。膾炙處外，醢醬處內。膾，古外反。炙，章夜反。醢，呼兮反，本又作「醢」，音海。○殽載之外內也。近醢醬者食之主，膾炙皆在豆。○疏曰：此饔之設，羹食最近人，羹食之外乃有殽載。今云外、內，明不得在羹食之內，故知在殽載之外內也。醢，徐音作海，<sup>①</sup>則醢之與醬兩物各別。依《昏禮》及《公食禮》，醬在右，醢在左，此醢醬處內，亦當醬在右，醢在左也。按《公食禮》有醢醬，鄭注云：「以醢和醬也。」又《周禮·醢人》共齊菹醢物。皆以醢醬共爲一物也。二義皆通，未知孰是。蔥渫處末，渫，以利反。○渫，悉蔥也，處醢醬之左。言末者，殊加也，渫在豆。○烝，之承反。○疏曰：地道尊右，言「處末」，則在醢醬之左矣。正饔唯有菹醢，無蔥渫，故知蔥渫爲殊加也。以其菹類，故知在豆也。酒漿處右。漿，子羊反，字亦作「將」。○處羹之右，此言若酒若漿耳。兩有之，則左酒右漿。此大夫、士與賓客燕食之禮，其禮食則宜放《公

食大夫禮》云。○燕，於徧反，本亦作「宴」。放，方兩反。食，音嗣。○疏曰：卑客則或酒或漿，若尊客則有酒有漿。按《公食禮》云：設酒於豆東，設漿飲於稻西。鄭注云：「酒在東，漿在西也。」以脯脩置者，左胸右末。胸，其俱反。○亦便食也。屈中曰胸。○疏曰：脩亦脯也。鄭注《腊人》云：「薄析曰脯，捶而施薑桂曰鍛脩。」胸，屈脯胸胸然也。左胸，胸置左也。右末，末，邊際，置右，右手取祭擘之便也。○同上。○羞濡魚者進尾，濡，音儒。○辨之由後，鯁肉易離也。乾魚進首，辨之由前，理易析也。○辨，補麥反，下同。鯁，格猛反。易，以豉反，下同。析，星歷反。○疏曰：濡，溼也。鯁，脇也。冬右腴，腴，以朱反。○陽氣在下。腴，腹下也。夏右鰭，鰭，音祁。○陽氣在上。鰭，脊也。○脊，子昔反。○疏曰：此進尾進首，右腴右鰭之屬，皆謂尋常燕食也。若祭祀饗食正禮，則《少牢》、《公食》魚在俎，皆縮載，俎既橫設，魚則隨俎而

①「音」字，原脫，據寬文本、賀本補。

從，於人爲橫，無進首進尾之理。祭臠。臠，舊火吳

反，依注音尋，況甫反，徐況紆反。○臠，大臠，謂剝魚

腹，讀如尋。○臠，力轉反。剝，口胡反。○疏曰：食魚

則取此肥美處以祭先也。凡齊，執之以右，居之

於左。齊，才細反，下同。○齊，謂食羹醬飲有齊和者

也。居於左手之上，右手執而正之，由便也。○食，音

嗣。和，戶卧反。○《少儀》。○客若降等，執食

興辭，食，音嗣。○辭者，辭主人之臨己食，若欲食於

堂下然。○疏曰：降等，謂若大夫爲卿之客也。食，飯

也。興，起也。客既卑，故未食必執飯以辭謝，飯爲食

主故也。若欲往堂下食者，《公食禮》云：賓，左擁簠，梁

右執涚以降。鄭云：辭主人臨己食，若欲食於堂下然

是也。此降等謂大夫於卿，故欲降而不降也。若敵者，

則《公食禮》云：大夫相食，賓執梁與涚之西序端。無

降法也。主人興，辭於客，然後客坐。復坐。

○復，扶又反。○疏曰：主人起辭止之，則客從辭而止。

主人延客祭，延，道也。祭，祭先也，君子有事不忘

本也。客不降等則先祭。○道，音導。○疏曰：祭者，

謂種種出少許置在豆間之地，以報先代造食之人也。

延客祭，謂主人先祭，客乃從之祭也。若敵，客則得自

祭，不須主人之延道矣。祭食，祭所先進。主人

所先進先祭之，所後進後祭之，如其次。殽之序，徧

祭之。徧，音遍，下注同。○謂載炙、膾也，以其本出

於牲體也。《公食禮》：魚、腊、涚，醬不祭也。○腊，音

昔。涚，音泣。○疏曰：序，次序也。謂炙載之屬同出

於牲，疑若不必徧匝而祭，故特明之。○《曲禮》。○

凡羞有俎者，則於俎內祭。疏曰：若羞在豆，

則祭於豆間，俎於人則橫在前，不得祭於俎外及兩俎間

也。○《少儀》。○唯水漿不祭，若祭，爲已僣

卑。僣，虛涉反，厭也。○水漿非盛饌也。已，猶大

也。祭之爲大有所畏迫，臣於君則祭之。○大，音泰。

○疏曰：按《公食禮》：宰夫執解漿以進，賓受坐祭，遂

飲。故知於君祭之也。○《玉藻》。○三飯，主人

延客食載，然後辯殽。飯，符晚反。依字書，

「食」旁作「卜」，扶萬反；「食」旁作「反」，符晚反：二字

不同。今則混之，故隨俗而音此字。辯，音遍。○先食

載，後食殽，殽尊也。凡食殽，辯於肩，食肩則飽也。○疏曰：三飯，謂二殮而告飽，須勸乃更食，故三飯竟，主人乃道客食載也。三殮後乃食載者，按《公食禮》亦以載爲加，故客三殮前未食之也。辯，遍也，謂先食載乃徧殽。《特牲》、《少牢》云初食殽，次食脊，次食骼，後食肩，是辯於肩也。主人未辯，客不虛口。俟主人也。虛口，謂醕也。客自敵以上，其醕不待主人飽，主人不先飽也。○醕，音胤，又士覲反。○疏曰：醕，謂食竟蕩口也，以酒曰醕，以水曰漱。主人常讓客，故客待主人辯乃得醕也。侍食於長者，主人親饋，則拜而食。饋，其類反。○勸長者食耳，雖賤不得執食興辭，拜而已，示敬也。○疏曰：此明侍從尊長爲客禮也。饋，謂進饌也。己雖侍尊長，而主人若自親饋與己，己則拜謝之而後食也。主人不親饋，則不拜而食。以其禮於己不隆。共食不飽，謙也。謂共羹飯之大器也。共飯不澤手。飯，符晚反。○澤，謂揜莎也。禮，飯以手。○疏曰：臨食揜莎，恐爲人穢。○揜，乃禾反。莎，息禾反。毋搏飯，搏，徒端反。飯，扶萬反，後不音者同。○爲欲致飽，不謙。○爲，于

僞反。○疏曰：共器，若取飯作搏，是欲爭飽，非謙也。毋放飯，今按：放飯，大飯也。毋流歎，歎，妹悅反。○今按：流歎，長歎也。毋咤食，咤，陟嫁反。○嫌薄之。○疏曰：咤，謂以舌口中作聲，若嫌主人之食。毋齧骨，齧，五結反。○爲有聲響，不敬。毋反魚肉，爲已歷口，人所穢。○疏曰：同器而食，不可反還器中，《少牢禮》尸所食餘肉，皆別致於肝俎。毋投與狗骨，爲其賤飲食之物。毋固獲，今按：所有不獲，不可固也。毋揚飯，飯黍毋以箸，毋嚙羹，飯黍之飯，扶晚反。箸，直慮反。嚙，它答反。○嫌欲疾也。○疏曰：揚，去熱氣也。飯黍當用匕。嚙，謂不嚼菜。○嚼，疾略反。毋絮羹，絮，敕慮反。○爲其詳於味也。絮，猶調也。○疏曰：絮，謂就食器中加以鹽梅。毋刺齒，刺，匕亦反。○爲其弄口，不敬。毋歠醢。醢，音海。○亦嫌詳於味也。○疏曰：醢，肉醬也。醬宜鹹歠者，爲其淡故。客絮羹，主人辭不能亨。客歠醢，主人辭以宴。亨，

普彭反。寔，其禹反。○主人優賓之辭。亨，煮也。寔，貧也。濡肉齒決，疏曰：濡，濕也。決，猶斷也。

○斷，音短。乾肉不齒決。堅，宜用手。毋嘬

炙。嘬，初怪反。炙，章夜反。○爲其食也。一舉盡

嚙曰嘬。○嚙，力轉反。羹之有菜者用挾，其無

菜者不用挾。挾，古協反。○挾，猶箸也，今人或謂

箸爲挾提。○疏曰：有菜者，爲鉶羹是也。以其有菜交

橫，非挾不可。無菜者，謂大羹滂也，直歃之而已。其

有肉調者，犬羹、兔羹之屬，或當用匕也。卒食，客

自前跪，徹飯齊以授相者，卒，子恤反。齊，將

兮反，本又作「齋」。相，息亮反。○謙也。自，從也。

齊，醬屬也。相者，主人贊饌者。《公食禮》：賓卒食，北

面取梁與醬以降也。○疏曰：食坐在前，南嚮，客食竟

加于俎，起從坐前，北面，當已坐而跪，自徹己所食飯與

齊，飯齊食主，故答主人初所親饋者也。此是卑者侍食

之客耳，若敵者則否。相者，謂佐助進食者。主人

興，辭於客，然後客坐。不聽親徹。○疏曰：

主人起，辭不聽自徹，則客亦止而坐也。《曲禮》。

○客祭，主人辭曰：「不足祭也。」祭者，盛主人之饌也。客飧，主人辭以「疏」。飧，音孫。

○飧者，美主人之食也。疏之言羸也。主人自置其

醬，則客自徹之。敬主人也。徹，莫于序端。

○《玉藻》。

主人復見之，以其贊，曰：「曷者吾子辱，使某見，請還贊於將命者。」復，扶又反，又音

服。曷，許亮反。還，音旋。○復見之者，禮尚往來也。以

其贊，謂曷時所執來者也。曷，曷也。將，猶傳也。傳命

者，謂擯相者。○曷，乃蕩反。傳，丈專反。①擯，必忍反。

相，息亮反。○疏曰：五等諸侯，身自出朝及遣臣出聘，圭

璋重，不可遙復，朝聘訖即還之，璧琮財輕，故不還。彼朝

聘用玉，自爲一禮，有不還之義。其在國之臣自執贊相見，

雖禽贊皆還之。臣見於君，則不還，義與朝聘異，不可相決

也。出接賓曰擯，人詔禮曰相，一也，故《聘禮》與《冠義》皆

云每一門止一相，是謂擯介爲相也。主人對曰：

①「丈」，原作「大」，據賀本改。

「某也既得見矣，敢辭。」讓其來答己也。○疏曰：上言主人者，據前爲主人而言。此云主人者，謂前賓今在其家而說也。賓對曰：「某也非敢求見，請還贊于將命者。」言不敢求見，嫌褻主人，不敢當也。今文無「也」。○褻，息列反。○疏曰：賓主頻見是褻，故不敢當相見之法，直云「還贊」而已。主人對曰：「某也既得見矣，敢固辭。」固，如故也。賓對曰：「某不敢以聞，固以請于將命者。」言不敢以聞，又益不敢當。○疏曰：上云「非敢求見」，此云「不敢以聞」，耳聞疏於目見，故云「又益不敢當」也。主人對曰：「某也固辭，不得命，敢不從。」許受之也。異日則出迎，同日則否。○疏曰：賓奉贊入，<sup>①</sup>不言主人出迎，又不言厥明，是與前相見同日。知異日出迎者，《鄉飲酒禮》云：「明日乃息司正」，主人出迎之。司正猶迎之，況同僚乎？是知異日出迎也。若然，《聘禮》公迎于大門內，至禮賓又出迎者，彼是公迎彼君之命，至禮賓乃爲賓身，故雖同日亦出迎之，鄭注云「已之禮更端」是也。《昏禮》賓爲使時及禮賓時，《有司徹》前爲尸時，後爲賓時，雖同日亦出迎，此亦更

端之義也。賓奉贊入，主人再拜受。賓再拜送贊，出。主人送于門外，再拜。

### 右復見。

士見于大夫，終辭其贊，于其人也，一拜其辱也。賓退，送，再拜。終辭其贊，以將不親答也。凡不答而受其贊，唯君於臣耳。大夫於士不出迎。人一拜，正禮也。送再拜，尊賓。○疏曰：事未至謂之將，如士相見後將親答，則辭而受其贊。此將不親答，故終不受也。

### 右士見大夫。

若嘗爲臣者，<sup>②</sup>則禮辭其贊，曰：「某也辭，不得命，不敢固辭。」禮辭，一辭其贊而許也。將不答而聽其以贊入，有臣道也。賓入，奠贊再拜，主人答壹拜。奠贊，尊卑異，不親授也。古文「壹」爲「一」。賓出，使摯者還其贊于門外，曰：「某

① 「贊」，原作「摯」，據賀本改。

② 「嘗」，原作「常」，據元明本、寬文本、賀本改。



也使某還贊。」還其贊者，辟正君也。○辟，音避。賓對曰：「某也既得見矣，敢辭。」辭君還其贊也。今文無「也」。賓者對曰：「某也命某，某非敢爲儀也，敢以請。」還贊者請使受之。○今按：某也，蓋主人之名。賓對曰：「某也夫子之賤私，不足以踐禮，敢固辭。」家臣稱私。踐，行也。言某臣也，不足以行賓客禮。賓客所不答者，不受贊。賓者對曰：「某也使某，不敢爲儀也，固以請。」言使某，尊君也。或言命某，傳言耳。賓對曰：「某固辭。不得命，敢不從。」再拜受。受其贊而去之。○疏曰：以其嘗爲臣爲輕，既不受其贊，又相見無饗燕之禮，故鄭云「去之」以絕之也。

### 右嘗爲臣。

下大夫相見，以鴈，飾之以布，維之以索，如執雉。索，悉各反，注同。○鴈，取知時，飛翔有行列也。飾之以布，謂裁縫衣其身也。維，謂繫聯其足。○行，戶郎反。衣，於既反。聯，音連。○疏曰：言「下大

夫者，國皆有之。卿五大夫。言上大夫，據三卿，則此下是五大夫也。二十七士與五大夫轉相副貳，則三卿宜有六大夫。而五者，何休云：司馬事省，闕一大夫。上大夫相見，以羔，飾之以布，四維之，結于面，左頭，如麇執之。麇，莫兮反。○上大夫，卿也。羔，取其從帥，群而不黨也。面，前也。繫聯四足，交出背上，於胸前結之也。如麇執之者，秋獻麇有成禮，如之。或曰：麇，孤之贊也。其禮蓋謂左執前足，右執後足。今文「頭」爲「脰」。○疏曰：「卿也」者，即三卿也。《庖人》云：「秋行犢麇」，則獻當在秋時也。如士相見之禮。大夫雖贊異，其儀猶如士。

右大夫相見。本文此下有「始見於君」、「庶

人見於君」、<sup>①</sup>若他邦之人」及「燕見於君」四條，今並入

《臣禮》篇。

凡言，非對也，妥而後傳言。妥，他果反。

○凡言，謂己爲君言事也。妥，安坐也。傳言，猶出言也。

①「庶人」，原作「廣」，據賀本改。

若君問，可對則對，不待安坐也。古文「妥」爲「緩」。○爲，于僞反。與君言，言使臣。與大人言，言事君。與老者言，言使弟子。與幼者言，言孝弟于父兄。與衆言，言忠信慈祥。與居官者言，言忠信。孝弟之弟，音悌。○博陳燕見言語之儀也。言使臣者，使臣之禮也。大人，卿大夫也。言事君者，臣事君以忠也。祥，善也。居官，謂士以下。

右言。○記：士於君所言大夫，沒

矣，則稱謚若字，名士。與大夫言，名士，字大夫。君所，大夫存亦名。於大夫所，有公諱，無私諱。公諱，若言語所辟先君之名。○《玉藻》。

凡與大人言，始視面，中視抱，卒視面，毋改。衆皆若是。中，如字。抱，薄報反。毋，音無，下同。○始視面，謂觀其顏色可傳言未也。中視抱，容其思之，且爲敬也。卒視面，察其納己言否也。毋改，謂傳言見答應之間，當正容體以待之，毋自變動，爲嫌解惰不虛心也。衆，謂諸卿大夫同在此者。皆若是，其視之儀無異也。

古文「毋」作「無」。今文「衆」爲「終」。○解，古賣反。情，他卧反。○疏曰：「毋」不從古文者，《說文》云：「毋，禁辭。」故不從「無」字也。「衆」不從今文者，蓋有上卒從終也。若父則遊目，毋上於面，毋下於帶。上，時掌反。○子於父，主孝不主敬，所視廣也，因觀安否何如也。今文「父」爲「甫」。古文「毋」爲「無」。若不言，立則視足，坐則視膝。不言，則伺其行起而已。

右視。

凡侍坐於君子，君子欠伸，問日之早晏，以食具告，改居，則請退可也。坐，才卧反，又如字。欠，起劒反。伸，音申。○君子，謂卿大夫及國中賢者也。志倦則欠，體倦則伸。問日晏，近於久也。具，猶辯也。改居，謂自變動也。古文「伸」作「信」，「早」作「蚤」。○辯，《釋文》作「辦」，皮覓反。蚤，音早。夜侍坐，問夜，膳葷，請退可也。葷，香云反。○問夜，問其時數也。膳葷，謂食之。葷，辛物，蔥薤之屬，食之以止卧。古文「葷」作「薰」。○薤，戶界反。○疏曰：「問其時數」者，謂若鐘鼓刻漏之數也。

右請退。本文此下有「君賜之食」一條，今人《臣禮》篇。

若先生、異爵者請見之，則辭。辭不得命，則曰：「某無以見，辭不得命，將走見。」先見之。先生，致仕者也。異爵，謂卿大夫也。辭，辭其自降而來。走，猶出也。先見之者，出先拜也。《曲禮》曰：主人敬賓，則先拜賓。○疏曰：先生，即《鄉飲酒》云「就先生而謀賓介」也。「異爵謂卿大夫也」者，此《士相見》本文是上，故以卿大夫為異爵也。

右長者請見。○記：大夫、士相見，雖貴賤不敵，主人敬客，則先拜客；客敬主人，則先拜主人。尊賢。○疏曰：此謂使臣行禮受勞已竟，次見彼國卿大夫，而德劣亦先拜有德之士也。謂異國則爾，同國則否。○今按：此未有以見同國、異國之辨，更詳之，下放此。凡非弔喪，非見國君，無不答拜者。禮尚往來。喪，賓不答拜，不自賓客也。國君見士，不答其拜，士賤。○疏曰：弔所以「賓不答拜」者，已本來為助執於喪事，非行賓主之

禮，故主人雖拜已，已不答也。故《士喪禮》有賓則拜之，賓不答拜是也。君不答士者，謂士見已君，君尊不答也。大夫見於國君，國君拜其辱。自外來而拜，拜見也。自內來而拜，拜辱也。○疏曰：君，謂見他國君也。故《聘禮》云公在門左拜，是拜其辱也。熊氏曰：同國大夫見已君，拜其辱者，以其初為大夫，敬之也。士見於大夫，大夫拜其辱。疏曰：謂平常相答拜，非加敬也。故《聘禮》賓問卿，卿迎再拜。《士相見禮》，士見大夫，於其人也，主人一拜，賓退，送，又再拜。同國始相見，主人拜其辱。疏曰：主人必先拜辱，不論有德也。君於士不答拜也，非其臣則答拜之。不臣人之臣。大夫於其臣，雖賤，必答拜之。辟正君。○疏曰：大夫為君宜辟正君，故不辨已臣貴賤，皆答拜也。○《曲禮》下。○士於大夫，不敢拜迎而拜送。禮不敵，始來拜，則士辟也。○疏曰：此謂大夫詣士，禮既不敵，故士不敢迎而先拜，大夫雖拜，士則辟之。「而拜送」者，按《儀禮·鄉射》、《鄉飲酒》、《公食》、《聘禮》，但是主人送賓

者，皆主人再拜，賓不答拜。鄭注云：「不答拜者，禮有終故也。」士於尊者先拜，進面，答之拜則走。士往見卿大夫，卿大夫出迎答拜，亦辟也。○疏曰：謂士往詣卿大夫，<sup>①</sup>即先於門外拜之，拜竟乃進，面親相見。若大夫出迎而答其門外之拜，則上走辟之也。○《玉藻》。○男女相答拜也。嫌遠別不相答拜以明之。○別，彼列反。○疏曰：男女宜別，或嫌其不相答，故明雖別，必宜答也。俗本云「男女不相答拜」。禮：男女拜，悉相答拜。則有「不」字爲非。○《曲禮》。

## 士相見義第十

### 鄉禮一之下

自天子至于庶人皆有摯。摯者，致也，所以致其志也。天子之摯鬯，諸侯玉，卿羔，大夫鴈，士雉。鬯也者，言德之遠聞也。玉也者，言一度不易也。羔也者，言柔而有禮也。鴈也者，言進退知時也。雉也者，言死其節也。故天子以遠德爲志，諸侯以一度爲

志，卿以有禮爲志，大夫以進退爲志，士以死節爲志。明乎志之義，而天下治矣。故執斯摯者，致志者也。君之摯以事神，臣之摯以養人。唯君受摯者，唯君受養也。非其君則辭摯，不敢當養也。古者非其君不仕，非其師不學，非其人不友，非其大夫不見。士相見之禮，必依於介紹，以言其不苟合者也；必依於摯，以言其道可親也。苟而合，唯小人無恥者能之。君子，可見也，不可屈也；可親也，不可狎也；可遠也，不可疎也。賓至門，主人三辭見，賓稱摯，主人三辭摯，所以致尊嚴也。大夫以禮相接，士以禮相諭，庶人以禮相同。然而爭奪興於末者，未之有也。人苟悅而相若者，未必爭；苟簡而相親者，未必怨。是故士相見禮者，人道之大也。

①「詣」，原作「諸」，據元明本、寬文本、賀本改。

所以使人重其身而毋邇於辱也，所以使人慎其交而毋邇於禍也。唯仕於君者召而往，未仕而見於君者冠而奠摯。在邦曰市井之臣，在野曰草莽之臣，君雖召不往也。是故雖有南面之貴，千乘之富，士之所以結者，禮義而已矣，利不足稱焉。刑罰行於國，所誅者好利之人，未有好利而其俗不亂者也。無介而相見，君以爲諂，故諸侯大國九介，次國七介，小國五介。劉敞補亡。○私相見有摯何？所以相尊敬，長和睦也。朋友之際，五常之道，有通財之義，賑窮救急之意，中心好之，欲飲食之，故財幣者所以副至意也。《白虎通義》。

## 投壺禮第十一

### 鄉禮二

投壺之禮。主人奉矢，司射奉中，使人

執壺。奉，音捧，芳勇反，下及注皆同。○矢，所以投者也。中，士則鹿中也。射人奉之者，投壺，射之類也。其奉之西階上，北面。○疏曰：所以皆在西階上者，欲就賓處也。「士鹿中」，《鄉射》記文。此篇乃大夫、士之禮，以經主人請賓，是平敵之辭也。其諸侯相燕，亦有投壺，故《左傳》云：晉侯與齊侯燕，投壺。然則，天子亦有之，但古禮亡，無以知也。其中之形，刻木爲之，狀如兕鹿而伏，背上立圓圈以盛算，司射奉中在西階上，北面。其執壺之人賤於司射，故在司射之西。以凡行禮統於主人，雖俱在西階而當尊東，故《燕禮》、《大射》宰夫代公爲主人，與賓俱升西階，而主人在東也。主人請曰：「某有枉矢哨壺，請以樂賓。」賓曰：「子有旨酒嘉肴，某既賜矣，又重以樂，敢辭。」哨，七笑反。樂，音洛。肴，戶交反。重，直用反。○燕飲酒，既脫屣升坐，主人乃請投壺也。否則或射，所謂燕射也。枉，哨，不正貌，爲謙辭。○脫，吐活反，本亦作「稅」。○疏曰：枉，曲也。哨，謂哨峻不正。既賜，言既受賜也。主人曰：「枉矢哨壺，不足辭也，敢固以請。」賓曰：「某既賜矣，又

重以樂，敢固辭。」固之言如故也。言如故辭者，重辭也。主人曰：「枉矢哨壺，不足辭也，敢固以請。」賓曰：「某固辭不得命，敢不敬從。」不得命，不以命見許。賓再拜受，主人般還曰：「辟。」般，步干反。還，音旋。○賓再拜受，拜受矢也。主人既辟，進授矢兩楹之間也。主人阼階上拜送，賓般還曰：「辟。」拜送，送矢也。辟，亦於其階上面也。○疏曰：《鄉飲酒》、《鄉射》拜受爵，送爵皆北面，此亦當北面也。

右請投。○記：司射、庭長及冠士立者皆屬賓黨，樂人及使者、童子皆屬主黨。長，丁丈反。冠，古亂反。○庭長，司正也。使者，主人所使薦羞者。樂人，國子能為樂者。此皆與於投壺。○與，音預。○司正，見二篇。<sup>①</sup>○疏曰：冠士，謂成人來觀禮者，尊之，故令屬賓黨。若童子賤，則屬主黨也。國子能為樂者，明非替人也。○降揖，其阼階及樂事皆與射同節。《大戴記》。○籌，室中五扶，堂上七扶，庭中九扶。<sup>②</sup>籌，直由反。扶，方

于反。○籌，矢也。鋪四指曰扶，一指按寸。《春秋傳》曰：「膚寸而合。」投壺者或於室，或於堂，或於庭，其禮襲，隨晏早之宜，無常處。○鋪，普烏反，又芳夫反。襲，息列反。處，昌慮反。○疏曰：矢有長短，隨地廣狹。室中狹矢，長五扶；堂上稍廣，矢長七扶；庭中廣，矢長九扶。四指曰扶，扶廣四寸，五扶者則二尺也，七扶者則二尺八寸也，九扶者則三尺六寸也。算長尺二寸。長，直亮反。○其節三扶可也。或曰：算長尺有握。握，素也。壺頸脩七寸，腹脩五寸，口徑二寸半，容斗五升。壺中實小豆焉，為其矢之躍而出也。壺去席二矢半。頸，古井反。為，于僞反。○脩，長也。腹容斗五升，<sup>③</sup>三分益，則為一斗，得闕困之象，積三百二十四寸也。以腹脩五寸約之所得，求其闕周二尺七寸有奇，是為腹徑九寸有餘也。實以小豆，取其滑且堅。○闕，音圓。困，

①

②

③

「二篇」，賀本作「鄉射大射」。

中，原作「下」，據賀本改。

「五」，原作「三」，據元明本、寬文本、賀本改。

去倫反。奇，紀宜反。滑，乎八反。○今詳：經文不言壺之圍徑，而但言其高之度、容之量，以爲相求互見之巧。且經言其所容止於斗有五升，而注乃以二斗釋之，則經之所言者圓壺之實數，而注之所言乃借以方體言之，而算法所謂虛加之數也。蓋壺爲圓形，斗五升爲奇數，皆繁曲而難計，故算家之術必先借方形虛加整數以定其法，然後四分去一以得圓形之實。此鄭氏所以舍斗五升之經文，而直以二斗爲說也。然其言知借而不知還，知加而不知減，乃于下文遂并方體之所虛加以爲實數，又皆必取全寸不計分釐，定爲圓壺腹徑九寸而圍二尺七寸，則爲失之。疏家雖知其失，而不知其所以失，顧乃依違其間，訖無定說，是以讀者不能無疑。①今以算法求之，凡此定二斗之量者，②計其積實當爲三百二十四寸，而以其高五寸者分之，則每高一寸爲廣六十四寸八分。此六十四寸者，自爲正方。又取其八分者割裂而加於正方之外，則四面各得二釐五毫之數，③乃復合。此六十四寸八分者，五爲一方壺，則其高五寸，其廣八寸五釐，而外方三尺二寸二分，中受二斗，如注之初說矣。然此方形者，算術所借以爲虛加之數爾。④若欲得圓壺之實數，則當就此方形規而圓之，去其四角

虛加之數四分之一，使六十四寸八分者但爲四十八寸六分，三百二十四寸者但爲二百四十三寸，則壺腹之高雖不減於五寸，其廣雖不減於八寸五釐，而其外圍則僅爲二尺四寸一分五釐，其中所受僅爲斗有五升，⑤如經之云，無不諧會矣。矢，以柘若棘，毋去其皮。柘，止夜反。毋，音無。去，起呂反。「皮」下《大戴》有「大七分」三字。○取其堅且重也。舊說云：矢大七分。或言去其皮節。

### 已拜，受矢，進即兩楹間。退反位，揖賓

就筵。主人既拜送矢，又自受矢。「進即兩楹間」者，言將有事於此也。退乃揖賓即席，欲與偕進，明爲偶也。賓席、主人席皆南鄉，間相去如射物。○鄉，許亮反。○疏曰：主人「受矢」者，主人之贊者持矢授主人，主人受之也。

①「讀」，原作「某」，據元明本、寬文本、賀本改。

②「定二斗之」，原作「言二十丈」，據元明本、寬文本、賀本改。

③「毫」，原作「豪」，據寬文本、賀本改。

④「借」，原作「行」，據元明本、寬文本、賀本改。

⑤「斗」，原作「十」，據元明本、寬文本、賀本改。

司射進度壺，閒以二矢半，反位。設中，東面，執八算興。度，徒洛反。一本無「以二矢半」四字。

○度壺，度其所設之處也。壺去坐二矢半，則堂上去賓席，主人席邪行各七尺也。反位，西階上位也。設中東面，既設中，亦實八算於中，橫委其餘於中西，執算而立，以請賓俟投。○處，昌慮反。坐，才卧反。邪，似嗟反。○疏曰：司射於執壺之人處受壺，乃東嚮來賓主筵前，進所量度，其壺置於賓、主筵南。「閒以二矢半」者，投壺有三處，室中、堂上及庭中也。日中則於室，日晚則於堂，太晚則於庭，是各隨光明故也。雖矢有長短，而度壺皆使去賓、主之席各二矢半也。室中去席五尺，堂上則去席七尺，庭中則去席九尺。「東面執八算興」者，既設中之後，於中西東面手執八算而興起，其中裏亦實八算。

右就筵。○記：算多少視其坐。坐，

如字，又才卧反。○算用當視坐投壺者之衆寡爲數也。

投壺者人四矢，亦人四算。

請賓曰：「順投爲人，比投不釋，勝飲不勝者。正爵既行，請爲勝者立馬，一馬從二

馬，三馬既立，請慶多馬。」請主人亦如之。

比，毗志反。勝，尸證反。飲，於鳩反。爲，于僞反。「請爲勝者立馬」之下，俗本有「一馬從二馬」五字者，誤。○請，猶告也。順投，矢本人也。比投，不拾也。勝飲不勝，言以能養不能也。正爵，所以正禮之爵也。或以罰，或以慶。馬，勝算也，謂之馬者，若云技藝如此，任爲將帥乘馬也。射，投壺皆所以習武，因爲樂。○拾，其劫反。技，其綺反。任，而林反。將，于匠反。帥，色類反。樂，音洛。○疏曰：此司射告賓黨爲投壺之法也。順，本也，言矢有本末，投矢於壺，以矢本人者，乃名爲人，則爲之釋算也。若矢以末入，則不名爲人，亦不爲之釋算也。「比投不釋」者，比，頻也，又賓主投壺法要更遞而投，若不待後人投之而已頻投，則其投雖入，亦不爲之釋算也。立馬，謂取算以爲馬表勝數也。「一馬從二馬」者，謂每一勝輒立一馬，禮以三馬爲成，若專三馬，則爲一成。但勝偶未必得三，若勝偶得二，劣偶得一，一既劣於二，故徹取劣偶之一以足勝偶之二爲三，故云「一馬從二馬」。然定本無此一句。「三馬既立，請慶多馬」者，若頻得三成，或取彼足爲三馬，是其勝已成，又酌酒慶賀於多馬之偶也。云「亦如之」者，謂司射請賓之黨



每事必應曰「諾」，既竟，則司射又悉以告賓者告諸主人，主人應諾，亦悉如賓也。

右請賓。○記：魯令弟子辭曰：「毋

幠，毋敖，毋偕立，毋踰言，偕立踰言有常

爵。」薛令弟子辭曰：「毋幠，毋敖，毋偕

立，毋踰言，若是者浮。」幠，好吾反，下同。敖，

五報反。舊，五羔反，注同。偕，音佩。浮，縛謀反。○

弟子，賓黨、主黨年穉者也。爲其立堂下相褻慢，司射

戒令之。記魯、薛者，禮衰乖異，不知孰是也。幠，敖，

慢也。偕立，不正鄉前也。踰言，遠談語也。常爵，常

所以罰人之爵也。浮，亦謂罰也。《晏子春秋》曰：「酌

者奉觴而進曰：『君令浮。』晏子時以罰梁丘據。浮，或

作「匏」，或作「符」。踰，或爲「遙」。○穉，直吏反。爲，

于僞反。鄉，許亮反。匏，薄交反。

命弦者曰：「請奏《貍首》，閒若一。」大

師曰：「諾。」貍，吏持反。閒，閒廁之間。大，音泰。○

弦，鼓瑟者也。《貍首》，《詩》篇名也，今逸，《射義》所云

「《詩》曰『曾孫侯氏』」是也。「閒若一」者，投壺當以爲志取

節焉。○疏曰：「閒若一」者，謂前後樂節中間疏數如似也。諾，承領之辭也。

右作樂。○記：鼓：○□○○○□

○□○○○□。半，○□○○○□○○○□○○

○□○○○□。魯鼓：○□○○○□○○○□○○

○□○○○□○○○□○○。半，○□○○○□○○

○□○○○□。薛鼓。此魯、薛擊鼓之節也。闕者，擊鼗

方者，擊鼓。占者舉事，鼓各有節，聞其節則知其事矣。

○闕，音圓，鼗也。鼗，薄迷反，其聲下，其音榻榻然。

榻，音吐臘反。口，鼓也，其聲高，其音鏜鏜然。鏜，音

吐郎反。○疏曰：每一闕點則一擊鼗，每一方點則一擊

鼓。頻有闕點則頻擊鼗，頻有方點則頻擊鼓也。取半

以下爲投壺禮，盡用之爲射禮。投壺之鼓半

射節者，投壺，射之細也。射，謂燕射。○疏曰：射與投

壺相對，用半鼓節爲投壺，用全鼓節爲射禮。又投壺在

室在堂，是燕樂之事，故知此射亦謂燕射，非大射及鄉

射也。魯鼓：○□○○○□○○○□。半，○□○○

○○○○○○○○○○。薛鼓：○□○○○□○○○□

○○○○○□○○○○○○○○○○○○○○○○○○○○

半，○□○○○○○○○○○○○○○○○○○○。此二者記兩家之異，<sup>①</sup>故兼列之。

左右告矢具，請拾投。有人者，則司射

坐而釋一算焉。賓黨於右，主黨於左。拾，更

也。告矢具請更投者，司射也。司射東面立釋算，則室以

南爲右，北爲左也。已投者退，各反其位。○更，占衡反。

○疏曰：左謂主人，右謂賓客。釋算者，釋於地。「於右」，

謂司射之前稍南。「於左」，謂司射之前稍北也。卒投，

司射執餘算曰：「左右卒投，請數。」二算爲

純，一純以取，一算爲奇，遂以奇算告曰：

「某黨賢於某黨若干純。」奇則曰「奇」，鈞則

曰「左右鈞」。《大戴》有「餘」字。數，色主反。純，音

全。奇，紀宜反。「遂以奇算告」，一本此句上更有「有勝者

司射」五字，誤。鈞，居句反。○卒，已也。賓主之黨畢已

投，司射又請數其所釋左右算，如數射算。一純以取，實於

左手，上純則縮而委之，每委異之，有餘則橫諸純下。一算

爲奇，奇則縮諸純下。兼斂左算，實於左手，一純以委，上

則異之。其它如右獲。畢，則司射執奇算，以告於賓與主

人也。若告云某賢於某者，未斥主黨勝與、<sup>②</sup>賓黨勝與。

以勝爲賢，尚技藝也。鈞，猶等也。等則左右手各執一算

以告。○縮，色六反。它，音他。「勝與」之與，音餘。○疏

曰：投壺卒，司射於壺西東面執算，請曰：賓主之黨投壺

卒，請數算。純，全也，二算合爲一全。地上取算之時，一

純則別而取之。一算謂不滿純者，故云「奇」。「遂以奇算

告」，謂左右數鈞等之餘算，手執以告曰：某賢於某若干。

勝者若雙數，則曰「若干純」；隻數，則曰若干奇。猶十算

則云五純，九算則云九奇也。鈞，等也。等則左右各執一

算以告，曰：「左右鈞。」○今按：此說差勝《鄉射》賈疏，然

恐或是九算則曰四純一奇也。

右請投視算。○記：侍投則擁矢。注

見《少儀》品節章。

命酌曰：「請行觴。」酌者曰：「諾。」觴，

失羊反，本或作「醕」。《大戴》無「命酌」至「行觴」六字，別

①「異」，原作「某」，據元明本、寬文本、賀本改。

②「斥」，原作「斤」，據寬文本、賀本改。

云「舉手曰請諸勝者之弟子爲不勝者酌」。○司射又請於賓與主人，以行正爵。酌者，勝黨之弟子。○疏曰：當酌者許酌，乃於西階上南面設豐洗觶，升酌，坐奠於豐上也。當飲者皆跪，奉觴曰：「賜灌。」勝者跪曰：

「敬養。」《大戴》此上有「以酌皆請舉酒」六字。跪，其委反。奉，芳勇反。灌，古亂反。養，羊尚反。○酌者升酌奠於豐上，不勝者坐取，乃退而跪飲之。灌，猶飲也。言賜灌者，服而爲尊敬辭也。《周禮》曰：「以灌賓客。」賜灌、敬養各與其偶於西階上，如飲射爵。○猶飲之飲，於鳩反。

右卒投飲不勝者。○記：勝則洗而以請，客亦如之，不角。注見《少儀》。<sup>①</sup>

正爵既行，請立馬，馬各直其算，一馬從二馬以慶，慶禮曰：「三馬既備，請慶多馬。」賓、主人皆曰：「諾。」《大戴》「正」上有「司正曰」三字，「請」下有「爲勝者」三字。直，如字，又持吏反。○飲不勝者畢，司射又請爲勝者立馬，當其所釋算之前。三立馬者，投壺如射，亦三而止也。三者，一黨不必三勝，其一勝者并其馬於再勝者以慶之，明一勝不得慶也。飲慶爵者，

偶親酌，不使弟子，無豐。○爲，于僞反。○疏曰：正爵，謂正禮罰酒之爵。立馬，樹標也。直，當也。投壺與射禮同，亦三番而止，每番勝者則立一馬。假令賓黨三番俱勝，則立三馬。或賓黨兩勝而立二馬，主黨一勝而立一馬，即以主黨從就賓黨二馬，以少足益於多，以助勝者爲榮，乃以慶賀多馬。但此經上云「請立馬」者，是司射請辭。「馬各直其算，一馬從二馬以慶」，是禮家陳事之言也。「慶禮曰三馬既備，請慶多馬」者，此還是司射請辭。正爵既行，請徹馬。投壺禮畢，可以去其勝算也。既徹馬，無算爵乃行。○去，起呂反。

右三投慶多馬。○記：不擢馬。注見《少儀》。<sup>②</sup>

儀禮經傳通解卷第六終

① 「少」，原作「曰」，據元明本、寬文本、賀本改。  
② 「注」，原作「法」，據元明本、寬文本、賀本改。

## 儀禮經傳通解卷第七

### 鄉飲酒禮第十二

#### 鄉禮三之上

#### 經四

鄉飲酒之禮。○主人就先生而謀賓、

介。介，音界。○主人，謂諸侯之鄉大夫也。先生，鄉中致仕者。賓、介，處上賢者。《周禮》大司徒之職：「以鄉三物教萬民而賓興之：一曰六德，知、仁、聖、義、忠、和；二曰六行，孝、友、睦、婣、任、恤；三曰六藝，禮、樂、射、御、書、數。」《鄉大夫》以「正月之吉，受法於司徒，退而頒之於其鄉吏，使各以教其所治，以考其德行，察其道藝。及三年大比，而興賢者能者。鄉老及鄉大夫帥其吏與其衆寡，以禮禮賓之。厥明，獻賢能之書於王」，是禮乃三年正月而一行也。諸侯之鄉大夫貢士於其君，蓋如此云。古者年七十而致仕，老於鄉里，大夫名曰父師，士名曰少師，而教學焉，恒

知鄉人之賢者。是以大夫就而謀之，賢者爲賓，其次爲介，又其次爲衆賓，而與之飲酒。是亦將獻之，以禮禮賓之也。今郡國十月行此飲酒禮，以《黨正》每歲「邦索鬼神而祭祀，則以禮屬民，而飲酒于序，以正齒位」之說，然此篇無正齒位之事焉。凡鄉黨飲酒，必於民聚之時，欲其見化，知尚賢尊長也。《孟子》曰：「天下有達尊三：爵也，德也，齒也。」○知，音智。行，下孟反。頒，音班。比，毗志反。少，詩照反。索，色白反。屬，音燭。長，丁丈反。○疏曰：處士者，有德行道藝而未仕者也。賢者，即德行者也。能者，即道藝者也。鄉老，謂三公，二鄉公一人也。云「諸侯之鄉大夫貢士於其君，蓋亦如此」者，無正文，故云「蓋」也。又曰：若據鄉貢一人，其介與衆賓不貢之矣，但立介與衆賓，輔賓行鄉飲酒之禮，待後年還以貢之耳。按《射義》云：「古者天子之制，諸侯歲獻貢士。」注引舊說：「大國三人，次國二人，小國一人。」大國三鄉，次國二鄉，小國一鄉，所貢之士與鄉同，則鄉送一人至君所。其國有遂，數亦同其鄉。并有公邑采地，皆有賢能貢之，而貢士與鄉數同。不言遂與公邑采地所貢者，蓋當鄉送一人至君所，君又總校德之大小，取以貢之。縱取鄉外，仍準鄉數爲定。鄉大夫雖行飲酒禮賓之於君，其簡訖，仍更行飲酒禮賓之於王。

又曰：《禮記》云：「歲十二月，合聚萬物而索饗之。」周謂之十二月，即夏之十月，農功畢而蜡祭。是月，黨正聚民於序學中，以三時務農將闕於禮，此時農隙，故行正齒位之禮。六十者坐，五十者立侍。六十者三豆，七十者四豆，八十者五豆，九十者六豆，年長者在上。是正齒位之法也。漢時十月飲酒，禮取《黨正》之文，此篇則無黨正正齒位法也。「民聚之時」，謂大比大蜡之時。尚賢，據此篇鄉飲酒，尊長，據《黨正》鄉飲酒也。但《黨正》飲酒以鄉大夫臨觀行禮，或鄉大夫居此黨內，則亦名鄉飲酒也。引《孟子》者，以證鄉大夫飲酒是尚德也，黨正飲酒尚齒也。爵於此無所當，連引之耳。或曰：賓若有遵者一章，即尚爵之義也。

### 右謀賓介。

主人戒賓，賓拜辱，主人答拜。乃請賓，賓禮辭，許。主人再拜，賓答拜。戒，警也，告也。拜辱，出拜其自屈辱至己門也。請，告以其所為來之事。不固辭者，素所有志。○警，音景。為，于僞反。○疏曰：知賓出門者，見《冠禮》主人宿賓，賓出門左，《鄉射》戒賓亦出門故也。《士相見》固辭，此禮辭即許者，賓已知欲貢己，又以學習德業，情意相許也。案《冠禮》，主人先拜，

賓答拜。此賓先拜，主人答拜者，彼《冠禮》主人戒同寮，尊，又使之加冠於子，尊重之，故主人先拜。此則鄉大夫尊矣，賓是鄉人，卑矣，又將貢己，宜尊敬主人，故賓先拜辱也。是以下注云，去又拜辱者，以送謝之也。○今按：學成行修，進仕於朝，上以致君，下以澤民，此士之素所有志也。主人退，賓拜辱，退，猶去也。去又拜辱者，以送謝之。介亦如之。如戒賓也。○疏曰：不言衆賓，衆賓德劣，但謀介時亦當謀之，故上注兼言「其次為衆賓」。至於戒速之日，必當遣人戒速使知，但略而不言，故下云「賓及衆賓皆從之」。故《鄉飲酒義》云：「主人親速賓及介，而衆賓自從之也。」

### 右戒賓介。○記：鄉，朝服而謀賓、

介，皆使能，不宿戒。鄉，鄉人，謂鄉大夫也。朝服，冠玄端、緇帶、素鞶、白屨。今郡國行鄉飲酒之禮，玄冠而衣皮弁服，與禮異。再戒為宿戒。禮：將有事，先戒而復宿戒。○鞶，音畢。衣，於既反。

乃席賓、主人、介，席，敷席也，夙興往戒，歸而敷席。賓席牖前，南面。主人席阼階上，西面。介席西階上，東面。○敷，音孚。牖，音酉。衆賓之席皆不屬

焉。席衆賓於賓席之西。「不屬」者，不相續也。皆獨坐，明其德各特。○疏曰：《鄉射》云：「席賓南面東上，衆賓之席繼而西。」此衆賓之席亦當然。但《鄉射》「言繼者，甫欲習衆庶，未有所殊別」，此乃特貢於君，故衆賓之席皆不屬焉。雖不屬，猶統賓爲位，同南面也。尊兩壺于房戶間，斯禁。有玄酒，在西。設篚于禁南，東肆，加二勺于兩壺。斯，如字，又音賜。勺，上灼反。○斯禁，禁切地無足者。玄酒在西，上也。肆，陳也。○疏曰：凡設尊之法，醴尊見其質，皆在房內，《冠禮》《禮子》《昏禮》《禮婦》是也。酒尊，皆於顯處見其文，此及醢子與《鄉射》《特性》《少牢》《有司徹》是也。言東肆以頭首爲記，從西向東爲肆，則大頭在西也。斯，漸也，漸盡之名，故知切地無足。《昏禮》《冠禮》皆云禁者，上禮以禁成爲名，是以《玉藻》云：「大夫側尊用楹，士側尊用禁。」注云：「楹，斯禁也。」大夫，士禮之異也。《禮器》云「大夫，士楹禁」，注云：「楹，斯禁也。」謂之楹者，《特性禮》云實獸於楹，注云：「楹之制，如今大木輿矣。」則楹是輿，非承尊之物，以禁與斯禁無足似輿，故名爲楹。若然，上之楹禁，大夫之斯禁，名雖異，其形同，是以《禮器》同名楹禁也。若天子諸

侯，承尊之物謂之豐，上有舟也。設洗于阼階東南，南北以堂深，東西當東榮。水在洗東，篚在洗西，南肆。深，申鳩反，後皆放此，更不音。○榮，屋翼。○疏曰：云「南北以堂深」者，堂深謂從堂廉北至房室之壁堂下，洗北去堂遠近深淺取於堂上深淺。假令堂深二丈，洗亦去堂二丈，以此爲度。云「榮屋翼」者，榮在屋棟兩頭，與屋爲翼，若鳥之有翼，故《斯下》詩云：「如鳥斯革，如翬斯飛。」與屋爲榮，故云榮也。

右設席。○記：蒲筵緇布純。純，之間

反，或章允反。○筵，席也。純，緣也。○緣，以絹反。

○疏曰：《公食記》云「蒲筵常緇布純」，此不言常，文不具也。倍尋曰常，丈六尺也。尊給冪，賓至徹之。

給，葛也。冪，覆尊巾。

羹定，定，丁佞反。○肉謂之羹。定，猶孰也。

○疏曰：肉孰即定止然，故以定言之。不敢煩勞賓，使之至而久侯，故以羹定爲速賓時節之限也。主人速賓，賓拜辱，主人答拜。還，賓拜辱。速，召也。還，猶退。○疏曰：《聘禮》云：「賓至近郊，使下大夫至賓館，遂

以賓人。《公食禮》使大夫戒賓，賓皆「不拜送，遂從之」。鄭注云：「不拜送者，爲從之，不終事。」皆不拜送，此獨拜送者，亦是鄉大夫尊，賓卑，又擬貢，故特拜辱而送之，異於餘者。介亦如之。如速賓也。賓及衆賓皆從之。從，猶隨也。言及衆賓，介亦在其中。

右速賓。○記：其牲狗也，狗取擇人。

亨于堂東北。亨，普庚反。○祖陽氣之所始也。陽

氣主養，《易》曰：「天地養萬物，聖人養賢以及萬民。」

○疏曰：此據《鄉飲酒義》而言，以正月三陽生之月，萬物出地，盛於東南，故云「祖陽氣之所始也」。引《易》「頤」彖辭者，義取養賢能而賓舉之事也。

主人一相，迎于門外，再拜賓，賓答拜；

拜介，介答拜。相，息亮反。○相，主人之吏，擯贊傳

命者。○傳，丈專反。○疏曰：主人於群吏中立一相，使

傳賓主之命，主人乃自出迎賓於大門外，《鄉飲酒義》云「主

人拜迎賓於庠門之外」是也。言「一相」者，欲見使一相傳

命乃迎也。揖衆賓，差益卑也。拜介，揖衆賓，皆西南

面。○疏曰：上文主人迎賓而拜介，是介差卑於賓，今於

衆賓不拜，直揖之而已，故云「差益卑也」。賓、介、衆賓立位在門外，以北爲上，主人與賓正東西相當，則介與衆賓差在南，故主人正西面拜賓，則側身向西南拜介，揖衆賓矣。主人揖，先人。揖，揖賓也，先入門而西面。○疏曰：

庠學唯一門，即向階，門內既有三揖，故主人導賓，揖而先入門，至內雷西向待賓也。賓厭介，入門左。介

厭衆賓人，衆賓皆入門左，北上。厭，一涉反。

○皆入門西東面，賓之屬相厭，變於主人也。推手曰揖，引手曰厭。今文皆作「揖」。又曰，衆賓皆入左，無「門」。

○疏曰：賓既北上，主人西面相向，揖訖乃相背，各向堂塗，介與衆賓亦隨賓至西階下。賓與介、衆賓等自用引手

而入，故不揖，是變於主人也。「厭」字或作「撻」字者，古字義亦通也。《周禮·司儀》云：「土揖庶姓，時揖異姓，天揖

同姓。」鄭以推手小下之爲土揖，平推手爲時揖，推手小舉之爲天揖也。云「引手」者，以手向身引之也。主人與

賓三揖，至于階，三讓。主人升，賓升。主人

阼階上，當楣，北面，再拜；賓西階上，當楣，

北面，答拜。楣，亡悲反。○三揖者：將進揖，當陳揖，

當碑揖。楣，前梁也。復拜，拜賓至此堂，尊之。○復，扶又反。○疏曰：云「三讓主人升」者，主人先升，賓後升，故《鄉射》云「主人升一等，賓升」是也。《爾雅》：陳，堂塗也。「楣前梁」，對後梁爲室戶上。「拜賓至此堂」者，《鄉飲酒義》亦云，是知拜至也。凡拜至者，皆是尊之也。

### 右迎賓。○記：立者東面北上。若

有北面者，則東上。賢者衆寡無常也，或統於堂，或統於門。○疏曰：此謂堂下立者，鄉人賢者或多或少。若少，則東面北上，統於堂也；若多，東面立不盡，即門西北面東上，統於門也。

### 主人坐取爵于篚，降洗。將獻賓也。○疏

曰：篚在堂上尊南，故取之乃降也。賓降，從主人也。

○今按：下文云「賓復位，當西序，東面」，注云：「言復位者，明始降時位在此。」原疏云：「上始降時直云賓降，不言處所，於此見之，是舉下以明上之義。」又按《燕禮》亦云「賓降階西，東面」，故此當取下文附見以足之云。主人坐，奠爵于階前，辭。重以己事煩賓也，事同曰讓，事異曰辭。○疏曰：獻賓是主人事，故重以煩賓也。「事同」，謂若上文主人與賓俱升階而云「三讓」是也。「事異」，

若此文主人有事賓無事則曰「辭」。此對文爲義，若散文則通，是以《周禮·司儀》云「主君郊勞，交擯，三辭，車逆，拜辱，三揖，三辭，拜受」是也。賓對。對，答也。賓主之辭未聞。

主人坐取爵，興，適洗，南面坐，奠爵于篚下，盥洗。已盥乃洗爵，致潔敬也。今文無「奠」。

○疏曰：案《鄉飲酒義》云：主人盥洗揚觶，所以致潔也。拜至，拜洗，拜受，拜送，所以致敬也。此止是致潔并言敬者，鄭注兼拜至，拜受而言耳。賓進，東北面，辭洗。

必進東行，示情。○疏曰：《鄉射》「賓進東北面，辭洗」，彼注云：「必進者，方辭洗宜違其位也。」言東北面，則位南於洗矣。是其賓初降立，至于序南，東鄉，至於主人洗爵乃東行，故此得北面辭洗也。云「示情」者，賓進前就主人示謙，下主人之情也。主人坐，奠爵于篚，興對。賓復位，當西序，東面。言復位者，明始降時位在此。

○疏曰：上經「奠爵于階前」者，主人未洗，見賓降即奠爵，故在階前奠爵。此即至洗將洗爵，見賓辭，故奠爵于篚，興

① 「原」，原作「○」，據元明本、寬文本、賀本改。



對，故不同也。主人坐取爵，沃洗者西北面。沃洗者，主人之群吏。○疏曰：下記「主人之贊者」，注云「贊，佐也，謂主人之屬，佐助主人之禮事，徹鬯沃盥，設薦俎」是也。卒洗，主人壹揖壹讓，升。俱升。古文「壹」作「一」。○疏曰：《鄉射》云：「主人卒洗，一揖一讓，以賓升。」是俱升也。上文主人先升，賓乃升者，以初至之時賓客之道進宜難，故主人升導之。至此以辭讓訖，故略威儀而俱升也。賓拜洗，主人坐奠爵，遂拜，降盥。復盥，爲手盥。○爲，于僞反。盥，步困反。○疏曰：言「奠爵遂拜」者，因事曰遂。凡賓主行事，相報皆言答，此不言答，省文也。賓降，主人辭，賓對，復位，當西序。卒盥，揖讓升，賓西階上疑立。疑，魚乙反，後「疑立」皆放此。○疑，讀爲「疑然從於趙盾」之疑，疑，正立自定之貌。○盾，徒本反。○疏曰：不言一揖一讓，從上可知。「疑然」以下，《公羊傳》文。然彼作「屹然」，與此異也。《鄉射》注云：「疑，止也，有矜莊之色。」主人坐取爵，實之，賓之席前西北面獻賓。獻，進也，進酒於賓。○疏曰：賓在西階，北面，將就席受，故

西北面向其席也。①賓西階上拜，主人少退。少退，少辟。○辟，音避。賓進受爵以復位，主人阼階上拜送爵，賓少退。復位，復西階上位。○疏曰：以賓西階上疑立，今見主人西北面獻於己席前，故賓進，將於席前受之也。案《鄉射》云：「賓進受爵於席前，復位。」此文不具也。薦脯醢。薦，進也。進之者，主人有司。○疏曰：案《昏禮》禮賓「贊者薦脯醢」，《周禮·膳宰》「薦脯醢」，故知此亦非主人，是有司也。賓升席，自西方。升由下也。升必中席。○疏曰：案《曲禮》云：「席南鄉北鄉，以西方爲上。」今升席自西方，云「升由下」者，以賓統於主人，以東方爲上，故以西方爲升由下也。乃設折俎。折，之設反。○牲體枝解節折在俎。○疏曰：凡解牲體之法，有全蒸其豚，解爲二十一體，體解即此折俎是也。是以下有賓俎脊、脅、肩、介俎脊、脅、肫、胙，是體解也。主人阼階東疑立，賓坐，左執爵，祭脯醢。坐，坐於席。祭脯醢者以右手。○疏曰：上文賓升

①「席」，原作「而」，據元明本、寬文本、賀本改。

席，下文降席，故知坐在席。經云「左執爵」，明祭用右手，是以《鄉射》亦云「右祭脯醢」。奠爵于薦西，興，右手取肺，卻左手執本，坐，弗繚，右絕末以祭，尚左手，噲之。興，加于俎。繚，音了。噲，才計反。○興，起也。肺離之。本，端厚大者。繚，猶紵也。大夫以上，威儀多，紵絕之。尚左手者，明垂紵之乃絕其末。噲，嘗也。○紵，音軫。上，時掌反。○疏曰：奠爵于薦右者，為取肺。奠之將舉，故奠於右。《記》云：「取俎，進俎不坐」，是以取時奠爵興，至加于俎又興也。云「肺離之」，此是舉肺到者。本，謂根本，肺之大端。此《鄉飲酒》大夫禮，故云繚祭。《鄉射》士禮云絕祭，但云繚必兼絕，言絕不得兼繚也。言「大夫以上」，則天子諸侯亦繚絕兼有，但禮篇亡，無以知也。《周禮·大祝》辨九祭，「七曰絕祭，八曰繚祭」，注云：「繚祭，以手從肺本循之至于末，乃絕以祭。絕祭，不循其本，直絕以祭。」祭本同，禮多者繚之，禮略者絕則祭之。」亦據此與《鄉射》而言也。噲，至齒則嘗之也。坐挽手，遂祭酒。挽，始兌反。○挽，拭也。古文「挽」作「說」。○疏曰：《內則》事佩之中有挽，則賓客自有挽巾以拭手也。興，席末坐啐酒。啐，七內反。

○啐，亦嘗也。○疏曰：席末，席之尾也。《鄉飲酒義》云：「於席末，言是席之正，非專為飲食也。此所以貴禮而賤財也。」祭薦、祭酒、噲肺於席中，唯啐酒於席末，是賤財之義也。云「啐亦嘗」者，亦前肺云噲，是至齒為嘗，此酒云啐，謂入口為嘗也。降席，坐奠爵，拜，告旨，執爵興，主人阼階上答拜。降席，席西也。旨，美也。賓西階上北面坐，卒爵，興，坐奠爵，遂拜，執爵興。主人阼階上答拜。卒，盡也。於此盡酒者，明此席非專為飲食起。○為，于僞反。○疏曰：「非專為飲食」，《鄉飲酒義》文。言「遂拜」者，亦因奠爵不起，因拜也。但此席為賓賢能起，故不在席盡爵，於此西階上卒之。然啐酒於席末，亦兼為飲食，故以不專言之也。

### 右獻賓。○記：獻用爵，其他用觶。

觶，之豉反。○爵尊，不襲用之。○疏曰：獻賓介、獻眾賓等，皆用一升之爵。至酬及旅酬之等，皆用三升之觶。以獻為初相敬，故用爵。以酬之等皆用為相勸，<sup>①</sup>

①、勸，原作「歡」，據元明本、寬文本、賀本改。

故用鬴也。凡舉爵，三作而不徒爵。謂獻賓、獻大夫、獻工皆有薦。○疏曰：徒，空也，謂不空以爵獻之而已，皆有薦脯醢。薦脯五挺，橫祭于其上，出自左房。挺，大頂反，本亦作「挺」，同。○挺，猶臠也。《鄉射禮》曰：「祭半臠，臠長尺有二寸。」左在東，陽也，陽主養。房，饌陳處也。《冠禮》之饌，脯醢南上。《曲禮》曰：「以脯脩置者，左胸右末。」○臠，音職。胸，其于反。○疏曰：「橫祭」者，於脯爲橫，於人爲縮。其挺有五，通祭者六，故《鄉射》記云：「薦脯用籩五臠，祭半臠橫于上，臠長尺二寸。」則祭半臠者長六寸。此脯不言長短者，記文不具也。引《冠禮》者，欲見此房中之饌亦南上也。引《曲禮》者，欲見此脯設之皆橫於人前也。俎由東壁，自西階升。亨狗既孰，載之俎，饌於東方。○疏曰：亨狗於東方，孰乃載之於俎，饌陳於東壁，恐由東階升，故辨之云「自西階升」也。賓俎，脊、脅、肩、肺。主人俎，脊、脅、臂、肺。介俎，脊、脅、胙、肺。肺皆離，皆右體，進腍。胙，音格，一音各。腍，于豆反。○凡牲，前脰骨

三：肩、臂、臠也；後脰骨二：膊、胙也。尊者俎尊骨，卑者俎卑骨。《祭統》曰：「凡爲俎者，以骨爲主。骨有貴賤。」凡前貴後賤。離，猶撻也。腍，理也。進理，謂前其本也。今文「胙」作「臠」。○脰，戶定反。臠，乃報反。膊，劉音純。撻，苦圭反。臠，古白反。○疏曰：此序體，賓用肩，主人用臂，介用胙，其間有臠肫而在介不用者，蓋爲大夫俎，故此闕焉。《鄉射》亦但記賓主之俎，而不言介俎，注云：「賓俎用肩，主人用臂，尊賓也。」若有尊者，則俎其餘體，是臠肫爲大夫明矣。大夫雖尊，不奪賓主正禮，故用體卑於主人與賓而尊於介也。或有介俎肫胙不言者，<sup>①</sup>欲見用體無常。若有一大夫，即介用肫；若有二大夫，則介用胙，故肫胙兩見亦是也。云「後脰骨二：膊、胙也」者，此皆如《特性》、《少牢》、不取穀也。云《祭統》者，據祭祀歸俎之法，此據飲酒生人之禮，引之者取一邊骨有貴賤之義，以其賓用肩，主人用臂，介用胙，前貴於後也。○今按：「介俎，脊、脅、肺」，印本「胙」上有「肫」字，然《釋文》無音。疏又云「有臠肫而介不用」，明本無此字也。成都石經亦誤，今據

①「不」，據賀本作「兩」。

音疏刪去。以爵拜者不徒作。作，起也，言拜既爵者不徒起，起必酢主人。○疏曰：拜受爵者有不酢主人法，故上經衆賓之長一人受爵而不酢主人，故鄭知此是「拜既爵」也。坐卒爵者拜既爵，立卒爵者不拜既爵。降殺各從其宜，不使相錯，唯工不從此禮。○殺，所界反。○疏曰：以工無日，故不使立卒爵而坐卒爵，雖坐卒爵而不拜既爵也。

**賓降洗**，將酢主人。○疏曰：《爾雅》云：「酢，報也。」前得主人之獻，今將酌以報之，故降洗而致潔敬也。主人降，亦從賓也。降，降立阼階東，西面。○疏曰：下云「主人復阼階東，西面」，故知初降在此也。賓坐奠爵，興辭。西階前也。○疏曰：《鄉射》云：「賓西階前東面坐奠爵，興，辭降。」此亦然也。主人對，賓坐取爵，適洗南，北面。主人阼階東，南面辭洗。賓坐奠爵于筐，興對。主人復阼階東，西面。賓東北面盥，坐取爵，卒洗，揖讓如初，升。主人拜洗，賓答拜，興，降盥，如主人禮。賓

實爵主人之席前，東南面酢主人。主人阼階上拜，賓少退。主人進受爵，復位，賓西階上拜送爵，薦脯醢。主人升席自北方，設折俎，祭如賓禮。祭者，祭薦俎及酒，亦嘑啐。○疏曰：《鄉射》賓盥訖將洗，主人乃辭洗，禮之常也。此將賓舉之，故未盥而辭洗，亦重之也。○今按：此等恐或文有先後，未必有此輕重之別也。○疏又曰：云「揖讓如初升」者，謂前主人卒洗，一揖一讓，升也。云「降盥如主人禮」者，謂如主人降盥禮，則此賓降，主人亦降，賓辭降，主人對，一與主人降辭已下同也。云「祭如賓禮」者，如上賓祭時坐，「左執爵，右祭脯醢，奠爵于薦西，興，右手取肺，卻左手執本，坐，弗繚，右絕末以祭，尚左手，嘑之。興，加于俎。坐，扱手，遂祭酒。興，席末坐啐酒」，故云祭如賓禮。云「祭者，祭薦俎及酒」者，薦謂脯醢，俎即離肺也。云「亦嘑啐」者，亦嘑肺啐酒也。不告旨，酒，已物也。自席前適阼階上，北面坐卒爵，興，坐奠爵，遂拜，執爵興，賓西階上答拜。自席前者，啐酒席末，因從北方降，由便也。

○疏曰：《曲禮》：席「東鄉西鄉，以南方爲上，南鄉北鄉，以

西方爲上。凡升席必由下，降由上。今主人當降自南方，以啐酒於席末，遂因從席北頭降，又從北向南，北面拜，是由便也。主人坐奠爵于序端，阼階上北面再拜，崇酒，賓西階上答拜。東西牆謂之序。崇，充也；言酒惡相充實。○疏曰：「奠爵于序端」者，擬後酬賓訖，取此爵以獻介也。賓告旨，甘主人之味，故啐則拜之。主人謝賓以酒惡相充實，故飲訖乃拜。

### 右賓酢主人。○記：主人，介，凡升

席自北方，降自南方。席南上，升由下，降由上，由便。○疏曰：主人與介席南方爲上，故升由下，降由上者，便也。○介爵、酢爵、僎爵，皆居右。

爵皆飲爵也。介，賓之輔也。酢，所以酢主人也。僎，謂鄉人爲卿大夫來觀禮者。酢，或爲「作」。僎，或爲「馴」。古文禮「僎」作「遵」。○疏曰：三人既不被優，故爵並居右，示爲飲之。按《鄉飲酒》，介爵及主人受酢之爵并僎爵，皆不明奠置之所，故記者於此明之。○《少儀》。

主人坐，取觶于筐，降洗。賓降，主人辭

降。賓不辭洗，立當西序，東面。觶，之豉反。○不辭洗者，以其將自飲。○疏曰：酬酒先飲，乃酬賓，故云「將自飲」。亦盥洗者，禮法宜潔故也。主人辭，應奠爵，不言者，文略也。卒洗，揖讓升，賓西階上疑立。主人實觶酬賓，阼階上北面，坐奠觶，遂拜，執觶興，賓西階上答拜。酬，勸酒也。酬之言周，忠信爲周。○疏曰：賓，疑立者，待主人自飲故也。主人將酬賓，若不自先飲，是不忠信，恐賓不飲，示忠信之道，故先自飲乃飲賓爲酬也。「忠信爲周」，《國語》文。坐祭，遂飲，卒觶，興，坐奠觶，遂拜，執觶興，賓西階上答拜。主人降洗，賓降，辭如獻禮。升，不拜洗。不拜洗，殺於獻。○殺，所界反。○疏曰：「辭如獻禮」者，主人辭賓降，賓辭主人爲己洗爵，此與獻賓時同。賓西階上立，主人實觶賓之席前，北面，賓西階上拜，主人少退，卒拜，進，坐奠觶于薦西。賓已拜，主人奠其觶。賓辭，坐取觶，復

①「僎」，原作「遵」，據賀本改。

位。主人阼階上拜送，賓北面坐，奠觶于薦東，復位。酬酒不舉，君子不盡人之歡，不竭人之忠，以全交也。○疏曰：「賓辭」者，《鄉射》「二人舉觶于賓與大夫，進，坐奠于薦右，賓與大夫辭，坐受觶以興」，注云：「辭，辭其坐奠觶」，《鄉射》注亦云：「辭主人復親酌已」是也。

### 右主人酬賓。○記：凡奠者於左，不

飲者，不欲其妨。○疏曰：謂主人酬賓之觶，主人奠于薦右，客不盡主人之歡，奠之于左，是不欲其妨後奠爵也。將舉於右。便也。○疏曰：謂若下經一人舉

觶爲旅酬始，二人舉觶爲無算爵始，皆奠于右，是其將舉者於右，以右舉之便也。○客爵居左，其飲居

右。客爵，謂主人所酬賓之爵也，以優賓耳。賓不舉，

奠于薦東，是居左也。○疏曰：「其飲居右」者，下經一

人舉觶于賓，賓奠觶于薦西，至旅酬賓，取薦西之觶以酬主人是也。○《少儀》。

### 主人揖，降，賓降立于階西，當序，東面。

主人將與介爲禮，賓謙，不敢居堂上。主人以介揖讓升，拜，如賓禮。主人坐取爵于東序端，降

洗。介降，主人辭降，介辭洗，如賓禮。升，

不拜洗。介禮殺也。○疏曰：按上主人迎賓之時，介與

衆賓從入。又主人與賓三揖至於階之時，介與衆賓亦隨至

西階下，東面。今此文云「揖讓升如賓禮」，則唯於升堂時

相讓，無庭中三揖之事矣。升堂而云拜者，謂拜至亦如賓

矣。云「介禮殺也」者，謂不拜洗，是以《鄉飲酒義》云「三讓

以賓升，拜至，獻酬，辭讓之節繁，及介省矣」是也。介西

階上立。不言疑者，省文。主人實爵介之席前，

西南面獻介。介西階上北面拜，主人少退，

介進，北面受爵，復位。主人介右北面拜送

爵，介少退。主人拜于介右，降尊以就卑也。今文無

「北面」。○疏曰：云「西南面獻介」者，以介席東面，故邪

向之也。主人位在阼階，今於獻介，主人來在西階介右，是

介卑，故降主人之尊就西階介之東北面拜也。至旅酬皆同

階者，禮殺故也。主人立于西階東，薦脯醢。介

升席自北方，設折俎。祭如賓禮，不啻肺，不

啐酒，不告旨。自南方降席，北面坐卒爵，

興，坐，奠爵，遂拜，執爵興，主人介右答拜。

不嘽嘽，下賓。○疏曰：云「主人立于西階東」者，始獻介之時近西在介右，今于設薦之時主人無事，稍近東。

### 右主人獻介。

介降洗，主人復阼階，降辭如初。如賓酢

之時。○疏曰：云「如初」者，如賓酢主人之時，介辭主人從已降，主人辭介爲已洗也。卒洗，主人盥。盥者，當

爲介酌。○疏曰：此主人自飲而盥者，尊介也，是以《鄉射》注云：「盥者，雖將酌自飲，尊大夫，不敢褻。」是其類也。介揖讓升，授主人爵于兩楹之間。就尊南

授之。介不自酌，下賓。酒者，賓主共之。○疏曰：「揖讓升」者，謂「揖」讓升也。云「授主人爵」，以爵授主人也。

知兩楹間是「尊南」者，以上云尊于房戶間，房戶間當兩楹之北也。云「下賓」者，以賓親酌以酢主人，此不自酌也。

《鄉飲酒義》云：「尊于房戶之間，賓主共之。」介西階上

立，主人實爵，酢于西階上，介右坐奠爵，遂

拜，執爵興，介答拜。主人坐祭，遂飲，卒爵，

興，坐奠爵，遂拜，執爵興，介答拜。主人坐，

奠爵于西楹南，介右再拜崇酒，介答拜。奠爵

西楹南，以當獻衆賓。○疏曰：主人既受爵，介無事，故于

西階上立。知此奠爵爲衆賓者，按下文云「主人揖升，坐取

爵于西楹下」是也。主人復阼階，揖降，介降立于

賓南。疏曰：向來主人與介行禮于西階上，事訖，故復阼

階揖讓降。介降立于賓南者，以將獻衆賓，故介無事，就賓

南也。

### 右介酢主人。

主人西南面三拜衆賓，衆賓皆答壹拜。

三拜，一拜，示偏，不備禮也。不升拜，賤也。○偏，音遍，

下同。○疏曰：主人在阼階下，衆賓在賓介之南，故西南

向拜之。衆賓各得主人一拜，主人亦偏得一拜，是不備禮。

《鄉射》、《少牢》、《有司徹》皆有此文，大夫尊故也。士則答

再拜，故《特性》云：「主人三拜衆賓，衆賓答再拜。」鄭云

「衆賓再拜者，士賤，旅之得備禮」是也。○今按：此疏云

「衆賓各得主人一拜，主人亦偏得一拜」。《鄉射》疏又云：

「衆賓無問多少，止爲三拜，是示偏也。」然則主人之拜衆

賓，不能一一拜之，但爲三拜以示偏，而衆賓之長者三人各

詳其說。《鄉射》放此。主人揖升，坐取爵于西楹下，降洗，升實爵，于西階上獻衆賓。衆賓之長升，拜受者三人。長，丁丈反。○長，其老者。言三人，則衆賓多矣。○疏曰：云「主人揖升」者，從三人爲首一一揖之而升也。云「降洗升實爵」者，以下不更言洗，則以下因此不復洗矣。云「西階上獻衆賓」者，下別言衆賓之長三人，則衆賓之中兼言堂下衆賓，故鄭云「衆賓多矣」。自三人已下，於下便以次歷言之矣。云「拜受者三人」，則堂下衆賓不拜受矣。主人拜送。於衆賓右。○疏曰：約上文介右而知也。坐祭立飲，不拜既爵。授主人爵，降復位。既，卒也，卒爵不拜。立飲，立授，賤者禮簡。○疏曰：賓賢能，以賢者爲賓，其次爲介，不問長幼。其三賓德劣于賓介，則數年之長幼。故此衆賓之長坐祭，與賓介同。不拜既爵，立飲，立授則異，賤故禮簡也。衆賓獻，則不拜受爵，坐祭立飲。次三人以下也，不拜，禮彌簡。○疏曰：此堂下衆賓，又簡於三人也。每一人獻，則薦諸其席。謂三人也。○疏曰：以其言席，又下別言衆賓，則此是三人也。衆賓辯有脯

醢。辯，音遍。○亦每獻薦於其位，位在下。今文，辯「皆作，遍」。○疏曰：以其言堂下立侍，不合有席，故不言席而云位在下也。不言其數者，鄉人有學識者皆來觀禮，皆入飲酒之內，是以《鄉射》云：旅酬堂上，辯，卒受者興，以旅在下者，明衆賓在堂下也。主人以爵降，奠于筐。不復用也。

右主人獻衆賓。○記：衆賓之長一人辭洗，如賓禮。於三人之中復差有尊者，餘二人雖爲之洗，不敢辭，其下不洗。○樂正與立者，皆薦以齒。與，音預。○謂其飲之次也。尊樂正同於賓黨，不言飲而言薦，以明飲也。既飲皆薦於其位，樂正位西階東，北面。○主人之贊者西面北上，不與，與，音預。○贊，佐也，謂主人之屬，佐助主人禮事，徹鼎，沃盥，設薦俎者。西面北上，統于堂也。與，及也。不及，謂不獻酒。無算爵然後與。燕乃及之。

揖讓升。賓厭介升，介厭衆賓升，衆賓



序升，即席。序，次也。即，就也。今文「厭」皆爲「揖」。

○疏曰：「衆賓序升」者，謂三賓堂上有席者。<sup>①</sup>以年長爲首，以次即席也。云「今文厭皆爲揖」，不從者，以賓相引以手，不得爲揖故也。一人洗，升，舉觶于賓。一人，

主人之吏。發酒端曰舉。○疏曰：此一人舉觶，爲旅酬也。云「發酒端曰舉」者，從上至下徧飲訖，又從上而起也。

實觶，西階上坐奠觶，遂拜，執觶興，賓席末答拜。坐祭，遂飲，卒觶興。坐奠觶，遂拜，執觶興，賓答拜。降洗，升實觶，立于西階上，賓拜。賓拜，拜將受觶。○疏曰：云「賓席末答拜」

者，謂於席西南面，非謂席上近西爲末，以其無席上拜法也。已下賓拜皆然。進，坐奠觶于薦西。賓辭，

坐受以興。舉觶不授，下主人也。言坐受者，明行事相接若親受，謙也。○疏曰：上獻賓皆親授而奠之，今不親

授，是下主人。《鄉射》注云：「不授，賤不敢也。」若於人手所授而已受之，則名爲受，不於人取之，不得言受。今於地取之而言受者，以主人奠之，賓取之而無隔絕，雖於地，若手受之也。舉觶者西階上拜送，賓坐，奠觶于

其所。所，薦西也。○疏曰：賓奠于其所者，待作樂後立司正，賓乃取此觶以酬主人，以其將舉，故且奠之於右也。舉觶者降。事已。○疏曰：案《鄉射》，舉觶者降，後有大夫，此不言者，大夫觀禮之人，或來或否，故不言也。

右一人舉觶。○記：樂作，大夫不

入。後樂賢者。○疏曰：大夫入，當一人舉觶之後，未

樂作之前，以助主人樂賢。若樂作之後，則後於樂賢者，故不入也。○今按：賓若有遵者，其禮詳見篇末及

《鄉射禮》一人舉觶之後。

設席于堂廉，東上。爲工布席也。側邊曰廉。

《燕禮》曰：「席工於西階上少東，樂正先升，北面。」此言樂正先升，立於西階東，則工席在階東。○疏曰：引《燕禮》者，欲證此席爲工。又以此經云「堂廉東上」，不言階東，故取《燕禮》及此下文以見樂正於西階東，而立於工西，則知工席更在階東，北面可知也。工四人，二瑟，瑟先。相者二人，皆左何瑟，後首，挾越，內弦，右手

①「堂」，原作「掌」，據元明本、寬文本、賀本改。

相。相，息亮反。何，戶可反。掙，口孤反。○四人，大夫制也。二瑟，二人鼓瑟，則二人歌也。瑟先者，將人，序在前也。相，扶工也，衆賓之少者爲之，每工一人，《鄉射禮》曰：「弟子相工如初人。」天子相工使眡瞭者，凡工，瞽矇也，故有扶之者。師冕見，及階，子曰「階也」，及席，子曰「席也」，固相師之道。後首者，變于君也。掙，持也，相瑟者則爲之持瑟。其相歌者，徒相也。越，瑟下孔也。內弦，側擔之者。○少，申召反。瞭，音了。瞽，音古。矇，音蒙。見，賢遍反。爲，于僞反。擔，丁甘反。○疏曰：此鄉大夫飲酒而云四人，《大射》諸侯禮而云六人，若然，上當二人，天子當八人，爲差次也。工四人，一人瑟，相二人，則工二人歌，雖不言相，亦二人可知，以空手無事，故不言也。天子相工使眡瞭爲之者，見《周禮·眡瞭》職云「凡樂事相瞽」是也。鄭司農云：無目眡謂之瞽，有目眡而無見謂之矇，有目無眸子謂之瞽。《燕禮》云「小臣左何瑟，面鼓」，注云：「燕尚樂，可鼓者在前面也。」此不面鼓，是變於君也。掙者，瑟底有孔越，以指深入，謂之掙也。徒，空也，無可倚，空以右手相。側擔之者，以左手於外側擔之，使弦向內也。

**樂正先升，立于西階東。**正，長也。○疏曰：案《周

禮》有大司樂、樂師，天子之官。此樂正者，諸侯及大夫、士之官，當天子大司樂。工人，升自西階，北面坐。相者東面坐，遂授瑟乃降。降立于西方，近其事。○近，附近之近。○疏曰：《鄉射》云：「樂正適西方，命弟子贊工還樂。」故知西方是近其事也。工歌《鹿鳴》、《四牡》、《皇皇者華》。三者皆《小雅》篇也。《鹿鳴》，君與臣下及四方之賓燕，講道修政之樂歌也。此采其已有旨酒，以召嘉賓，嘉賓既來，示我以善道，又樂嘉賓有孔昭之明德，可則倣也。《四牡》，君勞使臣之來樂歌也。此采其勤苦王事，念將父母，懷歸傷悲，忠孝之至，以勞賓也。《皇皇者華》，君遣使臣之樂歌也。此采其更是勞苦，自以爲不及，欲諮謀于賢知而以自光明也。○倣，戶教反。勞，力報反。使，所吏反。更，音庚。知，音智。○疏曰：凡歌《詩》之法，皆歌其類。此時貢賢能擬爲卿大夫，或爲君所燕食，以《鹿鳴》詩也。或爲君出聘，以《皇皇者華》詩也。或使反爲君勞來，以《四牡》詩也。故賓賢能而預歌此三篇，使習之也。○今按：《鹿鳴》即謂今日燕飲之事，所以導達主人之誠意，而美嘉賓之德也。《四牡》言其去家而仕於朝，辭親而從王事，於此乎始也。《皇皇者華》言其將

爲君使而賦政於外也。《學記》曰：「《宵雅》肄三，官其始也。」正謂此也。蓋此三詩，先王所制以爲燕飲之樂，用之鄉人，用之邦國，各取其象而歌之也。卒歌，主人獻

工。工左瑟，一人拜，不興受爵，主人阼階上拜送爵。一人，工之長也。凡工賤，不爲之洗。○疏

曰：「工之長」者，謂就四人之內爲首者也。案此《鄉飲酒》及《燕禮》同是主懽心尚樂之事，故有升歌笙閒合樂，及其獻工獻笙後，閒合不獻，以前已得獻，故不復重獻。《鄉射》

主於射，略於樂，無笙閒，唯有合樂，笙工並爲，至終總獻之。《大射》亦主於射，略於樂，但不閒歌，不合樂，故有升歌《鹿鳴》三終，主人獻工，乃後下管《新宮》，不復得獻，此君禮異於《鄉射》也。《大射》不略升歌而略笙閒合者，二

《南》是鄉大夫之正，《小雅》是諸侯之正，《鄉射》不略合樂，而《大射》不略升歌者，不可略其正也。薦脯醢，使人

相祭。使人相者，相其祭酒、祭薦。工飲，不拜既

爵，授主人爵。坐授之。衆工則不拜受爵，祭

飲，辯有脯醢，不祭。祭飲，獻酒重，無不祭也。今

文「辯」爲「徧」。○疏曰：衆工諸事皆不備，尚祭飲，則知

得獻酒無有不祭，故云「獻酒重，無不祭」也。其正酬亦祭，至旅酬以下則不祭，故下《記》云：「凡旅不洗，不洗者不祭。」鄭注云：「敬禮殺也，不甚潔也。」大師，則爲之洗，賓、介降，主人辭降，工不辭洗。大，音泰。

爲，于僞反。○大夫若君賜之樂，謂之大師，則爲之洗，尊之也。賓、介降，從主人也。工，大師也。上既言獻工矣，乃言大師者，大師或瑟或歌也。其獻之，瑟則先，歌則後。

○疏曰：天子諸侯有常官，則有大師也。大夫則無常官，若君賜之樂，并樂人與之，則亦謂之大師。「賓介降」，《鄉射》注云：「大夫不降，尊也。」此禮雖有大夫，亦不降可知也。笙入堂下，磬南，北面立，樂《南陔》、《白

華》、《華黍》。陔，古才反。○笙，吹笙者也，以笙吹此

詩以爲樂也。《南陔》、《白華》、《華黍》，《小雅》篇也，今亡，

其義未聞。昔周之興也，周公制禮作樂，采時世之詩以爲樂歌，所以通情相風切也，其有此篇明矣。後世衰微，幽厲尤甚，禮樂之書稍稍廢棄。孔子曰：「吾自衛反魯，然後樂正，《雅》、《頌》各得其所。」謂當時在者而復重雜亂者也，

惡能存其亡者乎？且正考父校商之名《頌》十一篇于周大師，歸以祀其先王，至孔子二百年之間，五篇而已，此其信

也。○相，如字。風，方鳳反。重，直用反。父，音甫。主人獻之于西階上，一人拜，盡階，不升堂，受爵。主人拜送爵，階前坐祭立飲，不拜既爵，升，授主人爵。一人，笙之長者也。笙三人，和一人，凡四人。《鄉射禮》曰：「笙一人拜于下。」○和，胡卧反。○疏曰：案《鄉射》記云：「二笙一和而成聲。」注：「二人吹笙，一人吹和，凡四人。」《爾雅》曰：「笙小者謂之和」是也。獻工之時，拜送在阼階上，<sup>①</sup>以工在階東故也。此拜送笙之時在西階上，以其笙在階下，故不同也。衆笙則不拜受爵，坐祭立飲，辯有脯醢，不祭。亦受爵于西階上，薦之皆於其位，磬南。今文「辯」爲「徧」。○疏曰：「磬南」者，依前笙人立于磬南之處也。乃閒歌《魚麗》，笙《由庚》；歌《南有嘉魚》，笙《崇丘》；歌《南山有臺》，笙《由儀》。閒，閒厠之閒。麗，力知反，本或作「離」。○閒，代也，謂一歌則一吹。六者皆《小雅》篇也。《魚麗》言太平年豐物多也，此采其物多酒旨，所以優賓也。《南有嘉魚》言太平君子有酒樂與賢者共之也，此采其能以禮下賢者，賢者蒙宴而歸之，與之燕樂

也。《南山有臺》言太平之治以賢者爲本，此采其愛友賢者，爲邦家之基、民之父母，既欲其身之壽考，又欲其名德之長也。《由庚》、《崇丘》、《由儀》今亡，其義未聞。○繫，力追反。蔓，音萬。樂，音洛。治，直吏反。長，如字。○劉敞云：此三篇皆笙詩也。《小序》云：有其義而亡其辭。亡謂本無，非亡逸之亡也。《鄉飲酒禮》鼓瑟而歌《鹿鳴》、《四牡》、《皇皇者華》，然後笙人堂下，磬南，北面立，樂《南陔》、《白華》、《華黍》。《燕禮》亦鼓瑟歌《鹿鳴》、《四牡》、《皇皇者華》，然後笙人立於縣中，奏《南陔》、《白華》、《華黍》。《南陔》以下，今無以考其名篇之義。然曰笙，曰樂，曰奏而不言歌，則有聲而無詞明矣，下《由庚》、《崇丘》、《由儀》放此。○今按：《小序》於此六笙詩皆著其義，蓋序者以意言之。今鄭此注云「其義未聞」，則亦不敢信其說矣。○疏曰：此一經堂下吹笙，堂上升歌，閒代而作，故謂之乃閒也。又云：謂「一歌則一吹」者，謂堂上歌《魚麗》終，堂下笙中吹《由庚》續之，以下皆然。乃合樂《周南·關雎》、《葛覃》、《卷耳》、《召南·鵲巢》、

①「上」，原作「東」，據元明本、寬文本、賀本改。

《采蘩》、《采蘋》。雖，七徐反。覃，大南反。卷，九轉反。召，音邵，注同。蘋，毗人反。○合樂，謂歌樂與衆聲俱作。《周南》、《召南》、《國風》篇也，王后、國君夫人房中之樂歌也。《關雎》言后妃之德，《葛覃》言后妃之職，《卷耳》言后妃之志，《鵲巢》言國君夫人之德，《采蘩》言國君夫人不失職，《采蘋》言卿大夫之妻能循其法度。昔太王、王季居于岐山之陽，躬行《召南》之教以興王業，及文王而行《周南》之教以受命。《大雅》云：「刑于寡妻，至于兄弟，以御于家邦。」謂此也。其始一國耳，文王作邑于豐，以故地爲卿士之采地，乃分爲二國。周，周公所食。召，召公所食。於時文王三分天下有其二，德化被于南土，是以其詩有仁賢之風者屬之《召南》焉，有聖人之風者屬之《周南》焉。夫婦之道，生民之本，王政之端，此六篇者其教之原也。故國君與其臣下及四方之賓燕，用之合樂也。鄉樂者，風也。《小雅》爲諸侯之樂，《大雅》、《頌》爲天子之樂。《鄉飲酒》升歌《小雅》，禮盛者可以進取也。《燕》合鄉樂，禮輕者可以逮下也。《春秋傳》曰：「肆夏」，《繁遏》、《渠》，天子所以享元侯也。《文王》、《大明》、《緜》，兩君相見之樂也。然則諸侯相與燕，升歌《大雅》，合《小雅》。天子與次國、小國之君燕亦如之，與大國之君燕，升歌《頌》、

合《大雅》。其笙間之篇未聞。○妃，芳非反。岐，其宜反。采地之采，七代反。被，皮義反。夏，戶雅反。遏，於葛反。○疏曰：「歌樂」，「衆聲俱作」者，謂堂上有歌瑟，堂下有笙磬，合奏此詩也。《燕禮》記云：「有房中之樂。」注云「弦歌《周南》、《召南》之詩而不用鐘磬之節。謂之房中者，后夫人之所諷誦，以事其君子」是也。亦有用鐘鼓奏之者，諸侯、卿、大夫燕饗亦得用之，故用鐘鼓。婦人用之，乃不用鐘鼓，則謂之房中之樂也。后妃夫人同是文王之化，《召南》是文王未受命已前之事，諸侯之禮，故稱夫人；《周南》是文王受命稱王之後，天子之禮，故稱后也。云「國君與其臣下賓客燕之合樂」者，據《燕禮》而言也。云「鄉樂」者，亦據《燕禮》記云「遂合鄉樂」者也。云「《小雅》」，則升歌《鹿鳴》之等是也。云「《大雅》、《頌》」，《肆夏》、《繁遏》、《渠》之等是也。此鄉飲酒爲饗禮，升歌《鹿鳴》進取諸侯之樂，饗禮盛也。「《燕》合鄉樂」，以《燕禮》輕，故可以逮下也。鄭君據《儀禮》上下而言，其實饗、燕同樂。知者，穆叔聘於晉，晉侯享之，歌《鹿鳴》之三，是與《燕禮》同樂也。若然，《小雅》云饗或進取，燕可以逮下者，饗亦逮下也。穆叔對曰：「《肆夏》，天子所以享元侯也。《文王》，兩君相見之樂也。《鹿鳴》，所以嘉寡君也。敢不拜嘉？」引之者，證《肆

夏、《繁遏》、《渠》是《頌》，謂天子之樂歌。案《鐘師》杜子春注引呂叔玉云：「肆夏，《時邁》也。繁遏，《執競》也。渠，《思文》也。」鄭君不從，以爲《詩》篇名，《頌》之族類也。此歌之大者載在樂章，樂崩亦從而亡之，是以《頌》不能具也。○今按：二《南》之分，注、疏說皆未安，唯程子曰：以周公主內治，故以畿內之詩言文王、太姒之化者，屬之《周南》。以召公掌諸侯，故以畿外之詩言列國諸侯大夫之室家被文王、太姒之化而成德者，屬之《召南》。此爲得之。謂之南者，言其化自岐、雍之間，被于江、漢之域，自北而南也。《詩》曰：「以《雅》以《南》，」即謂此也。工告于樂正曰：「正歌備。」樂正告于賓，乃降。樂正降者，以正歌備，無事也。降立西階東，北面。○疏曰：以其上堂時在西階之東，北面，知降堂下亦然，在笙磬之西，亦得監堂下之樂，知位在此也。

### 右樂賓。○記：磬，階閒縮雷，北面

鼓之。縮，所六反。雷，力又反。○縮，從也，雷以東西爲從。鼓，猶擊也。大夫而特縣，方賓鄉人之賢者，從上禮也。射則磬在東。古文「縮」爲「蹙」。○從，子容反。縣，音玄。蹙，子六反。○疏曰：鄭知此是諸侯

之卿大夫者，案《春官·小胥》掌樂縣之法而云：「凡縣鐘磬，半爲堵，全爲肆。」注云：「鐘磬者，編縣二十八枚而在一處，謂之堵。鐘一堵，磬一堵，謂之肆。半之者，謂諸侯之卿、大夫、士也。」諸侯之卿大夫半天子之卿大夫，西縣鐘，東縣磬。士半天子之士，縣磬而已。今此下唯縣磬而無鐘，蓋賓鄉人之賢者又從上禮也。若天子鄉大夫賓賢，雖從士禮，亦鐘磬俱有矣。○今案：此所引《春官》注文，則全爲肆者，天子之卿大夫判縣二肆，鐘磬各二堵也；士特縣一肆，鐘磬各一堵也。半之者，諸侯之卿大夫半天子之卿大夫，判縣一肆，西鐘東磬各一堵也，士則縣磬一堵而已。「射則磬在東」者，據《鄉射》而言，避射位，故在東，與此階閒異也。獻工與笙，取爵于上筐。既獻，奠于下筐。明其異器，敬也。如是，則獻大夫亦然。上筐二爵。○疏曰：「上筐二爵」者，獻賓，獻介，獻堂上，堂下衆賓訖，降奠于筐，是其上筐一爵也。「獻工與笙，既獻奠于下筐」，是上筐二爵也。又《鄉射禮》云「主人以爵降」，洗，獻大夫。此篇亦有大夫，故知上筐有三爵也。其笙則獻諸西階上。謂主人拜送爵也。於工拜于

阼階上者，以其坐于西階東也。古文無「上」。○疏曰：上經主人獻筮于西階上，此記人又言之，爲拜送爵而言也。

主人降席自南方，不由北方，由便。○疏曰：

主人之席南上，升由下，降由上，是其常，而言「由便」者，解禮所以升由下，降由上者，是由便也。側降。賓、介不從。○疏曰：側，特也。賓、介不從，故言側，以方燕禮殺

故也。作相爲司正，司正禮辭，許諾。主人

拜，司正答拜。相，息亮反。○作，使也。禮樂之正既

成，將留賓，爲有解惰，立司正以監之。拜，拜其許。○爲，

于僞反。解，古賣反。惰，徒卧反。監，古銜反。○疏曰：

上經云「一相迎于門外」，今將燕，使爲司正監察賓主之事也。主人與賓行獻酢之禮畢，是禮成也。升歌笙間，合樂

三終，是樂成也。故鄭總言禮樂之正既成也。主人升，

復席。

右立司正。

司正洗觶，升自西階，阼階上北面受命

于主人。主人曰：「請安于賓。」司正告于

賓，賓禮辭，許。爲賓欲去，留之，告賓於西階。○疏

曰：《鄉射》云司正「升自西階，由楹內適阼階上」，此不言由楹內者，省文也。《鄉射》又云：司正西階上請安于賓。

司正告于主人，主人阼階上再拜，賓西階上答拜。司正立于楹間以相拜，皆揖，復席。

再拜，拜賓許也。司正既以賓許告主人，遂立楹間以相拜。

賓、主人既拜，揖就席。○疏曰：凡相拜者，當在賓主拜

前，今在賓拜下者，以經云「司正告于主人」，因即拜賓，賓即答拜。文理切，不得先言相拜，故退之在下也。《鄉射》

云：「司正告于主人，遂立楹間以相拜，主人阼階上再拜，

賓西階上答再拜。」是其相拜在前也。司正實觶，降

自西階，階間北面坐奠觶，退共，少立。共，九

勇反，注同。○階間北面，東西節也。其南北當中庭。共，

拱手也。少立，自正，慎其位也。己帥而正，孰敢不正。

《燕禮》曰：「右還北面。」○疏云：階間，謂兩階之間，東西

等也。《鄉射》云司正「中庭北面坐奠觶」。「自正慎其位」，

欲令賓主亦皆正慎其位也。《燕禮》曰司正降自西階，右還

北面，取不背其君。此亦當右還北面，取不背大夫也。坐

取觶，不祭，遂飲，卒觶興，坐奠觶，遂拜，執觶興，洗，北面坐奠觶于其所，退立于觶南。洗觶奠之，示潔敬。立於其南以察衆。○疏曰：《鄉射》、《大射》皆直云取觶洗，南面，反奠於其所，不云盥，此經本有「盥」者，誤，今刪去。

右司正舉觶。○記：司正既舉觶而薦諸其位。司正，主人之屬也。無獻，因其舉觶而薦之。○疏曰：《記》又云「主人之贊者西面北上，不與，無算爵，然後與」，是無獻也。

賓北面坐，取俎西之觶，阼階上北面酬主人。主人降席，立于賓東。初起旅酬也。凡旅酬者，少長以齒，終於沃盥者，皆弟長而無遺矣。○長，丁丈反。弟，大計反。○疏曰：云「取俎西之觶」者，謂前一人舉觶奠于薦右。今爲旅酬而舉之，前主人酬賓奠于薦東者不舉，故言俎西以別之。云「主人降席」，不云自南方、北方者，下《記》云「主人、介凡升席自北方，降席自南方」，指此文也。《記》云：「主人之贊者西面北上，不與。」與，及也。不及，謂不及獻酒也。言不及獻酒，則旅酬亦不與矣，旅酬所以酬正獻也。《記》又云：「無算爵，然後與。」此旅

酬得終於沃洗者，鄭解酬之大法，故連引無算爵、旅酬，而言終沃洗也，其實此時未及沃洗也。賓坐奠觶，遂拜，執觶興，主人答拜。不祭，立飲，不拜卒觶，不洗，實觶，東南面授主人。賓立飲卒觶，因更酌以鄉主人，將授。○鄉，許亮反。主人阼階上拜，賓少退，主人受觶，賓拜送于主人之西。旅酬同階，禮殺。○疏曰：正酬時不同階，今同階，故云「禮殺」也。賓揖，復席。酬主人訖。主人西階上酬介，介降席自南方，立于主人之西，如賓酬主人之禮。主人揖，復席。其酌，實觶西南面授介。自此以下旅酬，酌者亦如之。○疏曰：知「西南面授介」者，案賓酬主人時，於阼階上東南面向之，則知此主人酬介于西階上西南面可知。云「自此已下旅酬，酌者亦如之」者，謂亦如主人酬介，其酬酌介實觶西南面授之，以其旅酬皆西階上故也。○今按：賓、主、介相酬初皆北面，但實觶之後、授觶之時賓、介則東南面授主人，主人則西南面授介，已受之後，即授者又還北面之位，賓、介則拜送于主人之西，主人則拜送于介之東，皆北面也。故下文受介酬



者得由其東，亦既受乃還北面拜送也。司正升相旅，

曰：「某子受酬。」受酬者降席。相，息亮反，下注

「升相」同。○旅，序也。於是介酬衆賓，衆賓又以次序相

酬。某者，衆賓姓也，同姓則以伯仲別之，又同則以且字別

之。○別，彼列反。○疏曰：上文「作相爲司正」，爲有懈

惰，立司正以監之。今以賓、主及介旅酬不監之，至衆賓乃

監者，以其主人與賓、介習禮已久，又各一位不嫌失禮。至

於衆賓或不久習禮，又同在一位，恐其失禮，故須監之也。

司正退立于序端，東面。辟受酬者，又便其贊上贊

下也。始升相，西階西，北面。○辟，音避。○疏曰：司正

初時在堂上西階西，北面，命受酬者訖，退立于西序端東面

者，則案此下文「衆受酬者受自左」，即是司正立處，故須

辟之；一則東面時贊上贊下便也。云「始升相，西階西，北

面」者，雖無正文，以衆賓之席在賓西南面，介酬在西階上，

司正升相旅，當在西階西，北面命賓，故知位如此也。受

酬者自介右，由介東也，尊介，使不失故位。○疏曰：

北面以東爲右，故鄭云「由介東也」。凡授受之法者，授由

其右，受由其左，即下文「衆受酬者」是也。此受介酬者應

自介左而自介右者，介位在西，故云「尊介，使不失故位」

也。衆受酬者受自左，後將受酬者皆由西，變於介

也。今文無「衆」、「酬者」。○疏曰：言「衆受酬者」，謂上

衆賓之內爲首者一人，自介右受之，自第二以下并堂下衆

賓，皆自左受之。言「變於介」者，即是授受之常法也。

拜，興，飲，皆如賓酬主人之禮。嫌賓以下異也。

辯，卒受者以觶降，坐奠于筐。辯，辯衆賓之在下

者。《鄉射禮》曰：「辯，遂酬在下者，皆升受酬于西階上。」

○疏曰：引《鄉射》者，經直言辯，文不具，故引以證也。

司正降，復位。觶南之位。○疏曰：以相旅畢，堂上

無事，故降復觶南之位。

右旅酬。○記：凡旅不洗，敬禮殺也。

○疏曰：案一人二人舉觶，皆爲旅始，不可不自潔，故

洗。自此以後，旅酬皆不洗也。不洗者不祭。不

甚潔也。○既旅，士不入。後正禮也，既旅則將

燕矣。○疏曰：旅，謂旅酬，所酬獻皆拜受，故云「正

禮」。既旅之後無算爵，行燕飲之法，非正禮，故「士不

入」，後正禮故也。

使二人舉觶于賓、介，洗，升實觶于西階

上。

上，皆坐奠觶，遂拜，執觶興，賓、介席末答拜。皆坐祭，遂飲，卒觶興，坐奠觶，遂拜，執觶興，賓、介席末答拜。二人，亦主人之吏。若有大夫，則舉觶于賓與大夫。《燕禮》曰：「賡爵者立于洗南，西面北上，序進，盥洗。」○賡，以證反。○疏曰：云「賓、介席末答拜」者，賓於席西南面答拜，介于席南東面答。云「若有大夫，則舉觶于賓與大夫」者，以其大夫尊于介故也。逆降，洗，升，實觶，皆立于西階上，賓、介皆拜。於席末拜。○疏曰：賓在席西南面，介在席南東面，以其俱是答拜，故同前席末拜也。皆進，薦西奠之，賓辭，坐取觶以興。介則薦南奠之，介坐受以興，退，皆拜送，降，賓、介奠于其所。賓言取，介言受，尊卑異文。今文曰「賓受」。○疏曰：一人之賓所奠觶于薦西，<sup>①</sup>一人之介所奠觶于薦南。又云：尊者得卑者物言取，是以《家語》云：「定公假馬於季氏，孔子曰：『君於臣有取無假。』」故賓尊言取，介卑言受也。

### 右二人舉觶。

司正升自西階，受命于主人。主人曰：

「請坐于賓。」賓辭以俎。至此盛禮俱成，酒清肴乾，賓主百拜，強有力者猶倦焉。張而不弛，弛而不張，非文武之道。請坐者，將以賓燕也。俎者，肴之貴者。辭之者，不敢以禮殺當貴者。○弛，式氏反。○疏曰：《鄉射》：「司正升自西階，阼階上受命于主人，適西階上，北面請坐于賓。」亦是使司正傳語于賓也。又云：自以上皆立行禮，人皆勞倦，故請坐于賓也。云「俎者，肴之貴者」，謂骨體貴而肉賤也。自旅以前立行禮是盛，自此後無算爵，坐以禮，謂之殺，故今將坐辭以俎，不敢以禮殺當貴者。案《燕禮》司正奠觶于中庭，請徹俎而坐。此禮司正監旅訖，二人舉觶，後將行無算爵，始請坐于賓。《燕禮》司正之前云：二人致爵，三舉旅得爵多，故司正奠時即坐燕。此禮由來未行旅酬，故使二人舉觶，徹俎後乃坐也。主人請徹俎，賓許。亦司正傳請告之。○傳，大專反。司正降階前，命弟子俟徹俎。西階前也。弟子，賓之少者。俎者，主人之吏設之，使弟子俟徹者，明徹俎賓之義。○少，申召反。○疏曰：賓敬主人而使弟子徹俎，故云「賓

①「薦」，原作「席」，據賀本改。

之義也。司正升，立于席端。待事。○疏曰：司正已命即升立于席端，弟子仍未徹俎，故云「待事」也。賓降席，北面，主人降席，阼階上北面。介降席，西階上北面。尊者降席，席東南面。皆立，相須徹俎也。尊者，謂此鄉之人仕至大夫者也，今來助主人樂賓，主人所榮而遵法者也，因以爲名。或有無，來不來，用時事耳。今文「遵」爲「僕」，或爲「全」。○疏曰：「皆立」者，將取俎以授人。遵不北面者，以其尊，故席東南面向主人。須，待也，待受俎之人至，一時徹而授之也。下文云「賓若有遵」，言「若」者，不定之辭，故知或有或無，來與不來。事在當時，故云「用時事耳」。賓取俎，還授司正。司正以降，賓從之。主人取俎，還授弟子。弟子以降，自西階，主人降自阼階。介取俎，還授弟子。弟子以降，介從之。若有諸公、大夫，則使人受俎如賓禮，衆賓皆降。取俎者皆鄉其席，既授弟子，皆降，復初人之位。○疏曰：下云「揖讓如初升」，故知此降時亦復初人之位。位在東階，西階相讓也。

右徹俎。○記：徹俎，賓、介、尊者之俎，受者以降，遂出授從者。從，才用反。○以送之。○疏曰：以上文無出之文，故記之。主人之俎，以東。藏於東方。○疏曰：以上文不言以東，故記人辨之。

說屨，揖讓如初升坐。說，吐活反。○說屨者，爲安燕當坐也。必說于下者，屨賤，不空居堂。說屨，主人先左，賓先右。今文「說」爲「稅」。○疏曰：云「如初升坐」者，謂賓主初入，揖讓而升堂也。凡堂上行禮之法，立行禮不說屨，坐則說屨。屨空則不宜陳于側，故降說屨，然後升坐也。《曲禮》云：「上於東階則先右足，上於西階則先左足。」鄭注云：「近于相鄉敬也。」《玉藻》著屨之法：「坐左納右，坐右納左。」今說之亦北面鄉階，主人先坐左，賓先坐右，亦取近于相鄉敬之義也。乃羞。羞，進也。所進者，狗臠醢也。鄉設骨體，所以致敬也，今進羞，所以盡愛也。敬之，愛之，所以厚賢也。○臠，壯吏反。鄉，許亮反，一作「歸」，同。○疏曰：知「所進者，狗臠醢」者，案

① 「一」字，原脫，據賀本補。

下《記》云「其牲狗」，《禮記》又云「庶羞不踰牲」，則所羞者狗也。但醢是舊作之物，諸經又不見以狗作醢，則豕必狗也，醢則當兼有餘牲也。骨體貴，人不食，故云「致敬」，豕醢賤，人所食，故云「盡愛」也。無算爵，算，數也。賓主燕飲，爵行無數，醉而止也。《鄉射禮》曰：「使二人舉觶于賓與大夫。」又曰：執觶者洗升實觶，反奠于賓與大夫。皆是。○疏曰：引《鄉射禮》者，此無算爵，從首至末，更從上至下，唯醉乃止。無算樂。燕樂亦無數，或間或合，盡歡而止也。《春秋》襄二十九年，吳公子札來聘，請觀于周樂。此國君之無算。○札，壯八反。○疏曰：上升歌笙間合樂皆三終，言有數，此即無也。或問，如上間歌用《小雅》也，或合用二《南》也。或，用其一，不並用也。引《春秋》者，彼是國君禮，此是大夫禮，見其異也。但無算之樂，還依尊卑用之。①案《春秋》為季札所歌《大雅》與《頌》者，但季札請觀周樂，魯為之盡陳。又魯，周公之後，歌樂得與元侯同，故無算之樂，《雅》、《頌》並作也。

### 右燕。

賓出，奏《陔》。《陔》，《陔夏》也。陔之言戒也，終日燕飲，酒罷，以《陔》為節，明無失禮也。《周禮·鐘師》

「以鐘鼓奏《九夏》，是奏《陔夏》則有鐘鼓矣。鐘鼓者，天子、諸侯備用之，大夫、士鼓而已。蓋建於阼階之西，南鼓。《鄉射禮》曰：「賓興，樂正命奏《陔》。賓降及階，《陔》作。賓出，衆賓皆出。」○羅，皮賣反，劉音皮。○疏曰：《鐘師》

云：「凡樂事，以鐘鼓奏《九夏》：《王夏》、《肆夏》、《昭夏》、《納夏》、《章夏》、《齊夏》、《族夏》、《醵夏》。」杜子春云：「王出入奏《王夏》，尸出入奏《肆夏》，牲出入奏《昭夏》，四方賓來奏《納夏》，臣有功奏《章夏》，夫人祭奏《齊夏》，族人侍奏《族夏》，客醉而出奏《陔夏》，公出入奏《醵夏》。」言以鐘鼓者，庭中先擊鐘卻擊鼓，而奏此《九夏》。《鐘師》《天子禮》有鐘鼓。《大射》諸侯禮，亦俱有鐘鼓。《鄉射》云「不鼓不釋」，明無鐘可知。此且論鐘鼓，若用《九夏》，則尊卑不同。天子則《九夏》俱作，諸侯則不用《王夏》，得奏其《肆夏》以下，大夫以下，據此文用《陔夏》，其餘無文。《大射》建鼓在阼階西，南鼓，此無正文，故云「蓋」。彼注云：鼓不在東縣，南為君也。此鄉大夫無東縣，直有一鼓而已，故縣在阼階之西，南鄉主人也。主人

①「依」，原作「伏」，據元明本、寬文本、賀本改。

送于門外，再拜。門東，西面拜也。賓、介不答拜，禮有終也。○疏曰：主人迎賓之時「門東，西面拜」，今送賓，還依此位立也。于迎賓、介時，賓、介答拜。今送賓，主人再拜，若賓、介答拜，是行禮無終畢，故賓、介不答，是禮有終也。不言衆賓者，迎送俱不拜，故不言也。

右賓出。○記：樂正命奏《陔》，賓出至于階，《陔》作。疏曰：賓降自西階，恐賓醉失禮，故至階奏之。

賓若有遵者，諸公、大夫則既一人舉觶，乃入。不干主人正禮也。遵者，諸公、大夫也。謂之賓者，同從外來耳。大國有孤，四命，謂之公。○疏曰：「正禮」，謂賓主獻酢是也。是以一人舉觶爲旅酬始，乃入。若然，即是作樂前人，而於此篇末乃言之者，以其無常，或來或不來，故於後言之也。孤只一人而言「諸」者，案鄭注《燕禮》云：「容牧下三監。」案《王制》云：天子使其大夫監於方伯之國，國三人，是殷法，周公因而不改，故云容也。云「大國有孤四命」者，《周禮·典命》文。謂之公者，若天子有三公也。席于賓東，公三重，大夫再重。重，

直龍反。○席此二者於賓東，尊之，不與鄉人齒也。天子之國，三命者不齒。於諸侯之國，爵爲大夫則不齒矣。不言遵者，遵者亦卿大夫。○疏曰：賓在戶牖之間，酒尊又在戶東，席此二者又在酒尊之東，但繼賓而言耳。鄉人謂衆賓之席，在賓西，故云「不與鄉人齒」。案：上注云此篇無正齒位之事，謂無《黨正》飲酒之法。此言齒者，謂士已上來觀禮，乃有齒法。云「天子之國，三命者不齒」者，《周禮·黨正》職文。鄭引之爲證者，欲見此篇之禮與天子鄉飲酒三命不齒同也。云「諸侯之國，爵爲大夫則不齒矣」者，以此篇及《鄉射》皆云若有大夫不辨命數，故知爵爲大夫即不齒也。《黨正》又云：「一命齒于鄉里，再命齒于父族，三命不齒。」不齒者，特爲位，不在父兄行列中。「一命齒于鄉里」者，公、侯、伯之士一命，與堂下鄉人齒，以其士立堂下故也。子、男之士不命，與一命之士同齒于階下。子、男之大夫一命，坐于上，與六十已上齒于堂。「再命齒于父族」者，謂子、男之卿與公、侯、伯之大夫以父族爲賓，則與之齒，異姓爲賓，則不與之齒，席于尊東。「三命不齒」者，爲公、侯、伯之卿，雖父族爲賓，亦不與之齒，席于尊東也。云「不言遵者」、「亦卿大夫」者，案上文賓若有遵者，即

諸公大夫也。公如大夫人，主人降，賓、介降，衆賓皆降，復初位。主人迎，揖讓升，公升如賓禮，辭一席，使一人去之。如，音若，出注。去，起呂反，下同。○如，讀若今之若。主人迎之于門內也。辭一席，謙自同于大夫。○疏曰：以不言主人出，故知迎于門內也。○今按：「如，讀若今之若」，但謂如字讀之似今人所用之若字耳，無他義也。疏說迂，今不取。大夫則如介禮，有諸公，則辭加席，委于席端，主人不徹。無諸公，則大夫辭加席，主人對，不去加席。加席，上席也。大夫席再重。○疏曰：云「大夫則如介禮」者，以其公如賓，故大夫則如介禮。主人迎賓，賓厭介，此公與大夫同人，公亦厭大夫，故云大夫如介禮。云「有諸公，則辭加席，委于席端，主人不徹」者，大夫再重，是其正。大夫以公在，故謙委加席于席端，主人不徹也。

右遵人。○記：若有諸公，則大夫於

主人之北，西面。其西面者，北上，統於公。○疏

曰：若無諸公，則大夫南面西上，統於賓也。

明日，賓鄉服以拜賜。拜賜，謝恩惠。鄉服，

昨日與鄉大夫飲酒之朝服也。不言朝服，未服以朝也。今文曰「賓服鄉服」。○朝，直遙反，下皆同。○疏曰：鄭知鄉服是朝服者，《記》云「朝服而謀賓介」是也。此賓言鄉服，其《鄉射》賓言朝服，不同者，按《鄉射》以「公士爲賓」謂在朝著朝服是其常，此賓是鄉人子弟未仕，雖著朝服，仍以鄉服言之故也。○今按：注云「今文曰賓服鄉服」，明古經文無「服」，今有之，衍文也，今刪去。主人如賓服以拜辱。拜賓復自屈辱也。《鄉射禮》曰：「賓朝服以拜賜于門外，主人不見，如賓服，遂從之，拜辱于門外，乃退。」○復，扶又反。○疏曰：此文不具，故引《鄉射》以爲證，明彼此賓主皆不相見，造門外拜謝而已。

右拜禮。

主人釋服，釋朝服，更服玄端也。古文「釋」作

「舍」。○疏曰：昨日正行賓舉飲酒之禮，相尊敬，故朝服，

此乃燕私，輕，故玄端也。乃息司正。息，勞也。勞賜

昨日贊執事者，獨云司正，司正，庭長也。○勞，力報反。

長，丁丈反。○疏曰：司正是庭長，故獨言之也。無介，

勞禮略也，司正爲賓。不殺，殺，所八反。○市買若因所

有可也，不殺則無俎。○疏曰：市買無正文，鄭以意言之。

又殺則俎以盛骨體，既言不殺，故知無俎也。薦脯醢，

羞同也。○疏曰：與正行飲酒同。羞唯所有，在有何

物。○疏曰：上文正行飲酒之時用狗彘，今不殺，故言「在

有何物」，雜物皆是也。徵唯所欲，徵，召也。○疏曰：

昨日正行飲酒，不得喚親友，故今禮食之餘，可別召知友

也。以告于先生，君子可也。告，請也。先生不以

筋力爲禮，於是可來。君子，國中有盛德者。可者，召不

召唯所欲。○筋，居慙反。○疏曰：先生，老人教學者。君

子，則《曲禮》「博聞強識」，「敦善行而不殆」者也。云「可者，

召不召唯所欲」者，上文云「徵唯所欲」，上下相成解也。

賓、介不與。與，音預。○禮漬則褻。古文「與」爲「預」。

○疏曰：賓、介昨日正行禮，今又召之，則是數，數則漬，漬則

不敬。鄉樂唯欲。鄉樂，《周南》、《召南》六篇之中唯所

欲作，不從次也。不歌《鹿鳴》、《魚麗》者，避國君也。○疏

曰：「《南》爲鄉大夫之樂，《小雅》爲諸侯之樂。上正行飲

酒，歌《小雅》，今燕不歌《鹿鳴》、《魚麗》，是避國君也。

右息司正。

### 鄉飲酒義第十三

### 鄉禮三之下

孔子曰：「吾觀於鄉，而知王道之易易

也。」易易，皆以豉反。○鄉，鄉飲酒也。易易，謂教化之

本，尊賢尚齒而已。主人親速賓及介，而衆賓自

從之，至于門外。主人拜賓及介，而衆賓自

入，貴賤之義別矣。別，彼列反。○速，謂即家召之。

別，猶明也。三揖至于階，三讓以賓升，拜至、

獻酬、辭讓之節繁，及介省矣。至于衆賓，升

受、坐祭、立飲，不酢而降，隆殺之義辨矣。

省，所領切。酢，音昨。殺，色界反。○繁，猶盛也。小減

曰省。辨，猶別也。尊者禮隆，卑者禮殺，尊卑別也。○呂

大臨曰：禮主乎別，節文雖繁而不可亂也。因親疏、長幼、

貴賤之差等，以爲屈伸隆殺之節文，明辨密察，然後盡乎制

禮之意矣。尊無二上，非獨爲君臣言之。國之所尊，君也，

雖父不得抗之；家之所尊，父也，雖母不得抗之。群居五

人，長者必異席，則群居亦有尊也。<sup>①</sup>喪祭燕飲皆有賓，有衆賓，<sup>②</sup>則賓亦有尊也。故飲酒之禮，賓介與衆賓送迎之節有等，所以別貴賤也，賓介與衆賓異矣。及三揖三讓，拜至，獻酬、辭讓之節，則賓與介又有等矣。故介之升也，不三揖三讓，不拜洗，主人不之阼階拜送，不啻肺，不啻酒，不告旨，不自酌酢授，主人不舉酬，省於賓可知矣。及衆賓，則升受坐祭立飲，不酢，<sup>③</sup>其拜受者，衆賓之長三人，餘則不拜，省於介又可知矣。於一等之中，寢有省焉，此所以辨隆殺也。工人升歌三終，主人獻之。笙人三終，主人獻之。閒歌三終，合樂三終，工告樂備，遂出。一人揚觶，乃立司正焉。知其能和樂而不流也。笙，音生。閒，閒廁之間。合，如字，徐音閣。和樂之樂，音洛。○工，謂樂正也，樂正既告備而降。言「遂出」者，自此至去，不復升也。流，猶失禮也。立司正以正禮，則禮不失可知。一人，或爲「二人」。○復，扶又反。○疏曰：「工人升歌三終」者，謂升堂歌《鹿鳴》、《四牡》、《皇皇者華》，每一篇而一終也。「笙人三終」者，謂吹笙之人入於堂下，奏《南陔》、《白華》、《華黍》，每一篇一終也。兩言「主人獻之」者，謂獻工及笙人也。「閒歌三終」

者，閒，代也，謂堂上與堂下更代而作也。堂上人先歌《魚麗》，則堂下笙《由庚》，此爲一終。又堂上歌《南有嘉魚》，則堂下笙《崇丘》，此爲二終也。又堂上歌《南山有臺》，則堂下笙《由儀》，此爲三終也。「合樂三終」者，謂堂上下歌瑟及笙並作也。若工歌《關雎》，則笙吹《鵲巢》合之；若工歌《葛覃》，則笙吹《采芣》合之；若工歌《卷耳》，則笙吹《采芣》合之。○今按：合樂，孔疏非是，當從上篇賈疏之說。謂堂上歌瑟，堂下笙磬合奏此六詩也。言三終者，二《南》各三終也。賓酬主人，主人酬介，介酬衆賓，少長以齒，終於沃洗者焉。知其能弟長而無遺矣。少，詩召反。沃，於木反。弟，音悌。○遺，猶脫也，忘也。○脫，徒活反，又音奪。○疏曰：齒，以次相旅，至於執掌盥洗之人，<sup>④</sup>以水沃盥洗爵者，皆預酬酒之限。此經雖據旅酬之時，其終於沃洗，是無算爵之節也，禮見上篇。弟，少也，言少之與長皆被恩澤而無遺棄也。○今

- ①「亦」，原作「所」，據元明本、寬文本、賀本改。
- ②「祭」，原作「制」，據寬文本、賀本改。
- ③「酢」，原作「酬」，據元明本、寬文本、賀本改。
- ④「盥」，原作「疊」，據賀本改。



按：弟，悌也，敬順之意，言能使少者皆承順以事長者而無所遺棄也。降，說屨升坐，修爵無數。飲酒之節，朝不廢朝，莫不廢夕。賓出，主人拜送，節文終遂焉。知其能安燕而不亂也。說，吐活反。廢朝之朝，直遙反，注「朝夕」、「既朝」同。莫，音暮。○朝、夕，朝暮聽事也。不廢之者，既朝乃飲，先夕則罷，其正也。終遂，猶充備也。○先，悉薦反。○疏曰：「降說屨升坐」者，此謂無算爵之初也。以前皆立而行禮，未徹俎，故未說屨。至此徹俎之後，乃說屨升堂坐也。「修爵無數」者，謂無算爵也。熊氏云：修，謂行也。「朝不廢朝，莫不廢夕」，此謂鄉飲酒之禮。若黨正飲酒，一國若狂，無不醉也。終，謂竟也。遂，謂申也。言雖至飲畢，<sup>①</sup>主人備禮拜而送賓，節制文章終竟申遂，不有闕少也。貴賤明，隆殺辨，和樂而不流，弟長而無遺，安燕而不亂，此五行者足以正身安國矣。彼國安而天下安，故曰：「吾觀於鄉，而知王道之易易也。」行，下孟反。○呂大臨曰：禮之所尊，尊其義也。其文則擯相習之，<sup>②</sup>其義則君子知之。修其文，達其義，然後

可以化民成俗也。「貴賤明，隆殺辨，和樂而不流，弟長而無遺，安燕而不亂」，此五者皆見于飲酒之禮而足以化民成俗矣。「故曰吾觀於鄉，而知王道之易易」者，所以甚言其易也。有貴賤隆殺之義，則有別矣，有別，有禮也。和樂而不流，安燕而不亂，<sup>③</sup>則有節矣。有節，義也。弟長而無遺則均，均則仁矣。仁義且有禮，行乎一鄉，達乎一國，所謂正身安國矣。舉斯術也，達之於天下，則天下安矣，故由一鄉而知王道可行於天下，此禮是也。○鄉飲酒之

義：主人拜迎賓于庠門之外，入，三揖而後至階，二讓而後升，所以致尊讓也。庠，音詳。

○庠，鄉學也。州，黨曰序。○疏曰：此謂鄉大夫，故迎賓于庠門外。若州長，黨正，則於序門外也。《州長》職云春秋「射于州序」，《黨正》云屬民「飲酒于序」，是州、黨曰序。有室謂之庠，無室謂之序。鄉學為庠，州、黨為序。《學記》云「黨有庠」者，謂鄉人在州、黨，但於鄉之庠學，不別立也。

①「雖」，原作「制」，據元明本、寬文本、賀本改。

②「擯」，原作「賓」，據元明本、寬文本、賀本改。

③「安燕」，原作「燕安」，據賀本改。

盥洗揚觶，所以致絜也。盥，音管。觶，之鼓反。

絜，音結。○揚，舉也，今禮皆作「騰」。○疏曰：盥洗，謂

獻賓時以水盥手而洗爵也。揚觶，謂酬賓時亦盥手而洗觶

也。拜至，拜洗，拜受，拜送，拜既，所以致敬

也。拜至，謂始升時拜，拜賓至。○疏曰：拜至者，謂賓

與主人升堂之後，主人於阼階之上北面再拜也。拜洗者，

謂獻酢者洗爵而升，受者皆拜也。拜受者，拜受爵也。拜

送者，拜送爵也。拜既者，飲酒既盡而拜也。尊讓絜敬

也者，君子之所以相接也。君子尊讓則不

爭，絜敬則不慢，不慢不爭，則遠於鬪辯矣，

不鬪辯則無暴亂之禍矣。斯君子之所以免

於人禍也，故聖人制之以道。遠，于萬反。○道，

謂此禮。○呂大臨曰：《學記》云：「黨有序，遂有序。」對序

而言，則黨為鄉之屬，蓋指鄉序而云黨有序也。盥手洗爵，

始獻賓之節也。既獻之後，舉觶酬賓亦盥洗而揚之，不敢

慢也。君子之相接，尊讓絜敬如此其至，雖有爭慢之心，無

從生矣。尊讓絜敬之禮行，則尊讓絜敬之俗成。禮行而至

于成俗，則天下之人皆將遠于鬪辯而免於人禍，則先王制

禮也有道，非苟為繁文飾貌升降之末節也。○鄉人，

士、君子尊於房戶之間，賓主共之也。尊有

玄酒，貴其質也。共，如字。○鄉人，鄉大夫也。士，

州長、黨正也。君子，謂卿、大夫、士也。卿、大夫、士飲國

中賢者，亦用此禮也。共尊者，人臣卑，不敢專大惠。

○卿，去京反。飲，於鳩反。○疏曰：卿大夫等唯有東房，

故設酒尊于東房之西室戶之東，在賓主之間，示賓主之共

有此酒也。酒雖主人之設，賓亦以酢主人也。北面設尊，

玄酒在左，謂在酒尊之西。地道尊右，貴其質素故也。羞

出自東房，主人共之也。共，音恭。○羞，燕私可

以自專也。○疏曰：共之，謂供于賓也。洗當東榮，

主人之所以自絜而以事賓也。榮，如字。○絜，

猶清也。○清，如字，劉才性反。賓主象天地也，介

俛象陰陽也，三賓象三光也。讓之三也，象

月之三日而成魄也。四面之坐，象四時也。

介，音戒。俛，音遵。魄，普百反。坐，才卧反。○陰陽，助

天地養成萬物之氣也。三賓象天三光者，係於天也。占文

禮「俛」皆作「遵」。○疏曰：天地則陰陽著成為天地，故賓

在西北，天地嚴凝之氣著；主在東南，天地溫厚之氣著；介坐在西南，象陰之微氣；僕在東北，象陽之微氣。賓，謂衆賓之長三人也。「四面之坐」者，主人東南象夏始，賓西北象冬始，僕東北象春始，介西南象秋始，其四時不離天地陰陽之內而坐也。○今按：自此以下至「禮以體長幼曰德」及後章「立賓以象天」以下至篇終，皆牽合傳會迂滯之說，不足深究。其曰月三日而成魄，尤爲紕舛，說見篇末。天地嚴凝之氣始於西南而盛於西北，此天地之尊嚴氣也；此天地之義氣也。天地溫厚之氣始於東北而盛於東南，此天地之盛德氣也；此天地之仁氣也。凝，魚矜反。○凝，猶成也。主人者尊賓，故坐賓於西北，而坐介於西南以輔賓。賓者，接人以義者也，故坐於西北。賓者接人以義，言賓來以成主人之德。主人者，接人以仁，以德厚者也，故坐於東南，而坐僕於東北以輔主人也。以僕輔主人，以其仕在官也。仁義接，賓主有事，俎豆有數曰聖。聖立而將之以敬曰禮，禮以體長幼曰德。聖，通也，所以通賓

主之意也。將，猶奉也。德也者，得於身也，故曰：古之學術道者，將以得身也，是故聖人務焉。術，猶藝也。得身者，謂成己令名，免於刑罰也。言學術道，則此說賓賢能之禮。○呂大臨曰：誠者，天之道也。不勉而中，不思而得，從容中道，聖人也。誠之者，人之道也，擇善而固執之也。誠者，義理之所出，人心之所同然者也。是皆天之道，聖人先得之，動容周旋，莫不中乎理義，制之以爲禮，所以爲天下法也。雖節文之多，皆出乎誠，其理義皆可得而道也。然禮之節文雖見乎外，莫非德之發也。故學者必以自得爲先，學文爲後。蓋有有其文而實不稱，未有其德而文不足者也。鄉人土君子，蓋鄉大夫士所飲酒之主人者也。尊于房戶之間，戶，室戶也，房在東，室戶居中，房與室戶之間，乃賓主位之間，故曰賓主共之也。酒，主人之物，而曰賓主共之者，主人獻賓，賓酢主人，皆酌此尊，且明君子之財當與人共，不自有也。玄酒，水也，飲之始也。飲始於水，極味於酒。凡酒之設，皆尚玄酒，質之爲貴，不忘本也。羞出自東房，主人致味以養賓，故曰主人共之而不與賓共也。洗當東榮，主人自挈以事賓，賓雖亦就此洗，不曰賓主共之者，明所以敬人者，各自

盡也。立賓以象天，尊之也。立主以象地，所以養也。介以輔賓，僕以輔主人，象陰陽之輔天地也。賓者，衆賓之長者也。其所以輔賓也，猶三光之輔于天也。三光，蓋星之大者有三也，其名不可得而考也。先儒謂三大辰：心爲大辰，伐爲大辰，北辰亦爲大辰。亦莫知其所稽也。晦三日而後明生于魄，故曰成魄。讓之三者，取象成魄於三日也。「四面之坐象四時」者，謂賓主介僕之坐象春夏秋冬也。東北至于東南，生氣也。生氣溫厚而主仁，故自孟春至于孟夏，生氣之所行，萬物所以發生，天之盛德氣也。主坐於東南，僕坐於東北，仁之序也。西南至於西北，殺氣也，嚴凝而主義，故自孟秋至于孟冬，殺氣之所行，萬物所以收斂，天之尊嚴氣也。賓坐于西北，介坐于西南，義之序也。飲酒之禮，所以致主人之養而尊賓主，以仁義接也。仁義接，賓主有事，俎豆有數，天下之理義存焉。天下理義無所不通，聖之謂也。無所不通，無所不敬，禮之所由制也。禮之行也不在乎他，在乎長幼之分而已。性之德也，禮得于身之謂德，由學然後得于身，則與先得人心之所同然者同之，故誠之而至于誠乃天道，是亦聖人也。○祭薦、祭酒，敬禮也。啐肺，嘗禮也。啐酒，成

禮也，於席末。言是席之正，非專爲飲食也，爲行禮也，此所以貴禮而賤財也。卒觶，致實於西階上，言是席之上，非專爲飲食也，此先禮而後財之義也。先禮而後財，則民作敬讓而不爭矣。薦，本亦作「薦」，同。啐，才細反。肺，芳廢反。啐，七內反。爲，于僞反。○非專爲飲食，言主於相敬以禮也。致實，謂盡酒也，酒爲觴實。祭薦、祭酒、啐肺于席中，唯啐酒於席末也。○疏曰：「祭薦」者，主人獻賓，賓即席祭所薦時脯醢也。「敬禮」者，言賓敬重主人之禮也。賓取俎上之肺啐齒之，所以嘗主人之禮也。飲主人酒而入口，成主人禮也。「於席末」，謂席西頭也。若此席專爲飲食，應于席中啐酒，今乃席末啐酒，此席之設本不爲飲食，是主人敬重于賓，故設席耳。祭薦、祭酒、啐肺，敬主人之物，故在席中。啐酒入於己，故在席末也。於席上祭薦、祭酒，是貴禮；席末啐酒，是賤財也。「致實」，謂致盡其所實之酒也。言此席之上非專爲飲酒，故不于席所而卒觶也。啐纔始入口，猶在席末。卒觶則盡爵，故遠在西階上也。○呂大臨曰：孔子曰：吾食於少施氏而飽，少施氏食我以禮。吾祭，作而辭曰：疏食不足祭也。吾食，作而

辭曰：疏食也，不敢以傷吾子。然則君子之於飲食，飽于敬而不飽于味也。飲酒之禮，盡主人之敬以養賓，盡賓之敬以答主人者也。主人獻賓，賓受爵，薦脯醢，賓升席，設折俎，賓祭脯醢，奠爵，取肺嘑之，坐祭酒，興，席末啐酒。主人之禮，賓不敢不答，故祭薦，祭酒，敬主人行此禮也。賓敬主人，在禮不在食，故嘑以啗之，啐以成之也。啐於席之末，不於席之正，主於行禮，不可以飲食瀆也，此貴敬而賤食也。賓卒爵於西階之上，不於席之上者，明是席之上可以成飲食之禮，不可卒飲食之事，是先敬而後食也。敬，禮也；食，財也。人之所以爭者，無禮而志于財也。如知乎貴禮而賤財，先禮而後財之義，則敬讓行矣。飲食之間可以化民成俗，則升降之文不為末節也。○鄉飲酒之禮：六十者坐，五十者立侍，以聽政役，所以明尊長也。六十者三豆，七十者四豆，八十者五豆，九十者六豆，所以明養老也。民知尊長養老，而後乃能入孝弟。民入孝弟，出尊長養老而後成教，成教而後國可安也。君子之所謂孝者，非家至而日見之也，合諸

鄉射，教之鄉飲酒之禮，而孝弟之行立矣。弟，音悌，下同。行，下孟反。○此說鄉飲酒，謂《黨正》「國索鬼神而祭祀，則以禮屬民而飲酒于序，以正齒位」之禮也。其鄉射，則《州長》「春秋以禮會民而射于州序」之禮也。謂之鄉者，州、黨、鄉之屬也。或則鄉之所居州黨，鄉大夫親為主人焉，如今郡國下令長於鄉射飲酒，從大守相臨之禮也。○索，色百反。屬，音燭。大，音泰。守，手又反。相，息亮反。○疏曰：案《鄉飲酒禮》：賓賢能則用處士為賓，其次為介，其次為眾賓，皆以年少者為之。此正齒位之禮，其實、介等皆用年老者為之，其餘為眾賓。賓內年六十以上於堂上，於賓席之西，南面坐，若不盡，則于介席之北，東面北上。其五十者，則立于西階下，東面北上，示有陪侍之義，非即在六十者旁同南面立也。「以聽政役」者，所以立于階下，示其聽受六十以上政事役使也。言欲明尊敬六十之長老，故立而聽政役也。「六十者三豆」至「九十者六豆」者，以其每十年加一豆非正禮，故不得為簋豆偶也。其五十者二豆而已，則《鄉飲酒禮》「眾賓立于堂下者皆二豆」。其實、介之豆無正文，當依眾賓之年而加之也。豆是供養之物，故云「明養老」。立侍是陪侍之儀，故云「明

尊長」也。「入孝弟」，謂入門而能行孝弟。「出尊長養老」者，謂出門而能尊長養老也。鄉射，謂春秋二時州長會射。鄉飲酒之禮，謂十月黨正飲酒。郡治之下及王侯國治之下，滿萬戶以上之令，不滿萬戶之長，於己縣或射或飲酒，則從郡之太守及王國之相來自行禮，相監臨之儀，不用令長禮也。州長、黨正飲射，而鄉大夫監臨，事亦類此，故引以相證也。○呂大臨曰：古之貴老也，其政則導其妻子使養其老。家植之桑，畜之雞豚狗彘，則老者衣帛食肉矣。其教則食三老五更于太學，天子袒而割牲，執醬而饋，執爵而醕，冕而總干。四代之養，皆於庠序，更用饗燕食之禮，皆所以使民不遺老窮，知貴老之義，故飲酒之禮，老者加豆有至於六也。尊長近乎事兄，弟也；養老近乎養親，孝也。入則順乎父兄，出則順乎長上，則民德歸厚矣。強不犯弱，衆不暴寡，人倫既正，教行俗美，薰沐涵濡，遷善而不自知，故曰「非家至而日見之也」。春秋合諸州長之射，冬行之黨正正齒位，鄉黨習見禮容之盛，漸乎禮義之俗，孝弟之行不肅而成，行禮之效也。○鄉飲酒之義：立賓以象天，立主以象地，設介、僎以象日月，立三賓以象三光。古之制禮也，經之以天地，紀之

以日月，參之以三光，政教之本也。日出於東，僎所在也。月生於西，介所在也。三光，三辰也，天之政教出於大辰焉。○疏曰：賓者，主所尊敬，故以賓象天。主供物以養賓，故以主象地。前經陰陽，據其氣；此云日月，言其體。昭十七年「有星孛于大辰」，《公羊》云：「大辰者何？大火也。伐爲大辰，北辰亦爲大辰。」何休云：「大火與伐，天所以示民時早晚，天下取以爲正，故謂之大辰。辰，時也。」是天之政教出於大辰。亨狗於東方，祖陽氣之發於東方也。亨，普庚反。○祖，猶法也。狗，所以養賓。陽氣，生養萬物。洗之在阼，其水在洗東，祖天地之左海也。阼，才路反。○海，水之委也。○委，於僞反。尊有玄酒，教民不忘本也。大古無酒，用水而已。○大，音泰。賓必南鄉。東方者春，春之爲言蠢也，產萬物者聖也。南方者夏，夏之爲言假也，養之，長之，假之，仁也。西方者秋，秋之爲言愁也，愁之以時察，守義者也。北方者冬，冬之爲言中也，中者藏也。是以天子之立也，左聖鄉仁，右義偕

藏也。鄉，許亮反。蠡，尺允反。夏，戶嫁反。假，戶雅反。愁，依注讀爲擎，子留反。藏，如字。脩，音佩。○春，猶蠡也。蠡動，生之貌也。聖之言生也。假，大也。愁，讀爲擎，擎，斂也。察，猶察察嚴殺之貌也。南鄉，鄉仁，貴長大萬物也。察，或爲「殺」。○殺，如字。介必東鄉，介賓主也。獻酬之禮，主人將西，賓將南，介覲其間也。○覲，音間廁之間。主人必居東方。東方者春，春之爲言蠡也，產萬物者也。主人者造之，產萬物者也。言禮之所在，<sup>①</sup>由主人出也。月者，三日則成魄，三月則成時。是以禮有三讓，建國必立三卿。三賓者，政教之本，禮之大參也。卿，去京反。參，七南反。○言禮者，陰也，大數取法於月也。○疏曰：魄，謂明生傍有微光也。<sup>②</sup>此謂月明盡之後而生魄，非必月三日也。所以前月大則月二日生魄，前月小則三日乃生魄。樂既爲陽，故禮爲陰。月是陰精，故禮之數取法於月也。○今按：魄者，月之有體而無光處也，故《書》言哉生明、旁死魄，皆謂月二三日月初生時也。凡言既生魄，即謂月十六日月始闕時也。今此篇兩言

月三日而成魄，則是漢儒專門陋學，未嘗讀《尚書》者之言耳。疏知其繆而曲徇之，故既有月明盡而生魄之說，又言月二日三日而生魄，何相戾之甚邪？此其大義，本不足言，而疏於例亦當削去。今特著之，以明述此義者之繆，不足深究云。

儀禮經傳通解卷第七終

①「在」，賀本作「共」。

②「微」，原作「微」，據元明本、寬文本、賀本改。

## 儀禮經傳通解卷第八

### 鄉射禮第十四

#### 鄉禮四之上

#### 經五

鄉射之禮。○主人戒賓，賓出迎，再拜，主人答再拜，乃請。主人，州長也。鄉大夫若在焉，則稱鄉大夫也。戒，猶警也，語也。出迎，出門也。請，告也，告賓以射事。不言拜辱，此爲習民以禮樂，不主爲賓己也。不謀賓者，時不獻賢能，事輕也。今郡國行此禮以季春，《周禮》：鄉老及鄉大夫，三年正月獻賢能之書於王，退而以鄉射之禮五物詢衆庶。諸侯之鄉大夫既貢士於其君，亦用此禮射而詢衆庶乎？○長，丁丈反。警，音景。語，魚據反。爲，于僞反。○疏曰：案《大射》「前三日，宰夫戒宰及司馬」，此不言日數，則戒賓與射同日矣。鄉射先行鄉飲酒，鄉飲酒成賓與飲酒同日，知此戒賓與射亦同日也。

又云：案鄉大夫是諸侯鄉大夫，則此州長亦諸侯之州長，以士爲之，是以經云「釋獲者執鹿中」，而《記》云「士鹿中」也。若天子州長，中大夫爲之矣。云「鄉大夫若在，則稱鄉大夫」，謂大夫來臨禮之時，州長戒賓不自稱，稱鄉大夫以戒賓也。云《周禮》「至衆庶」，皆《周禮·鄉大夫》職文。引之者，證此鄉射中之事。五物：「一曰和，二曰容，三曰主皮，四曰和容，五曰興舞。」鄭注云「和載六德，容包六行也。庶民無射禮，因田獵分禽則有主皮。主皮者，張皮射之，無侯也。主皮、和容、興舞，則六藝之射與禮樂與？」當射之時，民必觀焉，因詢之也」是也。和載六德者，和是六德之下，舉下以載上也。容包六行者，容人有孝行，則性行含容，孝是六行中之大，故舉上以包下也。云主皮六藝之射者，但六藝中射總言諸射，其教萬民射則唯有主皮，此詢衆庶，不兼士已上也。以和容爲禮者，「禮之用，和爲貴」，又行禮有容儀，是以漢時謂禮爲容，故以禮爲和容也。以樂爲興舞者，爲樂必興舞，故興舞以表樂也。但六藝之中，御與書，數三者於施化民爲緩，故特舉禮、樂與射而言之也。賓禮辭，許。主人再拜，賓答再拜。主人退，賓送，再拜。退，還射宮，省錄射事。○疏曰：



「射宮」者，鄉庠、州序是也。知「省錄射事」者，即下文云「張侯」之等是也。無介。雖先飲酒，主於射也，其序賓之禮略。

### 右戒賓。○記：大夫與，則公士爲

賓。與，音預。○不敢使鄉人加尊于大夫也。公士，

在官之上。鄉賓主用處士。○疏曰：據此鄉射使處士無爵命者爲賓，故有大夫來，不以鄉人加尊于大夫，故易去之，使公士爲賓。鄉飲酒，貢士法，有大夫來，不易去之，以其賓擬貢故也。處士，即君子者也。使能，

不宿戒。能者敏于事，不待宿戒而習之。

### 乃席賓，南面東上。不言於戶牖之間者，此射

於序。○疏曰：「此射於序」，鄉飲酒在庠，以其序無室，庠有室。序無室，則無戶牖，設席亦當戶牖之處耳。言「東上」，亦主人在東，故席端在東，不得以《曲禮》「席南向、北向，西方爲上」解之。衆賓之席繼而西。言繼者，甫欲習衆庶，未有所殊別。○別，彼列反。○疏曰：鄉飲酒，三賓之席不屬殊別，彼興賢能，故有殊別。席主人於阼階上，西面。阼階，東階。尊於賓席之東，兩

壺，斯禁。左玄酒，皆加勺，篚在其南，東肆。斯，如字，劉音賜。勺，上灼反。篚，音匪。○斯禁，禁切地無足者也。設尊者北面，西曰左，尚之也。肆，陳也。○疏曰：州長是士，應言禁，不言者，其中兼有鄉大夫禮，故舉大夫斯禁，與《鄉飲酒》同。經云「左玄酒」，據人設尊北面，故西爲左，若據酒，則以南面爲正。地道尊右，以西爲右，故玄酒在右也。設洗於阼階東南，南北以堂深，東西當東榮。水在洗東，篚在洗西，南肆。深，申鳩反。○榮，屋翼也。縣于洗東北，西面。縣，音玄。○此縣謂磬也。縣於東方，辟射位也。但縣磬者，半天子之士，無鐘。○辟，音避。○疏曰：「縣謂磬」者，對大射縣鐘、磬，鑄具有也。「辟射位」者，決鄉飲酒無射事，縣于階間也。諸侯之卿，大夫半天子之卿，大夫。天子之卿，大夫判縣者，東西各有鐘磬爲肆。諸侯之卿，大夫判縣者，分一肆於兩廂，東縣磬，西縣鐘。若天子之上特縣者，直東廂有鐘磬，二虞爲一肆，諸侯之士分取磬而已。縣于東方爲特縣，此既兼鄉大夫詢衆庶，當爲判縣，而總云無鐘者，方以禮樂化民，雖大夫亦同士特縣也。其天子、諸侯

鐘、磬、鐃具，<sup>①</sup>卿大夫、天子士以下亦無鐃。蓋若有鐃，添鐘、磬爲三，半不得也。

### 右設位。○記：尊，給幕，賓至徹之。

給，去逆反。○以給爲幕，取其堅潔。○疏曰：凡幕者，皆爲塵埃加，故設之。但用幕，不用幕不同者，凡用禮，皆不見用幕，質故也。即《上冠》禮子、《昏禮》禮賓、贊禮婦、《聘禮》禮賓，此等用禮皆無幕是也。醺用酒亦無幕者，從禮子，質也。或以尊厭卑亦無幕，《燕禮》君尊有幕，方圓壺則無幕。《昏禮》尊於室內有幕，尊於房戶外，爲媵御賤，故無幕。《鄉飲酒》、《鄉射》有幕者，無所厭故也。賓未至，恐塵加，賓至，徹去不復用也。《燕禮》君命徹幕，則未命之前重用之者。君尊，久設恐塵，故重覆之。蒲筵，緇布純。純，之間反，又諸允反，注同。○筵，席也。純，緣。○緣，以緇反。○疏曰：此與鄉人習禮，雖有公卿之尊，無加席，唯此一種。鄭注《周禮》云：「鋪陳曰筵，藉之曰席。」然其言之筵席通，但在地者爲筵，取鋪陳之義；在上曰席，取相承藉之義耳。○今按：鄭注《周禮》筵、席二字，但謂一物而二名耳，<sup>②</sup>疏說非是。西序之席北上。衆賓統於賓。○疏

曰：衆賓之席繼賓已西，南面東上，今謂衆賓有東面者則北上，非常，故記之也。此雖不言衆賓之數，然上文云「三拜衆賓」，則衆賓亦三人矣。而復有東面者，若公卿大夫多，尊東不能受則於尊西，賓近於西，則三賓東面北上，統於賓也。

### 乃張侯，下綱不及地武。侯，謂所射布也。

綱，持舌繩也。武，迹也，中人之迹尺二寸。侯象人，綱即其足也，是以取數也。○射，食亦反。○疏曰：《周禮》梓人云：「上綱與下綱出舌尋，緝寸焉。」注云：「綱所以繫侯於植者也。」中人之迹尺二寸者，無正文，《漢禮》云：「五武成步，步六尺。或據此而言也。」鄭注《梓人》云：「上下皆出舌一尋者，亦人張手之節也。」以侯下舌半上舌，而兩頭綱皆出一尋，即是上廣下狹，象人張足六尺，張臂八尺，而下綱象足，是以取六尺之數也。不繫左下綱，中掩束之。中，丁仲反。○事未至也。○疏曰：案下《記》云「東方謂之右个」，注云：「侯以向堂爲面也。」則此左下綱

<sup>①</sup>「具」，原作「其」，據元明本、寬文本、賀本改。

<sup>②</sup>「二」，原作「一」，據寬文本、賀本改。

以西畔而言也。云「中掩束之」者，案《記》云：鄉侯一丈，射二丈，上舌四丈，左右各出一丈，下舌三丈，左右各出五尺。今將此五尺與下綱不繫者，中掩左廂向東，待將射乃解之也。乏參侯道，居侯黨之一，西五步。容謂之乏，所以爲獲者御矢也。侯道五十步，此乏去侯北十丈，西三丈。○爲，于僞反。獲，如字。○疏曰：「乏參侯道」者，謂三分侯道。云「居侯黨之一」者，黨，旁也，謂在侯西北邪向之，故以旁言之。其居旁之一者，謂侯道內三分之，居一分之地，十丈也。云「西五步」者，據侯之正北落西有五步，即三丈也。云「容謂之乏」者，《射人》職王射三容，蓋以革爲之，可以容身者也。云「乏」者，謂矢於此匱乏不去也。獲者，謂唱獲者恐矢至其身，故爲作此以御矢也。《記》云鄉侯「五十弓」，弓之下制六尺，與步相應，故鄭云「步」也。云「此乏去侯北十丈」者，五十步計之，步六尺，五十步則三十丈，三分取一爲十丈。云「西三丈」者，經云「西五步」，五六三十，故云三丈也。遠近如此者，一得避矢，二得去堂二十丈，<sup>①</sup>聞唱獲聲，是其節也。

右張侯。○記：凡侯：天子熊侯，白質，諸侯麋侯，赤質，大夫布侯，畫以虎

豹，士布侯，畫以鹿豕。此所謂獸侯也。燕射則張之。鄉射及賓射，當張采侯二正。而記此者，天子諸侯之燕射，各以其鄉射之禮而張此侯，由是云焉。白質，赤質，皆謂采其地。其地不采者，白布也。熊、麋、虎、豹、鹿、豕，皆正面畫其頭象於正鵠之處耳。君畫一，臣畫二，陽奇陰偶之數也。燕射射熊、虎、豹，不安上下相犯。<sup>②</sup>射麋、鹿、豕，志在君臣相養也。其畫之，皆毛物之。○疏曰：獸侯「燕射則張之」者，《周禮·梓人》云「張獸侯以息燕」，注云「息者，休農息老物也。燕，謂勞使臣，若與群臣飲酒而射」是也。「鄉射及賓射，當張采侯二正」者，射人掌賓射，大夫、上同二正，是賓射二正。鄉射無文，知亦采侯二正者，《周禮》賓射，與賓客爲射，此鄉射雖與鄉人習禮，亦立賓主行射禮，又非私相燕勞，故約與賓射同也。言「采侯」者，《梓人》云：「張五采之侯，則遠國屬。」是賓射之侯也，用鄉射之禮，謂張侯道五十步及三耦，<sup>③</sup>與鄉射同，此侯則獸侯

①「堂」，原作「室」，據寬文本、賀本改。  
②「妾」，寬文本、賀本作「忘」。  
③「三」，原作「二」，據寬文本、賀本改。

是也。《周禮·掌蜃》云「其白盛之蜃」，則此以蜃灰塗之使白爲地。赤質者，亦以赤塗之，使赤爲地。知皆畫首者，以其言貍首者射不來者之首，此亦當然也。正鵠處者，案《梓人》云「參分其廣而鵠居一焉」，據大射之侯。若賓射之侯，則三分其侯而正居一；若燕射之侯，則獸居一耳。熊虎豹皆猛獸，不苟相下。若君臣之道，亦獻可者，替否者，不苟相從，輒當犯顏而諫似獸等，故用之。麋鹿豕並是可食之物，故云相養也。「毛物之一者，此無正文，但畫五正、三正之侯，各以其色，明畫獸侯亦以毛物畫之可知也。○今按：《周禮·梓人》有皮侯、采侯、獸侯，其曰「張皮侯而棲鵠」者，天子大射三侯，用虎、豹、熊皮飾侯之側，而畫以五采之雲氣，號曰皮侯。而又各以其皮爲鵠，綴之中央，似鳥之棲，故謂之棲鵠。其曰「五采之侯」者，賓射之侯也，正之方外如鵠，亦三分其侯而居一，中二尺畫朱，其外次白、次蒼、次黃、次黑，充其尺寸，使大如鵠，而亦畫其側爲五采雲氣。三正之侯，則去玄、黃。二正之侯，則去青、白，直以朱、綠也。《射義》注所謂「畫布曰正，棲皮曰鵠」是也。其曰獸侯，則燕射之侯，此《記》所謂「天子熊侯白質，諸侯麋侯赤質，大夫布侯畫以虎豹，士布侯畫以鹿

豕」者是也。蓋皆用布而皆畫獸頭於正鵠之處，故名獸侯。且天子、諸侯則以白土、赤土塗其布以爲質，士則用布而不塗，其側所畫雲氣采色之數，則亦如采侯之差等也。但天子只云熊侯者，此禮襲。天子以下，唯有五十步侯而已，無尊卑之別也。又按鄭注「不忘上下相犯」，疏解忘爲苟，然則乃「妄」字也。以文勢考之，似皆未安。或恐射此野獸，止是取其服猛除害之義，未必如鄭說也。凡畫者丹質。賓射之侯，燕射之侯，皆畫雲氣於側以爲飾。必先以丹采其地，丹淺於赤。○疏曰：鄉射以采侯，正，是賓射之侯也，此獸侯又是燕射之侯，故鄭並言之。云「畫雲氣」者，鄭解經凡言畫者，皆畫雲氣也。若賓射之侯，天子九十步侯，朱、白、蒼、黃、玄五正者，還畫此五色雲氣於其側；七十步侯，朱、白、蒼三正者，還畫此三色雲氣於其側；五十步侯，朱、綠二正者，還畫此二色雲氣於其側也。欲畫之時，又必先用丹采其地，乃於其上畫雲氣也。天子侯九十步之內，更有七十、五十步侯；畿內諸侯七十步侯內，更有五十步侯；畿外諸侯之九十步侯之內，更有七十、五十步侯；其畫之采皆如其數也。云「丹淺於赤」者，案《月令》云朱路赤騶，赤旂朱衣，二色互言，即爲一物。又案《冬

官·鍾氏《云》以朱湛丹秫。四人爲朱，色深而湛丹秫，故知丹淺於赤。鄭言此者，欲見以丹爲地，丹上得見赤色雲之義也。鄉侯，上个五尋，上个，謂最上幅也。八尺曰尋，上幅用布四丈。○疏曰：以五尋，尋八尺，五八四十，故四丈也。中十尺，方者也。用布五丈。今官布幅廣二尺二寸，旁削一寸。《考工記》曰：「梓人爲侯，廣與崇方。」謂中也。○疏曰：方者，謂侯中正方十尺也。十尺用布五幅，幅廣二尺二寸，兩畔各削一寸爲縫，幅各二尺，故五幅爲一丈也。漢法，幅二尺二寸，亦古制存焉。侯道五十弓，弓二寸，以爲侯中。言侯中所取數也。量侯道以狸步，而云弓者，侯之所取數，宜於射器也。正二寸，較中之博也。今文改「弓」爲「肱」也。○較，苦交反。肱，古橫反。○疏曰：《周禮·弓人》《云》「較解中有變焉」，謂弓附把中側骨之處博二寸，故於此處取數焉。倍中以爲躬，躬，身也，謂中之上下幅也，用布各二丈。○疏曰：身謂中上、中下各橫接一幅布者，故鄭云中之上下幅用布各二丈也。倍躬以爲左右舌，謂上个也。居兩旁謂之个，左右出謂之舌。○疏曰：言「爲上个」者，對下个

不得倍躬故也。个，舌一也，在躬之兩傍則謂之个，左右出則謂之舌。謂此二个躬外兩相各出一丈，若人舒舌，故謂之舌，據出者而言也。下舌半上舌。半者，半其出於躬者也，用布三丈。所以半上舌者，侯，人之形類也，上个象臂，下个象足。中人張臂八尺，張足六尺，五八四十，五六三十，以此爲衰也。凡鄉侯用布十六丈，數起侯道五十弓以計。道七十弓之侯，用布二十五丈二尺，道九十弓之侯，用布三十六丈。○疏曰：上舌兩相各一丈，今下舌兩相各五尺，通躬二丈，故云用布三丈也。「五八四十」，據上个四丈，「五六三十」，據下个三丈，以此上下爲衰差也。云「凡鄉侯用布十六丈，數起侯道五十弓以計」者，用布十六丈者，中五幅，幅一丈，用布五丈；上下躬各二丈，總四丈；上个四丈，下个三丈；是總十六丈也。云「道七十弓之侯，用布二十五丈二尺」者，道七十弓，弓取二寸，二七十四，侯中丈四尺。七幅，幅有丈四尺，中用布九丈八尺；上下躬各用布二丈八尺，上下總用布五丈六尺；上个倍躬爲五丈六尺，下舌半上舌，上舌出者，兩相各出丈四尺，下舌半之，兩相各出七尺，下舌用布一丈四尺，通躬二丈八尺，總計用布四丈二尺也。通計用布二十五丈二尺。

云「道九十弓之侯，用布三十六丈」者，弓取二寸，九十弓侯中丈八尺。侯中用布九幅，幅別丈八尺，中用布十六丈二尺，倍中以爲躬，上下躬各用布三丈六尺，上下總七丈二尺，倍躬以爲左右舌，上舌用布亦七丈二尺，下舌亦半上舌，上舌出者丈八尺，下舌半之，則下舌總用布五丈四尺。以此計之，總用布三十六丈也。

**羹定**，定，多佞反。○肉謂之羹。定，猶孰也，謂狗

孰可食。主人朝服，乃速賓。賓朝服出迎，再拜，主人答再拜，退，賓送再拜。朝，直遙反。

○速，召也。射賓輕也。戒時玄端。今郡國行此鄉射禮，皮弁服，與《禮》爲異。○疏曰：此主人與賓俱朝服。案《鄉飲酒》賓主俱不言服者，以彼賓禮重，故戒與速賓俱朝服，故不言。又其《記》云「鄉，朝服而謀賓介」，亦可見也。此習禮輕，是故戒時玄端，召時乃朝服，故須言之也。《公食》云：「賓朝服，即位於大門外，如聘。」注云：「於是朝服，則初時玄端。」宜與彼同。皆是戒時不言服，後速時朝服，故知此亦戒時玄端矣。賓及衆賓遂從之。

**右速賓。**○記：其牲狗也，狗取擇人。

**亨于堂東北。**亨，普庚反。○《鄉飲酒義》曰：祖陽

氣之所發也。

**及門，主人一相出迎于門外，再拜，賓答再拜。**相，息亮反。○相，主人家臣，擯贊傳命者。

○傳，丈專反，下「傳」同。**揖衆賓**，差卑，禮宜異。○疏

曰：此賓與衆賓同是鄉人無爵者，而云「差卑」者，唯據立爲賓者尊，衆賓即爲卑，不論有爵無也。主人以賓揖，

先人。以，猶與也。先人，入門右西面。賓厭衆賓，

衆賓皆入門左，東面北上，賓少進。厭，一涉

反，下「賓厭」同。○引手曰厭。少進，差在前也。今文皆

曰「揖衆賓」。主人以賓三揖，皆行，及階，三

讓。主人升一等，賓升。三讓而主人先升者，是主

人先讓於賓。不俱升者，賓客之道進宜難也。主人阼

階上，當楣北面再拜，賓西階上，當楣北面答

再拜。楣，忘悲反。○主人拜賓至此堂。

**右迎賓。**○記：立者東面北上。賓

黨。○疏曰：此謂一命及不命來觀禮者，與堂下衆賓齒，東面北上而立。

主人取爵于上筐，以降，將獻賓也。賓降。

從主人也。○今按：《鄉飲酒》云：「當西序東面。」主人

阼階前西面坐奠爵，興辭降，重以主人事煩賓也。

今文無「阼階」。賓對。對。答。主人坐取爵，興，

適洗，南面坐奠爵于筐下，盥洗。盥手又洗爵，

致絮敬也。古文「盥」皆作「浣」。○浣，戶管反。賓進，

東北面辭洗。必進者，方辭洗，宜違位也。言東北面，

則位南於洗矣。主人坐奠爵于筐，興對，賓反

位。反從降之位也。《鄉飲酒》曰：「當西序東面。」<sup>①</sup>主

人卒洗，壹揖壹讓，以賓升。賓西階上北面

拜洗，主人阼階上北面奠爵，遂答拜，乃降，

乃降，將更盥也。今文「壹」皆作「一」。賓降，主人辭

降，賓對。主人卒盥，壹揖壹讓，升，賓升，西

階上疑立。疑，魚乙反。○疑，止也，有矜莊之色。

○疏曰：《鄉飲酒》注云：「疑，正立自定之貌。」此言「疑，止也，有矜莊之色」，注相兼乃具也。主人坐取爵，賓

之賓席之前，西北面獻賓。進於賓也。凡進物曰

獻。○疏曰：「凡進物曰獻者，欲見此賓乃是鄉民而已，

無尊卑上下，猶言獻者，此獻直是進物，而言獻，進之也。

《周禮》注云：「古者致物於人，尊之則曰獻。」彼據尊敬前

人，雖卑亦曰獻。若齊侯獻捷於魯之類，義與此別也。賓

西階上北面拜，主人少退。少退，猶少辟也。

○辟，婢亦反，一音避。賓進受爵于席前，復位。

復位，西階上位。主人阼階上拜送爵，賓少退，

薦脯醢。薦，進。賓升席自西方，賓升降由下也。

○疏曰：凡席，升由下，降由上。下文降席不由上者，以主

人在東，敬主人，不得降由上。又於席西拜便，故云賓升降

由下也。乃設折俎。折，之設反，後皆倣此。○牲體枝

解節折以實俎也。主人阼階東疑立。賓坐，左

執爵，右祭脯醢，奠爵于薦西，興取肺，坐絕

祭。卻左手執本，右手絕末以祭也。肺離，上為本，下為

末。尚左手，啐之。啐，才計反。○啐，嘗也。右手在

下，絕以授口嘗之。興加于俎，坐挽手，執爵，遂

①「序」，原作「東」，據寬文本、賀本改。

祭酒，興，席末坐啐酒。說，始銳反。啐，七內反。○說，拭也。啐，嘗也。古文「說」作「說」。○拭，音式。降席，坐奠爵，拜，告旨。降席，席西也。旨，美也。執爵興，主人阼階上答拜。賓西階上北面坐，卒爵，興，坐奠爵，遂拜，執爵興，卒，盡。主人阼階上答拜。

右主人獻賓。○記：凡獻用爵，其他用觶。爵尊，不可褻也。○凡舉爵，三作而不

徒爵。謂獻賓，獻大夫，獻士皆有薦。薦，脯用

籩，五臟，祭半臟，橫于上。醢以豆，出自

東房，臟長尺二寸。臟，音職。○脯用籩，籩宜乾

物也。醢以豆，豆宜濡物也。臟，猶脰也，為記者異耳。

祭橫于上，殊之也。於人為縮，臟廣狹未聞也。古文

「臟」為「載」，今文或作「植」。○疏曰：「豆宜濡物」，而

《王制》云：「一為乾豆」者，鄭注《醢人》云：「作醢及醬者，

必先膊乾其肉，乃後細莖之，雜以粱糲及鹽漬，以美酒

塗置甌中，百日則成矣。」是乾以為豆實是也。○俎

由東壁，自西階升。狗既亨，載于東方。○疏

曰：上云「亨于堂東北」，賓俎曰載，載則于東方。東方，東壁也。既由東壁，恐如祭饌由東階升，故記人明之。若祭饌則東階升，《特牲》、《少牢》是也。尊神，故由阼階升。賓俎：脊、脅、肩、肺。主人俎：脊、脅、臂、肺。肺皆離。皆右體也，進腍。腍，七豆反。○以骨名肉，貴骨也。賓俎用肩，主人用臂，尊賓也。離，猶挫也。腍，膚理也。進理，謂前其本。右體，周所貴也。若有尊者，則俎其餘體也。○挫，苦圭反。○疏曰：云「以骨名肉」者，骨為本，有名，肉為末，無名，所食即肉，故以骨名肉，《特牲》注云「凡解體皆連肉」是也。「賓用肩，主人用臂」，此據前三體而言，有肩、臂、腍，而周人貴肩也。《少儀》云：「牛羊之肺，離而不提心。」鄭云：「提，猶絕也，剝離之，不絕中央少者。」中央少者，即是心也。此將食舉肺也。「前其本」與《公食》同，生人食法，《少牢》進下者，是鬼神食法。云「右體，周所貴」，則左體股所貴也。「若有尊者，則俎其餘體」者，前有三，肩、臂、腍，以次用之。賓主已用肩臂，有一大夫則用腍，二大夫則取後體用膊，若有三大夫已上則用脰，其脊、脅與賓主同，故下文云：「獲者之



俎，折脊、脅、肺、臠。」注云：「臠，若膊腋綴折之，以爲大夫之餘體」是也。○以爵拜者，不徒作。以爵

拜，謂拜既爵。徒，猶空也。作，起也。不空起，言起必酢主人。

賓以虛爵降，將洗以酢主人。主人降。從賓

也。降立阼階東，西面，當東序。賓西階前東面，坐

奠爵，興，辭降，主人對。賓坐取爵，適洗，北

面，坐奠爵于篚下，興，盥洗。賓北面盥洗，自外

來。○疏曰：對主人自內出，南面也。主人阼階之

東，南面辭洗。賓坐奠爵于篚，興對。主人

反位。反位，從降之位也。主人辭洗，進也。○疏曰：降

之位，即上東序之西南面位。言主人反位，<sup>①</sup>由前進乃反

位，故鄭卻本之。賓卒洗，揖讓如初，升。主人

拜洗，賓答拜，興，降盥，如主人之禮。賓升，

實爵，主人之席前，東南面酢主人。酢，<sup>②</sup>報。

○疏曰：言「如初」，則一揖一讓也。主人阼階上拜，

賓少退。主人進受爵，復位。賓西階上，拜

送爵，薦脯醢。主人升席自北方，乃設折俎，

祭如賓禮，祭薦俎及酒，亦嘑啐。不告旨。酒已物。

自席前適阼階上，北面坐，卒爵，興，坐奠爵，

遂拜，執爵興。賓西階上北面答拜。自，由也。

啐酒於席末，由前降便也。○便，婢面反，後放此。主人

坐奠爵于序端，阼階上再拜崇酒，賓西階上

答再拜。序端，東序頭也。崇，充也。謝酒惡相充滿也。

○疏曰：「奠爵于序端」，此擬下獻衆賓也。

### 右賓酢主人。

主人坐取觶于篚，以降。觶，之鼓反，下同。

○將酬賓。賓降，主人奠觶，辭降，賓對，東面

立。主人坐取觶，洗，賓不辭洗。不辭洗，以其

將自飲。卒洗，揖讓升。賓西階上疑立，主人

實觶，酬之，阼階上北面坐奠觶，遂拜，執觶

①「言」，原作「工」，據寬文本、賀本改。

②「酢」，原作「醉」，據元明本、寬文本、賀本改。

興。酬，勸酒。賓西階上北面答拜。主人坐祭，遂飲，卒觶，興，坐奠觶，遂拜，執觶興，賓西階上北面答拜。主人降洗，賓降辭，如獻禮。以將酌已。升，不拜洗。酬禮殺也。○殺，所界反。賓西階上立，主人實觶賓之席前，北面。酬賓。賓西階上拜，主人坐奠觶于薦西。賓辭，坐取觶以興，反位。賓辭，辭主人復親酌已。○復，扶又反。主人阼階上拜送，賓北面坐，奠觶于薦東，反位。酬酒不舉。主人揖降，賓降，東面立于西階西，當西序。主人將與衆賓爲禮，賓謙，不敢獨居堂。

### 右主人酬賓。

主人西南面三拜衆賓，衆賓皆答壹拜。

三拜，示偏也。壹拜，不備禮也。獻賓畢，乃與衆賓拜，敬不能並。○偏，音遍。○疏曰：衆賓，無問多少，止爲三拜而已，是示偏也。衆賓人皆一拜，是不備禮，此亦答大夫拜法。若答上拜，則亦再拜，見於《特牲》也。云，獻賓畢，乃

與衆賓拜者，自爾來唯與賓拜，未與衆賓拜，今始拜之，故云「敬不能並」。○今按：衆賓答一拜，說見上篇。主人揖升，坐取爵于序端，降洗，升，實爵，西階上獻衆賓。衆賓之長升，拜受者三人，長，丁丈反。○長，其老者。言三人，則衆賓多矣。國以多德行道藝爲榮，何常數之有乎？○行，下孟反。○疏曰：此雖非賓賢能，其衆亦二人在堂上，與《鄉飲酒》數同，其堂下衆賓無定數，故鄭云「衆賓多矣」。主人拜送。拜送爵於衆賓右。坐祭，立飲，不拜既爵，授主人爵，降復位。既，盡。○疏曰：此還上三人者，降復賓南東面位。衆賓皆不拜，受爵，坐祭，立飲。自第四以下，又不拜受爵，禮彌略。○疏曰：此謂堂下衆賓無數者也。每一人獻，則薦諸其席。諸，於。○疏曰：此還據堂上三人有席者，故云「薦諸其席」，謂席前也。衆賓辯有脯醢。辯，音遍。○薦於其位。○疏曰：還據堂下無席者，故鄭云「薦於其位」，不席也。主人以虛爵降，奠于篚。不復用。

右獻衆賓。○記：衆賓之長，一人

辭洗，如賓禮。長，丁丈反。○尊之於其黨。

○凡奠者於左，不飲，不欲其妨。○疏曰：謂若

酬賓奠於右，賓奠之於左。將舉者於右。便其舉

也。○疏曰：謂若酬、一人二人舉，奠之於薦右，後舉

之者也。○樂正與立者齒。與，音預。○謂其

飲之次也。尊樂正同與賓黨，《鄉飲酒》記曰：「與立者，皆薦以齒。」

揖讓，升。賓厭衆賓，升，衆賓皆升，就

席。一人洗，舉觶于賓。一人，主人之吏。○疏

曰：主人之吏，亦謂府史以下，非屬官也。升，賓觶，西

階上坐奠觶，拜，執觶興，賓席末答拜。舉觶

者坐祭，遂飲，卒觶，興，坐奠觶，拜，執觶興。

賓答拜。降洗，升實之，西階上北面，將進奠

觶。賓拜。拜受觶。舉觶者進，坐奠觶于薦

西，不授，賤不敢也。賓辭，坐取以興。若親受然。

舉觶者西階上拜送，賓反奠于其所，舉觶者

降。疏曰：云「反奠于其所」者，還於薦西，以其射後賓北

而舉之爲旅酬，故不奠於薦東也。

右一人舉觶。

大夫若有遵者，則入門左。謂此鄉之人爲

大夫者也。謂之遵者，方以禮樂化民，欲其遵法之也。其

士也，於旅乃入。鄉大夫、士非鄉人，禮亦然，主於鄉人耳。

今文「遵」爲「僕」。○僕，音遵。○疏曰：言「若」者，或無，

不定也。鄭知是當鄉大夫者，以其《鄉射》既與鄉人行射

禮，而言大夫者，當鄉大夫可知。士「於旅乃入」，下記云

「士既旅不入」，明未旅間皆得入也。「非鄉人，禮亦然」者，

以其同是鄉大夫，上，禮無異故也，但異鄉不助主人樂賓爲

別也。主人降，迎大夫於門內也。不出門，別於賓。

○別，彼列反。賓及衆賓皆降，復初位。不敢居堂

俟大夫人也。初位，門內東面。○疏曰：上文賓厭衆賓皆

入門左，東面北上。主人揖讓，以大夫升，拜至，

大夫答拜。主人以爵降，大夫降，主人辭降。

大夫辭洗，如賓禮。席于尊東，尊東，明與賓夾

尊也。不言東上，統於尊也。○疏曰：上云尊於賓席之

東，則在尊西，今大夫言席於尊東，明爲賓夾尊可知。「統於尊」者，席於尊東，繼尊而言，是以下云「大夫降，席東南面」，降由下，故知西上也。升，不拜洗。主人實爵，席前獻于大夫，大夫西階上拜，進受爵，反位。主人大夫之右拜送。大夫辭加席，主人對，不去加席。去，起呂反。○辭之者，謙不以己尊加賢者也。不去者，大夫再重席，正也。賓一重席。○重，直容反，下同。○疏曰：云「升，不拜洗」者，以大夫尊故也。云「反位」者，大夫反西階上位。《鄉射》之禮，鄉人爲賓，若大夫與，則以公士爲賓，亦選賢者爲之，故云「不以己尊加賢者也」。《鄉飲酒》云：「公三重，大夫再重。」禮之正也。鄉人故一重，縱公士爲賓亦一重也。乃薦脯醢。大夫升席，設折俎，祭如賓禮，不躋肺，不啐酒，不告旨，西階上卒爵，拜，主人答拜。凡所不者，殺於賓也。大夫升席由東方。○疏曰：上云「不拜洗」，亦是殺於賓之類也。大夫席西上，升由下，故知大夫升席由東方也。

右獻大夫。○記：若有諸公，則如賓

禮，大夫如介禮。無諸公，則大夫如賓禮。尊卑之差。諸公，大國之孤也。樂作，大夫不入。後樂賢也。

大夫降洗，將酢主人也。大夫若衆，則辯獻長乃酢。○疏曰：此經據一大夫而言，故獻大夫即酢。案《有司徹》：主人洗爵，獻長賓于西階上，然後衆賓長升，拜受爵，宰夫贊主人酌。若是以辯，乃升長賓，主人酌，酢于長賓，西階上，北面，賓在左。注云：「主人酌自酢，序賓意，賓卑不敢酢。」是「辯獻長乃酢」也。主人復阼階，降辭如初。卒洗，主人盥，盥者，雖將酌自飲，尊大夫，不敢褻。揖讓升，大夫授主人爵于兩楹間，復位。主人實爵，以酢于西階上。坐奠爵，拜，大夫答拜。坐祭，卒爵，拜，大夫答拜。主人坐奠爵于西楹南，再拜崇酒，大夫答拜。主人復阼階，揖降。將升賓。○疏曰：爲士於旅乃入，擬獻士，故奠爵于此也。大夫降，立于賓南。雖尊，不奪人之正禮。○疏曰：大夫尊，在堂則席于尊東。今降而在賓下者，欲使賓主相對行禮。若在其北，則妨賓主揖讓之

正禮。主人揖讓，以賓升，大夫及衆賓皆升，就席。

### 右大夫酢。

席工于西階上，少東。樂正先升，北面

立于其西。言少東者，明樂正西側階，不欲大東，辟射

位。○大，音泰。○疏曰：既言，席工于西階上，少東，則

在西階東矣。復云樂正，立于其西，則側近西階之東，而

不至於大東也。《燕禮》注亦然者，燕亦容有射法。工四

人，二瑟，瑟先。相者皆左何瑟，面鼓，執越，

內弦，右手相。人，升自西階，北面東上。工

坐，相者坐授瑟，乃降。相，息亮反。何，胡可反。

○瑟先，賤者先就事也。相，扶工也。而，前也。鼓在前，

變於君也。執越內弦，右手相，由便也。越，瑟下孔，所以

發越其聲也。前越言執者，內有弦結，手人之淺也。相者

降，立西方。○疏曰：云，四人，二瑟，則是二人歌可知。

亦不言相者，以其空相，故不言也。云瑟賤者，案大射，太

師，少師歌，衆工瑟，是瑟賤也。凡工，皆先瑟後歌，是賤者

先即事，故得獻亦在前也。鄉射與大射相對，大射，君禮而

後首，此臣禮前首，故云變於君。燕禮與鄉飲酒相對，燕

禮，面鼓，又與鄉飲酒後首相變。瑟體首寬尾狹，內越孔雖

長，廣狹亦等，但弦居瑟上，<sup>①</sup>近首鼓處則寬，近尾不鼓處

并而狹。側持之法，近鼓持之人則淺，近尾人則深。是以

通與《燕禮》言面鼓，則云執之手人淺也。《大射》與《鄉飲

酒》言後首，則云挈越，手人深故也。相者是弟子，位在西。

下文云：樂正適西方，命弟子贊工遷樂于下，故此降立還

於西方也。笙人，立于縣中，西面。縣，音玄。

○堂下樂相從也。縣中，磬東立，西面。○疏曰：上文云

縣于洗東北，西面，此云「立于縣中」，明是堂下相從皆在

東方也。磬東，當磬之東。鄭知不在磬西者，若磬西而西

面，則笙者背磬，不可也。乃合樂，《周南·關雎》、

《葛覃》、《卷耳》、《召南·鵲巢》、《采芣》、《采

蘋》。合，如字，劉音閑。○不歌，不笙，不閒，志在射，略

於樂也。不略合樂者，《周南》、《召南》之風，鄉樂也，不可

略其正也。昔大王、王季、文王始居岐山之陽，躬行以成王

業，至三分天下，乃宣《周南》、《召南》之化，本其德之初，

①「弦」，寬文本、賀本作「越」。

「刑于寡妻，至于兄弟，以御于家邦」，故謂之鄉樂。用之房中以及朝廷饗燕、鄉射、飲酒，此六篇其風化之原也，是以合金、石、絲、竹而歌之。○間，間廁之間。大，音泰。○疏曰：據《鄉飲酒》、《燕禮》作樂四節，今不歌不笙不間，唯有合樂，故云「志在射，略於樂也」。二《南》是大夫、士之鄉樂，已之正樂，故云「不可略其正」者也。工不興，告于樂正曰：「正歌備。」不興者，瞽朦禮略也。○朦，音蒙。○疏曰：言「正歌」者，升歌也。升歌《鹿鳴》是上歌，諸侯樂，非已正樂，故以二《南》爲正歌也。言「備」者，凡作樂皆三終，此備明亦三終也。樂正告于賓，乃降。樂正降者，堂上正樂畢也。降立西階東，北面。○疏曰：作樂主爲樂賓，今歌備，故告賓言歌備也。云「正樂」者，對後無算樂非正樂也。下射雖歌《騶虞》亦是堂下，非堂上，故以堂上決之也。云「降立西階東，北面」者，此無正文，約堂上樂正位在西階東北面，今降亦當在西階東北面也。主人取爵于上筐，獻工，大師則爲之洗。爲，于僞反。○尊之也。君賜大夫樂，又從之以其人，謂之大師也。○疏曰：天子、諸侯官備，有大師、少師、大夫、士官不備，不合有大師。然君有賜大夫、士樂器之法，如《春秋

左氏《云》晉侯以歌鐘樂人賜魏絳是也。賓降，主人辭降。大夫不降，尊也。工不辭洗，卒洗，升實爵。工不興，左瑟，一人拜受爵。左瑟，辟主人授爵也。一人，無大師，則工之長者。○疏曰：有大師，則大師不辭洗，拜受爵。若無大師，則凡工不辭洗，拜受爵，故變言工與一人。假令大師左瑟先獻，若歌則後獻，亦先獻工人，是以鄭云「一人，無大師，則工之長者」。以《鄉飲酒》獻工時云一人「不興，受爵」，注云：「一人，工之長者也。」<sup>①</sup>大師爲歌者未得獻，先獻瑟工之長者也。主人阼階上拜送爵，薦脯醢，使人相祭。相，息亮反。○人，相者。○疏云：相者，即弟子也。工飲，不拜既爵，授主人爵。衆工不拜受爵，祭飲，辯有脯醢，不祭。祭飲，不興受爵，坐祭，坐飲。不洗，遂獻笙于西階上。不洗者，賤也。衆工而不洗矣，而衆笙不洗者，<sup>②</sup>笙賤於衆工，正君賜之，猶不洗也。○疏曰：工在上

① 「工」，原作「笙」，據元明本、寬文本、賀本改。  
② 「衆」，原作「著」，據寬文本、賀本改。

貴，君賜之，大師則爲之洗。笙賤，位在下，正使君賜之笙人，猶不爲之洗，況衆笙乎。笙一人拜于下，盡階，不升堂，受爵。主人拜送爵。階前坐祭，立飲，不拜既爵，升，授主人爵。衆笙不拜受爵，坐祭，立飲，辯有脯醢，不祭。主人以爵降，奠于筐，反升就席。亦揖讓以賓升，衆賓皆升。○疏曰：云「亦」者，亦前共大夫行禮訖，主人揖讓以賓升，大夫及衆賓皆升就席也。

### 右樂賓。○記：三笙一和而成聲。

和，戶卧反。○三人吹笙，一人吹和，凡四人也。《爾雅》曰：「笙小者謂之和。」○獻工與笙，取爵于上筐。既獻，奠于下筐。其笙，則獻諸西階上。奠爵于下筐，不復用也。今文無「與笙」。○疏曰：云「奠爵于下筐，不復用也」者，謂堂上不復用，無妨堂下更人用之。知者，獻獲及釋獲者皆取而獻之是也。《大射》獻服不氏用散不用爵者，彼君禮，與此異也。

### 主人降席自南方，禮殺由便。○殺，所界反。

○疏曰：上文主人受酢爵時禮盛，故主人降席自北方，啐

酒於席末亦然。今此立司正禮殺，故降席自南方，由便也。側降。賓不從降。作相爲司正，司正禮辭，許諾。主人再拜，司正答拜。爵備樂畢，將留賓以事，爲有解倦失禮，立司正以監之，察儀法也。《詩》云：「既立之監，或佐之史。」○解，古賣反。監，古咸反。○疏曰：「爵備」者，謂賓及衆賓與尊者并工笙並得獻也。云「樂畢」者，合樂訖也。「事」者，下有射事，旅無算之事也。司正中間爲射，變爲司馬，射訖，反爲司正，以監察儀法也。引《詩》者，證監與正爲一物也。主人升，就席。

### 右立司正。

司正洗觶，升自西階，由楹內適阼階上，北面受命于主人，洗觶者，當酌以表其位，顯其事也。楹內，楹北。○疏曰：受命，謂受主人請安賓之命。西階上北面請安于賓。傳主人之命。賓禮辭，許。司正告于主人，遂立于楹間以相拜。相，謂贊主人及賓相拜之辭。主人阼階上再拜，賓西階上答再拜，皆揖就席。爲已安也。今文「揖」爲「升」。司正實觶，降自西階，中庭北面坐奠觶，興，

退少立。奠觶，表其位也。少立，自修正，慎其位也。古文曰「少退立」。○疏曰：「北面坐奠觶」，《鄉飲酒》亦然，此二者皆臣禮，威儀簡。《燕禮》、《大射》皆司正南面奠觶者，彼是君禮，威儀多也。進，坐取觶，興，反坐，不祭，遂卒觶，興。坐奠觶，拜，執觶興，洗，北面坐奠于其所。今文「坐取觶」，無「進」，又曰「坐奠之拜」。興，少退，北面立于觶南。立觶南，亦其故擯位。○疏曰：案上未有擯位，此云「擯位」者，①案《射禮》云「擯者退中庭」，是擯者在中庭有位。《燕禮》、《大射》皆擯者爲司正，而此《鄉射》、《飲酒》皆云「作相爲司正」，相即擯者也，故知觶南者中庭，故擯位也。未旅。旅，序也。未以次序相酬，以將射也。旅則禮終也。○疏曰：旅，衆也，而言序者，謂衆以次序相酬。必於未旅而射者，旅則醉而禮終，恐不得射也。此大夫、士禮，將射，先行鄉飲酒，後行旅酬而已，故未旅而射，後乃始行旅酬。燕禮、大射，國君禮，故先行燕禮。雖行一獻，以其辨尊卑，故四舉旅。大射主爲射，故再拜訖即射，燕禮主爲燕，故三舉旅乃射，彼皆與此不同也。

右司正舉觶。○記：司正既舉觶而薦諸其位。薦於觶南。○疏曰：知不薦於觶北者，以司正觶南北面立，若薦觶北，與觶相隔，故知觶南位北也。

三耦俟于堂西，南面東上。司正既立，司射

選弟子之中德行道藝之高者以爲三耦，使俟事於此。○疏

曰：《記》云：「三耦者，使弟子，司射前戒之。」注云：「弟子，賓黨之少者也。前戒，謂先射請戒之。」○今按：司射

見下注。司射適堂西袒、決、遂，取弓于階西，

兼挾乘矢，升自西階，階上北面告于賓曰：

「弓矢既具，有司請射。」袒，徒旱反。決，占穴反。

挾，音協，一音子協反。乘，繩證反。○司射，主人之吏也。

於堂西袒、決、遂者，主人無次，隱蔽而已。袒，左免衣也。

決，猶闔也，以象骨爲之，著有大擘指，以鉤弦闔體也。遂，

射轉也，以韋爲之，所以遂弦者也。其非射時，則謂之拾。

拾，斂也。②所以蔽膚斂衣也。方持弦矢曰挾。乘矢，四

拾，斂也。②所以蔽膚斂衣也。方持弦矢曰挾。乘矢，四

①「云」，原作「立」，據寬文本、賀本改。

②「斂」，原作「飲」，據寬文本、賀本改。



矢也。《大射》曰：「挾乘矢於弓外，見鏃於弣，右巨指鉤弦。」古文「挾」皆作「接」。○闔，音開。著，丁略反，又直略反。擘，補革反。鞬，古侯反。見，賢遍反。鏃，子木反，又七木反。弣，芳甫反。○疏曰：《大射》云：「司射自阼階前曰：爲政請射。」注：「爲政，謂司馬。司馬，政官，主射禮。」諸侯之州長無司馬官，直言「有司請」以比司馬也。「司射，主人之吏」者，《大射》諸侯禮，有大射正爲長，射人次之，司射又次之，小射正又次之，皆是士爲之，則此大夫、士禮不得用士，故知是主人之吏爲之也。「主人無次」，對《大射》人君禮有次在東方，不須適堂西也。凡事無問吉凶皆袒左，是以《士喪》及《大射》皆袒左，唯有受刑袒右，故《覲禮》云「乃右肉袒」，注云「刑宜施於右」是也。「決，猶闔也，以象骨爲之」，蓋取其滑也。「著右大擘指，以鉤弦闔體」者，以右巨指鉤弦故也。射鞬著左臂，所以遂弦也。云「其非射時，則謂之拾」者，此篇及《大射》將射云「袒決遂」，射訖則云「說決拾」。於公雖射亦謂之拾，故《大射》云：「公就物，<sup>①</sup>小射正奉決拾以從。」彼亦臨時而云拾。以公射，故變文以見義也。下《記》云：「凡挾矢，於二指之間橫之」，如《大射》所云是其方也。若側持弓矢則名執，故下文云「司射猶袒決遂，左執弓，右執一个，兼諸弦，面鏃」，注云

「側持弓矢曰執。面，猶尚也。并矢於弦，尚其鏃」是也。云「乘矢四矢也」者，下云「司射摺三挾一个」，又《詩》云「四矢反兮」，是四矢曰乘，凡物四皆云乘也。下《記》云：「司射之弓矢與扑，倚於西階之西。」是豫陳之於彼，故此誘射而就彼取之也。有司，謂司馬也，諸侯之州長無司馬官，故直言有司也。賓對曰：「某不能，爲二三子。」許諾。爲，于僞反。○言某不能，謙也。二三子，謂衆賓已下。○疏曰：《投壺禮》賓固辭乃許者，彼因燕而爲之，再辭乃許。此爲衆習禮，不專爲己，故一辭即許。《大射》不請者，彼爲擇士而射，故不須云許，直告射節而已。司射適阼階上，東北面告于主人曰：「請射于賓，賓許。」司射降自西階，階前西面，命弟子納射器。弟子，賓黨之年少者也。納，內也。射器，弓、矢、決、拾、旌、中、籌、楅、豐也。賓黨東面，主人之吏西面。○少，申召反。楅，音福。○疏曰：賓黨西方東面，今以西面命之，明是賓黨。言弟子，故知少者。乃納射器，皆

①「公」，原作「矢」，據寬文本、賀本改。

在堂西。賓與大夫之弓，倚于西序，矢在弓下，北括。衆弓倚于堂西，矢在其上。倚，於綺反。括，古活反。○上，堂西廉。矢亦北括。○疏曰：序在堂上，故矢在弓下。堂西在堂下，故矢隨其弓而在堂西廉椽之上也。主人之弓矢在東序東。亦倚于東序也。矢在其下，北括。司射不釋弓矢，遂以比三耦于堂西。三耦之南，北面，命上射曰：「某御於子。」命下射曰：「子與某子射。」比，毗志反。○比，選次其才相近者也。古文曰「某從於子」。○近，附近之近。○疏曰：言「遂以」者，司射因上階前令弟子納射器，不釋弓矢，遂比三耦也。司正爲司馬，兼官，由便也。立司正爲泄酒爾，今射司正無事。司馬命張侯，弟子說束，遂繫左下綱。說，吐活反，又始銳反。○事至也。今文「說」皆作「稅」。○疏曰：上張侯時不繫左下綱，中掩束之，今弟子說其束而繫綱於植，事至故也。司馬又命獲者倚旌于侯中，爲當負侯也。獲者，亦弟子也，謂之獲者，以事名之。○疏曰：堂下位，主人之黨在東，賓弟子在西，下云「獲者由西方坐取旌」，是

賓黨弟子可知。獲者由西方坐取旌，倚于侯中，乃退。樂正適西方，命弟子贊工，遷樂于下。當辟射也。贊，佐也。遷，徙也。○辟，音避。弟子相工，如初人，降自西階，阼階下之東南，堂前三筭，西面北上坐。相，息亮反。筭，占可反。○筭，矢幹也。今文無「南」。○幹，古但反。○疏曰：「如初人」者，亦如上升堂時，相者亦在，左何瑟，面鼓，內弦，右手相也。案《矢人》注：「矢幹長三尺。」是去堂九尺也。樂正北面立于其南。北面，鄉堂，不與工序也。○鄉，許亮反。○疏曰：工西面北上，以南北爲序，樂正北面，則東西爲列，故云「不與工序也」。

右請射。○記：三耦者，使弟子，司射前戒之。弟子，賓黨之少者也。前戒，謂先射請戒之。○凡挾矢，於二指之間橫之。二指，謂左右手之第二指，此以食指，將指挾之。○將，子匠反。○疏曰：左右手皆挾之者，以云「二指之間橫之」，則知左右手也。以左臂指拓弓，右臂指鉤弦，故知挾矢以第一、第二指間。第二指爲食指，《左傳》云：「子公之食指

動」是也。第三指為將指，《左傳》云吳王闔閭傷於將指是也。知不在無名指間者，以無名指短，與將指不相應也。司射之弓矢與扑，倚于西階之西。扑，普卜反。○便其事也。○疏曰：司射適堂西袒、決、遂，取弓矢于階西，兼挾乘矢，則誘射之弓矢在階西矣。誘射訖，適堂西改取一個挾之，遂適階西取扑，至視算之時，於西階西釋弓矢，去扑，獻釋獲者，此亦在西階西，故鄭云「便其事也」。司射在司馬之北，司馬無事不執弓。以不主射故也。○疏曰：經不明言司射與司馬南北相當，故明之也。司射既袒、決、遂而升，司馬階前命張侯，遂命倚旌。著並行也。古文曰「遂命獲者倚旌」。○疏曰：案上文將射「適堂西袒、決、遂」，取弓矢告賓請射，其時司馬即階前令「倚旌」，此皆同時，故鄭云「著並行」事。如上經納射器及比三耦以前，<sup>①</sup>司射獨行事，後及司正為司馬，與司射並行事，故記人記之也。旌，各以其物。旌，總名也。雜帛為物，大夫士之所建也。言各者，鄉射或於庠，或於樹。<sup>②</sup>○疏曰：云「旌，總名也」者，以《周禮·司常》云九旗，對文「通帛為旛，雜帛為物，全羽為旟，析羽為

旌」各別。今名物為旌者，散文通，故云旌總名也。云「雜帛為物，大夫士之所建也」者，《司常》文。通帛者，通體並是絳帛，周所尚赤也。雜帛者，中絳，緣邊白也。白，殷之正色也。「鄉射或於庠，或於樹」者，諸侯鄉大夫是大夫，詢衆庶，故射則於庠也。諸侯州長是士，故春秋習射則於樹也。大夫士同建物而云「各」者，大夫五仞，士三仞也。無物，則以白羽與朱羽糒，杠長三仞，以鴻脰韜上二尋。糒，女又反。杠，音江。仞，音刃。韜，吐刀反。○無物者，謂小國之州長也。其鄉大夫一命，其州長士不命，不命者無物。此翻旌也，翻亦所以進退衆者。糒者，雜也。杠，撞也。七尺曰仞。鴻，鳥之長脰者也。八尺曰尋。今文「糒」為「縮」，「韜」為「翻」。○翻，徒刀反。撞，直江反。○疏曰：案《典命》：「子男之卿再命，大夫一命，士不命。」大夫一命得建物，士不命則無物，是以不得與上各以其物同，別為此旌。云「此翻旌也」者，據下文「士鹿

①「比」，原作「此」，據元明本、賀本改。  
②「樹」，原作「謝」，據寬文本、賀本改。下徑改。

中翻旌」也。《記》云「君國中射，以翻旌獲」，此不命士與國君同者，士卑不嫌，命士以上，尊卑自異也。云「亦所以進退衆」者，《喪大記》君葬時執翻居前詔傾虧也。云「七尺曰仞」者，無正文。鄭案《書傳》云：雉長三丈，高一丈，則牆高一丈。《祭義》云：「築宮仞有三尺。」牆高一丈，云「仞有三尺」，除三尺之外，只有七尺，故知七尺曰仞也。王肅則依《小爾雅》四尺曰仞，孔君則八尺曰仞，所見不同也。脰，項也。云「八尺曰尋」者，亦無正文。《冬官》云車有「六等」之數，云「受長尋有四尺」，長丈二而云尋有四尺，除四尺，則尋長八尺矣。

### 司射猶挾乘矢，以命三耦：「各與其耦，

讓取弓矢，拾。」拾，其劫反，除「決拾」之外皆同。

○猶，有故之辭。拾，更也。○更，音庚。○疏曰：《大射》有次，「三耦取弓矢於次」，注云：「取弓矢不拾者，次中隱蔽處。」則此無次取弓矢。拾者，拾更也，遞取弓矢見威儀故也。云「猶有故之辭」者，前已云司射兼挾乘矢，此云猶挾，欲見司射恒執弓矢未改之意。三耦皆袒、決、遂，<sup>①</sup>有司左執弣，右執弦，而授弓，有司，弟子納射器者也。凡納射器者，皆執以俟事。○疏曰：前有司

請射爲司馬，此有司爲弟子者，以有事者皆有司，故鄭注解上有司請射爲司馬。此經以納射器使弟子，不見出文，則弟子執射器入者，即使守之以授用者，故知有司還是弟子。遂授矢。受於納矢而授之。○疏曰：此授矢者，則上文

有司授弓者，以其或執弓或執矢，故授弓訖，復受矢而授之。三耦皆執弓，搯三而挾一个。未違俟處也。

搯，捷也，捷於帶右。○捷，<sup>②</sup>初洽反，下同。○疏曰：上云

「三耦俟于堂西」，又云「遂以比三耦於堂西」，此云「三耦皆

執弓，搯三而挾一个」，前後皆因前位，未違俟處，下文乃云

「三耦皆進，由司射之西立于其西南，東面北上」，是移本

位也。云「插於帶右」者，以左手執弓，右手抽矢而射，故知

插於帶右，《詩》云「左旋右抽」是也。司射先立于所

設中之西南，東面。三耦皆進，由司射之西

立于其西南，東面北上而俟。司射東面立于

三耦之北，搯三而挾一个。爲當誘射也。固東面

矣，復言之者，明卻時還。○復，扶又反，下「復言」同。

①「袒」，原作「袒」，據元明本、寬文本、賀本改。

②「捷」字，賀本皆作「插」。

○疏曰：云司射先在中西南，東面，今三耦立於其西南，司射因卻來向三耦之北，東面，明司射卻時，右還西南，東面也。揖進，當階，北面揖。及階，揖。升堂，揖。豫則鉤楹內，堂則由楹外，當左物，北面揖。豫，音樹，出注。○鉤楹，繞楹而東也，序無室，可以深也。周立四代之學於國，而又以有虞氏之庠爲鄉學，《鄉飲酒義》曰「主人迎賓于庠門外」是也。庠之制，有堂有室也。今言豫者，謂州學也，讀如成周宣榭災之榭，《周禮》作「序」。凡屋無室曰榭，宜從榭。州立榭者，下鄉也。左物，下物也。今文「豫」爲「序」，序乃夏后氏之學，亦非也。○下，遐嫁反。○今按：下《記》云「上射於右」，故此以左物爲下物也。○疏曰：凡行射禮，耦耦各相對揖，故司射誘射，發東面位揖進，當西階北面揖，及階揖，升堂揖，訖，東行向兩楹間物，須過西楹，是以豫則鉤楹內北過，以《記》云「序則物當棟」，物近北，故過由楹北也；堂則由楹外過而東行，以《記》云「堂則物當楣」，物近南，故過由楹南也。云「當左物」者，以南面爲正，東爲左物，北面又揖也。「繞楹而東」者，北而東也。云「序無室」者，據州立序而言也。云「周立四代之學於國」者，案《王制》云：有虞氏上庠，下庠，

夏后氏東序，西序，殷人左學，右學，周人東膠，虞庠。「周立四代」者，通己爲四代也，故周之小學爲有虞氏之庠，制而在西郊，立殷之右學爲瞽宗，亦在西郊，立夏后氏之東序爲東膠，而在王宮之東，而又以有虞氏之庠爲鄉學，其制有堂有室，又以序爲州學，則有堂無室也。庠則《鄉飲酒義》所謂庠門外是也，序則《周禮》·州長職云「會民而射于序」是也。云「讀如宣榭之榭」者，案《春秋》書「成周宣榭火」，以其無室，與《爾雅》「無室曰榭」同，故引以爲證也。云「下鄉」者，以庠有室，榭無室故也。不從今文爲序，又不破《學記》、《州長》及下記者以夏序有室，今州立夏序雖去室而猶取序名，是以鄭注《州長》亦以序爲州黨之學也。○今按：注疏所言四代之學，未有以見其必然，姑存其大略而已。但豫無室，堂有室，①則粗可見。蓋有室則四分其堂，去一以爲室，故淺；無室，則全得其四分以爲堂，故深也。及物揖。左足履物，不方足，還，視侯中，俯正足。方，猶併也。志在於射，左足至，右足還，併足則是立也。南面視侯之中，乃俯視併正其足。○併，步頂反。

① 上「無」，原作「有」；下「有」，原作「無」，均據賀本改。

○疏曰：云「志在於射」者，解足未正先視侯中之意。言「左足至」者，解左足履物也。「右足還，併足則是立也」者，解經「不方足，還」及「正足」之言也。若然，還時兼視侯中也。案《大射》納射器之下即言：「工人，士與梓人升自北階兩楹間，疏數容弓，若丹若墨，度尺而午。」此文略，亦當在納射器後即畫之也。○今按：此疏解注文不可曉，恐有脫誤。蓋注意若曰：左足履物，而右足不併，便還足南面視侯之中也。若便併右足，則是立矣。以志在於射，<sup>①</sup>故未暇立而先視侯，既視侯而後俯併其足也。不去旌，去，起呂反。○以其不獲。○疏曰：旌擬唱獲，今以誘射不唱獲，故不去也。誘射，誘，猶教也。將乘矢，將，行也，行四矢，象有事於四方。執弓不挾，右執弦。不挾，矢盡。南面揖，揖如升射。降，出于其位南，適堂西，改取一个挾之。改，更也，不射而挾之，示有事也。今文曰「適序西」。○疏曰：上文司射位設于所設中之西南，東面，今乃設位南而北迴「適堂西」者，<sup>②</sup>取教衆耦威儀之法故也。遂適階西，取扑，搯之以反位。扑，所以撻犯教者。《書》云：「扑作教刑。」○撻，

地達反。○疏曰：《書》謂教學之刑，此為教射法，教雖不同，用扑是，故引為證也。

### 右誘射。○記：射自楹間，物長如

筈，其間容弓，距隨長武。「自楹間」者，謂射於庠也。楹間，中央東西之節也。物，謂射時所立處也，謂之物者，物猶事也，君子所有事也。「長如筈」者，謂從畫之長短也。筈，矢幹也，長三尺，與跬相應，射者進退之節也。「間容弓」者，上下射相去六尺也。「距隨」者，物橫畫也。始前足至東頭為距，後足來合而南面為隨。武，跡也，尺二寸。○疏曰：「射於庠」者，以其言楹間，則是有室而物當楣也。「從畫之長短」者，南北之長短也。《祭義》云：「君子跬步而弗忘孝。」一舉足謂之跬，再舉足謂之步，步射者履物不過一跬，故知以三尺為限也。「尺二寸」者，中人之跡尺二寸，謂橫尺二寸也。序則物當棟，堂則物當楣。是制五架之屋也。正中曰棟，次曰楣，前曰廡。○架，音駕。廡，九僞

①「於」，原作「相」，據寬文本、賀本改。  
②「設」，原作「適」，據寬文本、賀本改。

反，又九委反。○疏曰：云「是制五架之屋也」者，庠序皆然，但有室、無室為異，餘見上，鉤楹內「由楹外」下。楚扑長如筈，刊本尺。刊其可持處。射者有過則撻之。過，謂矢揚中人。凡射時矢中人，當刑之。今鄉會衆賢以禮樂勸民，而射者中人，本意在侯，去傷害之心遠，是以輕之，以扑撻於中庭而已，《書》曰：「扑作教刑。」

司馬命獲者執旌以負侯，欲令射者見侯與旌，深有志於中。○令，力呈反。中，丁仲反。○疏曰：凡射，主欲中侯，中則使獲者舉旌唱獲，以是豫使見之。獲者適侯，執旌負侯而俟。俟，待也。今文「俟」為「立」。○疏曰：謂待司馬命去侯。司射還，當上耦，西面作上耦射。還，左還也。作，使也。○疏曰：上耦位在司射之西南，東面，司射還，欲西面，與上耦相當，故知左還迴身當之取便也。司射反位，上耦揖進，上射在左，並行。當階，北面揖，及階揖。上射先升三等，下射從之，中等。中，猶閒也。○閒，閒厠之間。○疏曰：反位者，反中西南東面位也。上射

升堂，少左。下射升，上射揖，並行。並，併也，併東行。○疏曰：「併東行」者，向物也。云「少左」者，言上射先升，少左，避下射升階也。皆當其物，北面揖，及物揖。皆左足履物，還視侯中，合足而俟。司馬適堂西，不決、遂、袒，執弓。不決、遂，因不射，不備。○疏曰：司射誘射行事，袒即決、遂，執弓挾矢。今司馬不射，故不備。大射，司馬正不射而袒、決、遂者，彼《大射》志於射故然，以其不為射仍不挾矢也。出于司射之南，升自西階，鉤楹，由上射之後，西南面立于物閒。右執簫，南揚弓，命去侯。鉤楹，以當由上射者之後也。簫，弓末也，《大射》曰：「左執射。」揚，猶舉也。○疏曰：「鉤楹」者，於西楹西而北，東行過，由上射之後，乃「西南面立于物閒」者，欲取南揚弓，向侯便故也。「右執簫」者，不可、手揚弓，故引《大射》曰「左執射」，當卻手，則右執簫者當覆手也。獲者執旌許諾，聲不絕，以至于乏，坐，東面偃旌，興而

① 「由」，原作「內」，據寬文本、賀本改。

俟。聲不絕，不以宮商，不絕而已，鄉射威儀省。偃，猶仆也。○省，所景反。仆，音赴。○疏曰：俟者，待射者發矢也。《大射》云：「負侯皆許諾，以宮趨，直西及乏南，又諾以商，至乏，聲止。」是其威儀多，此威儀省，故不也。司馬出于下射之南，還其後，降自西階，反由司射之南，適堂西，釋弓，襲，反位，立于司射之南。還，劉戶串反，一音環。○圍下射者，明爲二人命去侯。○疏曰：司馬由上射之後，立於物間，命去侯訖，物間南行，西向適階降，是其順矣。然若如此，則似直爲上射命去侯，是以東行圍繞下射而出其東，乃南行西折，而適西階，明爲二人命去侯也。司射進，與司馬交于階前，相左，由堂下西階之東，北面視上射，命曰：「無射獲，無獵獲。」上射揖，司射退，反位。無射之射，食亦反。○射獲，謂矢中人也。獵，矢從傍。○傍，①蒲郎反，或作旁，②。○疏曰：相左之時，在西階之西，司馬由北而西行，司射由南而東行，各以左相近。人謂獲者，「矢從傍」者，謂矢近人也。乃射，上射既發，挾弓矢，而后下射。射，拾發，以將乘

矢。后，後也，當從后。獲者坐而獲，射者中，則大言獲。獲，得也。射，講武田之類，是以中爲獲也。○疏曰：《詩》云「舍拔則獲」，謂射著禽獸爲獲。戰伐得囚俘亦曰獲，射著正鵠亦曰獲。舉旌以宮，偃旌以商。宮爲君，商爲臣，聲和律呂相生。○疏曰：「舉旌以宮」，大言獲也。「偃旌以商」，小言獲也。「宮爲君，商爲臣」，《樂記》文也。獲而未釋獲。但大言獲，未釋其算。卒射，皆執弓，不挾，南面揖，揖如升射。不挾，亦右執弦，如司射。上射降三等，下射少右從之，中等，並行，上射於左。降，下。○疏曰：此上射、下射，升與降，皆上射爲先，又上射升降皆在左。與升射者相左，交于階前，相揖。由司馬之南適堂西，釋弓，說決拾，襲而俟于堂西，南面東上。三耦卒射，亦如之。司射去扑，倚于西階之西，升堂，北面告于賓曰：「三耦卒射。」說，吐

① 傍，原作「旁」，據寬文本、賀本改。  
② 旁，原作「傍」，據寬文本、賀本改。



活反，又始銳反。○去扑乃升，不敢佩刑器即尊者之側。  
○疏曰：大射，司射不升堂，亦去扑乃告卒射者，國君尊也。賓揖。以揖然之。○疏曰：《大射》不見公揖，「然之」者，公尊故也。

右初射獲而未釋獲。○記：命負侯

者由其位，於賤者禮略。○疏曰：司馬自在己位而命之，是於賤者略也。經無司馬命負侯之位，故記之也。上射於右。於右物射。○始射，獲而未

釋獲；復，釋獲；復，用樂行之。射，食亦反，

又食夜反。復用之復，扶又反。○君子取人以漸。

○疏曰：始射獲而不釋獲，據三耦射時。云「復釋獲」者，據第一番射時。「復用樂」，據第三番射時。○凡

適堂西，皆出入于司馬之南，唯賓與大夫降階，遂西取弓矢。尊者宜逸，由便也。

司射降，搯扑，反位。司馬適堂西，袒執

弓，由其位南進，與司射交于階前，相左，升自西階，鉤楹，自右物之後，立于物間，西南面，揖弓，命取矢。揖，推之也。○疏曰：推手曰揖，

引手曰服。揖弓者，向侯而推之，以其命取矢故也。揚弓者，向乏而揚之，以其命去侯故也。獲者執旌許諾，

聲不絕，以旌負侯而俟。俟弟子取矢，以旌指教

之。司馬出于左物之南，還其後，降自西階，

遂適堂前，北面立于所設楅之南，命弟子設

楅。楅，猶幅也，所以承筈齊矢者。○疏曰：訓楅爲幅

者，義取若布帛有邊幅整齊之意，故云「所以承筈齊矢」。

又《大射》云：「既拾取矢，棚之。」注云：「棚，齊等之也。」

○今按：注脫「齊」字，據疏文補之。乃設楅于中庭，

南當洗，東肆。東肆，統於賓。○疏曰：《大射》云：

「小臣師設楅，司馬正東面以弓爲畢。」鄭注云：「畢，所以

教助執事者。」明此亦然。《記》云：「楅，龍首。」鄭注云：

「兩端爲龍首。」若然，則有首無尾，而言西上者，應有刻飾

記之爲首尾也。司馬由司射之南退，釋弓于堂

西，襲，反位。弟子取矢，北面坐委于楅，北

括，乃退。司馬襲進，當楅南，北面坐，左右

撫矢而乘之。乘，成證反。○撫，拊之也。就委矢，左

右手撫而四四數分之也。上既言襲矣，復言之者，嫌有事

即袒也。凡事升堂乃袒。○拊，者甫反。①數，所主反，下「俟數」同。○疏曰「北括」者，順射時矢南行也。「撫」者，撫拍之義。「左右手撫而四四數分之」者，謂以右手撫四矢於東，以左手撫四矢於西也。云「凡事升堂乃袒」者，堂下雖有事亦不袒，若司射，不問堂上堂下，有事即袒。司馬與司射遞行，事恐同，故明之也。若矢不備，則司馬又袒執弓如初，升，命曰：「取矢不索。」索，悉各反。○索，猶盡也。弟子自西方應曰：「諾。」乃復求矢加于楅。應，應對之應。復，扶又反。○增，故曰加。羈獲者許諾，至此弟子曰諾，事同，互相明。○羈，許亮反，又作嚮。○疏曰：上言獲者許諾，則弟子亦許諾，此言弟子應曰諾，則獲者亦應諾可知。

右取矢。○記：楅，長如筈，博三寸，

厚寸有半，龍首，其中蛇交，韋當。厚，戶豆

反。○博，廣也。兩端爲龍首，中央爲蛇身相交也。

蛇、龍，君子之類也。交者，象君子取矢於楅上也。直

心背之衣曰當，以丹韋爲之。司馬左右撫矢而乘之，分

委於當。○直，音值。乘，繩證反。○疏曰：直通身之

言，其楅兩頭爲龍首，於背上通身著當，言當心中央也。

「丹韋爲之」者，周尚赤也。「分委於當」者，若未分時總在於當，今則四四在一邊，不謂分訖乃置於兩當也。楅，髮，橫而奉之，南面坐而奠之，南北當洗。髮，虛求反。○髮，赤黑漆也。○疏曰：取向弟子持矢北面，故南面奠之，又恐南北不知遠近，故《記》言「當洗」，以爲南北之節，②楅橫而奉之。○今按：拳，當作「奉」，字之誤也。陸氏音拳，亦非是，今刪去。

司射倚扑于階西，升，請射于賓，如初，

賓許諾。賓、主人、大夫若皆與射，則遂告于

賓，適阼階上告于主人，主人與賓爲耦。與，

音預。③○言若者，或射或否，在時欲耳。射者釋己之

志，④君子務焉。大夫，尊者也。告賓曰：主人御于子。告

主人曰：子與賓射。○疏曰：射禮三而止。第一番，直司

射與三耦誘射，不釋算。第二番，三耦與衆耦俱射，釋算。

①「者」，疑誤，《廣韻》作「芳」。

②「記」，原作「祀」，據寬文本、賀本改。

③「預」，原作「領」，據寬文本、賀本改。

④「釋」，原作「澤」，據元明本、寬文本、賀本改。

第三番，兼有作樂爲射節。賓、主、大夫則或射或否，不定也。告賓及主人，皆約下大夫與士射之辭，以賓比大夫，以主人比士，尊賓之義也。遂告于大夫，大夫雖衆，皆與士爲耦。以耦告于大夫曰：「某御于子。」大夫皆與士爲耦，謙也。來觀禮，同爵自相與耦，則嫌自尊別也。大夫爲下射，而云「御于子」，尊大夫也。士，謂衆賓之在下者及群士來觀禮者也。禮：一命已下，齒於鄉里。○別，彼列反。○疏曰：上命三耦云：「命上射曰：『某御于子。』」命下射曰：「子與某子射。」今命大夫云「某御于子」，與上射同者，尊大夫，故雖爲下射，其辭不與下射同也。衆賓之內與賓俱至，則得主人之所命者也。其將射而至者，非主人之所命，直來觀禮者也。但是一命已下，莫問先後，而至皆齒于堂下，故鄭總云「士，謂衆賓之在下者及群士來觀禮者也」。《周禮·黨正》十月行正齒位之禮云：「一命齒于鄉里，再命齒于父族，三命不齒。」《鄉飲酒》注云：「此篇無正齒位之禮。」<sup>①</sup>則鄉射先行鄉飲酒之禮，亦無正齒位之法，而云「一命以下齒于鄉里」者，士立于下，與鄉里齒是其常法。諸侯之士無再命以上，若公卿大夫，自在尊東爲遵也。言衆賓之在下者，則堂上三賓不與大夫爲

耦矣，亦皆射，故下文云「衆賓與射者皆降」是也。西階上北面作衆賓射。作，使。司射降，摺扑，由司馬之南適堂西，立，比衆耦。比，毗志反。○衆耦，大夫耦及衆賓也。命大夫之耦曰：「子與某子射。」其命衆耦如三耦。○疏曰：言大夫之耦，唯謂堂下之士，言衆賓，則兼堂上三賓。命大夫耦之辭，即上文命下射之辭也。衆賓將與射者皆降，由司馬之南適堂西，繼三耦而立，東上。大夫之耦爲上，若有東面者，則北上。言若有者，大夫、士來觀禮及衆賓，多無數也。○疏曰：上文司馬位在司射之南，東面，衆賓若少，以南面爲正，若多不受，則西邊東面北上，大夫自在尊東爲遵，不在此東面之位也。賓、主人與大夫皆未降。言未降者，見其志在射。○見，賢遍反。○疏曰：此時未降，後三耦卒射乃降，復與耦具升射也。言「志在射」者，以射在堂上故也。司射乃比衆耦，辯。衆賓射者降，比之，耦乃徧。○徧，音遍。遂命三耦拾取

① 「正」，原作「止」，據寬文本、賀本改。

矢，司射反位。反位者，俟其袒，決、遂來。二、耦拾取矢，皆袒、決、遂，執弓，進立于司馬之西南。必袒、決、遂者，明將有射事。○疏曰：案上司射位在中西南，司馬位在司射南，今立于司馬之西南，亦東面北上也。○今按：此「拾取矢」字疑衍。司射作上耦取矢，作之者，還當上耦，<sup>①</sup>如作射。○疏曰：案上文司射作射之時左還，當上耦西面作上耦射。司射反位，上耦揖進，當楅北面揖，及楅揖。當楅，楅正南之東西。○疏曰：此上耦發位東行時，一南一北並行，及將至楅南，下耦在南，稍進，當前楅南，俱北面揖。其時上射稍西，下射稍東，東西相當也。上射東面，下射西面。上射揖進，坐，橫弓，卻手自弓下取一个，兼諸羽，順羽且興，執弦而左還，退反位，東面揖。卻，去逆反。○橫弓者，南路弓也。卻手由弓下取矢者，以左手在弓表，右手從裏取之，便也。兼并矢於羽，當順羽，既又當執弦也。順羽者，手放而下，備不整理也。不言毋周，在阼非君，周可也。○路，蒲北反。毋，亦作「無」，同。○疏曰：云「南路弓也」者，覆左手以執弓，卻右手以

取矢，便也。表，弓背也。覆手以執背，右手卻在裏取矢，<sup>②</sup>故云「便也」。言「順羽且興」者，謂以右手順羽之時則興，故云「且興」也。言「左還」者，以左手向外而西回也。「東面揖」者，揖下射使取矢也。《大射》云：「左旋，毋周，反面揖。」鄭注云：「左還，反其位。毋周，右還而反東面也。君在阼，還周則下射將背之。」此直言「左還，反位」，不言毋周，明還周可也。○今按：《燕禮》云「司正「右還」，疏云：「以右手向外」者，以莫觶處為內而言也。《鄉射》云「左還」，疏云：「以左手向外」者，以所立處為內而言也。《大射》云：「毋周」者，既以左手向外，繞其所立之處，及至將帀之時，乃復以右手向外而轉身也。《鄉射》注云「周可也」，則以左手向外繞其立處，以至於匝，乃不復以右手向外，而即便轉身也。《燕禮》則右還而未至於匝，故不言周與不周也。下射進，坐，橫弓，覆手自弓上取一个，興，其他如上射。覆手由弓上取矢者，以左手在弓裏，右手從表取之，亦便。○覆，芳伏反。○疏曰：上射在

①「上」，原作「主」，據元明本、寬文本、賀本改。  
②「右」，原作「一」，據寬文本、賀本改。

西云「南路弓」，此在東而不言路弓，但云「覆手自弓上取矢」，則卻左手向上執弓而南路可知。○今按：上文東向覆手南路弓，則弦向身，此云西向卻手南路弓，則弦向外。既拾取乘矢，揖，皆左還，南面揖，皆少進，當楅南，皆左還，北面，搯三挾一个。楅南，鄉當楅之位。○疏曰：上云「進，當楅北面揖」，今至此位，皆還北面也。揖，皆左還，上射於右。上射轉居右，使其反位也。下射左還，少南行，乃西面。○疏曰：射時升降，上射皆居左，彼自堂西，不復庭位故也。此復庭位，故上射轉在右也。「左還少南行乃西面」者，以其初北面時，東西相當，今西行宜並，故下射少南行，乃西面取並行故也。與進者相左，相揖，反位。相左，皆由進者之北。○疏曰：以其進取矢者東行，此則西行，由進者之北，則得相左也。三耦拾取矢，亦如之。後者遂取誘射之矢，兼乘矢而取之，以授有司于西方，而後反位。取誘射之矢，挾五个，弟子逆受於東面位之後。○疏曰：上耦已取矢，復云「三耦」者，三耦之中除上耦外，實二耦也。「挾五个」者，以前拾取矢皆搯三挾一个，乃反

位，此則先取四矢亦搯三挾一个，乃並取誘射四矢兼挾之，故五个也。有司，即弟子納射器者，因留主授受于堂西西方，今見下耦將司射矢來向位，仍西面，弟子即往逆受之，訖，下射乃反向東面之位，是以鄭亦云「弟子逆受於東面位之後」也。○今按：後者兼取誘射之矢，則是下耦之下射也。此疏文不備。又東面位，蓋在司馬之西南。衆賓未拾取矢，皆袒、決、遂，執弓，搯三挾一个，由堂西進，繼三耦之南而立，東面北上。大夫之耦爲上。未，猶不也。衆賓不拾者，未射，無楅上矢也。言此者，嫌衆賓三耦同倫，初時有射者，後乃射有拾取矢，禮也。○疏曰：第一番射時未有拾取矢，禮以其第一番。唯有三耦射，無賓射法，楅上無矢可取故也。必初時已有射者，其後衆賓又射，乃有楅上之矢可拾取也。司射作射如初，一耦揖升如初。司馬命去侯，獲者許諾，司馬降，釋弓反位。去，起呂反。○疏曰：命去侯，許諾，不言如初者，初命去侯時，獲者許諾，聲不絕，以至于乏。再番，三番命去侯，獲者直許諾，無絕聲，故不言如初。

右再請射。○記：取誘射之矢者，既

拾取矢，而後兼誘射之乘矢而取之。謂反

位已禮成，乃更進取之，不相因也。○疏曰：云「不相

因」者，既自拾取己之乘矢，反位東西望訖，上射乃更向

前兼取誘射之矢，禮以變爲敬也。○今按：上經云「後

者遂取誘射之矢」，此注乃云反位，「禮成乃更進取之」，

似相矛盾。其上「射」字亦與「後者」二字不相應，當作

下耦之下射。○侍射則約矢。注見《少儀》品

節章。①

司射猶挾一个，去扑，與司馬交于階前，

升，請釋獲于賓。猶，有故之辭。司射既誘射，恒執

弓挾矢以掌射事，備尚未知，當教之也。今耦卒射，衆足

以知之矣，猶挾之者，君子不必也。賓許，降，搢扑，

西面立于所設中之東，北面命釋獲者設中，

遂視之。視之，當教之。○疏曰：教之，謂教其釋算，安

置左右及數算告勝負之事。釋獲者執鹿中，一人

執算以從之。鹿中，謂射於櫛也，於庠當兕中。○疏

曰：以州長是士，射于櫛，鄉大夫是大夫，爲之射于庠，下

《記》云士則「鹿中」，大夫「兕中」也。釋獲者坐設中，

南當楅，西當西序，東面，興受算，坐實八算

于中，橫委其餘于中西，南末，興，共而俟。

共，九勇反。○興，還北面受算，反東面實之。○疏曰：

「南當楅」，南北節。「西當西序」，東西節。以其所納射器

皆在堂西，執中與算皆從堂西來，向西序之南，南面，故執

中者既東面坐，設訖，興，還向北面受算，迴向東面實之也。

司射遂進，由堂下北面命曰：「不貫不釋。」

貫，古亂反。○貫，猶中也，不中正不釋算也。古文「貫」作

「關」。○中，丁仲反。正，音征。○疏曰：中者，貫穿布

侯，故以中爲貫也。上射揖，司射退反位。釋獲

者坐取中之八算，改實八算于中，興，執而

俟。執所取算。○疏曰：八算者，人四矢，一耦八矢，雖

不知中否，要須一矢則一算。改實八算，擬後來者用之。

乃射，若中，則釋獲者坐而釋獲，每一個，釋

一算。上射於右，下射於左，若有餘算，則反

①「品」，原作「儀」，據寬文本、賀本改。

委之。中，丁仲反。○委餘算，禮尚異也。委之，合於中西。又取中之八算，改實八算于中，興，執而俟。

右再射釋獲。○記：鹿中，髹，前足跪。鑿背容八算，釋獲者奉之，先首。奉，芳勇反。○「前足跪」者，象教擾之獸受負也。○擾，而小反。○疏曰：服不氏教擾猛獸，其有合負物者，教擾則屈前足以受負，<sup>①</sup>若今駝受負則四足俱屈之類也。箭籌八十，箭，篠也。籌，算也。「籌八十」者，略以十耦爲正，貴全數。其時衆寡從賓。○篠，息了反。長尺，有握，握素。握，本所持處也。素，謂刊之也，刊本一膚。○刊，苦干反。○疏曰：「長尺」復云「有握」，則握在一尺之外，此籌尺四寸矣。《公羊》何休云「側手爲膚」，又《投壺》云「室中五扶」，注云：「鋪四指曰扶，一指案寸。」皆謂布四指，一指一寸，四指則四寸也。○衆賓不與射者不降。與，音預。○不以無事亂有事。古文「與」爲「豫」。大夫降，立于堂西以俟射。尊大夫，不使久列於射位。○疏曰：謂主

人、大夫降時，賓主先射，大夫則立于堂西，其耦在司馬之西射位，大夫且立于堂西，射至，乃取其耦共升射。

三耦卒射，賓、主人、大夫揖。皆由其階降，揖。主人堂東袒、決、遂，執弓，搯三挾一个，賓於堂西亦如之。皆由其階，階下揖，升堂揖。主人爲下射，皆當其物北面揖，及物揖，乃射。卒，南面揖，皆由其階，階上揖，降階揖。賓序西，主人序東。皆釋弓，說決、拾，襲，反位，升，及階揖，升堂揖，皆就席。或言堂，或言序，亦爲庠、榭互言也。賓、主人射，大夫止于堂西。○疏曰：上云「榭則鉤楹內」，謂射於榭者也；「堂則由楹外」，謂射於庠者也。此當有鄉大夫射于庠，亦有州長射於序，故今袒、決、遂，則言堂東西見在庠也，在榭亦然。釋弓說決、拾，則言序東序西，序則榭也，在庠亦然，皆互言之也。云「大夫止于堂西」者，《記》云「大夫降，立于堂西以俟射」也。○今按：後《記》有「君袒朱襦」，大夫「袒薰襦」，

①「擾」，原作「優」，據寬文本、賀本改。

「君在，大夫射則肉袒」。然則，士射皆肉袒與？大夫袒、決、遂，執弓，搯三挾一个，由堂西出于司射之西，就其耦。大夫爲下射，揖進，耦少退，揖如三耦。及階，耦先升，卒射，揖如升射，耦先降。降階，耦少退。皆釋弓于堂西，襲，耦遂止于堂西，大夫升就席。耦於庭，不並行，尊大夫也。在堂如上射之儀，近其事，得申。衆賓繼射，釋獲皆如初，司射所作唯上耦。於是言唯上耦者，嫌賓、主人射亦作之。《大射》三耦卒射，司射請于公及賓。○疏曰：引《大射》者，公尊也。《記》云「賓、主人射，則司射擯升降」，是雖不作，猶爲擯相之，但不請也。卒射，釋獲者遂以所執餘獲，升自西階，盡階，不升堂，告于賓曰：「左右卒射。」降，反位，坐委餘獲于中西，興，共而俟。司射不告卒射者，釋獲者於是事，宜終之也。餘獲，餘算也，無餘算則空手耳。俟，俟數也。

右賓主大夫衆賓射。○記：賓、主人

射，則司射擯升降，卒射即席，而反位卒事。擯賓、主人升降者，皆尊之也。不使司馬擯其升降，主於射。○大夫與士射，袒薰襦。薰，許云反。○不肉袒，殊於耦。耦少退于物。下大夫也，既發則然。

司馬袒、決，執弓升，命取矢，如初。獲者許諾，以旌負侯，如初。司馬降，釋弓反位，弟子委矢，如初。大夫之矢，則兼束之以茅，上握焉。兼束大夫矢，優之，是以不拾也。束於握上，則兼取之，順羽便也。握，謂中央也。不束主人矢，不可以殊於賓也。言「大夫之矢」，則矢有題識也。肅慎氏貢楛矢，銘其括。今文「上」作「尚」。○題，大兮反。識，申志反。楛，音戶，字又作「枯」。<sup>①</sup>○疏曰：握上，則兼取之順持之處，今束於握之上，取持於中央握之，向下順羽便也。主人鄉大夫，則是大夫官，當束之，不敢殊別於賓。若主人是州長，則士自然不束也。○今按：注、疏「上握」之說未

①「枯」，原作「楛」，據寬文本、賀本改。



明。疑「束之」之處當在中央手握處之下，使握在上，則去鏃近而去羽遠，取之便易也。司馬乘矢如初。司射

遂適西階西，釋弓，去扑，襲，進由中東，立于

中南，北面視算。釋弓去扑，射事已。○疏曰：云「射

事已」，此始再番射未已而言已者，前不釋獲，今釋獲之功成則爲已，是以《記》注以「釋弓矢視算獻釋獲者」爲休武主文。休武者，射訖數算。主文者，洗爵獻釋獲者是也。釋

獲者東面于中西坐，先數右獲。數，所主反，下

同。○固東面矣，復言之者，爲其少南就右獲。○爲，于僞

反。○疏曰：釋獲者在中西，東面；釋算之時，賓黨於右，主黨于左。今將數算宜就之，是以少南就右獲，更東面也。

二算爲純。如字，《禮記》音全。○純，猶全也。耦陰

陽。○疏曰：陰陽對合，故二算爲耦陰陽也。一純以

取，實于左手，十純則縮而委之。縮，從也，於數

者東西爲從。古文「縮」皆爲「蹙」。○從，子容反。蹙，子

六反。○疏曰：凡言從橫者，南北爲從，東西爲橫。今釋

算者東面而言從橫，則據數算之人東面爲正，是以東西者爲從，南北者爲橫也。每委異之。易校數。○易，以豉

反。有餘純，則橫於下。又異之也，自近爲下。一

算爲奇，奇則又縮諸純下。奇，居宜反，下同。

○奇，猶虧也。又從之。興，自前適左，東面。起由

中東就左獲，少北於故，東面鄉之。○鄉，許亮反。○疏

曰：云「少北於故」，故則右算也。又移至左算之後，東面

鄉之，是以云少北於故。坐，兼斂算，實于左手，一

純以委，十則異之。變於右。○疏曰：右則一一取

之於地，實於左手。此則總斂於左手，一一取之於左手，委

於地，是變也。必變之者，禮以變爲敬也。其餘如右

獲。謂所縮所橫。司射復位，釋獲者遂進取賢

獲，執以升自西階，盡階，不升堂，告于賓。

賢獲，勝黨之算也。齊之而取其餘。○疏曰：以算爲獲

者，以其唱獲則釋算，故名算爲獲。若右勝，則曰「右

賢於左」；若左勝，則曰「左賢於右」。以純

數告。若有奇者，亦曰「奇」。賢，猶勝也。言賢

者，射之以中爲雋也。假如右勝，告曰：「右賢於左若干純，

若干奇。○中，丁仲反。○疏曰：「若干」者，數不定之辭。

凡數法，一二已上得稱若干，奇則一也，一外無若干。鄭亦

言「若干」者，因純有「若干」字而衍也。○今按：孔穎達說與此不同，詳見上篇。<sup>①</sup>若左右鈞，則左右皆執一算以告曰「左右鈞」。降復位，坐，兼斂算，實八算于中，委其餘于中西，興，共而俟。疏曰：此將爲第三番射，故豫設之，或實或委，一如前法也。

右取矢視算。○記：司射釋弓矢視算，與獻釋獲者釋弓矢。惟此二事，休武主文，

釋弓矢耳。然則，擯升降不釋。

司射適堂西，命弟子設豐。將飲不勝者，設

豐所以承其爵也。豐形蓋似豆而卑。○飲，於鳩反。○疏曰：案《燕禮》君尊有豐，此云承爵，豐則兩用之。《燕禮》注：「豐形似豆，卑而大。」此不言大，彼以承尊，故言大，此承爵，不言大或小耳。弟子奉豐升，設于西楹之西，乃降。勝者之弟子洗觶升酌，南面坐奠于豐上，降，袒執弓，反位。勝者之弟子，其少者也。耦不酌，下無能也。酌者不授爵，略之也。執弓反射位，不俟其黨，已酌有事。○少，詩召反。下，退嫁反，下「相下」同。○疏曰：案下文「三耦及衆射者皆與其耦進立

于射位」，今酌者不待其黨與俱進而先反位者，由已酌酒有事訖，其黨未得司射命，又無事，不得共酌者同就射位也。司射遂袒執弓，挾一个，搯扑，北面于三耦之南，命三耦及衆賓勝者皆袒、決、遂，執張弓。執張弓，言能用之也。右手執弦，如卒射。○疏曰：上文卒射執弓不挾，右執弦。不勝者皆襲，說決拾，卻左手，右加弛弓于其上，遂以執弣。弛，尸紙反。弣，芳甫反。○固襲說決拾矣，復言之者，起勝者也。執弛弓，言不能用之也。兩手執弣，又不得執弦。○疏曰：前降堂時既襲說決拾矣，至此復言者，以此起發勝者袒、決、遂，能用也。司射先反位，居前俟所命來。○疏曰：以衆射者皆止於堂西，未向射位，而司射先反位，於下文衆耦等乃來就位，是得命即來。三耦及衆射者皆與其耦進立于射位，北上。司射作升飲者，如作射。一耦進揖，如升射，及階，勝者先升堂，少右。先升，尊賢也。少右，辟飲者也，亦相

①「上」，原作「下」，據寬文本、賀本改。

飲之位。○辟，音避。○今按：右，自北面而言，則東也。所以辟當飲者，使得升取觶也。「相飲之位」，謂飲之者立於飲者之右也。不勝者進，北面坐取豐上之觶，興，少退，立卒觶，進，坐奠于豐下，興，揖。立卒觶，不祭不拜，受罰爵，不備禮也。右手執觶，左手執弓。○疏曰：此無正文，以祭禮皆左手執爵，用右手以祭，故知此亦然也。不勝者先降，後升先降，略之，不由次。○疏曰：射時，升降皆上射在先，今以其不勝略之，故不由次第也。與升飲者相左，交于階前，相揖，出于司馬之南，遂適堂西，釋弓，襲而俟。俟復射。○疏曰：謂俟第三番射也。有執爵者，主人使贊者代弟子酌也。於既升飲而升自西階，立于序端。○疏曰：以初使勝黨弟子酌酒於豐上以發首，故使弟子。今云「有執爵者」，明主人使贊者代弟子酌於豐上，以次至終也。贊者，謂主人之賤不射者，於上耦既飲訖，贊者乃升自西階，酌訖，奠於豐上而立于序端也。「立于序端」，文出《大射》。執爵者坐取觶，實之，反奠于豐上，升飲者如初。每者輒酌，以至於徧。三耦卒飲，賓、主

人、大夫不勝，則不執弓。執爵者取觶降洗，升實之，以授于席前。優尊也。受觶以適西階上，北面立飲。受罰爵者，不宜自尊別。卒觶，授執爵者，反就席。大夫飲，則耦不升。以賓主人飲，耦在上，嫌其升。若大夫之耦不勝，則亦執弛弓，特升飲。尊者可以孤無能。衆賓繼飲，射爵者辯，乃徹豐與觶。徹，猶除也。設豐者反豐於堂西，執爵者反觶於篚。

右飲不勝者。○記：主人亦飲於西階上。就射爵而飲也，已無俊才，不可以辭罰。○疏曰：此謂主人在不勝之黨受罰爵之時也。射爵，西楹西豐上之爵也，以主人尊，恐不受罰爵，故言不可辭罰也。○禮射不主皮。主皮之射者，勝者又射，不勝者降。禮射，謂以禮樂射也，大射、賓射、燕射是矣。不主皮者，貴其容體比於禮，其節比於樂，不待中爲雋也。言不勝者降，則不復升射也。主皮者無侯，張獸皮而射之，主於獲也。《尚書傳》曰：戰鬪不可不習，故於蒐狩以閑之也。閑之者，習之也。貫之者，習

之也。凡祭，取餘獲陳於澤，然後卿大夫相與射也。中者，雖不中也取；不中者，雖中也不取。何以然？所以貴揖讓之取也，而賤勇力之取。嚮之取也於囿中，勇力之取也。今之取也於澤宮，揖讓之取也。澤，習禮之處，非所於行禮，其射又主中，此主皮之射與？天子大射張皮侯，賓射張五采之侯，燕射張獸侯。○主皮之射與，平聲。○疏曰：云「以禮樂射」者，射時有禮兼作樂，故連樂言之。不言鄉射者，鄉射用采侯，賓射中兼之也。「其節比於樂」者，此即九節、七節、五節應於樂節是也。云「言不勝者降不復升射也」者，據主皮射者也。禮射二番不勝，仍待後番復升射也。○今按：《書傳》之文不具，蓋曰取蒐狩之餘獲陳於澤。今之中者，鄉雖不中亦取也。今之不中者，鄉雖中亦不取也。○勝則洗而以請，客亦如之。注見《少儀》品節章。

### 司馬洗爵，升，實之以降，獻獲者于侯。

鄉人獲者賤，明其主以侯爲功得獻也。○疏曰：案《大射》云：「司馬正洗散，遂實爵，獻服不。服不侯西北三步，北面拜受爵。」注云：「近其所爲獻。」彼國君禮，使服不士官唱獲，故就其所爲唱獲獻之。此鄉人獲者賤，故獻於侯，明

以侯爲功得獻也。薦脯醢，設折俎，俎與薦皆三祭。皆三祭，爲其將祭侯也，祭侯三處也。○處，呂慮反。

○疏曰：「三處」者，下文有與左、中是也。獲者負侯北面拜受爵，司馬西面拜送爵。負侯，負侯中也。

拜送爵不同面者，辟正主也。其設薦俎，西面錯，以南爲上。爲受爵于侯，薦之於位。古文曰「再拜受爵」。○疏曰：以下云「適右个」，又「適左个」，後言「中」，明先居中可知。上文正主獻賓，獻衆賓皆北面，與受獻者同面，此不同面，辟正主也。獲者，據文東面，而云西面錯，據設人而言也。《特牲》、《少牢》東面籩豆，皆以南方爲上，此亦然也。此云「負侯北面拜受爵」，是受爵于侯。下云「左个之西北三步，東面設薦」，是薦之於位也。不薦於侯者，以其酒在人手，可得就侯獻之，薦乃設之於地。若在侯所，則是祭侯，何名獻獲也？若大射，則獻與薦俱在乏，乃適侯祭之，君禮與此異也。獲者執爵，使人執其薦與俎從之，適右个，設薦俎。个，音幹。○獲者以侯爲功，是以獻焉。人，謂主人贊者，上設薦俎者也。爲設籩在東，豆在西，俎當其北也。言使設，新之。○疏曰：此將祭侯也。以獲者卑賤，因侯有功乃得獻。今還以得獻之酒獻

侯，故云「是以獻」也。侯以北面爲正，依《特牲》、《少牢》皆籩在右，故知籩在東右廂，豆在西左廂，可知也。鄭意嫌更使人設之，其實薦此者仍前人，而云使人設薦俎，示新之而已。獲者南面坐，左執爵，祭脯醢，執爵興，取肺，坐祭，遂祭酒。爲侯祭也，亦二手祭酒反注，如大射。○疏曰：此正祭侯，故獲者南面鄉侯祭，故鄭云「爲侯祭也」。《大射》云：「獲者左執爵，右祭薦俎，二手祭酒。」鄭注云：「二手祭酒者，南面於俎之北，當爲侯祭於豆間，爵反注，爲一手不能正也。此薦俎之設，如於北面人焉。此祭亦然也。」興，適左个，中亦如之。先祭左个，後中者，以外即之，至中，若神在中也。左个之西北三步，東面設薦俎。獲者薦右東面立飲，不拜既爵。不就乏者，明其享侯之餘也。立飲薦右，近司馬，於是司馬北面。○疏曰：若就乏，則已所當得。今不就乏而近侯者，明享侯之餘。知「於是司馬北面」者，此約獻釋獲者司射之位，案下文司射獻釋獲者，「釋獲者薦右東面拜受爵，司射北面拜送爵」，故知此時司馬亦北面也。若然，釋獲者在司射之西，北面立飲。此獲者不北面飲者，案《大射》注：「此鄉受獻之位也，不北面者，嫌爲侯卒爵。」

此亦然，故不北面也。司馬受爵，奠于篚，復位。獲者執其薦，使人執俎從之，辟設于乏南。辟，扶益反，注「辟之」，「辟舉」及下「左辟薦」同。○遷設薦俎就乏，明已所得禮也。言辟之者，不使當位，辟舉旌，偃旌也。設于南，右之也。凡他薦俎，皆當其位之前。○疏曰：前設近侯，見享侯之餘，此近乏者，乏者已所有事之處，<sup>①</sup>遷近乏是明其已所得禮故也。「右之」者，以右取之便也。凡燕及食并祭祀之薦俎，皆當其位之前，唯此與大射獲者與釋獲者薦俎辟設，不當前也。獲者負侯而俟。疏曰：獲者既受獻，負侯而俟第三番射也。司射適階西，釋弓矢，去扑，說決、拾、襲、適洗，洗爵，升，實之以降，獻釋獲者于其位少南。薦脯醢，折俎，有祭。不當其位，辟中。○疏曰：祭者，祭肺也。俎有祭肺，以爲將食而祭，故言有祭也。「辟中」者，以釋獲者位在中西，故獻之於其位少南，以辟中也。釋獲者薦右東面拜受爵，司射北面拜送爵。

①「者」，寬文本、賀本作「爲」。

釋獲者就其薦坐，左執爵，祭脯醢，興，取肺，坐祭，遂祭酒，興；司射之西，北面立飲，不拜既爵。司射受爵，奠于筐。釋獲者少西辟薦，反位。辟薦少西之者，爲復射妨司射視算也，亦辟俎。○疏曰：上獻獲者訖，獲者執其薦，使人執俎從之，設于乏南，此亦當與彼同也。

### 右獻獲者。○記：獲者之俎，折脊、

脅、肺、臠。臠，奴報反。○臠，若膊、胙、臠之折，<sup>①</sup>

以大夫之餘體。○膊，音純。胙，音格，又音各。臠，苦

角反。○疏曰：上賓、主人已用肩、臂，唯有臠及膊、胙、

臠，若脊脅骨多，尊卑皆有，自臠已下各得其一。今鄭

具言之，欲見所取之不定。若無大夫，則獲者依經得

臠。若大夫一人，則大夫得臠，獲者得膊。若大夫二

人，則獲者即得胙。若大夫三人，獲者即得臠。<sup>②</sup>若大

夫公卿更多，則折之不得整體，或更取餘體也。東方

謂之右个。个，音幹。○侯以鄉堂爲面也。釋獲

者之俎，折脊、脅、肺，皆有祭。皆，皆獲者也。

祭，祭肺也。以言肺，謂判肺不離，嫌無祭肺。○判，寸

本反。○疏曰：「判肺不離」者，即經中「脊、脅、肺」，是切肺與祭肺同，更不別有祭肺，唯釋獲者與主獲者皆別有祭肺也。然則，上肺即舉肺。案《公食大夫》有切肺與祭肺者，優賓，使賓祭，此二者亦以舉肺爲祭肺者，略賤者之義。

司射適堂西，袒、決、遂，取弓于階西，挾一个，搯扑以反位。爲將復射。司射去扑，倚

于階西，升，請射于賓，如初，賓許。司射降，

搯扑由司馬之南適堂西，命三耦及衆賓皆

袒、決、遂，執弓，就位。位，射位也。不言射者，以

當序取矢。○疏曰：射位在司射之西南東面者也。司射

先反位。言先三耦及衆賓也。既命之，即反位，不俟之

也。晁不言先三耦，未有拾取矢位，無所先。○先，悉薦

反，下同。○疏曰：凡射，大射與鄉射各有三位，此鄉射無

次，有堂西取弓矢，袒、決、遂及比耦之位，又有三耦射位在

①「膊」，據下「膊，音純」，疑爲「膊」之誤。

②「臠」，原作「般」，據寬文本，賀本改。

司射位西南，又有拾取矢及再番射位，是三位。大射有次，次內有袒、決、遂，取弓矢之位，又有堂東次比耦之位，又有射位并拾取矢之位，是亦有三位。但君臣禮異，故位事不同也。三耦及衆賓皆袒、決、遂，執弓，各以其耦進，反于射位。以，猶與也。今文「以」爲「與」。司射作拾取矢，三耦拾取矢如初，反位。賓、主人、大夫降揖如初。主人堂東，賓堂西，皆袒、決、遂，執弓，皆進階前揖。南面相俟而揖行也。○疏曰：言「南面」者，謂賓主各於堂東西，南面立相待。言「揖行」者，謂各於堂上北面相見而揖，揖訖行向楅也。及楅揖，拾取矢如三耦。及楅，當楅東西也。主人西面，賓東面，相揖拾取矢，不北面揖，由便也。○疏曰：賓主出堂，東西相見揖訖，東西行至楅所。三耦及衆賓皆於楅南，北面揖，及楅揖。此則無楅，南北面揖，賓主各由便也。卒，北面搢三挾一个，亦於三耦爲之位。○疏曰：此「搢三挾一个」與上再請射章「耦取矢訖搢三挾一个」同，又同處，故云「亦於三耦爲之位」也。揖退。皆已揖左還，各由其塗反位。○疏曰：謂賓主北面揖退之

時，賓主皆左還相背，各向堂塗，反堂東西之位也。賓堂西，主人堂東，皆釋弓矢，襲，及階揖，升堂揖，就席。將袒先言主人，將襲先言賓，尊賓也。○疏曰：袒是盡敬之事，襲是修容之禮，故上經將袒先言主人，此經襲則先言賓，是尊賓故也。大夫袒、決、遂，執弓，就其耦。降袒、決、遂於堂西，就其耦於射位，與之拾取矢。○疏曰：知「於堂西」者，上章賓、主人、大夫降，賓與大夫皆堂西袒、決、遂故也。揖皆進，如三耦。耦東面，大夫西面。大夫進坐，說矢束，說，吐活反，又始銳反。○說矢束者，下耦，以將拾取。○疏曰：云「大夫西面」者，爲下射故也。興，反位，而后耦揖進坐，兼取乘矢，順羽而興，反位揖。兼取乘矢者，尊大夫，不敢與之拾也。相下相尊，君子之所以相接也。○疏曰：此大夫與耦取矢踏弓、覆手、仰手，一如上耦法，其揖退之儀亦如上左還而西也。大夫進坐，亦兼取乘矢，如其耦。北面，搢三挾一个，亦於三耦爲之位。揖退。耦反位，大夫遂適序西，

釋弓矢，襲，升即席。大夫不序於下，尊也。衆賓繼拾取矢，皆如三耦，以反位。

右三請射。○記：大夫說矢束，坐說之。說，吐活反，又始銳反。○明不自尊別也。○別，彼列反。

司射猶挾一个以進，作上射如初，一耦揖升如初。進，前也。曷言還當上耦西面，是言進，終始互相明也。今文或言作「升射」。○疏曰：曷，謂上番將射時。司馬升，命去侯，獲者許諾。司馬降，釋弓反位。司射與司馬交于階前，去扑，襲，升，請以樂樂于賓，賓許諾。司射降，摺扑，東面命樂正曰：「請以樂樂于賓。」賓許。樂，下字音洛。○東面，於西階之前也。不就樂正命之者，傳尊者之命於賤者，遙號令之可也。樂正亦許諾，猶北面不還，以賓在堂。○傳，直專反。○疏曰：案《大射》云：「司射命樂正用樂，樂正曰：諾。」此不言者，文不具也，故注言之。云「猶北面不還以賓在堂」者，此亦無文。樂正位東階東南北面，大師位東北西面，賓在堂南面，樂正猶北

面，不還西面，是以下文特云「樂正東面命大師」，明此時不西面受命矣。司射遂適階間，堂下北面命曰：

「不鼓不釋。」不與鼓節相應，不釋算也。鄉射之鼓五節，歌五終，所以將八矢，一節之間當拾發，四節四拾，其一節先以聽也。○疏曰：《射人》云：王以《騶虞》九節，諸侯以《狸首》七節，卿、大夫以《采蘋》五節，士以《采芣》五節。是卿、大夫、士同五節。下《記》云：「歌《騶虞》若《采蘋》，皆五終。」尊卑樂節雖多少不同，四節以盡乘矢則同。其餘外侯七節者，三節先以聽；卿、大夫、士五節者，一節先以聽；皆四節拾將乘矢。但尊者先以聽則多，卑者先以聽則少，優至尊先知審故也。又鄭注《射人》云：「言節者，容侯道之數也。」凡射，皆與臣下共爲。若與尊者同耦，自與尊者同節，若不與尊者同耦，則各自用其節。上射揖，司射退反位，樂正東面命大師曰：「奏《騶虞》，間若一。」東面者，進還鄉大師也。《騶虞》，《國風·召南》之詩篇也。《射義》曰：「《騶虞》者，樂官備也。」其詩有「發五豝五縱，于嗟騶虞」之言，樂得賢者衆多，嘆思至仁之人以充其官，此天子之射節也。而用之者方有樂賢之



志，取其宜也。其他賓客，鄉大夫則歌《采蘋》。「問若」者，重節。○犯，音巴。縱，子工反。○疏曰：大師西面，樂正北面，故進身鄉大師乃命之也。《采蘋》是鄉大夫樂節。其他，謂賓射與燕射，若州長他賓客，自奏《采芣》也。此篇有鄉大夫、州長射法，則同用《騶虞》，以其同有樂賢之志也。「問若」，謂五節之間長短希數皆如「」，則是重樂節也。○今按：據《詩》但取「發五犯」之義耳。騶虞則為仁獸之名，以庶類蕃殖，美國君之仁如之也。樂官備「云者，諸儒有以騶為文王之圃，虞為主圃之官，故立此義，而鄭注因之與？其詩箋自相違異，今姑存之。大師不興，許諾。樂正退反位，乃奏《騶虞》以射。三耦卒射，賓、主人、大夫、衆賓繼射，釋獲如初。卒射，降。皆應鼓與歌之節，乃釋算。降者，衆賓。○疏曰：「樂正退」，反「工」南北面位也。次番射時，賓與主人、大夫卒射皆升堂，故知此降者但衆賓也。釋獲者執餘獲，升，告左右卒射如初。卒，已也。今文曰「告于賓」。

右三射用樂。○記：歌《騶虞》若《采

蘋》，皆五終，射無算。謂衆賓繼射者，衆賓無數也。每一耦射，歌五終也。○疏曰：「皆五終」者，大夫、士皆五節，一節一終，故云五終也。堂下衆賓繼射者無數，若堂上衆賓則三人也。

司馬升，命取矢，獲者許諾。司馬降，釋弓反位。弟子委矢，司馬乘之，皆如初。司射釋弓視算如初，算，獲算也。今文曰「視數」也。釋獲者以賢獲與鈞告如初，降復位。

右取矢視算。

司射命設豐實觶如初，遂命勝者執張弓，不勝者執弛弓，升飲如初。

右飲不勝者。

司射猶袒、決、遂，左執弓，右執一个，兼諸弦，面鉞，適堂西，以命拾取矢，如初。側持弦矢曰執。面，猶尚也。并矢於弦，尚其鉞，將止，變於射也。○疏曰：云「側持弦矢曰執」者，對方持弦矢曰挾，并矢將止，亦是對將射挾矢而言。司射反位，三耦及

賓、主人、大夫、衆賓皆袒、決、遂，拾取矢，如初。矢不挾，兼諸弦弣以退，不反位，遂授有司于堂西。不挾，亦謂執之如司射也。不以反射位授有司者，射禮畢。○疏曰：執之如司射，兼諸弦弣，則與司射異。辯拾取矢，揖，皆升就席。謂賓、大夫及衆賓也。相俟堂西，進立于西階之前。主人以賓揖升，大夫及衆賓從升，立時少退於大夫。耦及弟子留下自若。○疏曰：先取矢者皆相待堂西，其主人則在堂東，徧取矢訖，乃揖而升堂就席也。衆賓則賓也，皆依上文獻後升及留在下之法。司射乃適堂西，釋弓，去扑，說決、拾、襲，反位。疏曰：司射之扑在階西，今來去扑於堂西之等，以其不復射故也。司馬命弟子說侯之左下綱而釋之，說，吐活反。○說，解也。釋之不復射，掩束之。○復，扶又反。○疏曰：上初張侯時「不繫左下綱，中掩束之」，至將射時乃說束，「繫左下綱」，今說左下綱而釋之，明未全去。鄭下注又云：「諸所退皆俟于堂西，備復射也。」故知此釋之爲一番射畢不復射。若有射，則行燕射旅酬以後乃爲之也。命獲者以旌退，命弟子

退楅，司射命釋獲者退中與算而俟。諸所退皆俟堂西，備復射也。旌言以者，旌恒執也。獲者，釋獲者亦退其薦俎。

### 右三射畢。

司馬反爲司正，退復觶南而立。當監旅酬。○監，古銜反。樂正命弟子贊工即位，弟子相工如其降也，升自西階，反坐。贊工還樂也。降時如初入，樂正反自西階東，北面。○疏曰：前爲將射，遷工于東方，西面，樂正北面，今將旅酬作樂，故遷升於堂上也。初入，則上「工四人」已下是也。樂正初升立西階之東，合樂訖，降立于西階東，北面，還樂于下，又降自西階東，北面。今正樂畢，上無告請於賓之事，故不升，而反其堂下之位也。賓北面坐，取俎西之觶，興，阼階上北面酬主人。主人降席，立于賓東。賓坐奠觶，拜，執觶興，主人答拜。賓不祭，卒觶，不拜，不洗，實之，進東南面。所不者，酬而禮殺

①「留下自若」，原作「自若留下」，據賀本改。

也。賓立飲。○殺，所界反。○疏曰：「俎西之觶」，謂上  
 一人舉觶于賓，賓奠于薦西者也。《鄉飲酒》賓酬主人，不  
 祭，立飲。主人阼階上北面拜，賓少退，少退，少  
 逡遁也。○逡，七旬反。遁，音旬。主人進受觶，賓  
 主人之西，北面拜送。旅酬而同階，禮殺也。○疏  
 曰：獻酬之時，賓主各於其階。賓揖就席，主人以  
 觶適西階上酬大夫。大夫降席，立于主人之  
 西，如賓酬主人之禮。其既實觶，進西南面立鄉所  
 酬。主人揖，就席。若無大夫，則長受酬，亦  
 如之。長，丁丈反。○長，謂以長幼之次酬衆賓。○疏  
 曰：若有大夫，先酬之，無大夫則酬長，以鄉射無介，直有  
 三賓，以長幼之次受酬，衆賓則三賓也。司正升自西  
 階，相旅，作受酬者曰：「某酬某子。」某者，字  
 也。某子者，氏也。稱酬者之字，受酬者曰某子。旅酬下  
 爲上，尊之也。《春秋傳》曰：「字不若子。」此言某酬某子  
 者，《射禮》略於《飲酒》。《飲酒》言某子受酬，以飲酒爲主。  
 ○疏曰：云「旅酬下爲上，尊之也」者，以旅酬者少長以齒，  
 逮下之道，其受酬者雖卑於酬之者，然司正命之飲酒，則謂

酬之者爲某，稱其字也，謂受酬者爲某子，稱其氏也，是其  
 稱謂尊飲酬之者也。「字不若子」，《春秋公羊傳》文。受  
 酬者降席，司正退立于西序端，東面。退立，俟  
 後酬者也。始升相，立階西北面。○疏曰：司正升自西  
 階，與西階之酬者立，故知始時在西階西，北面也。衆受  
 酬者拜，興飲，皆如賓酬主人之禮。辯，遂酬  
 在下者，皆升，受酬于西階上。在下，<sup>①</sup>謂賓黨  
 也。《鄉飲酒》記曰：「主人之贊者西面北上，不與。無算  
 爵然後興。」此異於賓。○與，音預。○疏曰：賓黨在西，  
 主黨在東，主黨不與酬。卒受者以觶降，奠于筐。  
 司正降復位。疏曰：云「司正降復位」者，司正掌監旅  
 酬訖，故降使二人舉觶于賓與大夫，<sup>②</sup>爲無算始也。

右旅酬。○記：古者於旅也語，禮成  
 樂備，<sup>③</sup>乃可以言語，先王禮樂之道也。疾今人慢於禮

①「在」，原作「正」，據寬文本、賀本改。

②「與」，原作「矣」，據元明本、寬文本、賀本改。

③「禮成樂備」，原作「種成樂億」，據寬文本、賀本改。

樂之盛，言語無節，故追道古也。凡旅不洗，敬殺。不洗者不祭。不盛。既旅，士不入。後正禮也。既旅則將燕矣。士人，<sup>①</sup>齒於鄉人。○疏曰：士立于下，<sup>②</sup>故齒於鄉人也。

使二人舉觶于賓與大夫。<sup>③</sup>二人，主人之贊者。舉觶者皆洗觶，升，實之西階上，北面，皆坐奠觶，拜，執觶興，賓與大夫皆席末答拜。舉觶者皆坐祭，遂飲，卒觶，興，坐奠觶，拜，執觶興，賓與大夫皆答拜。舉觶者逆降洗，升實觶，皆立于西階上，北面東上，賓與大夫拜。舉觶者皆進，坐奠于薦右。坐奠之，<sup>④</sup>不敢授。○疏曰：賓與大夫皆席西南面答拜。「奠于薦右」者，以將飲者於右也。贊者卑，故不敢親授觶也。賓與大夫辭，坐受觶以興。辭，辭其坐奠觶。<sup>⑤</sup>○疏曰：必辭者，贊者不敢親授，賓與大夫不可自尊，故辭之。不言取而言受者，亦是若親受之然也。舉觶者退反位，皆拜送，乃降。賓與大夫反奠于其所，

興。不舉者，盛禮已崇。古文曰「反坐」。○疏曰：崇，重也。凡飲酒，<sup>⑥</sup>禮成於酬，前已旅酬，所盛禮已重。今主人復舉觶為無算爵，盡歡情，客不盡主人歡，故且奠之。未舉之，故不奠薦左。若無大夫，則唯賓。長一人舉觶，如《燕禮》「賡爵之為」。○疏曰：舉二人舉觶為賓與大夫，今若無大夫，當闕一人，故云「則唯賓」也。「長一人舉觶，如《燕禮》，初二大夫賡觶，至旅酬，復使二人，君命長賡一爵於君。與此同。彼旅酬，此為無算爵，不同，但一人是同，故引為證也。」

### 右二人舉觶。

司正升自西階，阼階上受命于主人，適西階上，北面請坐于賓。請坐，欲與賓燕，盡殷勤也。至此盛禮以成，酒清肴乾，强有力者猶倦焉。○疏

- <sup>①</sup>「入」，原作「大」，據元明本、寬文本、賀本改。
- <sup>②</sup>「士」，原作「上」，據元明本、寬文本、賀本改。
- <sup>③</sup>「使」，原作「徙」，據元明本、寬文本、賀本改。
- <sup>④</sup>「坐」，原作「壁」，據寬文本、賀本改。
- <sup>⑤</sup>「其」，原作「非」，據元明本、寬文本、賀本改。
- <sup>⑥</sup>「凡」，原作「沽」，據元明本、寬文本、賀本改。

曰：《聘義》云：「強有力者將以行禮也。酒清，人渴而不敢飲也；肉乾，人饑而不敢食也。日莫人倦，齊莊正齊，而不敢解情。引之者，證此賓須坐之義。賓辭以俎，俎者，肴之貴者也。辭之者，不敢以燕坐襲貴肴。反命于主人，主人曰：「請徹俎。」賓許。司正降自西階，階前命弟子俟徹俎。弟子，賓黨也。俎者，主人贊者設之。今賓辭之，使其黨俟徹，順賓意也。上言「請坐于賓」，此言「主人曰」，互相備耳。○疏曰：知弟子是賓黨者，以司正降自西階，階前命之，而賓黨弟子在西階東面也。必使賓黨弟子者，徹俎是賓請之，故鄭云「順賓意也」。

凡辭，皆司正請于主人，主人有命，司正乃傳告賓。今上文云司正「請坐于賓」，直見司正傳主人辭，不見主人曰「請坐于賓」之辭。此經直見「主人曰請徹俎」，不見司正傳主人以告賓，是互相備也。司正升立于序端，賓降席，北面。主人降席自南方，阼階上北面。大夫降席，席東南面。侯弟子升受俎。○疏曰：案下文賓俎授司正以出，此俟弟子受俎者，大夫與主人也。賓取俎，還授司正。司正以降自西階，賓從之降，

遂立于階西，東面。司正以俎出，授從者。從，才用反，注及下，從者同。○授賓家從來者也。古者與人飲食，必歸其盛者，所以厚禮之。○疏曰：《鄉飲酒》、《燕禮》、《大射》、《公食》皆歸其俎，以俎是肴之貴，故云「歸其盛者」也。主人取俎，還授弟子。弟子受俎，降自西階以東。主人降自阼階，西面立。以東，授主人侍者。○疏曰：弟子是賓黨，非主人之贊者，故知徹主人俎，還授主人侍者，歸入于內也。大夫取俎，還授弟子。弟子以降自西階，遂出授從者。大夫從之降，立于賓南。凡言「還」者，明取俎各自鄉其席。衆賓皆降，立于大夫之南，少退，北上。從降，亦為將燕。○為，于僞反。○疏曰：賓、主人、大夫有俎，從俎而降。三賓無俎，亦為將燕，故同降同升也。

### 右徹俎。

主人以賓揖讓，說屨，乃升。大夫及衆賓皆說屨，升坐。說，吐活反。○說屨者，將坐，空屨褻賤，不宜在堂也。說屨則攝衣，為其被地。○攝，苦侯反。被，皮義反。○疏曰：說屨低身，若不攝衣，恐衣被地

履之。此衣即裳也，對文則上曰衣，下曰裳，散文衣、裳通。乃羞，羞，進也，所進者狗彘醢也。燕設啗具，所以案酒。

○載，壯吏反。啗，徒覽反。無算爵。使二人舉

觶，賓與大夫不興，取奠觶飲，卒觶，不拜。

二人，謂羣者二人也。使之升，立于西階上。賓與大夫將旅，當執觶也。卒觶者固不拜矣，著之者，嫌坐卒爵者拜既爵。此坐于席，禮既殺，不復崇。○疏曰：經「賓」上有

「于」字者，誤。以此二觶仍是前二人所舉者，今以二人升者，舉發使行無算爵，非新觶，故「觶」上屬「賓」下屬爲句也。執觶者受觶，遂實之。賓觶以之主人，

大夫之觶長受，長，衆賓長。而錯，皆不拜。錯

者，實主人之觶，以之次賓也。實賓長之觶，以之次大夫，其或多者，迭飲於坐而已，皆不拜受，禮又殺也。○迭，大

結反。○疏曰：衆賓之長在賓西者三人，大夫則席於賓東。若大夫亦二人，則與衆賓等，得交錯相酬。言「其或多

者」，若有一大夫，則衆賓二人無所酬，直二人迭飲而已。

若大夫四人已上，多於三賓，自三人之外亦無所酬，則亦自相酬迭飲而已。上二人舉觶於賓與大夫，皆拜受，及飲卒不拜，是殺。今衆賓與大夫不拜受觶，故言「禮又殺也」。

辯，卒受者興，以旅在下者于西階上。衆賓之末，飲而酬主人之贊者，大夫之末，飲而酬賓黨，亦錯焉。

不使執觶者酌，以其將旅酬，不以己尊孤人也。其末若皆

衆賓，則先酬主人之贊者，若皆大夫，則先酬賓黨而已。執

觶者酌在上辯，降復位。○疏曰：辯，謂堂上衆賓已上皆

飲訖。卒受者，謂最末後飲者。「亦錯焉」者，亦若堂上

之交錯也。云「執觶者」，謂二人執觶者也。云「不以己尊

孤人」者，其堂上皆坐行酒，至此立階上，旅在下也。大夫

或少或無，則衆賓爲末飲。或大夫多，衆賓徧後二觶並酬

大夫，則大夫爲末飲也。二人舉觶，酌堂上衆賓已辯，其堂

下自酌相旅，二人無事，故降復于東階西面北上位，皆與旅

也，《鄉飲酒》記所謂「主人之贊者」「無算爵然後與」，下文

所謂「執觶者皆與旅」是也。長受酬，酬者不拜，乃

飲，卒觶，以實之。言酬者不拜者，嫌酬堂下異位當

拜也。古文曰「受酬者不拜」。○疏曰：謂堂下或賓黨之

長，或主人贊者之長，受堂上酬，嫌堂上下異位，堂上酬堂

下當拜，故明之也。受酬者不拜受。禮殺，雖受尊者

之酬，猶不拜。辯旅，皆不拜。主人之贊者於此始旅，

嫌有拜。執觶者皆與旅。與，音預。○嫌已飲不復

飲也。上使之勸人耳，非逮下之惠也。亦自以齒與於旅也。○疏曰：上文二人舉觶者西階上已卒觶，故云「已飲」也。卒受者以虛觶降，奠于筐。執觶者洗，升實觶，反奠于賓與大夫。復奠之者，燕以飲酒爲歡，醉乃止，主人之意也。今文無「執觶」及「賓觶」。大夫之觶，皆爲爵。實觶，觶爲之。無算樂。合鄉樂，無次數。○疏曰：知合鄉樂，《南》者，約上正歌時不略，其正已歌鄉樂。但上有次第，皆三終。今無次數，任賓主所好也。

### 右燕。

賓興，樂正命奏《陔》。陔，古才反。○《陔》，《陔夏》，其詩亡。《周禮》：賓醉而出，奏《陔夏》。《陔夏》者，天子、諸侯以鐘鼓，大夫、士鼓而已。賓降及階，《陔》作。賓出，衆賓皆出，主人送于門外，再拜。拜送賓于門東，西面。賓不答拜，禮有終。

右賓出。○記：大夫後出，下鄉人，不于其賓主之禮。主人送于門外，再拜。拜送大夫，尊之也。主人送賓，還入門揖，大夫乃出，送拜之。○

疏曰：上文後出，是大夫意。此經拜送，主人意。

明日，賓朝服以拜賜于門外。朝，直遙反。

○拜賜，謝恩惠也。主人不見，如賓服，遂從之，拜辱于門外，乃退。不見，不褻禮也。拜辱，謝其自屈辱。

### 右拜賜。

主人釋服，乃息司正，釋服，說朝服，服玄端也。息，猶勞也。勞司正，謂賓之與之飲酒，以其昨日尤勞倦也。《月令》曰：「勞農以休息之。」○說，吐活反。勞，力報反。○疏曰：上文主人如賓服，則主人亦朝服矣，故此爲釋朝服。玄端，即朝服之次，但易其裳爲異也。無介，介，音界。○勞禮略，貶於飲酒也。此已下皆記禮之異者。○今按：此鄉射禮本自無介，不但勞禮無介，疑此衍文也。不殺。殺，如字。○無俎故也。使人速，速，召賓。迎于門外，不拜，人升，不拜至，不拜洗，薦脯醢，無俎。賓酢主人，主人不崇酒，不拜衆賓。既獻衆賓，一人舉觶，遂無算爵。言遂者，

明其閒闕也。①賓坐奠觶于其所，賓者遂受命于主人，請坐于賓，賓降說屨升坐矣。不言遂請坐者，請坐主於無算爵。○疏曰：閒闕，謂閒一人舉觶。下有工升歌，立司正旅酬，及二人舉觶，及徹俎之事，此皆闕也。「不言遂請坐」者，言無算爵，自然請坐可知，故不須言也。無司正，使賓者而已，不立之。賓不與，與，音預。○昨日至尊，不可褻也。古文「與」作「豫」。徵唯所欲，徵，召也，謂所欲請呼。以告于鄉先生、君子可也。告，請也。鄉先生，鄉大夫致仕者也；君子，有大德行不仕者。○行，下孟反。羞唯所有，用時見物。○見，賢遍反。鄉樂唯欲。不歌《雅》、《頌》，取《周》、《召》之詩，在所好。○好，呼報反。

右息司正。

## 鄉射義第十五

### 鄉禮四之下

古者男子生，桑弧蓬矢六以射天地四方。天地四方者，男子之所有事也。故必先

有志於其所有事，然後敢用穀也，飯食之謂也。弧，音胡。蓬，步丁反。飯，扶晚反。食，音嗣。○男子生，則設弧於門左，三日負之，人爲之射，乃卜食子也。

○爲，于僞反。○呂大臨曰：天地之性，人爲貴。人之類，男子爲貴，其配則天也，陽也，乾也，可以服人而不服於人者也。故天地四方之大皆吾之所有事，不能則幾於非男子也。故於其始生，以桑弧蓬矢六以射天地四方也。士無事而食，不可也。故君子寧功浮於食，不欲食浮於功，有事於天地四方，而後敢用穀，則功浮於食而無愧。功無愧於食，是亦男子之事，故因射義而及之。○射者，進退周還必中禮。內志正，外體直，然後持弓矢審固。持弓矢審固，然後可以言「中」。此可以觀德行矣。行，下孟反。中，丁仲反。○內正外直，習於禮樂，有德行者也。正鵠之名，出自此也。○正，音征。鵠，古毒反，徐又如字。○呂大臨曰：孔子曰：「射不主皮，爲力不同科，古之道也。」蓋有禮射，有主皮之射。不主皮，禮射

①「明」，原作「俎」，據寬文本、賀本改。



也，所謂大射、鄉射是也。爲力者，主皮之射也。主皮者，主於獲而已，尚力而不習禮，故曰「爲力不同科」也。禮射者必先比耦，<sup>①</sup>故一耦皆有上射、下射，皆執弓而搢挾矢。其進也，當階及階，當物及物，皆揖。其退也，亦如之。其行有左右，其升降有先後，其射皆拾發。其取矢于楅也，始進揖，當楅揖，及楅揖，取矢揖，卒取矢揖，既搢挾揖，退與將進者揖。其取矢也，<sup>②</sup>有橫弓、卻手、兼弣、順羽、拾取之節焉。卒射而飲，勝者袒決遂，執張弓，不勝者襲，說決拾，加弛弓，升飲相揖如初，則進退周旋必中禮可見矣。<sup>③</sup>夫先王制禮，<sup>④</sup>豈苟爲繁文末節，使人難行哉？亦曰以善養人而已。蓋君子之於天下，必無所不中節，然後成德，必力行而後有功。其四支欲安佚也，苟恭敬之心不勝，則怠惰敖慢之氣生。<sup>⑤</sup>怠惰敖慢之氣生，則動容周旋不能中乎節。體雖佚而心亦爲之不安。安其所不安，則手足不知所措，故放辟邪侈，踰分犯上，將無所不至，天下之亂自此始矣。聖人憂之，故常謹於繁文末節，以養人於無所事之時，使其習之而不憚煩，則不遜之行亦無自而作，至於久而安之，則非法不行，無所往而非義矣。君子敬以直內，義以方外，敬義立而德不孤，則不疑其所行矣。故發而不中節者，常生乎不敬。所存乎內者敬，則所形乎外者莊矣。内外交

修，則發乎事者中矣。故曰內志正，外體直，然後持弓矢審固。持弓矢審固，然後可以言中也。射，一藝也，容比於禮，節比於樂。發而不失正鵠者，是必有樂於義理，久於恭敬，用志不分之心，然後可以得之。則其所以得之者，其德可知矣，故曰「可以觀德行矣」。○射者，仁之道也。

射求正諸己，己正而後發。發而不中則不怨勝己者，反求諸己而已矣。諸，猶於也。○呂大臨曰：仁者之道，不怨天，不尤人，行有不至，反求諸己而已。蓋以仁爲己任，無待於外也。射者求中，有似於此，故曰「射者仁之道也」。射也者，正己而後發。發而不中，知反求諸己而不怨勝己者，知所以中，莫不在己，非人之罪也。至愛人不親，治人不治，禮人不答，則反尤諸人，蓋不以仁爲己任，不知其類者也。君子無所不用其學，故於射也得反己之道焉。○孔子曰：「君子無所爭，必也射

①「射」，原作「計」，據寬文本、賀本改。

②「其」，原作「及」，據賀本改。

③「旋」，原作「還」，據寬文本、賀本改。

④「夫」，原作「大」，據元明本、寬文本、賀本改。

⑤「情」，原作「墮」，據元明本、寬文本、賀本改。

乎！揖讓而升，下而飲，其爭也君子。」爭，爭鬪之爭。○「必也射乎」，言君子至於射則有爭也。下，降也。飲射爵者亦揖讓而升降，勝者袒決遂，執張弓，不勝者襲，說決拾，卻左手，右加弛弓於其上而升飲，君子恥之，是以射則爭中。○袒，音但。決，古穴反。說，吐活反。拾，音十。卻，丘逆反，又羌略反。弛，式氏反，又始氏反。中，丁仲反。○今按：此言君子恭遜，不與人爭，惟於射而後有爭。然其爭也雍容揖遜乃如此，則其爭也君子，而非若小人之爭矣。○孔子曰：「射者何以射？何以聽？循聲而發，發而不失正鵠者，其唯賢者乎！若夫不肖之人，則彼將安能以中？」

正，音征。夫，音扶。肖，音笑。○何以，言其難也。聲，謂樂節也。畫布曰正，棲皮曰鵠。正之言正也，鵠之言梏也。梏，直也，言人正直乃能中也。發，或爲「射」。○棲，音西。梏，音角。○疏曰：「射者何以射」者，言爲射之人何以能使射中與樂節相應也。「何以聽」者，言何以能聽此樂節，使與射中相合。言射中樂節兩相應會，至極難矣。○呂大臨曰：射之爲藝，非專心致志則不得也。射以樂爲節，射者欲其容體比於禮而中多，故曰「何以射」。欲其節比於

樂，循聲而發，發而不失正鵠，故曰「何以聽」。「何以射」者，體之所動不在乎他處也。「何以聽」者，耳之所司不在乎它。是謂用志不分，不過乎物。推是道也，將無人而不自得，況於射乎！居是位也，行是事也，其心也或之乎彼也，或之乎此也，一出焉，一入焉，將無所往而可也。故射雖一藝也，而可以分賢不肖者以此。○《詩》云：

「發彼有的，以祈爾爵。」祈，求也，求中以辭爵也。酒者，所以養老也，所以養病也。求中以辭爵者，辭養也。呂大臨曰：射禮勝飲不勝，所以爭勝者辭乎飲也。君子責己重而責人輕，我之不中則反求諸己，曰：「非病也，不能也。」心平體正，持弓矢審固，循聲而發，發而不失正鵠者，惟賢者能之。若不肖之人，彼將安能以中。此責己重也。彼之不中則曰：「非不能也，病也。」酒者，所以養老與病也，故揖讓而升，以禮相下，以飲其不勝者，此責人輕也。《詩》云：「發彼有的，以祈爾爵。」求中以辭爵，則所以爭者，乃所以辭也。養則利之也，爭辭養乃所以爭辭利也。○孔子射於矍相之圃，蓋觀者如堵牆。矍，俱縛反。相，息亮反。圃，音補。堵，丁古反。○矍相，地名也。藝菜蔬曰圃。○疏，所魚

反。射至於司馬，使子路執弓矢出延射，曰：「賁軍之將，亡國之大夫，與爲人後者，不入，其餘皆入。」蓋去者半，入者半。賁，音奮。將，子匠反。與，音預。○先行飲酒禮，將射，乃以司正爲司馬。子路執弓矢出延射，則爲司射也。延，進也。出進觀者，欲射者也。賁，讀爲憤，憤猶覆敗也。亡國，亡君之國者也。與，猶奇也。後人者，一人而已。既有爲者而往奇之，是貪財也。子路陳此三者，而觀者畏其義，則或去也。延，或爲「誓」。○賁，音奔。覆，芳卜反。奇，居宜反。○疏曰：鄉射先行鄉飲酒之禮，未旅之前作相爲司正，至於將射，轉司正爲司馬。敗軍之將，言無勇也。亡國之大夫，言不忠且無智也。又使公罔之裘、序點揚觶而語。公罔之裘揚觶而語曰：「幼壯孝弟，耆耄好禮，不從流俗，修身以俟死者，不在此位也？」蓋去者半，處者半。序點又揚觶而語曰：「好學不倦，好禮不變，旄期稱道不亂者，不在此位也？」蓋廟有存者。點，多簞反。觶，之豉反。弟，音悌。耆，巨支反。耄，大結反。

好，呼報反。「俟死」絕句，①「者不」二字一句，下同。旄，又作「耄」，莫報反。期，音其。道，如字。廟，音勤，又音覲。○今按：期，當音「基」。○之，發聲也。射畢又使此二人舉觶者，古者於旅也語，語謂說義理也。三十曰壯。耆，耄，皆老也。流俗，失俗也。處，猶留也。八十、九十曰旄，百年曰期頤。稱，猶言也。道，猶行也。「者不」，言有此行不，可以在此賓位也。序，或爲「徐」。壯，或爲「將」。期，或爲「勤」。今《禮》《揚》皆作「騰」。○頤，以支反。行，下孟反。○疏曰：「又使公罔之裘序點揚觶而語」者：公罔，爲氏也，裘，名也。序，氏也，點，名也。揚，舉也。至將旅之時，使二人俱舉觶誓衆而說所誓之事。此舉其目，故總舉二人。於是公罔之裘先言，問此衆人之中有此上諸行不。若有，則可在此賓位也。至於序點所誓，則彌精於前矣。但此記所陳，亦約《鄉射禮》耳。「子路出延射」者，是將射之前。案鄉射司射比衆耦於堂西，此出延者，但觀者既多，庭中不容，故出延之，人乃比耦。以初門外未入觀者既多，未有賓主之禮，故誓，惡者令其不入。以鄉飲酒禮差之，射禮畢旅酬之時乃使二人舉觶，故鄉射禮畢，司馬反

① 「俟」，原作「俟」，據元明本、寬文本、賀本改。

爲司正，樂工升堂復位，賓取俎西之鬴酬主人，主人酬大夫。自相旅畢，君使二人舉鬴於賓與大夫，則當此公罔之裘，序點二人舉鬴之節也。但衆賓射事既了，皆在賓位，主人以禮接之，不復斥言其惡，於此但簡其善，公罔簡而尚疏，序點簡而轉詳。旄期之老不復能射，得云在位者，此極老之人本來觀禮，雖不能射，與在賓中，故知旅酬之時其人猶在也。○呂大臨曰：孔子溫良恭讓，其於鄉黨似不能言，未聞拒人如是之甚，故豐相之事疑不出於聖人，特門人弟子逆料聖人之意而爲此說，將以推尊聖人，而不知非聖人之所當言。如記稱孔子「我戰則克，祭則受福」。孔子固優爲之，而謂孔子言之，則非也。○賁軍之將，亡國之大夫，與爲人後者，皆有負於世，非賢能者也。爲人後者爲之子，則爲所後斬衰，爲其父母期，舍其親而爲人後，非人之所欲。特以大宗無後，族人以支子後之，迫於大宗，族人而忘親，此君子之所不取也。幼壯孝弟，耆耄好禮，不從流俗，修身以俟死者，德有立矣。好學不倦，好禮不變，旄期稱道不亂者，德有成矣。蓋士之立於世，無惡者寡矣。無惡者有之，有立者寡矣。有立者有之，成德者寡矣。「不在此位也」者，疑詞也，蓋言在此位也。衆之所會聚，簡別賢

不肖，人所難言也，故以疑詞示之。猶言「文不在茲乎」，蓋言在茲也。不曰「乎」而曰「也」者，蓋深示其不斥言也。○今按：鄭注、陸音「者不」二字文義不通，《家語》兩處並無「不」字，亦非是，當從呂說爲長云。

### 儀禮經傳通解卷第八終

# 儀禮經傳通解卷第九

## 學制第十六

### 學禮一之上

古之王者，建國君民，教學爲先。故舜命契曰：「百姓不親，五品不遜。契，音薛。

○舜，虞帝名。契，臣名。五品，謂父子、君臣、夫婦、長幼、朋友。遜，順也。汝作司徒，敬敷五教，在寬。」五教，謂父子有親、君臣有義、夫婦有別、長幼有序、朋友有信。敷此五教，以敬爲主，而以寬濟之。命夔曰：「命

汝典樂，教胄子。夔，求龜反。胄，直又反。○胄，長也，謂元子以下至卿、大夫子弟。○長，上聲。○疏曰：《說文》云：「胄，胤也。」《爾雅》云：「胤，繼也。」繼父世者，謂長子也。《王制》云：「樂正崇四術，立四教。」王太子、王子、群后之太子、卿大夫元士之適子皆造焉。直而溫，

寬而栗，剛而無虐，簡而無傲。栗者，嚴謹之意。

直，恐其不足于和，故教以溫；寬，恐其不足于敬，故教以栗；皆所以濟其美。剛者或失之虐，簡者或失之傲，故教使防其過。樂之爲教，本于中和，以養人之情性，故先言此以責其效。詩言志，歌永言，聲依永，律和聲。

心之所之謂之志。永，長也。聲，謂五聲：宮、商、角、徵、羽。律，謂十二律：黃鍾、大簇、姑洗、蕤賓、夷則、無射，爲六陽律；大呂、應鍾、南呂、林鍾、仲呂、夾鍾，爲六陰律。言教之詩以宣其志，歌詠之以長其言，以五聲依其歌之上

下，以六律節其聲之清濁，此爲樂之法也。○徵，展里反。簇，七豆反。蕤，人誰反。射，音亦。八音克諧，無相奪倫，神人以和。」八音：金、石、土、革、絲、木、匏、竹。倫，理也。言既以上文四句之法爲樂，則八音皆調不相陵奪，而用之祭祀朝享，神人皆和矣。① ○小學在公

宮南之左，大學在郊。學，所以學，士之宮。《尚書傳》曰：「百里之國，二十里之郊；七十里之國，九里之郊；五十里之國，三里之郊。」此小學、大學、殷之制。○《王制》。

① 「矣」下，賀本有「○學記合尚書」。

○使公卿之太子、大，音泰。大夫元士之適子，適，丁歷反。十有三年始入小學，見小節焉，踐小義焉。二十入大學，見大節焉，踐大義焉。故入小學知父子之道、長幼之序，入大學知君臣之義、上下之位。故爲君則君，爲臣則臣，爲父則父，爲子則子。長，丁丈反。○《尚書大傳》。○按：入學之年，諸說不同，見後《保傅》篇注。○程子曰：古者八歲入小學，十五入大學。擇其才可教者聚之，不肖者復之農畝。蓋士農不易業，既入學則不治農，然後士農判。古之士者，自十五入學至四十方仕，中間自有二十五年學，又無利可趨，則所志可知。須去趨善，便自此成德。後之人自童稚間已有汲汲趨利之意，何由得向善？故古人必使四十而仕，然後志定。只營衣食卻無害，惟利祿之誘最害人。○家有塾，黨有庠，術有序，國有學。塾，音熟。術，讀爲遂。○門側之堂謂之塾。古者二十五家爲閭，同共一巷，巷首有門，門邊有塾。里中之老有道德者爲左、右師，坐于兩塾。民在家之時，朝夕出入，恒受教於塾。五百家爲黨，萬二千五百家爲遂，遂在遠

郊之外。國，爲天子所都及諸侯國中。○《學記》。○大夫七十而致仕，老其鄉里。大夫爲父師，士爲少師。所謂里庶尹也。鄭曰：古者仕焉而已者，歸教於閭里。耄鉏已藏，祈樂已入，歲事已畢，耄，音憂。○祈樂，當爲「新穀」。餘子皆入學。年十五始入小學，見小節，踐小義焉。年十八始入大學，見大節，踐大義焉。餘子，猶衆子也。占者適子恒代父而仕也。距冬至四十五日，始出學傳農事。立春學止。上老平明坐於右塾，庶老坐於左塾，餘子畢出，然後皆歸，夕亦如之。上老，父師也。庶老，少師也。餘子皆入，父之齒隨行，兄之齒鴈行，朋友不相踰，輕任并，重任分。行，如字，又戶郎反。并，必性反。頌白者不提攜，出入皆如之。《尚書大傳》。○天子曰辟廱，諸侯曰類宮。類，音判。○《王制》。○按：辟，與「壁」同。廱，和也。天子之學，水旋丘如壁，故謂之辟廱。類，亦作「泮」。諸侯之學，東西南方有水，形如半壁，以其

半於辟廱，故曰泮宮。《詩》曰：「鑄京辟廱。」記曰：「泮宮，周學也。」○有虞氏養國老於上庠，養庶老於下庠。夏后氏養國老於東序，養庶老於西序。殷人養國老於右學，養庶老於左學。周人養國老於東膠，養庶老於虞庠，虞庠在國之西郊。皆學名也，異者，四代相變耳，或上西，或上東，或貴在國，或貴在郊。上庠，右學，大學也，在西郊。下庠，左學，小學也，在國中王宮之東。東序，東膠，亦大學，在國中王宮之東。西序，虞庠，亦小學也，在西郊。膠之言糾也，庠之言養也。周之小學為有虞氏之庠，制是以名庠。云其立鄉學亦如之。膠，或作「綵」。○糾，居黜反。綵，音求。○《王制》。○今按：此一節詳見《五學》篇。○《師氏》：居虎門之左，司王朝。朝，直遙反。○虎門，路寢門也。王日視朝于路寢門外，畫虎焉，以明勇猛，于守宜也。司，猶察也，察王之視朝，若有善道可行者，則當前以詔王。○疏曰：鄭知虎門是路寢門者，其路寢庭朝及庫門外之朝非常朝之處，司士所掌路門外是常朝日所朝之所。掌國中失之事，以教國子弟。中，去聲。

○教之者，使識舊事也。中，中禮者也。失，失禮者也。故書「中」為「得」，杜子春云：「當為「得」，記君得失，若《春秋》是也。凡國之貴遊子弟學焉。貴遊子弟，王公之子弟。遊，無官司者。○《大司樂》：掌成均之灋，以治建國之學政，而合國之子弟焉。鄭司農云：均，調也。樂師主調其音，大司樂主受此成事已調之樂。玄謂：董仲舒云：「成均，五帝之學。」成均之法者，其遺禮可法者。國之子弟，公卿大夫之子弟當學者，謂之國子。《文王世子》曰：「於成均以及取爵於上尊。」然則周人立此學之宮。○疏曰：按《王制》，有虞氏名學為上庠，下庠，至周立小學，在西郊者曰虞庠，五帝總名成均，當代則各有別稱。若三代，天子學總曰辟雍，當代各有異名，但無文可知也。凡有道者，有德者，使教焉，死則以為樂祖，祭於瞽宗。道，多才藝者。德，能躬行者。若舜命夔典樂教胄子是也。死則以為樂之祖，神而祭之。鄭司農云：瞽，樂人，樂人所共宗也。或曰：祭於瞽宗，祭於廟中。《明堂位》曰：「瞽宗，殷學也。泮宮，周學也。」以此觀之，祭於學宮中。○疏曰：按記云：「春誦夏弦，大師詔之瞽宗。」以其教樂在瞽宗，故祭樂祖還在瞽宗。

彼雖有學干戈在東序，以誦弦爲正。記又云「禮在瞽宗」，「書在上庠」。學禮、樂在瞽宗，祭禮先師亦在瞽宗矣。若書在上庠，書之先師亦祭於上庠，其《詩》則春誦夏弦在東序，則祭亦在東序也。○已上《周禮》。○夏曰校，殷曰序，周曰庠，學則三代共之。校、序、庠，皆鄉學、國學也。共之，無異名也。此孟子說，與上下數條皆不合，未詳其故。○《滕文公》。○魯之米廩，有虞氏之庠也。序，夏后氏之序也。瞽宗，殷學也。類宮，周學也。庠、序，亦學也。庠之言詳也，於以考禮詳事也。魯謂之米廩。虞帝上孝，今藏粢盛之委焉。序，次王事也。瞽宗，樂師瞽矇之所宗也。古者有道德者使教焉，死則以爲樂祖，于此祭之。類之言班也，于以班政教也。○《明堂位》。

**右法制名號之略。** 古者教人，其立法大意皆萬世通行，不可得而變革者，學者不可不知。若其名號位置節文之詳，則自經言之外，出於諸儒之所記者，今皆無以考其實矣。然不敢有所取舍，姑悉存之，讀者亦不必深究也。

《周禮·大司徒》：令五家爲比，五比爲閭，四閭爲族，五族爲黨，五黨爲州，五州爲鄉，以鄉三物教萬民，而賓興之。比，毗志反。○物，猶事也。興，猶舉也。三事教成，鄉大夫舉其賢者能者，以飲酒之禮賓客之，既則獻其書於王。一曰六德：知、仁、聖、義、忠、和。知，音智。○知，謂明於事。仁，謂愛人以及物。聖，謂通而先識。義，謂能斷時宜。忠，謂言以中心。和，謂不剛不柔。二曰六行：孝、友、睦、婣、任、恤。行，下孟反。婣，音因。○孝，謂善事父母。友，謂善於兄弟。睦，謂親於九族。婣，謂親於外親。任，謂信於友道。恤，謂賑於憂貧。○疏曰：九族者，上至高祖，下至玄孫，旁及總麻之內也。二曰六藝：禮、樂、射、御、書、數。禮，謂五禮：吉、凶、軍、賓、嘉也。樂，謂六樂：《雲門》、《大咸》、《大韶》、《大夏》、《大濩》、《大武》。射，謂五射：一曰白矢，謂矢貫侯過見其鏃白也；二曰參連，謂前放一矢，後三矢連續而



去也；三曰剡注，謂羽頭高鏃低而去，剡剡然也；四曰襄尺，<sup>①</sup>謂臣與君射，不與君並立，襄君一尺而退也；五日井儀，謂四矢貫侯，如井之容儀也。御，謂五御：一曰鳴和鸞，謂和在式，鸞在衡，升車則馬動，馬動則鸞鳴，鸞鳴則和應也；二曰逐水曲，謂隨逐水勢之屈曲而不墜水也；三曰過君表，謂若《毛詩》傳云：「褐纏旃以爲門，裘纏質以爲楸，間容握驅而入，擊則不得入。」君表則褐纏旃也；四曰舞交衢，衢，道也，謂在交道而車旋應於舞節；五曰逐禽左，謂御驅逆之車逆驅禽獸，使左當人君以射之也。書，謂六書：一曰象形，謂日、月之類，象日、月形體而爲之；二曰會意，謂武、信之類，人言爲信，止戈爲武，會合人意也；三曰轉注，謂考、老之類，建類一首，文意相受，左右相注，故名轉注；四曰處事，謂上、下之類，人在一上爲上，人在一下爲下，各有其處事得其宜，故曰處事；五曰假借，謂令、長之類，一字兩用也；六曰諧聲，謂形聲一也，如江、河之類，皆以水爲形，以工、可爲聲也。數，謂九數：一曰方田，以御田疇界域；二曰粟布，以御交質變易；三曰衰分，以御貴賤稟稅；四曰少廣，以御積算方圓；五曰商功，以御功程積實；六曰均輸，以御遠近勞費；七曰盈朒，以御隱雜互見；八曰方程，以御錯糅正圓；九曰勾股，以御高深廣遠。

以鄉八刑糾萬民：糾，猶割察也，謂察取鄉中八種之過而斷割其罪也。一曰不孝之刑，二曰不睦之刑，三曰不婣之刑，四曰不弟之刑，弟，音悌。○不弟，謂不敬師長。五曰不任之刑，六曰不恤之刑，七曰造言之刑，訛言惑衆。八曰亂民之刑。亂名改作，執左道以亂政也。以五禮防萬民之僞而教之中，禮所以節止民之侈僞，使上不逼下，下不僭上，行得其中。以六樂防萬民之情而教之和。樂所以道正民之情性，使乖戾不作，血氣和平。○《鄉大夫》：正月之吉，謂建子之月一日也。受教灋于司徒，退而頒之于其鄉吏，使各以教其所治，以考其德行，察其道藝。其鄉吏，州長以下。○疏曰：在身爲德，施之爲行，內外兼備，即爲賢者也。以歲時人其書。人其書者，言于大司徒。三年則大比，考其德行道藝而興賢者能者。鄉老及

①「襄」，原作「表」，據寬文本、賀本改。下「襄」字同。

鄉大夫帥其吏，與其衆寡以禮禮賓之。賢者，有德行者。能者，有道藝者。興賢者，謂若今舉孝廉。興能者，謂若今舉茂才。衆寡，謂鄉人之善者，無問多少。賓，敬也，賓所舉賢者能者。變舉言興者，謂合衆而尊寵之，以鄉飲酒之禮禮而賓之。厥明，鄉老及鄉大夫群吏獻賢能之書于王，王再拜受之，登于天府，內史貳之。厥，其也，其賓之明日也。獻，猶進也。王拜受之，重得賢者，王上其書于天府。天府，掌祖廟之寶藏者。內史，副寫其書者，當詔王爵祿之時。○藏，才浪反。○疏曰：內史職有策命諸侯群臣之事，故使貳之。退而以鄉射之禮五物詢衆庶：一曰和，二曰容，三曰主皮，四曰和容，五曰興舞。以，用也。行鄉射之禮，而以五物詢於衆民。鄭司農云：詢，謀也，問於衆庶，寧復有賢能者。和，謂閑門之內行也。容，謂容貌也。主皮，謂善射，射所以觀上也。故書「舞」爲「無」。杜子春讀「和容」爲「和頌」，謂能爲樂也。無，讀爲舞，謂能爲六舞。玄謂：和載六德，容包六行，庶民無射禮，因田獵分禽，則有主皮。主皮者，張皮射之，無侯也。主皮，和容、興舞，則六藝之射與禮樂與？當射之時，民必觀焉，因詢之

也。孔子射於矍相之圃，蓋觀者如堵牆，射至於司馬，使子路執弓矢出誓射者。又使公罔之裘、序點揚觶而語。詢衆庶之儀若是乎？○今按：五物之說未詳，當闕。○《州長》：正月之吉，各屬其州之民而讀灋，以考其德行道藝而勸之，以糾其過惡而戒之。長，丁丈反。屬，音燭，後並同。○屬，猶合也，聚也。因聚衆而勸戒之者，欲其善。若以歲時祭祀州社，則屬其民而讀灋，亦如之。春秋以禮會民，而射于州序。序，州黨之學也。會民而射，所以正其志也。○疏曰：言以禮者，亦謂先行鄉飲酒之禮而後射也。正歲，則讀教灋如初。謂建寅之月。雖以正月讀之，至正歲猶復讀之，因此四時之正，重申之。○《黨正》：四時之孟月吉日，則屬民而讀邦灋以糾戒之。以四孟之月朔日讀法者，彌親民者於教亦彌數。○數，音朔。○疏曰：鄉大夫管五州，去民遠，不讀法。州長管五黨，去民漸親，故正月正歲春秋兩社四讀法。黨正以下，去民彌親，故黨正加四月、七月、十月，爲七讀法。族師又加二月、三月、五月、六月、八月、九月、十二月，爲十四

讀法。鄭於此總釋之。春秋祭祭，亦如之。祭，祭

敬反。○祭，謂雩祭水旱之神，蓋亦為壇位，如祭社稷云。

「國索鬼神而祭祀」，則以禮屬民，而飲酒于

序，以正齒位。一命齒于鄉里，再命齒于父

族，三命而不齒。「國索鬼神而祭祀」，謂歲十二月大

蜡之時，建亥之月也。正齒位者，《鄉飲酒義》所謂「六十者

坐，五十者立侍。六十者三豆，七十者四豆，八十者五豆，

九十者六豆」是也。必正之者，為民三時務農，將闕於禮，

至此農隙而教之尊長養老，見孝弟之道也。黨正飲酒禮

亡，以此事屬於鄉飲酒之義，微失少矣。凡射，飲酒，此鄉

民雖為卿大夫必來觀禮。《鄉飲酒》、《鄉射》記大夫樂作不

人，士既旅不入是也。齒于鄉里者，以年與眾賓相次也。

齒于父族者，父族有為賓者，以年與之相次。異姓雖有老

者，居于其上，不齒者席于尊東，所謂遵。○疏曰：《儀禮》

未亡之時，篇內論正齒位之禮，其義具悉。今《鄉飲酒義》

唯有五十已上豆數之言，此經唯有壹命已下觀禮之事，二

處相兼，比於《儀禮》篇中鄉飲酒法，義理乃未足，故云微失

少矣。云「壹命齒于鄉里」者，謂天子之下士、公侯伯之士

在堂下矣。云「再命齒于父族」者，以其實在戶牖之間，南面，若賓是同姓父族，則與之齒也。既言齒于父族，明異姓非父族不齒可知。云「三命不齒」者，按《鄉飲酒》、《鄉射》皆酒尊在室戶東，房戶西，賓主夾之鄉人，為卿大夫來觀禮，為鄉人所遵法，謂之為遵席位，在酒尊東。公三重，大夫再重，故注知不齒者席于尊東也。「所謂遵」者，謂《鄉射》、《鄉飲酒》之遵也。鄭注《鄉飲酒》云「此篇無正齒位之事焉」者，彼是三年一貢士，直行飲酒之禮，無黨正正齒位之事。按：彼注又云「天子之國，二命則不齒；諸侯之國，爵為大夫則不齒」者，蓋得為卿大夫者，其年必高於眾賓，是以無問命數，皆不齒，以其爵尊故也。凡其黨之祭祀、喪紀、昏冠、飲酒，教其禮事，掌其戒禁。其黨之民。正歲屬民讀灋，而書其德行道藝，書記之。以歲時洊校比，洊，臨也。鄭司農云：校比，《族師》職所謂以時屬民，而校登其族之夫家眾寡，辯其貴賤老幼廢疾可任者，及其六畜車輦，如今小按比。○疏曰：「如今小按比」者，此舉漢法，言小按比對三年大比為小耳。及大比，亦如之。疏曰：族師至三年大按比，黨正亦洊之。○《族師》：月吉則屬民而讀邦

灋，書其孝弟睦婣有學者，月吉，每月朔日也。春秋祭酺亦如之。酺，音步。○酺者，爲人物裁害之神也。故書「酺」或爲「步」，杜子春云：「常爲酺」。玄謂：《校人》職又有「冬祭馬步」，則未知此世所云蠶螟之酺與，人鬼之步與？蓋亦爲壇位如雩祭云。族長無飲酒之禮，因祭酺而與其民以長幼相獻酬焉。○校，戶教反。蠶，悅全反。螟，覓經反。酺與，音餘，下「步與」同。祭，榮敬反，本亦作「榮」。○《閭胥》：凡春秋之祭祀、役政、喪紀之數，聚衆庶，既比則讀灋，書其敬敏任恤者。祭祀，謂州、社、黨祭族酺也。役，田役也。政，若州射黨飲酒也。喪紀，大喪之事也。四者及比，皆會聚衆民，因以讀法以敕戒之。故書「既」爲「暨」，杜子春讀「政」爲「征」，「暨」爲「既」。○《比長》：各掌其比之治，五家相受相和親，有皐奇衰則相及。皐，本亦作「罪」。衰，似嗟反。○衰，猶惡也。○齊桓公內政之法，正月之朝，鄉長復事，君親問焉，曰：「於子之鄉，有居處好學、慈孝於父母、聰慧質仁、發聞於鄉里者，有則以告。有而不以

告，謂之蔽明，其罪五。」有司已於事而竣。竣，音俊，退伏也。公又問焉，曰：「於子之鄉，有拳勇股肱之力秀出於衆者，有則以告。有而不以告，謂之蔽賢，其罪五。」有司已於事而竣。公又問焉，曰：「於子之鄉，有不慈孝於父母、不長弟於鄉里、驕躁淫暴、不用上令者，有則以告。有而不以告者，謂之下比，其罪五。」有司已於事而竣。是故鄉長退而修德進賢，公親見之。遂使役官及五屬大夫復事，公問之如初。五屬大夫於是退而修屬，屬退而修縣，縣退而修鄉，鄉退而修卒，卒退而修邑，邑退而修家。是故匹夫有善，可得而舉也；匹夫有不善，可得而誅也。《國語·齊語》。

#### 右教民之法。

《周禮·師氏》：掌以嫗詔王。以三德教國子：一曰至德，以爲道本；二曰敏德，

以爲行本，三曰孝德，以知逆惡。教三行：

一曰孝行，以親父母；二曰友行，以尊賢良；三曰順行，以事師長。嫩，音美。行，去聲。

知，舊音智，今讀如字。○德行，內外之稱，在心爲德，施之爲行。孝在三德之下，三行之上，德有廣於孝，而行莫尊焉。國子，公卿大夫之子弟，師氏教之，而世子亦齒焉，學君臣父子長幼之道。○疏曰：鄭不言王太子及元士之適子者，略言之，其實皆有也。○今按：至德者，誠意正心，端本清原之事。道，則天人性命之理，事物當然之，則修身齊家治國平天下之術也。敏德者，強志力行，蓄德廣業之事。行，則理之所當，爲日可見之跡也。孝德者，尊祖愛親，不忘其所由生之事。知逆惡，則以得於己者篤實深固，有以真知彼之逆惡，而自不忍爲者也。○《保氏》：掌

諫王惡。而養國子以道，乃教之六藝：一曰五禮，二曰六樂，三曰五射，四曰五馭，五曰六書，六曰九數。乃教之六儀：一曰祭祀之容，二曰賓客之容，三曰朝廷之容，四曰喪紀之容，五曰軍旅之容，六曰車馬之容。養國子

以道者，以師氏之德行審諭之，而後教之以藝儀也。祭祀之容，穆穆皇皇。賓客之容，嚴恪矜莊。朝廷之容，濟濟跄跄。喪紀之容，涕涕翔翔。軍旅之容，闐闐仰仰。車馬之容，顛顛堂堂。玄謂：祭祀之容，齊齊皇皇。賓客之容，穆穆皇皇。朝廷之容，濟濟翔翔。喪紀之容，纍纍顛顛。軍旅之容，暨暨路路。車馬之容，匪匪翼翼。○嚴，如字，又音儼。濟，子禮反。跄，七良反。闐，呼檻反。仰，本又作「印」，五剛反。濟濟皇皇，濟，子禮反，又音齊；皇，于況反，又音往。纍，律悲反。顛，音田，又如字。暨，其器反。路，五格反。匪，芳非反。○《大司樂》：以樂德教

國子：中、和、祗、庸、孝、友。中，猶忠也。和，剛柔適也。祗，敬。庸，有常也。善父母曰孝，善兄弟曰友。以樂語教國子：興、道、諷、誦、言、語。興，去聲。諷，方鳳反。○興者，以物喻事。道，讀曰導。導者，言古以剴今也。倍文曰諷，以聲節之曰誦。發端曰言，答述曰語。○剴，苦代反。倍，音佩。以樂舞教國子，舞《雲門》、《大卷》、《大咸》、《大磬》、《大

①「七」，原作「亡」，據元明本、寬文本、賀本改。

夏》、《大濩》、《大武》。大，劉皆音泰，戚如字。卷，音權，又眷勉反，又居遠反。磬，上昭反。濩，戶故反。○此周所存六代之樂。黃帝曰《雲門》、《大卷》，黃帝能成名，萬物以明，民共財，言其德如雲之所出，民得以有族類。《大咸》、《咸池》，堯樂也。堯能禪均刑法以儀民，言其德無所不施。《大磬》，舜樂也，言其德能紹堯之道也。《大夏》，禹樂也，禹治水傅土，言其德能大中國也。《大濩》，湯樂也，湯以寬治民而除其邪言，其德能使天下得其所也。《大武》，武王樂也，武王伐紂以除其害，言其德能成武功。○共，音恭。禪，時戰反。傅，音孚。○疏曰：敷土，敷，布也，布治九州之水土也。濩者，即救護也，救護使天下得其所也。按《樂記》云：「《大章》，章之也。」注云：「堯樂名也。《周禮》闕之，或作《大卷》。」又云：「《咸池》，備矣。」注云：「黃帝所作樂名也，堯增修而用之。《周禮》曰：《大咸》。」周公作樂，更作《大卷》，更與黃帝樂立名曰《雲門》，則《雲門》、《大卷》爲一，故下文分樂而序之，更不序《大卷》也。禁其淫聲、過聲、凶聲、慢聲。淫聲，若鄭、衛也。過聲，失哀、樂之節。凶聲，亡國之聲，若桑間、濮上。慢慢，悄悄不恭。○《大胥》：掌學士之版，以待

致諸子。鄭司農云：學士，謂卿大夫諸子學舞者。版，籍也，今時鄉戶籍世謂之戶版。大胥主此籍，以待常召聚學舞者。卿大夫之諸子則按此籍以召之。漢《大樂律》曰：卑者之子不得舞宗廟之酎，除吏二千石到六百石，及關內侯到五大夫子，先取適子高七尺已上，年二十到年三十，顏色和順、身體修治者，以爲舞者。與古用卿大夫子同義。春入學，舍采合舞。舍，音釋。采，音菜。○春始以學士入學宮而學之。合舞，<sup>①</sup>等其進退，使應節奏。鄭司農云：舍采，謂舞者皆持芬香之采。或曰：古者士見於君，以雉爲摯，見於師，以菜爲摯。菜，直謂蔬食菜羹之菜。《月令》：仲春之月，「上丁，命樂正習舞釋采。仲丁，又命樂正入學習樂」。玄謂：舍即釋也，采讀爲菜。始入學，必釋菜禮先師也。菜，蘋藻之屬。○疏，所居反。○疏曰：先鄭解舍采，家之說，後鄭皆不從者。按記有釋菜奠幣，又云：始立學「釋菜，不舞，不授器」。舍即釋也，采即菜也，故以爲學子始入學釋采禮先師也。釋菜禮輕，故不及先聖。秋頒學合聲。春使之學，秋頒其才藝，所爲

①「合」字，原脫，據寬文本、賀本補。

合聲，亦等其曲折使應節奏。○《大師》：掌六律六

同以合陰陽之聲。陽聲：黃鍾、太簇、姑洗、

蕤賓、夷則、無射。陰聲：大呂、應鍾、南呂、

函鍾、小呂、夾鍾。皆文之以五聲：宮、商、

角、徵、羽。皆播之以八音：金、石、土、革、

絲、木、匏、竹。兩，胡南反。匏，白交反。○六律六

同，詳見後篇。五聲，已見上。金，鐘鎛也。石，磬也。土，

埴也。革，鼓鼗也。絲，琴瑟也。木，祝敔也。匏，笙也。

竹，管簫也。教六詩：曰風，曰賦，曰比，曰興，

曰雅，曰頌。風、雅、頌者，聲樂部分之名也。風則十五

國風，雅則大、小雅，頌則三頌也。賦、比、興，則所以製作

風、雅、頌之體也。賦者，直陳其事，如《葛覃》、《卷耳》之類

是也。比者，以彼狀此，如《蟋蟀》、《綠衣》之類是也。興

者，託物興詞，如《關雎》、《兔置》之類是也。蓋衆作雖多，

而其聲音之節，製作之體不外乎此。故大師之教國子，必

使之以是六者三經而三緯之，則凡詩之節奏指歸，皆將不

待講說，而直可吟詠以得之矣。以六德爲之本，以

六律爲之音。六德，即大司樂所教樂德。六律，兼六

同而言。

### 右教子弟之法。

《王制》：司徒修六禮以節民性，六禮：

冠、昏、喪、祭、鄉、相見。明七教以興民德，七教：父

子、兄弟、夫婦、君臣、長幼、朋友、賓客。齊八政以防

淫，八政：衣服、飲食、事爲、異別、度、量、數、制。鄭氏

曰：事爲，百工技藝也。異別，五方用器不同也。度，丈尺

也。量，斗斛也。數，百十也。制，布帛幅廣狹也。一道

德以同俗，養耆老以致孝，恤孤獨以逮不足，

上賢以崇德，簡不肖以綏惡。綏，救律反。○耆

老，致仕及鄉中老賢者。逮，及也。簡，差擇也。命鄉簡

不帥教者以告，帥，音率，下同。○帥，循也。不循教，

謂教很不孝弟者。司徒使鄉簡擇以告者，鄉屬司徒。○疏

曰：《周禮》六鄉大夫皆司徒統領。耆老皆朝于庠。

元日，習射上功，習鄉上齒，大司徒帥國之俊

士與執事焉。與，去聲。○將習禮以化之，使之觀焉。

朝，猶會也。此庠謂鄉學也。鄉，謂飲酒也。鄉禮，春、秋

射，國蜡而飲酒養老。○蜡，仕詐反。○疏曰：初時耆老聚會於庠學，乃擇元日，就州學習射，就黨學上齒。習射，習鄉各在一處，不得同日。《州長》職云：「春、秋會射于州序。」然則射在州序而云鄉射禮者，州屬於鄉，雖在州序，亦得謂之鄉。鄉居此州，更不立州學。若州有事，則就鄉學也。周之十二月，國家蜡祭之時，黨正飲酒而養老，以正齒位。若正月鄉學飲酒，則無正齒位之事。不變，命國之右鄉簡不帥教者移之左，命國之左鄉簡不帥教者移之右，如初禮。中年考校而又不變，使轉徙其居，覲其見新人有所化也。亦復習禮於鄉學，使之觀焉。○覲，音冀。復，扶又反。○疏曰：中，猶閒也，謂閒一年而考校之時。下云「不變屏之遠方」者，謂九年之時。鄭注不云閒年者，以九年限極，不須云閒年也。不變，移之郊，如初禮。郊，鄉界之外者也。稍出遠之，後中年又爲之習禮於郊學。○疏曰：謂五年之時，閒四年，下一年也。郊，謂近郊也。以遠郊之內，六鄉居之。若鄉民近國城及國內之人，其學在國中，或在公宮之右，或在公宮之左，故前云右鄉、左鄉。若鄉人遠國城，在近郊之外者，則學在近郊，其習禮亦鄉大夫臨之。不變，移之

遂，如初禮。遠郊之外曰遂，遂大夫掌之。又中年復移之使居遂，又爲習禮於遂之學。○疏曰：謂七年之時，閒六年，下一年也。按《司馬法》曰：「百里郊，二百里野。」《遂人》云：「掌邦之野。」既二百里爲野遂之所居，故知遠郊之外。六鄉州學主射，黨學主正齒位。遂則縣與州同，鄙與黨同。未知縣正主射，鄙師主正齒位以否，亦應與鄉不異，而《周禮》不備耳。但縣鄙皆屬於遂，雖各立學，總曰遂學。或遂之所居縣鄙不立縣鄙之學，有事則在遂學，與鄉同。不變，屏之遠方，終身不齒。屏，必郢反。○遠方，九州之外。齒，猶錄也。○疏曰：九州之外，於周則夷、鎮、蕃也。蓋隨罪之輕重而爲遠近之差。若王子、公卿之子，雖屏夷狄，但居夷狄之內畔。命鄉論秀士，升之司徒，曰選士。選，宣戀反，下皆同。○移名於司徒也。秀士，鄉大夫所考有德行道藝者。○疏曰：按《鄉大夫》云：「三年則大比，考其德行道藝而興賢者，能者。」謂鄉人有能有賢者，以鄉飲酒之禮興之，獻賢能之書於王，名則升於天府，身則任以官爵，則下文云：「大樂正論造士之秀者以告於王，而升諸司馬，曰進士。」彼據鄉人，故三年一舉，此據學者，故中年考試，殷、周同也。熊氏以



爲此中年舉者爲殷禮，鄉大夫三年舉者爲周法。司徒論選士之秀者而升之學，曰俊士。可使習禮者，學，大學。○疏曰：按《內則》云：「二十而冠，始學禮。」此俊士年以二十可使習禮，身升於大學，非唯升名而已。升於司徒者不征於鄉，升於學者不征於司徒，曰造士。不征，不給其繇役。造，成也，能習禮則爲成士。○疏曰：此繇役者，供學及司徒細碎之繇役也。二十習禮，舉其大綱，若其性識聰明，則亦早能習之。樂正崇四術，立四教，樂正，樂官之長，掌國子之教，《虞書》曰：「夔，命汝典樂，教胄子。」崇，高也，高尚其術以作教也。幼者教之於小學，長者教之於大學，《尚書傳》曰：「年十五始入小學，十八人大學。」○疏曰：崇，謂敷暢義理，贊明旨趣，使學者知之。順先王《詩》、《書》、禮、樂以造士。順此四術而教以成是士也。春秋教以禮、樂，冬夏教以《詩》、《書》。春、夏，陽也，《詩》、樂者聲，聲亦陽也；秋、冬，陰也，《書》、禮者事，事亦陰也。互言之者，皆以其術相成。○疏曰：鄭意以爲秋教禮，春教樂，冬教《書》，夏教詩也。所以詩得爲聲者，詩是樂章，詩

之文義以樂聲播之，故爲聲。若以聲對舞，則聲爲安靜，舞爲鼓動，舞爲陽，聲爲陰，故《大胥》云「春釋采合舞，秋頒學合聲」是也。就舞之中奮動甚者屬陽，奮動輕者屬陰，故記云「春夏學干戈，秋冬學羽籥」是也。書者，言事之經禮者。行事之法事爲安靜，故云「書、禮者事，事亦陰也」。《記》云「秋學《禮》，冬讀書」。與此同也。若不互言，而但云春夏教以樂、詩，秋冬教以禮、《書》，則是春夏但教以樂、《詩》，不教禮、《書》，秋冬但教以禮、《書》，不教以《樂》、《詩》也。必互言者，以此四術不可暫時而闕，故今交互言之。云春教樂，明兼有禮；秋教禮，明兼有樂；夏教《詩》，兼有《書》；冬教《書》，兼有《詩》，故云「皆以其術相成」，但逐其陰陽以爲偏主耳。王太子、王子、群后之太子、卿大夫元士之適子，國之俊選皆造焉。造，才早反，徐七到反。○皆以四術成之。王子，王之庶子也。群后，公及諸侯。凡入學以齒。皆以長幼受學，不用尊卑。將出學，小胥、大胥、小樂正簡不帥教者以告于大樂正，大樂正以告于王。出學，謂九年大成而出也。此所簡者，謂王太子、王子、群后之太子、卿大夫元士之適子也。大胥、小胥，皆樂官屬也。王

命三公、九卿、大夫、元士皆入學。不變，王親視學。亦謂使習禮以化之。不變，王又親爲之臨視，重棄賢者子孫。此習禮皆於大學也。○疏曰：若殷人習禮在於大學，即記云「瞽宗，殷學」。又云「禮在瞽宗」，殷之大學也。若周則大學曰東膠，故鄭注《儀禮·鄉射》云：「周立四代之學於國，而又以有虞氏之庠爲鄉學。」則周之尋常習禮於殷學之中，至九年爲王子不變，其習禮當於東膠大學。然則餘子十八人大學，嫡子二十人大學者，皆是殷法也。若周法，立當代大學在公宮左，即東膠也。又立小學於西郊，即有虞氏之庠也。其習《書》則於虞氏之學，習禮、樂則於殷之學，習舞則於夏后氏之學，故云：「春夏學干戈，秋冬學羽籥，皆於東序。」春誦夏弦，大師詔之瞽宗。又云：「禮在瞽宗，《書》在上庠。」《詩》則無文。鄭注云：「弦，謂以絲播《詩》。」則習《詩》亦在瞽宗。然《詩》與禮、樂雖各在其學習之，至二十人大學之時，仍於大學之中兼習四術，故此注云習禮皆於大學，是周之大學亦習禮也。禮既在瞽宗，又在大學，則其餘亦可知也。不變，王三日不舉。去食樂，重弃人。屏之遠方，西方曰棘，東方曰寄，終身不齒。棘，依注音燹。○棘，當

爲「燹」，燹之言偏，使之偏寄於夷戎。不屏於南北，爲其大遠。○燹，蒲北反。○疏曰：按《漢書》云西南有燹夷，又云：南北萬三千里，東西九千里。大樂正論造士之秀者以告于王，而升諸司馬，曰進士。移名於司馬。司馬，夏官，卿，主邦政者。進士，可進受爵祿也。○疏曰：此文承王子、公卿大夫之子下，似專據王子等，其實鄉人人學爲造士者亦同於此。其鄉人不在學者及邦國所貢之士，所貢於王，亦當升諸司馬，以司馬掌爵祿。司馬辨論官材，辨其論，官其材，觀其所長。論進士之賢者以告於王，而定其論。各署其所長。論定然後官之，使之試守。①任官然後爵之，命之位定然後祿之。有發，則命大司徒教士以車甲。乘兵車衣甲之儀。有發，謂有軍師發卒。○疏曰：命司徒者，以其主衆又主教，故使與司馬相參也。○凡學，世子及學士必時，凡學，戶孝反，教也，下正學，師學戈，學舞同。○四時各有宜。學士，謂司徒論俊選

①「試」，原作「吐」，據元明本、寬文本、賀本改。

所升於學者。春夏學干戈，秋冬學羽籥，皆於東序。干，盾也。戈，句孑戟也。干戈，《萬》舞，象武也，用動作之時學之。羽籥，《籥》舞，象文也，用安靜之時學之。《詩》云：「左手執籥，右手秉翟。」○盾，食準反，又音升。句，占侯反。翟，大歷反。○疏曰：按《考工記》：「戈廣二寸，內倍之，胡三之，援四之。」以其形句曲有孑刃也。鄭云：「若今雞鳴戟也。」《公羊傳》：「《萬》者何？干舞也。」以其用干，故知象武也。羽，翟羽也。籥，笛也。《公羊傳》云：「籥者何？《籥》舞也。」以其不用兵器，故象文也。小樂正學干，大胥贊之；籥師學戈，籥師丞贊之。四人皆樂官之屬也，通職，秋冬亦學以羽籥。小樂正，樂師也。《周禮·樂師》：「掌國學之政，教國子小舞。」《大胥》：「掌學士之版。春入學，舍菜合舞。秋頒學，合聲。」《籥師》：「掌教國子舞羽吹籥。」○疏曰：此經雖多有諸侯之禮，故謂之大樂正、小樂正也。小舞者，謂年幼小時教之舞，其舞即帔舞、羽舞、皇舞、旄舞、干舞、人舞也。《周禮》唯有籥師，此云籥師承者，或諸侯之禮，或異代之法。胥鼓《南》。《南》，南夷之樂也。胥掌以六樂之會，正舞位。旄人教夷樂，則以鼓節之。《詩》云：「以《雅》以

《南》，以籥不僭。」○疏曰：胥，謂大胥。東夷之樂曰《昧》，南夷之樂曰《南》，西夷之樂曰《朱離》，北夷之樂曰《禁南》，一名《任》。記云：「《任》，南蠻之樂也。」春誦夏弦，大師詔之。瞽宗秋學《禮》，執禮者詔之；冬讀《書》，典書者詔之。《禮》在瞽宗，《書》在上庠。誦，謂歌樂也。弦，謂以絲播《詩》。陽用事，則學之以聲；陰用事，則學之以事。因時順氣，於功易成也。周立三代之學：學《書》於有虞氏之學，《典》、《謨》之教所興也；學舞於夏后氏之學，文武中也；學《禮》、《樂》於殷之學，功成治定，與己同也。○疏曰：上文學舞之時，皆據年二十升於大學者。若其未升大學之時，則如此文也。春夏是陽，陽主清輕，故學聲；秋冬屬陰，陰主體質，故學事。云「周立三代之學」者，謂立虞、夏、殷學也。其虞之學制在國，兼在西郊，則周之小學也。夏后氏之學在上庠，即周之大學，為夏之制也。先師以為三代學皆立大學、小學，今按下「養老於東序」，是周之大學，夏之東序也。又《王制》云「養老於虞庠」，是周之小學為虞庠也。凡祭與養老乞言、合語之禮，皆小樂正詔之於東序。學以三者之威儀也。「養老乞言」，養老人之賢者，因從乞善言可

行者也。合語，謂鄉射、鄉飲酒、大射、燕射之屬也。《鄉射》記曰：「古者於旅也語。」○疏曰：合語，謂合會義理而語說，非爲祭與養老而言也，指謂鄉射、鄉飲酒及大射、燕射旅酬之時皆合語爾。其實，祭末及養老，亦皆合語也。故《詩·楚茨》論祭祀之事云「笑語卒獲」，箋云「古者於旅也語」，是祭有合語也。養老既乞言，自然合語也。大樂

正學舞干戚，語說，命乞言，皆大樂正授數。

說，如字。○學以三者之義也。戚，斧也。語說，合語之說也。數，篇數。○疏云：「舞干戚」，即前經祭祀也。「語說」，謂合語之說，即前經合語也。「命乞言」，即前經養老也。「授數」者，謂干戚、語說、乞言三者，皆大樂正之官授世子及學士等篇章之數，爲之講說，使知義理。大司成論說在東序。論，力門反，徐力頓反，注同。○論說，

課其義之深淺，才能優劣。此云樂正司業父師，司成則大司成、司徒之屬師氏也。師氏掌以美詔王，教國子以三德三行，及國中失之事也。凡侍坐於大司成者，遠近

聞三席，可以問。遠近聞，並如字。問，徐古辦反。

○問，猶容也。容三席，則得指畫相分別也。席之制，廣三尺三寸三分，則是所謂函丈也。終則負牆，卻就後席相

避。列事未盡不問。錯尊者之語，不敬也。凡學，

春官釋奠于其先師，秋冬亦如之。官，謂禮、樂、

《詩》、《書》之官。《周禮》曰：「凡有道者，有德者，使教焉，死則以爲樂祖，祭於瞽宗。」此之謂先師之類也。若漢，

《禮》有高堂生，《樂》有制氏，《詩》有毛公，《書》有伏生，意可以爲之也。不言夏，夏從春可知也。釋奠者，設薦饌酌

奠而已，無迎尸以下之事。○疏云：所教之官，若春誦夏

弦，則大師釋奠也。教干戈，則小樂正、樂師等釋奠也。教

禮者，則執禮之官釋奠也。皇氏云：其教雖各有時，其釋

奠則四時各有其學，備而行之。四時在學釋奠，猶若教

《書》之官，春時於虞庠之中釋奠於明《書》之師，四時皆然。

教《禮》之官，秋時於瞽宗之中釋奠於其先代明《禮》之師，

如此之類是也。○陳祥道云：奠者，陳而奠之也。賈公彥

曰：奠之爲言停，停饌具而已。凡始立學者，必釋

奠于先聖先師，及行事，必以幣。謂天子命之

教，始立學官者也。先聖，周公若孔子。○疏云：立學爲

重，故及先聖，常典爲輕，故唯先師。○陳祥道云：學之釋

奠有常時者，有非時者。春官釋奠，常時之釋奠也。凡始

立學，天子視學出征，執有罪反以訊馘，告必釋奠焉，此非

時之釋奠也。凡釋奠者，必有合也。國無先聖、先師，則所釋奠者當與鄰國合也。○陳祥道云：釋奠之禮，有牲幣，有合樂，有獻酬。大祝造于廟，宜于社，過大山川則用事，反則釋奠，此告祭也。記曰：「凡告必用牲幣。」又曰：「凡釋奠者必有合也。」此釋奠有牲幣、合樂之證也。《聘禮》：「觴酒陳，席于阼，薦脯醢，三獻。一人舉爵，從者行酬，乃出。」此釋奠有獻酬之證也。○今以下文考之，有合當為合樂。從陳說。有國故則否。若唐、虞有夔、伯夷，周有周公，魯有孔子，則各自奠之，不合也。○今按：國故，當為喪紀凶札之類。凡大合樂，必遂養老。大合樂，謂春入學舍菜合舞，秋頒學合聲。於是時也，天子則視學焉，遂養老者，謂用其明日也。鄉飲酒、鄉射之禮，明日「乃息司正，徵唯所欲，以告於先生君子可也」，是養老之象類。凡語于郊者，語，謂論說於郊學。○疏云：郊，西郊也。周以虞庠為小學，在西郊，天子親視學而考課論說也。必取賢斂才焉，或以德進，或以事舉，或以言揚。「大樂正論造士之秀者，升諸司馬，曰進士」，謂此矣。曲藝皆誓之，曲藝，為小技能也。誓，謹也，皆使謹習其事。以待又語。又語，為後

復論說也。○復，扶又反。○疏曰：令待後復論說之日，如春待秋時也。三，而一有焉，說之中，有一善則取之。以有曲藝，不必盡善。乃進其等，進於衆學者。○疏曰：等，輩類也。以其序。又以其藝為次。謂之郊人，遠之。遠，于萬反。○俟事官之缺者以代之。遠之者，不曰俊選，曰郊人，賤技藝。○疏云：「謂之郊人」，以其猶在郊學也。於成均，以及取爵於上尊也。董仲舒曰：「五帝名大學曰成均。」則虞庠近是也。天子飲酒於虞庠，則郊人亦得酌于上尊以相旅。○疏云：上尊，堂上之酒尊。卑者酌於堂下之尊，郊人雖賤，亦得酌於堂上尊。始立學者，既興器用幣，與，當為「釁」，字之誤也。禮樂之器成則釁之，又用幣告先聖、先師以器成。然後釋菜，告先聖先師以器成有時，將用也。不舞不授器。釋菜，禮輕也。釋奠則舞，舞則授器。司馬之屬司兵、司戈、司盾祭祀授舞者，兵也。乃退儻于東序，一獻，無介語可也。儻，必刃反，本又作「擯」。○言乃退者，謂得立三代之學者，釋菜于虞庠，則儻賓于東序。魯之學有米廩、東序、瞽宗也。○疏云：東序與虞庠相對，

東序在東，虞庠在西，既退僮于東序，明釋菜在於虞庠。  
○《文王世子》。○今按：語，即前經「合語」之等。言「可也」，明釋菜時未可語，禮尚嚴也。

### 右教學之通法。

## 學義第十七

### 學禮一之下

皋陶曰：天敘有典，勅我五典五惇哉。

天次敘人之常性，各有分義，當勅正我五常之教，使合于五厚，厚天下。天秩有禮，自我五禮有庸哉。庸，常。自，用也。天次秩有禮，當用我吉、凶、軍、賓、嘉五者之禮以行之，使有常。同寅協恭和衷哉。寅，敬。

協，合。衷，中也。言厚典、庸禮皆天之所爲，君臣代天行事，當同敬合恭，而和順於中道也。天命有德，五服

五章哉。五服，天子、諸侯、卿、大夫、士之服也，尊卑采

章各異，所以命有德。○今按：五服，恐是袞、鷩、毳、希、玄五等冕服。天討有罪，五刑五用哉。五刑，謂墨、劓、剕、宮、大辟。政事懋哉，懋哉。言命德討罪，

無非天意，故代天行事者制此五服、五刑以爲政事，不可以不自勉。○《尚書》。○孟子曰：人之有道也，飽

食煖衣，逸居而無教，則近於禽獸。聖人有憂之，使契爲司徒，教以人倫：父子有親，君臣有義，夫婦有別，長幼有序，朋友有信。「人之有道」，言其皆有秉彝之性也。然無教則亦放逸怠惰而失之，故聖人設官而教以人倫，亦因其固有者而道之耳。

《書》曰：「天敘有典，勅我五典五惇哉。」此之謂也。○又

曰：庠者，養也；校者，教也；序者，射也。

夏曰校，殷曰序，周曰庠，學則三代共之，皆所以明人倫也。庠以養老爲義，校以教民爲義，序以

習射爲義，皆鄉學也。學，國學也。共之，無異名也。倫，序也。父子有親，君臣有義，夫婦有別，長幼有序，朋友有信，此人之大倫也，庠、序、學、校皆以明此而已。○晏子

曰：君令臣共，父慈子孝，兄愛弟敬，夫和妻柔，姑慈婦聽，禮也。共，音恭。君令而不違，臣共而不貳；父慈而教，子孝而箴；兄愛而

友，弟敬而順；夫和而義，妻柔而正；姑慈而從，婦聽而婉：禮之善物也。箴，之林反。婉，於阮反。○箴，諫也。從，不自專。婉，順也。○《左

傳》。○樂共子曰：「民生於三，事之如一。」

父生之，師教之，君食之。非父不生，非食不長，非教不知。生之族也，故一事之。食，音

嗣。長，丁丈反。唯其所在，則致死焉。在君、父為

君、父，在師為師。報生以死，報賜以力，人之道

也。《國語》。○《白虎通》曰：三綱者何謂

也？謂君臣、父子、夫婦也。君為臣綱，父

為子綱，夫為妻綱。大者為綱，小者為紀，所

以張理上下、整齊人道也。人皆懷五常之

性，有親愛之心，是以綱紀為化，若羅網之有

紀綱而百目張也。○所以謂三綱者何？一

陰一陽謂之道。陽得陰而成，陰得陽而序，

剛柔相配，故六人為三綱，<sup>④</sup>法天、地、人：君

臣法天，取象日月屈伸，歸功天也；<sup>⑤</sup>父子法

地，取象五行，轉相生也；夫婦法人，取象人合陰陽，有施化端也。<sup>⑥</sup>君，群也，群下之所歸也。臣，牽也，事君也，象屈服之形也。父者，矩也，以法度教子也。<sup>⑦</sup>子者，孳也，孳孽無已也。夫者，扶也，以道扶接也。婦者，服也，以禮屈服也。五性者何？謂仁、義、禮、智、信也。仁者，不忍，好生愛人。義者，宜也，斷決得中。禮者，履也，履道成文。智者，知也，見微知著。信者，誠也，專一不移。故人生而應八卦之體，得五氣以為常，仁、義、禮、智、信是也。

①「左」上，寬文本、賀本有「昭公二十六年」六字。

②「語」下，寬文本、賀本有「晉語」二字。

③「有紀綱」三字，原脫，據賀本補。

④「六」字，原脫，據賀本補。

⑤「天」字，原脫，據賀本補。

⑥「化端」二字，原脫，據賀本補。

⑦「法」字，原脫，據賀本補。

右明人倫之義。

天高地下，萬物散殊，而禮制行矣。禮爲

異也。流而不息，合同而化，而樂興焉。樂爲同

也。春作夏長，仁也；秋斂冬藏，義也。仁近

於樂，義近於禮。長，丁丈反。近，附近之近。○言

樂法陽而生，禮法陰而成。樂者敦和，率神而從

天；禮者別宜，居鬼而從地。敦，音純。別，彼列

反，下「以別」、「之別」同。○敦和，樂貴同也。率，循也。

從，順也。別宜，禮尚異也。○今按：神，陽也。鬼，陰也。

故聖人作樂以應天，制禮以配地。禮樂明

備，天地官矣。官，猶事也，各得其事。○人生而

靜，天之性也；感於物而動，性之欲也。言性

不見物則無欲。物至知知，然後好惡形焉。好，

呼報反。惡，烏路反，下並同。○至，來也。知知，每物來

則又有知也。言見物多，則欲益衆。形，猶見也。好惡

無節於內，知誘於外，不能反躬，天理滅矣。

誘，音酉。○節，法度也。知，猶欲也。誘，猶道也，引也。

躬，猶己也。理，猶性也。夫物之感人無窮，而人

之好惡無節，則是物至而人化物也。人化物

也者，滅天理而窮人欲者也。窮人欲，言無所不

爲。於是有悖逆詐僞之心，有淫佚作亂之

事。是故強者脅弱，衆者暴寡，知者詐愚，勇

者苦怯，疾病不養，老幼孤獨不得其所，此大

亂之道也。知，知義反。是故先王之制禮樂，

人爲之節。言爲作法度以遏其欲。○疏曰：人爲，猶

爲人也。○今按：「人爲之節」，言人人皆爲之節也。衰

麻哭泣，所以節喪紀也；鐘鼓干戚，所以和

安樂也；昏姻冠笄，所以別男女也；射鄉食

饗，所以正交接也。衰，七雷反。樂，音洛，下則樂、

樂則、不樂之樂同。冠，古亂反。笄，音雞。食，音嗣。○

男二十而冠，女許嫁而笄，成人之禮。射鄉，大射，鄉飲酒

也。禮節民心，樂和民聲，政以行之，刑以防

之。禮樂刑政四達而不悖，則王道備矣。○

君子曰：禮樂不可斯須去身。致樂以治心，



則易、直、子、諒之心油然而生矣。易、直、子、諒之心生則樂，樂則安，安則久，久則天，天則神。天則不言而信，神則不怒而威，致樂以治心者也。易，以豉反，下易慢之易同。○致，猶深審也。子，讀如不子之子。油然而生，好貌也。善心生則寡於利欲，寡於利欲則樂矣。樂由中出，故治心。○今按：《韓詩外傳》「子諒」作「慈良」，近是。天謂體性自然，神謂神妙不測。致禮以治躬則莊敬，莊敬則嚴威。躬，身也。禮自外作，故治身。心中斯須和不樂，而鄙詐之心人之矣；鄙詐人之，謂利欲生。外貌斯須不莊不敬，而易慢之心人之矣。易，輕易也。故樂也者，動於內者也；禮也者，動於外者也。樂極和，禮極順。內和而外順，則民瞻其顏色而弗與爭也。望其容貌，而民不生易慢焉。故德輝動於內而民莫不承聽，理發諸外而民莫不承順。德輝，顏色潤澤也。理，容貌之進止也。故曰：致禮樂之道，舉而錯之

天下，無難矣。以上《樂記》。

### 右明禮樂之義。

孔子曰：弟子入則孝，出則弟，謹而信，汎愛衆而親仁。行有餘力，則以學文。則弟之弟，大計反。○謹者，行之有常也。信者，言之有實也。汎，廣也。衆，謂衆人。親，近也。仁，謂仁者。餘力，猶言暇日。以，用也。文，謂《詩》、《書》六藝之文。○程子曰：爲弟子之職，力有餘則學文，不修其職而先文，非爲己之學也。尹氏曰：德行，本也；文藝，末也。窮其本末，知所先後，可以入德矣。洪氏曰：未有餘力而學文，則文滅其質；有餘力而不學文，則質勝而野。○愚謂：力行而不學文，則無以考聖賢之成法，識事理之當然，而所行或出於私意，非但失之於野而已。○《學而》。○孔子曰：興於《詩》，興，起也。《詩》本性情，有邪有正。其爲言既易知，而吟詠之間，抑揚反復，其感人又易入。故學者之初，所以興起其好善惡之心，而不能自己者，必於此而得之。立於禮，禮以恭敬辭遜爲本，而有節文度數之詳，可以固人肌膚之會，筋骸之束。故學者之中，所以能卓然自立而

不爲事物之所搖奪者，必於此而得之。成於樂。樂有

五聲十二律，更唱迭和，以爲歌舞八音之節，可以養人之性情，<sup>①</sup>而蕩滌其邪穢，消融其查滓，故學者之終，所以至於義精仁熟而自和順於道德者，必於此而得之，是學之成也。

○《泰伯》。○按《內則》，十歲學幼儀，十三學樂誦《詩》，二十而後學《禮》。則此三者非小學傳授之次，乃大學終身所得之難易，先後，淺深也。程子曰：天下之英才不爲少矣，特以道學不明，故不得有所成就。夫古人之詩，如今之歌曲，雖閭里童稚皆習聞之而知其說，故能興起。今雖老師宿儒，尚不能曉其義，況學者乎？是不得興於《詩》也。古人自灑掃應對，以至冠、昏、喪、祭莫不有禮。今皆廢壞，是以人倫不明，治家無法，是不得立於禮也。古人之樂，聲音所以養其耳，采色所以養其目，歌詠所以養其性情，舞蹈所以養其血脈。今皆無之，是不得成於樂也。是以古之成材也易，今之成材也難。○子思曰：夫子之教，必始於《詩》、《書》而終於禮、樂，雜說不與焉。<sup>②</sup>○君子曰：甘受和，白受采，忠信之人可以學禮。苟無忠信之人，則禮不虛道。和，去聲。○《禮器》。

## 右明教學之序。

### 儀禮經傳通解卷第九終

①「性情」，原作「情性」，據賀本改。

②「焉」下，賀本有小字雙行注文「孔叢子」三字。

# 儀禮經傳通解卷第十

## 弟子職第十八

### 學禮二

先生施教，弟子是則。溫恭自虛，所受是極。必虛其心，然後能有所容。極，謂盡其本原也。見善從之，聞義則服。溫柔孝弟，毋驕恃力。服，叶蒲北反。○驕而恃力，則羝羊觸藩。志毋虛邪，行必正直。游居有常，必就有德。行，下孟反。○虛，謂虛僞。顏色整齊，中心必式。夙興夜寐，衣帶必飭。式，法也。朝益暮習，小心翼翼。一此不懈，是謂學則。

### 右學則。

少者之事，夜寐蚤作。既拚盥漱，執事有恪。拚，弗運反。盥，音管。漱，素茂反。○埽席前曰

拚。盥，潔手。漱，滌口。①攝衣共盥，先生乃作。沃盥徹盥，汎拚正席，共，音恭。席，叶祥肅反。○共盥，謂共先生之盥器也。徹盥，謂既盥而徹盥器也。汎拚，謂廣拚內外，不止席前也。先生乃坐。出入恭敬，如見賓客。危坐鄉師，顏色毋怍。客，叶音恪。鄉，音向。○怍，謂變其容貌。

### 右蚤作。

受業之紀，必由長始。一周則然，其餘則否。長，丁丈反。否，叶音鄙。○謂先從長者教之，一周之外則不必然。始誦必作，其次則已。始誦而作，以敬事端也。至於次誦，則不必然。凡言與行，思中以為紀。古之將興者，必由此始。行，下孟反。○中者，無過無不及之名，以此為紀綱，然後可興也。後至就席，狹坐則起。狹坐之人，見後至者則當起。若有賓客，弟子駿作。對客無讓，應且遂行。

①「口」，原作「日」，據元明本、寬文本、賀本改。

趨進受命，所求雖不在，必以反命。客，見上。讓，叶平聲。行，叶音杭。○駿作，迅起也。對客無讓者，供給使令，不敢亢禮也。①受命，爲先生命，求雖不得，必以反白。反坐復業，若有所疑，捧手問之。師出皆起，至於食時。

### 右受業對客。

先生將食，弟子饌饋。攝衽盥漱，跪坐而饋。置醬錯食，陳膳毋悖。錯，七故反。悖，布內反。○饋，謂選具其食。凡置彼食，鳥獸魚鱉，必先菜羹。羹，叶音郎。○先菜後肉，食之次也。羹載中別，載在醬前，其設要方。載，側吏反。別，彼列反。要，一遙反。○載，謂肉而細者。遠載近醬，食之便也。其陳設食器，要令成方也。飯是爲卒，左酒右醬。醬，當作「漿」。○既飯而食則卒也，②是謂載也。禮：三飯乃食載而辨般，皆畢，又用酒以醕，用漿以漱，故言飯載，而食終乃言酒漿，明在載外也。鄭注：《禮》兩引此文皆作「漿」字。③又此上文已云載在醬前，則此醬不應復在載外矣。今本誤也。告具

而退，捧手而立。二句用韻不叶，未詳。○三飯二斗，左執虛豆，右執挾匕，周還而貳。唯謙之視，同謙以齒，周則有始。柄尺不跪，是謂貳紀。挾，占協反。還，音旋。謙，苦簾反。○

三飯食，必二毀斗也。挾，猶箸也。匕，所以載鼎實者。貳，謂再益也。食盡曰謙。視有盡者則益之。齒，次序也。如菜肉同盡，則先益菜，後益肉也。豆有柄長尺，則立而進之，此是再益之綱紀也。○先生已食，弟子乃徹。趨走進漱，拚前斂祭。④漱，祭，未詳。○既食畢，掃席前，并搜斂所祭也。

### 右饌饋。

先生有命，弟子乃食。以齒相要，坐必盡席。要，平聲。○所謂食坐盡前，恐汚席也。飯必

①「亢」，原作「七」，據寬文本、賀本改。

②「既飯而食則卒也」七字，原在上文「醬當作漿」前，據賀本移此。

③「此」，原作「上」，據寬文本、賀本改。

④「斂」，原作「板」，據元明本、寬文本、賀本改。

捧摩，羹不以手。亦有據膝，無有隱肘。既食乃飽，循呬覆手。摩，音覽。隱，於靳反。飽，叶補苟反。呬，音二。○不以手，當以袂也。隱肘，則太伏也。呬，口也。覆手而循之，所以拭其不潔也。振衽掃席，已食者作。摳衣而降，旋而鄉席。各徹其餽，如於賓客。既徹并器，乃還而立。摳，苦侯反。鄉，音向。席，客，還，並見上。立，未詳。○「振衽掃席」，謂振其底衽以拂席之污，賓客食畢，亦自徹其餽，并謂藏去也。

### 右乃食。

凡拚之道，實水于盤，攘臂袂及肘，堂上則播灑，室中握手。執箕膺揲，厥中有帚。揲，記注作「搗」，又作「葉」，並以涉反。○攘袂者，恐濕其袂，且不便於事也。堂上寬，故播而灑。室中隘，故握手為掬以灑。揲，舌也。既灑水將拚之，故執箕以舌自當，而置帚於箕中也。入戶而立，其儀不貸。執帚下箕，倚于戶側。貸，它得反。○謂倚箕於戶側。凡拚之紀，必由奧始。西南隅也。俯仰磬折，拚

毋有徹。折，之舌反。○徹，動也，不得觸動他物也。拚前而退，聚於戶內。從前掃而卻退，聚其所掃穢壤於戶內也。坐板排之，以葉適己，實帚于箕。板穢時，以手排之。適己，向己也。先生若作，乃興而辭。以拚未畢，故辭之令止也。坐執而立，遂出弃之。既拚反立，是協是稽。協，合也。稽，考也。謂合考書義也。

### 右灑掃。

暮食復禮，謂復朝食之禮。昏將舉火，執燭隅坐。錯總之法，橫于坐所。燭之遠近，<sup>①</sup>乃承厥火，坐，上聲。錯，見上。所，叶疏果反。燭，莊乙反。○總，束也，古者束薪蒸以為燭，故謂之總。其未然者，則橫于坐之所也。燭，謂燭盡。察其將盡之遠近，乃更以燭。承，取火也。居句如矩。蒸間容蒸，然者處下，捧椀以為緒。句，占侯反。下，叶音戶。○句，

①「燭」，原作「櫛」，據元明本、寬文本、賀本改。以下徑改，不再出校。

曲也。舊燭既盡，則更使人以新燭繼之。一橫一直，其兩端相接之處勢曲如矩，則方正不邪也。蒸，細薪也。言稍寬其束，使其蒸間可以各容一蒸，以通火氣。又使已然者居下，未然者居上，則火易然也。緒，燭燼也。椀，所以貯緒也。左手執燭，右手正燭。<sup>①</sup>有墮代燭，交坐無倍尊者。乃取厥燭，遂出是去。者，叶音渚。去，上聲。○先執燭者，既捧椀以貯燭之餘緒，遂以右手正燭，<sup>②</sup>而投其緒於椀中，至其燭漸短有墮而不可執者，則後執燭者代之而交坐於其處，前執燭者乃取燭而出棄之也。

### 右執燭。

先生將息，弟子皆起。敬奉枕席，問所何趾。俶衽則請，有常則否。奉，芳勇反。俶，昌六反。否，見上。○俶，始也。變其衽席，則當問其所趾，若有常處，則不請也。

### 右請衽。

先生既息，各就其友。相切相磋，各長其儀。周則復始，是謂弟子之紀。友，叶音以，

叶上章。長，丁丈反。儀，叶五何反。

### 右退習。

## 少儀第十九

## 學禮三

人生十歲曰幼，學。名曰幼，時始可學也。

《冠禮》云「棄爾幼志」，是未冠前爲幼。《內則》曰：「十年，出就外傳，居宿於外，學書計。」○程子曰：「古人生子，能食能言而教之。大學之法，以豫爲先。人之幼也，知思未有所主，便當以格言至論日陳於前，雖未曉知，且當薰聒，盈耳充腹，久自安習，若固有之。雖以他言惑之，不能入也。若爲之猶豫，及乎稍長，私意偏好生於內，衆口辯言爍於外，欲其純完，不可得也。二十曰弱，冠。冠，古亂反。○始成人，血氣猶未定，故曰弱，時可加冠於首也。三十曰壯，有室。其時年壯，可有室矣。室，謂妻也。四

① 左，原作「右」；右，原作「左」；均據寬文本、賀本改。

② 右，原作「左」，據寬文本、賀本改。

十曰強，而仕。智慮氣力強，可仕也。五十曰艾，

服官政。艾，老也。五十始衰，髮之蒼白者如艾。服官

政，謂爲大夫。六十曰耆，指使。耆者，至也。一

云：耆，稽久也。指事使人也。六十不與服戎，不親學。

七十曰老，而傳。傳家事，任子孫，是謂宗子之父。

○疏曰：庶子年老亦得傳付子孫，而鄭唯曰「謂宗子之父」

者，因此以證《喪服》宗子「有不孤者」，「爲父有廢疾，若七

十而老，子代主宗事者耳」，非謂宗子乃傳家事而餘人不得

也。八十、九十曰耄，耄，昏忘也，《春秋傳》曰：「謂

老將知，耄又及之。」七年曰悼，悼，憐愛也。悼與

耄，雖有罪不加刑焉。愛幼而尊老。百年曰期，

頤。期，猶要也。頤，養也。不知衣服食味，孝子要盡養

道而已。○今按：期，當音居宜反，《論語》「期可已矣」，與

「梓」字同，周匝之義也。期謂百年已周，頤謂當養而已。

期如上句幼、弱、耄、悼等字，頤如上句學、冠、不刑等字。

○《曲禮》。○幼名，冠字，五十以伯仲，死謚，

周道也。謚，音示。○疏曰：生若無名，不可分別，故生

三月而加名，故云幼名也。人年二十，有爲人父之道，朋友

等類不可復呼其名，故冠而加字，曰伯、仲、叔、季某甫。年

至五十耆艾轉尊，又捨其某甫之字，而直以伯、仲、叔、季別

之，至死而加謚。凡此之事，皆周道也。然則，自殷以前，

爲字不在冠時，伯、仲不當五十，以殷尚質，不諱名故也。

○《檀弓》。○年長以倍，則父事之。倍，薄亥反。

○謂年二十於四十者。人年二十，弱冠成人，有爲人父之

端。今四十於二十者，有子道。《內則》曰：年二十「惇行

孝弟」。十年以長，則兄事之。五年以長，則

肩隨之。肩隨者，與之並行差退。群居五人，則長

者必異席。席以四人爲節，因宜有所尊。○《曲禮》。

右差等。

幼子常視毋誑，說見《內則》。童子不衣裘

裳。衣，去聲。○裘，羔狐等皮爲之，太溫，消陰氣，使不

堪苦。不衣裳，便易。○疏曰：衣猶著也。童子體熱，不

宜著裘，太溫，傷陰氣也。又應給役，若著裘則不便，故並

不著也，故童子並緇布襦袴也。又曰：苦，謂役使。《內

① 「知」，原作「至」，據寬文本、賀本改。

則《公》：「二十可以衣裘。」立必正方，不傾聽。習其自端正。○疏曰：立宜正鄉一方，不得傾頭屬聽左右也。長者與之提攜，則兩手奉長者之手。奉，芳勇反。○習其扶持，尊者提攜，謂牽行。○疏曰：爲兒長大，方當供養扶持長者，故先使學之，令習便也。負劍辟咡詔之，則掩口而對。辟，匹亦反。咡，如志反，口耳之間曰咡。○負，謂置之於背。劍，謂挾之於旁。辟咡詔之，謂傾頭與語。口旁曰咡。使之掩口而對，習其鄉尊者屏氣也。○疏曰：劍，謂挾於脇下，如帶劍也。長者負兒之時，傾頭與語，必教之使掩口而對，恐氣觸人也。○張子曰：古之小兒，便能敬事長者。與之提攜，則兩手奉長者之手，問之，掩口而對。蓋稍不敬事，便不忠信，故教小兒且先安詳恭敬。○《曲禮》。○童子不裘不帛，不屨絢，無總服，聽事不麻。無事則立主人之北，南面。見先生，從人而入。絢，其俱反。見，賢遍反。○裘帛溫，傷壯氣也。絢，屨頭飾也。皆爲幼少不備禮也。雖不服總，猶免，深衣無麻，往給事也。○少，詩照反。免，音問。○疏曰：童子唯當室與族人爲禮，

有恩相接之義，故遂服本服之總耳。若不當室，則情不能至總，故不服也。雖不總，然猶著免，深衣無絰，以往給總喪使役也。案《問喪》以童子不當室則無免，而此云猶免者，崔氏、熊氏並云：不當室而免者，謂未成服而來也。《問喪》云不當室不免者，謂據成服之後也。○《玉藻》。○小子走而不趨，舉爵則坐祭立飲。小子，弟子也，卑，不得與賓、介俱備禮容也。○疏曰：趨，徐趨也。弟子不得與賓主參預禮，但給役使，故宜驅走，不得趨翔爲容也。○尊長於己踰等，不敢問其年。踰等，父兄黨也。問年，則已恭遜之心不全。燕見不將命。見，賢遍反。○私燕而見，不使摯者將傳其命，不敢用賓主之禮來，則若子弟然。遇於道，見則面，尊者若見己，已則面見。若尊者不見己，己則隱，不敢煩動尊者也。不請所之。不問所往也。喪俟事，不植弔。植，音特。○亦不敢故煩動也。事，朝夕哭時。侍坐弗使，不執琴瑟，不畫地，手無容，不翬也。畫，胡麥反。翬，本又作「𦏧」，所角反。○尊長或使彈琴指畫，則爲之可也。手無容，不弄手也。翬，扇也。雖熱，亦不敢搖扇



也。此皆端慤所以爲敬。寢則坐而將命。坐，跪也。

命，有所傳辭。若尊者卧而侍者傳辭，當跪前，不可以立，恐臨尊也。侍射則約矢，矢，箭也。凡射必計耦，先設

箭在中庭，上耦前取一次，下耦又進取一。如是更進，各得四箭而升堂，插三於要，而手執一。若卑者侍射，則不敢更拾進取，但一時并取四矢，故云約矢。侍投則擁矢。

投，投壺也。擁，抱也。矢，投壺箭也。尊者委四矢於地，一一取以投。卑者不敢委於地，悉執之。勝則洗而以

請，若敵射及投壺竟，司射命酌，而勝者弟子酌酒，不勝者飲之。若卑者得勝，則不敢直酌，但當洗爵，而請問何所行觴也。客亦如之。客射，若投壺不勝，主人亦洗而請

之，如卑侍之法，所以優賓也。○今按：此二句皆是卑者

與尊者爲耦而射及投壺。若己勝而司射命酌，則不敢使它弟子酌酒以罰尊者，必自洗爵而請行觴。若耦勝，則亦不敢煩它弟子酌而飲己，必自洗爵而請自飲也。注，疏說恐非是。不角，角，謂觥，罰爵也。於尊長與客飲，如獻酬

之爵，不敢用角也。○觥，苦橫反。不擢馬。擢，直角反。○擢，去也，謂徹也。己徹馬嫌勝，故專之。○疏曰：

凡投壺，每一勝輒立一馬，至三馬而成勝。但頻勝三馬難得，若一朋得二馬，一朋得一馬，於是一馬之朋，徹取一馬者，足以爲三馬，以成定勝也。今若卑者朋，雖得二馬，亦不敢徹尊長馬足成己勝也。○並《少儀》。

### 右品節。

汜掃曰掃，掃席前曰拚。拚席不以鬣，

執箕膺搗。汜，芳劍反。掃，悉報反。拚，弗運反。鬣，

力輒反。搗，見前篇。○鬣，謂帚也。帚恒掃地，不潔清

也。膺，親也。搗，舌也。持箕將去糞者，以舌自鄉。○疏

曰：汜，廣也。廣掃內外俱掃，拚則止掃席前也。○《少

儀》。○凡爲長者糞之禮，必加帚於箕上，爲

去聲。糞，音奮，又作「攢」。帚，之手反。○掃席前曰糞。

如是得兩手奉箕，恭也，謂初執而往時也。《弟子職》曰：

「執箕膺搗，厥中有帚。」○搗，又作「撲」，又作「葉」，並以涉

反。○疏曰：膺，胸前也。搗，箕舌也。以袂拘而退，

其塵不及長者，袂，武世反，衣袖末。拘，古侯反。

○謂掃時也，以袂擁帚之前，掃而卻行之。○疏曰：拘，障

也。當掃時，卻退以一手捉帚，又舉一手衣袂以拘障於帚

前，且揖且退，故曰拘而退。以箕自鄉而扱之。鄉，

與鄉同。扱，音吸，呂讀如《昏禮》「始扱一祭」之扱，音初洽

反。<sup>①</sup>○扱，讀爲吸，謂收養時也。箕去棄物，以鄉尊者則

不恭。○奉席如橋衡。奉，芳勇反。橋，居廟反。

○橫奉之，令左昂右低，如有首尾然。橋，井上櫟櫟，衡上

低昂。○櫟，又作「桔」，音結。櫟，古毫反。○疏曰：衡，

橫也，如橋之橫也。席舒則有首尾，故《公食禮》云：「卷白

末」，末即尾也。已卷則無首尾，此奉之左昂右低，故如有

首尾然。請席何鄉，請衽何趾。衽，而審反。趾，音

止。○順尊者所安也。衽，卧席也。坐問鄉，卧問趾，因於

陰陽。○疏曰：坐是陽，鄉亦陽。卧是陰，趾亦陰也。席

南鄉北鄉，以西方爲上；東鄉西鄉，以南方

爲上。布席無常，此其順之也。上，謂席端也。坐在陽，

則上左；坐在陰，則上右。○疏曰：東西設席，南鄉北鄉，

則以西方爲上頭也；南北設席，東鄉西鄉，則以南方爲上

頭也。蓋坐在陽則貴左，坐在陰則貴右。南坐是陽，其左

在西；北坐是陰，其右亦在西。東坐是陽，其左在南；西坐

是陰，其右亦在南也。然此乃據平常布席如此，若禮席則

或不然也。○《曲禮》。○見父之執，不謂之進不

敢進，不謂之退不敢退，不問不敢對，敬父同志

如事父。此孝子之行也。行，胡孟反。○《曲禮》。

○謀於長者，必操几杖以從之。從，猶就也。

○疏曰：几杖俱是養尊之物，故於謀議之時將就也。長

者問，不辭讓而對，非禮也。當謝不敏，若曾子之

爲。○《曲禮》。○從於先生，不越路而與人言。

從，才用反，下同。○尊不二也。先生，老人教學者。遭

先生於道，趨而進，正立拱手。爲有教使。○疏

曰：拱手，見師而起敬，故疾趨而進就之也。又不敢斥問

先生所爲，故正立拱手而聽先生之教。先生與之言則

對，不與之言則趨而退。爲其不欲與已並行。從

長者而上丘陵，則必鄉長者所視。上，時掌反。

○爲遠視不察，有所問。○《曲禮》。○將即席，容毋

怍，怍，才洛反。○怍，謂顏色變也。○疏曰：此謂弟子

①「洽」，原作「合」，據元明本、寬文本、賀本改。

講問初來之法。即，就。兩手摳衣，去齊尺。齊，音咨。○齊，謂裳下緝也。謂就席之時，以兩手提裳，令下緝去地一尺許，恐轉足踐之。○緝，七立反。衣毋撥，撥，半末反。○撥，發揚貌。足毋蹶。蹶，本又作「𨔵」，求月反，又居衛反。○蹶，行遽貌。先生書策琴瑟在前，坐而遷之，戒勿越。廣敬也。在前，謂當行之前。坐，亦跪也。遷，移也。越，踰也。○疏曰：坐通名跪，跪名不通坐也。虛坐盡後，盡，津忍反，下同。○謙也。○疏曰：虛，空也。空，謂非飲食坐也，《玉藻》云「徒坐不盡席尺」是也。食坐盡前。為汚席。○汚，音烏，又一故反。○疏曰：古者地鋪席，而俎豆皆陳於席前之地，若坐近後則濺汚席，故盡前也，《玉藻》云「讀書，食則齊，豆去席尺」是也。坐必安，執爾顏。安，謂不動。執，猶守也。久坐好異。長者不及，毋僂言。僂，仕鑒反。○僂，猶暫也，非類雜。○疏曰：長者正論甲事，未及乙事，少者不得輒以乙事暫然雜之。○今按：《說文》：「僂互，不齊也。」僂言，僂長者之先而言也。正爾容，聽必恭。正，謂矜莊也。聽先生之言不恭敬，則心不存而

易忘。毋勦說，勦，初交反。○勦，猶擊也，謂取人之說以為己說。○擊，力敢反。毋雷同。雷之發聲，物無不同時應者，人之言當各由己，不當然也。《孟子》曰：「人無是非之心，非人也。」必則古昔，稱先王。雖不雷同，又不得專輒，言必有依據。○毋踐履，毋踏席，摳衣趨隅，必慎唯諾。踏，在昔反。摳，苦侯反。唯，于癸反。○趨隅，升席必由下也。慎唯諾者，不先舉，見問乃應。○疏曰：踐，蹋也，後進者不得蹋先人者履也。踏，猶躐也。將就坐，當從下而升，當己位上不發初從上也。摳，提也。衣，裳也。趨，猶向也。隅，猶角也。既不踏席，當兩手提裳之前向席之下角，從下而升就己位也。《玉藻》云「升席不由前為躐席」，自是不由席前升，與此別。《鄉飲酒》云「賓升席自西方」，注云：「升由下也，升必中席。」彼謂近主人為上，故以西為下，與此同也。○今按：此是眾人共坐一席，既云「當己位上」，即須立於席後，乃得當己位上。蓋以前為上，後為下也，正與《玉藻》義同。《鄉飲》乃是特設賓席一人之坐，故以西為下，而自席下之中升而即席，與此異也。侍坐於先生，先生問焉，終則對。

不敢錯亂尊長之言。請業則起，請益則起。尊師重

道也。起，若今摳衣前請也。業，謂篇卷也。益，謂受說不解了，欲師更明說之。子路問政，子曰：「先之，勞之。」請益，曰：「無倦。」○父召無「諾」，先生召無「諾」，

「唯」而起。唯，于癸反。○應辭「唯」恭於「諾」。○疏

曰：唯，吟也。諾則似緩慢。○侍坐於所尊敬，毋

餘席。言先生坐一席，己坐一席，必盡其所近尊者之席

端，無使有餘。蓋欲得親近，若扶持備顧問，且擬有後來者，闕其下以待之。見同等不起，不為私敬。○疏

曰：同等後來者，任其坐於下也。燭至起，異晝夜。食

至起，為饌變。上客起。敬尊者。○疏曰：尊者見之

起，故侍者宜從之而起。然食與燭至起，則尊者不起，但侍者起也。燭不見跋，見，賢遍反。跋，半末反。○跋，本

也。燭盡則去之，嫌若燼多有厭倦意。○疏曰：本，把處

也。古者未有蠟燭，惟呼火炬為燭。尊客之前不叱

狗，叱，赤質反。狗，古口反。○主人於尊客之前不敢倦，

嫌若風去之。○風，去聲。○疏曰：卑客亦然，舉尊為甚。

讓食不唾。嫌有穢惡。○以上《曲禮》。○洗、盥、

執食飲者，勿氣。有問焉，則辟呬而對。辟

呬，音義見上。○示不敢歆臭也。○疏曰：洗，謂與尊者

洗足。盥，謂與尊者洗手。歆，謂不以鼻嗅飲食氣也。辟

呬，不敢以口氣及尊者。○《少儀》。○侍坐於君子，

君子問更端，則起而對。更，平聲。○離席對，敬

異事也。君子必令復坐。○離，去聲。○疏曰：更端，謂

鄉語已畢，更問他事。○侍於君子，不顧望而對，

非禮也。禮尚謙也。不顧望，若子路帥爾而對。○疏

曰：若指問一人，則一人直對。若普問衆人，則當顧望坐

中，恐有勝己者，不得率爾先對也。○長者賜，少者、

賤者不敢辭。不敢亢禮也。賤者，僮僕之屬。○侍

坐於君子，若有告者曰：「少閒，願有復也。」

則左右屏而待。閒，音閑，注同。○告曰，指或告君子

也。復，白也，言欲須少空閒有所白也。屏，猶退也，隱也。

○空，去聲。○疏曰：卑者正侍君子，而有人來告云：欲待

君子少閒無事時有所白。則侍者當自退避之，不得遠也。

毋側聽，毋噉應，毋淫視，毋怠荒。遊毋倨，

立毋跛，坐毋箕，寢毋伏。斂髮毋髻，冠毋

免，勞毋袒，暑毋褰裳。噉，古弔反。倨，音據。跛，彼義反。髻，徒細反。免，如字。袒，徒旱反。褻，起連反。○毋側聽，嫌探人之私也。側聽，耳屬於垣。「毋噉應」以下，皆爲其不敬。噉，號呼之聲也。淫視，流動邪睇也。怠荒，身體放縱，不自拘斂也。遊，行。倨，慢也。跛，偏任也。立當雙足並立，不得挈舉一足，一足踞地也。箕，謂舒展兩足，狀如箕舌也。伏，覆也。髻，髮也，毋垂餘如髮也。免，去。褻，祛也。髻，或爲肆。○爲，于僞反。號，戶高反。睇，大計反。①覆，芳伏反。髮，皮義反。祛，丘魚反。肆，以二反。○以上《曲禮》。○侍坐於君子，請見不請退。君子欠伸，運笏，澤劍首，還屨，問日之蚤莫，雖請退可也。欠，丘劍反。伸，音身。還，音旋。蚤，音早。莫，音暮。○不請退者，去止不敢自由。「欠伸」以下，皆解倦之狀。伸，類伸也。運，澤，謂玩弄也。金器弄之，易以汗澤。○疏曰：運，動也。澤，光澤也。玩弄劍首，則生光澤。旋，轉也。尊者脫屨於戶內，屨常在側。○然皆未通。○按：此章重出者，欠伸下但云「撰杖屨，視日蚤莫，侍坐者請出矣」，注云：撰，猶持也。○撰，仕轉反。○《少儀》。○侍坐於長者，屨不上

於堂。屨賤，空則不陳於尊者之側。○疏曰：長者在堂，則侍坐者脫屨於階下，不得上堂。若長者在室，則侍坐者得著屨上堂，而不得入室。解屨不敢當階。爲妨後升者。○疏曰：《內則》云：「屨，著綦。」鄭云：「綦，屨繫也。」將升堂則解之也。就屨，跪而舉之，屏於側。屏，必遲反。②○謂獨退也。就，猶著也。屏亦不當階。○著，丁略反。鄉長者而屨，跪而遷屨，俯而納屨。謂長者送之也，不得屏遷就近而已。俯，俛也。納，內也。遷，或爲「還」。○疏曰：不跪者，若跪則足嚮後，不便，故俯也。雖不並跪，亦坐左納右，坐右納左。○今按：注云「長者送之」，恐非是，但謂雖降階出戶，猶鄉長者不敢背耳。○《曲禮》。○排闥說屨於戶內者，一人而已矣，闥，音合。說，吐活反。○雖衆敵，猶有所尊也。有尊長在則否。在，在內也。後來之衆，皆說屨於戶外。○《少儀》。

①「睇大計反」，原作「眄莫遍反」，據賀本改。

②「屏必遲反」四字，原在下文「著丁略反」下，據賀本移此。

右灑掃應對進退。

燕侍食於君子，則先飯而後已，飯，煩晚

反，「小飯」同。○所以勸也。○疏曰：先飯，若嘗食然。

後已，若勸食然。毋放飯，毋流歎，小飯而嘔之，

歎，昌悅反。亟，紀力反，注同。○亟，疾也。備嘖嘖，若見

問也。○嘖，於月反。噎，伊結反。數嘖毋爲口容。

數，色角反。噍，在笑反，又作「嚼」。數噍，謂數數嚼之。

口容，弄口。客自徹，辭焉則止。主人辭其徹。

○疏曰：徹，謂徹俎。主人辭則客止。○《少儀》。○侍

食於先生，異爵者，後祭先飯。謙也。《玉藻》。

○侍食於長者，主人親饋，則拜而食。饋，其類

反，下同。○勸長者食耳，雖賤不得執食與辭，拜而已，示

敬也。主人不親饋，則不拜而食。以其禮於己不

降。○《曲禮》。○凡食果實者後君子，陰陽所成，

非人事也。火孰者先君子。備火齊不得，故先嘗之

也。○《玉藻》。○食棗、桃、李，弗致於核。核，

行隔反。○恭也。弗致者，謂不置於地。瓜祭上環，

食中，棄所操。操，七刀反。○上環，頭付也。○付，

亦作「剗」，寸本反，又取本反，切也。○疏曰：食瓜亦祭先

圃也。環者，橫斷形如環也，上環是寗間，下環是脫華處

也。○今按：頭付，謂寗頭所切一環也。以其所生之本味

最甘美，又先斷而不污，故以爲祭。中者，中環也，亦甘且

潔，故以奉尊者所操。下環爲手所持處，以其味薄而不潔，

故棄之而不食也。○《玉藻》。○侍飲於長者，酒進

則起，拜受於尊所。降席拜受，敬也，燕飲之禮鄉尊。

○疏曰：陳尊之所，貴賤不同。若諸侯燕及大射，鄉飲酒

及卿大夫燕，各見本篇。今《燕禮》、《鄉飲酒》皆無拜受於

尊所之文，正是文不具耳。近尊嚮長者，故往於尊所，嚮長

者而拜也。長者辭，少者反席而飲。長者舉未

醕，少者不敢飲。少，式召反。醕，子妙反。○不敢

先尊者。盡爵曰醕。《燕禮》曰：「公卒爵而後飲也。」○疏

曰：飲酒尊卑異爵，故《燕禮》公執膳爵，受賜爵者執散

爵。①又曰「受賜爵者以爵就席坐，公卒爵然後飲」，與此

禮合。而《上相見禮》云：「若君賜之爵，則下席，再拜稽首

① 散，原作「敬」，據賀本改。

受爵，升席祭，卒爵而俟，君卒爵，然後授虛爵。《玉藻》云：「君若賜之爵，則越席再拜稽首受，登席祭之。飲，卒爵而俟，君卒爵，然後授虛爵。」皆先君卒爵者。此據燕飲正禮，《玉藻》及《士相見禮》謂私燕之禮，故不同也。○

御同於長者，雖貳不辭。謂侍食於長者，饌具與之同也。貳，謂重設膳也。本爲長者設，辭之爲長者嫌。偶坐不辭。偶，嬖也。或彼爲客設饌，而召己往嬖共食。

○以上《曲禮》。

### 右侍食。

儀禮經傳通解卷第十終

## 儀禮經傳通解卷第十一

### 曲禮第二十

#### 學禮四

《曲禮》曰：《記》引正經之詞。毋不敬，毋，音

無，後以意推之。○禮主於敬。儼若思，儼，矜莊貌，人

之坐思，貌必儼然。○疏曰：若，如也。思，計慮也。人心

有所計慮，則其形狀必端慤也。安定辭，審言語也。

安民哉。言人能如此上三句者，則可以安民哉。○或問

敬，程子曰：主一之謂敬。問一，曰：無適之謂一。又曰：

但整齊嚴肅，則心自一，一則自無非辟之干矣。○呂大臨

曰：「毋不敬」者，正其心也。儼若思者，正其貌也。「安

定辭」者，正其言也。三者正矣，則無所往而非正，所謂「大

人正己而物正者也。以我對彼，我安則彼安，此修己以安

人也。推我之所安而天下平，此修己以安百姓也。天下至

大，取諸修身而無不足，故曰「安民哉」。此禮之本，故於

《曲禮》首章言之。○敖不可長，欲不可從，志不

可滿，樂不可極。敖，五報反。長，丁丈反。從，足用

反。樂，音洛。○四者慢遊之道，桀、紂所以自禍。○賢

者狎而敬之，畏而愛之。狎，戶甲反。○人之常

情，與人親狎則敬弛，有所畏敬則愛衰。唯賢者乃能狎而

敬之，是以雖褻而不慢，畏而愛之，是以貌恭而情親也。

愛而知其惡，憎而知其善。己之愛憎或出私心，而

人之善惡自有公論，唯賢者存心中正，乃能不以此而廢彼

也。積而能散，謂己有蓄積，見貧窮者則當能散以調救

之，若宋樂氏。○疏曰：樂氏事見《春秋》襄二十九年傳。

安安而能遷。謂己今安此之安，圖後有害則當能遷。

晉舅犯與姜氏醉重耳而行，近之。○疏曰：咎犯事見《春

秋》僖二十三年傳。○按：此上六句文意大同，皆蒙「賢

者」二字爲文。言皆衆人所不能，唯賢者乃能之耳。舊注

非是，今不取。○臨財毋苟得，爲傷廉也。○爲，于

偽反。○疏曰：苟，謂不度義而徇利也。廉，隅也。臨難

毋苟免。難，乃口反。○爲傷義也。很毋求勝，分

毋求多。很，胡懇反。勝，舒證反。分，扶問反。○爲傷



平也。很，闕也，謂爭訟也，《詩》云：「兄弟鬩于牆。」○闕，呼歷反。○修身踐言，謂之善行。行，下孟反，下同。○踐，履也，言履而行之。行修言道，禮之質也。言道，言合於道。質，猶本也，禮爲之文飾耳。○禮不安說人，說，音悅。○禮有常度，不可爲媚佞以求說於人也。不辭費。辭達則止，不貴於多。禮不踰節，不侵侮，不好狎。好，去聲。○爲傷敬也。狎，謂親褻。禮聞取於人，不聞取人。取於人，舊七樹反。○謂趣就師求道也。禮聞來學，不聞往教。尊道藝。○今按：此雖兩節，其實互明一事也。取於人者，童蒙求我，朋自遠來也。取人者，好爲人師，我求童蒙也。禮有取於人，所以彼有來學；無取人，所以我無往教也。○禮尚往來，往而不來，非禮也；來而不往，亦非禮也。○疑事毋質，質，成也。彼已俱疑而已成言之，終不然則傷知。○知，音智。○疏曰：人多專固，未知而爲已知，故戒之。直而勿有。直，正也。已若不疑，則當稱師友而正之，謙也。○不疑

在躬，躬，身也。不服行所不知，使身疑也。不度民械，度，大洛反。械，戶戒反。○械，兵器也。不計度民家之器物，爲不欲校人之強弱，且嫌不審也。不願於大家，大，謂富之廣也，嫌有貪欲汰侈之意。不訾重器。訾，子思反。○訾，思也。重，猶寶也。○今按：訾，猶計度也，下「無訾金玉成器」字義同此。《國語》云「訾相其質」，《漢書》云「爲無訾者」，又云「不訾之身」，皆此義。此言「不訾重器」者，謂不欲量物之貴賤，亦避不審也。不窺密，窺，苦規反。○嫌伺人之私也。密，隱曲處也。不旁狎，旁，泛及也。泛與人狎習，不恭敬也。不道舊故，舊事既非今日所急，且或揚人宿過以取憎惡，如陳勝賓客言勝故情，爲勝所殺之類也。不戲色。戲色，謂嬉笑侮慢之容。○《少儀》。○毋拔來，毋報往。拔，蒲未反。報，讀爲「赴疾」之赴。○拔，赴，皆疾也。人來往所之，當有宿漸，不可卒也。○宿，音秀。卒，才忽反。毋瀆神，瀆，謂數而不敬。○疏曰：瀆，慢也。神明正直，當敬而遠之。毋循枉，前日之不正，不可復遵行，當

求自伸。毋測未至。測，意度也，孔子所謂逆、詐、僥、不信之類也。毋訾衣服成器，與「不訾重器」之意同。毋身質言語。質，成也。聞疑則傳疑，若成之，或有所誤，即上文「疑事毋質」之意也。此三節十七事皆非謙遜謹厚之道，故戒之。○《少儀》。○博聞強識而讓，敦善行而不怠，謂之君子。識，音志。行，下孟反。○敦，厚。○君子不盡人之歡，不竭人之忠，以全交也。歡，謂飲食。忠，謂衣服之物。○呂大臨曰：君子躬自厚而薄責於人，責人厚而莫之應，此交之所以難全也。歡，謂好於我也。忠，謂盡心於我也。好於我者望之不深，則不至于倦而難繼也，酬酒不舉三酌，油油而退是也。①盡心於我者，不要其必力致，則不至於不能勉而絕也，《詩》云，每有良朋，烝也無戎是也。②

右通言。○傳曰：禮者，所以定親

疎，決嫌疑，別同異，明是非也。別，必列反。

○道德仁義，非禮不成；教訓正俗，非禮不備；分爭辨訟，非禮不決；君臣上下、父子兄弟，非禮不定；宦學事師，非禮不

親；班朝治軍，涖官行法，非禮威嚴不行；禱祠祭祀，供給鬼神，非禮不誠不莊。別，彼列反。辨，皮免反。朝，直遙反。宦，音患。○分，辨，皆別。宦，仕也。班，次也。涖，臨也。莊，敬也。學，或為「御」。○疏曰：熊氏云：宦謂學仕宦之事，學謂習學六藝，此二者俱是事師。《左傳》靈輒云：「宦三年矣。」服虔云：「宦，學也。」是學職事為宦也。是故君子恭敬撙節退讓以明禮。撙，祖本反。○在貌為恭，在心為敬。撙，猶趨也。○疏曰：趨，就也，向也。○鸚鵡能言，不離飛鳥；猩猩能言，不離禽獸。今人而無禮，雖能言，不亦禽獸之心乎？夫唯禽獸無禮，故父子聚麀。鸚，厄耕反。鵡，音武。離，力智反。猩，音生。應，音憂。○聚，猶共也。鹿牝曰麀。○牝，頻忍反。是故聖人作為禮以教人，使人以有禮，知

① 上「油」字，原作「沖」，據元明本、寬文本、賀本改。  
② 下「也」下，賀本有「○並曲禮」。

自別於禽獸。呂大臨曰：夫人之血氣，嗜欲、視聽、

食息與禽獸異者幾希，特禽獸之言與人異爾，然猩猩、

鸚鵡亦或能之。是則所以貴於萬物者，蓋有理義存焉。

聖人因理義之同然而制爲之禮，然後父子有親，君臣有

義，男女有別，人道所以立而與天地參也。縱恣怠放，

滅天理而窮人欲，將與馬牛犬彘之無辨，是果於自暴自

棄而不欲齒於人類者乎！○人有禮則安，無禮

則危，故曰：禮者，不可不學也。○夫禮

者，自卑而尊人。雖負販者，必有尊也，而

況富貴乎！負販者尤輕佻志利，宜若無禮然。富

貴而知好禮，則不驕不淫；貧賤而知好

禮，則志不懾。好，呼報反。懾，之揲反。○懾，猶

怯惑。<sup>①</sup>

君子之容舒遲，見所尊者齊遯。齊，音咨，

又側皆反。遯，音速。○謙慤貌也。遯，猶蹙蹙也。○疏

曰：「舒遲」，閒雅也。雖尋常舒遲，若見所尊則齊遯。齊

遯，言自斂持，不敢寬奢。○足容重，舉欲遲也。手

容恭，高且正也。目容端，不邪睇而視也。○睇，大計

反。口容止，不妄動也。聲容靜，不嘖咳也。○嘖，

於厥反。咳，苦代反。頭容直，不傾顧也。氣容肅，

似不息也。立容德，如有予也。○疏曰：德，得也。立

則磬折，如人授物予己，已受得之之形也。色容莊，勃

如戰色。○坐如尸，尸居神位，敬慎也。立如齊，

齊，側皆反。○磬且聽也。齊，謂祭祀之時。○按：此二

句本篇重出者，上有「若夫」二字，乃《大戴·曾子事父母》

篇文，別起下文之義，錄者誤并取之也，今刪去。燕居告

溫溫。告，謂教使也。○凡祭，容貌顏色如見所

祭者。如覲其人在此。○喪容纍纍，纍，力追反。

○羸憊貌，瘦瘠也。○羸，力皮反。憊，皮拜反。色容顛

顛，顛，又作「巔」，音田。○憂思貌，不舒暢也。○思，悉

嗣反。視容瞿瞿梅梅，瞿，紀具反。○不審貌也。

○疏曰：瞿瞿，驚遽之貌。梅梅，猶微微，謂微昧也。言

容繭繭，繭，古典反。○聲氣微也。○疏曰：繭繭，猶綿

綿

<sup>①</sup>「惑」下，賀本有「○並曲禮」。

綿。此上四句皆爲喪容也。戎容暨暨，暨，其記反。

○果毅貌也。言容諒諒，諒，五格反。○教令嚴也。

色容厲肅，義形貌也。○疏曰：厲，嚴。肅，威也。以

義斷割，故形於色。視容清明，察於事也。此上四句皆

爲戎容也。立容辨卑，毋調。調，音詔。○辨，讀爲

貶。自貶卑，謂磬折也。調，爲傾身以有下也。○貶，彼檢

反。頭頸必中，頭容直。山立，不動搖也。時行，

時而後行也。盛氣顛實揚休，顛，依注讀爲闐，音田。

○顛，讀爲闐。揚，讀爲陽，聲之誤也。盛身中之氣，使之

闐滿，其息若陽氣之休物也。玉色。色不變也。自「立

容」以下至此，又通言之。○《玉藻》。○吉事尚尊，

喪事尚親。吉事，朝廷列位也。喪事，以親者爲主，

《禮》曰：以服之精麤爲序。○賓客主恭，祭祀主

敬，喪事主哀，會同主詡。詡，況矩反。○恭在貌

也，而敬又在心。詡，謂言語敏大而有勇。軍旅思險，

隱情以虞。險，阻，出奇覆護之處也。隱，意也，思也。

虞，度也。當思念己情之所能，以度彼之將然否。○阻，側

呂反。覆，芳富反，謂伏兵也。徐音赴。護，況煩反。護，詐也，或云護譁。處，昌慮反。度，大洛反。○《少儀》。

○優游喜樂者，鐘鼓之色；愀然清靜者，縗

經之色；勃然充滿者，兵革之色。愀，七小反。

○臨喪則必有哀色，介冑則有不可犯之色。

貌與事宜相配。介，甲也。故君子戒慎，不失色於

人。失色，謂失其所當，如臨喪不哀，軍旅不嚴之類。②

○言語之美，穆穆皇皇；朝廷之美，濟濟翔

翔；祭祀之美，齊齊皇皇；車馬之美，匪匪

翼翼；鸞和之美，肅肅雍雍。美，音儀。濟，子禮

反。齊，如字。皇，音往，徐于況反。匪，芳非反。○匪，讀

如「四牡騤騤」之騤。齊齊皇皇，讀如「歸往」之往。美，皆

當爲「儀」，字之誤也。《周禮》：「教國子六儀：一曰祭祀之

容，二曰賓客之容，三曰朝廷之容，四曰喪紀之容，五曰軍

旅之容，六曰車馬之容。」○疏曰：「穆穆皇皇」，美大之狀。

①「序」下，賀本有「○荀子大略篇」。

②「類」下，賀本有「○曲禮」。

濟濟翔翔，厚重寬舒之狀。「皇如歸往之往」者，孝子祭祀心有所繫往。「匪匪翼翼」，嚴正之狀。「肅肅」，敬也。

雍雍，和也。○《少儀》。

○坐視膝，立視足，應

對言語視面。《士相見》云：子視「父則遊目，無上於

面，無下於帶。若不言，立則視足，坐則視膝」。鄭云：不

言，則伺其行起而已。立視前六尺而大之。蓋臣於

君前視也。近視六尺，自此而廣之，雖遠視而不過三丈六

尺。《曲禮》曰：「立視五萬。」彼在車上，與此不同也。①

○九擗：② 一曰稽首，二曰頓首，三曰空首，

四曰振動，五曰吉擗，六曰凶擗，七曰奇擗，

八曰褒擗，九曰肅擗，以享右祭祀。擗，音拜。

稽，音啟。振動，如字，李音董，杜徒弄反。褒，音報。右，

音又。○疏曰：「稽首」者，拜頭至地。稽，留也。頓首，

者，拜頭叩地也。稽首、頓首，頭俱至地，但稽首留地稍久，

頓首至地即舉，故以叩地為別，謂若以首叩物也。「空首」

者，拜頭至手，即《書》所謂「拜手」也。「振動」者，杜子春

云：振讀為振鐸之振，動讀為哀慟之慟。鄭大夫云：動讀

為董，《書》亦或為「董」。振董，以兩手相擊也。康成不取，

別云：振動，戰栗變動之拜，《書》曰「王動色變」是也。陸

德明從鄭大夫說，云：今倭人拜以兩手相擊，蓋古之遺法也。「吉拜」者，拜而後稽顙，謂先作頓首，後作稽顙。稽顙

雖類頓首，但觸地無容，故謂之稽顙，齊衰不杖期以下之拜

也。此殷之凶拜，而周謂之吉拜者，以其與頓首相類，而又

比凶拜為輕也。「凶拜」者，稽顙而後拜，謂先即以首觸地

無容，而後稍伸叩拜，三年之喪拜是也。又案：孔子曰：

「拜而後稽顙，類乎其順也；稽顙而後拜，順乎其至也。」

年之喪，吾從其至者。」鄭注云：「自期如殷可。則是不杖

期以下用殷之喪拜也。《雜記》又云：「三年之喪以喪拜，非

三年之喪以吉拜」是也。「奇拜」，杜子春云：奇，讀如奇偶

之奇，謂先屈一膝，即今之雅拜。鄭司農云：奇，讀曰倚，

謂持節持戟身倚之以拜也。康成不取，別云：奇拜者，一

拜也，臣禮曰君答壹拜，當亦如前空首是也。「褒拜」者，再

拜也，拜神與尸也，褒讀為報。鄭司農以為今持節拜也。

「肅拜」者，但俯下手，即《鄉飲酒》賓客入門撻也，《春秋傳》

曰「為事故敢肅使者」是也。享，獻也，謂朝踐獻尸時也。

祭祀二灌後，惟有朝踐饋獻稱獻。右，讀為侑，謂侑勸尸食

① 「也」下，賀本有「○荀子大略篇」。

② 「九」上，賀本有「大祝」二字。

也。此九拜非專爲祭祀，而以祭祀結之者，祭祀禮最重也。

○又曰：九拜之中，四種是正拜：一曰稽首，二曰頓首，三

曰空首，九曰肅擗。空首者，先以兩手拱至地，乃頭至手

也。頓首者，是空首之時引頭至地，少時即舉也。稽首者，

稽是稽留之義，頭至地多時方舉也。稽首，拜中最重，臣拜

君之拜。若頓首，則平敵自相拜之拜也。若空首者，君答

臣下之拜也，其有敬事則亦稽首也。肅拜，於拜中最輕，唯

軍中有肅拜，婦人亦以肅拜爲正。其餘五拜附此四種，振

動附稽首，占拜附頓首，奇拜附空首，凶拜、褒拜亦附稽首。

○顙，素黨反。齊，音咨。期，音基。頤，音壑，又音畿，側

隱之貌。擗，於至反，即今之揖也。○今按：九拜之說，以

注疏通修如此。但振動、奇拜、褒拜之義，未詳是否耳。

○志有四興：朝廷之志，淵然清以嚴；祭祀

之志，諭然思以和；軍旅之志，怫然愠然精

以厲；喪紀之志，漻然漻然憂以湫。<sup>①</sup>四志

形中，四色發外，維如志色之經也。沸，符勿

反。愠，紆粉反。漻，音聊，清深也。湫，即由反。容有

四起：朝廷之容，師師然翼翼然整以敬；祭

祀之容，遂遂然粥粥然敬以婉；軍旅之容，

湔然肅然固以猛；喪紀之容，恟然恟然若不

還：容經也。粥，于六反。婉，紆晚反。湔，彼側反。

恟，於求反，又於久反。懟，質涉反。視有四則：朝

廷之視，端丕平衡；祭祀之視，視如有將；

軍旅之視，固植虎張；喪紀之視，下丕垂

綱：視經也。丕，占「流」字。言有四術：言敬

以固朝廷之言也；<sup>②</sup>文言有序，祭祀之言

也；屏氣折聲，軍旅之言也；言若不足，喪

紀之言也：言經也。固，頤正視，平肩正背，

臂如抱鼓，足閒二寸，端面攝纓，端股整足。

體不搖肘，曰經立；因以微磬，曰共立；因

以磬折，曰肅立；因以垂佩，曰卑立；立容

也。共，音恭，下同。坐以經，立之容，肘不差而

也。

①「湫然」二字，原脫，據賀本補。

②「固」，原作「國」，據寬文本、賀本改。

足不跌，視平衡曰經坐；微俯視尊者之膝，曰共坐；仰首視不出尋常之內，曰肅坐；廢首伍肘，曰卑坐；坐容也。跌，徒結反。伍，與一低同。行以微磬之容，臂不搖掉，肩不下上，身似不則從然而任；行容也。掉，徒弔反。趨以微磬之容，飄然翼然，肩狀若汭，足如射箭；趨容也。旋以微磬之容，其始動也，穆如驚綯；其固復也，旄如濯絲；跲旋之容也。倏，式六反。跲，步般反。跪以微磬之容，掄右而下，進左而起，手有抑揚，各尊其紀；跪容也。拜以磬折之容，吉事上左，凶事上右，隨前以舉，項衡以下，寧速無遲，背項之狀，如屋之玄；拜容也。玄，未詳。拜而未起：伏容也。坐乘以經坐之容，手撫式，視五旅，欲無顧，顧不過轂，小禮動，中禮式，大禮下：坐車之容也。乘，繩證反，下同。立乘以經立之容，右持綏而左臂詘，存劒之緯，欲無顧，顧

不過轂，小禮據，中禮式，大禮下：立車之容也。禮，介者不拜，兵車不式，不顧不言，反抑式以應武容也；兵車之容也。若夫立而跛，坐而踡，體怠懈，志驕傲，趁視數顧，容色不比，動靜不以度，妄咳唾，疾言嗟，氣不順，皆禁也。跛，彼寄反，又作「跂」，去智反。踡，蒲堅反，足不正也。趁，七含反。數，音朔。比，毗志反。咳，音慨。唾，吐卧反。○白「志有四興」至此並賈誼《容經》。

### 右容節。

君子之居恒當戶，恒，胡登反。○鄉明。○鄉許亮反。寢恒東首。首生氣也。首，手又反。若有疾風迅雷甚雨，則必變。雖夜必興，衣服冠而坐。敬天之怒。○迅，音峻，又音信。衣，於既反。日五盥，沐稷而醕梁，櫛用櫛櫛，髮晞用象櫛，進機進羞，工乃升歌。盥，音管。醕，音悔。櫛，側乙反。櫛，章善反。機，其既反。○晞，乾也。沐，醕必進機作樂，盈氣也。更言進羞，明爲羞籩豆之實。○疏

曰：沐，沐髮也。𩚑，洗面也，取稷梁之潘汁，須滑故也。然此大夫禮耳，人君則沐𩚑皆梁也。櫛，白理木也。櫛，梳也。沐髮爲除垢膩，故用白理櫛木以爲梳。沐已，燥則髮澁，故用象牙滑櫛以通之也。機，謂酒也。《少儀》注云：「沐而飲酒曰機。」是沐畢必進機酒。又進羞也，羞籩羞豆爲飲而設，庶羞爲食而設，今進機則爲飲設，故知非庶羞也。樂工乃升堂以琴瑟而歌，以其新沐體虛，補益氣也。浴用二巾，上絺下綌。絺，丑疑反。綌，去逆反。○刷去垢也。○刷，魚劣反。出杆履蒯席，連用湯，杆，音零。蒯，苦怪反。連，力旦反。○杆，浴器也。蒯席澁，便於洗足也。連，猶釋也。○疏曰：蒯，菲草席澁，踐之刮去垢也。履蒲席，衣布晞身，乃屢進飲。進飲，亦盈氣也。○《玉藻》。○齊必有明衣，布。齊，側皆反。○齊必沐浴，浴竟即著明衣，所以明潔其體也，以布爲之。必有寢衣，長一身有半。長，去聲。○齊主於敬，不可解衣而寢，又不可著明衣而寢，故別有寢衣，其半蓋以覆足。齊必變食，居必遷坐。變食，謂不飲酒，不茹葷。遷坐，易常處也。楊氏曰：齊所以交神，故致潔變常以盡敬。○《論語》。

## 右居處齊潔之事。

步中《武》、《象》，趨中《韶》、《濩》。中，丁

仲反。濩，音護。○佩玉之聲，緩則中《武》、《象》，速則中

《韶》、《濩》也。○君與尸行接武，尊者尚徐。蹈半

迹。○蹈，徒報反。○疏曰：二足相躡，每蹈於半，不得各

自成迹，故云接武。大夫繼武，迹相及也。士中武，

迹間容迹。○疏曰：中，猶間也。每徙足，間容一足地。

徐趨皆用是。君、大夫、士之徐行也，皆如與尸行之

節也。疾趨則欲發，而手足毋移。疾趨，謂直行

也，疏數自若。發，謂起屢也。移之言靡也。毋移，欲其

直且正，不邪低搖動也。欲，或爲「數」。○數，色角反。

迪，羊邇反。圈豚行，不舉足，齊如流。圈，舉遠

反，又去阮反。豚，大本反，徐徒困反。齊，音咨，本又作

「齋」。○圈，轉也。豚之言若有所循。不舉足，曳踵則衣

之齊如水之流矣。孔子執圭則然，此徐趨也。○疏曰：

「圈豚行」者，言徐趨法曳轉足循地而行也。「齊如流」者，

①「也」下，賀本有「○荀子大略篇」。



齊裳下緝也，足既不舉，身又俯折，則裳下委地如水流也。席上亦然。尊處亦尚徐，言未坐時也。端行頤雷

如矢，弁行剡剡起履，頤，音夷。雷，力救反。弁，皮

彥反，急也。剡，以漸反。○此疾趨也。端，直也。頤，或

爲「這」也。○疏曰：「頤雷」者，行既疾，身乃小折而頭直

俯臨前，<sup>①</sup>頤如屋雷之垂也。「如矢」者，身趨前進不斜如

箭也。弁，急也。剡剡，身起貌也。急行欲速，而身屢常起

也。執龜玉，舉前曳踵，蹢蹢如也。蹢，章勇反。

蹢，色六反。○著徐趨之事。蹢，足後根也。○疏曰：謂

將行之時，初舉足前，後曳足根，行不離地，舉足狹數也。

凡行容惕惕，惕，音傷。○惕惕，直疾貌也。凡行，謂

道路也。廟中齊齊，齊，才氣反，又在啟反。○恭愍嚴

正貌也。○疏曰：齊齊，自收持嚴正之貌。朝廷濟濟

翔翔。濟，徐子禮反，有威儀也。翔，本又作「洋」，音詳。

○莊敬貌也。○疏曰：濟濟，威儀矜莊。翔翔，行而張拱。

○《玉藻》。○帷薄之外不趨，帷，幔。薄，簾也。不

見尊者行自由，不爲容也，人則容。行而張足曰趨。○疏

曰：禮：天子外屏，諸侯內屏，卿大夫以簾，士以帷。外屏，

門外爲之。內屏，門內爲之，「邦君樹塞門」是也。堂上

不趨，爲其迫也，堂下則趨。○爲，于僞反。城上不

趨，於迫狹無容。執玉不趨，志重玉也，《聘禮》曰：上

介授賓玉於廟門外。○疏曰：賓當進聘，故上介授賓玉於

主人廟門外，賓執玉進入門內，不疾趨而爲徐趨。執龜

策不趨。於重器無容。堂上接武，武，迹也。迹相

接，謂每移足半蹢之，中人之迹尺二寸。堂下布武，布

武，謂每移足各自成迹，不相蹢。室中不翔。又爲其迫

也。行而張拱曰翔。○凡奉者當心，提者當帶。

奉，芳勇反，又作「捧」。提，徒兮反。○高下之節。○疏

曰：帶有二處，朝服之屬其帶則高於心，深衣之類其帶則

下於脇。何以知然？《玉藻》說大帶云：「三分帶下，紳居

二焉。」紳長三尺，而居帶之下三分之二，則帶之下去地四

尺五寸矣。人長八尺爲限，若帶下四尺五寸，則帶上所餘

正三尺五寸，故知朝服等帶則高也。而《深衣》云：「帶，下

毋厭髀，上毋厭脇，當無骨者。」故知《深衣》之帶則下也。

①「折」，原作「抑」，據元明本、寬文本、賀本改。

今云「提者當帶」，謂深衣之帶，且古人恒著深衣，此明平常提奉，故益可知也。○以上《曲禮》。

### 右步趨奉持之容。

入竟而問禁，入國而問俗，入門而問諱。

竟，音境。○皆為敬主人也。禁，謂政教，俗謂常所行與所

惡也。國，城中也。●○適有喪者曰「比」，適之

也，往也。曰「某願比於將命者」，比，猶比方，俱給事。

○疏曰：此謂往敵者喪家也。○今按：比，恐當音必寐反，

為比附之義。童子曰「聽事」，曰「某願聽事於將命

者」。童子未成人，不敢當相見之禮。適公卿之喪，

則曰「聽役於司徒」。喪憂戚，無賓主之禮，皆為執

事來也。○疏曰：貴者喪不敢言比，故云「聽役於司徒」。

司徒主徒役之事，故其職云：「大喪，帥六鄉之衆庶，屬其

六引而治其政令。」又《檀弓》云：「孟獻子之喪，司徒旅歸

四布。」《隱義》云：「公卿亦有司徒官，以掌喪事也。」○《少

儀》。○始入而辭曰「辭矣」，即席曰「可矣」。

可，猶止也，謂擯者為賓主之節也。始入則告之辭，至就席

則止其辭。○疏曰：「始入」，謂始入門。辭，謂擯者告主

人辭讓賓，令賓先入也。至階之時，擯者亦應告主人曰，辭

讓賓先登。此不言者，「始入」之文包入門登階矣。○《少

儀》。○其未有燭而有後至者，則以在者告，

道瞽亦然。道，音導。○為其不見，意欲知之也。師冕

見，及階，子曰：「階也。」及席，子曰：「席也。」皆坐，子告之

曰：「某在斯，某在斯。」○為，于偽反。○《少儀》。○問

品味，曰：「子亟食於某乎？」問道藝，曰：

「子習於某乎？子善於某乎？」亟，去莫反。

○亟，數也。猶，常也。不斥人，謙也。道，三德、三行也。

藝，六藝。○三德、三行、六藝，並見《學制》。○《少儀》。

○擬人必於其倫。擬，魚起反。○擬，猶比也。倫，

猶類也。比大夫當於大夫，比士當於士，不以其類，則有所

褻。問天子之年，疏曰：此謂幼少新立之主，或遠方

異域至者問朝廷之臣下。國君倣此。對曰：「聞之，

始服衣若干尺矣。」既不敢言年，又不敢斥至尊所能，

然又不言見，但云「聞之」，依違而不敢斥，所以為恭也。

●「也」下，賀本有「○曲禮」。

問國君之年，長曰「能從宗廟社稷之事矣」，幼曰「未能從宗廟社稷之事也」。問大夫之子，長曰「能御矣」，幼曰「未能御也」。問士之子，長曰「能典謁矣」，幼曰「未能典謁也」。問庶人之子，長曰「能負薪矣」，幼曰「未能負薪也」。長，丁丈反，下同。○皆言其能，則長幼可知。御，猶主也，《書》曰：「越乃御事。」謂主事者。謁，請也，謂能攢贊出入，以事請告也。禮：四十強而仕，五十命為大夫。① ○問國君之子長幼，長則曰「能從社稷之事矣」，幼則曰「能御」、「未能御」。御，謂御事。問大夫之子長幼，長則曰「能從樂人之事矣」，幼則曰「能正於樂人」、「未能正於樂人」。正，樂政也。謂幼者習樂未成，但聽政令於樂人。《周禮·大司樂》：「以樂德樂舞教國子。」問士之子長幼，長則曰「能耕矣」，幼則曰「能負薪」、「未能負薪」。士祿薄，子以農事為業。○《少儀》。○君使士射，不能則辭以疾，言曰「某有負薪之

憂」。射者所以觀德，唯有疾可以辭也。使士射，謂以備耦也。憂，或為「疾」。○疏曰：射法，每兩人相對以決勝負，名之曰耦。「負薪之憂」者，言疾病氣劣，方恐不能負薪，故不能射，謙詞也。○問國君之富，數地以對，山澤之所出。問大夫之富，曰：「有宰食力，祭器，衣服不假問。」士之富，以車數對。問庶人之富，數畜以對。數，色主反，下「數畜」同。畜，許六反。始養曰畜。○皆在其所制，以多少對。天子尊，無與敵，奄有四海，故非所問也。宰，邑士也。食力，謂民之賦稅。上士三命，則得賜車馬，副車隨命。中士乘棧車，無副車也。○弔喪弗能賻，不問其所費；問疾弗能遺，不問其所欲；見人弗能館，不問其所舍；賜人者不曰來取，與人者不問其所欲。賻，音附。《公羊傳》曰：「錢財曰賻。」《穀梁傳》曰：「歸生者曰賻。」費，芳味反。遺，于季反。○皆為傷恩也。見人，見行人。館，舍也。與人不問其所欲，己物或時非其

① 「夫」下，賀本有「○曲禮」。

所欲，將不與也。○國君去其國，止之曰：「柰何去社稷也？」大夫，曰：「柰何去宗廟也？」士，曰：「柰何去墳墓也？」皆民臣殷勤之言。○疏曰：大夫、士之去，謂如三諫不從，或以罪見黜。

○在朝言禮，問禮，對以禮。朝，直遙反，下同。

○朝，謂君臣謀政事之處。於朝廷言，無所不用禮。輟

朝而顧，不有異事，必有異慮。心不正，志不在

君，輟，猶止也。顧，謂迴顧。故輟朝而顧，君子謂

之固。罔，謂不達於禮。在官言官，在府言府，

在庫言庫，在朝言朝。唯君命所在，就展習之也。

官，謂板圖文書之處。府，謂寶藏貨賄之處。庫，謂車馬兵

甲之處。朝，謂君臣謀政事之處也。朝言不及犬馬，

非公議也。公庭不言婦女，非其時也。公事不私

議。嫌若姦也。○朝廷曰退，近君為進。○疏曰：

言於朝廷之中，若欲散還，則稱曰退，下句放此。燕遊曰

歸，禮褻，主於家也。師役曰罷。罷，音皮。○罷之言

罷勞也，《春秋傳》曰：「師還曰罷。」○《少儀》。○今按：

《易》曰「或鼓或罷」，與《史記》「將軍罷休就舍」之罷亦同。注引《春秋傳》，疏以為用何休注，傳無此文也。○賀取

妻者曰：「某子使某，聞子有客，使某羞。」取，

去聲。○謂不在賓客之中，使人往者。羞，進也，言進於

客。古者謂候為進，其禮蓋壺酒束脩若人也，不斥主人。

○今按：記曰：昏禮不賀，人之序也。而此云然者，蓋不言

娶妻而但稱「有客」爾。○望柩不歌，人臨不翔，

臨，如字，舊力鳩反。○哀傷之，無容樂。當食不歎，食

或以樂，非歎所。○疏曰：人君吉食則有樂，賤者則無，故

云「或」也。適墓不歌，非樂所。哭日不歌，哀未忘

也。執紼不笑，臨樂不歎，臨祭不惰。為無神

也。○為，去聲。○今按：無神，謂不神在也。居喪不

言樂，祭事不言凶。①

右言語之禮。○傳：魏中山舍人倉

唐使，文侯召倉唐而見之，曰：「擊無

恙？」使，色吏反。見，賢遍反。倉唐曰：「唯，

①「凶」下，賀本有小字雙行注文「○曲禮」。

唯！」如是者三，乃曰：「君出太子而封之國，君名之，非禮也。」唯，于鬼反。文侯怵然爲之變容，問曰：「子之君無恙乎？」怵，尺律反。爲，于僞反。倉唐曰：「臣來時拜送書於庭。」文侯指顧左右，曰：「子之君長孰與是？」倉唐曰：「《禮》『擬人必以其倫』，諸侯無偶，無所擬之。」曰：「長大孰與寡人？」倉唐曰：「君賜之外府之裘，則能勝之；賜之斥帶，則不更其造。」勝，音升。更，音庚。<sup>①</sup>○晉獻文子成室，大夫發焉。文子，趙武也。作室成，晉君獻之，謂賀也，諸大夫亦發禮以往。<sup>②</sup>張老曰：「美哉輪焉！」美哉，免焉！「輪，起倫反。」<sup>③</sup>免，本亦作「煥」。○心譏其奢也。輪，輪囷，言高大。免，言衆多。○疏曰：《春秋外傳》曰「趙文子爲室，斲其椽而輿之，張老諫之」是也。「歌於斯，哭於斯，聚國族於斯。」祭祀、死喪、燕會於此足矣。言此者，欲防其後復爲。文子曰：

「武也得歌於斯，哭於斯，聚國族於斯，是全要領以從先大夫於九京也。」北面再拜稽首。要，一遙反。○全要領者，免於刑誅也。晉卿大夫之墓地在九原，「京」蓋字之誤，當爲「原」。君子謂之善頌、善禱。善頌，謂張老之言。善禱，謂文子之言。○疏曰：禱，求也。○《檀弓》。

凡飲酒，爲獻主者執燭抱燹，客作而辭，然後以授人。燹，側角反，又子約反，或音在遙反。

○爲宵言也。主人親執燭敬賓，示不倦也。言獻主者，容君使宰夫也。未熟曰燹。○熟，人悅反。○疏曰：凡飲酒，主人自獻賓。若尊卑不敵，則使宰夫爲主人以獻賓，故云「爲獻主」也。執燭不讓，不辭，不歌。以燭繼晝，禮殺。○殺，色戒反。○疏曰：禮：賓主有讓及更相辭

①「庚」下，賀本有「○說苑」。

②「往」，原作「生」，據寬文本，賀本改。

③「輪起倫反」，疑誤。《經典釋文》卷十一作「輪囷起倫反」，乃釋鄭注「輪囷」，在「免本亦作「煥」」下。《禮記正義》同。

謝，又各歌詩相顯德。今既夜莫，所以殺於三事。① ○凡

羞，有消者不以齊。消，起及反。○齊，和也。○疏

曰：賀瑒云：凡消，皆謂大羹，大羹不和也。爲君子擇

蔥薤，則絕其本末。爲，于僞反。薤，戶戒反。○爲

有萎乾。○萎，於危反。乾，音干。○疏曰：根不淨，末萎

乾。羞首者，進喙祭耳。喙，許穢反。○耳出見也。

○見，賢遍反。○疏曰：若膳羞有牲頭者，則進口以嚮尊

者。尊者若祭，先取牲耳祭之也。牛羊之肺，離而不

提心。提，丁禮反。○提，猶絕也。剉離之，不絕中央少

者，使易絕以祭耳。尊者以酌者之左爲上尊。尊

者，設尊者也。酌者鄉尊，其左則右尊也。○疏曰：人君

陳尊在東楹之西，於南北列之。設尊之人在尊西嚮東，以

右爲上，則尊以南爲上也。酌，謂酌酒人也。酌人在尊東

西面，以左爲上，亦上南也。二人俱以南爲上也。庾云：

《燕禮》：「司宮尊于東楹之西，兩方壺，左玄酒，南上。」

注：「《玉藻》云：唯君面尊。」玄酒在南，順君之面也。下

云：「公席阼階上，西鄉。」下又云：「執事者升自西階，立于

尊南，北面東上。」案「左玄酒南上」之言，是設尊者東鄉，酌

者西鄉，設者之右，則酌者之左也。○今按：設尊之法，

《鄉飲酒》云「玄酒在西」，《鄉射》云「左玄酒」，而鄭注云：

「設尊者北面，西曰左。」即此所謂尊者，以酌者之左爲上。

尊者，蓋言設尊之人。方其設時，即預度酌酒人之左，尊而

實以玄酒也。若據《燕禮》，則設尊者西面而左玄酒南上，

公乃即位於阼階上，則酌者不得背公，自當東面以酌而上，

尊乃在其右矣。故此經所云以爲爲鄉飲，鄉射而言則可，

以爲爲燕禮而言則正與之反。今鄭注既不明，庾、孔又

皆引《燕禮》而反謂酌者西面，其辟戾甚矣。惟賈疏以爲據

君面以左爲尊者得之，今詳見其本篇。尊壺者面其

鼻。鼻在面中，言鄉人也。② ○凡洗必盥。先盥乃

洗爵，先自潔也。盥有不洗也。③ ○未步爵，不嘗

羞。步，行也。○《少儀》。○柄尺不跪。豆有柄長

尺，則立進之。○《弟子職》。○取俎，進俎不坐。

以其有足，亦柄尺之類。○《少儀》。○飲酒者，機

① 事「下，賀本有「○少儀」。

② 也「下，賀本有「○少儀」。

③ 也「下，賀本有「○少儀」。

者、醯者，有折俎不坐。機，其記反。醯，子笑反。

折，之設反。○折俎尊，徹之乃坐也。已沐飲曰機。酌始

冠曰醯。○疏曰：案鄉飲酒、燕禮有折俎者皆不坐，獨云

「機者，醯者不坐」者，以二者無折俎之時則得坐，嫌畏有折

俎亦坐，故特明之。○《少儀》。○其有折俎者，取

祭反之，不坐，燔亦如之。燔，音煩。○亦為有足

柄尺之類。折俎，<sup>①</sup>折骨於俎也。燔，炙也。《鄉射》曰：賓

「奠爵于薦西，興取肺，坐絕祭」。「左手，嘑之。興加于俎，

坐輓手」。○柄，兵命反。嘑，才細反。輓，本又作「挽」，始

銳反。○疏曰：折俎，謂折骨於俎。既「有足柄尺之類」，

故就俎取所祭肺，立而取之，升席坐祭。訖，反此所祭之

物，加之於俎，皆立而為之，故云「取祭反之不坐」，唯祭時

坐耳。「燔亦如之」者，燔謂燔肉，雖非折骨，其肉在俎，其

取及祭反時，皆亦不坐，故云燔亦如之。尸則坐。尸，

尊也。《少牢禮》曰：「尸左執爵，右兼取肝肺，揣于俎鹽，

振祭，嘑之，加于菹豆。」○疏曰：前所引《鄉射》云「興」，則

知不坐，此引《少牢》不云興，故知尸則坐也。○《少儀》。

○一室之人，非賓客，一人徹。同事合居者，一人

則當少者也，賓客則各徹其饌也。壹食之人，一人

徹。壹，猶聚也，為赴事聚食也。凡燕食，婦人不

徹。婦人質，不備禮。○《玉藻》。○餼餘不祭，父

不祭子，夫不祭妻。餼，子閏反。○今按：禮：君賜

腥，則孰而薦之以為榮。若賜熟食，則恐是餼餘，故不以

祭。妻子雖卑於已，然既沒，則以神道接之，故亦不以祭

也。<sup>②</sup>○諸侯無故不殺牛，大夫無故不殺羊，

士無故不殺犬，豕，庶人無故不食珍。故，謂祭

饗。○疏曰：案《膳夫》：「王日一舉，鼎十有二物。謂大牢

也。《玉藻》云：「天子食，日少牢，朔月大牢。諸侯食，日

特牲，朔月少牢。」則知大夫食日特豚，朔月特牲；士日食

無文，朔月特豚。故《內則》曰：見子「具祝朔食」，注云：「天

子大牢，諸侯少牢，大夫特豕，士特豚。」是常食有限，不得

踰越。而《大行人》、《掌客》諸侯待賓皆用牛，《公食大夫

禮》大夫食賓禮亦用牛，是有故乃得殺也。○《王制》。

○君子不食圉腴。圉，與豢同，音患。○《周禮》「圉」

作「豢」，謂犬豕之屬，食米穀者也。腴，有似於人穢。○疏

①「折」，原作「拆」，據元明本、寬文本、賀本改。

②「也」下，賀本有「○曲禮」。

曰：腴，謂腸胃，故鼎闕一也。○《少儀》。

### 右飲食之禮。凡言賓主之事，附《相見禮》。

侍食於君者，附《臣禮》。事長者，附《少儀》。其雜者，附此篇。

### 爲人祭曰「致福」，爲己祭而致膳於君子

曰「膳」，祔練曰「告」。爲，于僞反。○此皆致祭祀之餘於君子也。攝主言「致福」，申其辭也。自祭言「膳」，謙也。祔練言「告」，不敢以爲福膳也。凡膳，告於君子，主人展之以授使者于阼階之南，南面再拜稽首，送。反命，主人又再拜稽首。使，色吏反。稽，音啓。○展，省具也。其禮：大牢則以牛

左肩、臂、臠，折九个，少牢則以羊左肩七个，植豕則以豕左肩五个。大，音泰。臂，亦作「辟」，必豉反。臠，奴報反，又人於反。个，古賀反。植，大得反。○折，斷分之。个，猶段也。皆用左者，右以祭也。不言

臂、臠，因牛序之可知。○疏曰：禮得大牢，則用牛膳。周人牲體尚右，<sup>①</sup>右邊已祭，所以獻左也。周貴肩，故用左肩也。「九个」者，取肩自上斷折之，至蹄爲九段，以獻之也。

臂、臠，謂肩脚也。若禮得少牢者，則膳羊左肩。折爲七个，不云臂臠，從上可知。然並用上牲，不并備饌，故大牢

者惟牛，少牢者惟羊也。若祭唯特豕，亦用豕左肩五个以爲膳也。○其以乘壺酒、束脩、一犬賜人。若

獻人，則陳酒執脩以將命，亦曰「乘壺酒、束

脩、一犬」。乘，繩證反。○陳重者，執輕者，便也。乘

壺，四壺也。酒，謂清也，糟也。不言陳犬，或無脩者，牽犬

以致命也。於卑者曰賜，於尊者曰獻。○便，婢面反，下

同。糟，早勞反。○疏曰：四馬曰乘，故知乘壺爲四壺。

束脩，十脰脯也。沛酒曰清，不沛曰糟。陳，列也。酒重脯

輕，陳列重者於門外，而執輕者人以將命。其以鼎肉，

則以將命。鼎肉，謂牲體已解，可升於鼎。其禽加

於一雙，則執一雙以將命，委其餘。加，猶多

也。○疏曰：委其餘，陳於門外也。犬則執縶，守

犬、田犬則授擯者，既受乃問犬名。牛則執

①「右」，原作「左」，據元明本、寬文本、賀本改。



紉，馬則執鞵，皆右之。<sup>①</sup> 縹，息列反。守，手又反。紉，丈引反。鞵，丁歷反。○縹、紉、鞵，皆所以繫制之者。<sup>②</sup> 犬有三種：一曰守犬，二曰田犬，三曰食犬。守犬，田犬間名，畜養者常呼之名，謂若韓之盧、宋之鵠之屬。右之者，執之宜由使也。臣則左之。異於衆物，臣謂囚俘。車則說綏，執以將命。甲，若有以前之，則執以將命；無以前之，則袒囊奉胄。說，又作「脫」，又作「稅」，同吐活反。袒，音但。囊，音羔。奉，芳勇反。胄，直又反。○甲，鎧也。有以前之，謂它摯幣也。囊，毀鎧衣也。胄，兜鍪也。袒其衣，出兜鍪以致命。○鎧，苦代反。毀，吐刀反。兜，丁侯反。鍪，莫侯反。器則執蓋，謂有表裏。弓則以左手屈鞵執拊。鞵，音獨。拊，芳武反。○鞵，弓衣也。左手屈衣，并於拊執之，而右手執簫。○并，必政反。劍則啟櫝，蓋襲之，加夫撓與劍焉。櫝，音獨。夫，音扶，注同。撓，如遙反。○櫝，謂劍函也。襲，卻合之。夫撓，劍衣也。加衣於函中，而置劍於衣上。<sup>③</sup> 夫，或爲「煩」，皆發聲。○函，音咸。卻，去略反。○疏曰：蓋，劍函之蓋也。開函

而以蓋卻合於函下，底於蓋上。加劍衣於函中，而復以劍置衣上也。○今按：卻猶仰也。笏、書、脩、脯也。苞苴、弓、茵、席、枕、几、穎、杖、琴、瑟，戈有刃者櫝，句。筴、籥，其執之皆尚左手。苴，子余反。茵，音因。穎，京領反，又垌迴反。○苞苴，謂編束菅葦以裹魚肉或它物也。<sup>⑤</sup> 茵，著蓐也，《既夕禮》云「茵著用荼」，謂用荼莠以著茵也。穎，警枕也。莢，著也。籥，如笛三孔。皆十六物也。左手執上，上，陽也。右手執下，下，陰也。○編，必綿反。菅，音姦。葦，于鬼反。裹，音果。著，音宁。蓐，音辱。○疏曰：皆尚左手，在上而執之，右手在下而承之。刀卻刃授穎，削授拊。卻，去略反。穎，役頂反。削，音笑。○卻，仰也，辟用時。穎，鍛

① 「之」字，原脫，據賀本補。  
 ② 「所」，原作「可」，據元明本、寬文本、賀本改。  
 ③ 「置」，原作「遵」，據元明本、寬文本、賀本改。  
 ④ 「穎」（並下文「穎京領反」、「穎警枕也」），元明本、寬文本、賀本作「穎」。按：字訓枕，當作「穎」是，「穎」爲假字。  
 ⑤ 「菅」，原作「萑」，據元明本、寬文本、賀本改。

也。削，曲刀也。拊，謂把。○辟，音避。把，音霸。○疏曰：授人以刀，卻仰其刃，授之以穎。以削授人，則以把授之。凡有刺刃者，以授人則辟刃。刺，匕智，匕亦二反。辟，匹亦反。○辟刃，不以正鄉人也。○鄉，許亮反。○《少儀》。○凡遣人弓者，張弓尚筋，弛弓尚角。遺，于季反。○弓有往來體，皆欲令其下曲，隤然順也。遣人無時，已定體則張之，未定體則弛之。○隤，徒回反。○疏曰：弓之爲體，以木爲身，以角爲面，筋在外面。張之時，曲來嚮內，故遣人之時使筋在上，弓身曲嚮其下；其弛弓之時，反張嚮外，筋在曲內，角在曲外。今遣人之時，角嚮其上，弓形亦曲嚮下，故鄭「皆欲令其下曲，隤然順也」。《弓人》云：「秋合三材，冬定體」。此注云：未定體，則方合三材之時也。右手執簫，左手承拊。拊，音撫。○簫，弭頭也，謂之簫，簫，邪也。拊，把也。○弭，亡婢反，弓末也。邪，似嗟反。把，音霸，手執處也。○疏曰：簫謂弓頭，頭稍刻，差邪似簫。客覆右手執弓下頭，又卻下左手以承弓把。把當中央而高，兩頭頰下，以授主人，主人在左。尊卑垂帨。帨，佩巾也。磬折則佩垂，授受之儀，尊卑。○今按：此謂賓主雖或一尊一卑，

然皆當磬折垂帨也。若主人拜，拜受也。則客還

辟，辟拜。還，音旋。辟辟，上扶亦反，下音避。○辟

拜，謙不敢當。○疏曰：還辟，猶逡巡也。不答拜者，方執

弓，不得拜也。主人自受，由客之左接下承拊，

由，從也。從客之左，右客，尊之。接下，接客手下也。承

拊卻手，則執簫覆手與？○覆，芳服反。○疏曰：主人拜

客既竟，從客左，與客並，以卻左手接客左手之下而承拊，

又覆右手捉弓下頭。鄉與客並，然後受。鄉，去聲。

○於堂上則俱南面，禮：敵者並授。○疏曰：言於堂上俱

南面，是嚮明故也。若不於堂上，則未必南面，當隨時便而

俱嚮明云。進劍者左首。左首，尊也。○疏曰：進，

亦遣也。首，劍拊環也。不以末授人，敬也。魯叔孫之圍

人欲殺公若，僞不解禮而授之劍末。以劍鋒末授之，是不

知禮也。進戈者前其鐔，後其刃。進矛戟者

前其鏃。鐔，在困反，舊子困反，又作管反。矛，又作

「鈇」。①鏃，又作「鏃」，徒對反。○後刃，敬也。三兵鐔、

① 又作鈇，原作本也，據賀本改。

鍬雖在下，猶爲首。銳底曰鑕，取其鑕地。平底曰鍬，取其鍬地。○疏曰：戈，鉤子戟也，如戟而橫安刃，但頭不嚮上爲鉤也。直刃長八寸，橫刃長六寸，刃下接柄處長四寸，並廣二寸，用以鉤害人也。刃，當頭而利者也。鑕，在尾而鈍者也。矛，如鋌而三廉也。戟，今之戟也，兩邊皆安橫刃，長六寸，中刃長七寸半，橫刃下接柄處又長四寸半，並廣寸半。鍬，爲矛戟柄尾平底者也。亦應並授。不云左右而云前後者，若相對則前後也，若並授則左右也。進几杖者拂之。尊者所馮依，拂去塵，敬也。效馬效羊者右牽之，效，胡教反，下同。○用右手便。效，猶呈見。○疏曰：馬羊有力，人右手亦有力，故用右手牽之。效犬者左牽之。犬齟齬人，右手當禁備之。○齟，常世反。○疏曰：犬有三種，前云右牽之者，彼是田犬，守犬，畜養馴善無可防禦。此乃食犬，則當左手牽之，右手防禦。執禽者左首。左首尊。○疏曰：左，陽也，首亦陽也。左首，謂橫捧之也，凡鳥皆然。若並授，則主人在左，故客以鳥首授之也。飾羔鴈者以績。績，胡對反。○績，畫也。諸侯大夫以布，天子大夫以畫。○疏曰：飾，覆也。

畫布爲雲氣，以覆羔鴈爲飾，以相見也。《士相見禮》云：「下大夫以鴈，上大夫以羔，飾之以布。」不言績者，彼是諸侯卿大夫，卑，故但用布也。受珠玉者以掬，掬，九六反。○慎也，掬手中。○疏曰：珠玉寶重，置在手中，不以袂承之，恐墜落。受弓劍者以袂。敬也。○疏曰：不露手取之，故用衣袂承接。○水潦降，不獻魚鼈。不饒多也。獻鳥者佛其首，爲其喙害人也。佛，戾也，蓋爲小竹籠以冒之。畜鳥者則勿佛也。畜，養也，養則馴。獻車馬者執策綏，獻甲者執冑，獻杖者執末，獻民虜者操右袂，獻粟者執右契，獻米者操量鼓，獻熟食者操醬齊，獻田宅者操書致。冑，直又反。操，七刀反。契，苦計反。量，音亮，一音良，斗斛也。齊，一作「齎」，同子兮反。○凡操執者，謂手所舉以告者也。設其大者，舉其小者，便也。甲，鎧也。冑，兜鍪也。民虜，軍所獲也，操其右袂制之。契，要也，右爲尊。量鼓，量器名。○疏曰：末者，拄地頭也。拄地不淨，不可嚮人，故執以白嚮，持淨頭以與人。粟，梁稻之屬。契，謂兩書一札，同而別之。米，六米之等。量，

是知斗斛之數。鼓，是量器名也。《隱義》云：東海樂浪人呼容米十二斛者爲鼓，<sup>①</sup>以量米，故云量鼓。獻米者執器以呈之。熟食，蔥漆之屬。醬齊，爲食之主，若見芥醬，必知獻魚膾之屬也。<sup>②</sup>書致，謂圖書於板，丈尺委曲書之，而致於尊者也。凡以弓劍、苞苴、簞笥問人者，簞，音單。笥，思嗣反，竹器也。○問，猶遺也。簞笥，盛飯食者，圓曰簞，方曰笥。操以受命，如使之容。使，色吏反。○謂使者。<sup>③</sup>○酒肉之賜，弗再拜。輕也。受重賜者拜受，又拜於其室。○疏曰：再，猶重也。酒肉輕，故初賜至則拜，明日不重往拜也。○《玉藻》。<sup>④</sup>

### 右問遺之禮。

升車必正立執綏，綏，挽以上車之索也。范氏曰：正立執綏，則心體無不正，而誠意肅恭矣。蓋君子莊敬無所不在，升車則見於此也。車中不內顧，不疾言，不親指。內顧，回視也，《禮》曰：「顧不過轂。」三者皆失容，且惑人。此記孔子升車之容也。○《論語》。○國君不乘奇車，奇，居宜反，奇邪不正之車。何云：不如法之車。○出入必正也。奇車，獵衣之屬。○疏

曰：獵車之形，今之鉤車是也。衣車，如鼈而長也，漢桓帝之時禁臣下乘之。車上不廣欬，欬，開代反。○爲若

自矜。廣，猶弘也。不妄指。爲感衆。立視五禡，

禡，本又作「窩」，惠圭反。○立，平視也。禡，謂規也，謂輪

轉之度。禡，或爲「榮」。<sup>⑤</sup>○榮，又作「藥」，如捶反。○疏

曰：車輪一周爲一規。乘車之輪高六尺六寸，徑一圍三，

三六十八，得一丈八尺，又六寸爲一尺八寸，總一規爲一丈

九尺八寸，五規爲九十九尺。六尺爲步，總爲十六步半，在

車上所視前十六步半也。式視馬尾，小俛。顧不過

轂。爲掩在後。國中以策彗卹勿驅，塵不出

軌。彗，音遂。卹，蘇沒反。勿，音沒。驅，如字，又羌遇

反。○人國不馳。彗，竹帚。卹勿，搔摩也。○搔，素刀

反。摩，莫何反。○疏曰：人國不馳，故不用鞭策，但取竹

①「斛」上，原有「石」字，據元明本、寬文本、賀本刪。

②「膾」，原作「鱉」，據元明本、寬文本、賀本改。

③「者」下，賀本有「○以上曲禮」。

④「玉藻」，原作「以上並曲禮」，據賀本改。案，「之容」以上爲《曲禮》文。

⑤「藥」，原作「榮」，據元明本、賀本改。下同。

帚帶葉者爲杖，形如掃帚，故云策彗。云「卹勿」者，以策微近馬體，不欲令疾也。但僕搔摩之時，其形狀卹勿然。

○今按：策彗，疑謂策之彗，若今時鞭末韋帶耳。<sup>①</sup> ○鸞

設於鑣，和設於軾。馬動而鸞鳴，鸞鳴而和

應，行之節也。鸞，和，皆鈴也。 ○國君下齊牛，

式宗廟。齊，側皆反。○疏曰：案《齊右》職注云：「王

見牲，則拱而式。」又引《曲禮》曰：「國君下宗廟，式齊牛。」

與此文異。熊氏云：此文誤，當以《周禮》注爲正。大夫

士下公門，式路馬。○君子式黃髮，自「下齊

牛」以下，皆敬老也。髮白變黃，彌老。下卿位，尊賢

也。卿位，卿之朝位也。君出過之而上車，人未至而下車。

○疏曰：卿位，路門之內門東北面位。出則過之而上車，

人則未到而下車。若迎賓客，則《樂師》注云：「登車於大

寢西階之前，反降於阼階之前也。」或「下卿位」，是諸侯禮，

《樂師》注是天子禮。人國不馳，愛人也。馳，善蘭人

也。<sup>②</sup> ○蘭，力刃反，雷刺也，一云躡也。○疏曰：善，猶好

也。蘭，雷刺也。若車馳則好雷刺人也。人里必式。

不誣十室。○疏曰：二十五家爲里，里巷首有門。十室之

邑，必有忠信之人，不可誣也。故人里則必式而禮之，爲敬也。○國君撫式，大夫下之。大夫撫式，士下之。撫，猶據也。據式小俛，崇敬也，乘車必正立。<sup>③</sup>

右在車之容。

凡僕人之禮，必授人綏。若僕者降等則

受，不然則否。若僕者降等則撫僕之手，不

然則自下拘之。拘，占侯反，又音俱。○撫，小止之，

謙也。自下拘之，由僕手下取之也。僕與己同爵，則不受。

○疏曰：「降等」，謂士與大夫，大夫與卿御，則主人不須

謙，故受取綏也。「不然」，謂僕者敵體，其主人宜謙，不受

其綏也。「自下拘之」，謂既敵不受而僕者必授，則主人當

卻手從僕手下自拘取之，示不用僕授也。○僕御婦

人，則進左手，後右手。遠嫌。○疏曰：僕在中央，

婦人在左，僕御之時，若進右手，則近相向生嫌，故進左手。

①「耳」下，賀本有「○曲禮」。

②「蘭」字，寬文本、賀本俱作「躡」。下二「蘭」同。

③「立」下，賀本有「○以上三條曲禮」。

持轡而後，右手使形微相背也。御國君，則進右手，

後左手而俯。敬也。○疏曰：禮以相嚮爲敬，又非男

女無所嫌，故進右手也。俯者既御，不得恒式，故但俯俛而爲敬也。①○僕於君子，君子升下則授綏，始

乘則式。君子下行，然後還立。乘，時證反。

還，音旋。○還車而立，以俟其去。○疏曰：「升下」，升及

下也。式，謂御者式，以待君子升也。「還車而立，以俟其

去」，僕人之禮。若君子將升，則僕先升；君子下行，則僕

後下。或曰：君車將駕，則僕執策立於馬前。故君子將下

車，則僕亦下車，立於馬前，待君子下行，乃更還車，立以俟

君去。○《少儀》。○君車將駕，則僕執策立於

馬前。監駕，且爲馬行。○疏曰：周禮：諸僕皆用大夫、

士爲之。策，馬杖也。別有人牽馬駕車，而此僕則知車事

者也。恐馬奔走，故自執馬杖立當馬前也。已駕，僕展

軛，軛，歷丁反。○展軛具視。○疏曰：展，視也。軛，軛

頭軛也。駕竟，僕則從車軛左右四面看視之也。效駕，

白已駕。奮衣由右上，取貳綏。上，時掌反。○奮，

振去塵也。貳，副也。○疏曰：綏，登車索。綏有二：一是

正綏，擬君之升；一是副綏，擬僕右之升。跪乘，乘，繩

證反。○未敢立，敬也。執策分轡，驅之五步而

立。轡，悲位反，下同。○調試之。○疏曰：轡，御馬索

也。車有一轅而四馬駕之，中央兩馬夾轅者名服馬，兩邊

名駢馬，亦曰驂馬，故《詩》曰：「兩服上駟，兩驂鴈行。」每

一馬有兩轡，四馬八轡。以驂馬內轡繫於軾前，其驂馬外

轡，並夾轅兩服馬各二轡，六轡在手，分置兩手，是各得三

轡也。分轡既竟，驅之使行，得五步止，而僕倚立待君出

也。君出就車，則僕并轡授綏，并，必正反。○車

上僕所主。○疏曰：「并轡授綏」，并六轡及策置一手中，

所餘一空手，取正綏授與君，令登車。當右手并轡，左手授

綏，轉身向後引君上也。左右攘辟。辟，音避，又扶亦

反。○謂群臣陪位侍駕者。攘，卻也，或者「攘」古「讓」字。

○疏曰：君已上車，車欲進行，左右侍者遷卻以避車，使不

妨車行也。車驅而騶，至于大門，君撫僕之手

而顧命車右就車，門閭溝渠必步。騶，仕救反。

①「也」下，賀本有「○以上曲禮」。

○僕手執轡，車行由僕，故君欲駐車，則抑止僕手也。車右，勇力之士，備制非常者。君行則陪乘，君式則下步行。○疏曰：騶，謂從者疾驅從車行也。至大門，車行至外門時也。撫，按止也，君欲駐車，故君抑止僕手。顧，回頭也。就車，謂君命勇力之士上車也。車行有三人，君在左，僕在中央，勇士在右。初出門內，未顧勇士，勇士趨在車後。今車行既至大門，恐有非常，故命車右上車。「門閭溝渠必步」，謂車右勇士之禮也。步，謂下車。門閭下者，以君式故也。溝渠下者，備傾覆也。① ○執君之乘車則坐。執，執轡，謂守之也。君不在中坐，示不行也。

○僕者右帶劍，負良綏，申之面，地諸臂。地，徒可反，引也，又他佐反。臂，音覓。○面，前也。臂，覆也。良，善。善綏，君綏也。負之，由左肩上人右腋下，申之於前，覆等上也。○等，力丁反。腋，音亦。○疏曰：僕，即御者也。「右帶劍」者，帶之於腰右邊也。帶劍之法在左，以右手抽之便也。今御者劍右帶者，御人在中，君在左，若左帶劍則妨於君，故右帶也。君由後升，僕者在車，背君而面向前，取君綏，由左腋下加左肩上，繞背入右腋下，申綏之末於面前。地，猶擲也。等，車前蘭也，②亦名

爲式。綏申於面前，而擲末於車前臂上也。○今按：下文始言「以散綏升」，則是此時僕方在車下帶劍負綏而擲綏末於臂上，君固未就車也。及僕以散綏升之後，君方出而就車。此疏乃言君由後升，僕者在車背君取綏而地諸臂，誤矣。又疑綏制當是以索爲環，兩頭相屬，故負之者得以如環處自左腋下過前後，各上至背則合而出於右腋之中，以申於前，而自車下擲於臂上。君升則還身向後，復以覆臂如環處授君，使君得以兩手執之而升也。以散綏升，執轡然後步。初升時，執策分轡行車，五步而立，待君至步行也。○疏曰：「以散綏升」者，謂初升時也。散綏，副綏也。僕登車，既不得執君綏，故執副綏而升也。○《少儀》。○今按：此與上條皆非專爲君御者之事。蓋劍妨左人，自當右帶，綏欲授人，自當負之以升。又當升時無人授己，故但取散綏以升，乃僕之通法，注、疏皆誤。○酌尸

之僕，如君之僕。當其爲尸則尊。○疏曰：尸之僕，爲尸御車之人。將欲祭載，酌酒飲之，如與君之僕，以其爲

①「也」下，賀本有「○曲禮」。

②「蘭」，元明本、寬文本、賀本作「闌」。

尸，則尊之似君也。其在車，則左執轡，右受爵，

祭左右軌范乃飲。軌，媿美反。范，音犯。○《周

禮·大御》：「祭兩軹，祭軌，乃飲。」軌與軹，於車同謂軹頭也。軌，與范聲同，謂軹前也。○軹，音旨。軹，音衛。軹，

音式。○疏曰：在車，謂僕在車中時也。僕既主尸車，故

於車上執轡而受爵也。尸位在左，僕立在右，故左執轡，

右受爵。祭酒也，君僕亦然。軌，謂轂末。「范」亦作「範」。

僕受爵將飲，則祭之於車左右軌及前范也。所以祭者，爲其神助已，不使傾危故也。「乃飲」者，祭遍乃自飲也。

○《少儀》。

### 右僕御之禮。

禮從宜，事不可常也。○宜，謂事之所宜，若男女

授受不親，爲禮而祭與喪則相授器之類。使從俗。使，

色吏反。○亦事不可常也。牲幣之屬，則當從俗所出，《禮

器》曰：「天不生，地不養，君子不以爲禮，鬼神不饗。」

○俗，<sup>①</sup>謂彼國之俗，若魏李彪以古服弔齊，齊裴昭明以凶服弔魏，蓋得此義。○貧者不以貨財爲禮，老者

不以筋力爲禮。禮許儉，不非無也。年五十始杖，八

十拜君命，一坐再至。○介者不拜，爲其拜而菱

拜。爲，于僞反。菱，子卧反。○菱則失容節。菱，猶詐

也。○疏曰：菱，挫也。戎容暨暨，著甲而屈拜，則挫損其

戎威之容也。一云著鎧而拜，形容不足，似詐也。<sup>②</sup>○今

按：菱，猶言有所枝柱，不利屈伸也。○受立授立不

坐，由便。○坐，亦跪也。性之直者則有之矣。有

之，有跪者也。謂受、授於尊者，而尊者短則跪，不敢以長

臨之。○《少儀》。○按：此句文義皆未通，恐是記失禮

耳。性之直，猶所謂直情而徑行者歟？○凡祭，於室

中，堂上無跣，燕則有之。跣，悉典反。○祭不跣

者，主敬也。燕則有跣，爲歡也。天子、諸侯祭，有坐尸於

堂之禮，祭所尊在室，燕所尊在堂。將燕，降說屨，乃升堂。

○疏曰：凡祭，謂天子至上悉然也。天子、諸侯祭有朝

事，延尸於戶外，故坐尸於堂。若卿、大夫以下，祭禮於室，

無坐尸於堂也。跣，說屨也。祭禮主敬，故凡祭在室中者，

非唯室中不說屨，堂上亦不敢說屨也。《燕禮》云：賓及卿

①「俗」上，賀本有「按」字。

②「也」下，賀本有「○以上曲禮」。



大夫皆說屨，升就席。則安坐而相親也。○《少儀》。

右從宜。○晏子聘魯，上堂則趨，授

玉則跪，上，時掌反。子貢怪之，問孔子曰：

「晏子知禮乎？」孔子曰：「其有方矣，我將問焉。」俄而，晏子至，孔子問之，晏子對

曰：「夫上堂之禮，君行一，臣行二。今君

行疾，臣敢不趨乎？今君之受幣也，卑臣

敢不跪乎？」孔子曰：「善！禮中又有

禮，賜寡使也，何足以識禮？」使，色吏反。

登城不指，城上不呼。呼，火故反，號叫也。

○爲惑人。將適舍，求毋固。謂行而就人館。固，猶

常也。求主人物，不可以舊常或時乏無。將入門，問

孰存。存，在也。①將上堂，聲必揚。警內人也。

將入戶，視必下。戶外有二屨，言聞則入，言

不聞則不入。入戶奉扃，視瞻毋回。下，叶音

虎。聞，音問。奉，膚孔反。扃，古螢反。○皆不干掩人之

私也。視必下，不舉目也。禮有鼎，扃所以闢鼎，故闢戶之

本亦謂之扃。奉扃，謂以兩手當心，徐徐開戶，如奉扃然，

不敢放手排闥也。回，迴轉，廣有瞻視也。戶開亦開，

戶闔亦闔。不以後來變先。有後入者，闔而勿

遂。勿遂，謂徐徐作闔勢，示不拒人也。離坐離立，

毋往參焉。離立者，不出中間。離，如字。參，

倉含反。○離，兩也，參與之爲三也。非但不往參，其坐立

亦不行出其中間，皆爲干人私也。揖人必違其位。

禮以變爲敬。○疏曰：《燕禮》，君降階，爾卿、大夫，鄭注

云：「爾，近也。」是君臣皆須然也。②執虛如執盈，人

虛如有人。重慎。○《少儀》。○並坐不橫肱。

肱，古弘反。○爲害旁人。授立不跪，授坐不立。

爲煩尊者俛仰受之。③

右雜記。○傳：孟子既娶，將入私

室，其婦袒而在內，孟子不悅，遂去不入。

①「也」下，賀本有「○此句係列女傳」。

②「也」下，賀本有「○曲禮」。

③「之」下，賀本有「○曲禮」。

婦辭孟母而求去，曰：「妾聞夫婦之道，私室不與焉。今者妾竊墮在室，而夫子見妾，勃然不悅，是客妾也。婦人之義，蓋不客宿，請歸父母。」孟母召孟子而謂之曰：

「夫《禮》，『將入門，問孰存』，所以致敬也；『將上堂，聲必揚』，所以戒人也；『將入戶，視必下』，恐見人過也。今子不察於禮而責禮於人，不亦遠乎！」孟子謝，遂留其婦。君子謂孟母知禮而明於姑母之道。《列女傳》。

### 右曲禮凡十一章。○傳：正考父疏

曰：《家語》云：宋泯公熙生弗父何，何生宋父周，周生世子勝，勝生正考父，考父生孔父嘉，其後以孔爲氏也。孔父生木金父，金父生皋夷父，夷父生防叔，防叔辟華氏之偪而奔魯，生伯夏，伯夏生梁紇，梁紇即生孔子也。佐戴、武、宣，三人皆宋君。三命茲益共，共，音恭。○三命，上卿也，言位高益共。故其

鼎銘云：考父廟之鼎。「一命而僂，再命而

僂，三命而俯。」僂，力主反。僂，紆甫反。○俯共

於僂，僂共於僂。循牆而走，走，叶音祖。○言不

敢安行。亦莫余敢侮。侮，亡甫反。○其共如

是，人亦不敢侮慢之。饘於是，鬻於是，以糊

余口。饘，之然反。鬻，之六反，孫炎云：淖麋也。①

糊，音胡。口，叶音苦。○於是鼎中爲饘鬻，糊屬其

口，言至儉。其共也如是。②○諸侯從劉康

公、成肅公會晉侯伐秦。劉康公，王季子。

成子受賑于社，不敬。賑，市軫反。○賑，宜社

之肉也。盛以賑器，故曰賑。宜，出兵祭社之名。

○盛，音成。劉子曰：「吾聞之，民受天地

之中以生，所謂命也。是以有動作禮義

威儀之則，以定命也。能者養之以福，養

①「麋」，疑當作「糜」字。

②「是」下，賀本有小字雙行注文「昭公七年春秋左氏傳」九字。

威儀以致福。不能者敗以取禍。是故君子勤禮，小人盡力。勤禮莫如致敬，盡力莫如敦篤。敬在養神，篤在守業。國之大事，在祀與戎。祀有執燔，盡，津忍反，下同。燔，音煩。○燔，祭肉。戎有受脤，神之大節也。交神之大節。今成子情，弃其命矣，情則失中和之氣。其不反乎！「既行，成肅公卒于瑕。」<sup>①</sup>○柯陵之會，柯陵，鄭西地名。會在魯成十七年。晉厲公視遠步高。厲公，晉成公之孫，景公之子州蒲也。視遠，望視遠。步高，舉足高。單襄公曰：單，音善。○襄公，王卿士，單朝之謚也。「夫君子目以定體，足以從之，體，手足也。是以觀其容而知其心矣。心不固則容不正。目以處義，義，宜也。足以步目。今晉侯視遠而足高，目不在體，在，存也。而足不步目，其心必異矣。目體不相從，何以能久？夫合諸侯，民之大事也，於是乎

觀存亡，故國將無咎。其君在會，步言視聽，必皆無謫，則可以知德矣。」明年晉弑厲公。<sup>②</sup>○晉孫談之子周適周，事單襄公，談，晉襄公之孫惠伯談也。周者，談之子，晉悼公之名。晉白獻公用麗姬之讒詛，不畜群公子，故孫周適周事單襄公。立無跛，跛，彼義反。○跛，偏任也。視無還，還，音旋。○睛轉復反為還。聽舞聳，不聳耳而聽。言無遠，遠，謂非耳目所及也。晉國有憂未嘗不戚，急其宗也。有慶未嘗不怡。慶，福也。怡，悅也。襄公有疾，召頃公而告之，頃公，襄公之子。曰：「必善晉周，將得晉國。其行也文，行，去聲。能文則得天地。天地所胙，小而後國。胙，才素反。○胙，福也。天之所福，小則得國，大則得天下。

①「瑕」下，賀本有小字雙行注文「成公十三年春秋左氏傳」十字。

②「公」下，賀本有小字雙行注文「國語周語」。

且夫立無跛，正也；視無還，端也；聽無聳，成也；成，定也。言無遠，慎也。爲晉休戚，不背本也。爲，于僞反。背，音佩。○休，喜也。被文相德，非國何取！」相，悉亮反。○被服文德，又以四行輔助之，非國何取，言必得也。及晉弑厲公迎而立之，是爲悼公，晉以復霸。復，扶又反。○衛侯在楚，北宮文子見令尹圍之威儀，言於衛侯曰：「令尹似君矣，將有他志。」言語瞻視行步不常。雖獲其志，不能終也。《詩》云：「靡不有初，鮮克有終。」鮮，上聲。終之實難，令尹其將不免。」公曰：「子何以知之？」對曰：「《詩》云：『敬慎威儀，惟民之則。』令尹無威儀，民無則焉。民所不則，以在民上，不可以終。」公曰：「善哉！何謂威儀？」對曰：「有威而可畏謂之威，有儀

而可象謂之儀。君有君之威儀，其臣畏而愛之，則而象之，故能有其國家，令聞長世。聞，音問。臣有臣之威儀，其下畏而愛之，故能守其官職，保族宜家。順是以下皆如是，是以上下能相固也。衛《詩》曰：『威儀棣棣，不可選也。』棣，直計反。選，息戀反。○《詩》、《邶風》。棣棣，富而閑習也。選，數也。言君臣上下、父子兄弟、内外大小皆有威儀也。周《詩》曰：『朋友攸攝，攝以威儀。』《詩》、《大雅》。攸，所也。攝，佐也。言朋友之道必相教訓以威儀也。故君子在位可畏，施舍可愛，進退可度，周旋可則，容止可觀，作事可法，德行可象，聲氣可樂，動作有文，言語有章，以臨其下，謂之有威儀也。」樂，音洛。明年，令尹圍弑楚

①「反」下，賀本有「○國語周語」。

子而自立，是爲靈王。後十三年，楚人弑之于乾谿。<sup>①</sup>○子贛由其家來謁於孔子，孔子正顏舉杖，磬折而立，曰：「子之大親毋乃不寧乎？」放杖而立，曰：「子之兄弟亦得無恙乎？」曳杖倍而行，曰：「妻子家中得毋病乎？」故身之倨佝，手之高下，顏色聲氣，各有宜稱，所以明尊卑，別疎戚也。折，之舌反。倨，紀具反。佝，公豆反。稱，去聲。別，彼列反。<sup>②</sup>

儀禮經傳通解卷第十一終

① 「谿」下，賀本有小字雙行注文「襄公二十一年春秋左氏傳」十一字。

② 「反」下，賀本有「○賈誼容經」。

## 儀禮經傳通解卷第十二

### 臣禮第二十一

#### 學禮五

將適公所，宿齊戒，居外寢，沐浴。史進

象笏，書思對命。齊，側皆反。○思，所思念，將以告

君者也。對，所以對君者也。命，所受君命也。書之於笏，為失忘也。既服，習容，觀玉聲，觀，古亂反。○玉

佩。乃出。揖私朝，輝如也，登車則有光矣。

朝，直遙反。○私朝，自大夫家之朝也，揖其臣乃行。

○《玉藻》。

右將朝。○傳：晉靈公不君，趙宣子

驟諫，公患之，使鉏麇賊之。晨往，寢門闢

矣，盛服將朝，尚早，坐而假寐。麇退，歎

而言曰：「不忘恭敬，民之主也。賊民之

主，不忠；棄君之命，不信。有一於此，不

如死也。」觸槐而死。麇，王兮反。朝，直遙反。

○《左氏》宣公二年。

始見于君，執摯，至下，容彌蹙。見，賢遍

反，下同。摯，音至，下同。蹙，子六反。○下，謂君所也。

蹙，猶促也。促，恭慙貌也。其為恭，士、大夫一也。庶

人見於君，不為容，進退走。容，謂趨翔。士、

大夫則奠摯，再拜稽首，君答壹拜。稽，音啟。

下同。○言君答士、大夫一拜，則於庶人不答之。庶人之

摯，驚。古文「壹」作「一」。若他邦之人，則使摯者

還其摯，曰：「寡君使某還摯。」賓對曰：「君

不有其外臣，臣不敢辭。」再拜稽首受。摯，必

刃反。○《士相見禮》。

右始見。○傳曰：臣見君所以有贊

何？贊者，質也。質己之誠，致己之悃悞

也。王者因臣之心以為之制，差其尊卑以

副其意。子見父無贊何？至親也。見無

時，故無贊。臣之事君，以義合也。得親供養，故質己之誠，副己之意，故有贊也。

贊，音至。惘，苦本反。幅，拍逼反。○《白虎通》。

大夫、士出入君門，由闌右，不踐闕。臣

統於君。闌，門樞。○《曲禮》上。○入公門，鞠躬如

也，如不容。鞠躬，曲身也。公門高大而若不容，敬之

至也。立不中門，行不履闕。闕，于通反。○中門，

中於門也，謂當樞闌之間，君出入處也。闕，門限也。謝氏

曰：立中門則當尊，行履闕則不恪。過位，色勃如

也，足躩如也，其言似不足者。躩，驅若反。

○位，君之虛位，謂門屏之間，人君立之處，所謂宁也。

君雖不在，過之必敬，不敢以虛位而慢之也。言似不足，不

敢肆也。攝齊升堂，鞠躬如也，屏氣似不息

者。齊，音咨。○攝，攝也。齊，衣下縫也。禮：將升堂，

兩手握衣使去地尺，恐躡之而傾跌失容也。屏，藏也。息，

鼻息出入者也。近至尊，氣容肅也。出降一等，逞顏

色，怡怡如也。沒階，趨，翼如也。復其位，

蹶蹶如也。陸氏曰：「趨」下本無「進」字，俗本有之，誤

也。○等，階之級也。逞，放也。漸遠所尊，舒氣解顏。怡

怡，和悅也。沒階，下盡階也。趨，走就位也。復位蹶蹶，

敬之餘也。○《鄉黨》。○君命召，雖賤人，大夫、

士必自御之。御，當爲「訝」，訝，迎也。君雖使賤人

來，必自出迎之，尊君命也。《春秋傳》曰：「跛者御跛者，

眇者御眇者。」皆訝也，世人亂之。○《曲禮》上。○凡君

召以三節，二節以走，一節以趨。節，所以明信，

輔君命也。使使召臣，急則持二，緩則持一。《周禮》曰：珍

圭以徵守，其餘未聞也。今漢使者擁節。在官不俟

屨，在外不俟車。趨君命也，必有執隨授之者。官，

謂朝廷治事處也。○疏曰：在外，謂其室及官府。○《玉

藻》。○大夫、士見於國君，君若勞之，則還

辟，再拜稽首。見，賢遍反。勞，力報反。還，音旋。

辟，婢亦反，下同。○謂見君既拜矣，而後見勞也。《聘禮》

曰：君勞使者及介，君皆答拜。君若迎拜，則還辟，

不敢答拜。嫌與君亢賓主之禮。迎拜，謂君迎而先拜

之，《聘禮》曰：大夫入門再拜，君拜其辱。○《曲禮》下。

右朝禮。○周襄王使宰孔賜齊侯

胙，<sup>①</sup>胙，在故反。○胙，祭肉。尊之，比二王後。

曰：「天子有事于文武，有祭事也。」使孔賜

伯舅胙。」天子謂異姓諸侯曰伯舅。齊侯將下

拜。孔曰：「且有後命，天子使孔曰：『以

伯舅耄老，加勞，賜一級，無下拜。』」耄，徒

結反。勞，力報反。○七十曰耄。級，等也。對曰：

「天威不遠，顏咫尺，咫，諸氏反。○言天監察不

遠，威嚴常在顏面之前。八寸曰咫。小白余敢貪

天子之命無下拜？小白，齊侯名。余，身也。

恐隕越于下，隕越，顛墜也。據天王居上，故言恐顛

墜于下。以遺天子羞。敢不下拜！」下拜，

登受。遺，于季反。○拜堂下，受胙於堂上。○《左

氏》傳公九年。○孔子曰：「拜下，禮也。今

拜乎上，泰也。雖違衆，吾從下。」○孔子

曰：「事君盡禮，人以爲諂也。」並《論語》。

凡侍於君，紳垂，足如履齊，頤雷，垂拱，

視下而聽上，視帶以及袷，聽鄉任左。齊，音

咨。頤，音夷。雷，力救反。袷，居業反。鄉，去聲。○紳

垂，則袷折也。齊，裳下緝也。袷，交領也。○疏曰：紳

大帶也。身直則帶倚，袷折則帶垂。「足如履齊」者，身折

則裳前下緝委地，故行則足常如踐履裳下也。「頤雷」者，

雷，屋簷，身俯，故頭臨前，垂頤如屋雷。拱，胥手也，身俯

則宜手胥而下垂也。「視下」者，視高則傲，故下矚。「聽

上」，謂聽尊者語宜諦聽，故仰頭而面嚮上以聽之。視帶及

袷，視君之法，下不過帶，高不過袷。聽鄉任左，鄭注《少

儀》曰「立者尊右」，則坐者尊左也。侍君之時，君坐，故侍

者在右，是以「聽鄉」皆以左爲任也。此謂臣以左耳近君，

故云任左。○《玉藻》。○贊幣自左，詔辭自右。

白，由也，謂爲君授幣，爲君出命也。<sup>②</sup>立者尊右。○《少

儀》。○凡燕見于君，必辯君之南面，若不得，

則正方，不疑君。見，賢遍反，下同。○辯，猶正也。

君南面，則臣見正北面。君或時不然，當正東面，若正西

面，則臣見正南面。君或時不然，當正東面，若正西

① 「周」上，賀本有「傳」字。  
② 「出」，原作「傳」，據賀本改。



面，不得疑君所處邪鄉之。此謂特見圖事，非立賓主之燕也。疑，度之。○疏曰：此位言君之方位，正南，臣北面鄉之。若不得南面，或君東西面，則臣亦正方鄉之，不可預度君之方位，邪立鄉之。①此與《燕義》、《燕禮》立賓主之燕別，蓋是特見圖事之時，并賓反見之燕，故此面位無常法也。君在堂，升見無方階，辯君所在。升見，升

堂見於君也。君近東，則升東階；君近西，則升西階。○疏曰：此亦謂反燕及圖事之法。若立賓主，君升自阼階，賓及主人升自西階，《燕禮》所云是也。○《士相見禮》

○侍坐則必退席，不退，則必引而去君之黨。

引，卻也。黨，鄉之細者。退，謂旁側也，辟君之親黨也。

○疏曰：退席，退就側席也。不退，謂旁無別席可退，或雖有別席，君不命之使退，則必引而去離君之親黨，在君之親黨之下而坐也。登席不由前，為躡席。為，去聲。

躡，力輒反。○升必由下也。○疏曰：失節而踐席，為躡席。應從於下升，若由前升，是躡席也。徒坐不盡席

尺。示無所求於前，不忘謙也。○疏曰：徒，空也。空

坐，謂非飲食及講問時也。不盡席之前畔，有餘一尺。讀

書、食，則齊，豆去席尺。讀書，聲當聞尊者。食，

為汙席也。○疏曰：「讀書食則齊」者，讀書聲則當聞尊者，食為其汙席，坐則近前，與席畔齊。「豆去席尺」者，以設豆去席一尺，不得不前坐就豆，解席所以近前之意也。

若賜之食，而君客之，則命之祭然後祭。雖見

賓客，猶不敢備禮也，待食則止不祭。○疏曰：祭，祭先

也。禮：敵者共食，則先祭；若降等之客，則後祭。若臣侍君而賜之食，則不祭。若賜食而君以客禮待之，則得祭。

雖得祭，又先須君命之祭，後乃敢祭也。先飯，辯嘗

羞，飲而俟。飯，扶晚反，下同。辯，音遍。○俟，君食而

後食也。君將食，臣先嘗之，忠孝也。○疏曰：「先飯辯嘗

羞」者，飯，食也，謂君未食而臣先食，徧嘗羞膳也。「飲而

俟」者，禮：食未殮必先嘏飲，以利滑喉中，不令澁噎。君

既未殮，故臣亦不敢殮，而先嘗羞，嘗羞畢而歆飲，以俟君

殮，臣乃敢殮。若有嘗羞者，則俟君之食然後

食，飯飲而俟。不祭，俟食，②不敢備禮也。不嘗羞，

①「鄉」，原作「度」，據賀本改。

②「俟」，原作「待」，據元明本、寬文本、賀本改。

膳宰存也。飯飲，利將食也。○疏曰：「若有嘗羞者」，此謂臣侍食得賜食，而非君所客者也。既不得爲客，故不得祭，亦不得嘗羞，則君使膳宰白嘗羞，故云「有嘗羞者」也。「飯飲」者，飲之也。雖不嘗羞，亦先飲，飲則利喉，以俟君也。君命之羞，羞近者。辟食味也。○疏曰：雖君已食，已乃後食，而猶未敢食羞，故又須君命。雖得君命，又猶未白專嘗，先食近其前者一種而止也。命之品嘗之，然後唯所欲。必先徧嘗之。○疏曰：品，猶遍也。既未敢越次多食，故君又命徧嘗，而已乃徧嘗之後，則隨己所欲，不復次第也。凡嘗遠食，必順近食。從近始也。○疏曰：客與不客悉皆如此，故云「凡」。「順近食」，避食味也。君未覆手，不敢飧。飧，音孫，下同。○覆手，以循呬，已食也。飧，勸食也。○疏曰：飧，謂以飲澆飯於器中也。禮：食竟更作三飧，以勸助令飽，實使不虛也。君既食，又飯飧。不敢先君飽。○疏曰：既，猶竟也。君食竟而又飧，則臣乃敢飧。飯飧者，二飯也。臣勸君食，如是可也。○疏曰：三飯，並謂飧也。君既徹，執飯與醬乃出授從者。從，才用反。

○食於尊者之前，當親徹也。○疏曰：既，已也。徹，徹饌也。飯，醬是食之主，此食已之饌也。君饌已徹，則臣乃白徹已饌以授從者。若君與已禮食，則但親徹之，不敢授已之從者也。凡侑食，不盡食，食於人不飽。謙也。君若賜之爵，則越席再拜稽首受，登席祭之。飲，卒爵而俟，君卒爵，然後授虛爵。不敢先君盡爵。○疏曰：「飲，卒爵而俟君卒爵，然後授虛爵」者，俟君飲盡，已乃授虛爵與相者也。必在君前先飲者，亦示其賤者先即事。後授虛爵者，示不敢先君盡爵，然此謂朝夕侍者始得賜爵也。若其大禮，則君先飲而臣後飲。此經先再拜稽首而後受，《燕》先受而後再拜，與此不同者，《燕禮》據大飲法，故先受爵而後奠爵再拜，此經據朝夕侍君而得賜爵，故再拜而後受。君子之飲酒也，受一爵而色洒如也。洒，先典反。○洒如，肅敬貌。洒，或爲「察」。二爵而言言斯，言，魚斤反。○言言，和敬貌。斯猶耳也。禮已三爵而油油，油油，說敬貌。以退。禮：飲過三爵則敬殺，可以去矣。○疏曰：臣侍君小飲之禮，唯止三爵，故《春秋傳》曰：「臣侍君燕，

過爵，非禮也。」退則坐取屨，隱辟而後屨，坐左納右，坐右納左。辟，匹亦反。○隱辟，俛逡巡而退著屨也。○疏曰：坐，跪也。初跪說屨堂下爲敬，故退而跪取屨，起而逡巡，隱辟而著之。納，猶著也。若坐左膝，則著右足之屨；若坐右膝，則著左足之屨。○《玉藻》。○若君賜之食，則君祭先飯，徧嘗膳，飲而俟，君命之食，然後食。飯，扶晚反。○君祭先飯，食其祭食，臣先飯，示爲君嘗食也。此謂君與之禮食。膳，謂進庶羞。既嘗庶羞則飲，俟君之徧嘗也，今云沾嘗膳。○沾，音貼，他簋反。若有將食者，則俟君之食然後食。將食，猶進食，謂膳宰也。膳宰進食，則臣不嘗食。《周禮·膳夫》：「授祭，品嘗食，王乃食。」若君賜之爵，則下席再拜稽首，受爵，升席祭，卒爵而俟，君卒爵，然後授虛爵。受爵者於尊所，至於授爵，坐授人耳。必俟君卒爵者，若欲其醕然也。今文曰「若賜之爵」，無「君」也。退坐取屨，隱辟而後屨。君爲之興，則曰：「君無爲興，臣不敢辭。」君若降送之，則不敢顧辭，遂出。爲，于僞反。○謂君

若食之飲之而退也。隱辟，俛而逡巡。興，起也。辭君興而不敢辭其降，於己大崇，不敢當也。大夫則辭，退下，比及門，三辭。比，毗志反。○下，猶降也。○疏曰：「大夫則辭退下」者，對上不敢辭是士，上卑不敢辭降。大夫之內兼三卿五大夫，臣中尊者，故得辭降也。○今按：此出《士相見禮》，與前章《玉藻》所記互有詳略，故並列之，不敢刪去，讀者宜參考之。○《士相見禮》。○凡祭於公者，必自徹其俎。臣不敢煩君使也。大夫以下，或使人歸之。祭於公，助祭於君也。○《曲禮》上。○賜果於君前，其有核者懷其核。核，戶革反。○嫌棄尊者物也。木實曰果。御食於君，君賜餘，器之溉者不寫，其餘皆寫。溉，古愛反。○重汙辱君之器也。溉，謂陶梓之器。不溉，謂萑竹之器也。寫者，傳已器中乃食之也。勸侑曰御。○《曲禮》上。○君賜車馬，乘以拜。賜衣服，服以拜。敬君惠也。賜，君未有命，弗敢即乘、服也。謂卿、大夫受賜於天子者，歸必致於其君，君有命乃乘服之。君賜，稽首，據掌致諸地。致首於地。據掌，以左手覆按右手

也。○疏曰：致，至也，謂頭及手俱至地，左手按於右手之上至地也。酒肉之賜，弗再拜。輕也。受重賜者拜受，又拜於其室也。○疏曰：再，猶重也。但初賜至時再拜，至明日不重往拜。○《玉藻》。○有慶，非君賜不賀。唯君賜爲榮也。○疏曰：有慶，謂或宗族親戚燕飲聚會，雖吉不相賀，唯受君之賜爲榮，故相拜賀。○《玉藻》。○大夫有獻弗親，君有賜不面拜，爲君之答己也。爲，于僞反。○不面拜，於外告小臣，小臣受以人也。小臣掌三公及孤卿之復逆也。○疏曰：「大夫有獻弗親」，謂大夫有物獻君，使人獻之，不親來獻。君有賜不面拜者，謂君有物賜大夫，大夫不面自來拜。所以然者，恐爲君之答己，故不自來，不報而去。○《郊特牲》。○君賜食，必正席先嘗之。君賜腥，必熟而薦之。君賜生，必畜之。食恐或餒餘，故不以薦。正席先嘗，如對君也。言先嘗，則餘當以頒賜矣。腥，生肉。熟而薦之，祖考，榮君賜也。畜之者，仁君之惠，無故不敢殺也。○《鄉黨》。

右侍坐賜食。○傳：晏子聘於楚，楚

王進橘置削，晏子不削而并食之。楚王曰：「橘當去削。」晏子對曰：「臣聞之：賜人主前者，瓜桃不削，橘柚不削。今王無教，臣不敢削，臣非不知也。」《說苑》。

凡爲君使者，已受命，君言不宿於家。使，色吏反，下同。○急君使也。言，謂有故所問也，《聘禮》曰：「君有言，則以束帛，如享禮。」君言至，則主人出拜君言之辱。使者歸，則必拜送于門外。敬君命也。此謂國君問事於其臣。若使人於君所，則必朝服而命之。使者反，則必下堂而受命。此臣有所告請於其君。○《曲禮》上。○凡自稱於君，士、大夫則曰「下臣」。宅者在邦，則曰「市井之臣」；在野，則曰「草茅之臣」。庶人則曰「刺草之臣」，他國之人則曰「外臣」。刺，七亦反。○宅者，謂致仕者去官而居，宅或在國中，或在野，《周禮·載師》之職「以宅田任近郊之地」。刺，猶剗除也。今「宅」或爲「託」。古文「茅」作「苗」。○剗，初限反。

○《士相見禮》。

○疾，君視之，東首，加朝服，拖

紳。首，去聲。拖，徒我反。○東首，以受生氣也。病卧

不能著衣束帶，又不可以褻服見君，故加朝服於身，又引大帶於上也。○《鄉黨》。

○執天子之器則上衡，上

時掌反。○謂高於心，彌敬也。此衡謂與心平。國君則

平衡，大夫則綏之，士則提之。綏，湯果反。

○綏，讀曰妥。妥之，謂下於心。凡執主器，執輕如

不克。重慎之也。主，君也。克，勝也。執主器，操

幣圭璧，則尚左手，行不舉足，車輪曳踵。操，

七刀反。曳，以志反。踵，之勇反。○重慎也。尚左手，尊

左也。車輪，謂行不絕地。立則磬折垂佩。主佩

倚則臣佩垂，主佩垂則臣佩委。折，之列反。

○君臣俛仰之節。倚，謂附於身。小俛則垂，大俛則委於

地。○《曲禮》下。○大夫，士下公門，式路馬。

乘路馬，必朝服，載鞭策，不敢授綏，左必式。

步路馬，必中道，以足蹙路馬芻有誅，齒路馬

有誅。蹙，子六反。芻，初俱反。○皆廣敬也。路馬，君

之馬。載鞭策，不敢執也。齒，欲年也。誅，罰也。○《曲

禮》上。○君車將駕，則僕執策立於馬前。監

駕且為馬行。○疏曰：策，馬杖也。別有人牽馬駕車，而

此僕監駕也。恐馬奔走，故自執馬杖立當馬前也。已

駕，僕展軻，軻，歷丁反。○展軻具視。○疏曰：展，視

也。軻，軻頭軻也。駕竟，僕則從車軻左右四面看視之。

效駕，自己駕。奮衣由右上，取貳綏，上，時掌反。

○奮，振去塵也。貳，副也。○疏曰：綏，登車索也。綏有

二：一是正綏，擬君之升，一是副綏，擬僕右之升。跪

乘，乘，繩證反。○未敢立，敬也。執策分轡，驅之

五步而立。轡，悲位反，又下同。○調試之。○疏曰：

轡，御馬索也。車有轡而四馬駕之，中央兩馬夾轡者名

服馬，兩邊名駢馬，亦曰驂馬，故《詩》曰：兩服上襄，兩驂

鴈行。每一馬有兩轡，四馬八轡，以驂馬內轡繫於軾前，其

驂馬外轡并夾轡兩服馬各二轡，六轡在手，分置兩手，是各

得三轡也。分轡既竟，驅之使行。得五步止，而僕倚立待

君出也。君出就車，則僕并轡授綏。并，必正反。

○車上僕所主。○疏曰：并轡授綏，并六轡及策置一手

中，所餘一空手取正綏授與君，令登車，當右手并轡，左手授綏，轉身向後引君上也。左右攘辟。辟，音避，又扶亦反。○謂群臣陪位侍駕者。攘，卻也，或者，攘「古「讓」字。○疏曰：君已上車，車欲進行，左右侍者還卻以避車，使不妨車行也。車驅而騶，<sup>①</sup>至于大門，君撫僕之手，而顧命車右就車，門閭溝渠必步。騶，仕救反。○車右，勇力之士，備制非常者，君行則陪乘，君式則下。○疏曰：騶，謂從者疾驅從車行也。至大門，車行至外門時也。撫，按止也。君欲駐車，故君抑止僕手。顧，回頭也。「就車」，謂君命勇力之士上車也。車行有三人，君在左，僕在中央，勇士在右。初出門內，未顧勇士，勇士趨在車後。今車行既至大門，恐有非常，故命車右上車。「門閭溝渠必步」，謂車右勇士之禮也。步，謂下車也。門閭下者，以君式故也。溝渠下者，恐傾覆也。○《曲禮》上。○執君之乘車則坐。執，執轡，謂守之也。君不在中坐，示不行也。○《少儀》。○祥車曠左，空神位也。祥車，葬之乘車。乘君之乘車不敢曠左，左必式。乘車之乘，繩證反。○君存惡空其位。○《曲禮》。

○乘貳車則式，佐車則否。貳車、佐車，皆副車也，朝祀之副曰貳，戌獵之副曰佐。魯莊公敗于乾，時公喪戎路，傳乘而歸。○《少儀》。

右恭敬。○傳：衛靈公與夫人夜坐，聞車聲磷磷，至闕而止，過闕復有聲。磷，離珍反。○車聲。公問夫人曰：「知此爲誰？」夫人曰：「此蘧伯玉也。」蘧，求於反。○伯玉，衛大夫，名瑗。公曰：「何以知之？」夫人曰：「妾聞禮：下公門，式路馬，所以廣敬也。路馬，君路車所駕之馬也。夫忠臣與孝子，不爲昭昭信節，不爲冥冥惰行。信，音申。行，下孟反。蘧伯玉，衛之賢大夫也，仁而有智，敬於事上。此其人必不以閭昧廢禮，是以知之。」公使人視之，果伯玉也。《列女傳》。

①「車驅」，原作「驅車」，據寬文本、賀本改。

事君者量而後入，不入而后量。凡乞假於人，爲人從事者亦然，故上無怨而下遠罪也。量，音亮。爲，于僞反。遠，于萬反。〇量，量其事意合成否。爲人臣下者，<sup>①</sup>有諫而無訕，有亡而無疾，訕，所諫反。〇亡，去也。疾，惡也。頌而無譏，諫而無驕，譏，敕檢反。〇頌，謂將順其美也。驕，謂言行謀從恃知而慢。怠則張而相之，相，息亮反。〇怠，惰也。相，助也。廢則掃而更之。更，音庚。〇廢，政教壞亂，不可因也。謂之社稷之役。役，爲也。〇《少儀》。〇責難於君謂之恭，陳善閉邪謂之敬，吾君不能謂之賊。《孟子》。〇進思盡忠，退思補過，將順其美，匡救其惡，故上下能相親。《孝經》。

右諫諍。〇傳：箕子者，紂親戚也。

箕，國。子，爵。紂，商王帝辛。紂始爲象箸，箸，直慮反。箕子歎曰：「彼爲象箸，必爲玉栝；爲玉栝，則必思遠方珍怪之物而御之

矣。輿馬宮室之漸自此始，不可振也。」紂爲淫佚，箕子諫，紂不聽而囚之。人或曰：「可以去矣！」箕子曰：「爲人臣諫不聽而去，是彰君之惡而自說於民，吾不忍爲也。」說，音悅。乃被髮佯狂而爲奴。遂隱而鼓琴以自悲，故傳之曰《箕子操》。王子比干者，亦紂之親戚也。見箕子諫不聽而爲奴，則曰：「君有過而不以死爭，則百姓何辜？」乃直言諫紂。爭，側併反。紂怒曰：「吾聞聖人之心有七竅，信有諸乎？」竅，古弔反。乃遂殺王子比干，剗視其心。剗，音枯。微子曰：「父子有骨肉，而臣主以義屬。」微子，名啟，帝乙之子，紂庶兄。故父有過，子三諫不聽則隨而號之；號，胡刀反。人臣三諫，不聽則其義可以去矣。」於是遂

①「下」字，原脫，據賀本補。

行。孔子曰：「殷有三仁焉。」《史記·微子世家》。○武王伐紂，伯夷、叔齊叩馬而諫，左右欲兵之，伯夷、叔齊，孤竹君之子。兵，謂殺之也。太公曰：「此義人也。」扶而去之。武王已平殷亂，天下宗周，而伯夷、叔齊恥之，義不食周粟，隱於首陽山，采薇而食之，遂餓而死。《史記·伯夷傳》。○齊景公至自田，晏子侍于遄臺，子猶馳而造焉。遄，淳緣反。造，七到反。○子猶，梁丘據。公曰：「唯據與我和夫！」晏子對曰：「據亦同也，焉得爲和？」公曰：「和與同異乎？」對曰：「異。和如羹焉，水、火、醯、醢、鹽、梅以烹魚肉，燀之以薪，夫，音扶。醢，馨兮反。醢，音海。燀，章善反。○燀，炊也。」宰夫和之，齊之以味，濟其不及，以洩其過。齊，才細反。洩，息列反。○濟，益也。洩，減也。君子食之，以平其心，君臣亦然。亦如羹。君所謂可而有否焉，臣獻其

否以成其可。獻君之否，以成君可。君所謂否而有可焉，臣獻其可以去其否。是以政平而不干，民無爭心。故《詩》曰：『亦有和羹，既戒既平。』《詩》頌殷中宗。能與賢者和齊可否，其政如羹，敬戒且平。和羹備五味，異於大羹。醴，無言，時靡有爭。』《禮·子公反。醴，古雅反。○醴，總也。醴，大也。言總大政能使上下皆如和羹。先王之濟五味、濟成也。和五聲也，以平其心，成其政也。聲亦如味，一氣，須氣以動。二體，舞者有文武。三類，《風》、《雅》、《頌》。四物，雜用四方之物。五聲，宮、商、角、徵、羽。六律，黃鐘、太簇、姑洗、蕤賓、夷則、無射也。陽聲爲律，陰聲爲呂，此十二月氣。七音，周武王伐紂，自午及子凡七日。王因此以數合之以聲昭之，故以七同其數，以律和其聲，謂之七音。八風，八方之風。九歌，九功之德皆可歌也。六府，三事謂之九功。以相成也。言此九者合，然後相成爲和樂。清濁、小大、



短長、疾徐、哀樂、剛柔、遲速、高下、出入、周疏，以相濟也。樂，音洛。○周，密也。君子聽之，以平其心。心平德和，故《詩》曰「德音不瑕」。《詩》、《邶風》也。義取心平則德音無瑕。闕。今據不然，君所謂可，據亦曰可，君所謂否，據亦曰否。若以水濟水，誰能食之？若琴瑟之專壹，誰能聽之？同之不可也如是。」昭公二十年《左氏傳》。○史黯曰：「事君者諫過而賞善，諫過，正救其惡。賞善，將順其美。薦可而替否，薦，進也。替，去也。」傳曰：「君所謂可而有否焉，臣獻其否以成其可；君所謂否而有可焉，臣獻其可以去其否。」獻能而進賢，擇才而薦之，朝夕誦善敗而納之。道之以文，行之以順，勤之以力，致之以死。死其難也。聽則進，否則退。」《國語·晉語》。○卻叔虎曰：「翟桓之君，好專利而不忌，翟，音迪。好，呼報反。○忌，難也。其臣競諂以求媚，

其進者壅塞，其臣競諂，故進者則壅塞其上，使不聞過也。其退者距違。其退去者則距違其君也。其上貪以忍，忍，忍為不義也。其下偷以幸，偷，苟且。幸，微幸也。有縱君而無諫臣，縱，放縱也。有冒上而無忠下，冒，抵冒，言貪也。君臣上下，各厭其私，以縱其回。厭，足也。回，邪也。民各有心，無所據依。據，杖也。以是處國，不亦難乎！」《晉語》。

國君死社稷，死其所受於天子也，謂見侵伐也。傳曰：「國滅，君死之，正也。」大夫死衆，士死制。死其所受於君。衆，謂軍師。制，謂軍教令所使為之。○《曲禮》下。

右死節。○傳：宋督將弑殤公，孔父生而存，則殤公不可得而弑也，於是先攻孔父之家。父，音甫，下同。○大夫稱家。父者，字也。禮：臣死，君字之。以君得字之，知先攻孔父之家。殤公知孔父死，已必死，趨而救之，皆死

焉。孔父正色而立於朝，則人莫敢過而致難於其君者，孔父可謂義形於色矣。朝，直遙反。難，乃旦反。○內有其義而外形見於顏色。

○《公羊》桓二年。○宋萬嘗與魯莊公戰，獲

乎莊公。莊公歸，散舍諸宮中，數月然後歸之。歸，反爲大夫於宋，與閔公博，婦人皆在側。萬曰：「甚矣，魯侯之淑，魯侯之美也！天下諸侯宜爲君者，唯魯侯爾。」

閔公矜此婦人，妬其言，顧曰：「此虜也，爾虜焉故，魯侯之美惡乎？」至萬怒，搏閔公，絕其脰。仇牧聞君弑，趨而至，遇之于門，手劍而叱之。萬臂掇仇牧，碎其首，妬，丁故反。惡，音烏。脰，音豆。叱，昌實反。掇，素葛反。○側手曰掇。齒著于門闔。闔，戶臘反。○闔，扇。仇牧可謂不畏強禦矣。《公羊》莊十二年。○晉獻公伐驪戎，獲驪姬以歸，立以爲夫人，生奚齊，其娣生卓子。

公將黜太子申生，里克、丕鄭、荀息相見，里克曰：「其若之何？」荀息曰：「吾聞事君者，竭力以役事，不聞違命。驪，力支反。○竭，盡也。役，爲也。○今按：役，疑當作「從」。君立臣從，何貳之有？」君立嗣，臣則從而奉之。

貳，二心也。丕鄭曰：「吾聞事君者，從其義，不阿其惑。阿，隨也。必立太子。」里克曰：「我不佞，雖不識義，亦不阿惑。」驪姬告優施曰：「君既許我殺太子而立奚齊矣，吾難里克，奈何？」優施曰：「吾來里克，一日而已。」姬使優施飲里克酒，告之曰：「君許驪姬殺太子而立奚齊，謀既成矣。」里克曰：「吾秉君以殺太子，吾不忍。通復故交，吾不敢。中立，其免乎？」優施曰：「免。」里克稱疾不朝。三旬，難乃成。太子雉經于新城之廟，卒立奚齊爲太子，使荀息傅之。公疾，召之曰：「以是藐諸

孤，辱在大夫，其若之何？」稽首而對曰：「臣竭其股肱之力，加之以忠貞。其濟，君之靈也；不濟，則以死繼之。」公曰：「何謂忠貞？」對曰：「公家之利，知無不爲，忠也；送往事居，耦俱無猜，貞也。」難，乃旦反。飲，於鴆反。朝，直遙反。貌，音眇。猜，七孩反。○往，死者。居，生者。耦，兩也。送死事生，兩無疑恨，所謂正也。公卒，里克、丕鄭以三公子之徒作亂，將殺奚齊，先告荀息曰：「三怨將作，三公子之徒。秦、晉輔之，子將何如？」荀息曰：「將死之。」里克曰：「君殺正而立不正，廢長而立幼，如之何？」荀息曰：「吾與先君言矣，不可以貳。能欲復言而愛身乎？雖無益也，將焉辟之？」且人之欲善，誰不如我？我欲無貳，而能謂人已乎？」里克遂殺奚齊於次，荀息將死之，人曰：「不如立卓子而輔之。」荀息立公子

卓，以葬。克又殺卓于朝，荀息死之。荀息可謂不食言矣。長，丁丈反。焉，於虔反。辟，音避。朝，直遙反。○《國語》。○晉懷公命無從亡人，懷公，子圉。亡人，重耳。期期而不至，無赦。狐突之子毛及偃從重耳在秦，弗召。期期，上音其，下音基。重，平聲。○偃，子犯也。懷公執狐突，曰：「子來則免。」對曰：「子之能仕，父教之忠，古之制也。策名委質，貳乃辟也。質，音贄。○名書於所臣之策，屈膝而君事之，則不可以貳。辟，罪也。今臣之子，名在重耳，有年數矣。若又召之，教之貳也。父教子貳，何以事君？刑之不濫，君之明也，臣之願也。淫刑以逞，誰則無罪？臣聞命矣。」乃殺之。《左氏》傳公二十三年。○楚子圍宋，晉使解揚如宋，使無降楚，曰：

①「語」下，賀本有「左傳公羊傳通修」七字。

「晉師悉起，將至矣。」鄭人囚而獻諸楚，楚子厚賂之，使反其言。解，音蟹。降，戶江反。

○反言晉不救。不許，三而許之。登諸樓車，

使呼宋人而告之，樓車，車上望櫓。遂致其君

命。楚子將殺之，使與之言曰：「爾既許

不穀，而反之，何故？非我無信，女則弃

之。速即爾刑。」對曰：「臣聞之：君能制

命爲義，臣能承命爲信，信載義而行之爲

利。謀不失利，以衛社稷，民之主也。義

無二信，女，音汝。○欲爲義者，不行兩信。信無

二命。欲行信者，不受二命。君之賂臣，不知

命也。受命以出，有死無貲，貲，于敏反。○

貲，廢隊也。又可賂乎？臣之許君，以成命

也。成其君命。死而成命，臣之祿也。寡君

有信臣，已不廢命。下臣獲考，考，成也。死又

何求？」楚子舍之以歸。《左氏》宣公十五年。

○衛懿公有臣曰弘演，遠使未還，翟人攻

衛及懿公於滎澤，殺之，盡食其肉，獨捨其

肝。弘演至，報使於肝畢，呼天而啼，盡哀

而止，曰：「臣請爲爆。」因自殺，先出其

腹，內懿公之肝。演，于善反。使，色吏反。爆，通

沃反。內，音納。○爆，表也。納公之肝於其腹中，故

曰「臣請爲爆」也。桓公聞之曰：「衛之亡也，

以爲無道也。今有臣若此，不可不存。」於

是復立衛於楚丘。弘演可謂忠矣，殺身出

生以徇其君，出，去也。去生就死，以徇從其君。

非徒徇其君也。又令衛之宗廟復立，祭祀

不絕，可謂有功矣。《呂氏春秋》。○樂毅破

齊，聞畫邑人王蠋賢，令軍中環畫邑三十

里無人。使人請蠋，蠋謝不往。燕人曰：

「不來，吾且屠畫邑。」蠋曰：「忠臣不事二

君，烈女不更二夫。齊王不用吾諫，故退

而耕於野。國破君亡，吾不能存而又欲劫之以兵。吾與其不義而生，不若死。」遂經其頸於樹枝，自奮絕脰而死。蠅，音蜀。燕，平聲。更，音庚。脰，音豆。○《通鑑》：赧王三十一年。

○齊崔杼弑其君光，晏子立於崔氏之門外，杼直吕反。○聞難而來。其人曰：「死

乎？」曰：「獨吾君也乎哉，吾死也。」言己與衆臣無異。曰：「行乎？」曰：「吾罪也乎哉，吾亡也。」自謂無罪。曰：「歸乎？」曰：

「君死，安歸？」言安可以歸。「君民者，豈以

陵民？社稷是主。臣君者，豈爲其口實？社稷是養。爲，于僞反，下同。養，去聲。○

言君不徒居民上，臣不徒求祿，皆爲社稷。故君爲社稷死，則死之；爲社稷亡，則亡之。謂以

公義死亡。若爲己死，而爲己亡，非其私暱，誰敢任之？暱，女乙反。任，音壬。○私暱，所親

愛也。非所親暱，無爲當其禍。且人有君而弑

之，吾焉得死之？而焉得亡之？焉，於虔

反。○言己非正卿，見待無異於衆臣，故不得死其難也。將庸何歸？將用死亡之義，何所歸趣。門

啟而入，枕尸股而哭，枕，之鳩反。○以公尸枕己股。興，三踊而出。踊，羊寵反。○《左氏》：襄

十五年。

父之讎弗與共戴天，父者，子之天，殺己之天，

與共戴天，非孝子也，行求殺之乃止。兄弟之讎不反

兵，恒執殺之備。交遊之讎不同國。讎不吾辟，則

殺之。交遊，或爲「朋友」。○《曲禮》。○父之讎，辟

諸海外；兄弟之讎，辟諸千里之外；從父兄

弟之讎，不同國。君之讎，眡父，師長之讎，眡

兄弟，主友之讎，眡從父兄弟。辟，音避。從，才用

反。眡，音示。長，丁丈反。○《周禮·調人》。

右復讎。○傳：子夏問於孔子曰：

「居父母之仇，如之何？」夫子曰：「寢苦

枕干，不仕，苦，始占反。枕，之鳩反。○雖除喪，居

處猶若喪也。干，盾也。弗與共天下也。不可以

並生。遇諸市朝，不反兵而鬪。」朝，直遙反。

○言雖適市朝，不釋兵。曰：「請問居昆弟之

仇，如之何？」曰：「仕弗與共國，銜君命

而使，雖遇之不鬪。」銜，音咸。使，色吏反。○爲

負而廢君命。曰：「請問居從父昆弟之仇，如

之何？」曰：「不爲魁。主人能，則執兵而

陪其後。」從，才用反。○魁，猶首也，爲其負當成之。

○《檀弓》。○韓、魏、趙氏殺智伯，分其田。

趙襄子漆智伯之頭以爲飲器，智伯之臣豫

讓欲爲之報仇，乃詐爲刑人，挾匕首入襄

子宮中，塗廁。襄子如廁，心動，索之，獲

豫讓。左右欲殺之，襄子曰：「智伯死無

後，而此人欲爲報仇，真義士也！吾謹避

之耳。」乃舍之。豫讓又漆身爲癩，吞炭爲

啞，行乞於市，其妻不識也。行見其友，其

友識之，爲之泣曰：「以子之才，臣事趙

孟，必得近幸，子乃爲所欲爲，顧不易邪？

何乃自苦如此，求以報仇，不亦愚乎？」豫

讓笑而應之曰：「不可。既已委質爲臣，

而又求殺之，是一心也。且爲先知報後

知，爲故君賊新君，大亂君臣之義，吾弗爲

之矣。凡吾所以爲此者，所以明君臣之

義，雖難不避也。」襄子出，豫讓伏於橋下，

襄子至橋，馬驚，索之，得豫讓，遂殺之。

「爲之」，欲爲之爲，去聲。癩，音賴。易，以豉反。

質，音至。○《史記》、《通鑑》。①○王孫賈事齊閔

王，王出走，賈失王之處，其母曰：「女朝

去而晚來，則吾倚門而望；女莫出不還，

則吾倚閭而望。女，音汝，下同。莫，莫故反。女

今事王，王出走，女不知其處，女尚何

①「鑑」，原作「監」，據元明本、寬文本、賀本改。

歸？」王孫賈乃入市中，曰：「淖齒亂齊國，殺閔王，欲與我誅齒者袒右。」淖，女教反。市人從之者四百人，與誅淖齒，刺而殺之。《通鑑》赧王三十二年。○張良，其先韓

人，大父開地，父平，相韓五世。平卒，良年少，未嘗宦事韓，而秦滅韓。良家僮三百人，弟死不葬，悉以家財求客刺秦王，為韓報仇。嘗學禮淮陽，東見倉海君。得力士，為鐵椎重百二十斤。秦皇帝東游，良與客狙擊秦皇帝博浪沙中，誤中副車。狙，七預反。伺候也。秦皇帝大怒，大索天下，求賊甚急。良乃更名姓，亡匿下邳，為任俠。及陳涉起兵，良亦聚少年百餘人，歸沛公，數以《太公兵法》說沛公，沛公善之。又說項梁立韓公子成為韓王，梁從之，以良為韓申徒。<sup>①</sup>徐廣曰：即司徒耳。因從沛公入關，畫策

滅秦。項羽立沛公為漢王，良乃歸韓。項羽留韓王成，不遣之國而殺之，良遂亡，間行歸漢，復為漢王畫策，破殺項羽垓下。漢王立為皇帝，封良為留侯。留侯乃稱曰：

「家世相韓，及韓滅，不愛萬金之資，為韓報仇彊秦，天下振動。今以三寸舌為帝者師，封萬戶，位列侯，此布衣之極，於良足矣。願棄人間事，欲從赤松子游耳。」乃學辟穀，道引輕身。徐廣曰：云乃學道引，欲輕舉也。高帝

崩，呂后強食之，後八年卒。楊時曰：張良破秦滅楚，始終為韓報仇耳，非欲為漢用也。<sup>②</sup>《史記》

### 儀禮經傳通解卷第十二終

①「徒」下，原重「徒」字，據元明本、寬文本、賀本刪。

②「楊時曰」至「為漢用也」二十二字，原作大字，據賀本改為小字注文。

## 儀禮經傳通解卷第十三

### 鐘律第二十二

#### 學禮六之上

此篇凡數皆準令式借用大字。

黃帝使泠綸自大夏之西、昆侖之陰，泠，音零。綸，音倫。侖，盧昆反。○應劭曰：大夏，西戎之國也。取竹於嶰溪之谷，以生而空竅厚薄均者，斷兩節閒而吹之，以爲黃鐘之宮。嶰，胡買反。斷，音短。○孟康曰：嶰溪，昆侖之北谷名也。晉灼曰：取谷中之竹，生而肉孔外內厚薄自然均者，截以爲笛，不復加削刮也。師古曰：黃鐘之宮，律之最長者。○今按：黃鐘之管，長九寸，圍九分，徑三分四釐六毫。制拾

貳笛以聽鳳皇之鳴，其雄鳴爲陸，雌鳴亦陸，以比黃鐘之宮，而皆可以生之，故曰黃鐘，律

呂之本。笛，大東反。比，頻寐反。○師古曰：比，合也。可以生之，謂上下相生也。拾壹管皆生於黃鐘之宮，故曰律呂之本。其雄鳴者爲陸律，曰黃鐘、太簇、姑洗、蕤賓、夷則、無射；其雌鳴者爲陸呂，曰大呂、夾鐘、中呂、林鐘、南呂、應鐘。於是文之以伍聲，曰宮、商、角、徵、羽，播之以捌音，曰金、石、土、革、絲、木、匏、竹，而大樂和矣。簇，七豆反。洗，先典反。蕤，如隹反。射，音亦。應，去聲。徵，展理反。匏，步交反。○陸呂，《周禮》作「陸同」，《國語》作「陸閒」。鄭康成曰：此拾貳者，以銅爲管，轉而相生。黃鐘爲首，其長玖寸，各因而參分之，上生者益壹分，下生者去壹焉。《國語》曰：「律所以立均出度也。古之神瞽考中聲而量之以制，度律均鐘。」言以中聲定律，以律立鐘之均。「文之」者，以調伍聲，使之相次如錦繡之有文章。播，猶揚也，揚之以捌音，乃可得而觀之矣。金，鐘鎛也。石，磬也。土，埙也。革，鼓鼗也。絲，琴瑟也。木，柷敔也。匏，笙也。竹，管簫也。以之候氣，則埋之密室，上與地平，實以葭灰，覆以緹



素，以候拾有貳月之中氣。冬至氣至，則黃鐘之管飛灰衝素。大寒以下，各以其月隨而應焉，而時序正矣。以之審度，則以子穀秬黍中者玖拾度黃鐘之長，而以壹黍之廣爲壹分，拾分爲寸，拾寸爲尺，拾尺爲丈，拾丈爲引，而伍度審矣。葭，居牙反。緹，他弟反。應，去聲。秬，白許反，下同。度，徒洛反。○師古曰：子穀猶言穀子，秬即黑黍也。中者，不大不小也。言取黑黍穀子大小中者，率爲分寸也。以之嘉量，則以子穀秬黍中者阡有貳伯實其龠，以井水準其概。合龠爲合，拾合爲升，拾升爲斗，拾斗爲斛，而伍量嘉矣。量，音亮。龠，弋灼反。概，工代反。合，音閑。○孟康曰：概欲其直，故以水平之。井水清，清則平也。師古曰：概，所以概平斗斛之上者也。嘉，善也。以之謹權衡，則以黃鐘壹龠阡貳伯黍之重爲拾貳銖，兩之得貳拾肆銖而爲兩，拾陸兩爲斤，叁拾斤爲鈞，肆鈞爲石，而伍權謹矣。銖，音殊。

《舜典》曰：「協時月正日，同律度量衡。」此之謂也。以上用《周禮》、《呂覽》、《漢志》、《隋志》通修。



右拾貳律陰陽辰位相生次第之圖。  
○傳：後漢鄭康成曰：陽管爲律，陰管爲呂。布拾貳辰，子爲黃鐘，管圓玖分而長

玖寸。同位娶妻，隔捌生子。下生者叁分去壹，上生者叁分益壹。黃鐘，乾之初玖也，隔捌而下生林鐘，坤之初陸。林鐘又隔捌而上生太簇之玖貳，太簇又下生南呂之陸貳，南呂又上生姑洗之玖叁，姑洗又下生應鐘之陸叁，應鐘又上生蕤賓之玖肆，蕤賓又上生大呂之陸肆，大呂又下生夷則之玖伍，夷則又上生夾鐘之陸伍，夾鐘又下生無射之上玖，無射又上生中呂之上陸。伍下陸上，乃壹終矣。○前漢司馬遷生鐘術曰：「以下生者，倍其實，叁其法。如：黃鐘玖寸，倍之則爲拾捌，叁其法則拾捌爲叁陸，故下生林鐘長陸寸。以上生者，肆其實，叁其法。如：林鐘陸寸，肆之則爲貳拾肆，叁其法則貳拾肆爲叁捌，故上生太簇長捌寸。上玖，商捌，羽柒，角陸，宮伍，徵玖。此拾貳字恐轉寫之誤，當作「宮玖，徵陸，商捌，羽伍，角柒」拾字。置壹而玖叁之

以爲法，實如法，得長壹寸。凡得玖寸，命曰「黃鐘之宮」。置子之壹而玖叁之至西，則得壹萬玖仟陸伯捌拾叁算，爲子之寸法矣。置子之實拾柒萬柒仟壹伯肆拾柒算，而以寸法約之，則壹萬玖仟陸伯捌拾叁算，爲壹寸而通其實之，全數得玖寸矣。故曰：音始於宮，窮於角；數始於壹，終於拾，成於叁；氣始於冬至，周而復生。」此諸儒無異說，其論之不同者，今譜如左，覽者可以考其得失焉。

大呂	黃鐘	
捌寸貳 伯肆拾 參分壹 肆。	玖寸。	鄭說十分 正寸
丑：參分 貳。以參 乘子數得 參爲子之 絲法，又參 分子數而 去壹，得貳 爲林鐘，林 鐘未律丑 之衝也。 凡陰律放 此，凡壹拾 壹萬捌仟 〇〇玖拾 捌算。	子：壹分。 黃鐘全律 之數，凡拾 柒萬柒仟 壹伯肆拾 柒算。	《史記》生 鐘分因正 寸展新分。 《史記》律 數計新分 借舊寸。
柒寸伍 分參分 壹。壹當 作「貳」。	捌寸柒分 壹。柒當 作「拾」。	今依生鐘 法約定分 釐毫絲忽， 皆以拾爲 玖而止。
捌寸參 分柒釐 陸毫。	玖寸。	

夾鐘	太簇	
柒寸貳 伯壹拾 捌分伍 仟。	捌寸。	寅：玖分 捌。以參 乘參得玖， 爲子之寸 數，又參分 貳而益壹， 得捌爲太 簇。凡壹 拾伍萬柒 仟肆伯陸 拾肆算。
卯：貳拾 柒分拾 柒。以參 乘寅上數 得貳拾柒， 爲子之毫 法，又參分 寅下數而 去壹，得此 下數爲南 呂，凡壹拾 萬。〇肆 仟玖伯柒 拾陸算。	陸寸壹 分參分 壹。壹當 作「柒」。	柒寸柒 分貳。柒 當作「拾」。
柒寸肆 分參釐 柒毫參 絲。		捌寸。

①「簇」下，賀本有「凡陽律放此」五字。

姑洗	中呂
柒寸之玖	陸寸萬
壹分	玖拾陸
拾肆。以	伯捌拾
參乘卯上	參分
數得此上	萬貳寸
數爲子之	之萬貳
分數，又參	拾肆。伯
分卯下數	柒拾肆。
而益壹，得	
此下數，而	
爲姑洗，凡	
壹拾參萬	
玖拾玖伯	
陸拾捌算。	
辰：捌拾	已：貳伯
壹分陸	肆拾參
拾肆。以	分壹伯
參乘卯上	貳拾捌。
數得此上	以參乘辰上
數爲子之	數得此上
分數，又參	數，爲子之
分卯下數	釐法，又參
而益壹，得	分辰下數而
此下數，而	去壹，得此
爲姑洗，凡	下數爲應
壹拾參萬	鐘，凡玖萬
玖拾玖伯	參玖參伯
陸拾捌算。	拾貳算。
陸寸柒	伍分玖
柒分。柒，	分參
當作「拾」。	貳。
柒寸	陸分陸
壹分。	參毫肆
	絲參分
	絲之貳。

蕤賓	林鐘
陸寸捌	陸寸。
拾壹分	
貳分	
拾陸。	
午：柒伯	未：貳仟壹
貳拾玖分	伯捌拾柒
伍伯壹拾	分壹仟貳
貳。以參乘	拾肆。以參
已上數得此	乘午上數得
上數，爲子之	此上數，爲子
釐數，又參分	之分法，又參
已下數而益	益壹，得此
壹，得此下數	下數爲大呂，
爲蕤賓，凡壹	凡壹拾陸萬
拾貳萬肆仟肆	伍仟捌伯捌
伯壹拾陸算。	拾捌算。
伍寸陸	伍寸柒
分參分	分肆。柒，
壹。壹，當	當作「拾」。
陸寸貳	陸寸。
分捌釐。	

① 「益」，原作「去」，據賀本改。

夷則	南呂
伍寸柒 伯貳拾 玖分寸 之肆伯 伍拾壹	伍寸叁 分寸之 壹
申陸仟 伍伯陸 壹分肆 玖拾陸 陸。以 參乘上 得此上 子之毫 而分未 此下數 則凡壹 萬○伍 玖拾貳	西壹萬 捌仟陸 捌拾叁 玖拾貳 以參乘 得此上 子之寸 而分申 此下數 鐘凡壹 萬柒仟 伍拾陸
伍分肆 叁分肆 貳分 「肆」 字衍。	肆分柒 捌。拾 當作「拾」。
伍分伍 寸毫 壹釐	伍分叁

無射	應鐘
肆寸陸 仟伍伯 陸分壹 陸分伍 伯貳拾	肆寸貳 柒分貳 拾寸之 拾
戌伍萬 玖仟玖 仟肆拾 玖分萬 貳仟柒 拾伯陸 拾捌。以 參乘上 得此上 子之毫 而分西 此下數 數而參 數去分 凡玖萬 伯○肆 玖拾貳	亥拾柒萬 柒仟壹 肆拾柒 陸伍仟 伍伯叁 陸。以參 上數得 爲子之 分戌下 壹得此 爲中呂 參萬壹 柒拾貳
肆分肆 叁分肆 貳分	肆分貳 叁分貳
肆分捌 釐捌 絲。毫	肆分陸 釐

- ①「去」，原作「益」，據智本改。  
②「益」，原作「去」，據智本改。  
③「去」，原作「益」，據智本改。  
④「益」，原作「去」，據智本改。

# 右拾貳律寸分釐毫絲數。今按：鄭氏與

太史公說不同，太史二說又自爲異，而今皆取之，且以鄭先於馬者。鄭氏之言，分寸審度之正法也。太史之言，欲其便於損益而爲假設之權制也。蓋律管之長，以玖爲本，上下相生，以叁爲法。而鄭氏所用正法，破壹寸以爲拾分，而其下破分爲釐，破釐爲毫，破毫爲絲，破絲爲忽，皆必以拾爲數，則其數中損益之際皆有餘分，雖有巧歷，終不能盡。是以自分而下遂不可析，而直以玖相乘，歷拾貳管。至破壹寸，以爲壹萬玖仟餘分而後略可得而記焉。然亦苦於難記而易差，終不若太史公之法爲得其要而易考也。蓋其以子爲壹，而拾壹叁之以至於亥，則得拾柒萬柒仟壹佰肆拾柒算，而子爲全律之數亥爲全律之實可知矣。以寅爲子之寸數，而酉爲寸法，則其律有九寸可知矣。以辰爲子之分數，而未爲分法，則其寸有九分可知矣。以午爲子之釐數，而已爲釐法，則其分有玖釐可知矣。以申爲子之毫數，而卯爲毫法，則其釐有玖毫可知矣。以戌爲絲數，而且爲絲法，則毫有玖絲可知矣。下而爲忽，亦因絲而玖之。雖出權宜，而不害其得乎自然之數。以之損益，則叁分之數整齊簡直易記而不差也。其曰黃鐘捌寸拾分壹者，亦放此意。但以正法之數合其權

法之分，故不同耳，其實則不異也。○《史記律數「拾」誤作「柒」者伍，皆用本字而誤屈其下垂之筆，本司馬貞、沈括之說。其大、夾、蕤、夷四律誤字，①則今以算得之。

宮	土	君	最下
商	金	臣	次下
角	木	民	高下、清濁之間
徵	火	事	次高
羽	水	物	最高
			最清

## 右伍聲伍行之象、清濁高下之次。○

傳：《樂記》：「宮爲君，商爲臣，角爲民，徵爲事，羽爲物，伍者不亂，則無怙慝之音矣。宮亂則荒，其君驕；商亂則陂，其官壞；角亂則憂，其民怨；徵亂則哀，其事勤；羽亂則危，其財匱。伍者皆亂，迭相陵，謂之慢。如此，則國之滅亡無日矣。」凡聲濁者爲尊，清者爲卑。怙慝，敝敗不利貌。

①「四」，原作「三」，據賀本改。

宮	徵	商	羽	角
捌拾壹	伍拾肆	柒拾貳	肆拾捌	陸拾肆
下生徵	上生商	下生羽	上生角	下生變宮

右伍聲相生損益先後之次。○《史

記》聲數曰：「玖玖捌拾壹以爲宮；叁分去壹，伍拾肆以爲徵；叁分益壹，柒拾貳以爲商；叁分去壹，肆拾捌以爲羽；叁分益壹，陸拾肆以爲角。」○唐杜佑《通典》曰：「宮生徵，叁分宮數捌拾壹分，各貳拾柒，下生去壹，去貳拾柒，餘伍拾肆以爲徵，故徵數伍拾肆也。徵生商，叁分徵數伍拾肆分，各拾捌，上生者加壹，加拾捌於伍拾肆，得柒拾貳以爲商，故商數柒拾貳也。商生羽，叁分商數柒拾貳分，各貳拾肆，下生者去壹，去貳拾肆，餘肆拾捌以爲羽，故羽數肆拾捌也。羽生角，叁分羽數肆拾捌分，各拾陸，上生者益壹，加拾陸于肆拾捌，得陸拾肆以爲角，故角數陸拾肆也。此伍聲

大小之次也。是黃鐘爲均，用伍聲之法。以下拾壹辰，辰各有伍聲，其爲宮商之法亦如之。故辰各有伍聲，合爲陸拾聲，是拾貳律之正聲也。」沈括疑《史記》此說止是黃鐘壹均之數，非衆律之通法。今詳《通典》云拾壹辰宮商之法亦如之。蓋若以拾壹律爲宮，亦用此數以乘本律之分數而損益之。如林鐘爲均，則以捌拾壹爲伍拾肆、貳拾柒爲拾捌之類也。

變宮說見下條。

變宮	變徵
肆拾貳。 <small>餘玖分分之陸。</small>	伍拾陸。 <small>餘玖分分之捌。</small>
<small>羽後宮前。</small>	<small>角後徵前。</small>
上生變徵。	

右貳變相生之法。○《國語》：「周

① 「史」上，賀本有「傳」字。「聲數」，《史記·律書》作「律數」，下沈括亦云「衆律之通法」。

② 「國」上，賀本有「傳」字。

景王問於伶州鳩曰：「柒律者何？」韋昭注曰：「周有柒音，黃鐘爲宮，大簇爲商，姑洗爲角，林鐘爲徵，南呂爲羽，應鐘爲變宮，蕤賓爲變徵。」《後漢志》說與此同，此說蓋以黃鐘爲法，餘律準此。○《淮南子》曰：「姑洗生應鐘，比於正音，故爲和；應鐘生蕤賓，不比於正音，故爲繆。」今按：伍聲相生，至于角位，則其數陸拾有肆，隔捌下生當得宮，前壹位以爲變宮，然其數叁分損壹，每分各得貳拾有壹，尚餘壹分不可損益，故伍聲之正至此而窮。若欲生之，則須更以所餘壹分析而爲玖，損其叁分之壹分，乃得肆拾貳分餘玖分分之陸，而後得成變宮之數。又白變宮隔捌上生當得徵，前壹位，其數伍拾有陸餘玖分分之捌以爲變徵，正合相生之法。自此又當下生，則又餘貳分不可損益，而其數又窮，故立均之法至於是而終焉。然而貳變但爲和、繆，已不得爲正聲矣。

太簇	大呂	黃鐘	
捌寸。	捌寸叁分柒釐陸毫。	玖寸。	正
肆寸。	叁分捌釐叁毫。	無。	半
柒寸捌分 ○○貳毫 肆絲肆忽 柒初。不用。		捌寸柒分 捌釐壹毫 陸絲貳忽。 不用。	變
叁寸捌分 肆釐伍毫 陸絲陸忽 捌初。		肆寸叁分 捌釐伍毫 叁絲壹忽。	變半



夾鐘						姑洗						中呂					
柒寸肆	分叁釐	柒毫叁	絲。	柒寸壹	分。	叁寸伍	叁寸伍	柒寸壹	分。	陸寸伍	分捌釐	叁毫肆	陸忽。	叁分忽	之貳。❶		
叁寸陸	分陸釐	叁毫陸	絲。	叁寸伍	分。	叁寸貳	叁寸貳	柒寸〇〇	叁寸肆分	柒寸〇〇	伍釐壹毫	陸毫貳	絲叁忽。				
								壹釐貳毫	伍釐壹毫	貳絲〇〇	壹絲〇〇						
								貳初貳抄。	壹初壹抄。	貳初貳抄。	壹初壹抄。						

蕤賓						林鐘						夷則					
陸寸貳	分捌釐。	叁寸壹		陸寸。		叁寸。	叁寸。	伍寸捌分	貳寸捌分	貳釐肆毫	伍釐陸毫	伍寸伍	貳寸柒	分伍釐	壹毫。		
	分肆釐。			叁寸。不	用。			伍寸捌分	貳寸捌分	貳釐肆毫	伍釐陸毫	伍寸伍	貳寸柒	分貳釐	伍毫。		
								叁初。	陸初。	壹絲壹忽	伍絲〇〇						

❶ 「叁分忽之貳」五字，原脫，據賀本補。

[illegible]

右拾貳律正變倍半之法。○傳：《通典》曰：以子聲比正聲，則正聲爲倍；以正聲比子聲，則子聲爲半。如黃鐘之管，正聲玖寸，子聲則肆寸半也。拾貳正律各有一定之聲，而旋相爲宮，則伍聲初無定位，當高者或下，當下者或高，則宮、商失序而聲不諧和，故取其半律以爲子聲。當上生而所生者短，則下取此聲以爲用。然以叁分損益之法計之，則亦適合下生之數。而自此律又以其正律下生，則復得其本法，而于半律又合上生之數。此唯杜氏言之，而它書不及也。黃鐘當以肆寸半爲半律，而圖以爲無者，以玖分之寸析至初抄，終無可紀之數也。林、南、應不用者，相生之不及也。此又杜氏所未言，故詳著之。又上下相生之法者，以仲呂之管長陸寸壹萬玖仟陸伯捌拾叁分寸之萬貳仟玖伯柒拾肆，上生黃鐘，叁分益壹，不及正律玖寸之數，但得捌寸伍萬玖仟○○肆拾玖分寸之伍萬壹仟捌伯玖拾陸，以爲黃鐘之變律，半之得肆寸伍萬玖仟○○肆拾玖

分寸之貳萬伍仟玖伯肆拾捌，以爲黃鐘變律之子聲。此依本文稍加詳潤，其不及「至」數但「玖字，「以爲」至「之變律」柒字，「變律之子聲」伍字，皆今所增入。本數猶用拾分之寸計之，尚爲繁冗，今以玖分之寸更定，見於圖內，而於此存其本文。又上下相生，以至仲呂，皆以相生所得之律寸數半之，以爲子聲之律。今按：蕤賓以下，仲呂上生之所不及，故無變律，而唯黃、太、姑、林、南、應有之。計正變通拾捌律，各有半聲，爲叁拾陸聲，其間又有捌聲，雖有而無所用，實計貳拾捌聲而已。杜氏又言變律上下相生，以至仲呂，則是又當增拾貳聲，而合爲肆拾捌聲，似太過而無所用也。今雅樂、俗樂皆有四清聲，其原蓋出於此。然既欠捌聲，且無變律，則其法又太疎略，而用有不周矣，覽者詳之。○《漢志》曰：「黃鐘不復與它律爲役者，黃鐘至尊，無與並也。」此言黃鐘唯於本宮用正律，若它律爲宮，則黃鐘之爲商、角、徵、羽三變者，皆但用其變律，而正律不復與之爲役也。此與《通典》變律之說相發明，而本《志》所言有未盡者，

故剟其大要附於此云。

第十一宮	第十宮	第九宮	第八宮	第七宮	第六宮	第五宮	第四宮	第三宮	第二宮	第一宮	宮生
中正	夾正	夷正	大正	蕤正	應正	姑正	南正	太正	林正	黃正	徵生上
黃半變	無正	夾半正	夷正	大半正	蕤半正	應正	姑半正	南正	太半正	林正	商生下
林變	中半正	無正	夾正	夷正	大半正	蕤正	應正	姑正	南正	太正	羽生上
太半變	林半變	黃半變	無正	夾半正	夷半正	大半正	蕤半正	應正	姑半正	南正	角生下
南變	太半變	林變	中半正	無正	夾半正	夷正	大半正	蕤正	應正	姑正	變宮生上
姑半變	南半變	太半變	林半變	黃半變	中半正	無半正	夾半正	夷半正	蕤半正	應正	變徵
應變	姑半變	南變	太半變	林變	黃半變	中半正	無正	夷正	大半正	蕤正	

右旋宮捌拾肆聲之圖。○傳：《禮

運》曰：「伍聲、陸律、拾貳管，還相爲宮。」

孔氏《正義》曰：拾貳辰「各自爲宮」，壹宮「各有伍聲拾貳管相生之次，至中呂而匝」，「凡陸拾聲」。○今按：孔氏以本文但云伍聲拾貳管，故不及貳變而止爲陸拾聲。今增入貳變貳拾肆聲，合爲捌拾肆聲。自唐以來，法皆如此云。

爲宮，爲商，爲角，爲徵，爲羽。拾貳管

自本律之外，爲它律之肆聲者，合其律爲調。

黃於本律，於無，於夷，於中，於夾。以上

黃宮伍調各用本均柒聲，而以黃鐘起調，黃鐘畢曲，餘律放此。

大	本律	應	南	蕤	姑
太	本律	黃	無	林	中
夾	本律	大	應	夷	蕤
姑	本律	太	黃	南	林
中	本律	夾	大	無	夷

應	無	南	夷	林	蕤
本律	本律	本律	本律	本律	本律
南	夷	林	蕤	中	姑
林	蕤	中	姑	夾	太
姑	夾	太	大	黃	應
太	大	黃	應	無	南

右陸拾調之圖。陸拾調即前旋宮圖內陸拾聲

也。其貳變貳拾肆聲非伍聲之正，不可爲調，故止于陸拾也。

鐘律義第二十三

學禮六之下

《管子》曰：「凡聽徵，如負豬豕覺而駭。凡聽羽，如鳴馬在樹。馬，疑當作「鳥」。凡聽宮，如牛鳴窳中。窳，居效反。凡聽商，如離群羊。凡聽角，如雉登木以鳴，音疾以清。」以鳴下六字疑衍。凡將起五音：凡首，謂音之總先

也。先主一而三之四開，以合九九，一而三之，即四也。以是四開合于五音，九也，又九之，爲八十一也。以是生黃鐘小素之首以成宮，素本宮八十一數生黃鐘之宮，爲五音之本。三分而益之以一，爲百有八，爲徵；本八十一，益以三分之一，二十七，通前百有八，是爲徵數。○今按：百有八半之則爲五十四。有三分而去其乘，適足以是生商，乘亦三分之一也。三分百八而去一，餘七十二，是商之數也。有三分而復於其所，以是成羽，三分七十二而益其一分二十四，合爲九十六，是羽之數也。○今按：九十六半之則爲四十八。有三分而去其乘，適足以是成角。三分九十六去其一分，餘六十四，是角之數。○太史公曰：「音樂者，所以動盪血脈，通流精神，而和正心也。故宮動脾而和正聖，商動肺而和正義，角動肝而和正仁，徵動心而和正禮，羽動腎而和正智。故聞宮音，使人溫舒而廣大；聞商音，使人方正而好義；聞角

音，使人惻隱而愛人；聞徵音，使人樂善而好施；聞羽音，使人整齊而好禮。」○《漢志》曰：「商之爲言章也，物成孰，可章度也。師古曰：度，音大各反。角，觸也，物觸地而出戴芒角也。宮，中也，居中央，暢四方，唱始施生，爲四聲綱也。徵，祉也，物盛大而緜祉也。羽，宇也，物聚臧，宇覆之也。夫聲者，中於宮，觸於角，祉於徵，章於商，宇於羽，故四聲爲宮紀也。協之五行，則角爲木，五常爲仁，五事爲貌；商爲金，爲義，爲言；徵爲火，爲禮，爲視；羽爲水，爲智，爲聽；宮爲土，爲信，爲思。以君、臣、民、事、物言之，則宮爲君，商爲臣，角爲民，徵爲事，羽爲物。唱和有象，故言君臣位事之體也。五聲之本，生於黃鐘之律。九寸爲宮，或損或益，以定商、角、徵、羽。九六相生，陰陽之應也。」

## 右明伍聲之義。

伶州鳩曰：「律所以立均出度也，韋昭

曰：律，謂六律、六呂也。陽爲律，陰爲呂。六律：黃鐘、太簇、姑洗、蕤賓、夷則、無射也。六呂：林鐘、中呂、夾鐘、大呂、應鐘、南呂也。均者，均鐘木，長七尺，有絃繫之，以均鐘者。度，謂鐘之大小清濁也。漢大子樂官有之。古之

神瞽考中聲而量之以制，神瞽，古樂正，知天道者也，死以爲樂祖，祭於瞽宗，謂之神瞽。考，合也，謂合中和之聲而量度之，以制樂也。度律均鐘，百官軌儀。

均，平也。軌，道也。儀，法也。度律，度律呂之長短，以平其鐘，和其聲，以立百事之道法也，故曰律、度、量、衡於是乎生。紀之以一，二，三，天、地、人。占者紀聲合樂以舞天

神、地祇、人鬼，故能神人以和。○今按：此疑謂三分損益之法。平之以六，平之以六律也，上章曰律以平聲。

成於十二，十二律呂也。陰陽相扶，律取妻而呂生子，上下相生之數備也。天之道也。天之數不過十二。

夫六，中之色也，故名之曰黃鐘，十一月，黃鐘，乾初九也。六者，天地之中。天有六氣，降生五味，天有六

甲，地有五子，十一而天地畢矣。而六爲中，故六律、六呂而成天道。黃鐘初九，六律之首，故以六律正色爲黃鐘之名，重元正始之義也。黃鐘，陽之變也，管長九寸，徑三分，圍九分，律長九寸，因而九之，九九八十一，故黃鐘之數立焉，爲宮。法云：九寸之一，得林鐘初六，六呂之首，陰之變，管長六寸，六月之律，坤之始也。故九六、陰陽、夫婦、子母之道。是以初九爲黃鐘。黃，中之色也。鐘之言陽氣鍾聚于下也。○今按：「六」字之義，注雖粗通，然似亦太牽合矣。下章《漢志》正作「黃」字，而其它說亦多出此，疑此「六」字本是「黃」字。劉歆時尚未誤，至韋昭作注時乃滅其上之半而爲「六」耳。又「法云九寸之一」，亦疑有誤，當是去其三分之一。所以宣養六氣、九德也。宣，徧

也。六氣：陰、陽、風、雨、晦、明也。九德，九功之德：水、火、金、木、土、穀、正德、利用、厚生。十一月陽伏於下，物始萌，於五聲爲宮，含元處中，所以徧養六氣、九德之本也。由是第之，由，從也。第，次也，次其月也。一曰太簇，正月，太簇，乾九二也。管長八寸。法云：九分之八。太簇，言陽氣太簇達於上。所以金奏贊陽出滯也。贊，佐也。賈、唐云：太簇正聲爲商，故爲金奏，所以佐陽

發，出滯伏也。《明堂月令》：「正月，蟄蟲始震。」三曰姑洗，所以修潔百物，考神納賓也。三月，姑洗，乾九三也。管長七寸壹分，律長七寸九分寸之壹。姑，潔也。洗，濯也。考，合也。言陽氣養生，洗濯枯穢，改柯易葉也。於正聲爲角。是月，百物修潔，故用之宗廟，合致神人，用之享宴，可以納賓也。四曰蕤賓，所以安靖神人，獻酬交酢也。五月，蕤賓，乾九四也。管長六寸三分，律長六寸八十一分寸之二十六。蕤，委蕤，柔貌也。言陰氣爲主，委蕤於下，陽氣盛長於上，有似於賓主，故可用之宗廟，賓客，以安靖神人，行酬酢也。酬，勸；酢，報也。五曰夷則，所以詠歌九則，平民無貳也。七月，夷則，乾九五也。管長五寸六分，律長五寸七十一分寸之四百五十一。夷，平也。則，法也。言萬物既成，可法則也，故可以詠歌九功之則，成民之志，使無疑貳也。六曰無射，所以宣布哲人之令德，示民軌儀也。九月，無射，乾上九也。管長四寸九分，律長四寸六千五百六十一分寸之六千五百二十四。宣，徧也。軌，道也。儀，法也。九月，陽氣上升，陰氣收藏，萬物無射見者，

故可以徧布前哲之令德，示民道法也。爲之六間，以揚沈伏，而黜散越也。六間，六呂在陽律之間。沈，滯也。黜，去也。越，揚也。呂，陰律，所以偁間陽律，成其功，發揚滯伏之氣，而去散越者也。伏則不宣，散則不和，陰陽序次，風雨時至，所以生物者也。元間大呂，助宣物也。十二月，大呂，坤六四也。管長八寸八分。法云：三分之一，四寸二百四十三分寸之五十二，倍之爲八寸分寸之一百四。下生律，元一也。陰繫於陽，以黃鐘爲主，故曰元間。以陽爲首，不名其初，臣歸功於上之義也。大呂助陽宣散物也。天氣始於黃鐘，萌而赤，地受之於大呂，牙而白，成黃鐘之功也。二間夾鐘，出四隙之細也。二月，夾鐘，坤六五也。管長七寸四分，律長三寸二千一百八十七分寸之一千六百三十一，倍之爲七寸分寸之一千七十五。隙，間也。夾鐘助陽。鍾，聚。曲，細也。四隙，四時之間氣微細者，春爲陽中，萬物始生，四時之氣皆始於春。春發而出之，三時奉而成之，故夾鐘出四時之微氣也。三間中呂，宣中氣也。四月，中呂，坤上六也。管長六寸六分，律長三寸萬九千六百八十三分寸之六

千四百八十七，倍之爲六寸分寸之萬二千九百七十四。陽氣起於中，至四月宣散于外，純乾用事，陰閉藏于內，所以助陽成功也，故曰正月正陽之月也。四閒林鐘，和展

百事，俾莫不任肅純恪也。六月，林鐘，坤初六也。

管長六寸，律長六寸。林，衆盛也。鍾，聚也。于正聲爲徵。展，審也。俾，使也。肅，速也。純，大也。恪，敬也。

言時務和審，百事無有僞詐，使莫不任其職事，速其功，大敬其職事也。五閒南呂，贊陽秀也。八月，南呂，坤

六二也。管長五寸三分，律長五寸二分寸之一。榮而不實曰秀。<sup>①</sup>南，任也。陰任陽事，助成萬物。贊，佐也。六

閒應鐘，均利器用，俾應復也。十月，應鐘，坤六

三也。管長四寸七分，律長四寸二十七分寸之二十。言陰

應陽用事，萬物鍾聚，百嘉具備，時務均利，百官器用，程度庶品使皆應其禮，復其常也。《月令》：孟冬，「命工師效

功，陳祭器，按程度，毋作淫巧以蕩上心，必功致爲上也。」

律呂不易，無姦物也。」律呂不變易其正，各順其時，

則神無姦行，物無害生也。○《周語》。○《漢志》曰：

「律十有二，陽六爲律，陰六爲呂。律以統氣

類物，呂以旅陽宣氣。黃鐘：黃者，中之色，

君之服也；鐘者，種也。天之中數五，韋昭

曰：壹參在上，柒玖在下。五爲聲，聲上宮，五聲

莫大焉；地之中數六，韋昭曰：貳肆在上，捌拾在

下。六爲律，律有形有色，色上黃，五色莫盛

焉。故陽氣施種於黃泉，孳萌萬物，師古曰：

孳，讀與滋同。滋，益也。萌，始生。爲六氣元也。

以黃色名元氣律者，著宮聲也。宮以九唱

六，孟康曰：黃鐘陽九，林鐘陰六，言陽唱陰和。變動

不居，周流六虛，始於子，在十一月。大呂：

呂，旅也，言陰大，旅助黃鐘宣氣而牙物也。

位於丑，在十二月。太族：族，奏也，言陽氣

大，奏地而達物也。師古曰：奏，進也。位於寅，

在正月。夾鐘：言陰夾助太族宣四方之氣

而出種物也。位於卯，在二月。姑洗：洗，

① 榮而不，原作「不榮而」，據賀本改。



絜也，言陽氣洗物辜絜之也，孟康曰：辜，必也，必使之絜也。位於辰，在三月。中呂：言微陰始起未成，著於其中，旅助姑洗宣氣齊物也。位於巳，在四月。蕤賓：蕤，繼也；賓，導也。言陽始導陰氣使繼養物也。位於午，在五月。林鐘：林，君也，言陰氣受任，助蕤賓君主種物使長大林盛也。師古曰：種物，種生之物。楸，占，茂「字也。種，音之勇反。位於未，在六月。夷則：則，法也，言陽氣正法度而使陰氣夷當傷之物也。師古曰：夷亦傷。位於申，在七月。南呂：南，任也，言陰氣旅助夷則任成萬物也。位於酉，在八月。亡射：射，厭也，言陽氣究物而使陰氣畢剥落之，終而復始，亡厭已也。位於戌，在九月。應鐘：言陰氣應亡射該減萬物，而雜陽閔種也。孟康曰：閔，減塞也，陰雜陽氣，減塞為萬物作種也。晉灼曰：外閉曰閔。師古曰：閔，音胡待反。位於亥，在十

月。」又曰：「黃鐘為宮，則太簇、姑洗、林鐘、南呂皆以正聲應，無有忽微，不復與它律為役者，同心壹統之義也。非黃鐘，而它律雖當其月自宮者，則其和應之律有空積忽微，不得其正。此黃鐘至尊，亡與並也。」孟康曰：忽微，若有若無，細於髮者也。謂正聲無有殘分也。它律為宮，則有空積，若鄭氏分壹寸為數千。

右明十二律之義。十二律之名必有深指，然《國語》、《漢志》所言如此支離附合，恐非本真，今姑存之，不足深究也。

黃鐘之實玖寸。下生者倍其實，得拾捌以為法。參分其法得壹者陸，為陸寸，以為林鐘。

林鐘之實陸寸。上生者肆其實，得貳拾肆以為法。參分其法得壹者捌，為捌寸，以為太簇。

太簇之實捌寸。下生者倍其實，得拾陸以

爲法。參其壹得參，以分其法。用拾伍得參者伍，爲伍寸。餘壹，爲參分寸之壹。合之爲南呂。

南呂之實伍寸參分寸之壹。計拾陸分。上生者肆其實，得陸拾肆以爲法。參其參得玖，以分其法。用陸拾參得玖者柒，爲柒寸。餘壹，爲玖分寸之壹。合之爲姑洗。姑洗之實柒寸玖分寸之壹。計陸拾肆分。下

生者倍其實，得壹伯貳拾捌，以爲法。參其玖得貳拾柒，以分其法。用壹伯捌得貳拾柒者肆，爲肆寸。餘貳拾，爲貳拾柒分寸之貳拾。合之爲應鐘。

應鐘之實肆寸貳拾柒分寸之貳拾。計壹伯貳拾捌分。上生者肆其實，得伍伯拾貳以爲法。參其貳拾柒得捌拾壹，以分其法。用肆伯捌拾陸得捌拾壹者陸，爲陸寸。餘貳拾陸，爲捌拾壹分寸之貳拾陸。合

之爲蕤賓。

蕤賓之實陸寸捌拾壹分寸之貳拾陸。計伍伯拾貳分。上生者肆其實，得貳阡肆拾捌以

爲法。參其捌拾壹得貳伯肆拾參，以分其法。用壹阡玖伯肆拾肆得貳伯肆拾參者捌，爲捌寸。餘壹伯肆，爲貳伯肆拾參分寸之壹伯肆。合之爲大呂。

大呂之實捌寸貳伯肆拾參分寸之壹伯肆。

計貳阡肆拾捌分。下生者倍其實，得肆阡玖拾陸以爲法。參其貳伯肆拾參得柒伯貳拾玖，以分其法。用參阡陸伯肆拾伍得柒伯貳拾玖者伍，爲伍寸。餘肆伯伍拾壹，爲柒伯貳拾玖分寸之肆伯伍拾壹。合之爲夷則。

夷則之實伍寸柒伯貳拾玖分寸之肆伯伍拾壹。計肆阡玖拾陸分。上生者肆其實，得壹萬陸阡參伯捌拾肆以爲法。參其柒伯貳

拾玖得貳阡壹伯捌拾柒，以分其法。用壹萬伍阡叁伯玖得貳阡壹伯捌拾柒者柒，爲柒寸。餘壹阡柒拾伍，爲貳阡壹伯捌拾柒分寸之壹阡柒拾伍。合之爲夾鐘。

夾鐘之實柒寸貳阡壹伯捌拾柒分寸之壹阡柒拾伍。計壹萬陸阡叁伯捌拾肆分。下生者倍其實，得叁萬貳阡柒伯陸拾捌以爲法。叁其貳阡壹伯捌拾柒得陸阡伍伯陸拾壹，以分其法。用貳萬陸阡貳伯肆拾肆得陸阡伍伯陸拾壹者肆，爲肆寸。餘陸阡伍伯貳拾肆，爲陸阡伍伯陸拾壹分寸之陸阡伍伯貳拾肆。合之爲無射。

無射之實肆寸陸阡伍伯陸拾壹分寸之陸阡伍伯貳拾肆。計叁萬貳阡柒伯陸拾捌分。上生者肆其實，得拾叁萬壹阡柒拾貳以爲法。叁其陸阡伍伯陸拾壹得壹萬玖阡陸伯捌拾叁，以分其法。用拾壹萬捌阡玖拾捌

得壹萬玖阡陸伯捌拾叁者陸，爲陸寸。餘壹萬貳阡玖伯柒拾肆，爲壹萬玖阡陸伯捌拾叁分寸之壹萬貳阡玖伯柒拾肆。合之爲仲呂。

仲呂之實陸寸壹萬玖阡陸伯捌拾叁分寸之壹萬貳阡玖伯柒拾肆。計拾叁萬壹阡柒拾貳分。上生者肆其實，得伍拾貳萬肆阡貳伯捌拾捌以爲法。叁其壹萬玖阡陸伯捌拾叁得伍萬玖阡肆拾玖，以分其法。用肆拾柒萬貳阡叁伯玖拾貳得伍萬玖阡肆拾玖者捌，爲捌寸。餘伍萬壹阡捌伯玖拾陸，爲伍萬玖阡肆拾玖分寸之伍萬壹阡捌伯玖拾陸。合之爲黃鐘之變。

右律寸舊法。本《周禮》鄭玄注及杜佑《通典》法推之，定爲此數。

黃鐘之實玖寸。叁分其實，得叁以爲法。下生者倍其法，得陸寸以爲林鐘。

林鐘之實陸寸。參分其實，得貳以爲法。

上生者肆其法，得捌寸以爲太簇。

太簇之實捌寸。參分其實，得貳寸陸分以

爲法。下生者倍其法，得伍寸參分，以

爲南呂。凡言分者，皆玖分寸之壹。

南呂之實伍寸參分。參分其實，得壹寸柒

分以爲法。上生者肆其法，得肆寸貳拾

捌分。內收貳拾柒分得參寸。合之得柒寸壹

分，以爲姑洗。

姑洗之實柒寸壹分。參分其實，得貳寸參

分參釐以爲法。下生者倍其法，得肆寸

陸分陸釐，以爲應鐘。凡言釐者，皆玖分

之壹。

應鐘之實肆寸陸分陸釐。參分其實，得壹

寸伍分貳釐以爲法。上生者肆其法，得

肆寸貳拾分捌釐。內收拾捌分爲貳寸。合之

得陸寸貳分捌釐，以爲蕤賓。

蕤賓之實陸寸貳分捌釐。參分其實，得貳

寸捌釐陸毫以爲法。上生者肆其法，得捌

寸參拾貳釐貳拾肆毫。內收貳拾柒釐爲參分，

又收拾捌毫爲貳釐。合之得捌寸參分柒釐陸

毫，以爲大呂。凡言毫者，皆玖分釐之壹。

大呂之實捌寸參分柒釐陸毫。參分其實，

得貳寸柒分貳釐伍毫以爲法。下生者倍

其法，得肆寸拾肆分肆釐拾毫。內收玖分爲

壹寸，又收玖毫爲壹釐。合之得伍寸伍分伍釐

壹毫，以爲夷則。

夷則之實伍寸伍分伍釐壹毫。參分其實，

得壹寸柒分柒釐陸毫參絲以爲法。上生

者肆其法，得肆寸貳拾捌分貳拾捌釐貳拾

肆毫拾貳絲。內收貳拾柒分爲參寸，又收貳拾柒釐

爲參分，又收拾捌毫爲貳釐，又收玖絲爲壹毫。合之

得柒寸肆分參釐柒毫參絲，以爲夾鐘。凡

言絲者，皆玖分毫之壹。

夾鐘之實柒寸肆分叁釐柒毫叁絲。叁分其

實，得貳寸肆分肆釐貳毫肆絲以爲法。

下生者倍其法，得肆寸捌分捌釐肆毫捌絲，以爲無射。

無射之實肆寸捌分捌釐肆毫捌絲。叁分其

實，得壹寸伍分捌釐柒毫伍絲陸忽以爲法。上生者肆其法，得肆寸貳拾分叁拾

貳釐貳拾捌毫貳拾絲貳拾肆忽。內收拾捌

分爲貳寸，又收貳拾柒釐爲叁分，又收貳拾柒毫爲叁釐，又收拾捌絲爲貳毫，又收拾捌忽爲貳絲。合之得

陸寸伍分捌釐叁毫肆絲陸忽，以爲中呂。

凡言忽者，皆玖分絲之壹。

中呂之實陸寸伍分捌釐叁毫肆絲陸忽。叁

分其實，得貳寸壹分捌釐柒毫壹絲伍忽以爲法。上生者肆其法，得捌寸柒分捌釐

壹毫陸絲貳忽，以爲黃鐘之變。

右律寸新法。本太史公《律書》生鐘分，蔡元

定以寸分釐毫絲忽約之，得此法。

子一

黃鐘之律

丑三

爲絲法

寅九

爲寸數

卯二十七

爲毫法

辰八十一

爲分數

巳二百四十三

爲釐法

午七百二十九

爲釐數

未二千一百八十七

爲分法

申六千五百六十一

爲毫數

酉一萬九千六百八十三

爲寸法

戌五萬九千〇〇四十九

爲絲數

亥一十七萬七千一百四十七黃鐘之實

右黃鐘寸分數法。蔡元定曰：按黃鐘九

寸，以三分爲損益，故以三歷十二辰得十一萬七千一百四十七爲黃鐘之實。其十二辰所得之數在子、寅、辰、午、申、戌六陽辰，爲黃鐘寸、分、釐、毫、絲之數；在

亥、酉、未、巳、卯、丑六陰辰，爲黃鐘寸、分、釐、毫、絲之法。其寸、分、釐、毫、絲之法皆用九數，故九絲爲毫，九毫爲釐，九釐爲分，九分爲寸，九寸爲黃鐘。蓋黃鐘之實一十七萬七千一百四十七之數，以三約之，爲絲者五萬九千四十九；以二十七約之，爲毫者六千五百六十一；以二百四十三約之，爲釐者七百二十九；以二千一百八十七約之，爲分者八十一；以一萬九千六百八十三約之，爲寸者九。由是三分損益，以生十一律焉。或曰：徑圍之分以十爲法，而相生之分、釐、毫、絲以九爲法，何也？曰：以十爲法者，天地之全數也。以九爲法者，因三分損益而立也。全數者，即十而取九相生者，約十而爲九，即十而取九者，體之所以立，約十而爲九者，用之所以行體者，所以定中聲，用者所以生十一律也。

子一分。爲九寸。

丑三分二。爲三寸。

寅九分八。爲一寸。

卯二十七分十六。爲一寸。○爲三分。

辰八十一分六十四。九爲一寸。○爲

一分。

巳二百四十三分一百二十八。二十七爲

一寸。○爲一分。○爲三釐。

午七百二十九分五百一十二。八十一爲

一寸。○九爲一分。○爲一釐。

未二千一百八十七分一千二十四。二百

四十三爲一寸。○二十七爲一分。○爲一釐。

○爲三毫。

申六千五百六十一分四千九十六。七百

二十九爲一寸。○八十一爲一分。○九爲一釐。

○爲一毫。

西一萬九千六百八十三分八千一百九

十二。二千一百八十七爲一寸。○二百四十

三爲一分。○二十七爲一釐。○三爲一毫。○

爲三絲。

戌五萬九千四十九分三萬二千七百六

十八。六千五百六十一爲一寸。○七百二十

九爲一分。○八十一爲一釐。○九爲一毫。○

一爲一絲。

亥一十七萬七千一百四十七分六萬五千五百三十六。一萬九千六百八十三爲一寸。○二千一百八十七爲一分。○二百四十三爲一釐。○二十七爲一毫。○三爲一絲。○一爲二忽。

右黃鐘生十一律數。十七萬七千一百四

十七之數，見於漢前，後《志》。然未見其所用之實，故今特存此以備轉寫之誤而參考焉。

儀禮經傳通解卷第十三終

儀禮經傳通解卷第十四

詩樂第二十四

學禮七

傳曰：十有三年，學樂，誦《詩》，舞《勺》。成童，舞《象》。先學《勺》，後學《象》，文、武之次也。成童，十五以上。二十而冠，舞《大夏》。《大夏》，樂之文、武備者也。三舞今皆亡。<sup>①</sup>

小雅

傳曰：大學始教，《宵雅》肄三，官其始也。宵之言小也。肄，習也。習《小雅》之三，謂《鹿鳴》、《四牡》、《皇皇者華》也。此皆君臣宴樂、相勞苦之詩，為始學者習之，所以勸之以官，且取上下相和厚。<sup>②</sup>  
○今按：《鄉飲酒》及《燕禮》皆歌此三篇。笙人樂《南陔》、《白華》、《華黍》，閒歌《魚麗》，笙《由庚》，歌《南有嘉魚》，笙《崇丘》，歌《南山有臺》，笙《由儀》。六笙詩本

無詞，聲亦不傳。

賓南	則蕤	昭林	蒿黃清	○	人林	吹蕤	我蕤	呦黃清
式應	是姑	視姑	我林	呦黃	之南	笙林	有林	呦南
燕南	餽南	民南	有南	呦姑	好黃	鼓南	嘉應	鹿蕤
以太清	我林	不黃清	嘉應	鹿蕤	我姑	簧姑	賓南	鳴姑
敖黃清	有南	恍姑	賓黃清	鳴姑	示林	承應	鼓林	食南
○	旨黃	君應	德南	食林	我南	筐黃清	瑟南	野姑
呦黃	酒姑	子黃清	音蕤	野南	周太清	是姑	吹黃清	之太
呦姑	嘉林	是姑	孔姑	之太清	行黃清	將南	笙林	苹黃

① 亡「下，賀本有，○內則」。  
② 「厚」下，賀本有，○學記」。



鹿太	嘉應	鼓南	旨黃	心黃清
鳴黃	賓南	琴姑	酒姑	
食太	鼓林	和應	以林	
野黃	瑟南	樂黃清	燕南	
之蕤	鼓黃清	且姑	樂黃	
芩姑	琴林	湛南	嘉應	
我蕤	鼓蕤	我林	賓南	
有南	瑟林	有南	之太清	

《鹿鳴》三章，章八句，黃鐘清宮。俗呼

正宮。

四黃	豈林	我林	駢南	歸南	處黃	載林
牡姑	不南	心黃	嘽應	王蕤	○	下南
駢蕤	懷應	傷應	嘽南	事姑	翩黃清	集蕤
駢姑	歸黃清	悲黃清	駱太清	靡太	翩姑	于南
周太	王蕤	○	馬黃清	鹽黃	者林	苞蕤
道黃	事姑	四黃	豈蕤	不林	騅南	栩林
倭蕤	靡林	牡姑	不林	遑姑	載姑	王太
遲姑	鹽南	駢林	懷應	啟太	飛應	事黃

靡蕤	翩姑	于南	遑蕤	載林	是太
鹽姑	者蕤	苞蕤	將太	驟南	用黃
不林	騅姑	杞姑	母黃	駟黃清	作蕤
遑南	載林	王蕤	○	駟林	歌姑
將太清	飛應	事姑	駕黃	豈林	將應
父黃清	載林	靡林	彼太	不南	母黃
○	止南	鹽南	四黃	懷應	來太清
翩黃清	集林	不黃	駱姑	歸黃	諗黃清

《四牡》五章，章五句，黃鐘清宮。俗呼

正宮。

皇黃	駢蕤	○	濡南	諏黃	如蕤
皇南	駢林	我黃	載林	○	絲姑
者林	征蕤	馬姑	馳南	我黃清	載林
華南	夫姑	維蕤	載黃	馬林	馳南
于林	每應	駒姑	驅姑	維應	載蕤
彼姑	懷南	六黃清	周蕤	騏黃清	驅林
原林	靡太清	轡姑	爰姑	六林	周應
隰南	及黃清	如林	咨太	轡南	爰黃

呼正宮。

《皇皇者華》五章，章四句，黃鐘清宮。俗

嘉林	有黃清	鰓林	多蕤	于太	有應	魚黃清
矣南	○	鯉南	且林	留黃清	酒南	麗姑
○	物黃清	君蕤	旨黃	魴蕤	旨林	于蕤
物蕤	其姑	子姑	○	鯉姑	且南	留姑
其林	多應	有林	魚黃清	君蕤	多黃清	鰓太
旨蕤	矣南	酒南	麗太清	子林	○	鯨黃
矣姑	維蕤	旨林	于應	有蕤	魚黃	君蕤
維南	其姑	且南	留黃清	酒姑	麗姑	子林

周應	六黃清	爰姑	轡姑	咨太清
爰南	轡姑	咨太	沃林	謀黃清
咨太清	既林	度黃	若南	○
詢黃清	均南	○	載蕤	我黃清
	載林	我黃	馳南	馬林
	馳南	馬南	載蕤	維應
	載黃	維應	驅林	駱南
	驅姑	駟黃清	周黃	六蕤

黃鐘清宮。俗呼正宮。  
《魚麗》六章，三章章四句，三章章二句，

燕黃	思姑	○	有黃	樛應	賓姑	然姑	以太清	君林	南黃清
又南	君黃清	翩黃	酒姑	木南	式太	汕林	樂黃清	子南	有林
思黃清	子姑	翩太	嘉太清	甘黃清	燕黃	汕南	○	有蕤	嘉應
	有林	者黃	賓黃清	瓠林	以南	君林	南黃清	酒姑	魚南
	酒南	雛姑	式應	繫南	衍黃清	子南	有南	嘉應	烝應
	嘉蕤	烝林	燕南	之黃清	○	有黃	嘉蕤	賓黃清	然南
	賓姑	然南	綏太清	君黃	南黃清	酒姑	魚姑	式林	罩姑
	式太	來蕤	之黃清	子太	有太清	嘉黃	烝蕤	燕南	罩南

維應	其蕤
其南	偕姑
時太	矣林
矣黃清	○
	物黃
	其太
	有黃
	矣姑

《南有嘉魚》四章，章四句，黃鐘清宮。俗呼正宮。

不南	山蕤	不 <sub>太清</sub>	父姑	有 <sub>太清</sub>	疆 <sub>黃清</sub>	光林	楊黃	○	樂蕤	樂應	南 <sub>黃清</sub>
眉 <sub>太清</sub>	有姑	已黃	母林	李 <sub>黃清</sub>	○	樂應	樂蕤	南 <sub>黃</sub>	只林	只 <sub>黃清</sub>	山 <sub>太清</sub>
壽 <sub>黃清</sub>	柎林	○	樂蕤	樂應	南 <sub>黃清</sub>	只 <sub>黃清</sub>	只林	山姑	君南	君應	有應
樂應	樂蕤	南 <sub>黃</sub>	只林	只 <sub>黃清</sub>	山林	君蕤	君應	有蕤	子姑	子南	臺南
只 <sub>黃清</sub>	只林	山 <sub>太</sub>	君蕤	君應	有應	子姑	子南	桑姑	萬黃	邦林	北應
君蕤	君應	有黃	子姑	子南	杞南	萬林	邦林	北 <sub>黃</sub>	壽姑	家南	山南
子姑	子南	栲姑	德蕤	民南	北林	壽南	家南	山姑	無 <sub>太</sub>	之 <sub>黃清</sub>	有 <sub>太清</sub>
德應	遐林	北南	音姑	之蕤	山南	無 <sub>太清</sub>	之黃	有 <sub>太</sub>	期黃	基林	萊 <sub>黃清</sub>

保 <sub>黃清</sub>	遐南	北應	音南
艾南	不蕤	山 <sub>黃</sub>	是林
爾林	黃姑	有 <sub>太清</sub>	茂 <sub>黃清</sub>
後 <sub>黃清</sub>	耆林	楸 <sub>黃清</sub>	○
	樂蕤	樂應	南 <sub>黃清</sub>
	只林	只 <sub>黃清</sub>	山姑
	君蕤	君應	有蕤
	子姑	子南	枸姑

《南山有臺》五章，章六句，黃鐘清宮。俗

呼正宮。

周南國風

傳曰：《周南》、《召南》，正始之道，王化

之基，故用之鄉人焉，用之邦國焉。《鄉飲酒》

及《鄉射禮》合樂《周南·關雎》、①《葛覃》、《卷耳》、《召

南·鵲巢》、《采芣》、《采蘋》、《燕禮》亦云遂歌鄉樂，亦即此

六篇也。鄭氏云：合樂，謂歌樂與衆聲皆作。《周南》、《召

南》、《國風》篇也，王后、國君夫人房中之樂歌也。《關雎》，

言后妃之德。《葛覃》，言后妃之職。《卷耳》，言后妃之志。

《鵲巢》，言國君夫人之德。《采芣》，言國君夫人不失職。

① 上「鄉」上，賀本有「詩序○」。

《采蘋》、言卿、大夫之妻能修其法度。夫婦之道，生民之本，王政之端。此六篇者，其教之原也，故國君與其臣下及四方之賓燕用之合樂也。鄉樂者，風也。《小雅》為諸侯之樂，《大雅》、《頌》為天子之樂。

樂無	芼林	友太	采南	側黃清	服林	之黃	之黃清	○	窈林	關黃清
之黃清	之南	之姑	之黃清	○	悠姑	求黃清	窈中	參黃清	窈南	關南
	窈黃清	參太	窈姑	參黃清	哉中	之南	窈林	差南	淑黃清	睢林
	窈南	差黃	窈中	差無	悠姑	不林	淑無	苻林	女姑	鳩南
	淑林	苻姑	淑林	苻南	哉太	得南	女姑	菜南	君黃清	在黃
	女太清	菜林	女南	菜林	輾黃清	寤姑	寤太	左林	子林	河姑
	鐘黃	左林	琴林	左太清	轉南	寐中	寐姑	右南	好南	之太
	鼓南	右姑	瑟姑	右林	反無	思南	求太	流無	迷黃清	洲黃

《關雎》三章，一章四句，二章章八句，無射清商。俗呼越調。

父林	我林	言太	敦黃	濩姑	谷黃清	○	集中	維中	葛黃
母黃	衣南	歸黃	○	為林	維林	葛黃清	于林	葉南	之太
	害南	薄黃	言黃清	絺姑	葉南	之太清	灌無	萋無	覃姑
	澣林	汗姑	告姑	為太	莫南	覃林	木太	萋太	兮太
	害無	我太	師南	綌姑	莫南	兮黃清	其黃清	黃南	施太
	否太	私姑	氏林	服太	是黃	施林	鳴南	鳥無	于姑
	歸黃清	薄姑	言林	之姑	刈姑	于南	喈無	于南	中太
	寧南	澣中	告姑	無太	是太	中無	喈黃清	飛林	谷黃

越調。  
《葛覃》三章，章六句，無射清商。俗呼

采 <sub>黃清</sub>	嗟 <sub>中</sub>	○	隕 <sub>林</sub>	以 <sub>林</sub>	岡 <sub>林</sub>	彼 <sub>黃</sub>	○	矣 <sub>黃</sub>	矣 <sub>黃清</sub>
采 <sub>姑</sub>	我 <sub>林</sub>	陟 <sub>黃清</sub>	我 <sub>中</sub>	不 <sub>南</sub>	我 <sub>林</sub>	兕 <sub>太</sub>	陟 <sub>清</sub>	我 <sub>中</sub>	
卷 <sub>林</sub>	懷 <sub>無</sub>	彼 <sub>無</sub>	姑 <sub>林</sub>	永 <sub>無</sub>	馬 <sub>姑</sub>	觥 <sub>姑</sub>	彼 <sub>南</sub>	僕 <sub>姑</sub>	
耳 <sub>南</sub>	人 <sub>太</sub>	崔 <sub>南</sub>	酌 <sub>南</sub>	懷 <sub>黃清</sub>	玄 <sub>南</sub>	維 <sub>黃清</sub>	硃 <sub>黃清</sub>	痛 <sub>林</sub>	
不 <sub>林</sub>	寘 <sub>黃</sub>	嵬 <sub>林</sub>	彼 <sub>無</sub>	○	黃 <sub>林</sub>	以 <sub>林</sub>	矣 <sub>林</sub>	矣 <sub>南</sub>	
盈 <sub>姑</sub>	彼 <sub>姑</sub>	我 <sub>林</sub>	金 <sub>姑</sub>	陟 <sub>黃</sub>	我 <sub>姑</sub>	不 <sub>南</sub>	我 <sub>黃</sub>	云 <sub>黃清</sub>	
頃 <sub>林</sub>	周 <sub>太</sub>	馬 <sub>姑</sub>	豐 <sub>太</sub>	彼 <sub>姑</sub>	姑 <sub>太</sub>	永 <sub>無</sub>	馬 <sub>姑</sub>	何 <sub>南</sub>	
筐 <sub>南</sub>	行 <sub>黃</sub>	虺 <sub>南</sub>	維 <sub>太清</sub>	高 <sub>南</sub>	酌 <sub>姑</sub>	傷 <sub>黃清</sub>	瘖 <sub>太</sub>	吁 <sub>無</sub>	

《卷耳》四章，章四句，無射清商。俗呼

越調。

維 <sub>黃</sub>	之中
鵲 <sub>姑</sub>	子 <sub>林</sub>
有 <sub>中</sub>	于 <sub>無</sub>
巢 <sub>林</sub>	歸 <sub>太</sub>
維 <sub>黃清</sub>	百 <sub>黃清</sub>
鳩 <sub>無</sub>	兩 <sub>林</sub>
居 <sub>南</sub>	御 <sub>南</sub>
之 <sub>林</sub>	之 <sub>黃清</sub>

○	之 <sub>黃</sub>	之 <sub>黃</sub>	盈 <sub>南</sub>	成 <sub>南</sub>
維 <sub>黃</sub>	之 <sub>林</sub>	○	之 <sub>黃清</sub>	之 <sub>黃清</sub>
鵲 <sub>林</sub>	子 <sub>黃</sub>	維 <sub>黃清</sub>	之 <sub>黃清</sub>	
有 <sub>南</sub>	于 <sub>林</sub>	鵲 <sub>無</sub>	子 <sub>南</sub>	
巢 <sub>林</sub>	歸 <sub>姑</sub>	有 <sub>南</sub>	于 <sub>姑</sub>	
維 <sub>林</sub>	百 <sub>太</sub>	巢 <sub>林</sub>	歸 <sub>林</sub>	
鳩 <sub>姑</sub>	兩 <sub>黃</sub>	維 <sub>南</sub>	百 <sub>太清</sub>	
方 <sub>太</sub>	將 <sub>太</sub>	鳩 <sub>林</sub>	兩 <sub>林</sub>	

《鵲巢》三章，章四句，無射清商。俗呼

越調。

于 <sub>黃清</sub>	于 <sub>黃</sub>	○	中 <sub>姑</sub>	宮 <sub>黃清</sub>	在 <sub>南</sub>	還 <sub>無</sub>
以南	以 <sub>姑</sub>	于 <sub>黃清</sub>	于 <sub>姑</sub>	○	公 <sub>黃清</sub>	歸 <sub>黃清</sub>
采 <sub>林</sub>	用 <sub>太</sub>	以 <sub>林</sub>	以 <sub>南</sub>	被 <sub>黃清</sub>	被 <sub>黃</sub>	
繫 <sub>南</sub>	之 <sub>姑</sub>	采 <sub>黃</sub>	用 <sub>林</sub>	之 <sub>太清</sub>	之 <sub>姑</sub>	
于 <sub>林</sub>	公 <sub>黃清</sub>	繫 <sub>南</sub>	之 <sub>南</sub>	僮 <sub>南</sub>	祁 <sub>太</sub>	
沼 <sub>姑</sub>	侯 <sub>南</sub>	于 <sub>太</sub>	公 <sub>黃清</sub>	僮 <sub>林</sub>	祁 <sub>姑</sub>	
于 <sub>太</sub>	之 <sub>無</sub>	潤 <sub>黃</sub>	侯 <sub>南</sub>	夙 <sub>太清</sub>	薄 <sub>林</sub>	
沚 <sub>姑</sub>	事 <sub>黃</sub>	之 <sub>太</sub>	之 <sub>太清</sub>	夜 <sub>林</sub>	言 <sub>南</sub>	

《采蘋》三章，章四句，無射清商。俗呼

越調。

于黃	以南	采林	蘋南	南姑	澗林	之南	濱林
于林	以姑	采中	藻林	于黃	彼姑	行太	潦黃
○	于黃	以姑	盛太	之姑	維清	筐南	及林
宮南	于林	以姑	湘中	之林	維林	錡南	及無
釜黃	○	于清	以南	奠黃	之姑	宗林	室姑
牖太	下黃	誰中	其南	尸無	之林	有清	齊南
季無	女黃						

《采蘋》三章，章四句，無射清商。俗呼越調。

右《風》、《雅》拾貳詩譜。《大戴禮》云：凡雅二十

六篇，其八篇可歌，歌《鹿鳴》、《貍首》、《鵲巢》、《采蘋》、《采芣》、《伐檀》、《白駒》、《騶虞》；八篇廢，不可歌；七篇《商》、《齊》可歌也；三篇閒歌。《史記》、《史義》、《史見》、《史童》、《史謗》、《史賓》、《十聲》、《叢挾》。《晉志》

云：漢末杜夔傳舊雅樂四曲，一曰《鹿鳴》，二曰《騶虞》，三曰《伐檀》，四曰《文王》，皆古聲辭。○今按：《大戴禮》頗有闕誤，其篇目都數皆不可考。至漢末年止存三篇，而加《文王》，又不知其何自來也。其後改作新辭，舊曲遂廢。至唐開元，《鄉飲酒禮》其所奏樂乃有此十二篇之日，而其聲今亦莫得聞矣。此譜乃趙彥肅所傳，云即開元遺聲也。古聲亡滅已久，不知當時工師何所考而爲此也。竊疑古樂有唱有歎，唱者發歌曲也，和者繼其聲也。詩詞之外，應更有聲字散聲以歎發其趣，故漢、晉之間，舊曲既失其傳，則其詞雖存，而世莫能補，爲此故也。若但如此譜直以一聲叶一字，則古《詩》篇篇可歌，無復樂崩之歎矣，夫豈然哉！又其以清聲爲調，似亦非古法。然古聲既不可考，則姑存此以見聲歌之彷彿，俟知樂者考其得失云。

禮樂記第二十五<sup>①</sup>

學禮八

人生而靜，天之性也；感于物而動，性

①「五」下，賀本有小字注文，凡十三章「四字」。

之欲也。物至知知，然後好惡形焉。好惡無節于內，知誘于外，不能反躬，天理滅矣。夫物之感人無窮，而人之好惡無節，則是物至而人化物也。人化物也者，滅天理而窮人欲者也。於是有悖逆詐僞之心，有淫佚作亂之事，是故强者脅弱，衆者暴寡，知者詐愚，勇者苦怯，疾病不養，老幼孤獨不得其所，此大亂之道也。是故先王之制禮樂，人爲之節：衰麻哭泣，所以節喪紀也；鐘鼓干戚，所以和安樂也；婚姻冠笄，所以別男女也；射鄉食饗，所以正交接也。禮節民心，樂和民聲。政以行之，刑以防之。<sup>①</sup>禮、樂、刑、政，四達而不悖，<sup>②</sup>則王道備矣。○樂者爲同，禮者爲異。同則相親，異則相敬。同，謂協好惡也。異，謂別貴賤也。樂勝則流，禮勝則離。流，謂合行不敬也。離，謂析居不和也。合情飾貌者，禮樂之事也。欲其並行斌斌然。禮義立，則貴賤等矣；

樂文同，則上下和矣；好惡著，則賢不肖別矣；刑禁暴，爵舉賢，則政均矣。仁以愛之，義以正之，如此則民治行矣。等，階級也。○樂由中出，和在心也。禮自外作。敬在貌也。樂由中出故靜，禮自外作故文。文，猶動也。大樂必易，大禮必簡。易，以豉反。<sup>③</sup>○易，簡，若于清廟大饗然。<sup>④</sup>樂至則無怨，禮至則不爭。揖讓而治天下者，禮樂之謂也。至，猶達也，行也。暴民不作，諸侯賓服，兵革不試，五刑不用，百姓無患，天子不怒，如此則樂達矣。合父子之親，明長幼之序，以敬四海之內，天子如此，則禮行矣。長，丁丈反。○賓，協也。試，用也。○大樂與天地同和，大禮與天地同節。言順

① 「防」，原作「典」，據賀本改。

② 「悖」，原作「存」，據寬文本、賀本改。

③ 「鼓」，原作「政」，據寬文本、賀本改。

④ 「大饗」，原作「天養」，據寬文本、賀本改。

天地之氣與其數。和故百物不失，不失其性。節故祀天祭地。成物有功報焉。明則有禮樂，教人者幽則有鬼神。助天地成物者也。《易》曰：「是故知鬼神之情狀與天地相似。」《五帝德》說黃帝德曰：「死而民畏其神者百年。」《春秋傳》曰：「若敖氏之鬼。」然則聖人之精氣謂之神，賢知之精氣謂之鬼。如此，則四海之內合敬同愛矣。禮者，殊事合敬者也；樂者，異文合愛者也。禮樂之情同，故明王以相沿也。沿，悅專反。○沿，猶因述也。孔子曰：「殷因於夏禮，所損益可知也。周因於殷禮，所損益可知也。」沿，或作「緣」。故事與時並，舉事在其時也。《禮器》曰：「堯授舜，舜授禹，湯放桀，武王伐紂，時也。」名與功偕。爲名在其功也。偕，猶俱也。堯作《大章》，舜作《大韶》，禹作《大夏》，湯作《大濩》，武王作《大武》，各因其得天下之功。故鐘鼓管磬，羽籥干戚，樂之器也；屈伸俯仰，綴兆舒疾，樂之文也。簠簋俎豆，制度文章，禮之器也；升降上下，周還裼襲，禮之文

也。綴，丁劣反。簠，音甫。簋，音鬼。還，音旋。裼，思力反。○綴，謂鄼舞者之位也。兆，其外營域也。故知禮樂之情者能作，識禮樂之文者能述。述，謂訓其義也。作者之謂聖，述者之謂明。明聖者，述作之謂也。○樂者，天地之和也；禮者，天地之序也。和故百物皆化，序故群物皆別。化，猶生也。別，謂形體異也。樂由天作，禮以地制。言法天地也。過制則亂，過作則暴。過，猶誤也。暴，失文武之意。明於天地，然後能興禮樂也。論倫無患，樂之情也；欣喜歡愛，樂之官也。倫，猶類也。患，害也。官，猶事也。中正無邪，禮之質也；莊敬恭順，禮之制也。質，猶本也。若夫禮樂之施於金石，越於聲音，用於宗廟社稷，事乎山川鬼神，則此所與民同也。言情官質制，先王所專也。○王者功成作樂，治定制禮，功成，治定，同時耳。功主于王業，治主于教民。《明堂位》說周公曰：「治天下六年，朝諸侯於明



堂，制禮作樂。」其功大者其樂備，其治辯者其禮具。辯，音遍。○辯，偏也。干戚之舞，非備樂也；樂以文德爲備，若《咸池》者。孔子曰：《韶》，盡美矣，又盡善也。」謂《武》盡美矣，未盡善也」。孰亨而祀，非達禮也。亨，普衡反。○達，具也。《郊特牲》曰：「郊血，大饗腥，三獻燭，一獻孰，至敬不饗味而貴氣臭也。」五帝殊時，不相沿樂；三王異世，不相襲禮。言其有損益也。樂極則憂，禮粗則偏矣。粗，倉都反。○樂，人之所好也，害在淫侈。禮，人之所勤也，害在倦略。及夫敦樂而無憂、禮備而不偏者，其唯大聖乎！敦，厚也。○天高地下，萬物散殊，而禮制行矣；流而不息，合同而化，而樂興焉。春作夏長，仁也；秋斂冬藏，義也。仁近於樂，義近於禮。樂者敦和，率神而從天；禮者別宜，居鬼而從地。故聖人作樂以應天，制禮以配地。禮樂明備，天地官矣；天尊地卑，君臣定矣；卑高已陳，貴賤

位矣；動靜有常，小大殊矣。方以類聚，物以群分，則性命不同矣。在天成象，在地成形，如此則禮者，天地之別也。卑高，謂山澤也。位矣，尊卑之位，象山澤也。動靜，陰陽用事。小大，萬物也。大者常存，小者隨陽出入。方，謂行蟲也。物，謂殖生者也。性之言生也。命，生之長短也。象，光耀也。形，體貌也。地氣上齊，天氣下降，陰陽相摩，天地相蕩。鼓之以雷霆，奮之以風雨，動之以四時，燠之以日月，而百化興焉，如此則樂者天地之和也。燠，況遠反。○齊，讀爲躋。躋，升也。摩，猶迫也。蕩，猶動也。奮，迅也。百化，百物化生也。化不時則不生，男女無辨則亂升，天地之情也。辨，別也。升，成也。樂失則害物，禮失則亂人。及夫禮樂之極乎天而蟠乎地，行乎陰陽而通乎鬼神，窮高極遠而測深厚。蟠，步丹反。○極，至也。蟠，猶委也。高遠，三辰也。深厚，山川也。言禮樂之道上至於天，下委於地，則其間無所不之。樂著大始，而

禮居成物。著，直略反。大，音泰。○著之言處也。大始，百物之始生也。著不息者，天也；著不動者，地也。著，猶明白也。息，猶休止也。《易》曰：「天行健，君子以自強不息。」一動一靜者，天地之閒也，閒，謂百物也。故聖人曰禮樂云。言禮樂之法天地也，樂靜而禮動，其並用事，則亦天地之閒爾。○夫豢豕爲酒，非以爲禍也，而獄訟益繁，則酒之流生禍也，豢，音患。○以穀食犬豕曰豢。爲，作也。言豢豕作酒本以享祀養賢，而小人飲之善醕，以致獄訟。是故先王因爲酒禮。壹獻之禮，賓主百拜，終日飲酒而不得醉焉，此先王之所以備酒禍也。壹獻，士飲酒之禮。百拜，以喻多。故酒食者，所以合歡也；樂者，所以象德也；禮者，所以綴淫也。綴，之劣反。○綴，猶止也。是故先王有大事，必有禮以哀之；有大福，必有禮以樂之。哀樂之分，皆以禮終。樂，音洛，下「所樂」及「樂其」同。分，扶問反。○大事，謂死喪也。樂也者，聖人

之所樂也，而可以善民心，其感人深，其移風易俗，故先王著其教焉。著，猶立也，謂立司樂以下使教國子。○今按：《漢書》舊本「俗」下有「易」字，新本亦無，唯荀悅作「移人疾」，恐當以舊本爲正。○樂也者，施也；禮也者，報也。言樂出而不反，而禮有往來也。樂，樂其所自生，而禮反其所自始。樂章德，禮報情，反始也。白，由也。樂也者，情之不可變者也；禮也者，理之不可易者也。理，猶事也。樂統同，禮辨異，統同，同和合也。辨異，異尊卑也。禮樂之說管乎人情矣。管，猶包也。○窮本知變，樂之情也；著誠去僞，禮之經也。禮樂，僂天地之情，達神明之德，降興上下之神，而凝是精粗之體，領父子君臣之節。僂，音負。粗，七奴反。○僂，猶依象也。降，下也。興，猶出也。凝，成也。精粗，謂萬物大小也。領，猶理治也。○是故大人舉禮樂，則天地將爲昭焉。言天地將爲之昭然明也。天地訢合，陰陽相得，煦

嫗覆育萬物，然後草木茂，區萌達，羽翼奮，角觫生，蟄蟲昭蘇，羽者嫗伏，毛者孕鬻，胎生者不殯，而卵生者不殯，則樂之道歸焉耳。訢，許其反。煦，許具反。嫗，於具反。區，占侯反。觫，古伯反。蟄，直力反。①伏，扶又反。孕，以證反。鬻，音育。殯，音獨。殯，況逼反。○訢，讀爲烹，烹猶蒸也。氣曰煦，體曰嫗。屈生曰區，無鰓曰觫。昭，曉也，蟄蟲以發出爲曉，更息曰蘇。孕，任也。鬻，生也。內敗曰殯。殯，裂也，今齊人語有殯者。○樂者，非謂黃鐘大呂、弦歌干揚也，樂之末節也，故童者舞之。鋪筵席，陳尊俎，列籩豆，以升降爲禮者，禮之末節也，故有司掌之。鋪，普胡反。○言禮樂之本，由人君也。禮本著誠去僞，樂本窮本知變。樂師辨乎聲詩，故北面而弦；宗祝辨乎宗廟之禮，故後尸；商祝辨乎喪禮，故後主人。辨，猶別也，正也。弦，謂鼓瑟琴也。後尸，居後贊禮儀。此言知本者尊，知末者卑。是故德成而上，藝成而下，行成而先，事成而後。行，下孟反。○德，三德也。行，三行

也。藝，才技也。先，謂位在上也。後，謂位在下也。是故先王有上有下，有先有後，然後可以有制于天下也。言尊卑備，乃可制作以爲治法。○君子曰：禮樂不可斯須去身。致樂以治心，則易、直、子、諒之心油然而生矣。易、直、子、諒之心生則樂，樂則安，安則久，久則天，天則神。天則不言而信，神則不怒而威，致樂以治心者也。致禮以治躬則莊敬，莊敬則嚴威。心中斯須不和不樂，而鄙詐之心人之心矣；外貌斯須不莊不敬，而易慢之心人之心矣。故樂也者，動於內者也；禮也者，動於外者也。樂極和，禮極順，內和而外順，則民瞻其顏色而弗與爭也，望其容貌而民不生易慢焉。故德輝動於內而民莫不承聽，理發諸

①「蟄直力反」，原作「蟲直中反」，據寬文本、賀本改。案，《經典釋文》作「蟄蟲，直立反」。

外而民莫不承順。故曰：致禮樂之道，舉而錯之天下無難矣。樂也者，動於內者也；禮也者，動於外者也。故禮主其減，樂主其盈。禮主其減，人所倦也；樂主其盈，人所歡也。<sup>①</sup>禮減而進，以進爲文；樂盈而反，以反爲文。進，謂自勉強也。反，謂自抑止也。文，猶美也，善也。禮減而不進則銷，樂盈而不反則放，故禮有報而樂有反。放，淫於聲樂不能止也。報，讀曰褒，猶進也。禮得其報則樂，樂得其反則安。得，謂曉其義，知其吉凶之歸。禮之報，樂之反，其義一也。俱趨立於中，不銷不放也。

儀禮經傳通解卷第十四終

① 「歡」，原作「欲」，據元明本、寬文本、賀本改。

儀禮經傳通解卷第十五

書數第二十六

學禮九

此一篇闕。

## 儀禮經傳通解卷第十六

### 學記第二十七

#### 學禮十

發慮憲，求善良，足以諉聞，不足以動衆。諉，思了反。聞，音問。○憲，法也，言發計慮當擬度於法式也。諉之言小也。○今按：動衆，謂聳動衆聽。蓋守常法，用中材，其效不足以致大譽。就賢體遠，足以動衆，未足以化民。就，謂躬下之。體，猶親也。○今按：遠，謂疎遠之上。下賢親遠，足以聳動衆聽，使知貴德而尊上，然未有開導誘掖之方也，故未足以化民。君子如欲化民成俗，其必由學乎！所學者，聖人之道，在方冊。○今按：此言唯教學可以化民，使成美俗。玉不琢不成器，人不學不知道。是故古之王者建國君民，教學爲先。謂內則設師保以教，使國

子學焉，外則有大學庠序之官。《兌命》曰：「念終始典于學」，其此之謂乎！典，經也。言學之不舍業也。兌，當爲「說」，字之誤也。○雖有嘉肴，弗食不知其旨也；雖有至道，弗學不知其善也。旨，美也。是故學然後知不足，教然後知困。學則睹已行之所短，教則見已道之所未達。知不足，然後能自反也；知困，然後能自強也。故曰：教學相長也。強，其丈反，又其良反。長，丁丈反。○自反，求諸已也。自強，修業不敢倦。○張子曰：困者，益之基也。學者之病正在於不知困矣，自以爲知，而問之不能答，用之不能行者多矣。《兌命》曰「學學半」，其此之謂乎！學學，上胡孝反。○言學人乃益己之學半。○古之教者，家有塾，黨有庠，術有序，國有學。術，當爲「遂」，聲之誤也。古者仕焉而已者，歸教於閭里，朝夕坐於門。門側之堂謂之塾。《周禮》：「五百家爲黨，萬二千五百家爲遂。」黨屬於鄉，遂在遠郊之外。比年入學，比，毗志反。○學者每歲來入也。中年考

校。中，丁仲反。○中，猶閒也。鄉，遂大夫閒歲則考學者之德行道藝，《周禮》三歲大比乃考焉。一年視離經辨志，三年視敬業樂群，五年視博習親師，七年視論學取友，謂之小成。九年知類通達，強立而不反，謂之大成。樂，五孝反。○離經，斷句絕也。辨志，謂別其心意所趣向也。知類，知事義之類也。強立，臨事不惑也。不反，不違失師道。○張子曰：離經，離析經之章句也。事師而至於親敬，則學之篤而信其道也。論學取友，能講論其學而取友必端也。知類通達，比物醜類是也。九年者，言其大略，人性有遲敏，氣有昏明，豈可齊也。強立而不反，可與立也。學至於立，則自能不息，以至於聖人而教者，可以無恨矣。○今按：鄭注、張說皆是也。辯志者，自能分別其心所趨向，如爲善爲利，爲君子爲小人也。敬業者，專心致志以事其業也。樂群者，樂於取益以輔其仁也。博習者，積累精專，次第該備也。親師者，道同德合，愛敬兼盡也。論學者，知言而能論學之是非。取友者，知人而能識人之賢否也。知類通達，聞知十而觸類貫通也。強立不反，知止有定而物不能移也。蓋考較之法，逐節之中，先觀其學業之淺深，徐察其志

行之虛實，讀者宜深味之，乃見進學之驗。夫然後足以化民易俗，近者說服而遠者懷之，此大學之道也。說，音悅。大，音泰，下同。○懷，來也，安也。記曰「蛾子時術之」，其此之謂乎！蛾，魚起反。○蛾，蚍蜉也。蚍蜉之子，微蟲耳。時術，蚍蜉之所爲，其功乃復成大垤。○疏曰：蚍蜉所爲，謂銜土也。○大學始教，皮弁祭菜，示敬道也。皮弁，天子之朝朝服也。祭菜，禮先聖先師。菜，謂芹藻之屬。《宵雅》肆三，官其始也；肆，以二反。○宵之言小也。肆，習也。習《小雅》之三，謂《鹿鳴》、《四牡》、《皇皇者華》也。此皆君臣宴樂相勞苦之詩，爲始學者習之，所以勸之以官，且取上下相和厚。人學鼓篋，孫其業也；孫，音遜，下同。○鼓篋，擊鼓警衆，乃發篋出所治經業也。孫，猶恭順也。夏、楚二物，收其威也；夏，占雅反。○夏，栢也。楚，荆也。二者所以扑撻犯禮者。收，謂收斂整齊之威。威，儀也。○栢，吐刀反。未卜禘不視學，游其志也；禘，大祭也。天子、諸侯既祭乃視學考校，以游暇學者之志意。時觀而弗語，存其心

也；語，魚庶反。○使之悻悻憤憤，然後啟發也。○今按：觀，示也，謂示以所學之端緒。語，告也。幼者聽而弗問，學不躐等也。學，胡教反。躐，里棘反。○學，教也，教之長穉。○疏曰：幼者有疑，但推長者問而聽之，不可躐等問其師。此七者，教之大倫也。倫，理也。自「大學始教」至此，其義七也。記曰：「凡學，官先事，士先志。」其此之謂乎！官，居官者也。士，學士也。○大學之教也，時教必有正業，退息必有居有居，有常居也。學。今按：上句鄭注，孔疏讀「時」字、「居」字句絕，而「學」字自爲一句，恐非。文意當以「也」字、「學」字爲句絕。時教，如春夏《禮》《樂》、秋冬《詩》《書》之類。居學，謂居其所學，如《易》之言居業。蓋常時所習，如下文操縵、博依、興藝、藏修、息遊之類，所以學者能安其學而信其道。不學操縵，不能安弦；操，七刀反。縵，末旦反。○操縵，雜弄。○疏曰：弦，琴瑟之屬。若不先學調弦雜弄，則手指不便，故不能安弦也。不學博依，不能安詩；博依，廣譬喻也。依，或爲「衣」。○張子曰：依，聲之依永者也。不學雜服，不

能安禮；雜服，冕服皮弁之屬。雜，或爲「雅」。○張子曰：服，事也。雜服，灑掃、應對、投壺、沃盥、細碎之事。又曰：道本至樂，古之教人先使有以樂之者，如操縵、博依、雜服，如此已心樂，樂則道義生。今無此以致樂，專義理，自得以爲樂。然學者太苦思，不從容，弟恐進銳退速，苦其難而不知其益，莫能安樂也。不興其藝，不能樂學。樂，五孝反。○興之言喜也，歆也。藝，謂禮、樂、射、御、書、數。○張子曰：禮樂之文，如琴瑟笙磬，古人皆能之。以中制節，射御亦必合於禮樂之文。如不失其馳，舍矢如破，騶虞和鸞，動必相應也。書數其用雖小，但施於簡策，然莫不出於學。故人有倦時，又用此以游其志，所以使之樂學也。故君子之於學也，藏焉修焉，息焉遊焉。藏，謂懷抱之。修，習也。息，謂作勞休止於之。遊，謂閒暇無事於之遊。夫然，故安其學而親其師，樂其友而信其道，是以雖離師輔而不反也。《兌命》曰：「敬孫務時敏，厥修乃來。」其此之謂乎！樂，音洛，又五孝反。離，力智反。○敬孫，敬道孫業也。敏，疾也。厥，其也。學者務及



時而疾其所修之業乃來。○張子曰：孫其志於仁則得仁，孫其志於義則得義，惟其敏而已。今之教者，呻其佔畢，多其訊。呻，音申。佔，勅沾反。○呻，吟也。佔，視也。簡謂之畢。訊，猶問也。言今之師自不曉經之義，但吟誦其所視簡之文，多其難問也。呻，或爲「慕」。訊，或爲「訢」。言及于數，其發言出說不首其義，動云有所法象而已。○疏曰：詐稱有所法象也。○今按：數，謂刑名度數。言及於數，欲以是窮學者之未知，非求其本也。注「法象」之說恐非。若小學之教，蓋將使之馴習乎灋掃應對之節，與今之教言及于數者，其意不同。進而不顧其安，務其所誦多，不惟其未曉。使人不由其誠，由，用也。使學者誦之而爲之說，不用其誠。教人不盡其材，材，道也，謂師有所隱也。《易》曰「兼三材而兩之」，謂天地人之道。○張子曰：人未安之又進之，未喻之又告之，徒使人生此節目，不盡其材，不顧安，不由誠，皆是施之妄也。教人至難，必盡人之材，乃不誤人。觀可及處，然後告之聖人之明。直若庖丁之解牛，皆知其隙，刃投餘地，無全牛矣。故使人必由其誠，教人必盡其材。人之

材足以有爲，但以其不由於誠，則不盡其材。若曰勉率而爲之，則豈有由其誠者哉？其施之也悖，其求之也佛。教者言非，則學者失問。夫然，故隱其學而疾其師，苦其難而不知其益也。隱，不稱揚也。不知其益，若無益然。○今按：「隱其學」，謂以其學爲幽隱而難知，如曰「子，以我爲隱」之意。雖終其業，其去之必速。速，疾也。學不心解則忘之易。教之不刑，其此之由乎！刑，猶成也。○大學之法：禁於未發之謂豫，未發，情慾未生，謂年十五時。○今按：此但謂豫爲之防，其事不一，不必皆謂十五時也。當其可之謂時，可，謂年二十成人時。○今按：此「當其可謂」，適當其可告之時，事亦不一，不當以年爲斷。不陵節而施之謂孫，「不陵節」，謂不教長者，才者以小，教幼者，鈍者以大也。施，猶教也。孫，順也。相觀而善之謂摩。不並問，則教者思專也。摩，相切磋也。○今按：此但謂觀人之能而於己有益，如以兩物相摩而各得其助也。此四者，教之所由興也。興，起也。發然後禁，則扞格而不勝；扞，胡半反。格，

胡客反。勝，音升。○教不能勝其情慾。格，讀如凍洛之洛。扞，堅不可入之貌。○疏曰：今人謂地堅爲洛。時過然後學，則勤苦而難成；時過則思放也。雜施而不孫，則壞亂而不修；小者不達，大者難識，學者所惑也。○疏曰：大才輕其小業，故不達，小才苦其大業，故難識也。獨學而無友，<sup>①</sup>則孤陋而寡聞；不相見也。燕朋逆其師，燕，猶褻也，褻其朋友。○今按：《大戴·保傳篇》作「左右之習反其師」，明此燕朋是私褻之友，所謂損者：友之類，注說非也。燕辟廢其學。辟，音譬。○褻師之譬喻。○今以上文推之，注亦非是。「燕譬」，但謂私褻之談，無益於學而反有所害也。此六者，教之所由廢也。廢，滅。君子既知教之所由興，又知教之所由廢，然後可以爲人師也。故君子之教喻也，道而弗牽，強而弗抑，開而弗達。道，音導，下同。○道，示之以道塗也。抑，猶推也。開，爲發頭角。道而弗牽則和，強而弗抑則易，開而弗達則思。和易以思，可謂善喻

矣。易，以鼓反，下同。○思而得之則深。○學者有四失，教者必知之。人之學也，或失則多，或失則寡，或失則易，或失則止。此四者，心之莫同也。失於多，謂才少者。失於寡，謂才多者。失於易，謂好問不識者。失於止，謂好思不問者。○張子曰：爲人則多，好高則寡，不察則易，苦難則止。知其心，然後能救其失也。救其失者，多與易則抑之，寡與止則進之。教也者，長善而救其失也。長，丁丈反，下同。善歌者，使人繼其聲；善教者，使人繼其志。言爲之善者，則後人樂放效。○今按：注說非是。繼聲、繼志，皆謂微發其端而不究其說，使人有所玩索而自得之也。其言也約而達，微而臧，罕譬而喻，可謂繼志矣。師說之明，則弟子好述之，其言少而解臧，善也。○今按：二者皆不務多言而使人自得之意。○君子知至學之難易，而知其美惡，然後能博

①「而」字，原脫，據元明本、寬文本、賀本補。

喻；能博喻，然後能爲師；能爲師，然後能爲長；能爲長，然後能爲君。美惡，說之是非也。

長，達官之長。○張子曰：知學者至于學之難易，又知其資質才性之美惡也。故師也者，所以學爲君也。

弟子學於師，學爲君。○今詳上文，此但謂能爲師以教人，

則能爲君以治人耳。是故擇師不可不慎也。師善

則善。○今按：此言能爲師者，其人難得，故不可不擇也。

記曰「三王四代唯其師」，此之謂乎！四代，

虞、夏、商、周。○凡學之道，嚴師爲難。嚴，尊敬

也。師嚴然後道尊，道尊然後民知敬學。是

故君之所不臣於其臣者二：當其爲尸，則弗

臣也；當其爲師，則弗臣也。尸，主也，爲祭主

也。大學之禮，雖詔於天子，無北面，所以尊

師也。尊師，重道焉，不使處臣位也。武王踐阼，召師尚

父而問焉，曰：昔黃帝、顓頊之道存乎意，亦忽不可得見

與？師尚父曰：在丹書。王欲聞之，則齊矣。王齊三日，

端冕。師尚父亦端冕奉書而入，負屏而立。王下堂南面而

立。師尚父曰：先王之道不北面。王行西折而南，東面而

立，師尚父西面道書之言。○皇氏曰：王在賓位，師尚父

在主位，此王廷之位。若尋常師徒之教，則師東面，弟子西

面，與此異也。○善學者，師逸而功倍，又從而

庸之。不善學者，師勤而功半，又從而怨之。

從，隨也。庸，功也。功之，受其道有功於己。善問者

如攻堅木，先其易者，後其節目，及其久也，

相說以解。不善問者反此。說，音悅。○言先易

後難以漸入。善待問者如撞鐘，叩之以小者則

小鳴，叩之以大者則大鳴，待其從容，然後盡

其聲。不善答問者反此。撞，丈江反。叩，音口。

○從，讀如富父春戈之春。春容，謂重撞擊也，始者一聲而

已。學者既開其端意，進而復問，乃極說之，如撞鐘之成聲

矣。從，或爲「松」。○今按：注說非是。從容，正謂聲之

餘韻從容而將盡者也，言必答盡所問之意，然後止也。此

皆進學之道也。此皆善問善答也。○記問之學，

不足以爲人師，記問，謂豫誦雜難雜說，至講時爲學者

論之。此或時師不心解，或學者所未能問。必也其聽

語乎。必待其問乃說之。力不能問，然後語之。

語之而不知，雖舍之可也。語，魚據反。舍，音捨。

○舍之，須後。○良冶之子，必學爲裘；仍見其家

鋼補穿鑿之器也。補器者，其金柔乃合，有似於爲裘。良

弓之子，必學爲箕。仍見其家撓角幹也。撓角幹者，

其材宜調，調乃三體相勝，有似於爲楊柳之箕。始駕馬

者反之，車在馬前。以言仍見則貫，即事易也。○疏

曰：始駕者，謂馬駒始學駕車之時。前此既未駕車，若忽

駕之，必當驚奔，故以大馬牽車於前而繫駒於後，使此駒日

日見車之行，俟其慣習而後駕之，乃不驚也。君子察於

此三者，可以有志於學矣。仍讀先王之道，則爲來

事不惑。○古之學者，比物醜類。以事相況而爲

之。醜，猶比也。醜，或爲「計」。○今詳文意，此句合屬上

章，仍有闕文。鼓無當於五聲，五聲弗得不和；

水無當於五色，五色弗得不章；學無當於五

官，五官弗得不治；師無當於五服，五服弗

得不親。當，丁浪反。○當，猶主也。五服，斬衰至緦

麻之親。君子曰：「大德不官，謂君也。○今按：

注說非是。但言大德者不但能專一官之事，若《荀子》所謂

「精於道者兼物物」也。大道不器，謂聖人之道，不如器

施於一物。大信不約，謂若「胥命於蒲」，無盟約。○今

按：注說亦非。此謂如天地四時不言而信者也。大時

不齊。或時以生，或時以死。○疏云：春夏華卉自生而

薺麥自死，秋冬草木自死而薺麥自生，故云不齊。不齊，爲

諸齊之本也。察於此四者，可以有志於本矣。」

本立而道生。言以學爲本，則其德於民無不化，於俗無不

成。三王之祭川也，皆先河而後海，或源也，

或委也，此之謂務本。委，於魏反。○源，泉所出

也。委，流所聚也。始出一勺，卒成不測。○疏曰：源，則

河也。委，則海也。申明先河後海之義也。○今詳此言所

以先河後海者，以其或是源，故先之；或是委，故後之。疏

有二說，此說是也。

## 大學第二十八大，舊音泰，今讀如字。學禮十一

子程子曰：「《大學》，孔氏之遺書，而

初學入德之門也。」於今可見古人爲學次第者，獨賴此篇之存，而《論》、《孟》次之。學者必由是而學焉，則庶乎其不差矣。

大學之道，在明明德，在親民，在止於至善。程子曰：親，當作「新」。○大學者，大人之學也。

明，明之也。明德者，人之所得乎天，而虛靈不昧，以具衆理而應萬事者也。但爲氣稟所拘，人欲所蔽，則有時而昏。然其本體之明，則有未嘗息者。故學者當因其所發而遂明之，以復其初也。新者，革其舊之謂也，言既自明其明德，又當推以及人，使之亦有以去其舊染之污也。止者，必至於是不遷之意。至善，則事理當然之極也。言明明德、新民，皆當至於至善之地而不遷。蓋必其有以盡夫天理之極，而無一毫人慾之私也。此三者，大學之綱領也。知止而后有定，定而后能靜，靜而后能安，安而后能慮，慮而后能得。后，與「後」同，後放此。○止者，所當止之地，即至善之所在也。知之，則志有定向。靜，謂心不妄動。安，謂所處而安。慮，謂處事精詳。得，謂得其所以止。物有本末，事有終始，知所先後，

則近道矣。明德爲本，新民爲末，知止爲始，能得爲終。本始所先，末終所後。此結上文兩節之意。古之欲明明德於天下者，先治其國；欲治其國者，先齊其家；欲齊其家者，先修其身；欲修其身者，先正其心；欲正其心者，先誠其意；欲誠其意者，先致其知，致知在格物。治，平聲，後放此。○「明明德於天下者」，使天下之人皆有以明其明德也。心者，身之所主也。誠，實也。意者，心之所發也。實其心之所發，欲其於善而無自欺也。致，推極也。知，猶識也。推極吾之知識，欲其所知無不盡也。格，至也。物，猶事也。窮至事物之理，欲其極處無不到也。此八者，《大學》之條目也。物格而后知至，知至而后意誠，意誠而后心正，心正而后身修，身修而后家齊，家齊而后國治，國治而后天下平。治，去聲，後放此。○物格者，物理之極處無不到也。知至者，吾心之所知無不盡也。知既盡，則意可得而實矣；意既實，則心可得而正矣。修身以上，明明德之事也。齊家以下，新民之事也。物格知至，則知所止矣。意誠以下，則皆

得所止之序也。自天子以至於庶人，壹是皆以修身爲本。壹是，一切也。正心以上，皆所以修身也。齊家以下，則舉此而措之耳。其本亂而末治者否矣。其所厚者薄，而其所薄者厚，未之有也。本，謂身也。所厚，謂家也。此兩節結上文兩節之意。

### 右經一章，蓋孔子之言而曾子述之。

凡三百五字。其傳十章，則曾子之意而門人記之也。舊本頗有錯簡，今因程子所定，而更考經文，別爲序次如左。凡千五百四十六字。○凡傳文，雜引經傳，若無統紀，然文理接續，血脉貫通，深淺始終，至爲精密。熟讀詳味，久當見之，今不盡釋也。

《康誥》曰：「克明德。」《康誥》、《周書》。克，能也。《大甲》曰：「顧諟天之明命。」大，讀作泰。諟，占「是」字。○《大甲》、《商書》。顧，謂常日在之也。諟，猶此也，或曰審也。天之明命，即天之所以與我，而我之所以爲德者也。常日在之，則無時不明矣。《帝典》曰：「克明峻德。」峻，《書》作「俊」。○《帝典》、《堯

典》、《虞書》。峻，大也。皆自明也。結所引書，皆言自明已德之意。

右傳之首章，釋明明德。此通下三章至「止於信」，舊本誤在「沒世不忘」之下。

湯之盤銘曰：「苟日新，日日新，又日新。」盤，沐浴之盤也。銘，名其器以自警之辭也。苟，誠也。湯以人之洗濯其心以去惡，如沐浴其身以去垢，故銘其盤。言誠能一日有以滌其舊染之污而自新，則當因其已新者而日日新之，又日新之，不可略有間斷也。《康誥》曰：「作新民。」鼓之舞之之謂作，言振起其自新之民也。《詩》曰：「周雖舊邦，其命維新。」《詩》、《大雅》、《文王》之篇。言周國雖舊，至於文王，能新其德，以及於民，而始受天命也。是故君子無所不用其極。自新、新民，皆欲止於至善也。

### 右傳之二章，釋新民。

《詩》云：「邦畿千里，惟民所止。」《詩》、《商頌》、《玄鳥》之篇。邦畿，王者之都也。止，居也，言物各有所當止之處也。《詩》云：「緡蠻黃鳥，止于丘

隅。」子曰：「於止，知其所止，可以人而不如鳥乎！」緝，《詩》作「綿」。○《詩》，《小雅·綿蠻》之篇。綿蠻，鳥聲。丘隅，岑蔚之處。「子曰」以下，孔子說《詩》之辭，言人當知所常止之處也。《詩》云：「穆穆文王，於緝熙敬止。」為人君，止於仁；為人臣，止於敬；為人子，止於孝；為人父，止於慈；與國人交，止於信。於緝之於，音烏。○《詩》，《文王》之篇。穆穆，深遠之意。於，嘆美辭。緝，繼續也。熙，光明也。敬止，言其無不敬而安所止也。引此而言聖人之止，無非至善。五者乃其日之大者也，學者於此究其精微之蘊，而又推類以盡其餘，則於天下之事皆有以知其所止而無疑矣。《詩》云：「瞻彼淇澳，萋竹猗猗。有斐君子，如切如磋，如琢如磨。瑟兮僩兮，赫兮喧兮。有斐君子，終不可諠兮。」如切如磋者，道學也。如琢如磨者，自修也。瑟兮僩兮者，恂慄也。赫兮喧兮者，威儀也。有斐君子，終不可諠兮者，道盛德至善，民之不能忘也。澳，於六反。萋，《詩》作「綠」。猗，叶韻，音阿。僩，下版反。喧，《詩》作「嘒」；諠，《詩》作「諶」，並況晚反。恂，鄭氏讀作峻。○《詩》，《衛風·淇澳》之篇。淇，水名。澳，隈也。猗猗，美盛貌。興也。斐，文貌。切以刀鋸，琢以椎鑿，皆裁物使成形質也。磋以鑢錫，①磨以沙石，皆治物使其滑澤也。治骨角者，既切而復磋之；治玉石者，既琢而復磨之；皆言其治之有緒而益致其精也。瑟，嚴密之貌。僩，武毅之貌。赫喧，宣著盛大之貌。諠，忘也。道，言也。學，謂講習討論之事。自修者，省察克治之功。恂慄，戰懼也。威，可畏也。儀，可象也。引《詩》而釋之，以明「明明德」者之止於至善。道學，自修，言其所以得之之由。恂慄、威儀，言其德容表裏之盛。卒乃指其實而嘆美之也。《詩》云：「於戲，前王不忘！」君子賢其賢而親其親，小人樂其樂而利其利，此以没世不忘也。於戲，音嗚呼。樂，音洛。○《詩》，《周頌·烈文》之篇。於戲，嘆辭。前王，謂文、武也。君子，謂其後賢後王。小人，謂後民也。此言前王所以新民者止於

能忘也。澳，於六反。萋，《詩》作「綠」。猗，叶韻，音阿。僩，下版反。喧，《詩》作「嘒」；諠，《詩》作「諶」，並況晚反。恂，鄭氏讀作峻。○《詩》，《衛風·淇澳》之篇。淇，水名。澳，隈也。猗猗，美盛貌。興也。斐，文貌。切以刀鋸，琢以椎鑿，皆裁物使成形質也。磋以鑢錫，①磨以沙石，皆治物使其滑澤也。治骨角者，既切而復磋之；治玉石者，既琢而復磨之；皆言其治之有緒而益致其精也。瑟，嚴密之貌。僩，武毅之貌。赫喧，宣著盛大之貌。諠，忘也。道，言也。學，謂講習討論之事。自修者，省察克治之功。恂慄，戰懼也。威，可畏也。儀，可象也。引《詩》而釋之，以明「明明德」者之止於至善。道學，自修，言其所以得之之由。恂慄、威儀，言其德容表裏之盛。卒乃指其實而嘆美之也。《詩》云：「於戲，前王不忘！」君子賢其賢而親其親，小人樂其樂而利其利，此以没世不忘也。於戲，音嗚呼。樂，音洛。○《詩》，《周頌·烈文》之篇。於戲，嘆辭。前王，謂文、武也。君子，謂其後賢後王。小人，謂後民也。此言前王所以新民者止於

①「錫」，原作「錫」，據元明本、寬文本、賀本改。

至善，能使天下後世無一物不得其所，所以既沒世而人思慕之，愈久而不忘也。此兩節咏嘆淫佚，其味深長，當熟玩之。

右傳之三章，釋止於至善。此章內自引

《淇澳》詩以下，舊本誤在「誠意」章下。

子曰：「聽訟，吾猶人也，必也使無訟乎！」無情者不得盡其辭，大畏民志，此謂知本。猶人，不異於人也。情，實也。引夫子之言，而言聖人能使無實之人不敢盡其虛誕之辭。蓋我之明德既明，自然有以畏服民之心志，故訟不待聽而自無也。觀於此言，可以知本末之先後矣。

右傳之四章，釋本末。此章舊本誤在「止於信」下。

此謂知本，程子曰：衍文也。此謂知之至也。此句之上別有闕文，此特其結語耳。

右傳之五章，蓋釋格物致知之義，而今亡矣。此章舊本通下章，誤在經文之下。閒嘗

竊取程子之意以補之曰：「所謂致知在格物者，言欲致吾之知，在即物而窮其理也。蓋人心之靈莫不有知，而天下之物莫不有理，惟於理有未窮，故其知有不盡也。是以《大學》始教，必使學者即凡天下之物，莫不因其已知之理而益窮之，以求至乎其極。至於用力之久，而一旦豁然貫通焉，則衆物之表裏精粗無不到，而吾心之全體大用無不明矣。此謂物格，此謂知之至也。」

所謂誠其意者，毋自欺也。如惡惡臭，如好好色，此之謂自謙，故君子必慎其獨也。惡，好，上字皆去聲。謙，讀爲慊，苦勑反。○誠其意者，自修之首也。毋者，禁止之辭。自欺云者，知爲善以去惡，而心之所發有未實也。謙，快也，①足也。獨者，人所不知而

① 快，原作「快」，據寬文本、賀本改。



己所獨知之地也。言欲自修者知爲善以去其惡，則當實用其力，而禁止其自欺。使其惡惡則如惡臭，好善則如好色，皆務決去，而求必得之，以自快足於己，不可徒苟且以徇外而爲人也。然其實與不實，蓋有他人所不及知而已獨知之者，故必謹之於此以審其幾焉。小人閒居爲不善，無所不至，見君子而后厭然，揜其不善而著其善。人之視己如見其肺肝然，則何益矣。此謂誠於中，形於外，故君子必慎其獨也。閒，音閑。厭，鄭讀爲壓。○閒居，獨處也。厭然，銷

沮閉藏之貌。此言小人陰爲不善，而陽欲揜之，則是非不知善之當爲與惡之當去也，但不能實用其力以至此耳。然欲揜其惡而卒不可揜，欲詐爲善而卒不可詐，則亦何益之有哉！此君子所以重以爲戒，而必謹其獨也。曾子

曰：「十目所視，十手所指，其嚴乎！」引此以明上文之意。言雖幽獨之中，而其善惡之不可揜如此，可畏之甚也。富潤屋，德潤身，心廣體胖，故君子必誠其意。胖，步丹反。○胖，安舒也。言富則能潤屋矣，德則能潤身矣，故心無愧怍，則廣大寬平，而體常舒泰，

德之潤身者然也。蓋善之實於中而形於外者如此，故又言此以結之。

右傳之六章，釋誠意。經曰「欲誠其意，先

致其知」，又曰「知至而后意誠」，蓋心體之明有所未盡，則其所發必有不能實用其力，而苟焉以自欺者。然或已明而不謹乎此，則其所明又非己有，而無以爲進德之基。故此章之指必承上章而通考之，然後有以見其用力之始終，其序不可亂而功不可闕如此云。

所謂修身在正其心者：身有所忿懣，則不得其正；有所恐懼，則不得其正；有所好樂，則不得其正；有所憂患，則不得其正。程子曰：「身有之『身』當作『心』。」忿，弗粉反。懣，勑值反。好，樂，並去聲。○忿懣，怒也。蓋是四者，皆心之用，而人所不能無者。然一有之而不能察，則欲動情勝，而其用之所行，或不能不失其正矣。心不在焉，視而不見，聽而不聞，食而不知其味，心有不在則無以檢其身，是以君子必察乎此而敬以直之，然後此心常存而身無不修也。此謂修身在正其心。

右傳之七章，釋正心修身。此亦承上章

以起下章。蓋意誠則真，無惡而實有善矣，所以能存是心以檢其身。然或但知誠意，而不能密察此心之存否，則又無以直內而修身也。○自此以下，並以舊文爲正。

所謂齊其家在修其身者：人之其所親愛而辟焉，之其所賤惡而辟焉，之其所畏敬而辟焉，之其所哀矜而辟焉，之其所敖惰而辟焉。故好而知其惡，惡而知其美者，天下鮮矣。辟，讀爲僻。「惡而」之惡，敖、好，並去聲。鮮，上聲。○人，謂衆人。之，猶於也。辟，猶偏也。五者，在人本有當然之則，然常人之情惟其所向而不加審焉，則必陷於一偏而身不修矣。故諺有之曰：「人莫知其子之惡，莫知其苗之碩。」諺，音彥。碩，叶韻時若反。○諺，俗語也。溺愛者不明，貪得者無厭，是則偏之爲害，而家之所以不齊也。此謂身不修不可以齊其家。

右傳之八章，釋修身齊家。

所謂治國必先齊其家者：其家不可教而能教人者，無之。故君子不出家而成教於

國：孝者，所以事君也；弟者，所以事長也；慈者，所以使衆也。弟，去聲。長，上聲。○身修則家可教矣；孝、弟、慈，所以修身而教於家者也。然而國之所以事君、事長、使衆之道不外乎是，此所以家齊於上而教成於下也。《康誥》曰「如保赤子」，心誠求之，雖不中，不遠矣。未有學養子而后嫁者也。中，去聲。○此引《書》而釋之，又明立教之本不假強

爲，在識其端而推廣之耳。一家仁，一國興仁；一

家讓，一國興讓；一人貪戾，一國作亂：其機如此。此謂一言僨事，一人定國。僨，音奮。

○一人，謂君也。機，發動所由也。僨，覆敗也。此言教成於國之效。堯、舜帥天下以仁，而民從之；桀、紂帥天下以暴，而民從之；其所令反其所好，而民不從。是故君子有諸己而后求諸人，無諸己而后非諸人。所藏乎身不恕，而能喻諸人者，未之有也。好，去聲。○此又承上文

「一人定國」而言。有善於己，然後可以責人之善；無惡於

己，然後可以正人之惡。皆推己以及人，所謂恕也。不如是，則所令反其所好，而民不從矣。喻，曉也。故治國在齊其家。通結上文。《詩》云：「桃之夭夭，其葉蓁蓁。之子于歸，宜其家人。」宜其家人，而後可以教國人。夭，平聲。蓁，音臻。○《詩》，《周南·桃夭》之篇。夭夭，少好貌。蓁蓁，美盛貌。興也。之子，猶言是子，此指女子之嫁者而言也。婦人謂嫁曰歸。宜，猶善也。《詩》云：「宜兄宜弟。」宜兄宜弟，而後可以教國人。《詩》，《小雅·蓼蕭》篇。《詩》云：「其儀不忒，正是四國。」其爲父子兄弟足法，而後民法之也。《詩》，《曹風·鳴鳩》篇。忒，差也。此謂治國在齊其家。此三引《詩》，皆以咏嘆上文之事而又結之如此，其味深長，最宜潛玩。

### 右傳之九章，釋齊家治國。

所謂平天下在治其國者：上老老而民興孝，上長長而民興弟，上恤孤而民不倍，是

以君子有絜矩之道也。長，上聲。弟，去聲。倍，與「背」同。絜，胡結反。○老老，所謂老吾老也。興，謂有所感發而興起也。孤者，幼而無父之稱。絜，度也。矩，所以爲方也。言此三者，上行下效，捷於影響，所謂家齊而國治也。亦可以見人心之所同，而不可使一夫之不獲矣。是以君子必當因其所同，推以度物，使彼我之間各得分願，則上下四旁均齊方正而天下平矣。所惡於上，毋以使下；所惡於下，毋以事上；所惡於前，毋以先後；所惡於後，毋以從前；所惡於右，毋以交於左；所惡於左，毋以交於右：此之謂絜矩之道。惡，先，並去聲。○此覆解上文「絜矩」二字之義。如不欲上之無禮於我，則必以此度下之心，而亦不敢以此無禮使之。不欲下之不忠於我，則必以此度上之心，而亦不敢以此不忠事之。至於前後左右，無不皆然，則身之所處，上下四旁，長短廣狹，彼此如一，而無不方矣。彼同有是心而興起焉者，又豈有一夫之不獲哉？所操者約，而所及者廣，此平天下之要道也。故章內之意，皆自此而推之。《詩》云：「樂只君子，民之父母。」民

之所好好之，民之所惡惡之，此之謂民之父母。樂，音洛。只，音紙。好，惡，並去聲，下並同。

○《詩》，《小雅·南山有臺》之篇。只，語助辭。言能絜矩而以民心爲己心，則是愛民如子而民愛之如父母矣。

《詩》云：「節彼南山，維石巖巖。赫赫師尹，民具爾瞻。」有國者不可以不慎，辟則爲天下僇矣。節，讀爲截。辟，讀爲僻。僇，與戮同。○《詩》，

《小雅·節南山》之篇。節，截然高大貌。師尹，周太師尹氏也。具，俱也。辟，偏也。言在上者人所瞻仰，不可不謹。若不能絜矩而好惡徇於一己之偏，則身弑國亡，爲天下之大戮矣。《詩》云：「殷之未喪師，克配上帝。儀監于殷，峻命不易。」道得衆則得國，失衆則失國。喪，去聲。儀，《詩》作「宜」。峻，《詩》作

「駿」。易，去聲。○《詩》，《文王》篇。師，衆也。配，對也。配上帝，言其爲天下君而對乎上帝也。監，視也。峻，大也。不易，言難保也。道，言也。引《詩》而言此，以結上文兩節之意。有天下者能存此心而不失，則所以絜矩而與民同欲者，自不能已矣。是故君子先慎乎德。有德

此有人，有人此有土，有土此有財，有財此有用。先謹乎德，承上文不可不謹而言。德，即所謂明德。

有人，謂得衆。有土，謂得國。有國，則不患無財用矣。德者本也，財者末也。本上文而言。外本內末，

爭民施奪。人君以德爲外，以財爲內，則是爭鬪其民，而施之以劫奪之教也。蓋財者人之所同欲，不能絜矩而欲專之，則民亦起而爭奪矣。是故財聚則民散，財散

則民聚。外本內末故財聚，爭民施奪故民散，反是則有

德而有人矣。是故言悖而出者亦悖而入，貨悖而入者亦悖而出。悖，布內反。○悖，逆也。此以言之出入，明貨之出入也。自先謹乎德以下至此，又因財貨以明能絜矩與不能者之得失也。《康誥》曰：「惟命不于常。」道善則得之，不善則失之矣。道，言

也。因上文引《文王》詩之意而申言之，其丁寧反覆之意益深切矣。《楚書》曰：「楚國無以爲寶，惟善以爲寶。」《楚書》，《楚語》。言不寶金玉而寶善人也。舅犯曰：「亡人無以爲寶，仁親以爲寶。」舅犯，晉

文公舅狐偃，字子犯。亡人，文公時爲公子，出亡在外也。仁，愛也。事見《檀弓》。此兩節又明不外本而內末之意。《秦誓》曰：「若有一个臣，斷斷兮無他技，其心休休焉，其如有容焉。人之有技，若己有之。人之彥聖，其心好之，不啻若自其口出。寔能容之，以能保我子孫黎民，尚亦有利哉。人之有技，媚疾以惡之。人之彥聖，而違之，俾不通。寔不能容，以不能保我子孫黎民，亦曰殆哉。」个，古賀反，《書》作「介」。斷，丁亂反。媚，音冒。○《秦誓》，《周書》。斷斷，誠一之貌。彥，美士也。聖，通明也。尚，庶幾也。媚，忌也。違，拂戾也。殆，危也。唯仁人放流之，迸諸四夷，不與同中國。此謂唯仁人爲能愛人，能惡人。迸，讀爲屏，古字通用。○迸，猶逐也。言有此媚疾之人，妨賢而病國，則仁人必深惡而痛絕之。以其至公無私，故能得好惡之正如此也。見賢而不能舉，舉而不能先，命也。見不善而不能退，退而不能遠，過也。命，鄭氏云當作「慢」，程子云當作「怠」，未詳孰是。遠，去聲。○若此

者，知所愛惡矣，而未能盡愛惡之道，蓋君子而未仁者也。好人之所惡，惡人之所好，是謂拂人之性，菑必逮夫身。菑，古「災」字。夫，音扶。○拂，逆也。好善而惡惡，人之性也。至於拂人之性，則不仁之甚者也。自《秦誓》至此，又皆以申言好惡公私之極，以明上文所引《南山有臺》、《節南山》之意。是故君子有大道，必忠信以得之，驕泰以失之。君子，以位言之。道，謂居其位而修己治人之術。發己白盡爲忠，循物無違謂信。驕者矜高，泰者侈肆。此因上所引《文王》、《康誥》之意而言。章內三言得失，①而語益加切，蓋至此而天理存亡之幾決矣。生財有大道，生之者衆，食之者寡，爲之者疾，用之者舒，則財恒足矣。恒，胡登反。○呂氏曰：國無遊民，則生者衆矣；朝無幸位，則食者寡矣；不奪農時，則爲之疾矣；量入爲出，則用之舒矣。愚按：此因有土有財而言，以明足國之道在乎務本而節用，非必外本內末而後財可聚也。自此以至終篇，皆一意

①「三」，原作「一」，據元明本、寬文本、賀本改。

也。仁者以財發身，不仁者以身發財。發，猶起也。仁者散財以得民，不仁者亡身以殖貨。未有上好仁而下不好義者也，未有好義其事不終者也，未有府庫財非其財者也。上好仁以愛其下，則下好義以忠其上。所以事必有終，而府庫之財無悖出之患也。孟獻子曰：「畜馬乘，不察於雞豚；伐冰之家，不畜牛羊；百乘之家，不畜聚斂之臣。與其有聚斂之臣，寧有盜臣。」此謂國不以利爲利，以義爲利也。畜，許六反。乘，斂，並去聲。○孟獻子，魯之賢大夫仲孫蔑也。畜馬乘，士初試爲大夫者也。伐冰之家，卿大夫以上喪祭用冰者也。百乘之家，有采地者也。君子寧亡己之財，而不忍傷民之力，故寧有盜臣而不畜聚斂之臣。「此謂」以下釋獻子之言也。長國家而務財用者，必自小人矣。彼爲善之，小人之使爲國家，菑害並至。雖有善者，亦無如之何矣。此謂國不以利爲利，以義爲利也。長，上聲。「彼爲善之」此句上下疑有闕文誤字。

○自，由也，言由小人導之也。此一節深明以利爲利之害，而重言以結之，其丁寧之意切矣。

右傳之十章，釋治國平天下。此章之義，務在與民同好惡而不專其利，皆推廣絮矩之意也。能如是，則親賢樂利各得其所而天下平矣。凡傳十章，前四章統論綱領指趣，後六章細論條目工夫。其第五章乃明善之要，第六章乃誠身之本，在初學尤爲當務之急，讀者不可以其近而忽之也。

儀禮經傳通解卷第十六終

## 儀禮經傳通解卷第十七

中庸第二十九 中者，不偏不倚，無過不及之名。庸，平

常也。

### 學禮十二

子程子曰：「不偏之謂中，不易之謂庸。中者，天下之正道；庸者，天下之定理。」此篇乃孔門傳授心法，子思恐其久而差也，故筆之於書以授孟子。其書始言一理，中散爲萬事，末復合爲一理。「放之則彌六合，卷之則退藏於密。」某味無窮，皆實學也。善讀者玩索而有得焉，則終身用之有不能盡者矣。

天命之謂性，率性之謂道，修道之謂教。

命，猶令也。性，即理也。天以陰陽五行化生萬物，氣以成形，而理亦賦焉，猶命令也。於是人物之生，因各得其所賦

之理，以爲健順五常之德，<sup>①</sup>所謂性也。率，循也。道，猶路也。人物各循其性之自然，則其日用事物之間莫不各有當行之路，是則所謂道也。修，品節之也。性道雖同，而氣稟或異，故不能無過不及之差，聖人因人物之所當行者而品節之，以爲法於天下，則謂之教，若禮、樂、刑、政之屬是也。蓋人之所以爲人，道之所以爲道，聖人之所以爲教，原其所自，無一不本於天而備於我。學者知之，則其於學知所用力而自不能已矣。故子思於此首發明之，讀者所宜深體而默識也。道也者，不可須臾離也，可離非道也。是故君子戒慎乎其所不睹，恐懼乎其所不聞。離，去聲。○道者，日用事物當行之理，皆性之德而具於心，無物不有，無時不然，所以不可須臾離也。若其可離，則爲外物而非道矣。是以君子之心常存敬畏，雖不見聞，亦不敢忽，所以存天理之本然，而不使離於須臾之頃也。莫見乎隱，莫顯乎微，故君子慎其獨也。見，音現。○隱，暗處也。微，細事也。獨者，人所不知而已所獨知之地也。言幽暗之中，細微之事，跡雖未形

①「常」，原作「當」，據元明本、寬文本、賀本改。

而幾則已動，人雖不知而已獨知之，則是天下之事無有著見明顯而過於此者。是以君子既常戒懼，而於此尤加謹焉，所以遏人欲於將萌，而不使其滋長於隱微之中，以至離道之遠也。喜怒哀樂之未發謂之中，發而皆中節謂之和。中也者，天下之大本也；和也者，天下之達道也。樂，音洛。中節之中，去聲。○喜、怒、哀、樂，情也。其未發，則性也，無所偏倚，故謂之中。發皆中節，情之正也，無所乖戾，故謂之和。大本者，天命之性，天下之理皆由此出，道之體也。達道者，循性之謂，天下古今之所共由，道之用也。此言性情之德，以明道不可離之意。致中和，天地位焉，萬物育焉。致，推而極之也。位者，安其所也。育者，遂其生也。自戒懼而約之，以至於至靜之中，無少偏倚，而其守不失，則極其中而天地位矣；自謹獨而精之，以至於應物之處，無少差謬，而無適不然，則極其和而萬物育矣。蓋天地萬物本吾一體，吾之心正則天地之心亦正矣，吾之氣順則天地之氣亦順矣，故其效驗至於如此。此學問之極功，聖人之能事，初非有待於外，而修道之教亦在其中矣。是其一體，用雖有動靜之殊，然必其體立而後用有以行，則其實亦非

有兩事也。故於此合而言之，以結上文之意。

右第一章。子思述所傳之意以立言：首明道之本原出於天而不可易，其實體備於己而不可離。次言存養省察之要，終言聖神功化之極。蓋欲學者於此反求諸身而自得之，以去夫外誘之私而充其本然之善，楊氏所謂一篇之體要是也。其下十章，蓋子思引夫子之言以終此章之義。

仲尼曰：「君子中庸，小人反中庸。中庸者，不偏不倚，無過不及而平常之理，乃天命所當然，精微之極致也。唯君子為能體之，小人反是。君子之中庸也，君子而時中；小人之中庸也，小人而無忌憚也。」王肅本作「小人之反中庸也」，程子亦以為然，今從之。○君子之所以為中庸者，以其有君子之德而又能隨時以處中也；小人之所以反中庸者，以其有小人之心而又無所忌憚也。蓋中無定體，隨時而在，是乃平常之理也。君子知其在我，故能戒謹不睹、恐懼不聞而無時不中。小人不知有此，則肆欲妄行而無所忌憚矣。



右第二章。此下十章皆論中庸，以釋首章之義，文

雖不屬而意實相承也。變和言庸者，游氏曰：以性情言之，則曰中和，以德行言之，則曰中庸是也。然中庸之中，實兼中和之義。

子曰：「中庸其至矣乎，民鮮能久矣！」

鮮，上聲，下同。○過則失中，不及則未至，故惟中庸之德爲至。然亦人所同得，初無難事，但世教衰，民不興行，故鮮能之，今已久矣。《論語》無「能」字。

### 右第三章。

子曰：「道之不行也，我知之矣，知者過

之，愚者不及也；道之不明也，我知之矣，賢者過之，不肖者不及也。知者之知，去聲。○道

者，天理之當然，中而已矣。知愚、賢不肖之過不及，則生稟之異而失其中也。知者知之過，既以道爲不足行，愚者不及知，又不知所以行，此道之所以常不行也；賢者行之過，既以道爲不足知，不肖者不及行，又不求所以知，此道之所以常不明也。人莫不飲食也，鮮能知味也。」道不可離，人自不察，是以有過不及之弊。

右第四章。

子曰：「道其不行矣夫！」夫，音扶。○由不明，故不行。

右第五章。此章承上章而舉其不行之端，以起下章之意。

子曰：「舜其大知也與！舜好問而好

察邇言，隱惡而揚善，執其兩端，用其中於民，其斯以爲舜乎！」知，去聲。與，平聲。好，去

聲。○舜之所以爲大知者，以其不自用而取諸人也。邇言者，淺近之言，猶必察焉，其無遺善可知。然於其言之未善者則隱而不宣，其善者則播而不匿，其廣大光明又如此，則人孰不樂告以善哉？兩端，謂衆論不同之極致。蓋凡物皆有兩端，如小大、厚薄之類。於善之中又執其兩端，而量度以取中，然後用之，則其擇之審而行之至矣。然非在我之權度精切不差，何以與此？此知之所以無過不及，而道之所以行也。

右第六章。

子曰：「人皆曰『予知』，驅而納諸罟獲

陷阱之中而莫之知辟也。人皆曰「予知」，擇乎中庸而不能期月守也。」予知之知，去聲。罟，音古。獲，胡化反。阱，才性反。辟，避同。期，居之反。○罟，網也；獲，機檻也；陷阱，坑坎也；皆所以擒取禽獸者也。擇乎中庸，辨別衆理，以求所謂中庸，即上章好問、用中之事也。期月，匝一月也。言知禍而不知辟，以況能擇而不能守，皆不得爲知也。

右第七章。承上章「大知」而言，又舉不明之端，以起下章也。

子曰：「回之爲人也，擇乎中庸，得一善，則拳拳服膺而弗失之矣。」回，孔子弟子顏淵名。拳拳，奉持之貌。服，猶著也。膺，胸也。奉持而著之心胸之間，言能守也。顏子蓋真知之，故能擇能守如此，此行之所以無過不及，而道之所以明也。

### 右第八章。

子曰：「天下國家可均也，爵祿可辭也，白刃可蹈也，中庸不可能也。」均，平治也。三者亦知、仁、勇之事，天下之至難也，然不必其合於中庸，則質

之近似者皆能以力爲之。若中庸，則雖不必皆如三者之難，然非義精仁熟而無一毫人欲之私者，不能及也。三者難而易，中庸易而難，此民之所以鮮能也。

### 右第九章。亦承上章以起下章。

子路問強，子路，孔子弟子仲由也。子路好勇，故問強。子曰：「南方之強與？北方之強與？抑而強與？」與，平聲。○抑，語辭。而，汝也。寬柔以教，不報無道，南方之強也，君子居之。寬柔以教，謂含容巽順以誨人之不及也。不報無道，謂橫逆之來，直受之而不報也。南方風氣柔弱，故以含忍之力勝人爲強，君子之道也。衽金革，死而不厭，北方之強也，而強者居之。衽，席也。金，戈兵之屬。革，甲冑之屬。北方風氣剛勁，故以果敢之力勝人爲強，強者之事也。故君子和而不流，強哉矯！中立而倚，強哉矯！國有道，不變塞焉，強哉矯！國無道，至死不變，強哉矯！」此四者，汝之所當強也。矯，強貌，《詩》曰「矯矯虎臣」是也。倚，偏著也。塞，未達也。國有道，不變未達之所守；國無道，不變平生

之所守也。此則所謂中庸之不可能者，非有以自勝其人欲之私，不能擇而守也。君子之強，孰大於是？夫子以是告子路者，所以抑其血氣之剛，而進之以德義之勇也。

### 右第十章。

子曰：「素隱行怪，後世有述焉，吾弗爲之矣。」素，按《漢書》當作「索」，蓋字之誤也。素隱行怪，

言深求隱僻之理，而過爲詭異之行也。然以其足以欺世而盜名，故後世或有稱述之者。此知之過而不擇乎善，行之過而不用其中，不當強而強者也，聖人豈爲之哉！君子

遵道而行，半塗而廢，吾弗能已矣。遵道而行，

則能擇乎善矣；半塗而廢，則力之不足也。此其知雖足以及之，而行有不逮，當強而不強者也。已，止也。聖人於此非勉焉而不敢廢，蓋至誠無息，自有所不能止也。君子

依乎中庸，遯世不見知而不悔，唯聖者能

之。」不爲索隱行怪，則依乎中庸而已。不能半塗而廢，是

以遯世不見知而不悔也。此中庸之成德，知之盡，仁之至，不賴勇而裕如者，正吾夫子之事，而猶不自居也。故曰「唯聖者能之」而已。

### 右第十一章。子思所引夫子之言，以明首章

之義者止此。蓋此篇大旨，以知、仁、勇三達德爲人道之門，故於篇首即以大舜、顏淵、子路之事明之。舜，知也；顏淵，仁也；子路，勇也。三者廢其一，則無以造道而成德矣。餘見第二十章。

君子之道費而隱。費，符味反。○費，用之廣

也。隱，體之微也。夫婦之愚可以與知焉，及其

至也，雖聖人亦有所不知焉；夫婦之不肖可

以能行焉，及其至也，雖聖人亦有所不能焉。

天地之大也，人猶有所憾。故君子語大，天

下莫能載焉；語小，天下莫能破焉。與，去聲。

○君子之道，近自夫婦居室之間，遠而至於聖人天地之所不能盡，其大無外，其小無內，可謂費矣。然其理之所以

然，則隱而莫之見也。蓋可知、可能者，道中之一事，及其

至而聖人不知、不能，則舉全體而言，聖人固有所不能盡

也。侯氏曰：聖人所不知，如孔子問禮，問官之類，所不

能，如孔子不得位，堯舜病博施之類。愚謂：人所憾於天

地，如覆載生成之偏，及寒暑災祥之不得其正者。《詩》

云：「鳶飛戾天，魚躍于淵。」言其上下察也。鳶，余專反。○《詩》：《大雅·旱麓》之篇。鳶，鵞鵝類。戾，至也。察，著也。子思引此詩以明化育流行，上下昭著，莫非此理之用，所謂費也。然其所以然者，則非見聞所及，所謂隱也。故程子曰：此一節子思嚶緊爲人處，活潑潑地。讀者其致思焉。君子之道，造端乎夫婦，及其至也，察乎天地。結上文。

右第十二章。子思之言，蓋以申明首章道不可離之意也。其下八章，雜引孔子之言以明之。

子曰：「道不遠人。人之爲道而遠人，不可以爲道。道者，率性而已，固衆人之所能知能行者也，故常不遠於人。若爲道者，厭其卑近以爲不足爲，而反務爲高遠難行之事，則非所以爲道矣。《詩》云：

『伐柯伐柯，其則不遠。』執柯以伐柯，睨而視之，猶以爲遠。故君子以人治人，改而止。睨，研計反。○《詩》：《邶風·伐柯》之篇。柯，斧柄。則，法也。睨，邪視也。言人執柯伐木以爲柯者，彼柯長短之

法，在此柯耳。然猶有彼此之別，故伐者視之猶以爲遠也。若以人治人，則所以爲人之道，各在當人之身，初無彼此之別。故君子之治人也，即以其人之道還治其人之身。其人能改，即止不治。蓋責之以其所能知能行，非欲其遠人以爲道也。張子所謂「以衆人望人，則易從」是也。忠恕違道不遠，施諸己而不願，亦勿施於人。盡己之心爲忠，推己及人爲恕。違，去也，如《春秋傳》齊師「違穀七里」之違。言自此至彼，相去不遠，非背而去之之謂也。道，即其不遠人者是也。「施諸己而不願，亦勿施於人」，忠恕之事也。以己之心度人之心，未嘗不同，則道之不遠於人者可見。故己之所不欲，則勿以施之於人，亦不遠人以爲道之事。張子所謂「以愛己之心愛人，則盡仁」是也。君子之道四，丘未能一焉：所求乎子，以事父，未能也；所求乎臣，以事君，未能也；所求乎弟，以事兄，未能也；所求乎朋友，先施之，未能也。庸德之行，庸言之謹，有所不足，不敢不勉，有餘不敢盡。言顧行，行顧言，君子胡不慥慥爾。」子、臣、弟、友，四字絕句。

○求，猶責也。道不遠人，凡己之所以責人者，皆道之所當然也，故反之以自責而自修焉。庸，平常也。行者，踐其實。謹者，擇其可。德不足而勉，則行益力；言有餘而訥，則謹益至。謹之至則言顧行矣，行之力則行顧言矣。慥慥，篤實貌。言君子之言行如此，豈不慥慥乎！贊美之也。凡此皆不遠人以爲道之事，張子所謂「以責人之心責己，則盡道」是也。

右第十三章。「道不遠人」者，夫婦所能，「丘

未能」者，聖人所不能，皆費也。而其所以然者，則至隱存焉。下章放此。

君子素其位而行，不願乎其外。素，猶見

在也。言君子但因見在所居之位而爲其所當爲，無慕乎其外之心也。素富貴，行乎富貴；素貧賤，行乎貧賤；素夷狄，行乎夷狄；素患難，行乎患難，君子無人而不自得焉。難，去聲。○此言素其位而行也。在上位不陵下，在下位不援上，正己而不求於人，則無怨。上不怨天，下不尤人。援，平聲。○此言不願乎其外也。故君子居易

以俟命，小人行險以徼幸。易，去聲。○易，平地也。居易，素位而行也。俟命，不願乎外也。徼，求也。幸，謂所不當得而得者。子曰：「射有似乎君子，失諸正鵠，反求諸其身。」正，音征。鵠，工毒反。○畫布曰正，棲皮曰鵠，皆侯之中，射之的也。子思引此孔子之言，以結上文之意。

右第十四章。子思之言也。凡章首無「子

曰」字者放此。

君子之道，辟如行遠必自邇，辟如登高必自卑。辟，譬同。詩曰：「妻子好合，如鼓瑟琴。兄弟既翕，和樂且耽。宜爾室家，樂爾妻帑。」好，去聲。耽，《詩》作「湛」，亦音耽。樂，音洛。○《詩》、《小雅·常棣》之篇。鼓瑟琴，和也。翕，亦合也。耽，亦樂也。帑，子孫也。子曰：「父母其順矣乎！」夫子誦此詩而贊之曰：人能和睦於妻子，宜於兄弟如此，則父母其安樂之矣。子思引《詩》及此語，以明行遠自邇、登高自卑之意。

右第十五章。

子曰：「鬼神之爲德，其盛矣乎！」程子

曰：鬼神，天地之功用，而造化之迹也。張子曰：鬼神者，二氣之良能也。愚謂：以二氣言，則鬼者陰之靈也，神者陽之靈也。以一氣言，則至而伸者爲神，反而歸者爲鬼，其實一物而已。爲德，猶言性情功效。視之而弗見，聽之而弗聞，體物而不可遺。鬼神無形與聲，然物之終始，莫非陰陽合散之所爲，是其爲物之體，而物所不能遺也。其言體物，猶《易》所謂「幹事」。使天下之人齊明盛服以承祭祀，洋洋乎！如在其上，如在其左右。齊，側皆反。○齊之爲言齊也，所以齊不齊而致其齊也。明，猶潔也。洋洋，流動充滿之意。能使人畏敬奉承，而發見昭著如此，乃其體物而不可遺之驗也。孔子曰：「其氣發揚於上爲昭明，焄蒿悽愴，此百物之精也，神之著也。」正謂此爾。《詩》曰：「神之格思，不可度思，矧可射思。」度，待洛反。射，音亦，《詩》作「數」。○《詩》、《大雅·抑》之篇。格，來也。矧，況也。射，厭也，言厭怠而不敬也。思，語辭。夫微之顯，誠之不可揜如此夫！夫，音扶。○誠者，真實無妄之

謂。陰陽合散，無非實者。故其發見之不可揜如此。

右第十六章。不見不聞，隱也。體物如在，則亦費矣。此前三章以其費之小者而言，此後三章以其費之大者而言，此一章兼費隱、包小大而言。

子曰：「舜其大孝也與！德爲聖人，尊爲天子，富有四海之內，宗廟饗之，子孫保之。與，平聲。○子孫，謂虞思、陳胡公之屬。故大德必得其位，必得其祿，必得其名，必得其壽。舜年百有十歲。故天之生物，必因其材而篤焉。故栽者培之，傾者覆之。材，質也。篤，厚也。栽，植也。氣至而滋息爲培，氣反而游散則覆。《詩》曰：『嘉樂君子，憲憲令德。宜民宜人，受祿于天。保佑命之，自天申之。』《詩》、《大雅·假樂》之篇。假，當依此作「嘉」。憲，當依《詩》作「顯」。申，重也。故大德者，必受命。」受命者，受天命爲天子也。

右第十七章。此由庸行之常，推之以極其至，見道之用廣也。而其所以然者，則爲體微矣。後二

章亦此意。

子曰：「無憂者，其惟文王乎！以王季

爲父，以武王爲子。父作之，子述之。」此言文

王之事。《書》言「王季其勤王家」，蓋其所作，亦積功累仁

之事也。武王纘太王、王季、文王之緒，壹戎

衣而有天下。身不失天下之顯名，尊爲天

子，富有四海之內，宗廟饗之，子孫保之。」大

音泰，下同。○此言武王之事。纘，繼也。大王，王季之父

也，《書》云：「大王肇基王迹。」《詩》云：「至于大王，實始翦

商。」緒，業也。戎衣，甲冑之屬。壹戎衣，《武成》文，言一

著戎衣以伐紂也。武王末受命，周公成文、武之

德，追王大王、王季，上祀先公以天子之禮。

斯禮也，達乎諸侯、大夫及士、庶人。父爲大

夫，子爲士，葬以大夫，祭以士。父爲士，子

爲大夫，葬以士，祭以大夫。期之喪達乎大

夫，三年之喪達乎天子。父母之喪，無貴賤，

一也。」追王之王，去聲。○此言周公之事。末，猶老也。

追王，蓋推文、武之意，以及乎王迹之所起也。先公，組紃以上至后稷也。上祀先公以天子之禮，又推大王、王季之意，以及於無窮也。制爲禮法，以及天下，使葬用死者之爵，祭用生者之祿。喪服自期以下，諸侯絕，大夫降。而父母之喪上下同之，推己以及人也。

### 右第十八章

子曰：「武王、周公，其達孝矣乎！達，

通也。承上章而言武王、周公之孝，乃天下之人通謂之孝，

猶孟子之言達尊也。夫孝者，善繼人之志，善述

人之事者也。上章言武王纘大王、王季、文王之緒以

有天下，而周公成文、武之德以追崇其先祖，此繼志述事之

大者也。下文又以其所制祭祀之禮，通于上下者言之。

春秋修其祖廟，陳其宗器，設其裳衣，薦其時

食。祖廟：天子七，諸侯五，大夫三，適士二，官師一。宗

器，先世所藏之重器，若周之赤刀、大訓、天球、河圖之屬

也。裳衣，先祖之遺衣服，祭則設之以授尸也。時食，四時

之食，各有其物，如春行羔、豚、膳、膏、香之類是也。宗

廟之禮，所以序昭穆也。序爵，所以辨貴賤

也；序事，所以辨賢也；旅酬下爲上，所以逮賤也；燕毛，所以序齒也。昭，如字。爲，去聲。○宗廟之次，左爲昭，右爲穆，而子孫亦以爲序。有事於太廟，則子姓兄弟、群昭群穆咸在而不失其倫焉。爵，公、侯、卿、大夫也。事，宗祝有司之職事也。旅，衆也。酬，導飲也。旅酬之禮，賓弟子、兄弟之子各舉觶於其長而衆相酬。蓋宗廟之中以有事爲榮，故逮及賤者，使亦得以申其敬也。燕毛，祭畢而燕，則以毛髮之色別長幼，爲坐次也。齒，年數也。踐其位，行其禮，奏其樂，敬其所尊，愛其所親，事死如事生，事亡如事存，孝之至也。踐，猶履也。其，指先王也。所尊，所親，先王之祖考、子孫、臣庶也。始死謂之死，既葬則曰反而亡焉，皆指先王也。此結上文兩節，皆繼志述事之意也。郊社之禮，所以事上帝也；宗廟之禮，所以祀乎其先也。明乎郊社之禮、禘嘗之義，治國其如示諸掌乎！」郊，祀天。社，祭地。不言后土者，省文也。禘，天子宗廟之大祭，追祭太祖之所自出於太廟，而以太祖配之也。嘗，秋祭也。四時皆祭，舉其一耳。禮

必有義，對舉之，互文也。示，與視同。視諸掌，言易見也。此與《論語》文意大同小異，記有詳略耳。

### 右第十九章。

哀公問政，哀公，魯君，名蔣。子曰：「文、武之政，布在方策。其人存，則其政舉；其人亡，則其政息。方，版也。策，簡也。息，猶滅也。有是君，有是臣，則有是政矣。人道敏政，地道敏樹。夫政也者，蒲盧也。夫，音扶。○敏，速也。蒲盧，沈括以爲蒲葦，是也。以人立政，猶以地種樹，其成速矣，而蒲葦又易生之物，其成尤速也。言人存政舉，其易如此。故爲政在人，取人以身，修身以道，修道以仁。此承上文人道敏政而言也。爲政在人，《家語》作「爲政在於得人」，語意尤備。人，謂賢臣。身，指君身。道者，天下之達道。仁者，天地生物之心，而人得以生者，所謂「元者善之長」也。言人君爲政在於得人，而取人之則又在修身，能仁其身，則有君有臣，而政無不舉矣。仁者，人也，親親爲大；義者，宜也，尊賢爲大。親親之殺，尊賢之等，禮所生也。殺，去聲。○人，指



人身而言。具此生理，自然便有惻怛慈愛之意，深體味之可見。宜者，分別事理，各有所宜也。禮，則節文斯二者而已。在下位不獲乎上，民不可得而治矣。鄭氏曰：此句在下，誤重在此。故君子不可以不修身，思修身，不可以不事親，思事親，不可以不知人，思知人，不可以不知天。「爲政在人，取人以身」，故不可以不修身。修身以道，修道以仁，故思修身不可以不事親。欲盡親親之仁，必由尊賢之義，故又當知人。親親之殺，尊賢之等，皆天理也，故又當知天。天下之達道五，所以行之者三：曰君臣也，父子也，夫婦也，昆弟也，朋友之交也，五者天下之達道也；知、仁、勇三者，天下之達德也。所以行之者，一也。知，去聲。○達道者，天下古今所共由之路，即《書》所謂五典，《孟子》所謂「父子有親，君臣有義，夫婦有別，長幼有序，朋友有信」是也。知，所以知此也。仁，所以體此也。勇，所以強此也。謂之達德者，天下古今所同得之理也。一，則誠而已矣。達道雖人所共由，然無是德，則無以行之，達德雖人所同得，

然一有不誠，則人欲間之，而德非其德矣。程子曰：所謂誠者，止是誠實此三者，三者之外更別無誠。或生而知之，或學而知之，或困而知之，及其知之，一也。或安而行之，或利而行之，或勉強而行之，及其成功，一也。」強，上聲。○知之者之所知，行之者之所行，謂達道也。以其分而言，則所以知者知也，所以行者仁也，所以至於知之、成功而一者勇也。以其等而言，則生知安行者知也，學知、利行者仁也，困知、勉行者勇也。蓋人性雖無不善，而氣稟有不同者，故聞道有蚤莫，行道有難易，然能自強不息，則其至一也。呂氏曰：所入之塗雖異，而所至之域則同，此所以爲中庸。若乃企生知、安行之資爲不可幾及，輕困知、勉行謂不能有成，此道之所以不明不行也。子曰：「好學近乎知，力行近乎仁，知恥近乎勇。」「子曰」二字衍文。好，近乎知之知，並去聲。○此言未及乎達德而求以入德之事。通上文三知爲知，三行爲仁，則此三近者，勇之次也。呂氏曰：愚者自是而不知，自私者徇人欲而忘反，懦者甘爲人下而不辭。故好學非知，然足以破愚；力行非仁，然足以忘

私；知恥非勇，然足以起懦。

知斯三者，則知所以

修身；知所以修身，則知所以治人；知所以

治人，則知所以治天下國家矣。斯三者，指三近

而言。人者，對己之稱。天下國家，則盡乎人矣。言此以

結上文修身之意，起下文九經之端也。

凡爲天下國家

有九經，曰修身也，尊賢也，親親也，敬大臣

也，體群臣也，子庶民也，來百工也，柔遠人

也，懷諸侯也。經，常也。體，謂設以身處其地而察其

心也。子，如父母之愛其子也。柔遠人，所謂無忘賓旅者

也。此列九經之目也。呂氏曰：天下國家之本在身，故修

身爲九經之本。然必親師友，然後修身之道進，故尊賢次

之。道之所進，莫先其家，故親親次之。由家以及朝廷，故

敬大臣、體群臣次之。由朝廷以及其國，故子庶民、來百工

次之。由其國以及天下，故柔遠人、懷諸侯次之。此九經

之序也。視群臣猶吾四體，視百姓猶吾子，此視臣、視民之

別也。修身則道立，尊賢則不惑，親親則諸父

昆弟不怨，敬大臣則不眩，體群臣則士之報

禮重，子庶民則百姓勸，來百工則財用足，柔

遠人則四方歸之，懷諸侯則天下畏之。此言

九經之效也。道立，謂道成於己而可爲民表，所謂「建其有

極」是也。不惑，謂不疑於理。不眩，謂不迷於事。敬大

臣，則信任專，而小臣不得以間之，故臨事而不眩也。來百

工，則通工易事，<sup>①</sup>農末相資，故財用足。柔遠人，則天下

之旅皆悅而顯出於其塗，故四方歸。懷諸侯，則德之所施

者博，而威之所制者廣矣，故曰「天下畏之」。齊明盛

服，非禮不動，所以修身也；去讒遠色，賤貨

而貴德，所以勸賢也；尊其位，重其祿，同其

好惡，所以勸親親也；「官盛任使」，所以勸

大臣也；忠信重祿，所以勸士也；時使薄

斂，所以勸百姓也；日省月試，既稟稱事，所

以勸百工也；送往迎來，嘉善而矜不能，所

以勸百工也；繼絕世，舉廢國，治亂持危，朝

聘以時，厚往而薄來，所以懷諸侯也。齊，側皆

反。去，上聲。遠，好、惡、斂，並去聲。既，許氣反。稟，彼

反。去，上聲。遠，好、惡、斂，並去聲。既，許氣反。稟，彼

① 工，原作「功」，據元明本、寬文本、賀本改。

錦、力錦二反。稱，去聲。朝，音潮。○此言九經之事也。「官盛任使」，謂官屬衆盛，足任使令也。蓋大臣不當親細事，故所以優之者如此。「忠信重祿」，謂待之誠而養之厚，蓋以身體之，而知其所賴乎上者如此也。既，讀曰饒。饒，稟，稍食也。稱事，如《周禮·稟人》職曰「考其弓弩，以上下其食」是也。往則爲之授節以送之，來則豐其委積以迎之。朝，謂諸侯見於天子。聘，謂諸侯使大夫來獻。《王制》：「比年一小聘，三年一大聘，五年一朝。」厚往薄來，謂燕賜厚而納貢薄。凡爲天下國家有九經，所以行之者一也。一者，誠也。一有不誠，則是九者皆爲虛文矣。此九經之實也。凡事豫則立，不豫則廢。言前定則不跲，事前定則不困，行前定則不疚，道前定則不窮。跲，其劫反。行，去聲。○凡事，指達道、達德、九經之屬。豫，素定也。跲，躓也。疚，病也。此承上文，言凡事皆欲先立乎誠，如下文所推是也。在下位，不獲乎上，民不可得而治矣；獲乎上有道，不信乎朋友，不獲乎上矣；信乎朋友有道，不順乎親，不信乎朋友矣；順乎親

有道，反諸身不誠，不順乎親矣；誠身有道，不明乎善，不誠乎身矣。此又以在下位者推言素定之意。反諸身不誠，謂反求諸身而所存所發，未能真實而無妄也。不明乎善，謂未能察於人心天命之本然，而真知至善之所在也。誠者，天之道也；誠之者，人之道也。誠者，不勉而中，不思而得，從容中道，聖人也。誠之者，擇善而固執之者也。中，並去聲。從，七容反。○此承上文「誠身」而言。誠者，真實無妄之謂，天理之本然也。誠之者，未能真實無妄而欲其真實無妄之謂，人事之當然也。聖人之德，渾然天理，真實無妄，不待思勉而從容中道，則亦天之道也。未至於聖，則不能無人欲之私，而其爲德不能皆實。故未能不思而得，則必擇善，然後可以明善。未能不勉而中，則必固執，然後可以誠身，此則所謂人之道也。不思而得，生知也。不勉而中，安行也。擇善，學知以下之事。固執，利行以下之事也。博學之，審問之，慎思之，明辨之，篤行之。此「誠之」之目也。學、問、思、辨，所以擇善而爲知，學而知也。篤行，所以固執而爲仁，利而行也。

程子曰：五者廢其一，非學也。有弗學，學之弗能弗措也；有弗問，問之弗知弗措也；有弗思，思之弗得弗措也；有弗辨，辨之弗明弗措也；有弗行，行之弗篤弗措也。人一能之，己百之；人十能之，己千之。君子之學，不爲則已，爲則必要其成，故常百倍其功。此困而知，勉而行者也，勇之事也。果能此道矣，雖愚必明，雖柔必強。明者，擇善之功。強者，固執之效。呂氏曰：君子所以學者，爲能變化氣質而已。德勝氣質，則愚者可進於明，柔者可進於強。不能勝之，則雖有志於學，亦愚不能明，柔不能立而已矣。蓋均善而無惡者，性也，人所同也；昏明強弱之稟不齊者，才也，人所異也。誠之者，所以反其同而變其異也。夫以不美之質，求變而美，非百倍其功，不足以致之。今以鹵莽滅裂之學，或作或輟，以變其不美之質，及不能變，則曰天質不美，非學所能變。是果於自棄，其爲不仁甚矣。

右第二十章。此引孔子之言，以繼大舜、文、武、周公之緒，明其所傳之一致，舉而措之，亦猶是耳。

蓋包費隱，兼小大，以終十二章之意。章內語誠始詳，而所謂誠者，實此篇之樞紐也。又按：《孔子家語》亦載此章，而其文尤詳，「成功一也」之下有「公曰：子之言美矣至矣！寡人實固，不足以成之也」，故其下復以「子曰」起答辭。今無此問詞，而猶有「子曰」二字，蓋子思刪其繁文以附于篇，而所刪有不盡者，今當爲衍文也。「博學之」以下，《家語》無之，意彼有闕文，抑此或子思所補也歟？

自誠明謂之性，自明誠謂之教。誠則明矣，明則誠矣。自，由也。德無不實而明無不照者，聖人之德所性而有者也，天道也；先明乎善而後能實其善者，賢人之學由教而人者也，人道也。誠則無不明矣，明則可以至於誠矣。

右第二十一章。子思承上章夫子天道、人道之意而立言也。自此以下十二章，皆子思之言，以反覆推明此章之意。

唯天下至誠，爲能盡其性；能盡其性，則能盡人之性；能盡人之性，則能盡物之

性；能盡物之性，則可以贊天地之化育；可以贊天地之化育，則可以與天地參矣。天下至誠，謂聖人之德之實，天下莫能加也。盡其性者，德無不實，故無人欲之私，而天命之在我者，察之由之，巨細精粗，無毫髮之不盡也。人、物之性，亦我之性，但以所賦形氣不同而有異耳。能盡之者，謂知之無不明而處之無不當也。贊，猶助也。與天地參，謂與天地並立為三也。此自誠而明者之事也。

右第二十二章。言天道也。

其次致曲。曲能有誠，誠則形，形則著，著則明，明則動，動則變，變則化，唯天下至誠為能化。其次，通大賢以下凡誠有未至者而言也。致，推致也。曲，偏也。形者，積中而發外。著，則又加顯矣。明，則又有光輝發越之盛也。動者，誠能動物。變者，物從而變。化，則有不知其所以然者。蓋人之性無不同，而氣則有異，故惟聖人能舉其性之全體而盡之。其次則必自其善端發見之偏，而悉推致之，以各造其極也。曲無不致，則德無不實，而形、著、動、變之功自不能已。積而至於能化，則其至誠之妙，亦不異於聖人矣。

右第二十三章。言人道也。

至誠之道，可以前知。國家將興，必有祲祥；國家將亡，必有妖孽。見乎蓍龜，動乎四體。禍福將至，善必先知之，不善必先知之，故至誠如神。見，音現。○祲祥者，福之兆。妖孽者，禍之萌。蓍，所以筮。龜，所以卜。①四體，謂動作威儀之間，如執玉高卑，其容俯仰之類。凡此皆理之先見者也。然唯誠之至極，而無一毫私偽留於心目之間者，乃能有以察其幾焉。神，謂鬼神。

右第二十四章。言天道也。

誠者自成也，而道自道也。道也之道，音導。○言誠者物之所以自成，而道者人之所當自行也。誠以心言，本也；道以理言，用也。誠者，物之終始，不誠無物，是故君子誠之為貴。天下之物，皆實理之所為，故必得是理然後有是物。所得之理既盡，則是物亦盡而無有矣。故人心一有不實，則雖有所為，亦如無

①「卜」，原作「十一」，據元明本、寬文本、賀本改。

有，而君子必以誠爲貴也。蓋人之心能無不實，乃爲有以自成，而道之在我者亦無不行矣。誠者，非自成己而已也，所以成物也。成己，仁也；成物，知也。性之德也，合外內之道也，故時措之宜也。知，去聲。○誠雖所以成己，然既有以自成，則自然及物，而道亦行於彼矣。仁者體之存，智者用之發，是皆吾性之固有，而無內外之殊。既得於己，則見於事者以時措之，而皆得其宜也。

### 右第二十五章。言人道也。

故至誠無息，既無虛假，自無間斷。不息則久，久則徵，久，常於中也。徵，驗於外也。徵則悠遠，悠遠則博厚，博厚則高明。此皆以其驗於外者言之，鄭氏所謂「至誠之德，著於四方」者是也。存諸中者既久，則驗於外者益悠遠而無窮矣。悠遠，故其積也廣博而深厚。博厚，故其發也高大而光明。博厚，所以載物也；高明，所以覆物也；悠久，所以成物也。悠久，即悠遠，兼內外而言之也。本以悠遠致高厚，而高厚又悠久也。此言聖人與天地同用。博厚配

地，高明配天，悠久無疆。此言聖人與天地同體。如此者，不見而章，不動而變，無爲而成。見，音現。○見，猶示也。不見而章，以配地而言也。不動而變，以配天而言也。無爲而成，以無疆而言也。天地之道，可一言而盡也：其爲物不貳，則其生物不測。此以下，復以天地明「至誠無息」之功用。天地之道，可一言而盡，不過曰「誠」而已。不貳，所以誠也。誠故不息，而生物之多，有莫知其所以然者。天地之道，博也，厚也，高也，明也，悠也，久也。言天地之道誠一不貳，故能各極其盛，而有下文生物之功。今夫天，斯昭昭之多，及其無窮也，日月星辰繫焉，萬物覆焉。今夫地，一撮土之多，及其廣厚，載華嶽而不重，振河海而不洩，萬物載焉。今夫山，一卷石之多，及其廣大，草木生之，禽獸居之，寶藏興焉。今夫水，一勺之多，及其不測，黿鼉、蛟龍、魚鼈生焉，貨財殖焉。夫，音扶。華，藏，並去聲。卷，平聲。勺，市若反。

○昭昭，猶耿耿，小明也。此指其一處而言之。及其無窮，猶十二章「及其至也」之意，蓋舉全體而言也。振，收也。卷，區也。此四條，皆以發明由其不貳不息，以致盛大而能生物之意。然天、地、山、川實非由積累而後大，讀者不以辭害意可也。《詩》云：「維天之命，於穆不已。」

蓋曰天之所以爲天也。「於乎不顯，文王之德之純。」蓋曰文王之所以爲文也，純亦不已。於，音鳴。乎，音呼。○《詩》、《周頌·維天之命》篇。

於，嘆辭。穆，深遠也。不顯，猶言豈不顯也。純，純一不雜也。引此以明「至誠無息」之意。程子曰：天道不已，文王純於天道，亦不已。純則無二，無雜，不已則無間斷先後。

### 右第二十六章。言天道也。

大哉聖人之道，包下文兩節而言。①洋洋

乎！發育萬物，峻極于天。峻，高大也。此言道

之極於至大而無外也。優優大哉！禮儀三百，

威儀三千。優優，充足有餘之意。禮儀，經禮也。威

儀，曲禮也。此言道之人於至小而無間也。待其人而

後行。總結上兩節。故曰：苟不至德，至道不

凝焉。至德，謂其人。至道，指上兩節而言也。凝，聚也。成也。故君子尊德性而道問學，致廣大而盡精微，極高明而道中庸。溫故而知新，敦厚以崇禮。尊者，恭敬奉持之意。德性者，吾所受於天

之正理。道，由也。溫，猶燠溫之溫，謂故學之矣，復時習之也。敦，加厚也。尊德性，所以存心而極乎道體之大也。道問學，所以致知而盡乎道體之細也。二者，修德凝道之大端也。不以一豪私意自蔽，不以一豪私欲自累，涵泳乎其所以知，敦篤乎其所已知，此皆存心之屬也。析理則不使有豪釐之差，處事則不使有過不及之謬，理義則日知其所未知，節文則日謹其所未謹，此皆致知之屬也。蓋非存心無以致知，而存心者又不可以不致知。故此五句大小相資、首尾相應，聖賢所示入德之方莫詳於此，學者宜盡心焉。是故居上不驕，爲下不倍。國有道，其言足以興；國無道，其默足以容。《詩》曰：「既明且哲，以保其身。」其此之謂與！倍，與

①「包」，原作「句」，據元明本、寬文本、賀本改。

「背」同。與，平聲。○興，謂興起在位也。《詩》、《大雅·烝民》之篇。

### 右第二十七章。言人道也。

子曰：「愚而好自用，賤而好自專，生乎今之世，反古之道。如此者，裁及其身者也。」好，去聲。裁，古「災」字。○以上孔子之言，子思引之。反，復也。非天子，不議禮，不制度，不考文。此以下子思之言。禮，親疎貴賤相接之體也。度，品制。文，書名。今天下車同軌，書同文，行同倫。行，去聲。○今，子思自謂當時也。軌，轍迹之度。倫，次序之體。三者皆同，言天下一統也。雖有其位，苟無其德，不敢作禮樂焉；雖有其德，苟無其位，亦不敢作禮樂焉。鄭氏曰：言作禮樂者，必聖人在天子之位。子曰：「吾說夏禮，杞不足徵也；吾學殷禮，有宋存焉；吾學周禮，今用之，吾從周。」此又引孔子之言。杞，夏之後。徵，證也。宋，殷之後。三代之禮，孔子皆嘗學之而能言其意，但夏禮既不

可考證，殷禮雖存，又非當世之法，惟周禮乃時王之制，今日所用。孔子既不得位，則從周而已。

### 右第二十八章。承上章「爲下不信」而言，亦人道也。

王天下有三重焉，其寡過矣乎！王，去聲。○呂氏曰：三重，謂議禮、制度、考文。惟天子得以行之，則國不異政，家不殊俗，而人得寡過矣。上焉者雖善無徵，無徵不信，不信民弗從；下焉者雖善不尊，不尊不信，不信民弗從。上焉者，謂時王以前，如夏、商之禮雖善，而皆不可考。下焉者，謂聖人在下，如孔子雖善於禮，而不在尊位也。故君子之道本諸身，徵諸庶民，考諸三王而不繆，建諸天地而不悖，質諸鬼神而無疑，百世以俟聖人而不惑。此君子，指王天下者而言。其道，即議禮、制度、考文之事也。本諸身，有其德也。徵諸庶民，驗其所信從也。建，立也，立於此而參於彼也。天地者，道也。鬼神者，造化之迹也。百世以俟聖人而不惑，所謂聖人復起，不易吾言者也。質諸鬼神而無疑，知天也；百世



以俟聖人而不惑，知人也。知天，知人，知其理也。是故君子動而世爲天下道，行而世爲天下法，言而世爲天下則。遠之則有望，近之則不厭。動，兼言行而言。道，兼法則而言。法，法度也。則，準則也。《詩》曰：「在彼無惡，在此無射。庶幾夙夜，以永終譽。」君子未有不如此而蚤有譽於天下者也。惡，去聲。射，音妬，《詩》作「敦」。○《詩》、《周頌·振鷺》之篇。射，厭也。所謂此者，指本諸身以下六事而言。

右第二十九章。承上章「居上不驕」而言，亦人道也。

仲尼祖述堯舜，憲章文武，上律天時，下襲水土。祖述者，遠宗其道。憲章者，近守其法。律天時者，法其自然之運。襲水土者，因其一定之理。皆兼內外，該本末而言也。辟如天地之無不持載，無不覆幬；辟如四時之錯行，如日月之代明。辟，音譬。幬，徒報反。○錯，猶迭也。此言聖人之德。萬

物並育而不相害，道並行而不相悖，小德川流，大德敦化，此天地之所以爲大也。悖，猶背也。天覆地載，萬物並育於其間而不相害，四時日月，錯行代明而不相悖。所以不害不悖者，小德之川流，所以並育並行者，大德之敦化。小德者，全體之分；大德者，萬殊之本。川流者，如川之流，脈絡分明而往不息也。敦化者，敦厚其化，根本盛大而出無窮也。此言天地之道，以見上文取辟之意也。

右第三十章。言天道也。

唯天下至聖，爲能聰明睿知，足以有臨也；寬裕溫柔，足以有容也；發強剛毅，足以有執也；齊莊中正，足以有敬也；文理密察，足以有別也。知，去聲。齊，側皆反。別，彼列反。○聰明睿知，生知之質。臨，謂居上而臨下也。其下四者，乃仁、義、禮、知之德。文，文章也。理，條理也。密，詳細也。察，明辨也。溥博淵泉，而時出之。溥博，周徧而廣闊也。淵泉，靜深而有本也。出，發見也。言五者之德充積於中，而以時發見於外也。溥博如天，

淵泉如淵。見而民莫不敬，言而民莫不信，行而民莫不說。見，音現。說，音悅。○言其充積極其盛，而發見當其可也。是以聲名洋溢乎中國，施及蠻貊。舟車所至，人力所通，天之所覆，地之所載，日月所照，霜露所隊，凡有血氣者，莫不尊親，故曰配天。施，去聲。隊，音墜。○「舟車所至」以下，蓋極言之。配天，言其德之所及，廣大如天也。

右第三十一章。承上章而言小德之川流，亦天道也。

唯天下至誠，爲能經綸天下之大經，立天下之大本，知天地之化育，夫焉有所倚？夫，音扶。焉，於虔反。○經、綸，皆治絲之事。經者，理其緒而分之；綸者，比其類而合之也。經，常也。大經者，五品之人倫。大本者，所性之全體也。惟聖人之德極誠無妄，故於人倫各盡其當然之實，而皆可以爲天下後世法，所謂經綸之也。其於所性之全體，無一毫人欲之僞以雜之，而天下之道千變萬化皆由此出，所謂立之也。其於天地之

化育，則亦其極誠無妄者有默契焉，非但聞見之知而已。此皆至誠無妄，自然之功用，夫豈有所倚著於物而後能哉？肫肫其仁，淵淵其淵，浩浩其天。肫，之純反。○肫肫，懇至貌，以經綸而言也。淵淵，靜深貌，以立本而言也。浩浩，廣大貌，以知化而言也。其淵、其天，則非特如之而已。苟不固聰明聖知達天德者，其孰能知之？聖知之知，去聲。○固，猶實也。鄭氏曰：唯聖人能知聖人也。

右第三十二章。承上章而言大德之敦化，亦天道也。前章言「至聖」之德，此章言「至誠」之道。然至誠之道，非至聖不能知；至聖之德，非至誠不能爲，則亦非二物矣。此篇言聖人天道之極致，至此而無以加矣。

《詩》曰「衣錦尚絅」，惡其文之著也。故君子之道闇然而日章，小人之道的然而日亡。君子之道，淡而不厭，簡而文，溫而理，知遠之近，知風之自，知微之顯，可與入德矣。衣，去聲。絅，口迴反。惡，去聲。闇，於感反。○前

章言聖人之德極其盛矣，此復自下學立心之始言之，而下文又推之以至其極也。《詩》、《國風·衛·碩人》、《鄭》之《丰》皆作「衣錦褰衣」，褰，綢同，禪衣也。尚，加也。古之學者爲己，故其立心如此。尚綢，故閤然；衣錦，故有日章之實。淡、簡、溫、綢之襲於外也，不厭而文且理焉，錦之美在中也。小人反是，則暴於外而無實以繼之，是以的然而日亡也。遠之近，見於彼者由於此也。風之白，著乎外者本乎內也。微之顯，有諸內者形諸外也。有爲己之心，而又知此三者，則知所謹而可入德矣，故下文引《詩》言謹獨之事。《詩》云：「潛雖伏矣，亦孔之昭。」故君子內省不疚，無惡於志。君子之所不可及者，其唯人之所不見乎。惡，去聲。○《詩》、《小雅·正月》之篇。承上文言莫見乎隱，莫顯乎微也。疚，病也。無惡於志，猶言無愧於心，此君子謹獨之事也。《詩》云：「相在爾室，尚不愧于屋漏。」故君子不動而敬，不言而信。相，去聲。○《詩》、《大雅·抑》之篇。相，祝也。屋漏，室西北隅也。承上文又言君子之戒謹恐懼，無時不然，不待言動而後敬信，則其爲己之功益加密矣。故下文引《詩》并言其效。《詩》曰：

「奏假無言，時靡有爭。」是故君子不賞而民勸，不怒而民威於鈇鉞。假，格同。鈇，音夫。○《詩》、《商頌·烈祖》之篇。奏，進也。承上文而遂及其效，言進而感格於神明之際，極其誠敬，無有言說而人自化之也。威，畏也。鈇，斨斨刀也。鉞，斧也。《詩》曰：「不顯惟德，百辟其刑之。」是故君子篤恭而天下平。《詩》、《周頌·烈文》之篇。不顯，說見二十六章，此借引以爲幽深玄遠之意。承上文言天子有不顯之德，而諸侯法之，則其德愈深而效愈遠矣。篤，厚也。篤恭，言不顯其敬也。篤恭而天下平，乃聖人至德淵微，自然之應，中庸之極功也。《詩》云：「予懷明德，不大聲以色。」子曰：「聲色之於以化民，末也。」《詩》曰「德輶如毛」，毛猶有倫。「上天之載，無聲無臭」，至矣！輶，由、西二音。○《詩》、《大雅·皇矣》之篇。引之以明上文所謂不顯之德者，正以其不大聲與色也。又引孔子之言，以爲聲色乃化民之末務。今但言不大之而已，則猶有聲色者存，是未足以形容不顯

之妙。不若《烝民》之詩所言「德輶如毛」，<sup>①</sup>則庶乎可以形容矣。而又自以爲謂之毛，則猶有可比者，是亦未盡其妙。不若《文王》之詩所言「上天之載」，<sup>②</sup>無聲無臭」，然後乃爲不顯之至耳。蓋聲臭有氣無形，在物最爲微妙，而猶曰無之，故唯此可以形容不顯、篤恭之妙。非此德之外，又別有是三等，然後爲至也。

右第三十三章。子思因前章極致之言，反求其本，復自下學爲己謹獨之事推而言之，以馴致乎篤恭而天下平之盛。又贊其妙，至於無聲無臭而後已焉。蓋舉一篇之要而約言之，其反復丁寧示人之意至深切矣，學者其可不盡心乎！

儀禮經傳通解卷第十七終

① 「輶」，原作「輕」，據寬文本、賀本改。  
② 「載」，原作「事」，據寬文本、賀本改。

## 儀禮經傳通解卷第十八

## 保傳第三十

## 學禮十三

夏爲天子十有餘世而殷受之，《大戴禮》無此十二字。○夏爲天子十七世。殷爲天子二十餘世而周受之，鄭曰：凡二十一世。周爲天子三十餘世而秦受之，鄭曰：凡三十七世。秦爲天子二世而亡。始皇，胡亥。人性不甚相遠也，《大戴》「不」作「非」。○鄭曰：孔子曰：「性相近。」何三代之君有道之長而秦無道之暴？《大戴》「三」代「作」殷周，無「之君」二字。○鄭曰：暴，卒疾也。其故可知也。古之王者，太子迺生，固舉以禮，《大戴》「迺」作「乃」，後同；「以」作「之」。○鄭曰：占即殷、周時也。使士負之。鄭曰：卜其吉也。有司齊肅端

冕，見之南郊，見于天也。齊，側皆反。見，賢遍反。○《大戴》「齊肅」作「參夙興」。鄭曰：參職，謂三月初也。○按：「參」乃「齊」字之誤，其下當脫一字，而注文「職」字亦誤。過闕則下，闕，占「闕」字。○鄭曰：敬君典法之處。過廟則趨，鄭曰：逕開故下，望廟則趨。孝子之道也。故自爲赤子，而教固已行矣。

《大戴》「而」作「時」，「已」作「以」。○顏曰：赤子，言其新生，未有眉髮，其色赤。周成王幼，在襁褓之中，召公爲太保，周公爲太傅，太公爲太師。襁，居兩反。褓，布老反。○本篇作「昔者成王」，今從《大戴》。○武王崩，①成王十有三也，而云在襁褓之中，言其小。保，保其身體；鄭曰：保，謂安守之。顏曰：保，安也。傅，傳之德義；《大戴》「之」作「其」。○鄭曰：傅，猶敷也。顏曰：傅，輔也。師，導之教訓；《大戴》「訓」作「順」。○鄭曰：師傅之教大同也。師主於訓導，②傅即

①「武」上，賀本有「鄭曰」二字。

②「主」，原作「上」，據寬文本、賀本改。

受而述之。《書敘》曰：「周公爲師，召公爲保，相成王爲左右也。」此三公之職也。鄭曰：今《尚書》說三公：司馬、司徒、司空也。《尚書》及《周禮》說古文與此同，故先儒論者多依此爲說也。於是爲置三少，皆上大夫也，少，失照反。○鄭曰：卿也，謂之孤也。曰：少保、少傅、少師，是與太子宴者也。鄭曰：記者因成王幼稚，周公居攝，又以王少漸賢聖之訓，長終封禪之美，<sup>①</sup>故據其成事，同於太子，而始末敘之，取明殷、周之隆，師友爲先也。○顏曰：宴，謂安居。故迺孩提有識，三公三少固明孝仁禮義，以導習之。《大戴》無「迺有識」三字，「之」下有「也」字。○顏曰：孩，小兒也。提，謂提撕之。逐去邪人，不使見惡行。去聲。於是皆選天下之端士、孝悌博聞有道德者以衛翼之，使與太子居處出入，《大戴》「皆」作「比」，「下」下無「之」字，「博聞」作「閑博」，「衛」作「輔」，「使」下有「之」字。故太子迺生而見正事，聞正言，行正道。《大戴》無「生而」二字，有「日」字。<sup>②</sup>左右前後，皆正人也。《大戴》「左」、「右」下皆有「視」

字，「人」下無「也」字。夫習與正人居之，不能毋正，猶生長於齊，不能不齊言也。長，展兩反。

○《大戴》「居」下無「之」字，「毋」作「不」，「正」下有「也」字。習與不正人居之，不能毋不正，猶生長於楚，不能不楚言也。故擇其所養，必先受業，迺得嘗之；擇其所樂，必先有習，迺得爲之。樂，魚教反。○《大戴》「養」作「嗜」。○鄭曰：恐其懈惰，故以所味好而誘之。孔子曰：「少成若天性，少失照反，下同。○《大戴》無「天」字。習貫如自然。」貫，與慣同，後放此。○《大戴》「如自然」作「之爲常」，下又有「此殷周之所以長有常道也」十一字。○鄭曰：言人性本或有所不能，少教成之，若天性自然也。《周書》曰：「習之爲常，自氣血始。」○顏曰：貫，亦習也。及太子少長，知妃色，顏曰：妃色，妃匹之色。則入于學。

《大戴》作「小學」，又引《學禮》一段，與上下文意不相屬，

<sup>①</sup>「終」，原作「終」，據元明本、寬文本、賀本改。

<sup>②</sup>「日」，原作「目」，據元明本、寬文本、賀本改。

《漢書》亦然，今別見《五學》篇。承師問道，退習而考於太傅，太傅罰其不則而達其不及，則德智長而理道得矣。《大戴》「考」作「端」。《漢書》「達」作「匡」。及太子既冠成人，免於保傅之嚴，則有記過之史，冠，去聲。○《大戴》「記」作「司」。①○顏曰：有過則記。徹膳之宰，徹，直列反。○《大戴》四句有「有」字，②「徹」下有「虧」字。○按：下文云：失度則史書之，工誦之，三公進而讀之，宰夫減其膳。進善之旌，《大戴》「旌」作「旂」。○鄭曰：堯置之，令進善者立於旂下也。誹謗之木，鄭曰：堯設之，使書政之愆失也。敢諫之鼓，鄭曰：舜置之，使諫者擊之以自聞也。瞽史誦詩，顏曰：瞽，無目者也。工誦箴諫，《大戴》「箴」作「正」。○鄭曰：工，樂人也。瞽官長誦，謂隨其過誦詩以諷。大夫進謀，《大戴》無此四字。士傳民語。習與智長，故切而不媿；《大戴》「媿」作「攘」，《漢書》作「媿」。③○鄭曰：量知授業，故雖勞能受也。○顏曰：每被切磋，故無大過可恥媿之事。○今按：此文《漢

書》爲是，而顏說亦非其意。但謂習聞規誨，與智俱長，故諫之雖切，亦能受之而不愧恨也。化與心成，故中道若性。中，去聲，下同。○鄭曰：觀心施化，故變善如性也。○今按：此言教化與心俱成，故所爲皆合於道，如性自然也。○《大戴》下有「是殷周所以長有道也」九字。三代之禮，天子春朝朝日，秋暮夕月，朝，上陟遙反，下馳遙反。○《漢書》無「天子」字，今從《大戴》。○鄭曰：祭日東壇，祭月西壇，以別內外，以端其位。○顏曰：朝日以朝，夕月以暮，皆迎其初出也。○今按：「三代之禮」四字疑當作「及其立爲」。所以明有敬也。《大戴》「敬」作「別」。○鄭曰：教天下之臣也。春秋入學，坐國老，執醬而親饋之，鄭曰：中春舍菜合饗，仲秋班學合聲，天子視學而遂養老。所以明有孝也。鄭曰：教天下之孝也。行以鸞和，《大戴》「以」作「中」。

① 句上「○」號原作「史」字，據元明本、賀本改。

② 「四句」，原作「禮」，據賀本改。

③ 「漢書作媿」四字原在下文，顏曰「上」，據元明本、寬文本、賀本移此。

○顏曰：鸞和，車上鈴。步中《采齊》，《大戴》「齊」作「茨」。○顏曰：樂詩名也。字或作「薺」，又作「茨」，並音才私反。趣中《肆夏》，趣，讀曰趨，《大戴》作「趨」。○顏曰：亦樂詩名。①○鄭曰：車亦應樂節步，又中佩聲，互言之也。《爾雅》曰「堂上謂之行」，「門外謂之趨」。《周禮》及《玉藻》曰「行以《肆夏》」，「趨以《采茨》」，此云「步中《采茨》，趨中《肆夏》」，又云「行以《采茨》，趨以《肆夏》」，則於大寢之內奏《采茨》，朝廷之中奏《肆夏》，與《周禮》文誤也。所以明有度也。鄭曰：教天下儀也。其於禽獸，見其生不食其死，聞其聲不食其肉，故遠庖廚。遠，去聲。○《大戴》於「上無」其「字」，下「食」字作「嘗」。○鄭曰：《玉藻》曰：「凡血氣之類，弗身踐。」所以長恩且明有仁也。鄭曰：皆先正於己。夫三代之所以長久者，以其輔翼太子有此具也。《大戴》「三代」作「殷周之前」，「者」下無「以」字，「太」作「天」，下同。及秦而不然，《大戴》無「而」字。其俗固非貴辭讓也，所上者告訐也；訐，居謁反。○《大戴》「上」作「尚」，「訐」作「得」。鄭云：字之誤也。

○顏曰：訐，謂面相斥罪也。固非貴禮義也，所上者刑罰也。使趙高傳胡亥而教之獄，《大戴》「使」作「故」。○鄭曰：趙高，宦者，秦中車府令。胡亥，始皇少子，二世也。所習者，非斬劓人則夷人之三族也。劓，牛例反。○《大戴》無「之」字。故胡亥今日即位而明日射人，《大戴》無「胡亥」字，「位」下無「而」字。忠諫者謂之誹謗，深計者謂之妖言，《大戴》「言」作「誣」。○鄭曰：昔伊尹諫夏桀，桀笑曰：「子為妖言矣。」莊辛諫襄王，襄王曰：「先生為楚國妖祥」是也。②其視殺人若艾草菅然。顏曰：艾，讀曰刈。菅，茅也。菅，音姦。豈惟胡亥之性惡哉？《大戴》無「惟」字。彼其所以道之者，非其理故也。《大戴》「以」下有「習」字，「道」作「導」，無「之者」字，「理」作「治」。鄙諺曰：「不習為吏，視已成事。」《大戴》

①「趣讀曰趨大戴作趨」八字與「顏曰亦樂詩名」六字，原順序顛倒，據賀本改。

②「楚國妖祥」，原作「定國妖祥」，據賀本改。



「諺」作「語」，「視已成事」作「如視已事」。○鄭曰：觀前成事也。古諺云：前事之不忘，後事之師也。鄙，猶今言俗語然也。又曰：「前車覆，後車誡。」夫三代之所以長久者，其已事可知也。《大戴》「三代」作「殷周」，無「之」字。○顏曰：已事，已往之事。然而不能從者，是不法聖知也。知，去聲。○《大戴》「而」作「如」，古字通用，無「者」字。○顏曰：法者，則而效之。秦世所以亟絕者，其轍跡可見也。亟，居力反。轍，直列反。○顏曰：亟，急也。車跡曰轍。然而不避，是後車又將覆也。《大戴》作「然而不辭者」是前車覆而後車必覆也。夫存亡之變，治亂之機，其要在是矣。《大戴》「變」作「敗」。天下之命懸於太子，太子之善在於早諭教與選左右。顏曰：諭，曉告也。與，猶及也。夫心未濫而先諭教，則化易成也。《大戴》無「夫」字，「濫」作「疑」，「諭教」作「教諭」。○鄭曰：心未疑，謂未有所知時也。開於道術，知義理之指，則教之力也。《大戴》「力」作

「功」。若其服習積貫，則左右而已。《大戴》「其」作「夫」，無「而」字。胡粵之人，生而同聲，耆欲不異，及其長而成俗，累數譯而不能相通，行有雖死而不能相為者，則教習然也。《大戴》「粵」作「越」，「俗」下有「也」字，「累」作「參」，「有雖」作「雖有」，「死」下無「而」字，「者」下無「則」字。○鄭曰：生而同聲，及其長也，重譯而曉之，不能使言語相通。嗜慾不異，至於成俗，其所行雖有死之可畏，猶不相放為者，皆習使之然也。蘇林曰：言其人之行不能易事相為處。○今按：行有雖死而不能相為者，鄭說誤，蘇說是也。承上文言習俗之殊，終身不變，雖至於死而不能相放效，猶《老子》言「民至老死不相往來」也。故曰選左右早諭教最急。夫教得而左右正，《大戴》再有「左右正」三字。則太子正矣；太子正而天下定矣。鄭曰：《孟子》曰：「君正莫不正也，君正而國定也。」《書》曰：「一人有慶，兆民賴之。」此之謂也。○古者王子年八歲而出就外舍，學小藝焉，履小節焉；束髮而就大學，學大藝焉，履大節焉。一本無「王

子」字。○小學，謂虎闌，師保之學也。大學，王宮之東者。束髮，謂成童，《白虎通》曰：「八歲入小學，十五入大學」是也。此太子之禮。《尚書大傳》曰：「公卿之太子，大夫元士嫡子，年十三始入小學，見小節而踐小義。年二十入大學，見大節而踐大義。」此王子入學之期也。又曰十五年入小學，十八入大學者，謂諸子姓既成者，至十五入小學，其早成者十八入大學。《內則》曰：「十年出就外傅，居宿於外，學書計」者，謂公卿已下教子於家也。○今按：虎闌，見《周禮·師氏》「居虎門之左，教國子弟」，《保氏》「掌養國子，守王闌」。一作「庠門」者，非是。又按：姓，孫也，或恐當作「性」。既，或恐當作「晚」。居則習禮文，行則鳴佩玉，升車則聞和鸞之聲，是以非僻之心無自入也。《大戴》。○天子設四學，當入學而太子齒。大，音泰，下「大傳」同。○四學，謂周四郊之虞庠也。《文王世子》曰：「行一物而三善皆得者，唯世子而已。」其齒於學之謂也。○《祭義》。○傳曰：天子之設四學，何也？曰：凡三王教世子，必以禮樂。樂，所以修內也；禮，所以修外也。禮

樂交錯於中，發形於外，是故其成也懌，恭敬而溫文。中，心中也。懌，悅懌。立大傅、少傅以養之，欲其知父子君臣之道也。養，猶教也，言養者，漬浸成長之。大傅審父子君臣之道以示之，謂爲之行其禮。少傅奉世子以觀大傅之德，行而審喻之。行，下孟反。○爲說其義。大傅在前，少傅在後，謂其在學時。人則有保，出則有師，謂燕居出入時。是以教諭而德成也。以有四人維持之。師也者，教之以事而喻諸德者也；保也者，慎其身以輔翼之而歸諸道者也。慎其身者，謹安護之。《記》曰：「虞、夏、商、周有師保，有疑丞，《記》所云謂天子也，取以成說。設四輔及三公，不必備，唯其人。」語使能也。語，言也。得能則用之，無則已，不必備其官也。小人處其位，不如且闕。君子曰德，德成而教尊，教尊而官正，官正而國治，君之謂也。當入學而太子齒，何也？曰：凡君之於世子，親則父也，

尊則君也。有父之親，有君之尊，然後兼天下而有之。是故養世子不可不慎也。處君父之位，覽海內之上，而近不能教其子，則其餘不足觀矣。故世子齒於學，則國人觀之，曰：「此將君我而與我齒讓，何也？」曰：「有父在，則禮然。」然而衆知父子之道矣。其二曰：「此將君我而與我齒讓，何也？」曰：「有君在，則禮然。」然而衆知君臣之義矣。其三曰：「此將君我而與我齒讓，何也？」曰：「長長也，則禮然。」然而衆知長幼之節矣。故父在斯爲子，君在斯爲臣。居子與臣之節，所以尊君而親親也。故學之爲父子焉，學之爲君臣焉，學之爲長幼焉。長，丁丈反。學，音效。○學，教。父子、君臣、長幼之道得而後國治。行一物而三善皆得者，唯世子而已，其齒於學之謂也。物，猶事也。語曰：「樂正司業，父師司成，師有父道，成生人者。」一有元良，萬國以

貞。」一，謂天子也，大善太子也。○今按：此《書·太甲》篇文。有本作，人正謂天子，而元良初不謂太子也，古人引經多如此，今但隨文觀之可也。世子之謂也。此一章係以《文王世子》與《家語》通修。○周文王使太公望傅，太子發嗜鮑魚，而太公弗與，曰：「禮，鮑魚不登於俎，豈有非禮而可以養太子哉？」●○成王幼，不能涖阼。涖，音吏，下同。○涖，視也。不能視阼階，行人君之事。周公相，踐阼而治。相，息量反，下同。○踐，履也，代成王履阼階，攝王位，治天下也。抗世子法於伯禽，欲令成王之知父子、君臣、長幼之道也。長，丁丈反，下同。○抗，猶舉也，謂舉以世子之法，使與成王居而學之。成王有過，則撻伯禽，所以示成王世子之道也。以成王之過擊伯禽，則足以感喻焉。子夏問於孔子曰：「記云：『周公相成王，教之以世子之

①「哉」下，賀本有小字注文「賈誼新書禮篇」六字。

禮。」有諸？」孔子曰：「昔者成王嗣立，幼未能蒞阼，周公攝政而治，抗世子法於伯禽，欲王之知父子君臣之道，所以善成王也。夫知爲人子者，然後可以爲人父；知爲人臣者，然後可以爲人君；知事人者，然後可以使人。是故抗世子法於伯禽，使之與成王居，亦學此禮於成王側。欲令成王之知父子、君臣、長幼之義也。聞之曰：爲人臣者殺其身，而有益於君則爲之，況于其身以善其君乎？周公優爲之。」聞之者，聞之於古也。于，讀爲迂，迂猶廣也、大也。○《文王世子》、《家語》。○楚莊王使士亹傳太子箴，亹，無匪反。○莊王，楚君，名旅也。士亹，楚大夫。箴，恭王名也。問於申叔時，叔時，楚賢大夫申公。叔時曰：「教之《春秋》，而爲之聳善而抑惡焉，以戒勸其心；爲于僞反，下同。○以天時紀人事，謂之《春秋》。聳，獎也。抑，貶也。教之世，而爲之昭明德而廢幽昏焉，世，謂先王之

世繫也。昭，顯也。幽，闇也。昏，亂也。爲之陳有明德者世顯，而闇亂者世廢也。以休懼其動；休，嘉也。動，行也。使之嘉顯而懼廢也。教之《詩》，而爲之導廣顯德，以耀明其志；導，開也。顯德，謂若成湯、文、武、周、召、奭公之屬，諸詩所美者也。教之禮，使知上下之則；教之樂，以疏其穢而鎮其浮；則，法也。疏，滌也。樂者所以移風易俗，蕩滌人之邪穢也。鎮，重也。浮，輕也。教之令，使訪物官；令，謂先王之官法、時令也。訪，議也。物，事也。使議知百官之事業。教之語，使明其德而知先王之務，用明德於民也。語，治國之善語。教之故志，使知廢興者而戒懼焉；故志，謂所記前世成敗之書。教之訓典，使知族類，行比義焉。比，毗志反。○訓典，五帝之書。族類，謂若「惇敘九族」。比義，義之與比也。若是而不從，動而不悛，悛，且緣反。○悛，改也。則文詠物以行之，文，文辭也。詠，風也。謂以文辭風託事物以動行也。求賢良以翼之。翼，輔也。

俊而不攝，則身勤之，攝，固也。勤，勤身以勸勉之。多訓典刑以納之，刑，法也。務慎惇篤以固之。攝而不徹，徹，勅列反。○徹，通也。則明施舍以導之忠，舍，上聲。○施己所欲，原心舍過，謂之忠恕。明久長以導之信，有信然後可以長久。明度量以導之義，度，徒洛反。量，如字。○義，宜也，言度量所宜也。明等級以導之禮，等級，貴賤之差。明恭儉以導之孝，恭儉，所以事親。明敬戒以導之事，敬戒於事，則無敗功。明慈愛以導之仁，明昭利以導之文，昭，明也。明利，言利人及物。明除害以導之武，除害，去暴亂也。明精意以導之罰，明盡精意，斷之以情。明正德以導之賞，正德，謂不私於所愛。明齊肅以耀之臨。齊，壹也。肅，敬也。耀，明也。臨，臨事也。若是而不濟，不可為也。」濟，成也。為，為師傅也。○《國語》。①

### 踐阼第三十一

### 學禮十四

武王踐阼，三日，既王之後。召士、大夫而

問焉，曰：「惡有藏之約行之，行萬世可以為子孫恒者乎？」惡，音烏。恒，胡登反，下同。○惡，猶於何也。言於何有約言而行之，乃行萬世而猶得其福。諸大夫對曰：「未得聞也。」然後召師尚父而問焉，曰：「黃帝、顓頊之道存乎意，亦忽不可得見與？」顓，音專。頊，許六反。○言忽然，謂不可得見。師尚父曰：「在丹書。王欲聞之，則齊矣。」三日，王端冕，師尚父亦端冕，奉書而入，負屏而立。齊，側皆反。○端，正也。樹謂之屏。王下堂，南面而立，師尚父曰：「先王之道，不北面。」王行西，折而南，東面而立。師尚父西面道書之言，曰：「敬勝怠者吉，怠勝敬者滅，義勝欲者從，欲勝義者凶。凡事不强則枉，凡事不能自強去執於此，則枉也。○今按：「去執」二字恐誤，蓋強者以力自矯之，謂若徇其所偏不自矯揉，則

①「語」下，賀本有「楚語」二字。

終於枉而已。弗敬則不正，枉者滅廢，敬者萬世。藏之約行之，行可以爲子孫恒者，此言之謂也。問先帝之道，庶聞要約之旨，故對此而已。

○要，去聲。王聞書之言，惕若恐懼而爲戒書。惕，他歷反。○託於物以自警戒也。於席之四端爲

銘焉，於几爲銘焉，於鑑爲銘焉，於盥槃爲銘焉，盥，音管。槃，薄官反，亦從皿。於楹爲銘焉，於

杖爲銘焉，於帶爲銘焉，於履屨爲銘焉，於觴豆爲銘焉，於戶爲銘焉，於牖爲銘焉，於劔爲銘焉，於弓爲銘焉，於矛爲銘焉。席前左端之銘曰：「安樂必敬。」安不忘危。前右端之銘曰：「無行可悔。」當恭敬朝夕，故以懷安爲悔也。

後左端之銘曰：「一反一側，亦不可以忘。」言雖反側之間，不可以忘道也。後右端之銘曰：

「所監不遠，視邇所代。」周監不遠，近在有殷之世。几之銘曰：「皇皇惟敬，口生哢，哢，許候反，一從言。○哢，恥也。言爲君子榮譽之主，可不慎乎哢哢言也。

口戕口。」言口能害口也。几者，人君出令所依，故以言

語爲戒也。鑑之銘曰：「見爾前，慮爾後。」盥

槃之銘曰：「與其溺於人也，寧溺於淵。溺

於淵猶可游也，溺於人不可救也。」日知所亡，

學者之功，溺於民庶，大人之禍。故或以自新取戒，或以游

溺爲鑑也。○今按：注云「自新取戒」，蓋指湯之盤銘而言

也。楹之銘曰：「毋曰胡殘，其禍將然；毋曰

胡害，其禍將大；毋曰胡傷，其禍將長。」夫爲

室者慎其楹，君天下者難其相也。○今按：此亦泛言，未

必指楹爲相也。杖之銘曰：「惡乎危？於忿

寔。惡，音烏，下同。寔，音至。○惡乎，何也。忿者，危

之道，怒甲及乙，又危之甚。杖危，故以危戒也。惡乎失

道？於嗜慾。杖依道而行之。惡乎相忘？於

富貴。」言身杖相資也，因失道相忘，乃嗜慾安樂之戒也。

帶之銘曰：「火滅修容，慎戒必恭，恭則壽。」

雖夜解息，其容不可以苟。帶於寢先釋，故因言之也。履

屨之銘曰：「慎之勞，勞則富。」行慎躬勞，躬勞終

福。論慎履，亦財不費也。履在下尤勞辱，因為此戒。勞與富音義兩施，互取焉。觴豆之銘曰：「食白杖，食自杖，戒之僇，僇則逃。」僇，居妖反，逸也。○無求醉飽，白杖而已。户之銘曰：「夫名難得而易失。無懃弗志，而曰我知之乎？無懃弗及，而曰我杖一本作「枝」。之乎？志，識也。杖立不能懲其驚怠，而自謂杖，成功無可就，故終失其名也。擾阻以泥之，今按：「無懃弗志」至此皆所未詳，要必有害於户者。若風將至，必先搖搖，搖搖，無所託，言有風則先困。○今按：此謂户不固閉而動搖也。雖有聖人，不能為謀也。」論人行亦然。牖之銘曰：「隨天之時，任也。以地之財，質也。敬祀皇天，敬以先時。」先祭時而敬齊。○今按：牖下齊祭之處也。劍之銘曰：「帶之以為服，動必行德，行德則興，倍德則崩。」以順誅也。弓之銘曰：「屈伸之義，廢興之行，無忘自一本作「息」。過。」言得時也。矛之銘曰：「造矛造矛，少閒弗忍，終

身之羞。」重言造矛，見造矛之不易也。言少閒之不忍，則為終身羞，以君子於殺之中禮恕存焉。「予一人所聞，以戒後世子孫。」貽厥孫謀，以燕翼子。武王之詩也。○按：此本《大戴禮》，然多闕衍舛誤，姑存其舊。○魯哀公問於子夏曰：「必學而後可以安國保民乎？」子夏曰：「不學而後能安國保民者，未之有也。」哀公曰：「然則五帝有師乎？」子夏曰：「有。臣聞神農學乎悉老，黃帝學乎大真，一作「墳」。顓頊學乎綠，一作「綠圖」，一作「伯夷父」。帝嚳學乎赤松子，嚳，枯沃反。○作「伯招」。堯學乎尹壽，一作「務成子跼」，一作「州支父」。舜學乎務成跼，跼，風無反。○一作「尹壽」，一作「許由」。禹學乎西王國，一作「大成執」。湯學乎威子伯，一作「貸子相」，一作「小臣」。文王學乎鉸時，鉸，古咬反，又古效反。○一作「錫疇子斯」。武王學乎郭叔，一作「太公」，一作「文王，武王學太公望，周公旦」。周公學乎太公，一作「號叔」。仲尼

學乎老聃。此十二聖人未遭此師，<sup>①</sup>則功業不著於天下，名號不傳乎千世。夫不學不明古道而能安國家者，未之有也。」聃，他甘反。

○《新序》。○魯哀公問於孔子曰：「寡人生於深宮之中，長於婦人之手，未嘗知哀也，未嘗知憂也，未嘗知勞也，未嘗知懼也，未嘗知危也。」孔子曰：「君之所問，聖君之問也。丘，小人也，何足以知之？」美大其問，故謙不敢對也。曰：「非吾子無所聞之也。」孔子曰：「君人廟門而右，登自阼階，仰視榱棟，俛見几筵，其器存，其人亡，君以此思哀，則哀將焉不至矣。榱，音衰。俛，音俯。焉，於虔反，下同。○謂祭祀時也。阼，與，祚同。榱，亦椽也。哀將焉不至，言必至也。君昧爽而櫛冠，櫛，仄瑟反。○昧，闇也。爽，明也。謂初曉尚闇之時。平明而聽朝，一物不應，亂之端也，君以此思憂，則憂將焉不至矣！君平明而聽朝，日昃而退，諸侯之子孫必有在君

之末庭者，君以此思勞，則勞將焉不至矣！諸侯之子孫，謂奔亡至魯而仕者。自平明至日昃，在末庭而修臣禮，君若思其勞，則勞可知也。以喻哀公亦諸侯之子孫，不戒慎修德，亦將有此奔亡之勞也。君出魯之四門以望魯之四郊，亡國之虛列必有數焉，虛，讀爲墟。君以此思懼，則懼將焉不至矣！且丘聞之：君者，舟也；庶人者，水也。水則載舟，水則覆舟。君以此思危，則危將焉不至矣！」《荀子·哀公篇》、《家語》、《新序》大同小異。

○賈子曰：天子不論先聖王之德，不知國君畜民之道，不見禮義之正，不察應事之理，不博古之典傳，不閑於威儀之數，《詩》、《書》、《禮》、《樂》無經，學業不法，凡是其屬，太師之任也。天子無恩於父母，不惠於庶民，無禮於大臣，不中於刑獄，無經於百官，不哀於

①「二」，原作「一」，據寬文本、賀本改。



喪，不敬於祭，不信於諸侯，不誠於戎事，不誠於賞罰，不厚於德，不强於行，賜與侈於近臣，鄰愛於疏遠卑賤，鄰愛「字上下必有闕誤。不能懲忿窒慾，言不勝其情，《易》曰：「君子以懲忿窒慾。」不從大師之言，凡是之屬，大傅之任也。

天子處位不端，受業不敬，言語不序，聲音不中律，中，去聲。○聲有準乃中律。進退節度無禮，

節度，或為「即席」。升降揖讓無容，周旋、俯仰、

視瞻無儀，安顧咳唾趨行不得，咳，苦代反。

○趨，或為「走」。色不比順，隱琴瑟，隱，據也。言

按禮樂之器。凡此其屬，大保之任也。天子宴

譬，廢其學，少師與天子宴者也。譬，本作「瞻」，又無

「廢」字，今以《學記》刊補。左右之習反其師，左右所

習不順於師也。○今按：此即《學記》所謂「燕朋逆其師」

者也。答遠方諸侯不知文雅之辭，應對群臣

左右不知己諾之正，簡聞小誦不傳不習，凡

此其屬，少師之任也。天子居處出入不以

禮，冠帶衣服不以制，御器在側不以度，縱上下雜采不以章，惑於朱紫，不以典章。忿怒說喜不以義，賦與集讓不以節，集，疑當作「譙」。凡此其屬，少傅之任也。天子宴私安如易，易，

以鼓反。○自放縱也。○今按：如，而古通用。樂而

湛，樂，音洛。湛，都含反。○過於樂也。飲酒而醉，

食肉而餒，餒，祖峻反。○過其性也。飽而強，強，

猶強也。飢而憊，憊，盧含反，與「婪」同。○憊，貪殘

也。暑而喝，喝，於歇反。○喝，傷暑也。寒而嗽，

寢而莫宥，坐而莫侍，行而莫先莫後。天子

自為開門戶，取玩好，自執器皿，亟顧環面，

好，呼報反。皿，眉永反。○環，旋也。御器之不舉不

藏，凡此其屬，少保之任也。號呼歌謠聲音

不中律，宴樂雅誦迭樂序，輕用雅誦也。凡禮不同

樂，各有秩，苟從所好，亂其次，聲樂之失，任在太史者，樂

應天也。《國語》曰：「吾非瞽史，焉知天道也。」不知日月之時節，不知先王之諱與大國之忌，《周

禮·小史》職曰：「若有事，則詔王之忌諱也。」不知風雨雷電之眚，凡此其屬，太史之任也。在衡爲鸞，在軾爲和，馬動而鸞鳴，鸞鳴而和應，聲曰和，和則敬，此御之節也。上車以和鸞爲節，下車以珮玉爲度，上有蔥衡，下有雙璜、衝牙，璜，音黃。○衡，平也。半璧曰璜。璜在旁，衝牙在中。玼珠以納其間，玼，蒲黠反，又蒲賓反。○納於衡、璜、衝牙之間。玼，亦作「蟻」。琚瑀以雜之。琚，音居。瑀，音禹。○總曰玼珠，而赤者曰琚，白者曰瑀。或曰：瑀，美玉。琚，石次玉。行以《采芡》，才資反。趨以《肆夏》，步環中規，中，去聲，下同。折還中矩，還，音旋。進則揖之，揖，一作「厭」。退則揚之，然后玉鏘鳴也。鏘，千羊反，亦作「瑒」。古之爲路車也，蓋圓以象天，二十八橑以象列星，橑，音老，又力報反。○橑，蓋弓也。軫方以象地，軫，止忍反，車後木。三十幅輻，音幅。以象月。故仰則觀天文，俯則察地理，前視則睹鸞和之聲，

側聽則觀四時之運，謂視輪也，車爲月。此巾車教之道也。巾車，宗伯之屬，下大夫二人。○《大戴》。○傳曰：國將興，必貴師而重傅。貴師而重傅則法度存。國將衰，必賤師而輕傅。賤師而輕傅則人有快，人肆其意。人有快則法度壞。《荀子·大略》。○又曰：觸情從欲謂之禽獸，苟可而行謂之野人，安故重遷謂之衆庶，辯然否、通古今之道謂之士，進賢達能謂之大夫，敬上愛下謂之諸侯，天覆地載謂之天子。○楚莊王謀事而當，群臣莫能逮，朝而有憂色，申公巫臣進曰：「君朝而有憂色，何也？」莊王曰：「吾聞之：諸侯自擇師者王，自擇友者霸，足己而群臣莫之若者亡。今以不穀之不肖而議於朝，且群臣莫能逮，吾國其幾於亡矣，是以有憂也。」《新序》。○燕昭王收破燕後即位，往見郭隗先生，隗，五罪反。曰：「敢問以國報讎者奈何？」郭隗先生對

曰：「帝者與師處，王者與友處，霸者與臣處，亡國與役處。咄指而事之，北面而受學，則百己者至。先趨而後息，先問而後嘿，則什己者至。人趨己趨，則若己者至。」「己趨」下疑有闕文。馮几授杖，眄視指使，則厮役之人至。眄，莫見反。厮，息移反。若恣睢奮擊，响藉叱咄，則徒隸之人至。睢，許季反。响，吁句反。藉，在夜反。叱，尺栗反。咄，當末反。○恣睢，驕傲也。此古服道致士之法也。王誠博選國中之賢者，而朝其門下，天下聞王朝其賢臣，天下之士必趨於燕矣。」《戰國策》。

儀禮經傳通解卷第十八終

## 儀禮經傳通解卷第十九

### 五學第三十二

### 學禮十五

《學禮》曰：帝入東學，上親而貴仁，則親疏有序而恩相及矣；帝入南學，上齒而貴信，則長幼有差而民不誣矣；帝入西學，上賢而貴德，則聖智在位而功不匱求位反，一作遺矣；帝入北學，上貴而尊爵，則貴賤有等而下不踰矣；《大戴》「踰」作「踰」。○顏曰：踰，與「踰」同，謂越制。○鄭曰：①成王年十五亦入諸學觀禮布政。四學者，東序、辟雍、虞庠及四郊之學也。春氣溫養，故上親。夏物盛，小大殊，故上齒。秋物成實，故貴德。冬時物藏於地，唯象於天，半見也，故尚爵。帝入太學，承師問道，退習而考於太傅，太傅罰其不則

而達其不及，則法也。則德智長而治道得矣。此五學者既成於上，則百姓黎民化輯於下矣。顏曰：輯，與集同。輯，和也。○《漢書》、《大戴》。

傳曰：天子入太學，祭先聖，則齒嘗爲臣者弗臣，所以見敬學與尊師也。

天子視學，大昕鼓徵，昕，音欣。○旦明，日將出也。衆至，然後天子至。乃命有司行事，興秩節，祭先師、先聖焉。有司卒事反命。適東序，釋奠於先老，遂設三老、五更、群老之席位焉。更，工衡反。適饌省醴，養老之珍具，遂發咏焉，退修之。反，登歌《清廟》，既歌而語，下管《象》，舞《大武》，大合衆以事。有司告以樂闋，苦穴反。王乃命公、侯、伯、子、男及群吏曰：「反，養老幼于東序。」以上乃占天子

① 鄭曰：「此下文字引自《大戴禮記》盧辯注，疑當作「盧曰」。

視學遂養老以令諸侯群吏之法，其全經不備，今因傳義而總之於其上，其下則復存傳義云。

傳曰：天子視學，大昕鼓徵，所以警

衆也。早昧爽擊鼓以召衆也。警，猶起也。《周禮》：

「凡用樂，大胥以鼓徵學士。」○疏曰：謂仲春合舞，季春合樂，仲秋合聲云。衆至，然後天子至，乃命有

司行事，興秩節，祭先師、先聖焉。興，猶舉

也。秩，常也。節，猶禮也。使有司攝其事，舉常禮，祭

先師、先聖。不親祭之者，視學觀禮耳，非爲彼報也。

有司卒事反命，告祭畢也。祭畢，天子乃入。始

之養也，又之養老之處。凡大合樂必遂養老，是以往

焉。言始，始立學也。○疏曰：時天子視學在虞庠之

中，有司釋奠既畢，天子乃從虞庠入反於國，明日乃之

東序而養老，故云「始之養也」。適東序，釋奠於

先老，親奠之者，已所有事也。○疏曰：周立三代學，

又立周之大學於東，謂之東膠，立小學於西郊，謂之虞

庠。天子尋常視學則於東膠中，唯行養老之禮若始立

學，則既視學畢，然後適東序養老之處，親釋奠於先世

之老，既畢，遂設三老、五更、群老之席位焉。若非始立學，則不釋奠於先老也。遂設三老、五更、群老

之席位焉。更，江衡反。○三老、五更各一人也，皆

年老更事致仕者也。天子以父兄養之，示天下之孝弟

也。名以三、五者，取象三辰五星，天所因以照明天下

者。群老無數，其禮亡。以《鄉飲酒禮》言之，席位之

處，則三老如賓，五更如介，群老如衆賓。○疏曰：蔡邕

以「更」字爲「叟」，叟，老稱。又以三老爲三人，五更爲

五人，案《鄉飲酒》注「敷席賓席牖前，南面，介席西階

上，東面，衆賓於賓之西，南面，各特焉」是也。適饌

省醴，養老之珍具，省，息井反。○親視其所有

也。○今按：珍，謂下章八珍、淳熬之屬。遂發咏

焉。退修之，以孝養也。咏，音詠。○發咏，謂

以樂納之。退修之，謂既迎而入，獻之以醴，獻畢而樂

闋。○闋，苦穴反。○疏曰：案《大射》賓入及庭，奏《肆

夏》。此養老既尊，故用兩君敵禮，入門即奏《肆夏》，故

《仲尼燕居》云「入門而縣興」是也。退修之，謂三老、五

更入而即位西階下，天子乃退，酌醴獻之。反，登歌

《清廟》，反，謂獻群老畢，皆升就席也。反就席，乃席上於西階上，歌《清廟》以樂之。○樂，音洛。○疏曰：反，謂反席。三老、五更、群老初受獻畢，皆立於西階下，東面。今皆反升就席，乃使工登堂上西階，北面，歌《清廟》之詩以樂之也。既歌而語，以成之也。言父子、君臣、長幼之道，合德音之致，禮之大者也。既歌，謂樂正告正歌備也。語，談說也。歌備而旅，旅而說父子、君臣、長幼之道，說合樂之美，以成其意，《鄉射》記曰：「古者於旅也語。」○疏曰：致，極也。下管《象》，舞《大武》，大合衆以事，達有神，興有德也。《象》，周武王伐紂之樂也，《詩·維清》奏《象》舞是也。以管播其聲，又爲之舞，皆於堂下。衆，謂所合學士。達有神，明天授命周家之有神也。興有德，美文王、武王有德，師樂爲用，前歌後舞。○疏曰：舞當中庭。事，謂大聚學士以登歌下管之事。正君臣之位，貴賤之等焉，而上下之義行矣。由《清廟》與《武》也。○疏曰：登歌《清廟》，文王之詩，君父詩也。下管《象》，武王之詩，臣子

詩也。《清廟》在上，管《象》在下，故得正君臣之位，貴賤之等也。有司告以樂闋，闋，終也，告君以歌舞之樂終。此所告者，謂無算樂。王乃命公、侯、伯、子、男及群吏曰：「反，養老幼于東序。」終之以仁也。群吏，鄉遂之官。王於燕之末而命諸侯時朝會在此者，各反養老如此禮，是終其仁心，《孝經說》所謂「諸侯歸，各帥於國，大夫勤於朝，州里驪於邑」是也。○驪，音冀。○疏曰：如此禮，謂如王家於東序之禮，是終竟其仁心也。云「《孝經說》以下者，《援神契》文。謂諸侯還歸，帥行於國，大夫勤力，行之於朝，州長里宰之官希驪慕仰行之於邑是也，謂此在下奉行在上之事也。是故聖人之記事也，謂記序前代事也。慮之以大，謂先本於孝弟之道。愛之以敬，謂省其所以養老之具。行之以禮，謂親迎之如見父兄。修之以孝養，謂親獻之，薦之。紀之以義，謂既歌而語之。終之以仁。謂又以命諸侯歸於國，復自行之。是故古之人一舉事而衆皆知其德之備也。古之君子，舉大事

必慎其終始，而衆安得不喻焉。言其爲之本末露見，盡可得而知也。喻，猶曉也。《兌命》曰：

「念終始典于學。」兌，當爲「說」，《說命》、《書》篇名，殷高宗之臣傳說之所作。典，常也，念事之終始常於學。學，禮義之府。○《文王世子》。

凡養老，五帝憲，憲，法也，養之爲法其德行。

○爲，于僞反。三王有乞言。有，讀爲又，又從之求善言可施行也。五帝憲，養氣體而不乞言。有善，則記之爲惇史。三王亦憲，既養老而后乞言，亦微其禮，皆有惇史。惇史，史惇厚者也。微其禮者，依違言之，求而不切也。○《內則》。

傳曰：食三老，五更於大學，天子袒而割牲，執醬而饋，執爵而醕，冕而總干，所以教諸侯之弟也。是故鄉里有齒，而老窮不遺，強不犯弱，衆不暴寡，此由大學來者也。食，音嗣。大，音泰，下同。醕，音胤。○割牲，制俎實也。醕，食罷飲也。干，盾也。冕而總干，親在

舞位，以樂侑食也。教諸侯之弟，次事親。○《祭義》。

有虞氏養國老於上庠，養庶老於下庠。

夏后氏養國老於東序，養庶老於西序。殷人養國老於右學，養庶老於左學。周人養國老於東膠，養庶老於虞庠，虞庠在國之西郊。

鄭注已見《學制》篇。○疏曰：養老必於學者，教孝悌之處，故於中養老。熊氏云：國老，謂卿大夫致仕者。庶老，謂士也。皇氏云：庶老，兼庶人在官者。其致仕之老，大夫以上當養，從國老之法，士養，從庶老之法。故《外饗》云「邦饗耆老，掌其割亨」，鄭注引此「周人養國老於東膠，養庶老於虞庠」是也。「周立小學爲有虞氏之庠制」者，庠則後有室，前有堂，若夏后氏之序及周之學所在序者，皆與庠制同。其州黨之序，則歇前而已。序則像也，故《鄉射》云：「豫則鉤楹內，堂則由楹外。」彼鄭注「豫讀如成周宣謝火之謝」是也。大學在國之西郊者，鄭駁《異義》之言「三，靈一雍在郊」者，熊氏之言意「文王之時猶從殷禮，故辟廱、大學在郊」，劉氏則以爲周之小學爲辟廱，在郊也。○陳祥道曰：四代之學如此，而周則又有辟廱、成均、瞽宗之名，則上庠、東序、右學、東膠，大學也，故國老於之養焉；下庠、

西序、左學、虞庠，小學也，故庶老於之養焉。記曰「天子設四學」，蓋周之制也。蓋周之學，成均居中，其左東序，其右瞽宗，此大學也，虞庠在國之西郊，則小學也。記曰：「天子視學，命有司行事，祭先師、先聖焉。卒事，遂適東序，設三老、五更之席。」又曰：「食三老、五更於大學，所以教諸侯之弟。祀先賢於西學，所以教諸侯之德。」夫天子視學，則成均也。命有司行事，祭先師、先聖焉，即祀先賢於西學也，所謂「祭於瞽宗」者也。有司卒事，適東序，設三老、五更之席，即養國老於東膠也，所謂食三老、五更於太學者也。然則商之右學在周謂之西學，亦謂之瞽宗，夏之東序在周謂之東膠，亦謂之太學。蓋夏學上東而下西，商學上右而下左，周之所存特其上者。而右學、東序，蓋與成均並建於一丘之上也。成均領學政，右學祀樂祖，東序養老更，右學、東序不特存其制而已，又因其所上之方而謂之也。○今按：諸儒皆以養國老者為大學，養庶老者為小學，蓋亦因王制之言而意之耳。陳氏說其位置又與鄭氏諸儒之說不同，皆無所考，闕之可也。有虞氏皇而祭，深衣而養老。夏后氏收而祭，燕衣而養老。殷人皐而祭，皐衣而養老。周人冕而祭，玄衣而

養老。皇，本又作「型」，音皇。皐，況甫反。皐，古老反，又古報反。○皇，冕屬也，畫羽飾焉。凡冕屬，其服皆玄上纁下，有虞氏十二章，①周九章，夏、殷未聞。凡養老之服，皆其時與群臣燕之服。有虞氏質，深衣而已。夏而改之，尚黑而黑衣、裳。殷尚白而皐衣、裳。周則兼用之，玄衣素裳，其冠則牟追、章甫、委貌也。諸侯以天子之燕服為朝服，《燕禮》曰：「燕，朝服。」服是服也。王者之後，亦以燕服為之。魯季康子朝服以皐，僭宋之禮也。天子皮弁，以日視朝也。○纁，許云反。牟，亡侯反。追，丁雷反。○疏曰：注云「凡養老之服皆其時與群臣燕之服」，以夏后氏燕衣而養老，周人玄衣素裳而養老，皆是燕服故也。深衣謂白布衣，以質，用白布而已。其冠未聞，皇氏云養老而首還服皇冠，崔氏云與夏同冠，未知孰是。《特牲》云：「大古冠布，齊則緇之。」則虞氏或用白布冠也。夏既尚黑，燕衣，黑衣也。皐，白色生絹，亦名為素，此皐衣謂白布深衣也。云「周則兼用玄衣素裳」者，若衣裳俱玄，則與夏不異。又《儀禮》朝服，緇布衣，素裳。緇則玄，故為玄衣素裳也。又

①「二」，原作「三」，據元明本、寬文本、賀本改。



云：朝服，首著玄冠。玄冠即委貌。以此推之，則殷之朝服則著章甫，夏之朝服則著牟追。云「以天子之燕服爲朝服」者，以燕禮諸侯燕臣子用朝服，明天子之燕亦朝服也。引《燕禮》曰「燕朝服」者，證朝、燕同。云「服是服也」者，言燕時服是朝服也。凡此言朝服者，皆謂諸侯之朝服玄衣素裳也。天子亦以是服燕，其朝則以皮弁，故鄭下文亦引之也。鄭又云：「弁，名出於槃。槃，大也，言所以自光大也。哻，名出於幬。幬，覆也，所以自覆飾也。收，言所以收斂髮也。其制之異亦未聞。」詳又見《冠義篇》。① ○凡養

老，有虞氏以燕禮，夏后氏以饗禮，殷人以食禮，周人修而兼用之。兼用之，備陰陽也。凡飲養

陽氣，食養陰氣，陽用春夏，陰用秋冬。○食，音嗣，注并下文「食之」並同。養，如字，徐以尚反，下同。○疏曰：皇氏云：人君養老有四：一是養三老、五更；二是子孫爲國難而死者，王養其父、祖；三是養致仕之老；四是引戶校年，養庶人之老。熊氏云：天子視學之年養老，一歲有七。謂四時凡四，如鄭氏此注。又案《文王世子》注云：「大合樂，謂春入學舍菜合舞，秋頒學合聲。」通前爲六。又季春大合樂，天子視學，亦養老也。又正文凡視學「必遂養老」，是總

爲七也。燕禮者，脫屣升堂，設烝折俎而無飯，其牲用狗，行一獻之禮，坐而飲酒，以至於醉，貴燕安也。饗禮者，體薦而不食，爵盈而不飲，依尊卑而爲獻，取數畢而已，致敬鄉也。食禮者，有飯而享太牢，酒設而不飲，以食爲主，重簡質也。周人修三代之禮而兼用以養老，②春夏用虞夏禮，秋冬用殷禮，文極備也。凡燕禮有一，燕同姓則夜飲，燕異姓則讓而止是也。饗禮有四，九獻、折俎、體委、無酌數是也。食禮有二，禮食、燕食是也。養致仕之老，則當用正燕、正饗、正食之禮。養死事之老，當用異姓之燕、折俎之饗、燕食之食。飲是清虛陽氣之象，食是形質陰體之義。注云「陽用春夏陰用秋冬」者，案《郊特牲》云「饗禘有樂而食嘗無樂」，是故春禘而秋嘗。饗與禘連文，故知饗在春。食與嘗連文，故知食在秋。彼不云冬夏者，彼是殷禮，此言冬夏者，據周法也。或鄭因春而言夏，因秋而見冬，雖周冬夏不養老也。就如熊義，去冬夏則一年有五養老也。又春合舞、秋合聲，即是春秋養老之事。冬夏更無養老，通季春大合樂有三養老也。熊氏以爲春秋各再養老，故爲一年七

① 「篇」下，賀本有「○王制」。

② 「三」，原作「二」，據寬文本、賀本改。

養老也，去冬夏猶爲五，義實可疑。皇氏云：春夏雖以飲爲主，亦有食，先行饗，次燕，次食。秋冬以食爲主，亦有饗，先行食，次燕，次饗。一日之中三事行畢。義或然也。五十養於鄉，六十養於國，七十養於學，達於諸侯。天子、諸侯養老同也。國、國中小學，在王宮之左。學，大學也，在郊。小學在國中，大學在郊，此殷制明矣。八十拜君命，一坐再至，瞽亦如之。九十使人受。命，謂君不親饗食，必以其禮致之。○疏曰：八十，年漸衰弱，不堪來學受養，君以饗食之禮使人就家致之。其受君命之時，理須再拜，不堪爲勞，一坐於地，而首再至於地。瞽人無目，恐其傾倒，拜君命之時，亦當如此。五十異粢，六十宿肉，七十貳膳，八十常珍，九十飲食不離寢，膳飲從於遊可也。粢，陟良反。離，力智反。○粢，糧也。貳，副也。遊，謂出入止觀。○觀，古亂反。六十歲制，七十時制，八十月制，九十日修，唯絞、衿、衾、冒死而後制。絞，戶交反。衿，其鳩反。冒，亡報反。○絞、衿、衾、冒，一日二日而可爲者。○疏曰：歲制，謂棺。此亦大夫以下，

人君則即位爲棹矣。時制，謂衣物難得者。月制，謂衣物易得者。日修，謂棺衣悉辦，但日整修而已。○今按：歲制者，歲一展而修之。下時、月、日放此。五十始衰，六十非肉不飽，七十非帛不煖，八十非人不煖，九十雖得人不煖矣。煖，溫。五十杖於家，六十杖於鄉，七十杖於國，八十杖於朝，九十者，天子欲有問焉則就其室，以珍從。尊養之。七十不俟朝，大夫士之老者，揖君則退。

○疏曰：人門至朝位，君出，揖之即退，不待朝事畢也。若不聽致仕，則《祭義》云：「七十杖於朝，八十不俟朝。」君揖者，案《周禮·司士》職云：「孤特揖，大夫以其等旅揖，士旁三揖。」注云：「公及孤卿大夫始入門右，皆北面東上，王揖之乃就位。」又云：「王揖之，皆遂通，既，復位。」○今按：注「揖君」當作「君揖」。八十月告存，每月致膳。九十日有秩。秩，常也，有常膳。五十不從力政，六十不與服戎，七十不與賓客之事，八十齊喪之事弗及也。與，音預。齊，側皆反。○力稍衰也。力政，城道之役也。與，及也。八十不齊，則不祭也，子代

之祭，是謂宗子不孤。○疏曰：大夫，士六十未致仕，若爲軍將，當與服戍，此據庶人也。案《異義》：「《禮》戴說《王制》云：『五十不從力政，六十不與服戍。』《易》孟氏、《韓詩》說：『年二十行役，三十受兵，六十還兵。』《古周禮》說：『國中自七尺以及六十，野自六尺以及六十有五，皆征之。』許慎謹案云：五經說皆不同，是無明文所據。漢承百王而制，二十三而役，五十六而免。六十五已老，而周復征之，非用民意。」鄭駁之云：「《周禮》所謂皆征之者，使爲胥徒給公家之事，如今之正衛耳。」田役爲重，故五十免之，《祭義》云「五十不爲甸徒」是也。戎事差輕，及孟氏說，六十還兵是也。胥徒又輕，故野外六十五猶征之。若四郊之內，以其多役，其胥徒之事，六十則免。初受役之時，始年二十也。其野王城之外，力役又少，胥徒之事十五則征之，至六十五。其力政之事，皆二十受之。兵革之事，則三十受之。故《易》孟氏、《詩》韓氏皆云：「二十行役，三十受兵也。」宗子不孤者，此嫡子代父而祭，是有父之宗子也。《喪服》有宗子孤者，是無父之宗子也。五十而爵，賢者命爲大夫。○疏曰：若其有德，不必五十，則《喪服》小功一章云：「大夫爲昆弟之長殤。是幼爲大夫爲兄之長

殤。六十不親學，不能備弟子禮。七十致政，唯衰麻爲喪。衰，七雷反。○致政，還君事。○《王制》。○凡三王養老，皆引年。已而引戶校年，當行復除也。老人衆多，非賢者不可皆養。八十者，一子不從政。九十者，其家不從政。《內則》此下有「瞽亦如之，凡父母在，子雖老不坐」字。廢疾非人不養者，一人不從政。廢，廢於人事。父母之喪，三年不從政。齊衰大功之喪，三月不從政。將徙於諸侯，三月不從政。疏曰：此謂大夫采地之民徙於諸侯爲民，以其新徙，當須復除。但諸侯地寬役少，爲人所欲，故唯三月不從政。自諸侯來徙家，期不從政。自，從也。○疏曰：自諸侯來徙於家者，謂諸侯之民來徙於大夫之邑，以大夫役多地狹，欲令人貪之，故期不從政。案《旅師》云：「新阡之治皆聽之，使無征役。」鄭注引此文以證之。少而無父者謂之孤，疏曰：孤，顧也，顧望無所瞻見也。老而無子者謂之獨，疏曰：獨，鹿也，鹿鹿無所依也。老而無妻者謂之矜，矜，一作

「鰥」，並古頑反。○疏曰：愁悵不能寐，日常鰥鰥然。其字從魚，魚日常不閉。老而無夫者謂之寡。疏曰：寡，傑也，傑然單獨。此四者，天民之窮而無告者也，皆有常飢。飢，廩也。瘠、聾、跛躄、斷者、侏儒、百工，<sup>①</sup>各以其器食之。瘠，於金反，啞也。聾，力東反。跛，彼我反。躄，必亦反，兩足不能行也。侏，音朱。○斷，謂支節絕也。侏儒，短人也。器，能也。○疏曰：案《晉語》云文公問八疾，胥臣對云「戚施植縛」，注云「使擊鐘」；「蓬篠蒙膠」，注云「膠是玉磬，使擊之」；「侏儒扶廬」，注云「扶，持也。廬，戟柄也」；「矇瞍修聲」，<sup>②</sup>注云「歌詠琴瑟」；「聾聵司火」，注云「使主然火。其童昏，瞽瘠、僂僂，官師所不材，宜於掌土」。是各以器食之。《外傳》不云跛躄，此不云蓬篠戚施，設文不具。《外傳》瘠與僂僂置於掌上，此瘠與侏儒以其器食之者，今古法異也。道路，男子由右，婦人由左，車從中央。道有三塗，遠別也。父之齒隨行，兄之齒鴈行，朋友不相踰。行，如字，音戶剛反，下同。○廣敬也，謂於塗中。輕任并，重任分，斑白者不提挈。并，必性

反。提，音啼。挈，苦結反。○皆謂以與少者。雜色曰斑。○疏曰：任，負也。老少並輕，則併與少者；老少並重，則分爲重輕。重與少者，輕與老者。君子耆老不徒行，庶人耆老不徒食。徒，猶空也。徒行，謂無車。徒食，謂無肉。○（王制）。○天子巡守，諸侯待于竟，天子先見百年者。問其國君，以百年者所在而往見之。八十九十者東行，西行者弗敢過；西行，東行者弗敢過。欲言政者，君就之可也。「弗敢過」者，謂道經之則見之。○疏曰：若天子諸侯，因其行次，或東行西行，至八十、九十者，問里之旁不敢過越而去，必往就見之。欲言政者，君就之可也。者，謂八十、九十之人，雖不當道路左右，欲其言論政教，君即就之可也。○或曰：八十、九十者東行，則人之西行者不敢分道而過，言必避之也。其西行也亦然。與注、疏不同，未知孰是。壹命齒于鄉里，再命齒于族，三命不齒，族有

①「工」，原作「土」，據元明本、寬文本、賀本改。  
②「修」，原作「循」，據元明本、賀本改。

七十者弗敢先。此謂鄉射飲酒時也。齒者，謂以年次

立若坐也。三命，列國之卿也，不復齒，席之於賓東。不敢先族之七十者，謂既一人舉觶乃人也，雖非族亦然。承「齒乎族」，故言族爾。○疏曰：案《儀禮·鄉飲酒》及《鄉射》

無一命、再命之文，此文乃在《黨正》，故鄭注《鄉飲酒》云：

「此篇無正齒位之事也。」而此云鄉射飲酒以總正齒位之事者，蓋亦有之，但文不備耳。三命列國之卿者，據諸侯言

之。若天子黨正飲酒，三命則上七也。此經雖據諸侯，亦兼《黨正》意，故云三命不齒。若諸侯之國鄉飲酒，但爵位為卿、大夫，雖再命一命，皆得不齒。以其是賓賢能，其得爵為卿、大夫者，必年長於衆賓，故其正文云：「席于賓東，

公三重，大夫再重。」注云：「席此二者於賓東，尊之，不與鄉人齒。」大夫坐於上，士立於下者是也。若天子黨正飲酒以正齒位，其實必長，故三命始不齒。一命下士立於下，再

命中上齒於父族，坐於堂上，三命上上席于賓東是也。族有七十者，初飲酒之時，則與衆賓先入。此三命者，為待獻賓獻介獻衆賓之後，至一人舉觶之時乃始入，故《鄉飲酒》、

《鄉射》記皆大夫樂作之前，一人舉觶之後，乃始得入也。若然，大夫之人，依禮自當一人舉觶之時，縱令無族人七十者，亦當如此。又族之七十者及鄉人少者於先已入，今特

云「族有七十者不敢先」者，意謂身有三命，若可在族人七十者之先，欲明敬齒上老，故云「不敢先」爾。鄭注又云「雖非族亦然」，但鄉人長老皆上之，既入，然後始入也。熊氏謂黨正飲酒正齒位，故有七十者，若鄉飲酒則無七十者。據《鄉飲酒禮》「明日乃息司正，告于先生、君子」，是老者明日乃入也。七十者不有大故不入朝，若有大故

而入，君必與之揖讓，而后及爵者。謂致仕在家者，其入朝，君先與之為禮，而后揖卿、大夫、士。○《祭義》。○大夫七十而致事。致其所掌之事於君而告

老。○疏曰：《白虎通》云：「臣年七十懸車致仕者，臣以執事趨走為職。七十耳目不聰明，是以退老去避賢也，所以長廉遠恥。」若不得謝，謝，猶聽也。君必有命勞苦，辭

謝之，其有德尚壯，則不聽耳。則必賜之几杖，行役以婦人。適四方，乘安車。自稱曰老夫，几

杖，婦人、安車，所以養其身體也。安車，坐乘，若今小車也。老夫，老人稱也，亦明君尊賢，《春秋傳》曰：「老夫耄矣。」○耄，音林。○疏曰：養老之具，在國及出皆得用之。今言行役婦人、四方安車，則相互也，從語便，故離言之耳。

庾蔚云：漢世駕一馬而坐乘也。熊氏云：案《書傳略說》

云：「致仕者以朝，乘車輜輪。」鄭云：「乘車，安車。言輜輪，明其小也。」○今按：輜與輅同，淳專反，蕃車下痺輪無輻者。於其國則稱名。君雖尊異之，自稱猶若臣。越國而問焉，必告之以其制。鄰國來問，必問於老者以答之。制，法度。○《曲禮》。○淳熬：煎醢加于陸稻上，沃之以膏，曰淳熬。淳，之純反。熬，五羔反。○淳，沃也。熬，亦煎也。沃煎成之以爲名。○疏曰：陸稻，謂陸地之稻也。謂以陸地稻米孰之爲飯，煎醢使熬加于飯上，恐其味薄，更沃之以膏，使味相湛漬。淳毋：煎醢加于黍食上，沃之以膏，曰淳毋。毋，依注音模，莫胡反。食，音嗣。○毋，讀曰模。模，象也，作此象淳熬。○疏曰：黍米不言陸者，黍皆在陸，無在水之嫌。炮：取豚若將，刳之剝之，實棗於其腹中，編萑以苴之，塗之以謹塗。炮之，塗皆乾，擘之，濯手以摩之，去其皴，爲稻粉，糝洩之，以爲醢，以付豚。煎諸膏，膏必滅之。鉅鑊湯，以小鼎薺脯於其中，使其湯毋滅鼎，二日三夜毋絕火，而后調之以醢醢。炮，步交反。

將，依注音牂，子郎反。刳，苦圭反。剝，口孤反。編，必縣反。萑，音丸，蘆也。苴，子餘反，苞裹也。謹，依注作「墜」，音斤，徐如字。塗，亦作「涂」。擘，必麥反。濯，直角反。去，起吕反。皴，章善反。糝，息酒反。洩，所九反。醢，羊支反。鑊，戶郭反。薺，音香。○炮者，以塗燒之爲名也。將，當爲「牂」，牂，牝羊也。刳，剝，《博異》語也。謹，當爲「墜」，聲之誤也。墜塗，塗有穰草也。皴，謂皮肉之上魄莫也。糝洩，亦《博異》語也。糝，讀與滌灑之滌同。薺脯，謂薺豚若羊於小鼎中，使之香美也。謂之脯者，既去皴，則解析其肉使薄如爲脯然，唯豚全耳，豚，羊入鼎三日，乃內醢醢可食也。○穰，如羊反。魄，普伯反。莫，亦作「漠」。○疏曰：「炮取豚若將」者，言爲炮之法，或取豚，或取牂。棗，香棗也。萑，亂草也。苴，裹也，編連亂草以裹之也。「塗之以謹塗」者，以此墜塗而泥塗之。「擘之」者，謂擘去乾塗也。「爲稻粉糝洩之以爲醢」者，付全豚之外煎之於膏，若羊則解析肉以粥和之。滅，沒也。小鼎盛膏，以膏煎豚牂，膏必沒此豚牂也。「鉅鑊湯以小鼎薺脯其中」，謂以大鑊盛湯，以小鼎之香脯實於大鑊湯中。「使其湯毋滅鼎」者，使鑊中之湯毋得沒此小鼎也。「毋絕火」者，欲令用火微熱勢不絕。擣珍：取牛、羊、麋、鹿、麇之

肉，必胾，每物與牛若一，捶，反側之，去其餌，孰出之，去其皽，柔其肉。擣，丁老反。腐，九倫反。胾，音每。捶，之葵反。餌，音二，本或作「皽」，下句作「餌」。○胾，脊側肉也。捶，擣之也。餌，筋腱也，柔之爲汁和也，汁和亦醢醢與？○筋，音斤。腱，其假反，或云筋之大者，或云筋頭也。○疏曰：腱，即筋之類。炮豚炮牂，調以醢醢，下漬亦然，故知擣珍和亦用醢醢。漬：取牛肉必新殺者，薄切之，必絕其理，湛諸美酒，期朝而食之以醢若醢醢。漬，似賜反。湛，子潛反。期，音替。醢，於力反。○湛，亦漬也。爲熬：捶之去其皽，編萑布牛肉焉。屑桂與薑，以酒諸上而鹽之，乾而食之。施羊亦如之。施麋，施鹿，施麇，皆如牛羊。欲濡肉，則釋而煎之以醢。欲乾肉，則捶而食之。酒，所買反。鹽，音黠。濡，音儒。○熬，於火上爲之也，今之火脯似矣。欲濡，欲乾，人自由也。醢，或爲「醢」。此七者，《周禮》八珍，其「肝膋」是也。○膋，音遼。○疏曰：「欲濡肉則釋而煎之以醢」者，欲得濡肉，則以水潤釋之，而煎之以醢也。

七者，謂第一淳熬也，第二淳模也，第三、第四炮豚若牂也，第五擣珍也，第六漬也，第七熬也。云「其一肝膋」者，則此糝下肝膋也，但作記之人文不依次，故在糝下陳之。糝：取牛羊豕之肉三如一，小切之，與稻米（稻米二，肉一）合以爲餌，煎之。此《周禮》糝食也。○食，音嗣，下「醢食」同。肝膋：取狗肝一，臠之以其膋，濡炙之，舉焦其膋，不蓼。臠，音蒙。焦，字又作「焦」，子消反。○膋，腸間脂。舉，或爲「巨」。○疏曰：舉，皆也，謂炙膋皆焦也。取稻米，舉糝漉之，小切狼臠膏，以與稻米爲醢。醢，讀爲蜜，之然反。○狼臠膏，臠中膏也。以煎稻米，則似今膏屠矣，此《周禮》醢食也。此醢當從餼。○臠，音億。屠，又作「蜜」，又作「醢」，同之然反，又音贊。○呂希哲曰：八珍，據正文謂淳熬也，淳毋也，炮也，擣珍也，漬也，熬也，糝也，肝膋也。上條注，疏說誤。○今按：此即上章所謂養老之珍也，故附于此。○《內則》。

傳：魯哀公問於孔子曰：「二三大夫皆勸寡人使隆敬於高年，何也？」孔子對

曰：「君之及此言，將天下實賴之，豈唯魯哉！」公曰：「何也？」其義可得聞乎？」

孔子曰：「昔者有虞氏貴德而尚齒，夏后氏貴爵而尚齒，殷人貴富而尚齒，周人貴親而尚齒。貴，謂燕賜有加於諸臣也。尚，謂有事尊之於其黨也。臣能世祿曰富。舜時多仁聖有德，後德則在小官。○按：注末句文義難通，所謂「後德」，言後進之有德者不加於前進之有德者。此雖貴德，而猶必尚齒之意也。虞、夏、殷、周，天下之盛王也，未有遺年者，年之貴乎天下久矣，次乎事親也。言其先老也。是故朝廷同爵則尚齒，七十杖於朝，君問則席，八十不俟朝，君問則就之，而弟達乎朝廷矣。弟，音悌，後皆同。○同爵尚齒，老者在上也。君問則席，爲之布席於堂上而與之言。凡朝位立於庭，魯哀公問於孔子，命席不俟朝，君揖之即退，不待朝事畢也。就之，就其家也。老而致仕，君或不許，異其禮而已，四代皆然。○疏曰：知「朝位立於庭」者，案燕禮、大射，君與卿大夫皆

立，卿大夫立於庭，君立于阼階上是也。云「不俟朝君揖之即退」者，案燕禮、大射，卿大夫立於庭，北面，君降自阼階，南鄉，爾卿，卿西面，爾大夫，大夫皆少進，皆北面。爾，謂揖也。行肩而不併，不錯則隨。見老者則車徒辟，斑白者不以其任行乎道路，而弟達乎道路矣。併，步頂反。辟，音避。○肩而不併，言肩不得併錯鴈行也，父黨隨行，兄黨鴈行。車徒辟，乘車步行皆辟老人也。斑白者，髮雜色也。任，所擔持也。不以任少者代之。○行，如字，又戶剛反。○疏曰：「行肩而不併」者，謂老少並行，少者差退在後，則朋友肩隨是也。錯鴈行，參錯也。居鄉以齒，而老窮不遺，強不犯弱，衆不暴寡，而弟達乎州巷矣。老窮不遺，以鄉人尊而長之，雖貧且無子孫，無棄忘也。一鄉者五州。巷，猶閭也。古之道，五十不爲甸徒，頒禽隆諸長者，而弟達乎狻猊矣。甸，田見反。狻，音蒐，所求反。○四井爲邑，四邑爲丘，四丘爲甸，甸六十四井也。以爲軍田出役之法，五十始衰，不從力役之事也。頒之言



分也。隆，猶多也。及田者分禽多其老者，謂竭作未五十者。春獵爲狻，冬獵爲狩也。○疏曰：一甸之中，出長轂一乘，甲士三人，步卒七十二人，供君田役事。云狻狩，則夏苗秋獮可知也。軍旅什伍同爵則尚齒，而弟達乎軍旅矣。什伍，士卒部曲也，《少儀》曰：「軍尚左，卒尚右。」孝弟發諸朝廷，行乎道路，至乎州巷，放乎狻狩，修乎軍旅，衆以義死之而弗敢犯也。」放，方往反。○死之，死此孝弟之禮。公曰：「善哉！」《家語》。○齊宣王問於春子曰：「寡人欲行孝弟之義，爲之有道乎？」宣王，齊君，陳敬仲之後也。春子曰：「昔者衛聞之樂正子樂正子，曾子弟子也。曰：『文王之治岐也，五十者杖於家，六十者杖於鄉，七十者杖於朝，見君揖杖，朝，當爲「國」。揖，當爲「去」。八十者杖於朝，見君揖杖。揖，挾也。君曰趨見客，無俟朝。不欲久停老者也。古者七十致仕，來者客之也。以朝

乘車輪輪，御爲僕送至於家，而孝弟之行義達於諸侯。乘車，安車也。御，君之御也。○輪，見前「乘安車」注。九十杖而朝，見君建杖。建，樹也。君曰趣見，毋俟朝。以朝車送之舍，天子重鄉養。①舍，館也。重，猶尊也。養，以禮食之也。卜筮巫鑒御于前，祝咽祝哽以食，乘車輪輪，胥與就膳徹，胥，樂官也。就，成也。胥成膳徹，謂以樂食之也。送至於家。君如有欲問，明日就其室以珍從，而孝弟之義達於四海。『明日，旦日。此文王之治岐也。君如欲行孝弟之大義，盍反文王之治岐？』《尚書大傳》。

儀禮經傳通解卷第十九終

①「天」，原作「大」，據元明本、賀本改。

## 儀禮經傳通解卷第二十

### 燕禮第三十三

#### 邦國禮一之上

#### 經六

燕禮。○小臣戒與者。與，音預。○小臣相

君燕飲之法。戒與者，謂留群臣也。君以燕禮勞使臣，若臣有功，故與群臣樂之。小臣則警戒告語焉，飲酒以合會爲歡也。○相，息亮反。勞，力報反。使，所吏反。樂，音洛。語，魚據反。○疏曰：王燕飲，大僕相，小臣佐之。此諸侯禮降於天子，故使小臣當大僕之事。「留群臣」，謂群臣留在國不行者也。○今按：「留群臣」，謂群臣朝畢將退，君欲與之燕，故使小臣留之，疏說非是。

#### 右戒群臣。

膳宰具官饌于寢東。膳宰，天子曰膳夫，掌君飲食膳羞者也。具官饌，具其官之所饌，謂酒也、牲也、脯

醢也。寢，路寢。○疏曰：云「路寢」者，以饗在廟，服朝服。下《記》云：「燕，朝服於寢。」正處在路寢，不在燕寢可知。○今按：「於寢」下疑脫「既朝服則宜於」六字。樂人縣。縣，音玄。○縣，鐘磬也，國君無故不徹縣。言縣

者，<sup>①</sup>爲燕新之。○爲，于僞反。○疏曰：案《周禮·眡瞭》職云：「掌大師之縣。」諸侯無眡瞭，則使僕人縣樂，大師以鼙展之，樂師又監之。《小胥》：「天子宮縣，諸侯軒縣」，面皆鐘、磬，鋪各一虞；「大夫判縣，士特縣」，不得有鋪，諸侯之士特縣，磬而已。《曲禮》：「大夫無故不徹縣」，則國君無故亦不徹縣可知。燕在路寢，有常縣之樂，今更整理之，故云「爲燕新之」也。設洗篚于阼階東南，當東雷。壘水在東，篚在洗西，南肆。設膳篚在其北，西面。雷，力又反。壘，音雷。○設此不言其官，賤也。當東雷者，人君爲殿屋也。亦南北以堂深。肆，陳也。膳篚者，君象觚所饌也，亦南陳。言西面，尊之，異其文。○觚，音孤。○疏曰：漢時殿屋，四向流水，故舉漢以況周。言東雷，明亦有西雷。對大夫士言東榮，兩下屋也。

①「言」，原作「官」，據元明本、賀本改。

象觚，案下文所以獻公者也，君尊不可與臣同筐，故別言之。「亦南陳」者，亦若疊洗之南肆也。不言南肆而言西面，是尊君之筐，故異其文也。司宮尊于東楹之西，兩方壺，左玄酒，南上。公尊瓦大兩，有豐，冪用給若錫，在尊南，南上。尊士旅食于門西，兩圓壺。大，音泰。給，去逆反。錫，悉歷反。鬯，音園。○司宮，天子曰小宰，聽酒人之成要者也。尊方壺，爲卿大夫士也。臣道直方，於東楹之西，予君尊此酒也。《玉藻》曰：「唯君面尊。」玄酒在南，順君之面也。瓦大，有虞氏之尊也。《禮器》曰：「君尊瓦甒。」甒形似豆，卑而大。冪用給若錫，冬夏異也。「在尊南」，在方壺之南也。尊士旅食者用圓壺，變於卿大夫也。旅，衆也。士衆食，謂未得正祿，所謂庶人在官者也。今文「錫」爲「錫」。○甒，亡甫反。卑，如字。錫，悉歷反。○疏曰：《天官·小宰》職治王宮之政令，諸侯有司宮掌宮事，與小宰同。《酒正》云：「酒正之出，日人其成，月人其要，小宰聽之。」此司宮亦掌酒事，是以知諸侯司宮當天子小宰也。「予君尊此酒」者，此決鄉飲酒、鄉射皆於房戶之間，賓主共之。此於東楹之西，向君設之，人君尊，專大惠也。引《玉藻》者，欲見尊面

向君。據君面以左爲尊，玄酒在南也。《少儀》又云：「尊者以酌者之左爲上尊。」《鄉飲酒》云：「尊兩壺于房戶之間，玄酒在西。」又《鄉射》云：「尊於賓席之東，兩壺斯禁，左玄酒。」鄭注云：「設尊者北面，西曰左。」此等皆據酌者北面而言，玄酒在左。此燕禮尊面向君，君面以左爲尊，玄酒在南。若據酌者，不得背君而西面，當尊西東面，則酌者之右爲上尊，是以下文媵爵于公者交於東楹北也。又云：「甒形似豆卑而大」者，據漢法而知。但豆徑尺，柄亦長尺，此承尊之物，不可同於常豆，故知卑而大，取其安穩也。夏宜用給，冬宜用錫。葛之麤者曰給。《喪服》傳云：「無事其縷，有事其布曰錫。」鄭注云「治其布使之滑易」是也。瓦大不言玄酒者，以其言「兩」又言「南上」，則有玄酒在南可知。凡無玄酒者不言上下，如下文「尊士旅食」直云「兩圓壺」之類是也。「正祿」者，《王制》下士以上至卿大夫皆得正祿也。「庶人在官者」，謂府史胥徒，皆非正祿，號爲士旅食者也。○今按：「在尊南」者，謂瓦大在方壺之南耳。疏云冪未用而陳於方壺之南，不雜於方壺、瓦大之間，誤也。若然，則正在二者之間矣，何得言不雜耶？司宮筵賓于戶西，東上，無加席也。筵，席也。席用蒲筵，緇

布純，無加席。燕，私禮，臣屈也，諸侯之官無司几筵也。  
○純，之閏反，又章允反。○疏曰：《公食》記云：「蒲筵常，緇布純，加萑席焉，玄帛純。」彼異國之賓有加席，禮得申。此燕，私禮，臣屈也。又天子有司几筵布席，諸侯兼官，使司宮設尊并席也。

### 右陳饌器。○記：燕，朝服于寢。朝，

直遙反。○朝服者，諸侯與其群臣日視朝之服也，謂冠玄端，緇帶，素鞞，白屨也。燕於路寢，相親昵也。今辟雍十月行此燕禮，玄冠而衣皮弁服，與禮異也。○鞞，音畢。辟，音璧。衣，於既反。○疏曰：《屨人》注：「天子諸侯吉事皆舄。」而云「白屨」者，引《士冠禮》成交。其實，諸侯當白舄，其臣則白屨也。鄭注又云：「複下曰舄，禪下曰屨。」下謂底也。燕於寢者，以饗在廟，明燕在寢私處也。亨于門外東方。亨，普庚反。○亨于門外，臣所掌也。○疏曰：此與公食皆君禮，故亨于門外。鄉飲酒亨于堂東北，不在外者，臣禮，宜主人親供也。

### 射人告具，告事具於君，射人主此禮，以其或射

也。○疏曰：案公食無射，故使贊者告具。大射告具之上

有羹定，此不言者，文不具也。小臣設公席于阼階上，西鄉設加席。公升即位于席，西鄉。鄉，許亮反，本又作「鄉」。○《周禮》：「諸侯酢席莞筵紛純，<sup>①</sup>加緇席畫純。」後設公席者，凡禮卑者先即事，尊者後也。○莞，音官。緇，音早。○疏曰：《周禮》、《司几筵》之文也。彼諸侯祭祀神席及受酢之席，此燕飲之席，與彼同。若饗諸侯來朝，則《郊特牲》云：「大饗，君三重席而酢焉。」是也。燕他國之臣，即《郊特牲》云：「三獻之介，君專席而酢焉。」此降尊以就卑。故君單席受酢也。又此燕，私禮，故賤者先即事。大射辨尊卑，故先設公席，後設賓席也。○今按：此篇與《大射》雖設席之先後不同，然皆公先升即位，然後納賓，非卑者先即事也。但其言偶不同耳，不當據文便生異義也，注、疏說皆非是。小臣納卿大夫，卿大夫皆入門右，北面東上。士立于西方，東面北上。祝史立于門東，北面東上。小臣師一人在東堂下，南面。士旅食者立于門西，

①「酢」，原作「昨」，據賀本改。

東上。納者，以公命引而入也。自士以下，從而入即位耳。師，長也。小臣之長一人，猶天子大僕，正君之服位者也。凡人門而右由闕東，左則由闕西。○長，丁丈反。大，音泰。闕，魚列反。○疏曰：此卿大夫之位，皆是擬君揖位，故下經君爾之始就庭位也。「西方東面北上」，此則士之定位。上賤，故不待君揖，入門即就定位也。「凡人門」者，鄭廣解入門之禮。案《玉藻》云：「公事自闕西，私事自闕東。」一也。故《曲禮》又云：「大夫，士出入公門，由闕右。」聘禮云：聘賓入，由闕西。蓋「凡人門而右由闕東」者，是臣朝君之法也。入門而左，由闕西者，是聘賓入門之法也。公降立于阼階之東南，南鄉。爾卿，卿西面北上；爾大夫，大夫皆少進。爾，近也，移也。揖而移之，近之也。大夫猶北面，少前。○近，附近之近。○疏曰：《曲禮》云：「揖人必違其位。」是以公將揖卿大夫，降立於阼階之東南，南面揖之。變揖言爾者，爾訓近也，移也，卿大夫得揖移近中庭。卿東相西面，五大夫中庭少進，北面不改也。射人請賓，命當由君出也。○疏曰：燕面或射，禮輕，或大射正爲擯，或小射正爲擯，皆是射人，故直云射人。不辨面位者，以君南面，射人北面可

知。公曰：「命某爲賓。」某，大夫也。○疏曰：知大夫者，以賓主相對，既以宰夫爲主人，是大夫，明賓亦當用大夫也。《燕義》云：「不以公卿爲賓，而以大夫爲賓，爲疑也。」射人命賓，賓少進，禮辭。命賓者，東面南顧。禮辭，辭不敏也。○疏曰：《少儀》云：「詔辭自右。」射人在君之右東面者，向君南顧者，向賓便也。反命。射人以賓之辭告於君。又命之，賓再拜稽首，許諾。又，復。○復，扶又反。射人反命。告賓許。賓出，立于門外，東面。當更以賓禮入。○疏曰：前卿大夫從臣禮，相從而入，故出更以賓禮入，是以下經「賓入及庭，公降一等揖之」。公揖卿大夫，乃升就席。揖之，人之也。○疏曰：言「人之」者，公將及升堂，故以人意相存偶，是以揖之乃升。小臣自阼階下，北面，請執冪者與羞膳者。執冪者，執瓦大之冪也。方闕壺無冪，羞膳，羞於公，謂庶羞。○疏曰：下注云「君物曰膳」，此又與執冪者連文，則羞於公可知。脯醢自稱薦，故知此是庶羞也。乃命執冪者，執冪者升自西階，立于尊南，北面東上。以公命於西階前命之也。東上，玄酒

之幕爲上也。羞膳者從而東，由堂東升自北階，房中西面南上，不言之者，不升堂，略之也。○疏曰：下《記》云「羞膳者與執幕者皆上也」，上位在西方東面，故知西階前命之也。東面階，西面階，婦人之階，非男子之所升，則羞者升自北階可知。《大射》「工人士與梓人亦升自北階」也。知「由堂東」，以羞在房。知「房中西面南上」者，約《士冠禮》贊者「立于房中西面南上」也。不升堂，不由前堂升也。膳宰請羞于諸公卿者。小臣不請而使膳宰，於卑者彌略也。禮以異爲敬。○疏曰：上請賓使射人，請執幕使小臣，已是其略。今羞諸公卿乃使膳宰，膳宰卑於小臣，故云彌略也。周禮，膳夫是上上，此諸侯膳宰明非上士。且禮之大例，薦羞者尊於設俎者，公士爲薦羞，膳宰設俎，故知膳宰卑也。射人納賓，射人，爲擯者也，今文曰「擯者」。賓人，及庭，公降一等揖之。及至也。至庭，謂既人而左，北面時。○疏曰：人，謂入門。及庭，謂出堂塗，北面。公升就席，以其將與主人爲禮，不參之也。○疏曰：下經云「賓升，主人亦升」，是與主人爲禮也。賓升自西階，主人亦升自西階，賓右北面至再拜，賓答再拜。主人，宰夫也。

宰夫，大宰之屬，掌賓客之獻飲食者也，①其位在洗北西面。君於其臣，雖爲賓，不親獻，以其尊，莫敢抗禮也。至再拜者，拜賓來至也。天子膳夫爲獻主。○仇，苦浪反，敵也。○疏曰：《燕義》云：「使宰夫爲獻主。下文胥薦主人于洗北西面，是其位所在也。《周禮·膳夫》職云：『王燕飲酒，則爲獻主。』」

右即位。○記：與卿燕，則大夫爲賓。與大夫燕，亦大夫爲賓。不以所與燕者爲賓者，燕爲序歡心，賓主敬也。公父文伯飲南宮敬叔酒，以路堵父爲客，此之謂也。君恒以大夫爲賓者，大夫卑，雖尊之，猶遠于君。今文無「則」，下無「燕」。○爲，于僞反。父，音甫。飲，於鳩反。堵，音者。遠，于萬反。○疏曰：此謂與己臣子燕法。若與異國之賓燕，皆用上介爲賓也。不用公卿爲賓者，恐逼君，用大夫爲賓，雖尊之，猶遠於君，不畏逼君也。○今按：若以樂納賓，記見樂賓後章。公所與燕者，雖不爲賓，亦常如異國之賓爲苟敬也。羞膳者與執幕者，皆士也。

①「食」字，原脫，據賀本補。

尊君也。膳宰卑於士。○疏曰：士則膳宰之長也。羞

卿者，小膳宰也。膳宰之佐也。凡薦與羞

者，<sup>①</sup>小膳宰也。謂於卿大夫以下也。上特言羞卿

者，<sup>②</sup>小膳宰者，欲絕於賓。羞賓者亦士。

主人降洗，洗南，西北面。賓將從降，鄉之。

賓降階西，東面，主人辭降，賓對。對，答。主

人北面盥，坐取觚洗，賓少進辭洗。主人坐

奠觚于筐，興對，賓反位。賓少進者，又辭，宜違其

位也。獻不以爵，辟正主也。古文「觚」皆爲「觶」。○辟，

音避。觶，章鼓反。○疏曰：《曲禮》云：「揖人必違其位。」

「辟正主」者，鄉飲酒，鄉射是正主，皆用爵，此宰夫爲主，故

用觚也。主人卒洗，賓揖，乃升。賓每先升，尊也。

○疏曰：「每先升」者，前賓已先升，此又先升也。主人

升，賓拜洗。主人賓右奠觚答拜，降盥。主人

復盥，爲拜手盥也。○盥，步困反。○疏曰：前盥爲洗

爵，此盥爲洗手。賓降，主人辭，賓對。卒盥，賓

揖升，主人升，坐取觚。取觚，將就瓦大酌膳。執

冪者舉冪，主人酌膳，執冪者反冪。君物曰膳，

膳之言善也。酌君尊者，尊賓也。主人筵前獻賓，賓

西階上拜，筵前受爵，反位，主人賓右拜送

爵。賓既拜，前受觚，退復位。膳宰薦脯醢，賓升

筵，膳宰設折俎。折俎，牲體骨也。《鄉飲酒》記曰：

「賓俎，脊、脅、肩、肺。」賓坐，左執爵，右祭脯醢，

奠爵于薦右，興取肺，坐絕祭，啐之，興，加于

俎，坐挽手，執爵，遂祭酒，興，席末坐啐酒，

降席，坐奠爵，拜，告旨，執爵興，主人答拜。

啐，才計反。挽，始銳反。啐，七內反。○降席，席西也。

旨，美也。○疏曰：「降席席西」，不言面，案前例降席，席西，

拜者皆南面，拜訖則告旨。賓西階上北面坐卒爵，

興，坐奠爵，遂拜，主人答拜。遂拜，拜既爵也。

右主人獻賓。○記：惟公與賓有俎。

主於燕，其餘可以無俎。

<sup>①</sup>與，原脫，據賀本補。

<sup>②</sup>上，原作「土」，據寬文本、賀本改。

賓以虛爵降，將酢主人。○酢，才各反，下同。

主人降，賓洗南坐奠觚，少進辭降，主人東面對。上既言爵矣，復言觚者，嫌易之也。《大射禮》曰：

「主人西階西，東面少進對。」今文從此以下「觚」皆爲「爵」。

○疏曰：一升曰爵，二升曰觚，散文即通，觚亦稱爵，經文不辨主人立處，又無少進之文。鄭以《大射》先行燕禮，皆與此同，故引以爲證。賓坐取觚，奠于筐下，盥洗。筐下，筐南。主人辭洗。謙也。今文無「洗」。

賓坐奠觚于筐，興對，卒洗，及階，揖升。主人升，拜洗如賓禮。賓降盥，主人降，賓辭降。卒盥，揖升，酌膳，執冪如初，以酢主人于西階上。主人北面拜受爵，賓主人之左拜送爵。賓既南面授爵，乃之左。主人坐祭，不啐酒。辟正主也。未薦者，臣也。○疏曰：《鄉飲酒》、《鄉射》皆是正主，不言不啐酒，故鄭云「辟正主也」。賓禮獻訖則薦脯醢，此主人是臣，故獻訖不薦。至獻大夫下，胥乃薦主人于洗北是也。不拜酒，不告旨。主人之義。○

疏曰：「告旨」者，賓拜主人訖，告酒美也。《鄉飲酒》、《鄉射》正主人，故云主人無自告美。此則宰夫代君爲主，不得直云主人，故云「主人之義」。遂卒爵，興，坐奠爵，拜，執爵興，賓答拜。主人不崇酒，以虛爵降奠于筐。崇，充也。不以酒惡謝賓，甘美君物也。賓降，立于西階西。既受獻矣，不敢安盛。射人升賓，賓升，立于序內，東面。東西牆謂之序。《大射禮》曰：「擯者以命升賓。」

### 右賓酢主人。

主人盥，洗象觚，升實之，東北面獻于公。象觚，觚有象骨飾也。取象觚者東面。○疏曰：知「東面」者，以膳筐南有臣之筐，不得北面取，又不得南面背君取，從西階來，不得筐東西面取，是以東面也。公拜受爵，主人降自西階，阼階下北面拜送爵。士薦脯醢，膳宰設折俎，升自西階。薦，進也。《大射禮》曰：「宰胥薦脯醢，由左房。」○胥，音須，又思敍反。○疏曰：凡此篇內舉旅行酬，公應先拜者，皆受酬者先拜，公乃答拜，尊公故也。此公先拜受爵者，受獻禮重故也。



前獻賓，薦脯醢，及設折俎，皆使膳宰者，賓卑故也。今於公，士薦脯醢，膳宰設折俎，異，以其士尊於膳宰。君尊，故使上薦。大射主於射，略於飲酒，故公及賓同使宰胥薦脯醢，庶子設折俎。此燕禮燕私，主於羞，故賓之薦俎，庶羞同使膳宰，君之脯醢庶羞同使士，尊官爲之。公祭如賓禮，膳宰贊授肺，不拜酒，立卒爵，坐奠爵，拜，執爵興。凡異者，君尊，變於賓也。○疏曰：云「凡」非一，謂膳宰贊授肺立卒爵，又上文「士薦脯醢」，皆是異於賓，故云「凡」以廣之。主人答拜，升，受爵以降，奠于膳筐。

右主人獻公。○記：獻公曰：「臣敢奏爵以聽命。」授公釋此辭，不敢必受之。○疏曰：謂主人獻公，賓賡觶於公，雖非獻，亦釋此辭也。

更爵，洗，升，酌膳酒以降，酢于阼階下，北面坐奠爵，再拜稽首，公答再拜。更爵者，不敢襲至尊也。古文「更」爲「受」。○疏曰：主人受公酢者，不敢煩公，尊君之義。獻君自酢同用觶，必更之者，襲因也，不敢因君之爵。主人坐祭，遂卒爵，再拜稽

首。公答再拜，主人奠爵于筐。

右主人受公酢。

主人盥洗，升賡觶于賓，酌散，西階上坐奠爵，拜賓，賓降筵，北面答拜。賡，以證反。散，思旦反，注及下同。○賡，送也，讀或爲揚，揚，舉也。酌散者，酌方壺酒也，於膳爲散。今文「賡」皆作「騰」。○疏曰：騰與賡皆送義，《檀弓》揚訓爲舉，義勝於送。主人坐祭，遂飲，賓辭。卒爵，拜，賓答拜。辭者，辭其代君行酒，不立飲也。此降於正主酬也。○疏曰：上文獻君，君立卒爵，此主人代君酬賓，亦宜立飲。今主人坐祭遂飲，故鄭云「辭其代君行酒，不立飲」。正主酬，如鄉飲，鄉射主人酬賓，皆坐卒爵。○今按：正主之酬，皆坐卒爵，此代君酬，當降禮而立飲。今不立而坐，則是不降，故辭不敢當也。主人降洗，賓降，主人辭降，賓辭洗。卒洗，揖升，不拜洗。不拜洗，酬而禮殺。○殺，所界反。主人酌膳，賓西階上拜。拜者，拜其酌已。受爵于筵前，反位。主人拜送爵，賓升席，坐祭酒，遂奠于薦東。遂者，因坐而奠，不北面

也。奠之者，酬不舉也。○疏曰：案鄉飲、鄉射，主人酬賓，皆主人實觶，席前北面，賓始西階上拜。此及大射，主人始酌膳時，賓已西階上拜者，以其主人皆是代君勸酒，其賓是臣，急承君勸，不敢安暇，故先拜也。主人又不坐奠于薦西，賓祭訖，遂南面奠于薦東，不北面奠也。主人降復位，賓降筵西，東南面立。賓不立于序內，位彌尊也。位彌尊者，其禮彌卑，記所謂「一張一弛」者，是之類與？○弛，尸氏反。與，音餘。○疏曰：案上初賓得獻降升之時，序內立，是不敢近賓席，是禮尊而賓卑。至此酬訖立於席西，是賓位彌尊，禮漸殺，故云彌卑也。獻時爲盛，是一張也。酬時爲殺，是一弛也。

### 右主人酬賓。

小臣自阼階下請媵爵者，公命長。長，丁丈反。○命長，使選卿大夫之中長幼可使者。○疏曰：案下文「大夫長升受旅」，是長幼次第，非專最長，則此「命長」亦非最長，但是長幼之中可使者也。小臣作下大夫二人媵爵。作，使也。卿爲上大夫，不使之者，爲其尊。○爲，于僞反。○疏曰：案《王制》：「上大夫卿。」媵爵者

阼階下皆北面再拜稽首，公答再拜。再拜稽首，拜君命也。媵爵者立于洗南，西面北上，序進，盥洗角觶，升自西階，序進酌散，交于楹北，降，阼階下皆奠觶，再拜稽首，執觶興，公答再拜。序，次第也，猶代也。楹北，西楹之北也。交而相待於西階上，既酌，右還而反，往來以右爲上。○疏曰：「西面北上」者，是未盥相待之位，「序進盥」則北面向洗。云「西楹之北」者，二大夫盥手洗爵訖，先者升西階，由西楹之北向東楹之西，東面酌酒訖，右還，由西楹北向西階上，北面。後者升西階，亦由西楹之北向東楹之西，酌酒訖，亦由西楹之北西階上北面相待，乃次第而降。「以右爲上」者，謂在洗南西面及階上北面時，先者在右，地道尊右故也。媵爵者皆坐祭，遂卒觶，興，坐奠觶，再拜稽首，執觶興，公答再拜。媵爵者執觶待于洗南。待君命也。○疏曰：以君尊臣卑，故雖自飲訖，猶執觶以待君命也。小臣請致者，請使一人與？二人與？優君也。○疏曰：案下二人俱致，禮法當然，是以不敢必君舉也，故云：「一人與？二人與？」取君進止，

是優君也。若君命皆致，則序進，奠觶于筐，阼階下皆再拜稽首，公答再拜。媵爵者洗象觶，升實之，序進，坐奠于薦南，北上，降，阼階下皆再拜稽首，送觶，公答再拜。序進，往來由尊北，交于東楹之北，奠于薦南，不敢必君舉也。《大射禮》曰：「媵爵者皆退反位。」○疏曰：酌酒奠于君所，故交于東楹之北，以其酒尊，所陳在東楹之西，西向，而陳其尊，有四并執罍者在南，不得南頭以之君所。又唯君面尊，若西面酌酒，則背君，故先酌者東面酌訖，由尊北又楹北往君所，奠訖，右還而反。後酌者亦於尊北，又於楹北與反者而交，先者於南西過，後者於北東行，奠訖，亦右還而反，相隨降自西階也。案《鄉飲》、《射》皆云奠者於左，將舉者於右，是以《鄉飲》一人舉觶及二人舉觶，皆奠于薦右。今言媵爵於公，是將舉旅，當奠於薦右，<sup>①</sup>而奠於薦左，故云不敢必君舉也。引《大射禮》者，此經無反位之文，故引《大射》媵爵者皆退反門右北面位。<sup>②</sup>

### 右媵爵于公。

公坐，取大夫所媵觶，興以酬賓，賓降，

西階下再拜稽首。公命小臣辭，賓升成拜。興以酬賓，就其階而酬之也。升成拜，復再拜稽首也。先時君辭之，於禮若未成然。○疏曰：賓降拜不於阼階下，而言西階下，故知公在賓西階上也。凡臣於君，雖為賓，與君相酬，受爵不敢拜於堂上，皆拜於堂下。若君辭之，聞命即升。若堂下拜訖，君辭之，即升，復再拜稽首。所以然者，以堂下再拜而君辭之，若未成然，故復升堂再拜稽首以成之。若堂下未拜之間，聞命則升，升乃再拜稽首，則不言升成拜，即下經云「小臣辭，賓升，再拜稽首」，鄭注「不言成拜者，為拜故下，實未拜」是也。凡臣拜於君有三等，初受獻拜於堂下，或親辭，或遣小臣辭，成與不成，如上說。至於酬酒，雖下堂拜，未即拜，待君辭，即所云「為拜故下，實未拜」者，禮殺也。此篇末無算爵受公賜爵者，皆下席堂上拜稽首，不堂下拜者，禮末又輕於酬時。公坐奠觶，答再拜，執觶興，立卒觶，賓下拜，小臣辭，賓

①「今言媵爵於公是將舉旅當奠於薦右」十五字原重复，據元明本、寬文本、賀本刪。

②「媵爵者皆退」，原作「以是之言」，據賀本改。又，賀本於句下有「也」字。

升，再拜稽首。不言成拜者，爲拜故下，實未拜也。下不輒拜，禮殺也。此賓拜於君之左，不言之者，不敢敵偶於君。○疏曰：上云公酬賓于西階上，則此賓升再拜者，拜於君之左可知。經不言者，不敢敵耦於君，闕其文也。公坐奠觶，答再拜，執觶興。賓進受虛爵，降奠于筐，易觶洗。君尊，不酌故也。凡爵不相襲者也，於尊者言更，自敵以下言易，更作新。易，有故之辭。進受虛爵，尊君也。不言公酬賓於西階上及公反位者，亦尊君，空其文也。○疏曰：「君尊不酌」者，凡酬賓，當親酌以授賓，今賓爵自酌者，君尊，不酌與臣故也。云「於尊者言更」，謂上文主人獻公訖，受爵以降，更爵自酢，是受尊者之爵言更也。下文云賓酬卿「更觶」，注云「卿尊」，是與尊者之爵言更也。云「自敵以下言易」者，謂此文公酬賓云「易觶」，是與卑者，故言易也。上文大夫二人媵爵于公，既卒觶，洗象觶，升坐奠，是公受卑者之爵。合言易而不言者，奠散觶，洗象觶，隔再拜稽首，故不復言易也。○今按：「更」、「易」二字，注、疏之說雖詳，然於例頗有不合，疑本無異義，不必強爲分別也。公有命，則不易不洗，反升酌膳觶，下拜。小臣辭，賓升再拜稽首。下拜，下亦

未拜，凡下未拜有二，或禮殺，或君親辭。君親辭，則聞命即升，升乃拜，是亦不言成拜。○疏曰：云，凡下未拜有二，禮殺二者，謂若此酬時也。「或君親辭」者，謂若《公食大夫》云：「公拜至，賓降，西階東北面答拜，公降一等辭，賓升，階上北面再拜稽首」。是階下未拜，不得言升成拜也。公答再拜。拜於階上也，於是賓請旅侍臣。○疏曰：案下《記》云：「凡公所酬，既拜，請旅侍臣。」大射於此時賓請旅於諸臣，此不言者，文不具，故記人辨之。賓以旅酬于西階上。旅，序也，以次序勸卿大夫飲酒。○疏曰：此目旅酬之事，下文「射人作大夫長」以下乃言其法。射人作大夫長，升受旅。言作大夫，則卿存矣。長者，尊先而卑後。○疏曰：遣射人作大夫者，燕或射，故使之。云「尊先而卑後」者，賓則旅三卿，三卿徧，次第至五大夫，大夫徧，不及士。賓大夫之右坐奠觶，拜，執觶興，大夫答拜。賓在右者，相飲之位。○飲，於鵠反。○疏曰：賓在西階上酬卿，賓與卿並北面，賓在東，卿在西，是賓在大夫之右。賓位合在西，今在東，故云「相飲之位」也。賓坐祭立飲，卒觶不拜。酬而禮殺。若

膳解也，則降更解洗，升實散。大夫拜受，賓拜送。言更解，卿尊也。大夫辯受酬，如受賓酬之禮，不祭。卒受者以虛解降，奠于筐。卒，猶後也。《大射禮》曰「奠于筐，復位」。今文「辯」皆作「徧」。○辯，音遍。○疏曰：不祭者，酬禮殺也。復位，復門右北面位。

右公爲賓舉旅。○記：凡公所辭，皆

栗階。栗，蹙也，謂越等急趨君命也。○蹙，子六反。

凡栗階不過二等。其始升猶聚足連步，越二等，左右足各一發而升堂。○疏曰：凡堂及階，尊者高而多，卑者庫而少。案《禮器》云：「天子之堂九尺，諸侯七尺，大夫五尺，士三尺。」《士冠禮》：「降三等受爵弁。」鄭注云：「降三等，下至地。」則士三等階。以此推之，則一尺爲一階，大夫五尺，五等階，諸侯七尺，七等階，天子九尺，九等階可知。今云「凡栗階不過二等」，言「凡」，則天子九等已下至士三等，皆有栗階之法。栗階不過二等，據上等而言，故鄭云「其始升猶聚足連步」也。《曲禮》云：「涉級聚足，連步以上。」鄭注云：「涉等聚足，謂前足躡一等，後足從之併。」連步，謂足相隨不相

過也。天子已下，皆留上等爲栗階，左右足各一發而升堂。其下無問多少，皆連步。《雜記》云：「主人之升降散等。」鄭注云：「散等，栗階。」則栗階亦名散等。凡公所酬，既拜，請旅侍臣。既拜，謂自酌升拜時也。賓者降階下告于公，還西階下告公許。旅，行也，請行酒于群臣。必請者，不專惠也。○疏曰：「自酌升拜時」，即上賓得君酬酒飲訖，自酌降拜升時也。「賓者」以下，約《大射》而知也。

主人洗，升實散，獻卿于西階上。酬而後

獻卿，別尊卑也，飲酒成於酬也。○別，彼列反。○疏曰：此酬非謂尋常獻酬，乃是君爲賓舉旅行酬。以其主人獻君，君酢主人，主人不敢酬君，故使二大夫媵爵于公，以當酬處，所以覆獻也。但君恩既大，爲賓舉旅，飲酒之禮成於酬，故酬辯乃獻卿。以君尊卿卑，是以君禮成，卿乃得獻，故云「別尊卑也」。司宮兼卷重席，設于賓左，東上。卷，居遠反。重，直容反。○言兼卷，則每卿異席也。重席，重蒲筵縮布純也。卿坐東上，統於君也。席自房來。○疏曰：此經設：卿之席在於賓東，《公食大夫》「蒲筵縮布純，加雀席，玄純」，彼爲異國之賓，有兩種席，故稱「加」。此

燕已臣子，一種席重設之，故不稱加。《鄉飲酒》、《鄉射》諸公大夫席于尊東西上，彼遵尊於主人，故鄭注云「統於尊」。此爲君尊，故統於君而東上也。《公食》記云：「宰夫筵，出自東房。」卿升，拜受觚，主人拜送觚，卿辭重席，司宮徹之。徹，猶去也。重席雖非加，猶爲其重累去之，辟君也。○去，起呂反。○疏曰：《鄉射》「辭加席」，以異席而辭之。此重席不合辭，以兩重似君，故辭以辟之也。乃薦脯醢，卿升席坐，左執爵，右祭脯醢，遂祭酒，不啐酒，降席，西階上北面坐卒爵。興，坐奠爵，拜，執爵興。主人答拜受爵，卿降復位。不酢，辟君也。卿無俎者，燕主於羞。○疏曰：此不言其人，故《記》辨之云：「羞卿者，小膳宰也。」上主人獻公，遂自酢于阼階下，此不酢也。辯獻卿，主人以虛爵降，奠于筐。今文無「奠于筐」。射人乃升卿，卿皆升就席。若有諸公，則先卿獻之，如獻卿之禮。先，悉薦反。○諸公者，謂大國之孤也。孤一人，言諸者，容牧有三監。○疏曰：《周禮·典命》云：「公之孤四命。」侯、伯已下不言孤，故據大

國而言。鄭注云：「上公得置孤卿一人。」《王制》云：「天子使其大夫爲三監，監於方伯之國，國二人。」彼是殷法，周制使伯佐牧，不置監，故鄭云「容」。言容有異代之法，據《周禮》，天子大夫四命，與孤等，故同稱公。席于阼階西，北面東上，無加席。席孤北面，爲其大尊，屈之也。亦因阼階西位近君，近君則屈，親寵苟敬私昵之坐。○大，音泰。近，附近之近。昵，女乙反。坐，才卧反。○疏曰：孤「無加席」者，亦是爲大尊屈之也。《記》云「賓爲苟敬，席于阼階之西」，以爲敬。此孤亦席於阼階之西，故爲「苟敬私昵之坐」也。

#### 右主人獻孤卿。

小臣又請媵爵者，二大夫媵爵如初。又，復。請致者，若命長致，則媵爵者奠饌于筐，一人待于洗南。長致，致者阼階下再拜稽首，公答再拜。命長致者，公或時未能舉，自優暇也。古文云「阼階下北面再拜」。○疏曰：「請致者」，亦小臣也。脫屨升坐以前，公爲賓爲卿爲大夫三舉旅者，燕禮之正，不得損益。而云「公或時未能舉自優暇」者，正謂周公

作經，許其如此爾。言「若」者，不定之辭，優君之義也。洗象鬴，升實之，坐奠于薦南，降，與立于洗南者二人皆再拜稽首，送鬴，公答再拜。奠于薦南者，於公所用酬賓鬴之處。二人俱拜，以其共勸君。○處，昌慮反。○疏曰：案前大夫二人媵鬴奠于公，薦南北上，其上鬴已取，為賓舉旅，下鬴仍在。今大夫又媵一鬴，而云「奠于薦南」，明知是所用酬賓鬴之處。云「共勸君」者，以二人媵爵，是共勸君酒。君雖止命長致，亦當「二人俱拜」也。

### 右再媵爵。

### 公又行一爵，若賓若長，唯公所酬。

爵，先媵者之下鬴也。若賓若長，則賓禮殺矣。長，公卿之尊者也。賓則以酬長，長則以酬賓。○疏曰：前大夫二人媵爵，皆奠于薦南，其上者已為賓舉旅，今又行一爵，故知「先媵者之下鬴也」。其後媵一鬴者，留之後為大夫舉旅也。前為賓舉旅，不云若賓若長，專為賓禮盛。至此為卿舉旅，不專為賓，是「賓禮殺」也。以旅于西階上，如初。大夫卒受者，以虛鬴降奠于筐。疏曰：言「如初」者，一如上為賓舉旅之節。

### 右公為卿舉旅。

主人洗升，獻大夫于西階上，大夫升，拜受觚。主人拜送觚，大夫坐祭，立卒爵，不拜既爵。主人受爵，大夫降復位。既，盡也。不拜之者，禮又殺。○疏曰：前卿受獻不酢，辟君，已是禮殺。今大夫受獻，不但不酢主人，又不拜既爵，故云「禮又殺」。胥薦主人于洗北，西面，脯醢，無胥。胥，之承反。○胥，膳宰之吏也。主人，大夫之下，先大夫薦之，尊之也。不於上者，上無其位也。胥，俎實。○疏曰：案《周禮》注：「胥，讀如諧，謂其有才智，為什長。」是庶人在官者。所羞薦者皆膳宰，故知此胥是膳宰之吏，主人宰夫也。雖是大夫，然其位次在下，此乃先大夫薦之，尊之也。燕禮，大夫堂上，士在下，獨此宰夫言堂上無位者，以其主人在阼階，君已在阼，故主人辟之位而在下，是以《大射》注云：「不薦於上，辟正主也。」胥者，升也，謂升特牲體於俎也。辯獻大夫，遂薦之，繼賓以西，東上。徧獻之乃薦，略賤也。亦獻而后布席也。○疏曰：凡大夫升堂受獻，得獻訖，即降。獻徧，不待大夫升，遂薦於其位，大夫始升，故言「遂」也。「略賤」者，決上卿與賓得獻，即薦，貴

故也。上獻卿之時言設席，此大夫不言，明亦得獻后即布席也。《大射》：「席小卿賓西東上」，注云：「辨貴賤也。」此燕禮主歡，不辨貴賤，小卿與大卿皆在賓東，故此賓西無小卿位。卒，射人乃升大夫，大夫皆就席。

### 右主人獻大夫。

席工于西階上，少東，樂正先升，北面立于其西。工，瞽矇歌諷誦詩者也。凡執技藝者稱工。①

《少牢饋食禮》曰：「皇尸命工祝。」《樂記》：「師乙曰：乙，賤工也。」樂正，于天子樂師也。凡樂，掌其序事，樂成則告備。○矇，音蒙。○疏曰：此上下作樂之中有四節：升歌一，笙二，閒三，合樂四。按《周禮》：瞽矇「掌播鼗，諷誦詩」，鄭云：「諷誦詩，謂聞讀之，不依詠。」即《爾雅》「徒歌曰謠」。此作樂之時依於瑟，即《詩》注云「曲合樂曰歌」，一也。小臣納工，工四人，二瑟。小臣左何瑟，面鼓，執越，內弦，右手相。人，升自西階，北面東上坐，小臣坐授瑟，乃降。何，胡我反。相，息亮反。○工四人者，燕禮輕，從大夫制也。面鼓者，燕尚樂，可鼓者在上也。越，瑟下孔也。內弦，弦為主也。相，

扶工也。後二人徒相，天子大僕二人也。小臣四人，祭僕六人，御僕十二人，皆同官。○疏曰：大射禮重，工六人，從諸侯制。鄉射之工四人，②是大夫制，則五等諸侯同六人也。引「大僕二人」，《周禮》文，別同官人多，得相參之意。工歌《鹿鳴》、《四牡》、《皇皇者華》。三者皆《小雅》篇也。《鹿鳴》，君與臣下及四方之賓宴，講道修政之樂歌也。此采其已有旨酒，以召嘉賓，嘉賓既來，示我以善道，又樂嘉賓有孔昭之明德，可則倣也。《四牡》，君勞使臣之來樂歌也。此采其勤苦王事，念將父母，懷歸傷悲，忠孝之至，以勞賓也。《皇皇者華》，君遣使臣之樂歌也。此采其更是勞苦，自以為不及，欲諮謀於賢知而以自光明也。○倣，戶教反。更，音賡。知，音智。卒歌，主人洗，升獻工。工不興，左瑟，一人拜受爵，主人西階上拜送爵。工歌乃獻之，賤者先就事也。左瑟，使其右。一人，工之長者也。工拜於席。○便，婢面反。○疏曰：工北面，以西為左，空其右，受獻。便者，酒

① 「凡」，原作「已」，據元明本、寬文本、賀本改。  
② 「之」，原作「皆」，據賀本改。



從東楹之西來，故以右爲便。《鄉飲酒》「大師則爲之洗」，則衆工不洗也。此經主人洗升獻工，不辨大師與衆工。又《鄉飲酒》記「不洗者不祭」，而此篇與《大射》群工與衆笙皆祭，以皆爲之洗故也。又經無降席之文，明拜於席可知。薦脯醢，輒薦之，變於大夫也。○疏曰：謂非貴工也。使人相祭，使扶工者相其祭薦、祭酒。卒爵不拜，賤不備禮。主人受爵。將復獻衆工也。衆工不拜受爵，坐祭，遂卒爵，辯有脯醢，不祭。主人受爵，降奠于筐。遂，猶因也。古文曰「卒爵不拜」。

### 右樂賓升歌獻工。

公又舉奠觶，唯公所賜，以旅于西階上，如初。言賜者，君又彌尊，賓長彌卑。○疏曰：燕尚飲酒，故工歌之後，笙奏之前，而爲大夫舉旅。大射雖行燕禮，主於射，故笙之間至射乃爲大夫舉旅。按：上爲賓舉旅直云「公興以酬賓」，爲卿舉旅而云「若賓若長」，是君禮漸尊，賓禮漸殺。雖然猶言酬，至此言「唯公所賜」者，是君又彌尊，賓長彌卑也。卒。旅畢也。○疏曰：謂爲大夫舉旅酬，行於西階之上，或從賓，或從卿，次第盡大夫也。

### 右公爲大夫舉旅。

笙人立于縣中，奏《南陔》、《白華》、《華黍》。陔，工才反。○以笙播此三篇之詩。縣中，縣中央也。《鄉飲酒禮》曰：「磬南北面，奏《南陔》、《白華》、《華黍》。」皆《小雅》篇也，今亡，其義未聞。昔周之興也，周公制禮作樂，采時世之詩以爲樂歌，所以通情相風切也，其有此篇明矣。後世衰微，幽、厲尤甚，禮樂之書，稍稍廢棄。孔子曰：「吾自衛反魯，然後樂正，《雅》、《頌》各得其所。」謂當時在者而復重雜亂者也，惡能存其亡者乎？且正考父校商之名《頌》十二篇于周大師，歸以祀其先王，至孔子二百年之間，五篇而已，此其信也。○風，方鳳反。重，直用反。惡，音烏。父，音甫。○今按：說見《鄉飲酒篇》。○疏曰：諸侯軒縣，闕南面，故得言「縣中」。《鄉飲酒》唯有一磬縣，故但云磬南。注引之者，亦見此爲近北面縣之南也。主人洗升，獻笙于西階上。一人拜，盡階不升堂，受爵降，主人拜送爵。階前坐祭，立卒爵，不拜既爵，升授主人。一人，笙之長

①「工」，原作「丁」，據元明本、寬文本、賀本改。

者也。《鄉射禮》曰：「笙一人拜于下。」衆笙不拜受爵，降，坐祭，立卒爵，辯有脯醢，不祭。疏曰：笙在堂下而言降者，階下受爵者亦盡階不升堂也。云「辯有脯醢」者，亦獻訖薦于位之前。乃閒歌《魚麗》，笙《由庚》，歌《南有嘉魚》，笙《崇丘》，歌《南山有臺》，笙《由儀》。閒，閒廁之閒。麗，力知反。○閒，代也，謂一歌則一吹也。六者皆《小雅》篇也。《魚麗》，言太平年豐物多也。此采其物多酒旨，所以優賓也。《南有嘉魚》，言太平君子有酒，樂與賢者共之也。此采其能以禮下賢者，賢者纍蔓而歸之，與之宴樂也。《南山有臺》，言太平之治以賢者爲本也。此采其愛友賢者，爲邦家之基，民之父母，既欲其身之壽考，又欲其名德之長也。《由庚》、《崇丘》、《由儀》，今亡，其義未聞。○下，遐嫁反。纍，力追反。蔓，音萬。治，直吏反。長，如字。遂歌鄉樂，《周南》《關雎》、《葛覃》、《卷耳》；《召南》《鵲巢》、《采芣》、《采蘋》。雎，七徐反。①覃，大南反。召，上照反。蘋，音頻。○《周南》、《召南》、《國風》篇也，王后、國君夫人房中之樂歌也。《關雎》，言后妃之德。

《葛覃》，言后妃之職。《卷耳》，言后妃之志。《鵲巢》，言國君夫人之德。《采芣》，言國君夫人不失職也。《采蘋》，言卿大夫之妻能修其法度也。昔大王、王季居于岐山之陽，躬行《召南》之教，以興王業。及文王而行《周南》之教，以受命。《大雅》云：「刑于寡妻，至于兄弟，以御于家邦。」謂此也。其始一國爾。文王作邑于豐，以故地爲卿士之采地，乃分爲二國。周，周公所食也。召，召公所食也。於時文王三分天下有其二，德化被于南土，是以其詩有仁賢之風者，屬之《召南》焉；有聖人之風者，屬之《周南》焉。夫婦之道者，生民之本，王政之端。此六篇者，其教之原也。故國君與其臣下及四方之賓燕，用之合樂也。鄉樂者，《風》也。《小雅》，爲諸侯之樂。《大雅》、《頌》，爲天子之樂。鄉飲酒升歌《小雅》，禮盛者可以進取。燕合鄉樂者，禮輕者可以逮下也。《春秋傳》曰：《肆夏》、《繁遏》、《渠》，天子所以享元侯也。《文王》、《大明》、《綿》，兩君相見之樂也。然則諸侯之相與燕，升歌《大雅》，合《小雅》也。天子與次國、小國之君燕，亦如之。與大國之君燕，升歌《頌》，合《大雅》，其笙閒之篇未聞。○今按：說見《鄉飲酒篇》。○興、

①「徐」，原作「如」，據賀本改。

王，如字。采，七代反。被，皮寄反。○疏曰：《飲酒》注云：合樂，謂歌與衆聲俱作。彼經有「合樂」字故也。此經無合樂字，實亦衆聲俱作，是以注以「合」解之也。大師告樂正曰：「正歌備。」大師，上工也。掌合陰陽之聲，教六詩，以六律爲之音者也。子貢問師乙曰：「吾聞聲歌各有宜也，如賜者宜何歌也？」是明其掌而知之也。正歌者，升歌及笙各三終，閒歌三終，合樂三終，爲一備，備亦成也。○疏曰：凡樂之歌，必使瞽矇爲焉。命其賢知者以爲大師，所謂上工也。《周禮·大師》：「掌六律六同，以合陰陽之聲。」注云：「陽聲：黃鐘、太簇、姑洗、蕤賓、夷則、無射。陰聲：大呂、應鐘、南呂、林鐘、中呂、夾鐘。」又云：「皆文之以五聲：宮、商、角、徵、羽。皆播之以八音：金、石、土、革、絲、木、匏、竹。」又云：「教六詩：曰風，曰賦，曰比，曰興，曰雅，曰頌。以六德爲之本，以六律爲之音。」師乙，魯之太師。樂正由楹內、東楹之東告于公，乃降復位。言由楹內者，以其立於堂廉也。復位，位在東縣之北。○疏曰：樂正與工俱在堂廉，則楹南無過處，故由楹內適東楹之東告于公也。大射，大樂正東縣之北，北面。

右樂賓笙閒合。○記：若以樂納賓，則賓及庭，奏《肆夏》。賓拜酒，主人答拜而樂闋。公拜受爵而奏《肆夏》，公卒爵，主人升受爵以下而樂闋。闋，苦穴反。○《肆夏》，樂章也，今亡。以鐘鐃播之，鼓磬應之，所謂金奏也。記曰：入門而縣興，示易以敬也。卿大夫有王事之勞，則奏此樂焉。○應，應對之應。易，以鼓反。○今按：樂納賓，見前即位章。○疏曰：常燕已，臣子無樂，王事之勞或有或無，故言「若」也。《九夏》皆《詩》篇名，《頌》之族類也。《鐘師》云：「掌金奏。」金謂鐘及鐃。又云：「凡樂事，以鐘鼓奏《九夏》。」鄭注云：「先擊鐘，次擊鼓。」是奏《肆夏》時有鐘、鐃、鼓、磬。彼經注雖不言磬，但縣內有此四者，故鄭兼言磬也。《仲尼燕居》云：「兩君相見，揖讓而入門，入門而縣興，揖讓而升堂，升堂而樂闋。」《郊特牲》云：「賓入大門而奏《肆夏》，示易以敬也。」必引二記文者，以燕在寢，賓及寢庭，與《仲尼燕居》入門而縣興事相類，故引之證賓及庭樂作之義也。不取賓入大門者，大門非寢門故也。言賓及庭奏《肆夏》，則非尋常大夫爲賓。與宰夫爲主人相對者，謂

若賓爲荀敬四方賓之類，特奏《肆夏》，其事既重，若非有王事之勞，何以致此故也。升歌《鹿鳴》，下管

《新宮》，笙入三成。《新宮》，《小雅》逸篇也。管

之入三成，謂三終也。○疏曰：《鹿鳴》不言下，歌《新

宮》不言笙，奏而言升歌，下管者，欲明笙奏異於常燕。

常燕，即上所陳四節是也。今下歌《鹿鳴》與笙奏全

別，<sup>①</sup>故特言。「下管《新宮》笙入三成」者，正謂笙奏《新

宮》三終，申說下管之義。遂合鄉樂，鄉樂，《周南》、

《召南》六篇。言遂者，不閒也。若舞則《勺》。勺，

音灼。○《勺》，《頌》篇，告成《大武》之樂歌也。其詩

曰：「於鑠王師，遵養時晦。」又曰：「實維爾公允師。」既

合鄉樂，萬舞而奏之，所以美王侯，勸有功也。<sup>②</sup>○於

鑠，上音烏，下舒若反。○疏曰：言「若」者，或爲之舞，

或不爲之舞。爲之舞，則作周萬舞之舞而奏《勺》，《詩》

傳曰：萬者，下舞也。

射人自阼階下，請立司正，公許，射人遂

爲司正。君許其請，因命用爲司正。君三舉爵，樂備作

矣。將留賓飲酒，更立司正以監之，<sup>③</sup>察儀法也。射人俱

相禮，其事同。○監，古銜反。相，息亮反。○疏曰：云

「君三舉爵」者，爲賓、爲卿、爲大夫舉旅。云「樂備作矣」

者，歌、笙、間、合四者備作，各三終矣。按《鄉飲酒》、《鄉

射》立司正後始行旅酬者，彼是士饗禮，饗禮之法莫問尊

卑，偏獻之後乃行旅酬，故立司正之後乃行旅酬。此燕禮，

國君燕其臣子，雖一獻以辨尊卑，故主人獻君而受酬，主人

卑，不敢酬公。獻之禮成於酬，故使大夫媵觶於公，當酬

公。君行大惠，即舉之爲賓，賓得觶請旅諸臣，偏卿大夫乃

成一獻之禮，復獻，卿大夫皆爲之舉旅行酬，皆成其獻。但

卿大夫皆堂上有位，近君不敢失禮，故雖舉旅行酬，而未立

司正。作樂後將獻群士，士職卑位在堂下，將爲士舉旅，恐

失禮，故未獻之前即立司正監之。司正洗角觶，南面

坐奠于中庭，升東楹之東受命，西階上北面

命卿大夫：「君曰：『以我安。』」卿大夫皆對

曰：「諾。敢不安！」洗奠角觶于中庭，明其事以自

表，威儀多也。君意殷勤，欲留賓飲酒，命卿大夫以我故

表，威儀多也。君意殷勤，欲留賓飲酒，命卿大夫以我故

①「工」，原作「一」，據元明本、寬文本、賀本改。

②「功」，原作「巧」，據元明本、寬文本、賀本改。

③「正」，原作「王」，據元明本、寬文本、賀本改。

安，或亦其實不主意於賓也。○疏曰：主人安，客乃安，故欲安賓，先語卿大夫，以我意故須安也。「不主意於賓」者，欲兼群臣共安也。司正降自西階，南面坐取觶，升酌散，降，南面坐奠觶，右還，北面少立，坐取觶，興，坐不祭，卒觶，奠之，興，再拜稽首。右還，將適觶南，先西面也。必從觶西，為君之在東也。少立者，自嚴正，慎其位也。○為，于僞反。○疏曰：「右還」，謂奠時南面，乃以右手向外而西面，乃從觶西南行而右還北面。蓋君在阼，若從觶東而左還北面，則背君也。司正監察，主為使人嚴正謹慎，故先自嚴正謹慎也。○今按：右還，說見《鄉射》「再請射」章。左還，南面坐取觶，洗，南面反奠于其所。反奠虛觶，不空位也。○疏曰：必使不空者，亦欲使眾人覩知司正嚴正之處。

### 右立司正。

升自西階，東楹之東請徹俎，降，公許，告于賓，賓北面取俎以出。膳宰徹公俎，降自阼階以東。膳宰降自阼階，以賓親徹，若君親徹然。○疏曰：臣之升降當西階，今見賓親徹，膳宰代君徹，不降

西階而降自阼階，當君降處，故云「若君親徹」，降自阼然也。卿大夫皆降，東面北上。以將坐，降待賓反也。○疏曰：按《大射》云「大夫降復位」，注云：「門東北面位。」不與卿同東面位者，彼卿有俎，卿取俎以出，故大夫不敢獨在西階下，故復位，復門東，北面位。此燕，卿無俎，故大夫與卿同降西階下東面北上位也。上文賓以俎出，當反入升坐，故卿大夫待賓反，亦升坐也。

### 右徹俎。

賓反人，及卿大夫皆說屨，升就席。公以賓及卿大夫皆坐，乃安。說，吐活反。○凡燕坐必說屨，屨賤，不在堂也。禮者尚敬，敬多則不親，燕安坐，相親之心也。○疏曰：不云君降說屨者，《少儀》云：「排闥說屨於戶內者，一人而已矣。」彼據尊者坐在室，則尊者一人說屨在戶內。今此燕在堂上，則君尊說屨於堂上席側可知也。羞庶羞。謂腍肝膋，狗臠醢也。骨體，所以致敬也。庶羞，所以盡愛也。敬之愛之，厚賢之道。○腍，士戀反。膋，音遼。臠，壯吏反。○疏曰：按《大射》云：「羞庶羞。」注云：「所進衆羞，謂腍肝膋，狗臠醢也。或有炮鼈、膾鯉、雉、兔、鶉、鴛。」《大射》先行燕禮，明與彼同。有此物

者，以經云庶羞，則不唯二豆而已。此注不言炮鼈已下，注文不具也。肝膋，見《內則》，用狗肝蒙之，以其膋而炙之。此及《大射》其牲皆用狗，故知有此及狗鼈也。知有炮鼈、膋鯉者，據《詩》而言也。又《內則》及《公食》有雉、兔、鶉、鴛。《鄉飲酒》、《鄉射》亦有狗，但經直云羞不云庶，是以鄭注云鼈醢，明二豆無餘物也。骨體致敬，據未坐以前。庶羞所以盡愛，據說屢已後也。大夫祭薦。燕乃祭薦，不敢於盛成禮也。○疏曰：盛，謂未立司正之前，立行禮時也。成禮，謂祭先也。大夫彼時受獻不祭脯醢，是不敢成禮於盛時也。司正升受命，皆命：「君曰：『無

不醉。』」賓及卿大夫皆興，對曰：「諾。敢不醉！」皆反坐。皆命者，命賓，命卿大夫也。起對必降席，司正退立西序端。○疏曰：云「起對必降席」者，以下云「反坐」知之也。云「司正退立西序端」，以《鄉飲酒》云：「司正升相旅，退立于序端，東面。」知此亦然也。

右燕。○記：有內羞。謂羞豆之實，醢食

糝食，羞籩之實，糝餌粉糝。○醢，以支反。食，音嗣。糝，素感反。糝，去久反，乾飯屑也，劉香久反。餌，音二。糝，才私反。○疏曰：醢，糝也，《內則》曰：「取稻

米，舉糝溲之，小切狼臠膏，以與稻米爲糝。」又曰：糝取牛、羊、豕之肉，三如一，小切。與稻米，稻米二，肉一合以爲餌，煎之是也。糝餌、粉糝，此二物皆粉，稻米、黍米所爲也。合蒸曰餌，餅之曰糝。糝者，搗粉熬大豆爲之，<sup>①</sup>爲餌，糝之，黏著以粉之耳。餌言糝，糝言粉，互相足是也。糝熬之，亦粉之，其粉搗之，亦糝之，是互相足也。

主人洗升，獻士于西階上。士長升，拜

受觶，主人拜送觶。獻上用觶，上賤也。今文「觶」作

「觚」。○疏曰：不從今文「觚」者，若從觚，與大夫已上何異，故不從。士坐祭立飲，不拜既爵，其他不

拜，坐祭立飲。他，謂衆士也。亦升受爵，不拜。○疏

曰：上長之外，皆衆士也。士尊於筮之長，筮之長尚受爵於階上，明士得升堂受爵也。乃薦司正與射人一

人、司士一人、執事二人，立于觶南，東上。

天子射人、司士，皆下大夫二人，諸侯則上士，其人數亦如

①「爲之」二字，寬文本、賀本無。

之。司正爲上。○疏曰：此等皆士而先薦者，以其皆有  
事，故先得薦。司士亦先薦者，按《周禮·司士》掌群士爵  
祿，廢置之事，士中之尊，故亦先得薦也。天子官尊，諸侯  
宜降一等，是諸侯射人，司士在士位中也。《周禮》序官：

「射人下大夫二人，上士四人，下士八人。」以畿外諸侯張三  
侯，與天子同射時，射人有事非一，故知射人之數亦同也。

云「司正爲上」者，雖同是士，以其爲庭長，故設在上先薦  
之。三者當官雖多，皆取長先薦，其餘在於衆位，依齒也。

又士位在西有事者，別在顰南，北面東上也。辯獻士。

士既獻者，立于東方，西面北上，乃薦士。每

已獻而即位于東方，蓋尊之，畢獻，薦于其位。○疏曰：庭

中之位，卿東方西面，大夫北面，士西方東面，是東方尊。

今卿大夫得獻升堂，位空，故士得獻即東方卿位，是尊之。

祝、史、小臣師，亦就其位而薦之。次士獻之，

已，不變位，位自在東方。○疏曰：上設位時，祝史在門

東，小臣在東堂下。主人就旅食之尊而獻之，旅

食不拜受爵，坐祭立飲。北面酌，南鄉獻之於尊

南。不洗者，以其賤，略之也。亦畢獻乃薦之，主人執爵奠

于筐，復位。○鄉，許亮反。○疏曰：按大射，旅食尊，在

西鑄之南，北面，則此主人在南，亦北面以陳尊，向君，若東  
楹之西，東向設尊，亦是向君爲正。彼酌者尊後東面酌，此  
亦尊後北面酌，南面獻之於尊南也。此乃庶人在官，府史  
胥徒之輩，故云賤也。

### 右主人獻士。

若射，則大射正爲司射，如鄉射之禮。

大射正，射人之長者也。如鄉射之禮者，燕爲樂卿大夫，宜  
從其禮也。如者，如其「告弓矢既具」至「退中與算」也。納

射器而張侯，其告請先于君，乃以命賓及卿大夫，其爲司正  
者亦爲司馬，君與賓爲耦。《鄉射》記曰自「君射」至「龍  
旌」，亦其異者也。薦旅食乃射者，是燕射主於飲酒。○疏

曰：云「大射正爲司射」者，燕禮輕，又不主爲射，故射人爲

擯，又爲司正。至射時，大射正爲司射。按鄉射，初，司射

告弓矢既具，至三番射訖而退中與算，故如之也。云「納射

器而張侯」者，欲見此與鄉射因納射器後即張侯，大射納射

器之後，無張侯之事。燕禮每事皆先請于君，大射亦先請

於君，故大射初，司射自阼階前請於公，公許，乃命賓。及

卿大夫鄉射，西階上告賓曰：「弓矢既具」，乃告於主人，遂告

大夫。是先後異也。必云「司正爲司馬」者，諸侯有常官，

嫌與《鄉射》異，故言此也。鄉射賓與主人爲耦，此君與賓爲耦，亦是異於鄉射也。引《鄉射》記「君射至龍旌亦其異者也」者，謂旌與中異，何者？彼因記國君三處射，旌與中各不同，云：「君國中射，則皮樹中，以翻旌獲，白羽與朱羽糅。」言國中，則此燕射也；又云「於郊則間中，以旌獲」，謂諸侯大射在郊；又云「於竟，則虎中、龍旌」，謂諸侯賓射在竟。此皆諸侯禮，射雖記在鄉射，皆與鄉射異也。○今按：「君國中射，則皮樹中，以翻旌獲，白羽與朱羽糅」已入此下記；「於郊，則間中以旌獲」已入《大射》記；「於竟，則虎中、龍旌」亦是燕射，并附此記。

右射。○記：君與射，則爲下射，袒

朱襦，樂作而后就物。袒，徒旱反。襦，如朱反。

○君尊。小臣以巾授矢，稍屬。屬，章欲反。

○君尊，不撝矢。不以樂志。辟不敏也。○辟，音

避。既發，則小臣受弓，以授弓人。俟復發

也。不使大射正，燕射輕。○復，扶又反。上射退

于物一筈，既發，則答君而俟。筈，工但反，又

「老反」<sup>①</sup>。若飲君，如燕則夾爵。謂君在不勝

之黨，賓飲之如燕，腰觚，則又夾爵。○疏曰：「夾爵」者，將飲君，先自飲，及君飲訖，又自飲，爲夾爵。君在，大夫射，則肉袒。不纁襦，厭於君。○厭，一涉反。

○疏曰：《鄉射》記大夫對士射，「袒纁襦」，此對君肉袒，故云「厭於君」也。○君國中射，則皮樹中，以

翻旌獲，白羽與朱羽糅。國中，城中也，謂燕射

也。皮樹，獸名。以翻旌獲，尚文德也。今文「皮樹」

「繁豎」，<sup>②</sup>「糅」爲「緇」。古文無「以」。○疏曰：知城中

是燕射者，以其下有賓射、大射，不在國也。「尚文德」

者，以文舞用羽，武舞用干也。此既用羽，知取尚文德

也。於竟，則虎中、龍旌。於竟，謂與鄰國君射

也。畫龍於旌，尚文章也。通帛爲旌。○疏曰：與鄰國

君射，則賓射也。以其君有送賓之事，因送則射。云

「尚文章也」者，亦若翻旌也。云「通帛爲旌」，《司常》

文，鄭注云：「凡九旗之帛，皆用絳。」則通帛者，正幅爲

①「反」下，賀本有「○答對」。

②本書卷二十一引此段文字在「繁豎」上有「爲」字，可參見。



絳。長尋曰旒，繫旒曰旒，通體皆用絳帛爲之，名旌。

○《鄉射》記。

賓降洗，升媵觚于公，酌散，下拜。公降一等，小臣辭。賓升再拜稽首，公答再拜。

觚，依注音觚。○此當言「媵觚」，酬之禮皆用觚，言「觚」者，字之誤也。古者「觶」字或作角旁氏，由此誤爾。賓

坐祭，卒爵，再拜稽首，公答再拜。賓降洗象觶，升酌膳，坐奠于薦南，降拜。小臣辭，賓升成拜，公答再拜，賓反位。反位，反席也。今文曰「洗象觚」。○疏曰：堂下無席，堂上乃有之，而云「賓升成拜」，不云降，明上反位者反席可知也。

右賓媵爵于公。

公坐，取賓所媵觶興，唯公所賜。至此又言「興」者，明公崇禮不倦也。今文「觶」又爲「觚」。○疏曰：此以下論君爲士舉旅之事。受者如初受酬之禮，降，更爵洗，升酌膳，下拜，小臣辭。升成拜，公答拜，乃就席坐行之。坐行之，若今坐相勸酒。有執爵者，上有盥升主酌授之者。○疏曰：若然，

前三舉旅皆酬者，自酌授人也。唯受于公者拜。公所賜者也，其餘則否。司正命執爵者爵辯，卒受者興以酬士。欲令惠均。○令，力呈反。○疏曰：此所命者，命大夫也。以前三舉旅，辯大夫則止，今此爲士舉旅，故及之。大夫卒受者以爵興，西階上酬士，士升，大夫奠爵拜，士答拜。興酬士者，士立堂下，無坐位。○疏曰：凡禮，堂上有席者坐，堂下無席者立。是以丁尹商陽是士而云「朝不坐」，堂下無坐位者也。大夫立卒爵，不拜，實之，士拜受，大夫拜送。士旅于西階上，辯。祝、史、小臣，旅食皆及焉。○疏曰：知旅食皆及者，以上未得獻時，旅酬不及，得獻之後，旅則及之。旅食亦次上得獻，故知亦酬及之。士旅酌，旅，序也。士以次序自酌相酬，無執爵者。卒。

右公爲士舉旅。

主人洗，升自西階，獻庶子于阼階上，如獻士之禮。辯，降洗，遂獻左右正與內小臣，皆於阼階上，如獻庶子之禮。庶子，掌正六牲之

體及舞位，使國子修德學道，世子之官也，而與膳宰、樂正聯事，樂正亦學國子以舞。左右正，謂樂正、僕人正也。小樂正立于西縣之北，僕人正、僕人師、僕人士立于其北，北上，大樂正立于東縣之北。若射，則僕人正、僕人士陪于工後。內小臣，奄人掌君陰事陰令，后夫人之官也，皆獻于阼階上，別於外內臣也。獻正下及內小臣，則磬人、鐘人、鐃人、鼓人、僕人之屬盡獻可知也。凡獻皆薦也。①○疏曰：按《周禮·諸子》職云：「大祭祀，正六牲之體。凡樂事，正舞位。」國子存遊倅，使之修德學道。彼天子諸子之官屬太子，若據諸侯，為世子之官。②引之者，以天子謂之諸子，諸侯謂之庶子，掌公卿大夫士之適子，掌事同故也。云「而與膳宰樂正聯事」者，以掌正六牲之體，得與膳宰聯事，掌國子修德學道，得與樂正聯事。云「左右正」者，據中庭為左右，《大射禮》「工遷於東，僕人正亦與樂正同處，名曰左右正，復云右正，是小樂正在西。蓋兩面俱縣，大、小樂正各監一縣也。知僕人正以下在小樂正之北者，以《鄉射》弟子相工皆在西，今僕人正以下亦是相工之人，故知亦在西方也。大樂正在東縣北者，約《鄉射》云「縣于洗東北」，至射時還樂於阼階下之東南，樂正北面立于其南也。云「若射則僕人正僕人士陪于工後」者，按《大射》，將射之時，

工遷于下東坫之東南，西面北上坐，相者以工為主，故知相工陪于東，即在工後也。《天官》：「內小臣奄士四人。」其職云：「掌王之陰事陰令。」鄭注云：「陰事，群妃御見之事。陰令，王所求為於北宮。」彼后之官兼云夫人者，欲見諸侯夫人亦有此官也。臣云外、內者，按《周禮》有外、內命夫，鄭注云：「外命夫，六鄉以出。」按：內命夫，朝廷卿大夫，則諸侯臣在鄉遂及采地者為外臣，在朝廷者為內臣。但外、內臣皆獻於西階上，此獻於阼階，故云「別於外、內臣」也。兼言僕人者，此經直見僕人正，不見僕人師、僕人士，《大射》見之。內小臣、奄人之賤者尚得獻，明此等皆得獻可知也。知「皆薦」者，以經云「如獻士」也。

### 右主人獻庶子以下。

無算爵，算數也。爵行無次無數，唯意所勸，醉而止。○疏曰：云「爵行無次無數」者，此對四舉旅以前皆有次有數，此則無次數也。士也，有執膳爵者，有執散爵者。執膳爵者酌以進公，公不拜受。

①「也」下，賀本有「○亦學戶教反教也」。

②「官」，原作「有」，據元明本、寬文本、賀本改。

執散爵者酌以之公，命所賜。所賜者興，受爵，降席下，奠爵，再拜稽首，公答拜。席下，席西也。古文曰「公答再拜」。○疏曰：自旅酬已前受公爵皆降拜，升成拜，至此不復降拜者，禮殺故也。云「席下席西也」者，賓與卿大夫席皆南面統於君，皆以東爲上，故知席下爲席西也。受賜爵者以爵就席坐，公卒爵，然後飲。不敢先虛爵，明此勸惠從尊者來也。○疏曰：受君賜爵者，若君未飲而已先卒爵，則似惠不由君而來，故俟君卒爵然後飲，則是由尊者來也。執膳爵者受公爵，酌，反奠之。宴歡在於飲酒，成其意。○疏曰：君意欲得皆醉，今執膳者酌，反奠於君前，望當君心，故云「宴歡在於飲酒，成其意」也。受賜爵者興，授執散爵，執散爵者乃酌行之。予其所勸者。唯受爵於公者拜，卒受爵者興，以酬士于西階上。士升，大夫不拜，乃飲，實爵。乃，猶而也。○疏曰：此執爵者皆酌行之以徧，唯卒爵者興以酬士，白酌與之，是以《鄉飲酒》、《鄉射》皆云：「辯，卒受者興，以旅在下者。」注云：「不使執觶者酌，以其將旅，不以己尊孤人也。」又曰：

此將勸士，士已升階，大夫即飲。不當用「乃」字，故以「而」字解之也。士不拜受爵，大夫就席，士旅酌，亦如之。公有命徹幕，則卿大夫皆降西階下，北面東上，再拜稽首。公命小臣辭，公答再拜，大夫皆辟。辟，音避，劉房益反。○命徹幕者，公意殷勤，必盡酒也。小臣辭，不升成拜，明雖醉，正臣禮也。不言賓，賓彌臣也。君答拜於上，示不虛受也。○疏曰：云「不言賓」，直言「卿大夫皆降」，不別言賓，是燕末賓同於臣。言「彌臣」者，上旅酬猶言賓，但言賜不言酬，已是賓卑。今乃設賓，不言賓，是賓彌臣也。遂升，反坐。士終旅於上，如初。卿大夫降而爵止，於其反席卒之。○今按：此士方旅酌，而大夫降，則爵止不行，公辭而大夫復升，士乃終旅於上也。無算樂。升，歌、間、合無數也，取歡而已，其樂章亦然。○疏曰：上升歌笙間合，各依次第而三終，有次有數。此則任君之情，無次無數。宵，則庶子執燭於阼階上，司宮執燭於西階上，甸人執大燭於庭，閭人爲大燭於門外。甸，大練反。閭，音昏。○宵，夜也。燭，焦也。甸人，掌共

薪蒸者。庭大燭，爲位廣也。閤人，門人也。爲，作也，作大燭以俟賓客出。○燂，哉約反，劉哉妙反。共，音恭。○疏曰：凡燕法設燭者，或射之後終燕則至宵也，或冬之日則不射亦宵也。燂者，古者無麻燭而用荆燂，未蒸曰燂，但在地曰燎，執之曰燭，樹於門外曰大燭，於門內曰庭燎。庭燎之差，公蓋五十，侯、伯、子、男皆三十，文出《大戴禮》也。此亦諸侯禮，以燕禮輕，故不言庭燎，設大燭而已。

### 右無算爵。

賓醉，北面坐取其薦脯以降，取脯，重得君賜。奏《陔》。《陔》，《陔夏》，樂章也。賓出奏《陔夏》，以爲行節也。凡《夏》，以鐘鼓奏之。○夏，戶雅反。賓所執脯，以賜鐘人於門內雷，遂出。必賜鐘人，鐘人掌以鐘鼓奏《九夏》。今奏《陔》以節己，用賜脯以報之，明雖醉不忘禮。古文「賜」作「錫」。卿大夫皆出，隨賓出也。公不送。賓禮訖，是臣也。

### 右賓出。

公與客燕，謂四方之使者。○使，所吏反。曰：「寡君有不腆之酒，以請吾子之與寡君

須臾焉，使某也以請。」腆，天典反。○君使人戒客

辭也。禮，使人各以其爵。寡，鮮也，猶言少德，謙也。腆，

善也。上介出請入告。古文「腆」皆作「殄」。今文皆曰「不

腆酒」，無「之」。○鮮，息淺反。○疏曰：《公食大夫》云：

「使大夫戒，各以其爵。」彼見賓出拜辱，大夫不答拜，此不

言，文不具。對曰：「寡君，君之私也。君無所

辱賜于使臣，臣敢辭。」上介出答主國使者辭也。

私，謂獨受恩厚也。○君無所爲辱賜於使臣，謙不敢當也。

敢者，怖懼用勢決之辭。「寡君固曰『不腆』，使某

固以請。」「寡君，君之私也，君無所辱賜于使

臣，臣敢固辭。」重傳命。固，如故。○重，直用反。

傳，文專反。○今按：「寡君君之私也」以下是客對辭。

「寡君固曰『不腆』，使某固以請。」「某固辭，

不得命，敢不從。」許之也。於是出見主國使者，辭以

見許爲得命。今文無「使某」。○今按：「某固辭」以下是

客對辭。致命曰：「寡君使某，有不腆之酒，以

①「受」，原作「有」，據元明本、寬文本、賀本改。

請吾子之與寡君須臾焉。」親相見，致君命辭也。「君貶寡君多矣，又辱賜于使臣，臣敢拜賜命。」貶，賜也，猶愛也。敢拜賜命，從使者拜君之賜命，猶謙不必辭也。○今按：「君貶寡君多矣」以下是客對辭。

### 右公與客燕。○記：若與四方之賓

燕，則公迎之于大門內，揖讓升。四方之賓，

謂來聘者也。白「戒」至於「拜至」，皆如《公食》，亦告饌具而後公即席。小臣「請執幕」，請「羞」者，乃迎賓也。

○食，音嗣。賓爲苟敬，席于阼階之西，北面。有胥，不啻肺，不啻酒。其介爲賓。

苟，且也，假也。主國君饗時，親進醴于賓。今燕，又宜獻焉。人臣不敢褻煩尊者，至此升堂而辭讓，欲以臣禮燕，爲恭敬也。於是席之如獻諸公之位。言苟敬者，賓實主國所宜敬也。胥，折俎也。不啻，似若遵者然也。介門西北面西上，公降迎上介以爲賓，揖讓升，如初禮。主人獻賓，獻公，既獻苟敬，乃媵觚，群臣即位，如燕也。○饗，許兩反，或作「鄉」。非燕爲之。爲，于僞反。○疏曰：言聘禮之賓行享禮訖，主國之君已親酌

醴進於賓，今燕又當親獻，故賓不敢當而揖讓辭之，乃以爲苟敬也。「言苟敬者，賓實主國所宜敬」，但爲辭讓，故以命介爲賓，不得敬之。今雖以介爲賓，不可全不敬，於是席之於阼階西而且敬之，故云「苟敬」也。《燕禮》與《大射》、《鄉射》皆不啻，是諸公如鄉禮。今聘卿在諸公之坐，亦不啻不啻，是爲似若諸公遵者然也。云「介門西北面西上」者，約《聘禮》而知也。上燕已臣子之時獻賓獻公既，即媵觚以酬賓，今苟敬之。前有薦有俎，實與君同，則知獻公後即獻苟敬，乃可酬賓也。無膳尊，無膳爵。降尊以就卑也。○疏曰：《郊特牲》云：「三獻之介，君專席而酢焉，此降尊以就卑也。」注云：「三獻，卿大夫來聘，主君饗燕之，以介爲賓，賓爲苟敬，則徹重席而受酢也。專猶單也。」彼與此事同，故鄭引彼經以證此。燕已臣子不見有君親受賓酢，若燕異國臣子得有專席，受酢者獻卿大夫之後，依次各爲此三人舉旅。獻士之後，賓乃媵觚於公，公取所媵觚爲上舉旅，應以爲酢君，君專席而受之也。若與四方之賓燕，媵爵，曰：「臣受賜矣，臣請贊執爵者。」受賜，謂公鄉者酬之，至燕，主人事實之禮

殺，賓降洗，升騰觶于公，答恩惠也。○鄉，許亮反。相者對曰：「吾子無自辱焉。」相，息亮反。○辭之也。對，答也。亦告公，以公命答之也。有房中之樂。弦歌《周南》、《召南》之詩，而不用鐘磬之節也。謂之房中者，后夫人之所諷誦，以事其君子。

### 燕義第三十四

#### 邦國禮一之下

諸侯燕禮之義，君立阼階之東南，南鄉，爾卿，大夫皆少進，定位也。君席阼階之上，居主位也。君獨升立席上，西面特立，莫敢適之義也。適，音敵。○定位者，爲其始入踞蹠，揖而安定也。設賓主，飲酒之禮也。使宰夫爲獻主，臣莫敢與君亢禮也。不以公卿爲賓而以大夫爲賓，爲疑也，明嫌之義也。賓人中庭，君降一等而揖之，禮之也。設賓主者，飲酒致歡也。宰夫，主膳食之官也。天子使膳宰爲主人。公，孤也。疑，自下上至之辭也。公卿尊矣，復以爲賓，則尊與君大相

近。君舉旅於賓，及君所賜爵，皆降再拜稽首，升成拜，明臣禮也。君答拜之，禮無不答，明君上之禮也。臣下竭力盡能以立功於國，君必報之以爵祿，故臣下皆務竭力盡能以立功，是以國安而君寧。禮無不答，言上之虛取於下也。上必明正道以道民，民道之而有功，然後取其什一，故上用足而下不匱也，是以上下和親而不相怨也。和、寧，禮之用也，此君臣上下之大義也。故曰：燕禮者，所以明君臣之義也。言聖人制禮，因事以託政。臣再拜稽首，是其竭力也。君答拜之，是其報以祿惠也。席，小卿次上卿，大夫次小卿，士、庶子以次就位於下。獻君，君舉旅行酬，而后獻卿；卿舉旅行酬，而后獻大夫；大夫舉旅行酬，而后獻士；士舉旅行酬，而后獻庶子。俎豆、牲體、薦羞，皆有等差，所以明貴賤也。牲體，俎實也。薦，謂脯醢也。羞，庶羞也。古者周天

子之官有庶子官，庶子官職諸侯卿大夫士之庶子之卒，掌其戒令，與其教治，別其等，正其位。職，主也。庶子，猶諸子也。《周禮》諸子之官，司馬之屬也。卒，讀皆爲倅，諸子副代父者也。戒令，致於大子之事。教治，修德學道。位，朝位也。國有大事，則率國子而致於大子，唯所用之。若有甲兵之事，則授之以車甲，合其卒伍，置其有司，以軍法治之，司馬弗正。國子，諸子也。軍法：百人爲卒，五人爲伍。弗，不也。國子屬大子，司馬雖有軍事不賦也。凡國之政事，國子存游卒，使之修德學道，春合諸學，秋合諸射，以考其藝而進退之。游卒，未仕者也。學，大學也。射，射宮也。《燕禮》有庶子官，是以義載此以爲說。

儀禮經傳通解卷第二十終

## 儀禮經傳通解卷第二十一

### 大射儀第三十五

#### 邦國禮二之上

#### 經七

大射之儀。○君有命戒射。將有祭祀之

事，當射，宰告於君，君乃命之。言君有命，政教宜由尊者。

○疏曰：知「將有祭祀之事當射」者，以下文《射義》而知

也。宰戒百官有事於射者，宰，於天子冢宰，治官

卿也。作大事，則掌以君命戒於百官。○疏曰：《周

禮·大宰》職云：「掌百官之誓戒，作大事則戒于百官，贊

王命。」鄭以天子冢宰言之，其實諸侯兼官，無冢宰，以司徒

兼之，故《聘禮》注云「宰，上卿，貳君事者也。諸侯謂司徒

爲宰」是也。射人戒諸公、卿、大夫射，司士戒

士射與贊者。射人掌以射法治射儀，司士掌國中

士，治凡其戒命，皆司馬之屬也。殊戒公卿大夫與士，辨貴賤也。贊，佐也，謂士佐執事不射者。○疏曰：上文宰官尊，總戒。此射人司上，色別重戒之，謂若《天官·冢宰》戒百官宗伯、大司寇之等，重戒也。此所云戒者，謂祭前旬有一日。知者，《祭統》云：「先期旬有一日，官宰宿夫人，夫人亦散齋七日，致齋三日。」又《大宰》云：「前期十日，帥執事而卜日，遂戒。」注云：「前期，前所諏之日也。」若然，則卜及戒皆在旬有一日矣。前射三日，宰夫戒宰及司馬，射人宿視滌。宰夫，冢宰官屬，掌百官之徵令者。司馬，於天子政官之卿，凡大射則合其六耦。滌，謂灑器，掃除射宮。○疏曰：上文「射人戒」是前期旬有一日，此宰夫申戒是前射三日。宿是夕宿，爲前一日，《宗伯》「宿，視滌濯」是也。云「凡大射則合其六耦」者，《大司馬》職云：「若大射，合諸侯之六耦。」是將祭而射，故使諸侯爲耦。若其餘射，則卿大夫以下爲耦也。

#### 右戒百官。

司馬命量人量侯道與所設乏以狸步，大侯九十，參七十，干五十。設乏，各去其侯西十、北十。量人，司馬之屬，掌量道巷塗數者。侯，謂所



射布也。量侯道，謂去堂遠近也。容謂之乏，所以爲獲者之禦矢。狸之伺物，每舉足者止視遠近，爲發必中也，是以量侯道取象焉。《鄉射》記曰：「侯道五十弓。」《考工記》曰：「弓之下制六尺。則此狸步六尺明矣。大侯者，熊侯，謂之大者，與天子熊侯同。參，讀爲糝，糝，雜也。雜侯者，豹鵠而麋飾，下天子大夫也。上，讀爲豻，豻侯者，豻鵠豻飾也。大夫將祭，於己射麋侯，上無臣，祭不射。」○疏曰：侯「射布也」，三侯皆以布爲之，而以皮爲鵠侯，旁亦以皮飾之。乏，即《周禮》所謂「容」。下文云以革爲之，所以爲獲者之禦矢，以其可以容身，故謂之容。云「乏」，則言矢於此乏匱不能去，故謂之乏也。「狸步」，先鄭謂一舉足爲步，於今爲半步，後鄭引《鄉射》、《考工》爲證者，所以明步爲六尺而非三尺也。熊侯而爲之大者，言畿外諸侯亦得用三侯，其數上同于天子，而非畿內諸侯所可比，故於熊侯加「大」以別之。然不嫌於偏上者，天子三侯，則虎侯、熊侯、豹侯，諸侯不得用虎侯，而以熊侯、糝侯、豻侯爲三侯。若畿內，則但有熊侯、豹侯，此其所以別也。云「豹鵠而麋飾，下天子大夫也」者，《司裘》云：「卿大夫則共麋侯。」此則以豹皮爲鵠，以麋飾其側，不用純麋，是下天子大夫也。豻，鄭注《周禮》云「胡犬」。豻侯，亦取捷點意。大夫得置家

臣，故將祭得大射擇士，士卑無臣，故祭不得射也。遂命量人、巾車張三侯，大侯之崇，見鵠於參，參見鵠於干，干不及地武，不繫左下綱，設乏，西十、北十。凡乏用革。巾車，於天子、宗伯之屬，掌裝衣車者，亦使張侯。侯，巾類。崇，高也，高必見鵠。鵠，所射之主，《射義》曰：「爲人君者以爲君鵠，爲人臣者以爲臣鵠，爲人父者以爲父鵠，爲人子者以爲子鵠。」言射中此乃能任己位也。鵠之言較，較，直也，射者所以直己志。或曰：鵠，鳥名，射之難中，中之爲俊，是以所射於侯取名也。《淮南子》曰：「鵠鵠知來。」然則，所云正者正也，亦鳥名，齊、魯之間名題肩爲正。正，鵠，皆鳥之捷點者。《考工記》曰：「梓人爲侯，廣與崇方，參分其廣而鵠居一焉。」則大侯之鵠方六尺，糝侯之鵠方四尺六寸大半寸，豻侯之鵠方三尺三寸少半寸。及，至也。武，迹也。中人之足長尺二寸，以豻侯計之，糝侯去地一丈五寸少半寸，大侯去地二丈二尺五寸少半寸。凡侯北面，西方謂之左。前射三日，張侯設乏，欲使有事者豫志焉。○疏曰：上文直命量人量侯道及乏遠近之處，此經論張侯高下之法也。《鄉射》云：「乏參侯道，居侯黨之一，西五步。」注云：「此乏去

侯北十丈，西三丈。」此經云西十北十，則西與北皆六丈，不得爲三分居侯黨之一者，以其三侯入堂深故也。西亦六丈者，以三侯恐矢揚傷人，與一侯亦異也。三侯之下總云西十北十，則其乏皆西十北十矣。侯之廣狹，取度於侯道。云「大侯之鵠方六尺」者，大侯侯道九十弓，弓取二寸，二十九十八，侯中丈八尺。三分其侯而鵠居一，故知方六尺也。云「參侯之鵠方四尺六寸大半寸」者，參侯侯道七十弓，弓取二寸，則侯中丈四尺。三分其侯而鵠居一，故知方四尺六寸大半寸也。云「豸侯之鵠方三尺三寸少半寸」者，<sup>①</sup>豸侯侯道五十弓，弓取二寸，則侯中方一丈。三分其侯而鵠居一，故知方三尺三寸少半寸也。凡言大半寸者，三分寸之二。少半寸者，三分寸之一。豸侯侯中一丈，上躬下躬及上舌下舌各二尺，合八尺，是丈八尺矣。張法：豸侯下綱不及地尺二寸，則上綱去地丈九尺二寸也。參侯侯中丈四尺，併躬與舌八尺，爲二丈二尺也。鵠居侯中三分之一，則鵠下有四尺六寸大半寸，通躬與舌四尺，爲八尺六寸大半寸。張法：參鵠下畔與豸侯之上綱齊，所謂見鵠於豸。自餘鵠下畔八尺六寸大半寸，爲豸侯所掩。自豸侯上綱計之，本去地丈九尺二寸，除八尺六寸，大半寸在掩，是參侯下綱去地一丈五寸少半寸，通上綱計之，去地三丈二尺五

寸少半寸。大侯侯中丈八尺，併躬與舌上下各四尺，爲二丈六尺。張法：大侯鵠下畔與參侯上綱齊，所謂見鵠於參。三分侯中，則鵠下亦有六尺，通躬與舌四尺，爲一丈，爲參侯所掩。自參侯上綱計之，本去地三丈二尺五寸少半寸，除一丈在掩，猶有二丈二尺五寸少半寸在。是大侯下綱去地之數通上綱計之，去地四丈八尺五寸少半寸，故注依此云也。樂人宿縣于阼階東，笙磬西面，其南笙鐘，其南鑄，皆南陳。笙，猶生也。東爲陽中，萬物以生。《春秋傳》曰：「太簇所以金奏，贊陽出滯。姑洗所以修絜百物，考神納賓。」是以東方鐘磬謂之笙，皆編而縣之。《周禮》曰：「凡縣鐘磬，半爲堵，全爲肆。」有鐘有磬爲全。鑄，如鐘而大。奏樂，以鼓、鑄爲節。○疏曰：陽氣起於子，盛於午，故東方爲陽中也。太簇，正月之管，奏之所以贊陽出滯。姑洗，三月之管，奏之所以修絜百物。東方陽管，唯有此二律，故據此言之，是以名東方鐘磬爲笙也。磬非應律之物，而與鐘同言笙者，以其與鐘同十六枚

① 下「三」，原作「二」，據元明本、寬文本、賀本改。下亦同改，不再出校。

而在一處，與鐘同編又同宮，故兼言磬。是以《磬師》職云「掌教擊編鐘」，是磬與鐘同編也。「凡縣鐘磬，半爲堵，全爲肆」者，《周禮·小胥》職文。鄭彼注云「半之」者，謂諸侯之卿大夫士也，<sup>①</sup>諸侯之卿大夫，半天子之卿大夫。天子之卿大夫判縣，東西各有鐘磬，是全之爲肆。諸侯卿大夫雖同判縣，半天子卿大夫，取一相鐘磬分爲兩相，西縣鐘，東縣磬，是半之爲堵。而天子之士特縣，直東有鐘磬，是全之爲肆。諸侯之士直特縣，半天子之士，縣磬而已，或於階間，或於東方，是亦半之爲堵。又天子宮縣，四面皆有。諸侯軒縣，闕南面，面皆有鐘、磬、鐃、鼓。卿大夫士皆無鐃。若有鐃，則諸侯臣，半天子臣，不得具，是以闕之。云「奏樂以鼓鐃爲節」者，按《周禮·鐃師》云：「掌金奏之鼓。」注云：「謂主擊晉鼓，以奏其鐘鐃也。」以此言之，則先擊鼓，後擊鐘鐃，皆是與樂爲節。建鼓在阼階西，南鼓。應鼗在其東，南鼓。建，猶樹也。以木貫而載之，樹之附也。南鼓，謂所伐面也。應鼗，應朔鼗也。先擊朔鼗，應鼗應之。鼗，小鼓也。在東，便其先擊小後擊大也。鼓不在東縣南，爲君也。○疏曰：下西面、北面建鼓，皆言一。此建鼓不言一者，彼在本方，故須言一，見無他

鼓。此鼓本東方，以爲君，故移來在北方，故異其文，不言也。《明堂位》云：「殷楹鼓，周縣鼓。」注云：「楹爲之柱，貫中上出也。縣，縣之於簨簴也。」此云「以木貫而載之」，則爲之柱貫中上出，一也。周人縣鼓，今言建鼓，則殷法也。主於射，略於樂，故用先代鼓。云「鼓不在東縣南，爲君」者，決下「一建鼓在其南，東鼓」者，爲賓復不在東縣北者，取順君面故也。西階之西，頌磬東面，其南鐘，其南鐃，<sup>②</sup>皆南陳。一建鼓在其南，東鼓，朔鼗在其北。言成功曰頌。西爲陰中，萬物之所成。《春秋傳》曰：「夷則所以詠歌九則，平民無忒。無射所以宣布哲人之令德，示民軌義。」是以西方鐘磬謂之頌。朔，始也。奏樂先擊西鼗，樂爲賓所由來也。鐘不言頌，鼗不言東鼓，義同，省文也。古文「頌」爲「庸」。○疏曰：夷則，無射，主西方成功收藏，故稱頌。頌者，美盛德之形容也。九則，謂六府、三事，九功之德。以此九則，平民無差慝也。哲人，謂后稷。后稷以稼穡之功成於季秋，先王之

①「士」，原作「上」，據元明本、寬文本、賀本改。

②「鐃」，原作「鐃」，據賀本改。下同改，不再出校。

業以農爲本，故云「示民軌義」，謂軌法義理也。賓向外來，位在西，其樂主爲樂賓，故「先擊朔鼗，應鼗應之」也。「古文頌爲庸」，其義亦通。《尚書》云：「笙庸以閒。」笙東方庸西方，是庸亦有成功之義也。一建鼓在西階之東，南面。言面者，國君於其群臣備三面爾。無鐘磬，有鼓而已。其爲諸侯則軒縣。○疏曰：國君合有三面，爲辟射位，又與群臣射，闕北面，無鐘、磬、鐃，直有一建鼓而已，故不言南鼓而言南面也。若與諸侯饗燕之類，則依諸侯軒縣，三面皆有鼓與鐘、磬、鐃。蕩在建鼓之間，蕩，竹也，謂笙簫之屬，倚於堂。○疏曰：《禹貢》云：「篠簫既敷。」注亦云：「蕩，竹也。」下云「乃管《新宮》」，注云：「管謂吹蕩。」則此蕩，管也。按《小師》職注云：「管，如簫而小，併兩而吹之，今大予樂官有焉。」《爾雅》云：「大笙謂之巢，小者謂之和。」簫，大者二十三管，長尺四寸，小者十六管，長尺二寸。大笙十九簧，小者十三簧。若然，笙簫與管器異，以其皆用竹，故云笙簫之屬也。管擬吹之，不倚在兩建鼓間，故知倚於堂也。鼗倚于頌磬西紃。鼗，如鼓而小，有柄。賓至，搖之以奏樂也。紃，編磬繩也。設鼗於磬西，倚於紃也。《王制》曰：「天子賜諸侯樂，則以祝將

之；賜伯、子、男樂，則以鼗將之。」○疏曰：按《那》詩云：「猗與那與，置我鼗鼓。」鄭讀「置」爲「植」，植鼗鼓者，爲楹貫而樹之。鼗雖不植，貫而搖之，亦植之類，與鼓同文，是如鼓而小也。《眡瞭》職云：「掌凡樂事播鼗，擊頌磬，笙磬。」磬言擊，鼗言播，播爲搖之可知。鼗所以節樂，賓至乃樂作，故於賓至搖之以奏樂也。紃若天子，諸侯冕而朱紃用組之類，磬又編縣之用紃，故知紃編磬繩也。鐘磬皆面向東，人居其前西面，故知鼗在磬西，倚之於紃也。

### 右張侯設樂。○《周禮·射人》：以

射灋治射儀，王以六耦射三侯，三獲三容，樂以《騶虞》，九節五正；諸侯以四耦射二侯，二獲二容，樂以《貍首》，七節三正；孤卿大夫以三耦射一侯，一獲一容，樂以《采蘋》，五節二正；士以三耦射豻侯，一獲一容，樂以《采蘩》，五節二正。射法，王射之禮。治射儀，謂肆之也。鄭司農云：「三侯，虎、熊、豹也。九節，析羽九重，設於長杠也。正，所射也。《詩》云：「終日射侯，不出正兮。」二侯，熊、豹也。玄謂：「三侯者，五

正、三正、二正之侯也。二侯者，三正、二正之侯也。一侯者，二正而已。此皆與賓射於朝之禮也。《考工·梓人》職曰：「張五采之侯，則遠國屬。」遠國，謂諸侯來朝者也。五采之侯，即五正之侯也。正之言正也，射者內志正，則能中焉。畫五正之侯，中朱，次白，次蒼，次黃，玄居外。三正，損玄、黃。二正，去白、蒼，而畫以朱、綠。其外之廣，皆居侯中參分之一，中二尺。今儒家云：四尺曰正，二尺曰鵠。鵠乃用皮，其大如正。此說失之矣。士與士射，則以豸皮飾侯，下大夫也。大夫以上與賓射，飾侯以雲氣，用采各如其正。九節、七節、五節者，奏樂以爲射節之差。言節者，容侯道之數也。《射義》曰：「明乎其節之志，以不失其事，則功成而德行立。」

厥明，司宮尊于東楹之西，兩方壺，膳尊兩甌在南，有豐。冪用錫若絺，綴諸箭，蓋冪，加勺，又反之。皆玄尊，酒在北。膳尊，君尊也，後陳之，尊之也。豐，以承尊也，說者以爲若井鹿盧，其爲字從豆，甬聲，近似豆，大而卑矣。冪，覆尊巾也。錫，細布也。絺，細葛也。箭，籛也。爲冪，蓋卷辟，綴於籛，橫

之也。又反之，爲覆勺也。皆玄尊，二者皆有玄酒之尊，重本也。酒在北，尊統於君，南爲上也。唯君面尊，言專惠也。今文「錫」或作「絺」，「絺」或作「給」。古文「箭」作「晉」。○疏曰：按《燕義》，諸侯射先行燕禮，此陳設器物與《燕禮》同，但文有詳略耳。鹿盧，即葬下棺碑間重鹿盧之類，其形兩頭大而中央小，今見井上豎柱夾之，以索繞而挽之是也。其爲字從豆爲形，以甬爲聲。既用豆爲形，故其制還近似乎豆，但豆口徑尺，柄亦長尺，其制小而高。此承尊之豐，口、足、徑各宜差寬，中央亦大，共高尺，比於豆差短，故云近似豆而卑。但斲一大木爲之，取其安穩。此豐若在宗廟或兩君燕，亦謂之玷，致爵於其上。「錫，細布」者，《喪服》記曰：「錫者十五升抽其半，無事其縷，有事其布，曰錫。」故知錫是細布也。謂之錫者，治其布使之滑易也。「唯君面尊」，謂人君燕臣子，專其恩惠，故尊鼻纒君。若鄉飲酒尊于房戶之間，賓主夾之，則不得專惠矣。尊士旅食于西鑄之南，北面，兩圜壺。旅，衆也。士衆食未得正祿，謂庶人在官者。圜壺，變於方也，賤，無玄酒。○疏曰：前設縣時，鑄南更有一建鼓，今設尊不應在鼓北而云鑄南者，其實在鼓南門西北面，與燕禮同。而

云鑄南者，遙繼鑄而言。必繼鑄者，樂以縣爲主故也。又尊于大侯之乏東北，兩壺獻酒。爲隸僕人、巾車、穆侯、豸侯之獲者。獻，讀爲沙，沙酒濁，特沛之，必摩沙者也。兩壺皆沙酒。《郊特牲》曰：「汁獻浼于醑酒。」服不之尊，俟時而陳於南，統於侯，皆東面。○疏曰：知爲隸僕及獲者，以其皆有功，又下文以此尊獻之也。知「沙酒濁」者，以五齊從下向上差之，醑沈清於泛醴，鬱鬯又在五齊之上，故知也。云「特沛之，必摩沙者也」者，此解名沙酒之意。引《郊特牲》者，此以五齊中取醑酒，蓋齊沛鬱鬯之事也。獻，沙也。沛鬱鬯之時，和盎齊，以手摩沙，出其香汁。浼，清也，沛之使清也。此爲隸僕以下卑賤之人而獻鬱鬯者。此所得獻，皆因祭侯，謂侯之神，故用鬱鬯也。知此不爲大侯服不設者，以下文云「服不之尊東面南上」，故云「俟時而陳」也。設洗于阼階東南，疊水在東，篚在洗西，南陳。設膳篚在其北，西面。或言南陳，或言西面，異其文也。○疏曰：言南陳亦西面，言西面亦南陳，其實所從言異，尊君故也。又設洗于獲者之尊西北，水在洗北，篚在南，東陳。亦統於侯也。無爵，因服不也。有篚，爲莫虛爵也。服不之洗，亦俟時而

陳於其南。○疏曰：言「亦統」者，因上文「設尊兩獻酒」注而云也。小臣設公席于阼階上，西鄉。司宮設賓席于戶西，南面，有加席。卿席賓東，東上。小卿賓西，東上。大夫繼而東上。若有東面者，則北上。席工于西階之東，東上。諸公阼階西，北面東上。唯賓及公席布之也。其餘樹之於位後耳。小卿，命於其君者也。席於賓西，射禮辨貴賤也。諸公，大國有孤卿一人，與君論道，亦不典職如公矣。○疏曰：知「賓及公席布之其餘樹之於位後」者，下文更有孤卿大夫席文，故知也。此實未布而言布之者，欲辨尊卑也。孤尊而後言之者，有無不常定也。「小卿命於其君」者，按《王制》云：「大國三卿，皆命於天子。次國三卿，二卿命於天子，一卿命於其君。」小國亦三卿，一卿命於天子，二卿命於其君。若言小卿，據次國已下有之。「射禮辨貴賤」者，決《燕禮》大、小卿皆在尊東，西無小卿位，彼主於燕，不辨貴賤故也。云「與君論道，亦不典職如公矣」者，約成周建官之意。官饌。百官各饌其所當共之物。疏曰：《燕禮》言宰此言官者，欲見非獨宰，故鄭云「百官各饌」。

# 右陳器設位具饌。

羹定，亨肉孰也。《射義》曰：「諸侯之射也，必先

行燕禮。」燕禮牲用狗。射人告具于公，公升即位

于席，西鄉。小臣師納諸公卿大夫，諸公卿

大夫皆入門右，北面東上。士西方，東面北

上。太史在干侯之東北，北面東上。士旅食

者在士南，北面東上。小臣師從者在東堂

下，南面西上。太史在干侯東北，士旅食者在士南，為

有侯，人庭深也。小臣師，正之佐也。正相君，出入君之大

命。○疏曰：《燕禮》上旅食者立于門西東上，此不繼門而

在士南繼士者，為有侯，故人庭深也。下有小臣正，正，長

也，故以師為佐。小臣正，如天子大僕，故引《大僕》職解之

也。公降立于阼階之東南，南鄉。小臣師詔

揖諸公卿大夫，諸公卿大夫西面北上，揖大

夫，大夫皆少進。詔，告也。變爾言揖，亦以其人庭

深也。上言大夫，誤衍耳。○疏曰：《燕禮》言「爾」，以其

近門去君遠而言爾。爾，近也，移也，揖之使移近。此人庭

大夫誤衍「者」，以其大夫與公卿面有異，故下別言大夫少進，明上有大夫，誤衍「大夫」、「大夫」四字也。

右即位。

大射正擯，大射正，射人之長。擯者請賓，公曰：「命某為賓。」某，大夫名。擯者命賓，賓少進，禮辭。命賓者，東面南顧。辭，辭以不敏。反命，以賓之辭告於君。又命之，賓再拜稽首，受命。又，復。擯者反命，賓出，立于門外，北面。公揖卿大夫，升就席。小臣白阼階下北面，請執冪者與羞膳者。請上可使執君兩甌之冪及羞脯醢庶羞於君者。方圓壺獻無冪。○疏曰：知「請上」者，據《燕禮》而知。云「方圓壺獻無冪」者，方圓壺，臣尊獻獲者，尊皆無冪。乃命執冪者，執冪者升自西階，立于尊南，北面東上。命者於西階前以公命命之，東上，執玄尊之冪為上。羞膳者從而東，由堂東升自北階，立于房中，西面南上。不言命者，不升堂，略之。○疏曰：知命之在西階前者，以其小臣位在東堂下，於阼階請公命，乃就西階請執冪者，以其執冪者上位在西故也。云「羞膳者

從而東」者，已於《燕禮》釋訖。云「不升堂」者，但不由南方升，略之。升自北堂，是亦升堂矣。膳宰請羞于諸公卿者。膳宰請者，異於君也。○疏曰：不言命者，對君言命於臣，略之。

### 右請立賓及執事者。

擯者納賓，賓及庭，公降一等揖賓，賓辟。及，至也。辟，逡遁，不敢當盛。○疏曰：「公降一等揖賓」，不請賓至位就席者，以賓與主人爲禮，禮不參，故不請也。此言「賓辟」，《燕禮》不言，文略也。公升即席，

以賓將與主人爲禮，不參之。奏《肆夏》。《肆夏》，樂章

名，今亡。呂叔玉云：《肆夏》，《時邁》也。《時邁》者，太平巡守祭山川之樂歌，其詩曰：「明昭有周，式序在位。」又曰：「我求懿德，肆于時夏。」奏此以延賓，其著宣王德，勸賢與？《周禮》曰：賓出入，奏《肆夏》。○疏曰：《周禮·鐘師》云：「以鐘鼓奏《九夏》，」杜子春引呂叔玉以爲「《肆夏》，《時邁》也」，鄭破云：「《九夏》皆《詩》篇名」，亦《頌》之類，「載在樂章，樂崩亦從而亡」。今又引呂叔玉於下者，以無正文，叔玉或爲一義，故兩解之也。云「奏此以

延賓，其著宣王德勸賢與」者，今國君歌此詩延賓入者，其欲著明諸侯，宣布王之德，以勸賢人使有德。言「與」者，鄭以義解之，無正文，故云「與」以疑之也。云「《周禮》曰賓出入，奏《肆夏》」者，按《大司樂》云：「王出入，則令奏《王夏》。尸出入，則令奏《肆夏》。牲出入，則令奏《昭夏》。」下云：「大饗不人牲，其他皆如祭祀。」大饗，謂饗賓客，故鄭約此爲文也。賓升自西階，主人從之，賓右北面至再拜，賓答再拜。主人，宰夫也，又掌賓客之獻飲食。君於臣，雖爲賓不親獻，以其莫敢亢禮。

### 右納賓。

主人降洗，洗南，西北面。賓將從降，鄉之不於洗北，辟正主。○疏曰：鄉飲酒、鄉射，主人降洗，洗北南面是正主。此宰夫代君爲主，故不於洗北南面也。賓降階西，東面，主人辭降，賓對。對，答。主人北面盥，坐取觚洗，賓少進，辭洗。主人坐奠觚于筐，興對，賓反位。賓少進者，所辭異，宜違其位也。獻不用爵，辟正主。主人卒洗，賓揖升。賓每先升，尊也。主人升，賓拜洗。主人賓右奠觚



答拜，降盥，賓降。主人辭降，賓對。卒盥，賓揖升，主人升，坐取觚。取觚，將就瓦甒酌膳。執冪者舉冪，主人酌膳。執冪者蓋冪，酌者加勺，又反之。反之，覆勺。筵前獻賓，賓西階上拜，受爵于筵前，反位，主人賓右拜送爵。賓既拜，於筵前受爵，退復位。宰胥薦脯醢，宰胥，宰官之吏也。不使膳宰薦，不主於飲酒，變於燕。賓升筵，庶子設折俎。庶子，司馬之屬，掌正六牲之體者也。《鄉射》記曰：「賓俎，脊、脅、肩、肺。」不使膳宰設俎，為射變於燕。賓坐，左執觚，右祭脯醢，奠爵于薦右，興取肺，坐絕祭，啐之，興加于俎，坐挽手，執爵，遂祭酒；興，席末坐啐酒，降席，坐奠爵，拜，告旨，執爵興，主人答拜。降席，席西也。旨，美也。樂闋。闋，止也。樂止者，尊賓之禮盛于上也。○疏曰：此經與《燕禮》皆賓及庭奏《肆夏》，賓拜酒，主人答拜而樂闋。《郊特牲》「賓人大門而奏《肆夏》」，又曰「卒爵而樂闋」，與此不同者，彼注謂朝聘者，故卒爵而

樂闋。此燕已臣子法，故啐酒而樂闋也。云「尊賓之禮盛於上」者，賓及庭而奏《肆夏》，至升堂飲酒樂乃止，是尊賓之禮盛於堂上者也。賓西階上北面坐，卒爵，興，坐奠爵，拜，執爵興，主人答拜。

### 右主人獻賓。

賓以虛爵降，既卒爵，將酢也。主人降。賓洗南西北面坐奠觚，少進，辭降。主人西階西，東面，少進對。賓坐取觚，奠于篚下，盥洗。篚下，篚南。主人辭洗。賓坐奠觚于篚，興對，卒洗，及階，揖升。主人升，拜洗如賓禮。賓降盥，主人降。賓辭降，卒盥，揖升，酌膳執冪如初，以酢主人于西階上。主人北面拜受爵賓，主人之左拜送爵。賓南面授爵，乃於左拜。凡授爵，鄉所受者。主人坐祭，不啐酒，辟正主也。未薦者，臣也。不拜酒，主人之義。《燕禮》曰：「不拜酒，不告旨。」遂卒爵，興，坐奠爵，拜，執爵興，賓答拜。主人不崇酒，以虛爵降，奠于

簠。不崇酒，辟正君也。崇，充也，謂謝酒惡相充實。賓降，立于西階西，東面。既受獻矣，不敢安盛。○疏曰：以堂上爲盛，故降下。下文於酬賓「降筵西，東南面立」，注云：「不立於序內，位彌尊。」《燕禮》注云：「位彌尊，禮彌卑。」是未酬已前禮盛者也。擯者以命升賓，賓升，立于西序，東面。命，公命也。東西牆謂之序。○疏曰：知公命者，命由尊者出也。

### 右賓酢主人。

主人盥，洗象觚，升酌膳，東北面獻于公。象觚，觚有象骨飾者也。取象觚東面，不言實之，變於燕。○疏曰：「取象觚東面」者，鄉公爲敬故也。《燕禮》云實之主於飲酒，此云酌，不云實之，主於射，略於飲酒故也。公拜受爵，乃奏《肆夏》。言「乃」者，其節異於賓。○疏曰：賓及庭奏，此君受爵乃奏，是其節異故也。云「乃」者，緩辭也。主人降自西階，阼階下北面拜送爵。宰胥薦脯醢，由左房。庶子設折俎，升自西階。自，由也。左房，東房也。人君左右房。《鄉射》記曰：「主人俎，脊、脅、臂、肺也。」○疏曰：人

君有左右房，故云左房。大夫、士東房而已，故不言左，以無右所對故也。公祭如賓禮，庶子贊授肺，不拜酒，立卒爵，坐奠爵，拜，執爵興。凡異者，君尊，變於賓。○疏曰：使庶子授肺，不拜酒，立卒爵之等，皆異於賓也。主人答拜，樂闋，升受爵，降奠于簠。

### 右主人獻公。

更爵洗，升酌散以降，酢于阼階下，北面坐奠爵，再拜稽首，公答拜。更，易也，易爵，不敢襲至尊。古文「更」爲「受」。主人坐祭，遂卒爵，興，坐奠爵，再拜稽首，公答拜。主人奠爵于簠。

### 右公酢主人。

主人盥洗，升媵觚于賓，酌散，西階上坐奠爵，拜，賓西階上北面答拜。媵，送也。散，方壺之酒也。古文「媵」皆作「騰」。主人坐祭，遂飲，賓辭。卒爵，興，坐奠爵，拜，執爵興，賓答拜。辭者，辭其代君行酒不立飲也，比於正主酬也。○疏

曰：上文公飲立卒爵，此則坐飲，故以公決之。云「比於正主酬也」者，謂於《鄉飲酒》、《鄉射》是正主酬賓之節也。主人降洗，賓降。主人辭降，賓辭洗。卒洗，賓揖升，不拜洗。不拜洗，酬而禮殺也。主人酌膳，賓西階上拜，受爵于筵前，反位。主人拜送爵，賓升席，坐祭酒，遂奠于薦東。遂者，因坐而奠之，不北面也。奠之者，酬不舉也。○疏曰：云「不北面也」者，此決《鄉飲酒》、《鄉射》、賓北面坐奠觶于薦東，注皆云「酬酒不舉」，引《曲禮》「君子不盡人之歡，不竭人之忠，以全交也」。主人降，復位，賓降筵西，東南面立。賓不立於序內，位彌尊。○疏曰：按《鄉飲酒》注云：「位彌尊，禮彌卑」。引《雜記》「一張一弛」，此對酬時立于西序之時，不降于下，禮稍卑，位稍尊。此在席西東南面，位彌尊，禮彌卑也。

### 右主人酬賓。

小臣自阼階下請媵爵者，公命長。命之使選於長幼之中也，卿則尊，士則卑。○疏曰：知不取年長及位長者，以下文但使下大夫爲之，是知用卿則尊，用士

則卑，故不取之，而取下大夫，尊卑處中者。小臣作下大夫二人媵爵。作，使。媵爵者阼階下皆北面再拜稽首，公答拜。再拜稽首，拜君命。媵爵者立于洗南，西面北上，序進，盥洗角觶，升自西階。序進酌散，交于楹北，降適阼階下，皆奠觶，再拜稽首，執觶興，公答拜。序，次第也，猶代也。先者既酌，右還而反，與後酌者交於西楹北，相左，俟於西階上，乃降，往來以右爲上。古文曰「降造阼階下」。媵爵者皆坐祭，遂卒觶，興，坐奠觶，再拜稽首，執觶興，公答再拜。媵爵者執觶待于洗南，待，待君命。小臣請致者，請君使人與？二人與？不必君命。若命皆致，則序進，奠觶于筐，阼階下皆北面再拜稽首，公答拜。媵爵者洗象觶，升實之，序進，坐奠于薦南，北上，降適阼階下，皆再拜稽首送觶，公答拜。既酌而代進，往來由尊北，交於東楹北，亦相左，奠於薦南，不敢必君舉。○疏曰：言「亦」者，亦前酬酌自飲時，

相左於西楹之北時，後者南相東向，先者北相西向，向西階右旋，北面待後至降也。今此二人，先者於尊西東面酌訖，於東楹之北東向，向公前奠之，右旋於東楹之北，北畔西過。後者亦於尊西東面酌訖，於東楹之北南過，東向於公前奠之，是亦交於楹北，相左也。云「奠於薦南，不敢必君舉」者，凡舉者於右，不舉者於左，今奠於薦左，是不舉之處，故云不敢必君舉也。媵爵者皆退反位。反門右北面位。○疏曰：大夫初與卿在門右北面，得揖，少進中庭北面，今當反庭中位而立。云「門右北面位」者，大夫雖得揖少進，仍是門右北面位，少進而已，故鄭還以門右北面言之。

### 右媵爵于公。

公坐取大夫所媵觶，興以酬賓，賓降西階下再拜稽首。小臣正辭，賓升成拜。公起，酬賓於西階，降尊以就卑也。正，長也。小臣長辭，變於燕。升成拜，復再拜稽首，先時君辭之，於禮若未成然。○疏曰：燕禮主歡，直使小臣辭，此射禮辯尊卑，故使小臣長辭也。公坐奠觶，答拜，執觶興。公卒觶，賓下拜，小臣正辭，賓升再拜稽首。不言成拜者，

爲拜故下，實未拜也。下不輒拜，禮殺也。下亦降也。發端，言降拜，因上事言下拜。○疏曰：自此已下皆云「公答拜」，不言再拜，《燕禮》皆言「公答再拜」。不同者，燕主歡不用尊卑，故公拜皆再拜。此射禮主辨尊卑，故答拜者止答一拜。《周禮·大祝》辨九拜「七曰奇拜」是也。云「下亦降也」者，此非訓下爲降，故以「發端，言降拜，因上事言下拜」，直因降有上文，即云下也。經云「公卒觶，賓下拜」者，公尊不拜，既爵賓降拜，若爲君拜既爵也。公坐奠觶答拜，執觶興。賓進受虛觶，降奠于筐，易觶興洗。賓進以臣道，就君受虛爵，君不親酌。凡爵不相襲者，於尊者言更，自敵以下言易。更，作新。易，有故之辭也。不言公酬賓於西階上及公反位者，尊君空其文也。公有命則不易不洗，反升酌膳，下拜。小臣正辭，賓升再拜稽首，公答拜。不易，君義也。不洗，臣禮也。賓告于擯者，請旅諸臣。擯者告于公，公許。旅，序也，賓欲以次序勸諸臣酒。賓以旅大夫于西階上，擯者作大夫長升受旅。作，使也，使之以長幼之次，先孤卿，後大夫。賓大夫之右

坐奠觶，拜，執觶興，大夫答拜。賓在右，相飲之位。○疏曰：賓位在左而在大夫之右者，是相飲之位，非賓主之位也。賓坐祭，立卒觶，不拜。酬而禮殺。若膳觶也，則降更觶，洗，升實散。大夫拜受，賓拜送，遂就席。言更觶，尊卿。尊卿則賓禮殺。○疏曰：上注云「不相襲」者，於尊者言「更」，自敵以下言「易」。此賓於卿是自敵以下，當言易，今言更者，尊卿。尊卿則卑賓，禮殺也。大夫辯受酬，如受賓酬之禮，不祭酒。卒受者以虛觶降，奠于筐，復位。卒，猶已也。今文，辯作「徧」。○疏曰：言「復位」者，亦如上復門右北面位，即庭中北面位也。

### 右公爲賓舉旅。

主人洗觚，升實散，獻卿于西階上。酬賓而後獻卿，飲酒禮成於酬。司宮兼卷重席，設于賓左，東上。言兼卷，則每卿異席。重席，蒲筵緇布純。席卿言東上，統於君，席自房來。○疏曰：上文設席之下，注謂「唯賓及公席布之，其餘樹之於位」，後至獻卿乃布之。則此云「兼卷」者，不謂至是始卷之，直是鋪設之時兼卷而

設之也。卿升，拜受觚。主人拜送觚，卿辭重席，司宮徹之。徹，猶去也。重席雖非加，猶爲其重累。辭之，辟君。乃薦脯醢，卿升席，庶子設折俎。卿折俎未聞，蓋用脊、脅、臠、折肺。卿有俎者，射禮尊。○疏曰：《鄉射》記云：「賓俎，脊、脅、肩、肺。主人俎，脊、脅、臂、肺。」①又「獲者之俎，折脊、脅、肺、臠。」②彼注云：「臠，若膊、肱、股之折，以大夫之餘體。」以此言之，則此賓俎亦用脊、脅、肩、肺，君俎亦脊、脅、臂、肺。前體有肩、臂、臠，後體有膊、肱、股，尊卑以次用之，故卿宜用臠。若有公，公用臠，卿宜用膊也。云「卿有俎者」，射禮尊者，對燕禮不辯尊卑，故公卿等皆無俎也。卿坐，左執爵，右祭脯醢，奠爵于薦右，興取肺，坐絕祭，不嚙肺，興加于俎，坐挽手，取爵，遂祭酒，執爵興，降席，西階上北面坐卒爵，興，坐奠爵，拜，執爵興。陳酒看，君之惠也。不嚙啐，事在射，臣之

①「脊」字，原脫，據寬文本、賀本補。

②「折」字，原脫，據寬文本、賀本補。

意。○疏曰：按《燕禮》不在射亦不啐者，彼爲臣有功，<sup>①</sup>君與之燕，恩及於卿，故卿不敢啐也。卿有無俎者，自然不啐也。主人答拜受爵，卿降，復位。復西面位，不酢，辟君。辯獻卿，主人以虛爵降，奠于筐。擯者升卿，卿皆升就席。若有諸公，則先卿獻之，如獻卿之禮，席于阼階西，北面東上，無加席。公，孤也。席之北面，爲大尊，屈之也。亦因阼階上近君，近君則親寵苟敬私昵之坐。

### 右主人獻孤卿。

小臣又請媵爵者，二大夫媵爵如初。請致者，若命長致，則媵爵者奠觶于筐。「命長致」者，使長者一人致也。公或時未能舉，自優暇。一人待于洗南，不致者。長致者阼階下再拜稽首，公答拜。再拜稽首，拜君命。洗象觶，升實之，坐奠于薦南，降，與立于洗南者二人皆再拜稽首，送觶，公答拜。奠於薦南，先媵者上觶之處也。二人皆拜如初，共勸君飲之。

### 右再媵爵。

公又行一爵，若賓若長，唯公所賜。一爵，先媵者之下觶也。若賓若長，禮殺也。長，孤卿之尊者也。於是言賜，射禮明尊卑。○疏曰：按《燕禮》言「唯公所酬」，此言所賜，是以決之也。以旅于西階上，如初。賜賓則以酬長，賜長則以酬賓，大夫長升受旅以辯。大夫卒受者以虛觶降，奠于筐。

### 右公爲賓若孤卿舉旅。

主人洗觚，升獻大夫于西階上。大夫升，拜受觚，主人拜送觚。大夫坐祭，立卒爵，不拜既爵，主人受爵，大夫降復位。既，盡也。大夫卒爵不拜，賤不備禮。○疏曰：此注云「賤不備禮」，《燕禮》注云「禮殺」，兩注相兼，其義乃足。胥薦主人于洗北，西面，脯醢，無胾。胥，宰官之吏。主人，下大夫也。先大夫薦之，尊之也。不薦于上，辟正主。

①「有」，原作「看」，據元明本、寬文本、賀本改。

脅，俎實。辯獻大夫，遂薦之，繼賓以西，東上。若有東面者，則北上。卒，擯者升大夫，大夫皆升就席。辯獻乃薦，略賤也。亦獻後布席也。○疏曰：上總言「辯獻大夫」，乃一時薦之，下文更明布席位次，就席之儀。「略賤」，則是獻訖降階，獻辯，擯者乃總升之就席，就席訖，乃薦之。

### 右主人獻大夫。

乃席工于西階上，少東。小臣納工，工六人，四瑟。工，謂瞽矇，善歌諷誦詩者也。六人：大師，少師各一人，上工四人。四瑟者，禮大樂衆也。○疏曰：云「禮大樂衆也」者，對《燕禮》「工四人而言也。僕人

正徒相大師，僕人師相少師，僕人土相上工。徒，空手也。僕人正，僕人之長。師，其佐也。士，其吏也。天子視瞭相工，諸侯兼官，是以僕人掌之。太師，少師，工之長也。凡國之瞽矇正焉。杜蒧曰：曠也太師也。於是分別工及相者，射禮明貴賤。○疏曰：以正爲長，師爲衆，故云僕人正爲長，僕人師爲佐也。士在僕人之下，故知僕人之吏，吏則府史之類也。相者皆左何瑟，後首，

內弦，跨越，右手相。謂相上工者，後首，主於射，略於此樂也。內弦跨越，以右手相工，由便也。越，瑟下孔，所以發越其聲者也。古文「後首」爲「後手」。後者徒相人，謂相太師，少師者也。上列官之尊卑，此言先後之位，亦所以明貴賤。凡相者以工出入。○疏曰：「上列官之尊卑」，謂先言僕人正與大師，後言僕人土與上工，是列官尊卑也。此陳先後，則上工在前，大師，少師在後，是先後之位。人時行位既然，則升堂與坐之位亦依此也。云「凡相者以工出入」者，欲見人時如此，出時亦然。小樂正從之，從大師也。後升者變於燕也。小樂正，於天子樂師也。○疏曰：燕禮，樂正先升，又不使小樂正，彼主於樂，此則略於樂故也。升自西階，北面東上。工六人。坐授瑟，乃降。相者也，降立於西縣之北。○疏曰：《鄉飲酒》注云：「降立於西方，近其事。」以取近其事，故在西縣之北也。小樂正立于西階東，不統於工，明工雖衆，位猶在此。○疏曰：云「不統於工，明工雖衆，位猶在此」者，決《燕禮》「工四人，樂正升立於工之西，在西階東，不統于工。此雖六人，衆於彼，猶統于階，而云西階東不

變。若使小樂正通之於工，恐工位移近西，故猶統于階也。乃歌《鹿鳴》三終。《鹿鳴》、《小雅》篇也。人君與臣下及四方之賓燕，講道修政之樂歌也。言已有旨酒，以召嘉賓，與之飲者，樂嘉賓之來，示我以善道，又樂嘉賓有孔昭之明德可則效也。歌《鹿鳴》三終，而不歌《四牡》、《皇華》，主於講道，略於勞苦與諸事。主人洗，升實爵，獻工。工不興，左瑟。工歌而獻之，以事報之也。洗爵獻工，辟正主也。獻不用觚，工賤，異之也。工不興，不能備禮，左瑟，便其右。大師無瑟，於是言左瑟者，節也。○疏曰：《鄉飲酒》、《鄉射》云「大師則爲之洗」，謂君賜之樂者，其餘工不爲之洗，是正主法。今此工六人皆爲之洗，故云「辟正主也」。必知同洗者，以其更無別獻之文，故知同洗也。《燕禮》、《大射》獻賓獻卿大夫皆用觚，而獻工用爵，故云「異之」。《鄉飲酒》、《鄉射》獻同用爵者，變於君故也。上言「獻工」，下云「一人拜受爵」，則六人皆在工內。而云「工不興左瑟」，於是明大師亦入左瑟中，故須云「大師無瑟」。於是言左瑟者，以其六人總當獻酒之節，故總入左瑟文，不謂有瑟也。一人拜受爵。謂大師也。言一人者，工賤，同之也。工拜於席。○疏曰：《鄉飲酒》、

《鄉射》云：「大師則爲之洗。」則知此一人謂大師。不言大師，對君工賤，不異其文，故同之而云一人也。主人西階上拜送爵，薦脯醢，輒薦之，變於大夫。○疏曰：按上文云「辯獻大夫，遂薦之」，此工得獻，不待辯輒薦之，故云「變於大夫」也。使人相祭。使人相者，相其祭薦祭酒。○疏曰：知「祭薦祭酒」者，此文承一人受爵薦脯醢之下，明二者皆祭也。若下文衆工直祭酒，不祭脯醢也。卒爵，不拜，主人受虛爵，衆工不拜受爵，坐祭，遂卒爵。辯有脯醢，不祭。相者，相其祭酒而已。主人受爵，降奠于筐，復位。大師及少師、上工皆降立于鼓北，「群工陪于後」，鼓北，西縣之北也。言鼓北者，與鼓齊面，餘長在後也。「群工陪于後」，三人爲列也。於是時，小樂正亦降立於其南，北面。工立，僕人立於其側，坐則在後。《考工記》曰：「鼓人爲皐陶，長六尺有六寸。」○疏曰：知「鼓北」是「西縣之北」者，以下文大師、少師始遷向東，明此降在西縣之北可知。云「言鼓北者，與鼓齊面，餘長在後也」者，按前列樂縣之時，鼓在罇南，今不言在鐘磬之北，遙據鼓而言之者，欲取形大



又面向東，工亦面向東，故遙取鼓面也。言「餘長在後」者，欲見鼓長六尺六寸，工面與鼓面齊，鼓有餘長在人後矣。言此者，工與鼓前面齊，後面不齊之意也。云「群工陪于後，三人爲列也」者，大師後有工二人，少師後亦有工二人，故云三人爲列也。云「於是時，小樂正亦降立於其南，北面」者，亦約遷樂於東方，工西面，樂正北面，言亦者，亦東方也。云「工立，僕人立于其側，坐則在後」者，亦約遷樂東方時面位得知也。《考工記》曰「鞀人爲臯陶」，先鄭云：「鞀，《書》或爲鞀」。後鄭謂：鞀者，以臯陶名官。鞀，即「陶」字，從革。今此注云鼓人爲臯陶者，誤，當作「鞀人」。鼓人自在《地官》，掌教六鼓矣。臯陶，鼓名，長六尺六寸。乃管《新宮》三終。管，謂吹蕩以播《新宮》之樂，其篇亡，其義未聞。笙從工而入，既管不獻，略下樂也。立于東縣之中。○疏曰：此云管，上云蕩，故鄭合爲一事解之。云「笙從工而入」者，按《燕禮》云「笙人立于縣中」，有笙人之文，此上下不見笙人之文，故知笙從工而入也。此管也而謂之笙者，按《燕禮》記云：「下管《新宮》，笙人三成。」則吹管者亦吹笙，故兼言笙，欲見笙管相將也。云「立于東縣之中」者，亦約《燕禮》文。

卒管，大師及少師、上工皆東

圻之東南，西面北上坐。不言縣北，統於堂也。於是時，大樂正還北面立于其南。○疏曰：工人前不即遷于東者，爲管笙所作，不以無事亂有事，故待卒管乃遷也。不言去堂，遠近當如鄉射遷工阼階之東南，堂前三筭，西面北上。

### 右樂賓。

賓者自阼階下請立司正，爵既備，上下樂作，君將留群臣而射，宜更立司正以監之，察儀法也。公許，擯者遂爲司正。君許其請，因命用之，不易之者，俱相禮，其事同也。司正適洗，洗角觶，南面坐奠于中庭，奠觶者，著其位以顯其事，威儀多也。○疏曰：《燕禮》及此《射禮》司正不以觶升而奠之於地，比《鄉飲酒》及《鄉射》爲顯，其威儀多，自此已後還與《鄉》同也。升東楹之東，受命于公。西階上北面命賓、諸公、卿、大夫：「公曰『以我安賓』。」諸公、卿、大夫皆對曰：「諾，敢不安！」以我安者，君意殷勤，欲留之，以我故安也。司正降自西階，南面坐取觶，升酌散降，南面坐奠觶。奠於中庭故處。

興，右還，北面少立，坐取觶興，坐不祭，卒觶，奠之，興，再拜稽首，左還，南面坐取觶，洗，南面反奠于其所，北面立。皆所以自昭明於衆也。將於觶南北面則右還，於觶北南面則左還，如是得於觶西往來也。<sup>①</sup>必從觶西往來者，爲君在阼，不背之也。

### 右立司正。

司射適次，袒，決，遂，執弓，挾乘矢於弓外，見鏃於弣，右巨指鉤弦。司射，射人也。次，若今時更衣處，張幃席爲之。耦次在洗東南。袒，左免衣也。決，猶闔也，以象骨爲之，著右巨指，所以鉤弦而闔之。遂，射講也，以朱韋爲之，著左臂，所以遂弦也。方持弦矢曰挾。乘矢，四矢。弣，弓把也。見鏃焉，順其射也。右巨指，右手大臂，以鉤弦，弦在旁，挾由便也。古文「挾」皆作「接」。○疏曰：云「司射射人也」者，按《燕禮》「射人告具」，又云「射人納賓」，又云「射人請立司正，公許，射人遂爲司正」，又曰「乃薦司正與射人一人」，又曰「若射」，<sup>②</sup>則大射正爲司射，是射人、司射、大射正、司正其實一人也。此篇云「射人告具」，又曰「大射正擯」，自此以後皆止云擯，「擯者自阼階下，請立司正，公許，遂爲司正」，則此篇擯者、

司正與大射正爲一人也。下云「公就物，小射正奉決拾以筭，大射正執弓」，注云「大射正舍司正，親其職」，「乃薦司正」，注云「司正，大射正」是也。云「耦次在洗東南」者，此無正文。按《鄉射》記云：「設楅，橫奉之，南面坐奠之，南北當洗。」此下云「耦出次，西行拾取矢，又當北行向楅，則次在洗東南矣。云「方持弦矢曰挾」者，以矢橫爲方，《鄉射》記云「凡挾矢，於二指間橫之」是也。自阼階前

曰：「爲政請射。」爲政，謂司馬也。司馬，政官，主射

禮。○疏曰：《大宰》云：「四曰夏官，其屬六十，掌邦政。」

是爲政謂司馬也。其屬有射人，主射事，故司馬政官主射

禮也。遂告曰：「大夫與大夫，士御於大夫。」

因告選耦於君。御，猶侍也。<sup>③</sup>大夫與大夫爲耦，不足

則士侍於大夫，與爲耦也。今文「於」爲「于」。○疏曰：云

「不足則士侍於大夫，與爲耦也」者，《曲禮》云「君使士射」，

注謂「以備耦」是也。遂適西階前，東面右顧，命

① 「於」，賀本作「從」。

② 「曰」，賀本作「云」。

③ 「猶」，原作「由」，據賀本改。

有司納射器。納，內也。○疏曰：命，謂司射命之也。有司，謂士佐執事不射者。《鄉射》西階前，西面命弟子納射器，此言東面者，君在阼，宜向之，故東面右顧者。以其有司是士，士在西階南東面，是以右顧向之。射器皆入，君之弓矢適東堂，賓之弓矢與中、籌、豐，皆止于西堂下。衆弓矢不挾，總衆弓矢楅，皆適次而俟。中，間中，算器也。籌，算也。豐，可奠射爵者。衆弓矢，三耦及卿大夫以下弓矢也。司射矢亦止西堂下。衆弓矢不挾，則納公與賓弓矢者挾之。楅，承矢器。今文「俟」作「待」。○疏曰：《鄉射》記云「於郊則間中」，據此《大射》故知「間中」中，所以盛算，故云算器也。云「司射矢亦止西堂下」者，下文云「司射卒誘射，遂適堂西，改取一个挾之」是也。若然，司射有矢無弓，在堂西有弓者誤。或則據司射將獻釋獲者，適阼階西，去扑，適堂西釋弓，脫決、拾，是時弓在西堂下也。工人士與梓人升自北階，兩楹之間，疏數容弓，若丹若墨，度尺而午，射正蒞之。工人士、梓人，皆司空之屬，能正方圓者。一從一橫曰午，謂畫物也。射正，司射之長。

○疏曰：《續人》職云「火以圜」，「士以黃，其象方」，《梓人》職「張五采之俟」之類，是知方圓也。云「一從一橫曰午，謂畫物也」者，則上文橫與距離是也。但未知從者橫者，若爲用丹，若爲用墨，或科用其一。云「午」十字，謂之先以左足履物，右足隨而並立也。云「度尺」者，即《鄉射》記從如筭三尺，橫如武尺二寸是也。卒畫，自北階下。司宮掃所畫物，自北階下。掃物，重射事也。工人士、梓人，司宮位在北堂下。○疏曰：南方不見有位，以其人升降自北階，明位在北堂下。太史俟于所設中之西，東面以聽政。中未設也，太史俟焉，將有事也。《鄉射禮》曰：「設中，南當楅，西當西序，東面。」司射西面誓之曰：「公射大侯，大夫射參，士射干。射者非其侯，中之不獲。卑者與尊者爲耦，不異侯。」大史許諾。誓，猶告也。古文「異」作「辭」。○疏曰：賓與君爲耦，同射大侯；士與大夫爲耦，同射參侯。以其既與尊者爲耦，不可使之別侯。別侯者，則非耦類故也。遂比三耦。比，選次之也。不言面者，大夫在門右北面，士西方東面。○疏曰：云「不言面」者，以下云面，故決

之。云「大夫在門右北面，士西方東面」者，仍依朝位而言。若耦及侯數，天子大射，賓射六耦三侯，畿內諸侯則二侯四耦，畿外諸侯大射，賓射皆三侯三耦。但諸侯畿外、畿內各有一申一屈，故畿外三侯遠尊得申，與天子同三耦則屈。畿內二侯近尊則屈，四耦則申。若燕射，則天子、諸侯例同三耦，一侯而已。以其燕私，屈也。若卿、大夫、士，例同一侯三耦。三耦俟于次北，西面北上。未知其耦。今文「俟」爲「立」。○疏曰：下經始命，而此經已言面位者，爲三耦，未知與誰爲耦，故立於此以俟命。司射命上射曰：「某御於子。」命下射曰：「子與某子射。」卒，遂命三耦取弓矢于次。取弓矢不拾者，次中隱蔽處。○疏曰：鄉射堂西顯露之處，則拾取矢也。

### 右請射。

司射入于次，搯三挾一个，出于次，西面揖，當階北面揖，及階揖，升堂揖，當物北面揖，及物揖，由下物少退，誘射。搯，扱也。挾一个，挾於弦也。个，猶枚也。由下物而少退，謙也。誘，

猶教也，「夫子循循然，善誘人」。○疏曰：射人誘射與《鄉射》同，但《鄉射》往階西取弓矢，此則人次取弓矢爲異。然此云「人次搯三挾一个」，則已前皆挾乘矢不改，《鄉射》亦然。射三侯，將乘矢，始射干，又射參，大侯再發。將，行也。行四矢，象有事於四方，《詩》云：「四矢反兮，以御亂兮。」卒射，北面揖。揖於當物之處，不南面者，爲不背卿。○疏曰：按《鄉射》「誘射，射卒，南面揖」者，彼尊東，或公或卿大夫位同不別，故司射不特尊之。此《大射》辨尊卑，尊東唯有天子命卿，其餘小卿及大夫皆賓西，故特尊之，不背之也。及階揖，降，如升射之儀。遂適堂西，改取一个挾之。改，更也。不射而挾矢，示有事也。遂取扑搯之，以立于所設中之西南，東面。扑，所以撻犯教者也。於是言立，著其位也。《鄉射》記曰：「司射之弓矢與扑，倚于西階之西。」○疏曰：按《鄉射》司射先就位乃誘射，此則誘射卒乃始就位者，由《大射》各有止次，就次取弓矢，射訖無事乃就位，故云「於是言立，著其位」也。引《鄉射》記者，此不言司射倚弓矢之處，故引之。

右誘射。

司馬師命負侯者：「執旌以負侯。」司馬師，正之佐也。令射者見侯與旌，深志於侯中也。負侯，獲者也。天子，服不氏下士一人，徒四人，掌以旌居乏待獲。析羽爲旌。○疏曰：引天子服不氏爲獲者，明諸侯亦當然也。負侯者皆適侯，執旌負侯而侯。司射適次，作上耦射。作，使也。司射反位，疏曰：此不言先反位者，爲三耦始出次，未有次前位，無所先，故不言先也。上耦出次，西面揖進。上射在左，並行，當階北面揖，及階揖。上射先升三等，下射從之，中等。上射在左，便射位也。中，猶閒也。○疏曰：云「上射在左，便射位也」者，《鄉射》亦云上射在左，不云便射位者。彼東面位，上射在北，故在左，不取便射位之義。此西面位，亦上射在北居右，故上射須在左，以其發位並行，及升北面就物位皆言居左，履物南面，上射乃在右，故云「上射在左，便射位也」。上射升堂少左，下射升，上射揖，並行。並，併也，併東行。皆當其物北面揖，及物揖，皆左足履物，還視侯

中，合足而侯。視侯中，各視其侯之中。大夫耦則視參中，參中十四尺。士耦則視干中，干中十尺。司馬正適次，袒、決、遂，執弓，右挾之，出，升自西階，適下物，立于物閒，左執弣，右執簫，南揚弓，命去侯。司馬正，政官之屬。簫，弓末。揚弓者，執下末。揚，猶舉也。適下物，由上射後東過也。命去侯者，將射當獲也。《鄉射禮》曰：「西南面，立於物閒。」○疏曰：按天子有大司馬卿一人，小司馬中大夫二人，此雖諸侯禮，亦應有小司馬，號爲「司馬正」也。《鄉射》司馬命去侯時，由上射後過至下射西，西南面揚弓命去侯，故引《鄉射》證此亦在物閒西南面也。負侯皆許諾，以宮趨，直西，及乏南，又諾以商，至乏，聲止。宮爲君，商爲臣，其聲和相生也。《鄉射禮》曰「獲者執旌許諾」。古文「聲」爲「聲」。○疏曰：云「宮爲君商爲臣」，《樂記》文云「聲和相生」者，宮生徵，徵生商，而云相生者，雖隔徵，亦是相生之義也。云「聲和」者，宮數八十一，商數七十二，彈宮則商應，故云「聲和」也。引《鄉射》者，彼臣禮，直云「諾，聲不絕」，不言宮商，引之證與此不同之意。授獲者，退

立于西方，獲者興，共而俟。大侯，服不氏負侯，徒一人居乏，相代而獲。參侯，千侯，徒負侯居乏，不相代。《鄉射禮》曰：「獲者執旌許諾，聲不絕」，以至於乏，坐東面偃旌，興而俟。古文「獲」皆作「護」，非也。○疏曰：上注引《周禮》服不氏下士一人，徒四人，是以鄭分之於三侯之上，大侯尊，故使服不氏與一徒居乏，自餘徒三人分之於二侯，徒以少一人，不得相代也。司馬正出于下射之南，還其後，降自西階，遂適次，釋弓，說決、拾、襲、反位。拾，遂也。《鄉射禮》曰：「司馬反位，立于司射之南。」○疏曰：此司馬不言位，宜與《鄉射》同，故引為證。司射進，與司馬正交于階前，相左，由堂下，西階之東，北面視上射，命曰：「毋射獲，毋獵獲。」上射揖，司射退，反位，射獲，矢中乏也。從旁為獵。乃射。上射既發，挾矢，而后下射射，拾發以將乘矢。拾，更也。將，行也。獲者坐而獲，坐言獲也。舉旌以宮，偃旌以商，等言獲也。獲而未釋獲。但言獲，未釋算。古文「釋」為「舍」。卒射，右挾之，北面揖，揖如升射。右挾

之，右手挾弦。上射降三等，<sup>①</sup>下射少右從之，中等，並行。上射於左，與升射者相左交于階前，相揖，適次，釋弓，說決、拾、襲、反位。上射於左，由下射階上少右，乃降待之。言襲者，凡射皆袒。○疏曰：云「上射降三等」者，諸侯階有七等，言三等者，欲明下射中等，是降一等之上下，下射過向西畔由右，故上射至地待之，乃得二人並行，上射於左也。云「與升射者相左交于階前」者，降射者仍南行，故得階前交往來也。云「凡射皆袒」者，按《鄉射》「命三耦各與其耦讓取弓矢，拾，三耦皆袒決遂」，取弓，遂至卒射。云「脫決拾，襲」，而俟于堂西南面。此則前遂命三耦取弓矢于次，不言袒，至此亦言襲，故須言「凡射皆袒」，決在此不見袒，亦袒可知也。三耦卒射，亦如之。

右初射獲而未釋獲。

司射去扑，倚于階西，適阼階下，北面告于公曰：「三耦卒射。」反，搯扑，反位。疏曰：

①「三」，原作「二」，據元明本、寬文本、賀本改。

《鄉射》：「司射去扑，倚于西階之西，升堂，北面告于賓曰：『三耦卒射。』」注云：「去扑乃升，不敢佩刑器即尊者之側。」此不升堂而亦去扑者，尊公故也。司馬正袒、決、遂，執弓，右挾之，出，與司射交于階前，相左。出，出于次也。袒時亦適次。○疏曰：出次者以袒時人次，今更出次，不在位上袒而入次取弓，凡袒襲皆於隱處。《鄉射》無次，司馬適堂西袒，執弓矢，是知雖無次者，亦不當在位。升自西階，自右物之後，立于物間，西南面，揖弓，命取矢。揖，推之。負侯許諾，如初去侯，皆執旌以負其侯而俟。俟小臣取矢，以旌指教之。司馬正降自西階，北面命設楅。此出于下射之南，還其後而降之。小臣師設楅，司馬正東面以弓爲畢。畢，所以教助執事者。《鄉射》記曰：「乃設楅于中庭，南當洗，東肆。」○疏曰：畢是助載鼎實之物，故司馬執弓爲畢以指授，若《周禮》執殳以爲鞭度然。引《鄉射禮》文者，證經設楅，故亦當洗。既設楅，司馬正適次，釋弓，說決、拾、襲，反位。小臣坐委矢于楅，北括，司馬師坐乘之。乘，

四四數之。卒，若矢不備，則司馬正又袒執弓，升命取矢如初，曰：「取矢不索。」乃復求矢，加于楅。卒，司馬正進坐，左右撫之，興，反位。左右撫，分上下射，此坐皆北面。

### 右取矢。

司射適西階西，倚扑，升自西階，東面請射于公。倚扑者，將即君前，不敢佩刑器也。升堂者，欲諸公卿大夫辯聞也。○疏曰：上去扑告君不注，至此乃注者，彼告在階階下遠君，故不注，至此升堂乃注，義與彼同也。上不升者，以告三耦卒射事緩，故在下。此告欲諸公卿大夫徧聞也，故升。但升者是其正，故《鄉射》亦升堂也。公許，遂適西階上，命賓御于公，諸公卿則以耦告于上，大夫則降，即位而后告。告諸公卿于堂上，尊之也。司射自西階上北面告于大夫曰：「請降。」司射先降，搢扑，反位。大夫從之降，適次，立于三耦之南，西面北上。適次，由次前而北，西面立。○疏曰：以諸公卿在上，故請大夫

降。《鄉射》：「主人與賓爲耦，遂告于大夫。」又曰：「賓主人與大夫皆未降。」彼臣禮，主人與賓皆卑，故大夫未降，與此異也。上云司射等適次，謂入次中，此適次者，大夫降自西階，東行適次，所過向堂東，西面立，因過次爲適次，非人次也。司射東面于大夫之西比耦，大夫與大夫，命上射曰：「某御於子。」命下射曰：「子與某子射。」卒，遂比衆耦。衆耦，士也。衆耦立于大夫之南，西面北上。若有士與大夫爲耦，則以大夫之耦爲上。爲上，居群士之上。○疏曰：國皆有二卿五大夫，三耦六人而已，而云使士爲耦者，卿大夫或有故，或出使，數容不足，使士備耦。命大夫之耦曰：「子與某子射。」告於大夫曰：「某御於子。」士雖爲上射，其辭猶尊大夫。命衆耦，如命三耦之辭。諸公卿皆未降，言未降者，見其志在射。○疏曰：言「未」者，後當降，故云未也。若終不射，不得言未，是以《鄉射》記云「衆賓不與射者不降」，<sup>①</sup>注：「不以無事亂有事。」是不射不得云未也。遂命三耦各與其耦拾取矢，皆袒、決、遂，執弓，右挾

之。此命人次之事也。司射既命而反位，不言之者，上射出，當作取矢，事未訖。○疏曰：鄭知此是「命人次之事」者，上來未有「耦入次袒、決、遂之事」，又下文乃云「耦出」，明此是命人次之事。若然，司射命訖當反位。不言者，以其三耦入次，<sup>②</sup>出乃當作取矢，待作取矢，即是事未訖，故不言反位也。一耦出，西面揖，當楅北面揖，及楅揖。三耦同入次，其出也，一上射出，西面立，司射作之，乃揖行也。當楅，楅正南之東西。上射東面，下射西面。上射揖進，坐橫弓，卻手自弓下取一个，兼諸弣，興，順羽，且左還，毋周，反面揖。橫弓者，南路弓也。卻手自弓下取矢者，以左手在弓表，右手從裏取之，便也。兼，并也。并矢於弣，當順羽，既又當執弦。順羽者，手放而下，備不整理也。左還，反其位。毋周，右還而反東面也。君在阼，還周則下射將背之。古文「且」爲「阻」。○疏曰：「毋周」者，左還，行

①「不」，原作「下」，據元明本、寬文本、賀本改。  
②「三」，原作「二」，據元明本、寬文本、賀本改。



至位，即位，右還而反東面，是還不周也。云「君在阼，還周則下射將背之」者，上射左還，已還背君，而據下射而言者，上射去君遠，故據下射而言。以其下射若右還周爲背君，若左還向東覆，即右還西面，是不背君，周即背故也。下

射進，坐橫弓，覆手自弓上取一个，兼諸弣，

興，順羽，且左還，毋周，反面揖。橫弓，亦南路

弓也。人東西鄉，以南北爲橫。覆手自弓上取矢，以左手

在弓裏，右手從表取之，便也。○疏曰：上射，下射俱南路

弓者，取背君向南爲順故也。既拾取矢，柎之。柎，

齊等之也。古文「柎」作「魁」。兼挾乘矢，皆內還，

南面揖。內還者，上射左，下射右，不皆右還，亦以君在

阼，嫌下射，故左還而背之也。上以陽爲內，下以陰爲內，

因其宜可也。○疏曰：云「不皆右還，亦以君在阼，嫌下

射，故左還而背之」者，若上下俱向內，是相向爲順。若上

射左還，是不故背君。若下射右還背君，少亦左還，初時面

向君，轉身南面背君多，似故背君，故不左還也。云「上以

陽爲內，下以陰爲內，因其宜可也」者，上射東面左還時，以

左手還取東相陽方爲內，下射西面右還時，以右手還取西

相陰方爲內，隨其陰陽得左右相向，是因其宜也。適楅

南，皆左還，北面揖，搯三挾一个。楅南，鄉當

楅之位也。揖，以耦左還，上射於左。以，猶與也。

言以者，耦之事成於此，意相人耦也。上射轉居左，使其反

位也。上射少北，乃東面。○疏曰：揖不須言以，今云

「以」者，必有義意，故鄭云「言以者，耦之事成於此」，謂成

於此拾取矢。以其取矢後一番了更無事，故云成於此，人

意相存耦也。云「上射轉居左，使其反位也」者，位在次北

西面，是以上射居左，至次北右還西面便也。云「上射少北

乃東面」，知不少南者，以其次在楅東南，北面揖時，已在次

西面，故知上射少北乃東面，得東當次也。退者與進

者相左，相揖，還。退，釋弓矢于次，說決、

拾、襲、反位。二耦拾取矢，亦如之。後者遂

取誘射之矢，兼乘矢而取之。以授有司于次

中，皆襲，反位。有司納射器，因留，主授受之。司

射作射如初，一耦揖升如初，司馬命去侯，負

侯許諾如初。司馬降，釋弓，反位。

右再請射。

司射猶挾一个，去扑，與司馬交于階前，

適阼階下，北面請釋獲于公，猶，守故之辭，於此

言之者，司射既誘射，恒執弓挾矢以掌射事，備尚未知，當教之也。今二耦卒射，衆足以知之矣，猶挾之者，君子不必也。

公許。反，摺扑，遂命釋獲者設中，以弓

爲畢，北面。北面立于所設中之南，當視之也。《鄉射

禮》曰：「設中，南當楅，西當西序。」太史釋獲，小臣

師執中，先首，坐設之，東面，退。太史實八

算于中，橫委其餘于中，西興，共而俟。先，猶

前也。命太史而小臣師設之，國君官多也。小臣師退，反

東堂下位。《鄉射禮》曰：「橫委其餘于中，西南末。」○疏

曰：此不見執算之人，按《鄉射》：「釋獲者執鹿中，一人執

算以從之。」彼臣禮，官少，釋獲者自執中設之，尚使人執

算，況國君官臣多，太史不自執中，豈得自執算，明亦使人

執之，但文不備也。司射西面命曰：「中離維綱，

揚觸梱復，公則釋獲，衆則不與。離，猶過也，獵

也。侯有上下綱，其邪制射舌之角者爲維。或曰：維當爲

絹，絹爲綱耳。揚觸者，謂矢中他物，揚而觸侯也。梱復，

謂矢至侯，不著而還。復，復反也。公則釋獲，優君也。衆

當中鵠而著。古文「梱」作「魁」。○疏曰：「離維綱，」離

猶過也，獵也，謂矢過獵，因著維與綱也。維者，謂上射上

舌，下射下舌，兩頭皆有角，以小繩綴角而繫之於植。綱

者，謂上綱，下綱皆出舌八尺，亦用繩爲之，所以繫侯於植

者。然則綱與維皆用繩爲之，故矢或離綱，或離維也。「或

曰維當爲絹絹綱耳」者，鄭更爲一義，謂非是綴角之繩，乃

止下綱之耳也。○按：綱耳即籠綱，以布爲之，《梓人》謂

之緝，而此謂之絹，字雖異而音則同。唯公所中，中

三侯皆獲。」值中一侯則釋獲。○疏曰：云「中三侯皆

釋獲」，則離維綱及揚觸梱復亦釋之，不言者，以中爲主也。

釋獲者命小史，小史命獲者。傳告服不，使知此

司射所命。○疏曰：據在大侯而言告服不，則參侯、千侯

告可知，舉遠見近。司射遂進，由堂下北面視上

射，命曰：「不貫不釋。」上射揖，司射退反

位。貫，猶中也。射不中鵠，不釋算。古文「貫」作「關」。

○疏曰：按上文公則釋獲言之，則此據除君而言也。釋

獲者坐取中之八算改實八算，興，執而俟。

執所取算。乃射。若中，則釋獲者每一个釋一算，上射於右，下射於左。若有餘算，則反委之。委餘算，禮貴異。又取中之八算，改實八算于中，興，執而俟，三耦卒射。

### 右再射釋獲。

賓降，取弓矢于堂西。不敢與君並俟告，取之以升，俟君事畢。○疏曰：下云司射「告射于公」，小射正「取公之決拾」并「授弓，拂弓」，是君得告乃取弓矢，是不敢與君並俟告也。云「取之以升，俟君事畢」者，按下又云「公將射，則賓降，適堂西，袒，決，遂，執弓，搯三挾一个，升自西階」，是君事畢乃爾。今此但取之以俟，非即袒、決、遂也。蓋去射時尚遠，不可以即袒。諸公卿則適次，繼三耦以南。言繼三耦，明在大夫北。○疏曰：言「適次」者，但射位在堂東，次在洗東南，今諸公卿東南適次前，北至三耦之南，以次西面立，明在大夫之北也。公將射，則司馬師命負侯，皆執其旌以負其侯而俟。君尊，若始焉。○疏曰：按上始時，司馬命負侯，三耦將射，司馬命去侯。今三耦卒射，君將射，司馬使更命負

侯，是君尊若始焉。司馬師反位，隸僕人掃侯道。新之。司射去扑，適阼階下，告射于公。公許，適西階東，告于賓。告當射也。今文曰「阼階下」，無「適」。遂搯扑，反位。小射正一人取公之決拾于東楹上，一小射正授弓，拂弓，皆以俟于東堂。授弓，當授大射正。拂弓，去塵。○疏曰：

據此經上下或云大射正，或云司射，或云小射正，當是大射正一人爲上，司射次之。司射或謂之小射正。若然，大射正與司射各一人，據其行事，小射正不止一人而已。如此文既云「小射正一人」，又云「一小射正」，則小射正二人也。云「授弓當授大射正」者，下云「大射正執弓」以袂以授公，明此授弓者當授大射正也。公將射，則賓降，適堂西，袒，決，遂，執弓，搯三挾一个，升自西階，先待于物北，北一筈，東面立。不敢與君併。筈，矢幹。東面立，鄉君也。○疏曰：前文賓降適堂西取弓矢，無賓升堂之文，但文不具，其實即升矣，是以此文云

①「實」，原作「釋」，據元明本、寬文本、賀本改。

賓降。筈，矢幹。按《周禮·矢人》：「矢幹長三尺，則此賓立于物北三尺矣。」司馬升，命去侯如初，還右乃降，釋弓，反位。還右，還君之右也。猶出下射之南，還其後也。今文曰「右還」。○疏曰：知「還右」爲「還君之右」者，按上文初射時，司馬立於物間南揚弓，命去侯訖，出於下射之南，還其後，降自西階，釋弓反位。今此賓爲上射，君爲下射，故知爲還君之後也。公就物，小射正奉決、拾以筈，大射正執弓，皆以從于物。筈，崔葦器。大射正舍司正，親其職。小射正坐奠筈于物南，遂拂以巾，取決興，贊設決，朱極三。極，猶放也，所以輜指，利放弦也，以朱韋爲之。三者，食指、將指、無名指。無極，放弦契於此指，多則痛。小指短，不用。小臣正贊袒，公袒朱襦。卒袒，小臣正退俟于東堂，小射正又坐取拾，興，贊設拾，以筈退奠于玷上，復位。既袒乃設拾。拾，當以韞襦上。○疏曰：拾，當拾斂膚體，宜在朱襦之上，故既袒乃設拾。《鄉射》云「袒、決、遂」，以其無襦，故遂與決得俱時設。若大夫對士射，袒纁襦，設遂，亦當在袒後。大射正

執弓，以袂順左右隈，上再下壹，左執弣，右執簫，以授公，公親揉之。順，放之也。隈，弓淵也。揉，宛之，觀其安危也。今文「順」爲「循」。古文「揉」爲「紉」。○疏曰：以袂向下於弓，隈順放之。《考工記·弓人》云「其弓安」，「其弓危」，以弓弱者爲危，弓强者爲安，則此云觀安危者，謂試弓之強弱。小臣師以巾內拂矢而授矢于公，稍屬。內拂，恐塵及君也。稍屬，不撻矢。大射正立于公後，以矢行告于公，若不中，使君當知而改其度。下曰留，上曰揚，左右曰方。留，不至也。揚，過去也。方，出旁也。公既發，大射正受弓而俟，拾發以將乘矢。公，下射也而先發，不留尊也。○疏曰：按上三耦射者，上射射訖，乃次下射，故鄭云爾。公卒射，小臣師以巾退，反位。大射正受弓，受弓，以授有司於東堂。小射正以筈受決、拾，退奠于玷上，復位。大射正退，反司正之位，小臣正贊襲。公還而后賓降，釋弓于堂西，反位于階西，東面。階西東

面，賓降位。○疏曰：上文賓受獻訖，降立於階西，東面。公即席，司正以命升賓。賓升復筵，而后卿大夫繼射。諸公卿取弓矢于次中，袒，決，遂，執弓，搯三挾一个，出，西面揖，揖如三耦。升射，卒射，降如三耦。適次，釋弓，說決、拾、襲，反位。衆皆繼射，釋獲皆如初。諸公卿言取弓矢，衆言釋獲，互言也。○疏曰：此公與賓復升即位者，公卿以下當繼射，公與賓當觀之，故升就位也。卒射，釋獲者遂以所執餘獲適階下，北面告于公曰：「左右卒射。」司射不告者，釋獲者於是有事，宜終之也。餘獲，餘算也。無餘算則無所執。古文曰「餘算」。反位，坐委餘獲于中西，興，共而俟。司馬袒執弓，升命取矢如初，負侯許諾，以旌負侯如初。司馬降，釋弓如初。小臣委矢于楅，如初。司馬，司馬正，於是司馬師亦坐乘矢。○疏曰：皆言「如初」，故鄭按上文而言也。賓、諸公、卿、大夫之矢，皆異束之以茅。卒，正

坐，左右撫之，進束，反位。異束大夫矢，尊殊之也。正，司馬正也。進，前也。又言束，整結之，示親也。○疏曰：公卿皆異束，但言大夫者，公卿自相對，其矢俱束之，及其脫之亦拾取。但三耦之內，大夫以上耦之，士矢不束，大夫束之，故曰「尊殊之」。賓之矢，則以授矢人于西堂下。是言矢人，則納射器之有司，各以其器名官職。不言君矢，小臣以授矢人于東堂下可知。○疏曰：知者，以小臣取矢，明取之以授矢人。司馬釋弓反位，而後卿大夫升就席。此言其升，前小臣委矢於楅。○疏曰：按上文司馬降釋弓如初，在小臣委矢之上，其司馬降釋弓之時，卿大夫即升就席。委矢當依司馬命取矢之下，不失其次，故不即見卿大夫升事，是以于此特言「司馬降釋弓」與「卿大夫升」爲節耳，故鄭亦言其次第也。

右公及諸公卿大夫射。○記：君射則爲下射，上射退于物一筭，既發則答君而俟。答，對也。此以下雜記也。今文「君射則爲下」。君樂作而後就物，君袒朱襦以射，君尊。小臣以巾執矢以授。君尊，不搯矢，不挾

矢，授之稍屬。若飲君，如燕則夾爵。謂君在不勝之黨也。賓飲君如燕，賓饔餼于公之禮則夾爵。爵者，君既卒爵，復自酌。君國中射，則皮樹中，以翽旌獲，白羽與朱羽糒。國中，城中也。謂燕射也。皮樹，獸名。以翽旌獲，尚文德也。今文，皮樹「爲」繁豎，「糒」爲「紹」。古文無「以」。於郊，則閭中，以旌獲。於郊，謂大射也。大射於大學，《王制》曰：「小學在公宮之左，大學在郊。」閭，獸名，如驢一角，或曰如驢歧蹄，《周書》曰：「北唐以閭。」析羽爲旌。於竟，則虎中龍旛。於竟，謂與鄰國君射也。畫龍於旛，尚文章也。通帛爲旛。大夫，兕中，各以其物獲。兕，獸名，似牛一角。士鹿中，翽旌以獲。謂小國之州長也。用翽用旌以獲，無物也。占文無「以獲」。唯君有射于國中，其餘否。臣不習武事於君側也。古文「有」作「又」。今文無「其餘否」。君在，大夫射則肉袒。不袒纁襦，厭於君也。今文無「射」。○此一節並《鄉射》記文，今移在此。

司射適階西，釋弓，去扑，襲，進由中東，

立于中南，北面視算。釋弓去扑，射事已也。○疏曰：矢亦去之，是以下文司射，執弓，挾一个，摺扑，明此時去矢後更挾之。釋獲者東面于中西坐，先數右獲。固東面矣，復言之者，少南就右獲。二算爲純，純，猶全也，耦陰陽也。一純以取，實于左手，十純則縮而委之。縮，從也。於數者，東西爲從。占文「縮」皆作「蹙」。每委異之，易校數。有餘純則橫諸下。又異之也，自近爲下。一算爲奇，奇則又縮諸純下。又從之。興，自前適左，從中前北也，更端，故起。東面坐。少北於故。坐，兼斂算，實于左手，一純以委，十則異之，變於右也。其餘如右獲。謂所縮所橫者。司射復位，釋獲者遂進取賢獲執之，由阼階下，北面告于公。賢獲，勝黨之算也。執之者，齊而取其餘。若右勝，則曰「右賢於左」；若左勝，則曰「左賢于右」，以純數告。若有奇者，亦曰「奇」。告曰：某賢於某若干純，若干奇。若左右鈞，則左右各執一

算以告曰：「左右鈞。」還復位，坐兼斂算，實八算于中，委其餘于中西，興，共而俟。

右取矢視算。

司射命設豐，當飲不勝者射爵。司宮士奉

豐由西階升，北面坐設于西楹西，降復位。

勝者之弟子洗觶，升酌散，南面坐奠于豐上，降反位。弟子，其少者也。不授者，射爵猶罰爵，略之。

○疏曰：自此以上，其疏見於《鄉射》，於此不復言。按：獻酬之爵皆手授，罰爵不手授，此飲射爵亦不手授，故云「猶罰爵，略之」也。然大夫已上皆手授，尊之，故下注云：「授爵而不奠豐，尊大夫也。」其三耦之內，雖大夫亦取於豐者，以其作三耦與衆耦同事，故不復殊之。司射袒，執弓，挾一个，搯扑，東面于三耦之西，命三耦及衆射者勝者：「皆袒、決、遂，執張弓。」執張弓，言能用之也。右手挾弦。不勝者皆襲，說決、拾，卻左手，右加弛弓于其上，遂以執弣。」固襲說決拾矣，復言之者，起勝者也。不勝者執弛弓，言不能用之。

也。兩手執弣，無所挾也。○疏曰：射畢之時，皆就次襲說決拾矣。今以勝者更袒決遂，故復言。不勝，襲，說決拾，欲與勝者相起發也。司射先反位，居前，俟所命人次而來飲。三耦及衆射者皆升，飲射爵于西階上。不勝之黨無不飲。○疏曰：大射者所以擇士以助祭，適不幸而在不勝之黨，雖數中亦受罰。及論其藝，雖飲射爵亦得助祭。或但在勝黨，不飲罰爵，若不數中，亦不得助祭。蓋飲罰據一黨而言，助祭取一身之藝，義故不同也。小射正作升飲射爵者，如作射。一耦出，揖，如升射。及階，勝者先升堂，少右。先升，尊賢也。少右，辟飲者，亦因相飲之禮然。○疏曰：鄉飲酒，鄉射獻酬之禮，獻者在右，酬者在左，故云「亦」也。不勝者進，北面坐取豐上之觶，興，少退，立卒觶，進，坐奠于豐下，興，揖。立卒觶，不祭不拜，受罰不備禮也。右手執觶，左手執弓。○疏曰：按《鄉飲酒》皆祭坐卒爵，拜既爵，故此決之，受罰不備禮也。云「右手執觶，左手執弓」者，以其執弛弓不釋於地，明知未飲時兩手執弓。今受罰爵，右手執爵，爲便左手執弓可知。不勝

者先降，後升先降，略之，不由次也。降而少右，復並行。

○疏曰：少右，辟升者在左。

與升飲者相左，交于

階前，相揖，適次，釋弓，襲，反位。僕人師繼酌射爵，取觶實之，反奠于豐上，退俟于序端。僕人師酌者，君使之代弟子也。自此以下，辯爲之

酌。升飲者如初，三耦卒飲。若賓、諸公、

卿、大夫不勝，則不降，不執弓，耦不升。此

耦，謂士也。諸公、卿或闕，士爲之耦者，不升，其諸公、卿、大夫相爲耦者，不降席，重恥尊也。○疏曰：大夫坐於上，上立於下，故知此耦爲上也。僕人師洗，升實觶以

授，<sup>①</sup>賓、諸公、卿、大夫受觶于席以降，適西階上，北面立飲，卒觶，授執爵者，反就席。

雖尊亦西階上立飲，不可以己尊枉正罰也。授爵而不奠豐，尊大夫也。若飲公，則侍射者降，洗角觶，升

酌散，降拜。侍射，賓也，飲君則不敢以爲罰，從致爵之

禮也。○疏曰：「角觶」，<sup>②</sup>即兕觥罰爵也，以兕角爲之，容三升。此謂賓白酌用之，如飲君，即下文所言「象觶」，亦從

獻賓之爵，<sup>③</sup>不敢用罰爵也。公降一等，小臣正辭，

賓升再拜稽首，公答再拜。賓坐祭卒爵，再

拜稽首，公答再拜。賓降，洗象觶，升酌膳以

致，下拜，小臣正辭，升，再拜稽首，公答再

拜。公卒觶，賓進受觶，降洗散觶，升實散，

下拜，小臣正辭，升，再拜稽首，公答再拜。

賓復酌自飲者，夾爵也。但如致爵，則無以異於燕也。夾爵，亦所以恥公也。所謂若飲君，燕則夾爵。賓坐不

祭，卒觶，降奠于筐，階西東面立。不祭，象射

爵。擯者以命升賓，賓升就席。擯者，司正也。

今文「席」爲「筵」。若諸公、卿、大夫之耦不勝，則亦執弛弓，特升飲。此耦亦謂士也。特，猶獨也。

以尊爲耦，而又不勝，使之獨飲，若無倫匹，孤賤也。衆

皆繼飲射爵，如三耦。射爵辯，乃徹豐與觶。

①「實」，原作「賓」，據元明本、寬文本、賀本改。

②「角」，原作「用」，據元明本、寬文本、賀本改。

③「從」，原作「徙」，據元明本、寬文本、賀本改。



徹，除也。

右飲不勝者。若飲君則夾爵，見前章。

司宮尊侯于服不之東北，兩獻酒，東面南上，皆加勺，設洗于尊西北，筐在南，東肆，實一散于筐。爲大侯獲者設尊也。言尊侯者，獲者之功由侯也。不於初設之者，不敢必君射也。君不射，則不獻大侯之獲者。散，爵名，容五升。○疏曰：按上張侯先設大侯，以大射者爲祭，擇士，人君不可不親，故尊其尊，使之必射而豫張大侯。至於設大侯之尊，必俟君射訖乃設之者，許其自優暇，容有不射之理，是以不射則不設，射乃設之也。云「散爵名容五升」者，按《韓詩傳》云：「一升曰爵，二升曰觶，三升曰觶，四升曰角，五升曰散。」是其散容五升也。司馬正洗散，遂實爵，獻服不。言服不者，著其官，尊大侯也。服不，司馬之屬，掌養猛獸而教擾之者。洗酌皆西面。○疏曰：自此已前皆以事名之，於此始著其官，是尊大侯也。服不掌養猛獸，教之使擾馴人，意象王者服不服諸侯，使歸服王者。云「洗酌皆西面」者，以其設尊設洗皆東面，故知洗爵酌酒皆西面向之也。若然，獻旅食尊，後酌者爲背君，此西面不嫌背君，以其南統於侯故

也。服不侯西北三步，北面拜受爵。近其所爲獻。○疏曰：服不得獻，由侯所爲，故不近之而近侯。司馬正西面拜送爵，反位。不俟卒爵，略賤也。此終言之，獻服不之徒乃反位。○疏曰：服不祭侯而後卒爵，今司馬反位在末祭侯之前，是略賤也。雖不俟卒爵，然亦必兼獻其徒而後始反位。蓋大侯尊，服不與其徒皆在獲所，既獻服，不必兼獻其徒，但經文不具，故鄭謂「反位」者必該其終言之，非止於獻一人，下注云「司馬正皆獻之」是也。宰夫有司薦，庶子設折俎。宰夫有司，宰夫之吏也。《鄉射》記曰：「獲者之俎，折脊、脅、肺。」○卒錯，獲者適右个，薦俎從之。不言服不，言獲者，國君大侯，服不負侯，其徒居乏待獲，變其文，容二人也。司馬正皆獻之。薦俎已錯，乃適右个，明此獻已，已歸功於侯也。適右个，由侯內，《鄉射》記曰：「東方謂之右个。」○疏曰：按上注云「天子服不氏下士一人，徒四人，掌以旌居乏待獲」，鄭言「容二人」者，欲見服不與徒二人皆得獻，故鄭云「司馬正皆獻之」。云「適右个由侯內」者，以其既祭

右个，次祭左个，<sup>①</sup>乃祭於中，故云「適右个，由侯內」。獲

者左執爵，右祭薦俎，二手祭酒。祭俎不奠爵，

不備禮也。二手祭酒者，獲者南面於俎北，當爲侯祭於豆

間，爵反注，爲一手不能正也。此薦俎之設，如於北面人

焉。天子祝侯曰：「唯若寧侯，無或若女不寧侯，不屬於王

所，故抗而射女。疆飲疆食，貽女曾孫諸侯百福。」諸侯以

下，祝辭未聞。○疏曰：「祭俎」者，謂祭俎上肺。但肺有

二種，此云祭是祭肺也，非是離肺。知者，按《鄉射》記云：

「獲者之俎，折脊、脅、肺、臠。」又曰：「釋獲者之俎，折脊、

脅、肺。」皆有祭，則此俎祭肺亦離肺。若然，凡祭，祭肺皆

不奠爵是其常。云「此不奠爵不備禮」者，但祭肺、離肺兩

有，祭肺不奠爵。若空有祭肺，亦不奠爵。今祭俎不奠，故

云「不備禮」。適左个，祭如右个，中亦如之。先

祭个，後中者，以外即之至中，若神在中。《鄉射禮》曰：獻

獲者，「俎與薦皆三祭」。○疏曰：以其左、右及中，故三

祭，非謂一處有三祭。卒祭，左个之西北三步，東

面。此鄉受獻之位也，<sup>②</sup>不北面者，嫌爲侯卒爵。○疏

曰：前服不受獻之時侯西北面者，欲歸功於侯故也。今卒

爵雖同舊處而東面者，以其前受獻爲己，今卒爵還爲己卒

爵，故東面，是以云「不北面者，嫌爲侯卒爵」也。設薦

俎，立卒爵。不言不拜既爵，司馬正已反位，不拜可知

也。《鄉射禮》曰：「獲者薦右東面立飲。」司馬師受虛

爵，洗，獻隸僕人與巾車、獲者，皆如大侯之

禮。隸僕人掃侯道，巾車，張大侯及參侯，干侯之獲者，其

受獻之禮，如服不也。隸僕人、巾車，於服不之位受之，功

成於大侯也。不言量人者，此自後以及先可知。○疏曰：

「巾車張大侯」者，舉尊者而言。其參侯、干侯亦張之，上文

司馬「遂命量人、巾車張三侯」是也。云「及參侯干侯之獲

者」，以上文已獻大侯獲者，明此是參侯、干侯之獲者可知。

云「隸僕人、巾車於服不之位受之」者，以隸僕人、巾車素無

其位，而經云「如大侯之禮」，明就大侯之位受獻，是以鄭云

功成於大侯也。卒，司馬師受虛爵，奠于筐。獲

者之筐。獲者皆執其薦，庶子執俎從之，設于

乏少南，少南，爲復射妨旌也。隸僕人、巾車、量人，白服

者之筐。獲者皆執其薦，庶子執俎從之，設于

乏少南，少南，爲復射妨旌也。隸僕人、巾車、量人，白服

① 「右」原作「左」，「左」原作「右」，據賀本改。

② 「此」，原作「北」，據寬文本、賀本改。

不而南。○疏曰：知「自服不而南」者，雖無正文，以其受獻於服不之位，明繼服不而南可知。服不復負侯而俟。

### 右獻服不。

司射適階西，去扑，適堂西，釋弓，說決、拾、襲，適洗，洗觚，升實之，降，獻釋獲者于其位，少南，獻釋獲者與獲者異，文武不同也。去扑者，扑不升堂也。少南，辟中。○疏曰：以其獻獲者於侯西北面受獻，歸功於侯，是其武獻。釋獲者升堂酌酒，東面獻之，就釋算之所，是其文，故云「文武不同」。薦脯醢、折俎，皆有祭。俎與服不同，唯祭一為異。○疏曰：云「俎與服不同」者，以其俱用一俎。云「唯祭一為異」者，上祭侯之俎有二，此釋獲者正唯一祭耳。釋獲者薦右東面拜受爵，司射北面拜送爵。釋獲者就其薦坐，左執爵，右祭脯醢，興，取肺，坐祭，遂祭酒。祭俎不奠爵，亦賤不備禮。興，司射之西，北面立，卒爵，不拜既爵。司射受虛爵，奠于

筐。釋獲者少西辟薦，反位。辟薦少西之者，為復射妨司射視算，亦辟俎也。

### 右獻釋獲。

司射適堂西，袒，決、遂，取弓，挾一个，適階西，搯扑以反位。為將復射。司射倚扑于階西，適阼階下，北面請射于公，如初。不升堂，賓、諸公、卿、大夫既射矣，聞之可知。反，搯扑，適次，命三耦皆袒，決、遂，執弓，序出取矢。臯言拾，是言序，互言耳。司射先反位。言先，先三耦也。司射既命三耦以入次之事，即反位。三耦入次，袒、決、遂，執弓挾矢，乃出反次外西面位。臯不言司射先反位，三耦未有次外位，無所先也。○疏曰：「臯」謂第一番之時，但言司射反位而不言先，是以決之。三耦拾取矢如初，小射正作取矢如初。小射正，司射之佐。作取矢，禮殺代之。三耦既拾取矢，諸公、卿、大夫皆降，如初位，與耦人于次，皆袒，決、遂，執弓，「皆進當楅」。進，坐，說矢束。上射東

面，下射西面，拾取矢，如三耦。「皆進當幅」，進三耦，揖之位也。凡繼射，命耦而已，不作射，不作取矢，從初。○疏曰：云「凡繼射，命耦而已，不作射，不作取矢，從初」者，言凡繼射命耦者，前三耦卒射後，大夫降至，三耦之南，西面北上，司射東面于大夫西，比耦，大夫與大夫，命上射曰：「某御於子。」命下射曰：「子與某子射。」卒，遂比衆耦云云。至公即席後，賓升階復位還筵，而後卿，大夫繼射。後「衆皆繼射，釋獲皆如初」，注云：「諸公卿言取弓矢，衆言釋獲，互言也。」既司射注：「司射所作，唯上耦。」是此文小射正但作三耦拾取矢，公以下亦無作拾文，故曰「不作取矢從初」，從三耦法也。若士與大夫爲耦，

士東面，大夫西面，大夫進，坐，說矢束，退反位。說矢束，自同於三耦，謙也。○疏曰：三耦是士之東，既是大夫，若東則異於三耦，故云「說矢束，自同於三耦，謙也」。耦揖進，坐兼取乘矢，興，順羽，且左還，毋周，反面揖。兼取乘矢，不敢與大夫捨。大夫進坐，亦兼取乘矢，如其耦。北面摺三挾一个，揖進。大夫與其耦皆適次，釋弓，說

決、拾、襲、反位，諸公卿升就席。大夫反位，諸公卿乃升就席，大夫與已上下位。○疏曰：諸公卿大夫自爲耦者，拾取矢在前，大夫與士耦者說矢束，拾取矢在後。今待大夫反位，公卿乃升就席者，蓋公卿乃上大夫，與大夫同爵，但上下有異耳，故上大夫待下大夫反位乃後升就席。衆射者繼拾取矢，皆如三耦，遂入于次，釋弓矢，說決、拾、襲、反位。司射猶挾一个以作射如初，一耦揖升如初。司馬升，命去侯，負侯許諾。司馬降，釋弓反位。

### 右三請射。

司射與司馬交于階前，倚扑于階西，適阼階下，北面請以樂于公，公許。請奏樂以爲節也。始射，獲而未釋獲，復釋獲，復用樂行之。君子之於事也，始取苟能，中課有功，終用成法，教化之漸也。射用應樂爲難。孔子曰：「射者何以聽？循聲而發，發而不失正鵠者，其唯賢者乎！」○疏曰：云「請奏樂以爲節也」者，謂若天子《騶虞》九節，諸侯《狸首》七節，大夫《采蘋》，士《采芣》，皆五節。云「始射，獲而未釋獲」者，謂第一番三耦射

中時，雖唱獲未釋算。云「復釋獲」者，謂第二番衆耦皆射，釋算未作樂。云「復用樂行之」者，謂第三番射，非直釋算，復用樂焉。云「射用應樂爲難」者，但禮射其容體比於禮，其節比於樂，又須中於侯，名爲應樂節。司射反，摺扑，東面命樂正曰：「命用樂。」言君有命用樂射也。樂正在工南，北面。○疏曰：此時工在洗東，西面，樂正在工南，北面，司射在西階下，東面。經云「命樂正」者，東面遙命之。樂正曰：「諾。」司射遂適堂下，北面眡上射，命曰：「不鼓不釋。」不與鼓節相應，不釋算也。鼓亦樂之節。《學記》曰：「鼓無當於五聲，五聲不得不和。」凡射之鼓節，《投壺》其存者也。周禮，射節：天子九，諸侯七，卿大夫以下五。○疏曰：射之鼓節多少，無文，今《禮記·投壺篇》圖出魯鼓，薛鼓，云：「取半以下爲投壺節，盡用之爲射節。」是其投壺存者。上射揖，司射退反位，樂正命大師曰：「奏《貍首》，閒若一。」樂正西面受命，左還東面，命大師以《大射》之樂章，使奏之也。《貍首》，逸詩《曾孫》也。貍之言不來也，其詩有「射諸侯首不朝者」之言，因以名篇。後世失之，謂之《曾

孫》。曾孫者，其章頭也，《射義》所載「《詩》曰『曾孫侯氏』」是也。以爲諸侯射節者，采其既有弧矢之威，又言「小大莫處，御於君所，以燕以射，則燕則譽」，有樂以時會君事之志也。「閒若一」者，調其聲之疏數重節。○疏曰：重節，謂必疏數如一者，重此樂節故也。大師不興，許諾。樂正反位，奏《貍首》以射。二耦卒射，賓待于物如初。公樂作而后就物，稍屬，不以樂志，其他如初儀。不以樂志，君之射儀遲速從心，其發不必應樂，辟不敏也。志，意所擬度也，《春秋傳》曰：「吾志其日。」○疏曰：《春秋傳》定八年：「公侵齊，門于揚州。」其時魯人「顏息射人中眉，退曰：『我無勇，吾志其日也。』」是志是意所擬度也。卒射如初，賓就席，諸公、卿、大夫衆射者皆繼射，釋獲如初。卒射，降反位。釋獲者執餘獲進告。左右卒射，如初。

### 右三射用樂。

司馬升，命取矢，負侯許諾。司馬降，釋弓反位。小臣委矢，司馬師乘之，皆如初。

司射釋弓視算，如初。釋獲者以賢獲與鈞告，如初，復位。

### 右取矢視算。

司射命設豐，實觶，如初。遂命勝者執張弓，不勝者執弛弓，升飲，如初。卒，退豐與觶，如初。司射猶袒、決、遂，左執弓，右執一个，兼諸弦，面鏃，適次，命拾取矢，如初。

側持弦矢曰執。面，猶尚也。兼矢於弦，尚鏃，將止，變於射也。○疏曰：上文皆云「挾一个」，此經云「執一个」，方「持弦矢曰挾」，以其將射故也。「側持弦矢曰執」，謂兼矢於弦而鏃向上，將止變於射也。按《鄉射禮》云：「矢不挾，兼諸弦弣。」彼不言面鏃，而此言面鏃，彼言兼弦弣，而此不言兼弣，各舉一邊，省文之義。司射反位，三耦及諸公、卿、大夫衆射者，皆袒、決、遂以拾取矢，如初。矢不挾，兼諸弦，面鏃，退適次，皆授有司弓矢，襲，反位。不挾，亦謂執之如司射。卿、大夫升，就席。司射適次，釋弓，說決、拾，去

扑，襲，反位。司馬正命退楅，解綱。小臣師退楅，巾車、量人解左下綱。司馬師命獲者以旌與薦俎退，解，猶釋也。今文「司馬師」，無「司馬」。司射命釋獲者退中與算而俟。諸所退射器皆俟，備君復射，釋獲者亦退其薦俎。○疏曰：射已三番，於後或射或否，臣不敢必君射，故備擬之也。前辟薦俎，今既退中與算，薦俎不可虛留，明亦退之可知。

### 右飲不勝者。

公又舉奠觶，唯公所賜，若賓若長，以旅于西階上，如初。大夫卒受者以虛觶降，奠于筐，反位。

### 右公爲大夫舉旅。

司馬正升自西階，東楹之東，北面告于公：「請徹俎。」公許。射事既畢，禮殺人倦，宜徹俎燕坐。遂適西階下，北面告于賓。賓北面取俎以出，諸公卿取俎如賓禮，遂出，授從者于門外，自其從者。大夫降復位。門東北面位。○疏

曰：大夫雖無俎，以賓及公卿皆送俎，不可獨立於堂，故降復位。云「門東北面位」者，謂初小臣納卿大夫，門東北面揖位。庶子正徹公俎，降自阼階，以東。降自阼階，若親徹也。以東，去藏。

### 右徹俎。

賓、諸公、卿皆入門，東面北上。諸公卿不入門而右，以將燕，亦因從賓。司正升賓，賓、諸公、卿、大夫皆說屨，升就席。公以賓及卿、大夫皆坐，乃安。晁命以我安，臣於君尚猶踟躕，至此乃敢安。羞庶羞，羞進也。庶，衆也。所進衆羞，謂臠肝、膾、狗臠醢也，或有炮鼈、膾鯉、雉、兔、鶉、鴛。○疏曰：《大射》先行燕禮，燕法：其牲唯有狗。又按《內則》云：「肝膾，取狗肝一，幪之以其膾，濡炙之，舉燠其膾，不蓼。」注云：「膾，腸閒脂。」故知此羞中有肝膾也。又知有「狗臠醢」者，以《公食大夫》有牛臠炙、羊臠炙、豕臠炙，此燕無三牲，故知臠醢亦用狗。大夫祭薦。燕乃祭薦，不敢於盛成禮。○疏曰：此大夫卑，不敢與公卿同時於盛成禮也。司正升受命，皆命。公曰：「衆無不醉。」賓

及諸公卿大夫皆興，對曰：「諾，敢不醉。」皆反位坐。皆命者，命賓，命諸公，命卿、大夫，皆鄉其位也。興對必降席，敬也。司正退立西序端。○疏曰：經直云「興」，不言降席，鄭知「降席」者，以云「反坐」，故知降席也。上文以我安賓不降席者，彼直云安，未盡殷勤，故不降。此命使醉，是盡殷勤，故興降，加敬也。知「司正退立西序端」者，按司正監酒，此將獻士，事未訖，亦如鄉飲酒監旅時立于西序端也。

### 右燕。

主人洗酌，獻士于西階上。士長升，拜受觶，主人拜送。獻士用觶，士賤也。今文「觶」作「觚」。○疏曰：上獻大夫已上用觚，觚二升，觶三升，用大者賤，用小者尊，故云「士賤也」。士坐祭，立飲，不拜既爵。其他不拜，坐祭，立飲。其他，謂衆士也。升不拜受爵。○疏曰：上云長謂士中之長，次云士謂長已下，下云其他，知謂衆士者，以下經旅食，謂庶人在官，故知此非府史以下。乃薦司正與射人于觶南，北面東上，司正爲上。司正，射人士也。以齒受獻，既

乃薦之也。司正，大射正也。射人，小射正，略其佐。○疏曰：按《燕禮》，薦司正與射人一人，司士一人，執事二人，此小射正執事非一人，皆當同薦。不言其數者，略之，故文不具。辯獻士，士既獻者立于東方，西面北上，乃薦士。士既獻易位者，以卿大夫在堂，臣位尊東也。畢獻薦之，略賤。祝史、小臣師，亦就其位而薦之。亦者，亦士也。辯獻乃薦也，祝史門東，北面東上。主人就士旅食之尊而獻之，旅食不拜受爵，坐祭，立飲。主人既酌，西面，士旅食北面受之，不洗者，於賤略之。○疏曰：知「主人既酌，西面，士旅食北面受之」者，以其不可背君南面授，故知位之如此。若然，大史等亦北面，則亦西面授酒也。其小臣師等按上文位在阼階東南。自然北面授。主人執虛爵，奠于篚，復位。

### 右獻士及祝史。

賓降洗，升，媵觶于公，酌散，下拜。公降一等，小臣正辭。賓升再拜稽首，公答再拜。賓受公賜多矣。禮將終，宜勸公，序厚意也。今文

「觶」爲「觚」，「公答拜」，無「再拜」。○疏曰：上文爲賓，爲卿，爲大夫舉旅皆臣自致爵，今此其賓爲士舉旅行酬，因得爲賓致爵於君，故鄭云「序賓厚意也」。賓坐祭，卒爵，再拜稽首，公答再拜。賓降，洗象觚，升酌膳，坐奠于薦南，降拜。小臣正辭，賓升成拜，公答拜，賓反位。反位，反席也。此「觚」當爲「觶」。○疏曰：自此以前，賓位在西階下東面，無席戶牖之間位則有席。此賓升成拜，不言降反位，明反位者反於戶牖之間席位。「觚當爲觶」者，凡旅酬皆用觶，獻士尚用觶，故知觚當爲觶，下經「觚」亦當爲「觶」。公坐，取賓所媵觚，興，唯公所賜，受者如初受酬之禮。降，更爵洗，升酌膳，下，再拜稽首。小臣正辭，升成拜。公答拜，乃就席坐行之。坐行之，若今坐相勸酒。有執爵者，士有盥升，主酌授之。○疏曰：下文云「士有執膳爵者，有執散爵者」，故知士有盥升，主酌授之。唯受于公者拜。公所賜者拜，其餘則否。司正命：「執爵者爵辯，卒受者興以酬士。」欲令惠均。○疏曰：以堂上公卿大夫旅徧，并堂下之士



也。大夫卒受者以爵興，西階上酬士，士升，大夫奠爵拜，士答拜。興酬士者，士立堂下，與上坐者異也。○疏曰：向來堂上相旅，皆坐相酬，執爵者行之，大夫未受酬者，當與士相酬，士立堂下與上坐者異，故大夫興而立酬也。大夫立卒爵，不拜，實之。士拜受，大夫拜送。士旅于西階上，辯。祝史，小臣師，旅食皆及焉。士旅酌。旅，序也。士以次自酌相酬，無執爵者。

### 右公爲士舉旅。

若命曰「復射」，則不獻庶子。獻庶子則正禮畢，後無事。○疏曰：獻酬之禮，庶子以下最後得獻，復射在獻庶子之前。司射命射，唯欲。司射命賓及諸公卿大夫射，欲者則射，不欲者則止，可否之事，從人心也。卿大夫皆降，再拜稽首，公答拜。拜君樂與臣下執事無已。不言賓，賓從群臣禮，在上。○疏曰：初酬賓，直言賓。再舉旅言若長，不專於賓。第二舉旅云「唯公所賜，若賓若長」。至賓，士舉旅，直云「唯公所賜」，復不言若賓若長。賓至此降没不言賓，是賓禮以漸而殺，且從群臣

禮在上矣。壹發，中三侯皆獲。其功一也，而和者益多，尚歡樂也。矢揚觸，或有參中者。○疏曰：上文唯公得中三侯，皆釋獲，至此禮殺，臣與君同，是以鄭云「和者益多，尚歡樂也」。云「矢揚觸或有參中」者，卿大夫主射參侯，士主射豸侯，其或揚觸容中別侯，皆與釋。

### 右復射。

主人洗，升自西階，獻庶子于阼階上，如獻士之禮。辯獻，降洗，遂獻左右正與內小臣，皆於阼階上，如獻庶子之禮。庶子既掌正六牲之體，又正舞位，授舞器，與膳宰、樂正聯事，又掌國子戒令，教治世子之官也。左右正，謂樂正、僕人正也，位在中庭之左右。小樂正在頌磬之北，右也，工在西，即北面。工遷於東，則東面。大樂正在笙磬之北，左也，工在西，則西面。工遷於東，則北面。僕人正相大師，工升堂，與其師士降立於小樂正之北，北上。工遷於東，則陪其工後。國君無故不釋縣。二正，君之近官也。內小臣，奄人，掌君陰事陰令，后、夫人之官也。獻三，官於阼階，別內外臣也。同獻更洗，以時事不聯也。獻正下及內小臣，則磬人、鐘人、鐃人、鼓人、僕人師、僕人士，盡獻可知也。庶子、內小臣，位

在小臣師之東，少退西上。○疏曰：云「小樂正在頌磬之北，右也，工在西，即北面」者，工在西，謂遷樂於下時，大師、少師、上工立於鼓北也。云「工遷於東，則東面」者，按上遷樂於東之時，直云大師、少師、上工皆東站之東，不見小樂正從之，明留在西縣之北，東面向工矣。云「大樂正在笙磬之北，左也，工在西，則西面」者，按上文司射「東面命樂正」，單言樂正者，謂大樂正既東面命之，則大樂正元立於東矣，以其工在西階下，故知西面向之矣。云「工遷於東，則北面」者，按上文樂正反位，大師既西面，明樂正北面可知，是以鄉射工遷於東，西面北上，樂正北面立于其南，此亦與彼同北面也。云「國君無故不釋縣。二正君之近官也」，言此者，人君路寢之廷樂縣不釋，樂正與僕人正同掌樂事，是君之近官也。云「同獻更洗，以時事不聯也」者，以其雖同獻於阼階上，獻有前後，故更爵洗之，是以云時事不聯也。云「庶子、內小臣，位在小臣師之東」者，按公食，堂上夾北有宰夫，內宰在東北，此射禮，堂上夾北無宰位，又按執事者堂上，又非樂人，不得在樂正位，以其與小臣師同名小臣，故知小臣師之東也。又云「少退西上」者，見《公食》在宰東北少退，故知此亦少退。知西上者，以此位皆西上故也。

### 右獻庶子左右正內小臣。

無算爵。算，數也。爵行無次數，唯意所勸，醉而止。士也，有執膳爵者，有執散爵者。執膳爵者酌以進公，公不拜，受。執散爵者酌以之公，命所賜。所賜者興，受爵，降席下，奠爵再拜稽首，公答再拜。席下，席西。受賜爵者以爵就席坐，公卒爵，然後飲。酬之禮，爵代舉。今爵並行，嫌不代也。並行猶代者，明勸惠從尊者來。○疏曰：凡行酬之法，轉爵遞飲，今膳、散兩有，宜得即飲，猶待公卒爵乃飲，猶代飲然。明惠從公來，嫌得即飲不代，故必卒爵然後飲。執膳爵者受公爵，酌，反奠之。燕之歡在飲酒，成其意也。○疏曰：更酌反奠於公所，擬公更賜爵，是其歡燕成己意也。受賜者興，授執散爵者，執散爵者乃酌行之。與其所勸者，唯受于公者拜。卒爵者興，以酬士于西階上。士升，大夫不拜乃飲，實爵。乃，猶而也。

○疏曰：鄭轉「乃」爲「而」者，乃是緩辭，於理不切，故爲而也。①士不拜受爵，大夫就席，士旅酌，亦如之。公有命徹罍，則賓及諸公卿大夫皆降，西階下北面東上，再拜稽首。命徹罍者，公意殷勤，欲盡酒。公命小臣正辭，公答拜。大夫皆辟，升反位。升不成拜，於將醉正臣禮。○疏曰：於例，臣於堂下再拜稽首，得小臣以君命辭，其拜不成，當升成禮。今直升不成拜者，以其拜於下，是臣之正。士終旅於上，如初。卿大夫降而爵止，於其反席卒之。○疏曰：上文卿大夫酬辯始酬士，公命徹罍，公卿以下降而爵止，是以卿大夫升反席，士以下相酬而卒之。無算樂。升歌間合無次數，唯意所樂。宵則庶子執燭於阼階上，司宮執燭於西階上，甸人執大燭於庭，閭人爲燭於門外。宵，夜也。燭，燋也。甸人，掌共薪蒸者。庭大燭，爲其位廣也。爲，作也，作燭俟賓出。

右無算爵。

賓醉，北面坐取其薦脯以降，取脯，重得君之賜。奏《陔》。《陔夏》，樂章也。其歌，《頌》類也。以鐘鼓奏之，其篇今亡。賓所執脯，以賜鐘人于門內雷，遂出。必賜鐘人，鐘人以鐘鼓奏《陔夏》，賜之脯，明雖醉，志禮不忘樂。○疏曰：按《鄉飲酒》、《鄉射》賓出無取脯賜鐘人之事者，彼是臣禮，此爲君法，故詳略不同。卿大夫皆出，從賓出。公不送，臣也，與之安燕交歡，嫌亢禮也。○疏曰：歸來安燕交歡，若又送之，是亢禮也。公人，《驚》。《驚夏》，亦樂章也，以鐘鼓奏之，其詩今亡。此公出而言人者，射宮在郊，以將還爲人。燕不《驚》者，於路寢無出人也。○疏曰：按《周禮·鐘師》有《九夏》，皆樂章，其中有《驚夏》，如《陔夏》，故云亦樂章也。天子射在虞庠，周之小學在西郊，按《鄉射》記「於郊則問中」，鄭注云：諸侯「大學在郊」。是諸侯大射所。此篇所解多不具者，以其諸侯大夫射，先行燕禮，大射三番多倚《鄉射》，是以與禮同者，於此不復重釋之也。

①「而」，原作「之」，據賀本改。

右賓出公人。

## 大射義第三十六

邦國禮二之下

記

古者諸侯之射也，必先行燕禮；卿、大夫、士之射也，必先行鄉飲酒之禮。故燕禮者，所以明君臣之義也；鄉飲酒之禮者，所以明長幼之序也。言別尊卑老穉而後射，以觀德行也。故射者進退周還必中禮。內志正，外體直，然後持弓矢審固；持弓矢審固，然後可以言中。此可以觀德行矣。內正外直，習於禮樂，有德行者也，正鵠之名出自此也。其節，天子以《騶虞》爲節，諸侯以《貍首》爲節，卿、大夫以《采蘋》爲節，士以《采芣》爲節。《騶虞》者，樂官備也；《貍首》者，樂會時也；《采蘋》

者，樂循法也；《采芣》者，樂不失職也。是故天子以備官爲節，諸侯以時會天子爲節，卿、大夫以循法爲節，士以不失職爲節。故明乎其節之志以不失其事，則功成而德行立，德行立則無暴亂之禍矣，功成則國安。故曰：射者，所以觀盛德也。《騶虞》、《采蘋》、《采芣》，今《詩》篇名。《貍首》逸，下云「曾孫侯氏」是也。樂官備者，謂《騶虞》曰「壹發五豝」，喻得賢者多也，「于嗟乎騶虞」，歎仁人也。樂會時者，謂《貍首》曰：「小大莫處，御于君所。」樂循法者，謂《采蘋》曰：「于以采蘋，南澗之濱。」循澗以采蘋，喻循法度以成君事也。樂不失職者，謂《采芣》曰：「被之童童，夙夜在公。」○射者，男子之事也，因而飾之以禮樂也。故事之盡禮樂，而可數爲以立德行者，莫若射，故聖王務焉。選上者，先德行，乃後決之於射。男子生而有射事，學禮樂以飾之。○古者天子之制：諸侯歲獻，貢士於天子，天子試之於射宮。其容體比於禮，其節比於樂，而中多者得與於祭。其容體不比

於禮，其節不比於樂，而中少者不得與於祭。數與於祭而君有慶，數不與於祭而君有讓。數有慶而益地，數有讓而削地。是以諸侯君臣盡志於射，以習禮樂。夫君臣習禮樂而以流亡者，未之有也。流，猶放也，《書》曰：「流共工于幽州。」故《詩》曰：「曾孫侯氏，四正具舉。大夫君子，凡以庶士。小大莫處，御于君所。以燕以射，則燕則譽。」言君臣相與盡志於射，以習禮樂，則安則譽也。是以天子制之，而諸侯務焉。此天子所以養諸侯而兵不用，諸侯自爲正之具也。此《曾孫》之詩，諸侯之射節也。四正，正爵四行也。四行者，獻賓，獻公，獻卿，獻大夫，乃後樂作而射也。莫處，無安居其官次者也。御，猶侍也。「以燕以射」，先行燕禮乃射也。「則燕則譽」，言國安則有名譽。譽，或爲「與」。○天子將祭，必先習射於澤。澤者，所以擇士也。已射於澤，而后射於射宮。射中者得與於祭，不中者不得與

於祭。不得與於祭者，有讓削以地；得與於祭者，有慶益以地，進爵紬地是也。澤，官名也。士，謂諸侯朝者，諸臣及所貢士也。皆先令習射於澤，已乃射於射宮，課中否也。諸侯有慶者先進爵，有讓者先削地。

儀禮經傳通解卷第二十一終

## 儀禮經傳通解卷第二十二

竟，張旌，孤卿建旌也。

經八此篇屬賓禮。《大戴》第十四，《小戴》第十五，《別錄》第八。

記：久無事，則聘焉。聘，匹正反，訪也。

○事，謂盟會之屬。○諸侯使大夫問於諸侯曰

聘。《曲禮》。○《周禮·大行人》：「凡諸侯

之邦交，歲相問也，殷相聘也，世相朝也。」

小聘曰問。殷，中也。久無事，又於殷朝者及而相聘也。

父死子立曰世。凡君即位，大國朝焉，小國聘焉。鄭司

農云：《春秋傳》「孟僖子如齊殷聘」。○疏曰：僖子如齊

事見昭公九年《左氏傳》，注云：殷，中也。自襄二十年

叔老聘於齊，至今積二十一年，故中復盛聘。與此數不

相當，然其禮則同也。○今按：《春官》「殷見曰同」，鄭

注云：「殷，猶衆也，十二歲王如不巡守，則六服盡朝。」

《大行人》所謂殷同，殷國是也。此亦鄭注，乃訓「殷」爲

「中」，與「衆」義異。其云「於殷朝者及而相聘」，則又與

「衆」義同，蓋以爲十二年而一大聘也。疏既以爲中，又

云盛聘，則與「衆」義略同，蓋如《喪禮》殷奠之類，今未詳

其孰是也。

## 聘禮第三十七

### 邦國禮三之上

鄭注《目錄》云：「大問曰聘，諸侯相於久無事，使卿

相問之禮。小聘使大夫。」《周禮》曰：「凡諸侯之邦交，

歲相問也，殷相聘也，世相朝也。」○疏曰：下《記》云「久

無事，則聘焉」，注云：「事，謂盟會之屬。」若有事，事上

相見也。「小聘使大夫」者，下經云「小聘曰問，其禮如爲

介，三介」是也。《周禮·大行人》云歲問殷聘，《聘義》所

云「比年小聘，三年大聘」是也。《大行人》又云：「上公九

介，侯伯七介，子男五介。又云：「凡諸侯之卿，其禮各

下其君二等。」《聘義》：「上公七介，侯伯五介，子男三

介。」是諸侯之卿介各下其君二等者也。若小聘曰問，使

大夫，又下其卿二等。此聘禮是侯伯之卿大聘，以其經

云：「五介，」上介奉束錦，上介四人皆奉玉錦。」又云「入

聘禮。○君與卿圖事，圖，謀也，謀聘故及可

使者。謀事者必因朝，其位，君南面，卿西面，大夫北面，士東面。○朝，直遙反。○疏曰：故，謂有事故，或因聘，或特行。《記》云：「若有故，則卒聘，束帛加書將命」，是因聘者也。晉侯使韓穿來言汶陽之田之類，是特行者也。可使者，謂於三卿之中選可使者也。謀事必因朝者，欲取詢衆之意。諸侯三朝：燕朝，燕禮是也；又射朝，大射是也；路門外正朝不見，疑當與二朝面位同。故此以燕禮、大射儀約之，知正朝面位然也。若天子三朝，射人見射朝，司士見正朝，不見燕朝，以諸侯正朝與燕朝同，明天子燕朝亦與正朝同也。遂命使者，使，所吏反。下以意推之。○遂，猶因也。既謀其人，因命之也。聘使卿。○疏曰：知「使卿」者，以下經云「及竟張旌」，而《周禮·司常》則「孤卿建旌」也。使者再拜稽首，辭。辭以不敏。君不許，乃退。退，反位也。受命者必進。既圖事，戒上介，亦如之。既，已也。戒，猶命也。已謀事，乃命上介，難於使者，易於介。○易，以豉反。宰命司馬戒衆介，衆介皆逆命，不辭。宰，上卿，貳君事者也。諸

侯謂司徒爲宰。衆介者，士也，士屬司馬。周禮，司馬之屬，司士掌作士，適四方，使爲介。逆，猶受也。○疏曰：天子有六卿，天、地、四時之官。諸侯兼官但有三卿：地官司徒兼冢宰，夏官司馬兼春官，冬官司空兼秋官。是以《左氏》杜泄云：季孫爲司徒，叔孫爲司馬，孟孫爲司空。餘已見《內則》篇首。「不辭」者，賤不敢辭。

右圖事命使介。

宰書幣，書聘所用幣多少也。宰又掌制國之用。

命宰夫官具。宰夫，宰之屬也。命之使衆官具幣及所宜齎。

右具齎幣。○記：《小行人》：「合六

幣：圭以馬，璋以皮，璧以帛，琮以錦，琥以繡，璜以黼。此六物者，以和諸侯之好故。」琮，才宗反。琥，音虎。璜，音黃。好，呼報反。○合，同也。六幣，所以享也。五等諸侯享天子用璧，享后用琮，其大各如其瑞，皆有庭實，以馬若皮。皮，虎豹皮也。用圭璋者，二王之後也。二王後尊，故享用圭璋而特之。《禮器》曰：「圭璋特」，義亦通於此。其於諸

侯亦用璧琮耳，子、男於諸侯則享用琥璜，下其瑞也。凡二王後、諸侯相享之玉，大小各降其瑞一等。及使卿大夫覲聘，亦如之。○覲，通弔反，後同。○疏曰：小行人，司寇之屬，掌邦國賓客之禮。言「合」者，以兩兩相配合也。皮、馬二者本非幣，總云六幣者，以用之當幣處也。享，獻也。云五等諸侯享玉「各如其瑞」者，《玉人》云：「璧琮九寸，諸侯以享天子。」言九寸，據上公之禮。上公既如其瑞，則侯、伯、子、男亦如其瑞可知。知子、男享天子亦用璧琮者，《覲禮》總稱「侯氏用璧」，明五等同也。云二王後用圭璋享者，上經六玉皆所以享上公，只用璧琮，而圭璋未見所用，則二王後尊用之可知。云「特之」者，既無束帛之加，皮馬又不上於堂也。《禮器》所云，蓋據朝聘之玉無束帛之加，而其義亦通於此。「其於諸侯亦用璧琮」者，上公相享用璧琮降天子一寸，明二王後相享不可同天子用圭璋，則用璧琮可知。云「子男於諸侯享用琥璜」者，《覲禮》總稱「侯氏用璧」，琮琥璜未見所用，明自相享退用琥璜可知。且子、男朝時用璧，自相享宜退一等，則用琥璜益明矣。云二王後、諸侯相享之玉，大小各降其瑞一等者，《玉人》云：「瑑琮八寸，諸侯以享夫人。」禮更無八寸之法，

明上公九寸，降一等至八寸，上公既降，明二王後與侯、伯、子、男各降一寸可知。云「使卿大夫覲聘，亦如之」者，《玉人》云：「瑑圭璋八寸，璧琮八寸，以覲聘。」此據上公之臣圭璋、璧琮皆降一等，與相享之玉同，其餘侯、伯、子、男降一寸明矣。其子、男之臣不得過君，則用琥璜四寸，亦與相享之玉同也。云「皆有庭實以馬若皮」者，《覲禮》「奉束帛，匹馬卓上，九馬隨之」，是以馬也。《聘禮》「庭實，皮則攝之」，是以皮也。皮馬相間，二經各言其一耳。知「虎豹皮」者，以《郊特牲》云「示服猛也」。○凡諸侯之交，各稱其邦而爲之幣，以其幣爲之禮。稱，尺證反。○幣，享幣也。於大國則豐，小國則殺。主國禮之，如其豐殺，謂賄用束紡，禮用玉帛乘皮及贈之屬。○殺，去聲。紡，芳往反。○《司儀》。○多貨則傷于德，貨，天地所化生，謂玉也。君子於玉比德焉。朝聘之禮，以爲瑞節，重禮也。多之則是主於貨，傷敗其爲德。幣美則沒禮。幣，人所造成，以自覆幣，謂束帛也。愛之斯欲衣食之，君子之情也。是以享用幣，所以副忠信。美之，則是主於幣，而禮之本意不見也。○既受行，出，遂見



宰，問幾月之資。幾，居豈反。○資，行用也。古

者君臣謀密草創，未知所之遠近，問行用，當知多少而已。古文「資」作「齎」。○齎，子兮反。○今按：上言

與卿圖事，則固已知所之矣。此但言與宰計度資費之多寡而已，注言未知所之，非是。

及期，夕幣。及，猶至也。夕幣，先行之日，夕陳

幣而視之，重聘也。使者朝服，帥衆介夕。視其事

也。古文「帥」皆作「率」。管人布幕于寢門外。幕，

音莫。○管，猶館也。館人，謂掌次舍帷幕者也。布幕以

承幣。寢門外，朝也。古文「管」作「官」。今文「布」作

「敷」。○疏曰：天官之屬有掌舍、掌次。《幕人》：「掌帷幕

幄帟綬之事。」鄭云：「在旁曰帷，在上曰幕。幕或在地，展

陳于上。」即此布幕是也。「寢門外朝」，謂路門外，即正朝

之處。官陳幣，皮，北首西上，加其奉于左皮

上。馬則北面，奠幣于其前。奉，所奉以致命，謂

束帛及玄纁也。馬言「則」者，此享主用皮，或時用馬，馬人

則在幕南，皮馬皆乘。古文「奉」爲「卷」。今文無「則」。○

纁，許云反。乘，繩證反。○疏曰：官，即上文「官具」者

也。「陳」者，陳于幕上。「所奉以致命」者，下文享時致束

帛加璧以享君，玄纁加琮以享夫人者是也。鄭不言璧琮

者，璧琮不陳，厥明乃授之也。國無皮者乃用馬。「皆乘」

者，下賓觀時「總乘馬」，又云「乘皮」也。使者北面，衆

介立于其左，東上。既受行，同位也。位在幕南。○

疏曰：未受命已前，卿、大夫、士面位各異，是以《記》云：

「使者既受行日，朝同位。」幣在幕上，使者須視幣，故在幕

南也。卿、大夫在幕東，西面北上。大夫西面，辟

使者。○辟，音避。○疏曰：此謂處者大夫常北面，今與

卿同西面，故云「辟使者」。宰人告具于君，君朝服

出門左，南鄉。鄉，許亮反，下以意求之。○入告，入

路門而告。○疏曰：朝在路門外，君在路寢聽政。史讀

書展幣，展，猶校錄也。史幕東西面讀書，賈人坐撫其

幣。每者曰在。必西面者，欲君與使者俱見之也。○賈，

音嫁，後同，掌物價之官。○疏曰：賈人主幣行者，故使撫

幣。受之其幣，謂官具之者，非直所奉而已。宰執書，

告備具于君，授使者，使者受書，授上介。史

展幣畢，以書還授宰，宰既告備，以授使者。其受授皆北

面。○疏曰：三者皆北面向君也。公揖人，揖，禮群臣。

官載其幣，舍于朝。待旦行也。○疏曰：官，謂官人從賓行者，與前「官陳幣」者異。上介視載者，監其安處之，畢乃出。○監，占銜反。○疏曰：注言上介出，不言餘人出，則舍于朝以守幣也。所受書以行。爲當復展。○爲，于僞反。復，扶又反，下以意求之。○疏曰：所受書，謂宰所授者。

### 右授使幣。○記：使者既受行日，朝

同位。謂前夕幣之間，同位者，使者北面，介立于左少退，別其處臣也。

### 厥明，賓朝服釋幣于禰。禰，乃禮反。○告

爲君使也。賓，使者謂之賓，尊之也。天子諸侯將出，告群席，大夫告禰而已。凡釋幣，設洗盥如祭。○疏曰：卿大夫朝服祭，告亦朝服。大夫三廟，降天子，不得並告，直告禰而已。下《記》云：「簠一尸，若昭若穆。」容父在。父在則祭祖，父卒則祭禰。然則初行時，若父在則釋幣於祖廟也。《曾子問》云：「凡告用牲幣。」注云：「牲，當爲『制』。」則告無牲，直用幣而已。但奉幣須潔，當有洗以盥手。其設洗法，見《士冠禮》「篚在洗西」。

### 有司筵几于室中，

祝先人，主人從人。主人在右再拜，祝告，又再拜。更云主人者，廟中之稱也。祝告，告以主人將行也。○稱，尺證反。釋幣，制玄纁束，奠于几下，出。祝釋之也。凡物十曰束。玄纁之率，玄居三，纁居

二。《朝貢禮》云：純，四只。制，丈八尺。○率，音律。只，音紙。○疏曰：玄三纁二，率皆如此也。純，謂幅之廣狹。制，謂舒之長短。《周禮》：趙商問：只長八寸，四八三十二，幅廣三尺二寸大廣，非其度。鄭玄答云：古積畫誤爲「四」，當爲「三」，三則二尺四寸矣。《雜記》云：「納幣一束，束五兩，兩五尋。」然則每卷二丈，若作制幣者，每卷丈八尺爲制，合卷爲匹也。主人立于戶東，祝立于牖西，少頃之間，示有俟於神。又入取幣，降，卷幣實于筭，埋于西階東，筭，音煩，器名。○「又入」者，祝也。埋幣必盛以器，若藏之然。○盛，音成。又釋幣于行。告將行也。行者之先，其古人之名未聞。天子諸侯有常祀在冬。大夫三祀：曰門，曰行，曰厲。《喪禮》有「毀宗躡行，出于大門」，則行神之位在廟門外西方。不言埋幣，可知也。今時民春秋祭祀有行神，占之遺禮乎？○

躐，力涉反。○疏曰：「行者之先」，謂古始教行路之人。「天子諸侯有常祀在冬」者，《月令》祀行是也。大夫雖有行無常祀，因行使始出有告禮而已。然此謂平地道路之神，至於出城，又有輶祭祭山川之神，論無險難也。祭山川之神有輶壇，此祭行神亦當有輶壇，《月令》注云：「行在廟門外之西，爲輶壇，厚二寸，廣五尺，輪四尺」是也。遂受命。賓須介來，乃受命也。言遂者，明白是出，不復入。○疏曰：若然，則待介于門矣。上介釋幣，亦如之。如其於櫛與行。

### 右釋幣于櫛及行。

上介及衆介俟于使者之門外。俟，待也。

待於門外，東面北上。○疏曰：依賓客門外之位。使者

載壇，帥以受命于朝。壇，之然反。○壇，旌旗屬

也。載之者，所以表識其事也。《周禮》曰「通帛爲壇」，又

曰「孤卿建壇」。至於朝門，使者北面東上。古文「壇」皆爲

「膳」。○識，如字，疑當音志。○疏曰：諸侯三門：臯、應、

路。路門外有常朝位。下文「君使卿進使者」乃入至朝，即

此朝門者，臯門外矣。君朝服南鄉，卿大夫西面

北上，君使卿進使者。進之者，使者謙，不敢必君之終使已。使者人，及衆介隨入，北面東上。君揖使者進之，上介立于其左，接聞命。進之者，有命宜相近也。接，猶續也。○近，附近之近。賈人西面坐啟櫝，取圭，垂纁，不起而授宰。櫝，大木反，函也。纁，音早，注「纁」同。○賈人，在官知物賈者。纁，所以藉圭也。其或拜，則奠于其上。今文「纁」作「璫」。○疏曰：注云「其或拜則奠于其上」者，《觀禮》記云「奠圭于纁上」是也。但纁有二種：一者以木爲中幹，以韋衣之，天子五采，公、侯、伯三采，子、男二采，采爲再行，下《記》及《典瑞》皆有其文，此爲纁也。下《記》云「絢組尺」及《曲禮》下文「執玉，其有藉者則楊」，鄭亦謂之纁，若韋版爲之者，奠玉於上，此則無垂纁屈纁之事。若絢組爲之者，所以繫玉於韋版，使不失墜，此乃有屈垂之法，則此經所云者是也。注皆以韋版纁藉解之者，鄭意以承玉及繫玉二者所用相將，又同名爲纁，是以和合解之也。○今按：「在官」上疑有「庶人」二字。宰執圭，屈纁，自公左授使者。屈纁者，斂之，禮以相變爲敬也。自公左，贊幣之義。

○疏曰：《少儀》云：「贊幣自左，詔辭自右。」使者受圭，同面，垂纁以受命。同面者，宰就使者北面並授之。既授之，而君出命矣。凡授受者，授由其右，受由其左。○疏曰：據《鄉飲酒》、《鄉射》、《燕禮》，獻酢酬皆授由其右，受由其左。若有所因，則有授由左，受由右。是以使者反命之時，宰自公左受玉，賓授觀時士受馬適右受，鄭皆以為「由使」。又《鄉飲酒》云：「受酬者自介右。」鄭云：「尊介，使不失故位。」如此者，皆是變例也。既述命，同面授上介。述命者，循君之言，重失誤。上介受圭，屈纁，出授賈人，衆介不從。賈人，將行者，在門外北面。○疏曰：上介送圭出與賈人訖，當復入，故衆介不從以待之。注言「將行者」，以別上文賈人出玉，是留者也。受享束帛加璧，受夫人之聘璋，享玄纁束帛加琮，皆如初。璋，音章。○享，獻也。既聘又獻，所以厚恩惠也。帛，今之璧色繒也。夫人亦有聘享者，以其與己同體，為國小君也。其聘用璋，取其半圭也。君享用璧，夫人用琮，天地配合之象也。圭璋特達，瑞也；璧琮有加，往德也。《周禮》曰：「瑑、圭、璋、璧、琮，以覲聘。」

○繒，自陵反。瑑，大轉反。○疏曰：此經中三事，上經已受聘君圭，此經受享君束帛加璧，又受聘夫人璋，又受享夫人琮。前官陳幣不陳圭璧琮，是以此始言受之。而復連言束帛玄纁，以其是相配之物也。「璧色繒」，《周禮·宗伯》「以蒼璧禮天」下云「牲幣各放其器之色」。言今時者，漢亦用周制，但未知此聘享之圭果用何色耳。云「特達」，謂以朝聘不加束帛也。言「瑞」者，《大宗伯》「以玉作六瑞，公執桓圭」以下是也。「璧琮有加」，謂加於束帛之上也。「往德」，謂往致其德也。「瑑圭璋璧琮」，臣出聘所用也，不為六瑞之制，但瑑之而已，又所執皆降其君一等。

右受命于朝。○記：通帛為旌，通帛，

謂大赤，從周正色，無飾。○疏曰：通體盡用絳，無他物之飾。孤卿建旌。孤卿不畫，言奉王之政教而已。

○疏曰：不畫異物，帛而已，以其直有時王政教，故云「奉王之政教而已」。○《司常》。○瑑、圭、璋、

璧、琮，纁皆二采一就，以覲聘。璋以聘后夫人，以琮享之也。大夫衆來曰覲，寡來曰聘。鄭司農

① 「少儀」，原作「曲禮」，據賀本改。

云：瑑有圻鄂瑑起。○疏曰：本君親自朝則執桓圭之等，此蓋遣臣行聘之所執者。公、侯、伯之臣則執圭璋，子、男之臣不得過本君，用圭璋亦用璧琮，纁皆朱、綠二采，共爲一就。璋以聘后與夫人，而琮享之。圭以聘天子與諸侯，而璧享之。鄭不言天子、諸侯者，以聘后、夫人文隱，故特舉之也。《大宗伯》：「時聘曰問，殷覲曰視。」衆來，則元年、七年、十一年一服朝之歲，來者衆也。特來，則天子有事乃來，亦無常期，故云寡也。瑑有圻鄂瑑起，是不爲桓信躬，蒲穀之文，直瑑之而已。○《典瑞》。○瑑圭璋八寸，璧琮八寸，以覲聘。瑑，文飾也。覲，視也。聘，問也。衆來曰覲，特來曰聘。《聘禮》曰：「凡四器者，唯其所寶，以聘可也。」○疏曰：此謂上公之臣執以覲聘於天子及后，聘用圭璋，而享用璧琮也。兩諸侯相聘亦執之，侯、伯之臣宜六寸，子、男之臣宜四寸，並不得執君之桓圭之等，直瑑爲文飾耳。○《玉人》。○所以朝天子，圭與纁皆九寸，剡上寸半，厚半寸，博三寸，纁三采六等，朱、白、蒼。圭，所執以爲瑞節也。剡上，象天闕地方也。雜采曰纁，以韋衣木版，飾以三色。再

就，所以薦玉重慎也。九寸，上公之圭也。古文「纁」或作「藻」，今文作「瑑」。○疏曰：《周禮·掌節》有玉節之節，即是節與瑞別矣，但節不得言瑞，瑞亦是節信，故連言節也。下不剡，象地方，上剡，象天闕。《雜記》云：「圭剡上左右各寸半。」尊卑同之，惟長短依命數不同。凡言纁者，皆象水草之文，天子五采，公、侯、伯三采，子、男二采，皆是雜色也。木版大小一如玉制，然後以韋衣之。「三色再就」者，即六等也，一采爲再就，三采即六等也，鄭注《典瑞》又云：「一匣爲一就。」又有雖再匣併爲一就者，如《典瑞》所謂侯伯「三采三就」之類是也。○《雜記》疏云：「三采六等以朱白蒼畫之再行也」者，按《聘禮》記云「朝天子，圭與纁皆九寸」，「纁三采六等，朱、白、蒼，朱、白、蒼」是也。既重云「朱、白、蒼」，是一采爲二等，相間而爲六等也。若五等諸侯，皆一采爲一就，《典瑞》云公、侯、伯「皆三采三就」，謂一采爲一就，故三采三就，其實采別二就，三采則六等也。《典瑞》又云子、男「皆二采再就」，二采謂朱綠也，<sup>①</sup>二采故二就，其實采別二就，二采則四等也。《典瑞》又云「瑑、

①「二」，原作「一」，據元明本、寬文本、賀本改。

圭、璋、璧、琮，纁皆二采一就，以覲聘，此謂卿大夫每采唯一等，是二采共一就也，與諸侯不同。其天子則《典瑞》云纁「五采五就」，亦一采爲一就，五采故五就，其實采別二就，五采則十等也。○今按：上《記》只有「朱白蒼」三字，而《雜記》疏所引乃重有之，不知何時傳寫之誤，失此三字。兼其言采就之說詳明，今皆著于上，覽者詳之。問諸侯，朱綠纁，八寸。二采再就，降於天子也。於天子曰朝，於諸侯曰問，記之於聘，文互相備。○疏曰：上云三采六等，此二采不云四就者，臣禮與君禮異。子、男亦同一采，但一采爲一匝，二采爲再匝，共四等。今臣一采爲一就，二采共爲再就，是二采當君一采之處。《典瑞》云：「瑑、圭、璋、璧、琮，纁皆二采一就，以覲聘。」亦是臣二采當君一采之處。上公朝天子，圭與纁皆九寸，則白相朝亦九寸。上公遣臣相問，圭與纁皆八寸，則遣臣問天子亦八寸。是《記》於聘文互相備也。皆玄纁繫，長尺，絢組。繫，音計，又胡帝反。長，直亮反。絢，呼縣反，又胥倫反，又音巡。組，音祖。○采成文曰絢。繫，無事則以繫玉，因以爲飾，皆用五采組，上以玄，下以絳爲地。今文

「絢」作「約」。○約，音巡。○疏曰：上文纁藉尊卑不同，此之組繫尊卑等。無事，謂在櫝之時，亦以繫玉，因以爲飾。經言纁而注言絳者，《周禮》、《爾雅》皆云三入爲纁，郭注云：「纁，絳也。」明二色同也。○凡四器者，唯其所寶，以聘可也。言國獨以此爲寶也。四器，謂圭、璋、璧、琮。○凡執玉，無藉者襲。藉，謂纁也，纁所以緼藉玉。○執玉，其有藉者則裼，無藉者則襲。藉，在夜反，下同。裼，星歷反。○藉，藻也。裼、襲，文質相變耳。有藻爲文，裼見美亦文；無藻爲質，襲充美亦質。圭璋特而襲，璧琮加束帛而裼，亦是也。○疏曰：藉者，藉玉之藻也，鄭氏云：「纁，所以藉玉，以采色畫韋衣於木版之上，廣表各如其玉之大小，前後垂之，《覲禮》云「瑞玉有纁」是也。又有五采組繩以爲繫，其組上玄下黃，長尺，無事則以繫玉，有事則垂爲飾，《聘禮》記云「玄纁，繫長尺，絢組」是也。又曰：《禮說含文嘉》云：「天子、三公、諸侯，皆以三帛薦玉。」宋均注云：「其殷禮三帛謂朱、白、蒼。」又此《聘禮》璧琮加束帛，亦是藉也。又曰：裼襲者，凡衣近體有袍澤之屬，其外有裘，夏月則衣葛，其上有裼衣，裼

衣上有襲衣，襲衣之上有常著之服，則皮弁之屬也。掩而不開則謂之爲襲。若開此皮弁及中衣，左袒出其裼衣，謂之爲裼。又曰：此章之義，則皇氏云：凡執玉之時，必有其藻以承於玉。若盡飾見美之時，必垂藻於兩端，令垂向於下，謂之有藉。當時所執之人，則去體上外服，以見在內裼衣，故云有藉者則裼也。其事質充美之時，承玉之藻，不使下垂，屈而在手，謂之無藉。當時所執之人則掩其上服，襲蓋裼衣，謂之無藉者則襲。此謂執玉之人朝聘行禮，或有裼時，或有襲時也。又云「圭璋特而襲」者，上公享王圭以馬，享后璋以皮，皮馬既不上於堂，其上唯特有圭璋。圭璋既是寶物，不可露見，必以物覆襲之，故云「圭璋特而襲」也。云「璧琮加束帛而裼」者，謂侯、伯、子、男享天子璧以帛，享后琮以錦，既有帛錦承玉，上唯用輕細之物蒙覆以裼之，故云「璧琮加束帛而裼」也。此明非但人有裼襲，其玉亦有裼襲之義。熊氏則云：采色畫章衣服之藻藉則常有，今言無者，據不垂之也。其垂藻之時則須裼，屈藻之時則須襲。按《聘禮》：賓至主人廟門之外，「賈人東面坐，啟牘，取圭垂纁，不起而授上介。」注云：「不言裼襲者，賤不裼也。」以賈賤，故不言裼，明貴者垂藻當裼也。又

云：「上介不襲，執圭屈纁授賓。」注：「上介不襲者，以盛禮不在於已。」明屈纁合襲也。又云：「賓襲執圭」，又云公「襲受玉」，於時圭皆屈藻，故賓與公執玉皆襲。是屈藻之時皆襲，則所謂無藉者襲是也。《聘禮》又云：「賓出，公授宰玉，裼，降立。」是授玉之後乃裼也。又云：「賓裼，奉束帛加璧享。」是有藉者裼。凡朝之與聘，賓與主，君行禮皆屈而襲，至于行享之時皆裼也。知者，以《聘禮》行聘則襲，受享則裼。凡享時其玉皆無藉藻，故崔靈恩云：初享圭璋特，故有藻，其餘則束帛加璧。既有束帛，不須藻。○《曲禮》。○陳祥道云：玉有以纁爲之藉，有以束帛爲之藉。有藉則裼，無藉則襲，特施於束帛而已。聘，賓襲執圭，公襲受玉。及享，則賓裼奉束帛加璧，蓋聘特用玉而其禮嚴，享藉以帛而其禮殺。此襲裼所以不同。先儒以垂纁爲有藉，屈纁爲無藉，此說非也。○陸佃曰：無藉，若圭璋特是也。經言纁，又別言藉，則藉非纁著矣。藉若璧以帛，琮以錦之類。所謂公側襲受玉于中堂，<sup>①</sup>此無藉者之玉也，即束帛加璧裼矣。○今按：鄭說兩義，詞太簡略，指不分

①「側」，原作「降」，據賀本改。

明。疏家所引皇氏、熊氏始以垂屈言之。但熊氏所云「今言無者，據垂之也」，乃與經文及皇氏并已說上下文皆相反，疑其「據」字之下當脫一「不」字，今已輒爲補之矣。至於圭、璋、璧、琮之義，則皇氏爲失而熊氏得之。但《周禮·典瑞》云「璧琮纁皆二采一就」，而熊氏亦自謂以韋衣服之藉則常有，<sup>①</sup>而又引崔靈恩云璧琮「既有束帛，則不須藻」，似亦牴牾。疑璧琮雖有藻而屈之，當爲無藉，特以加於束帛，故從有藉之例，而執之者楊耳。陳氏、陸氏則但取鄭注後說，而用熊氏之義，似亦有理，然今未敢斷其是非，故悉著其說以俟知者。

遂行，舍于郊，於此脫舍衣服，乃即道也。《曲

禮》曰：「凡爲君使，已受命，君言不宿於家。」○疏曰：言「遂行」者，受命即行，不留停。「脫舍衣服」者，上文賓朝服告禰及遂朝君受命，至此衣服未改，鄭注云「占時道路深衣」，則此脫舍朝服，服深衣而行矣。斂廬。此行道耳，未有事也。斂，藏也。

右遂行。○記：凡爲君使者，已受

命，君言不宿於家。急君使也。言，謂有故所問

也。《聘禮》曰：「若有言，則以束帛，如享禮。」○疏曰：

君言，或問其臣，或問他人。已受宜急去，不得留停宿於家也。○《曲禮》。○今按：注引《聘禮》「有言」以釋言字，迂滯不通。○出祖，釋輶，祭酒脯，乃飲

酒于其側。祖，始也。既受聘享之禮，行出國門，止陳車騎，釋酒脯之奠於輶，爲行始也。《詩》傳曰：「輶，道祭也。」謂祭道路之神。《春秋傳》曰：「輶涉山川。」然則輶，山行之名也。道路以險阻爲難，是以委土爲山，或伏牲其上，使者爲輶祭酒脯祈告也。卿大夫處者，於是餞之，飲酒于其側。禮畢，乘車轡之而遂行，舍於近郊矣。其牲，犬、羊可也。古文「輶」作「拔」。○騎，其義反。難，乃旦反。餞，在淺反。轡，力狄反。拔，芳弗反。○疏曰：凡道路之神有二：在國內釋幣於行者，謂平適道路之神；出國門釋奠於輶者，謂山行道路之神。祀行之禮，北面設主於輶上。國外祀山行之神爲輶壤，大小與之同。鄭注《夏官·大馭》云：「封土爲山象，以菩芻棘柏爲神主，既祭，以車轡之而去，喻無險難也。」

①「常」，原作「皆」，據寬文本、賀本改。



云「或伏牲其上」者，按《周禮·犬人》：「掌供犬牲，伏瘞亦如之」，鄭注云：「伏謂伏犬，以王車轅之」是也。《詩》云：「取羝以軼。」是用羊也。是犬羊各用其一，未必並用之。言「可」者，人君有牲，大夫無牲，直用酒脯。

○問大夫之幣，俟于郊，爲肆，又齋皮馬。

齋，子兮反，注同。○肆，猶陳列也。齋，猶付也。使者既受命，宰夫載問大夫之禮待於郊，陳之爲行列，至則以付之也。使者初行，舍於近郊。幣云肆，馬云齋，因其宜，亦互文也。不於朝付之者，辟君禮也。必陳列之者，不夕也。古文「肆」爲「肆」。○行，戶郎反。肆，以二反。

若過邦，至于竟，使次介假道，束帛將命

于朝，曰：「請帥。」奠幣。至竟而假道，諸侯以國

爲家，不敢直徑也。將，猶奉也。帥，猶道也，請道己道路所當由。○請道之道，音導。下大夫取以入告，出

許，遂受幣。言遂者，明受其幣，非爲許故也。容其辭

讓不得命也。○爲，于僞反。○疏曰：幣本爲行禮，非爲求許。若因許道受幣，當云出許受幣，不須言遂。今云

「遂」，是已許道尚辭讓，此幣不得命遂受之，故云遂也。餼之以其禮，上賓大牢，積唯芻禾，介皆有餼。餼，許氣反。積，子賜反。○凡賜人以牲，生曰餼。

餼，猶稟也，給也。以其禮者，尊卑有常差也。常差者，上賓、上介牲用大牢，群介用少牢。米皆百筥，牲陳于門內之西，北面。米設于中庭。上賓、上介致之以束帛，群介則牽羊焉。上賓有禾十車、芻二十車，禾以秣馬。○少，時照反。秣，音末。士帥，没其竟。没，盡。誓于其

竟，賓南面，上介西面，衆介北面東上。史讀書，司馬執筴，立于其後。筴，音策。○此使次介

假道，止而誓也。賓南面，專威信也。史於衆介之前，北面讀書，以敕告士衆，爲其犯禮暴掠也。禮，君行師從，卿行旅從。司馬，主軍法者，執策示罰。○掠，音亮。從，才用

反。○疏曰：此誓當在使次介假道之時，止而誓言。今在「士帥没其竟」之後言之者，以上文設彼國禮，此更卻本而

言之也。

右過他國。

未入竟，壹肆。肆，以二反。○謂於所聘之國竟

也。肄，習也。習聘之威儀，重失誤。爲壇壇，畫階，

帷其北，無宮。壇，以垂反，一以癸反。壇，大丹反，封

土曰壇。畫，音獲，注同。○壇土象壇也。帷其北，宜有所

鄉依也。無宮，不壇土，畫外垣也。○垣，音袁。○疏曰：

按《觀禮》與《司儀》同爲壇三成，宮方三百步。此壇止壇土

爲之，無成，又無尺數，是象之也。「不壇土」，以畫外垣，是

無宮也。朝服，無主，無執也。不立主人，主人尊

也。不執玉，不敢褻也。徒習其威儀而已。介皆與，北

面西上。與，音預。○人門左之位也。古文「與」作

「豫」。○疏曰：大門外內及廟門內之禮威儀少，故略之，

但習入廟聘享，布幣，受玉之禮，是以直云「北面西上」之位

也。習享，士執庭實。士，士介也。庭實必執之者，

皮則有攝張之節。○疏曰：知所執是皮者，以其金龜竹箭

之等皆列之於地，不執之，所執者唯有皮而已。下聘時，執

皮者張之，是有攝張之節也。習夫人之聘享，亦如

之。習公事，不習私事。公事，致命者也。○疏

曰：私事者，謂私覲於君，私面於卿大夫。

### 右習儀。

及竟，張旌，誓。及，至也。張旌，明事在此國

也。張旌，謂使人維之。○疏曰：大夫杠五刃，齊於較。

較崇八尺，人又長八尺，人維得手及之者，蓋以物接之，乃

得維持之。按《節服氏》：「六人維王之大常。」鄭云：「維之

以纆。」諸侯四人，不依命數。大夫或一人，或二人。乃

謁關人，謁，告也。古者竟上爲關，以譏異服，識異言。

○疏曰：《周禮·司關》：「上士二人，中士四人。」每關下

士二人。蓋上士、中士六人總主諸關，下士二人各主一關

也。關人問從者幾人，從，才用反。幾，居豈反。

○欲知聘問，且爲有司當共委積之具。○委，於僞反。積，

子賜反。○疏曰：關人所問，爲卿行旅從，若大夫小聘，亦

當百人也。共具者，賓客人竟，當於廬宿市設，少曰委，多

曰積。以介對。以所與受命者對，謙也。《聘禮》：上公

之使者七介，侯、伯之使者五介，子、男之使者三介。以其

代君交於列國，是以貴之。《周禮》曰：「凡諸侯之卿，其禮

各下其君二等。」○疏曰：不以五百人、百人對，而但以所

與同受命者對，是謙也。君使士請事，遂以入竟。

請，猶問也，問所爲來之故也。遂以入，因道之。○疏曰：

君子不必人，故知而猶問也。

右及竟。

人竟，斂廬，乃展。復校錄幣，重其事。斂廬，

變於始人。布幕，賓朝服立于幕東，西面，介皆

北面東上，賈人北面，坐拭圭，拭，音式。○拭，清

也。側幕而坐，乃開櫝。○清，或才姓反。○疏曰：賓「西

面」者，雖不對君，由是臣道，異於前暫時也。遂執展

之。持之而立，告在。○疏曰：所告者，告賓。上介北

面視之，退復位。言退復位，則視圭進違位。退

圭，圭璋尊，不陳之。陳皮，北首西上，又拭壁展

之，會諸其幣，加于左皮上。上介視之，退。

會，合也。諸，於也。古文曰「陳幣，北首」。馬則幕南

北面，奠幣于其前。前，當前幕上。展夫人之聘

享，亦如之。賈人告于上介，上介告于賓。

展夫人聘享，上介不視，貶於君也。賈人既拭璋琮，南面告

於上介，上介於是乃東面以告賓，亦所謂「放而文」之類。

○放，方往反。○疏曰：《禮器》云：「有放而文也。」注云：

「謂若天子服日月以至黼黻。」是天子衣放象日月以下而為

文。今夫人聘享，上介不視，但賈人告上介，上介告賓，是亦放象君禮而為文變也。有司展群幣，以告。群

幣，私觀及大夫者。有司，載幣者，自展自告。及郊，又

展如初。郊，遠郊也。周制：天子畿內千里，遠郊百里。

以此差之，遠郊，上公五十里，侯伯三十里，子男十里也。

近郊各半之。○疏曰：《周禮》「畿方千里」，《商頌》云「邦

畿千里」，夏時《禹貢》方千里曰甸服，據唐、虞畿內是也。

公五百里中置國城，面二百五十里，故遠郊五十里。自此

已下，差之可知。云「近郊」，約周天子之法，亦無正文。

《尚書》鄭注云：「周之近郊五十里。今河南洛陽相去則

然。」及館，展幣于賈人之館，如初。館，舍也。遠

郊之內有候館，可以小休止沐浴。展幣不于賓館者，為主

國之人有勞問已者就焉，便疾也。○勞，力到反。○疏

曰：《周禮》遺人職云：「十里有廬，三十里有宿，五十里

有市，市有候館。」畿內道路皆有候館。鄭據此候館在遠郊

之內，不謂於此獨有也。

右三展幣。○記：諸公之臣相為國

客，謂相聘也。則三積，皆三辭拜受。受者，受

之於庭也。侯、伯之臣不致積。○疏曰：此在道之禮，

於路館致之，亦有束帛。若諸公云「登」即是登堂，此不云登，故知受於庭也。按本經五介「張旌」，是侯、伯之卿，經不云積，明不致積可知，但不以束帛行禮致之，豈於道全無積乎？明有也。○《司儀》。

○凡侯、伯、子、男之臣，以其國之爵相爲客而相禮，其儀亦如之。爵，卿也，大夫也，士也。○疏曰：鄭注

《掌客》云：「爵卿也，則飧二牢，饗饌五牢；大夫也，則飧大牢，饗饌三牢；士也，則飧少牢，饗饌大牢也。此降小禮，豐大禮也。以命數，則參差難等，略於臣，用爵而已。」以此三等相禮也。云「其儀亦如之」者，亦以三等相差，七十步七介，五十步五介，三十步三介，小聘使大夫，又降殺也。凡四方之賓客，禮儀、辭命、饌牢、賜獻，以二等從其爵而上下之。上下，猶豐殺也。○疏曰：此與《大行人》云「諸侯之卿，各下其君二等，大夫士亦如之」義同。大夫下卿，士下大夫，凡禮皆以其爵而降殺以兩，如七鼎五鼎，五牢三牢之類是也。○《司儀》。

賓至于近郊，張旌，君使下大夫請行，

反。君使卿朝服，用束帛勞。請行，問所之也，雖

知之，謙不必也。士請事，大夫請行，卿勞，彌尊賓也。其服皆朝服。○疏曰：人「近郊張旌」者，示將有事以自表也。上介出請，入告。賓禮辭，迎于舍門之外，再拜。

出請，出門西面請所以來事也。入告，人北面告賓也。每所及至，皆有舍。其有來者與，皆出請入告，

于此言之者，賓彌尊，事彌錄。○疏曰：前士請事，大夫請行，亦當出請入告，於此始言之者，先士，次大夫，後卿，以是先卑後尊，今復見此言，故云「賓彌尊，事彌錄」也。○今按：注中「與」字，陸氏音餘，監本作「此」者，非疑詞，不當音餘。複出「者」字，亦無義理，竊疑本「介」字也。勞者

不答拜。凡爲人使，不當其禮。○疏曰：聘賓亦初入大門，主君拜，賓辟不答拜也。如此之類皆然，故云「凡」以該之。至後僨勞者與之答拜，爲已故也。賓揖先人，受于舍門內。不受于堂，此主於侯、伯之臣也，公之臣受

勞於堂。○疏曰：按下記「登聽命」，知受勞於堂。勞者奉幣入，東面致命。東面，鄉賓。賓北面聽命，還，少退，再拜稽首，受幣，勞者出。北面聽命，

還，少退，再拜稽首，受幣，勞者出。北面聽命，

若君南面然。少退，象降拜。○疏曰：歸饗餼，大夫東面致命，賓降階，西面，再拜稽首，是此象之也。又訝受法，歸饗餼時，堂上北面受幣，此在庭，亦當北面訝受幣，勞者南面可知也。授老幣，老，賓之臣。○疏曰：大夫家臣稱老，若趙、魏臧氏老之類也。出迎勞者。欲償之。勞者禮辭，賓揖先人，勞者從之，乘皮設，乘，繩證反，後此類皆同。○設於門內也。物四曰乘。皮，麋鹿皮也。○疏曰：庭實當三分庭一在南設之，今以償勞者在庭，故設於門內也。知用麋鹿皮者，按《郊特牲》諸侯朝享天子法用虎豹，此臣聘君降於享天子，故《齊語》云齊桓公使諸侯輕其幣，用麋鹿皮四張，亦一隅也。賓用束錦償勞者，償，必刃反。○言償者，賓在公館如家之義，亦以來者為賓。勞者再拜稽首受，稽首，尊國賓也。○疏曰：稽首，首至地，臣拜君法。頓首，頭扣地，平敵相於法。空首，首至手，君答臣下拜法。《郊特牲》云：「大夫之臣不稽首，非尊家臣，以辟君也。」今勞者與賓同類而稽首，故云尊國賓也。賓亦稽首送者，以是為君使，故報之也。賓再拜稽首，送幣。受，送，拜皆北面，象階上。

○疏曰：按歸饗餼賓償大夫時，賓楹間北面授幣，大夫西面受，此賓宜與彼同。北面授還，北面拜送，當云「授拜送皆北面」，蓋據賓而言「受」，字誤也。○今按：「西面」當作「南面」。勞者揖皮出，乃退，賓送再拜。揖皮出，東面揖執皮者而出。○疏曰：執皮者在門內當門，勞者在執皮者之西，故知東面揖也。《公食禮》云：公侑食以束帛，<sup>①</sup>庭實設乘皮，賓出，揖庭實出。鄭云：揖執皮者，若親受。云「上介受賓幣，從者訝受皮」，則此勞者之從者亦當訝受也。夫人使下大夫勞以二竹簠方，玄被纁裏，有蓋。簠，音甫，或作「簠」。外國內方曰簠，內圓外方曰簠。○竹簠方者，器名也，以竹為之，狀如簠而方，如今寒具筥。筥者圓，此方耳。○圓，音圓。○疏曰：簠皆用木而圓，受斗二升，此則用竹而方，故云「如簠而方」。寒具，見《籩人》，先鄭注云：「清朝未食，先進寒具口實。」以冬食，故謂之寒具。又按《玉人》云：「案十有二寸，<sup>②</sup>棗栗十有二列，諸侯純九，大夫純五，夫人以勞諸侯。」彼謂王

①「帛」，原作「錦」，據元明本、賀本改。

②「寸」字，原脫，據賀本補。

后，故有玉案，此諸侯夫人，故無之也。其實棗蒸栗擇，兼執之以進。兼，猶兩也。右手執棗，左手執栗。

○疏曰：按下文，則此大夫先度右手，乃以左手授栗，便也。亦見《士虞禮》。賓受棗，大夫二手授栗，受授

不游手，慎之也。○疏曰：初兩手俱用，既授棗而不兩手共授栗，則是游暇一手，爲不慎矣。賓之受，如初禮。

如卿勞之儀。賓之如初，下大夫勞者遂以賓人。出以束錦授從者，因東面釋辭，請道之以人，然則賓送不拜。○疏曰：經言「遂以賓人」，明知有辭請導之，雖

無文，鄭以意言之。「賓送不拜」者，以其云「遂以賓人」即從之，明賓送不拜，謂若《公食大夫》使人戒賓「不拜送」，遂從之「其類也」。按上君使士請，遂以賓人，鄭云因導之。不言賓送不拜者，請事無幣，賓亦不僨，故其請導賓無拜送之理。此大夫勞賓，與卿同有拜送之理，故云「賓送不拜」也。《覲禮》大夫勞侯氏，侯氏即從大夫夫人，拜送大夫。天子使尊，故雖從亦拜送，與此異。

右郊勞。○記：諸公之臣相爲國客，

及大夫郊勞，旅擯，三辭拜辱，三讓，登，聽

命，下拜，登受。賓使者如初之儀，及退，

拜送。登聽命，賓登堂也。「賓」當爲「僨」。勞用束

帛，僨用束錦。侯、伯之臣，受勞於庭。○疏曰：旅擯不

傳辭，賓使各陳七介而已。云「三辭拜辱」者，賓從館內

出於大門，拜使者辱命來於外。云「三讓」者，讓升堂。

云「賓使者如初之儀」者，謂使傳命訖，禮畢出門，賓以

束帛僨使者，如初行勞時之儀。前賓受幣，今使者受幣，受幣雖異，威儀則同，敬主君使者也。○《司儀》。

○辭曰：「非禮也，敢。」對曰：「非禮也，

敢。」辭，辭不受也。對，答問也。二者皆卒曰敢，言不

敢。○疏曰：辭謂賓辭主人，答謂賓答主人，介則在旁，

曰「非禮也，敢」。○今按：諸本下句末有「辭」字，注無

復出「辭」字。永嘉本張淳《識誤》曰：「以注疏考之，經

下義「辭」字，注上合更有一「辭」字，蓋傳寫誤以注文

爲經文也，當依注疏減經以還注。」其說爲是，今從之。

至于朝，主人曰：「不腆先君之祧，既拊

① 「送」字，原脫，據賀本補。

以俟矣。」腆，他典反。拚，方問反，謂洒掃。<sup>①</sup>○賓至外門，下大夫人告，出釋此辭。主人者，公也。不言公而言主人，主人，接賓之辭，明至欲受之，不敢稽賓也。腆，猶善也。遷主所在曰桃。周禮：天子七廟，文武為桃，諸侯五廟。則桃始祖也，是亦廟也。言桃者，桃尊而廟親，待賓客者，上尊者。○疏曰：《周禮·守桃》：「掌守先王先公之廟桃。」鄭注云：「廟，謂大祖之廟及三昭三穆，遷主所藏曰桃。先公之遷主藏于后稷之廟，先王之遷主藏于文、武之廟。」云奄八人，廟有一奄，周立七廟，通姜嫄廟為八，故奄八人。《祭法》鄭注云：「桃之言超也。超，上去意也。」不毀之也。云「遷主所藏曰桃」，天子有二桃，以藏先王之遷主，諸侯無之，但遷主藏于大祖廟，故此亦以名大祖廟為桃也。下文迎賓及廟門受聘享皆在廟，明是大祖廟可知。既於大廟受聘享以尊之，若享食則於禰廟，燕又在寢，彌相親也。此鄭義，若孔君、王肅則以高祖之父及祖為二桃，非鄭義也。賓曰：「俟閒。」閒，如字，劉音閑。○賓之意不欲奄卒主人也，且以道路悠遠，欲沐浴齊戒，俟閒，未敢聞命。○卒，寸忽反。齊，側皆反。○疏曰：命，即上主人之命。

## 右至朝。

大夫帥至于館，卿致館。致，至也。賓至此館，主人以上卿禮致之，所以安之也。○疏曰：《覲禮》云：「侯氏遂從之，天子賜舍。」辭曰：「賜伯父舍。侯氏再拜稽首，受饋之束帛乘馬。」注云：「王使人以命致館，無禮，猶饋之者，尊王使也。」無禮，謂無束帛。此云「以上卿禮」，明有束帛致也。賓迎再拜，卿致命，賓再拜稽首。卿退，賓送再拜。卿不俟設飧之畢，以不用束帛致故也。不用束帛致之者，明為新至，非大禮也。○飧，音孫，下及注同，<sup>②</sup>熟食曰飧。○疏曰：下直云「宰夫朝服設飧」，不言致，則此卿致館，兼致飧矣。致館有束帛，致飧空以辭。致君命無束帛，下《記》云「飧不致」是也。然此侯、伯之卿禮其公之臣，亦以幣帛致，按《司儀》云云。又曰：其臣致飧無幣，其五等諸侯致飧則有幣。按《司儀》諸侯相於「致飧如致積」有幣，知致飧亦有幣也。○今按：此「致」止謂致館耳，章首日其事而下詳其節也。上無「飧」字

① 「洒掃」，原作「掃灑」，據元明本、寬文本、賀本改。  
② 「下及」二字，原脫，據賀本補。

而但云「致命」，注、疏何以見其爲致殯耶？詳又見下章。

### 右致館。

注、疏云：「兼致殯」，今按：非是，詳見

上下文。

○記：諸公之臣相爲國客，致館如

初之儀。如郊勞也，不饋耳。侯、伯之臣，致館于庭。

不言致殯者，君於聘大夫不致殯也。下《記》曰：「殯不

致，賓不拜。」○疏曰：鄭知不饋者，本經致館無束帛，賓

亦無饋，知此亦然也。「君於聘大夫不致殯」者，本經致

館之下即云宰夫設殯，此致館下亦不云致殯，是五等之

臣皆無致殯也。○《司儀》。○今按：注云無饋，未知其

何以知之。若謂上經致館不言束帛，亦不言賓饋之事，

此亦當然，則當併與無束帛言之，不當只言無饋也。且

郊勞有幣，此禮既如郊勞，則亦有幣，而鄭注《司儀》諸

公致館亦云：「凡云致者，皆有幣以致之。」此亦言致，不

得獨無幣也。疏於上經亦云「以上卿禮，明有束帛致」，

而於此乃遷就其說，自相牴牾，覽者詳之。○卿館

於大夫，大夫館於士，士館於工商。館者必

於廟，不館於敵者之廟，爲大尊也。自官師以上，有廟

有寢，工商則寢而已。○疏曰：《祭法》云：「適土一廟，

官師一廟。鄭云：「官師，謂中士、下士。」《周禮·隸僕》

鄭注云：「五寢，五廟之寢。天子七廟，唯祧無寢。」蓋前

曰廟，後曰寢也。《爾雅》云：「室有東西廂曰廟。」注

云：「夾室前堂。」又曰：「無東西廂有室曰寢。」注云：

「但有中室。」自上以上，有廟者必有寢。庶人在官者，

工商之等，有寢者則無廟，故《祭法》云：「庶士庶人無

廟」，祭於寢是也。又曰：《曾子問》云：「公館與公所爲

曰公館。」鄭注云：「公館，若今縣官宮也。」彼是正客館。

彼此兩言之者，若朝聘使少則皆於正客館，若使多則有

在大夫廟。○今按：疏引《曾子問》之文如此，而下經

還玉，賓「負右房而立」，是不必於廟也明矣。鄭注不

通，當從疏說。管人爲客，三日具沐，五日具

浴。管人，掌客館者也。客，謂使者下及士介也。

宰夫朝服設殯，食不備禮曰殯。《詩》云：「不素

殯兮」，《春秋傳》曰「方食魚殯」，皆謂是。○疏曰：云「不

備禮」者，對饗餼而言。饗餼則生腥飪皆具，而又多餘物，

殯則唯腥飪而已。飪一牢，在西，鼎九，羞鼎

三，腥一牢，在東，鼎七。飪，而審反。○中庭之

饌也。飪，熟也。熟在西，腥在東，象春、秋也。鼎西九東

七。凡其鼎實與其陳，如陳饗餼。羞鼎，則陪鼎也，以其實



言之則曰羞，以其陳言之則曰陪。○疏曰：「鼎西九東七」者，九謂正鼎九：牛、羊、豕、魚、腊、腸胃、膚、鮮魚、鮮腊；東七者，腥鼎無鮮魚、鮮腊，故七。「如陳饗餼」者，如其死牢，故《掌客》云：「諸侯之禮，饗餼九牢，七牢，五牢。」其死牢如殯之陳。凡介、行人，皆有殯饗餼。此則如介禮也。是殯之死牢與饗餼死牢實與殯陳同，亦於東階西階也。陪鼎三，則下云腳、臠、臠是也。堂上之饌八，西夾六。八、六者，豆數也。凡饌以豆爲本。堂上八豆、八簋、六鉶、兩簠、八壺，西夾六豆、六簋、四鉶、兩簠、六壺。其實與其陳，亦如饗餼。○鉶，音刑。門外米、禾皆二十車，禾，稟實并刈者也。諸侯之禮，車米視生牢，禾視死牢，牢十車。大夫之禮，皆視死牢而已。雖有生牢，不取數焉。米陳門東，禾陳門西。○稟，古老反。刈，魚廢反。○疏曰：注說皆約下歸饗餼知之，後倣此。薪芻倍禾。各四十車。凡此之陳，亦如饗餼。上介，飪一牢，在西，鼎七，羞鼎三。堂上之饌六，門外米、禾皆十車，薪芻倍禾。西鼎七，無鮮魚、鮮腊。衆介皆少牢。亦飪在西，鼎五：羊、豕、腸胃、魚、腊。新至尚

熟，堂上之饌。四豆、四簋、兩鉶、四壺，無簠。○疏曰：知「鼎五」者，以賓九、上介七，衆介當五，降殺以兩。

右設殯。○記：凡諸侯之卿、大夫、

士爲國客，則如其介之禮以待之。言其特來聘問，待之禮如其爲介時也。然則《聘禮》凡所以禮賓，是亦禮介。○疏曰：諸侯相朝，衆臣從君，凡介、行人、宰、史皆有殯，饗餼以其爵等爲之，禮惟上介有禽獻。今不從君而特來聘問者，其待之禮亦如其從君爲介之時也。大聘曰聘，則卿爲賓，大夫爲上介，士爲衆介。小聘曰問，則大夫爲賓，介皆士，故此歷言卿、大夫、士也。○詳見《諸侯相朝禮》。凡禮賓客，國新殺禮，凶荒殺禮，札喪殺禮，禍裁殺禮，在野在外殺禮。皆爲國省用愛費也。國新，新建國也。凶荒，無年也。禍裁，新有兵、寇、水、火也。○疏曰：「在野在外殺禮」者，以其野外忽遽，禮物不可卒備，故亦殺之。○《掌客》。上公殯五牢，食四十，簠十，豆四十，鉶四十有二，壺四十，鼎簋十有二，牲三十有六，皆陳。凡介、行人、宰、

史皆有飧，以其爵等爲之牢禮之陳數。侯、伯、飧四牢，食三十有二，簋八、豆三十有二，鉶二十有八，壺三十有二，鼎簋十有二，腥二十有七，皆陳。凡介、行人、宰、史皆有飧，以其爵等爲之禮。子、男、飧三牢，食二十有四，簋六，豆二十有四，鉶十有八，壺二十有四，鼎簋十有二，牲十有八，皆陳。凡介、行人、宰、史皆有飧，以其爵等爲之禮。鉶，音刑。○飧，客始至，致小禮也。

公、侯、伯、子、男，飧皆飪一牢，其餘牢則腥。食者，其庶羞美可食者也。其設，蓋陳于楹外東西，不過四列。簋，稻粱器也。公十簋，堂上六，西夾、東夾各二也。侯、伯八簋，堂上四，西夾、東夾各二。子、男六簋，堂上二，西夾、東夾各二。豆，菹醢器也。公四十豆，堂上十六，西夾、東夾各十二。侯、伯三十二豆，堂上十二，西夾、東夾各十。子、男二十四豆，堂上十二，西夾、東夾各六。《禮器》曰：「天子之豆二十有六，諸公十有六，諸侯十有二，上大夫八，下大夫六。」以此《聘禮》差之，則

堂上之數與此同。鉶，羹器也。公鉶四十二，侯、伯二十八，子、男十八。公之數太懸絕，非差衰也。二十八，書或爲二十四，亦非也。其於衰，公又當三十，於言又爲無施。禮之大數，鉶少於豆，推其衰，公鉶四十二，宜爲三十八，蓋近之矣。則公鉶堂上十八，西夾、東夾各十，侯、伯堂上十二，西夾、東夾各八，子、男堂上十，西夾、東夾各四。壺，酒器也。其設於堂夾，如豆之數。鼎，牲器也。簋，黍稷器也。鼎十有二者，飪一牢，正鼎九與陪鼎三，皆設於西階前。簋十二者，堂上八，西夾、東夾各二。合言鼎簋者，牲與黍稷俱食之主也。牲，當爲「腥」，聲之誤也。腥，謂鼎，於侯、伯云「腥二十有七」，其故「腥」字也。諸侯禮盛，腥鼎有鮮魚、鮮腊，每牢皆九爲列，設于阼階前。公腥鼎三十六，腥四牢也；侯、伯腥鼎二十七，腥三牢也；子、男腥鼎十八，腥二牢也。皆陳，陳列也。飧門內之實，備于是矣。亦有車米禾芻薪。公飧五牢，米二十車，禾三十車。侯、伯四牢，米、禾皆二十車。子、男三牢，米十車，禾二十車。芻薪皆倍其禾，凡介、行人、宰、史，衆臣從賓者也。行人主禮，宰主具，史主書。皆有飧饗饌，尊其君以及其臣也，以其爵等爲之牢禮之陳數：爵卿也，則飧二牢，饗

餼五牢，大夫也，則飧大牢，饗餼三牢，士也，則飧少牢，饗餼大牢也。此降小禮，豐大禮也，以命數則參差難等，略於臣，用爵而已。○差，初佳反，又初宜反。衰，初危反。差衰，謂降殺等級也。凡諸侯之卿、

大夫、士爲國客，則如其介之禮以待之。

言其特來聘問，待之禮如其爲介時也。然則聘禮凡所以禮賓，是亦禮介。○疏曰：此介指上諸侯相見之介，若此聘禮則自有介。大聘則卿爲賓，大夫爲上介，士爲衆介。小問則大夫爲賓，介皆上也，故此歷言卿、大夫、士也。○《掌客》。○飧不致，不以束帛致命，草次饌，飧具輕。賓不拜，以不致命。沐浴而食之。自潔清，尊主國君賜也。記此，重者沐浴可知。○陸佃曰：「飧不致」者，設之而已。

厥明，訝賓于館。訝，五嫁反。○此訝下大夫

也。以君命迎賓謂之訝，訝，迎也，亦皮弁。賓皮弁聘，

至于朝，賓入于次。服皮弁者，朝聘主相尊敬也，諸

侯視朔皮弁服。入于次者，俟辨也。次在大門外之西，以帷爲之。○辨，蒲莧反，辨具之辨。○疏曰：「視朔皮弁

服」，本《玉藻》文。若朝天子，則用冕服。乃陳幣。有司入于主國廟門外，以布幕陳幣，如展幣焉。圭璋，賈人執纘而俟。卿爲上摯，大夫爲承摯，士爲紹摯，摯者出請事。摯，謂主國之君所使出接賓者也。紹，

繼也，其位相承繼而出也。主君，公也，則摯者五人；侯、伯也，則摯者四人；子、男也，則摯者三人。《聘義》曰：「介紹而傳命，君子於其所尊不敢質，敬之至也。」既知其所爲來之事，復請之者，賓來當與主君爲禮，爲其謙不敢斥尊者，啟發以進之。於是時，賓出次，直闕西，北面。上摯在闕東闕外，西面。其相去也，公之使者七十步，侯、伯之使者五十步，子、男之使者三十步。此旅摯耳，不傳命。上介在賓西北，東面。承摯在上摯東南，西面。各自次序而下。末介，末摯，旁相去三丈六尺。上摯之請事，進南面，揖賓俱前，賓至末介，上摯至末摯，亦相去三丈六尺。止揖而請事，還入告于公。天子、諸侯朝覲，乃命介紹傳命耳。其儀，各鄉本受命，反面傳而下，及末則鄉受之，反面傳而上。又受命傳而下，亦如之。此三丈六尺者，門容二徹參个，旁加各一步也。今文無「摯」。○所爲，于僞反，下「爲其」皆同。闕，魚列反。闕，音域。而上之上，時掌反。○疏曰：

此擯陳在主國大門外，主君之擯與賓之介東西相對，南北陳之。云「其位相承繼而出」者，從門向南陳爲繼而出。擯者人數本《周禮·大行人》文，但天子尊，得分別諸侯尊卑以待之。諸侯卑，故止據己國大小而爲擯數。注云「上擯在闕東闕外，西面」者，主位在東，故賓在闕西。上擯在闕東，以擯位並門東西面，故上擯亦西面向君也。「此旅擯耳」者，按《司儀》云「二問，旅擯」，鄭云：「旅，陳，陳擯介，不傳辭。」故鄭此云「不傳命」。然上下注又皆引「介紹而傳命」之語者，蓋交擯傳命則是賓介傳命。此旅擯傳命者，直是賓至末介下，對上擯傳本君之命也。其介相紹繼，則交擯、旅擯同，唯傳命不傳辭有異，是以《司儀》云「及將幣交擯」，鄭注亦引「介紹傳命」爲證，以其皆是相連繼於位也。云「上介在賓西北、東面。承擯在上擯東南、西面」，此謂賓直闕西北面，主君在門內南面，列位時云西北東南者，據賓西北望上介，介仍向正北陳之矣。上擯東南望承擯等，仍向正南陳之矣。不謂介西北邪陳，擯東南向邪陳也。云「各自次序而下」者，賓之介或七，或五，或三，從南向北次序上，次下至末介，主人之擯或五，或四，或三，從承擯向南上，次下至末擯也，東西相去三丈六尺。云「上擯之請事，進南面，揖賓俱前」者，謂上擯入向公前北面受命，出門

南面遙揖賓使前。擯者漸南行，賓至末介北東面，上擯至末擯南西面，東西相去亦三丈六尺。云「止揖而請事」者，二人俱立定，乃揖而請所爲來之事。注又舉朝覲禮以證交擯，然《覲禮》無迎法，饗食有迎法，故《齋僕》云：「朝覲宗遇饗食各以其等，爲車送逆之節。」云「其儀，各向本受命，反面傳而下」者，雖言各鄉本受命，非一時之事，先上擯入受命，出傳與承擯，承擯傳與末擯。此是上擯鄉本受命，反面傳而下，末介向末擯邊受命，傳與次介，次介傳與上介，上介傳與賓，是及其末則鄉受之，反面傳而上也。云「又受命傳而下，亦如之」者，此乃發賓傳向主君，一如前發主君傳而向下，故云「亦如之」。如此三迴爲交擯三辭，此則《司儀》云「諸公相爲賓，交擯，三辭」者也。「二徹參个」者，徹廣八尺，參个三八二十四，門容二丈四。云「傍加各一步也」者，此無正文，但人之進退周旋，不過再舉足一步，故門傍各空一步。丈二添二丈四尺，爲三丈六尺。公皮弁迎賓于大門內，大夫納賓。公不出大門，降于待其君也。大夫，上擯也，謂之大夫者，上序可知。從大夫總，無所別也。於是賓主人皆楊。○別，彼列反。楊，西歷反。○疏曰：「待其君」，則如《司儀》所謂公皮弁，交擯，車迎拜

辱，出大門。故此知是降也。《春秋》之義，卿稱大夫，《王制》云「上大夫卿」，是總無別也。《玉藻》云「不文飾也不楊」，又云「執龜玉襲」，下行聘時執玉皆襲，此未執玉，正是文飾之時，故賓主皆楊也。賓入門左，內賓位也。衆介隨入，北面西上少退，擯者亦入門而右，北面東上，上擯進相君。○相，息亮反。○疏曰：此注亦多約下入廟行聘享文。入門之後，每事皆上擯相君也。公再拜，南面拜迎。賓辟，不答拜。辟，音避，下以意推之。○辟位遠遁，不敢當其禮。○疏曰：奉君命使，不敢賓，故辟酬亢之禮。公揖人，每門每曲揖。每門輒揖者，以相人偶爲敬也。凡君與賓入門，賓必後君，介及擯者隨之，並而鴈行。既入，則或左或右，相去如初。《玉藻》曰：「君入門，介拂闥，大夫中楨與闥之間，士介拂楨。賓人不中門，不履闥。」此賓謂聘卿大夫也。門中，門之正也。不敢與君並由之，敬也。介與擯者鴈行，卑不踰尊者之迹，亦敬也。賓之介，猶主人之擯。○後，戶豆反，下同。行，戶郎反。楨，直庚反，《爾雅》謂之楔，門兩傍木也。○疏曰：諸侯三門，皋、應、路，則應門爲中門，左宗廟，右社稷。入大門東行即至廟門，其間得有每門者，諸侯有五廟，大祖之廟居中，二

昭居東，二穆居西，廟皆別門，門外兩邊皆有南北隔牆，隔牆中夾通門。若然，祖廟已西隔牆有三，則閤門亦有三。東行經三門乃至大祖廟，門中則相逼，入門則相遠，是以每門皆有曲即相揖，故每曲揖也。言「凡君與賓入門賓必後君」者，非只聘享向祖廟，若饗食向禰廟，燕禮向路寢，皆當然也。自「君入門」至「不履闥」，亦是通法。又曰：以一闥言之，君最近闥，亦拂之而過，上介則隨君而行，拂闥而過，所以與君同行者，臣自爲一列。主君既出迎賓，主君與賓並入，主君於東闥之內，賓於西闥之內，並行而入。上介於西闥之外，上擯於東闥之外，皆拂闥；次介、次擯皆大夫，中楨與闥之間，末介、末擯皆士，各自拂楨。如是，得君入中門之正，上擯、上介俱得拂闥，又得不踰尊者之迹矣。云「門中，門之正也」者，謂兩闥之間。云「卑不踰尊者之迹」者，士以大夫爲尊，大夫以上介爲尊，上介以君爲尊也。○今按：《江都集禮》：「廟制：諸侯立廟，宜在中門外之左。古者宗廟之制，外爲都宮，內各有寢廟，別有門垣，太祖在北，左昭右穆，以次而南。」與此疏之說不同，未知孰是。門闥之說，與《玉藻》注、疏亦不同，今見下記。及廟門，公揖人，立于中庭。公揖先人，省內事也。既則立於中

庭以俟賓，不復出，如此得君行一臣行二，於禮可矣。公迎賓大門內，卿、大夫、以下入廟門即位而俟之。○疏曰：「省內事」，謂如《曲禮》主人「請人爲席」之類。「君行一臣行二」者，見君行近臣行遠，尊者宜逸，卑者宜勞也。初命迎賓于館之時，卿、大夫、士固在朝矣。及賓來大門外陳介之時，主君之擯亦在大門外之位，君在大門內時，其卿、大夫不以無事亂有事，當於廟中在位矣。又當行事之時，公授宰玉，上受皮，宰夫授公几，皆不見此官等入廟之文，明此官已先在位而俟也。又曰：「君行一臣行二」，出《齊語》晏子辭。○今按：《齊語》無此辭，今見《曲禮》、《雜記》、《章實立接西塾》。接，猶近也。門側之堂謂之塾。立近塾者，已與主君交禮，將有出命，俟之於此。介在幣南，北面西上，上擯亦隨公入門東，東上，少進於士。○塾，音熟。近，附近之近。○疏曰：云「介北面西上」者，以上文入竟展幣時，賓立于幕東，故介東上。今此陳幣，賓在門西，故介西上，皆統於賓也。几筵既設，擯者出請命。有几筵者，以其廟受，宜依神也，賓至廟門，司宮乃于依前設之，神尊，不豫事也。席西上，上擯待而出請受賓所以來之命，重停賓也。至此言命，事彌至，言彌信也。《周禮》：

「諸侯祭祀席，蒲筵，績純，右彫几。」○依前之依，於豈反，本又作「宸」。績，戶內反。純，章允反。○疏曰：知在宸前者，按《司几筵》云：「大朝覲，大饗射，王位依前南鄉，設筵几。」《爾雅》云：「牖戶之間謂之宸。」但天子以屏風設於宸，諸侯無屏風爲異席，亦不同也。上人竟，士請事近郊，下大夫請行，皆是謙問，不敢以必來之己國不正言之，至此正問之而言請命，是其事至言信矣。《周禮·司几筵》文。彼諸侯祭祀，席三重，上更有「加莞筵紛純」，不引之者，文略可知。引之者，證此所設者設常祭祀之席也。賈人東面坐，啟櫝取圭，垂纁，不起而授上介。賈人鄉入陳幣，東面俟，於此言之，就有事也。授圭不起，賤不與爲禮也。不言楊襲者，賤不楊也。纁，有組繫也。○鄉，音向，下同。上介不襲，執圭，屈纁，授賓。上介北面受圭，進西面授賓。不襲者，以盛禮不在於己也。屈纁，并持之也。《曲禮》曰：「執玉，其有藉者則裼，無藉者則襲。」○疏曰：引《曲禮》者，彼記人據此絢組尺爲纁藉，不據韋皮衣木版畫以五采之纁藉也。云「執玉，其有藉者則裼」，據此賈人垂纁以授上介，上介不襲受之時也。云其「無藉者則襲」者，據此上介屈纁以授賓，賓襲受之時也。

記人直記楊襲之義，不論盛禮在己之意，故各舉一邊而言也。賓襲，執圭。執圭，盛禮而又盡飾，爲其相蔽敬也。《玉藻》曰：「服之襲也，充美也，是故尸襲，執玉龜襲也。」○盡，津忍反。○疏曰：臣於君所，合楊以盡飾。今既執圭以瑞爲敬，若又盡飾而楊，則掩蔽執玉之敬，故不得楊也。充，猶覆也。擯者入告，出辭玉。擯者，上擯也。人告公以賓執圭將致其聘命。圭，贊之重者，辭之，亦所以致尊讓也。納賓，賓入門左。公事自闕西。介皆入門左，北面西上，隨賓人也。介無事，止於此。今文無「門」。○疏曰：按《司儀》云：「諸公之臣，相爲國客。及將幣，每門止一相。及廟，唯君相入。」注云：「唯君相入。客臣也，相不入矣。」此介皆入不同者，彼云「每門止一相」，鄭云「絕行在後耳，非是全不入廟」。又云「唯君相入」者，謂前相君禮須入，故言之。臣相不前相禮，故不言人，其實皆入，與此同也。○今按：疏說與此不通，當闕。一。揖，君與賓也。入門將曲，揖，既曲北面，又揖，當碑，揖。○疏曰：前云「公揖入，立于中庭」，三分庭一在南，賓後獨入，得云「入門將曲，揖」者，謂公先在庭南面，賓入門將曲之時，既曲北面之時，主君皆向賓揖之，再揖，訖，主君乃東

面向堂塗，北行當碑，乃得賓主相向之揖，是以得君行一，臣行二。非謂賓入門時，主君更向內雷，相近而揖也。○今按：疏說蓋印本差誤，今以文義考之，更定如此。至于階，三讓。讓升。公升二等，先賓升二等，亦欲君行一，臣行二。○先，悉薦反。○疏曰：諸侯階有七等，公升二等，在上仍有五等，而得云「君行一臣行二」者，但君行少，臣行多，大判而言。賓升，西楹西，東面，與主君相鄉。擯者退中庭。鄉公所立處，退者以公宜親受賓命，不用擯相也。賓致命，致其君之命也。公左還北鄉，當拜。擯者進，進阼階西，釋辭於賓，相公拜也。公當楣再拜，楣，亡悲反。○拜，貺也。貺，惠賜也。楣謂之梁。賓三退，負序。三退，三逡遁也。不言辟者，以執圭將進授之。公側襲，受玉于中堂與東楹之間。側，猶獨也。言獨，見其尊賓也。佗日公有事，必有贊爲之者。凡襲于隱者，公序楹之間可知也。中堂，南北之中也。入堂深，尊賓事也。東楹之間，亦以君行一，臣行二。○見，賢遍反，下以意求之。楹，丁念反。○疏曰：按《大射》云：「公卒射，小臣正贊襲。」是其贊爲之也。

擯者退，負東塾而立。反其等位，無事。賓降，介逆出。逆出，由使。賓出，聘事畢。公側授宰玉，使藏之，授於序端。楊，降立。楊者，免上衣，見楊衣。凡當盛禮者，以充美爲敬，非盛禮者，以見美爲敬，禮尚相變也。《玉藻》曰：「裘之楊也，見美也。」又曰：「麕裘青犴褰，絞衣以楊之。」《論語》曰：「素衣，麕裘。」皮弁時或素衣，其裘同可知也。裘者爲溫，表之，爲其褻也。寒暑之服，冬則裘，夏則葛，凡禮楊者左，降立，俟享也，亦於中庭。古文「楊」皆作「賜」。○麕，音迷，或作「麕」，同。犴，五旦反，胡地野犬也。褰，本又作「褻」，詳又反。絞，戶交反。「爲溫」、「爲其」，皆去聲。禮，音但。○疏曰：凡服，四時不同。假令冬有裘，觀身禪衫，<sup>①</sup>又有襦袴，襦袴之上有裘，裘上有楊衣，楊衣之上又有上服、皮弁、祭服之等。若夏，則以絺綌，絺綌之上則有中衣，中衣之上復有上服、皮弁、祭服之等。若春、秋二時，則衣袷褶，袷褶之上加以中衣，中衣之上加以上服也。諸侯與其臣視朔與行聘禮，皆服麕裘，但君則麕裘還用麕裘，臣則不敢純如君，麕裘則青犴褰，楊衣君臣亦有異時。在國則君臣同素衣，聘時主君亦素衣，唯臣用絞衣爲楊也。《雜記》云：「朝服十五升

布。」皮弁亦天子朝服，與諸侯朝服同用十五升布，亦同素積以爲裳。白舄，臣用白屨也。

### 右行聘禮。○記：卿，大夫訝；大

夫，士訝；士皆有訝。訝，五嫁反。○卿，使者。

大夫，上介也。士，衆介也。訝，主國君所使迎待賓者，

如今使者護客。○疏曰：大聘使卿，主人使大夫訝。小

聘使大夫，主人使士訝。謂初行聘及饗、食、燕皆迎之，

故鄭君無所指定。○宗人授次，次以帷，少退

于君之次。主國之門外，諸侯及卿大夫之所使者，

次位皆有常處。○疏曰：上公九十步，侯、伯七十步，

子、男五十步，使其臣聘使，大聘、小聘又各降二等，其

次皆依其步數就西方而置之。未行禮之時，止於其中，

將行禮乃出也。○今按《周禮》，幕人掌相會共帷幕，掌

次掌張幕。此「宗人」字恐誤。○諸公之臣，相爲

國客。及將幣，旅擯，三辭，拜逆，客辟，三

揖。每門止一相，及廟，唯君相入。三讓，

①「觀」，賀本作「觀」。



客登，拜，客三辟，授幣，下出，每事如初之儀。客辟，逡巡不答拜也。唯君相人，客，臣也，相不

人矣。拜，主君拜客至也。客三辟，三退負序也。每事，享及有言。○疏曰：上經云「賓三退負序」，注云：

「不言辟者，以執圭將進授之。」此亦執圭將授，言辟者，《儀禮》是委曲行事，此《周禮》據大總而言，故不同也。

○《司儀》。○君入門，介拂闕。大夫中楨與

闕之間，士介拂楨。此謂兩君相見也。楨，門楔

也。君人必中門，上介夾闕，大夫介，士介厲行於後，示不相沿也。君若迎聘客，擯者亦然。○楔，古八、先結

二反。○疏曰：君「必中門」者，謂當楨闕之中。主君在

闕東，賓在闕西。主君上擯在君之後，稍近西而拂闕。

賓之上介在賓之後，稍近東而拂闕。大夫擯介各當君後，在楨闕之中央。賓人不中門，不履闕。辟尊

者所從也，此謂聘客也。闕，門限。公事自闕西，

聘享也。私事自闕東。覲面也。○疏曰：闕，謂門

之中央所豎短木，又謂之門楹。楨，謂門兩旁長木，所謂門楔也。○《玉藻》。○今按：此云門只有一闕，唯上

經賈疏獨云門有二闕，故中門之處及君與賓介行之次第皆有不同，未知孰是，當更考之。○大夫見於國

君，國君拜其辱。自外來而拜，拜見也；自內來而

拜，拜辱也。○疏曰：公在門左拜，是拜其辱也。○《曲

禮》。○君若迎拜，則還辟，不敢答拜。嫌與

君抗賓主之禮。迎拜，謂君迎而先拜之，《聘禮》曰：大

夫人門再拜，君拜其辱。○疏曰：聘，賓初至主國大門

外，主君迎而拜之。前經「賓入門左，公再拜，賓辟不答

拜」是也。故鄭引《聘禮》者，初入門，主君再拜其辱也。

○《曲禮》。○唯大聘有几筵。謂受聘享時也。

小聘輕，雖受于廟，不為神位。○禮：不拜至。以

賓不於是始至。今文「禮」為「體」。○疏曰：前者請行

禮，賓言俟間，故今不是始至也。○辭無常，孫而

說。孫，音遜。說，音悅。○孫，順也。大夫使，受命

不受辭，辭必順且說。辭多則史，少則不達。

史，謂策祝。辭苟足以達，義之至也。至，極

也。今文「至」為「砥」。○辭曰：「子以君命在

寡君，寡君拜君命之辱。」此贊君拜聘享辭也。

在，存也。○上介執圭如重，授賓。慎之也。

《曲禮》曰：「凡執主器，執輕如不克。」○疏曰：此常聘在主君廟門外，上介屈纁授賓之容。賓入門，皇，

升堂，讓，將授，志趨。皇，自莊盛也。讓，謂舉

手平衡也。志，猶念也。念趨，謂審行步也。孔子之執

圭，鞠躬如也，如不勝。上如揖，下如授，勃如戰色，足

蹠蹠如有循。古文「皇」皆作「王」。○勝，音升。上，示

掌反。蹠，所六反。○疏曰：授，謂授玉。志趨，謂念鄉

入門在庭，執玉徐趨，今當亦然。若降堂後趨，則疾而

翼如也。平衡，謂與心平，《曲禮》「國君則平衡」是也。

「足蹠蹠如有循」，謂徐趨。授如爭承，下如送，

君還而后退。爭，爭鬪之爭，重失隊也。而后，猶然

後也。○隊，直類反。○疏曰：授玉之時，如與人爭接

取物，恐失隊也。聘享每訖，君實不送，而賓之敬如君

送然。退，謂出廟門，更行後事，非出大門也。下階，

發氣，怡焉。再三舉足。又趨。發氣，舍息

也。再三舉足，自安定乃復趨也。至此云「舉足」，則志

趨卷豚而行也。孔子之升堂，鞠躬如也，屏氣似不息

者，出降一等，遲顏色怡怡如也。沒階趨進，翼如也。

○卷，去阮反。豚，大本反。○今按：「趨進」，「進」字

衍。卷豚，義見《曲禮》，卷，轉也，豚之言若有循。及

門，正焉。容色復故，此皆心變見於威儀。執圭

入門，鞠躬焉，如恐失之。記異說也。○皇，

且行。入門主敬，升堂主慎。復記執玉異說。

○凡執主器，執輕如不克。重慎之也。主，君

也。克，勝也。執主器，操幣圭璧，則尚左手，

行不舉足，車輪曳踵。重慎也。尚左手，尊左

也。車輪，謂行不絕地。○《曲禮》。

擯者出請，不必實事之有無。賓謁，奉束帛

加璧享，擯者入告，出許。許受之。庭實，皮則

攝之，毛在內，內攝之，人設也。攝，之涉反。

○皮，虎豹之皮。攝之者，右手并執前足，左手并執後足。

毛在內，不欲文之豫見也。內攝之者，兩手相鄉也。人設，

亦參分庭。在南，言則者，或以馬。凡君於臣，臣於君，麋

鹿皮可也。○并，必性反，或如字。○疏曰：《郊特牲》

云：「虎豹之皮，示服猛也。束帛加璧，往德也。」文無所

屬，則天子、諸侯皆得用之。「人設，參分庭一在南」者，見《昏禮》記。但此右首，彼左首者，《昏禮》象生，故與此異也。「凡君於臣」，謂使者歸，若使卿贈如覲幣，及食饗以侑幣，酬幣，庭實皆有皮。臣於君，謂私覲，庭實設四皮，及介用儼皮，此皆有麋鹿皮。賓入門左，揖讓如初，升致命，張皮。張者，釋外足，見文也。公再拜受幣，士受皮者自後右客。自，由也。從東方來，由客後西，居其左受皮也。執皮者既授，亦自前西而出。賓出，當之坐攝之。象受于賓。公側授宰幣，皮如入，右首而東。如入，左在前，皮右首者，變于生也。○疏曰：「如入左在前」者，皮四張，四人入門時，先者北面在左，西頭爲上，餘取皮向東者，亦左在前，向東爲次第也。云「皮右首者，變於生也」者，《曲禮》云：「執禽者左首。」《士相見》：「摯用雉，左頭奉之，下大夫執鴈，上大夫執羔，如執雉，皆左首。」

右享禮。○記：及享，發氣焉，盈容。

發氣，舍氣也。孔子之於享禮，有容色。衆介北面，

踣焉。踣，七羊反。○容貌舒揚。○疏曰：《曲禮》

云：「大夫濟濟，士踣踣。」○凡庭實，隨人，左先，皮馬相間可也。間，廁之也。○隨人，不並行也。間，猶代也。土物有宜，君子不以所無爲禮，畜獸同類，可以相代。古文「間」作「干」。○疏曰：云「左先」者，以皮馬以四爲禮，北面以西頭爲上，故左先入陳也。

云「君子不以所無爲禮」者，按《禮器》云：「天不生，地不養，君子不以爲禮。」言當國有馬而無虎豹皮，則用馬，或有虎豹皮并有馬，則以皮爲主而用皮也。賓之幣，唯馬出，其餘皆東。馬出，當從廐也。餘物皆東，藏之內府。○若君不見，君有疾若他故，不見使者。使大夫受。受聘享也。大夫，上卿也。自下聽命，自西階升受，負右房而立，賓降亦降。此儀如還圭然，而賓大夫易處耳。今文無「而」。

○疏曰：此時升降皆與下經還玉之儀同，但彼賓自大夫左受之，此大夫於賓左受之，此爲易處也。不禮。辟正主也。古文「禮」作「禮」。

聘于夫人用璋，享用琮，如初禮。如公立于中庭以下。

右聘享夫人。○辭：「君以社稷故，

在寡小君，拜。」此贊拜夫人聘享辭也。言君以社

稷故者，夫人與君體敵，不敢當其惠也。其卒亦曰：寡

君拜命之辱。○疏曰：「夫人與君敵體」，今夫人使致禮

來，主人不敢當，故云「以社稷故」，明夫人同主社稷。

彼國亦得聘之，其惠不由己也，然其卒亦自當之曰「寡

君拜命」。若下文問卿，則與君不敵，故敢當之，云「君

貺寡君，延及二三老」也。

若有言，則以束帛，如享禮。有言，有所告

請，若有所問也。《記》曰：「有故，則束帛加書以將命。」

《春秋》臧孫辰告糴于齊，公子遂如楚乞師，晉侯使韓穿來

言汶陽之田，皆是也，無庭實也。

右有言。○記：若有故，則卒聘，束

帛加書將命。百名以上書於策，不及百名

書於方。故，謂災患及時事相告請也。將，猶致也。

名，書文也，今謂之字。策，簡也。方，版也。○疏曰：

簡據一片，策是衆簡相連。鄭作《論語序》云：「《易》、

《詩》、《書》、《禮》、《樂》、《春秋》策皆尺二寸，《孝經》謙

半之，《論語》八寸策者，三分居一，又謙焉。」是其策之

長短。鄭注《尚書》：「三十字，一簡之文。」服虔注《左

氏》云：「古文篆書，一簡八字。」是一簡之字數。○今

按：此簡之長及字數皆未詳，或六經之策皆二尺四

寸，乃與下數合，當更考之。主人使人與客讀諸

門外。受其意，既聘享，賓出而讀之。不於內者，人稠

處嚴，不得審悉。主人，國君也。人，內史也。書必璽

之。○稠，直由反。處，昌慮反。璽，音徙。○疏曰：

《左傳》襄二十九年有璽書，杜注云：「璽，印也。」

賓者出請事，賓告事畢。公事畢。賓奉束

錦以請覲，覲，見也。鄉將公事，是欲交其歡敬也。不

用羔，因使而見，非特來。○疏曰：「鄉將公事」者，聘享是

也。此行私禮，爲交歡敬也。卿初仕見己君及卿，皆見以

羔。若諸侯相朝，其臣從君，亦得執羔見主君。《左傳》「公

會晉師于瓦」，「范獻子執羔」，即其事也。賓者入告，

出辭。客有大禮，未有以待之。○疏曰：「大禮」，謂聘

享。「未有以待之」，謂未禮賓，故止客請覲，而下文先行禮

賓也。①請禮賓，賓禮辭，聽命，擯者入告。告賓許也。宰夫徹几改筵。宰夫，又主酒食者也。將禮賓，徹神几，改神席，更布也。賓席東上。《公食大夫禮》曰：「蒲筵常，緇布純，加萑席尋，玄帛純。」此筵上，下大夫也。《周禮》曰：「筵國賓于牖前，莞筵紛純，加纁席畫純，左彤几」者，則是筵孤也。孤彤几，卿大夫其漆几與？○萑，音完。與，音餘。○疏曰：賓席東上，對前爲神而西上也。《司几筵》有五几，從上向下序之：天子玉几，諸侯彤几，孤彤几，卿大夫漆几，下有素几，喪事所用。公出迎賓以人，揖讓如初。公出迎者，己之禮更端也。○疏曰：前聘享俱是公禮，故聘訖而享，公不出迎。此禮賓是私禮，故云「更端」而出迎也。公升，側受几于序端。漆几也。今文無「升」。宰夫內拂几三，奉兩端以進。內拂几，不欲塵紛尊者。以進，自東箱來授君。○坩，蒲閤反。○疏曰：按《覲禮》：「几俟于東箱。」公東南鄉，外拂几三，卒，振袂，中攝之，進，西鄉。進就賓也。○疏曰：宰夫奉几兩端，故公中攝之，復擬賓用兩手自公手外取之故也。擯者告，告賓以公授几。賓進，

訝受几于筵前，東面俟。未設也。今文「訝」爲「梧」。○梧，五故反。○疏曰：未設者，俟公拜送乃設之。公壹拜送，公尊也。古文「壹」作「一」。○疏曰：賓再拜稽首，公乃壹拜，當空首，故云公尊也。○今按：此經云公拜送，而下文乃云賓答再拜，此疏反云「賓再拜而公乃拜」，誤矣。其言空首，則得之。賓以几辟。辟位遽遁。北面設几，不降，階上答再拜稽首。不降，以主人「禮未成也」。几，賓左几。○疏曰：「禮未成」者，《鄉飲酒》云：「啐酒，成禮也。」設几主爲啐酒，今未啐醴，故云「禮未成也」。「賓左几」者，對神右几也。宰夫實觶以醴，加枲于觶，面枋。枲，音四。枋，彼命反。○酌以授君也。君不自酌，尊也。宰夫亦洗升實觶，以醴自東箱來，不面擯，不訝授也。○擯，以涉及。○疏曰：宰夫上授几時，自下而升東箱，今當亦然。經不言者，略賤也。「不訝授者，蓋面向賓，宰夫來公傍側，並授與公，故「不面擯」也。公側受醴。將以飲賓。○飲，於鳩反。賓不

①「禮賓」，原作「賓禮」，據賀本改。

降，壹拜，進筵前受醴，復位，公拜送。醴，賓壹拜者，醴質，以少爲貴。○疏曰：《禮器》云禮有「以少爲貴者」，今賓於上下皆再拜稽首，獨此一拜，故鄭據大古之醴質，無玄酒配之，故壹拜，以少爲貴也。宰夫薦籩豆脯醢，賓升筵，擯者退負束塾。事未畢，擯者不退中庭，以有宰夫也。○疏曰：按上文擯者退當在中庭，今退負塾者，以有宰夫相已無事故也。若無宰夫，則在中庭矣。賓祭脯醢，以杞祭醴三，庭實設。庭實，乘馬。降筵，北面，以杞兼諸觶，尚櫛，坐啐醴。啐，七內反。尚，與上通。○降筵，就階上。○疏曰：以左手執觶，右手以杞，祭醴訖，降筵，北面，以杞兼并於觶，兩手捧之。「就階上」者，以鄉飲酒獻酬卒爵，各於其階，明此亦在西階之上。公用束帛，致幣也。言用，尊于下也，亦受之于序端。○疏曰：凡言用者，皆敬而尊之意，此君親用束帛禮賓，故「言用，尊于下也」。前公受几于序端，此亦當然。建柶，北面奠于薦東。槽禮不卒。①擯者進相幣，相，息亮反。○贊以辭。賓降，辭幣。不敢當公禮也。公降一等辭，辭賓降也。栗階升，

聽命，栗階，趨君命尚疾，不連步。○疏曰：凡栗階者，其始升亦連步，於上栗階不過二等。今云「不連步」者，謂不從下向上皆連步，其始升連步，則有之也。降拜，拜受。公辭，不降一等，殺也。○殺，所界反。升，再拜稽首，受幣，當東楹北面。亦訝受而北面者，禮主於己。己，臣也。○疏曰：前行聘享時，賓東面，主君西面訝授受，但以奉君命，故賓不北面。此以主君禮己，己臣也，故北面受也。上受几受醴亦是己之禮，以禮未成，故不北面也。退，東面俟。俟君拜也。不北面者，謙若不敢當階然。公壹拜，賓降也，公再拜。不俟公再拜者，不敢當公之盛也。「公再拜」者，事畢成禮也。○疏曰：此賓主俱謙，公本欲再拜，賓見公一拜則降，不敢當，公不止，遂再拜也。「事畢成禮」者，前受几及醴，公皆一拜。今事畢成禮，不可亦自尊，故送幣亦再拜也。賓執左馬以出，受尊者禮，宜親之也。效馬者并左右勒授之。餘三馬，主人牽者從出也。○勒，丁歷反。○疏曰：

①「卒」，原作「啐」，據賀本改。

《曲禮》云：「效馬效羊者右牽之。」效猶呈見，故謂牽馬人為效馬者也。上介受賓幣，從者訝受馬。從，才用反。○從者，士介。

右禮賓。○記：醴尊于東箱，瓦大

一，有豐。大，音泰。○瓦大，瓦尊。豐，承尊器，如

豆而卑。○卑，劉音婢。薦脯五臟，祭半臟，橫

之。臟，音職。○臟，脯如版然者，或謂之脰，皆取直

貌焉。○脰，大頂反。祭醴，再扱，始扱一祭，

卒再祭。扱，初洽反。○卒，謂後扱。主人之庭

實，則主人遂以出，賓之士訝受之。此謂餘

三馬也，左馬，賓執以出矣。士，士介從者。○諸公

之臣，相為國客。及禮，再拜稽首，君答

拜。禮，以體禮客。○疏曰：知「以體禮客」者，按上經

禮客用醴齊，異於君鬱鬯也。○《司儀》。

賓覲，奉束錦，總乘馬，二人贊，入門右，

北面奠幣，再拜稽首。不請不辭，鄉時已請也。覲

用束錦，辟享幣也。總者，總八轡牽之。贊者，居馬閒扣馬

也。入門而右，私事自闕右。奠幣再拜，以臣禮見也。贊

者，賈人之屬，介特覲也。○辟，音避。扣，音口。○疏

曰：賓總八轡在前牽之，二人贊者各居兩馬閒，各用左、右

手，手扣一匹也。「入門而右，私事自闕右」者，《玉藻》云

「公事自闕西」，鄭注云「聘享也」，「私事自闕東」，注云「覲

面也」。此行覲禮，故引之也。擯者辭，辭其臣。賓

出，事畢。擯者坐取幣，出，有司二人牽馬以

從，出門，西面于東塾南。將還之也。贊者有司受

馬乃出。凡取幣于庭，北面。○疏曰：云「贊者有司受馬

乃出」者，賓出之時，贊扣馬者未得出，待人受馬乃得出。

所以然者，幣可奠之於地，其馬不可散置。擯者請受，

請以客禮受之。賓禮辭，聽命，賓受其幣，贊者受馬。

牽馬，右之，入設。庭實先設，客禮也。右之，欲人居

馬左，任右手便也。於是牽馬者四人，事得申也。《曲禮》

曰：「效馬效羊者右牽之。」賓奉幣入門左，介皆入

門左，西上。以客禮入，可從介。公揖讓如初，

升，公北面再拜。公再拜者，以其初以臣禮見，新之

也。賓三退，反還負序，反還者，不敢與授主同。

振幣進授，當東楹，北面。不言君受，略之也。士受馬者，自前還牽者後，適其右，受。還，戶串反。○自，由也。適牽者之右而受之也。此亦並授者，不自前左，由便也，使其已授而去也。受馬自前，變於受皮。牽馬者自前西，乃出。自，由也。○疏曰：四馬並北面，牽馬者皆在馬西。士既受馬，其最西頭者便即出門，不須由馬之前。其次東三匹者，皆由西於馬前而出，故云「牽馬者自前西，乃出」，據三人而言也。賓降階東拜送，君辭，拜送幣于階東，以君在堂，鄉之。○疏曰：此言賓拜送幣者，私覲已物故也。前享幣不拜送者，致君命，非已物故也。拜也，君降一等辭。君乃辭之，而賓由拜，敬也。擯者曰：「寡君從子，雖將拜，起也。」此禮固多有辭矣，未有著之者，是其志而煥乎？未敢明說。○疏曰：唯此及《公食》皆著其辭，煥然可見。又云「未敢明說」者，謂餘辭固可以類推，但疑事無質，故上注每云其辭未聞也。栗階升，公西鄉，賓階上再拜稽首。成拜。公少退，爲敬。賓降出。公側授宰幣，馬出，廟中宜清。公降立。

右私覲。○記：私覲愉愉焉，愉，羊朱反。○容貌和敬。○疏曰：享時盈容，舒於聘時之戰色。私覲，又舒於盈容。出如舒鴈。威儀自然而有行列。舒鴈，鴈也。○疏曰：出又舒於愉愉也。○既覲，賓若私獻，奉獻將命。時有珍異之物，或賓奉之，所以自序尊敬也，猶以君命致之。○疏曰：臣統於君，雖是私獻已物，亦以君命致之，故云將命。擯者入告，出禮辭。辭其獻也。賓東面坐奠獻，再拜稽首。送獻不人者，奉物禮輕。○疏曰：若以私獻人，則是主於貨，傷害於享覲。擯者東面坐取獻，舉以入告，出，禮請受。東面坐取獻者，以宜並受也。其取之，由賓南而自後右客也。○疏曰：賓者從門東適南方，西行於賓北，東面坐取幣，入告於君，及出，一請於賓而受之。賓者與賓敵，故云「宜並受也」。賓固辭，公答再拜。拜受於賓也。「固」亦衍字。○疏曰：上文擯者禮請受，不云固，明知賓亦不固辭，故云衍也。擯者立于闕外以相拜，賓辟，相贊也。古文「闕」爲「蹇」。擯者授宰夫于



中庭。東藏之，既乃介覲。若兄弟之國，則問夫人。兄弟，謂同姓若昏姻甥舅有親者。問，猶遣也，謂獻也。不言獻者，變於君也。非兄弟，獻不及夫人。

○諸公之臣，相爲國客，私面。私面，私覲也。

鄭司農云：說私面，以《春秋傳》曰：楚公子棄疾見鄭伯，以其良馬私面。私獻，既覲，則或有私獻者。再

拜稽首，君答拜。《司儀》。

擯者出請，上介奉束錦，士介四人皆奉玉錦束，請覲。玉錦，錦之文織繻者也。禮有以少文爲貴者，後言束，辭之便也。○繻，音辱。擯者入告，

出許。上介奉幣儷皮，二人贊。儷，猶兩也。上

介用皮，變於賓也。皮，麋鹿皮。○儷，音麗。○疏曰：賓

用馬，今介用皮，故云變也。皆入門右，東上，奠

幣，皆再拜稽首。皆者，皆衆介也。贊者奠皮出。

擯者辭，亦辭其臣。介逆出。亦事畢也。擯者執

上幣，士執衆幣，有司二人舉皮，從其幣，出

請受。此請受，請于上介也。擯者先即西面位請之。釋

辭之時，衆執幣者隨立門中而俟。○疏曰：言「隨」者，謂相隨從，故《昏禮》記云：「納徵，執皮，隨入。」注云：「爲門中阨狹。」《記》云：「凡庭實，隨入，左先。」明此出時，亦隨出而立也。按《匠人》云：「廟門容大楹七个。」注：「大楹，牛鼎之楹，長三尺。」七个則二丈一尺。闕東，明不得並出也。○今按：「闕東」下當有脫字。委皮南面，擯者既

釋辭，執衆幣者進即位，有司乃得委之。南面，使其復入也。委皮當門。○復，扶又反。○疏曰：皮人右首右先，

故南面橫委於門中，當門北上，執皮者北面受之而乃入，便也。執幣者西面北上，擯者請受。請于上介也。

上言其次，此言其位，互約文也。○疏曰：此言西面北上，則上當有「北面東上」之文。下云士介覲幣時，「士三人東上，坐取幣，立」是也，此宜有「士執衆幣，立于南面」之文。

如是者，互文也。言約者，雖互見其文，文猶不備，上當言

「擯者執幣，士四人北面東上，坐取幣，從有司二人坐舉皮，從其幣出，隨立於門中。擯者出門，西面于東塾南，請受。

士執幣者進立擯南，西面北上，執皮者南面委皮於門中北上」，如是乃爲文備也。介禮辭，聽命，皆進，訝受

其幣。此言皆訝受者，嫌擯者一一授之。○疏曰：享幣

無門外授先後之法，故不言皆。上介奉幣，皮先，人

門左，奠皮。先皮者，介隨執皮者而人也。入門左，介

至揖位而立。執皮者奠皮，以有不敢授之義。古文重

「人」。○重，直用反。○疏曰：賓觀時，奉幣入門左，介皆

入門左，西上，公揖讓，升，賓至此待揖而後進，明此介亦至揖位而立。公再拜。拜中庭也，不受于堂，介賤也。

○疏曰：上云「降立」，別無更進退之文，自受享以來皆在

中庭也。介振幣，自皮西進，北面授幣，退復

位，再拜稽首，送幣。進者，北行，參分庭一而東行，

當君乃復北行也。○疏曰：介初在揖位，君在中庭，奠皮

近西，故介發揖位，經皮西北出三分一乃東行北向，當君乃

北行，至君所乃授幣。介出，宰自公左受幣。不側

受，介禮輕。○疏曰：宰自公左受，即是側。不云側者，當

有贊者於公受，轉授宰，故云「介禮輕」也。有司二人

坐舉皮以東。擯者又納士介，納者，出道人也。

○道，音導。士介入門右，奠幣，再拜稽首。終

不敢以客禮見。擯者辭，介逆出。擯者執上幣

以出，禮請受，賓固辭，禮請受者，一請受而聽之也。

賓爲之辭，士介賤，不敢以言通於主君。固，衍字，當如面

大夫也。○疏曰：按下士介面大夫時，「擯者執上幣出，禮

請受，賓辭」，無「固」字，故知此「固」衍字。公答再拜。

擯者出，立于門中以相拜。擯者以賓辭入告，還立

門中闕外，西面，公乃遙答拜也，相者贊告之。士介皆

辟，辟，於其東面位遠遁也。士三人東上，坐取幣，

立。俟擯者執上幣來也。擯者進，就公所也。宰夫

受幣于中庭，以東，使宰夫受于士，士介幣輕也。受

之于公左。賓幣，公側授宰，上介幣，宰受于公左，士介

幣，宰夫受于士。敬之差。執幣者序從之。序從者，

以宰夫當一一受之。

右介私覲。○記：君於士，不答拜

也。非其臣，則答拜之。不臣人之臣。○疏

曰：君於已士以其賤，故不答拜。然士介聘還亦旅答拜

者，敬其奉使而還。上相見禮答拜者，以其初爲士，敬

之故也。此他國之士，非已尊所加，故答之。○《曲

禮》。

擯者出請，賓告事畢。賓既告事畢，衆介逆道

賓而出也。○疏曰：「逆道」者，介爲首，賓爲尾也。知必逆出者，上經聘訖，下經聘夫人私覲，皆介逆出，此亦當然也。擯者人告，公出送賓。公出，衆擯亦逆道，紹擯及賓並行，間亦六步。及大門內，公問君。鄉以公禮將事，無由問也。賓至始入門之位，北面，將揖而出，衆介亦在其右，少退西上，於此可以問君居處何如，序殷勤也。時承擯，紹擯亦於門東，北面東上。上擯往來傳君命，南面。蘧伯玉使人於孔子，孔子問曰：「夫子何爲？」此公問君之類也。○蘧，其居反。○今按：所引《論語》「非聘事，意略相類耳。賓對，公再拜。拜其無恙。公拜，賓亦辟。○恙，羊亮反。○疏曰：《爾雅》：「恙，憂也。」公問大夫，賓對。公勞賓，賓再拜稽首，公答拜。勞，力到反，注及下同。○勞以道路之勤。公勞介，介皆再拜稽首，公答拜。賓出，公再拜送，賓不顧。公既拜，客趨辟，君命上擯送賓出，反告賓不顧，於此君可以反路寢矣。《論語》說孔子之行曰：「君召使擯，色勃如也，足躩如也。賓退，必復命曰：賓不顧矣。」○行，下孟反。躩，屈縛反，又驅碧反。○疏曰：按：

送賓用上擯，孔子爲下大夫而得爲上擯者，君使攝也。賓請有事於大夫，請，問，問卿也。不言問聘，聘亦問也，嫌近君也。上擯送賓出，賓東面而請之，擯者反命，因告之。○近，附近之近。○疏曰：從朝以來，行聘享，行禮賓之事，事已煩矣。今日即請，未可即行，故云反命因告之。告之使知而已，是以賓至館行勞賓介，及受饗餼，終日有事，明日乃行問卿之禮也。賓所請問，卿宜云有事于某子，故下《記》云「幣之所及皆勞」，鄭云「所以知及不及者，賓請有事，固曰某子某子」是也。公禮辭，許。禮辭，一辭。賓即館。小休息也。即，就也。

右公送賓問君勞賓介。○記：諸公之臣，相爲國客。出，及中門之外，問君，客再拜對，君拜，客辟而對。君問大夫，客對。君勞客，客再拜稽首，君答拜，客趨辟。①中門之外，即大門之內也。問君曰：「君不恙乎？」對曰：「使臣之來，寡君命臣于庭。」大夫曰：「二

①「客」字，原脫，據賀本補。

「三子不恙乎？」對曰：「寡君命使臣于庭，三子皆在。」勞客曰：「道路悠悠，客甚勞。」勞介則曰：「二三子甚勞。」問君，客再拜對者，爲敬慎也。○疏曰：「問君」以下，未知鄭所出何文。或云是孔子聘問之辭，未知然否。○《司儀》。○大夫、士見於國君，君若勞之，則還辟，再拜稽首。謂見君既拜矣，而後見勞也。《聘禮》曰：君勞使者及介，<sup>①</sup>君皆答拜。○疏曰：按《聘禮》勞賓之前不見賓，<sup>②</sup>先拜。此云賓「既拜矣」，謂賓初行私覲之時，已拜主君矣。在後始主君勞，故曰「既拜矣」，<sup>③</sup>而後見勞。引《聘禮》者，證君勞賓再拜之事。熊氏以爲唯云大夫、士，謂小聘大夫爲賓，士爲介也。今謂大聘、小聘皆然，故鄭引《聘禮》以證之。此大夫之中，則含卿也。○《曲禮》。○賓即館，訝將公命，使己迎待之命。○疏曰：按《秋官·掌訝》職云：「賓入館，次于舍門外，待事于客。」注云：「次，如今官府門外更衣處。待事于客，通其所求索。」將公命有事，通傳于君。又見之以其摯。又，復也。復以私禮見者，訝將舍於賓館之外，宜相親也。大夫訝者執鴈，士訝者執雉。

卿大夫勞賓，賓不見。以己公事未行，上介以賓辭辭之。○疏曰：聘享雖畢，而問大夫等事猶未行也。大夫奠鴈再拜，上介受。不言卿，卿與大夫同執鴈，下見于國君。《周禮》：凡諸侯之卿見朝君，皆執羔。○疏曰：《周禮》，約《掌客》文。勞上介，亦如之。

右卿大夫勞。○記：幣之所及皆勞，不釋服。以與賓接於君所，賓又請有事于己，不可以不速也。所不及者，下大夫未嘗使者也。不勞者，以先是賓請有事於己同類，既聞彼爲禮所及，則已往有嫌也。所以知及不及者，賓請有事，固曰某子某子。

君使卿韋弁，歸饗餼五牢。變皮弁，服韋弁，敬也。韋弁，韎韋之弁，兵服也。而服之者，皮、韋同類，取相近耳。其服蓋韎布以爲衣而素裳。牲，殺曰饗，生曰餼。今文「歸」或爲「饋」。○韎，音昧，又亡拜反。○疏曰：自此盡「皆再拜稽首」，論主君使卿歸饗餼於賓之事。

- ①「君」，原作「吾」，據元明本、寬文本、賀本改。
- ②「禮」字，原脫，據賀本補。
- ③「矣」，原作「已」，據賀本改。

《周禮·春官·司服》：「王之吉服有九」，祭服之下先云「兵事，韋弁服」，後云「視朝，皮弁服」，則韋弁尊於皮弁。韎，即赤色，以赤韋爲弁也。「皮、韋同類，取相近耳」者，有毛則曰皮，去毛熟治則曰韋，本是一物。云「其服蓋韎布以爲衣而素裳」者，此無正文，但正服則鄭注《司服》云：「韋弁，以韎韋爲弁，又以爲衣裳。」又晉卻至衣「韎韋之跗注」，鄭注解跗爲幅，以注爲屬，謂制韋如布帛之幅而連屬爲衣及裳。今此異者，鄭意此爲賓館於大夫、士之廟，既爲入廟之服，不可純如兵服，故爲韎布爲衣而素裳，《鄭志》：「兵服與皮弁同白焉，故言素裳，此亦同也。然無正文，故云「蓋」以疑之。上介請事，賓朝服禮辭。朝服，示不受也，受之當以尊服。有司人陳。入賓所館之廟，陳其積。○

疏曰：《記》云「卿館於大夫，大夫館於士」，皆是大夫、士之廟，下文又云「揖入及廟」，鄭據此而言，明陳之於廟。孔子又云：「公館與公所爲曰公館。」鄭注云：「公館，若今縣官宮也。」彼是正客館，彼此兩言之者，若朝聘使少，則皆於正客館，若使多，則有在大夫廟。饗，謂飪與腥。飪一

牢，鼎九，設于西階前，陪鼎當內廉，東面北上，上當碑，南陳；牛、羊、豕、魚、腊、腸胃，

同鼎，膚、鮮魚、鮮腊，設局鼎。臠，臠，臠，蓋陪牛、羊、豕。腊，音昔。臠，占螢反。鼎，亡狄反。臠，音香，牛臠也。臠，許云反，羊臠也。臠，許堯反，豕臠也。○陪鼎三牲，臠、臠、臠，臠陪之，庶羞加也。當內廉，辟堂塗也。腸胃次腊，以其出牛羊也。膚，豕肉也，唯燂者有膚。此饌先陳其位，後言其次，重大禮，詳其事也。宮必有碑，所以識日景、引陰陽也。凡碑引物者，宗廟則麗牲焉，以取毛血。其材，宮廡以石，窆用木。○臠，火各反，《字林》：「火郭反。燂，劉音尋，一本作「燂」，音潛。窆，彼驗反。○疏曰：按《公食大夫》，庶羞非正饌，故在正鼎後而言「加」也。「辟堂塗」者，正鼎九，雖大判繼階而言，其云于階前，則階東稍遠，故陪鼎猶當內廉而辟堂塗之內也。君子不食園腴，犬豕曰園，故牛羊有腸胃而無膚，豕則有膚而無腸胃也。豚亦無膚，以其皮薄故也。言「宮必有碑」者，按諸經云三揖者，鄭注皆云：「入門將曲揖，既曲北面揖，當碑揖。若然，《士昏》及此《聘禮》是大夫、士廟內皆有碑矣。《鄉飲酒》、《鄉射》言三揖，則庠序之內亦有碑矣。《祭義》云「君牽牲，麗于碑」，則諸侯廟內有碑明矣，天子廟及庠、序有碑可知。但生人寢內不見有碑，雖無文，兩君相朝，燕

在寢，豈不三揖乎？明亦當有碑矣。言「所以識日景」者，觀碑景邪正以知日之早晚也。「引陰陽」者，又觀碑景南北長短，十一月日南至，景南北最長，陰盛也；五月日北至，景南北最短，陽盛也。二至之間，景之盈縮，陰陽進退可知。「其材」，則雖無正文，然葬碑取縣繩緯暫時之間，往來運載，當用木而已。其宮廟之碑，取其妙好，又須久長，用石爲之。○今按：注內「景」下「引」字，疑當作「別」。又今禹墓窆石尚存，高五六尺，廣二尺，厚一尺許，其中有竅，以受紼引棺者也。然則窆亦用石矣。《檀弓》云：「公室視豐碑，三家視桓楹。」豈天子諸侯以石，故謂之碑，大夫以下用木，故謂之楹歟？廟中同謂之碑，則固皆謂石也。腥二

牢，鼎二七，無鮮魚、鮮腊，設于阼階前，西面，南陳，如飭鼎，二列。有腥者，所以優賓也。

○疏曰：按下文，士四人無腥，是不優之也。堂上八

豆，設于户西，西陳，皆二以並，東上，韭菹，

其南醯醢，屈。韭，音九。菹，莊居反。醢，他感反。

○户，室户也。東上，變于親食賓也。醢醢，汁也。屈，猶錯也。今文「並」皆爲「併」。○疏曰：醢醢西昌本，昌本西麋鬻，麋鬻西菁菹，菁菹北鹿鬻，鹿鬻東葵菹，葵菹東蜩醢，

蜩醢東韭菹。按《周禮·天官·醢人》：「朝事之豆有八：

韭菹、醢醢、昌本、麋鬻、菁菹、鹿鬻、茆菹、麋鬻」。按《公食大夫》公親食賓云：「宰夫自東房薦豆六，設于醬東，西上。」此云東上，是變於親食賓也。八簋繼之，黍其南

稷，錯。黍在北。○疏曰：繼豆以西陳之，次第亦與豆

同，故鄭云屈猶錯也。但豆之實各別，直次第陳之，則得相變，故云屈。簋惟有黍稷，雖屈陳之，亦閒雜必錯陳，使當行閒錯不相並，乃得相變，故鄭下注「凡屈錯要相變」是也。

六鉶繼之，牛以西羊、豕，豕南，牛以東羊、

豕。鉶，羹器也。○疏曰：此不言紼屈錯者，紼文自具，故

不言之也。按：此文上下紼、屈、錯，似各別，鄭此注「屈猶

錯」，《土喪禮》「陳衣於房中，南領，西上紼」，注云：「紼，猶屈。」又似不別者。云紼、屈二者，下手陳之少異。屈者，句

而屈陳之；紼者，直屈陳之，不爲句陳訖則相似。錯者，閒雜而陳之，與紼、屈同。兩簋繼之，梁在北。簋不次

簋者，梁稻加也。凡饌屈錯要相變。○疏曰：凡豆及簋之

數皆耦，兩自相對而陳之。屈錯不相對者，要得相變不使相當。其六鉶紼者，牛及豕二者相變，羊、豕相當不相變，以其大牢牛、羊、豕不耦，故羊、豕不得變也。○今按：六

鉶之位：東北牛，東南豕，北羊，南羊，西北豕，西南牛。是牛、豕常相變不相當，惟羊一物自相當，疏云「牛及豕二者相變」是也。而下乃云「羊、豕相當不相變」，未詳何謂。八壺設于西序，北上，二以並，南陳。壺，酒尊也。酒蓋稻酒、梁酒。不錯者，酒不以雜錯為味。○疏曰：下夫人歸禮，醢、黍、清各兩壺，此若與彼同，有黍各兩壺，止成六壺，各三壺則成九壺，皆不合八數，故知止是稻、梁，但無正文，故云「蓋」以疑之。知非稻、黍者，以稻、梁是加相對之物也。又曰：此陳饗、饌堂上及東西夾，簋有二十，簋六，上文設殯時，與此堂上及西夾，其對則簋十四、簋四。按《掌客》，設殯，公、侯、伯、子、男簋同十二，公簋十，侯、伯簋八，子、男簋六，又皆陳饗饌，其死牢如殯之陳，如何此中殯之簋數及饗、饌之簋數皆多於君？彼是君禮，自上下為差，此乃臣禮，或多或少白是一法，不可以彼相並。又此中致饗，饌於賓，醢醢百饗，米百筥，《周禮》上公饗筥百二十，侯、伯饗筥百，子、男饗筥八十。子、男少於此卿、大夫禮。禮或損之而益，此其類也。西夾六豆，設于西墉下，北上。韭菹，其東醢醢，屈，六簋繼之。黍其東稷，錯，四鉶繼之。牛以南羊，羊

東豕，豕以北牛，兩簋繼之，梁在西。皆二以並，南陳。六壺西上，二以並，東陳。東陳在北墉下，統於豆。○疏曰：「六豆」者，先設韭菹，其東醢醢，又其東昌本，南麋臠，麋臠西菁菹，又西鹿臠。此陳還取朝事之豆，其六簋，四鉶、兩簋、六壺東陳，其次可知，義復與前同也。饌于東方，亦如之，東方，東夾室。西北上。亦韭菹，其東醢醢也。○疏曰：云「西北上」者，則於東壁下南陳，西北有韭菹，東有醢醢，次昌本，次南麋臠，次西有菁菹，次北有鹿臠，亦屈錯也。云「西北上」者，恐東夾饌從東壁南陳，以東北為上，其西有醢醢，與西夾相對陳之，故云「西北上」。見雖東夾，其陳亦與西夾同。壺東上，西陳。亦在北墉下，統於豆。○今按：凡言「北上」者，皆南陳；「西上」者，皆東陳。此經「西夾六豆，設于西墉下，北上」，至兩簋下結云「皆二以並，南陳」，又云「六壺西上，東陳」。饌於東方，亦如之，西北上。壺東上，西陳，則是東西之饌，自簋以上皆南陳，惟壺東西陳之。疏於東夾之豆亦云「於東壁下南陳」，其布置之次序亦是南陳。下又云「雖東夾，其陳亦與西夾同」，凡此皆與經文合。而布置西夾之豆乃東陳之，又以簋鉶簋皆與壺東陳，不惟與經

文不合，而亦自相抵牾，殊不可曉，覽者詳之。醢醢百

甕，夾碑，十以爲列，醢在東。甕，鳥弄反。○夾

碑在鼎之中央也。醢在東，醢穀，陽也。醢，肉，陰也。○

疏曰：甕，瓦器，其容亦蓋。穀。《旅人》云：「簋實穀。」

又云：「豆實三而成穀。」四升曰豆，則甕與簋同受斗二升

也。餼二牢，陳于門西，北面東上。牛以西

羊、豕，豕西牛、羊、豕。餼，生也。牛羊，右手牽之。

豕，束之，寢右，亦居其左。○疏曰：按《特牲》云：「牲在其

西，北首，東足。」鄭注云：「東足者，尚右也。」與此不同者，

彼祭禮法用右胖，故寢左上右。《士虞》記云：「陳牲于廟

門外，北首西上，寢右。」鄭注：「寢右者，當升左胖也。」變

吉，故與此生人同也。米百筥，筥半斛，設于中

庭，十以爲列，北上。黍、粱、稻皆二行，稷四

行。筥，居呂反。行，戶郎反，下同。○庭實固當庭中，言

當中庭者，南北之中也。東西爲列，列當醢醢南，亦相變

也。此言中庭，則設碑近如堂深也。○疏曰：上享時庭實

入設，不言中庭，則在東西之中，其南北三分庭一在南。此

更言中庭，欲明南北之中也。知北上東西爲行者，以經云

「北上。黍、粱、稻皆兩行，稷四行」，若南北縱陳，止得言東西，不得言北上。何者？以黍、粱、稻及稷當行皆一種，無

上下故也。明橫陳，可知黍兩行在北，次粱兩行，次稻兩

行，次南稷四行。所以不用稻爲上者，稻粱是加，黍稷是

正，故黍爲上端，稷爲下端，以見上下，而稻粱居其間。「設

碑近如堂深也」者，陳鼎，上當其碑南向陳之，醢醢夾碑在

鼎中央，亦南向陳之，<sup>①</sup>今米爲筥在醢醢之南北之中，則碑

近北可知。言「堂深」者，猶若設洗南北以堂深相似，若然，

碑東當洗矣。門外米三十車，車乘有五簋，設

于門東爲三列，東陳。簋，劉色縷反，一音速，注「不

數」之數同，卷末放此。○大夫之禮，米禾皆視死牢，乘、

簋，數名也。乘有五簋，二十四斛也。簋，讀若「不數」之

數。今文「簋」或爲「逾」。○逾，劉音余，後同，《說文》大溝

反。○疏曰：上文飭一牢，腥二牢，是三牢死，米、禾皆三

十車，是視死牢也。下《記》云：「十斗曰斛，十六斗曰簋，

十簋曰乘。」若然，一乘十六斛，又有五簋爲八斛，總二十四

斛也。禾三十車，車三秬，設于門西，西陳。

①「南向」，原作「向南」，據賀本改。



秬，丁故反，四百秉爲秬，《字林》丈加反。○秬，數名也。三秬，千二百秉。薪芻倍禾。倍禾者，以其用多也。薪從米，芻從禾，四者之車皆陳，北轡。凡此所以厚重禮也。《聘義》曰：「占之用財不能均如此，然而用財如此其厚者，言盡之於禮也。盡之於禮，則內君臣不相陵而外不相侵，故天子制之而諸侯務焉爾。」○軻，丁留反，車轅。○疏曰：薪可以炊爨，故從米陳之。芻可以食馬，故從禾陳之。賓皮弁迎大夫于外門外，再拜，大夫不答拜。大夫，使者，卿也。揖入。及廟門，賓揖入。賓與使者揖而入。使者止執幣，賓俟之于門內，謙也。古者天子適諸侯，必舍於大祖廟；諸侯行，舍于諸公廟；大夫行，舍于大夫廟。○大祖之大，音泰。○疏曰：聘時主君揖入，立于庭，尊卑法。此賓與使者幣，故賓在門內，謙也。云「門內」，即寧下，故下賓問卿云：「及廟門，大夫揖入。」鄭注「入者，省內事也，既而俟于寧下」是也。《禮運》云：「天子適諸侯，必舍其祖廟。」下《記》云：「卿館于大夫，大夫館于士，士館于工商。」鄭注云：「不館於敵者之廟，爲大尊也。」以此差之，諸侯無正文。鄭注「舍于諸公廟」者，諸公，大國之孤。云「大夫行，舍于大夫廟」者，謂卿舍于大夫

也。若無孤之國，諸侯舍于卿廟也。○今按：疏內「者」下「幣」字，疑當作「敵」。大夫奉束帛，執其所以將命。人，三揖，皆行，皆猶並也。使者尊，不後主人。○疏曰：賓所在若主人，非謂君也。至于階，讓，大夫先升一等。讓不言三，不成三也。凡升者，主人讓于客三，敵者則客三辭，主人乃許升，亦道賓之義也。使者尊，主人三讓，則許升矣。今使者三讓，則是主人四讓也。公雖尊，亦三讓乃許升，不可以不下主人也。古文曰「三讓」。○下，戶嫁反，後「下君」、「下朝」皆同。○疏曰：賓三讓大夫即升，無三辭則不成三也。經雖言「讓，大夫先升」，大夫之讓不明，故鄭君兩言之，但使尊終先升。若主人三讓，使人亦三讓，主人又一讓，使者乃升，故鄭復言此也。按《周禮·司儀》云：「諸公之臣，相爲國客，大夫郊勞，三讓，登聽命。」又云「致饗餼如勞之禮」，即得行三讓之禮。此中「古文云三讓」，與彼合。鄭不從者，《周禮》舉其大率而云三讓，此《儀禮》據屈曲行事，觀此經直云「讓，大夫先升」，是主人或三讓，大夫無三讓，故不從古文也。公爲主人亦有三讓，公尊必三讓者，不下賓客，主人之義故也。賓從升堂，北面聽命。北面于階上也。大夫東面致

命，賓降階西，再拜稽首，拜餼亦如之。大夫以束帛同致饗餼也，賓殊拜之，敬也，重君之禮也。○疏曰：賓拜饗三牢，及庭實又別拜餼二牢，及門外米禾。大夫辭，升成拜，尊賓。受幣堂中西，北面。趨主君命也。堂中西，中央之西。大夫降，出。賓降，授老幣，出迎大夫。老，家臣也。賓出迎，欲償之。大夫禮辭，許，人，揖讓如初。賓升一等，大夫從升堂。賓先升，敵也，皆北面。庭實設，馬乘。乘，四馬也。賓降堂，受老束錦，大夫止。止不降，使之餘尊。賓奉幣西面，大夫東面，賓致幣。不言致命，非君命也。大夫對，北面當楣再拜稽首。稽首，尊君客也。致對，有辭也。○疏曰：既行敵禮，當頓首，今稽首，是拜君禮故也。禮常有辭，今文不具。受幣于楹間，南面，退，東面俟。賓北面授，尊君之使。○疏曰：凡敵體授受之義，授由其右，受由其左。賓再拜稽首送幣，大夫降，執左馬以出。出廟門，從者亦訝受之。賓送于外門外，再拜。明日

賓拜于朝，拜饗與餼，皆再拜稽首。拜謝主君之恩惠於大門外。《周禮》曰：「凡賓客之治，令訝聽之。」此拜亦皮弁服。○疏曰：上受時皮弁，故知此拜亦皮弁。按公食大夫，若不親食，使大夫致之，則賓受以朝服，及拜亦以朝服。○上介，饗餼三牢，飪一牢，在西，鼎七，羞鼎三。飪鼎七，無鮮魚，鮮腊也。賓、介皆異館。○疏曰：自此盡「兩馬束錦」，論主君使下大夫歸饗餼於上介之事。腥一牢，在東，鼎七，堂上之饌六。六者，賓西夾之數。西夾亦如之。筯及饔，如上賓。凡所不貶者，尊介也。言如上賓者，明此賓客介也。○疏曰：按下云「賓之公幣私幣皆陳」，上介公幣陳，是上介有不與賓同者，獨此饗餼大禮，西夾筯及饔如上賓，以其客此上介如上賓之禮也。餼一牢，門外米禾視死牢。牢十車，薪芻倍禾。凡其實與陳，如上賓。凡，凡飪以下。下大夫韋弁用束帛致之，上介韋弁以受，如賓禮，介不皮弁者，以其受大禮似賓，不敢純如賓也。償之兩馬束錦。疏曰：此下大夫使者受上介之償禮，如卿使者受賓償禮，當

庭同。○士介四人，皆餼大牢，米百筥，設于門外。牢米不入門，略之也。米設當門，亦十爲列，北上。牢在其南，西上。○疏曰：自此至「無償」，論使宰夫歸餼於衆介之事。云「牢在其南，西上」者，以此餼本設於庭，在門內，由士介賤不得入門，且賓與上介門東有米三十車，薪六十車，門西禾三十車，芻六十車，皆統門爲上，此餼本非門外東西之物，制不在門外東西，宜當門陳之，賓上介餼在米南，門西東上，明知此牢亦在米南，而西上爲異耳。宰夫朝服，牽牛以致之，執紼牽之，東面致命，朝服無束帛，亦略之。士介西面拜迎。<sup>①</sup>○紼，直軫反。○疏曰：上賓與上介米禾皆視死牢，且有芻薪米禾，此士直有生餼無死牢，則無芻薪米禾矣。士介朝服，北面再拜稽首，受，受，於牢東拜。自牢後適宰夫右受，由前東面授從者。○疏曰：前君使士受私覲之馬，適其右受之，知此亦在右受也。若然，君使士受私覲由前，此由牢後，與受馬不同者，牛畜擾馴與馬有異，故得從其後，適宰夫右取便也。無擯。既受，拜送之矣。明日，衆介亦各如其受之服，從賓拜於朝。○疏曰：知衆介明日禮如此者，以下夫人歸禮大略同。其注云：「於是乃言賓拜，明介從拜。」

然則君歸饗餼，介皆從拜可知。

右歸饗餼。○記：聘日，致饗。急歸大

禮。○上公饗餼九牢，其死牢如殯之陳，牽四牢，米百有二十筥，醢醢百有二十甕，車皆陳。車米眡生牢，牢十車，車秉有五簋；車禾眡死牢，牢十車，車三秬，芻薪倍禾，皆陳。侯、伯饗餼七牢，其死牢如殯之陳，牽三牢，米百筥，醢醢百甕，皆陳。米三十車，禾四十車，芻薪倍禾，皆陳。子、男饗餼五牢，其死牢如殯之陳，牽二牢，米八十筥，醢醢八十甕，皆陳。米二十車，禾三十車，芻薪倍禾，皆陳。凡介行人宰史，皆有饗餼，以其爵等爲之禮。饗餼，致大禮也。宰史，衆臣從賓者也。爵卿也饗餼五牢，大夫也饗餼三牢，士也則饗餼大牢也。凡諸侯之卿、大夫、

①「士」原作「上」，據寬文本、賀本改。

士爲國客，則如其介之禮以待之。<sup>①</sup> ○致饗餼如勞之禮。疏曰：同使卿，威儀進止皆如郊勞。○《司儀》。○十斗曰斛，十六斗曰簋，十簋曰秉，秉，十六斛。今江、淮之間，量名有爲簋者。今文「簋」爲「逾」。○量，音亮。二百四十斗。謂一車之米，秉有五簋。四秉曰筥，此秉謂刈不盈手之秉也。筥，積名也。若今萊、易之閒刈稻聚把，有名爲筥者。《詩》云：「彼有遺秉。」又云：「此有不斂穧。」○穧，才計反。○疏曰：穧，即此筥，即今人謂之一鋪、兩鋪也。十筥曰稷，十稷曰秬，四百秉爲一秬。一車之禾三秬，爲千二百秉。三百筥，三十稷也。古文「稷」作「縷」。○稷，宰孔反，《字林》子丁反。縷，音總。○賜饗，唯羹飪。筮一尸，若昭若穆。羹飪，謂飪一牢也。肉謂之羹。唯是祭其先，大禮之盛者也。筮尸若昭若穆，容父在。父在則祭祖，父卒則祭禰。腥餼不祭，則士介不祭也。士之初行，不釋幣于禰，不祭可也。古文「羹」爲「羔」，「飪」作「臠」。○臠，而甚反，劉音審。○疏曰：占者天子諸侯行載廟木

主，大夫雖無木主，亦以幣帛主其神，是以受主國饗餼，故筮尸祭然後食之，尊神以求福故也。昭穆言「若」者，以其昭穆不定故。僕爲祝，祝曰：「孝孫某，孝子某，薦嘉禮于皇祖某甫，皇考某子。」祝祝，上之六反，下之又反。○僕爲祝者，大夫之臣攝官也。○疏曰：若然，諸侯不攝官，使祝祝策矣，但《定四年》祝佗又云「嘉好之事，君行師從，卿行旅從」，則臣無事。若君到主國祭饗之時，得不攝官乎？但大夫使僕攝祝，則是本無祝官，與諸侯異耳。如饋食之禮。如《少牢饋食》之禮，不言少牢，今以大牢也。今文無「之」。○疏曰：按少牢禮有尊俎籩豆鼎敦之數，陳設之儀，陰厭陽厭之禮，九飯三獻之法，上大夫又有正祭於室，饋尸於堂，此等皆宜有之。至於致爵，加爵及獻兄弟、弟子等，固當略之矣。假器於大夫，不敢以君之器爲祭器。盼肉及廋、車。盼，音班。廋，所求反。○盼，猶賦也。廋，廋人也。車，巾車也。二人，掌視車馬之官也。賦及之，明辯也。古文「盼」作「紛」。

① 賀本於句下有「○掌客」。

○疏曰：此謂祭訖歸胙所及。廋人、巾車，見《周禮》。士無饗，無饗者無擯。謂歸餼也。○無饗者，無饗禮。士介無饗禮。○凡賓拜于朝，訝聽之。拜，拜賜也。唯稍不拜。○疏曰：按經云：

「賓三拜乘禽於朝，訝聽之，遂行，舍于郊。」又按《司儀》云：「明日客拜禮賜，遂行。」是臨行大小禮皆拜賜，則知唯米粟芻薪等不拜也。○歸大禮之日，既受饗

餼，<sup>①</sup>請觀。聘於是國，欲見其宗席之好，百官之富，若九尊大之焉。訝帥之，自下門入。帥，猶道也，從下門外人，游觀非正也。

賓朝服問卿，不皮弁，別於主君。卿，每國三人。

○疏曰：三卿皆以幣問之，其主國下大夫曾使向己國者，乃得幣問之，與卿異。卿受于祖廟，重賓禮也。祖，正

父也。○疏曰：大夫三廟：有別子者，立太祖廟，非別子者，并立曾祖廟，正父即祖廟也。今不受于太祖廟及曾祖廟，而受於祖廟者，以其天子受於文王廟，諸侯受於太祖廟，大夫下君，故受於王父廟。下大夫擯。無士擯者，

既接於君所，急見之。擯者出請事，大夫朝服迎

于外門外，再拜。賓不答拜，揖。大夫先入，每門每曲揖，及廟門，大夫揖入。入者，省內事也，既而俟于宁也。○宁，直吕反。○疏曰：大夫二門，人大門東行，即至廟門。未及廟門而有每門者，大夫三廟，每廟兩旁皆南北豎牆，牆皆閣門。假令王父廟在東，則有每門每曲之事。「省內事」者，《曲禮》云「請入爲席」是也。「俟于宁」者，門屋宁也。下云賓入「三揖，皆行」，鄭注云：「皆，猶並也。」是俟于宁，乃得與賓並行。「三揖不俟于庭」者，下君也。擯者請命。亦從人而出請，不几筵，辟君也。○疏曰：君受聘時，擯者從君而入，几筵既設，擯者出請。此擯者亦從卿而入省內，然後出請。庭實設四皮。麋鹿皮也。賓奉束帛入，三揖，皆行，至于階，讓。皆，猶並也。古文曰「三讓」。○疏說見前。賓升一等，大夫從，升堂，北面聽命。賓先升，使者尊。賓東面致命，致其君命。大夫降階西，再拜稽首。賓辭，升成拜，受幣堂中西，北面。於

①「饗」，原作「饗」，據賀本改。

堂中央之西受幣，趨聘君之命。賓降出，大夫降，授老幣，無擯。不擯賓，辟君也。

右問卿。○記：聘日，致饗。明日，

問大夫。不以殘日問人，崇敬也。古文曰「問夫人也」。大夫不敢辭，君初爲之辭矣。疏曰：賓

聘享訖，出大門，請有事於大夫。君禮辭許，是君初爲之辭，故卿不辭也。○注曰：此宜在「明日問大夫」下。

○今依注移入。○辭：「君貺寡君，延及二三

老拜。」此贊拜問大夫之辭。貺，賜也。大夫曰老。

○疏曰：是與君不敵，敢當之也。

擯者出請事，賓面，如覲幣。面，亦見也。

其謂之面，威儀質也。○見，如字。○疏曰：覲，面並文，其面爲質。若散文，面亦爲覲，故鄭《司儀》注云：「私面，私覲也。」賓奉幣，庭實從，庭實，四馬。入門右，

大夫辭，大夫於賓人，自階下辭迎之。賓遂左。見私

事也，雖敵，賓猶謙入門右，爲若降等然。《曲禮》曰：「客若降等，則就主人之階。主人興辭於客，然後客復就西階。」○疏曰：主人是大夫，客是士，降等法，士就東階。

庭實設，揖讓如初。大夫至庭中，旋並行。○疏曰：

迴旋與賓揖而並行北出。言「如初」者，大夫不出門，唯有庭中一揖，至碑又揖，再揖而已。大夫升一等，賓從之。大夫先升，道賓。大夫西面，賓稱面。稱，舉

也。舉相見之辭以相接。大夫對，北面當楣再拜，

受幣于楹間，南面退，西面立。受幣楹間，敵也。

賓亦振幣進，北面授。○疏曰：《曲禮》云：「鄉與客並，然

後受。」注云：「於堂上則俱南面。禮：敵者並授。」此是敵

者之常禮也。雖是敵者，於兩楹之間或有訝受者，皆是相尊敬之法。則此云大夫南面，賓北面授，雖是敵禮，是尊大

夫，故訝受。賓當楣再拜送幣，降，出。大夫

降，授老幣。

右賓私面於卿。

擯者出請事，上介特面，幣如覲，介奉

幣。特面者，異於主君，士介不從而人也。君尊，衆介始

覲，不自別也。上賓則衆介皆從之。○疏曰：介初覲主君之時，不敢自尊，別與衆介同執幣而入。今私面於鄰國卿，不與衆介同而特行禮焉。皮，二人贊，亦儷皮也。人

門右，奠幣，再拜。降等也。大夫辭，於辭上介則出。擯者反幣。出還于上介也。庭實設，介奉幣入，大夫揖讓如初。大夫亦先升一等。今文曰「入設」。介升，大夫再拜受。亦於楹間南面而受。介降拜，大夫降辭。介升，再拜送幣。介既送幣，降出也。大夫亦授老幣。擯者出請，衆介面，如覲幣。入門右，奠幣，皆再拜。大夫辭，介逆出。擯者執上幣出，禮請受，賓辭，賓亦爲士介辭。○爲，于僞反。大夫答再拜。擯者執上幣，立于門中以相拜，士介皆辟，老受擯者幣于中庭，士三人坐取群幣以從之。擯者出請事，賓出，大夫送于外門外，再拜，賓不顧。相，息亮反。○不顧，言去。擯者退，大夫拜辱。拜送也。

右介私面於卿。

下大夫嘗使至者，幣及之。嘗使至己國，則以幣問之也。君子不忘舊。上介朝服，二介，問下

大夫，下大夫如卿受幣之禮。上介，三介，下大夫使之禮也。○疏曰：據此篇，大聘使卿五介，小聘使大夫三介。若大國之卿七介，小聘使大夫五介；小國之卿三介，小聘使大夫一介也。《曲禮》云：「儼人必於其倫。」故問下大夫還使上介，是各於其爵易以相尊敬者也。其面，如賓面于卿之禮。

右賓問嘗使者。○記：幣之所及皆勞，不釋服。以與賓接於君所，賓又請有事于己，可以不速也。所不及者，下大夫未嘗使者也。不勞者，以先是賓請有事於己同類，既聞彼爲禮所及，則已往有嫌也。所以知及不及者，賓請有事，固曰某子某子。

大夫若不見，有故也。君使大夫各以其爵爲之受，如主人受幣禮，不拜。各以其爵，主人卿也則使卿，大夫也則使大夫。不拜，代受之耳，不當主人禮也。

右主國大夫有故。○記：既將公事，

賓請歸。謂已問大夫，事畢請歸，不敢自專，謙也。主國留之，饗食燕獻無日數，盡殷勤也。○賓既將

公事，復見訝以其摯。既，已也。公事，聘享問大夫。復，報也。使者及上介執鴈，群介執雉，各以見其訝。○疏曰：訝者鄉以贊私見己，今還私以贊報見之。知「執鴈」者，上文主國卿大夫勞賓同執鴈，則此使者及上介同執鴈可知。「各以見其訝」者，謂使者見大夫之訝者，上介見士之訝者，士介亦見士訝者。

夕，夫人使下大夫韋弁歸禮。今文「歸」作

「饋」，下及《記》同。○夕，問卿之夕也。使下大夫，下君也。君使之。云「夫人」者，以致辭當稱寡小君。○疏曰：

按《春秋公羊傳》何休注云：「禮，婦人無外事。」故知此使下大夫歸禮者，是君使之可知。堂上籩豆六，設于

戶東，西上，二以並，東陳。籩豆六者，下君禮也。

臣設于戶東，又辟饌位也。其設，脯其南，醢，六籩六豆。

○疏曰：辟君饌位，白室戶東爲首，二以並，東陳。先於北

設脯，即於脯南設醢，又於醢東設脯，以次屈而陳之，皆如上也。壺設于東序，北上，二以並，南陳。醲、

黍、清，皆兩壺。醲，所九反。○醲，白酒也。凡酒，稻

爲上，黍次之，梁次之，皆有清、白。以黍間清、白者，互相備，明三酒六壺也。先言醲，白酒尊，先設之。○問，閒廟

之閒。大夫以束帛致之，致夫人命也。此禮無牢，下

朝君也。賓如受饗之禮，儻之乘馬束錦。上

介四豆、四籩、四壺，受之如賓禮。四壺，無稻酒

也。不致牢，下於君也。○疏曰：「無稻酒」者，從上去之

也。儻之兩馬束錦。明日，賓拜禮於朝。於是

乃言賓拜，明介從拜也。今文「禮」爲「體」。○從，才用反。

○疏曰：於上介受禮，後始言賓拜，明介從拜可知也。

右夫人歸禮於賓。○記：聘日，致

饗。明日，問大夫。夕，夫人歸禮。與君異

日，下之也。今文「歸」作「饋」。

大夫餼賓大牢，米八筐。其陳於門外，黍、梁

各二簋，稷四簋，二以並，南陳，無稻，牲陳於後，東上。不

饌於堂庭，辟君也。○疏曰：云「牲陳於後東上」者，此與

君餼士介略同。餼士介時，不言門東西，鄭注云「當門」，則

知此門外亦當門。君餼賓，米在庭，牲在門西，雖不正當米

南，亦得牲在其南，故知此牲陳亦在米南可知。知「東上」

者，君餼賓時，陳於門西東上也。賓迎再拜，老牽牛

以致之，賓再拜稽首受。老退，賓再拜送。



老，室老，大夫之貴臣。○疏曰：按《喪服》傳曰：「室老，士貴臣，其餘皆衆臣也。」鄭注云：「室老，家相也。士，邑宰也。」上介亦如之。衆介皆少牢，米六筐，皆士牽羊以致之。米六筐者，又無梁也。士亦大夫之貴臣。○疏曰：士，邑宰，見上。

右大夫餼賓介。○記：凡餼，大夫黍梁稷，筐五斛。謂大夫餼賓，上介也。器寡而大，略。○疏曰：君歸饗餼于賓與大夫，介筭米小而多者，是尊者所致，以多器爲榮。今大夫致禮於賓介，器寡而大，是略之於卑者也。

公於賓，壹食，再饗。食，音嗣，注及下同。○饗，謂享大牢以飲賓也。《公食大夫禮》曰：「設洗如饗。」則饗與食互相先後也。古文「壹」皆爲「一」。今文「饗」皆爲「鄉」。○亨，普庚反。飲，於鳩反。○疏曰：公、侯、伯、子、男，大聘使卿，主君一食再饗，小聘使大夫，則主君一食一饗。若然，按《掌客》：「子、男一食一饗，子、男之卿再饗。多於君者，以其君臣各自相望，不得以君決臣也。饗禮與食禮同，食禮既享大牢，明饗禮享大牢可知。但以食禮無酒，饗禮有酒，故以飲賓言之。此經先言食，後言饗，

則食在饗前。《公食》言設洗如饗禮，則饗在食前。此其先後出於主君之意，故不定也。燕與羞，俶獻，無常數。俶，昌叔反，始也。○羞，謂禽羞鴈鷺之屬，成熟煎和也。俶，始也。始獻，四時新物，《聘義》所謂「時賜無常數」，由恩意也。古文「俶」作「淑」。○鷺，音木。賓介皆明日拜于朝，上介壹食壹饗。饗食賓，介爲介，從饗獻矣，復特饗之，客之也。若不親食，使大夫各以其爵，朝服致之以侑幣，如致饗，無償。侑，音又。○君不親食，謂有疾及他故也。必致之，不廢其禮也。致之必使同班，敵者易以相親敬也。致禮於卿，使卿，致禮於大夫，使大夫，非必命數也。無償，以己本宜往。古文「侑」皆作「宥」。○疏曰：饗餼之等不宜召賓，故君使人致禮賓，則償使者。此饗食之禮，主君無故，合速賓之來就主君，入廟，賓無償禮。今主君有故，往致於賓，<sup>①</sup>亦無償，故云「本宜往」。致饗以酬幣，亦如之。酬幣，饗禮酬賓勸酒之幣也，所用未聞也。禮幣束帛乘馬，亦不是過

①「往」，原作「生」，據賀本改。

也。《禮器》曰「琥璜爵」，蓋天子酬諸侯。○琥，音虎。

### 右食饗燕羞獻。○記：凡諸侯之禮，

上公乘禽日九十雙，殷膳大牢，以及歸，三饗三食三燕。<sup>①</sup>若弗酌，則以幣致之。侯、伯之禮，乘禽日七十雙，殷膳大牢，三饗再食再燕。<sup>②</sup>子、男之禮，乘禽日五十雙，壹饗壹食壹燕。<sup>③</sup>介、行人、宰、史，唯上介有禽獻。凡諸侯之卿、大夫、士爲國客，則如其介之禮以待之。乘，繩證反，注同。

○乘禽，乘行群處之禽，謂雉鴈之屬，於禮以雙爲數。殷，中也，中又致膳，示念賓也。若弗酌，謂君有故不親饗食燕也。不饗，則以酬幣致之。不食，則以侑幣致之。○疏曰：「中又致膳者，蓋於牢禮之外，見賓中間未去，故又示無倦也。」<sup>④</sup>

### ○饗食，如將幣之儀。

饗食，亦謂君不親，而使大夫以幣致之。○疏曰：知饗食是君不親者，以其與還圭共文，同是致之也。致饗及還玉，賓主皆是大夫，其將幣，主君與使臣行禮，大概雖同，而迎拜升降亦不盡如之也。○《司儀》。

其介爲介。饗賓有介者，賓尊，行敵禮也。○疏

曰：饗賓於廟之時，還以其上介爲介，上經上介一食一饗，則是從賓爲介之外，復別饗也。○凡致禮，皆

用其饗之加籩豆。凡致禮，謂君不親饗賓及上

介，以酬幣致其禮也。其，其賓與上介也。加籩豆，謂

其實也，亦實於簠簋。饗禮今亡。○疏曰：按上經賓介

皆有食饗，唯士介不言，故知其中唯有賓與上介。各

以其爵朝服。此句宜在「凡致禮」下。○今依注移

入。○大夫來使，無罪，饗之，樂與嘉賓爲禮。

過則餼之。餼之，腥致其牢禮也。<sup>⑤</sup>其致之辭，不云

君之有故耳。《聘義》曰：「使者聘而誤，主君不親饗食，

所以愧厲之也。」不言罪者，罪將執之。○疏曰：《春秋》

之義，聘賓有罪，皆執之。○有大客後至，則先

①「三食」二字，原脫，據賀本補。

②「再食」二字，原脫，據賀本補。

③「壹食」二字，原脫，據賀本補。

④賀本於句下有「○掌客」。

⑤「腥」，賀本作「生」。

客不饗食，致之。卑不與尊者齊禮。○燕則上介爲賓，賓爲苟敬。饗食，君親爲主，尊賓也。燕，私樂之禮，崇恩殺敬也。賓不欲主君復舉禮事禮已，于是辭爲賓，君聽之。從諸公之席，命爲苟敬。苟敬者，主人所以小敬也。更降迎其介以爲賓。介，大夫也。雖爲賓，猶卑於君，君則不與亢禮也。主人所以致敬者，自敵以上。○疏曰：饗食在廟，爲賓，故君親爲主。至後燕禮在寢，又以醉爲度，崇於恩，殺於敬，故賓辭而使介爲賓也。阼階西近主，爲位諸公坐位，故云「小敬」，對戶牖南面爲大敬。介在廟門內西北面，降至庭迎之。云「不與，亢禮也」者，略取《燕義》文，解君不親爲獻主而使宰夫之意也。云「主人所以致敬者，自敵以上」者，謂兩君相見，兩大夫，兩士以上，則主人親獻也。宰夫獻。爲主人代公獻。○既致饗，旬而稍，宰夫始歸乘禽，日如其饗餼之數。稍，所教反。○稍，稟食也。乘，謂乘行之禽也，謂鴈鷺之屬。其歸之，以雙爲數。其，賓與上介也。古文「既」爲「餼」。士中日則二雙。中，猶閒也。不一日一雙，大寡不敬也。凡獻，執一雙，委其餘于面。執

一雙，以將命也。面，前也，其受之也。①上介受以人告之，士舉其餘從之，賓不辭，拜受于庭。上介執之，以相拜于門中，乃入授人。上介受，亦如之。士介拜受于門外。○疏曰：自「上介受」至「授人」，約私獻文。云「上介受亦如之」者，以其受饗餼之時，上介受已如賓禮，故知受乘禽亦如賓也。云「士介拜受於門外」者，以其受餼在門外，此受乘禽在門外可知。禽羞，俶獻，比。比，放也。其致之，禮如乘禽也。禽羞，謂成孰有齊和者。俶獻，四時珍美新物也。俶，始也，言其始可獻也。《聘義》謂之時賜。

大夫於賓，壹饗壹食。上介，若食若饗。若不親饗，則公作大夫致之以酬幣，致食以侑幣。作，使也。大夫有故，君必使其同爵者爲之致之。列國之賓來，榮辱之事，君臣同之。○疏曰：此直言饗食，不言燕，其實亦有也。

### 右大夫饗食賓介。

君使卿皮弁還玉于館，玉，圭也。君子於玉

①「也」，原作「止」，據元明本、寬文本、賀本改。

比德焉。以之聘，重禮也。還之者，德不可取於人，相切厲之義也。皮弁者，始以此服受之，不敢不終也。賓皮弁襲，迎于外門外，不拜，帥大夫以入。迎之不拜，示將去，不純爲主也。帥，道也。今文曰「迎于門外」。古文「帥」爲「率」。○疏曰：上歸饗餼時，賓拜迎。大夫升自西階，鉤楹。鉤楹，由楹內，將南面致命，致命不東面，以賓在下也。必言鉤楹者，賓在下，嫌楹外也。○疏曰：上歸饗餼時，大夫東面致命，行聘時，賓亦東面致命。初行聘時在堂上楹內，故今嫌在楹外也。賓自碑內聽命，升自西階，自左，南面受圭，退負右房而立，聽命於下，敬也。自左南面，右大夫且並受也。必並受者，若鄉君前耳。退，爲大夫降遽遁。今文或曰「由自西階」，無「南面」。○鄉，許亮反。○疏曰：賓受禮時，公用束帛，賓西階上聽命，歸饗餼時，賓阼階上聽命，此特於下聽命，<sup>①</sup>故云敬也。本國君前受圭璋時，北面並受，今還南面並受，面位不同，並受不異。「退爲大夫降遽遁」者，以大夫降爲之遽遁，而退因即負右房南面而立，大夫上直有東房西室，天子諸侯左右房，今或不在大夫廟而舍於正客館，

故有右房也。○今按：或舍於大夫廟中，則當退於堂之西北，負室牖而立。大夫降中庭，賓降自碑內，東面，授上介于阼階東。大夫降出，言中庭者，爲賓降節也。授於阼階東者，欲親見賈人藏之也。賓還阼階下西面立。上介出請，賓迎，大夫還璋，如初人。出請，請事於外以入告也。賓雖將去，出入猶東，唯升堂由西階。凡介之位，未有改也。賓謁迎，大夫賄用束紡。賄，呼罪反。紡，敷罔反。○賄，予人財之言也。紡，紡絲爲之，今之縛也，所以遺聘君，可以爲衣服，相厚之至。○縛，息絹反，一作「縛」，劉音須，《說文》云：「白鮮色也，<sup>②</sup>居椽反。《聲類》以爲今正絹字。○疏曰：此未知何用之財，若是報享之物，不應在禮玉之上。今言「束紡」者，以其上圭璋是彼國之物，下云禮玉束帛，報聘君之享物。彼君厚禮於此，此亦當厚禮於彼，故特加此束紡，是以鄭云相厚之至也。鄭注《周禮》云：「布帛曰賄。」是賄爲財物，與人則謂之賄。又注《周禮》·內司服云：「素紗者，今之白縛

①「特」，原作「時」，據賀本改。

②「白鮮色」，原作「縛鮮支」，據賀本改。

也。」則此束紡者，素紗也，故據漢法況之。禮玉、束帛、乘皮，禮，禮聘君也，所以報享也。亦言玉璧可知也。今文「禮」皆作「禮」。○疏曰：上文聘賓行享之時，束帛加璧，束錦加琮，<sup>①</sup>今報享物，亦有璧琮致之，故云「亦言玉璧」，可知此玉則琮也，以其經言玉，故以玉言之。若然，經言束帛，兼有束錦矣。皆如還玉禮。大夫出，賓送，不拜。

右還玉報享。○記：賄，在聘于賄。

賄，財也。于，讀曰爲。言主國禮賓，當視賓之聘禮而爲之財也。賓客者，主人所欲豐也。若苟豐之，是又傷財也。《周禮》曰：「凡諸侯之交，各稱其邦而爲之幣，以其幣爲之禮。」古文「賄」皆作「悔」。○稱，尺證反。○

無行，則重賄反幣。無行，謂獨來，復無所之也。

必重其賄與反幣者，使者歸，以得禮多爲榮，所以盈聘君之意也。反幣，謂禮玉、束帛、乘皮，所以報聘君之享禮也。昔秦康公使西乞術聘于魯，辭孫而說，襄仲曰：

「不有君子，其能國乎？」厚賄之。此謂重賄反幣者也。今文曰「賄反幣」。○疏曰：「獨來復無所之」，謂特來，

非歷聘也。歷聘，則吳公子札聘於上國，聘齊、聘魯是也。○客將歸，使大夫以其束帛反命于館。爲書報也。明日，君館之。既報，館之，書問尚疾也。○疏曰：昨日爲書報之，今日君始就館送客，故云「書問尚疾也」。○還圭，如將幣之儀。還以本圭，故云如也。<sup>②</sup>○疏見饗食下。

公館賓，爲賓將去，親存送之，厚殷勤，且謝聘君之意也。公朝服。○疏曰：初在廟行聘享尊重，故皮弁拜謝稍輕，故朝服。賓辟，不敢受主國君見已於此館也。此亦不見，言辟者，君在廟門，敬也。凡君有事於諸侯臣之家，車造廟門乃下。○造，七到反。○疏曰：上文賓即館，卿大夫勞賓，賓不見，以其不見，故遣上介聽命，故知此賓亦不見。凡言「辟」者，將見而不見則謂之辟。此本不見而言辟者，以其君在廟門外，雖不見而言辟，故鄭云「敬也」。按《公食》記云「賓之乘車在大門外」，又《曲禮》云「客車不入大門」，以此言之，君車入大門矣。大夫、士有兩門，入門

① 「錦」，原作「帛」，據賀本改。

② 「也」下，賀本有「○司儀」。

東行，則是廟門矣。既至廟門，須與賓行禮。上介聽命。聽命於廟門中，西面，如相拜然也。擯者每贊君辭，則曰：「敢不承命，告于寡君之老。」○疏曰：按前受士介幣之時，「賓固辭，公答再拜，擯者出，立于門中以相拜」，注云：「立門中闕外，西面。」此中賓不見，使介聽命，明如相拜，然取其視外，便也。必知在「門中西面」者，以其君來如賓禮東面，介西面向公可知。《玉藻》云：「擯者曰：寡君之老。」注云：「擯者之辭，主於見他國君。」今上介當擯者之處，故知告于賓，稱告于寡君之老。聘享，夫人之聘享，問大夫，送賓，公皆再拜。拜此四事，公東面拜，擯者北面。公退，賓從，請命于朝。賓從者，實為拜主君之館己也。言請命者，以己不見，不敢斥尊者之意。○為，于僞反。公辭，賓退。辭其拜也。退，還館裝駕，為旦將發也。《周禮》曰：「賓從，拜辱于朝，明日，客拜禮賜，遂行。」○疏曰：彼注云：「禮賜者，謂乘禽。」此見下文。

右主君就賓館。○記：君館客，客辟，介受命，遂送，客從，拜辱于朝。君館客

者，客將去，就省之，盡殷勤也。遂送，君拜以送客。明日，客拜禮賜，遂行，如人之積。積，子賜反。○禮賜，謂乘禽，君之加惠也。如人之積，則三積從來至去。○《司儀》。○又拜送。拜送賓也，其辭蓋云「子將有行，寡君敢拜送」。宜承上「君館」之下。○今依注移入。

賓三拜乘禽於朝，訝聽之。發去乃拜乘禽，<sup>①</sup>明己受賜，大小無不識。遂行，舍于郊。始發，且宿近郊，自展軛。○軛，力丁反。

右賓拜賜遂行。○記：賓於館堂楹間，釋四皮束帛。賓不致，主人不拜。賓將遂去是館，留禮以禮主人，所以謝之也。不致，不拜，不以將別崇新敬也。○疏曰：若鄉飲酒送賓，賓不答，禮有終，相類也。

公使卿贈，如覲幣。贈，送也，所以好送之也。言如覲幣，見為反報也。今文「公」為「君」。○好，呼報反。

①「乘」，原作「承」，據元明本、寬文本、賀本改。

見，賢遍反。受于舍門外，如受勞禮，無償。勞，力到反。○不入，無償，明去而宜有已也。如受勞禮，以贈勞同節。○疏曰：歸饗餼，則人設而有償矣。使下大夫贈上介，亦如之。使士贈衆介，如其覲幣。大夫親贈，如其面幣，無償。贈上介，亦如之。使人贈衆介，如其面幣。士送至于竟。

右贈送。○記：凡賓客，送逆同禮。

謂郊勞、郊送之屬。○疏曰：郊勞是逆，郊送是送，尊卑不同，二者一也。○《司儀》。

使者歸，及郊，請反命。郊，近郊也。告郊

人，使請反命於君也。必請之者，以己久在外，嫌有罪惡，不可以入。春秋時，鄭伯惡其大夫高克，使之將兵，遂而不納，此蓋請而不得入。○惡，烏路反。朝服，載旌。行

時稅舍于此郊，今還至此，正其故行服，以俟君命，敬也。

古文「旌」作「膳」。饗，乃入。饗，如羊反。○饗，祭名

也。爲行道累歷不祥，饗之以除災凶。乃入，陳幣于

朝，西上。上賓之公幣、私幣皆陳，上介公幣

陳，他介皆否。皆否者，公幣私幣皆不陳。此幣，使者

及介所得於彼國君卿大夫之贈賜也。其或陳或不陳，詳尊而略卑也。其陳之、及卿大夫處者待之，如夕幣。其禮於君者，不陳。上賓，使者。公幣，君之賜也。私幣，卿大夫之幣也。他介，士介也。言他，容衆從者。○從，才用反。○疏曰：賓之公幣有八：郊勞幣，一也；禮賓幣，二也；致饗餼，三也；夫人歸禮幣，四也；侑食幣，五也；再饗幣，六也；夕幣，七也；贈賄幣，八也。此八者，皆主君禮賜使者，皆用束錦，故云公幣。賓之私幣略有十九：主國三卿五大夫皆一，食有侑幣，饗有酬幣，皆用束錦，則是十六；有三卿郊贈，十九也。其上介公幣則有五：致饗餼，一也；夫人致禮幣，二也；侑食幣，三也；饗酬幣，四也；郊贈幣，五也。降於賓者，以其上介無郊勞幣，又無禮賓幣，又闕一饗幣，故賓八、上介五也。上介私幣有十一：主國三卿五大夫或饗或食不備，要有其一，則其幣八也；又三卿皆有郊贈，如其面幣，通前則十一也。主國下大夫嘗使己國者，聘亦有幣及之，則亦有報幣之事，其數不定。士介四人，直有郊贈報私幣，<sup>①</sup>主國卿大夫報士介私面，士介私幣，數不甚明。「禮於君者」，謂賄用束紵，禮用束帛、乘皮之類也。知

① 「直」，原作「且」，據寬文本、賀本改。

「不陳」者，以賓介所陳之幣皆是主國之君禮於己者，故各陳之。若是於禮聘君之物，則當統於賓，不得衆介皆有也。蓋禮於君者，是其正，故不陳。禮於己者以其榮，故陳之也。又聘君以幣問卿而無報幣，以尊卑不敵，不敢報也。○今按：經文主國禮賜無有夕幣，疏於「上介公幣」云「無郊勞」及「無禮賓幣，又闕一饗幣，故賓八，上介五」，則前公幣中「夕」字當是「饗」字之誤，而其次亦當在「再饗」之前。束帛各加其庭實，皮左。不加於其皮上，榮其多也。公南鄉。亦宰告于君，君乃朝服出門，左，南鄉。○疏曰：此陳幣當如初夕幣之時，管人布幕于寢門外，使者北面，衆介立于其左，東上，卿大夫在幕東，西面北上，宰告于君，君朝服出門左，南鄉。卿進使者，使者執圭，垂纁，北面。上介執璋，屈纁，立于其左。此主於反命，士介亦隨入，並立，東上。○疏曰：按上行聘禮之時，上介屈纁授賓，賓襲受之。今此賓執圭垂纁，賓則裼，變於彼國致命時也。上介執璋屈纁者，變於賓故也。必變之者，反命致敬少於鄰國致命時，故賓於君前得裼，見美爲敬也。反命曰：「以君命聘于某君，某君受幣于某宮，某君再拜，以享某君，某君再

拜。」君亦揖使者進之，乃進反命也。某君，某，國名也。某宮，若言桓宮、僖宮也。①某君再拜，受也。必言此者，明彼君敬君，己不辱命。○疏曰：聘享在太祖廟，不在親廟，此大略舉廟而言耳。宰自公左受玉，亦於使者之東，同面並受也。不右使者，由便也。○疏曰：凡並授者，授由其右，受由其左。此受由其右者，因東藏之便。受上介璋，致命亦如之。變反言致者，若云非君命也。致命曰：「以君命聘於某君夫人，某君再拜。以享于某君夫人，某君再拜。」不言受幣于某宮，可知略之。執賄幣以告曰：「某君使某子賄。」授宰。某子，若言高子、國子。凡使者所當以告君者，上介取以授之，賄幣在外也。禮玉亦如之。亦執束帛加璧也。告曰：「某君使某子禮。」宰受之，士隨，自後左士介，受乘皮如初。上介出取玉束帛，士介後取皮也。②○疏曰：「士隨，自後」，謂自士介後，其在東上者，不須云自後。其餘三人皆後，乃得左

①「桓」，原作「相」，據元明本、寬文本、賀本改。  
②「後」，下疏引作「從」。按《儀禮注疏》作「從」，阮元校勘記云：「毛本『從』作『後』，下同。《通解》作『從』。」



之。必「左士介」者，取向東藏之便故也。享時賓奉束帛加璧，是上介取以授賓，明「士介從取皮」可知。執禮幣，以盡言賜禮，盡，津忍反。○禮幣，主國君初禮賓之幣也。以盡言賜禮，謂自此至於贈。○疏曰：謂從郊勞已後至於贈賄，八度禮賓皆有幣，是自郊勞爲初也。公曰：「然，而不善乎。」善其能使於四方。而，猶女也。○女，音汝。授上介幣，再拜稽首，公答再拜。「授上介幣」，當拜公言也。不授宰者，當復陳之。○復，扶又反。○疏曰：此幣皆先陳之，今賓執以告君，賓釋辭，君曰：勤勞使於四方。故授上介幣，當拜答君。言此幣人於己者，故不授宰。私幣不告，亦略卑也。君勞之，再拜稽首，君答再拜。勞之以道路勤苦。若有獻，則曰：「某君之賜也。」言此物某君之所賜予爲惠者也。其所獻雖珍異，不言某爲彼君服御物，謙也。其大夫出，反必獻，忠孝也。君其以賜乎？「不必其當君也。獻不拜者，爲君之答己也。上介徒以公賜告，如上賓之禮。徒謂空手，不執其幣。君勞之，再拜稽首，君答拜。勞士介，亦如之。」上介四人，

旅答壹拜，又賤也。○疏曰：君勞上介，上介再拜稽首，君答拜。不言再拜，則君答上介一拜矣。勞士亦如之，不言「皆」，則總答一拜矣。答賓再拜，答上介一拜，<sup>①</sup>介已賤矣。士介四人，共答一拜，故云「又賤也」。此一拜，則《周禮·大祝》「九拜」七曰奇拜，彼注云「一拜，答臣」者是也。《曲禮》云：「君於士不答拜。」此以其新行反命而勞苦之，故異於常也。君使宰賜使者幣，使者再拜稽首。以所陳幣賜之也。禮：臣子，人賜之而必獻之君父，不敢自私服也。君父因以予之，則拜受之，如更受賜也。既拜，宰以上幣授之。賜介，介皆再拜稽首，上介之幣，皆載以造朝，不陳之耳。與上介同受賜命，俱拜。既拜，宰亦以上幣授上介。乃退。君揖人，皆出去。○疏曰：初賓將行，君前受命訖，君揖人，揖賓介出，故知此君退者，亦反命訖，賓介出。介皆送至于使者之門，將行，俟于門，反，又送于門，與尊長出入之禮也。○長，丁丈反。乃退揖，揖別也。使者拜其辱。隨謝之也，再拜上介，三拜士介。

①「上」，原作「士」，據賀本改。

## 右歸反命。

釋幣于門，門，大門也。主于闕，布席于闕西闕

外，東面，設洗于門外東方，其餘如初于禴時。出于行，入于門，不兩告，告所先見也。○疏曰：按《特牲》筴時云：①

「席於門中，闕西闕外。」故知此亦席于闕西闕外。知「東面」者，神居東面爲正故也。云「設洗于門外東方」者，以其廟學設洗皆云「洗當東榮」，故在門外亦在東方也。乃至

于禴，筵几于室，薦脯醢。告反也。薦，進也。

○疏曰：亦司宮設席于奧東面，右几。觴酒陳，主人酌

進奠，一獻也。言陳者，將復有次也。先薦後酌，祭禮也。

行釋幣，反釋奠，略出謹入也。○疏曰：主人一獻，當言

奠，今不言奠而言陳者，以其下仍有室老及士獻，以備三

獻，故言陳。陳有次第之言，以其三時次第皆列于坐者也。

「祭禮」，見《特牲》、《少牢》，皆先薦饌乃後獻奠于銅南。出

時以禱祈，入時以祠報，故不同也。席于阼，爲酢主人

也。酢主人者，祝取爵酌，不酢於室，異於祭。○疏曰：祭

時皆於室內，受酢有尸，其酢又以尸爵，此皆異。薦脯

醢，成酢禮也。二獻。室老亞獻，士三獻也。每獻奠，

輒取爵酌主人，自酢也。○疏曰：正祭有尸，三獻皆獻尸

訖，尸酢主人，主婦賓長。今此無尸，皆自酢。一人舉

爵，三獻禮成，更起酒也。主人奠之，未舉也。獻從

者，從，才用反，注同。○從者，家臣從行者也，主人獻之，

勞之也。皆升飲酒於西階上，不使人獻之，辟國君也。○

辟，音避。○疏曰：按《特牲禮》，獻衆賓及兄弟之等，皆升

飲於西階上，故此獻從者亦於階上可知。云「不使人獻之，

避國君」者，若正祭，雖國君亦自獻，故《祭統》云：「尸飲

五，君洗玉爵獻卿；尸飲七，君洗瑤爵獻大夫之等。」告祭

非常，故獻從者從燕法，如使宰夫爲獻主而不親獻。行

酬，乃出。主人舉奠酬從者，下辯，室老亦與焉也。○

辯，音遍。上介至，亦如之。

## 右禮門及禴。

聘遭喪，人竟，則遂也。遭喪，主國君薨也。

人竟則遂，國君以國爲體，士既請事，已人竟矣。闕人未

告，則反。不郊勞，子未君也。不筵几，致命不於廟，

①「特」，原作「時」，據元明本、寬文本、賀本改。

就尸柩於殯宮，又不神之。○疏曰：鬼神所在曰廟，則殯宮亦得爲廟，則設几筵亦可矣。但始死不忍異於生，不神之，故於殯傍無几筵也。《曾子問》云：「君薨世子生，告殯，殯東有几筵者。」鄭云：「明繼體也。」不禮賓，喪降事也。主人畢歸禮，賓所飲食不可廢也。禮，謂饗餼饗食。○食，音嗣。賓唯饗餼之受。受正不受加也。○疏曰：饗食之等，是其加也。不賄，不禮玉，不贈。喪殺禮，爲之不備。○殺，色界反。遭夫人世子之喪，君不受，使大夫受于廟，其他如遭君喪。夫人、世子死，君爲喪主，使大夫受聘禮，不以凶接吉也。其他，謂禮所降。○疏曰：《服問》云：「君所主，夫人妻、太子、適婦。」遭喪，將命于大夫，主人長衣練冠以受。遭喪，謂主國君薨，夫人、世子死也。此三者，皆大夫攝主人。長衣，素純布衣也。去衰易冠，不以純凶接純吉也。吉時在裏爲中衣，中衣長衣，繼皆掩尺，表之曰深衣，純袂寸半耳。君喪不言使大夫受，子未君，無使臣義也。○純，諸允反，又之閏反。去，起吕反。衰，七回反。○疏曰：此長衣則與深衣同布，但袖長素純爲異。去衰

易冠者，謂脫去斬衰之服而著長衣，脫去六升、九升之冠而著練冠，故云「去衰易冠」也。禮：爲君，三升衰裳，六升冠；爲夫人、世子，六升衰裳，九升冠。三衣皆十五升，練冠亦九升。

右遭主國喪。○記：遭主國之喪，不

受饗食，受牲禮。牲，亦當爲「腥」，聲之誤也。有

喪不忍煎烹，正禮殯饗餼當孰者，腥致之也。○煎，子然反。烹，普庚反。○《掌客》。

聘，君若薨于後，人竟則遂。既接於主國君

也。○疏曰：闕人告君，君使上請事，是接於主君矣。赴

者未至，則哭于巷，衰于館，未至，謂赴告主國君

者也。「哭于巷」者，哭于巷門，未可爲位也。「衰于館」，未

可以凶服出見人。其聘享之事，白若吉也。今文「赴」作

「訃」。受禮，受饗餼也。不受饗食。亦不受加。赴

者至，則衰而出，禮爲鄰國闕，於是可以凶服將事也。

○疏曰：《春秋左氏傳》云：「杞孝公卒，晉悼夫人喪之。平

公不徹樂，非禮也。禮，爲鄰國闕服。」注云：「鄰國尚爲之

闕樂，況舅甥之親乎？」若然，赴者至，主國君使者衰而出，

則主國可以闕樂矣。「凶服將事」，謂主人所歸禮，則賓可以凶服受之。其正行聘享，則著吉服矣，故《雜記》云「執玉不麻」是也。唯稍受之。稍，稟食也。○疏曰：禮：

「君行師從，卿行旅從。」從者既多，不可闕於稍食。按《周禮》每云「稍事」，皆謂米稟，以其稍稍給之，故謂米稟爲稍。歸，執圭復命于殯，升自西階，不升堂。「復命

于殯」者，臣子之於君父，存亡同。○按《禮記》，奔父母之喪，升自西階。此復命於殯，亦升自西階法。生時，出必告，反必面，故云「臣子於君父，存亡同」也。子即位，不

哭。將有告請之事，宜清淨也。不言世子者，君薨也。諸

臣待之，亦皆如朝夕哭位。○疏曰：按《公羊傳》：「君存稱世子，君薨稱子某，既葬稱子，踰年稱君。」《奔喪》云：奔父之喪在家者，「待之皆如朝夕哭位」。辯復命如聘，自

陳幣至于上介，以公賜告，無勞。子臣皆哭，使者既復

命，子與群臣皆哭。與介人，北鄉哭。北鄉哭，新至

別於朝夕。○別，彼列反。○疏曰：使者升階復命訖，不

見出文，而言「與介人」者，以其復命之時，介在幣南北面，去殯遠，復命訖，除去幣，賓更與介前人近殯，北鄉哭，鄉內

爲人。新至別於朝夕者，朝夕哭位在阼階下，西面，今於殯前北鄉。出，袒括髮。悲哀變於外，臣也。○括，占活反。○疏曰：按《奔喪》云：「至于家，入門左，升自西階，東面哭，括髮袒於殯東。」是於內者子故也。此使者出門袒括髮，變於外者，臣故也。入門右，即位踊。從臣位，自哭至踊，如《奔喪》禮。○疏曰：按《奔喪》云：袒括髮於西階，東即位，踊，「襲經於序東」。此門外袒括髮，入門右即位，踊，亦當襲經於序東，故鄭云自哭至踊如奔喪禮也。

### 右聘君薨。

若有私喪，則哭于館，衰而居，不饗食。

私喪，謂其父母。哭于館，衰而居，不敢以私喪自聞于主國，凶服于君之吉使。《春秋傳》曰：「大夫以君命出，聞喪，徐行而不反。」○疏曰：「衰而居」，謂服衰居館，行聘享，則皮弁吉服。「大夫」以下，《春秋公羊傳》文，何氏注：聞大喪而不反，重君命也。徐行者，「爲君當使人追代之」。以此言之，使雖未出國境，聞父母之喪，遂行，不敢以私廢王事，君使人代之可也。以此言之，明至彼所使之國，雖聞父母之喪，不反可知。歸，使衆介先，衰而從之。已有齊斬之服，不忍顯然趨於往來，其在道路，使介居前，

歸又請反命，己猶徐行隨之。君納之，乃朝服，既反命，出公門釋服，哭而歸。其它如奔喪之禮。吉時道路深衣。○疏曰：朝服反命，出門去朝服，還服吉時深衣，三日成服乃去之。

### 右私喪。○記：賓客有喪，唯芻稍之

受。不受饗食，饗食加也。喪，謂父母死也。客，則又有君焉。芻，給牛馬。稍，人廩也。其正禮餼饗，主人致之則受。○疏曰：「喪謂父母死也」者，據正賓而言。若諸侯，正應母死，而有父者，或始封之君，舊為卿大夫，容有父，或父有廢疾不立，已受位於祖，亦云有父也。云「客，則又有君焉」者，謂介已下非直有父母，又有君喪，以其俱三年。○《掌客》。○今按：此《周禮》文，以君為賓，臣為客也。

### 賓人竟而死，遂也，主人為之具而殯。

為，于偽反，又如字，下「為之棺」同。○具，謂始死至殯所常用。○疏曰：注文如此，明不殯於館，但取其至殯為節耳。以其大斂訖即殯，故連言殯。下文歸介復命之時，柩止門外，明斂於棺而已。○今按：下記《周禮》注疏云權殯於館，此疏非是。介攝其命。為致聘享之禮也。初時，

上介接聞命。○為，于偽反。君弔，介為主人。雖有臣子親姻，猶不為主人，以介與賓並命於君，尊也。○疏曰：古者賓聘，家臣適子皆從行。是以延陵季子聘於齊，其子死，葬於贏，博之間。主人歸禮幣，必以用。當中奠贈諸喪具之用，不必如賓禮。○疏曰：主人所歸禮與幣，必以中喪者之用之物，不必如常時賓禮。蓋饗餼紡帛之類，或不堪喪者之用也。喪具，謂襲與小斂、大斂所用也。介受賓禮，無辭也。介受主國賓己之禮，無所辭也。以其當陳之以反命也。有賓喪，嫌其辭之。不饗食，歸，介復命，柩止于門外。門外，大門外也。必以柩造朝，達其忠心。○疏曰：國君有三門，臯、應、路。又有三朝：內朝在路寢庭，正朝在路門外，應門外無朝，外朝當在臯門外。經直云「止於門外」，無入門之言，明知止於大門外，外朝之上。介卒復命，出，奉柩送之，君弔，卒殯。卒殯，成節乃去。○疏曰：「卒復命」，謂復命訖。「送之」，謂從大門外送至賓之家。殯，喪之大節，卒殯而後君與介乃去也。若大夫介卒，亦如之。不言上介者，小聘，上介，士也。○疏曰：按此據大聘，上介

是大夫而言。今鄭以經不言上介，則「大夫介卒」，中兼有聘使大夫，其卒亦如之，故鄭云「不言上介，小聘，上介士也」，欲兼見小聘之法也。若小聘，上介、末介皆士，則入下文「上介死」中，以其下文更不見小聘賓介死法，故此兼言之也。士介死，爲之棺斂之，斂，力豔反。○不具他衣服也，自以時服也。君不弔焉。主國君使人弔，不親往。若賓死，未將命，則既斂于棺，造于朝，介將命。未將命，謂俟閒之後也。以柩造朝，以己至朝，志在達君命。○閒，音閑，又如字。若介死，歸復命，唯上介造于朝。若介死，雖士介，賓既復命，往，卒殯乃歸。往，謂送柩。

右賓介卒。○記：凡賓客死，致禮以喪用。死則主人爲之具而殯矣。喪用者，饋奠之物。

○疏曰：若諸侯出行，則以三年之戒以裨從。死時除棺之外，主人皆備之。若從者死，棺物皆共之。殯者在館，權殯還日以柩行。「饋奠之物」者，小斂時豚一鼎，大斂時特豚三鼎之類是也。○《掌客》。○爲君使而死，公館復，私館不復。公館者，公宮與

公所爲也。私館者，自卿大夫以下之家也。復，謂始死，以衣升屋，招魂復魄也。○公館，若今縣官宮也，公所爲，君所命使舍己者。○《雜記》、《曾子問》。大夫士死於道，則升其乘車之左轂，以其綏復。如於館死，則其復如於家。綏，亦綏也。大夫復於家以玄冕，士以爵弁服。○《雜記》。

小聘曰問。不享，有獻，不及夫人。主人不筵几，不禮，面不升，不郊勞。享，本又作「饗」。○記貶於聘，所以爲小也。獻，私獻也。面，猶覲也。○疏曰：「不享」者，謂不以束帛加璧，獻國所有。云「不禮」者，聘訖不以齊酒禮賓。「面不升」者，謂私覲庭中受之，不升堂。其禮，如爲介，三介。如爲介，如爲大聘上介。

右小聘。

### 聘義第三十八

### 邦國禮三之下

疏曰：《聘禮》謂大聘使卿，是侯伯之卿，此義蓋兼

子、男而論之。

# 記

聘禮：上公七介，侯伯五介，子男三介，

所以明貴賤也。此皆使卿出聘之介數也。《大行人》

職曰：「凡諸侯之卿，其禮各下其君二等。」○疏曰：上公親行則九介，其卿降二等，故七介，侯、伯、子、男，以次差之。

介紹而傳命，君子於其所尊弗敢質，敬之至也。質，謂正白相當。三讓而后傳命，三讓而后

入廟門，三揖而后至階，三讓而后升，所以致尊讓也。此揖、讓，主謂賓也。三讓而后傳命，賓至廟

門，主人請事時也。賓見主人陳擯，以大客禮當己，則三讓之，不得命，乃傳其君之聘命也。三讓而後入廟門，讓主人

廟受也，《小行人》職曰：「凡四方之使者，大客則擯，小客則受其幣，聽其辭。」○疏曰：知「此揖、讓，主謂賓」者，以

三讓而后傳命及三讓而后入廟門，皆賓先讓也。三揖至階，三讓而后升，雖主人爲首，皆賓讓而後至於主人。若賓

不讓，則不至於三，是揖讓之事皆賓爲主，故云「此揖、讓，主謂賓也」。云「三讓而後傳命，賓至廟門，主人請事時也」

者，鄭解三讓而後傳命之節，正當賓至主人大門，主人請事之時。按聘禮，賓至大門，主人陳介而請事，此云「廟門」者，有「廟」字者誤也。云「三讓而後入廟門」者，按《聘禮》入廟門之時無三讓之文，不備也。君使士迎于竟，大

夫郊勞，君親拜迎于大門之內而廟受，北面拜貺，拜君命之辱，所以致敬也。貺，賜也。賓致命，公當楣再拜，拜聘君之恩惠，辱命來聘者也。敬讓

也者，君子之所以相接也。故諸侯相接以敬讓，則不相侵陵。君子之相接，賓讓而主人敬也。

卿爲上擯，大夫爲承擯，士爲紹擯。君親禮賓，賓私面私覲，致饗餼，還圭璋，賄贈，饗，食，燕，所以明賓客君臣之義也。設大禮則賓客之也，或不親而使臣，則爲君臣也。故天子制諸侯，

比年小聘，三年大聘，相厲以禮。使者聘而誤，主君弗親饗食也，所以愧厲之也。諸侯相厲以禮，則外不相侵，內不相陵。此天子之所以養諸侯，兵不用而諸侯自爲正之具

也。比年小聘，所謂歲相問也。三年大聘，所謂殷相聘也。○疏曰：行聘之時，禮有錯誤，則君不親接賓，使之愧恥，自勉勸厲。以圭璋聘，重禮也。已聘而還圭璋，此輕財而重禮之義也。諸侯相厲以輕財重禮，則民作讓矣。圭，瑞也，尊圭璋之類也。用之還之，皆爲重禮。禮必親之，不可以己之有還復之也。財，謂璧、琮、享幣也。受之爲輕財者，財可還復，重賄反幣，是也。○疏曰：以器言之謂之圭，執以行禮謂之瑞。瑞，信也，謂與人爲尊卑之信驗也。璋，圭之類，故亦尊之也。行禮之義，必親自爲之。若己親往彼國，則可以己國之有執往行禮。今主國之君既不親往彼國，則不以己國所有寶玉還復償他國所來圭璋，故還歸之也。此聘禮以圭璋爲聘，璧琮爲享，若二王後享天子用圭璋，則亦爲財而受之不歸也。主國待客，出入三積，餼客於舍，五牢之具陳於內，米三十車，禾三十車，芻薪倍禾，皆陳於外。乘禽日五雙，群介皆有餼牢，壹食再饗，燕與時賜無數，所以厚重禮也。厚重禮，厚此聘禮也。○疏曰：三積，謂上公之臣。聘禮是侯

伯之臣，則不致積。古之用財者不能均如此，然而用財如此其厚者，言盡之於禮也。盡之於禮，則內君臣不相陵，而外不相侵。故天子制之，而諸侯務焉爾。不能均如此，言無則從其實也。言盡之於禮，欲令富者不得過也。○疏曰：天子制此聘禮，諸侯務而行焉。聘射之禮，至大禮也。質明而始行事，日幾中而后禮成，非强有力者，弗能行也。故强有力者將以行禮也，幾，音畿，又音基。○禮成，禮畢也，或曰「行成」。○行，下孟反。酒清，人渴而不敢飲也；肉乾，人飢而不敢食也。日莫人倦，齊莊正齊而不敢解惰，以成禮節，以正君臣，以親父子，以和長幼。此衆人之所難而君子行之，故謂之有行。有行之謂有義，有義之謂勇敢。故所貴於勇敢者，貴其能以立義也；所貴於立義者，貴其有行也；所貴於有行者，貴其行禮也。故所貴於勇敢者，貴其敢行禮義也。故勇敢强有



力者，天下無事則用之於禮義，天下有事則用之於戰勝。用之於戰勝則無敵，用之於禮義則順治。外無敵，內順治，此之謂盛德，故聖王之貴勇敢，強有力如此也。勇敢強有力而不用之於禮義戰勝，而用之於爭鬪，則謂之亂人。刑罰行於國，所誅者亂人也。如此，則民順治而國安也。渴，苦葛反。乾，音干。莫，音暮。齊，側皆反。解，佳賣反。惰，徒卧反。長，丁丈反。有行，下孟反，下「有行」同。治，直吏反。○勝，克敵也，或爲「陳」。○陳，直斬反。○今按：疏云此雖終結聘射，然自酒清、肴乾、日莫、成禮、父子、長幼之語，似據《射》、《鄉》而言，恐《射》、《鄉》之義失次在此，或相因而言歟？○定王六年，使單襄公聘于宋，單襄公，王卿士單朝也。聘，問也。問者，王之所以撫萬國，存省之。遂假道於陳，以聘于楚。假道，自宋適楚，經陳也。是時天子微弱，故以諸侯相聘之禮假道也。聘禮，若過國至于境，使次介假道，束帛將命于廟。火朝覲矣，道弗可行也。火，心星也。覲，見也。草穢塞路爲弗。

朝見，謂夏正十月，晨見於辰。候不在疆。候，候人也，掌送迎賓客者。疆，境也。司空不視塗，司空，卿官，掌道路也。澤不陂，陂，障也。古不寶澤，故鄭之。川不梁，流曰川。梁，渠梁。古不防川，故梁之。野有庾積，唐尚書云：十六糾曰庾。昭謂：此庾，露積穀也，《詩》云「曾孫之庾，如坻如京」是也。場功未畢，治場未畢也，《詩》云：「九月築場圃。」道無列樹，古者列樹以表道，且爲城守之用。墾田若蓺，發田曰墾。蓺，猶蒔也。言其稀少，猶若蓺物。膳宰不致饌，膳宰，膳夫也，掌賓客之牢。禮：生曰饌。司里不授館，司里，里宰也，掌授客館。國無寄寓，寓，亦寄也。無寄寓者，不爲廬舍，可以寄羈旅之客。縣無施舍，四甸爲縣，縣方六十里。施舍者，所以施舍賓客負任之處。民將築臺于夏氏。民，陳國之民。臺，觀臺也。夏氏，陳大夫夏徵舒之家。及陳，陳靈公與孔寧、儀行父南冠以如夏氏，留賓弗見。及，至也。陳靈公，舜後，恭公之子靈公平國也。孔寧、儀行父，陳之二卿。南冠，楚冠也。

如，之也，往之微舒家淫夏姬。賓，單襄公也。單子歸，

告王曰：「陳侯不有大咎，國必亡。」單子，襄公也。卿大夫稱子，於其私土稱公。王曰：「何故？」

對曰：「夫辰角見而雨畢，辰角，大辰，蒼龍之角。●角，星名也。見者，朝見東方建戌之初，寒露節也。

雨畢者，殺氣日盛，雨氣盡也。天根見而水涸，天根，

亢，氏之間也，涸，竭也。謂寒露雨畢之後五日，天根朝見，

水潦盡竭也。《月令》：「仲秋，水始涸。」天根見乃盡竭也。

本見而草木節解，本，氏也。謂寒露之後十日，陽氣

盡，草木之枝節皆理解也。駟見而隕霜，駟，天駟，●

房星也。隕，落也。謂建戌之中，霜始降。火見而清

風戒寒。謂霜降之後，清風先至，所以戒人爲寒備也。

故先王之教曰：「雨畢而除道，水涸而成梁，

教，謂《月令》之屬也。九月雨畢，十月水涸。草木節解

而備藏，備，收藏也。《月令》：「季秋，農事畢收。」隕霜

而冬裘具，「孟冬，則天子始裘。」故九月可以具之。清

風至而修城郭宮室。」謂火見之後，建亥之初也。

故《夏令》曰：「九月除道，十月成梁。」《夏令》，

夏后氏之令，周所因也。除道所以便行旅，成梁所以便民，使不涉也。其時儆曰：「收而場功，饘而畚揭。

時儆，時所以儆告其民也。收而場功，使人修閑倉也。饘，

具也。畚，器名，土籠也。揭，舁土之器。具汝畚揭，將以

築作也。營室之中，土功其始。定，謂之營室，謂建

亥小雪之中，定星昏正於午，土功可以始也。《詩》云：「定

之方中，作于楚宮。」火之初見，期於司里。」期，會

也。致其築作之具，會於司里之官。此先王之所以

不用財賄，而廣施德於天下者也。施德，謂因時

警戒，謹蓋藏，成築功也。今陳國火朝覲矣，而道

路若塞，野場若棄，澤不陂障，川無舟梁，舟

梁，以舟爲梁也。是廢先王之教也。周制有之

曰：「列樹以表道，立鄙食以守路。制，法也。

表，識也。鄙，四鄙。十里有廬，廬有飲食。國有郊牧，

①「蒼」，原作「倉」，據賀本改。

②「駟」，原作「馬」，據元明本、寬文本、賀本改。

國外曰郊。牧，放牧之地。疆有寓望，疆，境也。境界之上，有寄寓之舍，候望之人。藪有圃草，澤無水曰藪。圃，大也。必有茂大之草以備財用。囿有林池，囿，苑也。林，積木也。池，積水也。所以禦災也。禦，備也。災，飢，兵也。其餘無非穀土，民無縣耜，言常用也。人土曰耜，耜柄曰耒。野無奧草。皆墾辟也。奧，深也。不奪民時，不蔑民功。蔑，棄也。有優無匱，有逸無罷。國有班事，國，城邑也。班，次也，執事有次。縣有序民。縣鄙之民，從事有序。今陳國道路不可知，田在草間，不墾者多。功成而不收，野場若棄也。民罷於逸樂，罷於爲國君作逸樂之事。是棄先王之法制者也。周之《秩官》有之，《秩官》，周常官，篇名。曰：「敵國賓至，關尹以告，敵，位敵也。關尹，司關，掌四方賓客，叩關則爲之告。《聘禮》曰：「及境，謁關人，關人問從者幾人，遂以入境。」行理以節逆之，理，吏也。逆，迎也。執瑞節爲信而迎之也。行理，小行人。候人爲導，導賓至於

朝。出，送之境。卿出郊勞，《聘禮》曰：「賓至于近郊，君使卿朝服，用束帛勞。」門尹除門，門尹，司門也。除門，掃除門庭也。宗祝執祀，宗，宗伯。祝，太祝也。執祀，賓將有事於廟，則宗祝執祭祀之禮。司里授館，司里授客所當館，次於卿也，《聘禮》：「卿致館。」司徒具徒，具徒役，修道路之委積。司空視塗，視險易也。司寇詰姦，禁詰姦盜。虞人人材，虞人，掌山澤之官。祭祀賓客，各供其材。甸人積薪，甸人，掌薪蒸之官也。火師監燎，火師，司火。燎，庭燎也。水師監濯，水師，掌水，監滌濯之事者。膳宰致饗，熟食曰饗。廩人獻餼，生曰餼，禾米也。司馬陳芻，司馬，掌帥圉人養馬，故陳芻。圉人，職屬司馬。工人展車，展省客車，補傷敗也。百官官以物至。賓人如歸，是故小大莫不懷愛。小大，謂賓介也。其貴國之賓至，則以班加一等，益虔。貴國，大國也。班，次也。至於王使，則皆官正莅事，正，長也。莅，臨也。上卿監之。監，視也。若王巡守，則君親

監之。』周禮：王十二歲一巡守。今雖朝也不才，有分族於周，朝，單子之名。有分族，王之親族也。承王命以爲過賓於陳，假道爲過賓。而司事莫至，是蔑先王之官也。蔑，欺也。先王之令有之曰：文、武之教。『天道賞善而罰淫，故凡我造國，無從非彝，造爲也。彝，常也。無即慆淫，即，就也。慆，慢也。各守爾典，以承天休。』典，常也。休，慶也。今陳侯不念胤續之常，棄其伉儷妃嬪，伉，對也。儷，偶也。而帥其卿佐以淫於夏氏，不亦瀆姓矣乎？卿佐，孔、儀也。微舒之父御叔，即陳公子夏之子，靈公之從祖父，嬀姓也。而靈公淫其妻，是爲褻瀆其姓。陳，我大姬之後也。大姬，周武王之女，虞胡公之妃，陳之祖妣也。棄衮冕而南冠以出，不亦簡彝乎？衮，卷龍之衣。冕，大冠也。公之盛服。簡，略也。彝，常也。言其棄禮，簡略常服也。是又犯先王之令也。先王之令，無從非彝。昔先王之教，茂帥其德也，猶恐隕越。言勉帥其德，猶恐

落墜。若廢其教而棄其制，蔑其官而犯其令，將何以守國？無禮則危。居大國之間，大國，晉、楚。而無此四者，其能久乎？「四者，謂教、制、官、令也。八年，陳侯殺于夏氏。九年，楚子入陳。事見《國語》。○子產相鄭伯以如晉，子產，鄭大夫，名僑。晉侯以魯喪故，未之見也。子產使盡壞其館之垣而納車馬焉。士文伯讓之，相，息亮反。盡，子忍反。壞，音怪。垣，音袁。○文伯，晉大夫，名勾，字伯瑕。○勾，古本及《釋例》作「丐」，俗作「勾」，非。曰：「敝邑以政刑之不修，寇盜充斥，充，滿。斥，見。言其多。○見，賢遍反。無若諸侯之屬辱在寡君者何？是以令吏人完客所館，令，力呈反。○館，舍也。高其閭閻，閭，戶日反。閻，獲耕反。○疏曰：閭，閭，皆是門名，言高爲其門耳。厚其牆垣，以無憂客使。使，所吏反。○無令客使憂寇盜。今吾子壞之，雖從者能戒，其若異客何？以敝邑之爲盟主，繕完葺牆，葺，侵

入反。○葺，覆也。○疏曰：周禮：葺屋，蓋以草覆。此葺牆亦是以草覆也。○顏師古曰：完，當作「字」，字之誤也。以待賓客，若皆毀之，其何以共命？寡君使句請命。」共，音恭。句，古害反。○請問毀垣之命。對曰：「以敝邑褊小，介於大國，介，閒也。誅求無時，誅責也。是以不敢寧居，悉索敝賦，以來會時事。隨時來朝會。逢執事之不閒，閒，音閑。而未得見，見，賢遍反。又不獲聞命，未知見時。不敢輸幣，亦不敢暴露。暴，步卜反。其輸之，則君之府實也，非薦陳之，不敢輸也。薦陳，猶獻見也。其暴露之，則恐燥濕之不時而朽蠹，以重敝邑之罪。燥，素早反。蠹，丁故反，蟲敗也。重，直用反。僑聞文公之爲盟主也，宮室卑庳，庳，音婢。無觀臺榭，觀，古亂反。○疏曰：四方而高曰臺，有屋謂之榭。以崇大諸侯之館。館如公寢，庫廩繕修，司空以時平易道路，易，以鼓反。○易，治也。圻人以時塏館宮室。圻，

本又作「圻」，同音烏。塏，莫歷反。○圻人，塗者。塏，塗也。○疏曰：塏，一名圻，塗工作具也，因名其人。塏亦泥也。諸侯賓至，甸設庭燎，庭燎，設火于庭。僕人巡宮，巡宮行夜。車馬有所，有所處。賓從有代，代客役。巾車脂轄，轄，戶八反。○巾車，主車之官。隸人、牧、圉各瞻其事，瞻，之廉反。○瞻視客所當得。百官之屬各展其物。展，陳也，謂群官各陳其物以待賓。公不留賓，而亦無廢事。賓得速去，則事不廢。憂樂同之，事則巡之，巡，行也。教其不知，而恤其不足。賓至如歸，無寧菑患，言見遇如此，寧當復有菑患邪？無寧，寧也。不畏寇盜，而亦不患燥濕。今銅鞮之宮數里，鞮，丁兮反。數，所具反。○銅鞮，晉離宮。而諸侯舍於隸人。舍如隸人舍。門不容車，而不可踰越。門庭之內迫迮，又有牆垣之限。盜賊公行，而天癘不戒。癘，猶災也，言水潦無時。賓見無時，命不可知。若又勿壞，是無所藏幣以重罪也。敢請執事，

將何所命之。問晉命已所止之宜。雖君之有魯喪，亦敝邑之憂也。言鄭與魯亦有同姓之憂。若獲薦幣，薦進也。修垣而行，行，去也。君之惠也，敢憚勤勞！文伯復命，反命於晉君。趙文子曰：「信。信如子產言。我實不德，而以隸人之垣以羸諸侯，羸，音盈。○羸，受也。○疏曰：賈服、王、杜皆讀爲盈，盈是滿也，故皆訓爲受。是吾罪也！」使士文伯謝不敏焉。晉侯見鄭伯有加禮，禮加敬。厚其宴好而歸之，乃築諸侯之館。事見魯襄公三十一年《左氏春秋傳》。○楚子西、子期伐吳，及桐汭，宣城廣德縣西南有桐水出白石山西北，入丹陽湖。陳侯使公孫貞子弔焉，弔爲楚所伐。及良而卒，良，吳地。將以尸入。《聘禮》：「若賓死，未將命，則既斂於棺，造於朝，介將命。」○疏曰：《左傳》注曰：「尸者，未葬之通稱。」吳子使太宰嚭勞，且辭曰：「以水潦之不時，無乃廩然隕大夫之尸，以重寡君之憂，寡君敢辭。」勞，力報反。廩，

力甚反。隕，于敏反。○廩然，傾動貌。上介芋尹蓋對曰：「寡君聞楚爲不道，荐伐吳國，芋，于付反。荐，在偏反。○蓋，陳大夫貞子。上介，荐重也。○今按：「上介」二字屬下句，《釋文》云屬上句，誤也。滅厥

人民，寡君使蓋備使，弔君之下吏。備，猶副也。無祿，使人逢天之感，大命隕隊，絕世于良。絕世，猶言棄世。廢日共積，積，子賜反，又如字。

○廢行道之日，以共具殯斂所積聚之用。一日遷次。

一日便遷次。①言不敢留君命。今君命逆使人曰

「無以尸造于門」，是我寡君之命委于草莽也。且臣聞之曰「事死如事生」，禮也，於是乎有朝聘而終，以尸將事之禮，朝聘道死，以尸行事。又有朝聘而遭喪之禮。遭所聘之喪。若

不以尸將命，是遭喪而還也，無乃不可乎！以禮防民，猶或踰之。今大夫曰「死而棄

①「便」，原作「使」，據賀本改。

之』，是棄禮也，其何以爲諸侯主？謂主盟也。先民有言曰：『無穢虐士。』虐士，死者。備使奉尸將命，苟我寡君之命達于君所，雖隕于深淵，則天命也，非君與涉人之過也。」吳人內之。內，如字，音納。○《傳》言芊尹蓋知禮。○哀公十五年《左氏春秋傳》。○今按：疏曰：按禮，賓人竟而死，則以尸入殯于館，而介攝其命；賓已至朝，<sup>①</sup>主人將欲行禮，賓請問之後而賓死，則以柩造朝，以尸將事。今公孫貞子卒於竟內，依禮唯可以尸而人殯於賓館，芊尹乃欲以柩造朝，以尸將事，而吳人納之。杜注又以爲知禮，皆失之矣。

儀禮經傳通解卷第二十二終

①

「已至」，原作「至已」，據賀本改。

## 儀禮經傳通解卷第二十三

### 公食大夫禮第三十九 邦國禮四之上

食，音嗣。○鄭《目錄》曰：主國君以禮食小聘大夫之禮。○疏曰：鄭知是「小聘大夫」者，按下文云「宰夫自東房薦豆六」於醬東，「設黍稷六簋」，又設庶羞十六豆，此等皆是下大夫小聘之禮。下乃別云「上大夫八豆八簋」，又云「上大夫庶羞二十豆」，是食上大夫之法，故知此篇據小聘大夫也。若然，《聘禮》據侯、伯之大聘，此篇據小聘大夫者，周公設經互見爲義。按篇末云：「魚腸胃倫膚若九若十有一，下大夫則若七若九。」鄭注云：「此以命數爲差。九，謂再命者。十，謂三命者。七，謂一命者。九或上或下者，再命謂小國之卿、次國之大夫也。卿則曰上，大夫則曰下。大國之孤視子、男。」以此言之，魚、腸胃、倫膚皆七者，謂子、男小聘之大夫。此

《公食》序在《聘禮》之下，是因聘而食之。不言食賓與上介，直云大夫者，若云食賓與上介，則小聘使下大夫，上介乃是士，是以直云大夫，兼得大夫聘賓與上介，亦兼小聘之賓。若然，《聘禮》據大聘，因見小聘。後言大聘者，欲見大聘、小聘或先或後不常之義。

經九注曰：《公食》於五禮屬嘉禮。《大戴》第十五，《小戴》第十六，《別錄》第九。

公食大夫之禮。○使大夫戒，各以其爵。戒，猶告也。告之必使同班，敵者易以相親敬。○易，以鼓反。○疏曰：此篇雖據子、男大夫爲正，兼見五等諸侯大聘使卿之事，故云「各以其爵」也。上介出請人告，問所以爲來事。○爲，于僞反，下「爲既」、「爲從」、「爲公」、「爲賓」同。○疏曰：大夫至賓館之門外，賓使上介出請大夫所爲來之事。三辭。三，息暫反，又如字。○爲既先受賜，不敢當。○疏曰：聘日已受饗餼大禮，故今辭食不敢當之。受饗之時，禮辭而已，至於饗食，皆當三辭。賓出，拜辱，拜使者，屈辱來迎己。大夫不答拜，

①「後」上，賀本有「此公食先見小聘」七字。



將命。不答拜，爲人使也。將，猶致也。賓再拜稽

首，受命。大夫還，復於君。賓不拜送，遂從之。

不拜送者，爲從之，不終事。○疏曰：按《鄉飲酒》主人拜

送，賓不答拜，云禮有終。此賓不拜送，爲從之不終事。若

然，《鄉飲酒》、《鄉射》戒賓遂從之，而云拜辱、拜送者，以其

主人先反不相隨，故得拜辱、拜送。《觀禮》使者勞賓於門

外，侯氏再拜遂從之，使者既不先反，猶拜送者，尊天子使故

也。賓朝服即位于大門外，如聘。於是朝服，則

初時玄端。如聘，亦入于次俟。○疏曰：云「如聘」者，則

賓主設摯介以相待，如聘時也。云「於是朝服，則初時玄

端」者，謂賓初在館拜所戒大夫即玄端，賓遂從至君大門外

人次，乃去玄端，著朝服出次即位，不若《聘禮》重賓，發館

即皮弁也。云「亦入於次俟」者，亦如聘時俟主人辦也。

右戒賓賓從。○記：不宿戒。食禮輕

也。此所以「不宿戒」者，謂前期三日之戒，中戒爲宿，

謂前期一日。○疏曰：大射前期三日，宰夫戒宰及司

馬，又少牢辟人君有前期一日之宿。此雖人君禮，以食

禮輕，與《鄉飲酒》、《鄉射禮》同當日爲之，故皆不言日

數，下注云「食賓之朝，夙興戒之，賓則從戒而來，不復

召」是也。戒，不速。食賓之朝，夙興戒之，賓則從

戒者而來，不復召。賓之乘車在大門外西方，

北面立。賓車不入門，廣敬也。凡賓即朝，中道而

往，將至，下行而後車還立于西方。賓及位而止，北面。

卿大夫之位當車前。凡朝位，賓主之間各以命數爲遠

近之節也。○疏曰：云「凡賓即朝，中道而往」者，《內

則》云「男子由右，女子由左」，車從中央。故賓乘車中

道。云「車還立于西方」者，《少儀》云：「僕於君子，始乘

則式，君子下行，然後還立。」注云：「還車而立，以俟其

去。」是還立于西方鄉外。云「賓及位而止，北面」者，

《玉藻》云賓立不當門，彼亦謂聘使也。云「卿大夫之位

當車前」者，《大行人》云：「上公立當軹，侯伯「立當前

疾」，子男立當衡。又云大國之孤「朝位當車前」者，則

卿大夫立亦與孤同一節。兼云大夫者，小聘曰問，使下

大夫立與孤卿同當車前，故連言也。云「凡朝位賓主之

間各以命數爲遠近之節」者，《大行人》云：「上公朝位，

賓主之間九十步，侯伯七十步，子男五十步。」注云：「朝

位，謂大門外賓下車及王車出迎所立處。」又云：「凡諸

侯之卿，其禮各下其君二等以下，及大夫士皆如之。」是

臣亦各依其君命數而降之，故鄭總以命數言之也。

### 即位，具。

主人也。擯者俟君於大門外，卿、大

夫、士序，及宰夫具其饌物，皆於廟門之外。○疏曰：君迎賓人，始言卿大夫以下廟內之位，則知此具饌物時，皆在廟門外也，故下注云：「自卿大夫至此，不先即位從君而入者，明助君饗食，賓自無事。」故不在大門內。是其義也。羹定。定，多佞反。○肉謂之羹。定，猶孰也。著之者，下以爲節。○疏曰：與下文陳鼎之節爲目。甸人陳鼎

七，當門，南面西上，設局甬。甬若束若編。

編，必綿反。○七鼎，一大牢也。甸人，冢宰之屬，兼亨人者。南面西上，以其爲賓，統於外也。局，鼎扛，所以舉之者也。凡鼎甬，蓋以茅爲之，長則束本，短則編其中央。今文「局」作「鉉」。古文「甬」皆作「密」。○疏曰：《聘禮》致飧與饗餼皆九鼎，此亦一大牢而七鼎者，此食禮輕，無鮮魚、鮮腊，與《聘禮》「腥一牢」「鼎七」同也。《天官》有甸師氏，兼有亨人，皆屬冢宰。《亨人》職云「掌共鼎鑊」，《甸師》職云「掌帥其徒以薪蒸，役外內饗之事」，諸侯比天子不備官，故使甸人兼亨人陳鼎也。鼎甬，諸文皆不言所用之物，此經雖言「若束若編」，亦不指所用之體，鄭以茅是絜白之

物，故擬用之而云「蓋」也。設洗如饗，必「如饗」者，先

饗後食，如其近者也。《饗禮》亡，《燕禮》則設洗於阼階東南。古文「饗」或作「鄉」。小臣具槃匱在東堂下。

匱，以支反。○爲公盥也，公尊，不就洗。小臣於小賓客饗食，掌正君服位。○疏曰：《夏官·小臣》職云「小祭祀，賓客，饗食，如大僕之法」。此諸侯之聘客饗食，故亦小臣掌之也。宰夫設筵，加席几。設筵於户西，南面而左

几。公不賓至授几者，親設滹醬，可以略此。○疏曰：云

「設筵於户西，南面而左几」者，以其賓在户牖之間南面，又生人左几，異於神右几故也。云「公不賓至授几者，親設滹醬，可以略此」者，決《聘禮》禮賓時，公親授几者以無設滹醬之事故也，故下記云「不授几」，鄭云「異於醴也」。無

尊，主於食，不獻酬。飲酒，漿飲，俟于東房。飲

酒，清酒也。漿飲，載漿也。其俟，奠於豐上也。飲酒先言飲，明非獻酬之酒也。漿飲先言漿，別於六飲也。○疏

曰：云「飲酒，清酒也」者，按《周禮·酒正》注，先鄭云：「清酒，祭祀之酒。」後鄭從之，則此賓客用之者，優賓故也。云

「漿飲，載漿也」者，載之言載，以其汁滓相載，故云載，漢法有此名故也。云「奠於豐上也」者，下云「飲酒實于觶，加于

豐是也，此云奠即彼加也。云「飲酒先言飲，明非獻酬之酒也」者，以其鄉飲酒、燕禮等獻酬之酒皆不言飲，飲之，可知此擬酌口，故言飲，是異於獻酬酒故也。云「漿飲先言漿，別於六飲也」者，按《漿人》云：「共王六飲：水、漿、醴、涼、醫、醕。」彼先云六飲，後云水漿，與此先云漿不同，故云「先云漿，別於六飲」。必別於六飲者，彼六飲爲渴而飲，此漿爲酌口，故異之。凡宰夫之具，饌于東房。凡，非一也。飲食之具，宰夫所掌也。酒漿不在「凡」中者，雖無尊，猶嫌在堂。○疏曰：以其酒漿常在堂，若不特言之，則「凡」中不含之。言謂酒漿仍在堂，故上特言之。

右陳器饌。○記：不授几，異於醴也。

○疏曰：決禮賓時，公親授几也。無阼席，公不坐。

亨于門外東方。必於門外者，大夫之事也。東方者，主陽。○疏曰：按上經甸人，亨人之等，亨人是士官，不得言大夫之事。言「大夫之事」者，解亨在門外之禮也。《燕禮》注云：「亨於門外，臣所掌也。」言臣，亦是大夫事。《少牢》《虞饗饗饗皆在門外，亦大夫事。《特牲》云「主婦視饔饌于西堂下」者，以其無廢人主之，故在內。若然，鄉飲酒雖是大夫之事，以其取祖陽氣之

始，故亦於門內。司宮具几，與蒲筵常，緇布純，加萑席尋，玄帛純，皆卷白末。司宮，大宰之屬，掌宮廟者也。丈六尺曰常，半常曰尋。純，緣也。萑，細葦也。末，經所終，有以識之。必長筵者，以有左右饌也。今文「萑」皆作「莞」。○疏曰：《燕禮》注：「司宮，天子曰小宰。」與此不同，其義則一。蓋彼是設尊，故以小宰解之，此設几席，故以太宰之屬解之。按太宰之下有宮人，掌宮中除汙穢之事，即此司宮。彼不言設几席者，以天子具官，別有司几筵，又有小宰，諸侯兼官，故司宮兼司几筵及小宰也。云「丈六尺曰常，半常曰尋」者，此皆無正文。按《周禮·考工記》云：「車有六等之數，云：「軫崇四尺，謂之一等。」又云：「戈長六尺六寸，既建而進之。」崇於軾四尺，謂之二等。人長八尺，崇於戈四尺，謂之三等。戈長尋有四尺，崇于人四尺，謂之四等。車戟常，崇于戈四尺，謂之五等。酋矛常有四尺，崇于戟四尺，謂之六等。」自軾至矛皆以四尺爲差，以是約之，即知常是丈六尺，尋是八尺也。云「萑，細葦」者，以類言之，其實全別。此萑又與莞席之莞不同，彼莞謂蒲也。云「有以識之」者，席無異物爲記，但

織之白有首尾可爲記識耳。云「必以長筵者，以有左右饌」者，賓在戶牖之間南面，正饌在左，庶羞在右，雖不在席上，皆陳於席前，當席左右，其間容人，故必長筵也。宰夫筵，出自東房。筵本在房，宰夫敷之也。天子、諸侯左右房。○疏曰：上云「司宮具凡」，筵具之在房，宰夫敷之而已。「天子、諸侯左右房」，以其言東房對西房，若大夫士直有東房而已，故直云在房也。

公如賓服，迎賓于大門內，不出大門，降於

國君。○疏曰：《周禮·司儀》云：「將幣，交擯，三辭，車逆，拜辱，賓車進，答拜。」又云：「致饗饌，饗食，皆如將幣之儀。」是國君來則出迎也。大夫納賓。大夫，謂上擯也。納賓以公命。賓入門左，公再拜，賓辟，再拜稽首。左，西方，賓位也。辟，遠遁，不敢當君拜也。

公揖入，賓從。揖入，道之。及廟門，公揖入。廟，禰廟也。○疏曰：《儀禮》之內單言廟者，皆據禰廟。《昏禮》納采云「至于廟」，《記》云「凡行事，必用昏昕，受諸禰廟」是也。若非禰廟，則言廟祧，若《聘禮》云「不腆先君之祧」，問卿云「受于祖廟之類」是也。但受聘在祖廟，食饗

在禰，燕輕於食，饗又在寢，是其差次也。賓入，三揖。每曲揖，及當碑揖，相人偶。至于階，三讓。讓先升。

○疏曰：《曲禮》云：「客若降等，則就主人之階。」主人固辭，然後客復就西階。此亦降等初即就西階者，此君與客食禮，禮之正，彼謂大夫士以小小燕食之禮，故與此不同也。公升二等，賓升。遠下人君。○疏曰：亦取「君行一，臣行二」之義也。大夫立于東夾南，西面北上。東夾南，東西節也。取節於夾，明東於堂。○疏曰：

此謂主國卿大夫立位。序西爲正堂，序東有夾室，立于夾室之南，是東於堂也。士立于門東，北面西上。統

於門者，非其正位，辟賓在此。○疏曰：燕禮、大射士在西方，東面北上，不統於門。今在門東，西上，宜東統於君而統於門者，以賓在門西，辟賓在此，非正位故也。小臣東

堂下，南面西上。宰東夾北，西面南上。宰，

宰夫之屬也。古文無「南上」。○疏曰：宰在北堂之南，與夾室相當，故云夾北也。云「宰，宰夫之屬」者，以經云「南上」，則非止一人，下文宰夫之官皆在其內，亦於此立可知。但宰尊官，反在小臣之下者，以其小臣位在北堂南，故先見

之，非謂尊卑先後爲次也。內官之士，在宰東北，西面南上。夫人之官，內宰之屬也。自卿大夫至此，不先即位，從君而入者，明助君饗食，賓自無事。○疏曰：《周禮·天官》：內宰，下大夫，掌王后已下。彼天子內官，諸侯未必有內宰，以其言內官之士，以士爲之，明當天子內宰，故鄭舉內宰況之也。前聘時君迎客于大門內時，卿大夫已下入廟即位者，受聘事重，非饗食之事，故先入廟即位。此已下雖有宰及宰夫者，皆有事，及大夫匕牲，士庶羞之等，皆助君食賓，非己之事，故後入也。介門西，北面西上。西上，自統於賓也。然則承擯以下，立于西上，少進東上。○疏曰：介統於賓而西上，則擯統於君而東上可知。承擯以下既是有事之人，又是大夫尊於士，故知少進東上。不言上擯者，上擯有事其位不定，故不言。

### 右迎賓即位。

公當楣北鄉，至再拜，賓降也，公再拜。楣謂之梁。至再拜者，興禮俟賓，嘉其來也。公再拜，賓降矣。○疏曰：「至再拜」者，公方一拜，賓即降。「公再拜」者，賓降後又一拜，雖一拜，本當再拜，故皆以再拜言之。猶下侑幣之時，「公一拜，賓降，公再拜」，注云：「賓不敢俟

成拜也。」①鄭云「公再拜，賓降矣」者，謂至再拜則賓降也。賓西階東，北面答拜。西階東，少就主君，敬也。○疏曰：答拜也，並據公未降之前，賓始一拜，公降一等，開在一辭之中。又辭而賓猶終降，再拜稽首。知者，以下文「賓栗階升，不拜」，是已拜於下也。擯者辭拜於下之時，其位在下，故下《記》云「卿擯由下」。擯者辭，辭拜於下拜也。公降一等辭曰：「寡君從子，雖將拜，興也。」賓降再拜，公降，擯者釋辭矣。賓猶降，終其再拜稽首。興，起也。賓栗階升，不拜。自以己拜也。栗，寔栗也。不拾級連步，趨主國君之命，不拾級而下曰是。○是，敕略反。○疏曰：於堂下終爲再拜稽首，故於堂上不拜也。云「栗，寔栗也」者，謂疾之意也。云「不拾級連步」者，《曲禮》云「拾級聚足，連步以上」，鄭注云：「涉級聚足，謂前足躡一等，後足從之併。」此涉級也。連步，謂足相隨不相過也。其連步，據足而言；涉級，據階而說。其實一也，此等尋常升法。此栗階據趨君命而上，按《燕禮》

① 引經在《聘禮》，所引注在《公食大夫禮》「公壹拜，賓降也，公再拜」下。

記云「凡君所辭，皆栗階」，注云：「栗，蹙也，謂越等急趨君命也。」又曰「凡栗階，不過二等」，注云：「其始升猶聚足連步，越二等，左右足各一發而升堂。」是栗階之法也。云「不拾級而下曰是」者，凡升降有四種，云是者，君臣急諫諍則越三等爲是階，越一等爲歷階，又有栗階，又有連步，爲四等也。命之，成拜，階上北面再拜稽首。賓降拜，主君辭之，賓雖終拜，於主君之意猶爲不成。○疏曰：按《論語》孔子云：「拜下，禮也。今拜乎上，泰也。」是以上文主君雖辭，賓猶終拜於下，盡臣之禮爲成拜，而主君之意猶以爲不成，故命之升成拜，賓遂主君之意，故升更拜也。

右拜至。○記：卿擯由下。不升堂也。

○疏曰：此謂上擯擯詔賓主升降周還之事。

士舉鼎，去甬于外，次入，陳鼎于碑，南面西上。右人抽扃，坐奠于鼎西，南順，出自鼎西，左人待載。人由東，出由西，明爲賓也。今文「奠」爲「委」。古文「待」爲「持」。○疏曰：次入，謂序人也。雍人以俎入，陳于鼎南。旅人南面加匕于鼎，退。旅人，雍人之屬，旅食者也。雍人言入，旅人

言退，文互相備也。出入之由，亦如舉鼎者。匕俎每器一人，諸侯官多也。○疏曰：云「旅人，雍人之屬」者，即《燕禮》云「尊士旅食于門西」，鄭云「庶人在官者」是也。云「諸侯官多」者，按《少牢》云：「鼎序人，雍正執匕以從，雍府執四匕以從，司士合執二俎以從，司士贊者二人皆合執二俎以相從。」是大夫官少，故每人兼執也。大夫長盥，洗東南，西面北上，序進盥。退者與進者交于前，卒盥，序進，南面匕。長，以長幼也。序，猶更也。前，洗南。○疏曰：按《鄉飲酒》、《鄉射》賓盥北面，則此大夫亦皆北面可知。云「長，以長幼也」者，若《燕禮》云「命長」之類，皆據長幼爲長，不謂衆中之長者也。載者西面。載者，左人也。亦序自鼎東，西面於其前，大夫匕則載之。○疏曰：前云「左人待載」，其時鼎東南面，今大夫鼎北面南匕之，左人當載，故序自鼎東西面於其前矣。俎正當鼎南，則載者在鼎南稍東也。魚腊飪，飪，孰也。食禮宜孰，饗有腥者。○疏曰：上云「羹定」，肉謂之羹，恐魚腊不在羹定之中，故此特著「魚腊飪」。以食禮尚孰，故皆飪也。又曰：《國語》云王饗用體薦，「體薦則腥矣」，《樂

記《云大饗》而俎腥魚，是享禮有腥也。載體進奏，體

謂牲與腊也。奏謂皮膚之理也。進其理，本在前。下大夫體七個。○疏曰：三牲與腊皆載體，直言體，不辨體形及

數。以下魚、腸胃、倫膚皆言七，則此亦七體，故鄭云「下大

夫體七個」。按《士虞》記云「升左肩、臂、臠、肫、脊、脅」

七體，彼喪禮用左，又按《鄉飲酒》、《鄉射》記皆云「右胖進

腠」，則此亦用右胖肩、臂、臠、肫、脊、脅可知。既用右

胖，則左胖爲庶羞。其庶羞者，此下大夫十六豆，上大夫二

十豆是也。若致飧及歸饗饌，腥鼎皆無庶羞。鄉飲酒、鄉

射、燕禮、大射雖同用狗一牲以其享，亨亦皆有庶羞也。云

「進其理，本在前」者，此謂生人食法，故進本。本，謂近上

者，若祭祀則進末，《少牢》云「進下」，鄭云「變於食生」是

也。魚七，縮俎，寢右。右首也。寢右，進鬻也。乾

魚進腠，多骨鯁。○疏曰：縮，縱也。魚在俎爲縱，於人亦

橫。賓在戶牖之間南面，俎則東西陳之，魚在俎，首在右，

腹腠鄉南。鬻，脊也。進脊在北鄉賓，是取脊少骨鯁者以

優賓也。若祭祀則進腠，以鬼神尚氣，腠者氣之所聚，故

《少牢》進腠是也。腸胃七，同俎。以其同類也，不異

其牛羊，腠賤也。此俎實凡二十八。○疏曰：牛羊同是畜

類，又其腹腠賤，故略之同俎也。牛羊各有腸胃，腸胃各

七，四七二十八也。但此腸胃與牲或同鼎同俎，或別鼎別

俎，何者？據此文七鼎，腸胃與牲別鼎別俎，是其正法，

取其鼎俎奇也。《少牢》五俎，腸胃與牲同鼎者，以其有鮮

獸，若腸胃別鼎則六，不得奇，故并腸胃與牲同鼎，《有司

徹》亦然。此腸胃七者，以其與牲體別鼎，故取數於牲亦

七。《少牢》并腸胃於牲鼎，故云腸三、胃二，取數於脊脅各

三也。賓尸禮殺於正祭，故腸胃各一。《既夕》盛葬奠，故

腸胃五也。倫膚七，倫，理也，謂精理滑脆者。今文

「倫」或作「論」。○疏曰：倫膚，謂豕之皮革爲之，但此公

食大夫爲賓用爲美，故膚與腸胃皆別鼎俎。《特牲》惟有三

鼎，魚、腊不同鼎，故膚從牲同鼎。《有司徹》雖同《少牢》，

亦止三鼎而已，羊、豕、魚皆一鼎，故膚還從於牲鼎也。又

此膚與牲體之數亦七，而《少牢》膚九者，此食禮，故膚從體

數，《少牢》大夫之祭，膚出下牲，故取數於牲之體而九也。

腸、胃、膚皆橫諸俎，垂之。順其在牲之性也，腸胃

垂及俎拒。○疏曰：腸胃得在牲而垂膚，亦言「順牲之性」

者，從多而言。云「垂及俎拒」者，《少牢》云「腸三、胃三，垂

及俎拒」是也。大夫既匕，匕奠于鼎，逆退，復

位。事畢，宜由便也。上匕載者，又待設俎。○疏曰：上文云「士舉鼎」，又云，左人待載」，下文云「士設俎于豆南」，是載者又待設俎可知也。

### 右鼎俎入。

公降盥，將設醬。賓降，公辭，辭其從己。卒

盥，公壹揖壹讓，公升，賓升。揖讓皆壹，殺於初。

古文「壹」皆作「一」。宰夫自東房授醢醬，授，授公

也。醢醬，以醢和醬。○疏曰：蒲筵於堂上戶牖之間，南

面設之，乃設正饌於中席已東，庶羞於中席已西。按歸饗

餼，醢，醢別，知此不別而以醢和醬者，此經所陳物，異者皆

別器，此醢醬下但言醬不別言醢，明以醢和醬可知。祭祀

無此法，以生人尚褻味，故有之。公設之。以其爲饌

本。賓辭，北面坐遷而東遷所。東遷所，奠之東

側，其故處。○疏曰：云「東遷所」者，謂以西爲上，君設當

席中，故東遷之，辟君設處側近也，近其故處。公立于

序內，西鄉。不立阼階上，示親饌。○疏曰：君之行事

皆在阼階上，今以設饌在戶西近北，故近阼北立，是示親監

饌也。賓立于階西，疑立。不立階上，以主君離阼

也。疑，正立也，自定之貌。今文曰「西階」。宰夫自東

房薦豆六，設于醬東，西上。韭菹以東，醢

醢，昌本。昌本南，麋臠，以西菁菹、鹿臠。

醢醢，醢有醢。昌本，昌蒲本菹也。醢有骨謂之臠。菁，萑

菁，菹也。今文「臠」皆作「麋」。○疏曰：《周禮·醢人》朝

事之豆八，此用其六，彼注云：「醢，肉汁也。昌本，昌蒲根

也。」又云：「細切爲臠，全物若腍爲菹。」臠菹之稱，菜、肉

通。此經言菹不言臠者，臠菹麋細雖異，通而言之，臠亦得

爲菹也。萑菁，即蔓菁也。士設俎于豆南，西上。

牛、羊、豕、魚在牛南，腊、腸胃亞之。亞，次也。

不言紆錯，俎尊也。○紆，側耕反。○疏曰：上設豆紆陳

之，下設黍稷錯陳之，此設俎不紆不錯者，尊故也。膚以

爲特。直豕與腸胃東也。特膚者，出下牲，賤。○疏

曰：豕在牛羊之下爲賤，膚豕之所出，故特之於俎東也。

旅人取匕，甸人舉鼎，順出，奠于其所。以其

室也。其所，謂當門。○疏曰：前旅人以匕入加於鼎，退

出，今還使之取匕前，士舉鼎入。今不使舉鼎出者，以其士

載訖，遂設俎於賓前。事未畢，故甸人舉鼎而出也。宰



夫設黍稷六簋于俎西，二以並，東北上。黍當牛俎，其西稷，錯以終，南陳。並，併也，今文曰「併」。古文「簋」皆作「軌」。大羹湑不和，實于鐙。宰右執鐙，左執蓋，由門入，升自阼階，盡階不升堂，授公，以蓋降出，人反位。大羹湑，煮肉汁也。大古之羹不和，無鹽菜。瓦豆謂之鐙。宰謂大宰，宰夫之長也。有蓋者，饌自外人，爲風塵。今文「湑」爲「汁」，又曰「入門自阼階」，無「升」。○疏曰：宰位在東夾北，西面南上，今以蓋降出送於門外，乃更入門，反於東夾北位也。大羹不和，質也，鉶羹則調之以鹽菜。云「宰謂大宰，宰夫之長」者，以單言宰，諸侯三卿無大宰，以司徒兼大宰，大宰之下有宰夫，故云「宰夫之長」也。公設之于醬西，賓辭，坐遷之。亦東遷所。○疏曰：醬既東遷所，今於醬西遷之，明亦東遷所移之故，醬處也。宰夫設鉶四于豆西，東上，牛以西羊，羊南豕，豕以東牛。鉶，菜和羹之器。○疏曰：下《記》云：牛羞、羊苦、豕微，是菜和羹，以此鉶盛之也。據羹在鉶言之，謂之鉶羹，據器言之，謂之鉶鼎，正鼎之後設之，

謂之陪鼎，人庶羞言之，謂之羞鼎，其實一也。飲酒，實于觶，加于豐。豐，所以承觶者也，如豆而卑。宰夫右執觶，左執豐，進設于豆東。食有酒者，優賓也。設于豆東，不舉也。《燕禮》記曰：「凡奠者於左。」○疏曰：云「食有酒者，優賓也」者，按下文宰夫執漿飲，賓興受，唯用漿醕口，不用酒。今主人猶設之，是優賓也。《燕禮》主人奠於薦左，賓不飲，取奠於薦右。此酒不用，故亦奠於豆東。酒義雖異，不舉是同。然無凡奠者於左之文，鄭注蓋引《鄉飲酒》、《鄉射》記文，而轉寫者之誤也。宰夫東面坐啟簋會，各卻于其西。會，簋蓋也，亦一一合卻之，各當其簋之西。○疏曰：云「亦一一合卻之」者，卻者，仰也，簋蓋有六，兩兩皆相重而仰之，謂之卻合，故云一一卻合之。「各當其簋之西」爲兩處，亦者，亦《少牢》，故《少牢》云「佐食啟會蓋二，以重設于敦南」也。

### 右設正饌。○記：贊者盥，從俎升。

俎，其所有事。○疏曰：豆亦從下升，不言從者，贊者不佐祭豆，直佐祭俎也。經云「三牲之肺不離，贊者辯取之，壹以授賓」，是黍稷亦贊祭。不從升者，黍稷設之在後故也。黍稷雖後升先祭者，以其先食黍稷，後食肉故

也。上贊，下大夫也。上謂堂上，擯贊者事相近，以佐上下爲名。鉶芼，牛霍、羊苦、豕薇，皆有滑。霍，豆葉也。苦，苦茶也。滑，葦葢之屬。今文「苦」爲「芼」。○疏曰：《士虞》記云：「鉶芼，用苦若薇，有滑。夏用葵，冬用葢。」鄭注云：「葢，葦類也，乾則滑。夏秋用生葵，冬春用乾葢。」此經云「皆有滑」，不言所用之物，故取彼記解之。云「之屬」者，其中兼有葵也。

贊者負東房，南面，告具于公。負東房，負

房戶而立也。南面者，欲得鄉公與賓也。○疏曰：經直云「負東房」，鄭知「負房戶而立」者，以公在東序內，賓在戶西，雖告具于公，且欲使賓聞之，故知於房近西，是以云「得鄉公與賓也」。公再拜，揖食。再拜，拜賓饌具。賓

降拜，答公拜。公辭，賓升，再拜稽首。不言成拜，降未拜。賓升席，坐取韭菹，以辯擣于醢，上豆之間祭。擣，猶染也。今文無「于」。贊者東面坐取黍，實于左手，辯，又取稷，辯，反于右手，興，以授賓，賓祭之。取授以右手，便也。賓亦興受，坐祭之於豆祭也。獨云贊興，優賓也。《少儀》曰：

「受立授立，不坐。」○疏曰：此所授者，皆謂遠賓者。菹醢及鉶皆不言授者，以其近賓，取之易也。按《曲禮》云「般之序，辯祭之」，故知雖不授亦祭之也。經直云「祭」，知「祭之於豆祭」者，按《少牢》云「尸取韭菹，辯擣于三豆，祭于豆間」故也。云「獨云贊興，優賓」者，欲見賓坐而不興，是優賓，其實俱興也。引《少儀》者，欲見贊興賓亦興之義，以其賓坐贊亦坐故也。三牲之肺不離，贊者辯取之，壹以授賓。肺不離者，刲之也。不言刲，刲則祭肺也。

此舉肺不離而刲之，便賓祭也。祭離肺者，絕肺祭也。壹，猶稍也。古文「壹」作「一」。○疏曰：《少儀》云：「牛羊之肺，離而不提心。」鄭云：「提猶絕也，刲離之不絕中央少者。」此即爲食而舉肺也。《少牢》云：「舉肺一，長終肺，祭肺三，皆切之。」是祭肺切，舉肺不切也。此肺雖不離而刲之，與祭肺同，其實舉肺，故不言刲。將祭之時，則絕末而祭之，與祭肺異也。凡舉肺有二名：一名離肺，一名舉肺。祭肺亦名刲肺也。賓興受，坐祭。於是云「賓興受坐祭」，重牲也。賓亦每肺興受，祭於豆祭。扱手，扱上鉶以枲，辯擣之，上鉶之間祭。扱以枲，扱其鉶菜也。扱，拭也，拭以巾。○疏曰：此云「上鉶之間祭」者，著

其異於餘者。餘祭於上豆之間，此鉶別自祭鉶間。云「挽拭也，拭以巾」者，按《內則》「左佩紛帨，帨即佩巾，而云挽拭，拭手以巾。似帨不名巾者，本名帨者，以拭手爲名，其實名巾，故鄭舉其實稱也。此有四鉶而云「扱上鉶」，辯搗則唯有一柄優賓，故用一柄而已。《少牢》「二鉶祭神，故宜各有柄也。祭飲酒於上豆之間，魚、腊、醬、醢不祭。不祭者，非食物之盛者。○疏曰：魚、腊、醢、醬非盛者，在正饌之內，故不祭。若人庶羞，則祭之，下文辯「取庶羞之大，興一以授賓，賓受，兼壹祭之」，《少儀》云「祭臠，臠，詰爲大魚肉之臠，是亦祭之也。」

### 右賓祭正饌。

宰夫授公飯梁，公設之于清西，賓北面辭，坐遷之，既告具矣，而又設此，殷勤之加也。遷之，遷而西之，以其東上也。○疏曰：知「遷而西」者，以其加饌與庶羞並列也。知梁「東上」者，下文「宰夫膳稻于梁西」，是以梁在東爲上也。公與賓皆復初位。位序內階西。○疏曰：上公設醬時，立于序內，賓立于階西，此云「公與賓復初位」，故知公還在序內，賓還在階西也。宰

夫膳稻于梁西，膳，猶進也，進稻梁者以簋。○疏曰：知進稻以簋者，下《記》云「簋有蓋幕」，鄭注云：「稻梁將食乃設，去會於房，蓋以幕。」上云設黍稷訖云「卻會」，此稻梁不云卻會者，先於房去之故也。士羞庶羞皆有大蓋，執豆如宰。羞，進也。庶，衆也。進衆珍味可進者也。大，以肥美者特爲饗，所以祭也。魚或謂之臠。臠，大也。唯醢醬無大。如宰，如其進大羹清，右執豆，左執蓋。○疏曰：云「皆有大」者，中有二物、三物之肉，兼有魚也。云「魚或謂之臠。臠，大也」者，《有司徹》云「尸俎五魚，侑主人皆一魚，皆加臠祭于其上」是也。《少儀》云：「臠祭也。云「唯醢醬無大」者，鄭注《周禮·醢人》作醢之法：「先膊乾其肉，乃後莖之，雜以粱麴及鹽，漬以美酒，塗置甑中，百日則成矣。」何大饗之有也？醬則醢也，亦無大饗也。先者反之，由門入，升自西階。庶羞多，羞人不足，則相授於階上，復出取也。○疏曰：「反之」者，以其庶羞十六豆，羞人不足，故先至者反取之。下文云「先者一人升，設於稻南」，其人不反，則此云「先者反之」，謂第二已下爲先者也。先者一人升，設于稻南簋西，閒容

人。簋西，黍稷西也。必言稻南者，明庶羞加，不與正豆併也。問容人者，賓當從間往來也。○疏曰：稻與庶羞俱是加，稻在黍稷西近北，庶羞繼而南陳，俱在黍稷正饌之西，是不與正豆併也。「賓當從間往來」，則下文賓「左擁簋梁，右執淸以降，公辭，升，反奠于其所」是也。旁四列，

西北上。不統於正饌者，雖加，自是一體，是所謂羹臠中

別。○疏曰：《曲禮》云「左穀右臠」，彼云「穀，骨體也」，此

肉謂之羹，亦一也。穀爲正饌，臠謂切肉，則庶羞分置左右，此亦正饌在東，庶羞在西，問容人，是中別也。腳以

東，臠、臠、牛炙。腳、臠、臠，今時臠也。牛曰腳，羊

曰臠，豕曰臠，皆香美之名也。古文「腳」作「香」，「臠」作

「熏」。炙南醢，以西牛臠、醢、牛鮓。先設醢，紼

之以次也。《內則》謂鮓爲膾，然則膾用鮓。今文「鮓」作

「鮓」。○疏曰：此云「先設醢，紼之以次」，而《特性》注云

「以有醢，不得紼也」，與此違者，大凡醢配臠是其正，而醢

卑于臠。今牛、羊、豕臠皆在醢下者，直是紼之次，非尊卑

之列。《特性》以一有醢，若紼之，當醢在臠上，不成錯，故

不得紼。《少牢》四豆羊臠，故得紼而錯，與此同也。鮓

南羊炙，以東羊臠、醢、豕炙。炙南醢，以西豕臠、芥醬、魚膾。芥醬，芥實醬也。《內則》曰：「膾，春用葱，秋用芥。」衆人騰羞者，盡階不升堂，授，以蓋降，出。」騰，當作「騰」，騰，送也。授，授先者一人。

右設加饌。○記：簠有蓋幕。稻梁將

食乃設，去會於房，蓋以幕。幕，巾也，今文或作「幕」。

○疏曰：簠簋相將，簠既有會，明簋亦有會可知。但黍

稷先設，故卻會於敦南，簠盛稻梁，將食乃設，故鄭云

「去會于房，蓋以幕」。至於陳設，幕亦去之。經云「有

蓋幕」者，據出房未設而言。凡炙無醬。已有鹹和。

○疏曰：云「凡」者，欲解《儀禮》一部之內，牛、羊、豕炙

皆無醬。云「已有鹹和」者，若今人食炙然。

贊者負東房，告備于公。復告庶羞具者，以

其異饌。贊升賓，以公命名賓升席。○疏曰：前設饌

訖，贊者告具于公，公再拜揖食。此使贊升賓者，以其禮殺

故也。是以上文正饌公先拜，賓答拜，此賓先拜公，公答拜

爲異也。賓坐席末，取梁即稻，祭于醬淸間。

即，就也。祭稻粱不以豆祭，祭加宜於加。○疏曰：下文云「賓三飯以淸醬」，注云：「每飯，歠淸，以肴搗醬，食正饌也。」又云「不以醬淸」，注云：「不復用正饌也。」則此淸醬是正饌，而云「加」者，以在正饌之上得與正饌爲本，故名正饌，其實是正饌之加，故公親設之也。贊者北面坐，辯取庶羞之大，興，一以授賓，賓受，兼壹祭之。壹壹受之而兼一祭之，庶羞輕也。自祭之於臠臠之間，以異饌也。○疏曰：「壹壹受之而兼一祭之，庶羞輕也」者，決上三牲之肺祭之，今此祭庶羞并之，故云輕也。不云於豆祭而云「於臠臠之間」，以祭宜於加故也。

### 右賓祭加饌。

賓降拜，拜庶羞。公辭，賓升，再拜稽首，公答再拜。賓北面自閒坐，左擁簠粱，右執淸以降。自閒坐，由兩饌之間也。擁，抱也。必取粱者，公所設也。以之降者，堂尊處，欲食於階下然也。公辭，賓西面坐奠于階西，東面對，西面坐取之，栗階升，北面反奠于其所，降辭公。奠而後對，成其意也。降辭公，敬也。必辭公者，爲其尊而親臨已食。

待食，贊者之事。○疏曰：云「成其意」者，謂成其食降階下之意，故奠乃對。此決下文大夫相食，賓執粱與淸之西序端，主人辭，賓反之而不奠也。公許，賓升，公揖，退于箱。箱，東夾之前，俟事之處。○疏曰：按《爾雅》「有東西廂曰廟」，其夾皆在序外故也。知是「俟事之處」者，正以此文「公揖退于廂」而俟賓食，即待事之處也。賓者退，負東塾而立。無事。賓坐，遂卷加席，公不辭。贊者以告公，公聽之，重來，優賓。○疏曰：公既在序外，賓食在戶西，若不告公，公何以知之，明知贊者告公也。公來則勞賓，不來則賓不勞，故不來者所以優饒賓也。賓三飯，以淸醬。每飯歠淸，以肴搗醬，食正饌也。三飯而止。君子食不求飽，不言其肴，優賓。○疏曰：《曲禮》：「三飯，主人延客食載，然後辯般。」與此不同者，此爲禮食，故先食般，彼大夫、士與客燕食，則先食載，故不同也。又《昏禮》同牢云：「贊爾黍，授肺脊，皆食，以淸醬，皆祭舉食舉也。」注云：「皆食，食黍也。以，用也，用者，謂歠淸啜醬。」而不食般者，此公食賓禮，解體折節，明食般可知。彼豚解者皆不食，故不食般也。彼又云「三飯卒食」，注：「同牢示親，不主爲食起，三飯而成禮。」故不食

般也。但清言嘖，淡故也；醬言濡，鹹故也。云「不言其般，優賓」者，特牲、少牢尸食時，舉般皆言次第，此不言者，任賓取之，是優賓也。宰夫執觶漿飲，與其豐以進。此進漱也，非為卒食，為將有事，緣賓意欲白潔清。賓挽手，興受。受觶。宰夫設其豐于稻西，酒在東，漿在西，是所謂「左酒右漿」。○疏曰：「酒在東」者，上飲酒實于觶，宰夫設于豆東是也。「漿在西」者，即此經設於稻西是也。《曲禮》云：「酒漿處右。」彼注云：「此言若酒若漿耳，兩有之，則左酒右漿也。」庭實設。乘皮。賓坐祭，遂飲，奠於豐上。飲，漱。

### 右賓正食。

公受宰夫束帛以侑，西鄉立。束帛，十端帛也。侑，猶勸也。主國君以為食賓，殷勤之意未至，復發幣以勸之，欲用深安賓也。西鄉立，序內位也，受束帛于序端。○疏曰：上文公設醬，公立于序內，西鄉，此經亦云「西鄉立」，故知亦在「序內位」也。大射禮，公凡受于序端。故每云公之所受者，皆約之受於序端。賓降筵北面，以君將有命也。北面於西階上。○疏曰：以君將有束帛

侑食之命，故於西階上待之。賓者進相幣，為君釋幣辭於賓。賓降辭幣，升聽命，降辭幣，主國君又命之，升，聽命，釋許辭。○疏曰：云「主國君又命之，升」，知者，約《聘禮》「禮賓，賓降辭幣，公降一等辭，栗階升」，聽命是也。降拜。當拜受幣。公辭，賓升，再拜稽首。受幣，當東楹北面。主國君南面授之，當東楹者，欲得君行一，臣行二也。退，西楹西，東面立。俟主國君送幣也。退不負序，以將降。○疏曰：《聘禮》：「公拜貺，賓三退，負序。」不言辟者，以執圭將進授之。此公拜送幣，賓在階西，不負序者，以將降故也。公壹拜，賓降也，公再拜。賓不敢俟成拜。介逆出，以賓事畢。賓北面揖，執庭實以出，揖執者，示親受。公降立。俟賓反。上介受賓幣，從者訝受皮。從者，府史之屬。訝，迎也。今文曰「梧受」。○疏曰：此子，男小聘，使大夫上介一人而已。此時已受賓幣，故知訝受者非士介，是府史之屬也。

①「栗」，原作「東」，據賀本改。

# 右侑幣。

賓入門左，沒雷，北面，再拜稽首。便退則

食禮未卒，不退則嫌，更人行拜，若欲從此退。○疏曰：云

「便退則食禮未卒，不退則嫌」者，此鄭探解賓意。食禮自有

常法，三飯之後，當受侑幣，送庭賓出，更人以終食禮。若便

退，則食禮未卒，不退，則有貪食之嫌。是以「更人行拜」，示

將辭之，意待公設辭而後留也。公辭，止其拜，使之卒食。

揖讓如初。如初人也。升，賓再拜稽首，公答再

拜。賓拜，拜主國君之厚意，賓揖，介人復位。○疏曰：上

文云「介逆出」，下更云「介逆出」，明知中間介復人可知，但復

人之節當此賓人之時也。賓降辭公，如初。將復食。

賓升，公揖退于箱，賓卒食會飯，三飲，卒，已也。

已食會飯，三漱漿也。會飯，謂黍稷也。此食黍稷，則初時

食稻粱。○疏曰：知「會飯是黍稷」者，上文云「宰夫東面坐，

啟篋會，各卻於其西」，此云「食會飯」，故知是黍稷也。前賓

三飯不云會，以其簠盛稻粱，稻粱無會，故鄭云「此食黍稷，

則初時食稻粱」矣。不以醬清，不復用正饌也。初時食

加飯用正饌，此食正饌用庶羞，互相成也。後言清，或時後

用。○疏曰：上文「賓三飯，以清醬」，注云「每飯漱清，以散搗

醬」，是正饌，稻粱是加。此云「卒食會飯，三飲，不以醬清」，鄭

意以黍稷是其正，庶羞是其加，是互相成也。上文「賓三飯，以

清醬」，先言清，後言醬，是先用清。此後言清，或容前三飯後

用清，故作文有先後也。挽手，興，北面坐取梁與醬

以降，西面坐奠于階西。示親徹也。不以出者，非所

當得，又以已得侑幣。○疏曰：云「不以出者」，決《士昏禮》賓

取脯出以授從者，彼是已所當得，此非特已得侑幣，下文「有司

卷三牲之俎，歸于賓館」，亦是已所當得。鄭不言三牲而言侑

幣者，據已得者而言之。東面再拜稽首，卒食拜也。不

北面者，異於辭。○疏曰：上文賓受侑幣出，更入門左拜，其

時辭欲退，猶待公留，故北面，此卒食禮終，故東面。公降再

拜。答之也，不辭之使升堂，明禮有終。

## 右卒食。

介逆出，賓出，公送于大門內，再拜，賓

不顧。初來揖讓，而退不顧，退禮略也，示難進易退之

義。摯者以賓不顧告公，公乃還也。有司卷三牲之

俎，歸于賓館，卷，猶收也，無遺之辭也。三牲之俎，正

饌尤尊，盡以歸賓，尊之至也。歸俎者實于簠，它時有所釋故。○疏曰：此無所俎而言「卷三牲之俎」，不言用俎。鄭云「實于簠」，按《士虞禮》亦無所俎，尸舉牲體皆盛於簠，吉凶雖不同，無所俎是，故知同用簠也。《特牲》及《士虞》尸卒食，取俎歸于尸，个，是有所釋，此無所釋，故稱「卷」也。彼注云：「釋，猶遣也。」遣者，君子不盡人之歡，不竭人之忠也。魚腊不與。以三牲之俎無所釋故也。禮之有餘爲施惠。不言腸胃膚者，在魚腊下，不與可知也。古文「與」作「豫」。

### 右賓出。

明日，賓朝服拜賜于朝。拜食與侑幣，皆再拜稽首。朝，謂大門外。○疏曰：云「朝謂大門外」者，以其經云「拜賜于朝」，無賓人之文。又《聘禮》以極造朝，亦無喪人之文也。此《食禮》拜侑幣，《聘禮》歸饗餼直言「拜饗與餼」，不拜束帛者，彼使人致之，故不拜。此食禮君親賜，故拜之。訝聽之。受其言，人告出報也。此下大夫有士訝。○疏曰：《周禮·掌訝》：「大夫有士訝。」此篇是子，男使下大夫小聘，故云「此下大夫有士訝」也。

### 右拜賜。

上大夫，八豆、八簋、六鉶、九俎，魚腊皆二俎。記公食上大夫異於下大夫之數。豆加葵、菹、鰾，四四爲列，俎加鮮魚、鮮腊，三三爲列，無特。○疏曰：

云「豆加葵菹鰾」者，按《周禮·醢人》「朝事之豆」云：「韭菹、醢醢、昌本、麋臠、菁菹、鹿臠、茆菹、麋臠。」上文下大夫之豆用其六，仍有茆菹、麋臠。今上大夫八豆不取之，而取饋食之豆葵菹、鰾醢者，按《少牢饋食》四豆，二豆用葵菹、鰾醢，二豆用韭菹、醢醢，注云：「韭菹、醢醢，朝事之豆也。」而饋食用之豐大夫禮。則此公食大夫兼用饋食之豆，亦是豐大夫禮也。云「俎加鮮魚、鮮腊」者，上文下大夫七俎，牛、羊、豕、魚、腊、腸胃與膚，此云九俎，明加鮮魚、鮮腊。云「無特」者，陳饌要方上七俎者，東西兩行爲六俎，一俎在特于俎東，此九俎爲三行，故無特，雖無特，膚亦爲下。魚、腸胃、倫膚，若九若十有一，下大夫則若七若九。此以命數爲差也。九，謂再命者也。十一，謂三命者也。七，謂一命者也。九或上或下者，再命謂小國之卿，次國之大夫也。卿則曰上，大夫則曰下。大國之孤視子、男。○疏曰：云「此以命數爲差也」者，按《周禮·典命》：「公、侯、伯之卿三命，大夫再命，士一命；子、男之卿



再命，大夫一命，士不命。」則諸侯之臣分爲三等，三命，再命，一命，不命與一命同。此經魚、腸胃、倫膚亦分爲三等，有十一，有九，有七，則十一當三命，九當再命，七當一命。若然，惟有上下二文者，以公、侯、伯之大夫與子、男之卿同再命。卿爵尊爲上，大夫爵卑爲下，則上言若九者，子、男之卿也，下言若九者，公、侯、伯大夫也，故鄭云「卿則曰上，大夫則曰下」。云「大國之孤視子、男」者，此經唯見三命以下，故鄭併論及之。按《周禮·典命》大國之孤四命，又《大行人》云「大國之孤執皮帛以繼子、男」。又云「其他皆視小國之君」。若然，孤與子、男同十三，侯，伯十五，上公十七，差次可知。庶羞，西東毋過四列。謂上下大夫也。古文「毋」爲「無」。○疏曰：上文云「庶羞旁四列」，此上大夫饌內言「庶羞，西東毋過四列」，則東西橫行，上下大夫皆四以爲行，下大夫四四十六，東西四行，南北亦四行，上大夫東西四行，南北五行矣。上大夫庶羞二十，加於下大夫以雉兔鶉鴛。鴛，無母。○疏曰：云「鴛，無母」者，按《爾雅·釋鳥》云：「鴛，鴛母。」郭氏曰：「鴛也，青州人呼曰鴛母。」《莊子》云：「田鼠化爲鴛。」《淮南子》云：「蝦蟇所化也。」《月令》曰：「田鼠化爲鴛。」然則鴛、鴛一物也。

右食上大夫禮。○記：上大夫蒲筵

加萑席，其純皆如下大夫純。謂三命大夫也。

孤爲賓，則莞筵紛純，加纁席畫純也。○疏曰：經云「上

大夫」不辨命數，則子、男之卿再命，其席亦同下大夫。

鄭言「謂三命大夫」者，欲見公、侯、伯之卿三命，亦與

子、男下大夫同，公之孤四命，其席則異。按《周禮·司

几筵》云：筵國賓于牖前，「莞筵紛純，加纁席畫純。」與

此記三命已下席不同，故知彼國賓謂筵孤也，無正文，

故云「則」也。上大夫庶羞，酒飲漿飲，庶羞

可也。於食庶羞，宰夫又設酒漿，以之食庶羞可也，以

優賓。○疏曰：上經云「上大夫庶羞二十豆」，此復記之

者，欲見上大夫食加飯之時，得兼食庶羞。其時宰夫更

設酒飲漿飲，以優賓也。拜食與侑幣，皆再拜稽

首。嫌上大夫不稽首。

若不親食，謂主國君有疾病若他故。○疏曰：

疾病之外，別云「他故」者，君有死喪之事，故《聘禮》云：

「主人畢歸禮，賓唯饗餼之受。」謂畢致饗食，但賓不受之。

使大夫各以其爵、朝服以侑幣致之。執幣以將

命。豆實，實于甕，陳于楹外，二以並，北陳。

簋實，實于筐，陳于楹內、兩楹間，二以並，南

陳。陳甕筐於楹間者，象授受於堂中也。南北相當，以食

饌同列耳。甕北陳者，變於食。甕數如豆，醢芥醬從焉。

筐米四。今文「並」作「併」。○疏曰：云「南北相當，以食

饌同列耳」者，按上文正食之時，黍稷亦南陳，今於楹間陳，

筐米亦南陳，是正食及此饌同列也。云「甕北陳者，變於

食」者，上文正食之時，「宰夫自東房薦豆六，設於醬東西

上」陳之，今於楹間二以併，北陳，是變於食也。菹醢各異

物，不可同甕，故甕數如豆，上大夫八豆則八甕，下大夫六

豆則六甕。庶羞之醢同是醬類，故使之相從，但庶羞之醢

更無別種，宜同一甕，芥醬宜亦一甕。知有芥醬者，以其有

生魚故也。上文上大夫八簋，今乃生致之，黍稷宜各一筐，

稻粱又二筐，故云筐米四。

庶羞陳于碑內，生魚也，魚腊從焉。上大夫加

鮮魚、鮮腊、雉兔、鶉鴛，不陳于堂，辟正饌。○疏曰：上文

魚膾是魚之中膾者，皆是生魚也，按鄭注《周禮》云「燕人膾

魚方寸，切其腴以啗所貴」是也。此則全生不膾，何者？

本膾在豆，與載炙俱設，今載炙在牲未殺，膾全不破可知。

然庶羞之內，衆羞俱有，鄭獨云生魚者，以其載炙在牲不

殺，於此無矣，雖有乾腊雉兔之等，以生魚爲主也。云「魚

腊從焉」者，雖無三牲之肉，有乾魚腊可知。云「上大夫加

鮮魚、鮮腊、雉兔、鶉鴛」者，以其下大夫七鼎無鮮魚、鮮腊，

上大夫九鼎加鮮魚、鮮腊可知，雉兔、鶉鴛亦生致之矣。庶

羞本在堂上正饌之西，今在碑內，故云「辟正饌」也。不陳

於碑南者，以其本合在堂，今宜近堂，故在碑北。庭實陳

于碑外，執乘皮者也，不參分庭一在南者，以言歸，宜近

內。○疏曰：庭實正法，皆參分庭一在南而陳之，《昏禮》

記納徵執皮者是也。今云「碑外」，繼碑而言，是近北矣。

彼陳於主人之庭，擬與賓向外，故近南。此陳於客館，擬與

賓入內，故鄭云「以言歸」，故在內也。牛、羊、豕陳于

門內西方，東上。爲其踐汗館庭，使近外。○疏曰：

上庶羞與庭實在碑之內，近內陳之。此牛羊豕陳於門內，

繼門言之，是爲其踐汗館庭也。若然，致饗饌，牛、羊、豕亦

在此。彼不言者，以饗饌有腥有熟，其生者近門是其常，故

略之。此既不殺，宜近內，故決之也。賓朝服以受，

如受饗禮，朝服，食禮輕也。○疏曰：歸饗饌時，卿卓

弁，賓皮弁受。無儻。以己本宜往。○疏曰：主君無故，速賓在廟行食禮，而有侑幣賓，無儻法，主君有故，致食禮，并有侑幣，亦不合有儻，故云「以己本宜往」。明日，賓朝服以拜賜于朝，訝聽命。賜亦謂食，侑幣。○疏曰：上速賓食時拜食與侑幣，今亦然，故云「亦」。

### 右不親食。

大夫相食，親戒速。記異於君者也。速，召也。先就告之，歸具。既具，復自召之。○疏曰：經大夫親戒速，決君不親戒速，以下諸文亦皆異，故云「記異於君者也」。云「先就告之，歸具。既具，復自召之」者，以其戒具兩有，皆親爲之，與《鄉飲酒》、《鄉射》同，故彼一文皆云戒賓既歸，布筵設尊，乃親速賓是也。迎賓于門外，

拜至，皆如饗拜。饗，大夫相饗之禮也，今亡。古文「饗」或作「鄉」。降盥，受醬、涓、侑幣、束錦也。

皆自阼階降堂受，授者升一等，皆者，謂受醬、受涓、受幣也。侑用束錦，大夫文也。降堂，謂止階上。今文無「束」。賓止也。主人三降，賓不從。○疏曰：上文鄭注「皆者，謂受醬、受涓、受幣」，皆自阼階降。此云「主人三

降」，即上三者。不數主人降盥者，按《鄉飲》所言降盥者，皆爲洗爵，故賓從降，此降盥不爲洗爵，故鄭不數之。《聘禮》致饗餼，「賓降堂，受老束錦，大夫止」，注云：「止不降，使之餘尊。」此賓不降者，雖賓主敵，以主人降堂不至地，故賓止不降也。賓執梁與涓，之西序端。不敢食於尊處。○疏曰：此兩大夫敵，故之西序端。上公食大夫，大夫降階下，臣卑故也。主人辭，賓反之。卷加席，主人辭，賓反之。辭幣，降一等，主人從。從辭賓降。受侑幣，再拜稽首，主人送幣亦然。敵也。○疏曰：按《郊特牲》云：「大夫之臣不稽首，非尊家臣，以辟君也。」又按《左氏傳》哀十七年：「公會齊侯盟于蒙，孟武伯相。齊侯稽首，公拜。齊人怒，武伯曰：非天子，寡君無所稽首。」若然，臣於君乃稽首，平敵相施當頓首。①今言「敵」而稽首者，以食禮相尊敬，雖敵亦稽首，與臣拜君同故也。辭於主人，降一等，主人從。辭，謂辭其臨己食。卒食，徹于西序端，亦親徹。東面

①「施」，原作「於」，據寬文本、賀本改。

再拜，降出。拜，亦拜卒食。其他皆如公食大夫之禮。疏曰：云「其他」，謂豆數、俎體、陳設皆不異上陳，但禮異者，謂親戒速，君則不親迎賓，公不出。此大夫出大門，公受醬滂幣不降，此大夫則降也。公食大夫，大夫降食於階下，此言「西序端」。上公食卷加席，公不辭，此則辭之，皆是異也。若不親食，則公作大夫，朝服以侑幣致之。作，使也。大夫有故，君必使其同爵者爲之致禮。列國之賓來，榮辱之事君臣同。賓受于堂，無儔。與受君禮同。○疏曰：《聘禮》賓受致饗幣云：「堂中西，北面。」注：「趨主君之命也。堂中西，中央之西。」此雖無儔受幣，亦與之同也。

### 右大夫相食禮。

## 公食大夫義第四十

### 邦國禮四之下

食禮：公養賓，國養賢，<sup>①</sup>一也。親之故愛之，愛之故養之，養之故食之。食而弗愛，猶豢之也；愛而弗敬，猶畜之也。饗禮，敬

之至也；食禮，愛之至也。饗爲愛弗勝其敬，食爲敬弗勝其愛，文質之辨也。公使大夫戒，必以其爵恭也。己輕則卑之，己重則是以其貴臨之也。賓三辭聽命，言是禮之貴，弗敢當也。弗敢當，故難進也。公迎賓于大門內，非不能至于外也，所以待人君之禮也。臣之意欲尊其君，子之意欲尊其父，故迎賓于大門內，所以順其爲尊君之意也。三揖至于階，三讓而升堂，充其意，諭其誠也。於廟用祭器，誠之盡也。君子於所尊敬不敢狎。不敢狎，故神明之。神明之，故忠臣嘉賓樂盡其心也。大夫立于東夾南，西面北上；士立于門東，北面西上；小臣東堂下，南面西上；宰東夾北，西面南上；內官之士在宰東北，西面南上。百官有司備，以

① 「國」字，原脫，據賀本補。

樂養賢也。設筵加席几，致安厚之義也。公設醬，然後宰夫薦豆菹醢，士設俎；公設大羹，然後宰夫設鉶啟簋，言以身親之也。賓徧祭，公設梁，宰夫膳稻，士膳庶羞，爲殷勤也。賓三飯梁，以消醬，以君子之厚己也。賓必親徹，有報之道也。庭實乘皮，侑以束帛，雖備物，猶欲其加厚焉也。公拜送，終之以敬也。有司卷三牲之俎，歸于賓館，不敢褻其餘也。上大夫八豆、八簋、六鉶、九俎，庶羞二十，其餘衰，是見德之殺也。<sup>①</sup>君子之言曰：<sup>②</sup>愛人者，使人愛之者也；敬人者，使人敬之者也；親人者，使人親之者也；自卑者，使人尊之者也。是故公養賓，國養賢，其義一也。未有愛之、敬之、親之、尊之，而其位不安者也。未有不愛、不敬、不尊、不親，而能長有其國者也。將由乎好德之君，則將怡焉唯恐其不足於禮。將由乎驕慢之

君，則將曰：是食於我而已矣！故禮：君子所不足，小人所泰餘也。孔子食於少施氏，將祭，主人辭曰：「不足祭也。」將飧，主人辭曰：「不足飧也。」孔子退，曰：「吾食而飽，少施氏有禮哉！」故君子難親也，將親之，舍禮何以哉？劉敞補。

# 諸侯相朝禮第四十一

## 邦國禮五之上

### 集補經

凡諸侯之邦交，歲相問也，殷相聘也，世相朝也。小聘曰問。殷，中也。久無事，又於殷朝者及而相聘也。父死子立曰世。凡君即位，大國朝焉，小國聘焉。此皆所以習禮考義，正刑一德，以尊天子也，必擇有道之國而就修之。○疏曰：云「小聘曰問」者，《聘禮》文，故

① 「是見」，原作「見是」，據賀本改。  
② 「之言」，原作「言之」，據賀本改。

彼云、小聘曰問，不享」是也。大聘使卿，小聘使大夫也。《聘義》、《王制》皆云「三年一大聘」，此不言三年而云殷者，欲見中間久無事，及殷朝者來及亦相聘，故云殷，不云三年也。若然，《聘義》與《王制》皆云「比年一小聘」，此云「歲相問」，不云比年者，取歲歲之義也。「父死子立曰世」，是繼世之義也。○《大行人》。○諸侯相見，必告于禰。

疏曰：下文云「反必親告于祖禰」，出時宜亦告祖禰。為道近，故或唯告禰。朝服而出視朝，朝服，為事故也。

○疏曰：事，謂或會或弔之事。諸侯朝服玄冠，緇衣素裳，以諸侯朝天子冕而出視朝，為將廟受，尊敬天子，習其禮，故著冕服。諸侯相朝，雖在廟受，降下天子，不敢冕服，唯服臨朝聽事之服。熊氏又云：①此朝服謂皮弁服，以天子用以視朝，故謂之朝服。《論語》云「占月必朝服而朝」，注云「朝服，皮弁服」是也。必知朝服皮弁服者，《聘禮》諸侯相聘皮弁服，明相朝亦皮弁服，此義為勝也。命祝史告

于五廟，所過山川。諸侯五廟，山川所不過則不告，貶於適天子也。亦命國家五官，道而出。反必親告于祖禰，乃命祝史告至于前所告者，而

后聽朝而入。五官，五大夫典事者。命者，敕之以其

職。道，祖道也。反必親告祖禰，同出入禮。○疏曰：按

《大宰》云：「建其牧，立其監，設其參，傳其伍。」是諸侯有

三卿五大夫，出入所告，理不容殊。②而諸侯相見出不云

告祖者，或道近變其常禮耳。故反必親告祖禰，以明出入

之告，其禮不殊也。○《曾子問》。○凡諸公相為賓，

謂相朝也。主國五積，三問，皆三辭，拜受，皆

旅擯。再勞，三辭，三揖，登，拜受，拜送。積，

子賜反，後皆同。旅，如字，又音臚，力於反。○賓所停止

則積，閒闊則問，③行道則勞，其禮皆使卿大夫致之，從來

至去，數如此也。三辭，辭其以禮來於外也。積問不言登，

受之於庭也，鄭司農云：旅，讀為旅於泰山之旅。謂九人

傳辭，相授於上下竟，問賓從未上行，介還受，上傳之。玄

謂：旅，讀為鴻臚之臚，臚，陳之也。賓之介九人，使者七

人，皆陳擯位，不傳辭也。賓之上介出請，使者則前對，位

①「熊」，原作「能」，據元明本、寬文本、賀本改。

②「理」，賀本作「禮」。

③「積閒闊」四字，原脫，據賀本補。

皆當其末擯焉。三揖，謂庭中時也。拜送，送使者。○傳，直專反。○疏曰：積者，《遣人》所云「十里有廬，廬有飲食，三十里有宿，宿有委，五十里有市，市有積。是也。問者，問不恙也。勞，謂勞苦之。云「皆使卿大夫致之」者，按《聘禮》，遣卿行勞禮，臣來尚遣卿勞，明君來遣卿勞可知。此再勞，一勞在境，一勞在遠郊，皆使卿。其近郊勞，當主君親爲之也。其積問當使大夫，故下句云「致殯如致積之禮」，注云：「俱使大夫，禮同也。」知致殯使大夫者，見《聘禮》「宰夫朝服設殯」。宰夫即大夫。問亦小禮，明亦使大夫也。先鄭以爲旅擯與交擯同之，後鄭不從者，此臣禮云旅擯，下文云「主君郊勞，交擯三辭」，明其別。旅直陳擯介，不傳辭，交則一往一來傳辭也。後鄭謂「旅，讀爲鴻臚之臚，臚，陳之」者，按《爾雅·釋詁》云：「尸、旅，陳也。」《釋言》云：「豫、臚，敍也。」注云：「皆陳敍也。」後鄭不從旅大山之旅，從臚者，欲取敍義也。云「賓之介九人」者，自從公介九人之禮。云「使者七人」者，自從降二等之禮。云「皆陳擯位，不傳辭」以下，皆約《聘禮》主君大門內迎聘賓之位也。云「三揖，謂庭中時」者，如《聘禮》入門揖，當曲揖，當碑揖是也。主君郊勞，交擯，三辭，車逆，

拜辱，三揖三辭，拜受，車送，三還再拜。主君郊勞，備三勞而親之也。鄭司農云：交擯三辭，謂賓主之擯者俱三辭也。車逆，主人以車迎賓於館也。拜辱，賓拜謝辱也。玄謂：交擯者，各陳九介使傳辭也。車迎拜辱者，賓以主君親來，乘車出舍門而迎之。若欲遠就之然，後見之則下拜，迎謝其自屈辱來也。至去，又出車，若欲遠送然。主君三還辭之，乃再拜送之也。車送迎之節，各以其等，則諸公九十步，立當車軹也。三辭重者，先辭，辭其以禮來於外，後辭，辭升堂。○疏曰：云「備三勞而親之」者，《大行人》有「三問三勞」之文也。先鄭云「車逆，主人以車迎賓於館也拜辱，賓拜謝辱也」，後鄭不從者，此直是備三勞，既來至國，何有輒迎賓於館乎？後鄭謂「各陳九介」者，以其在道，俱不爲主，又非主君從賓之禮，故無五擯之事，而各陳九介。其位，主君至館大門外北面而陳此九介，去門九十步，東面。賓在大門內，於門外之東亦陳九介，西面。云「立當車軹也」者，賓主俱立當軹，《大行人》文。云「後辭，辭升堂」者，按《鄉飲酒禮》：「主人取爵降洗，賓降，主人坐奠爵于階前，辭。」注云：「事同曰讓，事異曰辭。」禮，升堂是事同，不云讓而云辭者，此賓主敵者，主人之意欲有受於庭之心，故從事異曰辭。是以下諸公之臣等升堂

皆云讓，依事同曰讓，非敵，故《聘義》云：「三讓而後傳命，三讓而後入廟門。」並是異，不云辭者，欲取致尊讓之意，變文耳。又《記》文非正經，故不爲例也。致館亦如之。館，舍也。使大夫授之，君又以禮親致焉。○疏曰：《聘禮》云：「大夫帥至館，卿致之。」以此知先遣大夫授館也，此大夫亦應是卿。上主君郊勞，此親致館，故知亦如之也。凡云致者，皆有幣以致之，致之使若已有然也。致飧如致積之禮。俱使大夫，禮同也。飧，食也，小禮曰飧，大禮曰饗。○疏曰：上公飧五牢，賓始至之禮，欲致館後即言之。云「如致積之禮」者，積在道已致，故云如之。云「飧，食也」者，以其芻薪米禾食之類，故云食也。《聘禮》使宰夫設飧，禮物又少，故曰小禮。饗餼有腥有牽，芻薪米禾又多，故曰大禮。及將幣，交擯，三辭，車逆拜辱。賓車進答拜，三揖三讓。每門止一相，及廟，唯上相入。賓三揖三讓，登，再拜授幣，賓拜送幣，每事如初，賓亦如之。及出，車送，三請三進，再拜，賓三還三辭，告辟。授，音受。賓，亦音賓。辟，音避。○鄭司農云：交擯，擯

者交也。賓車進答拜，賓上車進，主人乃答其拜也。及出車送三請，主人三請留賓也。三進，進隨賓也。賓三還三辭告辟，賓三還辭謝，言已辟去也。玄謂：既三辭，主君則乘車出大門而迎賓，見之而下拜其辱，賓車乃前下答拜也。三揖者，相去九十步，揖之使前也。至而三讓，讓入門也。相，謂主君擯者及賓之介也。謂之相者，於外傳辭耳，入門當以禮詔侑也。介紹而傳命者，君子於其所尊不敢質，敬之至也。每門止一相，彌相親也，君入門，介拂闥，大夫中根與闥之間，上介拂根，此爲介鴈行相隨也。止之者，絕行在後耳。賓三揖三讓，讓升也。登再拜，授幣，授當爲受，主人拜至且受玉也。每事如初，謂享及有言也。賓當爲賓，謂以鬱鬯禮賓也。上於下曰禮，敵者曰賓，《禮器》曰：「諸侯相朝，灌用鬱鬯，無籩豆之薦。」謂此朝禮畢賓賓也。三請三進，請賓就車也。主君每一請，車一進，欲遠送之也。三還三辭，主君一請者，賓亦一還一辭。○闕，魚列反。根，直庚反。行，戶剛反。○疏曰：此並在主君大門外，賓去門九十步而陳九介，主君在大門外之東陳五擯。上擯入受命，出請事，傳辭與承擯，承擯傳與末擯，末擯傳與末介，末介傳與承介，承介傳與上介，上介傳與賓，賓又傳與上介，上介傳與承介，承介傳與末介，末介傳與末擯，



末擯傳與承擯，承擯傳與上擯，上擯人告君。如是者二，謂之交擯三辭。諸「交擯」者，例皆如此也。「車逆拜辱」者，傳辭既訖，主君乘車出大門，至賓所下車，拜賓屈辱來此也。「賓車進答拜」者，賓初升車進就主君，主君下，賓亦下車，答主君拜也。「三揖」者，主君遙揖賓使前，北面三讓人大門也。云「每門止一相」者，既入門，回而東至祖廟之時，祖廟西仍有二廟。以其諸侯五廟，始祖廟在中，兩傍各有二廟，各別院爲之，則有二門，門傍皆有南北隔牆，隔牆皆通門，故得有「每門」。若不然，從大門內即至祖廟之門，何得有每門而云「門止一相」乎？故爲此解也。云「上相人」者，相人即上擯、上介。云「三揖」者，亦謂入門揖，當曲揖，當碑揖也。云「二讓登」者，至階，主君讓賓，賓讓主君，如是者二，主君先升。云「再拜授幣」者，授當爲受，賓主俱升，主人在阼階上北面拜，乃就兩楹間南面，賓亦就主君，賓授玉，主君受之，故云再拜受幣也。云「賓拜送幣」者，賓既授乃退向西階上，北面拜送幣乃降也。先鄭言主人答拜，後鄭不從者，車逆拜辱已是主人，今云車進答當是客，何得主人再答拜？所言「三請留賓」，後鄭亦不從者，行朝享禮賓訖，送賓出，禮既有限，何因更有留賓之事？云「介紹而傳命」者，此《聘義》文。按：彼介紹而傳命謂聘者旅

擯法，引證此交擯者，但紹繼也，謂介相繼而陳，則交擯皆得爲紹，故此交擯亦得紹介而傳命也。按彼注，質謂正自相當，賓主不敢正自相當，故須擯介通情也。云「君入門」以下，本《記》文。君入門不言所拂者，朝君入由闕西亦拂闕，不言之者，君特行，不與介連類，故不言也。介拂闕者，上介隨君後與大夫士介自爲鴈行於後也。《聘禮》介皆入廟門門西，北面西上，故知此君介亦入門門西，北面西上可知，故云「絕行在後」，後亦入廟也。「謂享及有言也」者，按《聘禮》享夫人下云「若有言，束帛如享禮」是也。云「上於下曰禮敵者曰儐」者，《大行人》云「王禮再裸而酢」之屬，是上於下曰禮。此諸侯云儐，是「敵者曰儐」也。致饗餼，還圭，饗食，致贈，郊送，皆如將幣之儀。還，音環，又音旋。食，音嗣，下皆同。○此六禮者，惟饗食速賓耳，其餘主君親往。親往者，賓爲主人，主人爲賓。君如有故不親饗食，則使大夫以酬幣侑幣致之。鄭司農云：還圭，歸其玉也，故公子重耳受嬖反璧。玄謂：聘以圭璋，禮也，享以璧琮，財也。已聘而還圭璋，輕財而重禮。贈送以財，既贈又送至于郊。○疏曰：按公食大夫禮，君親食之，若不親食，則以侑幣致之。《聘禮》云：「公於賓，壹食

再饗，上介壹食壹饗。若不親食，致之以侑幣，致饗以酬幣。」以此知二者皆速賓也。《聘禮》云：「君使卿，歸饗餼。」又云：「賓迎于門外。」又云：「大夫東面致命，君使卿還玉于館，賓迎于外門外，不拜，帥大夫以入。」以此二者知「賓爲主人，主人爲賓」，致贈郊送亦然可知也。《聘禮》乃君於臣，此兩君敵，明主君親爲之矣。先鄭云公子重耳事，見《左傳》僖公二十三年。但彼反璧者，義取不貪寶意，非還圭，故後鄭不從也。後鄭謂「聘以圭璋禮也」者，《聘義》云：「以圭璋聘，重禮也。」謂行聘禮也。云「享以璧琮財也」者，貢財貨時，用璧琮以致之，故云「財也」。云「贈送以財」者，《聘禮》：賓「遂行，舍于郊。公使卿贈，如覲幣。」注云：「言如覲幣，見爲反報。」是贈并送至于郊。賓之拜禮，拜饗餼，拜饗食。鄭司農云：賓之拜禮者，因言賓所當拜者之禮也。所當拜者，拜饗餼，拜饗食。玄謂：賓相去，就朝拜謝此三禮。三禮，禮之重者也。賓既拜，主君乃至館贈之。去，又送之于郊。○疏曰：按《聘禮》，饗餼、燕羞、餼獻之明日，賓皆拜於朝，將去又三拜，乘禽于朝。彼臣，故盡拜謝。此賓之拜，禮在致贈郊送之下，則不及燕羞餼獻乘禽，以其君略小惠。將去，惟拜其大禮也。

按《聘禮》：「賓三拜，乘禽於朝，遂行，舍于郊，公使卿贈。」若然，此致贈郊送在拜禮後，今設文在前者，欲取如將幣之儀，故進文在前，其贈送合在後也。云「賓既拜，主君乃至館贈之。去，又送之於郊」者，鄭以贈送之文在前，拜禮在後，恐顛倒，故此解之是其次也。賓繼主君，皆如

主國之禮。鄭司農云：賓繼主君，復主人之禮費也，故曰「皆如主國之禮」。玄謂：繼主君者，僨主君也。僨之者，主君郊勞，致館、饗餼、還圭、贈郊送之時也。如其禮者，謂玉帛皮馬也。有饌陳之積者，不如也，若饗食，主君及燕亦速焉。○費，芳味反。○疏曰：後鄭不從先鄭「復主人之禮」之說者，以主人禮費既多，非賓所能復也。後鄭以爲「僨主君」者，按《聘禮》，君遣卿勞及致館等皆僨，僨者報也。上注云「敵者曰僨」，故此報主君爲僨。按《聘禮》云：「賓至于近郊，君使卿朝服用束帛勞。」又云：「賓用束帛勞者，君使卿韋弁歸饗餼。」又云：「大夫奉束帛。」又云：「賓降授老幣，出迎大夫。」（注云：「出迎，欲僨之。」）「庭實設馬乘，賓降堂，受老束錦。賓奉幣西面，大夫東面，賓致幣。」是皆有僨法。彼兩臣有僨，此兩公有僨可知也。然彼《聘禮》君使卿致館無幣，故亦無僨。臣於君，雖他國

亦不敢速君饗食。此兩君，故不同也。主君有故，不能親以侑幣酬幣致之，亦無償。諸侯、諸伯、諸子、諸男之相爲賓也，各以其禮相待也，如諸公之儀。賓主相待之儀，與諸公同也。饗餼饗食之禮，則有降殺。○殺，色界反。○疏曰：五等諸侯以命數分爲三等，其圭璋、饗餼、殯積、步數、摯介皆降殺，備於《大行人》、《掌客》。其進退升降揖讓之儀，一與公同，故云如諸公之儀。○《司儀》。○凡諸侯之禮：上公五積，皆眡殯牽，三問皆脩，群介、行人、宰、史皆有牢。殯五牢，食四十，簠十，豆四十，鉶四十有二，壺四十，鼎，簋十有二，牲三十有六，皆陳。饗餼九牢，其死牢如殯之陳，牽四牢，米百有二十，管，醢醢百有二十，車皆陳。車米眡生牢，牢十車，車乘有五斂，車禾眡死牢，牢十車，車三秬，芻薪倍禾，皆陳。乘禽日九十雙，殷膳大牢，以及歸，三饗、三食、三燕。若弗酌，則以幣致之。凡介、行人、宰、史皆有殯饗

餼，以其爵等爲之牢禮之陳數，唯上介有禽獻。夫人致禮，八壺、八豆、八籩，膳大牢，致饗大牢，食大牢。卿皆見以羔，膳大牢。侯、伯四積，皆眡殯牽，再問皆脩。殯四牢，食三十有二，簠八，豆三十有二，鉶二十有八，壺三十有二，鼎，簋十有二，腥二十有七，皆陳。饗餼七牢，其死牢如殯之陳，牽三牢，米百管，醢醢百，皆陳。米三十車，禾四十車，芻薪倍禾，皆陳。乘禽日七十雙，殷膳大牢，再饗、<sup>①</sup>再食、再燕。凡介、行人、宰、史皆有殯饗餼，以其爵等爲之禮，唯上介有禽獻。夫人致禮，八壺、八豆、八籩，膳大牢，致饗大牢，卿皆見以羔，膳特牛。子、男三積，皆眡殯牽，壹問以脩。殯三牢，食二十有四，簠六，豆二十有四，鉶十有八，壺二十有四，鼎、

①「再」，原作「三」，據賀本改。

簋十有二，牲十有八，皆陳。饗餼五牢，其死牢如飧之陳，牽二牢，米八十筥，醢醢八十簠，皆陳。米二十車，禾三十車，芻薪倍禾，皆陳。乘禽日五十雙，壹饗、壹食、壹燕。凡介、行人、宰、史皆有飧饗餼，以其爵等爲之禮，唯上介有禽獻。夫人致禮，六壺、六豆、六籩，膳眡致饗，親見卿，皆膳特牛。斂，素口反，劉色纒反。耗，丁故反，或丈加反。乘，繩證反，下注同。食，音嗣，下「食大牢」、「再食」、「壹食」，注「不食」同。見，賢遍反，下注以意推之。○「積，皆視飧牽」，謂所共如飧，而牽牲以往不殺也。不殺則無銅鼎。簠簋之實，其米實于簠，豆實實于簠。其設，簠陳于楹內，簠陳于楹外，牢陳于門西，車、米、禾、芻、薪陳于門外，壺之有無未聞。「三問皆脩」，脩，脯也。上公三問皆脩，下句云「群介行人宰史皆有牢」，君用脩而臣有牢，非禮也，蓋著脫字失處且誤耳。飧，客始至，致小禮也。公、侯、伯、子、男飧皆飪一牢，其餘牢則腥。食者，庶羞美可食者也。其設蓋陳于楹外，東西不過四列。簠，稻梁器也。公十簠，堂上六，西夾、東夾各

二也。侯、伯八簠，堂上四，西夾、東夾各二。子、男六簠，堂上二，西夾、東夾各二。豆，菹醢器也。公四十豆，堂上十六，西夾、東夾各十二。侯、伯三十二豆，堂上十二，西夾、東夾各十。子、男二十四豆，堂上十二，西夾、東夾各六。《禮器》曰：「天子之豆二十有六，諸公十有六，諸侯十有六，上大夫八，下大夫六。」以《聘禮》差之，則堂上之數與此同。銅，羹器也。公銅四十二，侯、伯二十八，子、男十八，非衰差也。二十八，書或爲二十四，亦非也。其於衰，公又當三十，又爲無所據。依禮之大數，銅少於豆，推其衰，公銅四十二宜爲三十八，蓋近之矣。則公銅堂上十八，西夾、東夾各十；侯、伯堂上十二，西夾、東夾各八；子、男堂上十，西夾、東夾各四。壺，酒器也，其設於堂夾，如豆之數。鼎，牲器也。簠，黍稷器也。鼎十有二者，飪一牢，正鼎九與陪鼎三，皆設于西階前。簋十有二，堂上八，西夾、東夾各二。合言鼎簠者，牲與黍稷俱食之主也。牲，當爲「腥」，聲之誤也。腥，謂腥鼎也。於侯、伯云「腥」，上有「七」，其故腥字也。諸侯禮盛，腥鼎有鮮魚、鮮腊，每牢皆九爲列，設于阼階前。公腥鼎三十六，腥四牢也。侯、伯腥鼎二十七，腥三牢也。子、男腥鼎十八，腥二牢也。皆陳，陳列也。飧，門內之實備于是矣。亦有車米禾芻薪，公飧五

牢，米二十車，禾三十車。侯，伯四牢，米禾皆二十車。子，男三牢，米十車，禾二十車。芻薪皆倍其禾。饗餼，既相見致大禮也。大者既兼餼積，有生有腥有孰，餘又多也。死牢如殯之陳，亦飪一牢在西，餘腥在東也。牽，生牢也，陳于門西如積也。米橫陳于中庭，十爲列，每筥半斛，公侯伯子男黍、粱、稻皆二行。公稷六行，侯、伯稷四行，子、男二行。醯醢夾碑從陳，亦十爲列。醯在碑東，醢在碑西。皆陳於門內者，於公門內之陳也。言「車」者，衍字耳。車米，載米之車也。《聘禮》曰：「十斗曰斛，十六斗曰簋，十簋曰秉。」每車秉有五簋，則二十四斛也。禾，稟實并刈者也，《聘禮》曰：「四秉曰筥，十筥曰稭，十稭曰秬。」每車三秬，則三十稭也。稭，猶束也。米禾之秉筥，字同數異。禾之秉，手把耳。筥，讀爲棟栢之栢，謂一積也。皆陳，橫陳門外者也。米在門東，禾在門西。芻薪雖取數于禾，薪從米，芻從禾也。乘禽，乘行群處之禽，謂雉鴈之屬，於禮以雙爲數。殷，中也。中又致膳，示念賓也。若弗酌，謂君有故不親饗食燕也。不饗則以酬幣致之，不食則以侑幣致之。凡介、行人、宰、史衆臣，從賓者也。行人主禮，宰主具，史主書，皆有餼饗餼，尊其君以及其臣也。以其爵等爲之牢禮之陳數：爵卿也，則殯二牢，饗餼五牢，大夫也，則殯大牢，

饗餼三牢，士也，則殯少牢。饗餼，大牢也。此降小禮，豐大禮也。以命數，則參差難等，略於臣，用爵而已。夫人致禮，助君養賓也。籩豆陳于戶東，壺陳于東序。凡夫人之禮，皆使下大夫致之。於子、男，云膳視致饗，言夫人致膳於小國君，以致饗之禮，則是不復饗也。饗有壺酒，卿皆見者，見于賓也。既見之，又膳之，亦所以助君養賓也。卿見又膳，此《聘禮》卿、大夫勞賓餼賓之類與？於子、男，云「親見卿皆膳特牛」，見讀如卿皆見之見，言卿於小國之君，有不造館見者，故造館見者乃致膳。鄭司農說牽云：「牲可牽行者也，故《春秋傳》曰：『餼牽竭矣。』」秬，讀爲秬秠麻答之秬。○飪，而甚反。衰，初危反，下同。差，初佳反，又初宜反。倍，音裴。行，戶剛反，下以意推之。從，子容反。稟，占老反。並，必政反。稭，本又作「總」，子工反，又音摠。栢，音呂。積，才計反。參，初林反。差，初宜反。復，扶又反。勞，力報反。造，七報反。秬，徐音姊。○疏曰：云「上公五積，皆眠殯牽」者，公國自相朝，是上公之禮有五積皆視殯。一積眠一殯，殯五牢，五積則二十五牢。言牽者，數雖眠殯，殯則殺，積全不殺，並生致之，故云牽。「侯伯四積」，亦皆眠殯牽，殯四牢，一積眠一殯，則一積四牢，摠十六牢，亦牽不殺。「子男三積」，積亦眠殯，殯三牢，一

積三牢，三積九牢，亦牽之不殺也。必牽之不殺者，以其在道分置豫往，故不殺之也。既云「不殺則無錮鼎」者，錮鼎即陪鼎是也。但殺乃有錮鼎，不殺則無錮鼎可知，侯、伯、子、男皆然。鄭云「簠簋之實」已下，皆約《公食大夫》解之。鄭云「三問皆脩，脩，脯也」，對文，「脩」是鍛脩加薑桂捶之者，「脯」，乾肉薄者，散文脩，脯一也。云「著脫字失處」者，按下文「凡介，行人，宰，史」皆在饗食燕下，此特在上，或見下文脫此語，著於此，或於下著訖，此剩不去，故云然也。下文皆云「凡介」，此云「群介」，故誤耳。云「小禮」者，按《聘》賓「大夫帥至館，卿致館」即云「宰夫朝服設餼」，是其客始至之禮。言小禮者，對饗餼爲大禮也。云「公、侯、伯、子、男餼皆飪一牢」，其餘牢則腥者，下惟言腥不言飪，此有錮及鼎皆爲飪一牢而言，以是經雖不言飪，須言飪之矣。云「其餘牢則腥」，腥之數備於下也。云「食者，庶羞之美陳于楹外，東西不過四列」者，前所陳皆約《公食大夫》致食之禮，今按《公食》「若不親食，庶羞陳于碑內」者，設餼之時堂上皆有正饌，無容庶羞之處，楹外既空，不須向碑內及堂下，故疑在楹外陳之，十以爲列，故四列也。《公食》陳于碑內者，由饗陳于楹外。故在下也。云「簠盛稻粱」以下，皆

約《公食》及《聘禮》致饗餼文裁之。云「公四十豆堂上十六，至「各六」，鄭以堂上豆數，取《聘禮》致饗餼於上大夫八豆，下大夫六豆，並是堂上豆數。又取《禮器》「天子之豆二十有六，諸公十有六，諸侯十有二」，謂侯、伯、子、男同，則亦是堂上豆數可知。以此文公言四十，侯、伯三十二，子、男二十四，其堂上豆數既約《聘禮》與《禮器》東西多少，鄭以意差之，與此同也。云「錮羹器也」者，錮，器名，錮器所以盛腳臠臠三等之羹，故爲錮羹。云「公錮四十二侯伯二十八子男十八非衰差也」者，衰差之法，上下節級似，若九，若七，若五，校一節是衰差。今公四十二，侯、伯二十八，子、男十八，公於侯、伯、子、男大縣絕，故云非衰差也。云「二十八，書或爲二十四，亦非也」者，侯、伯若二十四，爲比公四十二，校十八，又以二十四比子、男十八，校六，亦非其類，故云「亦非」也。云「推其衰，公錮四十二宜爲三十八，蓋近之」者，子、男十八，侯、伯二十八，公三十八，以十爲降殺，則是等差蓋近也。云「公錮堂上十八，西夾、東夾各十，侯、伯堂上十二，西夾、東夾各八，子、男堂上十，西夾、東夾各四」，知如此差者，亦約《聘禮》致饗餼，兼以意準量而言。云「鼎，牲器也」者，謂亨牲體之器。云「簠，黍稷器也」者，「鼎十有二者，飪一牢，正鼎九與陪鼎三」，皆設于西

階前」者，其陪鼎三設于內廉。云「簋十二者，堂上八，西夾、東夾各二，知設如此者，約《聘禮》而知之也。牢鼎九者，謂牛、羊、豕、魚、腊、膚與腸胃、鮮魚、鮮腊，陪鼎三者，腳、臠、臠也。云「合言鼎簋，以牲與黍稷俱食之主」者，黍稷與衆饌為主，牲與羞物為主，是俱得爲食之主也。此五等諸侯同簋十一，按《聘禮》致饗餼，堂上八簋，東西夾各六簋，總二十簋。彼臣多，此君少者，禮有損之而益故也。云「牲，當爲腥，聲之誤也。腥，謂腥鼎也。於侯，伯云腥二十有七，其故腥字」者，子、男亦云牲十八，是亦當爲腥也。云「諸侯禮盛，腥鼎有鮮魚、鮮腊」云云者，此皆約《聘禮》設餼而言。按：彼「飪一牢，在西，鼎九，羞鼎三，腥一牢，在東，鼎七」，致饗餼云「腥二牢，鼎二七，無鮮魚、鮮腊，設于阼階前，西面陳，如飪鼎二列」，此云三十六，故知有鮮魚、鮮腊也。云「餼，門內之實備」仍有車米等，是以云「亦有車米禾芻薪」也。云「公餼五牢，米二十車，禾三十車」已下，皆約饗餼死牢而言。以其饗餼云死牢如餼之陳，上公五牢死，侯、伯四牢死，子、男三牢死，皆如餼之陳，明此米禾數如此。云「芻薪皆倍其禾」者，亦約饗餼禮也。若然，按《聘禮》米禾皆二十車者，彼大夫禮，豐小禮，大夫餼一牢，故米禾皆抵之，米禾各二十車也。云「大者既兼餼積，有生有腥

有孰，餘又多也」者，假令上公饗餼九牢，五牢死，四牢牽，上公五積皆抵餼牽，則是一積五牢。言兼餼，死五牢與餼同。若言兼積，則止兼四而不能盡。今乃言兼積者，以其牽與積同，故云兼之也。侯、伯、子、男皆兼積不盡。言「餘又多」者，謂米、禾、芻、薪、醢醢、芻米之屬。云「牽，生牢也，陳于門西如積」者，亦橫陳于門西而東上。云「米橫陳于中庭，十爲列，每宮半斛」，知然者，前餼之陳及積之陳皆約《聘禮》致饗餼法，今於此文積在前已說，故以此饗餼向前如之，故云「如積也」。言如積，則亦如聘禮饗餼也。今此自米已下，還約《聘禮》致饗餼法。云「公、侯、伯、子、男黍粱稻皆二行，公稷六行，侯、伯稷四行，子、男稷二行」者，彼云「米百筥，筥半斛，設于中庭，十以爲列，北上。黍粱稻皆二行，稷四行」，此以增稷，餘不增，故知公稷六行。子、男米八筥，黍、粱、稻各二行，更得二即足，故知稷二行。云「醢醢夾碑從陳，亦十爲列。醢在碑東，醢在碑西」者，彼注云：「夾碑在庭之中央也。醢在東，醢殺，陽也。醢肉，陰也。言夾碑，故知從陳。然侯、伯醢醢百甔，米百筥，上介筥及甔如上賓，上介四人，米百筥，此數多于子、男，與侯、伯等者，上公醢醢百二十甔，與王舉百二十甔同，故《鄭志》

云此公乃二王後。<sup>①</sup>如是，王之上公與侯、伯俱同百饔，子、男八十饔，其筭米皆同饔數，此是尊卑之差。至於《聘禮》，乃是臣法，自爲一禮，不相與，亦是損之而益。「言車衍字」者，言車，載米之車不合在醢醢下言之。又按「侯、伯、子、男醢醢」下皆無車字，故知衍字也。「謂一檮也」者，檮即《詩》云「此有不斂穧」，檮即鋪也。云「於禮以雙爲數」者，即此九十、五十及士中日則二雙，皆以雙爲數是也。云「若弗酌」以下，皆約《聘禮》文。不言致燕者，饗食在廟，燕在寢，禮惟言致饗食者，以合在廟嚴凝之事，不親，即須致之。燕禮褻，不親酌蓋不致也。云「凡介、行人」，鄭云「行人主禮，宰主具，史主書」者，按《王制》云「太史典禮，執簡記」，《太史》職亦云「執其禮事」，與此史主書、行人主禮違者，大史在國則專主書，故《曲禮》云：「史載筆，士載言。」此云史，止謂大史之屬官，以其有爵等，故知也。云「行人主禮」者，主賓客之禮，大行人之類是也。按《聘禮》云：「史讀書，宰執書，告備具于君。」又掌饌具，故《公食大夫》云：「宰夫具饌于房」，是掌具也。云「爵卿也，則飧二牢，饗餼五牢」已下，皆約《聘禮》賓之卿、上介之大夫、七介四人，歸饗餼降殺而言也。云「此降小禮，豐大禮也」者，小禮謂飧，飧則去君遠矣，并乘禽之等，皆是小禮也。大禮，謂

饗餼，卿五牢，子、男卿與君等，是豐大禮也。云「以命數，則參差難等，略於臣，用爵而已」者，依命，公、侯、伯卿三命，大夫再命，士一命，子、男卿再命，大夫一命，士不命，并有大國孤一人四命。是從孤已下，通一命，不命有五等。若以此命數五等爲之，則參差難可等級，略於臣用爵而已。爵則有三等，易爲等級也。言「略於臣，用爵」，則君不依爵而用命，即諸侯爵五等，命惟三等，《大行人》、《掌客》皆依命是也。云「夫人致禮」以下，見《聘禮》致饗餼，「下大夫韋弁歸禮，堂上籩豆設於戶東，西上，二以並，東陳（注設於戶東，辟饌位），壺設于東序，北上，南陳，醑、黍、清皆兩壺」。約此故知之也。若然，不使卿者，按《內宰》云：「致后之賓客之禮。」注：「謂諸侯朝覲及女賓之賓客。」內宰是下大夫，王后尚使下大夫，況諸侯夫人乎？故知使下大夫也。云「於子，男云膳視致饗」至「饗有壺酒者，公、侯、伯夫人致禮則云八壺，八豆，八籩，與膳大牢，致饗大牢三者各別。於子，男夫人則云膳視致饗，鄭云「饗有壺酒」，則致膳無酒矣，故云饗有酒。若然，子、男夫人於諸侯惟有二禮，以《聘禮》夫人於聘大夫直有籩豆壺，又不致饗，是其差也。云「卿皆見」至「亦所以助君養賓」，言亦者，亦夫人也。

①「云」，原作「去」，據元明本、寬文本、賀本改。



云「卿既見又膳，此《聘禮》大夫勞賓餼賓之類與」者，按《聘禮》：「畢，賓即館，卿大夫勞賓，賓不見。大夫奠鴈再拜，上介受。」（注云：「不言卿，卿與大夫同執鴈，下見於國君。」）《周禮》：「凡諸侯之卿見朝君，皆執羔。」勞上介亦如之。」又云：「餼賓大牢，米八簋，上介亦如之。」此朝君有膳無勞餼，聘客有勞餼無膳，明此事相當，故云「勞賓餼賓之類與」。云「於子、男云親見卿皆膳特牛，見讀如卿皆見之見」者，上公、侯、伯直云「卿皆見以羔」，於子、男即云「親見卿」，作文有異。此言「親見卿」，似朝君親自來見卿，有此嫌，故讀從上文「卿皆見」以兼之，明此見亦是卿見朝君。三卿之內，有見者有不見者，若故造館見則致膳，若不故造館見則不致膳也。云「秬，讀為秬秠麻答之秬」者，時有此言，故從之。《詩》云：「萬億及秬。」秬亦數之總號。答是鋪名，刈麻者數把共為一鋪。言此者，見秬為束之總號之意也。○《掌客》。

## 諸侯相朝義第四十二 邦國禮五之下

記

諸侯相朝之禮，各執其圭瑞，服其服，乘

其輅，建其旌旗，施其樊纓，從其貳車，<sup>①</sup>委積之以其牢禮之數，所以別義也。介紹而相見，君子於其所尊，不敢質，敬之至也。君使大夫迎于境，卿勞于道，君親郊勞致館，及將幣，拜迎于大門外而廟受，北面拜飢，所以致敬也。三讓而後升，所以致尊讓也。敬讓也者，君子之所相接也。諸侯相接以敬讓，則不相侵陵也。此天子之所以養諸侯，兵不用而諸侯自為正之具也。君親致饗既，還圭，饗食，致贈，郊送，所以相與習禮樂也。諸侯相與習禮樂，則德行修而不流也。故天子制之，諸侯務焉。《大戴禮記》。

儀禮經傳通解卷第二十三終

① 「貳」，原作「義」，據寬文本、賀本改。

## 儀禮集傳集註卷第二十四<sup>①</sup>

覲禮

王朝禮一之上

記：邦畿方千里，其外方五百里謂之侯服，歲壹見，其貢祀物。又其外方五百里謂之甸服，二歲壹見，其貢嬪物。又其外方五百里謂之男服，三歲壹見，其貢器物。又其外方五百里謂之采服，四歲壹見，其貢服物。又其外方五百里謂之衛服，五歲壹見，其貢財物。又其外方五百里謂之要服，六歲壹見，其貢貨物。見，賢遍反，下同。嬪，婢人反。要，於嬌反。○要服，蠻服也。此六服去王城三千五百里，相距七千里，公、侯、伯、子、男封焉。其朝貢之歲，四方各四分趨四時而來，或朝

春，或宗夏，或覲秋，或遇冬。祀貢者，犧牲之屬。故書「嬪」作「頻」。鄭司農云：「嬪物，婦人所爲物。」玄謂：「絲枲也。器物，尊彝之屬。服物，玄纁絺纈也。材物，八材也。貨物，龜貝也。」○《大行人》。○九州之外

謂之蕃國，世壹見，各以其所貴寶爲贄。

九州之外，夷服、鎮服、蕃服也。《曲禮》曰：「其東夷、北狄、西戎、南蠻，雖大曰子。」《春秋傳》曰：「杞伯以夷禮，故曰子。」然則九州之外，其君皆子、男也。無朝貢之歲，父死子立，及嗣王即位，乃一來耳。名以其所貴寶爲贄，則蕃國之君無執玉瑞者，是謂其君爲小賓，臣爲小客。所貴寶見傳者，若犬戎獻白狼、白鹿是也。其餘則《周書·王會》備焉。○《大行人》。○諸侯之於

天子也，比年一小聘，三年一大聘，五年一朝。比，毗志反。○比年，每歲也。小聘，使大夫。大聘，使卿。朝，則君自行。然此大聘與朝，晉文霸時所制也。虞、夏之制，諸侯歲朝。周之制，侯、甸、男、采、

① 以下各卷均標《儀禮集傳集註》，以未經朱子審定。今一仍其舊，以下不一出校。

衛、要服六者，各以其服數來朝。○《王制》。○天子無事，與諸侯相見曰朝。事，謂征伐。○天子當依而立，諸侯北面而見天子，曰覲。天子當宁而立，諸公東面，諸侯西面，曰朝。依，於起反。宁，珍呂反。○諸侯春見曰朝，受摯於朝，受享於廟，生氣文也。秋見曰覲，一受之於廟，殺氣質也。朝者位於內朝而序進，覲者位於廟門外而序入，王南面立于依宁而受焉。夏宗依春，冬遇依秋。春秋時齊侯唁魯昭公以遇禮相見，取易略也。覲禮今存，朝、宗、遇禮今亡。○唁，音彦。○《曲禮》。○《大宗伯》：以賓禮親邦國，春見曰朝，夏見曰宗，秋見曰覲，冬見曰遇，時見曰會，殷見曰同，時聘曰問，殷覲曰視。覲，他弔反。○此六禮，以諸侯見王爲文。六服之內，四方以時分來，或朝春，或宗夏，或覲秋，或遇冬，名殊禮異，更遞而徧。朝，猶朝也，欲來之早。宗，尊也，欲其尊王。覲之言勤也，欲其勤王之事。遇，偶也，欲其若不期而俱至。時見者，言無常期。諸侯有不順服者，王將有征討之事，

則既朝覲，王爲壇於國外，合諸侯而命事焉，《春秋傳》曰「有事而會，不協而盟」是也。殷，猶衆也。十二歲王如不巡守，則六服盡朝。朝禮既畢，王亦爲壇，合諸侯以命政焉。所命之政，如王巡守。殷見，四方四時分來，歲終則徧。時聘者，亦無常期，天子有事乃聘之焉。竟外之臣，既非朝歲，不敢瀆爲小禮。殷覲，謂一服朝之歲，以朝者少，諸侯乃使卿以大禮衆聘焉，一服朝在元年、七年、十一年。○《大行人》：掌大賓之禮及大客之儀，以親諸侯。大賓，要服以內諸侯。大客，謂孤卿。春朝諸侯而圖天下之事，秋覲以比邦國之功，夏宗以陳天下之謨，冬遇以協諸侯之慮，時會以發四方之禁，殷同以施天下之政。六事者，以王見諸侯爲文。圖、比、陳、協，皆考績之言。王者春見諸侯，則圖其事之可否；秋見諸侯，則比其功之高下；夏見諸侯，則陳其謀之是非；冬見諸侯，則合其慮之異同。六服以其朝歲，四時分來，更迭如此而徧。時會，即時見也，無常期。諸侯有不順服者，王將有征討之事，則既朝，王命爲壇於國外，合諸侯而發禁命事焉。禁，謂九伐之法。

殷同，即殷見也。<sup>①</sup>王十二歲一巡守，若不巡守則殷同。殷同者，六服盡朝。既朝，王亦命爲壇於國外，合諸侯而命其政。政，謂邦國之九法。殷同，四方四時分來，歲終則徧矣。九伐九法，皆在《司馬》職。《司馬法》曰：「春以禮朝諸侯，圖同事；夏以禮宗諸侯，陳同謀；秋以禮覲諸侯，比同功；冬以禮遇諸侯，圖同慮。時以禮會諸侯，施同政；殷以禮宗諸侯，發同禁。」○《小行人》：「令諸侯春入貢，秋獻功，王親受之，各以其國之籍禮之。」貢，六服所貢也。功，考績之功也。秋獻之，若今計文書斷於九月，其舊法。

### 經十

覲禮。○至於郊。郊，謂近郊，去王城五十里。

右至郊。○記：《司關》：凡四方之

賓客敏關，則爲之告。敏，苦狗反。爲，于僞反，

後同。○賓客，謂朝聘者。敏關，猶謁關人也。鄭司農

說以《國語》曰：「周之《秩官》有之曰：敵國賓至，關尹

以告，行理以節逆之。」○《小行人》：逆勞于畿。

勞，老報反。○《訝士》：與行人送逆之。人

於國則爲之前驅而辟，野亦如之。訝，五嫁

反。辟，匹亦反。○送逆，謂始來及去也。出入，謂朝

覲於王時也。《春秋傳》曰：「晉侯受策以出，出入三覲。」

人國人野，自以時事。○《掌訝》：掌邦國之等

籍，以待賓客。等九儀之差數。戒官脩委積，

與士逆賓于疆，爲前驅而入。委，烏僞反。

積，子賜反，後同。○官，謂牛人、羊人、舍人、委人之

屬。士，訝士也。既戒，乃出迎賓。及宿則令聚

橐，橐，音託。○令，令野廬氏。及委則致積。以

王命致于賓。○《環人》：送逆，以路節達諸

四方。路節，旌節也。四方，圻上。舍則授館，令

聚橐，有任器則令環之。令，令野廬氏。鄭司農

云：四方之人有任器者，則環人主令殉環守之。○殉，

徐音循，又辭俊反。凡門關無幾，送逆及疆。

鄭司農云：門關不得苛留環人也。玄謂：環人送逆之，

則賓客出入不見幾。○《野廬氏》：達國道路，

①「也」，原作「人」，據元明本、寬文本、賀本改。

至于四畿。達，謂巡行通之，使不陷絕也。去王城五百里曰畿。令守涂地之人聚櫟之，有相翔者誅之。守涂地之人，道所出廬宿旁民也。相翔，猶昌翔觀伺者也。鄭司農云：聚櫟之，聚擊櫟以宿衛之也。有姦人相翔於賓客之側，則誅之，不得令寇盜賓客。○《大司徒》：大賓客，<sup>①</sup>令野脩道委積。《小司徒》：小賓客，<sup>②</sup>令野脩道委積。令，令遣人使爲之也。小賓客，諸侯之使臣也。少曰委，多曰積，皆所以給賓客。○《遂人》：令脩野道而委積。委積於廬宿市。○《遂師》：巡其道脩，庀其委積。庀，匹爾反。○巡其道脩，行治道路也。故書「庀」爲「比」，鄭司農云：讀爲庀。庀，具也。○《遺人》：掌其道路之委積，凡國野之道：十里有廬，廬有飲食；三十里有宿，宿有路室，路室有委；五十里有市，市有候館，候館有積。遺，唯季反。○廬，若今野候，徙有序也。宿，可止宿，若今享有室矣。候館，樓可

觀望者也。一市之間，有三廬一宿。○《委人》：

以稍聚待賓客。」稍，所教反。○聚，凡畜聚之物。

瓜瓠葵芋，禦冬之具也。

○《牛人》：共其牢禮

積膳之牛。共，音恭，下同。○牢禮，飡饗也。積，

所以給賓客之用，若《司儀》職曰「主國五積」者也。膳，

所以閒禮賓客，若《掌客》云「殷膳太牢」。

○《羊

人》：共其灋羊。灋羊，飡饗積膳之羊。

○《司

門》：「凡四方之賓客造焉，則以告。造，猶

至也。告，告於王而止客以俟逆。

王使人皮弁用璧勞，侯氏亦皮弁迎于帷

門之外，再拜，《小行人》職曰：「凡諸侯入王，則逆勞

于畿。」則郊勞者，大行人也。皮弁者，天子之朝朝服也。

璧無束帛者，天子之玉尊也。不言諸侯言侯氏者，明國殊

舍異，禮不凡之也。郊舍狹寡，爲帷宮以受勞。《掌舍》職

曰：「爲帷宮，設旌門。」使者不答拜，遂執玉，二

① 「大司徒大賓客」，原作「大賓客大司徒」，據賀本改。

② 「小司徒小賓客」，原作「小賓客小司徒」，據賀本改。

揖。至于階，使者不讓，先升。侯氏升聽命，降，再拜稽首，遂升受玉。不答拜者，爲人使不當其禮也。不讓先升，奉王命尊也。升者，升壇。使者東面致命，侯氏東階上西面聽之。使者左還而立，侯氏還壁，使者受。侯氏降，再拜稽首，使者乃出。左還，還南面，示將去也。立者，見侯氏將有事於己，侯之也。還玉，重禮。侯氏乃止使者，使者乃入。侯氏與之讓升，侯氏先升，授几。侯氏拜送几，使者設几，答拜。侯氏先升，賓禮統焉。几者，安賓，所以崇優厚也。上介出止使者，則已布席也。侯氏用束帛乘馬，僎使者，使者再拜受，侯氏再拜送幣。僎使者，所以致尊敬也。拜者各於其階。使者降，以左驂出，侯氏送于門外，再拜，侯氏遂從之。駢馬曰驂。左驂，設在西者。其餘三馬，侯氏之士遂以出授使者之從者于外。從之者，遂隨使者以至朝。

右郊勞。○記：《大行人》：以九儀

辨諸侯之命，等諸臣之爵，以同邦國之禮，而待其賓客。上公之禮，出入五積，三問三勞。侯、伯之禮，出入四積，再問再勞。子、男之禮，出入三積，壹問壹勞。九儀：謂命者五，公、侯、伯、子、男也；爵者四，孤、卿、大夫、士也。出入，謂從來訖去也。每積有牢禮米禾芻薪，凡數不同者，皆降殺。問，問不恙也。勞，謂苦倦之也。皆有禮，以幣致之。○《小行人》：眠館，將幣，爲承而擯。眠館，致館也。承，猶丞也。王使勞賓於郊，致館於賓，至將幣，使宗伯爲上擯，皆爲之承而擯之。

天子賜舍，以其新至，道路勞苦，未受其禮，且使即安也。賜舍，猶致館也，所使者司空與？小行人爲承擯。今文「賜」作「錫」。曰：「伯父，女順命于王所，賜伯父舍。」女，音汝。○此使者致館辭。侯氏再拜稽首，受館。僎之束帛乘馬。王使人以命致館，無禮，猶僎之者，尊王使也。侯氏受館於外，既則僎使者於內。

右賜舍。○記：五官之長曰「伯」，是

職方，長，丁丈反，下同。○謂爲三公者，《周禮》：「九

命作伯。」職，主也。是伯分主東西者，《春秋傳》曰：「自

陝以東周公主之，自陝以西召公主之，一相處于內。」

是，或爲「氏」。其擯於天子也，曰「天子之

吏」。擯者辭也。《春秋傳》曰：「王命委之吏」。謂

三公也。天子同姓謂之「伯父」，異姓謂之

「伯舅」。自稱於諸侯曰「天子之老」，於外

曰「公」，於其國曰「君」。稱之以父與舅，親之之

辭也。外，自其私土之外，天子畿內。九州之長人

天子之國曰「牧」。每一州之中，天子選諸侯之賢

者以爲之牧也，《周禮》曰：「乃施典於邦國而建其牧。」

天子同姓謂之「叔父」，異姓謂之「叔舅」，

於外曰「侯」，於其國曰「君」。牧尊於大國之

君而謂之叔父，辟伯也。亦以此爲尊。禮或損之而益，

謂此類也。外，自其國之外，九州之中，曰侯者，本爵

也，二王之後不爲牧。○《曲禮》下。○《掌訝》：

賓客至于國，賓入館，次于舍門外，待事于

客。次，如今官府門外更衣處。待事于客，通其所求

索。凡賓客，諸侯有卿訝，卿有大夫訝，大

夫有士訝，士皆有訝。此謂朝覲聘問之日，王所

使迎賓客于館之訝。凡訝者，賓客至而往，詔

相其事而掌其治令。○《訝士》：賓客居

館，則帥其屬而爲之蹕，誅戮暴客者。客

出入則道之，有治則贊之。蹕，音畢。○出入，

謂朝覲於王時也。《春秋傳》曰：「晉侯受策以出，出入

三覲。」

天子使大夫戒曰：「某日，伯父帥乃初

事。」大夫者，卿爲訝者也。《掌訝》職曰：「凡訝者，賓客

至而往，詔相其事。」戒，猶告也。其爲告，使順循其事也。

初，猶故也。侯氏再拜稽首。受覲日也。

右戒日。

諸侯前朝，皆受舍于朝，同姓西面北上，

異姓東面北上。言諸侯者，明來朝者衆矣。顧其人

覲，不得並耳。受舍于朝，受次于文王廟門之外。《聘禮》記曰：「宗人授次，次以帷，少退于君之次。」則是次也。言舍者，尊舍也，天子使掌次爲之。諸侯上介先朝受焉。此覲也，言朝者，覲遇之禮雖簡，其來之心猶若朝也。分別同姓，異姓，受之將有先後也。《春秋傳》曰：「寡人若朝于薛，不敢與諸任齒。」則周禮先同姓。

### 右受舍。

侯氏裨冕，釋幣于禰。禰，乃禮反。裨，婢支反，下同。○將覲，質明時也。裨冕者，衣裨衣而冠冕也。裨之爲言裨也。天子六服，大裘爲上，其餘爲裨，以事尊卑服之，而諸侯亦服焉。上公衮，無升龍；侯、伯鷩；子、男毳，孤絺；卿、大夫玄，此差司服所掌也。禰，謂行主遷主矣，而云禰，親之也。釋幣者，告將覲也。其釋幣，如聘大夫將受命釋幣于禰之禮。既則祝藏其幣，歸乃埋之於桃西階之東。

### 右釋幣于禰。○記：諸侯裨冕以

朝：公之服自衮冕而下，如王之服；侯、伯之服自鷩冕而下，如公之服；子、男之服自毳冕而下，如侯、伯之服；孤之服自

希冕而下，如子、男之服；卿大夫之服自玄冕而下，如孤之服。此明朝聘天子及助祭之

服，諸侯自相朝聘皆皮弁服。鄭司農云：衮，卷龍衣也。鷩，裨衣也。毳，屬衣也。玄謂：《書》曰：「予欲觀古人之象，日月星辰，山龍華蟲，作繪；宗彝、藻、火、粉米、黼、黻希繡。」此古天子冕服十二章。華蟲，五色之蟲，《續人》職曰：「鳥獸蛇雜四時五色以章之謂」是也。希，讀爲絺，或作「黼」，字之誤也。王者相變，至周而以日月星辰畫於旌旗，所謂三辰旌旗，昭其明也。而冕服九章，登龍於山，登火於宗彝，尊其神明也。九章：初一日龍，次二曰山，次三曰華蟲，次四曰火，次五曰宗彝，皆畫以爲繡，次六曰藻，次七曰粉米，次八曰黼，次九曰黻。皆希以爲繡。則衮之衣五章，裳四章，凡九章也。鷩畫以雉，謂華蟲也，其衣三章，裳四章，凡七也。毳畫虎，謂宗彝也，其衣三章，裳二章，凡五也。希刺粉米無畫也，其衣一章，裳二章，凡三也。玄者，衣無文，裳刺黻而已，是以謂玄焉。凡冕服，皆玄衣纁裳。○《司服》。

乘墨車，載龍旂弧韞，乃朝以瑞玉，有



纁。纁，音獨。纁，音早。○墨車，大夫制也。乘之者，入天子之國，車服不可盡同也。交龍爲旂，諸侯之所建。弧，所以張縵之弓也，弓衣曰鞬。瑞玉，謂公桓圭，侯信圭，伯躬圭，子穀璧，男蒲璧。纁，所以藉玉，以韋衣木，廣袤各如其玉之大小，以朱白蒼爲六色。今文「玉」爲「圭」，「纁」或爲「纁」。天子設斧依於戶牖之間，左右几。依，於豈反。○依，如今綈素屏風也。有繡斧文，所以示威也。斧謂之黼。几，玉几也。左右者，優至尊也。其席莞席紛純，加纁席畫純，加次席黼純。天子衮冕，負斧依。衮衣者，裨之上也。纁之爲九章。其龍，天子有升龍，有降龍。衣此衣而冠冕，南鄉而立，以俟諸侯見。嗇夫承命，告于天子。嗇夫，蓋司空之屬也。爲未擯，承命於侯氏。下介傳而上，上擯以告天子。天子見公，擯者五人；見侯、伯，擯者四人；見子、男，擯者三人；皆宗伯爲上擯。《春秋傳》曰：「嗇夫馳。」天子曰：「非他，伯父實來，予一人嘉之。伯父其人，予一人將受之。」言「非他」者，親之辭。嘉之者，美之辭也。上擯又傳此而下至嗇夫，侯氏之下介受之，傳而上，上介以告

其君，君乃許入。今文「實」作「寔」，「嘉」作「賀」。侯氏入門右，坐奠圭，再拜稽首，入門右，執臣道不敢由賓客位也。卑者見尊，奠摯而不授。擯者謁。謁，猶告也。上擯告以天子前辭，欲親受之，如賓客也。其辭所易者，曰「伯父其升」。侯氏坐取圭，升致命，王受之玉。侯氏降階東，北面再拜稽首，擯者延之曰：「升。」升成拜，乃退。擯者請之，侯氏坐取圭，則遂左降拜稽首送玉也。從後詔禮曰延。延，進也。

右行覲禮。○記：偏駕不入王門。在

旁與己同曰偏。同姓金輅，異姓象輅，四衛革輅，蕃國木輅。駕之與王同，謂之偏。駕不入王門，乘墨車以朝是也。偏駕之車，舍之於館與？○《司常》：交龍

爲旂，諸侯建旂。諸侯畫交龍，一象其升朝，一象其下復也。○《典瑞》：公執桓圭，侯執信

圭，伯執躬圭，纁皆三采三就；子執穀璧，男執蒲璧，纁皆二采再就；以朝覲宗遇會同于王。信，音身。○三采，朱、白、蒼。二采，朱、綠

也。鄭司農云：以圭璧見于王。《覲禮》曰：「侯氏入門右，坐奠圭，再拜稽首。」侯氏見于天子，春日朝，夏日宗，秋日覲，冬日遇，時見曰會，殷見曰同。○《聘禮》記：所以朝天子，圭與纁皆九寸，剡上寸半，厚半寸，博三寸，纁三采六等，朱、白、蒼；問諸侯，朱、綠纁，八寸：皆玄纁繫，長尺，絢組。剡，以冉反。絢，呼縣反。○采成文曰絢。繫，無事則以繫玉，因以爲飾，皆用五采絢，上以玄，下以絳爲地。今文「絢」作「約」。○《司几筵》：凡大朝覲，王位設黼依，依前南鄉設莞筵紛純，加纁席畫純，加次席黼純，左右玉几。依，於起反。鄉，許亮反。純，章允反。○斧謂之黼，其黼白黑采，以絳帛爲質。依，其制如屏風然。於依前爲王設席，左右有几，優至尊也。鄭司農云：紛，讀爲幽，又讀爲和粉之粉，謂白纁也。純，讀爲均服之均，緣也。纁，讀爲藻率之藻。次席，虎皮爲席。《書·顧命》曰：「成王將崩，命太保、芮伯、畢公等被冕服，馮玉几。」玄謂：紛如綬，有文而狹者。纁席，削蒲莢，展之，

編以五采，若今合歡矣。畫，謂雲氣也。次席，桃枝席，有次列成文。○記：几俟于東箱。王即席，乃設之也。東箱，東夾之前，相翔待事之處。○《肆

師》：大賓客，淊筵几，築鬻。鬻，音煮。○築

香草煮以爲鬻，此王所以禮賓客。○覲禮，天子不

下堂而見諸侯。正君臣也。下堂而見諸侯，

天子之失禮也，由夷王以下。夷王，周康王之

玄孫之子也，時微弱不敢自尊於諸侯。○《郊特牲》。

○君天下曰「天子」，朝諸侯，分職，授政，

任功曰「予一人」。皆擯者辭也。天下，謂外及四

海也。漢於蠻夷稱天子，於王侯稱皇帝。《覲禮》曰：

「伯父寔來，余一人嘉之。」余，予，古今字。諸侯見

天子曰「臣某侯某。」見，音現。○嗇夫承命告天

子辭也。其爲州牧，則曰：天子之老臣某侯某奉圭請

覲。○《曲禮》。○《大宗伯》：朝覲會同，則

爲上相，相，息亮反，下同。○相，詔王禮也。出接賓

曰擯，人詔禮曰相。相者五人，卿爲上擯。王命諸

侯則儐。儐，進之也。王將出命，假祖廟，立依前南鄉。儐者進，當命者延之，命使登，內史由王右以策命之。降，再拜稽首，登，受策以出。此其略也。○《司

儀》：掌九儀之賓客擯相之禮，以詔儀容，辭令，揖讓之節。以詔者，以禮詔王。

四享，皆束帛加璧，庭實唯國所有。四，

當爲「三」。古書作「三」，四或皆積畫，此篇又多四字，字相似，由此誤也。《大行人》職曰：「諸侯廟中將幣，皆三享。」其禮差又無取於四也。初享或用馬，或用虎豹之皮。其次享，三牲魚腊，籩豆之實，龜也金也，丹漆絲纁竹箭也，其餘無常貨。此地物非一國所能有，唯所有分爲三享，皆以璧帛致之。奉束帛匹馬卓上，九馬隨之，中庭西上，奠幣，再拜稽首。卓，讀如卓王孫之卓，卓猶的也。以素的一馬以爲上，書其國名，後當識其何產也。馬必十匹者，不敢斥王之乘，用成數，敬也。擯者曰：「予一人將受之。」亦言王欲親受之。侯氏升致命，王撫玉。侯氏降自西階，東面授宰幣，西階前再拜稽首，以馬出，授人，九馬隨之。王

不受玉，撫之而已，輕財也。「以馬出」，隨侯氏出授王人於外也。王不使人受馬者，主於享，王之尊益君，侯氏之卑益臣。事畢。三享訖。

右行享禮。○《小行人》：合六幣：

圭以馬，璋以皮，璧以帛，琮以錦，琥以繡，璜以黼。此六物者，以和諸侯之好故。琮，才宗反。琥，音虎。璜，音黃。○合，同也。六幣，所以享也。五等諸侯享天子用璧，享后用琮，其大各如其瑞，皆有庭實，以馬若皮。皮，虎豹皮也。用圭璋者，二王之後也。二王後尊，故享用圭璋而特之。《禮器》曰「圭璋特」，義亦通於此。其於諸侯，亦用璧、琮耳。子男於諸侯，則享用琥璜，下其瑞也。凡二王後，諸侯相享之玉，大小各降其瑞一等，及使卿大夫覲聘，亦如之。○《掌訝》：將幣，爲前驅。至于朝，詔其位，人復。及退，亦如之。道之以如朝。鄭司農云：詔其位，告客以其位處也。人復，客人則掌訝出復其故位也。客退，復人迎，爲之前驅至于館也。玄謂：人復者，人告王以客至也。退亦如之，如其爲前驅。

○《小宗伯》：受其將幣之齋。謂所齋來貢獻之財物。○《服不氏》：則抗皮。抗，苦浪反，又

公郎反。○鄭司農云：謂賓客來朝聘布皮帛者，服不氏主舉藏之。玄謂：抗者，若《聘禮》曰「有司二人舉皮以東」。

○《校人》：受其幣馬。校，戶教反。○賓客之幣馬，來朝聘而享王者。

○《大宗伯》：則攝而載果。載，爲也。果，讀爲裸。代王裸賓客以鬯。

君無酌臣之禮，言爲者，攝酌獻耳，拜送則王也。鄭司農云：王不親爲主。○《肆師》：蒞筵几，築鬻，

鬻，音煮。○築，香草煮以爲鬯。贊裸將。酌鬱鬯，

授大宗伯載裸。○《小宗伯》：辨六彝之名

物，以待果將。六彝，雞彝、鳥彝、斚彝、黃彝、虎彝、蜼彝。果，讀爲裸。

乃右肉袒于廟門之東，乃入門右，北面

立，告聽事。右肉袒者，刑宜施於右也。凡以禮事者左

袒，人更從右者，臣益純也。告聽事者，告王以國所用爲罪之事也。《易》曰：「折其右肱，無咎。」擯者謁諸天子，

天子辭於侯氏曰：「伯父無事，歸寧乃邦。」謁，告。寧，安也。乃，猶女也。侯氏再拜稽首，出自屏南，適門西。

右請事。

遂入門左，北面立，王勞之，再拜稽首。擯者延之曰「升」，升成拜，降出。勞，力報反。○王辭之，不即左者，當出隱於屏而襲之也。天子外屏勞之，勞其道勞也。

右王勞。

天子賜侯氏以車服，迎于外門外，再拜。

賜車者，同姓以金路，異姓以象路。服則袞也，鷩也，毳也。

古文曰「迎于門外也」。路先設，西上，路下四，亞

之。重賜無數，在車南。路，謂車也，凡君所乘車

曰路。路下四，謂乘馬也。亞之，次車而東也。《詩》云：

「君子來朝，何錫予之？」雖無予之，路車乘馬。又何予之？玄袞及黼。重，猶善也。所加賜善物，多少由恩也。

《春秋傳》曰：「重錦三十兩。」諸公奉篋服，加命書

于其上，升自西階，東面，大史是右。大，音泰。

○言諸公者，王同時分命之而使賜侯氏也。右，讀如周公右王之右。是右者始隨入，於升東面，乃居其右。古文

「是」爲「氏」也。侯氏升，西面立，大史述命。讀

王命書也。侯氏降兩階之間，北面再拜稽首。

受命。升成拜，大史辭之降也。《春秋傳》曰：「且有後

命，以伯舅耄老，毋下拜。」此辭之類。大史加書于服

上，侯氏受。受篋服。使者出，侯氏送，再拜。

儻使者，諸公賜服者束帛四馬，儻大史亦如之。既云拜送，乃言儻使者，以勞有成禮，略而遂言。同

姓大國則曰「伯父」，其異姓則曰「伯舅」，同

姓小邦則曰「叔父」，其異姓小邦則曰「叔

舅」。據此禮云伯父，同姓大邦而言。

右賜車服。○記：三公一命卷，若有

加則賜也，不過九命。次國之君不過七

命，小國之君不過五命。卷，依注音衮，占本反。

○卷，俗讀也，其通則曰衮。三公八命矣，復加一命，則

服龍衮，與王者之後同。多於此則賜，非命服也。虞夏

之制，天子服有日月星辰。《周禮》曰：「諸公之服，白衮

冕而下，如王之服。」○《王制》。○《典命》：上公

九命爲伯，其國家、宮室、車旗、衣服、禮儀

皆以九爲節。侯、伯七命，其國家、宮室、

車旗、衣服、禮儀皆以七爲節。子、男五

命，其國家、宮室、車旗、衣服、禮儀皆以五

爲節。上公，謂王之三公有德者，加命爲二伯。二王

之後，亦爲上公。國家，國之所居，謂城方也。公之城

蓋方九里，宮方九百步；侯伯之城蓋方七里，宮方七百

步；子男之城蓋方五里，宮方五百步。《大行人》職則有

諸侯圭籍、冕服、建常、樊纓、貳車、介、牢禮、朝位之數

焉。○《小宗伯》：掌衣服、車旗、宮室之賞

賜。王以賞賜有功者。

饗禮，乃歸。禮，謂食燕也。王或不親以其禮幣

致之，略言饗禮，互文也。《掌客》職曰：「上公三饗三食」

燕，侯、伯再饗再食再燕，子、男一饗一食一燕。」

右饗。○記：《大行人》：上公廟中

將幣，三享王禮，再裸而酢，饗禮九獻，食禮九舉。侯、伯，廟中將幣，三享王禮，一裸而酢，饗禮七獻，食禮七舉。子、男，廟中將幣，三享王禮，一裸不酢，饗禮五獻，食禮五舉。廟，受命祖之廟也。饗，設盛禮以飲賓也。皆有禮，以幣致之。故書「裸」作「果」。鄭司農云：「三享，三獻也。裸，讀爲灌。再裸，再飲公也。而酢，報飲王也。舉，舉樂也。玄謂：三享皆束帛加璧，庭實唯國所有。《朝事儀》曰：『奉國地所出重物而獻之，明臣職也。』朝先享，不言朝者，朝正禮，不嫌有等也。王禮，王以鬱鬯禮賓也。《鬱人》職曰：『凡祭祀賓客之裸事，和鬱鬯以實彝而陳之。』禮者使宗伯攝酌圭瓚而裸，王既拜送爵，又攝酌璋瓚而裸，后又拜送爵，是謂再裸。再裸，賓乃酢王也。禮，侯、伯一裸而酢者，裸賓，賓酢王而已，后不裸也。禮，子、男一裸不酢者，裸賓而已，不酢王也。不酢之禮，聘禮禮賓是與？九舉，舉牲體九飯也。」

○《典瑞》：凡賓客之事，共其玉器。賓客，謂朝聘者。玉器，謂四圭、裸圭之屬。

○《大宗伯》：以饗燕之禮，親四方之賓客。○《小宗伯》：辨六尊之名物，以待賓客。待者，有事則給之。六尊，獻尊、象尊、壺尊、著尊、大尊、山尊。○《酒正》：共禮酒，共后之致飲于賓客之禮，醫酏糟，皆使其士奉之。共，音恭，下同。醫，於已反。酏，以之反。○禮酒，王所致酒也。王致酒，后致飲，夫婦之義。糟，醫酏不泔者。泔曰清，不泔曰糟。后致飲，無醴醫酏不清者，與王同體，屈也，亦因以少爲貴。士，謂酒人、漿人、奄士。

○《酒人》：共禮酒，飲酒而奉之。酒正使之也。禮酒，饗燕之酒。飲酒，食之酒。此謂給賓客之稍，王不親饗燕，不親食，而使人各以其爵，以酬幣侑幣致之，則從而以酒往。

○《漿人》：共稍禮，共夫人致飲于賓客之禮，清醴醫酏糟而奉之。亦酒正使之。三物有清有糟。夫人不體王，得備之。禮，飲醴用柄者糟也，不用者清也。

○《籩人》：共其薦籩羞籩。謂饗燕時。

○《川

衡：共川奠。川奠，籩豆之實，魚、鱸、蜃、蛤之屬。

○《澤虞》：共澤物之奠。亦籩豆之實，芹、芻、

菱、芡之屬。○《舍人》：共簠簋，實之陳之。

方曰簠，圓曰簋，盛黍稷稻粱器。○《饔人》：共其

簠簋之實。謂致飧饗。○《舂人》：共其食

米。饗有食米，則饗禮兼燕與食。○《醯人》：共

醯五十甕。醯，呼在反。○致饗餼時。○《醢

人》：共醢五十甕。醢，呼西反。○《鹽人》：

共其形鹽、散鹽。散，息但反。○形鹽，鹽之似虎

形者。○《外饗》：掌割烹，共其脯脩刑臠，

陳其鼎俎，實之牲體魚腊。亨，普耕反。臠，火

吳反。○脩，鍛脯反。刑，鉶羹也。臠，牒肉大臠。

○《牛人》：共其膳羞之牛。羞，進也。所進賓

之膳。燕禮小臣請執事者與羞膳者，至獻賓而膳宰設

折俎。○《獸人》：共其死獸生獸。共其完者。

○《敝人》：共其魚之鱻。敝，音魚。鱻，悉

然反。鱻，苦老反。○新殺為鱻，乾者為鱻。○《腊

人》：共其脯腊，凡乾肉之事。大物解肆乾

之，謂之乾肉。薄析曰脯，捶之而施薑桂曰鍛脩。腊，

小物全乾。○《亨人》：共大羹鉶羹。亨，普耕

反。○大羹，肉滷。鄭司農云：大羹，不致五味也。

鉶羹，加鹽菜矣。○《肆師》：授祭。授賓祭肺。

○《大司樂》：宿縣，遂以聲展之。縣，音玄。

○叩聽其聲，具陳次之，以知完否。出入，則令奏

《王夏》、《肆夏》。皆樂章名。帥國子而舞。

常用舞者帥以往。○《樂師》：序其樂事，令奏

鐘鼓，令相。令，力呈反。相，息亮反，後同。○序

樂事，次序用樂之事。令相，令視瞭扶工。司農云：告

當相替師者，言當罷也。替師，首者，皆有相道之者。

故師冕見，及階曰「階也」，及席曰「席也」，皆坐曰「某在

斯，某在斯」。曰相，師之道與？○《典庸器》：伐

國所獲之器，若崇鼎、賁鼎及其兵物所鑄銘也。帥其

屬而設筥簠，陳庸器。筥，息允反。簠，音巨。

○設筥簠，視瞭當以縣樂器焉。陳功器，以華國也。杜

子春云：筥，讀為博選之選。橫者為筥，從者為鏃。

○《小師》：登歌擊拊，下管擊應鼓，拊者，擊石。應，鼗也，小鼓也。徹歌。於有司徹而歌雍。○《鐘師》：奏燕樂。以鐘鼓奏之。○《笙師》：共其鐘笙之樂。鐘笙，與鐘聲相應之笙。○《司干》：授舞器，舞器，羽籥之屬。既舞則受之。既，已也。受取藏之。○《鞀師》：帥其屬而舞鞀樂。鞀，音妹，又莫拜反。○舞之以東夷之舞。○《旄人》：舞其燕樂。○《籥師》：鼓羽籥之舞。文舞有持羽吹籥者。鼓之者，常爲之節。○《內宗》：薦加豆籩，加爵之豆籩。故書爲「籩豆」。鄭司農云：謂婦人所薦。及以樂徹，則佐傳豆籩。傳，直專反。○佐傳，佐外宗。○《外宗》：佐王后薦玉豆，眡豆籩，及以樂徹，亦如之。眡，視其實。王后以樂羞盥則贊贊，猶佐也。○天子適諸侯，諸侯膳用犢。諸侯適天子，天子賜之禮大牢。貴誠之義也。犢者，誠懇未有牝牡之情，是以小爲貴也。○《郊

特牲》。

諸侯覲于天子，爲官方三百步，四門，壇十有二尋，深四尺，加方明于其上。四時朝覲受之於廟，此謂時會殷同也。宮，謂墮土爲埽，以象牆壁也。爲宮者，於國外，春會同則於東方，夏會同則於南方，秋會同則於西方，冬會同則於北方。八尺曰尋，十有二尋則方九十六尺也。深，謂高也，從上曰深。《司儀》職曰：「爲壇三成。」成猶重也。三重者，自下差之爲三等，而上有堂焉。堂上方二丈四尺，上等、中等、下等，每面十二尺。方明者，上下四方神明之象也。上下四方之神者，所謂神明也。會同而盟，明神監之，則謂之天之司盟，有象者，猶宗廟之有主乎？王巡守，至於方嶽之下，諸侯會之，亦爲此宮以見之。《司儀》職曰：「將會諸侯，則命爲壇三成，宮，旁一門，詔王儀，南鄉見諸侯也。」○壇，以垂反。埽，音劣。方明者，木也，方四尺。設六色：東方青，南方赤，西方白，北方黑，上玄，下黃。設六玉：上圭，下璧，南方璋，西方琥，北方璜，東方圭。六色象其神，六玉以禮之。上宜以蒼璧，下宜以黃琮，而不以者，則上下之神非天地之至貴者也。設玉



者，刻其木而著之。上介皆奉其君之旂，置于宮，尚左，公、侯、伯、子、男皆就其旂而立。置於宮者，建之豫爲其君見王之位也。諸公中階之前，北面東上；諸侯東階之東，西面北上；諸伯西階之西，東面北上；諸子門東，北面東上；諸男門西，北面東上。尚左者，建旂，公東上，侯先伯，伯先子，子先男，而位皆上東方也。諸侯入壇門，或左或右，各就其旂而立。王降階，南鄉見之。三揖：土揖庶姓，時揖異姓，天揖同姓。見揖，位乃定。古文「尚」作「上」。

**四傳擯。**王既揖五者，升壇，設擯，升諸侯，以會同之禮。其奠瑞玉及享幣，公拜於上等，侯、伯於中等，子、男於下等。擯者每延之，升堂致命，王受玉撫玉，降拜於下等，及請事、勞，皆如覲禮，是以記之觀云。四傳擯者，每一位畢，擯者以告，乃更陳列而升。其次，公也、侯也、伯也各一位，子、男俠門而俱東上，亦一位也。至庭乃設擯，則諸侯初入門，王官之伯帥之耳。古文「傳」作「傳」。天子乘龍，載大旆，<sup>①</sup>象日月、升龍、降龍，出拜日於東門之外，反祀方明。此謂會同以春者也。馬八尺以上爲龍。大旆，大常也。王建大常，繆首畫日月，其下及旒交畫升龍降龍。《朝事義》曰：「天

子冕而執鎮圭，尺有二寸，纁藉尺有二寸，摺大圭，乘大路，建大常，上有二旒，纁纁十有二就，武車十有二乘，帥諸侯而朝日於東郊，所以教尊尊也。退而朝諸侯。」由此二者言之，已祀方明乃以會同之禮見諸侯也。凡會同者，不協而盟，《司盟》職曰：「凡邦國有疑會同，則掌其盟約之載書及其禮儀，北面詔明神，既盟則藏之。」言北面詔明神，則明神有象也。象者其方明乎？及盟時又加於壇上，乃以載辭告焉。詛祝掌其祝號。禮日於南門外，禮月與四瀆於北門外，禮山川丘陵於西門外。此謂會同以夏、冬、秋者也。變拜言禮者，容祀也。禮月於北郊者，月，大陰之精，以爲地神也。盟神必云日月山川焉者，尚著明也。《詩》曰：「謂予不信，有如皦日。」《春秋傳》曰：「縱子忘之，山川神祇其忘諸乎？」此皆用明神爲信也。祭天，燔柴。祭山丘陵，升。祭川，沈。祭地，瘞。升，沈，必就祭者也。就祭，則是謂王巡守及諸侯之盟祭也。其盟，惕其著明者。燔柴、升、沈、瘞，祭禮終矣。

①「旆」，賀本作「旂」。下注文「大旆大常也」之「旆」，賀本亦作「旂」。

備矣。《郊特牲》曰：「郊之祭也，迎長日之至也，大報天而主日也。」《宗伯》職曰：「以實柴祀日月星辰。」則燔柴祭天謂祭日也。柴爲祭日，則祭地瘞者，祭月也。日月而云天地，靈之也。《王制》曰：王「巡守，至于岱宗，柴。」是王巡守之盟，其神主日也。《春秋傳》曰：「晉文公爲踐土之盟。」而《傳》云山川之神，是諸侯之盟，其神主山川也。月乃太陰之精，上爲天使，臣道莫貴焉。是王官之伯會諸侯而盟，其神主月與？古文「瘞」作「瘞」。○惕，苦蓋反。

### 右祀方明。○記：《司儀》：將合諸

侯，則令爲壇三成，宮，旁一門。合諸侯，謂有事而會也，爲壇于國外以命事。宮，謂壇土以爲牆處，所謂爲壇墮宮也。天子春帥諸侯拜日於東郊，則爲壇於國東；夏禮日於南郊，則爲壇於國南；秋禮山川丘陵於西郊，則爲壇於國西；冬禮月四瀆於北郊，則爲壇於國北。既拜禮而還，加方明於壇上而祀焉，所以教尊尊也。王巡守殷國而同，則其爲宮亦如此與？鄭司農云：三成，三重也。《爾雅》曰：「丘，成爲敦丘，再成爲陶丘，三成爲崑崙丘。」謂三重。詔王儀，南鄉見諸侯，土揖庶姓，時揖異姓，天揖同姓。鄉，

音向。○謂王既祀方明，諸侯上介皆奉其君之旂置于宮，乃詔王升壇。諸侯皆就其旂而立。諸公中階之前，北面東上；諸侯東階之東，西面北上；諸伯西階之西，東面北上；諸子門東，北面東上；諸男門西，北面東上。王揖之者，定其位也。庶姓，無親者也。土揖，推手小下之也。異姓，婚姻也。時揖，平推手也。天揖，推手小舉之。及其擯之，各以其禮。公於上等，侯、伯於中等，子、男於下等。謂執玉而前見於王也。擯之各以其禮者，謂擯公者五人，侯、伯四人，子、男三人。上等，中等，下等，謂所奠玉處也。壇三成，深四尺，則一等一尺也。壇有十二尋，方九十六尺，則堂上二丈四尺，每等丈二尺與？諸侯各於其等奠玉，降拜，升成拜，明臣禮也。既，乃升堂授王玉。其將幣亦如之，其禮亦如之。將幣，享也。禮，謂以鬱鬯裸之也。皆於其等之上。○《大宗伯》：以玉作六器，以禮天地四方。禮，謂始告神時薦於神坐，《書》曰「植璧秉圭」是也。以蒼璧禮天，以黃琮禮地，以青圭禮東方，以赤璋禮南方，

以白琥禮西方，以玄璜禮北方。此禮天以冬

至，謂天皇大帝在北極者也。禮地以夏至，謂神在崑崙

者也。禮東方以立春，謂蒼精之帝而大昊，句芒食焉。

禮南方以立夏，謂赤精之帝而炎帝，祝融食焉。禮西方

以立秋，謂白精之帝而少昊，蓐收食焉。禮北方以立

冬，謂黑精之帝而顓頊，玄冥食焉。禮神者必象其類：

璧圓象天；琮八方象地；圭銳象春物初生；半圭曰璋，

象夏物半死；琥猛象秋嚴；半璧曰璜，象冬閉藏，地上

無物，唯天半見也。○《司常》：交龍爲旂，諸

侯建旂，會同賓客，各建其旂，置旌門。

○《典瑞》：王晉大圭，執鎮圭，繅藉五采

五就，以朝日。繅有五采文，所以薦玉，木爲中幹，

用韋衣而畫之。就，成也。王朝日者，示有所尊，訓民

事君也。天子常春分朝日，秋分夕月。《觀禮》曰：「拜

日於東門之外。」故書「鎮」作「瑱」。鄭司農云：「晉讀爲

摺紳之摺，謂插於紳帶之間，若帶劍也。瑱，讀爲鎮，

《玉人》職曰：「大圭長三尺，杼上，終葵首，天子服之。」

「鎮圭尺有二寸，天子守之。」繅，讀爲藻率之藻。五就，

五匝也，一匝爲一就。○《司盟》：掌盟載之

法，載，盟辭也。盟者書其辭於策，殺牲取血，坎其牲，

加書於上而埋之，謂之載書。凡邦國有疑會同，

則掌其盟約之載及其禮儀，北面詔明神。

既盟則貳之。約，如字，又於妙反，下同。○有疑，

不協也。明神，神之明察者，謂日月山川也。觀禮加方

明於壇上，所以依之也。詔之者，讀其載書以告之也。

貳之者，寫副以授六官。○《大司寇》：凡邦之

大盟約，涖其盟書，而登之于天府，涖，臨也。

天府，祖廟之藏。大史、內史、司會及六官皆

受其貳藏之。會，古外反。○六官，六卿之官也。

貳，副也。

## 朝事義

### 王朝禮一之下

古者聖王明義，以別貴賤，別，彼列反。以

序尊卑，以體上下，然後民知尊君敬上，而忠

順之行備矣。行，下孟反。是故古者天子之

官，有典命官掌諸侯之儀，大行人掌諸侯之

儀，以等其爵，故貴賤有別，尊卑有序，上下有差也。典命諸侯之五儀，諸臣之五等，以定其爵，故貴賤有別，尊卑有序，上下有差也。故朝聘之禮，各執其圭瑞，服其服，乘其輅，建其旌旗，施其樊纓，樊，步干反。從其貳車，委積之以其牢禮之數，所以明別義也。然後天子冕而執鎮圭，尺有二寸，藻藉尺有二寸，藉，在夜反。搢大圭，搢，音晉。乘大輅，建大常，大常之大，音太。十有二旒，樊纓十有再就，貳車十有貳乘，乘，繩證反。率諸侯而朝日東郊，所以教尊尊也。退而朝諸侯。爲壇三成，宮旁一門。天子南鄉鄉，許亮反。見諸侯，土揖庶姓，時揖異姓，天揖同姓，所以別親疏外內也。公、侯、伯、子、男各以其旂就其位：諸公之國中階之前，北面東上；諸侯之國東階之東，西面北上；諸伯之國西階之西，東面北上；諸子之國門東，北面東上；<sup>①</sup>

諸男之國門西，北面東上。及其將幣也，公於上等，所以別貴賤、序尊卑也。奠圭降拜，升，成拜，明臣禮也。奉國地所出重物而獻之，明臣職也。肉袒入門而右，以聽事也。明臣禮，職臣事，所以教臣也。率而祀天於南郊，配以先祖，所以教民報德不忘本也。率而享祀於大廟，所以教孝也。與之大射，以考其習禮樂，而觀其德行；行，下孟反。與之圖事，以觀其能；賓而禮之，賓，必忍反。三饗三食三宴，食，音嗣。以與之習立禮樂。是故一朝而近者三年，朝，直遙反，下同。遠者六年，有德焉，禮樂爲之益習，德行爲之益修，天子之命爲之益行。然後使諸侯世相朝，交歲相問，殷相聘，以習禮考義，正刑一德，以崇天子。故曰朝聘之禮者，所以正君臣之義

① 「諸子之國門東北面東上」十字，原脫，據賀本補。

也。諸侯附於德，服於義，則天下太平。古者天子，爲諸侯不行禮義，爲于僞反。不修法度，不附於德，不服於義，故使射人以射禮，選其德行，職方氏、大行人以其治國，選其能功。諸侯之得失治亂定，然後明九命之賞以勸之，明九伐之法以震威之。尚猶有不附於德，不服於義者，則使掌交說，故諸侯莫不附於德服於義者。此天子之所以養諸侯，兵不用而諸侯自爲政之法也。<sup>①</sup>

儀禮集傳集註卷第二十四終

① 「也」下，賀本有小字注文，大戴禮記「四字」。

## 儀禮集傳集註卷第二十五

曆數

王朝禮二之上

黃帝迎日推策，晉灼曰：策，數也，迎數之也。

瓚曰：日月朔望未來而推之，故曰「迎日」。順天地之

紀，幽明之占，死生之說，徐廣曰：一云「幽明之

數，合死生之說」。存亡之難。時播百穀草木，

淳化鳥獸蟲蛾，旁羅日月星辰，水波土石金

玉，勞勤心力耳目，節用水火材物。有土德

之瑞，故號黃帝。難，去聲。蛾，牛綺反。○《大戴

禮》作「黃帝黼黻衣大帶，乘龍宸雲，以順天地之紀，幽明之

故，死生之說，存亡之難。時播百穀艸木，故教化淳鳥獸昆

蟲，曆離日月星辰，極畋土石金玉，勞心力耳目，節用水火

材物」。○今按：「迎日推策」，「淳化」、「勞勤」，當从《史

記》。「幽明之故」、「曆離」，當从《戴禮》。「水波」、「極畋」則二書皆失之，而《戴禮》爲近，但不知的是何字耳。○

帝顓頊養材以任地，載時以象天。顓，音專。

頊，許六反。○帝嚳曆日月而迎送之。嚳，口毒

反。①○堯乃命羲和，欽若昊天，曆象日月星

辰，敬授人時。重黎之後羲氏、和氏，世掌天地四時之

官，故堯命之，使敬順昊天。昊天，言元氣廣大。星，四方

中星。辰，日月所會。曆象，其分節敬記天時以授人也。

此舉其目，下別序之。分命羲仲，宅嵎夷，曰暘

谷。嵎，音隅。○宅，居也。東表之地稱嵎夷。暘，明也，

日出於谷而天下明，故稱暘谷。暘谷，嵎夷，一也。羲仲，

居治東方之官。寅賓出日，平秩東作。寅，敬。賓，

導。秩，序也。歲起於東而始就耕，謂之東作。東方之官

敬導出日，平均次序東作之事，以務農也。日中，星

鳥，以殷仲春。日中，謂春分之日。鳥，南方朱鳥七

宿。殷，正也。春分之昏，鳥星畢見，以正仲春之氣節，轉

①「反」下，賀本有「○以上史記五帝本紀」。

以推季孟則可知。厥民析，鳥獸孳尾。孳，音字。

○冬寒無事，並入室處。春事既起，丁壯就功。厥，其也，言其民老壯分析。乳化曰孳。交接曰尾。申命義叔，

宅南交。申，重也。南交，言夏與春交，舉一隅以見之，

此居治南方之官。平秩南訛，敬致。訛，五禾反。○

訛，化也。掌夏之官平序南方，化育之事，敬行其教，以致其功，四時同之，亦舉一隅。日永，星火，以正仲

夏。永，長也，謂夏至之日。火，蒼龍之中星，舉中則七星

見可知。以正仲夏之氣節，季孟亦可知。厥民因，鳥

獸希革。因，謂老弱因就在田之丁壯以助農也。夏時鳥

獸毛羽希少改易。革，改也。①分命和仲，宅西，曰

昧谷。昧，冥也。日入於谷而天下冥，故曰昧谷。昧谷

曰西，則嵎夷東可知。此居治西方之官，掌秋天之政。寅

餞納日，平秩西成。餞，送也。日出言導，日入言送，

因事之宜。秋，西方，萬物成平，序其政助成物也。宵

中，星虛，以殷仲秋。宵，夜也。春言日，秋言夜，互

相備。虛，玄武之中星，亦言七星，皆以秋分日見，以正三

秋。厥民夷，鳥獸毛毼。毼，先典反。○夷，平也，

老壯在田與夏平也。毼，理也，毛更生整理。申命和

叔，宅朔方，曰幽都，平在朔易。北稱朔，亦稱

方，言一方則三方見矣。北稱幽，則南稱明，從可知也。

都，謂所聚也。易，謂歲改。易於北方，平均在察其政，以

順天常。上總言義、和敬順昊天，此分別仲、叔各有所掌。

日短，星昴，以正仲冬。日短，冬至之日。昴，白虎

之中星，亦以七星並見，以正冬之三節。厥民隩，鳥獸

氄毛。隩，於六反。氄，如勇反。○隩，室也。民改歲入

此室處，以辟風寒。鳥獸皆生，毳毼細毛以自溫。○林氏

曰：宅嵎夷，宅南交，宅西、宅朔方者，所以奠方隅也。蓋

作曆之法，必先候日月之出沒、星辰之躔度。欲候日月之

出沒、星辰之躔度者，必先準定四面方隅之地為表識，四方

既定，然後可以候日月之出沒，測星辰之運行，而曆象之法

自此起矣。嵎夷，青州之嵎夷也在正東。南交，即交趾也，

《五帝本紀》：黃帝之地北至于幽陵，南至于交趾。則交趾

①「也」，原作「故」，據寬文本、賀本改。

之對幽都，其來尚矣。西者，隴西之西縣也，在正西。幽都，舜時之幽州也，在正北。蓋嵎夷之方，日出之地也。隴西之方，日入之地也。據其地而言之，則謂之嵎夷，謂之西。據其日月出没而言之，則謂之暘谷、昧谷。將欲賓出日而餞納日，故先定暘谷、昧谷之地也。賓，導也，徐音賓。餞，送也。導者，引前之名。送者，從後之稱。因其出也，導以引之；因其入也，從而送之。帝嚳曆日月而迎送之，即此法也。○今按：「宅」字古與「度」字通用，見《周禮》注等書者非一。「宅嵎夷」之屬，皆謂度日影於此。如唐開元十二年，遣使天下候影，南距林邑，北距橫野，中得浚儀、岳臺，應南北之弦，居地之中，即其事也。林氏說正如此，但不解「宅」字之義，似正謂居此而度景，故附此說以足成其義云。○林氏曰：平秩東作、南訛、西成，平在朔易者，陰陽四時之氣運於天地之間，造化密移，莫不有序。平秩者，平均次序也。在，察也。所以候其節氣之早晚，如後世分定二十四氣之類是也。孔氏論東作謂：歲起於東而始就耕，平均次序東作之事以務農也。此但謂萬物發生於東爾，非取於農作之義也。曾氏謂春為陽中，萬物以生，秋為陰中，萬物以成，作如「薇亦作止」，《老子》「萬物並作」之作，可補先儒之失。敬致者，致日也，《周官》「冬夏致日，春

秋致月」，《左氏》「日官居卿以致日」，則「敬致」者致日之謂也。蓋曆法欲候日月之出没，此以昏旦見於南方之中星以定晷度之所至，謂之「敬致」，與「寅賓」、「寅餞」同。《月令》云：「日在營室，昏參中，旦尾中。」謂日在營室有昏有旦者，所謂「賓出日」、「餞納日」也。謂「昏參中、旦尾中」者，即此所謂「敬致」也。賓日於東，餞日於西，然後日中、日永、宵中、日短可得而知也。敬致南方之中星矣，然後星鳥、星火、星昴、星虛可得而見也。此二者可得而知，然後分、至之氣可得而定矣。○今按：敬致，林引《周禮》為說，亦是。但《周禮》所謂「致日」乃考日中之景，故此亦使南方之官掌之，非謂考中星也。其考中星自見下句，不應先於此而言之也。○林氏曰：鳥、火、虛、昴，皆是分、至之昏見於南方，直正午之中星，而孔氏以謂七星畢見，不以為中星，故唐孔氏云：仲春之月，日在奎婁，入於西地，則初昏之時井、鬼在午，柳、星、張在巳，翼、轸在辰。仲夏之月，<sup>①</sup>日在東井而入於西地，即初昏之時角、亢在午，氐、房、心在巳，箕、尾在辰。仲秋之月，日在角而入於西地，即初昏之

①「月」，原作「中」，據元明本、寬文本、賀本改。下「月」字同。



時斗、牛在午，女、虛、危在巳，室、壁在辰。仲冬之月，日在斗入於西地，則初昏之時奎、婁在午，胃、昂在巳，畢、觜、參在辰。信如孔氏此說，則是鳥、火、虛、昂當分，至昏皆見於巳，非正午也，其何爲四方中星哉？王子雍覺其非，遂謂：「宅嵎夷，孟月也。日中、日永、宵中、日短，<sup>①</sup>仲月也。星鳥、星火、星虛、星昴，季月也。」此說並與天象偶合，然分孟、仲、季，非《書》之意，蓋二孔、王肅皆不知曆家有歲差之法，以《月令》日在某宿而求之，所以不合。按曆家自北齊張子信始首知歲法，以古曆推之，凡八十餘年差一度。《月令》日在某宿，比之堯時則已差矣。以日會月在某宿求之中星，宜其不合矣。故唐一行云：「日在虛星，則星火、星昴皆以仲月昏中。」沈存中亦云：「《堯典》曰短星昴，今乃日短星東壁。以是知歲差之法，乃曆家之所通知，特先儒未之思耳。」蓋仲春之月，日在昴，入於西地，則初昏之時鶉火之星見於南方正午之位。當是時也，晝五十刻，夜五十刻，是爲春分之氣，故曰「日中，星鳥，以殷仲春」。仲夏之月，日在星，入於西地，初昏之時大火之星見於南方正午之位。當是時也，晝長夜短，晝六十刻，夜四十刻，是爲夏至之氣，故曰「日永，星火，以正仲夏」。仲秋之月，日在心，入於西地，則初昏之時虛之星見於南方正午之位。當是時也，晝

夜分，晝五十刻，夜五十刻，是爲秋分之氣，故曰「宵中，星虛，以殷仲秋」。仲冬之月，日在虛，入於西地，初昏之時昴星見於南方正午之位。當是時也，晝短夜長，晝四十刻，夜六十刻，是爲冬至之氣，故曰「日短，星昴，以正仲冬」。分、至之氣既定，則十二月之氣無不定矣。春曰日中，秋曰宵中，蓋互文以見日夜之分也。春曰星鳥，夏曰星火，秋曰星虛，冬曰星昴，蓋四方躔度之星。以名言之，自角、亢、氐、房、心、尾、箕至于井、鬼、柳、星、張、翼、轸，凡二十有八。以日月所會言之，自營、陬、降、婁、大梁、實沈、鶉首、鶉火、鶉尾、壽星、大火、析木、星紀至于玄枵，凡一十有二。以物象言之，則青龍、玄武、白虎、朱鳥，凡四。作典者欲備見，故互言之。春、秋言殷，冬、夏言正者，亦猶春、秋謂之分，冬、夏謂之至也。分、至定，則十二月之中氣無不定矣。然猶以爲未也，而又以析、因、夷、隤言之於農事之早晚，故繼之曰厥民析、因、夷、隤。析者，言春事既起，丁壯就功。因者，因就在田之丁壯以助農也。夷者，平也。秋稼將盛，農事將畢，民獲卒歲之實，心力平夷安舒也。隤者，暖也。冬寒，民集隤暖也。既定民事之早晚矣，以爲未也，猶考物類

①「日短」二字，原脫，據賀本補。

之變化，鳥獸孳尾，希革、毛毯、毳毛者，蓋萬物之微物感天地至和之氣而動作應時，不期然而然耳。故作曆者觀此則候天時之早晚，如《禮記·月令》云「魚上冰，獺祭魚」，「倉庚鳴」，「鴻雁來」之類，是《堯典》之遺法也。○今按：析、因、夷、隤，乃是驗之於人以審氣候之寒溫，與下句驗之於物以審時物之變遷語意相似。若謂此句爲定農事之早晚，則下句爲欲定何事邪？大抵命此四官皆考天時以作曆之事，曆正則可以授民時，治百官，而農桑田役之務、飲食居處之宜，無不得其序矣，不必於此遽指一事而言也。帝

曰：「咨！汝羲暨和，朞三百有六旬有六日，

以閏月定四時，成歲。咨，嗟。暨，與也。匝四時曰

朞。一歲十二月，月三十日，正三百六十日。除小月六爲

六日，是爲一歲有餘十二日，未盈三歲足得一月，則置閏焉，以定四時之氣節，成一歲之曆象。允釐百工，庶

績咸熙。」允，信。釐，治。工，官。績，功。咸，皆。熙，

廣也。言定四時，成歲曆，以告時授事，則能信治百官，衆

功皆廣歎其善。○正義曰：周天三百六十五度四分之

一，此言三百六十六日者，王肅云：四分日之一，又入六日之內，舉全數以言之，故云三百六十六日也。曆法，以一日

分爲九百四十分。日之行也，日一度，其爲十二月以三百六十日，是一歲所餘凡五日九百四十分之二百三十五。月之行也，日十三度十九分度之七，常以二十九日半又九百四十分日之二十九而與日合，是一歲三百五十四日三百四十八分外，所餘凡五日九百四十分日之五百九十二。以五百九十二并二百三十五，是一歲日月所餘共十日九百四十分日之八百二十七。今孔注言十二日者，皆以大率據整而計之耳。十九年，年十日，爲百九十日，又十九个八百二十七，爲一萬五千七百一十三，以日法九百四十分除之，得十六日，以并一百九十日爲二百六日，不盡六百七十三分爲日餘，合爲閏月得七閏。每月二十九日，爲二百三日，又七个月餘各四百九十九分，合爲三千四百九十三，以日法九百四十分除之，得三日，共爲二百六日，不盡亦六百七十三，是爲一章之數。二十七章爲一會，三會爲一統，三統爲一元。章、會、統、元，運於無窮。若無閏，三年差一月，則以正月爲二月，每月皆差。九年差三月，即以春爲夏。若十七年差六月，即四時相反，時何由定，歲何由成，百工何以允釐而庶績何以咸熙乎？故須置閏以定時成歲，然後可以治百工，熙庶績也。王肅云：斗之所建，是爲中氣。日月所在，斗指兩辰之間，無中氣，所以爲閏也。○舜在

璿璣玉衡，以齊七政。璿，音旋。○在，察也。璿，美玉。璣衡，王者正天文之器，可運轉者。七政，日、月、五星，各異政。○正義曰：璣衡者，璣爲轉運，衡爲橫簫，運璣使動於下，以衡望之，是王者正天文之器，漢世以來謂之渾天儀者是也。馬融云：渾天儀可旋轉，故曰璣衡。其橫簫所以視星宿也。以璿爲璣，以玉爲衡，蓋貴天象也。蔡邕云：玉衡長八尺，孔徑一寸，下端望之，以視星辰。蓋懸璣以象天，而衡望之。轉璣窺衡，以知星宿。是其說也。七政，其政有七，於璣衡察之，必在天者，知七政謂日、月與五星也。木曰歲星，火曰熒惑星，土曰鎮星，金曰太白星，水曰辰星。《易·繫辭》云：「天垂象見吉凶，聖人象之。」此日、月、五星有吉凶之象，因其變動爲占，七者各自異政，故爲七政。得失由政，故稱政也。上天之體不可得知，測天之事見於經者，唯有此璿璣玉衡一事而已。蔡邕《天文志》云：言天體者有三家：一曰周髀，二曰宣夜，三曰渾天。宣夜絕無師說。周髀術數具在，考驗天象，多所違失，故史官不用。惟渾天者近得其情，今史所用候臺銅儀，則其法也。虞喜云：宣，明也。夜，幽也。幽明之數，其術兼之，故曰宣夜。但絕無師說，不知其狀如何。周髀之術，以爲天似覆盆，蓋以斗，極爲中，中高而四邊下，日月旁行繞之，

日近而見之爲晝，日遠而不見爲夜。渾天者，以爲地在其中心，天周其外，日月初登於天，後入於地。晝則日在地上，夜則日入地下。王蕃《渾天說》曰：「天之形狀似鳥卵，天包地外，如卵之裹黃，圓如彈丸，故曰渾天，言其形體渾渾然也。其術以爲天半覆地上，半在地下，其天居地上見者一百八十二度半強，地下亦然。北極出地上三十六度，南極入地下亦三十六度。而嵩高正當天之中，極南五十五度，當嵩高之上。又其南十二度爲夏至之日道，又其南二十四度爲春、秋分之日道，又其南二十四度爲冬至之日道。南下去地三十一度而已，是夏至日北去極六十七度，春秋分去極九十一度，冬至去極一百一十五度。」此其大率也。其南北極持其兩端，其天與日月星宿斜而迴轉。此必古有其法，遭秦而滅，漢武帝時落下閎、鮮于妄人始爲渾天之法，宣帝時司農中丞耿壽昌始鑄銅爲之象，史官施用焉，後漢張衡作《靈憲》以說其狀，蔡邕、鄭玄、陸績、吳時、王蕃、晉世姜岌、張衡、葛洪皆論渾天之義，並以渾說爲長。江南宋元嘉中皮延宗又作是《渾天論》，太史丞錢樂鑄銅作渾天儀，傳於齊、梁、周、平江陵，遷其器於長安，今在太史臺

矣。<sup>①</sup>衡長八尺，璣徑八尺，圓周二丈五尺，強轉而望之，有其法也。<sup>②</sup>唐正觀中李淳風爲之，開元中浮屠一行、梁令瓚又爲之，唐亂而亡。我宋太平興國中蜀人張思訓始創爲之，至元祐中蘇頌更造，其法尤密，置渾儀於上以仰觀，置渾象於下以俯視，樞機輪軸隱於中，以水激輪則渾象皆動，不假人力。○《洪範》：四，五紀：一曰歲，所以紀四時。二曰月，所以紀一月。三曰日，紀一日。四曰星辰，二十八宿迭見以敍氣節，十二辰以紀日月所會。五曰曆數。曆數節氣之度以爲曆，敬授民時。○正義曰：五紀者，五事爲天時之經紀也：一曰歲，從冬至以及明年冬至爲一歲，所以紀四時也。二曰月，朔望至晦，大月三十日，小月二十九日，所以紀一月也。三曰日，從夜半以至明日夜半，周十二辰爲一日，所以紀一日也。四曰星辰，星謂二十八宿，昏明迭見，辰謂日月別行，會於宿度，從子至於亥爲十二辰。星以紀節氣早晚，辰以紀日月所會處也。五曰曆數，算日月行道所曆，計氣朔早晚之數，所以爲一歲之曆。凡此五者，皆所以紀天時，故謂之五紀也。五紀不言時者，以歲月氣節正而四時亦自正，時隨月變，非曆所推，故不言時也。五紀爲此次者，歲統月，月統日，星辰

見於天，其曰曆數總曆四者，故歲爲始，曆爲終也。又曰：天以積氣無形，二十八宿分之爲限，每宿各有度數，合成三百六十五度有餘。日月右行，循此宿度，日行一度，月行十三度有餘。二十九日過半而月一周與日會，每於一會謂之一月，是一歲爲十二月，仍有餘十一日。爲日行天未周，故置閏以充足。若均分天度以爲十二次，則每次三十度有餘。一次之內，有節氣、中氣，次之所管，其度多每月之所統，其日入月朔參差不及，節氣不得在月朔，中氣不得在月半。故聖人曆數此節氣之度，使知氣所在，既得氣在之日以爲一歲之曆，所以敬授民時。王肅云：日月星辰所行，布而數之，所以紀度數是也。<sup>③</sup>○《周官·太史》：正歲年以序事，頒之于官府及都鄙。中數曰歲，朔數曰年。中朔大小不齊，正之以閏，若今時作曆日矣。定四時，以次序授民時之事。《春秋傳》曰：「閏以正時，時以作事，事以厚生，生民之本，於是乎在。」○正義曰：云「中數曰歲朔數曰年」者，一年之內有二十四氣：正

①「臺」，原作「書」，據元明本、寬文本、賀本改。  
②「也」下，賀本有「○以上尚書虞書○今按」。  
③「也」下，賀本有「○尚書周書」。

月，立春節，啟蟄中；二月，雨水節，春分中；三月，清明節，穀雨中；四月，立夏節，小滿中；五月，芒種節，夏至中；六月，小暑節，大暑中；七月，立秋節，處暑中；八月，白露節，秋分中；九月，寒露節，霜降中；十月，立冬節，小雪中；十一月，大雪節，冬至中；十二月，小寒節，大寒中。皆節氣在前，中氣在後。節氣，一名朔氣。中氣在晦，<sup>①</sup>則後月間，中氣在朔，則前月間。節氣有人前月法，中氣無人前月法。中氣匝則為歲，朔氣匝則為年。假令十二月中氣在晦，則閏十二月，十六日得後正月立春節，此即朔數曰年。至後年正月一日得啟蟄中，此中氣匝，此即是中數曰歲。云「中朔大小不齊，正之以閏」者，周天三百六十五度四分度之一。日一日行一度，月一日行十三度十九分度之七。二十四氣通閏分之，一氣得十五日，二十四氣分得三百六十度，仍有五度四分度之一。一度更分爲三十二，五度爲百六十。而四分度之一者又分爲八分，通前爲百六十八分。二十四氣分之，氣得七分。若然，二十四氣，氣有十五日七分。五氣得三十五分，取三十二分爲一日，餘三分推入後氣，是二十四氣合得五日零八分。通一歲計之，爲三百六十五日三十二分之八也。云「中朔大小不齊，正之以閏」者，月有大小，一年三百五十四日而已，自餘仍有十一

日，是以二十三月以後中氣在晦，不置閏則中氣入後月，須置閏以補之，故云正之以閏，是以云若今時作曆日矣。頒告朔于邦國。天子頒朔于諸侯，諸侯藏之祖廟，至朔朝于廟，告而受行之。鄭司農云：頒，讀爲班。班，布也。以十二月朔，布告天下諸侯。○正義曰：「告而受行之」者，縣之於中門，匝日斂之。此經及《論語》稱告朔，《玉藻》謂之聽朔，《春秋》謂之視朔。視者，人君入廟視之。告者，使有司讀祝以言之。聽者，聽治一月政令。所從言之異耳。鄭司農云「以十二月朔，布告天下諸侯」者，言朔者，以十二月曆及政令若《月令》之書，但以受行，號之爲朔。閏月，詔王居門終月。門，謂路寢門也。鄭司農云：

《月令》十二月分在青陽、明堂、總章、玄堂左右之位，唯閏月無所居，居于門，故於文「王」在「門」謂之「閏」。○正義曰：明堂路寢有九室，大室在中央，四角各有二堂，隔之爲个堂。大室正東之堂謂之青陽，正南之堂謂之明堂，正西之堂謂之總章，正北之堂謂之玄堂。云「左右之位」者，青陽、明堂、總章、玄堂各有左右之位，《月令》謂之左右个。

①「中」，原作「朔」，據賀本改。

《馮相氏》：掌十有二歲，十有二月，十有二辰，十日，二十有八星之位，辯其敘事，以會天位。馮，音憑。相，息亮反。○歲，謂太歲，歲星與日同次之月，斗所建之辰。《樂說》說歲星與日常應太歲月建以見。歲日月星辰宿之位，謂方面所在。辯其敘事，謂若仲春辯秩東作，仲夏辯秩南訛，仲秋辯秩西成，仲冬辯在朔易。會天位者，合此歲日月星辰宿五者以爲時事之候，若今曆日太歲在某月某日某甲朔日直某也。○正義曰：歲，謂太歲，左行於地，行於十二辰，一歲移一辰者也。云「十有二月」者，謂斗柄月建一辰，十二月而周。云「十有二辰」者，謂子、丑、寅、卯之等十有二辰也。「十日」者，謂甲、乙、丙、丁之等也。云「二十八星」者，東方角、亢、氏、房、心、尾、箕，北方斗、牛之等，爲二十八星也。若指星體而言，謂之星。日月會於其星，即名宿，亦名辰，亦名次，亦名房。云「之位」者，總五者皆有位處也。云「辯其敘事」者，謂五者皆與人爲候之，以爲事業次敘，而事得分辯。「以會天位」，五者在天會合而爲候也。「歲，謂太歲，歲星與日同次之月，斗所建之辰」者，此太歲在地，與天上歲星相應而行。歲星爲陽，右行於天，一歲移一辰。云「歲星與日同次之

月，斗所建之辰」者，以歲星爲陽，人之所見，太歲爲陰，人所不覩。既歲星與太歲雖左行、右行不同，要行度不異，故舉歲星以表太歲。言歲星與日同次之月，一年之中，唯於一辰之上爲法。若元年甲子朔旦冬至，日、月、五星俱起於牽牛之初，是歲星與日同次之月，十一月斗建子，子有太歲。至後年星移向子上，十二月會于玄枵，十二月斗建丑，且有太歲，自此以後皆然。引《樂說》者，證太歲在月建之義也。冬夏致日，春秋致月，以辯四時之序。冬至日在牽牛，景丈二尺。夏至日在東井，景尺五寸。此長短之極。極則氣至，冬無憊陽，夏無伏陰。春分日在婁，秋分日在角，而月弦於牽牛、東井，亦以其景知氣至不。春、秋、冬、夏氣皆至，則是四時之敘正矣。○正義曰：此經欲知人君政之得失之所致，觀日月之景以辯四時之敘，若政教得所，則四時之景依度。若依度，則四時之敘得正矣。必「冬夏致日，春秋致月」者，以日者，實也，故於長短極時致之也；月者，闕也，故於長短不極時致之也。按《易緯通卦驗》云：①「冬至日置八引，樹八尺之表，日中視其

①「按易緯通卦驗云」七字，原脫，據賀本補。

影，如度者歲美人和，晷不如度者歲惡人偽，言政令之不平。」<sup>①</sup>注言：「八引者，樹杙於地，四維四中，引繩以正之，故因名之曰引。立表者，先正方面，於視日審矣。晷進則水，晷退則旱，進尺二寸則月食，退尺二寸則日食。」晷進，謂長於度，日之行黃道外，則晷長，晷長者陰勝，故水。晷短，謂短於度，日之行人進黃道內，故晷短，晷短者陽勝，是以早。進尺二寸則月食者，月以十二為數，以勢言之，宜為月食。退尺二寸則日食者，日之數備于十，晷進為盈，晷退為縮，冬至晷長丈三尺。注云：所立八尺之表，陰長丈三尺，長之極。彼雖不言夏至尺五寸景，以冬至影丈三尺反之，知夏唯尺五寸景也。」<sup>②</sup>是以鄭注《考靈曜》云：「日之行，冬至之後漸差向北，夏至之後漸差向南。日差大分六，小分四。大分六者，分一寸為十分，小分四者，分一分為十分。一寸千里，則差六百四十里。」《大司徒》職云：「日至之景，尺有五寸，謂之地中。」從夏至之後差之，至冬至得丈三尺景。又案《天文志》：「春，秋分，日在婁角而晷中，<sup>③</sup>立八尺之表，而晷景長七尺三寸六分。」冬無慙陽，夏無伏陰者，以德政所致，而四時之景合度，故陰陽和也。」云「春分日在婁，秋分日在角，而月弦於牽牛、東井，亦以其景知氣至不」者，案《通卦驗》云：「夫八卦氣驗常不在望，以人

月八日不盡八日候諸卦氣。」注云：「人月八日不盡八日，陰氣得正而平。」以此而言，致月景亦用此日矣。若然，春分日在婁，其月上弦在東井，圓於角，下弦於牽牛。秋分日在角，上弦於牽牛，圓於婁，下弦於東井。故鄭言月弦於牽牛、東井，不言圓、望，義可知也。此以三月諸星復，若不在三月則未到本位，大判皆以合昏星體在西而言。以其二月春分婁星昏在西，秋分角星昏亦在西，以是推之，皆可知。案《天文志》云「月有九行」，云：「黑道二，出黃道北；赤道二，出黃道南；白道二，出黃道西；青道二，出黃道東。立春、春分，月東從青道云云。然用之，一決房中道，青赤出陽道，白黑出陰道。月失節度而行，出陽道則早風，出陰道則雨。」此云九行，則通數黃道也。進入黃道南，<sup>④</sup>謂之赤道。夏時月在黃道南，謂之赤道。進入黃道北，謂之黑道。東西自相對，春時月行黃道東，謂之青道。進入黃道西，謂

①「言」字，原脫，據賀本補。

②「注」，原作「法」，據賀本改。

③「知」，原作「致」，據元明本、寬文本、賀本改。

④「角」字，原脫，據寬文本、賀本補。

⑤「進」上，賀本有「冬時月在黃道北謂之黑道」十一字。

之白道。秋時月在黃道西，謂之白道。進入黃道東，謂之青道。此皆不得其正，故曰「出陽道則旱風，出陰道則雨」。若在黃道是其正，亦如日然。故《星備》云：「明王在上，則日月五星皆乘黃道。」又《黃帝占》云：「天道有三，黃道者，日月五星所乘。」問曰：「案鄭《駁異義》云：《三光考靈曜》書云：日道出于列宿之外萬有餘里。謂五星則差在其內，何得與日同乘黃道？」又問曰：「日何得在婁、角、牽牛、東井乎？」答曰：「黃道數寬廣，雖差在內，猶不離黃道，或可以上下為內外。」又案《天文志》云：「春秋分，日在婁角，去極中，而昃中，立八尺之表而昃景長七尺三寸六分也。」若然，《通卦驗》云「春秋昃景長七尺二寸四分」者，謂昃表有差移，故不同也。《保章氏》：「掌天星，以志星辰日月之變動，以觀天下之遷，辨其吉凶。」志，古文「識」，識，記也。星，謂五星。辰，日月所會。五星有贏縮闔角，日有薄食暈珥，月有虧盈朏側匿之變。七者右行列舍，天下禍福變移所在皆見焉。○正義曰：上馮相氏掌日月星辰不變依常度者，此官掌日月星辰變動，與常不同，以見吉凶之事。古之文字少，「志意」之志與「記識」之志同，後代自有記識之字，不復以志為識。「星謂五星」，

東方歲，南方熒惑，西方太白，北方辰，中央鎮星。云「辰，日月所會」者，《左傳》上文伯對晉侯之辭也，其說已見前章「四曰星辰」之下。云「五星有贏縮」者，案《天文志》云：歲星所在，其國不可以伐，可以伐人。超舍而前為贏，退舍為縮。贏，其國有兵；縮，其國有憂。故人有言曰：「天下太平，則五星循度，亡有逆行。日不食朔，月不食望。」云「闔角」者，《星備》云：「五星更王相休廢，其色不同。王則光芒，相則內實，休則光芒無角不動搖，廢則少光，色順四時，其國皆當也。」又云：「立春，歲星王七十二日，其色有白光，角芒，土王三月十八日，其色黃而大，休則圓，廢則內虛。立夏，熒惑王七十二日，色赤，角芒，土王六月十八日，其色黃而大。立秋，太白王七十二日，光芒無角，土王九月十八日，其色黃而大。立冬，辰星王七十二日，其色白，芒角，土王十二月十八日，其色黃而大。星當王相，不芒角，其邦大弱，強國取地。大弱，失國亡土也。」云「日有薄蝕暈珥」者，此則《視侵》之職：「掌十輝之法以觀妖祥，辨吉凶：一曰侵，二曰象，三曰鐫，四曰監，五曰闇，六曰瞢，七曰彌，八曰敘，九曰隤，十曰想。」侵者，陰陽氣相侵也。象者，如赤鳥也。鐫，謂日旁氣四面反鄉如輝狀也。監，雲氣臨日也。闇，日月食也。瞢，日月瞢瞢無光也。彌者，白虹



彌天也。敘者，雲有次序，如山在日上也。躋者，升氣也。想者，輝光也。云「月有虧盈」者，此則《禮運》所云「三五而盈，三五而闕」也。云「朧側匿之變」者，《尚書五行傳》云：「晦而月見西方謂之朧，朔而月見東方謂之側匿。側匿則侯王其肅，朧則侯王其舒。」云「七者右行列舍」者，七謂日月五星，皆右行於天，留伏順逆以見吉凶，故云天下禍福變移所在皆見焉。辰與二十八宿隨天左行，非所以見吉凶，已見《馮相氏》。以星土辨九州之地，所封封域皆有分星，以觀妖祥。分，扶問反。○星土，星所主土也。封，猶界也。鄭司農說星土以《春秋傳》曰「參爲晉星」、商主大火，《國語》曰「歲之所在，則我有周之分野」之屬是也。玄謂：大界則曰九州，州中諸國中之封域，於星亦有分焉，其書亡矣。堪輿雖有郡國所入度，非古數也。今其存可言者，十二次之分也。星紀，吳、越也。玄枵，齊也。娵訾，衛也。降婁，魯也。大梁，趙也。實沈，晉也。鶉首，秦也。鶉火，周也。鶉尾，楚也。壽星，鄭也。大火，宋也。析木，燕也。此分野之妖祥，主用客星彗字之氣爲象。○正義曰：「辨九州之地」者，據北斗而言。「所封封域」者，據二十八宿而說。鄭

云「大界則曰九州」，《春秋緯文耀鉤》云：「布度定記，分州繫象：華、岐以西龍門、積石至三危之野，<sup>①</sup>雍州，屬魁星。則太行以東至碣石、王屋、砥柱、冀州，屬樞星。河、雷澤，東至海岱以北，兗州、青州，屬機星。蒙山以東至南江、會稽、震澤，徐、揚之州，屬權星。大別以東至雷澤、九江、荊州，屬衡星。荆山西南至岷山、北嶠、鳥鼠，梁州，屬開星。外方熊耳以至泗水、陪尾、豫州，屬搖星。此九州屬北斗，星有七，州有九，但兗、青、徐、揚并屬二州，故七星主九州也。」周之九州差之義亦可知。云後代有作堪輿者「雖有郡國所入度非古數」，雖非古數，時有可言者。故云「今其存可言者，十二次之分也」者。但吳越在南，齊魯在東，今歲星或北或西，不依國地所主者。此古之受封之日，歲星所在之辰，國屬焉故也。吳、越二國同次，亦謂同年度受封，故云同次也。云「此分野之妖祥主用客星彗字之氣爲象」者，案《公羊傳》昭十七年：「冬，有星孛于大辰。孛者何？彗星也。」何休云：「孛彗者，邪亂之氣，掃故置新之象。」《左氏》申繻曰：「彗所以除舊布新。」如是，彗，孛一也。時爲宋、衛、陳、鄭災。《天文志》：彗長丈二。

①「西」字，原脫，據賀本補。

言用客星者，替非位，奔實而入他辰者也。以十有二

歲之相，觀天下之妖祥。相，息亮反。○歲，謂太

歲，歲星與日同次之月，斗所建之辰也。歲星爲陽，右行於

天，太歲爲陰，左行於地，十二歲而小周。其妖祥之占，《甘

氏歲星經》其遺象也。鄭司農云：太歲所在，歲星所居，

《春秋傳》曰「越得歲而吳伐之，必受其凶」之屬是也。○正

義曰：「越得歲而吳伐之必受其凶」者，案昭二十二年夏，

吳伐越，史墨曰：「不及四十年，越其有吳乎！」越得歲而

吳伐之，必受其凶。龍，東方宿，天德之貴神，其所在之國，

兵必昌，向之以兵則凶。吳、越同次，吳先舉兵，故凶也。

或歲星在越分中，故云得歲。以五雲之物辨吉凶、

水旱降豐荒之侵象。侵，子鳩反。○物，色也。視

日旁雲氣之色。降，下也，知水旱所下之國。鄭司農云：

以二至二分觀雲氣，青爲蟲，白爲喪，赤爲兵荒，黑爲水，黃

爲豐。故《春秋傳》曰：「凡分至啟閉，必書雲物，爲備故

也。」故曰：「凡此五物，以詔救政。」○正義曰：知視日旁雲

氣之色者，以其《視侵》十者皆視日旁雲氣之色也。以十

有二風察天地之和，命乖別之妖祥。十有二辰

皆有風，吹其律以知和不，其道亡矣。《春秋》襄十八年楚

師伐鄭，師曠曰：「吾驟歌北風，又歌南風。南風不競，多

死聲，楚必無功。」是時楚師多凍，其命乖別審矣。○正義

曰：十二風是十二辰氣爲風，風即氣也。云：「吹其律以知

和不，其道亡」者，師曠吹律而知此氣亦常吹律也。今無吹

律之法，故云「其道亡」。案彼服注：「北風，無射夾鐘以

北。南風，姑洗以南。」云「命乖別審矣」者，以南風弱，即知

楚無功，是其命楚師乖離別審矣。案《考異郵》曰：「陽立

于五，極于九，五九四十五，且變以陰合陽，故八卦主八風，

距同，各四十五日。艮爲條風，震爲明庶風，巽爲清明風，

離爲景風，坤爲涼風，兌爲閭闔風，乾爲不周風，坎爲廣莫

風。」案《通卦驗》云：冬至，廣莫風。十二月大寒，小寒皆

不云風至。立春，條風至。雨水，猛風至。二月驚蟄，不見

風至。春分，明庶風至。清明，雷鳴雨下，清明風至。玄鳥

來，穀雨，不見風。立夏，清明風至。小滿，不見風。五月

芒種，不見風。夏至，景風至。小暑、大暑，<sup>①</sup>不見風。立

秋，涼風至。處暑，不見風。白露，不見風。秋分，閭闔風

至。<sup>②</sup>寒露、霜降，皆不見風。立冬，不周風至。小雪、大

①「夏至景風至小暑」七字，原脫，據賀本補。

②「閭闔」，原作「涼」，據賀本改。

雪，皆不見風。如是無十二風，何云十二月皆有風乎？案《通卦驗》云三月、六月、九月、十二月皆不見風，惟有八以當八卦。八節云十二月者，則乾之風漸九月，坤之風漸六月，艮之風漸十二月，巽之風漸三月。故清明節次云清明風，立夏復云清明風，是清明風主三月，復主四月，則其餘四維之風主兩月可知。雨水猛風與條風俱在正月，則猛風非八卦之風亦可知也。凡此五物者，以詔救政，訪序事。訪，謀也，見其象則當豫爲之備，以詔王救其政，<sup>①</sup>且謀今歲天時占相所宜，次序其事。○《春秋》文

公元年《左氏》曰：於是閏三月，非禮也。於

曆法，閏當在僖公末年，誤於今年三月置閏，蓋時達曆者所譏。先王之正時也，履端於始，舉正於中，歸餘於終。步曆之始，以爲術之端首。昔之日，三百六十

有六日，日月之行又有遲速，而必分爲十二月，舉中氣以正。月有餘日，則歸之於終，積而爲閏，故言歸餘於終。

履端於始，序則不愆。四時無愆過。舉正於中，民則不惑。斗建不失其次，寒暑不失其常，故無疑惑。

歸餘於終，事則不悖。悖，必內反。○四時得所，事

無悖亂。○正義曰：古今曆法推閏月之術，皆以閏餘減章歲餘，以歲中乘之章閏而一，所得爲積月，命起天正算外，閏所在也。其有進退，以中氣定之，無中氣則閏月也。古曆十九年爲一章，章有七閏，入章三年閏九月，六年閏六月，九年閏三月，十一年閏十一月，十四年閏八月，十七年閏四月，十九年閏十二月。此據元首初章，若於後漸積餘分，大率三十二月則置閏，不必恒同初章閏月。僖五年正月辛亥朔日南至，治曆者皆以彼爲章首之歲，《漢書·律曆志》云：「文公元年距僖五年辛亥二十九歲，是歲閏餘十三，閏當在十一月後。」今三月已即置閏，是嫌閏月大近前也。杜以爲僖公三十年閏九月，文二年閏正月，故言於曆法閏當在僖公末年，誤於今年置閏，嫌置閏太近後也。杜爲《長曆》置閏疏數無復定準。凡爲曆者，閏前之月，中氣在晦，閏後之月，中氣在朔。僖五年正月朔日冬至，則四年當閏十二月也。杜《長曆》僖元年閏十一月，五年閏十二月，與常曆不同者，杜以襄二十七年再失閏，司曆過，昭二十年一月己丑日南至，哀十二年十二月蝕，云火猶西流，司曆過，則春秋之世，曆法錯失，所置閏月或先或後，不與常

①「救」字，原脫，據賀本補。

同。杜唯勘經傳上下日月以爲《長曆》。若日月同者，則數年不置閏月，若日月不同，須置閏。乃同者，則未滿三十二月頻置閏，所以異於常曆。故《釋例》云：「《春秋》日有頻月而食者，有曠年不食者，理不得一如算以守常數，故曆無有不失也。始失之毫釐，尚未可覺，積而成多，以失弦望晦朔，則不得不改憲以順之。日月轉運於天，猶人之行步，故推曆謂之步曆。步曆之始，以爲術之端首，謂曆之上元，必以日月全數爲始於前，更無餘分，以此爲術之端首，故言履端於始也。昔之日三百六十五日九百四十分之二百三十五，謂從冬至至冬至，必滿此數，乃周天也。日月之行有遲有速，日行遲而月行速，凡二十九日半九百四十分之二十九分則月行及日。其十二月一周，唯三百五十四日九百四十分之三十四十八。以十一月一周之數除一替日之數，計一年餘十日八百二十七分，未得氣周，故積以置閏也。」劉炫云：「一歲爲十二月，猶有十一日有餘未得周也。分一周之日爲十二月，則每月常三十日餘。計月及日爲一月，則每月唯二十九日餘，前朔後朔相去二十九日餘，前氣後氣三十日餘，每月參差，氣漸不正。但觀中氣所在，以爲此月之正，取中氣以正月，故言舉正於中也。月朔之與月節，每月剩一日有餘，所有餘日歸之於終，積成一月則置之

爲閏，故言歸餘於終。六年，閏月不告朔，非禮也。經稱告月，傳稱告朔，明告月必以朔。閏以正時，四時漸差，則置閏以正之。時以作事，順時命事。事以厚生，事不失時則年豐。生民之道，於是乎在矣。不告閏朔，弃時政也，何以爲民？哀公十二年冬十有二月，螽。季孫問諸仲尼，仲尼曰：「丘聞之，火伏而後蟄者畢。火，心星也，火伏在今十月。今火猶西流，司曆過也。」猶西流，言未盡沒。知是九月，曆官失一閏，《釋例》論之備。○正義曰：《月令》：「季夏之月，昏火星中。」《詩》云：「七月流火。」毛傳云：「流，下也。」謂昏而見於西南，漸下流也。《周禮·司燿》云：「季秋內火。」是九月之昏，火始入，十月之昏，則伏矣。猶西流者，言其未盡沒，是夏九月也。經書十二月則是夏十月，曆官失一閏，故以九月爲十月。《釋例》、《長曆》言諸儒皆以爲時，實周之九月，而書十二月謂之再失閏，若如其言，乃成三失，非但再也。今以《長曆》推《春秋》，此十二月乃夏之九月，實周十一月也。此年當有閏而今不置閏，此爲失一閏耳，十二月不應螽，故季孫怪

之。仲尼以斗建在戌火星尚未盡沒，據今猶見，故言猶西流，明夏之九月尚可冇蠡也。季孫雖聞仲尼此言，猶不即改，明年十二月復蠡，於是始悟十四年春乃置閏，欲以補正時曆也。傳於十五年書閏月，蓋置閏正之，欲明十四年之閏於法當在十二年也。

卜筮闕

儀禮集傳集註卷第二十五終

## 儀禮集傳集註卷第二十六

夏小正

王朝禮三之上

傳曰：何以謂之小正？以小著名也。

正月。啟蟄，鴈北鄉，鄉，許亮反。雉震响，响，古豆反。魚陟負冰。農緯厥耒，初歲祭耒，始用耒。囿有見韭。<sup>①</sup>時有俊風，寒日滌凍塗。田鼠出，農率均田。獺祭魚，獺，他達反。鷹則爲鳩。農及雪澤，初服于公田。采芸。鞠則見，初昏參中，斗柄縣在下。縣，音玄。柳稊，稊，徒稽反。梅、杏、杝桃則華，杝，音夷。緹縞，緹，他禮反。縞，古老反。雞桴粥。桴，步侯反。粥，音育。

傳曰：正月。啟蟄，言始發蟄也。鴈北鄉。先言鴈而後言鄉者何也？見鴈而後數其鄉也。數，色主反。鄉者何也？鄉其居也，鴈以北方爲居。何以謂之爲居？生且長焉爾。長，丁丈反。「九月遯鴻鴈」，遯，特計反。先言遯而後言鴻鴈何也？見遯而後數之則鴻鴈也。何不謂南鄉也？曰：非其居也，故不謂南鄉。記鴻鴈之遯也，如不記其鄉，何也？曰：鴻不必當《小正》之遯者也。雉震响，震也者，鳴也；响也者，鼓其翼也。正月必雷。雷不必聞，惟雉爲必聞之。何以謂之？雷則雉震响，相識以雷。魚陟負冰，陟，升也。負冰云者，言解蟄也。農緯厥耒。緯，束也。束其耒云爾者，用是見君之亦有耒也。初

①「囿有見韭」，原脫，據賀本及下傳文補。

歲祭末，始用暢也，暢也者，終歲之用祭也。其曰初云爾也者，言是月之始用之也。初者，始也。或曰祭韭也。圃有見韭。圃也者，園之燕者也。時有俊風。俊者，大也。大風，南風也。何大於南風也？曰：合冰必於南風，解冰必於南風，生必於南風，收必於南風，故大之也。寒日滌凍塗。滌也者，變也，變而煖也。凍塗者，凍下而澤上多也。田鼠出。田鼠者，嗛鼠也。嗛，戶監反。記時也。農率均田。率者，循也。均田者，始除田也，言農夫急除田也。獺祭魚。傳本「獺」下有「獸」字。其必與之獻，與，疑作「謂」。獻，傳作「獸」。何也？曰：非其類也。祭也者，得多也。善其祭而後食之。十月豺祭獸謂之祭，獺祭魚謂之獻，傳作「獸祭」。何也？豺祭其類，獺祭非其類，故謂之獻，傳作「獸」。大之

也。鷹則爲鳩。鷹也者，其殺之時也；鳩也者，非其殺之時也。善變而之仁也，故具言之也曰「則」，盡其辭也；鳩爲鷹，變而之仁也，故不盡其辭也。農及雪澤。言雪澤之無高下也。初服于公田。古者有公田焉，言古者先服公田而後服其田也。<sup>①</sup>采芡。舊注云：似邪蒿，可食。爲廟采也。鞠則見。鞠也者何也？星名也。鞠則見者，歲再見爾。初昏參中。蓋記時也云。斗柄縣在下。言斗柄者，所以著參之中也。柳稊。稊也者，發孚也。梅、杏、杕桃則華。杕桃，山桃也。緹縞。緹也者，莎隨也；縞也者，其實也。先言緹而後言縞者何也？緹先見者也。雞桴粥。粥也者，相粥之時也。或曰：桴，偃伏也；伏，

①

「言古者」，原作「者古言」，據寬文本、賀本改。

扶又反。粥，養也。

二月。往耒耜，禪。耒，音憂。禪，音丹。初

俊羔，助厥母粥。綏多女士。丁亥，萬用人學。祭鮪，鮪，位軌反。榮莖，莖，居隱反。采繫，昆小蟲，抵蜺。蜺，直其反。來降燕，乃睇。睇，特計反。剥鰾，鰾，常演反。有鳴倉庚。榮芸，時有見稊始收。

傳曰：二月。往耒耜，禪。禪，單也。

初俊羔，助厥母粥。俊也者，大也；粥也者，養也。言大羔能食草木而不食其母也，羊羔非其子而後養之，善養而繼之也。或曰：夏《大戴》作「憂」。有煮祭，祭者用羔。是時也不足喜樂，樂，音洛。喜，傳本作「善」。羔之爲生也而記之，與牛羊傳云：舊註作「羔羊」。腹時也。綏多女士。綏，安也，冠子娶婦之時也。冠，古亂反。丁亥，萬用人學，丁亥者，吉日也。萬也者，干戚舞也。人

學也者，大學也，謂今時大舍采也。祭鮪，祭不必記，記鮪何也？鮪之至有時，美物也。鮪者，魚之先至者也。而其至有時，謹記其時。榮莖，采繫。莖，采也；《大戴》作「采色」。繫，由胡，由胡者，繫母也。繫方勃也，皆豆實也，故記之。昆小蟲，抵蜺。昆者，衆也，由魂，魂也者，動也，小蟲動也。其先言動而後言蟲者何也？萬物至是動而後著。抵，猶推也。推，土堆反。蜺，蜺卵也，蜺，魚豈反。卵，盧短反。爲祭醢也。取之則必推之，推之不必取，取必推而不言取。來降燕，乃睇，燕，乙也；降者，下也。言來者何也？莫能見其始出也，故曰來降。言乃睇何也？睇者，眄也，眄，普莫反。眄者視可爲室者也。百鳥皆曰巢，窠穴取與之室何也？摻泥而就家，人《大戴》作「人」。人內也。摻，所覽反。剥鰾，以爲



鼓也。有鳴倉庚。倉庚者，商庚也，商庚者，長股也。榮芸，時有見稊始收，有見稊而後始收。是《小正》序也。《小正》之序時也，皆若是也。稊者，所爲豆實。

三月。參則伏。攝桑，委楊，犂羊，穀則鳴。穀，音斛。頒冰，采識，妾子始蠶，執養宮事。祈麥實，越有小旱，田鼠化爲鴛，鴛，音如。拂桐芭，鳴鳩。

傳曰：三月。參則伏。伏者，非亡《大戴》作「忘」。之辭也。星無時而不見，我有不見之時，故曰伏云。攝桑，攝而記之，急桑也。委一作「萎」。楊。楊則花而後記之。犂羊。羊有相還之時，其類犂犂然，記變爾。或曰：犂，羝也。羝，丁奚反。穀則鳴，穀，天螻也。螻，音樓。頒冰。頒冰者，分冰以授大夫也。采識。識，草也。妾子始蠶。先妾而後子何也？曰：事有漸也，

言自卑事者始也。傳本云：當云「事自卑者始」。或無「也」字。執養宮事。執，操也；操，七刀反。養，長也。長，丁丈反。祈麥實。麥實者，五穀之先見者，故急祈而記之也。越有小旱。越，于也，記是時恒有小旱。田鼠化爲鴛。鴛，鵠也。鵠，烏含反。變而之善，故盡其辭也。鴛爲鼠，變而之不善，故不盡其辭也。拂桐芭。拂也者，拂也，桐芭之時也。或曰：言桐芭始生貌，拂拂然也。鳴鳩，言始相命也。先鳴而後鳩何也？鳩者，鳴而後知其鳩也。

四月。昴則見，見，賢遍反。初昏，南門正。鳴札，罔有見杏，鳴蜮。蜮，音或。王萑莠，取荼，萑，房九反。莠幽。越有大旱，執陟攻駒。

傳曰：四月。昴則見，初昏，南門正。南門者，星也。歲再見，壹正，蓋大正所取

法也。鳴札，札者，寧縣也。縣，音懸。鳴而後知之，故先鳴而後札。罔有見杏，罔者，山之燕者也。鳴蜮，蜮也者，或曰屈造之屬也。王荇莠，取茶。茶也者，以爲君薦蔣也。莠幽，越有大旱，記時爾。執陟攻駒，執也者，始執駒也；執駒也者，<sup>①</sup>離之去母也，執而升之君也；攻駒也者，教之服車數舍之也。

五月。參則見。見，賢遍反。浮游有殷，鳩則鳴。鳩，與鵠通，古役反。時有養日，乃瓜，良蜩鳴。蜩，音彫。匱之興五日翕，望乃伏。匱，於殄反。啟灌藍蓼，鳩爲鷹，唐蜩鳴。初昏，大火中。煮梅，蓄蘭，菽糜，菽，音叔。糜，音門。頒馬。

傳曰：五月。參則見。參也者，伐作「牧」。星也，故盡其辭也。浮游有殷，殷，衆也；浮游者，渠略也，朝生而暮死。

稱「有」何也？有見也。鳩則鳴，鳩者，百鷦也。鳴者，相命也。其不辜之時也，是善之，故盡其辭也。時有養日，《大戴》「日」作「曰」。<sup>②</sup>以十月「養夜」考之，作「日」近是。養，長也。長，丁丈反。一則在本，一則在末，故其記曰「時養日」，《大戴》作「曰」，<sup>③</sup>非是。云本多作「之」，今從傳本舊注。也。乃瓜，傳本「瓜」上有「衣」字。乃傳云：一本有「衣」字。者，急瓜《詩》云：一作「衣」。之辭也；傳云：一本有「衣」也者，始創衣也。瓜也者，始食瓜也。良蜩鳴，良蜩也者，五采具。匱之興五日翕，望乃伏，其不言生而稱興何也？不知其生之時，故曰「興」。以其興也，故言之「興五日翕」

①「執駒也」，原脫，據賀本及上下文補。  
②「曰」，原作「白」，據元明本、寬文本、賀本改。  
③「曰」，原作「白」，據元明本、寬文本、賀本改。

也。望也者，月之望也。而伏云者，不知其死也，故謂之伏。五日也者，十五日也。翕也者，合也。伏也者，人而不見也。啟灌藍蓼，啟者，別也，陶而疏之也；灌者，聚生者也。記時也。鳩爲鷹，唐蜩鳴，唐蜩鳴者，匿也。初昏，大火中，大火者，心也；心中，種黍菽糜時也。煮梅，爲豆實也。蓄蘭，爲沐浴也。菽糜，以在經中矣，又言之時何也？是食短闕而記之。頒馬，分夫婦一作「大夫卿」。之駒也。將閒諸則，或取離駒納之則法也。

六月。初昏，斗柄正在上。煮桃，鷹始摯。

傳曰：六月。初昏，斗柄正在上。五月大火中，六月斗柄正在上，用此見斗柄之不在當心也，蓋當依。依，尾也。煮桃，桃也者，桼桃也。桼桃也者，山桃也，煮以

爲豆實也。傳本「桼」作「桼」，注云：按《爾雅》：「桼，檍。」郭璞云：「白檍也，樹似白楊。」而古今字書有桼而無桼，亦無有訓山桃者。《爾雅》：「檍桃，山桃。」音斯。《唐韻》亦云：「此書桼桃者，山桃也，當作檍。」蓋傳寫之誤。鷹始摯，始摯而言之何也？諱煞之辭也。傳本有「言」字。摯云。

七月。莠藿葦。莠，讀爲秀。藿，胡官反。葦，于鬼反。狸子肇肆，湟潦生葦。湟，音皇。潦，力倒反。葦，符兵反。爽死，并莠。漢案戶。寒蟬鳴。初昏，織女正東鄉。鄉，音向。時有霖雨，灌荼。斗柄縣在下則旦。縣，音懸。

傳曰：七月。莠藿葦，未莠則不爲藿葦，莠然後爲藿葦，故先言莠。狸子肇肆，肇，始也；肆，遂也。言其始遂也。其或曰：肆，殺也。湟潦生葦，湟，下處也。有

①「并」，原作「葦」，據元明本、賀本改。下傳文「并莠并也者」同。

湟然後有潦，有潦而後有葦草也。爽死，爽也者，猶疏也。莽，莽也者，有馬帚也。漢案戶，漢也者，河也。《大戴》無此三字。案戶也者，直戶也，言正南北也。寒蟬鳴，蟬也者，蜳蜳也。蜳，大兮反。初昏，織女正東鄉，時有霖雨，灌荼，灌，聚也；荼，藿葦之莠。傳本有「也」字。爲蔣楮之也。藿未秀爲莢，莢，土敢反。葦未秀爲蘆。傳本「秀」皆作「莠」。斗柄縣在下則旦。

八月。剥瓜，玄校。剥棗，桌零。桌，力執反。丹鳥羞白鳥。辰則伏，鹿人從。駕爲鼠。參中則旦。

傳曰：八月，剥瓜，剥瓜也者，畜瓜之時也。玄校，玄也者，黑也；校也者，若綠傳本作「緣」。色然。婦人未嫁者衣之。衣，去聲。剥棗，剥也者，取也。桌《大戴》作「栗」。零，零也者，降也。零而後取之，故不言剥。

也。丹鳥羞白鳥，丹鳥者，謂丹良也；白鳥者，謂蚊傳本作「閭」。蚋也。蚋，儒稅反。其謂之鳥也，重其養者也。有翼者爲鳥。羞也者，進也，不盡食也。辰則伏，辰也者，謂星也；伏也者，人而不見也。鹿人從，鹿人從者，從群也。鹿之養也，離群而善而傳本無此「而」字。之。離而生，非所知時也，故記從不記離。君子之居幽也不言。或曰：人從。《大戴》無此「從」字。人從也者，大者於外，小者傳本有。於內，率之也。駕爲鼠，參中則旦。

九月。內火。內，音納。遭鴻鴈，遭，特計反。主夫出火。陟玄鳥蟄，熊羆、①貉貉、鼬鼬則穴。貉，莫白反。貉，曷各反。鼬，音佑。鼬，音生。榮鞠，樹麥。鞠，居六反。王始裘。辰繫于日，雀

①「熊」，原脫，據賀本及下文補。

人于海爲蛤。

傳曰：九月。內火，內火也者，大

火；大火也者，<sup>①</sup>心也。遭鴻鴈，遭，往也。

主夫出火，主夫也者，主以時縱火也。陟

玄鳥蟄，陟，升也；玄鳥者，鷺也。先言陟

而後言蟄何也？陟而後蟄也。熊羆、貉

貉、鼬鼯則穴，《大戴》「穴」作「大」，非。若蟄

也。<sup>②</sup>榮鞠，樹麥，《大戴》無「樹麥」字，傳云：或

曰傳文也。鞠，草也。鞠榮而樹麥，時之急

也。王始裘，王始裘者何也？衣裘之時

也。衣，去聲。辰繫于日，傳本注無此字，疑八月

「辰則伏」之類，寫時脫也。雀入于海爲蛤，蓋有

矣，非常人也。

十月。豺祭獸。豺，牀皆反。初昏，南門

見。見，賢遍反。黑烏浴。時有養夜。玄雉入

于淮爲蜃。蜃，時忍反。織女正北鄉則旦。鄉，

許亮反。

傳曰：十月。豺祭獸，善其祭而後食

之也。初昏，南門見，南門者，星名也，及

此再見矣。黑烏浴。黑烏者何也？烏

也。浴也者，飛乍高乍下也。時有養夜，

時有養夜者，養，長也，若日之長也。玄傳

本注無「玄」字，傳作「云」，疑屬上則然，亦非也。雉入

于淮爲蜃，蜃者，蒲蘆也。織女正北鄉則

旦，織女，星名也。

十有一月。王狩，陳筋革。嗇人不從，

隕麋角。

傳曰：十有一月。王狩，狩者，言王

之時田，冬獵爲狩。陳筋革，陳筋革者，省

兵甲也。嗇人不從，不從者，弗行於時月

也，萬物不通。隕麋角，隕，墜也。日冬

①「者」，原脫，據賀本及上下文補。

②「也」，原作「而」，據賀本及上下文改。

至，陽氣至始動，諸向生皆蒙蒙符矣，故麋角隕，記時焉爾。

十有二月。鳴弋，玄駒賁。賁，音奔。納

卯蒜。蒜，蘇貫反。虞人人梁，隕麋角。

傳曰：十有二月。鳴弋，弋也者，禽

也。先言鳴而後言弋者何也？鳴而後知其弋也。

玄駒賁，玄駒也者，螳也。螳，魚豈反。賁者何也？

走於地中也。納卯蒜，

卯蒜也者，本如卯者也。納者何也？

納之君也。虞人人梁，虞人，官也；梁者，主

設罟罟者也。罟，音占。隕麋角，蓋陽氣旦

睹也，故記之也。○《周月》：維一月既南

至，昏昴畢見，日短極，基踐長，微陽動于

黃泉，陰降慘于萬物。是月斗柄建子，始

昏北指，陽氣虧，草木萌蕩。日月俱起于

牽牛之初，右回而行。月周天起一次，而

與日合宿。日行月一次，而周天曆舍于十

有二辰。<sup>①</sup>終則復始，是謂日月權輿與？

周正歲道，數起于時一而成于十次，一爲

首，其義則然。凡四時成歲，歲有春夏秋冬，

各有孟、仲、季，以名十有二月。中氣

以著時應，春三氣：雨水、春分、穀雨；

夏三氣：小滿、夏至、大暑；秋三中

氣：處暑、秋分、霜降；冬三中氣：小雪、

冬至、大寒。閏無中氣，斗指兩辰之間。

萬物春生夏長，長，丁丈反。秋收冬藏，天地

之正，四時之極，不易之道。夏數得天，百

王所同。其在商湯，用師于夏，降民之災，

順天革命，改正朔，變服殊號，一文一質，

示不相沿。以建丑爲正，易民之眠。若天

時天變，亦一代之時。亦越我周王致伐于

商，改正異械，以垂三統。至於敬授民時，

①「有」，原作「月」，據賀本改。

巡狩烝享，猶自夏焉。是謂《周月》，以紀于政。以上見《汲冢周書》，雖出近世所僞作，然其論亦會集經傳之文，無悖理者，今姑存之。○單子

曰：「夫辰角見而雨畢，單，音善。夫，音扶。

見，賢遍反，下同。○辰角，大辰蒼龍之角。角，星名也。見者，朝見東方建戌之初，寒露節也。雨畢者，殺

氣日至，而雨氣盡也。天根見而水涸，涸，下各反，

下同。○天根，亢、氐之間。涸，竭也。謂寒露雨畢之

後五日，天根朝見，水潦盡竭也。《月令》：仲秋，水始

涸。天根見，乃盡竭也。本見而草木節解，解，下

買反。○本，氐也。謂寒露之後十日，陽氣盡，草木之

枝節皆理解也。駟見而隕霜，駟，天駟，房星也。

隕，落也。謂建戌之中霜始降。火見而清風戒

寒，謂霜降之後，清風先至，所以戒人爲寒備也。故

先王之教曰：「雨畢而除道，水涸而成梁，

教，謂《月令》之屬也。九月雨畢，十月水涸也。草木

節解而備藏，備，收藏也。《月令》：季秋，農事畢

收。隕霜而冬裘具，孟冬，天子始裘，故九月可以

具。清風至而修城郭宮室。」謂火見之後，建亥

之初也。故《夏令》曰：「九月除道，十月成

梁。」《夏令》，夏后氏之令，周所因也。除道所以便行

旅，成梁所以便民，使不涉也。其時儆曰：「收而

場功，倂而畚櫪，倂，直里反。畚，音本。櫪，九玉

反。○時儆，時以儆告其民也。收而場功，使人修困倉

也。倂，具也。畚，器名，土籠也。櫪，舁土之器。具爾

畚櫪，以築作也。營室之中，土功其始。定，謂

之營室也。建亥小雪中，定星昏正於午，土功可以始，

故《詩》云「定之方中，作于楚宮」也。火之初見，期

於司里。」期，會也。致其築作之具，會於司里之官

也。此先王所以不用財賄，而廣施德於天

下者也。施德，謂因時警戒，謹蓋藏，成築功也。今

陳國火朝覲矣，而道路若塞，野場若棄，澤

不陂障，川無舟梁，覲，徒歷反。陂，彼爲反。障，

之亮反。○舟梁，以舟爲梁矣。是廢先王之教

也。」《國語·周語》。○魯宣公夏濫於泗淵，

濫，盧瞰反。○濫，漬也。漬，罾於泗水之淵以取魚也。

泗在魯城北也，又曰南門。里革斷其罾而棄之，

罾，網也。曰：「古者大寒降，土蟄發，降，下

也。寒氣初下，謂季冬建丑之月，大寒之後也。土蟄

發，謂孟春建寅之月，蟄始震也。《月令》：「孟春蟄蟲始

震，魚上冰，獺祭魚也。」水虞於是乎講罾罟，取

名魚，登川禽，而嘗之寢廟，行諸國人，助

宣氣也。罾，音孤。罟，音柳。○水虞，漁師也，掌川

澤之禁令。講，習也。罾，漁網。罟，筍也。名魚，大魚

也。川禽，鼈蜃之屬。諸，之也。是時陽氣起，魚陟負

冰，故令國人取之，所以助宣氣也。《月令》：「季冬始

漁，適嘗魚，先薦寢廟。」唐云「孟春」，誤矣。鳥獸孕，

水蟲成，孕，懷子也。謂春時也。獸虞於是乎禁

罝羅，藉魚鼈以爲夏槁，罝，音嗟。藉，又角反。

槁，苦老反。○獸虞，掌鳥獸之禁令。罝，兔罟。羅，鳥

罟也。禁，禁不得施也。藉，藉也。槁，乾也。夏不得

取，故於此時撤刺魚鼈以爲夏儲也。助生阜也。

阜，長也。鳥獸方孕，故取魚鼈助生物也。鳥獸成，

水蟲孕，水虞於是禁罝羅，設罝鄂，罝，音獨。

麗，音鹿。罝，音靜。鄂，五各反。○罝，當作罝。罝

麗，小網也。罝，陷也。鄂，柞格，所以誤獸也。謂立夏

鳥獸已成，水蟲懷孕之時，禁取魚之網，設取獸之物也。

以實廟庖，畜功用也。以獸實宗廟庖廚也。而

長魚鼈，畜四時功，足國財用也。且夫山不槎櫟，

槎，仕雅反。櫟，五達反。○槎，斫也。以株生曰櫟。

澤不伐天，艸木未成曰天。魚禁鯢鮪，鯢，音昆。

鮪，音而。○鯢，魚子也。鮪，未成魚也。獸長麇

麇，長，丁丈反。麇，音倪。麇，一老反。○鹿子曰麇，

麇子曰麇。鳥翼殷卵，殷，古候反。○翼，成也。生

哺曰殷，未乳曰卵。蟲舍蜺蜚，舍，音捨。蜺，音遲。

蜚，音沿。○蜺，蟻子也，可以爲醢。蜚，蝟陶也，可食。

舍，不取也。蕃庶物也，古之訓也。」《國語·魯

語》。○縣子問子思曰：「顏回問爲邦，夫

子曰：『行夏之時若時，殷、周異正爲非



乎？」縣，音懸。○縣子瑣言夏以建寅爲正，夫子是之，則商、周以子且爲正，乃非乎？子思曰：「夏數得天，堯、舜之所同也。夏以寅爲正，得天數之全，故堯、舜亦然。殷、周王征伐革命以應乎天，因改正朔，若云天時之改爾，故不相因也。湯、武革命，所以應天，故變其正朔，蓋言若受天命然。夫受禪於人者則襲其統，夏因人心之歸以受舜禪，故亦因其朔不改。受命於天者則革之，所以神其事，如天道之變然也。三統之義，夏得其正，是以夫子云。」《孔叢子·雜訓》。

## 月令

### 王朝禮三之下

孟春之月，日在營室，昏參中，旦尾中。

參，所林反。○孟，長也。日月之行，一歲十二會，聖王因其會而分之，以爲大數焉。觀斗所建，命其四時。此云孟春者，日月會於諏訾而斗建寅之辰也。凡記昏明中星者，

爲人君南面而聽天下，視時候以授人事。○《淮南子·時則訓篇》無「日在營室」字，有「招搖指寅」字。○《唐》本作「正月之節日在虛昏昂中曉心中斗建寅位之初」。其日甲乙。乙之言軋也。日之行，春東從青道，發生萬物，月爲之佐，時萬物皆解孚甲，自抽軋而出，因以爲日名焉。乙不爲月名者，君統臣功也。○《淮》此上有「其位東方」，下有「盛德在木」字。其帝大皞，其神句芒。大，音泰。皞，胡老反。句，古侯反，下同。○此蒼精之君，木官之臣，自古以來著德立功者也。大皞，宓戲氏。句芒，少皞氏之子，曰重，爲木官。○《淮》無此二句。①其蟲鱗，象物孚甲將解。鱗，龍蛇之屬。其音角，謂樂器之聲也。二分羽益一以生角，角數六十四，屬木者，以其清濁中，民象也。春氣和則角聲調，《樂記》曰：「角亂則憂，其民怨。」凡聲尊卑取象五行，數多者濁，數少者清，大不過宮，細不過羽。律中大簇。中，丁仲反，下同。簇，七豆反。○律，候氣之管，以銅爲之。中，猶應也。孟春氣至則大簇之律應，謂

①「句」，原作「字」，據元明本、寬文本、賀本改。

吹灰也。大簇者，林鐘之所生，三分益一，律長八寸，凡律空圍九分。《周語》曰：「大簇，所以金奏贊陽出滯。」其數八，數者，五行佐天地生物成物之次也。《易》曰：「天一，地二，天三，地四，天五，地六，天七，地八，天九，地十。」而五行自水始，火次之，木次之，金次之，土爲後。木生數三，成數八，但言八者，舉其成數。○《唐》此下有「其性仁其事貌」字。其味酸，其臭羶。木之臭味也。①凡酸羶者，皆屬焉。其祀戶，祭先脾。春陽氣出，祀之於戶，內陽也。祀之先祭脾者，春爲陽中，於藏直脾，脾爲尊。凡祭五祀於廟，用特性，有主有尸，皆先設席于奧。祀戶之禮，南面設主于戶內之西，乃制脾及腎爲俎，奠于主北。又設盛於俎西，祭黍稷、祭肉、祭醴，皆一。祭肉，脾一，腎再，既祭徹之，更陳鼎俎，設饌于筵前，迎尸，略如祭宗廟之儀。東風解凍，蟄蟲始振。魚上冰，獺祭魚，鴻鴈來。獺，他達反。○皆記時候也。振，動也。《夏小正》：「正月啟蟄，魚陟負冰。」漢始亦以驚蟄爲正月中，此時魚肥美，獺將食之，先以祭也。鴈自南方來，將北反其居。今《月令》「鴻」皆爲「候」。○《呂氏春秋》及《淮》「鴻鴈來」皆作「候鴈北」。○《淮》「振」下有「蘇」字，「上」下有「負」字。

○《唐》云「立春之日，東風解凍，後五日蟄蟲始振，後五日魚上冰」，仍以「獺祭魚，鴻鴈來」兩句入後章。天子居青陽左个，乘鸞路，駕倉龍，載青旂，衣青衣，服倉玉，食麥與羊，其器疏以達。載，音戴。上「衣」去聲，後同。○皆所以順時氣也。「青陽左个」，大寢東堂北偏。鸞路，有虞氏之車，有鸞和之節而飾之以青，取其名耳。春言鸞，冬夏言色，互文。馬八尺以上爲龍。凡所服玉，謂冠飾及所佩者之衡璜也。麥實有孚甲，屬木。羊，火畜也，時尚寒，食之以安性也。器疏者，刻鏤之，象物當貫土而出也。凡此車馬衣服，皆所取於殷時而有變焉，非周制也。周禮朝、祀、戎、獵，車服各以其事，不以四時爲異。又《玉藻》曰：「天子龍衮以祭，玄端而朝日，皮弁以日視朝。」與此皆殊。○《呂》「路」作「輅」，「倉龍」作「蒼龍」，「倉玉」作「青玉」。○《淮》此一節作「天子衣青衣乘蒼龍服蒼玉建青旗食麥與芋服八風水饗柘燧火東宮御女青色衣青采鼓琴瑟其兵矛其畜羊朝於青陽左个以出春令命相布德施惠行慶賞省徭賦」。《唐》「鸞」作「青」，「路」作「輅」，

①「臭味」，元明本、寬文本、賀本作「味臭」。

「倉」並作「蒼」。是月也，以立春。先立春三日，太史謁之天子曰：「某日立春，盛德在木。」天子乃齊。先，悉薦反。齊，側皆反，下同。○太史，禮官之屬，掌正歲年以序事。謁，告也。○《呂》、《唐》、《齊》皆作「齋」。○《淮》無「是月」至此一節。○《唐》無「是月也以立春」字，「太史」下有「以先立春三日」字，「之」作「於」。立春之日，天子親帥三公、九卿、諸侯、大夫以迎春於東郊。還反，賞公、卿、諸侯、大夫於朝。還，音旋，後同。○迎春，祭倉帝靈威仰於東郊之兆也。《王居明堂禮》曰：「出十五里迎歲。」蓋殷禮也。周近郊五十里。賞，謂有功德者有以顯賜之也。朝，大寢門外。○《呂》、《淮》、《唐》、《帥》皆作「率」。《唐》無「三」、「九」字。《呂》、《淮》並無「諸侯」字。《淮》「迎春」作「迎歲」。「于」作「於」，無「還反至於朝」一節。《呂》、《唐》「反」皆作「乃」。命相布德和令，行慶施惠，下及兆民。相，悉亮反。○相，謂三公，相王之事也。德，謂善教也。令，謂時禁也。慶，謂休其善也。惠，謂恤其不足也。天子曰兆民。○《唐》「民」作「人」，篇內並同。慶賜遂行，

毋有不當。當，丁浪反。○遂，猶達也。言使當得者皆得，得者無非其人。○《呂》、《唐》「毋」皆作「無」，篇內並同。○《淮》以「命相」至此一節屬上文。乃命太史守典奉法，司天日月星辰之行，宿離不貸，毋失經紀，以初為常。離，音儷，呂計反。貸，吐得反。○典，六典。法，八法也。離，讀如儷偶之儷。宿儷，謂其屬馮相氏、保章氏掌天文者相與宿偶，當審候伺，不得過差也。經紀，謂天文進退度數。○《呂》「貸」作「忒」。○《淮》無「乃命」至此一節。○《唐》云「命太史司天曆候」，無「之行」字，「為常」下又有「是月也，命有司祭風師。是月也，命有司釁龜策占兆審卦吉凶」。○下又別分一章，云「正月中氣，日在危昏，畢中曉，尾中斗，建寅位之中。雨水之日獮祭魚。後五日鴻鴈來，後五日草木萌動，天子乃命有司布農事，舍東郊，修封疆，端徑術，善相丘陵、阪險、原隰，土地所宜五穀所殖，以教導人，必躬親之。田事既飭，先定準直，農乃不惑」。是月也，天子乃以元日祈穀于上帝。謂以上辛郊祭天也。《春秋傳》曰：「夫郊，祀后稷以祈農事。是故啟蟄而郊，郊而後耕。」上帝，大微之帝也。

○《唐》無「是月也」字。乃擇元辰，天子親載耒耜，措之于參保介之御閒。帥三公、九卿、諸侯、大夫躬耕帝籍，天子三推，三公五推，卿、諸侯九推。耒，力對反。推，吐回反。○元辰，蓋郊後占亥也。耒，耜之上曲也。保介，車右也。置耒耜於車右與御者之間，明已勸農，非農者也。人君之車，必使勇上衣甲居右而參乘，備非常也。保，猶衣也。介，甲也。帝籍，爲天神借民力所治之田也。○《呂》「于參」作「參于」，「帥」作「率」，「帝籍」作「藉田」，「侯」下有「大夫」字。○《唐》「措」作「置」，無「于參保介之御閒」字，有「車右」字，無「三」、「九」字，「帥」及「帝籍」同《呂》本。反，執爵于大寢，三公、九卿、諸侯、大夫皆御，命曰勞酒。勞，力報反。○既耕而宴飲，以勞群臣也。大寢，路寢。御，侍也。○《呂》無「大夫皆」字。○《淮》無「是月」至此一節。○《唐》「反」作「還」，「執爵」作「讌飲」，「于」作「於」，無「三」、「九」字。是月也，天氣下降，地氣上騰，天地和同，《唐》無此一節。草木萌動。此陽氣蒸達，可耕之候也。《農書》曰：「上長冒櫬，陳根可拔，耕者急

發。○《呂》「萌」作「繁」。王命布農事，命田舍東郊，皆修封疆，審端徑術，田，謂田畷，主農之官也。舍東郊，順時氣則居，以命其事也。封疆，田首之分職。術，《周禮》作遂。遂上有徑，遂，小溝也，步道曰徑。今《尚書》曰「分命羲仲，宅隅夷」也。○《呂》「王」下無「命」字。善相丘陵、阪險、原隰，土地所宜，五穀所殖，以教道民，必躬親之。相，視也。田事既飭，先定準直，農乃不惑。相，息亮反。阪，音反。道，音導。○說所以命田舍東郊之意也。準直，謂封疆徑遂也。《夏小正》曰：「農率均田。」○《淮》無「是月」至此一節。○《唐》屬上文。是月也，命樂正入學習舞。爲仲春將釋菜。○《淮》無此一節。○《唐》無「入學」字。乃修祭典，重祭禮，歲始省錄也。○《淮》作「修除祠位」。命祀山林川澤，犧牲毋用牝。牝，頻忍反。○爲傷妊生之類。①○《淮》作「幣禱鬼神犧牲用牝」。○《唐》「山林川澤」作「岳鎮海瀆」。禁止伐木，盛德所在。

①「生」，原脫，據賀本補。

○《淮》無「止」字。毋覆巢，毋殺孩蟲、胎、夭、飛鳥，毋麝毋卵。孩，戶哀反。夭，烏老反。麝，音迷。卵，力管反。○爲傷萌幼之類。○《淮》「巢」下無「毋」字及「孩蟲」、「飛鳥」字。○《唐》無「毋覆」至「飛鳥」字。毋聚大衆，毋置城郭，爲妨農之始。○《淮》無「大」字及下「毋」字。掩骼埋胔。骼，江百反。胔，才賜反。○爲死氣逆生也。骨枯曰骼，肉腐曰胔。○「埋胔」，《呂》作「糞」，《淮》作「穢」。是月也，不可以稱兵，稱兵必天殃。逆生氣。○《呂》、《唐》「必」下有「有」字。兵戎不起，不可從我始。爲客不利，主人則可。○《呂》「可」下有「以」字。毋變天之道，以陰政犯陽。毋絕地之理，易剛柔之宜。毋亂人之紀。仁之時而舉義事。○《淮》無「是月」至此一節。孟春行夏令，則雨水不時，巳之氣乘之也。四月於消息爲乾。○《呂》、《淮》「雨水」並作「風雨」。草木蚤落，生日促。○《呂》、《淮》、《唐》「蚤」並作「早」，篇內並同。《呂》「落」作「槁」。國時有恐，以火訛相驚。○《呂》、《淮》「時」作

「乃」。行秋令，則其民大疫，申之氣乘之也，七月始殺。○《呂》無「其」字。猋風暴雨總至，猋，必遙反。○正月宿直尾箕，箕好風，其氣逆也。回風爲猋。○《呂》「猋」作「疾」，「總」作「數」。《淮》、《唐》「猋」作「飄」。○《淮》「總」作「總」。藜莠蓬蒿並興；藜，力兮反。莠，音酉。○生氣亂，惡物茂。行冬令，則水潦爲敗，雪霜大摯，首種不入。摯，音至。種，章勇反。○亥之氣乘之也。舊說首種謂稷。○《淮》「雪」作「雨」，「摯」作「雹」，「種」作「稼」，句下有「正月官司司空其樹楊」。○仲春之月：日在奎，昏弧中，旦建星中。奎，苦圭反。弧，音胡。○仲，中也。仲春者，日月會於降婁而斗建卯之辰也。弧在輿鬼南，建星在斗上。○《呂》「弧」作「孤」。○《淮》無「日在奎」字，有「招搖指卯」字。○《唐》作「二月之節日在營室昏東井中曉箕中斗建卯位之初」。律中夾鐘。夾鐘者，夷則之所生，三分益一，律長七寸二千一百八十七分寸之千七十五。仲春氣至，則夾鐘之律應。《周語》曰：「夾鐘出四隙之細。」○諸本上下並與孟春文同，今從《唐》本刪，後放此。始雨水，桃始華，

倉庚鳴，鷹化爲鳩。皆記時候也。倉庚，驪黃也。

鳩，搏穀也。漢始以雨水爲二月節。○《呂》「始」作「李」。

《淮》作「桃李始華」。○《唐》無「始雨水」字，作「驚蟄之日

桃始華後五日倉庚鳴後五日鷹化爲鳩」。天子居青陽

大廟。青陽大廟，東堂大室。○《淮》「居」作「朝于」。

是月也，安萌芽，養幼少，存諸孤。少，詩召反。

○助生氣也。○《淮》以此一節屬下文。擇元日，命民

社。社，后土也。使民祀焉，神其農業也。祀社日用甲。

○《淮》、《唐》皆以此屬下文。命有司省囹圄，去桎

梏，毋肆掠，止獄訟。省，所景反，又所幸反。囹，音

零。圖，魚呂反。去，羌呂反。桎，音質。梏，工毒反。掠，

音亮。○順陽寬也。省，減也。囹圄，所以禁守繫者，若今

別獄矣。桎梏，今械也，在手曰桎，在足曰梏。肆，謂死刑

暴尸也。《周禮》曰：「肆之三日。」掠，謂捶治人。○《淮》

「肆」作「笞」，下有「養幼小存孤獨以通句萌擇元日令民社」

十六字。是月也，《唐》此下有「命樂正習舞上丁釋奠于

國學天子乃率公卿諸侯親往視之命有司上戊釋奠于太公

廟是月也擇元日命人社」，又分此下別爲一章，云「二月中

氣日在奎昏東井中曉南斗中斗建卯位之中春分之日玄鳥

至後五日雷乃發聲後五日始電是月也祀朝日於東郊天子

獻羔開冰先薦寢廟是月也日夜分則同度量平權衡」。玄

鳥至。至之日，以太牢祠于高禘，天子親往，

謀，音梅。○玄鳥，燕也。燕以施生時來，巢人堂宇而孚

乳，嫁娶之象也，媒氏之官以爲候。高辛氏之世，玄鳥遺

卵，娥簡吞之而生契，後王以爲媒官嘉祥而立其祠焉。變

媒言謀，神之也。○《呂》「祠」作「祀」。○《唐》此上別有

「是月也」字，無下「至」字。后妃帥九嬪御。御，謂從

往侍祠。周禮，天子有夫人，有嬪，有世婦，有女御。獨云

九嬪，舉中言也。○《呂》、《唐》「帥」作「率」。乃禮天子

所御，帶以弓韉，授以弓矢于高禘之前。韉，

大木反。○天子所御，謂今有娠者。於祠，大祝酌酒，飲於

高禘之庭，以神惠顯之也。帶以弓韉，授以弓矢，求男之祥

也。《王居明堂禮》曰：「帶以弓韉，禮之謀下，其子必得天

材。」○《淮》無「是月也」至此節。○《唐》此下有「是月也命

有司祭馬祖」九字。是月也，日夜分，雷乃發聲，

始電。蟄蟲咸動，啟戶始出。又記時候。發，猶

出也。○《呂》「啟」作「開」。○《淮》「乃」作「始」，無「始電」字，「動」下有「蘇」字，無「啟戶始出」字。○《唐》以此一節屬上文，無「蟄蟲」以下八字。先雷三日，奮木鐸以令兆民曰：「雷將發聲，有不戒其容止者，生子不備，必有凶災。」先，悉薦反。○主戒婦人有娠者也。容止，猶動靜。○《呂》、《淮》並無「木」字，「將」並作「且」。《呂》「令」下有「于」字。《淮》「奮」作「振」，「令」下有「於」字。○《唐》無此一節。日夜分，則同度量，鈞衡石，角斗甬，正權概。量，音亮。甬，音勇。概，古代反。○因晝夜等而平當平也。同、角、正，皆謂平之也。丈尺曰度。斗斛曰量。三十斤曰鈞。稱上曰衡。百二十斤曰石。甬，今斛也。稱錘曰權。概，平斗斛者。○《呂》「甬」作「桶」。○《淮》無「日夜分則」字，有「令官市」字，「甬」作「稱」，「正」作「端」。○《唐》此一節屬上文。是月也，耕者少舍，乃修閭扇，寢廟畢備，閭，戶臘反。○舍，猶止也。因蟄蟲啟戶，耕事少閒而治門戶也。用木曰閭，用竹箬曰扇。畢，猶皆也。凡廟前曰廟，後曰寢。○《淮》無此一節。毋作大事以妨農之事。大

事，兵役之屬。○《呂》、《淮》、《唐》並無「之」字。《呂》、《淮》「事」作「功」。○《淮》以此句屬下文。是月也，毋竭川澤，毋漉陂池，毋焚山林。漉，音鹿。陂，彼宜反。○順陽養物也。畜水曰陂。穿地通水曰池。○《淮》無「是月也」字，有「毋作大事以妨農功」八字。天子乃鮮羔開冰，先薦寢廟。鮮，當為「獻」，聲之誤也。獻羔，謂祭司寒也。祭司寒而出冰，薦於宗廟，乃後賦之。《春秋傳》曰：「古者日在北陸而藏冰，西陸朝覲而出之。其藏冰也，深山窮谷，固陰沍寒，於是乎取之。其出之也，朝之祿位，賓、食、喪、祭於是乎用之。其藏之也，黑牡、秬黍以享司寒。其出之也，桃弧棘矢以除其災。其出入也，時食肉之祿，冰皆與焉。大夫命婦，喪浴用冰。祭寒而藏之，獻羔而啟之。公始用之，火出而畢賦。自命夫命婦至于老疾，無不受冰。」○《呂》「鮮」作「獻」。○《淮》無此一節。○《唐》屬上文。上丁，命樂正習舞釋菜，樂正，樂官之長也。命習舞者，順萬物始出地鼓舞也。將舞，必釋菜於先師以禮之。《夏小正》曰：「丁亥，萬人入學。」天子乃帥三公、九卿、諸侯、大夫親往視之。

順時達物也。仲丁，又命樂正入學習樂。爲季春

將合樂也。習樂者，習歌與八音。○《呂》「習」作「入」，

「釋」作「舍」，「帥」作「率」，無「大夫」字，「仲」作「中」。

○《淮》無「上丁」以下至此一節。○《唐》入前章。是月

也，祀不用犧牲，用圭璧，更皮幣。更，占行反。

○爲季春將選而合騰之也。更，猶易也。當祀者，告以玉

帛而已。仲春行秋令，則其國大水，寒氣總

至，西之氣乘之也。八月，宿直昴畢，畢好雨。○《淮》

「總」作「總」。寇戎來征，金氣動也，畢又爲邊兵。行

冬令，則陽氣不勝，麥乃不孰，子之氣乘之也。十

一月爲大陰。○諸本「孰」皆作「熟」，篇內皆同。民多相

掠，陰姦衆也。○《淮》「掠」作「殘」。行夏令，則國

乃大旱，煖氣早來，午之氣乘之也。○《呂》、《淮》

「煖」作「煖」。《淮》「國乃」作「其國」。蟲螟爲害。螟，

亡丁反。○暑氣所生爲災害也。○《淮》此下有「二月官倉

其樹杏」。○季春之月，日在胃，昏七星中，旦

牽牛中。季，少也。季春者，日月會於大梁而斗建辰之

辰。○《淮》無「日在胃」字，有「招搖指辰」字。○《唐》作

「三月之節日在婁昏柳中曉南斗中斗建辰位之初」。律

中姑洗。洗，素典反。○姑洗者，南昌之所生也，三分益

一，律長七寸九分寸之一。季春氣至，則姑洗之律應，《國

語》曰：「姑洗，所以修潔百物，考神納賓。」○諸本見仲春

章。桐始華，田鼠化爲鴛，虹始見，萍始生。

鴛，音如。虹，音紅。見，賢遍反。萍，步丁反。○皆記時

候也。鴛，鴛母。蟬，蟬謂之虹。萍，萍也，其大者曰蘋。

○《呂》、《淮》、《唐》「萍」作「萍」。○《唐》云「清明之日桐始

華後五日田鼠化爲鴛後五日虹始見」，又分「萍始生」入下

章。天子居青陽右个。青陽右个，東堂南偏。○諸

本見仲春章。是月也，天子仍薦鞠衣于先帝。

鞠，居六反，如菊華也，又去六反，如鞠塵。○爲將蠶求福

祥之助。鞠衣，黃桑之服。先帝，大皞之屬。○《呂》無

「乃」字。○《淮》無此一節。命舟牧覆舟，五覆五

反，乃告舟備具于天子焉。覆，芳服反。○舟牧，

主舟之官也。覆反舟者，備傾漏也。○《呂》、《淮》皆無

「命」字。《唐》「舟牧」作「有司」。《淮》「告」作「言」，無「舟



備焉」字。天子始乘舟，薦鮪于寢廟，鮪，于軌反。

○進時美物。○《淮》「子」下有「乃」字，「于」作「於」。乃

為麥祈實。為，于僞反。○於含秀求其成也。不言所

祈，承寢廟可知。○《唐》無此句。是月也，生氣方

盛，陽氣發泄，句者畢出，萌者盡達，不可以

內。句，古侯反。○時可宣出，不可收斂也。句，屈生者。

芒而直曰萌。○《呂》「句」作「牙」。天子布德行惠，

命有司發倉廩，賜貧窮，振乏絕；振，猶救也。

○《淮》無「布德行惠」字，「倉」作「困」，「廩」作「倉」，「賜」作

「助」。○《呂》「倉」作「窮」。開府庫，出幣帛，周天

下；勉諸侯，聘名士，禮賢者。周，謂給不足也。

勉，猶勸也。聘，問也。名士，不仕者。○《淮》無「周天下」

字，「勉」作「使」。○《唐》分此下別為一章，曰「三月中氣日

在胃昏張中曉南斗中斗建辰位之中穀雨之日萍始生後五

日鳴鳩拂其羽後五日戴勝降于桑」。是月也，命司空

曰：「時雨將降，下水上騰。循行國邑，周視

原野，脩利隄防，道達溝瀆，開通道路，毋有

障塞。上，時掌反。行，下孟反。隄，丁兮反。○廣平曰

原，國也，邑也，平野也。溝瀆與道路皆不得不通，所以除

水潦，便民事也。古者溝上有路。○《淮》無「是月也」，

「曰」字，「道達」作「導通」，「開通道路」作「達路除道」，無

「毋有障塞」字，有「從國始至境止字」。○《唐》「命司空」作

「天子命有司」，「循」作「巡」。田獵，置罟、羅罔、畢

罟、餒獸之藥，毋出九門。」置，子斜反。罟，音浮。

罟，於計反。餒，於僞反。○為鳥獸方孚乳，傷之逆天時

也。獸罟曰置罟。鳥罟曰羅罔。小而柄長謂之畢。罟，射

者所以自隱也。凡諸罟及毒藥，禁其出九門，明其常有時

不得用耳。天子九門者，路門也，應門也，雉門也，庫門也，

皋門也，城門也，近郊門也，遠郊門也，關門也。今《月令》

無「罟」，「罟」為「弋」。○罟，音古。弋，羊職反。○《呂》

「罔」作「網」。《呂》、《淮》「獵」下有「畢弋」字，無「畢罟」字。

《呂》、《唐》「九」並作「國」。《淮》「罔」作「罟」，「獸」作「毒」。

是月也，命野虞毋伐桑柘。柘，之夜反。○愛蠶食

也。野虞，謂主田及山林之官。○《淮》無「是月也」字，

「命」作「乃禁」。○唐「野虞」作「有司」。鳴鳩拂其羽，

戴勝降于桑，蠶將生之候也。鳴鳩飛且翼相擊，趨農

急也。戴勝，織紵之鳥，是時恒在桑。言降者，若時始自天來，重之也。○《淮》「拂」作「奮」，「勝」作「篤」。○《唐》屬上文。具曲植簾筐。植，直吏反。簾，居吕反。筐，丘狂反。○時所以養蠶器也。曲，薄也。植，槌也。○《吕》「曲植簾」作「狹曲蒙」，《淮》作「樸曲筥」，《唐》作「乃修蠶器」。后妃齊戒，親東鄉躬桑，禁婦女毋觀省婦使，以勸蠶事。鄉，許亮反。觀，古喚反。省，所景反。○后妃親採桑，示帥先天下也。東鄉者，鄉時氣也。是明其不常留養蠶也。留養者，所卜夫人與世婦。婦，謂世婦及諸臣之妻也。《內宰》職曰：「仲春，詔后帥外內命婦，始蠶于北郊。」女，外內子女也。《夏小正》曰：「妾子治蠶，執養官事。」毋觀，去容飾也。婦使，縫線組紉之事。○《吕》「勸」作「力」。○《淮》無「親」字，「躬」作「親」，無「禁婦女毋觀」字，無「以」字。○《唐》「親東鄉躬桑」作「享先蠶而躬桑」，無「禁婦女」，無「觀省婦使」字。蠶事既登，分繭稱絲效功，以共郊廟之服，無有敢惰。繭，古典反。共，音恭。○登，成也。敕往蠶者，蠶畢將課功以勸戒之。○《吕》「惰」作「墮」。○《淮》、《唐》無此一節。是月也，命工師令百工審五庫之量，金、

鐵、皮、革、筋、角、齒、羽、箭、幹、脂、膠、丹、漆，毋或不良。量，音亮。筋，音斤。○工師，司空之屬官也。五庫，藏此諸物之舍也。量，謂物善惡之舊法也。幹，器之木也。凡輅幹有當用脂。良，善也。○《吕》、《淮》「或」並作「有」。○《淮》無「是月也」字，「命工師」至「之量」作「命五庫令百官審」，無「齒羽」字。百工咸理，監工日號：「毋悖于時，毋或作為淫巧以蕩上心。」監，占銜反。悖，必內反。○咸，皆也。於百工皆理治其事之時，工師則監之。日號，令之戒之以此二事也。悖，猶逆也。百工作器物各有時，逆之則不善。時者，若《弓人》「春液角，夏治筋，秋合三材，冬定體」之屬也。淫巧，謂僞飾不如法也。蕩，謂動之使生奢泰也。今《月令》無「于時」，「作為」為「詐僞」。○《吕》「為」作「僞」。《唐》「于」作「於」。《唐》無「或為」字。是月之末，擇吉日大合樂，天子乃率三公、九卿、諸侯、大夫親往視之。大合樂者，所以助陽達物，風化天下也。其禮亡，今天子以大射，郡國以鄉射禮代之。○《淮》無「是月之末」字。《唐》「之末」作「也」。《淮》「擇」下有「下旬」

字，「樂」下有「致歡欣」字，無「天子」以下十六字。○《唐》屬下文。是月也，乃合累牛騰馬，遊牝于牧。累，力追反。○累、騰，皆乘匹之名。是月所合牛馬，謂繫在廄者，其牝欲遊，則就牧之牡而合之。○《呂》「累」作「繫」。○《淮》無「是月也」，「累」作「繫」。犧牲駒犢，舉書其數。以在牧而校數書之，明出時無他故，至秋當錄內，且以知其息之多少也。○《淮》無此八字。○《唐》此下云「是月也擇吉日大合樂天子乃率公卿諸侯大夫親往視之」。命國難，九門磔攘，以畢春氣。難，乃多反。磔，竹伯反。攘，如羊反。○此難，難陰氣也。陰寒至此不止，害將及人。所以及人者，陰氣右行，此月之中，日行歷昴，昴有大陵積尸之氣，氣佚則厲鬼隨而出行，命方相氏帥百隸索室廩疫以逐之，又磔牲以攘於四方之神，所以畢止其災也。《王居明堂禮》曰：「季春出疫于郊，以攘春氣。」○《呂》無「命」字，「國」下有「人」字，此下有「行之是令而」至「三句」。○《呂》、《淮》、《唐》「難」並作「難」。○《淮》「命」作「令」，此下有「行是月令甘雨至」三句。○《唐》「命」上有「是月也」字。季春行冬令，則寒氣時發，草木皆肅，且之氣乘之也。肅，謂枝葉縮栗。國有大

恐；以水詛相驚。行夏令，則民多疾疫，時雨不降，未之氣乘之也。六月宿直鬼，鬼為天尸，時又有暑也。山陵不收；高者暎於熱也。○《淮》「收」作「登」。行秋令，則天多沈陰，淫雨蚤降，戍之氣乘之也。九月多陰。淫，霖也，雨三日以上為霖。今《月令》曰「衆雨」。兵革並起。陰氣勝也。○《淮》此下有「三月官鄉其樹李」。○孟夏之月，日在畢，昏翼中，旦婺女中。孟夏者，日月會於實沈而斗建巳之辰。○《呂》作「旦須女中」。○《淮》無「日在畢」字，有「招搖指巳」字。○《唐》作「四月之節日在昴昏翼中曉牽牛中斗建巳位之初」。其日丙丁。丙之言炳也。日之行，夏南從赤道，長育萬物，月為之佐，時萬物皆炳然著見而強大，又因為日名焉。《易》曰：「齊乎巽，相見乎離。」○《淮》此上有「其位南方」字，下有「盛德在火」字。○《唐》「丙」作「景」。其帝炎帝，其神祝融。此赤精之君，火官之臣，自古以來，著德立功者也。炎帝，大庭氏也。祝融，顓頊氏之子，曰黎，為火官。○《淮》無此二句。其蟲羽，象物從風鼓翼，飛鳥之屬。其音徵，徵，張里反。○「三分宮去一以

生徵，徵數五十四，屬火者，以其微清，事之象也。夏氣和則徵聲調，《樂記》曰：「徵亂則哀，其事勤。」律中中呂。

中呂之中，音仲。○孟夏氣至，則中呂之律應。中呂者，無

射之所生，三分益一，律長六寸萬九千六百八十三分寸之萬二千九百七十四，《周語》曰：「中呂，宣中氣。」○諸本

「中」皆作「仲」。其數七，火生數二，成數七，但言七者，

亦舉其成數。○《唐》此下有「其性禮其事視」。其味

苦，其臭焦。火之臭味也。凡苦焦者皆屬焉。其祀

竈，祭先肺。夏陽氣盛熱於外，祀之於竈，從熱類也。

祀之先祭肺者，陽位在上，肺亦在上，肺為尊也。竈在廟門

外之東，祀竈之禮先席於門之奧，東面設主于竈陴，乃制肺

及心肝為俎，奠于主西。又設盛于俎南，亦祭黍；祭肺、

心、肝各一，祭禮三，亦既祭徹之，更陳鼎俎，設饌于筵前。

迎尸如祀戶之禮。螻蟈鳴，蚯蚓出。王瓜生，苦

菜秀。螻，音樓。蟈，古獲反。蚓，以忍反。○皆記時候

也。螻蟈，蛙也。王瓜，草挈也。今《月令》云「王荇生」，

《夏小正》云「王荇秀」，未聞孰是。○《呂》「瓜」作「善」。

○《淮》「蚓」作「蟻」。○《唐》云「立夏之日螻蟈鳴後五日丘

蚓出後五日王瓜生」，而分「苦菜秀」入後章。天子居明

堂左个，乘朱路，駕赤駟，載赤旂，衣朱衣，服

赤玉，食菽與雞，其器高以粗。駟，音留。粗，七

奴反。○明堂左个，大寢南堂東偏也。菽，實孚甲堅合，屬

水。雞，木畜，時熱食之，亦以安性也。粗，猶大也。器高

大者，象物盛長。○《呂》、《唐》「路」作「輅」。○《淮》此一

節作「天子衣赤衣乘赤騮服赤玉建赤旗食菽與雞服八風水

饗柘燧火南宮御女赤色衣赤采吹芋笙其兵戟其畜雞朝于

明堂左个以出夏令」。○《唐》「雞」作「雉」。是月也，以

立夏。先立夏三日，太史謁之天子曰：「某

日立夏，盛德在火。」天子乃齊。先，悉薦反。○

謁，告也。○《淮》無「是月也」至此一節。○《唐》無「是月

也以立夏」六字，「太史」下云「以先立夏三日謁於」。立

夏之日，天子親帥三公、九卿、大夫以迎夏於

南郊。還反，行賞封諸侯，慶賜遂行，無不欣

說。說，音悅。○迎夏，祭赤帝赤燔怒於南郊之兆也。不

言帥諸侯而云「封諸侯」，諸侯時或無在京師者，空其文也。

《祭統》曰：「古者於禘也，發爵賜服，順陽義也。於嘗也，

出田邑，發秋政，順陰義也。」今此行賞可也，而封諸侯則違於古。封諸侯，出土地之事，於時未可，似失之。○諸本「帥」並作「率」，「反」並作「乃」。○《呂》無「行」及「諸」字。○《淮》「迎夏」作「迎歲」，「行賞」作「賞賜」，無「慶賜」以下八字。○《唐》無「三」、「九」字，「賞」下無「封」字，有「公卿」字，「侯」下有「大夫於朝」字。乃命樂師習合禮樂，為將飲酎。○《淮》作「脩禮樂饗左右」。○《唐》以此一節屬下文。命大尉贊桀俊，遂賢良，舉長大，助長氣也。贊，猶出也。桀俊，能者也。遂，猶進也。三王之官有司馬，無大尉，秦官則有大尉。今俗人皆云周公作《月令》，未通於古。○《呂》「尉」作「封」。○《淮》「遂」作「選」，「長大」作「孝弟」。○《唐》「大尉」作「相」，「桀」作「傑」。○今按：後章「養壯佼」字當屬此，「長大」之下蓋簡錯也。行爵出祿必當其位。當，丁浪反。○使順之也。○《淮》「必當其位」作「佐天長養」。○《唐》此下云「是月也命樂正習盛樂大雩帝命有司禱祀山川方之卿士有益於人者以祈穀實是月也命有司祀雨師」，又別分一章云「四月中氣日在畢昏軫中曉須女中斗建巳位之中小滿之日苦菜秀後五日靡草死後五日小暑至挺重囚出輕繫」。是月也，

繼長增高，謂草木盛蕃廡。○《淮》無「是月也」，「長」作「脩」。毋有壞墮。墮，許規反。○亦為逆時氣。○《呂》、《淮》「墮」作「隳」。毋起土功，毋發大衆，為妨蠶農之事。○《淮》「起」作「興」，無「毋發大衆」字。毋伐大樹。亦為逆時氣。是月也，天子始緇。緇，勅其反。○初服暑服。○《淮》無此一節。○《唐》作「天子初衣暑服」。命野虞出行田原，為天子勞農勸民，毋或失時。行，下孟反，下同。為，于偽反。○重敕之。○《呂》無「為天子」字，《淮》、《唐》同。○《淮》「命」作「令」，無「出」字，「勞農勸民」作「勸農事」，無「毋或失時」字。○《唐》「野虞出」作「有司巡」，「勸民」作「勉人」。命司徒巡行縣鄙，命農勉作，毋休于都。急趨於農也。縣鄙，鄉遂之屬，主民者也。《王居明堂禮》曰：「毋宿于國。」今《月令》「休」為「伏」。○《呂》「巡」作「循」。○《淮》、《唐》並無此一節。是月也，驅獸毋害五穀，《淮》無「是月也」字，「獸」下有「畜」字，「毋害」亦作「勿令害」。毋大田獵。為傷蕃廡之氣。○《淮》無此句。

農乃登麥，天子乃以彘嘗麥，先薦寢廟。登，進也。麥之新氣尤盛，以彘食之，散其熱也。彘，水畜。○《呂》「登」作「升」。○《淮》無「農乃登麥」一句，無「乃」字。○《唐》「嘗麥」下有「羞以含桃」字。是月也，聚畜百藥。畜，且六反。○蕃廩之時，毒氣盛。○《呂》「畜」作「蓄」。○《淮》無「是月也」字。○《唐》以屬下章。廩草死，麥秋至。斷薄刑，決小罪，斷，丁亂反。○舊說云：廩草，薺亭歷之屬。《祭統》曰「草艾則墨」，謂立秋後也。刑無輕於墨者，今以純陽之月斷刑決罪，與「毋有壞墮」自相違，似非。○《呂》「廩」作「廩」，無「決小罪」一句。○《淮》無「斷薄刑，決小罪」二句。○《唐》已見上文。出輕繫。崇寬。○《呂》、《淮》並無此句。○《唐》已見上文。蠶事畢，后妃獻繭，乃收繭稅，以桑爲均，貴賤長幼如一，以給郊廟之服。長，丁丈反。○后妃獻繭者，內命婦獻繭於后妃。收繭稅者，收於外命婦。外命婦雖就公桑蠶室而蠶，其夫亦當有祭服以助祭，收以近郊之稅耳。貴賤長幼如一，國服同。○《呂》無「蠶事畢」字，「長幼」作「少長」，「之」下有「祭」字。○《淮》

無此一節。○《唐》作「是月也蠶事既登」。是月也，天子飲酎，用禮樂。酎，直又反。○酎之言醇也，謂重釀之酒也。春酒至此始成，與群臣以禮樂飲之於朝，正尊卑也。孟冬云「大飲烝」，此言「用禮樂」，互其文。○《呂》無「用禮樂」字，有「行之是令甘雨至」三句「字」。○《淮》無此一節。孟夏行秋令，則苦雨數來，五穀不滋，數，所角反。○申之氣乘之也。苦雨，白露之類，時物得雨傷。四鄙入保；金氣爲害也。鄙，界上邑。小城曰保。○《淮》「鄙」作「鄰」。行冬令，則草木蚤枯，長日促。後乃大水，敗其城郭；亥之氣乘之也。○《淮》「敗」作「壞」。行春令，則蝗蟲爲災，暴風來格，蝗，音黃。○寅之氣乘之也。必以蝗蟲爲災者，寅有啟蟄之氣，行於初暑，則當蟄者大出矣。格，至也。○《呂》、《淮》「災」作「敗」。秀草不實。氣更生之，不得成也。○《淮》此下有「四月官田其樹桃」。○仲夏之月，日在東井，昏亢中，旦危中。亢，音剛。○仲夏者，日月會於鶉首而斗建午之辰也。○《淮》無「日在東井」字，有「招搖指午」字。○《唐》作「五月之節日在參昏角中曉危中斗建午

位之初」。律中蕤賓。蕤，人誰反。○蕤賓者，應鐘之

所生，三分益一，律長六寸八十一分寸之二十六。仲夏氣至，則蕤賓之律應，《周語》曰：「蕤賓，所以安靜神人，獻酬交酢。」○諸本上下與孟夏同，今從《唐》本。小暑至，

《唐》已見上章。螳螂生，鵙始鳴，反舌無聲。螳，

音堂。螳，音郎。鵙，工役反。○皆記時候也。螳螂，螳螂

母也。鵙，搏勞也。反舌，百舌鳥。○《唐》作「芒種之日螳

螂生後五日鵙始鳴後五日反舌無聲」。天子居明堂大

廟，明堂大廟，南堂當大室也。○諸本此下與孟夏文同，

今从《唐》本。養壯佼。佼，古卯反。○助長氣也。○

今按：此句當屬上章「舉長大」之下。是月也，命樂師

修鞀鞀鼓，均琴瑟管簫，執千戚戈羽，調竽笙

笛簫，飭鐘磬柷敔。鞀，大刀反。鞀，步西反。竿，音

于。笛，音池。簫，音黃。柷，呂六反。敔，魚呂反。○為

將大雩帝習樂也。修，均、執、調、飭者，治其器物，習其事

之言。○《呂》「笛簫」作「埙簫」。○《呂》、《淮》無「是月也」

及「鼓」字。《淮》「鞀」作「鞀」，無「均」字，「執千戚戈羽」在

「鐘磬」下，無「竿」、「簫」字，「笛」作「簫」，無「柷敔」字。

○《唐》無此一節。命有司為民祈祀山川百源，

大雩帝，用盛樂，乃命百縣雩祀百辟，卿士有

益於民者，以祈穀實，辟，必亦反。○陽氣盛而常

旱，山川百源，能興雲雨者也。衆水始所出為百源，必先祭

其本乃雩。雩，吁嗟求雨之祭也。雩帝，謂為壇南郊之旁，

雩五精之帝，配以先帝也。自「鞀鞀」至「柷敔」皆作曰盛

樂，凡他等用歌舞而已。百辟卿士，古者上公，若句龍、后

稷之類也。《春秋傳》曰：「龍見而雩。雩之正當以四月。

凡周之秋三月之中而旱，亦修雩禮以求雨，因著正雩，此月

失之矣。天子雩上帝，諸侯以下雩上公。周冬及春、夏雖

旱，禮有雩無雩。○《呂》、《淮》「源」作「原」。《呂》「縣雩」

下有「祭」字。○《淮》無「乃命百縣」以下。○《唐》已見上

章。農乃登黍。登，進也。○《淮》、《唐》無此句。是

月也，天子乃以雛嘗黍，羞以含桃，先薦寢

廟。雛，仕于反。○此嘗雛也而云「嘗黍」，不以牲主穀

也。必以黍者，黍，火穀，氣之主也。含桃，櫻桃也。

○《呂》「雛」作「雛」。○《淮》無「是月也」，「雛」作「雉」。

○《唐》無此一節。令民毋艾藍以染，為傷長氣也。

此月藍始可別，《夏小正》曰：「五月啟灌藍蓼。」○《淮》  
「令」作「禁」。毋燒灰，爲傷火氣也，火之氣於是爲盛。  
火之滅者爲灰。○《呂》「灰」作「炭」。毋暴布。暴，布  
卜反。○不以陰功干大陽之事。○《唐》無此一節。門  
閭毋閉，關市毋索。索，所格反。○順陽敷縱，不難  
物。挺重囚，益其食。挺，大頂反。○挺，猶寬也。  
○《淮》此下有「存孤寡振死事」六字。○《唐》「門」上有「是  
月也」字，又以「挺重囚」入上章，而無「益其食」三字。遊  
牝別群，孕妊之欲止也。則繫騰駒，爲其壯氣有餘，  
相蹄齧也。○《呂》、《淮》無「則」字，「繫」作「執」。班馬  
政。馬政，謂養馬之政教也。《度人》職曰：「掌十有二閑  
之政教，以阜馬、佚特、教馳、攻駒。」此之謂也。○《呂》  
「政」作「正」。○《唐》此下云「是月也聚蓄百藥」，又別分一  
章云「五月中氣日在東井昏亢中曉營室中斗建午位之中夏  
至之日鹿角解後五日蜩始鳴後五日半夏生是月也祀皇地  
祇於方丘」。是月也，日長至，陰陽爭，死生分。  
爭者，陽方盛，陰欲起也。分，猶半也。○《呂》「日長至」作  
「長至日」。○《淮》無「是月也」字，「長」作「短」。君子齊

戒，處必掩身，毋躁。掩，猶隱翳也。躁，猶動也。  
今《月令》「毋躁」爲「欲靜」。○《呂》「身」下有「欲靜」字。  
○《淮》無「處必」字，「掩」作「慎」。止聲色，毋或進。  
進，猶御見也。聲，謂樂也。《易》及《樂》、《春秋》說：「夏  
至，人主與群臣從八能之士作樂五日。」今止之，非其道也。  
○《淮》「止」作「節」，無「毋或進」字。○今按：止聲色，蓋  
亦處必掩身毋躁之義。若以止樂言，則拘矣。《月令》之說  
固多有未安，而此難以爲非也，注文蓋失其指矣。薄滋  
味，毋致和。和，戶卧反。○爲其氣異，此時傷人。  
○《淮》無此句。節耆欲，定心氣。微陰扶精，不可散  
也。○《呂》「節」作「退」。《呂》、《唐》「耆欲」作「嗜慾」。  
○《淮》無此二句。百官靜事毋刑，罪罰之事不可以  
開。今《月令》「刑」爲「徑」。○《淮》「刑」作「徑」。以定  
晏陰之所成。晏，伊見反。○晏，安也。陰，猶安。  
鹿角解，蟬始鳴，半夏生，木堇榮。解，戶買反。  
堇，音謹。○又記時候也。半夏，藥草。木堇，王蒸也。  
○《唐》上三句已見上文，而無下一句，此下有「是月也命有  
司祭先牧」九字。是月也，毋用火南方，陽氣盛，又



用火於其方，害微陰也。○《淮》作「禁民無發火」。可以居高明，可以遠眺望，可以升山陵，可以處臺榭。順陽在上也。高明，謂樓觀也。閭者謂之臺，有木者謂之榭。○《淮》無下「三」可以「字」，「升」作「登」。仲夏行冬令，則雹凍傷穀，子之氣乘之也。陽爲雨，陰起脅之，凝爲雹。○《呂》、《淮》「凍」作「霰」。道路不通，暴兵來至。盜賊攻劫，亦雹之類。行春令，則五穀晚孰，卯之氣乘之也。生日長。○《淮》「晚」作「不」。百膳時起，其國乃饑；膳，音特。○膳，蝗之屬。言百者，明衆類並爲害。○《唐》「饑」作「虛」。行秋令，則草木零落，酉之氣乘之也。八月宿直昴畢，爲天獄主殺。果實早成，生日短。○《淮》「早」作「蚤」。民殃於疫。大陵之氣來爲害也。○《淮》此下有「五月官相其樹榆」。○季夏之月，日在柳，昏火中，旦奎中。季夏者，日月會於鶉火而斗建未之辰也。○《淮》無「日在柳」字，有「招搖指未」字。○《呂》、《淮》作「昏心中」。○《唐》作「六月之節日在東井昏氏中曉東壁中斗建未位之

初」。律中林鐘。林鐘者，黃鐘之所生，二分去一，律長六寸，季夏氣至則林鐘之律應，《周語》曰：「林鐘，和展百物，俾莫不任肅純恪。」○《淮》「林」作「百」，高誘云：「百鐘者，林鐘也。」○諸本見仲夏章，但《淮》云「其位中央其日戊己盛德在上其蟲羸其音宮律中百鐘其數五其味甘其臭香其祀中雷祭先心」。溫風始至，蟋蟀居壁，鷹乃學習，腐草爲螢。蟋，音悉。蟀，音率。螢，《釋文》作「熒」，戶肩反。○皆記時候也。鷹學習，謂攫搏也，《夏小正》曰：「六月鷹始摯。」螢，飛蟲，熒火也。○《呂》「壁」作「宇」，「螢」下有「蜉」字，《呂》、《淮》「草」下有「化」字。《淮》「宇」作「奧」，「螢」作「熒」。○《唐》云「小暑之日溫風至後五日蟋蟀居壁後五日鷹乃學習」，而以「腐草爲螢」入下章。天子居明堂右个，明堂右个，南堂西偏也。○諸本見仲夏章，但《淮》云「天子衣純黃乘黃騮服黃玉建黃旗食稷與牛服八風水鬱柘燧火中宮御女黃色衣黃采其兵劍其畜牛朝于中宮」。命漁師伐蛟、取鼃、登龜、取鼈，蛟，音交。鼃，夫多反。鼈，音元。○四者甲類，秋乃堅成，《周禮》曰：「秋獻龜魚。」又曰：「凡取龜用秋時。」是夏之秋也。作《月令》者，以爲此秋據周之時也。周之八月，夏之

六月，因書於此，似誤也。蛟言伐者，以其有兵衛也。龜言登者，尊之也。鼃鼃言取，羞物賤也。鼃皮又可以冒鼓。今《月令》「漁師」爲「撈人」。○《呂》「命」上有「是月也」字，「命」作「令」，無「登龜」字。○《淮》「師」作「人」。○《唐》屬後九月章。命澤人納材葦。葦，于鬼反。○蒲葦之屬，此時柔刃，可取作器物也。○《呂》「命」上有「乃」字，「澤」作「虞」，「納」作「入」。○《淮》「命」作「令」，「澤」作「滂」。○《唐》無此一節。是月也，命四監大合百縣之秩芻，以養犧牲，令民無不咸出其力，四監，主山林川澤之官。百縣，鄉遂之屬，地有山林川澤者也。秩，常也。百縣給國養犧牲之芻多少有常，民皆當出力爲之。今《月令》「四」爲「田」。○《呂》、《淮》「命」作「令」，「大」下皆有「夫」字。《淮》無「令民」以下八字。以共皇天上帝、名山大川、四方之神，以祠宗廟社稷之靈，以爲民祈福。共，音供。○牲以供祠神靈，爲民求福，明使民艾芻，是不虛取也。皇天，北辰耀魄寶，冬至所祭於圓丘也。上帝，太微五帝。○《呂》、《淮》「共」作「供」。《淮》無「以祠之靈」字，「福」下有「行惠令弔死問疾存視長老行稭鬻厚席蓐以送萬物歸也」二十三

字。○《唐》無「是月」至此一節。是月也，命婦官染采，黼黻文章必以法故，無或差貸。黼，音甫。黻，音弗。貸，他得反。○婦官，染人也。采，五色。○《呂》無「染」字，「貸」作「忒」。○《淮》無「是月也」及「必」以下八字。○《唐》「婦官」作「有司」，「采」作「綵」。黑黃倉赤，莫不質良，無敢詐僞。質，正也。良，善也。所用染者，當得真采正善也。○《呂》「無」作「勿」，「詐僞」作「僞詐」。《呂》、《唐》「倉」並作「蒼」。《淮》「黑」作「青」，「倉」作「白」，「赤」作「黑」，無「無敢詐僞」字。以給郊廟祭祀之服，以爲旗章，以別貴賤等給之度。別，彼列反。○旗章，旌旗及章識也。○《呂》、《唐》「給」作「綴」。○《淮》「郊」作「宗」，無「祭祀」及「以爲旗章」以下十二字，而「服」下有「必宣以明」字。○《唐》此下別分一章云「六月中氣日在柳昏尾中曉奎中斗建未位之中大暑之日腐草爲螢後五日土潤溽暑後五日大雨時行」。是月也，樹木方盛，乃命虞人入山行木，毋有斬伐。行，下孟反。○爲其未堅刃也。○《呂》「命」作「令」，「有」作「或」。○《淮》無「乃命」至「行木」八字，「毋有」作

「勿敢」。○《唐》「虞人」作「有司」。不可以興土功，不可以合諸侯，不可以起兵動衆。土將用事，氣欲靜。○《淮》無「不可以興土功」字，「侯」下有「起土功」字，無「不可以」字，「起兵動衆」作「動衆興兵」。○《唐》自「是月也樹木」至此屬下文。毋舉大事，以搖養氣，大事，興繇役以有爲。○《呂》「養」作「蕩」，下有「於」字。毋發令而待以妨神農之事也。發令而待，謂出繇役之令以預驚民也。民驚則心動，是害土神之氣。土神稱曰神農者，以其主於稼穡。○《呂》「待」作「干」，下有「時」字，無「也」字。水潦盛昌，神農將持功，舉大事則有天殃。言土以受天雨澤，安靜養物爲功，動之則致害也。《孝經說》曰：「地順受澤，謙虛開張，含泉任萌，滋物歸中。」○《呂》無「昌」字，下有「命」字，「持」作「循」。○《淮》無「毋舉大事」至「舉大事」一節，「則」作「必」。○《唐》與《淮》同，并無「則有天殃」四字。是月也，土潤辱暑，潤辱，謂塗溼也。○《淮》、《唐》無「是月也」字，餘已見上文。○諸本「辱」作「溼」。大雨時行，《唐》已見上文。燒薙行水，利以殺草，如以熱湯。薙，

它計反。○薙，謂迫地芟草也。此謂欲稼萊地，先薙其草，草乾燒之，至此月大雨，流水潦畜於其中，則草死不復生，而地美可稼也。《薙人》「掌殺草」，職曰：「夏日至而薙之。」又曰：「如欲其化也，則以水火變之。」○《淮》無「燒薙行水如以熱湯」字。○《唐》「燒」上有「乃」字，無「如以熱湯」字。可以糞田疇，可以美土疆。疆，其丈反。○土潤辱，膏澤易行也。糞，美，互文耳。土疆，強隳之地。○《淮》無兩「可以」字，「美」作「肥」。○《呂》此下有「行之是令是月甘雨三至三旬二日」。○《唐》此下有「是月也樹木方盛乃命有司入山行木無有斬伐不可以興土功不可以合諸侯不可以起兵動衆」。季夏行春令，則穀實鮮落，國多風欬，鮮，音仙，又仙典反。欬，苦代反。○辰之氣乘之也。木屬巽，辰又在巽位，二氣相亂爲害。○諸本「鮮」皆作「解」。○《淮》無「國」字。民乃遷徙，象風轉移物也。行秋令，則丘隰水潦，戊之氣乘之也。九月宿直奎，奎爲溝瀆，與此月大雨并而高下皆水。禾稼不孰，傷於水也。○《呂》「禾稼」作「稼穡」。乃多女災，含任之類敗也。行冬令，則風寒不時，且

之氣乘之也。○《呂》「風寒」作「寒氣」。鷹隼蚤鷙，隼，

息允反。鷙，音至。○得疾癘之氣也。○《呂》、《唐》並作

「鷙」。○《淮》作「鷙」。四鄙人保。象鳥雀之走竄也。

都邑之城曰保。○《淮》此下有「六月官少內其樹梓」。○

中央土，火休而盛德在土也。其日戊己。戊之言茂

也。己之言起也。日之行四時之間，從黃道，月爲之佐。

至此萬物皆枝葉茂盛，其含秀者抑屈而起，故因以爲日名焉。其帝黃帝，其神后土。此黃精之君，土官之神，

自古以來著德立功者也。黃帝，軒轅氏也。后土，亦顓頊

氏之子，曰黎，兼爲土官。其蟲倮，倮，力果反。○象物

露見不隱藏，虎豹之屬恒淺毛。○《呂》「倮」作「螺」。其

音宮，聲始於宮，宮數八十一，屬土者，以其最濁，君之象

也。季夏之氣和則宮聲調，《樂記》曰：「宮亂則荒，其君

驕。」律中黃鐘之宮，黃鐘之宮最長也。十二律轉相

生，五聲具終於六十焉。季夏之氣至則黃鐘之宮應，《禮

運》曰：「五聲六律十二管，還相爲宮。」其數五。土生數

五，成數十，但言五者，土以生爲本。○《唐》此下有「其性

信其事思」。其味甘，其臭香，土之味臭也。凡甘香

者皆屬之。其祀中雷，祭先心。雷，力又反。○中

雷，猶中室也。土主中央而神在室。古者複穴，是以名室

爲雷。云祀之先祭心者，五臟之次，心次肺，至此心爲尊

也。祀中雷之禮，設主於牖下，乃制心及肺，肝爲俎。其祭

肉，心、肺、肝各一，他皆如祀戶之禮。○《唐》此下有「是月

也祀黃帝于南郊」。天子居大廟大室，乘大路，駕

黃駟，載黃旂，衣黃衣，服黃玉，食稷與牛，其

器鬯以閎。鬯，于權反。閎，音宏。○大廟大室，中央

室也。大路，殷路也，車如殷路之制而飾之以黃。稷，五穀

之長。牛，土畜也。器鬯者，象土周匝於四時。閎，讀如

紘，紘謂中寬象土含物。○《呂》「鬯」作「高」，「閎」作「揜」。

○《淮》無此章文，並見季夏章。○《唐》「大路」作「黃輅」，

「駟」作「龍」。○孟秋之月，日在翼，昏建星中，

旦畢中。孟秋者，日月會於鶉尾而斗建申之辰也。

○《呂》「之月」下有「長日至四句六日」字，「建星」作「斗

畢」，「中」下有「則立秋」字。○《淮》無「日在翼」字，有「招

搖指申」字，「建星」亦作「斗」。○《唐》作「七月之節日在張

昏尾中曉婁中斗建申位之初」。其日庚辛。庚之言更

也，辛之言新也。日之行，秋西從白道，成熟萬物，月爲之佐，萬物皆肅然改更，秀實新成，又因以爲日名焉。○《淮》此上有「其位西方」字，下有「盛德在金」字。其帝少皞，其神蓐收。少，詩召反。蓐，音辱。○此白精之君，金官之臣，自占以來著德立功者也。少皞，金天氏。蓐收，少皞氏之子，曰該，爲金官。○《淮》無此二句。其蟲毛。象物應涼氣而備寒。狐貉之屬，生旃毛也。其音商，三分徵益一以生商，商數七十二。屬金者，以其濁次宮，臣之象也。秋氣和則商聲調，《樂記》曰：「商亂則陂，其官壞。」律中夷則。孟秋氣至則夷則之律應。夷則者，大呂之所生也，二分去一，律長五寸七百二十九分寸之四百五十一，《周語》曰：「夷則，所以詠歌九則，平民無貳。」其數九。金生數四，成數九，但言九者，亦舉其成數。○《唐》此下有「其性義其事言」。其味辛，其臭腥。金之臭味也，凡辛腥者皆屬焉。其祀門，祭先肝。秋陰氣出，祀之於門外陰也。祀之先祭肝者，秋爲陰中，於藏直肝，肝爲尊也。祀門之禮，北面設主于門左樞，乃制肝及肺，心爲俎，奠于主南。又設盛于俎東，其他皆如祭竈之

禮。涼風至，白露降，寒蟬鳴，鷹乃祭鳥，用始行戮。皆記時候也。寒蟬，寒蜩，謂蛻也。鷹祭鳥者，將食之，示有先也。既祭之後，不必盡食，若人君行刑，戮之而已。○《唐》作「立秋之日涼風至後五日白露降後五日寒蟬鳴以鷹乃祭鳥屬」，後章無「用始行戮」一句。天子居總章左个，乘戎路，駕白駱，載白旂，衣白衣，服白玉，食麻與犬，其器廉以深。駱，音洛。○總章左个，大寢西堂南偏。戎路，兵車也，制如周革路而飾之以白。白馬黑鬣曰駱。麻實有文理，屬金。犬，金畜也。器廉以深，象金傷害物入藏。○《淮》此一節云「天子衣白衣乘白輅服白玉建白旗食麻與犬服八風水饗柘燧火西宮御女白色衣白采撞白鐘其兵戈其畜狗朝于總章左个以出秋令求不孝不悌戮暴傲悍而罰之以助損氣」。○《唐》戎路作「白輅」，麻作「酒」，犬作「魚」。是月也，以立秋。先立秋三日，大史謁之天子曰：「某日立秋，盛德在金。」天子乃齊。先，悉薦反。○《淮》無「是月」至此一節。○《唐》無「是月也以立秋」字，「太史」下有「以先立秋三日」字，「之」作「於」。立

秋之日，天子親帥三公、九卿、諸侯、大夫以迎秋於西郊。還反，賞軍帥武人於朝。帥，所類反。○迎秋者，祭白帝白招拒於西郊之兆也。軍帥，諸將也。武人，謂環人之屬有勇力者。○諸本「帥」皆作「率」，「反」作「乃」。○《淮》無「諸侯」字，於「作」于」。○《唐》無「二」、「九」字。天子乃命將帥選士厲兵，簡練桀俊，專任有功，以征不義，征之言正也，伐也。○《呂》、《淮》無「乃」字，「帥」作「率」。《淮》、《唐》無「天子」字。《淮》「土」作「卒」。《唐》「厲」作「勵」，「桀」作「傑」，「俊」作「雋」。詰誅暴慢，以明好惡，順彼遠方。詰，去吉反。好，呼報反。惡，烏路反。○詰，謂問其罪，窮治之也。順，猶服也。○《呂》「順」作「巡」。○《淮》無「以明好惡」字，「遠」作「四」。○《唐》此下別分一章，云「七月中氣日在張昏箕中曉昴中斗建申位之中處暑之日鷹乃祭鳥後五日天地始肅後五日禾乃登」。是月也，命有司修法制，繕囹圄，具桎梏，繕市戰反。○《呂》「繕」作「謹」。○《淮》無「是月也」及「具桎梏」字。○《唐》此下有「斷薄刑決小罪」字。禁止姦，慎罪邪，

務搏執，順秋氣，政尚嚴。○《淮》無「止罪」字，「慎」作「塞」，無「務搏執」三字。命理瞻傷，察創視折，創，初良反。○理，治獄官也，有虞氏曰士，夏曰大理，周曰大司寇。創之淺者曰傷。○《淮》無此一節。審斷決獄，訟必端平，斷，丁亂反，下同。○端，猶正也。○《呂》「端」作「正」。○《淮》無「斷」字，「獄」下有「平詞訟」字，無「必端平」字。戮有罪，嚴斷刑。《淮》無此六字。○唐無「禁止」至此四節。天地始肅，不可以贏。贏，音盈。○肅，嚴急之言也。贏，猶解也。○《淮》「地」作「墜」，後並同。是月也，農乃登穀，天子嘗新，先薦寢廟。黍稷之屬，於是始孰。○《呂》、《淮》「登」作「升」。○《淮》無「也」字，「乃」作「始」。○《唐》「月也」下有「築場圃」字。命百官始收斂，順秋氣，收斂物。○《呂》無「收」字。○《唐》作「是月也命有司納材革」。完隄防，謹壅塞，以備水潦。完，胡官反。壅，於勇反。○備者，備八月也。八月宿直畢，畢好雨。○《淮》「壅」作「障」。○《唐》無此一節。修宮室，坏牆垣，

補城郭。坏，步回反。垣，音袁。○象秋收斂物當藏也。

○《淮》作「修城郭繕宮室」，無「坏垣」字。○《呂》「坏」作

「圻」，「修宮」上有「是月也」字，無「補城郭」字。是月

也，毋以封諸侯、立大官，毋以割地、行大使、

出大幣。使，色吏反。○古者於嘗出田邑，此其月也。

而禁封諸侯割地，失其義。○《呂》、《淮》無「諸」字，《呂》

「以割地」作「割土地」，《淮》無「毋以割地」字，《呂》、《淮》下

有二句，並作「行重幣出大使」。○《呂》此下有「行之是令

而涼風至三句」。○《淮》此下有「行是月令涼風至三句」。

○《唐》無此一節。孟秋行冬令，則陰氣大勝，亥

之氣乘之也。介蟲敗穀，介，甲也。甲蟲屬冬。敗穀

者，稻蟹之屬。戎兵乃來；十月宿直營室，營室之氣爲

害也。營室主武上。①行春令，則其國乃旱，寅之

氣乘之也。雲雨以風除也。陽氣復還，五穀無

實；復，扶又反。○陽氣能生而不能成實。○《呂》「復」

作「後」，「無」作「不」。行夏令，則國多火災，巳之氣

乘之也。○《淮》作「冬多」。○《唐》作「其國」。寒熱不

節，民多瘡疾。瘡疾，寒熱所爲也。今《月令》「瘡疾」

爲「疾疫」。②○《淮》「熱」作「暑」，此下有「七月官庫其樹

棟」。○仲秋之月，日在角，昏牽牛中，旦觜觿

中。觜，子斯反。觿，戶圭反。○仲秋者，日月會於壽星

而斗建酉之辰也。○《淮》無「日在角」字，有「招搖指酉」

字。○《呂》、《淮》皆作「觜觿中」。○《唐》作「八月之節日

在翼昏南斗中曉畢中斗建酉位之初」。律中南呂。南

呂者，太簇之所生，三分去一，律長五寸三分寸之一。仲秋

氣至則南呂之律應，《周語》曰：「南呂者，贊陽秀物。」○諸

本上下與孟秋同，今從《唐》本。盲風至，鴻鴈來，玄

鳥歸，群鳥養羞。盲，亡庚反。○皆記時候也。盲

風，疾風也。玄鳥，燕也。歸，謂去蟄也。凡鳥隨陰陽者，

不以中國爲居。羞，謂所食也。《夏小正》曰：「八月，③

丹鳥羞白鳥。」說曰：「丹鳥也者，謂丹良也。白鳥也者，謂

閭蚘也。其謂之鳥者，重其養者也。有翼爲鳥，養也者，不

①「士」，賀本作「事」。

②「疾」，賀本作「厲」。

③「八」，原作「九」，據元明本、寬文本、賀本改。

盡食也。」二者文異，群鳥、丹良，未聞孰是。○《呂》、《淮》

「盲」作「涼」，「鴻」作「候」。《淮》「養」作「翔」，無「羞」字。

○《唐》作「白露之日鴻鴈來後五日玄鳥歸後五日群鳥養羞」，無「盲風至」三字。天子居總章大廟。總章大

廟，西堂當大室也。○《淮》「居」作「朝于」。○諸本與孟秋

同，今从《唐》本。是月也，養衰老，授几杖，行糜

粥飲食。糜，亡疲反。粥，之六反。○助老氣也。行，猶

賜也。○《淮》以此一節屬下文。乃命司服，具飭衣

裳，文繡有恒，制有小大，度有長短，此謂祭服

也。文，謂畫也。祭服之制，畫衣而繡裳。○《呂》「恒」作

「常」。衣服有量，必循其故，量，音亮。○此謂朝燕

及他服，凡此為寒益至也。《詩》云：「七月流火，九月授

衣。」於是作之可也。冠帶有常。因制衣服而作之也。

○《淮》無「乃命」至此一節，《唐》以屬季秋章。乃命有

司申嚴百刑，斬殺必當，毋或枉撓。枉撓不

當，反受其殃。當，丁浪反。撓，女教反，又乃絞反。

○申，重也。當，謂值其罪。○諸本皆無「乃」字。○《淮》

「枉撓」作「決獄」，下有「是月也養長老授几杖行稭鬻飲

食」。○《唐》「命」上有「是月也」，「必當」下有「無留有罪」，仍以此一節屬後章。是月也，乃命宰祝，循行

犧牲，視全具。案芻豢，瞻肥瘠。察物色，必

比類。量小大，視長短，皆中度。五者備當，

上帝其饗。行，下孟反。芻，初其反。豢，音患。中，丁

仲反。○於鳥獸肥充之時，宜省群牲也。宰祝，大宰、大

祝，主祭祀之官也。養牛羊曰芻，犬豕曰豢。五者，謂所視

也，所案也，所瞻也，所察也，所量也。此皆得其正，則上帝

饗之，上帝饗之而無神不饗也。○《呂》「循」作「巡」，「饗」

作「享」。○《淮》無「是月也循視全具」字，「瞻肥瘠」作「視

肥瘠全粹」，必「作」謂「長短」作「少長」，「皆」作「莫不」，

無「五者」以下八字。○《唐》無「乃」字，「宰祝」作「有司」。

天子乃難，以達秋氣。難，乃多反。○此難，難陽氣

也。陽暑至此不衰，害亦將及人。所以及人者，陽氣左行，

此月宿直昴畢，昴畢亦得大陵積尸之氣，氣佚則厲鬼亦隨

而出行，於是亦命方相氏帥百隸而難之。《王居明堂禮》

曰：「仲秋，九門磔攘以發陳氣，禦止疾疫。」○諸本「難」作

「儼」。○《呂》「儼」下有「禦佐疾」字，「達」作「通」。○《淮》

「達」作「御」。○《唐》「天子」上有「是月也」字，此下有「是



月也命樂正習吹上丁釋奠於國學天子乃率公卿諸侯大夫親往視之是月也命有司上戊釋奠於太公廟是月也擇元日命人社，此下又別分一章，云「八月中氣日在軫昏南斗中曉東井中斗建西位之中秋分之日雷乃收聲後五日蟄蟲坏戶後五日水始涸是月也祝夕月于西郊是月也命有司享壽星於南郊」。以犬嘗麻，先薦寢廟。麻始孰也。

○《唐》以此屬下文。是月也，可以築城郭，建都邑，穿竇窖，修囷倉。竇，音豆。窖，古孝反。困，丘倫反。○爲民將人物當藏也。穿竇窖者，入地圓曰竇，方曰窖。《王居明堂禮》曰：「仲秋，命庶民畢入于室，曰：時殺將至，毋懼其災。」○《呂》「窖」作「窕」。○《淮》無「也」字。乃命有司趣民收斂，務畜菜，多積聚。趣，七綠反。畜，丑六反。○始爲禦冬之備。○《呂》「畜」作「蓄」。○《淮》無「務」字，「菜」作「采」。○《唐》無「是月」至此二節。乃勸種麥，毋或失時，其有失時，行罪無疑。麥者，接絕續乏之穀，尤重之。○《呂》「其有」作「其或」。○《淮》無「乃」字，「種」下有「宿」字，無「毋或失時」字，「其有」作「若或」。○《唐》以此一節屬下文。是

月也，日夜分，雷始收聲，蟄蟲坏戶，殺氣浸盛，陽氣日衰，水始涸。坏，步回反。涸，戶角反。○又記時候也。雷始收聲，在地中動內物也。坏，益也。蟄蟲益戶，謂稍小之也。涸，竭也。此甫八月中氣，雨未止，而云水竭，非也。《周語》曰：「辰角見而雨畢，天根見而水涸。」又曰：「雨畢而除道，水涸而成梁。」辰角見，九月本也；天根見，九月末也。《王居明堂禮》曰：「季秋除道致梁，以利農也。」○《呂》、《淮》「雷」下有「乃」字，無「聲」字。《呂》「坏」作「俯」。《淮》「坏」作「培」。○《唐》以屬上文。日夜分，則同度量，平權衡，正鈞石，角斗甬。《呂》、《淮》「同」作「壹」，「角」作「齊」，「斗」作「升」。《淮》無「則」字，「甬」作「稱」。○《唐》無「正鈞石，角斗甬」，別有「是月也命有司祭馬社天子嘗麻先薦寢廟命有司申嚴百刑斬殺必當無留有罪無或枉撓枉撓不當反受其殃是月也勸人種麥無或失時」四十八字。是月也，易關市，來商旅，納貨賄，以便民事。四方來集，遠鄉皆至，則財不匱，上無乏用，百事乃遂。易，以豉反。匱，其位反。○易關市，謂輕其稅，使民利之。商旅，賈客也。匱，亦乏也。遂，猶成也。○《呂》「集」作「雜」。

○《淮》無「是月也」及「則」字，「易」作「理」，「賄」作「財」。  
 《呂》《淮》「納」作「入」，「則財」下有「物」字。凡舉大事，毋逆大數，必順其時，慎因其類。事，謂興土功，合諸侯，舉兵衆也。季夏禁之，孟秋始征伐，此月築城郭，季秋教田獵，是以於中爲之戒焉。○《呂》無上「大」字，下「大」作「天」，①「慎」作「乃」，此下有「行之是令白露降」三句。○《淮》無此一節。○唐無「是月」以下至此一節。仲秋行春令，則秋雨不降，卯之氣乘之也。卯宿直房心，心爲大火。草木生榮，應陽動也。國乃有恐，以火訛相驚。○《呂》《淮》「乃有」作「有火」。行夏令，則其國乃旱，蟄蟲不藏，五穀復生；復，扶乂反。○午之氣乘之也。○《呂》無「乃」字。○《淮》「穀」下有「皆」字。行冬令，則風災數起，收雷先行，數，色角反。○子之氣乘之也。北風殺物。先，猶蚤也。冬主閉藏。草木蚤死。寒氣盛也。○《淮》此下有「八月官尉其樹柘」。○季秋之月，日在房，昏虛中，旦柳中。季秋者，日月會於大火而斗建戌之辰也。○《淮》無「日在房」字，有「招搖指戌」字。○《唐》作「九月

之節日在角昏牽牛中曉東井中斗建戌位之初」。律中無射。射，音亦。○無射者，夾鐘之所生，三分去一，律長四寸六千五百六十一分寸之六千五百二十四。季秋氣至則無射之律應，《周語》曰：「無射，所以宣布喆人之令德，示民軌儀。」○諸本見仲秋章。鴻鴈來賓，爵人大水

爲蛤，鞠有黃華，豺乃祭獸戮禽。鞠，九六反。豺，音柴。○皆記時候也。來賓，言其客止未去也。大水，海也。戮，猶殺也。○《呂》《淮》「鴻」作「候」，「鞠」作「菊」。《呂》「乃」作「則」。《淮》「爵」作「雀」。○《唐》作「寒

露之日鴻鴈來賓後五日雀人大水爲蛤後五日菊有黃華豺乃」，以下入後章。天子居總章右个。總章右个，西堂北偏。○《淮》「居」作「朝于」，餘見仲秋章。是月也，申嚴號令，申，重。○《淮》《唐》「是月也」並作「命有司」。命百官貴賤無不務內，以會天地之藏，無有宣出。內，謂收斂入之也。會，猶聚也。○《呂》《淮》無「命」字，「內」作「入」。○《唐》此下有「是月也命有

①「上」、「下」，原脫，據賀本及正文補。

司伐蛟取鼃登龜取龜，又分此下別爲一章，云「九月中氣日在氏昏須女中曉柳中斗建戌位之中霜降之日豺乃祭獸後五日草木黃落後五日蟄蟲咸俯」。乃命冢宰，農事備收，備，猶盡也。○《呂》無「乃」字。○《唐》屬下文。舉五穀之要，定其租稅之簿。○《呂》「穀」作「種」。藏帝藉之收於神倉，祇敬必飭。重稔盛之委也。帝藉，所耕千畝也。藏祭祀之穀爲神倉。祇，亦敬也。○《呂》無「之收」字。○《淮》無「祇敬必飭」字。○《唐》屬下文。是月也，霜始降，則百工休。寒而膠漆之作不堅好也。○《淮》無「則」字。乃命有司曰：「寒氣總至，民力不堪，其皆入室。」總，猶猥卒。○猥，溫罪反。卒，七忽反。○《唐》「總」作「總」，此下有「是月也命有司具飭衣裳文繡有恒衣服有量冠帶有常必循其故是月也天子嘗稻先薦寢廟乃命有司農事備收舉五穀之要藏帝藉於神倉祇敬必飭是月也命有司合秩芻以養犧牲以供皇天上帝名山大川四方之神以祠宗廟社稷之靈爲人祈福」。上丁，命樂正人學習吹。吹，昌睡反。○爲將饗帝也。春夏重舞，秋冬重吹也。○《唐》無「上丁」，

「入學」字。是月也，大饗帝，言大饗者，遍祭五帝也。《曲禮》曰「大饗不問卜」，謂此也。○《淮》、《唐》無「是月也」字。《唐》「帝」下有「於明堂」字。嘗犧牲，告備于天子。嘗者，謂嘗群神也。天子親嘗帝，使有司祭於群神，禮畢而告焉。○《淮》無「告備于天子」。○《唐》此上有「命有司」，此下有「是月也趣人收斂務蓄菜」十字。合諸侯制，百縣爲來歲受朔日，與諸侯所稅於民輕重之法，貢職之數，以遠近土地所宜爲度，以給郊廟之事，無有所私。秦以建亥之月爲歲首，於是歲終使諸侯及鄉遂之官受此法焉。合諸侯制者，定其國家、宮室、車旗、衣服、禮儀也。諸侯言合制，百縣言受朔日，互文也。貢職，謂所入天子。凡周之法，以正月和之，正歲而縣於象魏。○《淮》「職」作「賦」，「地」作「墜」，無「以給」下十字。○《唐》無此一節。是月也，天子乃教於田獵以習五戎，班馬政。教於田獵，因田獵之禮教民以戰法也。五戎，謂五兵：弓矢、殳、矛、戈、戟也。政，謂齊其色，度其力，使同乘也。《校人》職曰：「凡軍事，物馬而頒之。」○《呂》「班」作「發」，無「政」字。○《淮》無

「天子班馬政」字。命僕及七驪咸駕，載旌旐，授

車以級，整設于屏外。驪，側求反。旐，音兆。○

僕，戎僕及御夫也。七驪，謂趣馬，主爲諸官駕說者也。既

駕之，又爲之載旌旐，《司馬》職曰「仲秋教治兵，如振旅之陳。辨旗物之用：王載大常，諸侯載旂，軍吏載旗，師都載

旗，鄉遂載物，郊野載旐，百官載旗」是也。級，等次也。整，正列也。設，陳也。屏，所田之地，門外之蔽。○《呂》

「旐」作「於」，「旐」下有「與」字，「授」作「受」。○《淮》「命」下有「大」字，「載」作「戴」，「旐」作「桂」，無「旐」字，「整」作

「皆正」。司徒搢扑，北面誓之。搢，音晉。扑，普卜反。○誓衆以軍法也。○《呂》、《淮》「面」作「嚮以」。《淮》

「誓」作「贊」。天子乃厲飾，執弓挾矢以獵，厲飾，

謂戎服，尚威武也。今《月令》「獵爲「射」。○《呂》「厲」下有「服厲」字，《淮》有「服廣」字。《呂》、《淮》「挾」作「操」，

《呂》「獵」作「射」。命主祠祭禽于四方。以所獲禽

祀四方之神也。《司馬》職曰：「羅弊致禽以祀枋。」

○《呂》「于」作「於」。○《淮》無「于」字。○《唐》無「是月也」以下至此一節。是月也，草木黃落，乃伐薪爲

炭。伐木必因殺氣。○《淮》無「也」字。○《唐》無「是月

也」字，草木黃落」已見上文。蟄蟲咸俯在內，皆墜

其戶。墜，其靳反。○墜，爲塗閉之，辟殺氣。○《呂》

「內」作「穴」。○《淮》「俯」作「俛」，無下六字。○《唐》上四字見上文，亦無下六字。乃趣獄刑，毋留有罪。趣，

七綠反。○殺氣已至，有罪者即決也。○《呂》「趣」作「決」。○《唐》無此一節。收祿秩之不當，供養之

不宜者。當，丁浪反。供，九用反。養，餘亮反。○天氣

殺而萬物咸藏，●可以去之也。祿秩之不當，恩所加增也。

供養之不宜，欲所食者熊蹯之屬，非常食。○《呂》「當」下

有「者」字，「供」作「共」。○《淮》此下有「通路除道從境始至國而后已」十二字。○《唐》無此一節。是月也，天

子乃以犬嘗稻，先薦寢廟。稻始熟也。○《呂》無

「以犬」字。○《淮》「稻」作「麻」。○《唐》已見上文。季

秋行夏令，則其國大水，冬藏殃敗，民多飢

①「氣」，原作「地」，據元明本、賀本改。「咸」，原作「成」，據元明本、寬文本、賀本改。

噫；軌，音求。噫，丁計反。○未之氣乘之也。六月，宿直東井，氣多暑雨。○《呂》、《淮》「噫」作「室」。行冬令，則國多盜賊，邊境不寧，土地分裂；且之氣乘之也。極陰爲外，邊境之象也，大寒之時，地隆拆也。行春令，則煖風來至，民氣解惰，解，古賈反。○辰之氣乘之也。巽爲風。○《呂》「煖」作「煖」，「惰」作「墮」。師興不居。辰宿直角，角主兵。不居，象風行不休止也。○《呂》「興不居」作「旅必興」。○《淮》此下有「九月官候其樹槐」。○孟冬之月，日在尾，昏危中，旦七星中。孟冬者，日月會於析木之津而斗建亥之辰也。○《淮》無「日在尾」字，有「招搖指亥」字。○《唐》作「十月之節日在房昏虛中曉張中斗建亥位之初」。其日壬癸。王之言任也，癸之言揆也。日之行，冬北從黑道，閉藏萬物，月爲之佐，時萬物懷任於下，揆然萌芽，又因以爲日名焉。○《淮》此上有「其位北方」字，下有「盛德在水」字。其帝顓頊，其神玄冥。顓，音專。頊，許玉反。○此黑精之君，水官之臣，自古以來著德立功者也。顓頊，高陽氏也。玄冥，少皞氏之子，曰脩，曰熙，爲水官。

○《淮》無此二句。其蟲介。介，甲也。象物閉藏地中，龜鼈之屬。其音羽，三分商去一以生羽，羽數四十八。屬水者，以爲最清，物之象也。冬氣和則羽聲調，《樂記》曰：「羽亂則危，其財匱。」律中應鐘。孟冬氣至則應鐘之律應。應鐘者，姑洗之所生，三分去一，律長四寸二十七分寸之二十。《周語》曰：「應鐘，均利器用，俾應復。」其數六。水生數一，成數六，但言六者，亦舉其成數。○《唐》此下有「其性智其事聽」。其味鹹，其臭朽。水之臭味也。凡鹹朽者皆屬焉。氣若有若無爲朽。○《淮》「朽」作「腐」。其祀行，祭先腎。冬陰盛，寒於水，祀之於行，從辟除之類也。祀之先祭腎者，陰位在下，腎亦在下，腎爲尊也。行在廟門外之西，爲轅壤，厚一寸，廣五尺，輪四尺。祀行之禮，北面設主于轅上，乃制腎及脾爲俎，奠于主南。又設盛于俎東，祭肉腎一脾再，其他皆如祀門之禮。○《淮》「行」作「并」。水始冰，地始凍，雉入大水爲蜃，虹藏不見。蜃，常忍反。見，賢遍反。○皆記時候也。大水，淮也。大蛤曰蜃。○《唐》作「立冬之日水始冰後五日地始凍後五日野雞入大水爲蜃」，

而以下四字屬後章。天子居玄堂左个。乘玄路，

駕鐵驪，載玄旂，衣黑衣，服玄玉。食黍與

粢，其器閼以奄。驪，力知反。○玄堂左个，北堂西

偏也。鐵驪，色如鐵。黍秀舒散，屬火，寒時食之，亦以安性也。粢，水畜也。器閼而奄，象物閉藏也。今《月令》曰

「乘軫路」，似當爲「軫」字之誤也。○《呂》「奄」作「弁」。

○《淮》此一節作「天子衣黑衣乘玄驪服玄玉建玄旗食黍與粢服八風水饗松燧火北宮御女黑色衣黑采擊磬石其兵鍛其畜粢朝于玄堂左个以出冬令命有司修群禁禁外徙閉門閼大搜客斷罰刑殺當罪阿上亂法者誅」。○諸本「路」皆作「輅」。○《唐》「黑」作「玄」，「粢」作「鴈」。是月也，以

立冬。先立冬三日，大史謁之天子曰：「某

日立冬，盛德在水。」天子乃齊。立冬之日，

天子親帥三公、九卿、大夫以迎冬於北郊。

還反，賞死事，恤孤寡。先，悉薦反。○迎冬者，祭

黑帝叶光紀於北郊之兆也。死事，謂以國事死者，若公叔禹人、顏涿聚者也。孤寡，其妻子也。有以惠賜之，大功加賞。○《呂》無「以」字，「帥」作「率」，「反」作「乃」。○《淮》

無「是月」至「乃齊」一節，「冬於」作「歲于」。○《唐》無「是

月也以立冬」字，「太史」下有「先立冬三日」字，無「三」，

「九」字，有「諸侯」字。○《淮》、《唐》「帥」、「反」並同《呂》

本。是月也，命大史釁龜筮占兆，審卦吉凶。

釁，許靳反。筮，初格反。○筮，蓍也。占兆，龜之繇文也。

《周禮·龜人》：「上春釁龜。」謂建寅之月也。秦以其歲首

使大史釁龜筮，與周異矣。卦吉凶，謂《易》也。審，省錄

之。而不釁筮，筮短，賤於兆也。今《月令》曰「釁祠」，祠衍

字。○《呂》「史」作「卜」，「釁」作「禱祠」。《呂》、《淮》「筮」

作「策」，無「占兆」字，「卦」下有「兆以察」字。《淮》無「也」

字，「史」作「祝」，「釁」作「禱」，「祀」下有「有神位占」字。

○《唐》以此一節屬孟春章。是察阿黨，則罪無有

掩蔽。阿黨，謂治獄吏以私恩曲撓相爲也。○《呂》「是」

上有「於」字，「黨」作「上」，下有「亂法者」字，「罪」下有「之」

字。○《淮》無此一節。○《唐》無「是」字，「蔽」下有「是月

也可以築城郭造宮室穿竇修囹圄」。是月也，天子

始裘。九月授衣，至此可以加裘。○《淮》「是月也」作

「於是」。○《唐》此下有「是月也祭神州地祇於北郊是月也

命有司祭司寒是月也命有司祭司中司命司人司祿」，此下

又別分作一章，云「十月中氣日在尾昏危中曉翼中斗建亥位之中」。命有司曰：「天氣上騰，地氣下降，天地不通，閉塞而成冬。」上，時掌反。○使有司助閉藏之氣。門戶可閉閉之，窗牖可塞塞之。○《呂》無「塞」字。○《淮》無此一節。○《唐》云「小雪之日虹藏不見後五日天氣上騰地氣下降後五日閉塞而成冬」，無「天地不通」字。命百官謹蓋藏。藏，才浪反。○謂府庫困倉有藏物。○《呂》《命》作「令」。○《唐》「百官」作「有司」。命司徒循行積聚，無有不斂。行，下孟反。積，子賜反。聚，才柱反。○謂芻禾薪蒸之屬。○《淮》無「循」字及「無有不斂」字。○《唐》無「命司徒」字。坏城郭，戒門閭，修鍵閉，慎管籥。固封疆，備邊境，完要塞，謹關梁，塞溪徑。鍵，其偃反。籥，羊灼反。疆，居良反。要塞之塞，先代反。溪，音奚。○坏，益也。鍵，牡。閉，牝也。管籥，搏鍵器也。固封疆，謂使有司循其溝樹及其衆庶之守法也。要塞，邊城要害處也。梁，橋橫也。溪徑，禽獸之道也。今《月令》「疆」或爲「壘」。○《呂》「坏」作「圻」，「管」作「闕」。○《呂》《淮》「鍵」作「捷」，「疆」作

「壘」，「溪」作「蹊」。○《淮》「坏」作「脩」，「戒」作「警」，「備」作「修」，無「梁」字，「塞」作「絕」。○《唐》無「慎」至「疆」六字及「完要塞」三字，「溪」作「蹊」。飭喪紀，辨衣裳，審棺槨之薄厚，塋丘壟之小大，高卑，厚薄之度，貴賤之等級。塋，音營。塋，力勇反。○此亦閉藏之具，順時飭正之也。辨衣裳，謂襲斂尊卑所用也，所用又有多少。○《呂》「喪」作「哀」。○《淮》無「辨衣裳」字。「柳」下有「衣裳」字，「卑」作「庫」，「度」下云「使貴賤尊卑各有等級」。是月也，命工師效功，陳祭器，案度程，毋或作爲淫巧以蕩上心，必功致爲上。霜降而百工休，至此物皆成也。工師，工官之長也。效功，錄見百工所作器物也。主於祭器，祭器尊也。度，謂制大小也。程，謂器所容也。淫功，謂奢僞怪好也。蕩，謂搖動生其奢淫。○《呂》《淮》無「命」字。《呂》《唐》無「或」、「爲」、「必」字。《淮》「程」作「呈」，無「毋或」至「心必」十一字，「功」作「堅」。物勒工名，以考其誠。勒，刻也。刻工姓名於其器，以察其信，知其不功致。○《淮》無此一節。功有不當，必行其罪，以窮其情。當，丁浪

反。○功不當者，取材美而器不堅也。○《呂》「巧」作「工」。○《淮》云「工事苦慢作爲淫巧必行其罪與」。《唐》皆無「以窮其情」四字。是月也，大飲烝。十月農事畢，天子、諸侯與其群臣飲酒於太學，以正齒位，謂之大飲，別之於他。其禮亡，今天子以燕禮，郡國以鄉飲酒禮代之。烝，謂有牲體爲俎也。《黨正》職曰：「國索鬼神而祭祀，則以禮屬民，而飲酒于序，以正齒位。」亦謂此時也。《詩》云：「十月滌場，朋酒斯饗。」曰殺羔羊，躋彼公堂。稱彼兕觥，受福無疆。」是頌大飲之詩。○《呂》、《淮》「烝」作「蒸」。天子乃祈來年于天宗，大割祠于公社及門閭，臘先祖五祀。臘，力合反。○此《周禮》所謂蜡祭也。天宗，謂日月星辰也。大割，大殺群牲割之也。臘，謂以田獵所得禽祭也。五祀：門、戶、中霤、竈、行也。或言祈年，或言大割，或言臘，互文。○《呂》「割」下有「牲」字，「臘」作「饗」。○《淮》無「乃」字，「割」作「禱」，「祠」作「祭」，無「及門閭」字，「臘」作「畢饗」，無「五祀」字。○《唐》無此一節。勞農以休息之。勞，力報反。○黨正屬民，飲酒，正齒位是也。○《呂》、《淮》「農」下有「夫」字。天子乃命將帥講武，習射御角力。將，子匠反。

帥，色類反。○爲仲冬將大閱簡習之，亦因營室主武事也。凡田之禮，唯狩最備。《夏小正》：「十一月，王狩。」○《呂》「帥」作「率」，「習」作「肄」。○《淮》無「天子乃」字，「力」下有「勁」字。○《唐》無此一節，而有「是月也易關市來征旅納貨賄以便人事四方來集遠鄉皆至則財不匱上無乏用百事乃遂」。是月也，乃命水虞、漁師收水泉池澤之賦。毋或敢侵削衆庶兆民，以爲天子取怨於下。其有若此者，行罪無赦。因盛德在水，收其稅。○《淮》無「是月也」及「敢」字，「削」作「平」，又無「衆庶」以下二十一字。○《唐》「水虞漁師」作「有司」，無「泉池」字，「或作「令」，亦無「衆庶」字，「赦」下有「是月也乃命有司秫稻必齊麴釀必時湛熾必絮水泉必香陶器必良火齊必得兼用六物酒官監之無有差貸」四十三字。①孟冬行春令，則凍閉不密，地氣上泄，寅之氣乘之也。○《呂》、《淮》「上」並作「發」。民多流亡，象蟄蟲動。行夏令，則國多暴風，方冬不寒，蟄蟲復出；

①「三」，原脫，據寬文本、賀本補。



復，扶又反。○巳之氣乘之也。立夏巽用事，巽爲風。

○《淮》無「國」字。行秋令，則雪霜不時，申之氣乘之也。小兵時起，土地侵削。申陰氣尚微。申宿直

參伐，參伐爲兵。○《淮》此下有「十月官司馬其樹檀」。

○仲冬之月，日在斗，昏東辟中，旦軫中。辟，

必亦反。○仲冬者，日月會於星紀而斗建子之辰也。

○《呂》「辟」作「壁」。○《淮》無「日在斗」字，有「招搖指子」

字，無「東」字。○《唐》作「十一月之節日在箕昏營室中曉

軫中斗建子位之初」。律中黃鐘。黃鐘者，律之始也，

九寸。仲冬氣至則黃鐘之律應，《周語》曰：「黃鐘，所以宣

養六氣九德。」○諸本上下與孟冬同，今从《唐》本。冰益

壯，地始坼，鶡旦不鳴，虎始交。鶡，苦割反。○

皆記時候也。鶡旦，求旦之鳥也。交，猶合也。○《呂》、

《淮》「旦」作「鳴」。《淮》「鶡」作「鴒」。○《唐》無「冰益壯地

始坼」字，作「大雪之日鶡鳥不鳴後五日虎始交後五日荔挺

出」。天子居玄堂大廟。玄堂太廟，北堂當大室。○

諸本上下與孟冬同，今從《唐》本。飭死事。飭軍士，<sup>①</sup>

戰必有死志。○《呂》、《淮》、《唐》並無此三字。今按：三

字衍文，當從《唐》本。命有司曰：「土事毋作，慎

毋發蓋，毋發室屋及起大衆，以固而閉，地氣

沮泄，是謂發天地之房，諸蟄則死，民必疾

疫，又隨以喪，命之曰暢月。而，猶女也。暢，猶

充也。大陰用事，尤重閉藏。○《呂》無「慎」字，「蓋」下有

「藏」字，無「發室屋及」字，「閉」下有「發蓋藏起大衆」字，

「沮」作「且」，「必」作「多」。○《淮》無「慎」、「蓋」字，「屋」作

「居」，無「以固」至「沮泄」八字，「房」作「藏」，「又」作「有」，

「喪」下有「急捕盜賊誅淫佚詐僞之人」，無「之」字，「暢」作

「暢」。○《唐》無「日」、「慎」，「蓋」字，「沮」作「且」，無「命之

曰暢月」字。是月也，命奄尹申宮令，審門閭，

謹房室，必重閉。重，直龍反。○奄尹，主領奄豎之

官也。於周則爲內宰，掌治王之內政宮令，譏出入及開閉

之屬。重閉，外內閉也。○《淮》無「是月也」字。○《唐》

「奄尹」作「內宰」。省婦事，毋得淫。雖有貴戚

近習，毋有不禁。省，所景反。○省婦事，所以靜陰

①「士」，原作「事」，據賀本改。

類也。淫，謂女功奢僞怪好物也。貴戚，謂姑姊妹之屬。近習，天子所親幸者。○《淮》無「毋得」以下十三字。

○《唐》無「省婦」以下六字。乃命大酋，秣稻必齊，

麴蘖必時，湛熾必絜，水泉必香，陶器必良，火齊必得。兼用六物，大酋監之，毋有差貸。

酋，在由反。秣，音述。麴，丘六反。蘖，魚列反。湛，子廉

反。齊，才細反。監，工銜反。貸，他得反。○酒孰曰酋。

大酋者，酒官之長也，於周則爲酒人。秣稻必齊，謂孰成

也。湛，漬也。熾，炊也。火齊，生孰之調也。物，猶事也。

差貸，謂失誤，有善有惡也。古者穫稻而漬米麴，至春而爲

酒，《詩》云：「十月穫稻，爲此春酒，以介眉壽。」○《呂》

「熾」作「煇」，無「兼用」以下八字。○《唐》此一節見前章。

天子命有司祈祀四海、大川、名源、淵澤、井

泉。順其德盛之時祭之也。今《月令》「淵」爲「深」。

○《呂》、《淮》「子」下有「乃」字。《呂》「源」作「原」。《淮》、

《唐》無「祈」字。《淮》無「源淵井泉」字。《唐》無「天子」字，

無「淵澤」字，又分此下別爲一章，云「十一月中氣日在南斗

昏東壁中曉角中斗建子位之中冬至之日蚯蚓結後五日麋

角解後五日水泉動是月也祀昊天上帝於圓丘」。是月

也，農有不收藏積聚者，馬牛畜獸有放佚者，取之不詰。畜，許六反。○此收斂尤急之時，人有取者

不罪，所以警懼其主也。《王居明堂禮》曰：「孟冬之月，命

農畢積聚，繫收牛馬。」○《呂》、《淮》「馬牛」作「牛馬」，「佚」

作「失」。《淮》無上「者」字。○《唐》「畜」作「禽」，「佚」作

「逸」。山林藪澤，有能取蔬食，田獵禽獸者，

野虞教道之。其有相侵奪者，罪之不赦。藪，

素口反。○務收斂野物也。大澤曰藪。草木之實爲蔬食。

○諸本「道」皆作「導」。《呂》、《淮》「疏」作「疎」。《淮》無下

「者」字。《唐》「野虞」作「有司」，此下有「是月也命有司祭

馬步是月也伐木取竹箭」。是月也，日短至，陰陽

爭，諸生蕩。爭者，陰方盛，陽欲起也。蕩，謂物動將萌

牙也。○《淮》無「諸生蕩」字。君子齊戒，處必掩

身。身欲寧，去聲色，禁耆欲，安形性，事欲

靜，以待陰陽之所定。齊，側皆反。去，起呂反。

耆，音嗜。○寧，安也。聲，謂樂也。《易》及《樂》、《春秋》

說云：「冬至，人主與群臣從八能之士作樂五日。」此言「去

聲色」，又相反。○諸本並無「一身」字，「耆」皆作「嗜」。

○《呂》「掩」作「弁」。○《淮》「君子」上有「是月也」二字，「寧」作「靜」，「欲」作「慾」，下又有「寧身體」字，無「事欲」以下十字。○《唐》「欲寧」作「無躁」。芸始生，荔挺出，蚯蚓結，麋角解，水泉動。解，音蟹。○又記時候也。芸，香草也。荔挺，馬薺也。水泉動，潤上行。○《淮》作「荔挺出芸始生」，「蚓」作「蟄」。○《唐》無「芸始生」三字，餘見上文。日短至，則伐木取竹箭。此其堅成之極時。○《淮》無「日短至」三字，「伐」下有「樹」字。○《唐》已見上文。是月也，可以罷官之無事，去器之無用者。謂先時權所建作者也。天地閉藏而萬物休，可以去之。○《淮》無「以去」字。塗闕庭門間，築圉圖，此以助天地之閉藏也。順時氣也。○《呂》、《淮》「此」作「所」。《淮》無「藏也」字。《唐》無此一節。仲冬行夏令，則其國乃旱，午之氣乘之也。氛霧冥冥，氛，芳芸反。○霜露之氣散相亂也。○《呂》「氛」作「氣」。雷乃發聲，震之動也，午屬震。行秋令，則天時雨汁，瓜瓠不成，雨，于付反。瓠，戶故反。○

酉之氣乘之也。酉宿直昂畢，畢好雨。雨汁者，水雪雜下也。子宿直虛危，虛危內有瓜瓠。○《淮》「天」作「其」，「汁」作「水」。國有大兵，兵亦畢之氣。行春令，則蝗蟲爲敗，當蟄者出，卯之氣乘之也。○《呂》、《淮》並作「蟲螟」。○《唐》作「蟲蝗」。水泉咸竭，大火爲旱。民多疥癩。疥癩之病，孚甲象也。○《呂》、《淮》「疥」作「疾」。○《淮》此下有「十一月官都尉其樹棗」。○季冬之月，日在婺女，昏婁中，旦氐中。婁，力侯反。氐，丁兮反。○季冬者，日月會於玄枵而斗建丑之辰也。○《淮》無「日在婺女」字，有「招搖指丑」字。○《唐》作「十二月之節日在南斗昏奎中曉亢中斗建丑位之初」。律中大呂。大呂者，蕤賓之所生也，三分益一，律長八寸二十四分，分寸之百四。季冬氣至則大呂之律應，《周語》曰：「大呂，助陽宣物。」○諸本見仲冬章。鴈北鄉，鵲始巢，雉雊雞乳。鄉，音向。雊，古豆反。乳，如住反。○皆記時候也。雊，雉鳴也，《詩》云：「雉之朝雊，尚求其雌。」○《呂》「雉雊雞乳」作「乳雉雊」。○《淮》「始」作「加」，「雉雊雞乳」作「雉雊雞呼卵」。○《唐》云「小寒之日鴈北鄉

後五日鵲始巢後五日野雉始雊」。天子居玄堂右个。

玄堂右个，北堂東偏。○諸本見仲冬章。○《唐》此下有

「命將帥講武習射御角力乃教田獵以習五戎班馬政命僕及七驪咸駕載旌旄授車以級整設于屏外有司摺扑北面以誓之天子乃厲飾執弓挾矢以獵命有司修祭禽之禮天子乃赭百神於南郊爲來年祈福於天宗」。<sup>①</sup>又分此下別爲一章，云「十二月，中氣日在須女昏婁中曉氏中斗建丑位之中大寒之日雞始乳後五日鷩鳥厲疾後五日水澤腹堅」。命有司

大難，旁磔，出土牛以送寒氣。難，乃多反。磔，

竹百反。○此難，難陰氣也，難陰始於此者。陰氣右行，此

月之中，日歷虛危，虛危有墳墓四司之氣。爲厲鬼，將隨強

陰出害人也。旁磔，於四方之門磔攘也。出，猶作也。作

土牛者，丑爲牛，牛可牽止也。送，猶畢也。○諸本「難」作

「難」。○《淮》無「以送寒氣」字。○《唐》屬下文。征鳥

厲疾，殺氣當極也。征鳥，題肩也，齊人謂之擊征，或名

曰鷹，仲春化爲鳩。○《唐》見上文。乃畢山川之祀，

及帝之大臣、天之神祇。祇，音祁。○四時之功成

於冬，孟月祭其宗，至此可以祭其佐也。帝之大臣，句芒之

屬。天之神祇，司中、司命、風師、雨師。○《呂》「畢」下有「行」字，「天」下有「地」字。○《淮》、《唐》無此一節。是

月也，命漁師始漁。天子親往，乃嘗魚，先薦

寢廟。天子必親往視漁，明漁非常事，重之也，此時魚繁

美。○《淮》無「是月也」字，「嘗」作「射」。《淮》、《唐》無

「乃」字。《唐》「漁師」作「有司」。冰方盛，水澤腹

堅，命取冰。腹，厚也。此月日在北陸，冰堅厚之時也。

北陸，謂虛也。今《月令》無「堅」。○《呂》、《淮》「腹」作

「復」。○《唐》「水澤腹堅」已見上文，此但云「命取而藏

之」。冰以人，令告民出五種。種，章勇反。○冰

既入而令田官告民出五種，明大寒氣過，農事將起也。

○《淮》無「冰方」至「以人」十三字，又無「告」字。○《唐》

「以」作「已」。命農計耦耕事，修耒耜，具田器。

耜者，耒之金也，廣五寸。田器，鎡鋌之屬。○《呂》「命」下

有「司」字。○《淮》「命」作「令」。○《唐》無「事」字，此下又

有「命有司出土牛以示農耕之早晚」。命樂師大合吹

① 「命僕」下之「及」，原作「大」，據賀本改。

而罷。合，古答反。吹，昌睡反。○歲將終，與族人大飲，作樂於大寢，以綴恩也。言罷者，此用禮樂於族人最盛，後年若時乃復然也。凡用樂必有禮，用禮則有不用樂者。《王居明堂禮》：「季冬，命國爲酒，以合三族，君子說，小人樂。」○《唐》以此一節屬下文。乃命四監收秩薪柴，以共郊廟及百祀之薪燎。共，音供，下並同。燎，力召反。○四監，主山林川澤之官也。大者可析謂之薪，小者合束謂之柴。薪施炊爨，柴以給燎，《春秋傳》曰：「其父析薪。」今《月令》無「及百祀之薪燎」。○《呂》、《淮》共「作供」，「郊」作「寢」。《淮》無「柴」字。《唐》以此一節屬下文。是月也，日窮于次，月窮于紀，星回于天，數將幾終，幾，音機。○言日月星辰運行于此月，皆周匝於故處也。次，舍也。紀，會也。○《呂》「回」作「迴」。○《淮》「回」作「周」，無「數將幾終」字。歲且更始。專而農民，毋有所使。而，猶女也。言專一女農民之心，令之豫有志於耕稼之事，不可徭役。徭役之，則志散失業也。○《呂》、《淮》「且」作「將」。《呂》「而」作「於」。《淮》「專」作「令」，「而」作「靜」。《唐》「而」作「其」。天子乃與公卿大夫共飭國典，論時令，以待

來歲之宜。飭國典者，和六典之法也。《周禮》以正月爲之，建寅而縣之，今用此月，則所因於夏、殷也。○《呂》無「公」字。○《淮》無「共」字，「來」作「嗣」。○《唐》此下有「是月也合諸侯制百縣爲來歲受朔日與諸侯所稅於人輕重之法貢職之數以遠近土宜爲度以給郊廟之事無有所私」。乃命太史次諸侯之列，賦之犧牲，以共皇天、上帝、社稷之饗。此所與諸侯共者也。列國有大小也，賦之犧牲，大者出多，小者出少。饗，獻也。○諸本共「並作供」。○《淮》「饗」作「芻享」。○《唐》「太史」作「有司」，無「皇天上帝社稷之饗」八字，而有「享祀」二字。乃命同姓之邦，共寢廟之芻豢。此所以與同姓共也。芻豢，猶犧牲。○《呂》、《淮》「邦」作「國」，「共」作「供」。命宰歷卿大夫至于庶民土田之數，而賦犧牲，以共山林名川之祀。此所與卿、大夫、庶民共者也。歷，猶次也。卿大夫采地亦有大小，其非采地，以其邑之民多少賦之。○《呂》「命」作「令」，「歷」作「磨」，「賦」下有「之」字，「共」作「供」。○《淮》無「命宰歷」三字，「卿」下有「土」字，無「土田」至「犧牲」以九字。○《唐》無此一節。凡在天下九州之民者，無不咸獻其力，

以共皇天上帝、社稷寢廟、山林名川之祀。

民非神之福不生，雖有其邦國采地，此賦要由民出。

○《呂》此下有「行之是令此謂一終二句二日」。○《淮》無

此一節。○《唐》無「者」字，「共」作「供」，「名川」作「川澤」，

此下又有「命樂正大合吹而罷乃命有司收秩薪柴以供郊廟

及百祀之薪燎命有司大儺旁磔以送寒氣」。季冬行秋

令，則白露早降，介蟲爲妖，戌之氣乘之也。九月

初，尚有白露，月中乃爲霜，丑爲鼃蟹。四鄙入保，畏

兵辟寒象。○《呂》「鄙」作「鄰」。行春令，則胎夭多

傷，夭，烏老反。○辰之氣乘之也。天，少長也。此月物甫

萌芽，季春乃句者畢出，萌者盡達，胎夭多傷者，生氣早至，

不充其性。○《淮》無「多」字。國多固疾，生不充性，有

久疾也。命之曰逆，衆害莫大於此。行夏令，則水

潦敗國，時雪不降，冰凍消釋。未之氣乘之也。季

夏，大雨時行。《淮》此下有「十二月官獄其樹櫟」。

儀禮集傳集註卷第二十六終

# 儀禮集傳集註卷第二十七

## 樂制

### 王朝禮四之上

《周禮·大宗伯》：以天產作陰德，以中禮防之；以地產作陽德，以和樂防之。

天產者，動物，謂六牲之屬。地產者，植物，謂九穀之屬。陰德，陰氣在人者。陰氣虛，純之則劣，故食動物，作之使動，過則傷性，制中禮以節之。陽德，陽氣在人者。陽氣盈，純之則躁，故食植物，作之使靜，過則傷性，制和樂以節之。如是，然後陰陽平，性情和，而能育其類。以禮樂合天地之化，百物之產，以事鬼神，以諧萬民，以致百物。禮濟虛，樂損盈，並行則四者乃得其和。能生非類曰化，生其種曰產。

○《大司樂》：以六律、六同、五聲、八音、六舞大合樂，以致鬼神示，以

和邦國，以諧萬民，以安賓客，以說遠人，以作動物。

示，音祇。說，音悅。○六律，合陽聲者也。六同，合陰聲者也。此十二者以銅爲管，轉而相生，黃鐘爲首，其長九寸，各因而三分之上生者益一分，下生者去一焉。《國語》曰：「一律，所以立均出度也。古之神瞽考中聲而量之以制，度律均鐘。」言以鐘聲定律，以律立鐘之均。大合樂者，謂徧作六代之樂，以冬至至作之，致天神人鬼，以夏至至作之，致地祇物彪。動物，羽羸之屬。《虞書》曰：「夔曰：夏擊鳴球、搏拊、琴瑟以詠。祖考來格，虞賓在位，群后德讓，下管鼗鼓，合止柷敔，笙鏞以間。鳥獸跕跕，《蕭韶》九成，鳳皇來儀。夔曰：於！予擊石拊石，百獸率舞，庶尹允諧。」此其於宗廟九奏效應。乃分樂而序之，以祭，以享，以祀。分，謂各用一代之樂。乃奏黃鐘，歌大呂，舞《雲門》，以祀天神。以黃鐘之鐘，大呂之聲爲均者。黃鐘，陽聲之首，大呂爲之合，奏之以祀天神，尊之也。天神，謂五帝及日月星辰也。王者又各以夏正月祀其所受命之帝於南郊，尊之也，《孝經》說：「祭天南郊，就陽位」是也。乃奏大蔟，歌應

鐘，舞《咸池》，以祭地示。大，音泰。族，七豆反。

○大族，陽聲第二，應鐘爲之合。《咸池》，《大咸》也。地示所祭於北郊，謂神州之神及社稷。乃奏姑洗，歌南

呂，舞《大磬》，以祀四望。洗，先典反。磬，音韶。

○姑洗，陽聲第三，南呂爲之合。四望，五嶽、四鎮、四瀆。

此言祀者，司中、司命、風師、雨師或亦用此樂與？乃奏

蕤賓，歌函鐘，舞《大夏》，以祭山川。蕤，人誰

反。函，胡南反。○蕤賓，陽聲第四，函鐘爲之合。函鐘，

一名林鐘。乃奏夷則，歌小呂，舞《大濩》，以享

先妣。濩，戶故反。○夷則，陽聲第五，小呂爲之合。小

呂，一名中呂。先妣，姜嫄也。姜嫄履大人跡，感神靈而生

后稷，是周之先母也。周立廟，自后稷爲始祖，姜嫄無所

妃，是以特立廟而祭之，謂之「閼宮」。閼，神之。○妃，音

配，本亦作「配」。乃奏無射，歌夾鐘，舞《大武》，

以享先祖。射，音亦。○無射，陽聲之下也，夾鐘爲之

合。夾鐘，一名閼鐘。先祖，謂先王、先公。凡六樂者，

文之以五聲，播之以八音。六者，言其均，皆待五

聲八音乃成也。播之言被也，故書「播」爲「藩」，杜子春

云：藩，當爲播，讀如后稷播百穀之播。凡六樂者，一

變而致羽物及川澤之示，再變而致羸物及山

林之示，三變而致鱗物及丘陵之示，四變而

致毛物及墳衍之示，五變而致介物及土示，

六變而致象物及天神。羸，力果反。○變，猶更也，

樂成則更奏也。此謂大蜡索鬼神而致百物，六奏樂而禮

畢。東方之祭，則用大族、姑洗。南方之祭，則用蕤賓。西

方之祭，則用夷則、無射。北方之祭，則用黃鐘爲均焉。每

奏有所感，致和以來之。凡動物敏疾者，地祇高下之甚者

易致。羽物既飛又走，川澤有孔竅者，蛤蟹走則遲，墳衍孔

竅則小矣，是所以舒疾之分。土祇，原隰及平地之神也。

象物，有象在天，所謂四靈者。天地之神，四靈之知，非德

至和則不至。《禮運》曰：「何謂四靈？麟、鳳、龜、龍謂之

四靈。龍以爲畜，故魚鮪不滄；鳳以爲畜，故鳥不畜；麟以

爲畜，故獸不狘；龜以爲畜，故人情不失。」凡樂：圜鐘

爲宮，黃鐘爲角，大族爲徵，姑洗爲羽；鼗鼓

鼗鼗，孤竹之管，雲和之琴瑟，《雲門》之舞。

冬日至，於地上之圜丘奏之。若樂六變，則



天神皆降，可得而禮矣。凡樂：函鐘爲宮，大簇爲角，姑洗爲徵，南呂爲羽；靈鼓靈鼗，孫竹之管，空桑之琴瑟，《咸池》之舞。夏日至，於澤中之方丘奏之。若樂八變，則地示皆出，可得而禮矣。凡樂：黃鐘爲宮，大呂爲角，大簇爲徵，應鐘爲羽；路鼓路鼗，陰竹之管，龍門之琴瑟，九德之歌，九磬之舞，於宗廟之中奏之。若樂九變，則人鬼可得而禮矣。徵，張里反。靈，音雷。鼗，徒刀反。○此三者皆禘大祭也。天神則主北辰，地祇則主崑崙，人鬼則主后稷。先奏是樂以致其神，禮之以玉而裸焉，乃後合樂而祭之。《大傳》曰：「王者必禘其祖之所自出。」《祭法》曰：「周人禘嚳而郊稷。」謂此祭天闕丘，以嚳配之。闕鐘，夾鐘也。夾鐘生於房心之氣，房心爲大辰，天帝之明堂。函鐘，林鐘也。林鐘生於未之氣，未坤之位，或曰天社在東井與鬼之外。天社，地神也。黃鐘生於虛危之氣，虛危爲宗廟。以此三者爲宮，用聲類求之，天宮夾鐘陰聲，其相生從陽數，其陽無射。無射上生中呂，中呂與地宮同位，不用也。中

呂上生黃鐘，黃鐘下生林鐘。林鐘，地宮，又不用。林鐘上生太簇，太簇下生南呂。南呂與無射同位，又不用。南呂上生姑洗。地宮林鐘，林鐘上生太簇，太簇下生南呂，南呂上生姑洗。人宮黃鐘，黃鐘下生林鐘，林鐘地宮，又辟之。林鐘上生太簇，太簇下生南呂，南呂與天宮之陽同位，又辟之。南呂上生姑洗，姑洗、南呂之合，又辟之。姑洗下生應鐘，應鐘上生蕤賓，蕤賓，地宮林鐘之陽也，又辟之。蕤賓上生大呂。凡五聲，宮之所生，濁者爲角，清者爲徵羽。此樂無商者，祭尚柔，商堅剛也。鄭司農云：雷鼓、雷鼗，皆謂六面有革可擊者也。雲和，地名也。靈鼓、靈鼗，四面路鼓、路鼗，兩面。九德之歌，《春秋傳》所謂：「水、火、金、木、土、穀，謂之六府。正德、利用、厚生，謂之三事。」六府三事，謂之九功。九功之德皆可歌也，謂之九歌也。玄謂：雷鼓、雷鼗，八面。靈鼓、靈鼗，六面。路鼓、路鼗，四面。孤竹，竹特生者。孫竹，竹枝根之末生者。陰竹，生於山北者。雲和、空桑、龍門，皆山名。九磬，讀當爲大韶，字之誤。○凡舞：有帔舞，有羽舞，有皇舞，有旄舞，有干舞，有人舞。帔，音弗。○故書「皇」作「型」。鄭司農云：帔舞者，全羽。羽舞者，析羽。皇舞者，

以羽冒覆頭上，衣飾翡翠之羽。旄舞者，斄牛之尾。干舞者，兵舞。人舞者，手舞。社稷以帟，宗廟以羽，四方以皇，辟離以旄，兵事以干，星辰以人舞。望，讀爲皇，書亦或爲「皇」。玄謂：帟，析五采繒，今靈星舞子持之是也。皇，雜五采，羽如鳳皇色，持以舞。人舞，無所執，以手袖爲威儀。四方以羽，宗廟以人，山川以干，早暘以皇。教樂儀，行以《肆夏》，趨以《采薺》，車以如之，環拜以鐘鼓爲節。薺，徐私反。○教樂儀，教王以樂出入於大寢朝廷之儀。故書「趨」作「跲」。鄭司農云：「跲，當爲「趨」。書亦或爲「趨」。《肆夏》、《采薺》，皆樂名，或曰皆逸詩。謂人君行步以《肆夏》爲節。趨疾於步，則以《采薺》爲節。若今時行禮於大學，罷出，以鼓《陔》爲節。環，謂旋也。拜，直拜也。玄謂：行者，謂於大寢之中。趨，謂於朝廷。《爾雅》曰：「堂上謂之行，門外謂之趨。」然則王出既服，至堂而《肆夏》作，出路門而《采薺》作。其反，入至應門，路門亦如之。此謂步迎賓客，王如有車出之事，登車於大寢西階之前，反降於阼階之前。《尚書傳》曰：「天子將出，撞黃鐘之鐘，右五鐘皆應。人則撞蕤賓之鐘，左五鐘皆應。大師於是奏樂。」凡射：王以《騶虞》爲節，諸侯以

《貍首》爲節，大夫以《采蘋》爲節，士以《采芣》爲節。騶，側留反。○《騶虞》、《采蘋》、《采芣》，皆樂章名，在《國風·召南》，唯《貍首》在《樂記》。《射義》曰：「《騶虞》者，樂官備也。《貍首》者，樂會時也。《采蘋》者，樂循法也。《采芣》者，樂不失職也。是故天子以備官爲節，諸侯以時會爲節，卿大夫以循法爲節，士以不失職爲節。」鄭司農說以《大射禮》曰：「樂正命大師曰：奏《貍首》，問若。」大師不興，許諾。樂正反位，奏《貍首》以射。《貍首》，曾孫。○《樂師》。○王宮縣，諸侯軒縣，卿、大夫判縣，士特縣。縣，音玄。○樂縣，謂鐘磬之屬縣於筓簷者。鄭司農云：「宮縣，四面縣。軒縣，去其一面。判縣，又去其一面。特縣，又去其一面。四面象宮室，四面有牆，故謂之宮縣。軒縣三面，其形曲，故《春秋傳》曰：「請曲縣繁纓以朝」，諸侯之禮也。故曰：「唯器與名不可以假人。」玄謂：軒縣去南面，辟王也。判縣，左右之合，又空北面。特縣，縣於東方，或於階閒而已。凡縣鐘磬，半爲堵，全爲肆。鐘磬者，編縣之二八十六枚，而在簷，謂之堵。鐘一堵，磬一堵，謂之肆。半之者，謂諸侯之卿大夫士也。諸侯之卿大夫半天子之卿大夫，西縣鐘，東

縣磬。士亦半天子之士，縣磬而已。鄭司農云以《春秋傳》曰：「歌鐘二肆。」○《小胥》。○《太師》：掌六律六同以合陰陽之聲。陽聲：黃鐘、太簇、姑洗、蕤賓、夷則、無射。陰聲：大呂、應鐘、南呂、函鐘、小呂、夾鐘。皆文之以五聲，宮、商、角、徵、羽。皆播之以八音，金、石、土、革、絲、木、匏、竹。○凡樂事，以鐘鼓奏九《夏》：《王夏》、《肆夏》、《昭夏》、《納夏》、《章夏》、《齊夏》、《族夏》、《祫夏》、《騶夏》。齊，側皆反。祫，古哀反。騶，五羔反。○以鐘鼓者，先擊鐘，次擊鼓，以奏《九夏》。夏，大也，樂之大歌有九。故書「納」作「內」，杜子春云：「內，當爲「納」。祫，讀爲「騶」鼓之「騶」。王出入奏《王夏》，戶出入奏《肆夏》，牲出入奏《昭夏》，四方賓來奏《納夏》，臣有功奏《章夏》，夫人祭奏《齊夏》，族人侍奏《族夏》，客醉而出奏《騶夏》，公出入奏《騶夏》。《肆夏》，《詩》也，《春秋傳》曰：「穆叔如晉，晉侯享之，金奏《肆夏》之三，不拜。王歌《文王》之三，又不拜。歌《鹿鳴》之三，不拜。曰：「《三夏》，天子所以享元侯也，使臣不敢與聞。」

《肆夏》與《文王》、《鹿鳴》俱稱三，謂其三章也，以此知《肆夏》詩也。《國語》曰：「金奏《肆夏》、《繁遏》、《渠》，天子所以享元侯。《肆夏》、《繁遏》、《渠》，所謂三夏矣。呂叔玉曰：《肆夏》、《繁遏》、《渠》，皆周頌也。《肆夏》、《時邁》也。《繁遏》、《執競》也。《渠》、《思文》也。肆，遂也。夏，大也。言遂於大位，謂王位也，故《時邁》曰：「肆于時夏，允王保之。」繁，多也。遏，止也。言福祿止於周之多也，故《執競》曰：「降福穰穰，降福簡簡，福祿來反。」渠，大也。言以后稷配天，王道之大也，故《思文》曰：「思文后稷，克配彼天。」故《國語》謂之曰：「皆昭令德以合好也。」玄謂：以《文王》、《鹿鳴》言之，則《九夏》皆詩篇名，《頌》之族類也。此歌之大者載在樂章，樂崩亦從而亡，是以《頌》不能具。○《鐘師》。○《典同》：掌六律六同之和，以辨天地四方陰陽之聲，以爲樂器。陽聲屬天，陰聲屬地，天地之聲布於四方。爲，作也。故書「同」作「銅」。鄭司農云：陽律以竹爲管，陰律以銅爲管。竹，陽也。銅，陰也。各順其性，凡十二律，故《大師》職曰：「執同律以聽軍聲。」玄謂：律，述氣者也。同助陽宣氣，與之同，皆以銅爲之。凡聲：高聲碨，正聲緩，下聲

肆，陂聲散，險聲斂，達聲贏，微聲縮，回聲衍，侈聲笮，弇聲鬱，薄聲甄，厚聲石。硯，占本反。陂，彼義反。縮，音閣。笮，側百反。甄，音震。○故書「硯」或作「硯」，杜子春讀硯爲鏗鎗之鏗。高，謂鐘形容高也。縮，讀爲闇不明之闇。笮，讀爲行扃暗暗之暗。石，如磬石之聲。鄭大夫讀硯爲袞冕之袞，陂讀爲人短罷之罷，縮讀爲鶉鵲之鶉。鄭司農云：鐘形下當蹕。正者，不高不下，鐘形上下正備。玄謂：高，鐘形大上，上大也。高則聲上藏，袞然旋如裏。正，謂上下正直，則聲緩無所動。下，謂鐘形大下，下大也，下則聲出去放肆。陂，讀爲險陂之陂，陂謂偏侈，陂則聲離散也。險，謂偏弇也，險則聲斂不越也。達，謂其形微大也。達則聲有餘，若大放也。微，謂其形微小也。縮，讀爲飛鉗涅縮之縮。縮，聲小不成也。回，謂其形微圓也，回則其聲淫衍無鴻殺也。侈，謂中央約也，侈則聲迫笮出去疾也。弇，謂中央寬也，弇則聲鬱勃不出也。甄，讀爲甄濯之甄，甄猶掉也。鐘微薄則聲掉，鐘太厚則如石，叩之無聲。凡爲樂器，以十有二律爲之數度，以十有二聲爲之齊量。齊，才計反。量，音亮。○數度，廣長也。齊量，侈弇之所容。凡和樂

亦如之。和，謂調其故器也。○《爾雅·釋樂》

曰：宮謂之重，商謂之敏，角謂之經，徵謂之迭，羽謂之柳。皆五音之別名，其義未詳。大瑟謂

之灑，灑，所買反。○長八尺一寸，廣一尺八寸，二十七

弦。大琴謂之離，或曰：琴大者，二十七弦，未詳長

短。《廣雅》曰：「琴長三尺六寸六分，五弦。」大鼓謂之

鼗，鼗，音填。○鼗長八尺。小者謂之應，《詩》曰：

「應輶縣鼓。」在大鼓側。大磬謂之磬，磬，虛驕反。○

磬，形似犂鎗，以玉石爲之。大笙謂之巢，列管匏中，

施簧管端，大者十九簧。小者謂之和，十三簧者。《鄉

射》記曰：「笙一和而成聲。大箎謂之沂，箎，音池。

沂，音銀。○箎，以竹爲之，長尺四寸，圍三寸。一孔上出

一寸三分，名翹，橫吹之。小者尺二寸，《廣雅》云八孔。

大埙謂之跗，埙，許緣反。跗，音叫。○埙，燒土爲之，

大如鵝子，銳上平底，形如稱錘，六孔。小者如雞子。大

鐘謂之鏞，《書》曰：「笙鏞以間。」亦名鏞，音博。其中

謂之剽，小者謂之棧。大簫謂之言，剽，音瓢。

棧，側簡反。○編二十三管，長尺四寸。小者謂之筴。筴，戶交反。○十六管，長尺二寸。簫，一名籥。大管謂之箛，箛，九遙反。○管長尺，圍寸，併漆之，有底，賈氏以爲如篴，六孔。其中謂之篴，小者謂之篴。大箛謂之產，篴，乃結反。篴，音妙。○箛，如笛三孔而短小，《廣雅》云七孔。其中謂之仲，小者謂之筴。徒鼓瑟謂之步，筴，音渥。○獨作之。徒吹謂之和，徒歌謂之謠，吹，昌睡反。○《詩》云：「我歌且謠。」徒擊鼓謂之訢，訢，五各反。○《詩》云：「或歌或訢。」徒鼓鐘謂之修，徒鼓磬謂之蹇。蹇，紀展反。○未見義所出。所以鼓柷謂之止，柷，昌執反。○柷如漆桶，方二尺四寸，深一尺八寸，中有椎柄，連底桐之，令左右擊。止者，其椎名。所以鼓敔謂之籛。敔，魚呂反。籛，之仁反。○敔如伏虎，背上有二十七鉏鋸，刻以木，長尺，櫟之，籛者其名。大鼗謂之麻，小者謂之料。料，力彫反。○麻者音概而長也，料者聲清而不亂。和樂謂之節。○《鳧氏》：爲鐘，兩樂

謂之鈇。樂，力端反。鈇，先典反。○故書，「樂」作「樂」，杜子春云：當爲「樂」，書亦或爲「樂」。鈇，鐘口兩角。鈇閒謂之于，于上謂之鼓，鼓上謂之鉦，鉦上謂之舞，鉦，音征。○此四名者，鐘體也。鄭司農云：于，鐘唇之上祛也。鼓，所擊處。舞上謂之甬，甬上謂之衡。甬，音勇。○此二名者，鐘柄。鐘縣謂之旋，旋蟲謂之幹。縣，音玄。旋，如字。○旋屬鐘柄，所以縣之也。鄭司農云：旋蟲者，旋以蟲爲飾也。玄謂：今時旋有蹲熊、盤龍、辟邪。鐘帶謂之篆，篆閒謂之枚，枚謂之景。帶所以介其名也，介在于鼓鉦舞甬衡之間，凡四。鄭司農云：枚，鐘乳也。玄謂：今時鐘乳俠鼓與舞，每處有九，面三十六。于上之攢謂之隧。攢，音摩。○攢，所擊之處攢弊也。隧在鼓中，窒而生光，有似夫隧。○窒，烏華反。十分其鈇，去二以爲鉦。以其鉦爲之鈇閒，去二分以爲之鼓閒。以其鼓閒爲之舞脩，去二分以爲舞廣。去，起呂反。廣，古曠反。○此言鉦之徑居鈇徑之八，而鈇閒與

鉦之徑相應，鼓間又居銑徑之六，與舞脩相應。舞脩，舞徑也。舞上下促，以橫爲脩，從爲廣，舞廣四分。今亦去徑之二分以爲之間，則舞間之方恒居銑之四也。舞間方四，則鼓間六亦其方也。鼓六，鉦六，舞四，此鐘口十者，其長十六也。鐘之大數以律爲度，廣長與闔徑假設之耳。其鑄之，則各隨鐘之制爲長短大小也。凡言間者，亦爲從篆以介之，鉦間亦當六，今時鐘或無鉦間。以其鉦之長，爲之甬長。并衡數也。以其甬長爲之圍，參分其圍，去一以爲衡圍。衡居甬上又小。參分其甬長，二在上，一在下，以設其旋。令衡居一分，則參分，旋亦二在上，一在下。以旋當甬之中央，是其正。薄厚之所震動，清濁之所由出，侈弇之所由興，有說。說，猶意也。故書「侈」作「移」，鄭司農云：當爲「侈」。鐘已厚則石，大厚則聲不發。已薄則播，大薄則聲散。侈則柞，柞，側百反。○柞，讀爲咋，咋然之咋，聲大外也。弇則鬱。聲不舒揚。長甬則震，鐘掉則聲不正。是故大鐘十分其鼓間，以其一爲之厚；小鐘十分其鉦間，以其一爲之厚。

言若此則不石不播也。鼓鉦之間同方六，而今宜異。又十分之一猶大厚，皆非也。若言鼓外鉦外，則近之。鼓外二，鉦外一。鐘大而短，則其聲疾而短聞。聞，音問，下同。○淺則躁，躁易竭也。鐘小而長，則其聲舒而遠聞。深則安，安難息。爲遂，六分其厚，以其一爲之深而闔之。厚，鐘厚。深，謂窄之也，其窄闔。故書「闔」或作「圀」，杜子春云：當爲「圀」。○《韞人》：爲臯陶，韞，音運。○鄭司農云：韞，書或爲「鞫」。臯陶，鼓木也。玄謂：鞫者，以臯陶名官也。鞫則陶字從革。長六尺有六寸，左右端廣六寸，中尺，厚三寸。廣，古曠反。○版中廣頭狹爲穹隆也。鄭司農云：謂鼓木一判者，其兩端廣六寸，而其中中央廣尺也，如此乃得有腹。穹者三之一，鄭司農云：穹，讀爲志無空邪之空，謂鼓木腹穹隆者，居鼓三之一也。玄謂：穹讀如穹蒼之穹。穹隆者，居鼓面三分之一，則其鼓四尺者，版穹一尺三寸三分寸之一也。倍之爲二尺六寸三分寸之二，加鼓四尺，穹之徑六尺六寸三分寸之二也。此鼓合二十版。上三正。鄭司農云：謂兩頭一平，中央一平也。

玄謂：「參」，當爲「參」。正，直也。參直者，穹上一直，兩端又直，各居一尺二寸，不弧曲也。此鼓兩面，以六鼓差之，賈侍中云「晉鼓大而短」，近晉鼓也。以晉鼓鼓金奏。鼓長八尺，鼓四尺，中圍加三之一，謂之鼗鼓。鼗，扶云反。○中圍加三之一者，加於面之圍以三分之一也。面四尺，其圍十二尺，加以三分一四尺，則中圍十六尺，徑五尺三寸三分寸之一也。今亦合二十版，則版穹六寸三分寸之二耳。大鼓謂之鼗，以鼗鼓鼓軍事。鄭司農云：「鼓四尺，謂革所蒙者廣四尺。爲鼗鼓，長尋有四尺，鼓四尺，倨句磬折。」倨，音據。句，音鉤。折，之設反。○以鼗鼓鼓役事。磬折，中曲之不參正也。中圍與鼗鼓同，以磬折爲異。凡冒鼓，必以啟蟄之日。啟蟄，孟春之中也，蟄蟲始聞雷聲而動，鼓所取象也。冒，蒙鼓以革。良鼓瑕如積環。革，調急也。鼓大而短，則其聲疾而短聞。鼓小而長，則其聲舒而遠聞。○《磬氏》：爲磬，倨句一矩有半。必先度一矩爲句，一矩爲股，而求其弦。既而以一矩有半觸其弦，則磬之倨句也。磬之制有大小，此假矩以定倨句，

非用其度耳。其博爲一，博，謂股博也。博，廣也。股爲二，鼓爲三。參分其股博，去一以爲鼓博；參分其鼓博，以其一爲之厚。鄭司農云：「股，磬之上大者。鼓，其下小者所當擊者也。玄謂：股外面，鼓內面也。假令磬股廣四寸半者，股長九寸也，鼓廣三寸，長尺三寸半，厚一寸。已上則摩其旁，鄭司農云：「磬聲太上，則摩鐃其旁。玄謂：太上，聲清也。薄而廣，則濁。已下則摩其耑。耑，音端。○大下，聲濁也。短而厚，則清。」○魯隱公問羽數於衆仲，衆仲音終。○問執羽人數。對曰：「天子用八，八八六十四人。諸侯用六，六六三十六人。大夫四，四四十六人。士二，二二四人。士有功，賜用樂。夫舞，所以節八音而行八風，八音：金、石、絲、竹、匏、土、革、木也。八風，八方之風。八音之器播八方之風，手之舞之，足之蹈之，節其制而敘其情。故自八以下。」唯天子得盡物數，故以八爲列。諸侯則不敢用八。○《左氏》隱五年。○《荀子》曰：聲樂之象：鼓大麗，鐘統

實，磬廉制，竽笙簫和，管籥發猛，塤箎翁博，瑟易良，易，以鼓反。①琴婦好，歌清盡，舞天道兼。兼，音建。鼓，其樂之君耶！故鼓似天，鐘似地，磬似水，竽、簫、管、籥似星辰、日、月，鞀、柷、拊、控、楬似萬物。鞀，音桃。柷，昌六反。拊，音撫。控，苦江反。楬，苦瞎反。曷以和舞之意？曰：目不自見，耳不自聞也，然而洽俯仰、詘信、進退、遲速莫不廉制，詘，音屈。信，音申。盡筋骨之力以要鐘鼓拊會之節，而靡有悖逆者，衆積諄諄乎！要，平聲。悖，布內反。諄，直黎反。○《白虎通》曰：八音者何謂也？土曰塤，竹曰管，皮曰鼓，匏曰笙，絲曰絃，石曰磬，金曰鐘，木曰柷敔，此謂八音也，法易八卦也。塤，「坎」音也；管，「艮」音也；鼓，「震」音也；絃，「離」音也；鐘，「兌」音也；柷敔，「乾」音也。塤在十一月，塤之爲言熏也，陽氣於黃泉之下熏蒸而萌。匏之言施

也，牙也，在十二月，萬物始施而牙。笙者，太簇之氣，象萬物之生，故曰笙。有七正之節焉，有六合之和焉，天下樂之，樂，音洛，下同。故謂之笙。鼓，「震」音，煩氣也。萬物憤懣震動而出，懣，音悶。雷以動之，溫以煖之，風以散之，雨以濡之，奮至德之聲，感和平之氣也。同聲相應，同氣相求，神明報應，天地祐之，其本乃在萬物之始耶？故謂鼓也。鞀者，「震」之氣也。上應昂星，以通王道，故謂之鞀也。簫者，中呂之氣也。萬物生於無聲，見於無形，勳也，肅也，故謂之簫。簫者以祿爲本，言承天繼物爲民本，人力加，地道化，然後萬物勳也，故謂之簫也。瑟者，商也，閑也，所以懲忿窒欲，正人之德也。故曰：瑟有君父之節，臣子之法。君父有節，

①「鼓」，疑爲「鼓」之誤。



臣子有義，然後四時和，四時和然後萬物生，故謂之瑟也。琴者，禁也，所以禁止淫邪，正人心也。磬者，夷則之氣也，象萬物之成也，其氣磬。故曰：磬有貴賤焉，有親疎焉，有長幼焉。長，丁丈反。朝廷之禮，貴不讓賤，所以明尊卑也。鄉黨之禮，長不讓幼，所以明有年也。宗廟之禮，親不讓疎，所以明有親也。此三者行，然後王道得，王道得然後萬物成，天下樂之，故樂用磬也。鐘之爲言動也，陰氣用事，萬物動成，鐘爲氣，用金爲聲也。鎛者，時之氣聲也，鎛，音博。節度之所生也。君臣有節度則萬物昌，無節度則萬物亡。亡與昌正相迫，故謂之鎛。柷敔者，終始之聲，萬物之所生也。陰陽順而復，故曰柷。承順天地，序迎萬物，天下樂之，故樂用柷。柷，始也。敔，終也。一說，笙、柷、鼓、簫、琴、塤、鐘、磬也如其次：笙在北方，柷在

東北方，鼓在東方，簫在東南方，琴在南方，塤在西南方，鐘在西方，磬在西北方也。聲五，音八何？聲爲本，出於五行；音爲末，象八風。故《樂記》曰：「聲成文謂之音，比音而樂之謂之樂也。」○景王將鑄無射，而爲之大林，賈侍中云：無射，鐘名，律中無射也。大林，無射之覆也。作無射，而爲大林以覆之，其律中林鐘也。或說云：鑄無射，而加以林鐘之數益之。昭謂：下言細抑大陵，又曰聽聲越遠，如此則賈言無射有覆近之矣。單穆公曰：「不可！夫鐘不過以動聲，單，音善。○動聲，謂合樂以金奏，而八音從之。若無射有林，耳不及也。若無射復有大林以覆之。無射，陽聲之細者。林鐘，陰聲之大者。細抑大陵，故耳不能聽及也。夫鐘聲以爲耳也，耳所不及，非鐘聲也。非法鐘之聲也。猶目所不見，不可以爲目也。若目之精明，所不能見，亦不可以施目也。耳目所不能及而強之，則有眩惑之失，以生疾也。夫目之察度也，不過步武

尺寸之間，六尺爲步，賈君以半步爲武。其察色也，不過墨丈尋常之間。五尺爲墨，倍墨爲丈，八尺爲尋，倍尋爲常。耳之察鈇也，在清濁之間。清濁，律呂之變也。黃鐘爲宮則濁，大呂爲角則清。其察清濁也，不過一人之所勝。勝，音升。○勝，舉也。是故先王之制鐘也，大不出鈞，重不過石。鈞，所以鈞音之發也。以木長七尺有絃繫之以爲鈞法。百二十斤爲石。律度量衡於是乎生，律，五聲陰陽之法也。度，丈尺也。量，斗斛也。衡有斤兩之數，生於黃鐘。黃鐘之管容秬黍千二百粒。粒百爲銖，是爲一龠。龠二爲合，合重一兩。故曰律度量衡於是乎生也。小大器用於是乎出，出於鐘也。《易》曰：「制器者尚其象。」小，謂錙銖分寸。大，謂斤兩丈尺。故聖人慎之。今王作鐘也，聽之弗及，耳不及知其清濁也。比之不度，不度，不中鈞石之數。鐘聲不可以知鈇，耳不能聽，故不可以知和。制度不可以出節，節，謂法度量衡之節。無益於樂，而鮮民財，將焉

用之！夫樂不過以聽耳，而美不過以觀目。若聽樂而震，觀美而眩，患莫甚焉。焉用之焉，於虔反。夫耳目，心之樞機也，樞機，發動也。心有所欲，耳目爲之發動。故必聽和而視正。聽和則聰，視正則明。習於和正，則不眩惑也。聰則言聽，明則德昭。聽言昭德，則能思慮純固。以言德於民，民歆而德之，則歸心焉。歆，許金反。○歆，猶喜服也。言德，以言發德教也。是以作無不濟，求無不獲，然後能樂。若視聽不和，而有震眩，則味人不精，不精則氣佚，氣佚則不和。不和，無射，大林也。若聽樂而震，視色而眩，則味人不精美。味人不精美，則氣放佚，不行於身體。於是乎有狂悖之言，有眩惑之明，有轉易之名，有過慝之度。悖，布內反。慝，它得反。○慝，惡也。此四者，氣佚之所生。狂悖眩惑，說子朝寵賓孟也。轉易過惡，嬖子配適，將殺大臣也。出令不信，有轉易也。刑政放紛，動不順時，民無據依，不知所力，各有

離心。不知所爲盡力也。上失其民，作則不濟，求則不獲，其何以能樂？」王弗聽，問之伶州鳩，對曰：「臣聞之：琴瑟尚宮，凡樂輕者從大，重者從細，故琴瑟尚宮也。鐘尚羽，鐘聲大，故尚羽也。石尚角，石，磬也。輕於鐘，故尚角。角，清濁之中也。匏竹利制，匏，笙也。竹，簫管也。利制，以聲音調利爲制，無所尚也。大不踰宮，細不過羽。夫宮，音之主也。第以及羽，宮聲大，故爲主。第，次也。故樂器重者從細，重，謂金石也。從細，尚細聲。謂鐘尚羽，石尚角也。輕者從大。輕，瓦絲也。從大，謂瓦絲尚宮也。是以金尚羽，石尚角，瓦絲尚宮，匏竹尚議，議，議從其調和。草木一聲。革，鼗鼓也。木，祝敔也。一聲，無清濁之變。夫政象樂，樂從和，和從平。和，八音克諧也。平，細大不踰也，故可以平民。樂和則諧，政和則平矣。聲以和樂，律以平聲。謂五聲也，以成八音而調樂也。賈侍中云：律，黃鐘爲宮，林鐘爲徵，太簇爲商，南呂爲羽，姑洗爲角，所以平

五聲也。金石以動之，鐘磬所以發動五聲。絲竹以行之，管絃所以行之。詩以道之，道己志也，誦之曰詩。《書》曰：「詩言志。」歌以詠之，詠，詠詩也。《書》曰：「歌永言，聲依永。」匏以宣之，宣，發揚也。瓦以贊之，贊，助也。草木以節之。物得其常曰樂極，物，事也。極，中也。極之所集曰聲，集，會也。言中和之所會集曰正聲。聲應相保曰和，保，安也。細大不踰曰平。細大之聲不相踰越曰平，今無射有大林，是不平也。如是而鑄之金，鑄金以爲鐘也。磨之石，磨石以爲磬也。繫之絲木，繫絲木以爲琴瑟也。越之匏竹，越匏竹以爲笙管也。越，謂爲之孔也。《樂記》曰：「朱絃而疏越。」節之鼓，節其長短小大。而行之以遂八風。遂，順也。傳曰：所以節八音而行八風也。正西曰兌，爲金，爲闕闔風。西北曰乾，爲石，爲不周風。正北曰坎，爲革，爲廣莫風。東北曰艮，爲匏，爲融風。正東曰震，爲竹，爲明庶風。東南曰巽，爲木，爲清明風。正南曰離，爲絲，爲景風。西南曰坤，爲瓦，爲涼風。

於是乎氣無滯陰，亦無散陽，滯，積也。積陰而發，則夏有霜雹。散陽，陽不藏，冬無冰，李梅實之類也。陰陽序次，風雨時至，嘉生繁祉，人民和利，物備而樂成，上下不罷，罷，音皮。○罷，勞也。故曰樂正。今細抑大陵，不容於耳，非和也。細，無射也。大，大林也。言大聲陵之，細聲抑而不聞。不容於耳，耳不能容別也。聽聲越遠，非平也。越，迂也。言無射之聲爲大林所陵，聽之微細迂遠，非平也。夫有和平之聲，於是乎道之以中德，詠之以中音，中德，中庸之德聲也。中音，中和之音也。德音不愆，以合神人，合神人，謂祭祀享宴也。神是以寧，民是以聽。若夫匱財用，罷民力，以逞淫心，逞，快也。聽之不餖，比之不度，無益於教，而離民怒神，非臣之所聞也。」王不聽。《國語》。○周景王將鑄無射，周景王也。無射，鐘名，律中無射。伶州鳩曰：「王其以心疾死乎！伶，樂官。州鳩，其名也。夫樂，天子之職也。職，所主也。

夫音，樂之興也；樂因音而行。而鐘，音之器也。音由器以發。天子省風以作樂，省風俗作樂以移之。器以鍾之，鍾，聚也。以器聚音。輿以行之。樂須音而行。小者不窕，窕，他彫反。○窕，細不滿。大者不撝，撝，戶化反。○撝，橫大不入。則和於物。物和則嘉成，嘉樂成也。故和聲入於耳而藏於心，心億則樂。樂，音洛。○億，安也。窕則不咸，咸，如字，一本作感，戶暗反。○不充滿人心。撝則不容，心不堪容。心是以感，感實生疾。今鐘撝矣，王心弗堪，其能久乎！」《左氏》昭二十一年。○太史公曰：夫上古明王舉樂者，非以娛心自樂，樂，音洛。快意恣欲，將爲治也。正教者皆始於音，音正而行正。故音樂者，所以動盪血脈，通流精神而和正心也。故宮動脾而和正聖，商動肺而和正義，角動肝而和正仁，徵動心而和正禮，羽動腎而和正智。故樂所以內輔正心而外異貴賤也；上以事

宗廟，下以變化黎庶也。琴長八尺一寸，「琴」上疑有闕字。八尺一寸者，是京房律準。正度也。弦大者爲宮，而居中央，爲君。商張右傍，其餘大小相次，不失其次序，則君臣之位正矣。故聞宮音，使人溫舒而廣大；聞商音，使人方正而好義；聞角音，使人惻隱而愛人；聞徵音，使人樂善而好施；聞羽音，使人整齊而好禮。好，呼報反。○一出《韓詩外傳》，謂湯作《濩》云云。夫禮由外人，樂自內出。故君子不可須臾離禮，須臾離禮則暴慢之行窮外；不可須臾離樂，須臾離樂則姦邪之行窮內。離，去聲。行，下孟反，下同。故樂音者，君子之所以養義也。夫古者，天子諸侯聽鐘磬未嘗離於庭，卿大夫聽琴瑟之音未嘗離於前，所以養行義而防淫佚也。佚，音逸。夫淫佚生於無禮，故聖人使人耳聞《雅》、《頌》之音，目視威儀之禮，足行恭敬之容，口言仁義之道。故

君子終日言而邪辟無由入也。辟，讀爲僻。○《史記·樂書》。

## 樂記

### 王朝禮四之下

凡音之起，由人心生也。人心之動，物使之然也。感於物而動，故形於聲。宮、商、角、徵、羽，雜比曰音，單出曰聲。形，猶見也。聲相應，故生變。樂之器，彈其宮則衆宮應，然不足樂，是以變之使雜也。《易》曰：「同聲相應，同氣相求。」《春秋傳》曰：「若以水濟水，誰能食之？」若琴瑟之專一，誰能聽之？」變成方，謂之音。方，猶文章也。比音而樂之，及干戚羽旄，謂之樂。比，毗志反。○干，盾也。戚，斧也。武舞所執也。羽，翟羽也。旄，旄牛尾也。文舞所執。周禮，舞師、樂師掌教舞，有兵舞，有干舞，有羽舞，有旄舞。《詩》曰：「左手執籥，右手秉翟。」樂者，音之所由生也，其本在人心之感於物也。是故其哀心感者，其聲噍以殺；其樂心感者，其聲

暉以緩；其喜心感者，其聲發以散；其怒心感者，其聲粗以厲；其敬心感者，其聲直以廉；其愛心感者，其聲和以柔。六者非性也，感於物而后動。噍，子堯反。殺，色界反。樂心之樂，音洛。暉，昌善反。○言人聲在所見，非有常也。噍，蹶也。暉，寬綽貌。發，猶揚也。粗，麤也。是故先王慎所以感之者，故禮以道其志，樂以和其聲，政以一其行，刑以防其姦。禮、樂、刑、政，其極一也，行，下孟反。○極，至也。所以同民心而出治道也。此其所謂至也。○凡音者，生人心者也。情動於中，故形於聲。聲成文，謂之音。是故治世之音安以樂，其政和；亂世之音怨以怒，其政乖；亡國之音哀以思，其民困。聲音之道與政通矣。樂，音洛。思，去聲。○言八音和否隨政也。《玉藻》曰：「御聲幾聲之上。」宮爲君，商爲臣，角爲民，徵爲事，羽爲物。五者不亂，則無怙慝之音矣。怙，昌廉反。

慝，昌制反。○五者，君、臣、民、事、物也。凡聲濁者尊，清者卑。怙慝，敝敗不和貌。宮亂則荒，其君驕。商亂則陂，其官壞。角亂則憂，其民怨。徵亂則哀，其事勤。羽亂則危，其財匱。五者皆亂，迭相陵，謂之慢，如此則國之滅亡無日矣。陂，彼義反。○君、臣、民、事、物，其道亂則其音應而亂。荒，猶散也。陂，傾也。《書》曰：「王耄荒。」《易》曰：「無平不陂。」鄭、衛之音，亂世之音也，比於慢矣。比，猶同也。桑間、濮上之音，亡國之音也，其政散，其民流，誣上行私而不可止也。濮，音卜。○濮水之上，地有桑間者，亡國之音於此之水出也。昔殷紂使師延作靡靡之樂，已而自沈於濮水，後師涓過焉，夜聞而寫之，爲晉平公鼓之，是之謂也。桑間在濮陽南。誣，罔也。○凡音者，生於人心者也。樂者，通倫理者也。倫，猶類也。理，分也。是故知聲而不知音者，禽獸是也。知音而不知樂者，衆庶是也。唯君子爲能知樂。禽獸知此爲

聲爾，不知其宮商之變也。八音並作，克諧曰樂。是故審聲以知音，審音以知樂，審樂以知政，而治道備矣。是故不知聲者不可與言音，不知音者不可與言樂，知樂則幾於禮矣。禮樂皆得，謂之有德。德者，得也。幾，近也。聽樂而知政之得失，則能正君、臣、民、事、物之禮。是故樂之隆，非極音也；食饗之禮，非致味也。食，音嗣。○隆，猶盛也。極，窮也。《清廟》之瑟，朱弦而疏越，壹倡而三歎，有遺音者矣。大饗之禮，尚玄酒而俎腥魚，大羹不和，有遺味者矣。倡，昌諒反。和，去聲。○《清廟》，謂作樂歌清廟也。朱弦，練朱弦，練則聲濁。越，瑟底孔也。畫疏之，使聲遲也。倡，發歌曲也。三歎，三人從歎之耳。大饗，袷祭先王，以腥魚爲俎實，不臠孰之。大羹，肉湑，不調以鹽菜。遺，猶餘也。○今按：《呂氏春秋》「遺」皆作「進乎」，近是。是故先王之制禮樂也，非以極口腹耳目之欲也，將以教民平好惡而反人道之正也。好，

惡，並去聲。○教之使知好惡也。○天地之道，寒暑不時則疾，風雨不節則饑。教者民之寒暑也，教不時則傷世。事者民之風雨也，事不節則無功。教謂樂也。然則先王之爲樂也，以法治也，善則行象德矣。以法治，以樂爲治之法。行象德，民之行順君之德也。○夫民有血氣心知之性，而無哀樂喜怒之常，應感起物而動，然後心術形焉。言在所以感之也，術所由也。形，猶見也。是故志微噍殺之音作而民思憂，嘽諧、慢易、繁文、簡節之音作而民康樂，粗厲、猛起、奮末、廣賁之音作而民剛毅，廉直、勁正、莊誠之音作而民肅敬，寬裕、肉好、順成、和動之音作而民慈愛，流辟、邪散、狄成、滌濫之音作而民淫亂。知，音智。思，息吏反。嘽，昌善反。易，以豉反。樂，音洛。賁，扶粉反。肉，而救反。辟，匹亦反。○志微，意細也。吳公子札聽《鄭風》而曰：「其細已甚，民弗堪也。」簡節，少易也。舊末，動使四支也。賁，讀

爲憤，憤怒氣充實也，《春秋傳》曰：「血氣狡憤。」肉，肥也。狄、滌，往來疾貌也。濫，僭差也。此皆民心無常之傲也。肉，或爲「潤」。是故先王本之情性，稽之度數，制之禮義，合生氣之和，道五常之行，使之陽而不散，陰而不密，剛氣不怒，柔氣不懾，四暢交於中，而發作於外，皆安其位而不相奪也。行，下孟反。懾，之涉反。○生氣，陰陽氣也。五常，五行也。密之言閉也。懾，猶恐懼也。然後立之學等，廣其節奏，省其文采，以繩德厚。等，差也，各用其才之差學之。廣，謂增習之。省，猶審也。文采，謂節奏合也。繩，猶度也。《周禮·大司樂》：「以樂語教國子，興、道、諷、誦、言、語。以樂舞教國子，舞《雲門》、《大卷》、《大咸》、《大韶》、《大夏》、《大濩》、《大武》。」律小大之稱，比始終之序，以象事行。稱，尺證反。比，毗志反。○律，六律也，《周禮·典同》：「以六律六同辨天地四方陰陽之聲，以爲樂器。」小大，謂高聲、正聲之類也。終始，謂始於宮，終於羽。宗廟黃鐘爲宮，大呂爲角，大蕤爲徵，應鐘爲羽。以象事行，宮爲君，商爲臣。使親疎

貴賤、長幼男女之理皆形見於樂，故曰樂觀其深矣。長，丁丈反。見，音現。○謂同聽之，莫不敬，莫不和順，莫不和親。○土敝則草木不長，水煩則魚鼈不大，氣衰則生物不遂，世亂則禮慝而樂淫。是故其聲哀而不莊，樂而不安，慢易以犯節，流湏以忘本，廣則容姦，狹則思欲，感條暢之氣，而滅和平之德，是以君子賤之也。長，丁丈反。湏，縣鮮反。○遂，猶成也。慝，穢也。廣，謂聲緩也。狹，謂聲急也。感，動也。動人條暢之善氣，使失其所。凡姦聲感人而逆氣應之，逆氣成象而淫樂興焉。正聲感人而順氣應之，順氣成象而和樂興焉。倡和有應，回邪曲直各歸其分，而萬物之理，各以類相動也。和，去聲。分，扶問反。○成象者，謂人樂習焉。是故君子反情以和其志，比類以成其行。姦聲亂色不留聰明，淫樂慝禮不接心術，惰慢邪辟之氣不設於身體，使耳目鼻口心知百體，皆由順



正以行其義。行，去聲。辟，匹亦反。知，音智。○

反，猶本也。術，猶道也。然後發以聲音，而文以

琴瑟，動以干戚，飾以羽旄，從以簫管，奮至

德之光，動四氣之和，以著萬物之理。奮，猶動

也。動至德之光，謂降天神，出地祇，假祖考。著，猶成也。

是故清明象天，廣大象地，終始象四時，周還

象風雨，五色成文而不亂，八風從律而不姦，

百度得數而有常，小大相成，終始相生，倡和

清濁，迭相爲經。還，音旋。○清明，謂人聲也。廣

大，謂鐘鼓也。周還，謂舞者。五色，五行也。八風從律，

應節至也。百度，百刻也。言日月晝夜不失正也。清，謂

蕤賓至應鐘。濁，謂黃鐘至中呂。故樂行而倫清，耳

目聰明，血氣和平，移風易俗，天下皆寧。言

樂用則正人理，和陰陽也。倫，謂人道也。故曰：樂者

樂也。君子樂得其道，小人樂得其欲。以道

制欲，則樂而不亂；以欲忘道，則惑而不樂。

樂也之樂，音洛，下同。○道，謂仁義也。欲，謂邪淫也。

是故君子反情以和其志，廣樂以成其教。樂

行而民鄉方，可以觀德矣。鄉，去聲。○方，猶道

也。○德者，性之端也；樂者，德之華也；金

石絲竹，樂之器也。詩言其志也，歌咏其聲

也，舞動其容也。三者本於心，然後樂器從

之。是故情深而文明，氣盛而化神，和順積

中而英華發外，唯樂不可以爲僞。三者本志也，

聲也，容也。言無此本於內，則不能爲樂也。樂者，心

之動也；聲者，樂之象也。文采節奏，聲之

飾也。君子動其本，樂其象，然後治其飾。

是故先鼓以警戒，三步以見方，再始以著往，

復亂以飭歸，奮疾而不拔，極幽而不隱，獨樂

其志，不厭其道，備舉其道，不私其欲。是故

情見而義立，樂終而德尊。君子以好善，小

人以聽過。故曰：生民之道，樂爲大焉。樂

其，獨樂之樂，並音洛。見，音現。好，去聲。○文采，樂之

威儀也。先鼓，將奏樂，先擊鼓以警戒衆也。三步，謂將

舞，必先三舉足，以見其舞之漸也。再始以著往，武王除喪，至盟津之上，紂未可伐，還歸三年乃遂伐之。《武》舞再更始，以明伐時再往也。復亂以飭歸，謂鳴鏜而退，明以整歸也。奮疾，謂舞者也。極幽，謂歌者也。夫樂者，樂也，人情之所不能免也。樂必發於聲音，形於動靜，人之道也。聲音動靜，性術之變，盡於此矣。樂也，樂必之樂，並音洛。○免，猶自止也。人道，人之所爲也。性術，言此出於性也。盡於此，不可過。故人不耐無樂，樂不耐無形，形而不爲道，不耐無亂。樂，音洛。○形，聲音動靜也。耐，古書「能」字也，後世變之，此獨存焉。占以能爲三台字。先王恥其亂，故制《雅》、《頌》之聲以道之，使其聲足樂而不流，使其文足論而不息，使其曲直、繁瘠、廉肉、節奏，足以感動人之善心而已矣，不使放心邪氣得接焉。是先王立樂之方也。足樂之樂，音洛。肉，而救反。○流，猶淫放也。文，篇辭也。息，猶銷也。曲直，歌之曲折也。繁瘠廉肉，聲之鴻殺也。節奏，闕作進止所應也。方，道也。是故樂在宗

廟之中，君臣上下同聽之，則莫不和敬；在族長鄉里之中，長幼同聽之，則莫不和順；在閭門之內，父子兄弟同聽之，則莫不和親。故樂者審一以定和，比物以飾節。節奏合以成文，所以合和父子君臣，附親萬民也。是先王立樂之方也。長，丁丈反。比，毗志反。○審一，審其人聲也。比物，謂雜金、革、土、匏之屬也。以成文，五聲八音克諧相應和。故聽其《雅》、《頌》之聲，志意得廣焉；執其干戚，習其俯仰詘伸，容貌得莊焉；行其綴兆，要其節奏，行列得正焉，進退得齊焉。故樂者，天地之命，中和之紀，人情之所不能免也。詘，丘勿反。綴，知衛反。要，平聲。行，戶剛反。○綴，表也，所以表行列也。《詩》云：「荷戈與綴。」兆，域也。舞者進退所至也。要，猶會也。命，教也。紀，摠要之名也。夫樂者，先王之所以飾喜也。軍旅鈇鉞者，先王之所以飾怒也。故先王之喜怒，皆得其儕焉。鈇，音夫。

鉞、音越。儕，仕皆反。○儕，猶輩類。喜則天下和之，怒則暴亂者畏之。先王之道，禮樂可謂盛矣。天子之於天下，喜怒節之以禮樂，則兆民和從而

畏敬之。禮樂，王者所常興，則盛也。○以上並《樂記》。

○《雅》、《頌》之聲皆發於辭，本於情，故君臣以睦，父子以親，故《韶》、《夏》之樂也，聲浸乎金石，潤乎草木。今取怨思之聲施之於弦管，聞其音者不淫則悲，淫則亂男女之辨，悲則感怨思之氣，思，息嗣反。豈所謂樂哉？故事不本於道德者，不可以爲儀；言不合乎先王者，不可以爲道；音不調乎《雅》、《頌》者，不可以爲樂。○賢人之政降人以體，聖人之政降人以心。體降可以圖始，心降可以保終。降體以禮，降心以樂。所謂樂者，非金石絲竹也，謂人樂其家，謂人樂其族，謂人樂其業，謂人樂其都邑，謂人樂其政令，謂人樂其道德。如此君人者，乃作樂以節之，使不

失其和，故有德之君以樂樂人，無德之君以樂樂身。樂人者久而長，樂身者不久而亡。樂其、樂人、樂身之樂，並音洛。○《三略》。○先王之

樂，所以節百事也，故有五節。五聲之節。遲速本末以相及，中聲以降，五降之後，不容彈矣。此謂先王之樂得中聲，聲成五降而息也。降，罷退。

於是有煩手淫聲，慆堙心耳，乃忘平和，君子弗聽也。慆，土刀反。堙，音因。○五降而不息，則雜聲並奏，所謂鄭衛之聲。物亦如之。言百事皆如樂，不可

失節。至於煩，乃舍也已，無以生疾。舍，音捨。

○煩不舍，則生疾。君子之近琴瑟，以儀節也，非以慆心也。爲心之節儀，使動不過度。○《左氏》昭元年。○六律者何？黃鐘、蕤賓、無射、太簇、

夷則、姑洗是也，故天子左五鐘，右五鐘。六

律爲陽，六呂爲陰。凡律呂十二各一鐘。天子宮縣黃鐘、

蕤賓在南北，其餘則在東西。天子將出，則撞黃鐘，

右五鐘皆應。撞，丈江反。○黃鐘在陽，陽氣動，西五

鐘在陰，陰氣靜。君將出，故以動告靜，靜者皆和也。馬

鳴中律，步者皆有容，駕者皆有文，御者皆有數。步者中規，折還中矩，立則磬折，拱則抱鼓。中，去聲。折，之設反。還，音旋。○言聲合於樂體，

比於禮也。然後大師奏登車，告出也。大，音泰。

○《周禮》：「王出入，奏《王夏》。」人則撞蕤賓，左五鐘皆應。蕤賓在陰，東五鐘在陽，君入，故以靜告動，動

者則亦皆和之也。以治容貌，容貌得則氣得，氣

得則肌膚安，肌膚安則色齊矣。人，故欲其靜

也。蕤賓聲，狗吠彘鳴及倮介之蟲，皆莫不

延頸以聽蕤賓。彘，直吏反。倮，力果反。○皆守物

及陰之類也。在內者皆玉色，在外者皆金聲。

玉色，反其正性也。金聲，其事殺。然後少師奏，登

堂就席，告人也。少，去聲。○少師，佐成大師之事

者也。此言至樂相知，物動相生，同聲相應之

義也。古者帝王升歌《清廟》，樂章名。大琴

練弦達越，大瑟朱弦達越，以韋爲鼓，謂之搏

拊，何以也？拊，方武反。○練弦，朱弦，互文也。

越，下孔也。凡練弦達越搏拊者，象其德寬和。君子有

大人聲，不以鐘鼓竽瑟之聲亂人聲。《清廟》

升歌者，歌先人之功烈德澤也，故欲其清也。

烈，業也。其歌之呼也，呼，出聲也。曰：「於穆

清廟。」於者，歎之也；穆者，敬之也；清者，

欲其在位者徧聞之也。故周公升歌文王之

功烈德澤，苟在廟中嘗見文王者，愀然如復

見文王。故《書》曰：「搏拊琴瑟以詠，祖考

來假。」此之謂也。於，音烏。愀，七小反。假，音格。

○《尚書大傳》。○賓牟賈侍坐於孔子，孔子與

之言，及樂，曰：「夫《武》之備戒之已久，何

也？」對曰：「病不得其衆也。」《武》，謂周舞也。

備戒，擊鼓警衆。病，猶憂也，以不得衆心爲憂，憂其難也。

「咏歎之，淫液之，何也？」對曰：「恐不逮事

也。」液，音亦。○咏歎，淫液，歌遲之也。逮，及也。事，

伐事也。「發揚蹈厲之已蚤，何也？」對曰：

「及時事也。」蚤，音早。○時至，武事當施也。

「《武》坐，致右憲左，何也？」對曰：「非《武》

坐也。」言《武》之事無坐也。致，謂膝至地也。憲，讀為

軒，聲之誤。「聲淫及商，何也？」對曰：「非

《武》音也。」言《武》歌在正其軍不貪商也，時人或說其

義為貪商也。子曰：「若非《武》音，則何音

也？」對曰：「有司失其傳也。若非有司失

其傳，則武王之志荒矣。」傳，直專反。○有司，典

樂者也。傳，猶說也。荒，老耄也。言典樂者失其說也，而

時人妄說也。《書》曰：「王耄荒。」子曰：「唯丘之聞

諸萇弘，亦若吾子之言是也。」萇，直良反。○萇

弘，周大夫。賓牟賈起，免席而請曰：「夫《武》

之備戒之已久，則既聞命矣。敢問遲之遲而

又久，何也？」遲之遲，謂久立於綴。子曰：「居，

吾語女。夫樂者，象成者也。摠干而山立，

武王之事也；發揚蹈厲，大公之志也；《武》

亂皆坐，周、召之治也。」語，去聲。女，音汝。大，音

泰。召，時詔反。○居，猶安坐也。成，謂已成之事也。摠

干，持盾也。山立，猶正立也，象武王持盾正立待諸侯也。

發揚蹈厲，所以象威武時也。《武》舞象戰鬪也。亂，謂失

行列也。失行列則皆坐，象周公、召公以文止武也。且

夫《武》，始而北出，再成而滅商，三成而南，

四成而南國是疆，五成而分，周公左，召公

右，六成復綴以崇。綴，知衛反，下同。○成，猶奏

也，每奏《武》曲一終為一成。始奏，象觀兵盟津時也；再

奏，象克商時也；三奏，象克殷有餘力而反也；四奏，象南

方荆蠻之國侵畔者服也；五奏，象周公、召公分職而治

也；六奏，象兵還振旅也。復綴，反位止也。崇，充也。凡

六奏以充《武》樂也。天子夾振之而駟伐，盛威於

中國也。夾振之者，王與大將夾舞者，振鐸以為節也。

駟，當為「四」，聲之誤也。《武》舞，戰象也，每奏四伐，一擊

一刺為一伐。《牧誓》曰：「今日之事，不過四伐、五伐。」分

夾而進，事蚤濟也。分，猶部曲也。事，猶為也。濟，

成也。舞者各有部曲之列，又夾振之者，象用兵，務於早成

也。久立於綴，以待諸侯之至也。象武王伐紂待

諸侯也。且女獨未聞牧野之語乎？女，音汝。

○欲語以作《武》樂之意。武王克殷反商，未及下車而封黃帝之後於薊，封帝堯之後於祝，封帝舜之後於陳，下車而封夏后氏之後於杞，投殷之後於宋，封王子比干之墓，釋箕子之囚，使之行商容而復其位。庶民弛政，庶士倍祿。濟河而西，馬散之華山之陽而弗復乘，牛散之桃林之野而弗復服，車甲衅而藏之府庫而弗復用；倒載干戈，包之以虎皮；將帥之士，使爲諸侯，名之曰「建櫜」，然後天下知武王之不復用兵也。薊，音計。行，去聲。弛，始氏反。華，去聲。弗復之復，扶又反，下「不復」同。衅，許靳反，與「霰」同。倒，丁老反。將，去聲。帥，率內反。櫜，音羔。○反，當爲「及」，字之誤也。及商，謂至紂都也。《牧誓》曰：「至于商郊牧野。」封，謂故無土地者也。投，舉徙之辭也。時武王封紂子武庚於殷墟，所徙者微子也。後周公更封而大之，積土爲封，封比干墓，崇賢也行，猶視也，使箕子祝商禮樂之官，賢者所處，皆令反其居

也。弛政，去其紂時苛政也。倍祿，復其紂時薄者也。散，猶放也。桃林，在華山旁。甲，鎧也。衅，「霰」字也。包干戈以虎皮，明能以武服兵也。建，讀爲「鍵」，字之誤也。兵甲之衣曰櫜。鍵櫜，言閉藏兵甲也。《詩》曰：「載櫜弓矢。」《春秋傳》曰：「垂櫜而入。」《周禮》曰：「櫜之欲其約也。」薊，或爲「績」。祝，或爲「鑄」。散軍而郊射，左射《狸首》，右射《騶虞》，而貫革之射息也；裨冕搢笏，而虎賁之士說劍也；祀乎明堂，而民知孝；朝覲，然後諸侯知所以敬；耕藉，然後諸侯知所以敬。五者，天下之大教也。裨，被支反。搢，音進。賁，音奔。說，吐活反。朝，音潮。○郊射，爲射宮於郊也。左，東學也。右，西學也。《狸首》、《騶虞》，所以歌爲節也。貫革，射穿甲革也。裨冕，衣裨衣而冠冕也。裨衣，衮之屬也。搢，猶插也。賁，憤怒也。文王之廟爲明堂制。耕藉，藉田也。食三，老五更於大學，天子袒而割牲，執醬而饋，執爵而醕，冕而摠干，所以教諸侯之弟也。食，音嗣。更，古行反。大，音泰。醕，音胤。弟，大計反。○三，老五

更，互言之耳。皆老人更知三德五事者也。冕而摠干，親在舞位也。周名大學曰東膠。若此，則周道四達，禮樂交通，則夫《武》之遲久，不亦宜乎？「言《武》遲久，爲重禮樂。」○《樂記》。

○魏文侯問於子夏曰：「吾端冕而聽古樂，則唯恐卧。聽鄭、衛之音，則不知倦。敢問古樂之如彼，何也？新樂之如此，何也？」魏文侯，晉大夫畢萬

之後，僭諸侯者也。端，玄衣也。古樂，先王之正樂也。

子夏對曰：「今夫古樂，進旅退旅，和正以廣。弦匏笙簧會守拊鼓，始奏以文，復亂以武，治亂以相，訊疾以雅。君子於是語，於是道古，脩身及家，平均天下，此古樂之發也。

拊，音撫。相，息亮反。訊，音信。○旅，猶俱也。俱進俱

退，言其齊一也。和正以廣，無姦聲也。會，猶合也，皆也，

言衆皆待擊鼓乃作。《周禮·大師》職曰：「大祭祀，帥鞀登歌，令奏擊拊。」下管，播樂器，令奏鼓輶。文，謂鼓也。

武，謂金也。相，即拊也，亦以節樂。拊者以韋爲表，裝之以鞣。鞣一名相，因以名焉。今齊人或謂鞣爲相。雅，亦

樂器名也，狀如漆笛，中有椎。今夫新樂，進俯退

俯，姦聲以濫，溺而不止，及優侏儒，獫狝子女，不知父子。樂終不可以語，不可以道古，

此新樂之發也。侏，音朱。獫，乃刀反。○俯，猶曲

也，言不齊一也。濫，濫竊也。溺而不止，聲淫亂無以治之。獫，獫狝也。言舞者如獫狝戲也，亂男女之尊卑。獫，

或爲「優」。今君之所問者樂也，所好者音也。

夫樂者與音，相近而不同。」好，去聲。○言文侯

好音而不知樂也。鏗鏘之類皆爲音，應律乃爲樂。文侯

曰：「敢問何如？」欲知音樂異意。子夏對曰：

「夫古者天地順而四時當，民有德而五穀昌，疾疢不作而無妖祥，此之謂大當。然後聖人

作爲父子君臣以爲紀綱，紀綱既正，天下大

定。天下大定，然後正六律，和五聲，弦歌

《詩·頌》，此之謂德音，德音之謂樂。當，去

聲。疢，勑覲反。○當，謂樂不失其所。《詩》云：「莫

其德音，其德克明，克明克類，克長克君。王

此大邦，克順克俾。俾于文王，其德靡悔。既受帝祉，施于孫子。」此之謂也。莫，亡伯反。長，丁丈反。王，去聲。施，以鼓反。○此有德之音，所謂樂也。德正應和曰莫，照臨四方曰明，勤施無私曰類，教誨不倦曰長，慶賞刑威曰君，慈和徧服曰順。俾，當爲「比」，聲之誤也。擇善從之曰比。施，延也。言文王之德皆能如此，故受天福延於後世也。今君之所好者，其溺音乎？好，去聲。○言無文王之德，則所好非樂也。文侯曰：「敢問溺音何從出也？」玩習之久，不知所由出也。子夏對曰：「鄭音好濫淫志，宋音燕女溺志，衛音趨數煩志，齊音敖辟喬志，此四者皆淫於色而害於德，是以祭祀弗用也。敖，音傲。辟，讀爲僻。喬，音驕。○言四國皆出此溺音。濫，濫竊姦聲也。燕，安也。《春秋傳》曰：「懷與安，實敗名。」趨數，讀爲促速，聲之誤也。煩，勞也。祭祀者不用淫樂。《詩》云：『肅雍和鳴，先祖是聽。』夫肅肅，敬也；雍雍，和也。夫敬以和，何事不行？言古樂敬且和，故無事而不用，溺音無所施。爲人君者，

謹其所好惡而已矣。君好之，則臣爲之；上行之，則民從之。《詩》云「誘民孔易」，此之謂也。好，惡，並去聲。易，以鼓反。○誘，進也。孔，甚也。言民從君所好惡，進之於善無難。然後聖人作爲鞀、鼓、柷、敔、壎、篪，此六者，德音之音也。鞀，音桃。柷，苦江反。敔，苦瞎反。壎，許袁反。篪，音池。○六者爲本，以其聲質也。柷，謂祝敵也。壎，篪，或爲「簫」。然後鐘、磬、竽、瑟、以和之，干、戚、旄、狄以舞之。此所以祭先王之廟也，所以獻酬酢也，所以官序貴賤各得其宜也，所以示後世有尊卑長幼之序也。酬，市由反。酢，音昨。長，丁丈反。○官序貴賤，謂尊卑樂器列數有差次。鐘聲鏗，鏗以立號，號以立橫，橫以立武。君子聽鐘聲，則思武臣。鏗，苦耕反。橫，占曠反。○號，號令，所以警衆也。橫，充也，謂氣作充滿也。石聲磬，磬以立辨，辨以致死。君子聽磬聲，則思死封疆之臣。石聲磬，磬當爲「磬」，字之誤也。辨，謂



分明於節義。絲聲哀，哀以立廉，廉以立志。君子聽琴瑟之聲，則思志義之臣。廉，廉隅也。竹聲濫，濫以立會，會以聚衆。君子聽竽笙簫管之聲，則思畜聚之臣。濫，力敢反。〇濫之意，猶擊聚也。會，猶聚也。聚，或爲最。鼓鼙之聲，謹，謹以立動，動以進衆。君子聽鼓鼙之聲，則思將帥之臣。鼙，步西反。將，去聲。帥，所類反。〇聞謹鼙則人意動作。謹，或爲歡。動，或爲勳。君子之聽音，非聽其鏗鎗而已也，彼亦有所合之也。鎗，七羊反。〇以聲合成己之志。〇同上。〇孔子學琴於師襄子，襄子曰：「吾雖以擊磬爲官，然能於琴。今子於琴已習，可以益矣。」孔子曰：「丘未得其數也。」有閒曰：「已習其數，可以益矣。」孔子曰：「丘未得其志也。」有閒曰：「已習其志，可以益矣。」孔子曰：「丘未得其爲人也。」有閒，孔子有所謬然思焉，謬然，深思貌。有所睎然高望而遠眺

焉，睎，音繹。眺，他弔反。〇眺，見。曰：「丘迨得其爲人矣。迨，近也。黹而黑，頎然長，曠如望羊，黹，徒感反。頎，音祈。〇曠，用志廣遠。望羊，遠視也。奄有四方，奄，同也。文王之時，三分天下有其二。後周有四方，文王之功也。非文王其孰能爲此？」師襄子避席葉拱而對曰：「葉拱，兩手薄其心也。『君子，聖人也！』其傳曰『文王操』。《家語》。〇孔子至齊郭門之外，遇一嬰兒挈一壺，相與俱行。其視精，其心正，其行端，孔子謂御曰：『趣驅之！趣驅之！』《韶》樂方作。」於是至而聞《韶》，學之三月不知肉味，曰：「不圖爲樂之至於此也。」故樂非獨以自樂也，又以樂人，非獨以自正也，又以正人，至矣哉！趣，音促。自樂，樂人之樂，音洛。〇《說苑》。〇吳公子札來聘，請觀於周樂。魯以周公故，有天子禮樂。使工爲之歌《周南》、《召南》，爲，去聲，後同。召，音邵。〇此皆各依其本國歌所常用聲曲。曰：「美

哉！美其聲。始基之矣。《周南》、《召南》，王化之基。猶未也，猶有商紂，未盡善也。然勤而不怨矣。」未能安樂，然其音不怨怒。爲之歌《邶》、《鄘》、《衛》，邶，音佩。鄘，音容。○武王伐紂，分其地爲三監。三監叛，周公滅之，更封康叔，并三監之地。故三國盡被康叔之化。曰：「美哉淵乎！憂而不困者也。淵，深也。亡國之音哀以思，其民困。衛康叔、武公之德化深遠，雖遭宣公淫亂，懿公滅亡，民猶秉義，不至於困。吾聞衛康叔、武公之德如是，是其《衛風》乎！」康叔，周公弟。武公，康叔九世孫。皆衛之令德君也。聽聲以爲別，故有疑言。爲之歌《王》，《王》，《黍離》也。幽王遇西戎之禍，平王東遷，王政不行於天下，風俗下與諸侯同，故不爲《雅》。曰：「美哉！思而不懼，其周之東乎！」宗周隕滅，故憂思。猶有先王之遺風，故不懼。爲之歌《鄭》，《詩》第七。曰：「美哉！其細已甚，民弗堪也。是其先亡乎！」美其有治政之音。譏其煩碎，知不能久。爲之歌《齊》，《詩》第八。曰：

「美哉泱泱乎！大風也哉！泱，於郎反。○泱泱，弘大之聲。表東海者，其大公乎！大，音泰。○太公封齊，爲東海之表式。國未可量也。」言其或將復興。爲之歌《豳》，豳，彼貧反。○《詩》第十五。豳，周之舊國，在新平漆縣東北。曰：「美哉蕩乎！樂而不淫，其周公之東乎！」樂，音洛。○蕩乎，蕩蕩然也。樂而不淫，言有節。周公遭管、蔡之變，東征三年，爲成王陳后稷、先公不敢荒淫以成王業，故言其周公之東乎。爲之歌《秦》，《詩》第十一。後仲尼刪定，故不同。曰：「此之謂夏聲。夫能夏則大，大之至也，其周之舊乎！」夫，音扶。○秦本在西戎汧、隴之西，秦仲始有車馬禮樂，去戎狄之音，而有諸夏之聲，故謂之夏聲。及襄公佐周平王東遷，而受其故地，故曰周之舊。爲之歌《魏》，《詩》第九。魏，姬姓國。閔元年，晉獻公滅之。曰：「美哉泱泱乎！大而婉，險而易行，以德輔此，則明主也。」泱，扶弓反。易，以豉反。○泱泱，中庸之聲。婉，約也。險，當爲儉字之誤也。大而

約，則儉節易行。惜其國小無明君也。爲之歌《唐》，  
 《詩》第十。《唐》，晉詩。曰：「思深哉！其有陶唐  
 氏之遺民乎！不然，何憂之遠也？」晉本唐國，  
 故有堯之遺風。憂思深遠，情發於聲。非令德之後，  
 誰能若是？」爲之歌《陳》，《詩》第十二。曰：  
 「國無主，其能久乎？」淫聲放蕩，無所畏忌，故曰國  
 無主。自《鄘》以下無譏焉。鄘，古外反。○《鄘》，  
 第十三。《曹》，第十四。言季子聞此二國歌，不復譏論之，  
 以其微也。爲之歌《小雅》，《小雅》，小正，亦樂歌之  
 常。曰：「美哉！思而不貳，思文武之德，無貳叛之  
 心。怨而不言，有哀音。其周德之衰乎？衰，小  
 也。猶有先王之遺民焉。」謂有殷王餘俗，故未大  
 衰。爲之歌《大雅》，《大雅》，陳文王之德以正天下。  
 曰：「廣哉熙熙乎！熙熙，和樂聲。曲而有直  
 體，論其聲。其文王之德乎！」《雅》，《頌》所以詠盛  
 德形容，故但歌其美者，不皆歌變雅。爲之歌《頌》，  
 《頌》者，以其成功告於神明。曰：「至矣哉！言道備。

直而不倨，倨，音據。○倨，傲。曲而不屈，屈，撓。  
 邇而不偪，謙退。遠而不攜，攜，貳。遷而不  
 淫，淫，過蕩。復而不厭，常日新。哀而不愁，知  
 命。樂而不荒，樂，音洛。○節之以禮。用而不  
 匱，德弘大。廣而不宣，不自顯。施而不費，施，  
 去聲。○因民所利而利之。取而不貪，義然後取。處  
 而不底，底，丁禮反。○守之以道。行而不流。制  
 之以義。五聲和，宮、商、角、徵、羽。八風平。八方  
 之氣。節有度，守有序，八音克諧，節有度也。無相  
 尊倫，守有序也。盛德之所同也。《頌》有殷、魯，故  
 曰盛德之所同。見舞《象箛》，《南籥》者，箛，音朔。  
 ○《象箛》，舞所執。《南籥》，以籥舞也。皆文王之樂。  
 曰：「美哉！猶有憾。」美哉，美其容也。文王恨不  
 及己致太平。見舞《大武》者，武王樂。曰：「美  
 哉！周之盛也，其若此乎！」見舞《韶濩》者，  
 濩，音護。○殷湯樂。曰：「聖人之弘也，而猶有  
 慙德，聖人之難也。」慙於始伐。見舞《大夏》

者，禹之樂。曰：「美哉！勤而不德，非禹其誰能脩之？」盡力溝洫，勤也。見舞《韶箒》者，箒，

音簫。○舜樂。

曰：「德至矣哉，大矣！如天之

無不幬也，幬，徒報反。○幬，覆也。如地之無不

載也。雖甚盛德，其蔑以加於此矣，觀止矣。

若有他樂，吾不敢請已。」魯用四代之樂，故及《韶

箒》而季子知其終也。季札賢明才博，在吳雖已涉見此樂

歌之文，然未聞中國雅聲，故請作周樂，欲聽其聲，然後依

聲以參時政，知其興衰也。聞秦詩謂之夏聲，聞《頌》曰五

聲和，八風平，皆論聲以參政也。舞畢，知其樂終，是素知

其篇數。○《左氏》襄二十九年。

○子貢見師乙而

問焉，曰：「賜聞聲歌各有宜也，如賜者宜何

歌也？」贛，與貢同。○子貢，孔子弟子。師，樂官也。

乙，名。聲歌各有宜氣順性也。

師乙曰：「乙，賤工

也，何足以問所宜。請誦其所聞，而吾子自

執焉。樂人稱工。執，猶處也。夫歌者，直己而陳

德也，動己而天地應焉，四時和焉，星辰理

焉，萬物育焉。寬而靜，柔而正者宜歌

《頌》；廣大而靜，疏達而信者宜歌《大雅》；

恭儉而好禮者宜歌《小雅》；正直而靜廉而

謙者宜歌《風》；肆直而慈愛者宜歌《商》；

好，去聲。○《商》，宋詩也。愛，或爲哀。直己而陳德，各

因其德歌所宜。育，生也。溫良而能斷者宜歌

《齊》。故《商》者，五帝之遺聲也，商人識之，

故謂之《商》。《齊》者，三代之遺聲也，齊人

識之，故謂之《齊》。明乎《商》之音者，臨事

而屢斷，明乎《齊》之音者，見利而讓。斷，都

亂反。○屢，數也。數斷事，以其肆直也。見利而讓，以其

溫良能斷也。斷，猶決也。臨事而屢斷，勇也；

見利而讓，義也。有勇有義，非歌孰能保

此？保，猶安也，知也。故歌者，上如抗，下如

隊，曲如折，止如槁木，倨中矩，句中鉤，纍

纍乎端如貫珠。隊，直媿反。折，之設反。槁，古老

反。中，去聲。句，紀具反。纍，力追反。○言歌聲之著，

動人心之審，如有此事。故歌之爲言也，長言之也。說之，故言之；言之不足，故長言之；長言之不足，故嗟嘆之；嗟嘆之不足，故不知手之舞之、足之蹈之也。」說音悅。○長言之，引其聲也。嗟嘆，和續之也。不知手之舞之足之蹈之，歡之至也。○《樂記》。○子路鼓琴，孔子聞之，謂冉有曰：「甚矣，由之不才也！夫先王之制音也，奏中聲以爲節。流入於南，不歸於北。夫南者，生育之鄉；北者，殺伐之域。故君子之音，溫柔居中，以養生育之氣。憂愁之感，不加于心也；暴厲之動，不在于體也。夫然者，乃所謂治安之風也。小人之音則不然，亢麗微末以象殺伐之氣。中和之感，不載于心；溫和之動，不存于體。夫然者，乃所以爲亂亡之風。昔者舜彈五絃之琴，造《南風》之詩，其詩曰：『南風之薰兮，可以解吾民之愠兮。南風之時兮，可以阜吾民之財

兮。』得其時。阜，盛也。唯脩此化，故其興也勃焉，德如泉流。至于今，王公大人述而弗忘。殷紂好爲北鄙之聲，其廢也忽然。至于今，王公大人舉以爲誡。夫舜起布衣，積德含和而終以帝；紂爲天子，荒淫暴亂而終以亡；非各所脩之致乎？由今也匹夫之徒，曾無意于先王之制，而習亡國之聲，豈能保其六七尺之體哉？」冉有以告子路，子路懼而自悔，靜思不食，以至骨立。夫子曰：「過而能改，其進矣乎。」《家語》。○《呂氏春秋·古樂》曰：樂所由來者尚也，尚，疑。必不可廢。有節有侈，有正有淫矣。節，適也。侈，大也。正，雅也。淫，亂也。賢者以昌，不肖以亡。昔古朱襄氏之治天下也，朱襄氏，古天子，炎帝之別號。多風而陽氣畜積，萬物散解，果實不成，故士達作爲五絃瑟，以來陰氣，以定群生。士達，朱襄氏之臣。昔葛天氏之樂，三人摯牛尾投足以

歌八闕：慘，所斬反。闕，苦穴反。○葛天氏，古帝名。投足，猶蹠足。闕，終。一曰《載民》，二曰《玄鳥》，三曰《遂草木》，四曰《奮五穀》，五曰《敬天常》，六曰《達帝功》，七曰《依地德》，八曰《總萬物之極》。樂之八篇名也。昔陶唐氏之始，陰多滯伏而湛積，湛，音沈。○陶唐氏，堯之號。水道壅塞，不行其原，故有洪水之災。民氣鬱閼而滯著，著，直略反。○閼，讀曰遏止之遏。筋骨瑟縮不達，故作爲舞以宣導之。宣，通。昔黃帝令伶倫作爲律。伶倫，黃帝臣。伶倫自大夏之西，大夏，西方之山。乃之阮隃之陰，隃，式注，式朱二反。○阮隃，山名。山北曰陰。取竹於嶰谿之谷，以生空竅厚鈞者，斷兩節間，竹生谿谷者，取其厚鈞，斷兩節間以爲律管。其長二寸九分而吹之，以爲黃鐘之宮，斷竹長三寸九分，吹之音中黃鐘之宮。吹日舍少次，制十二筒，六律六呂各有管，故曰十二筒，合成舍矣。以之阮隃之下，聽鳳凰之鳴，

以別十二律。其雄鳴爲六，雌鳴亦六，以此黃鐘之宮適合，合，和諧。黃鐘之宮皆可以生之。故曰：黃鐘之宮，律呂之本。法鳳之雄雌，故律有陰陽。上下相生，故曰黃鐘之宮皆可以生之。黃帝又命伶倫與榮璉鑄十二鐘，以和五音。以仲春之月，乙卯之日，日在奎，始奏之，命之曰《咸池》。璉，音袁。○奏十二鐘樂，名之爲《咸池》。帝顓頊生自若水，實處空桑，顓，音專。頊，許六反。○處，居空桑。乃登爲帝。惟天之合，正風乃行，惟天之合，德與天合。風化也。其音若熙熙淒淒鏘鏘。帝顓頊好其音，乃令飛龍作效八風之音，好，去聲。○八風，八卦之風。命之曰《承雲》，以祭上帝。上帝，昊天上帝。乃令鬴先爲樂倡，鬴，音善。倡，昌亮反。○倡，始也。鬴乃偃浸，以其尾鼓其腹，鼓，擊。其音英。英，和盛貌。帝嚳命咸黑作爲聲歌：《九招》、《六列》、《六英》。倕作爲鞀鼓、鐘磬、吹苓、管壎篪，因令

鳳鳥、天翟舞之。帝嚳大喜，乃以康帝德。嚳，枯沃反。招，時遙反。倅，音垂。○康，安。帝堯立，乃命質爲樂。質乃效山林谿谷之音以歌，質，當爲夔。乃以麋輅置缶而鼓之，輅，力角反。○鼓，擊。乃拊石擊石，以象上帝玉磬之音，以致舞獸。鼓楬乃梓五絃之瑟，梓，分。作以爲十五絃之瑟，命之曰《大章》，以祭上帝。舜立，鼓楬、延乃梓鼓楬之所爲瑟，益之八絃，以爲二十三絃之瑟。帝舜乃令質修《九招》、《六列》、《六英》，以明帝德。《招》、《列》、《英》，皆樂名也。帝謂舜。禹立，勤勞天下，日夜不懈，通大川，決壅塞，鑿龍門，降通滂水以導河，滂，蓮條反。○決壅塞，故鑿龍門也。降，大。滂，水。疏三江五湖，注之東海，以利黔首。於是命皋陶作爲《夏籥》九成，以昭其功。黔，其廉反。陶，音遙。○九成，九變。昭，明。殷湯即位，夏爲無道，暴虐萬民，侵削諸侯，不

用軌度，天下患之。湯於是率六州以討桀之罪，功名大成，黔首安寧。湯乃命伊尹作爲《大濩》，歌《晨露》，修《九招》、《六列》，以見其善。《大濩》、《晨露》、《九招》、《六列》，皆樂名。善，美。周文王處岐，諸侯去殷三淫而翼文王。文王，古公亶父之孫，王季歷之子也。古公避獯鬻之難，邑于岐山之陽有周地，及受命，因爲天下號也。淫，過。翼，佐。三淫，謂剖比干之心，斲賢士之股，剝孕婦之胎，故諸侯去之而佐文王也。散宜生曰：「殷可伐也。」文王弗許。散宜生，文王四臣之一也。《論語》曰：文王爲西伯，三分天下有其二，以服事殷。故不許。周公旦乃作詩曰：「文王在上，於昭于天。周雖舊邦，其命維新。」以繩文王之德。武王即位，以六師伐殷，六師未至，以銳兵克之於牧野。於，音烏。○未至殷都，而勝紂於牧野。歸，乃薦俘馘于京太室，乃命周公爲作《大武》。馘，古獲反。爲，去聲。○《大武》，周樂。成王立，殷民反，反，叛。

王命周公踐伐之，踐，往。商人服象，爲虐于東夷，象，獸名也。周公遂以師逐之，至于江南，乃爲《三象》，以嘉其德。故樂之所由來者尚矣，非獨爲一世之所造也。《三象》，周公所作樂名。嘉，美也。尚，久也。自黃帝以來，功成作樂，故曰非獨爲一世之所造也。

儀禮集傳集註卷第二十七終



# 儀禮集傳集註卷第二十八

## 王制之甲分土<sup>①</sup>

## 王朝禮五

《禹貢》：五百里甸服：甸，田遍反。○規方千里之內謂之甸。服，為天子服治田，去王城面五百里。百里賦納總，甸服內之百里，近王城者。禾稾曰總，人之供飼國馬。二百里納銍，銍，珍栗反。○銍，刈，謂禾穗。○穗，音遂。三百里納結服，結，工八反。○結，稾也，服稾役。四百里粟，五百里米。所納精者少，麤者多。五百里侯服：甸服外之五百里侯。侯也，斥侯而服事。百里采，侯服內之百里，供王事而已，不主一。二百里男邦，男，任也，任王者事。三百里諸侯。三百里同為王者斥侯，故合三為一名。五百里綏服：綏，安也。侯服外之五百里，安服王者政教。三

百里揆文教，揆，度也，度王者文教而行之，三百里皆同。○度，待洛反。二百里奮武衛。文教外之二百里，奮武衛，天子所以安。五百里要服：要，一逼反。○綏服外之五百里，要束以文教。三百里夷，守平常之教，事王者而已。二百里蔡。蔡，法也。法三百里而差簡。五百里荒服：要服外之五百里言荒，又簡略。三百里蠻，以文德蠻來之，不制以法。二百里流。流，移也，言政教隨其俗。凡五服相距為方五千里。東漸于海，西被于流沙，朔南暨聲教，漸，子廉反。○漸，入也。被，及也。此言五服之外，皆與王者聲教而朝見。訖于四海。<sup>②</sup>

傳曰：禹合諸侯于塗山，執玉帛者萬國。諸侯執玉，附庸執帛。塗山，在壽春東北。○哀公七年《左氏傳》。

王者之制祿爵，公、侯、伯、子、男，凡五

<sup>①</sup> 本卷宋本缺，改以元明本為底本，校以寬文本與賀本。  
<sup>②</sup> 「海」下，賀本有「尚書夏書」四字。

等。諸侯之上大夫卿、下大夫、上士、中士、下士，凡五等。<sup>二</sup>「五」，象五行剛柔十日。祿所受食。爵，秩次也。上大夫曰卿。○天子之田方千里，象日月之大，亦取畷同也。此謂縣內以祿公、卿、大夫、元士。公、侯田方百里，伯七十里，子、男五十里。不能五十里者，不合於天子，附於諸侯，曰附庸。天子之三公之田視公、侯，天子之卿視伯，天子之大夫視子、男，天子之元士視附庸。皆象星辰之大小也。不合，謂不朝會也。小城曰附庸。附庸者，以國事附於大國，未能以其名通也。視，猶比也。元，善也。善士，謂命士也。此地殷所因夏爵三等之制也。殷有鬼侯、梅伯，則殷爵三等者公、侯、伯也。周武王初定天下，更立五等之爵，增以子、男，而猶因殷之地，以九州之界尚狹也。周公攝政，致太平，斥大九州之界，制禮成武王之意，封王者之後爲公及有功之諸侯。大者地方五百里，其次侯四百里，其次伯三百里，其次子二百里，其次男百里。所因殷之諸侯，亦以功黜陟之，其不合者皆益之地爲百里焉。是以周世有爵尊而國小，爵卑而國大

者。唯天子畿內千里不增，以祿群臣，不主爲治民。○

凡四海之內九州，州方千里。州建百里之國三十，七十里之國六十，五十里之國百有二十，凡二百一十國。名山大澤不以封，其餘以爲附庸閒田。八州，州二百一十國。閒，音閑。○建，立也。立大國三十，十三公也；立次國六十，十六卿也；立小國百二十，十<sup>①</sup>十二小卿也。名山大澤不以封者，與民同財，不得障管，亦賦稅之而已。此大界方三千里，三三而九，方千里者九也。其一爲縣內，餘八各立一州，此殷制也。周公制禮，九州大界方七千里，七七四十九，方千里者四十有九也。其一爲畿內，餘四十八。八州各有方千里者六，設法一州，封地方五百里者不過四，謂之大國；又封方四百里者不過六，又封方三百里者不過十一，謂之次國；又封方二百里者不過二十五，及餘方百里者，謂之小國。盈上四等之數，并四十六。一州二百一十國，則餘方百里者百六十四也。凡處地方千里者五，方百里者五十九，其餘方百里者四十一，附庸地也。天子之

①「十」，原作「二」，據賀本改。

縣內，方百里之國九，七十里之國二十有一，五十里之國六十有三，凡九十三國。名山大澤不以盼，其餘以祿士以爲閒田。縣內，夏時天子所居州界名也，殷曰畿，《詩·殷頌》曰：「邦畿千里，維民所止。」周亦曰畿，畿內大國九者，三公之田三，爲有致仕者副之爲六也，其餘三待封王之子弟。次國二十一者，卿之田六，亦爲有致仕者副之爲十二，又三爲三孤之田，其餘六亦待封王之子弟。小國六十三，大夫之田二十七，亦爲有致仕者副之爲五十四，其餘九，亦以待封王之子弟。三孤之田不副者，以其無職佐公論道耳。雖有致仕，猶可即而謀焉。盼，讀爲班。○凡九州千七百七十三國，天子之元士、諸侯之附庸不與。與，音預。○不與，不在數中也。《春秋傳》曰：「禹會諸侯於塗山，執玉帛者萬國。」言執玉帛，則是唯謂中國耳。中國而言萬國，則是諸侯之地有方百里，有方七十里，有方五十里者，禹承堯、舜而然矣。要服之內，地方七千里乃能容之。夏末既衰，夷狄內侵，諸侯相并，土地減，國數少。殷湯承之，更制中國方三千里之界，亦分爲九州，而建此千七百七十三國焉。周公復唐虞之舊域，分其五服爲九，其要服之內

亦方七千里，而因殷諸侯之數，廣其土，增其爵耳。《孝經說》曰：「周千八百諸侯，布列五千里內。」此又改周之法，關盛衰之中，三七之間以爲說也。終此說之意，五五二十五，方千里者二十五也。其一爲畿內，餘二十四州各有方千里者三，其餘諸侯之地大小則未得而聞也。○天子，百里之內以共官，千里之內以爲御。共，音供。○謂此地之田稅所給也。官，謂其文書財用也。御，謂衣食。千里之外設方伯，五國以爲屬，屬有長，十國以爲連，連有帥；三十國以爲卒，卒有正；二百一十國以爲州，州有伯。長，丁丈反。帥，色類反，下同。○屬、連、卒、州，猶聚也。伯、帥、正，亦長也。凡長皆因賢侯爲之，殷之州長曰伯，虞、夏及周皆曰牧。八州，八伯，五十六正，百六十八帥，三百三十六長。八伯各以其屬，屬於天子之老二人，分天下以爲左右，曰二伯。老，謂上公。《周禮》曰：「九命作伯。」《春秋傳》曰：「自陝以東，周公主之，自陝以西，召公主之。」天子使其大夫爲三監，監於方伯之國，國三人。監，古蹇反。監於，古銜

反。○使佐方伯，領諸侯。○天子之縣內諸侯，祿也。選賢置之於位，其國之祿如諸侯，不得世。外諸侯，嗣也。有功乃封之，使之世也。《冠禮》記曰：「繼世以立諸侯，象賢也。」○千里之內曰甸，能治田出穀稅。千里之外曰采，九州之內也。取其美物以當穀稅。曰流。謂九州之外也。夷狄流移，或貢或不貢。《禹貢》：「荒服之外，三百里蠻，二百里流。」○方千里者爲方百里者百，封方百里者三十國，其餘方百里者七十。又封方七十里者六十，爲方百里者二十九，方十里者四十，其餘方百里者四十，方十里者六十。又封方五十里者百二十，爲方百里者三十，其餘方百里者十，方十里者六十。名山大澤不以封，其餘以爲附庸閒田，諸侯之有功者取於閒田以祿之，其有削地者歸之閒田。○天子之縣內方千里者爲方百里者百，封方百里者九，其餘方百里者九十一。又封方七十里者二十一，爲方

百里者十，方十里者二十九。其餘方百里者八十，方十里者七十一。又封方五十里者六十三，爲方百里者十五，方十里者七十五。其餘方百里者六十四，方十里者九十六。○諸侯世子世國，象賢也。大夫不世爵。使以德，爵以功。謂縣內及列國諸侯爲天子大夫者。不世爵而世祿，辟賢也。未賜爵，視天子之元士以君其國。列國及縣內之國也。諸侯之大夫不世爵祿。○中國戎夷、五方之民皆有性也，不可推移。地氣使之然。東方曰夷，被髮文身，有不火食者矣。南方曰蠻，雕題交趾，有不火食者矣。雕、文，謂刻其肌，以丹青涅之。交趾，足相鄉然，浴則同川，卧則僂。不火食，地氣燠，不爲病。西方曰戎，被髮衣皮，有不粒食者矣。北方曰狄，衣羽毛，穴居，有不粒食者矣。衣，去聲。○不粒食，地氣寒，少五穀。中國、夷蠻戎狄皆有安居、和味、宜服、利用、備器。其事雖異，各自足。五

方之民，言語不通，嗜欲不同。達其志，通其欲，東方曰寄，南方曰象，西方曰狄鞮，北方曰譯。鞮，丁兮反。譯，音亦。○皆俗閒之名，依其事類耳。鞮之言知也，今冀部有言狄鞮者。○已上並《王制》。

○《周禮·大司徒》：以土圭之灋測土深，正日景，以求地中。日南則景短多暑，日北則景長多寒，日東則景夕多風，日西則景朝多陰。深，尺鳩反。○土圭，所以致四時日月之景也。測，

猶度也，不知廣深，故曰測。故書「求」爲「救」，杜子春云：「當爲「求」。鄭司農云：測土深，謂南北東西之深也。日南，謂立表處大南，近日也。日北，謂立表處大北，遠日也。景夕，謂日跌景乃中，立表處大東，近日也。景朝，謂日未中而景中，立表處大西，遠日也。玄謂：晝漏半而置土圭，表陰陽，審其南北。景短於土圭，謂之日南，是地於日爲近南也。景長於土圭，謂之日北，是地於日爲近北也。東於土圭，謂之日東，是地於日爲近東也。西於土圭，謂之日西，是地於日爲近西也。如是，則寒暑陰風偏而不和，是未得其所求。凡日景於地，千里而差一寸。日至之景尺

有五寸，謂之地中，天地之所合也，四時之所交也，風雨之所會也，陰陽之所和也。然則百物阜安，乃建王國焉。制其畿，方千里而封樹之。景尺有五寸者，南戴日下萬五千里，地與星辰四遊升降於二萬里之中，是以半之得地之中也。畿方千里，取象於日一寸爲正。樹，樹木溝上，所以表助阻固也。鄭司農云：土圭之長尺有五寸，以夏至之日立八尺之表，其景適與土圭等，謂之地中，今潁川陽城地爲然。凡建邦國，以土圭土其地而制其域：諸公之地，封疆方五百里，其食者半；諸侯之地，封疆方四百里，其食者參之一；諸伯之地，封疆方三百里，其食者參之一；諸子之地，封疆方二百里，其食者四之一；諸男之地，封疆方百里，其食者四之一。土其地，猶言度其地。鄭司農云：土其地，但爲正四方耳。其食者半，公所食租稅得其半耳，其半皆附庸小國也，屬天子。參之一者，亦然。故《魯頌》曰：「錫之山川，土田附庸。奄有龜蒙，遂荒大東，至于海邦。《論語》曰：季氏將伐顓臾，孔子曰：『先王

以爲東蒙主，且在邦域之中，是社稷之臣。」此非七十里所能容，然則方五百里、四百里，合於《魯頌》、《論語》之言。諸男食者四之一，適方五十里，獨此與今五經家說合耳。

○凡邦國，千里封公，以方五百里則四公，方四百里則六侯，方三百里則七伯，方二百里則二十五子，方百里則百男，以周知天下。

以此率徧知四海九州邦國多少之數也。方千里者，爲方百里者百，以方三百里之積，以九約之，得十一有奇。云「七伯」者，字之誤也。周九州之界方七千里，七七四十九，方千里者四十九。其一爲畿內，餘四十八，八州各有方千里者六，周公變殷湯之制，雖小國地皆方百里，是每事言「則」者，設法也。設法者，以待有功而大其封，一州之中，以其千里封公，則可四；又以其千里封侯，則可六；又以其千里封伯，則可十一；又以其千里封子，則可二十五；又以其千里封男，則可百。公侯伯子男，亦不是過也。州二百一十國，以男備其數焉，其餘以爲附庸。四海之封，黜陟之功，亦如之。雖有大國，爵稱子而已。鄭司農云：「此制亦見《大司徒》職曰諸公之地「方五百里」，諸侯之地「方四百里」，諸伯之地「方三百里」，諸子之地「方二百里」，諸男之

地「方百里」。凡邦國，大小相維。大國比小國，小國事大國，各有屬相維聯也。王設其牧，選諸侯之賢者爲牧，使牧理之。制其職，各以其所能；牧監參伍之屬，用能所任秩次。制其貢，各以其所有。國之地物所有。方千里曰王畿，其外方五百里曰侯服，又其外方五百里曰甸服，又其外方五百里曰男服，又其外方五百里曰采服，又其外方五百里曰衛服，又其外方五百里曰蠻服，又其外方五百里曰夷服，又其外方五百里曰鎮服，又其外方五百里曰藩服。服，服事天子也，《詩》云：「侯服于周。」○《職方氏》。

傳：祭公謀父之言曰：「先王之制：

邦內甸服，父，音甫。○邦內，謂天子畿內千里之地。《商頌》曰：「邦畿千里，維民所止。」《王制》曰：「千里之內曰甸。」京邑在其中央，故《夏書》曰：「五百里甸服。」則古今同矣。甸，王田也。服，服其職業也。自商以前，并畿內爲五服。武王克殷，周公致太平，因禹所

弼除畿內，更制天下爲九服。千里之內謂之王畿，王畿之外曰侯服，侯服之外曰甸服。今謀父諫穆王，稱先王之制猶以王畿爲甸服者。甸，古名，世俗所習也，故周襄王謂晉文公曰「昔我先王之有天下也，規方千里以爲甸服」是也。《周禮》亦以蠻服爲要服，足以相況也。邦外侯服，邦外，邦畿之外也。方五百里之地謂之侯服。侯服，侯圻也。言諸侯之近者，歲一來見也。侯、衛賓服，此總言之也。侯，侯圻也。衛，衛圻也。言自侯圻至衛圻，其間凡五圻，圻五百里，五五二千五百里，中國之界也。謂之賓服，常以服貢賓見於王也。五圻者，侯圻之外曰甸圻，甸圻之外曰男圻，男圻之外曰采圻，采圻之外曰衛圻。《周書·康誥》曰「侯、甸、男、采、衛」是也。凡此服數，諸家之說皆紛錯不同，唯賈君近之。蠻、夷要服，蠻，蠻圻也。夷，夷圻也。周禮：衛圻之外曰蠻圻，去王城二千五百里，九州之界也。夷圻去王城四千里。《周禮·行人》職曰：衛圻之外「謂之要服」。此言蠻、夷要服，則夷圻朝貢或與蠻圻同也。要者，要結好信而服從也。戎、狄荒服。戎、狄去王城四千五百里至五千里也。四千五百里爲鎮

圻，五千里爲藩圻，在九州之外荒裔之地，與戎、狄同俗，故謂之荒，荒忽無常之言也。甸服者祭，供日祭也。此采地之君，其見無數。侯服者祀，供月祀也。堯、舜及周，侯服皆歲見。賓服者享，供時享也。享，獻也。周禮：甸圻二歲而見，男圻三歲而見，采圻四歲而見，衛圻五歲而見。其見必以所貢助祭於廟，《孝經》所謂「四海之內，各以其職來祭」者是也。要服者貢，供歲貢也。要服六歲一見也。荒服者王。王，王事天子也。《周禮》：「九州之外謂之蕃國，世一見，各以其所貴寶爲贄。」故《詩》云：「自彼氐羌，莫敢不來王。」日祭，日祭，祭於祖考，謂上食也。近漢亦然。月祀，月祀於高、曾也。時享，時享於二祧也。歲貢，歲貢於壇、墀也。終王，終，謂世終也。朝嗣王及即位而來見也。先王之訓也。有不祭則修意，意，志意也。謂邦國之內有一違闕不供日祭者，先修志意以自責也。圻內近，知王意。有不祀則修言，言，號令也。有不享則修文，文，典法也。有

不貢則修名，名，謂尊卑職供之名號也。《晉語》曰：「信於名，則上下不干也。」有不王則修德，遠人不服，則修文德以來之。序成而有不至則修刑。序成，謂上五者次序已成，而有不至，則有刑誅。於是乎有刑不祭，伐不祀，征不享，讓不貢，讓，譴責也。告不王。謂以文辭告曉之也。地遠者罪輕。於是乎有刑罰之辟，刑不祭也。有攻伐之兵，伐不祀也。有征討之備，征不享也。有威讓之令，讓不貢也。有文告之辭。告不王也。布令陳辭而又不至，則增修於德而無勤民於遠，勤，勞也。是以近無不聽，遠無不服。《周語》。○羊客問子思曰：「周自后稷封爲王者，後子孫據國至大王、王季、文王，此固世爲諸侯矣，焉得爲西伯乎？」子思曰：「吾聞諸子夏，古之帝王中分天下，使二公治之，謂之二伯。殷王帝乙之時，王季以功，九命作伯，大，音泰。焉，於虔反。○

禮：九命：一命受職，再命受服，三命受位，四命受器，五命受則，六命受官，七命受國，八命受牧，九命作伯。受圭瓚鬯之賜，瓚，才但反。鬯，勑亮反。○禮：九錫：一曰車馬，二曰衣服，三曰樂器，四曰納陛，五曰虎賁，六曰朱戶，七曰斧鉞，八曰弓矢，九曰圭瓚。故文王因之，得專征伐，此以諸侯爲伯，猶周、召之君爲伯也。」召，音邵。○周、召之地，在雍州岐山之陽。古公賁父避狄，自豳始遷於此，修德以建王業，故商王帝乙命其子季歷以爲西伯。至紂又命文王爲西伯，蓋商之州長曰伯，謂以文王爲伯而在西也。故文王行化而雍、梁、荆、豫、徐、揚之人咸被其德而從之，故語曰「三分天下有其二」。由服事殷，惟冀青，充一分屬紂矣。文王受命，作邑于豐，而岐陽周、召之地已空，故分賜周公、召公以爲采邑，施大王、王季之化於己所職之國。傳記言分陝而治者，蓋此也。○《孔叢子》。○周成王使召康公命齊大公曰：「五侯九伯，女實征之，以夾輔周室。」召，音邵。女，音汝。○五等諸侯，九州之伯，皆得征討其罪，



齊桓因此命以夸楚。○《左氏》僖公四年。○公羊

子曰：「自陝而東者，周公主之；自陝而

西者，召公主之，一相處乎內。」陝，失冉反，一

云當作「郊」。召，音邵。相，去聲。○陝者，蓋今弘農

陝縣是也。禮：司馬主兵，司徒主教，司空主土。《春

秋》撥亂世以紕陟爲本，故舉紕陟以所主者言之。

○《公羊》隱公五年。○周襄王命尹氏及王子

虎、內史叔興父策命晉侯重耳爲侯伯。重，

平聲。○以策書命晉侯爲伯。○《左氏》僖公二十八

年。○王者必立牧方三人，使窺遠牧衆

也。遠方之民有饑寒而不得衣食，有獄訟

而不平其冤，失賢而不舉者，人告乎天子。

天子於其君之朝也，揖而進之，曰：「意，

朕之政教，有不得爾者邪？何如乃有饑

寒而不得衣食，有獄訟而不平其冤，失賢

而不舉？」然後，其君退而與其卿大夫謀

之，遠方之民聞之，皆曰：「誠天子也！」

夫我居之僻，見我之近也；我居之幽，見我之明也。可欺乎哉？故牧者所以明四目，通四聰也。夫，音扶。

儀禮集傳集註卷第二十八終

①「公羊」二字，原脫，據賀本補。

## 儀禮集傳集註卷第二十九

王制之乙制國

王朝禮六

凡建王國，大司徒以土圭之灋測土深，正日景以求地中。日南則景短多暑，日北則景長多寒，日東則景夕多風，日西則景朝多陰。深，尺鳩反。○土圭，所以致四時日月之景也。測，

猶度也，不知廣深，故曰測。故書「求」爲「救」，杜子春云：「當爲「求」。鄭司農云：測土深，謂南北東西之深也。日南，謂立表處大南，近日也。日北，謂立表處大北，遠日也。景夕，謂日跌景乃中，立表處大東，近日也。景朝，謂日未中而景中，立表處大西，遠日也。玄謂：晝漏半而置土圭，表陰陽，審其南北。景短於土圭，謂之日南，是地於日爲近南也。景長於土圭，謂之日北，是地於日爲近北也。東於土圭，謂之日東，是地於日爲近東也。西於土圭，謂之日

西，是地於日爲近西也。如是，則寒暑陰風偏而不和，是未得其所求。凡日景於地，千里而差一寸。日至之景，尺有五寸，謂之地中。天地之所合也，四時之所交也，風雨之所會也，陰陽之所和也。然則百物阜安，乃建王國焉。制其畿，方千里而封樹之。景尺有五寸者，南戴日下萬五千里，地與星辰四遊升降於三萬里之中，是以半之，得地之中也。畿方千里，取象於日一寸爲正。樹，樹木溝上，所以表助阻固也。鄭司農云：土圭之長，尺有五寸，以夏至之日，立八尺之表，其景適與土圭等，謂之地中，今潁川陽城地爲然。○今按：自唐以來，以浚儀岳臺晷景爲地中。○《量人》：「掌營國城郭，營后宮，量市朝道巷門渠，造都邑亦如之。」量，音亮。朝，直遙反。○建，立也。立國有舊法式，若《匠人》職云：分國，定天下之國分也。后，君也。言君，容王與諸侯。○《匠人》：「營國，方九里，旁三門。」營，謂丈尺其大小。天子十二門，通十二子。疏云：王城當十二里。國中九經、九緯，經涂九軌。國中，城內也。經緯，謂涂也。經緯之

涂，皆容方九軌。軌謂轍廣，乘車六尺六寸，旁加七寸，凡八尺，是爲轍廣九軌，積七十二尺，則此涂十二步也。旁加七寸者，輻內二寸半，輻廣三寸半，綆三分寸之二，金轄之間，三分寸之一。左祖右社，面朝後市，王宮所居也。祖，宗廟。面，猶鄉也；王宮當中經之涂也。市朝一

夫。方各百步。夏后氏世室，堂修二七，廣四脩一。廣，古曠反。○世室者，宗廟也。魯廟有世室，牲

有白牡，此用先王之禮。脩，南北之深也。夏度以步，令堂修十四步，其廣益以四分修之一，則堂廣十七步半。五

室，三四步，四三尺。堂上爲五室，象五行也。三四

步，室方也。四三尺，以益廣也。木室於東北，火室於東南，金室於西南，水室於西北，其方皆三步，其廣益之以三尺。土室於中央，方四步，其廣益之以四尺。此五室居堂，

南北六丈，東西七丈。九階，南面三，三面各二。四旁

兩夾，窗，窗助戶爲明，每室四戶八窗。白盛，蜃灰

也。盛之言成也，以蜃灰塗牆，所以飾成宮室。門堂，

三之二，門堂，門側之堂。取數於正堂。令堂如上制，則

門堂南北九步二尺，東西十一步四尺。《爾雅》曰：「門側

之堂謂之塾。」室，三之一。兩室與門各居一分。殷

人重屋，堂脩七尋，堂崇三尺，四阿重屋。重，

直龍反。○重屋者，王宮正堂若大寢也。其修七尋五丈六

尺，放夏，周，則其廣九尋七丈二尺也。五室各二尋。崇，

高也。四阿，若今四注屋。重屋，複簷也。○簷，側白反。

周人明堂，度九尺之筵，東西九筵，南北七

筵，堂崇一筵，五室，凡室二筵。度，徒洛反，下

同。○明堂者，明政教之堂。周度以筵，亦王者相改。周

堂高九尺，殷三尺，則夏一尺矣，相參之數。禹卑宮室，謂

此一尺之堂與？此三者或舉宗廟，或舉王寢，或舉明堂，

互言之以明其同制。室中度以几，堂上度以筵，

宮中度以尋，野度以步，涂度以軌。周文者，各

因物宜爲之數。室中，舉謂四壁之內。廟門容大扃七

个，扃，古煢反，下同。个，古賀反。○大扃，牛鼎之扃，長

三尺。每扃爲一个，七个二丈一尺。闔門容小扃參

个。廟中之門曰闔。小扃，腳鼎之扃，長二尺，三个六尺。

路門不容乘車之五个，乘，去聲。○路門者，大寢之

門。乘車，廣六尺六寸，五个三丈三尺。言不容者，是兩門

乃容之。兩門乃容之，則此門半之，丈六尺五寸。應門二徹參个。正門謂之應門，謂朝門也。二徹之內八尺，三个二丈四尺。內有九室，九嬪居之；外有九室，九卿朝焉。嬪，音頻。朝，直遙反。○內，路寢之裏也。外，路門之表也。九室，如今朝堂諸曹治事處。九嬪掌婦學之法，以教九御。六卿三孤爲九卿。九分其國以爲九分，九卿治之。九分其國，分國之職也。三孤佐三公論道，六卿治六官之屬。王宮門阿之制五雉，宮隅之制七雉，城隅之制九雉。阿，棟也。宮隅、城隅，謂角浮思也。雉，長三丈，高一丈。度高以高，度廣以廣。經涂九軌，環涂七軌，野涂五軌。廣狹之差也。故書「環」或作「轅」，杜子春云：「當爲「環」。環涂，謂環城之道。門阿之制以爲都城之制，都四百里，外距五百里，王子弟所封。其城隅高五丈，宮隅門阿皆三丈。宮隅之制以爲諸侯之城制。諸侯，畿以外也，其城隅制高七丈，宮隅門阿皆五丈。《禮器》曰：「天子諸侯臺門。」環涂以爲諸侯經涂，野

涂以爲都經涂。經，亦謂城中道。諸侯環涂五軌，其野涂及都環涂野涂皆三軌。①

記：明堂者，古有之也。凡九室，一室而有四戶八牖，凡三十六戶，七十二牖。以茅蓋屋，上圓下方。赤綴戶也，白綴牖也。二九四七五三六一八。記用九室謂法龜文，故取此數以明其制也。堂高三尺，東西九筵，南北七筵。九室十二堂，室四戶，戶二牖，其宮方三百步。在近郊，近郊三十里。淳于登說：「明堂在國之陽三里之外，七里之內，丙巳之地。《韓詩》說：「明堂在南方七里之郊。」然三十里無所取也。此天子之路寢也，不齊不居其室。待朝在南宮，揖朝出其南門。齊，側皆反。朝，直遙反，下同。○《大戴禮》。○昔者周公朝諸侯於明堂之位，朝，直遙反。○周公攝王位，以

① 「三」，原作「二」，據元明本、寬文本、賀本改。

明堂之禮儀朝諸侯也。不於宗廟，辟王也。天子負斧依南鄉而立。依，於豈反。鄉，去聲。○天子，周公也。負之言背也。斧依，爲斧文屏風於戶牖之間，周公於前立焉。三公中階之前，北面東上。諸侯之位阼階之東，西面北上。諸伯之國西階之西，東面北上。諸子之國門東，北面東上。諸男之國門西，北面東上。九夷之國東門之外，西面北上。八蠻之國南門之外，北面東上。六戎之國西門之外，東面南上。五狄之國北門之外，南面東上。九采之國應門之外，北面東上。四塞，世告至，此周公明堂之位也。塞，先代反。○朝之禮不於此，周公權用之也。朝位之上，上近主位，尊也。九采，九州之牧典貢職者也。正門，謂之應門。二伯帥諸侯而入，牧居外而糾察之也。四塞，謂夷服、鎮服、蕃服在四方爲蔽塞者。新君即位，則乃朝。《周禮》：「侯服歲一見，甸服二歲一見，男服三歲一見，采服四歲一見，衛服五歲一見，要服六歲一見。九州之外謂

之蕃國，世一見。」明堂也者，明諸侯之尊卑也。朝於此，所以正儀辨等也。○《明堂位》。○《內宰》：凡建國，佐后立市。設其次，置其敘，正其肆，陳其貨賄，出其度、量、淳、制，祭之以陰禮。量，音亮。淳，諸允反。○市朝者，君所以建國也。建國者，必面朝後市，王立朝而后立市，陰陽相承之義。次，司次也。敘，介次也。陳，猶處也。度，丈尺也。量，豆區之屬。鄭司農云：佐后立市者，始立市，后立之也。祭之以陰禮者，市中之社先后所立社也。故書「淳」爲「敦」，杜子春讀敦爲純，純謂幅廣也。制，謂匹長。玄謂：純制，《天子巡守禮》所云，制幣丈八尺，純四咫與？陰禮，婦人之祭禮。

王畿千里，以廛里任國中之地，以場圃任園地，以宅田、士田、賈田任近郊之地，以官田、牛田、賞田、牧田任遠郊之地，廛，直連反。賈，音古。○《司馬法》曰：「王國百里爲郊，二百里爲州，三百里爲野，四百里爲縣，五百里爲都。」杜子春云：五十里爲近郊，百里爲遠郊。玄謂：廛里者，若今云邑里居

矣。廛，民居之區域也。里，居也。以廛里任國中，而遂人職授民田，夫一廛，田百畝，是廛里不謂民之邑居在都城者與？圃，樹果蔬之屬。季秋於中爲場。樊圃謂之園。宅田，致仕者之家所受田也。《士相見禮》曰：「宅者在邦，則曰市井之臣；在野，則曰草茅之臣。」士讀爲仕，仕者亦受田，所謂圭田也。《孟子》曰：「自卿以下必有圭田，圭田五十畝。」賈田，在市賣人其家所受田也。官田，庶人在官者其家所受田也。牛田者，以養公家之牛。賞田者，賞賜之田。牧田者，牧六畜之田。牛田、牧田，牧者之家所受田也。以公邑之田任甸地，公邑，謂六遂餘地，天子使大夫治之。自此以外皆然。二百里、三百里，其上大夫如州長。四百里、五百里，其下大夫如縣正。是以或謂二百里爲州，四百里爲縣，云遂人亦監焉。以家邑之田任稍地，稍，所教反。○家邑，大夫之采地。以小都之田任縣地，小都，卿之采地。以大都之田任噩地。噩，居良反。○大都，公之采地，王子弟所食邑也。噩五百里，王畿界也。皆言任者，地之形寔不方平如圖，受田邑者，遠近不得盡如制，其所生育賦貢，取正於是耳。○凡王畿內方千里，積百同，九百萬夫之地也。有山陵、林

麓、川澤、溝瀆、城郭、宮室、塗巷，三分去一，餘六百萬夫。又以田不易、一易、再易，上中下相通，定受田者三百萬家也。遠郊之內，地居四同，三十六萬夫之地也。三分去一，其餘二十四萬夫。六鄉之民七萬五千家，通不易、一易、再易，一家受二夫，則十五萬夫之地，其餘九萬夫。廛里也，場圃也，宅田也，土田也，賈田也，官田也，牛田也，賞田也，牧田也，九者亦通受一夫焉，則半農人也，定受田十二萬家也。《食貨志》云：「農民戶一人已受田，其家衆男爲餘夫，亦以口受田如比。士工商家受田，五口乃當農夫一人。」今餘夫在遂地之中，如此則士工商以事入在官，而餘夫以力出耕公邑。甸稍縣都合居九十六同，八百六十四萬夫之地。城郭宮室差少，塗巷又狹，於三分所去六而存一焉。以十八分之十三率之，則其餘六百二十四萬夫之地，通上中下六家而受十三夫，定受田二百八十八萬家也。其在甸七萬五千家爲六遂，餘則公邑。○疏曰：此一經論任土之法，但天子畿內千里，中置國城，四面至噩各五百里，百里爲一節，封授不同。今則從近向遠，發國中爲始也。但自遠郊百里之內，置六鄉七萬五千家，自外餘地，有此廛里以至牧田九等所任也。云「以公邑之田任甸地」者，郊外曰甸，甸在遠郊之外，其中置六遂七萬五千家，餘地既九等之

人所受，以爲公邑也。但自此以至畿畺，四處皆有公邑，故據此而言也。云「以家邑之田任稍地」者，謂天子大夫各受采地二十五里，在三百里之內也。云「以小都之田任縣地」者，謂天子之卿各受五十里采地，在四百里縣地之內也。云「以大都之田任畺地」者，謂三公及親王子、母弟各受百里采地，在五百里畺地之中也。名三百里地爲「稍」者，以大夫地少，稍稍給之，故云稍也。四百里爲「縣」者，以四百里采地之外地爲公邑，主之者尊卑如縣正，故《司馬法》亦名「四百里爲縣」也。五百里爲「畺」者，以外畔至五百里畿畺，故以畺言之。○今按：郊地四同六鄉井田在內，甸地十二同六遂公邑在內，稍地二十同家邑公邑在內，縣地二十八同小都公邑在內，畺地三十六同大都公邑在內，甸地之外皆謂之野。公邑、家邑、小都、大都，皆謂之都鄙。○《載師》。○六鄉之法：五家爲比，使之相保；五比爲閭，使之相受；四閭爲族，使之相葬；五族爲黨，使之相救；五黨爲州，使之相賙；五州爲鄉，使之相賓。比，毗志反。賙，音周。○此所以勸民者也。使之者，皆謂立其長而教令使之。保，猶任也。救，救凶災也。賓，賓客其賢者。故書

「受」爲「授」，杜子春云：當爲「受」，謂民移徙所到則受之，所去則出之。又云：賙，當爲「糾」，謂糾其惡。玄謂：受者，宅舍有故，相受寄託也。賙者，謂禮物不備，相給足也。閭，二十五家。族，百家。黨，五百家。州，二千五百家。鄉，萬二千五百家。○《大司徒》。○六遂之法：五家爲鄰，五鄰爲里，四里爲鄣，五鄣爲鄙，五鄙爲縣，五縣爲遂，皆有地域溝樹之，使各掌其政令刑禁，以歲時稽其人民，而授之田野，簡其兵器，教之稼穡。鄙，作管反。○鄰，里、鄣、鄙、縣、遂，猶郊內比、閭、族、黨、州、鄉也。鄭司農云：田野之居，其比伍之名與國中異制，故五家爲鄰。玄謂：異其名者，示相變耳。遂之軍法，追胥起徒役如六鄉。辨其野之土，上地、中地、下地，以頒田里：上地，夫一廛，田百畝，萊五十畝，餘夫亦如之；中地，夫一廛，田百畝，萊百畝，餘夫亦如之；下地，夫一廛，田百畝，萊二百畝，餘夫亦如之。晦，與「畝」同。○萊，謂休不耕者。鄭司農云：戶計一夫一婦而賦之田，其一户有數口者，餘夫亦受

此田也。廛，居也。揚子雲有田一廛，謂百畝之居也。玄謂：廛，城邑之居，《孟子》所云「五畝之宅，樹之以桑」者也。六遂之民，奇受一廛。雖上地猶有萊，皆所以饒遠也。王莽時城郭中宅不樹者爲不毛，出三夫之布。凡治野，夫閒有遂，遂上有徑；十夫有溝，溝上有畛；百夫有洫，洫上有涂；千夫有澮，澮上有道；萬夫有川，川上有路，以達於畿。畛，之忍反。洫，況逼反。澮，古外反。○十夫二鄰之田，百夫一鄰之田，千夫二鄰之田，萬夫四縣之田。遂、溝、洫、澮，皆所以通水於川也。遂廣深各二尺，溝倍之，洫倍溝。澮廣二尋，深二仞。徑、畛、涂、道、路，皆所以通車徒於國都也。徑容牛馬，畛容大車，涂容乘車一軌，道容二軌，路容三軌。都之野涂與環涂同，可也。萬夫者，方三十三里少半里，九而方一同。以南畝圖之，則遂從溝橫，洫從澮橫，九澮而川周其外焉，去山陵、林麓、川澤、溝瀆、城郭。○《遂人》。○凡造都鄙，制其地域而封溝之，以其室數制之：不易之地，家百畝；一易之地，家二百畝；再易之地，家三百畝。都鄙，王

子弟公卿大夫采地，其界曰都，鄙所居也。《王制》曰：「天子之縣內，方百里之國九，七十里之國二十有一，五十里之國六十有三。」此蓋夏時采地之數，周末聞矣。《春秋傳》曰：「遷鄭焉而鄙留。」城郭之宅曰室。《詩》云：「嗟我婦子，曰爲改歲，入此室處。」以其室數制之，謂制丘甸之屬。《王制》曰：「凡居民，量地以制邑，度地以居民。地邑民居，必參相得。」鄭司農云：「不易之地，歲種之地，地美，故家百畝。一易之地，休一歲乃復種，地薄，故家二百畝。再易之地，休二歲乃復種，故家三百畝。」○《大司徒》。乃經土地而井牧其田野：九夫爲井，四井爲邑，四邑爲丘，四丘爲甸，四甸爲縣，四縣爲都。以任地事而令貢賦，凡稅斂之事。此謂造都鄙也。采地制井田異於鄉遂，重立國，小司徒爲經之。立其五溝五塗之界，其制似「井」之字，因取名焉。《孟子》曰：「夫仁政必自經界始。經界不正，井地不均，貢祿不平，是故暴君姦吏必慢其經界。經界既正，分田制祿可坐而定也。」鄭司農云：「井牧者，《春秋傳》所謂「井衍沃」、「牧隰臯」者也。玄謂：隰臯之地，九夫爲牧，二牧而當一井。今造都鄙，授民田，有不易，有一易，有再易，通率二而當一，



是之謂井牧。昔夏少康在虞思，有田一成，有衆一旅，一旅之衆而田一成。則井牧之法先古然矣。九夫爲井者，方一里，九夫所治之田也。此制小司徒經之，匠人爲之溝洫，相包乃成耳。邑丘之屬相連比以出田稅，溝洫爲除水害。四井爲邑，方二里。四邑爲丘，方四里。四丘爲甸，甸之言乘也，讀如衷甸之甸。甸方八里。旁加一里，則方十里爲一成，積百井，九百夫。其中六十四井，五百七十六夫，出田稅，三十六井，三百二十四夫，治洫。四甸爲縣，方二十里。四縣爲都，方四十里。四都方八十里，旁加十里，乃得方百里爲一同也，積萬井，九萬夫。其四千九十六井，三萬六千八百六十四夫，出田稅，二千三百四井，二萬七百三十六夫，治洫，三千六百井，三萬二千四百夫，治澮。井田之法備於一同，今止於都者，采地食者皆四之一，其制三等：百里之國凡四都，一都之田稅入於王，五十里之國凡四縣，一縣之田稅入於王，二十五里之國凡四甸，一甸之田稅入於王。地事，謂農、牧、衡、虞也。貢，謂九穀、山澤之材也。①賦，謂出車徒，給徭役也。《司馬法》曰：「六尺爲步，步百爲畝，畝百爲夫，夫三爲屋，屋三爲井，②井十爲通。通爲匹馬，三十家，士一人，徒二人。通十爲成，成百井，三百家，革車一乘，士十人，徒二十人。十成爲終，終千

井，三千家，革車十乘，士百人，徒二百人。十終爲同，同方百里，萬井，三萬家，革車百乘，士千人，徒二千人。」○《小司徒》。○《匠人》：爲溝洫。主通利田間之水道。耜廣五寸，二耜爲耦。一耦之伐，廣尺深尺謂之畝。田首倍之，廣二尺，深二尺，謂之遂。耜，音嗣。廣，古曠反，下同。耦，音偶。畝，占犬反。○古者耜一金，兩人并發之。其壟中曰畝，畝上曰伐。伐之言發也。畝，畎也。今之耜歧頭兩金，象古之耦也。田一夫之所佃百畝，方百步地。遂者，夫間小溝，遂上亦有徑。九夫爲井，井間廣四尺，深四尺，謂之溝。方十里爲成，成間廣八尺，深八尺，謂之洫。方百里爲同，同間廣二尋，深二仞，謂之澮。此畿內采地之制。九夫爲井，井者，方一里，九夫所治之田也。采地制井田，異於鄉、遂及公邑。三夫爲屋，屋，具也。一井之中，三屋九夫，三三相具以出賦稅，共治

①「材」，原作「林」，據元明本、寬文本、賀本改。  
②「三」，原作「二」，據元明本、寬文本、賀本改。

溝也。方十里爲成，成中容一甸，甸方八里出田稅，緣邊一里治洫。方百里爲同，同中容四都，六十四成，方八十里出田稅，緣邊十里治澮。采地者，在三百里、四百里、五百里之中。《載師》職曰：「園廩二十而一，近郊十一，遠郊二十而三。甸、稍、縣、都，皆無過十二。」謂田稅也，皆就夫稅之輕近重遠耳。滕文公問爲國於孟子，孟子曰：「夏后氏五十而貢，殷人七十而助，周人百畝而徹，其實皆什一也。徹者，徹也。助者，藉也。龍子曰：『治地莫善於助，莫不善於貢。』貢者，校數歲之中以爲常。」文公又問井田，孟子曰：「請野九一而助，國中什一使自賦。卿以下必有圭田，圭田五十畝，餘夫二十五畝。死徙無出鄉，鄉田同井，出入相友，守望相助，疾病相扶持，則百姓親睦。方里而井，井九百畝，其中爲公田。八家皆私百畝，同養公田。公事畢，然後敢治私事，所以別野人也。」又曰：「《詩》云：『雨我公田，遂及我私。』惟助爲有公田。由此觀之，雖周亦助也。」魯哀公問於有若曰：「年饑，用不足，如之何？」有若對曰：「盍徹與？」曰：「二，吾猶不足，如之何其徹也？」《春秋》宣公十五年秋「初稅畝」，《傳》曰：「非禮也。穀出不過藉，以豐財也。」此數者，世人謂之錯而疑焉。以《載師》職及《司馬法》論之，周制畿內用夏之貢法，稅夫無公田。以

《詩》、《春秋》、《論語》、《孟子》論之，周制邦國用殷之助法，制公田不稅夫。貢者，自治其所受田，貢其稅穀。助者，借民之力以治公田，又使收斂焉。畿內用貢法者，鄉遂及公邑之吏，旦夕從民事，爲其促之以公，使不得恤其私。邦國用助法者，諸侯專一國之政，爲其貪暴，稅民無藝。周之畿內，稅有輕重，諸侯謂之徹者，通其率以什一爲正。《孟子》云「野九夫而稅一，國中什一」，是邦國亦異外、內之法耳。圭之言珪，絜也，周謂之上田。鄭司農說以《春秋傳》曰「有田一成」，又曰「列國一同」。○《冬官》。○《王制》：

方一里者爲田九百畝。一里方三百步。方十里者爲方一里者百，爲田九萬畝。方百里者爲方十里者百，爲田九十億畝。億，今十萬。方千里者爲方百里者百，爲田九萬億畝。萬億，今萬萬也。○自恒山至於南河，千里而近。恒，胡登反。○冀州域。自南河至於江，千里而近。豫州域。自江至於衡山，千里而遙。荊州域。自東河至於東海，千里而遙。徐州域。自東河至於西河，千里而近。亦冀州域。自西河至於

流沙，千里而遙。雍州域。西不盡流沙，南不盡衡山，東不盡東海，北不盡恒山。凡四海之內，斷長補短，方三千里，爲田八十萬億一萬億畝。斷，音短。○九州之大計。方百里者，爲田九十億畝。山陵、林麓、川澤、溝瀆、城郭、宮室、塗巷，三分去一，其餘六十億畝。麓，音鹿。瀆，音讀。去，起呂反。○以一大國爲率，其餘所以授民也。山足曰麓。○率，音律。古者以周尺八尺爲步，今以周尺六尺四寸爲步。古者百畝當今東田百四十六畝三十步。古者百里，當今百二十一里六十步四尺二寸二分。周尺之數，未詳聞也。案禮制，周猶以十寸爲尺，蓋六國時多變亂法度。或言周尺八寸，則步更爲八八六十四寸。以此計之，古者百畝當今百五十六畝二十五步，古者百里當今百二十五里。○司空執度地，度地，上如字，下徒洛反。○司空，冬官，卿，掌邦事者。度，丈、尺也。居民山川沮澤，時四時，沮，將慮反。○觀寒煖燥濕。沮，謂菜渰。

量地遠近，制邑井之處。興事任力。事，謂築邑、廬、宿、市也。○凡居民材，必因天地寒煖燥濕。煖，乃管反。○使其材藝堪地氣也。廣谷大川異制，謂其形象。民生其間者異俗，謂其所好惡。剛柔、輕重、遲速異齊，齊，才細反。○謂其情性緩急。五味異和，和，胡卧反。○謂香臭與鹹苦。器械異制，械，戶戒反。○謂作務之用。衣服異宜。謂氈裘與絺綌。脩其教，不易其俗，齊其政，不易其宜。教，謂禮義。政，謂刑禁。○凡居民，量地以制邑，度地以居民，地邑民居，必參相得也。得，猶足也。無曠土，無游民，食節事時，民咸安其居，樂事勸功，尊君親上，然後興學。樂，音洛。○立小學、大學。○古者公田藉而不稅，藉，在亦反。○藉之言借也，借民力治公田，美惡取於此，不稅民之所自治也。《孟子》曰：「夏后氏五十而貢，殷人七十而助，周人百畝而徹。」則所云「古者」，謂殷時。市廛而不稅，廛，市物邸舍，稅其舍不稅其物。關譏而

不征，譏，譏異服，譏異言。征，亦稅也。《周禮》：「國凶札則無門關之征，猶譏也。」林麓川澤以時入而不禁，麓，山足也。夫圭田無征。夫，猶治也。征，稅也。《孟子》曰：「卿以下必有圭田。」治圭田者不稅，所以厚賢也。此則《周禮》之士田，以任近郊之地，稅什一。田里不粥，墓地不請。粥，音育。○皆受於公，民不得私也。粥，賣也。請求也。用民之力，歲不過三日。治宮室、城郭、道渠。其用之也，任老者之事，食壯者之食。寬其力，饒其食。○並《王制》。①

傳：季康子欲以一井田出法賦焉，使訪孔子，子曰：「丘弗識也。」冉有三發，卒曰：「子爲國老，待子而行，若之何子不言？」孔子不對，而私於冉有曰：「求，汝來！汝弗聞乎？先王制土藉田以力，田有稅收，藉力以治公田也。而底其遠近；底，平，平其遠近，俱十一而中。賦里以人，而量其有無；里，廛里有稅，度其有無以爲多少之人也。任力

以夫，而議其老幼。力，作度之事。丁夫任其老幼，或重或輕。於是鰥寡孤疾老者，軍旅之出則徵之，無則已。鰥，占頑反。○於軍旅之役，則鰥寡孤疾或有所取，無軍事則止也。其歲，收田一井，出稷禾秉缶米芻藁不是過，缶，方有反。○其歲，軍旅之歲。一把曰秉，四秉曰筥，十筥曰稷。②穗連藁芻不可分，故曰步缶。十六斗曰庾也。先王以爲之足。君子之行，必度於禮，施取其厚，度，徒洛反。施，尸豉反。○施以厚爲德也。事舉其中，事以十一爲節。斂從其薄。若是，其以丘亦足矣。斂，力艷反。○丘，十六井。不度於禮而貪冒無厭，則雖賦田將有不足。且子孫若以行之而取法，則有周公之典在。若欲犯法，則苟行之，又何訪焉？「冒，亡北

①「並」，原脫，據賀本補。

②「十筥曰稷」，原作「稷」，據賀本改。

反。厭，於鹽反。○《家語》。○《孟子》曰：夏后

氏五十而貢，殷人七十而助，周人百畝而徹，其實皆什一也。徹者，徹也；助者，藉也。徹，敕列反。藉，子夜反。○夏時一夫受田五十

畝，而每夫計其五畝之人以爲貢。商人始爲井田之制，以六百三十畝之地，畫爲九區，區七十畝。中爲公田，其外八家各受一區，但借其力以助耕公田，而不復稅其私田。周時一夫授田百畝。鄉遂用貢法，十夫有溝；都鄙用助法，八家同井。耕則通力而作，收則計畝而分，故謂之徹。其實皆什一者，貢法固以十分之一爲常數，惟助法乃是九一。而商制不可考，周制則公田百畝，中以二十畝爲廬舍，一夫所耕公田實計十畝。通私田百畝，爲十一分而取其一，蓋又輕於十一矣。竊料商制亦當似此，而以十四畝爲廬舍，一夫實耕公田七畝，是亦不過什一也。徹，通也，均也。藉，借也。龍子曰：

「治地莫善於助，莫不善於貢。」貢者，校數歲之中以爲常。樂歲，粒米狼戾，多取之而不爲虐，則寡取之；凶年，糞其田而不

足，則必取盈焉。爲民父母，使民盼盼然，將終歲勤動，不得以養其父母，又稱貸而益之，使老稚轉乎溝壑，惡在其爲民父母也？」樂，音洛。盼，五禮反，從目從兮，或音普覓反者，非。養，去聲。惡，平聲。○龍子，古賢人。狼戾，猶狼藉，言多也。糞，擁也。盈，滿也。盼，恨視也。勤動，勞苦也。稱，舉也。貸，借也。取物於人，而出息以償之也。益之，以足取盈之數也。稚，幼子也。《詩》

云：「雨我公田，遂及我私。」惟助爲有公田。由此觀之，雖周亦助也。雨，于付反。

○《詩》，《小雅·大田》之篇。雨，降雨也。言願天雨於公田，而遂及私田，先公而後私也。當時助法盡廢，典籍不存，惟有此詩可見周亦用助，故引之也。夫仁

政，必自經界始。經界不正，井地不均，穀祿不平，是故暴君汙吏必慢其經界。經界既正，分田制祿可坐而定也。夫，音扶。○經界，謂治地分田，經畫其溝塗封植之界也。此法不脩，則田無定分，而豪強得以兼并，故井地有不均。賦無定

法，而貪暴得以多取，故穀祿有不平。此欲行仁政者之所以必從此始，而暴君汙吏則必欲慢而廢之也。有以正之，則分田制祿，可不勞而定矣。無君子莫治野人，無野人莫養君子。養，去聲。○分田制祿之法，不可偏廢也。請野九一而助，國中什一使自賦。此分田制祿之常法，所以治野人使養君子也。野，郊外都鄙之地也。九一而助，爲公田而行助法也。國中，郊門之內，鄉遂之地也。田不井授，但爲溝洫，使什而自賦其一，蓋用貢法也。周所謂徹法者蓋如此。以此推之，當時非惟助法不行，其貢亦不止什一矣。卿以下必有圭田，圭田五十畝。此世祿常制之外，又有圭田，所以厚君子也。圭，潔也，所以奉祭祀也。不言世祿者，滕已行之，但此未備耳。餘夫二十五畝。程子曰：一夫上父、母、下妻、子，以五口，八口爲率，受田百畝。如有弟，是餘夫也。年十六，別受田二十五畝，俟其壯而有室，然後更受百畝之田。愚按：此百畝常制之外，又有餘夫之田，以厚野人也。死徙無出鄉，鄉田同井，出入相友，守望相

助，疾病相扶持，則百姓親睦。死，謂葬也。徙，謂徙其居也。同井者，八家也。友，猶伴也。守望，防寇盜也。方里而井，井九百畝，其中爲公田。八家皆私百畝，同養公田。公事畢，然後敢治私事，所以別野人也。養，去聲。別，彼列反。○此詳言井田形體之制，乃周之助法也。公田以爲君子之祿，而私田野人之所受。先公後私，所以別君子、野人之分也。不言君子，據野人而言，省文耳。上言野及國中二法，此獨詳於治野者，國中貢法，當世已行，但取之過於什一爾。○《滕文公》上。○「古者曷爲什一而藉？」什一以借民力，以什與民，自取其一爲公田。公羊子曰：「什一者，天下之中正也。多乎什一，大桀小桀；奢泰多取於民，比於桀也。寡乎什一，大貉小貉。貉，亡伯反。○蠻貉無社稷宗廟，百官制度之費，稅薄什一者，天下之中正也，什一行而頌聲作矣。」何休曰：「聖人制井田之法而口分之，一夫一婦受田百畝以養父母妻子，五

口爲一家。井田之義：一曰無泄地氣，二曰無費一家，三曰同風俗，四曰合巧拙，五曰通貨財。因井田以爲市，故俗語曰「市井」。種穀不得種一穀，以備災害。田中不得有樹，以妨五穀。還廬舍，種桑荻雜菜，畜五母雞、兩母豕，瓜果種疆畔，女工蠶織，老者得衣帛焉，得食肉焉，死者得葬焉。多於五口名曰餘夫，以率受田二十五畝。十井共出兵車一乘。司空謹別田之高下善惡，分爲三品：上田一歲一墾，中田二歲一墾，下田三歲一墾。肥饒不得獨樂，墮墾不得獨苦，故三年一換土易居，財均力平，兵車素定，是謂均民力，彊國家。在田曰廬，在邑曰里。一里八十戶，八家共一巷。中里爲校室，選其耆老有高德者名曰父老，其有辯護伉健者爲里正，皆受倍田，得乘馬。父老比三老孝弟官屬，里

正比庶人在官之吏。民春夏出田，秋冬入保城郭。田作之時，春，父老及里正旦開門坐塾上，晏出後時者不得出，莫不持樵者不得入。五穀畢入，民皆居宅，里正趨緝績，男女同巷，相從夜績，至於夜中。故女功一月得四十五日作，從十月盡正月止。男女有所怨恨，相從而歌。饑者歌其食，勞者歌其事。男年六十，女年五十，無子者，官衣食之，使之民間求詩，鄉移於邑，邑移於國，國以聞於天子。故王者不出牖戶，盡知天下所苦，不下堂而知四方。十月事訖，父老教於校室。八歲者學小學，十五者學大學。其有秀者移於鄉學，鄉學之秀者移於庠序，庠序之秀者移於國學。學於小學，諸侯歲貢小學之秀者於天子。學於大學，其有秀者命曰造士。行同而能偶，別之以射，然後爵之。士以才能

進取，君以考功授官。三年耕，餘一年之蓄；九年耕，餘三年之積；三十年耕，有十年之儲。雖遇唐堯之水、殷湯之旱，民無近憂。四海之內莫不樂其業，故曰頌聲作矣。」養，去聲。荻，音狄。衣，乘，並去聲。別，彼列反。墾，康很反。樂，音洛。境，苦交反。塉，克角反。校，胡教反。莫，音暮。趨，音促。食，音嗣。○宣公十五年《公羊傳》。○齊桓公親逆管仲于郊，與之坐而問焉，管仲對曰：「昔者聖王之治天下也，參其國而伍其鄙，參，三也。國，郊以內也。伍，五也。鄙，郊以外也。謂三分國都以爲三軍，五分其鄙以爲五屬。聖王，謂若湯、武也。定民之居，成民之事，謂使四民各居其職所也，若工就官府，農就田野，所以成其事也。陵爲之終，以爲葬地。而慎用其六柄焉。」柄，本也。六柄：生、殺、貧、富、貴、賤也。桓公曰：「成民之事若何？」管仲對曰：「四民者勿使雜處，四民，

謂士、農、工、商。雜處則其言嘵，其事易。」嘵，莫江反。○嘵，亂貌。易，變易也。公曰：「處士、農、工、商若何？」管子對曰：「昔聖王之處士也，使就閒燕；閒，音閑。○士，講學道藝者。閒燕，猶清淨也。處工，就官府；處商，就市井；處農，就田野。今夫士，群萃而州處，夫，音扶。○萃，集也。處，聚也。閒燕則父與父言義，子與子言孝，其事君者言敬，其幼者言悌。少而習焉，其心安焉，不見異物而遷焉。少，去聲。○物，事也。遷，移也。是故其父兄之教不肅而成，肅，疾也。其子弟之學不勞而能。夫是，故士之子恒爲士。今夫工，群萃而州處，審其四時，夫，音扶。恒，胡登反，下同。○言四時各有其宜也，謂死、生、凝、釋之時也。辨其功苦，辨，別也。功，牢也。苦，脆也。權節其用，權，平也，視其平沈之均也。節，節其大小輕重也。論比協材，論，擇也。比，比其善惡也。



協，和也。和其剛柔也。旦莫從事，施於四方，施其物用於四方也。以飭其子弟，飭，教也。相語以事，相示以巧，相陳以功。陳，亦示也。功，成功也。功善則有賞。少而習焉，其心安焉，不見異物而遷焉。是故其父兄之教不肅而成，其子弟之學不勞而能。夫是，故工之子恒爲工。今夫商，群萃而州處，察其四時，四時所用者，預資之也。而監其鄉之資，監，居陷反。○監，視也。資，財也。視其貴賤有無。以知其市之賈，負任擔荷，任，如深反。荷，下可反。○背曰負，肩曰擔。任，抱也。荷，揭也。服牛輶馬，輶，余招反。○服，謂牛服車也。輶，馬車也。《詩》云：「皖彼牽牛，不以服箱。」以周四方，周，徧也。以其所有，易其所無，市賤鬻貴，鬻，音育。○市，取也。鬻，賣也。旦莫從事於此，以飭其子弟，相語以利，相示以賴，賴，贏也。相陳以知賈。賈，音價。少而習焉，其心安

焉，不見異物而遷焉。是故其父兄之教不肅而成，其子弟之學不勞而能。夫是，故商之子恒爲商。今夫農，群萃而州處，察其四時，四時樹藝各有宜也。權節其用，耒耜枷芟，耜，音似。枷，音加。芟，師銜反。○權，平也。平節其器用小大倨句之宜也。枷，拂也。所以擊草也。芟，大鎌，所以芟草也。及寒，擊藁除田，藁，音杲。○寒，謂季冬大寒之時也。藁，枯草也。以待時耕。時耕，謂立春之後。及耕，深耕而疾耰之，以待時雨。耰，音憂。○疾，速也。耰，摩平也。時雨至，當種之也。時雨既至，挾其槍刈耨耨，槍，千羊反。耨，奴遭反。耨，音博。○在掖曰挾。槍，槍也。刈，鎌也。耨，鎡鉞也。耨，鉏也。以旦暮從事於田野。脫衣就功，首戴茅蒲，身衣襍襌，襌，芳木反。襌，音適。○脫，解也。茅蒲，簦笠也。襍襌，蓑蓆衣也。茅，或作萌，竹萌之皮，所以爲笠也。霑體塗足，霑，濡也。暴其髮膚，盡其四

支之敏，敏，猶材也。以從事於田野。少而習焉，其心安焉，不見異物而遷焉。是故其父兄之教不肅而成，其子弟之學不勞而能。夫是，故農之子恒爲農，野處而不暱。暱，近也。其秀民之能爲士者，必足賴也。秀民，民之秀出者也。賴，恃也。有司見而不以告其罪五。有司，掌民之官也。罪在五刑也。有司已於事而竣。」竣，且句反。○已，畢也。竣，退伏也。桓公曰：「定民之居若何？」管子對曰：「制國以爲二十一鄉。」唐尚書云：四民之所居也。昭謂：國、國都城郭之域也，惟士、工、商而已，農不在焉。桓公曰：「善！」管子於是制國以爲二十一鄉：二千家爲一鄉。二十一鄉，凡四萬二千家。此管仲所制，非周法也。工商之鄉六，工、商各三也，二者不從戎役也。士鄉十五，唐尚書云：士與農共十五鄉。昭謂：此士，軍士也。十五鄉合三萬人，是爲三軍。農，野處而不暱，不在都邑之數，則

下所云五鄙是也。公帥五鄉焉，五鄉萬人，是謂中軍，公所帥也。國子帥五鄉焉，高子帥五鄉焉。國子，高子，皆齊上卿，各帥五鄉，爲左、右軍也。參國起按，以爲三官，參，三也。按，界也。分國事以爲三也。臣立三宰，三宰，三卿也。使掌群臣也。工立三族，族，屬也。晉趙盾爲旄車之族。上言工商之鄉六，則各三也。市立三鄉，市，商也。商處市井，故曰市。澤立三虞，《周禮》有澤虞之官。虞，度也，掌度知川澤之大小及所生育者。山立三衡。《周禮》有山虞、林衡之官。衡，平也，掌平其政也。桓公曰：「伍鄙若何？」管子上言「參其國而伍其鄙」，內政既備，故復問伍鄙之事。管子對曰：「制鄙：三十家爲邑，邑有司；制野鄙之政也。此以下與郊內之制異也。十邑爲卒，卒有卒帥；十卒爲鄉，鄉有鄉帥；三鄉爲縣，縣有縣帥；十縣爲屬，屬有大夫。五屬，故立五大夫，各使治一屬焉；帥，所類反。○

五屬，四十五萬家也。立五正，正，長也。各使聽一屬焉。是故正之政聽屬，正，五正也。聽大夫之治也。牧政聽縣，牧，五屬大夫也。聽縣帥之治。下政聽鄉。」下政，縣帥也。聽鄉帥之治也。桓公曰：「各保治爾所，無或淫怠而不聽治者！」《齊語》。○楚蔦掩爲司馬，子木使庀賦，庀，匹婢反。○庀，治。數甲兵。數，色主反。○閱數之。蔦掩書土田，書土地之所宜。度山林，度，徒洛反。○度量山林之材，以共國用。鳩藪澤，藪，素口反。○鳩，聚也。聚成藪澤，使民不得焚燎之，欲以備田獵之處。辨京陵，辨，別也。絕高曰京。大阜曰陵。別之以爲冢墓之地。表淳鹵，鹵，音魯。○淳鹵，塉薄之地。表異，輕其賦稅。數疆潦，數，色主反。潦，音老。○疆界有流潦者，計數減其租入。規偃豬，偃，於建反。○偃豬，下濕之地。規度其受水多少。町原防，町，徒鼎反。○廣平曰原。防，隄也。隄防閒地，不得方正如井田，別爲小頃

町。牧隰臯，隰臯，水涯下濕，爲芻牧之地。井衍沃，衍，以善反。○衍沃，平美之地。則如周禮，制以爲井田。六尺爲步，步百爲畝，畝百爲夫，九夫爲井。量入脩賦，量九土之所入，而治理其賦稅。賦車籍馬，籍，疏其毛色歲齒，以備軍用。賦車兵，車兵，甲士。徒卒，步卒。甲楯之數。楯，食準反。○使器械有常數。既成，以授子木，禮也。襄二十五年《左氏傳》。

儀禮集傳集註卷第二十九終

## 儀禮集傳集註卷第三十

王制之丙 王禮

王朝禮七

天子者，與天地參，故德配天地，兼利萬物，與日月並明，明照四海而不遺微小。其在朝廷則道仁聖禮義之序，恐當作「言」。燕處則聽《雅》、《頌》之音，行步則有環佩之聲，升車則有鸞和之音。居處有禮，進退有度，百官得其宜，萬事得其序。《詩》云：「淑人君子，其儀不忒，正是四國。」此之謂也。參，七南反。朝，直遙反。忒，吐得反。○道，猶言也。環佩，佩環、佩玉也，所以爲行節也。《玉藻》曰：「進則揖之，退則揚之，然後玉鏘鳴也。」環，取其無窮止，玉則比德焉。孔子佩象環五寸，人君之環，其制未聞也。鸞、和，皆鈴也，所以爲

車行節也。《韓詩內傳》曰：「鸞在衡，和在式。故升車則馬動，馬動則鸞鳴，鸞鳴則和應。」居處，朝廷與燕也。進退，行步與升車也。發號出令而民說，謂之和；上下相親，謂之仁；民不求其所欲而得之，謂之信；除去天地之害，謂之義。義與信，和與仁，帝王之器也。有治民之意，而無其器，則不成。說，音悅。○器，謂所操以作事者也。義、信、和、仁，皆存乎禮。○《經解》。○是以天子之禮有五門：曰臯門，曰雉門，曰庫門，曰應門，曰路門。三朝：曰外朝，曰治朝，曰內朝。應，應對之應。朝，直遙反。○鄭司農云：王有五門：外曰臯門，二曰雉門，三曰庫門，四曰應門，五曰路門。路門，一曰畢門。外朝在路門外，內朝在路門內。左九棘，右九棘，左嘉石，右肺石。《明堂位》說魯公宮曰：「庫門，天子臯門。雉門，天子應門。」言魯用天子之禮，所名曰庫門者，如天子臯門，所名曰雉門者，如天子應門。此名制二兼四，則魯無臯門、應門矣。《檀弓》曰：「魯莊公之喪，既葬而經不入庫門。」言其除喪而反，由外來，是庫門在雉門外

必矣。如是，王五門，雉門爲中門，雉門設兩觀，與今之宮門同。閭人幾出入者，窮民蓋不得入也。《郊特牲》譏繹於庫門內，言遠，當於廟門。廟在庫門之內，見於此矣。《小宗伯》職曰：「建國之神位，右社稷，左宗廟。」然則外朝在庫門之外，臬門之內與？今司徒府有天子以下大會殿，亦古之外朝哉！周天子，諸侯皆有二朝，外朝一，內朝二。內朝之在路門內者，或謂之燕朝。○《秋官·朝士》注。○《朝士》：掌外朝之法：左九棘，孤卿大夫位焉，群士在其後。右九棘，公侯伯子男位焉，群吏在其後。面三槐，三公位焉，州長衆庶在其後。左嘉石，平罷民焉。右肺石，達窮民焉。朝，直遙反。長，丁丈反。罷，音疲。○樹棘以爲位者，取其赤心而外刺，象以赤心三刺也。槐之言懷也，懷來人於此，欲與之謀。群吏，謂府史也。州長，鄉遂之官。帥其屬而以鞭呼趨且辟，辟，匹亦反。○趨朝辟行人，執鞭以威之。禁慢朝、錯立、族談者。慢朝，謂臨朝不肅敬也。錯立族談，違其位傳語也。○傳，子損反。《小司寇》：掌外朝之政，以致萬民而

詢焉：一曰詢國危，二曰詢國遷，三曰詢立君。朝，直遙反。○外朝，朝在雉門之外者也。國危，謂有兵寇之難。國遷，謂徙都改邑也。立君，謂無冢適，選於庶也。鄭司農云：致萬民，聚萬民也。詢，謀也。《詩》曰：「詢于芻蕘。」《書》曰：「謀及庶人。」其位：王南鄉，三公及州長百姓北面，群臣西面，群吏東面。鄉，音向。長，丁丈反。○群臣，卿、大夫、士也。群吏，府史也。其孤不見者，孤從群臣，鄉大夫在公後。小司寇擯以敘進而問焉，以衆輔志而弊謀。擯，必刃反。○擯，謂揖之使前也。敘，更也。輔志者，尊王賢明也。《司士》：掌治朝之法，正其朝儀之位，辨其貴賤之等：王南鄉，三公北面東上；孤東面北上；卿大夫西面北上；王族故士、虎士在路門之右，南面東上；大僕、大右、大僕從者在路門之左，南面西上。朝，直遙反。鄉，音嚮。大僕、大右之大，音泰。從，才用反。○此王日視朝事於路門外之位。王族故士，故爲士，晚退留宿衛者。未嘗

仕，雖同族不得在王宮。大右，司右也。大僕從者，小臣、祭僕、御僕、隸僕。司士擯，詔王出揖公卿大夫以下朝者。

孤卿特揖，大夫以其等旅揖，士旁三揖，

王還揖門左，揖門右。特揖，一一揖之。旅，衆也。

大夫爵同者，衆揖之。公及孤卿大夫始入門右，皆北面東上。王揖之乃就位。群士及故士大僕之屬，發在其位。群

士位東面，王西南鄉而揖之。三揖者，士有上中下，王揖之，皆遂遁，既，復位。鄭司農云：卿、大夫、士皆君之所

揖，《禮》、《春秋傳》所謂「三揖在下」。大僕前，大，音

泰。○前正王視朝之位。王入，內朝皆退。朝，直遙

反。○王入，入路門也。王入路門，內朝朝者皆退，反其官

府治處也。王之外朝，則朝士掌焉。《玉藻》曰：「朝服以

日視朝於內朝，朝，辨色始入。君日出而視之，退適路寢聽

政，使人視大夫，大夫退，然後適小寢。」謂諸侯也。王日視

朝皮弁服，其禮則同。○王眡燕朝，則大僕正位，

掌擯相。眡，音視。相，去聲。○燕朝，朝於路寢之庭。

王圖宗人之嘉事，則燕朝。○《國語》：「合神事于內朝。」

○《記》：「公族朝于內朝。」○《大僕》。○王六寢，后

六宮。陳祥道曰：王大寢一，小寢五。大寢，聽政嚮明而

治也，故在前。小寢，釋服燕息也，故在後。先儒謂王小寢

五，而一寢在中，四寢於四角。春居東北，夏居東南，秋居

西南，冬居西北。土王之月，居中。后之六宮，亦正宮在

前，五宮在後，其制如王之五寢。①○《小宰》之職：

掌建邦之宮刑，以治王宮之政令，凡宮之糾

禁。杜子春云：宮，皆當爲「官」。玄謂：宮刑，在王宮中

者之刑。建，明布告之。糾，猶割也，察也，若今御史中丞。

正歲，以宮刑憲禁于王宮。憲，謂表縣之，若今新

有法令云。《士師》：掌宮禁。《宰夫》：正歲，

以法警戒群吏，令修宮中之職事。警，勅戒之

言。《宮正》：掌王宮之戒令糾禁，糾，猶割也，察

也。以時比宮中之官府次舍之衆寡。比，毗志

反。○官府之在宮中者，若膳夫、玉府、內宰、內史之屬。

次，諸吏直宿，若今部署諸廬者。舍，其所居寺。辨外內

而時禁。鄭司農云：分別外人、內人，禁其非時出入。

①「寢」下，賀本有「○官人內宰」。

稽其功緒，糾其德行。行，下孟反。○稽，猶考也，計也。功，吏職也。緒其志業。幾其出入，均其稍食。稍，所教反。○鄭司農云：幾其出入，若今時宮中有罪，禁止不得出，亦不得入，及無引籍不得入宮司馬殿門也。玄謂：幾荷其衣服持操及疏數者。①稍食，祿稟。去其淫怠與其奇袤之民。去，起呂反。奇，音羈。袤，似嗟反。○民，宮中吏之家人也。淫，放濫也。怠，解慢也。奇袤，謫觚非常。會其什伍而教之道藝。五人爲伍，二伍爲什。會之者，使之輩作輩學相勸率，且寄宿衛之令。鄭司農云：道，謂先王所以教道民者。藝，謂禮、樂、射、御、書、數。《宮伯》：掌王宮之士庶子，凡在版者。鄭司農云：庶子，宿衛之官。版，名籍也，以版爲之，今時鄉戶籍謂之戶版。玄謂：王宮之士，謂王宮中諸吏之適子也。庶子，其支庶也。掌其政令，行其秩敘，作其徒役之事，秩，祿稟也。敘，才等也。作徒役之事，天子所用。授八次八舍之職事。鄭司農云：庶子，《夏官·諸子》「所領國子之倅而掌其教治」者也。國子之倅，謂公卿大夫士之子，是父之副貳。教治，謂使之修

德學道也。國有大事，則授之車甲，合其卒伍，以軍法治之。祭祀用樂，則大胥以鼓徵之而序其宮中之事。八次八舍，衛王宮者必居四角四中，於徵候便也。次，其宿衛所在。舍，其休沐之處。《諸子》：國有大事，則帥國子而致於天子，唯所用之。若有兵甲之事，則授之車甲，合其卒伍，置其有司以軍法治之，司馬弗正。天子之大，音泰。正，音征。○軍法：百人爲卒，五人爲伍。弗，不也。國子屬天子，司馬雖有軍事，不賦之。凡國之政事，國子存遊倅，使之修德學道，春合諸學，秋合諸射，以考其藝而進退之。倅，七內反。○遊倅，倅之未仕者。學，大學也。射，射宮也。《王制》曰：「春，秋教以《禮》，《樂》，冬，夏教以《詩》，《書》，王太子、王子、群后之太子、卿大夫元士之適子、國之俊選皆造焉。」《虎賁氏》：掌虎士八百人，以先後王而趨以卒伍。賁，音奔。○王出，將虎賁士居前，雖群行亦有局分。○將，子匠反。

①「荷」，元明本、寬文本、賀本作「呵」。

舍則守王閑。舍，王出所止宿處。閑，柅柅。王在國則守王宮。爲周衛。國有大故，則守王門。《旅賁氏》：夾王車而趨。賁，音奔。《閭人》：掌守王宮之中門之禁。閭，音昏。○中門，於外內爲中，若今宮闕門。鄭司農云：王有五門：外曰臬門，二曰雉門，三曰庫門，四曰應門，五曰路門。路門，一曰畢門。玄謂：雉門，三門也。《春秋傳》曰：「雉門災，及兩觀。」喪服凶器不入宮，潛服賊器不入宮，奇服怪民不入宮。喪服，衰經也。凶器，明器也。潛服，若衷甲者。賊器，盜賊之任器。兵物皆有刻識。奇服，衣非常。《春秋傳》曰「龍奇無常」，怪民狂易。《司隸》：掌罪隸、蠻隸、閩隸、貉隸、夷隸各百有二十人，使各服其邦之服，執其邦之兵，以守王宮與野舍之屬禁。閩，亡巾反。貉，孟百反。《師氏》：亦使其屬帥四翟之隸，各以其服守王門。《保氏》：使其屬守王闔。○《膳夫》：掌王之食飲膳羞。凡王之饋，食用六穀，膳用六牲，

飲用六清，羞用百有二十品，珍用八物，醬用百有二十甕。甕，屋貢反。○進物於尊者曰饋。此饋之盛者，王舉之饌也。六牲：馬、牛、羊、豕、犬、雞也。羞，出於牲及禽獸，以備滋味，謂之庶羞。《公食大夫禮》：《內則》下大夫十六，上大夫二十，其物數備焉。天子，諸侯有其數，而物未得盡聞。珍，謂淳熬、淳母、炮豚、炮牂、擣珍、漬熬、肝腎也。醬，謂醢醢也。王舉，則醢人共醢六十甕，以五醢、七醢、七菹、三醢實之，醢人共醢菹醢物六十甕。鄭司農云：羞，進也。六穀：稌、黍、稷、粱、麥、苽。苽，彫胡也。六清：水、漿、醴、醕、醫、醕。王日一舉，鼎十有二物，皆有俎。殺牲盛饌曰舉。王日一舉，以朝食也，后與王同庖。鼎十有二，牢鼎九，陪鼎三。物，謂牢鼎之實，亦九俎。以樂侑食，膳夫授祭，品嘗食，王乃食。侑，猶勸也。祭，謂判肺脊也。禮，飲食必祭，示有所先。品者，每物皆嘗之，道尊者也。卒食，以樂徹于造。造，作也。鄭司農云：造，謂食之故所居處也。已

①「闔」下，元明本、寬文本、賀本有「周禮」二字。



食，徹置故處。王齊日三舉。齊，側皆反。○鄭司農云：齊必變食。《酒正》：掌五齊：一曰泛齊，二曰醴齊，三曰盎齊，四曰緹齊，五曰沈齊。齊，才細反。盎，烏浪反。緹，音體。○泛者，成而滓浮泛泛然，如今宜成醪矣。醴，猶體也，成而汁滓相將，如今甜酒矣。盎，猶翁也，成而翁翁然葱白色，如今酈白矣。緹者，成而紅赤，如今下酒矣。沈者，成而滓沈，如今造清矣。自醴以上尤濁，縮酌者。盎以下差清，其象類則然。古之法式，未可盡聞。杜子春讀齊皆爲案。又云：《禮器》曰：「緹酒之用，玄酒之尚。」玄謂：齊者，每有祭祀，以度量節作之。三酒之物：一曰事酒，二曰昔酒，三曰清酒。鄭司農云：事酒，有事而飲者。昔酒，無事而飲也。清酒，祭祀之酒。玄謂：事酒，酌有事者之酒，其酒則今之醪酒也。昔酒，今之舊久白酒，所謂舊醖者也。清酒，今中山冬釀，接夏而成。四飲之物：一曰清，二曰醫，三曰漿，四曰醕。醫，於已反。醕，以支反。○清，謂醴之泔者。醫，《內則》所謂「或以醕爲醴」。凡醴濁，釀醕爲之，則少清矣。醫之字從「毌」從「酉」省也。漿，今

之釀漿也。醕，今之粥，《內則》有黍醕。醕，飲粥稀者之清也。鄭司農云：以《內則》曰：「飲，重醴、稻醴、黍醴、清醴、梁醴、清醴。或以醕爲醴。」漿，水，醕。后致飲于賓客之禮，有醫、醕、糟。糟，音聲與清相似。醫與醕亦相似，文字不同，記之者各異耳，此皆一物。○有太府以受其貨賄之人：關市之賦以待王之膳服，邦中之賦以待賓客，四郊之賦以待稍秣，家削之賦以待匪頒，邦甸之賦以待工事，邦縣之賦以待幣帛，邦都之賦以待祭祀，山澤之賦以待喪紀，幣餘之賦以待賜予。凡邦國之貢以待弔用，凡萬民之貢以充府庫，凡式貢之餘財以共玩好之用。①而金玉玩好，玉府掌之；良兵良器，內府掌之；王及后、世子之衣服之用，則外府掌之。大，音泰。稍，削，並所教反。頒，音班。予，音與。好，呼報反。○王之吉服：祀

①「餘」，原脫，據賀本補。

昊天上帝，則服大裘而冕，祀五帝亦如之；享先王則袞冕，享先公饗射則鷩冕，祀四望山川則毳冕，祭社稷五祀則希冕，祭群小祀則玄冕。凡兵事，韋弁服；眡朝，則皮弁服；凡甸，冠弁服；凡凶事，服弁服；凡弔事，弁絰服。鷩，必滅反。毳，昌銳反。希，本又作「絺」，陟里反。眡，音示。朝，直遙反。絰，徒結反。○註並見《器服篇》。○《司服》。○五路：一曰玉路，建大常以祀；金路，建大旂以賓，同姓以封；象路，建大赤以朝，異姓以封；革路，建大白以即戎，以封四衛；木路，建大麾以田，<sup>①</sup>以封蕃國。大常，音泰。朝，直遙反。○註見《器服篇》。○《巾車》。○宗祝在廟，三公在朝，三老在學。王前巫而後史，卜筮瞽侑皆在左右。王中心無爲也，以守至正。朝，直遙反。○此所以達禮於下也，教民尊神慎居處也。宗，宗人也。瞽，樂人也。侑，四輔也。○《禮運》。○天子出戶而巫覡有事，出

門而宗祝有事。覡，胡的反。○出戶，謂出內門也。女曰巫，男曰覡。有事，祓除不祥。出門，謂車駕出國門。宗者，主祭祀之官。有事，謂祭行神也。<sup>②</sup>○古者天子必有四鄰：前曰疑，後曰丞，左曰輔，右曰弼。天子有問無以對，責之疑；可志而不志，責之丞；可正而不正，責之輔；可揚而不揚，責之弼。其爵視卿，其祿視次國之君也。<sup>③</sup>○周公作《立政》以戒成王曰：「虎賁、綴衣、趣馬、小尹，賁，音奔。綴，丁衛反。趣，七口反。○趣馬，掌馬之官。言此三者，雖小官長，必慎擇其人。左右攜僕，百司庶府。雖左右攜、持器物之僕及百官有司、主券契藏吏，亦皆擇人。繼自今立政，其勿以儉人，其惟吉士，用勸相我國家。」勸，音適。相，息亮反。○立政之臣，惟以吉士勉治我國家。

①「建大麾」，原脫，據賀本補。

②「也」下，賀本有「○荀子正論」。

③「也」下，賀本有「尚書大傳」四字。

○《立政》。○昔成王與弟叔虞戲，削桐葉爲珪以與叔虞，曰：「以此封若。」史佚因請擇日立叔虞。成王曰：「吾與之戲耳。」史佚曰：「天子無戲言。言則史書之，禮成之，樂歌之。」於是遂封叔虞於唐。佚，音逸。<sup>①</sup> ○曾子問於夫子曰：「敢問從父之令，可謂孝乎？」子曰：「是何言與？是何言與？昔者天子有爭臣七人，雖無道，不失其天下。諸侯有爭臣五人，雖無道，不失其國。大夫有爭臣三人，雖無道，不失其家。士有爭友，則身不離於令名。父有爭子，則身不陷於不義。故當不義，則子不可以不爭於父，臣不可以不爭於君，故當不義則爭之。從父之令，又焉得爲孝乎？」與，音餘。爭，音爭。離，力智反。焉，於虔反。○《孝經》。○《冢宰》：以八柄詔王馭群臣：一曰爵，以馭其貴；二曰祿，以馭其富；三曰子，以馭其幸；四曰置，以馭其

行；五曰生，以馭其福；六曰奪，以馭其貧；七曰廢，以馭其罪；八曰誅，以馭其過。  
馭，音御。予，音與。行，下孟反。○柄，所秉執以起事者也。詔，告也，助也。爵，謂公、侯、伯、子、男、卿、大夫、士也。《詩》云「誨爾序爵」，言教王以賢否之第次也。班祿所以富臣下，《書》曰：「凡厥正人，既富方穀。」幸，謂言行偶合於善，則有以賜予之，以勸後也。生，猶養也。賢臣之老者，王有以養之。成王封伯禽於魯，曰「生以養周公，死以爲周公後」是也。五福，一曰壽。奪，謂臣有大罪，沒人家財者。六極，四曰貧。廢，猶放也，舜殛鯀于羽山是也。誅，責讓也，《曲禮》曰：「齒路馬有誅。」凡言馭者，所以驅之內之於善。以八統詔王馭萬民：一曰親親，二曰敬故，三曰進賢，四曰使能，五曰保庸，六曰尊貴，七曰達吏，八曰禮賓。統，所以合牽以等物也。親親，若堯親九族也。敬故，不慢舊也，晏平仲久而敬之。賢，有善行也。能，多才藝者。保庸，安有功者。尊貴，尊天下之貴者，《孟子》曰：「天下之達尊者：」

① 「唐」下，寬文本、賀本有「○史記」。

曰：爵也、德也、齒也。」《祭義》曰：「先王之所以治天下者五：貴有德，貴貴，貴老，敬長，慈幼。」達吏，察舉勤勞之小吏也。禮賓，賓客諸侯，所以示民親仁善鄰。○荀卿子曰：「人主者，天下之利勢也。得道以持之，則大安也，大榮也，積美之源也。不得其道以持之，則大危也，大累也，有之不如無之，及其綦也，求爲匹夫不可得也。」累，去聲。綦，渠宜反。○綦，謂窮極之時。<sup>①</sup>

儀禮集傳集註卷第三十終

① 「之時」，原作「而峻」，據賀本改。又句下，賀本有「○荀子」。

# 儀禮集傳集註卷第三十一

王制之丁王事

王朝禮八

《舜典》：歲二月，東巡守，至于岱宗，柴。守，詩救反，下同。○諸侯爲天子守土，故稱守。巡行之既班瑞之，明月乃順春東巡。岱宗，泰山，爲四岳所宗。燔柴祭天，告至。望秩于山川，東岳，諸侯境內名山大川，如其秩次望祭之，謂五岳牲禮視三公，四瀆視諸侯，其餘視伯、子、男。肆覲東后。遂見東方之國君。

協時月正日，同律度量衡。量，力尚反。○合四時之節氣，月之大小，日之甲乙，使齊一也。律法制及尺、丈、斛、斗、斤、兩，皆均同。修五禮、五玉、修吉、凶、賓、軍、嘉之禮，五等諸侯執其玉。三帛、二生、一死贊。贊，音至。○三帛：諸侯世子執纁，公之孤執玄，附庸之君

執黃。二生：卿執羔，大夫執鴈。一死：士執雉。玉、帛、生、死，所以爲贊以見之。如五器，卒乃復。卒，終復還也。器，謂圭璧。如五器，禮終則還之，三帛、生、死則否。五月，南巡守，至于南岳，如岱禮。南岳，衡山，自東岳南巡，五月至。八月，西巡守，至于西岳，如初。西岳，華山。初，謂岱宗。十有一月，朔巡守，至于北岳，如西禮。北岳，恒山。歸，格于藝祖，用特。巡守四岳，然後歸告至文祖之廟。藝文也。言祖，則考著。特，一牛。五載一巡守，群后四朝。朝，直遙反。○各會朝于方岳之下，凡四處，故曰四朝。將說敷奏之事，故申言之。堯、舜同道，舜攝則堯又可知。敷奏以言，明試以功，車服以庸。敷，陳。奏，進也。諸侯四朝，各使陳進治理之言。明試其言，以要其功，功成則賜車服，以表顯其能用。○《王制》：諸侯之於天子也，比年一小聘，三年一大聘，五年一朝。比，毗志反。朝，直遙反。○比年，每歲也。小聘使大夫，大聘使卿，朝則君自行。然此大聘

與朝，晉文霸時所制也。虞夏之制，諸侯歲朝。周之制，侯、甸、男、采、衛、要服六者，各以其服數來朝。天子巡守，問百年者就見之。守，詩救反。○就見老人。命大師陳詩，以觀民風，大，音泰。○陳詩，謂采其詩而視之。命市納賈，以觀民之所好惡，志淫好辟。賈，音嫁。好，惡，並去聲。辟，音僻。○市，典市者。賈，謂物貴賤厚薄也。質則用物貴，淫則侈物貴。民之志淫邪，則其所好者不正。命典禮，考時月，定日，同律、禮、樂、制、度、衣、服，正之。同陰律也。山川神祇，有不舉者爲不敬，不敬者君削以地；舉，猶祭也。宗廟，有不順者爲不孝，不孝者君紕以爵。紕，丑律反。○不順者，謂若逆昭穆。變禮易樂者爲不從，不從者君流；流，放也。革制度衣服者爲畔，畔者君討。討，誅也。有功德於民者，加地進律。律，法也。歸假于祖禰，用特。假，音格。禰，乃禮反。○假，至也。特，特牛也。祖下及禰，皆一牛。天子將出，類乎上帝，

宜乎社，造乎禰。諸侯將出，宜乎社，造乎禰。造，七報反。○帝謂五德之帝，所祭於南郊者。類，宜，造，皆祭名，其禮亡。天子無事與諸侯相見，曰朝。朝，直遙反。○事，謂征伐。考禮、正刑、一德，以尊于天子。○周制：六年五服一朝。朝，直遙反，下同。○五服，侯、甸、男、采、衛。六年一朝，會京師。又六年，王乃時巡，考制度于四岳。周制十二年一巡守，春東，夏南，秋西，冬北，故曰時巡。考正制度禮法于四岳之下，如虞帝巡守然。諸侯各朝于方岳，大明黜陟。觀四方諸侯各朝于方岳之下，大明考績黜陟之法。○《周官》。○《大行人》：王之所以撫邦國諸侯者，歲徧存，三歲徧覲，五歲徧省，七歲徧象胥，諭言語，協辭命，九歲徧瞽史，諭書名，聽聲音，十有一歲達瑞節，同度量，成牢禮，同數器，修法則，十有二歲，王巡守殷國。徧，音遍。覲，通弔反。省，悉井反。屬，音燭。量，音亮。守，詩救反。○撫，猶安也。存，覲，

省者，王使臣於諸侯之禮，所謂閒問也。歲者，巡守之明歲以爲始也。屬，猶聚也。自五歲之後，遂閒歲徧省也。七歲省而召其象胥，九歲省而召其瞽史，皆聚於天子之宮教習之也。故書「協辭命」作「叶詞命」。鄭司農云：「象胥，譯官也。」叶「當爲「汁」，「詞」當爲「辭」，書或爲「叶辭命」。玄謂：胥讀爲語。《王制》曰：「五方之民言語不通，嗜慾不同。達其志，通其慾，東方曰寄，南方曰象，西方曰狄鞮，北方曰譯。」此官正爲象者，周始有越重譯而來獻，是因通言語之官爲象胥云。謂，謂象之有才知者也。辭命，六辭之命也。瞽，樂師也。史，大史、小史也。書名，書之字也，古曰名，《聘禮》曰：「百名以上。」至十一歲又徧省焉。度，丈、尺也。量，豆、區、釜也。數器，銓衡也。法，八法也。則，八則也。達、同、成、修，皆謂齋其法式，行至則齊等之也。成，平也，平其僭踰者也。王巡守，諸侯會者，各以其時之方，《書》曰遂「覲東后」是也。其殷國，則四方四時分來如平時。時聘以結諸侯之好，殷覲以除邦國之慝。好，去聲。慝，吐得反。○此二事者，亦以王見諸侯之臣使來者爲文也。時聘者，亦無常期。天子有事，諸侯使大夫來聘，以禮見之，禮而遣之，所以結其恩好也。天

子無事則已。殷覲，謂一服朝之歲也。慝，猶惡也。一服朝之歲，五服諸侯皆使卿以聘禮來覲天子，天子以禮見之，命以政禁之事，所以除其惡行也。閒問以諭諸侯之志，歸賑以交諸侯之福，賀慶以贊諸侯之喜，致餼以補諸侯之裁。閒，閒厠之間。賑，上忍反。餼，音會。○此四者，王使臣於諸侯之禮也。「閒問」者，閒歲一問諸侯，謂存省之屬。「諭諸侯之志」者，諭言語，諭書名，其類也。交，或往或來者也。贊，助也。「致餼」，凶禮之弔禮餼禮也。補諸侯灾者，若《春秋》「澶淵之會」、「謀歸宋財」。○《小行人》：「達六節，出國用虎節，土國用人節，澤國用龍節，皆以金爲之；道路用旌節，門關用符節，都鄙用管節，皆以竹爲之。」此謂邦國之節也。達之者，使之四方，亦皆齋法式以齊等之也。諸侯使臣行覲聘，則以金節授之，以爲行道之信也。虎、人、龍者，自其國象也。道路，謂鄉、遂大夫也。都鄙者，公之子弟及卿大夫之采地之吏也。凡邦國之民遠出至他邦，他邦之民若來入，由國門者，門人爲之節；由關者，關人爲之節。其以徵令及家徙，鄉遂大夫及采地

吏爲之節。皆使人執節將之以達之，亦有期以反節。管節，如今之竹使符也。其有商者，通之以符節，如門關。門關者與市聯事，節可同也，亦所以異於畿內也。凡節，有天子法式存於國。若國札喪，則令賻補之；若國凶荒，則令賙委之；若國師役，則令槁檜之；若國有福事，則令慶賀之；若國有禍裁，則令哀弔之。凡此五物者，治其事故。賻，音附。槁，苦報反。檜，音會。○故書「賻」作「傳」，「槁」爲「稟」。鄭司農云：賻補之，謂賻喪家，補助其不足也。若今時一室二尸，則官與之棺也。稟，當爲「槁」，謂槁師也。玄謂：師役者，國有兵寇以匱病者也，使隣國合會財貨以與之，《春秋》定五年夏「歸粟於蔡」是也。《宗伯》職曰：「以檜禮哀圍敗」。禍裁，水火。及其萬民之利害爲一書，其禮俗、政事、教治、刑禁之逆順爲一書，其悖逆、暴亂、作慝猶犯令者爲一書，其札喪、凶荒、厄貧爲一書，其康樂、和親、安平爲一書。凡此五物者，每國辨異之，以反命于王，以周知天下之故。悖，必內反。

懸，吐得反。札，側八反。厄，烏隔反。樂，音洛。○懸，惡也。猶，圖也。○《司儀》：將合諸侯，則令爲壇

三成，宮，旁一門。合諸侯，謂有事而會也，爲壇于國外以命事。宮，謂壝土以爲牆處，所謂爲壇壝宮也。天子春帥諸侯拜日於東郊，則爲壇於國東；夏禮日於南郊，則爲壇於國南；秋禮山川丘陵於西郊，則爲壇於國西；冬禮月四瀆於北郊，則爲壇於國北。既拜禮而還，加方明於壇上而祀焉，所以教尊尊也，《覲禮》曰：「諸侯覲於天子，爲宮方三百步，四門，壇十有二尋，深四尺」是也。王巡守，殷國而同，則其爲宮亦如此與？鄭司農云：三成，三重也。《爾雅》曰：「丘一成爲敦丘，再成爲陶丘，三成爲昆侖丘。」謂三重。詔王儀南鄉見諸侯，土揖庶姓，時揖異姓，天揖同姓。鄉，音嚮。○謂王既祀方明，諸侯上介皆奉其君之旂置于宮，乃詔王升壇，諸侯皆就其旂而立。諸公中階之前，北面東上。諸侯東階之東，西面北上。諸伯西階之西，東面北上。諸子門東，北面東上。諸男門西，北面東上。王揖之者，定其位也。庶姓，無親者也。土

①「祀」，原作「禮」，據寬文本、賀本改。



揖，推手小下之也。異姓，昏姻也。時揖，平推手也。《衛將軍文子》曰：「獨居思仁，公言言義，其聞《詩》也，一日三復白圭之玷，是南宮縚之行也。夫子信其仁，以為異姓。」謂妻之也。天揖，推手小舉之。及其擯之，各以其禮：公於上等，侯、伯於中等，子、男於下等。擯，必刃反。○謂執玉而前見於王也。擯之各以其禮者，謂擯公者五人，侯、伯四人，子、男三人也。上等、中等、下等者，謂所奠玉處也。壇三成，深四尺，則一等一尺也。壇一十有二尋，方九十六尺，則堂上二丈四尺，每等丈二尺與？諸侯各于其等奠玉，降拜，升成拜，明臣禮也。既，乃升堂授王玉。其將幣亦如之。將幣，享也，皆於其等之上。○《掌客》：王合諸侯而饗禮，則具十有二牢，庶具百物備，諸侯長十有再獻。長，丁丈反。○饗諸侯而用王禮之數者，以公侯伯子男盡在，是兼饗之，莫敵用也。諸侯長，九命作伯者也。獻，公、侯以下如其命數。王巡守殷國，則國君膳以牲犢，令百官百姓皆具。從者，三公眡上公之禮，卿眡侯、伯之禮，大夫眡子、男之禮，士眡

諸侯之卿禮，庶子壹眡其大夫之禮。守，詩救反。從，才用反。眡，音示。○國君者，王所過之國君。犢，繭栗之犢也。以膳天子，貴誠也。牲孕，天子不食也。祭帝，不用也。凡賓客則皆角尺。令者，掌客令主國也，百姓皆具，言無有不具備。○《職方氏》：王將巡守，則戒于四方，曰：「各修平乃守，考乃職事，無敢不敬戒，國有大刑。」守，詩救反。○乃，猶女也。守，謂國境之內。職事，所當共具。及王之所行，先道，帥其屬而巡戒令。先道，先由王所從道居前，行其前日所戒之令。王殷國亦如之。殷，猶衆也。十二歲王若不巡守，則六服盡朝。謂之殷國。其戒四方諸侯與巡守同。○《士訓》、《誦訓》：王巡守，則夾王車。《土方氏》：樹王舍。為之藩羅。○天子適諸侯曰巡狩。巡狩者，巡所守也。諸侯朝于天子曰述職。述職者，述所職也。無非事者，春省耕而補不足，秋省斂而助不給。夏諺曰：「吾王不遊，吾何以休？吾王

不豫，吾何以助？一遊一豫，爲諸侯度。」  
狩，舒救反。省，悉并反。○述，陳也。省，視也。斂，收獲也。給，亦足也。夏諺，夏時之俗語也。豫，樂也。巡所守，巡行諸侯所守之土也。述所職，陳其所受之職也。皆無有無事而空行者，而又春秋循行郊野，察民之所不足而補助之。故夏諺以爲王者一遊一豫，皆有恩惠以及民，而諸侯皆取法焉，不敢無事慢遊以病其民也。○《梁惠王》下。入其疆，土地辟，田野治，養老尊賢，俊傑在位，則有慶，慶以地。入其疆，土地荒蕪，遺老失賢，培克在位，則有讓。一不朝，則貶其爵；再不朝，則削其地；三不朝，則六師移之。辟，音闕。培，蒲侯反。朝，直遙反。○慶，賞也，益其地以賞之也。培克，聚斂也。讓，責也。移之者，誅其人而變置之也。自入其疆至則有責，言巡狩之事。自一不朝至六師移之，言述職之事。○《告子》下。○《神農之法》曰：丈夫丁壯而不耕，天下有受其饑者；婦人當年而不織，天下有受其寒者。故身自耕，妻親織，以爲天下先。○昔

者天子爲藉千畝，冕而朱紘，躬秉耒。諸侯爲藉百畝，冕而青紘，躬秉耒。以事天地山川、社稷先古，以爲醴酪齊盛於是乎取之，敬之至也。紘，音宏。醴，音洛。齊，音資。盛，音成。○藉，藉田也。先古，先祖。○《祭義》。○《內宰》：中春，詔后帥外內命婦，始蠶于北郊，以爲祭服。中，音仲。○蠶于北郊，婦人以純陰爲尊，郊必有公桑蠶室焉。歲終，則會內人之稍食，稽其功事。會，古外反。稍，所教反。○內人，主謂九御。佐后而受獻功者，比其小大與其麤良而賞罰之。比，毗志反。○獻功者，九御之屬。鄭司農云：烝而獻功。玄謂：《典婦功》曰：「及秋獻功。」上春，詔王后帥六宮之人而生種稑之種，而獻之于王。種，直龍反。稑，音六。○六宮之人，夫人以下分居后之六宮者。古者使后宮藏種，以其有傳類蕃孳之祥，必生而獻之，示能育之，使不傷敗，且以佐王耕事共禘郊也。鄭司農云：先種後熟謂之種，後種前熟謂之稑。王當以耕種于藉田。玄

謂：《詩》云「黍稷種稷」是也。夫人以下分居后之六宮者，每宮九嬪一人，世婦三人，女御九人，其餘九嬪三人，世婦九人，女御二十七人，從后唯其所燕息焉。從后者，五日而沐浴，其次又上，十五日而徧云。夫人如三公，從容論婦禮。○民之大事在農，穀，民之本，故農爲大事也。上帝之粢盛於是乎出，粢，子私反。盛，音成。○出於農也。器實曰粢，在器曰盛。民之蕃庶於是乎生，蕃，息也。庶，衆也。事之供給於是乎在，供，具也。給，足也。和協輯睦於是乎興，協，和也。輯，聚也。睦，親也。財用蕃殖於是乎始，殖，長也。敦龐純固於是乎成，龐，莫江反。○敦，厚也。龐，大也。是故稷爲大官。民之大事在農，故稷之職爲大官也。古者太史順時視視，音脈。土，陽瘡，瘡，丁佐反。憤盈，土氣震發，視，視也。瘡，厚也。憤，積也。盈，滿也。震，動也。發，越也。農祥晨正，農祥，房星也。晨正，謂立春之日，晨中於午也。農事之候，故曰農祥也。日月底于天廟，底，至也。天廟，營

室也。孟春之月，日月皆在營室也。土乃脈發。脈，理也。《農書》曰：「春土冒橛，陳根可拔，耕者急發。」先時九日，先，先立春日也。太史告稷曰：「自今至于初吉，初吉，二月朔日也，《詩》云：『二月初吉。』陽氣俱蒸，土膏其動。蒸，升也。膏，潤也。其動，潤澤欲行也。弗震弗渝，脈其滿胥，穀乃不殖。」震，動也。渝，變也。胥，灾也。言陽氣俱升，土膏欲動，當即發動變寫其氣。不然，則脈滿氣結，①更爲灾疫，穀乃不殖也。稷以告，以太史之言告王。王曰：「史帥陽官以命我司事。」史，太史。陽官，春官。司事，主農事官也。曰：「距今九日，土其俱動，距，去也。王其祗拔，監農不易。」拔，音弗。○祗，敬也。拔，齊戒，拔除也。不易，不易物土之宜也。王乃使司徒咸戒公卿、百吏、庶民，百吏，百官。庶民，甸師氏所掌之民也，主耕耨王之藉田者。司空除壇于藉，司

①「滿」，原作「萌」，據寬文本、賀本改。

空，掌地也。命農大夫咸戒農用。農大夫，田畯也。

農用，田器也。先時五日，先耕時也。瞽告有協風

至，瞽，樂大師，知風聲者也。協，和也，風氣和、時候至

也。立春曰融風也。王即齊宮，齊，側皆反。○所齊之

宮也。百官御事，各即其齊三日。御，治也。王

乃淳，淳，之純反。濯饗醴，淳，沃也。濯，溉也。饗，

飲也。謂王沐浴飲醴酒也。及期，期，耕日也。鬱人

薦鬯，鬯，音暢。○鬱，鬱金香草，宜以和鬯酒也。《周

禮·鬱人》：「掌裸器，凡祭祀賓客，和鬱鬯以實彝而陳

之。」共王之齊鬯也。犧人薦醴，犧人司樽，掌共酒醴。

王裸鬯，饗醴乃行，裸，灌也。灌鬯，飲醴，皆所以自

香潔也。百吏、庶民畢從。及藉，后稷監之，

監，察也。膳夫、農正陳藉禮，膳夫，上士也。掌王

之飲食膳羞之饋食。農正，田大夫也，主敷陳藉禮而祭其

神，爲農祈也。大史贊王，贊，導也。王敬從之。

王耕一墾，鉞，伐二音。班三之，班，次也。王耕一

墾，一耜之發也。耜廣五寸，二耜爲耦，一耦之發，廣尺深

尺。三之，下各三其上也。王一墾，公三，卿九，大夫二十

七也。庶民終于千畝。終，盡耕之也。其后稷省

省，息井切。功，太史監之；司徒省民，大師監

之；畢，宰夫陳饗，膳宰監之。宰夫，下大夫。膳

宰，膳夫也。膳夫贊王，王歆大牢，歆，饗也。班

嘗之，公、卿、大夫也。庶人終食。終，畢也。是日

也，瞽帥、音官以省風土。音官，樂官。風土，以音

律省土風，風氣和則土氣養也。廩于藉東南，鍾而

藏之，廩，御廩也，一名神倉。東南，生長之處。鍾，聚

也。謂爲廩以藏王所藉田，以奉粢盛也。而時布之于

農。布，賦也。稷則徧誡百姓，紀農協功，紀，謂

綜理也。協，同也。曰：「陰陽分布，震雷出滯。」

陰陽分布，日夜同也。滯，蟄蟲也。《明堂月令》曰：「日夜

分，雷乃發聲，始震電，蟄蟲咸動，啟戶而出也。」土不備

壅，辟在司寇。壅，發也。辟，罪也。在司寇，司寇行

其事也。乃命其旅曰：「徇，旅，衆也。徇，行也。

農師一之，一之，先往也。農師，上士也。農正再

之，農正，后稷之佐，田峻也，故次農師。后稷三之，農官之君也，故次農正。司空四之，司空主道路溝洫，故次后稷也。司徒五之，司徒省民，故次司空也。大保六之，大師七之，大保，大師，天子三公，佐王論道，汎監衆官，不特掌事，故次司徒也。太史八之，大史掌逆官府之治，故次大師也。宗伯九之，宗伯，卿官，掌相王之典禮，若王不與祭則攝位，故次大史也。王則大甸。大甸，帥公、卿、大夫親行農也。耨穫亦如之。」如之，如耕時也。民用莫不震動，恪恭于農，用，謂田器也。修其疆畔，日服其耨，不解于時，疆，境也。畔，界也。耨，鋤屬。財用不乏，民用和同。是時也，王事惟農是務，無有求利於其官，以干農功，求利，謂變易役使，干亂農功。三時務農而一時講武，三時，春、夏、秋。一時，冬也。講，習也。故征則有威，守則有財，而和於民矣。《周語》。○古者天子諸侯必有公桑蠶室，近川而爲之，築宮仞有三尺，棘牆而外閉之。及大昕之

朝，君皮弁素積，卜三宮之夫人、世婦之吉者，使人蠶于蠶室，奉種浴于川，桑于公桑，風戾以食之。昕，許斤反。奉，芳勇反。種，章勇反。○大昕，季春朔日之朝也。諸侯夫人三宮，半王后也。風戾之者，及早涼脆採之，風戾之，使露氣燥，乃以食蠶，蠶性惡濕。歲既單矣，世婦卒蠶，奉繭以示于君，遂獻繭于夫人。夫人曰：「此所以爲君服與！」遂副禕而受之，因少牢以禮之。繭，古典反。與，音餘，注同。禕，音暉。少，詩照反。○歲單，謂三月月盡之後也。言歲者，蠶歲之大功事畢於此也。副禕，王后之服，而云夫人，記者容二王之後與？禮之，禮奉繭之世婦。及良日，夫人纁，三盆手，遂布于三宮夫人、世婦之吉者，使纁。遂朱綠之，玄黃之，以爲黼黻文章。服既成，君服以祀先王先公，敬之至也。纁，悉刀反。黼，音甫。黻，音弗。○《祭義》。○是故天子親耕於南郊，以共齊盛；王后蠶於北郊，以共純服。諸侯耕於東

郊，亦以共齊盛；夫人蠶於北郊，以共冕服。天子、諸侯非莫耕也，王后、夫人非莫蠶也，身致其誠信，誠信之謂盡，盡之謂敬，敬盡然後可以事神明，此祭之道也。共，音供。齊，子私反。盛，音成。○《祭統》。○王后親織玄紼，紼，丁感反。○說云：紼，冠之垂前後者。昭謂：紼，所以懸瑱當耳者也。公侯之夫人加之以紼，紼，音宏。紼，音延。○既織紼，復加之紼，紼也。冕曰紼。紼，纓之無綏者也，從下而上，不結。紼，冕上覆之者也。卿之內子爲大帶，卿之適妻爲內子。大帶，緇帶也。命婦成祭服，命婦，大夫之妻也。祭服，玄衣、纁裳也。列士之妻加之以朝服，朝，直遙反。○列士，元士也。既成祭服，又加之以朝服也。朝服，天子之土皮弁素積，諸侯之士玄端委貌。自庶士以下，皆衣其夫。衣，去聲。○庶士，下士也。下，至庶人也。社而賦事，烝而獻功，社，春分祭社也，事農桑之屬也。冬祭曰烝，烝而獻五穀，布帛之功也。男女效績，愆則有辟，古之制

也。辟，婢亦反。○績，功也。辟，罪也。君子勞心，小人勞力，先王之訓也。自上以下，誰敢淫心。《魯語》。《太宰》：以九職任萬民，一曰三農，先九穀；二曰園圃，毓草木；三曰虞衡，作山澤之材；四曰藪牧，養蕃鳥獸；五曰百工，飭化八材；六曰商賈，阜通貨賄；七曰嬪婦，化治絲枲；八曰臣妾，聚斂疏材；九曰閒民，無常職轉移執事。大，音泰。毓，古「育」字。藪，素口反。蕃，扶元反。賈，音古。嬪，音頻。枲，絲里反。閒，音閑。○任，猶傳也。鄭司農云：「三農，平地、山、澤也。九穀：黍、稷、秫、稻、麻、大、小豆、大、小麥。八材：珠曰切，象曰瑳，玉曰琢，石曰磨，木曰刻，金曰鏤，革曰剝，羽曰析。閒民，謂無事業者。轉移，爲人執事，若今傭賃也。玄謂：三農，原、隰及平地。九穀，無秫、大麥而有粱、苽。樹果毓曰圃。園，其樊也。虞衡，掌山澤之官，主山澤之民者。澤無水曰藪。牧，牧田在遠郊，皆畜牧之地。行曰商，處曰賈。阜，盛也。金玉曰貨，布帛曰賄。嬪，婦人之美稱也。《堯典》曰：「釐降二女，嬪于虞。」臣、

妾，男女貧賤之稱。晉惠公卜懷公之生曰：「將生一男一女，男爲人臣，女爲人妾。生而名其男曰圉，女曰妾。」及懷公質於秦，妾爲宦女焉。疏材，百草根實可食者。疏不熟曰饘。以九賦斂財賄：一曰邦中之賦，二曰四郊之賦，三曰邦甸之賦，四曰家削之賦，五曰邦縣之賦，六曰邦都之賦，七曰關市之賦，八曰山澤之賦，九曰幣餘之賦。削，所教反。○財，泉穀也。鄭司農云：邦中之賦，二十而稅一，各有差也。幣餘，百工之餘。玄謂：賦，口率出泉也。今之筭泉，民或謂之賦，此其舊名與？鄉大夫以歲時登其夫家之衆寡，辨其可任者。國中自七尺以及六十，野自六尺以及六十有五，皆征之。《遂師》之職亦云以徵其財征，皆謂此賦也。邦中，在城郭者。四郊，去國百里。邦甸，二百里。家削，三百里。邦縣，四百里。邦都，五百里。此平民也。關市、山澤，謂占會百物。幣餘，謂占賣國中之斥幣。皆未作當增賦者，若今賈人倍筭矣。自邦中以至幣餘，各入其所有穀物，以當賦泉之數。每處爲一書，所待異也。以九式均節財用：一曰祭祀之式，二曰賓客之

式，三曰喪荒之式，四曰羞服之式，五曰工事之式，六曰幣帛之式，七曰芻秣之式，八曰匪頒之式，九曰好用之式。秣，音末。頒，音班。好，呼報反。○式，謂用財之節度。荒，凶年也。羞，飲食之物也。工，作器物者。幣帛，所以贈勞賓客者。芻秣，養牛馬禾穀也。鄭司農云：匪，分也。頒，讀爲班布之班，謂班賜也。玄謂：王所分賜群臣也。好用，燕好所賜予。以九貢致邦國之用：一曰祀貢，二曰嬪貢，三曰器貢，四曰幣貢，五曰材貢，六曰貨貢，七曰服貢，八曰旂貢，九曰物貢。嬪，故書作「賓」。○鄭司農云：祀貢，犧牲包茅之屬。賓貢，皮帛之屬。器貢，宗廟之器。幣貢，繡帛。材貢，木材也。貨貢，珠貝自然之物也。服貢，祭服。旂貢，羽毛。物貢，九州之外，各以其所貴爲摯，肅慎氏貢楛矢之屬是也。玄謂：嬪貢，絲枲。器貢，銀、鐵、石、磬、丹漆也。幣貢，玉、馬、皮、帛也。材貢，櫛幹、栝柏、篠簜也。貨貢，金、玉、龜、貝也。服貢，絺紵也。旂，讀如圉游之游。旂貢，燕好、珠璣、琅玕也。物貢，雜物，魚、鹽、橘、柚。○《大府》：掌九貢、九

賦、九功之貳，以受其貨賄之人，頒其貨于受藏之府，頒其賄于受用之府。大，音泰。○九功，謂九職也。受藏之府，若內府也。受用之府，若職內也。凡貨賄皆藏以給用耳，良者以給王之用，其餘以給國之用。或言受藏或言受用又雜言貨賄，皆互文。凡官府都鄙之吏及執事者，受財用焉。凡頒財以式灋授之：關市之賦以待王之膳服，邦中之賦以待賓客，四郊之賦以待稍秣，家削之賦以待匪頒，邦甸之賦以待工事，邦縣之賦以待幣帛，邦都之賦以待祭祀，山澤之賦以待喪紀，幣餘之賦以待賜予。稍，削，並所教反。秣，音末。頒，音班。予，音與。○待，猶給也，此九賦之財給九式者。膳服，即羞服也。稍秣，即芻秣也。謂之稍，稍用之物也。喪紀，即喪荒也。賜予，即好用也。鄭司農云：幣餘，使者有餘來還也。玄謂：幣餘，占賣國之斥幣。凡邦國之貢以待弔用，此九貢之財所給也。給弔用，給凶禮之事。凡萬民之貢以充府庫，此九職之財。充，猶

足。凡式貢之餘財以共玩好之用，好，呼報反。  
○謂先給九式及弔用，足府庫而有餘財，乃可以共玩好，明玩好非治國之用。言「式」言「貢」，互文。凡邦之賦用取具焉。賦用，用賦。歲終，則以貨賄之人出會之。會，古外反。《遺人》：「掌邦之委積以待施惠，鄉里之委積以恤民之艱阨，門閭之委積以養老孤，郊里之委積以待賓客，野鄙之委積以待羈旅，縣都之委積以待凶荒。遺，于僞反。委，於僞反。積，子賜反。施，式豉反。艱，古「艱」字。羈，居宜反。○委積者，廩人、倉人計九穀之數足國用，以其餘共之，所謂餘法用也。職內邦之移用亦如此也，皆以餘財共之。少曰委，多曰積。鄉里，鄉所居也。艱阨，猶困乏也。門閭以養老孤，人所出入，易以取餼廩也。羈旅，過行寄止者。待凶荒，謂邦國所當通給者也。故書「艱阨」作「謹阨」，「羈」作「寄」，杜子春云：「謹阨」當爲「艱阨」，「寄」當爲「羈」。凡國野之道：十里有廬，廬有飲食；三十里有宿，宿有路室，路室有委；五十里有市，市有候館，候館有積。廬，



若今野候，徒有房也。①宿，可止宿，若今亭有室矣。候館，樓可以觀望者也。一市之間，有三廬一宿。○《均

人》：凡均力政，以歲上下。豐年則公旬用三日焉，中年則公旬用二日焉，無年則公旬用一日焉。政，音征。②○豐年，人食四鬴之歲也。人

食三鬴爲中歲，人食二鬴爲無歲，歲無贏儲也。公，事也。旬，均也，讀如營營原隰之營，《易》「坤爲均」，今書亦有作

「旬」者。凶札則無力政，無財賦。札，側八反。③

○無力政，恤其勞也。無財賦，恤其乏困也。財賦，九賦也。不收地守地職，不均地政。政，音征。○不

收山澤及地稅，亦不平計地稅也。非凶札之歲，當收稅乃均之耳。三年大比，則大均。比，毗志反。○有年

無年，大平計之。若久不修，則數或闕。○《旅師》：

掌聚野之耰粟、屋粟、閒粟，耰，音鉏。閒，音閑。

○野，謂遠郊之外也。耰粟，民相助作。一井之中，所出九

夫之稅粟也。屋粟，民有田不耕，所罰一夫之稅粟。閒粟，閒民無職事者所出一夫之征粟。而用之，以質劑致

民。平頒其興積，施其惠，散其利，而均其政

令。劑，一隨反。積，子賜反。○而，讀爲若，聲之誤也。

若用之，謂恤民之艱阨，委積於野，如遺人於鄉里也。以質劑致民，案人稅者名，會而貸之。興積，所興之積，謂三者之粟也。平頒之，不得偏頗有多少。縣官徵聚物曰興，今

云軍興是也。是粟縣師徵之，旅師斂之而用之。以調衣食曰惠，以作事業曰利。均其政令者，皆以國服爲之息。凡

用粟，春頒而秋斂之。困時施之，饒時收之。凡

新甿之治皆聽之，使無征役，以地之媿惡爲之等。甿，莫耕反。媿，音美。○新甿，新徙來者也。

治，謂有所求乞也。使無征役，復之也。《王制》曰：「自諸

侯來徙於家，期不從政。」以地美惡爲之等，七人以上授以上地，六口授以中地，五口以下授以下地，與舊民同。旅師掌斂地稅，而又施惠散利，是以屬用新民焉。○太史典

禮，執簡記，奉諱惡，惡，去聲。○簡記，策書也。

諱，先王名。惡，忌日，若子卯。天子齊戒受諫。齊，

①「徙」，賀本作「徒」，「房」，原作「房」，據賀本改。

②「音」，原作「意」，據元明本、寬文本、賀本改。

③「八」，原作「入」，據元明本、寬文本、賀本改。

側皆反。○歲終群臣奏歲事，諫王所當改爲也。司會以歲之成質於天子，會，占外反。○司會，冢宰之屬。掌計要者。成，計要也。質，猶平也，平其計要。冢宰齊戒受質。贊王受之。大樂正、大司寇、市三官以其成，從質於天子。大樂正，於周宗伯之屬。市，司市也，於周司徒之屬。從，從司會也。大司徒、大司馬、大司空齊戒受質。百官各以其成質於三官，大司徒、大司馬、大司空以百官之成質於天子。百官，此三官之屬。百官齊戒受質，受平報也。然後休老勞農，勞，力報反。○饗養之。成歲事，斷計要也。制國用。《王制》。○冢宰制國用，必於歲之杪。五穀皆入，然後制國用。杪，亡少反。○制國用，如今度支經用。杪，末也。用地小大，視年之豐耗。耗，呼報反。○小國大國，豐凶之年，各以歲之收入制其用多少。多不過禮，少有所殺。以三十年之通制國用，量人以爲出。量，音亮。○通三十年之率，當有九年之蓄。出，謂所當給爲。祭

用數之仂，仂，音勒，下同。○筭今年一歲經用之數，用其什一。喪用三年之仂。喪，大事，用三歲之什一。喪祭用不足曰暴，有餘曰浩。暴，猶耗也。浩，猶饒也。祭，豐年不奢，凶年不儉。常用數之仂。國無九年之蓄曰不足，無六年之蓄曰急，無三年之蓄曰國非其國也。三年耕必有一年之食，九年耕必有三年之食。以三十年之通，雖有凶旱水溢，民無菜色，然後天子食，日舉以樂。菜色，食菜之色。民無食菜之飢色，天子乃日舉樂以食。○《王制》。○禮：國有飢人，人主不飡；飡，音孫。國有凍人，人主不裘；報囚之日，人主不舉樂。歲凶穀不登，臺扉榭徹干候，馬不食穀，馳道不除，食減膳，饗祭有闕。故禮者，自行之義，養民之道也。○受計之禮，主所親拜者二：聞生民之數則拜之，聞登穀則拜之。《詩》曰：「君子樂胥，受天之祜。」夫憂民之憂者，民亦憂其憂；樂民

之樂者，民亦樂其樂。與士民若此者，受天之福矣。樂，音洛。夫，音扶。① ○古者聚貨不妨民衣食之利，聚馬不害民之財用，貨，珠玉之屬，自然物也。貨，馬多，則養求者衆，妨財用力也。國馬足以行軍，國馬，民馬也。十六井爲丘，有戎馬一匹，牛二頭，足以行軍也。公馬足以稱賦，公馬，公之戎馬。稱，舉也。賦，兵賦也。不是過也。公貨足以賓獻，賓，饗。獻，貢也。家貨足以共用，共，音供。○家，大夫也。不是過也。《楚語》。○古者稅什一，宣十五年注詳矣。豐年補敗，敗，謂凶年。不求而上下皆足也，雖累凶年，民弗病也。莊公二十八年《穀梁傳》。○古之君人者，必時視民之所勤。民勤於力，則功築罕。罕，希。民勤於財，則貢賦少。民勤於食，則百事廢矣。凶荒殺禮。冬築微，春新延廡，以其用民力爲已悉矣。莊公二十九年《穀梁傳》。○天子不言多少，諸侯不言利害，大夫不言得喪，喪，息浪反。○

皆謂言貨財也。士不通貨財，士賤，雖得言之，亦不得貿遷如商賈也。有國之君不息牛羊，息，蕃育也。錯質之臣不息雞豚，錯，七路反。質，音至。○錯，置也。質，讀爲贊，《孟子》曰：「出疆必載質。」蓋古字通耳。置贊，謂執贊而置于君。《士相見禮》曰：「士大夫奠贊於君，再拜稽首。」《禮記》曰：「畜馬乘者，不察于雞豚。」或曰：置質，猶言委質也。言凡委質爲人臣，則不得與下爭利。豕卿不修幣，大夫不爲場園，豕卿，上卿。不修幣，謂不修財幣販息之也。治稼穡曰場，樹菜蔬曰園。謂若公儀子不奪園夫、工女之利也。從士以上皆羞利而不與民爭業，樂分施而恥積臧。然故民不困財，貧屢者有所竄其手。樂，音洛。臧，音藏。屢，讀爲窶。○竄，容也，謂有所容其手而力作也。多積財而羞無有，羞貧。重民任而誅不能，使民不能勝任而復誅之。此邪行之所以起，刑罰之所以多也。上好羞，則民閭飾矣；行，好，並去

①，扶「下」，賀本有「○並賈誼新書禮篇」。

聲，下同。○好羞貧而事奢侈，則民間自修飾也。上好富，則民死利矣。二者，亂之衢也。衢，道。民語曰：「欲富乎？忍恥矣，傾絕矣，絕故舊矣，與義分背矣。」背，蒲內反。○忍恥，不顧廉恥。傾絕，謂傾身絕命而求也。分背，如人分背而行。上好富，則人民之行如此，安得不亂？<sup>①</sup>○歲凶，年穀不登，登，成也。君膳不祭肺，馬不食穀，馳道不除，祭事不縣，大夫不食梁，士飲酒不樂。縣，音懸。○皆自爲貶損，憂民也。禮：食殺牲則祭先，有虞氏以首，夏后氏以心，殷人以肝，周人以肺。不祭肺，則不殺也。天子食，日少牢，朔月大牢。諸侯食，日特牲，朔月少牢。除，治也。不治道，爲妨民取蔬食也。縣，樂器，鐘、磬之屬也。梁，加食也。不樂，去琴瑟。○《曲禮》。○國家靡敝，則車不雕幾，甲不組縹，食器不刻鏤，君子不履絲屨，馬不常秣。縹，亡皮反。幾，音祈。組，音祖。縹，大登反。鏤，音漏。秣，音末。○靡敝，賦稅亟也。雕，畫也。幾，附纏爲沂鄂也。組縹，以組飾之及給帶也。《詩》云：「公徒三萬，貝胄

朱纓。」亦鎧飾也。○《少儀》。○五穀不升爲大饑，升，成也。一穀不升謂之嗛，嗛，去簞反。○嗛，不足貌。二穀不升謂之饑，三穀不升謂之饉，四穀不升謂之康，饉，音近。○康，虛。五穀不升謂之大侵。侵，傷。大侵之禮，君食不兼味，臺榭不塗，塗，堊飾。弛侯，廷道不除，弛，式氏反。○弛，廢也。侯，射侯也。廢侯不燕射，廷內道路不修除。百官布而不制，官職修列不可闕廢，不更有造作。鬼神禱而不祀，《周書》曰：大荒有禱而無祀。此大侵之禮也。襄公二十四年《穀梁傳》。○大喪則不舉，大荒則不舉，大札則不舉，天地有災則不舉，邦有大故則不舉。札，側八反。災，音災。○大荒，凶年。大札，疫癘。天災，日月晦食。地災，崩動。大故，寇戎之事。鄭司農云：大故，刑殺也。《春秋傳》曰：「司寇行戮。君爲之不舉。」○《膳夫》。○大札、大荒、

①「亂」下，賀本有「荀子大略篇」五字。

大裁，素服。大荒，饑饉也。大裁，水火爲害。君臣素服縞冠，若晉伯宗哭梁山之崩。○《司服》。○至于八月

不雨，君不舉。爲旱變也。此謂建子之月不雨，盡建

未月也。《春秋》之義，周之春夏無雨未能成災，至其秋秀實之時而無雨則雩。雩而得之則書「雩」，喜祀有益也；雩而不得則書「旱」，明災成也。

○年不順成，君衣布

搢本，關梁不租，山澤列而不賦，土功不興，

大夫不得造車馬。搢，音薦。○皆爲凶年變也。君衣

布者，謂若衛文公大布之衣、大帛之冠是也。搢本，去斑茶

佩上笏也。士以竹爲笏，飾本以象關梁不租。此周禮也，

殷則關恒譏而不征。列之言遮列也。雖不賦猶爲之禁，不

得非時取也。造，謂作新也。○荼，音舒。○年不順

成，天子素服，乘素車，食無樂。自貶損也。○

以上並《玉藻》。○古者有災者謂之厲，君一時

素服，使有司弔死問疾，憂以巫豎匍匐以掄

之，湯粥以方之，善者，先乎矜寡孤獨及疾不

能相養。死無以葬埋者，葬埋之。匍，音蒲。

匍，蒲北反。矜，古頑反。① ○孔子在齊，大旱，春

饑，景公問于孔子曰：「如之何？」孔子曰：

「凶年則乘駑馬，力役不興，馳道不修，驚，音

奴。○馳道，君行之道。祈以幣玉，君所祈請用幣及

玉，不用牲也。祭事不縣，縣，音懸。○不作樂也。祀

以下牲，當用大牢者，用少牢。此則賢君自貶以

救民之禮也。」《家語》。○魯大旱，公欲焚巫

尪，尪，烏黃反，後同。○巫尪，女巫也，主祈禱請雨者。

或以爲尪非巫也，瘠病之人，其面上向，俗謂天哀其病，恐

雨入鼻，故爲之旱，是以公欲焚之。臧文仲曰：「非

旱備也！修城郭，貶食省用，務穡勸分，穡，

儉也。勸分，有無相濟。此其務也。巫尪何爲？」

僖公二十一年《左氏傳》。○歲旱，穆公召縣子而

問然，縣，音懸。○然之言焉也。凡「穆」或作「繆」。

曰：「天久不雨，吾欲暴尪而奚若？」暴，蒲卜

① 「反」下，賀本有「○說苑」。

反。○疋者面向天，覲天哀而雨之。曰：「天則不雨

而暴人之疾子，虐，毋乃不可與？」與，音餘。

○鋼疾，人之所哀，暴之是虐。「然則吾欲暴巫而奚

若？」曰：「天則不雨而望之愚婦人，於以求

之，毋乃已疏乎？」已，猶甚也。巫主接神，亦覲天哀

而雨之。《春秋傳》說巫曰：在女曰巫，在男曰覲。《周

禮·女巫》：「旱暵則舞雩。」徙市則奚若？」曰：

「天子崩，巷市七日；諸侯薨，巷市三日。爲

之徙市，不亦可乎？」爲，去聲。○徙市者，庶人之

喪禮。今徙市，是憂戚于旱若喪。○《檀弓》下。

○日有

食之，天子不舉，去盛饌。伐鼓于社，責群陰。

伐，猶擊也。諸侯用幣于社，社尊于諸侯，故請救而

不敢責之。伐鼓于朝，退自責。以昭事神、訓民、

事君，天子不舉，諸侯用幣，所以事神。尊卑異制，所以

訓民。示有等威，古之道也。等威，威儀之等差。

○文公十五年《左氏傳》。○國主山川，主，謂所主祭。

故山崩川竭，君爲之不舉，爲，去聲。○去盛饌。

降服，損盛服。乘縵，縵，武旦反。○車無文。徹

樂，息八音。出次，舍于郊。祝幣，陳玉帛。史辭，

自罪責。以禮焉。禮山川。○成公五年《左氏傳》。

○天反時爲災，寒暑易節。地反物爲妖，群物失

性。民反德爲亂，亂則妖災生，故文反「正」

爲「乏」。文，字。○宣公十五年《左氏傳》。○軍有

憂，則素服哭於庫門之外，憂，謂爲敵所敗也。素

服者，縗冠也。赴車不載橐韞。橐，音羔。韞，勑亮

反。○兵不戢，示當報也。以告喪之辭言之，謂還告於國。

橐，甲衣。韞，弓衣。○《檀弓》。○有焚其先人之

室，則三日哭，謂人燒其宗廟，哭者哀精神之有虧傷。

故曰：「新宮火，亦三日哭。」火，人火也，新宮火

在魯成三年。○《檀弓》下。○國亡大縣邑，公、

卿、大夫、士皆厭冠，哭於大廟三日，君不舉。

厭，于業反。大廟，大，音泰。○軍敗失地，以喪歸也。厭

冠，今喪冠，其服未聞。或曰：君舉而哭於后土。

后土，社也。孔子惡野哭者。爲其變衆。《周禮·甸

枚氏：「掌禁野叫呼歎鳴于國中者，行歌哭于國中之道者。」○《檀弓》上。

○孔子爲大司寇，國廩焚，子退朝而之火所。鄉人有自爲火來者，則拜之，士一，大夫再。子貢曰：「敢問何也？」孔子曰：「其來者，亦相弔之道，吾爲有司，故拜之。」廩，居又反。自爲，于僞反。○言拜之者，爲其來弔已。《宗伯》職曰：「以弔禮哀禍災。」○《家語》。

儀禮集傳集註卷第三十一終

## 儀禮集傳集註卷第三十一

王制之戊設官

王朝禮九

昔者黃帝氏以雲紀，故爲雲師而雲名；

黃帝，軒轅氏，姬姓之祖也。黃帝受命有雲瑞，故以雲紀事，百官師長皆以雲爲名號。縉雲氏蓋其一官也。炎帝

氏以火紀，故爲火師而火名；炎帝，神農氏，姜姓之祖也。亦有火瑞，以火紀事，名百官。共工氏以水

紀，故爲水師而水名；共，音供。○共工氏，以諸侯

霸有九州者，在神農前，大皞後。亦受水瑞，以水名官。

大皞氏以龍紀，故爲龍師而龍名。大，音泰。

皞，胡老反，下同。○大皞，伏羲氏，風姓之祖也。有龍瑞，

故以龍命官。少皞摯之立也，鳳鳥適至，故紀

於鳥，爲鳥師而鳥名：鳳鳥氏，歷正也；少

詩照反。摯，音至。○鳳鳥知天時，故以名歷正之官。玄

鳥氏，司分者也；玄鳥，燕也。以春分來，秋分去。

伯趙氏，司至者也；伯趙，伯勞也。以夏至鳴，冬至

止。青鳥氏，司啟者也；青鳥，鶡鵒也。以立春鳴，

立夏止。丹鳥氏，司閉者也；丹鳥，鷩雉也。以立

秋來，立冬去，人大水爲蜃。上四鳥皆歷正之屬官。祝

鳩氏，司徒也；祝鳩，鷦鷯也。鷦鷯孝，故爲司徒，主

教民。鵷鳩氏，司馬也；鵷，七徐反。○鵷鳩，王鵷

也。鷩而有別，故爲司馬，主法制。鳴鳩氏，司空

也；鳴，音戶。○鳴鳩，鵯鵊也。鵯鵊平均，故爲司空，平

水土也。爽鳩氏，司寇也；爽鳩，鷹也。鷩，故爲司

寇，主盜賊。鵲鳩氏，司事也。鵲，胡骨反。○鵲鳩，

鵲鵲也，春來冬去，故爲司事。五鳩，鳩民者也。鳩，

聚也。治民上聚，故以鳩爲名。五雉爲五工正，五

雉，雉有五種：西方曰鷩雉，東方曰鷦雉，南方曰翟雉，北

方曰鵲雉，伊、洛之南曰翟雉。利器用、正度量，夷

民者也。量，音亮。○夷，平也。九扈爲九農正，



扈，音戶。○扈有九種也：春扈鵠鵠，夏扈竊玄，秋扈竊藍，冬扈竊黃，棘扈竊丹，行扈啗啗，宵扈噴噴，桑扈竊脂，老扈鵲鵲。以九扈爲九農之號，各隨其宜以教民事。扈民無淫者也。扈，止也。止民使不淫放。自顓頊以來，不能紀遠，乃紀於近，爲民師而命以民事，則不能故也。顓，音專。頊，許玉反。○顓頊氏，代少皞者，德不能致遠瑞，而以民事命官。○《春秋左氏傳》昭公十七年。

傳：叔孫昭子問於鄒子曰：「少皞氏鳥名官，何故也？」少皞，金天氏，黃帝之子，己姓之祖也。問何故以鳥名官。鄒子曰：「吾祖也，我知之。」仲尼聞之，見於鄒子而學之。於是仲尼年二十八。既而告人曰：「吾聞之，『天子失官，學在四夷』，猶信。」失官，官不修其職也。傳言聖人無常師。○《春秋左氏傳》昭公十七年。

古者大撓作甲子，黔如作虜首，黔，其占

反。容成作義歷，義和作占日，尚儀作占月，后益作占歲，胡曹作衣，夷羿作弓，羿，五計反。祝融作市，狄儀作酒，高元作室，虞姁作舟，伯益作井，赤冀作臼，乘特作駕，寒哀作御，王冰作服牛，史皇作圖，巫彭作醫，巫咸作筮。○ 著筮。①

傳曰：此二十官者，聖王之所以治天下也。聖王不能二十官之事，然而使二十官盡其巧，畢其能，聖王作上故也。聖王在上，官使人人，故盡畢其巧能也。聖王之所不能也，用其人，得其任，故所不能。其不知也，所以知之也。《老子》曰：「不知乃知之。」此之謂也。養其神，修其德而已矣，無所思慮勞神，是養神也。無狀而能化育萬物，謂之德。豈必勞形愁心弊耳

① 「筮」下，賀本有「○呂氏春秋勿躬」。

目哉？<sup>①</sup>

唐虞稽古，建官惟百。內有百揆四岳，外有州、牧、侯、伯，堯、舜考占以建百官，內置百揆四岳，象天之有五行，外置州、牧十二及五國之長，上下相維，外內咸治，言有法。庶政惟和，萬國咸寧。官職有序，故衆政惟和，萬國皆安，所以爲至治。夏、商官倍，亦克用乂。禹、湯建官二百，亦能用治，言不及唐、虞之清要。○《周官》。○夏商之制：天子三公、九卿、二十七大夫、八十一元士。大國三卿皆命於天子，下大夫五人，上士二十七人；次國三卿，二卿命於天子，一卿命於其君，下大夫五人，上士二十七人；小國二卿，皆命於其君，下大夫五人，上士二十七人。命於天子者，天子選用之，如今詔書除吏矣。小國亦三卿，一卿命於天子，二卿命於其君。此文似誤脫耳，或者欲見畿內之卿與？<sup>②</sup>○《王制》。○制：三公一命卷，若有加則賜也，不過九命；次國之君不過七命；

小國之君不過五命。卷，俗讀也，其通則曰袞。三公八命矣，復加一命則服龍袞，與王者之後同。多於此則賜，非命服也。虞夏之制，天子服有日月星辰。《周禮》曰：「諸公之服自袞冕而下，如王之服。」大國之卿不過三命，下卿再命，小國之卿與下大夫一命。不著次國之卿者，以大國之下互明之。此卿命則異，大夫皆同《周禮》。公、侯、伯之卿三命，其大夫再命，子、男之卿再命，其大夫一命。○《王制》。○制：農田百畝。百畝之分，上農夫食九人，其次食八人，其次食七人，其次食六人，下農夫食五人。庶人在官者，其祿以是爲差也。分，扶問反。食，音似。○農夫皆受田於公田，肥瘠有五等，收入不同也。庶人在官，謂府史之屬，官長所除，不命於天子、國君者。分，或爲「糞」。諸侯之下士視上農夫，祿足以代其耕也。中士倍下士，上士倍中士，下大夫倍上

① 「哉」下，賀本有「呂氏春秋勿躬」。

② 「二」，原脫，據寬文本、賀本補。

士。卿四大夫祿，君十卿祿。次國之卿三大夫祿，君十卿祿。小國之卿倍大夫祿，君十卿祿。此班祿尊卑之差。次國之上卿，位當大國之中，中當其下，下當其上大夫。小國之上卿，位當大國之下卿，中當其上大夫，下當其下大夫。此諸侯使卿大夫覲聘並會之序也。其爵位同，小國在下。爵異，固在上耳。○《春秋傳》，小國無「上大夫下當其」六字。其中有中士下士者，數各居其上之三分。謂其爲介，若特行而並會也。居，猶當也。此據大國而言，大國之上爲上，次國之上爲中，小國之上爲下。士之數，國皆二十七人，各三分之一；上九，中九，下九。以位相當，則次國之上士當大國之中，中當其下，小國之上士當大國之下。凡非命士，亦無出會之事。《春秋傳》謂士爲微。○《王制》。○諸侯之下士祿食九人，中士食十八人，上士食三十六人，下大夫食七十二人，卿食二百八十八人，君食二千八百八十人。次國之卿食二百一十六人，君食二千

一百六十人。小國之卿食百四十四人，君食千四百四十人。次國之卿命於其君者，如小國之卿。天子之大夫爲三監，監於諸侯之國者，其祿視諸侯之卿，其爵視次國之君，其祿取之於方伯之地。方伯爲朝天子，皆有湯沐之邑於天子之縣內，視元士。食，音似。監，古陷反。監於，古銜反。爲，于僞反。朝，直遙反。○給齋戒白潔清之用。浴用湯，沐用潘。○《王制》。

傳曰：古者天子三公，每一公三卿佐之，每一卿三大夫佐之，每一大夫三士佐之。故天子三公、九卿、二十七大夫、八十一元士，所與爲天下者，若此而已。自三公至元士凡百二十，此夏時之官，周之官三百六十。《禮志》曰：「有虞氏之官五十，夏后百，殷二百，周三百」，近之，未得其實也。據夏、周推其差，則有虞氏之官六十，夏后氏百二十，殷二百四十，周三百六十，爲有所法。

《周禮》：以九儀之命，正邦國之位。每命異儀，貴賤之位乃正。《春秋傳》曰：「名位不同，禮亦異

數。「壹命受職，始見命爲正吏，謂列國之士，於子、男爲大夫，王之下士亦一命。鄭司農云：受職，治職事。再命受服，鄭司農云：受服，受祭衣服，爲上士。玄謂：此受玄冕之服，列國之大夫再命，於子、男爲卿。卿、大夫自玄冕而下，如孤之服。王之中士亦再命，則爵弁服。三命受位，鄭司農云：受下大夫之位。玄謂：此列國之卿，始有列位於王，爲王之臣也。王之上士亦三命。四命受器，鄭司農云：受祭器爲上大夫。玄謂：此公之孤始得有祭器者也。《禮運》曰：「大夫具官，祭器不假，聲樂皆具，非禮也。」王之下大夫亦四命。五命賜則，鄭司農云：「則」者，法也，出爲子、男。玄謂：則，地未成國之名。王之下大夫四命，出封加一等，五命，賜之以方百里二百里之地者，方三百里以上爲成國。王莽時以二十五成爲則，方五十里，合今俗說子、男之地，獨劉子駿等識古有此制焉。六命賜官，鄭司農云：子、男入爲卿，治一官也。玄謂：此王六命之卿賜官者，使得自置其臣，治家邑如諸侯。《春秋》襄十八年冬，晉侯以諸侯圍齊，荀偃爲君禱河，既陳齊侯之罪而曰：「曾臣彪將率諸侯以討焉，其官臣偃實先

後之。」七命賜國，王之卿六命，出封加一等者。鄭司農云：出就侯、伯之國。八命作牧，謂侯、伯有功德者，加命得專征伐於諸侯。鄭司農云：一州之牧，王之三公亦八命。九命作伯。上有功德者，加命爲二伯，得征五侯九伯者。鄭司農云：長諸侯爲方伯。○《宗伯》。○諸侯之五儀曰：上公九命爲伯，其國家、宮室、車旗、衣服、禮儀皆以九爲節；侯、伯七命，其國家、宮室、車旗、衣服、禮儀皆以七爲節；子、男五命，其國家、宮室、車旗、衣服、禮儀皆以五爲節。上公，<sup>①</sup>謂王之三公有德者，加命爲二伯，二王之後亦爲上公。國家，國之所居，謂城方也。公之城蓋方九里，宮方九百步。侯、伯之城蓋方七里，宮方七百步。子、男之城蓋方五里，宮方五百步。《大行人》職則有諸侯圭藉、冕服、建常、樊纓、武車、介冑，禮朝位之數焉。王之三公八命，其卿六命，其大夫四命。及其出封，皆加一等，其國家、宮室、車旗、

①「上」，原作「王」，據寬文本、賀本改。

衣服、禮儀亦如之。四命，中下大夫也。出封，出畿內，封於八州之中。加一等，褒有德也。大夫爲子、男，卿爲侯、伯，其在朝廷則亦如命數耳。王之上士三命，中士再命，下士一命。凡諸侯之適子誓於天子，攝其君，則下其君之禮一等。未誓，則以皮帛繼子、男。適，音嫡。○誓，猶命也。言誓者，明天子既命以爲之嗣，樹子不易也。《春秋》桓九年，曹伯使其世子射姑來朝，行國君之禮是也。公之子如侯、伯而執圭，侯、伯之子如子、男而執璧，子、男之子與未誓者皆次小國之君，執皮帛而朝會焉，其賓之皆以上卿之禮焉。諸臣五等之命曰：公之孤四命，以皮帛眡小國之君；其卿三命；其大夫再命；其士壹命。其宮室、車旗、衣服、禮儀，各眡其命之數，侯、伯之卿、大夫、士亦如之。子、男之卿再命，其大夫壹命，其士不命，其宮室、車旗、衣服、禮儀，各眡其命之數。眡，音示。○視小國之君者，列於卿、大夫之位，而禮如子、男也。鄭司農云：九命上公，得置孤卿一人。《春秋傳》曰：「列國之卿當小國之君，固

周制也。」○《典命》。○周立大師、大傅、大保，茲惟三公。論道經邦，燮理陰陽。燮，息列反。○師，天子所師法。傅，傅相天子。保，保安天子於德義者。此惟三公之任，佐王論道以經緯國事，和理陰陽，言有德乃堪之。官不必備，惟其人。三公之官不必備員，惟其人有德，乃以處之。少師、少傅、少保，曰三孤。少，詩照反。○此三官名曰三孤。孤，特也，言卑於公、尊於卿，特置此三者。貳公弘化，寅亮天地，弼予一人。副貳三公，弘大道化，敬信天地之教，以輔我一人之治。冢宰掌邦治，統百官，均四海。天官，卿稱，大宰主國政治，統理百官，均平四海之內邦國，言任大。司徒掌邦教，敷五典，擾兆民。地官，卿，司徒主國教化，布五常之教，以安和天下衆民，使小大協睦。宗伯掌邦禮，治神人，和上下。春官，卿，宗廟官長，主國禮，治天地神祇、人鬼之事及國之吉凶、軍、賓、嘉五禮，以和上下，尊卑等列。司馬掌邦政，統六師，平邦國。夏官，卿，主戍馬之事，掌國征伐，統正六軍，平治

王邦、四方國之亂者。司寇掌邦禁，詰姦慝，刑暴

亂。慝，吐得反。○秋官，卿，主寇賊法禁，治姦惡，刑強

暴作亂者。夏司馬討惡助長物，秋司寇刑姦順時殺。司

空掌邦土，居四民，時地利。冬官，卿，主國空土

以居民士農工商四人，使順天時，分地利，授之土，能吐生  
百穀，故曰土。六卿分職，各率其屬，以倡九牧，

阜成兆民。倡，昌亮反。○六卿各率其屬官大夫士，治

其所分之職，以倡道九州牧伯爲政，大成兆民之性命，皆能  
其官則政治。○《周禮》之略：惟王建國，建，立

也。周公居攝而作六典之職，謂之《周禮》，營邑於上中，七  
年致政成王，以此禮授之，使居維邑治天下。《司徒》職

曰：「日至之景尺有五寸，謂之地中。天地之所合也，四時  
之所交也，風雨之所會也，陰陽之所和也，然則百物阜安，

乃建王國焉。」辨方正位，辨，別也。鄭司農云：別四

方，正君臣之位，君南面臣北面之屬。玄謂：《考工·匠  
人》：「建國，水地以縣，置槓以縣，視以景。爲規，識日出

之景與日人之景，晝參諸日中之景，夜考之極星，以正朝  
夕。」是別四方。《召誥》曰：「越三日戊申，太保朝至于洛，

卜宅。厥既得卜，則經營。越三日庚戌，太保乃以庶殷攻  
位於維汭。越五日甲寅，位成。」正位，謂此定宮廟。體

國經野，體，猶分也。經，謂爲之里數。鄭司農云：營國

方九里，國中九經九緯，左祖右社，面朝後市，野則九夫爲  
井，四井爲邑之屬是也。設官分職，鄭司農云：置冢

宰、司徒、宗伯、司馬、司寇、司空，各有所職而百事舉。以

爲民極。極，中也。今天下之人各得其中，不失其所。

○今案：極，謂標準也。○乃立天官冢宰，使帥其

屬而掌邦治，以佐王均邦國。掌，主也。邦治，王

所以治邦國也。佐，猶助也。鄭司農云：邦治，謂總六官

之職也，故《大宰》職曰：「掌建邦之六典，以佐王治邦國。」

六官皆總屬於冢宰，故《論語》曰：「君薨，百官總己以聽於  
冢宰。」言冢宰於百官無所不主。《爾雅》曰：「冢，大也。」

冢宰，大宰也。大宰，卿一人。大，音泰，後同。○掌

建邦之六典，以佐王治邦國。以八法治官府，以八則治都  
鄙，以八柄詔王馭群臣，以八統詔王馭萬民，以九職任萬

①「治」下，元明本、寬文本、賀本有「○尚書周官」。

民，以九賦斂財賄，以九式均節財用，以九貢致邦國之用，以九兩繫邦國之民。小宰，中大夫二人。掌官刑及

王宮之政令，糾禁，掌六典、八法、八則、九貢、九賦、九式之貳、六敍、六屬、六職、六聯、八成、六計。宰夫，下大夫

四人。掌治朝之法，群吏之治，辨八職。○宮正，掌王

宮之戒令糾禁，官官之長也。宮伯。掌王宮士庶子之政

令。○膳夫，掌王之食飲膳羞，以養王及后、世子，食官

之長也。庖人，庖，扶交反。○掌共膳羞之物。內饗，

饗，於容反，下同。○掌王及后、世子之割烹煎和。外

饗，掌外祭祀之割烹及賓客之飧饗饗食。亨人。亨，普

庚反。○掌饗烹煮。○甸師，甸，田遍反。○掌耕王籍

共齋盛蕭茅、果蔬、薪蒸，共野物官之長也。獸人，掌罟

田獸。敝人，敝，音魚。○掌以時敝。鼈人，掌取互

物。腊人。掌乾肉。○醫師，掌醫之政令，醫官之長

也。食醫，掌和王之食飲膳羞。疾醫，掌養萬民之疾

病。瘍醫，瘍，音羊。○掌療瘍。獸醫。掌療獸。○

酒正，掌酒之政令，酒官之長也。其屬皆奄奴，唯凌人用

士。酒人，掌爲酒齊。漿人，掌共六飲。凌人，凌

力證反。○掌冰。籩人，掌籩實。醢人，醢，呼在反。

○掌豆實。醢人，醢，呼西反。○掌凡醢物。鹽人，掌

鹽之政令。冪人。冪，莫歷反。○掌共巾冪。○宮

人，掌王之六寢之修，寢舍之長也。掌舍，掌王會同之

舍。幕人，掌帷幕幄帟綬。掌次。次，自修正之處。

○大府，下大夫。掌九貢、九賦、九功之貳，以受頒其

貨賄，治藏之長也。王府，掌王金玉、玩好、兵器，凡良貨

賄之藏。內府，掌受九貢、九賦、九功之貨賄、良兵、良

器。外府。掌邦布之人出。○司會，中大夫。會，

古外反。○掌六典、八法、八則之貳、九貢、九賦、九功、九

式之法，計官之長也。司書，掌六典、八法、八則、九職、

九正、九事、邦中之版、土地之圖。職內，掌邦之賦入。

職歲，掌邦之賦出。職幣。掌式法以斂幣。○司

裘，掌爲裘及射侯、與邦之皮事。掌皮。掌斂頒皮革。

○內宰，下大夫。掌王內之政令，教陰禮，教婦職，贊

后禮，佐后立市，詔后蠶及生種稷之種，宮中官之長也。

內小臣，掌王后之命，奄士也。閹人，閹，音昏。○掌守王宮中門之禁。寺人，掌內人及女宮之戒令。內豎，豎，音樹。○掌內外之通令，凡小事。九嬪，嬪，音頻。○掌婦學之法，不列三夫人者，猶三公之無職也。世婦，掌祭祀、賓客、喪紀之事。女御，掌御敘于王之燕寢。女祝，掌王后之內祭祀、禱祠之事。女史，掌禮職內治之貳，以詔后治內政。○典婦功，掌婦式之法，主婦功官之長也。典絲，掌絲之人出。典枲，枲，絲里反。○掌布總纓紵麻草之物。○內司服，掌王后之六服、外內命婦之服，主宮中裁縫官之長也。縫人，縫，扶用反。○掌王宮縫線之事。染人，染，如艷反。掌染絲帛。追師，追，丁回反。○掌王后及外內命婦之首服。屨人，掌王及后之服屨，辨外內命夫婦之屨。夏采。掌染鳥羽及大喪之復。○乃立地官司徒，使帥其屬而掌邦教，以佐王安擾邦國。教所以親百姓，訓五品。有虞氏五而周十有二焉。擾亦安也，言饒衍之。大司徒，卿一人。掌建邦之土地之圖與其人民之數，

辨邦國都鄙之數，而制其畿疆、社稷，以土會之法辨五地之物生，因此以施十二教，以土宜之法辨十二土而相民宅，辨十二壤而知其種，以土均之法辨五物九等而制地征，以土圭之法建王國，制邦國，造都鄙，以荒政十二聚萬民，以保息六養萬民，以本俗六安萬民，頒十二職于邦國、都鄙，以鄉三物、五禮、六樂教萬民，以鄉八刑糾萬民。小司徒，中大夫二人。掌建邦之教法，以稽國中及四郊都鄙之夫家，九比之數，會萬民之卒伍，以起軍旅，作田役，比追胥，令貢賦，均土地以知其民數，經土地而井牧其田野。鄉師，下大夫四人。各掌所治鄉之教。○鄉老，二鄉則公一人。鄉大夫，每鄉則卿一人。萬二千五百家爲鄉，凡六鄉。鄉大夫掌其鄉之政教、禁令。州長，每州中大夫一人。長，丁丈反。○二千五百家爲州，凡三十州。州長各掌其州之教治政令。黨正，每黨下大夫一人。五百家爲黨，凡百五十黨。黨正各掌其黨之政令教治。族師，每族上士一人。百家爲族，凡七百五十族。族師各掌其族之戒令政事。閭胥，每閭中士一人。二十五家爲閭，凡三千閭。閭胥



各掌其間之徵令。比長，五家下士一人。比，毗志反。○五家爲比，凡一萬五千比。比長各掌其比之治。○封人，掌設王社壇及畿封樹，邦國都邑之社稷，封域鼓人，教六鼓四金之音，以節聲樂，和軍旅，正田役。舞師，教兵舞、帔舞、羽舞、皇舞、野舞。牧人，牧祭祀之牲。牛人，養公牛。充人。繫祭祀之牲。○載師，掌任土之法，稅官之長也。閭師，掌國中、四郊人民、六畜之數，以任其力，徵其賦。縣師，掌邦國都鄙人民、田萊之數，徵野之賦貢。遺人，遺，於季反。○掌委積以待施惠。均人。掌均地政、地守、地職。○師氏，中大夫。掌以嫺詔王，以德行教國子，居虎門，以司王朝，帥四隸以守王門，諫教官之長也。保氏，下大夫。掌諫王惡，以六藝、六儀教國子，守王闕。司諫，糾萬民之德，正其行而強之道藝。司救，掌萬民之寢惡過失而誅讓之。調人，司萬民之難而諧和之。媒氏。掌萬民之判，令嫁娶，聽陰訟。○司市，下大夫。掌市之治教政刑、量度禁令，市官之長也。質人，掌成市之貨賄、質劑、書

契、度量、淳制。廛人，廛，直連反。○掌斂市布。胥師，各掌其次之政令。賈師，賈，音古。○各掌其次之貨賄之治。司競，競，音暴。○掌憲市之禁令。司稽，掌巡市而察其犯禁、不物者。胥，各掌所治之政。肆長，長，丁丈反。○各掌其肆之政令。泉府。掌斂市之滯貨，以待買、以賒貸者。○司門，下大夫。掌授管鍵，以啟閉國門，幾出入不物者。司關，掌國貨之節。掌節。掌守邦節，以輔王命。○遂人，中大夫。掌經田野、造縣鄙之地域溝樹，使各掌其政令，簡其兵器，教之稼穡，以令貢賦、師田、政役之事，六遂都鄙官之長也。遂師，下大夫四人。各掌其遂之政令戒禁，以徵財征，作役事。遂大夫，每遂中大夫一人。萬二千五百家爲遂，凡六。遂大夫各掌其遂之政令，教稼穡，簡稼器，修稼政。縣正，每縣下大夫一人。二千五百家爲縣，縣正各掌其縣之政令徵比，趨其稼事。鄙師，每鄙上士一人。五百家爲鄙，鄙師各掌其鄙之政令祭祀。鄼長，每鄼中士一人。鄼，作管反。○百家爲

鄼，鄼長各掌其鄼之政令。里宰，每里下士一人。

二十五家爲里，里宰掌比其邑之衆寡、六畜、兵器，合耦于耜，以治稼穡。鄰長，五家一人。五家爲鄰，鄰長掌

相糾相受。○旅師，掌聚野之粟，春頒而秋斂之。稍

人，稍，所教反。○掌丘乘之政令。委人，委，於僞反。

○掌斂野之賦斂，薪芻、木材。土均，掌平土地之政。

草人，掌土化之法。稻人。掌稼下地。○土訓，掌

道地圖，道地慝。誦訓。掌道方志，道方慝。○山

虞，掌山林之政令，而爲之厲禁。林衡，掌巡林麓而平

其守。川衡，掌巡川澤而平其守。澤虞，掌國澤之政

令。迹人，掌邦田之政令。井人，井，號猛反。○掌金

玉錫石之地。角人，徵齒角。羽人，徵羽翮。掌葛，

徵絺綌。掌染草，掌炭，掌茶，掌蜃，囿人，場

人。掌場圃。○廩人，下大夫。掌九穀之數，穀官

之長也。舍人，掌平宮中之穀。倉人，掌粟人之藏。

司祿，司稼，掌巡野，觀稼，以年上下出斂法。春人，

共米，饋人，饋，●尺志反。○共盛。稟人。稟，苦報

反。○共內外朝穴食者之食。○乃立春官宗伯，使

帥其屬而掌邦禮，以佐王和邦國。大宗伯，

卿一人。掌以吉禮事鬼神示，以凶禮哀邦國之憂，以賓

禮親邦國，以軍禮同邦國，以嘉禮親萬民，以九儀之命正邦

國之位，以六瑞等邦國，以六摯等諸臣，以六器禮天地四

方，以中禮和樂，教萬民事鬼神，致百物。小宗伯，中

大夫二人。掌建國之神位，掌五禮之禁令，辨廟桃之昭

穆，辨五服、車旗、宮室，辨三族之親疏，掌其門子之政令，

毛六牲，辨六齎、六彝、六尊。肆師，下大夫四人。

掌立國祀之禮，序其祭祀。○鬱人，鬱，於物反。○掌

裸器和鬱鬯。鬯人，鬯，勅亮反。○共柎鬯。雞人，共

雞牲夜嘯旦。司尊彝，掌六尊、六彝。司几筵，掌五

几、五席。天府，掌祖廟之守藏。典瑞，掌玉瑞、玉器

之藏。典命，掌諸侯五儀、諸臣五等之命。司服，掌王

之吉凶衣服。典祀，掌外祀之兆守。守祧。守先王先

①「饋」，原作「饋」，據寬文本、賀本改。

公之廟祧。○世婦，每宮卿二人，下大夫四人。

掌女宮宿戒及祭祀。內宗，掌宗廟之祭祀，薦加豆籩。

外宗。掌宗廟之祭祀，佐后薦豆籩。○冢人，下大

夫。掌公墓。墓大夫，下大夫。掌邦墓。職喪。

掌凡有爵者之喪。○大司樂，中大夫。掌成均之

法，以治建國之學政，以樂德、樂語、樂舞教國子，以六律、

六同、五聲、八音、六舞大合樂，以致鬼神示，和邦國，諧萬

民，作動物，禁淫聲，樂官之長也。樂師，下大夫。掌

國學之政，教國子小舞，教樂儀。大胥，掌學士之版，以

待致諸子。小胥。掌學士之徵令而比之。大師，下

大夫。掌六律、六同，教六詩。小師，掌教鼓、鼗、祝、

敔、塤、簫、管、絃、歌。○瞽矇，矇，音蒙。○掌鼗、鼓、

祝、敔、塤、簫、琴、瑟及九德、六詩之歌。眡瞭，眡，音視。

瞭，音了。○掌凡樂事相瞽。典同，掌爲樂器。磬師，

鐘師，笙師，鐃師，鐃，音博。鞀師，鞀，音妹。○教

鞀樂。旄人，教舞散樂、夷樂。籥師，教國子舞羽吹

籥。○籥章，掌土鼓豳籥，以逆暑迎寒、祈年祭蜡。鞀

鞀氏，鞀，丁兮反。鞀，九具反。○掌夷樂。典庸器，

掌藏庸器樂器。司干。掌舞器。○大卜，下大夫。

掌三兆，三《易》、三夢之法，以邦事作八命，卜筮官之長也。

卜師，掌開龜之四兆。龜人，掌六龜之屬，取之、攻之、

釁之。蕀氏，蕀，時髓反。○掌共焦契。占人，掌占龜

筮。筮人，筮，音筮。○掌三《易》以辨九筮。占夢，占

六夢。眡侵。侵，子鳩反，又且衽反。○掌十輝以觀妖

祥。○大祝，下大夫。掌六祝、六祈，作六辭，辨六

號、九祭、九擗，祝官之長也。小祝，掌小祭之祝號。喪

祝，掌大喪勸防之事。甸祝，掌表貉之祝號。詛祝。

掌盟詛、類造、攻說、禴祭之祝號。○司巫，掌群巫之

政，巫官之長也。男巫，女巫。○大史，下大夫。

掌建邦之典法則，正歲年以序事，頒告朔于邦國，史官之長

也。小史，掌邦國之志。馮相氏，馮，音憑。相，息亮

反。○掌歲、月、辰、日、星之位。保章氏。掌志星、辰、

①「塤」，原脫，據賀本及上下文補。

②「羽」，原脫，據賀本補。

日、月之變。內史，中大夫。掌八柄以詔王治，書王命。外史，掌書外令、四方之志、三皇五帝之書，達書名于四方。御史。掌邦國都鄙萬民之治令，以贊冢宰。○巾車，下大夫。掌公車之政令。典路，掌五路車僕，掌車路之倅。司常。掌九旗。○都宗人，掌都祭祀之禮。家宗人，掌家祭祀之禮。凡以神仕者無數。○乃立夏官司馬，使帥其屬而掌邦政，以佐王平邦國。大司馬，卿一人。掌建邦國之九法，以佐王平邦國，以九伐之法正邦國，以九畿之籍施邦國之政，教振旅，芟舍，治兵，大閱，大合軍，以行禁令，以救無辜，伐有罪。小司馬，中大夫二人。軍司馬，下大夫四人。輿司馬，行司馬。○軍將命卿將，去聲。○萬二千五百人爲一軍。帥帥，中大夫。帥，所類反，下同。○二千五百人爲師。旅帥，下大夫。五百人爲旅。卒長，上士。長，丁丈反。○百人爲卒。兩司馬，中士。二十五人爲兩。伍長。長，丁丈反。○五人爲伍。○司勳，掌六鄉賞地，以等功。馬質，掌質馬。量人，量，音亮。○掌建國之法。

小子，掌祭祀，羞羊肆、羊骹、肉豆。羊人，掌羊牲。司燿。燿，古喚反。○掌行火之政令。○掌固，掌修城郭、溝池、樹渠之固，而頒其守。司險，掌九州山林川澤之阻，設溝涂而樹之，皆有守禁。掌疆，候人。各掌其方之道治。○環人，掌致師察軍慝。挈壺氏。挈壺以令軍井。○射人，下大夫。掌公、卿、大夫將射見王之位，以射法治射儀。○服不氏，養猛獸。射鳥氏，射，食亦反。羅氏，羅鳥鳥。掌畜。畜，許六反。○養鳥。○司士，下大夫。掌群臣之版，正朝儀之位，衛官之長也。諸子，下大夫。掌國子之倅。司右。掌群右之政令。虎賁氏，下大夫。賁，音奔。○掌先後王而趨。旅賁氏，賁，音奔。○夾王車。節服氏，維王之太常。方相氏。掌時難。○太僕，下大夫。○掌正王之服位，出入王之大命，建路鼓以達窮者及遽令，僕官之長也。小臣，掌王之小命，相王之小法儀。祭僕，掌眠祭祀而警戒其有司。御僕，掌群吏

①「下」，原作「中」，據元明本、寬文本、賀本改。

之逆、庶民之復。隸僕，掌五寢掃除糞洒之事。<sup>①</sup> ○弁師。掌五冕。○司甲，下大夫。兵官之長也。司兵，掌五兵五盾。司戈盾。盾，常允反。○司弓矢，下大夫。司弓官之長也。繕人，掌王之用弓弩。稟人。稟，占老反。○掌齋弓矢之工。○戎右，中大夫。占參乘也，掌戎車之兵革。齊右，下大夫。齊，側皆反。○掌前齊車。道右。掌前道車。○大馭，中大夫。馭，音御。○掌馭玉路。戎僕，中大夫。掌馭戎車。齊僕，齊，側皆反。○掌馭金路。道僕，掌馭象路。田僕，掌馭田路。馭夫。掌馭貳車，從車、使車。○校人，中大夫。校，戶教反。○掌王馬之政，馬官之長也。趣馬，趣，七走反。<sup>②</sup>○掌贊正良馬。巫馬，掌養疾馬。牧師，掌牧地。廋人，廋，所求反。○掌十有二閑之政教。圉師，圉，魚呂反，下同。○教養馬。圉人。掌養馬。○職方氏，中大夫四人，下大夫八人。掌天下之圖，辨九州九服之國，主四方官之長也。土方氏，掌土圭之法，以相宅建邦國都鄙。懷方氏，掌來遠民。合方氏，掌達道路同數器。

訓方氏，掌道四方之政事。形方氏，掌制邦國之地域。山師，掌山林名物。川師，掌川澤名物。遘師，遘，音元。○掌四方之地名名物。匡人，掌達法則匡邦國。撝人。撝，他南反。○掌誦王志巡邦國。○都司馬，掌都之車馬兵甲。家司馬。○乃立秋官司寇，使帥其屬而掌邦禁，以佐王刑邦國。大司寇，卿一人。掌建三典以詰四方，以五刑糾萬民，以圉土教罷民，以兩造禁民訟，以兩劑禁民獄，以嘉石平罷民，以肺石達窮民。小司寇，中大夫二人。掌外朝之政以詢萬民，以五聽求民情，以八辟附刑罰，以三刺斷獄訟。士師，下大夫四人。掌以五禁、左右刑罰，以五刑先後刑罰，掌上之八成。鄉士，各掌其鄉之獄訟。遂士，各掌其遂之獄訟。縣士，各掌其縣之獄訟。方士，掌都家之獄訟。訝士，掌四方之獄訟。朝士。朝，直遙反。○掌外朝之法。○司民。掌登萬民之數。

<sup>①</sup>「五」，原作「廟」，據賀本改。

<sup>②</sup>「走」，原作空格，據寬文本、賀本補。

○司刑，掌五刑之法。司刺。掌三刺、三宥、三赦之法。○司約，約，於妙反。○掌邦國萬民之約劑。司盟，掌盟載之法。職金，掌凡金玉錫石丹青之戒令。司厲。掌盜賊之任器貨賄。○犬人。掌犬牲。○司圜，收教罷民。掌囚，守盜賊。掌戮，掌殺戮。司隸，掌五隸。罪隸，役百官府。蠻隸，役校人。閩隸，閩，莫巾反。○役畜養鳥。夷隸，役牧人。貉隸，貉，孟百反。○役服不氏。布憲，掌憲刑禁。禁殺戮，掌司斬殺戮者。禁暴氏，掌禁庶民之亂暴。野廬氏，掌達道路。蜡氏，蜡，清預反。○掌除鼬。雍氏，雍，於勇反。○掌溝瀆澮池之禁。萍氏，掌水禁，幾酒、謹酒。司寤氏，掌夜時。司烜氏，烜，音毀。○掌取明水、火，修火禁。條狼氏，條，音滌。○掌執鞭以趨辟。修閭氏，掌比國中宿互櫟者。冥氏，掌攻猛獸。庶氏，庶，音煮。○除毒蟲。穴氏，攻蟄獸。罍氏，罍，音翅，失鼓反。○攻猛鳥。柞氏，柞，側百反。○攻草木。薙氏，薙，他計反。○殺草。荝族氏，荝，音摘。族，倉獨反。○覆天鳥之巢。翦氏，除蠹物。赤

友氏，友，音跋。○除牆屋。蠮氏，蠮，古獲反。○去竈。壺涿氏，涿，陟角反。○除水蟲。庭氏，射天鳥。銜枚氏，司嚙。伊耆氏。共杖咸。○大行人，中大夫。掌大賓、大客之禮儀，以親諸侯。此以下皆主賓客之官。小行人，下大夫。掌禮籍，以待四方之使者，達六節，成六瑞，合六幣。司儀，掌九儀以詔賓客擯相，儀容辭令揖讓之節。行夫，掌邦國傳遽之小事。環人，掌送迎賓客。象胥，掌傳王言。掌客，掌訝，掌交，掌以節與幣巡諸侯及萬民。①掌察，掌貨賄，朝大夫，朝，直遙反。○掌都家之國治。都則，都士，家士。○冬官司空亡。考工之屬，攻木之工：輪人，為輪為蓋。輿人，為車。車人，為車，為末。輶人，輶，張留反。○為輶。廬人，為廬器。匠人，建國，營國，為溝洫。弓人，為弓。梓人。為

①「象胥掌傳王言掌客掌訝掌交掌以節與幣巡諸侯及萬民」，原作「象胥掌以節與幣巡諸侯及萬民掌客掌訝掌交」，據賀本改。

侯，爲筍虞，爲飲器。攻金之工：築氏，爲削。冶

氏，爲殺矢。鳧氏，爲鐘。栗氏，栗，古栗字。○爲量。

段氏，段，丁亂反。○爲鑄。桃氏。爲劍。攻皮之

工：函人，爲甲。鮑人，鞞人，鞞，音運。○爲臯陶。

韋氏，裘氏。設色之工：畫績，鍾氏，染羽。

筐人，筐，音匡。幌氏。幌，莫黃反。○涑絲。刮摩

之工：刮，古八反。玉人，珣人，珣，側筆反。雕

人，磬氏，爲磬。矢人。爲矢。搏埴之工：搏，

音團，一音搏。埴，時職反。陶人，爲甗。旒人。旒，

甫往反。○爲簋。○凡執技以事上者，祝、史、

射、御、醫、卜及百工。言技，謂此七者。凡執技

以事上者，不貳事，不移官，欲專其事，亦爲不德。

出鄉不與士齒，賤也。於其鄉中則齒，親親也。仕

於家者，出鄉不與士齒。亦賤。①

儀禮集傳集註卷第三十二終

① 「賤」下，寬文本、賀本有「○王制」。

## 儀禮集傳集註卷第三十三

王制之己建侯

王朝禮十

凡建邦國，大司徒以土圭土其地而制其域，見《王制》篇，其與《周禮》不同者，鄭氏已言之矣。土方氏以土地相其宅，相，息亮反。○土地，猶度地，知東西南北之深而相其可居者。宅，居也。量人以建國之法量其城郭、宮室、市朝、道巷、門渠，量，音亮。朝，直遙反。○立國有舊法式，若《匠人》職云。太祝先告后土用牲幣，后土，社神也。封人設其社稷之壝而封其四疆。壝，維癸反。

《匠人》：營國，方九里。○鄭氏曰：

公之城方九里，宮廣九百步；侯、伯之城方七里，宮廣七百步；子、男之城方五里，

宮廣五百步。○《費誓》曰：魯人三郊三遂。費，音秘。○疏曰：三郊三遂，謂魯人三軍。《周禮·司徒》：萬二千五百家爲鄉。《司馬法》：「萬二千五百人爲軍。《小司徒》云：「凡起徒役，無過家一人。」是家出一人，一鄉爲一軍。天子六軍，出自六鄉，則諸侯大國三軍，亦當出自三鄉也。《周禮》又云：「萬二千五百家爲遂。」《遂人》職云：「以歲時稽其人民，簡其兵器，以起征役。」則六遂亦當出六軍。鄉爲正，遂爲副耳。鄭衆云：六遂之地，在王國百里之外。然則王國百里爲郊。鄉在郊內，遂在郊外。《釋地》云：「邑外謂之郊。」孫炎曰：「邑，國都也。」設百里之國，去國十里爲郊，則諸侯之制，亦當鄉在郊內，遂在郊外。此言三郊三遂者，三郊謂三鄉也。蓋使三鄉之民分在四郊之內，三遂之民分在四郊之外，鄉近於郊，故以郊言之。○《書大傳》曰：古者，百里之國，三十里之遂，二十里之郊，九里之城，三里之宮；七十里之國，二十里之遂，九里之郊，三里之城，一里之宮；五十里之國，九里之遂，



三里之郊，一里之城，以城爲宮。遂郊之門，執禁以譏異服，譏異言。<sup>①</sup>玄或疑焉。<sup>②</sup>

《匠人》云：「國方九里，謂天子城也。」今大國九里，則與天子同。《春秋傳》曰：「中五之一，小九之一。」以此推說，小國大都之城方百步，中都之城六十步，小都之城三十三步，<sup>③</sup>非也。然則大國七里之城，次國五里之城，<sup>④</sup>小國二里之城焉，爲近可也。或者，天子實十二里城，諸侯大國九里，次國七里，小國五里。○諸

侯之宮，三門三朝。其外門曰皋門，次曰應門，又次曰路門。應，應對之應。○鄭氏曰：

有庫、雉，無皋、應。其皋門內曰外朝，應門內

曰內朝，路門內曰路寢之朝。記曰：諸侯

朝服以日視朝於內朝，退適路寢聽政。鄭

氏曰：天子諸侯皆三朝，此內朝者，路門

外之正朝，猶天子之治朝也。路寢則猶天

子之內朝，而中門之外又自有外朝也。朝，

直遙反。

命諸侯，王位設黼依，依前南鄉設莞筵

紛純，加纁席畫純，加次席黼純，左右玉几。

黼，音甫。依，於豈反。鄉，音嚮。莞，音官。純，章允反。

纁，音早。○斧謂之黼，其黼白黑采，以絳帛爲質。依其制

如屏風然。於依前爲王設席，左右有几，優至尊也。鄭司

農云：紛，讀爲鹵，又讀爲和粉之粉，謂白繡也。純，讀爲

均服之均。純，緣也。纁，讀爲藻率之藻。次席，虎皮爲

席，《書·顧命》曰：「成王將崩，命大保、芮伯、畢公等被冕

服，憑玉几。」玄謂：紛如綬，有文而狹者。纁席，削蒲莢展

之，編以五采，若今合歡矣。畫，謂雲氣也。次席，桃枝席，

有次列成文。<sup>①</sup>宗伯儋，儋，必刃反。○儋，進之也。王

將出命，假祖廟，立依前南鄉。儋者進，當命者延之，命使

登。內史由王右以策命之，降，再拜稽首，登，受策以出。

此其略也。諸侯爵祿其臣，則於祭焉。內史策命之。

鄭司農說以《春秋傳》曰：王命「內史叔興父策命晉侯爲侯

<sup>①</sup>「遂郊之門執禁以譏異服譏異言」，原作雙行夾注，據賀本改。

<sup>②</sup>「玄」，原作「城」，據賀本改。

<sup>③</sup>「次國五里之城」，原脫，據賀本補。

<sup>④</sup>「文」下，寬文本，賀本有「○司几筵文」。

伯」，策謂以簡策書王命，其文曰：「王謂叔父：敬服王命，以綏四國，糾逖王慝。」<sup>①</sup>

傳：衛子魚曰：「武王克商，成王定之，選建明德，以蕃屏周。故周公相王室，以尹天下，蕃，方元反。相，息亮反。○尹，正也。於周爲睦。睦，親厚也，以盛德見親厚。分魯公以大路、大旂、魯公、伯禽也。此大路、金路，錫同姓諸侯車也。交龍爲旂，周禮同姓以封。夏后氏之璜、璜，音黃。○璜，美玉名。封父之繁弱，父，音甫。○封父，古諸侯也。繁弱，大弓名。殷民六族：條氏、徐氏、蕭氏、索氏、長勺氏、尾勺氏，使帥其宗氏，輯其分族，將其類醜，素，素各反。勺，示灼反。輯，音集。○醜，衆也。以法則周公，用即命于周。即，就也，使六族就周，受周公之法制。是使之職事于魯，共魯公之職事。以昭周公之明德。昭，顯也。分之士田陪敦。陪，步回反。○陪，增也。敦，厚也。祝、宗、

卜、史、大祝、宗人、大卜、大史，凡四官。備物、典策、典策，春秋之制。官司、彝器，官司，百官也。彝器，常用器。因商奄之民，商奄，國名也。與四國流言，或迸散在魯，皆令即屬魯懷柔之。命以《伯禽》。伯禽，周公世子。時周公唯遣伯禽之國，故皆以付伯禽。○今按：下文《康誥》、《唐誥》，則《伯禽》亦書名。而封於少皞之虛。少，詩照反。皞，胡老反。虛，起居反。○少皞虛，曲阜也，在魯城內。分康叔康叔，衛之祖。以大路、少帛、綉茷、旃旌、少，詩照反。綉，七見反。茷，步貝反。旃，章然反。○少帛，雜帛也。綉茷，大赤，取染草名也。通帛爲旃，析羽爲旌。大呂，鐘名。殷民七族：陶氏、施氏、繁氏、錡氏、樊氏、饑氏、終葵氏，封畛土略，自武父以南及圃田之北竟，繁，步間反。②錡，魚豈反。畛，之忍反。父，音甫。竟，音境。○畛，

① 「慝」下，賀本有「○春官」。

② 「閒」，原作「河」，據元明本、寬文本、賀本改。

塗所徑也。略，界也。武父，衛北界。圃田，鄭藪名。取於有閭之土以共王職，共，音恭。○有閭，衛所受朝宿邑，蓋近京畿。取於相土之東都以會王之東蒐。相，息亮反。○爲湯沐邑，王東巡守，以助祭泰山。聘季授土，聘，乃甘反。○聘季，周公弟，司空。陶叔授民，陶叔，司徒。命以《康誥》而封於殷虛，虛，起居反。○《康誥》，《周書》。殷虛，朝歌也。皆啟以商政，疆以周索。皆，魯，衛也。啟，開也，居殷故地，因其風俗，開用其政。疆理土地以周法。索，法也。分唐叔唐叔，晉之祖。以大路密須之鼓，密須，國名。闕鞶，鞶，九勇反。○甲名。姑洗，洗，息典反。○鐘名。懷姓九宗，職官五正。懷姓，唐之餘民。九宗，一姓爲九族。職官五正，五官之長。命以《唐誥》而封於夏虛，虛，起居反。○《唐誥》，誥命篇名也。夏虛，大夏，今太原晉陽也。啟以夏政，亦因夏風俗，開用其政。①疆以戎索。」太原近戎而寒，不與中國同，故

自以戎法。○今按：策命晉文公乃爲侯伯，非封國也。《伯禽》、《唐誥》之篇，今亦亡逸，而《康誥》又非策命，唯《微子》、《蔡仲之命》，乃封國策命之詞也。○《左氏》定公四年。

《冢宰》：施六典于邦國，建其牧，立其監，設其參，傳其伍，陳其殷，置其輔。監，古陷反。參，七南反。傳，音附。○侯，伯有功德者加命作州長，謂之牧，所謂八命作牧者。監，謂公、侯、伯、子、男各監一國。參，謂鄉三人。伍，謂大夫五人。殷，衆也，謂衆士也。《王制》：「諸侯上士二十七人。」其中七，下士各居其上之三分。輔，府史，庶人在官者。○今按：監，疑謂天子大夫爲二監者。蓋謂之邦國則固有君矣，但建牧立監以總之，設卿大夫上吏以輔之耳。○《天官》。

《牧誓》曰：司徒、司馬、司空。《左氏》曰：魯季孫爲司徒，叔孫爲司馬，孟孫爲司空。《內則》曰：后王命冢宰，降德於衆兆民。《左氏》又曰：宋華元爲右師，魚

①「用」，原作「明」，據元明本、寬文本、賀本改。

石爲左師，蕩澤爲司馬，華喜爲司徒，公孫師爲司城，向爲人爲大司寇，鱗朱爲少司寇，向帶爲大宰，魚府爲少宰。華，胡化反。向，所亮反。少，詩照反。○今按：《牧誓》所云，蓋未克商時侯國之官，故《內則》以冢宰敷教，而鄭氏以爲諸侯并六卿爲三，故以司徒兼冢宰，皆諸侯三卿之證也。唯宋得備六官，說者以爲二王之後得用天子制度，理或然也。

以九貢致其用：一曰祀貢，二曰嬪貢，三曰器貢，四曰幣貢，五曰材貢，六曰貨貢，七曰服貢，八曰旂貢，九曰物貢。嬪，音頻。○嬪，故書作「賓」。鄭司農云：祀貢，犧牲包茅之屬。賓貢，皮帛之屬。器貢，宗廟之器。幣貢，繡帛。材貢，木材也。貨貢，珠貝自然之物也。服貢，祭服。旂貢，羽毛。物貢，九州之外，各以其所貴爲摯，肅慎氏貢楛矢之屬是也。玄謂：嬪貢，絲枲。器貢，銀鐵石磐丹漆也。幣貢，玉馬皮帛也。材貢，杅榦栝柏篠簜也。貨貢，金玉龜貝也。服貢，絺紵也。旂讀如罔游之游，旂貢，燕好珠璣琅玕也。物貢，雜

物，魚鹽橘柚。以九兩繫其民：一曰牧，以地得民；二曰長，以貴得民；三曰師，以賢得民；四曰儒，以道得民；五曰宗，以族得民；六曰主，以利得民；七曰吏，以治得民；八曰友，以任得民；九曰覲，以富得民。長，丁丈反。覲，素口反。○兩，猶耦也，所以協耦萬民。繫，聯綴也。牧，州長也，九州各有封域以居民也。長，諸侯也，一邦之貴，民所仰也。師，諸侯師氏，有德行以教民者。儒，諸侯保氏有六藝以教民者。宗，繼別爲大宗收族者。鄭司農云：主，謂公卿大夫，世世食采不絕，民稅薄利之。玄謂：利，讀如上思利民之利，謂以政教利之。吏，小吏在鄉邑者。友，謂同井相合耦勸作者。《孟子》曰：「鄉田同井，出入相友，守望相助，疾病相扶持，則百姓親睦。」覲亦有虞，掌其政令，爲之厲禁，使其地之民守其材物，以時入于王府，頒其餘於萬民。富，謂覲中材物。○《大祝》：頒祭號于邦國都鄙。祭號，六號。○《太史》：頒告朔于其國。天子班朔于諸侯，諸侯藏之祖廟，至朔朝于廟，告而受行之。鄭司農曰：頒讀爲班，

班，布也，以十二月朔布告天下諸侯，故《春秋傳》曰：「不書日，官失之也。」

記曰：諸侯皮弁以聽朔于太廟。《春

秋》魯文公六年閏月，不告朔，猶朝于廟。朝，直遙反。十六年夏五月，公四不視朔。

《論語》：「子貢欲去告朔之餼羊，子曰：

『爾愛其羊，我愛其禮。』」餼，許氣反。傳

曰：諸侯受十二月朔政於天子，藏於大祖

廟。每月朔朝廟，使大夫南面奉天子命，

君北面而受之。此時使有司先告朔，慎之

至也。受於廟者，孝子歸美先君，不敢自

專也。言朝者，緣生以事死。親在朝，朝

莫夕已死，不敢渫鬼神故也。必于朔者，

感月始生而朝也。朝朝，上如字，下直遙反。莫，

音暮。渫，息列反。

《大宗伯》：以九儀之命正邦國之位：

壹命受職，再命受服，三命受位，四命受器，

五命賜則，六命賜官，七命賜國，八命作牧，九命作伯。注見《設官》篇。○《典命》：掌其五

儀，曰：上公九命爲伯，其國家、宮室、車旗、

衣服、禮儀皆以九爲節；侯、伯七命，其國

家、宮室、車旗、衣服、禮儀皆以七爲節；

子、男五命，其國家、宮室、車旗、衣服、禮儀

皆以五爲節。王之三公八命，其卿六命，其

大夫四命。及其出封，皆加一等，其國家、宮

室、車旗、衣服、禮儀亦如之。○《大司馬》：

掌建邦國之九法以佐王平邦國。平，成也，正

也。制畿封國，以正邦國；封，謂立封於疆爲界。

設儀辨位，以等邦國；儀，謂諸侯及諸臣之儀。辨，

別也，別尊卑之位。進賢興功，以作邦國；興，猶舉

也。作，起也。起其勸善樂業之心，使不惰廢。建牧立

監，以維邦國；監，古陷反。○牧，州牧也。監，監一

國，謂君也。維，猶聯結也。制軍詰禁，以糾邦

國；詰，猶窮治也。糾，猶正也。施貢分職，以任邦

國；職，謂賦稅也。任，猶事也，事以其力之所堪。簡稽鄉民，以用邦國；簡，謂比數之。稽，猶計也。均守平則，以安邦國；諸侯有土地者均之，尊者守大，卑者守小。則，法也。比小事大，以和邦國，比，毗志反。○比，猶親，使大國親小國，小國事大國，相合和也。又使其屬合方氏者：達其道路，津梁相湊，不得陷絕。通其財利，茂遷其有無。同其數器，權衡不得有輕重。壹其度量，量，音亮。○尺丈釜鍾不得有大小。除其怨惡，惡，烏路反。○怨惡邦國相侵虐。同其好善。好，呼報反。○所好所善，謂風俗所高尚。擲人者：誦王志，道國之政事，以巡天下之邦國而語之，擲，吐南反。語，魚據反。○道，猶言也。以王之志與政事論說諸侯，使不迷惑。使萬民和說而正王面。說，音悅。○面，猶鄉也，使民之心曉而正鄉王。○《司服》：辨其服曰：公之服自衮冕而下，如王之服；侯、伯之服自鷩冕而下，如公之服；子、男之服自毳冕而下，如侯伯之服。

驚，普滅反。毳，昌銳反。○《典瑞》：掌其瑞曰：公執桓圭，侯執信圭，伯執躬圭，子執穀璧，男執蒲璧。信，音申。○《巾車》：掌其車曰：金路以封同姓，象路以封異姓，革路以封四衛，木路以封蕃國。以上註見《名器》篇。○《大宗伯》：以脤膾之禮，親兄弟之國。脤，時忍反。膾，音煩。○脤膾，社稷宗廟之肉，以賜同姓之國，同福祿也。兄弟有共先王者，魯定公十四年，天王使石尚來歸脤。以賀慶之禮，親異姓之國。異姓，王昏姻甥舅。以賓禮親邦國。親，謂使之相親附，賓禮之別有八。曰：春見曰朝，夏見曰宗，秋見曰覲，冬見曰遇；時見曰會，殷見曰同，時聘曰問，殷覲曰視。見，賢遍反。朝，直遙反。覲，他弔反。○注見《朝聘篇》。以軍禮同邦國，曰：大師之禮，用衆也；大均之禮，恤衆也；大田之禮，簡衆也；大役之禮，任衆也；大封之禮，合衆也。註見《軍禮》篇。以凶禮哀其憂，哀，謂救患分戕，凶

禮之別有五。

曰：①以喪禮哀死亡，哀，謂親者服

焉，疏者含槨。

以荒禮哀凶札，札，側八反。○荒，人

物有害也。《曲禮》曰：「歲凶，年穀不登，君膳不祭肺，馬

不食穀，馳道不除，祭事不懸，大夫不食粱，士飲酒不樂。」

札讀爲截，截謂疫癘。以弔禮哀禍裁，禍裁，謂遭水

火。宋大水，魯莊公使人弔焉，曰：「天作淫雨，害於衆盛，

如何不弔？」廋焚，孔子拜鄉人爲火來者，拜之，上一，大夫

再，亦相弔之道。以檜禮哀圍敗，檜，戶外反。○同

盟者合會財貨，以更其所喪。《春秋》襄三十年冬，「會于澶

淵，宋裁故」，是其類。以恤禮哀寇亂。恤，憂也，鄰

國相憂。兵作於外爲寇，作於內爲亂。○《大司馬》：

以九伐之法正邦國：馮弱犯寡，則眚之；賊

賢害民，則伐之；暴內陵外，則壇之；野荒

民散，則削之；負固不服，則侵之；賊殺其

親，則正之；放弑其君，則殘之；犯令陵政，

則杜之；外內亂，鳥獸行，則滅之。馮，皮冰反。

眚，所景反。壇，音善。行，下孟反。○註見《軍禮》篇。○

以上並《周禮》。○《書》曰：「三載考績，三考，

黜陟幽明。」其訓曰：三歲而小考者，正職而

行事也。九歲而大考者，黜無職而賞有功

也。其賞有功也，諸侯賜弓矢者，得專征；

賜鈇鉞者，得專殺；賜圭瓚者，得爲鬯以祭。

不得專征者，以兵屬於得專征之國；鈇，方于

反。鉞，音越。瓚，才旦反。鬯，勅亮反。○《春秋傳》曰：

魯賦八百，邾賦六百，以屬於晉。由是也。不得專殺

者，以獄屬於專殺之國；不得賜圭瓚者，資

鬯於天子之國然後祭。資，取也。○又曰：諸

侯得專征者，鄰國有臣弑其君，孽伐其宗，雖

有請於天子而征之可也，征而歸其地於天

子。孽，魚列反。○孽，支子也。宗，適子也。征，伐也。

○諸侯之有不率正者，天子紂之：紂，音出。○

率，循也。正，政也。一紂，少紂以爵；謂三年時也。

言少紂，明以漸也。再紂，少紂以地；謂六年時也。

再紂，少紂以地；謂六年時也。

再紂，少紂以地；謂六年時也。

再紂，少紂以地；謂六年時也。

再紂，少紂以地；謂六年時也。

①「曰」，原脫，據賀本補。

三紂而地畢。以上《尚書大傳》。

周平王錫晉文侯柎鬯一卣、彤弓一、

彤矢百、盧弓一、盧矢百、馬四匹。柎，音巨。

鬯，敕亮反。卣，由手反。彤，徒冬反。○黑黍曰柎，釀

以鬯草，不言圭瓚，可知卣中罇也。當以錫命告其始祖，

故賜鬯。彤，赤。盧，黑也。馬四匹曰乘。○《書·文侯

之命》。○齊桓公會諸侯于葵丘，王使宰孔

賜齊侯胙，胙，音祚。○胙，祭肉。尊之，比二王後。

賞服大路、龍旂九旒、渠門赤旂。旂，音祈。

旒，音流。○大路，謂金路，鉤樊纓九就。龍旂，畫交龍

於繆也，正幅爲繆，旁屬爲旒。鉤，婁領之鉤。樊，馬大

帶，纓當胸，削革爲之，皆以五采屬飾之。九就，就，成

也。渠門，兩旗所建，以爲軍門，若今牙門也。○《齊

語》。○晉文公以諸侯之師及楚人戰于城

濮，楚師敗績，獻楚俘於王：駟介百乘，徒

兵千人。濮，音卜。乘，去聲。○駟介，四馬被甲。徒

兵，步卒。王命尹氏及王子虎、內史叔興父

策命晉侯爲侯伯，父，音甫。○以策書命晉侯爲伯

也。《周禮》：「九命作伯。」尹氏、王子虎，皆王卿士也。

叔興父，大夫也。三官命之，以寵晉。賜之大輅之

服、戎輅之服，輅，音路。○大輅，金輅。戎輅，戎

車。二輅各有服。彤弓一，彤矢百，旅弓矢千，

彤，徒冬反。旅，音盧。○彤，赤弓。旅，黑弓。弓一矢

百，則矢千弓十矣。諸侯賜弓矢，然後專征伐。柎鬯

一卣，柎，音巨。鬯，敕亮反。卣，由手反。○柎，黑

黍。鬯，香酒，所以降神。卣，器名。虎賁三百人，

曰：「王謂叔父：『敬服王命，以綏四國，糾

逖王慝。』」賁，音奔。逖，敕力反。慝，吐得反。○

逖，遠也。有惡於王者，糾而遠之。晉侯三辭，從

命，曰：「重耳敢再拜稽首，奉揚天子之丕

顯休命。」重，直龍反。稽，音啟。○稽首，首至地。

丕，大也。休，美也。受策以出，出入三覲。出

人，猶去來也。從來至去，凡三見王。○《左·僖公二十

八年》。○舜曰：「咨，禹！惟時有苗弗率，汝

徂征。」禹乃會群后，誓于師曰：「蠢茲有



苗，昏迷不恭，侮慢自賢，反道敗德。肆予以爾衆士，奉辭罰罪。爾尚一乃心力，其克有勳。」蠹，春允反。○《書·大禹謨》。○啟與有扈戰于甘之野，王曰：「有扈氏威侮五行，怠棄三正，天用勳絕其命，今予惟恭行天之罰。」扈，音戶。勳，子小反。○《書·甘誓》。○惟仲康肇位四海，胤侯命掌六師。羲和廢厥職，酒荒于厥邑，胤后承王命徂征，告于衆曰：「惟時羲和顛覆厥德，沉亂于酒，畔官離次，昏迷于天象，以干先王之誅。今予以爾有衆，奉將天罰。爾衆士同力王室，尚弼予欽承天子威命。」肇，音兆。胤，引證反。○《書·胤征》。○諸侯朝正於王，朝，直遙反。○朝而受政教也。王宴樂之，於是乎賦《湛露》，則天子當陽，諸侯用命也。樂，音洛。湛，直減反。○《湛露》曰：「湛湛露斯，匪陽不晞。」晞，乾也。言露見日而乾，猶諸侯稟天子命而行。諸侯敵

王所憫而獻其功，憫，苦愛反。○敵，猶當也。憫，恨怒也。王於是乎賜之彤弓一、彤矢百，旅弓矢千，以覺報宴。彤，徒冬反。旅，音盧。○覺，明也。謂諸侯有四夷之功，王賜之弓矢，又爲歌《彤弓》，以明報功宴樂。○《左氏傳》文公四年。○凡諸侯有四夷之功，則獻于王，王以警于夷，以警懼夷狄。中國則否，諸侯不相遺俘。遺，維季反。○雖夷狄俘，猶不以相遺。○《左氏傳》莊公三十一年。○禮：諸侯三年一貢士於天子，天子命與諸侯輔助爲政，所以通賢共治，示不獨專重民之至。大國舉三人，次國舉二人，小國舉一人。一適謂之好德，再適謂之賢賢，三適謂之有功。不適謂之過，再不適謂之傲，三不適謂之誣。好，呼報反。❶○天子賜諸侯之樂，則以祝將之；賜伯子

❶ 「反」下，寬文本、賀本有「○尚書大傳」。

男樂，則以鼗將之。柷，昌六反。○將，謂執以致命。柷，鼗，皆所以節樂。○《王制》。

衛武公年數九十有五矣，猶箴儆於國曰：「自卿以下至於師長士，苟在朝者，無謂我老耄而舍我，必恭恪於朝，朝夕以交戒我；聞一二之言，必誦志而納之，以訓道我。」箴，音針。長，丁丈反。耄，莫報反。舍，音捨。在朝，於朝之朝，直遙反。道，音導。○言，謗譽之言也。志，記也。在輿有旅賁之規，賁，音奔。○規，規諫也。旅賁，勇力之士，掌執戈楯夾車而趨，車止則持輪。位宁有官師之典，宁，直吕反。○中庭之左右謂之位，門屏之間謂之宁。師，長也。典，常也。倚几有誦訓之諫，誦訓，工師所誦之諫，書之於几也。居寢有替御之箴，替，音薛。○替，近也。臨事有瞽史之道，道，音導。○事，戎祀也。瞽，樂太師，掌詔吉凶。史，太史也，掌詔禮事。宴居有師工之誦，師，樂師。工，替瞽也。誦，謂箴諫也。史不失書，矇不失誦，以訓御

之，矇，音蒙。○御，進也。於是乎作《懿》，戒以自儆也。三君云：《懿》，戒書也。昭謂：《懿》，《詩·大雅·抑》之篇也。懿，讀曰抑，毛《詩·敍》曰：「《抑》，衛武公刺厲王，亦以自儆也。」及其沒也，謂之叡聖武公。叡，悅歲反。○《楚語》。○衛獻公出奔齊。師曠侍於晉侯，師曠，晉樂大師子野。晉侯曰：「衛人出其君，不亦甚乎？」對曰：「或者其君實甚。良君將賞善而刑淫，養民如子，蓋之如天，容之如地；民奉其君，愛之如父母，仰之如日月，敬之如神明，畏之如雷霆，其可出乎？天生民而立之君，使司牧之，勿使失性。有君而爲之貳，貳，卿佐。使師保之，勿使過度。是故天子有公，諸侯有卿，卿置側室，側室，支子之官。大夫有貳宗，貳宗，宗子之副貳者。士有朋友，庶人工商，皁隸牧圉皆有親暱，以相輔佐也。善則賞之，皁，在早反。暱，女乙反。○賞，謂宣揚。過則匡之，匡，正也。患則救之，救其

難也。失則革之。革，更也。自王以下各有父兄子弟以補察其政。補其愆過，察其得失。史爲書，誓爲詩，工誦箴諫，大夫規誨，士傳言，庶人謗，商旅于市，百工獻藝。故《夏書》曰：「道人以木鐸徇于路，傳，直專反。適，在由反。鐸，徒各反。徇，以俊反。○逸《書》。道人，行令之官也。木鐸，木舌金鈴。徇于路，求歌謠之言。」官師相規，官師大夫，自相規正。工執藝事以諫。」所謂獻藝。正月孟春，于是乎有之，諫失常也。有道人徇路。夫君，神之主而民之望也。若困民之主，匱神乏祀，百姓絕望，社稷無主，將安用之？弗去何爲？天之愛民甚矣，豈其使一人肆於民上？」夫，音扶。去，起吕反。○肆，放也。以從其淫而棄天地之性必不然矣。從，于用反。○《左氏傳》襄公十四年。○孔子曰：「在上不驕，高而不危。制節謹度，滿而不溢。高而不危，所以長守貴也。滿而不溢，所以長守富

也。富貴不離其身，然後能保其社稷而和其民人，蓋諸侯之孝也。《詩》云：「戰戰兢兢，如臨深淵，如履薄冰。」離，力智反。兢，居陵反。○《孝經》。○子曰：「道千乘之國，敬事而信，節用而愛人，使民以時。」道，音導。乘，去聲。○《論語》。○又曰：「諸侯有爭臣五人，雖無道，不失其國。」爭，音諍。○《孝經》。○辛伯諗周桓公曰：「內寵並后，外寵貳政，嬖子配適，大都偶國，亂之本也。」諗，音審。適，音嫡。○《左氏傳》閔公二年。

傳曰：始封諸侯無子，死不得與兄弟何？古者象賢也，弟非賢者，子孫至繼體。諸侯無子得及親屬者，以其俱賢者，子孫也重其先祖之功，故得及之。《禮·服》傳曰：「大宗不可絕，同宗則可以爲後。」王者受命而作，興滅國，繼絕世何？爲先王無道，妄殺無辜，及嗣子幼弱，爲強臣所

奪，子孫皆無罪因而絕，重其先人之功，故復立之。誅君之子不立者，義無所繼也。

諸侯世位，象賢也，今親被誅絕也。《春秋傳》曰：「誅君之子不立。」君見弑其子得立何？以尊君防篡弑也。大夫功成未封，子得封者善，善及子孫也。諸侯入爲公卿大夫，得食兩家采，不曰有能，然後居其位，德加於人，然後食其祿，所以尊賢重有德也。今以盛德人輔佐兩食之何？

《王制》曰：「天子之縣內諸侯，祿也；外諸侯，嗣也。」天子太子食采者，儲君嗣主也，當有士以尊之也。太子食百里，與諸侯封同，故禮曰：公仕大夫子，子也無爵而在大夫上，故知百里也。公卿大夫皆食采者，示與民同有無也。世子三年喪畢，必上受爵命於天子何？明爵土者天子之有也，臣無自爵之義。童子當受父爵，命

使大夫就其國命之，明王者不與童子爲禮也。

儀禮集傳集註卷第三十三終

## 儀禮集傳集註卷第三十四

王制之庚名器上王朝禮十一<sup>①</sup>

君天下曰「天子」，朝諸侯，分職，授政，任功，曰「予一人」。朝，直遙反。○皆擯者辭也。天下，謂外及四海也。今漢於蠻夷稱天子，於王侯稱皇帝。《觀禮》曰：「伯父實來，余一人嘉之。」余，予，古今字耳。踐阼，臨祭祀，內事曰「孝王某」，外事曰「嗣王某」。阼，存故反。○皆祝辭也。唯宗廟稱孝，天地社稷祭之郊內，而曰嗣王，不敢同外內。臨諸侯，眡於鬼神，曰「有天王某甫」。眡，之忍反。○眡，致也，祝告致于鬼神辭也。<sup>②</sup>曰「有天王某甫」，某甫，且字也。不名者，不親往也。《周禮》：大會同，過山川，則大祝用事焉。鬼神，謂百辟卿士也。眡，或爲「祗」。崩，曰「天

王崩」。史書策辭。復，曰「天子復矣」。始死時呼魂辭也。不呼名，臣不名君也，諸侯呼字。告喪，曰「天王登假」。假，音遐。○告，赴也。登，上也。假，已也。上已者，若仙去云耳。措之廟，立之主，曰「帝」。措，七故反。○同之天神。《春秋傳》曰：凡君卒哭而祔，祔而作主。天子未除喪，曰「予小子」。謙，未敢稱「一人」。《春秋傳》曰：「以諸侯之踰年即位，亦知天子之踰年即位。以天子三年然後稱王，亦知諸侯於其封內三年稱子。」生名之，死亦名之。生名之曰小子王，死亦曰小子王也。晉有小子侯，是僭取於天子號也。五官致貢曰享。貢，功也。享，獻也。致其歲終之功於王，謂之獻也。《周禮·大宰》：「歲終，則令百官府各正其治，受其會，聽其致事，而詔王廢置。」五官之長曰「伯」，長，丁丈反。○謂爲三公者，《周禮》：「九命作伯。」

① 「禮十一」，原脫，據賀本補。

② 「祝」，原作「祀」，據寬文本、賀本改。「致」，原作「至」，據賀本改。

是職方。職，主也，是伯分主東西者。《春秋傳》曰：「自陝以東，周公主之；自陝以西，召公主之。一相處乎內。」是，或爲「氏」。其擯於天子也，曰「天子之吏」。擯，必刃反。○擯者辭也。《春秋傳》曰：「王命委之三吏。」謂三公也。天子同姓謂之「伯父」，異姓謂之「伯舅」，自稱於諸侯曰「天子之老」，於外曰「公」，於其國曰「君」。稱之以父與舅，親親之辭也。外，自其私上之外，天子畿內。九州之長入天子之國曰「牧」。長，丁丈反。○每一州之中，天子選諸侯之賢者以爲之牧也，《周禮》曰：「乃施典於邦國而建其牧。」天子同姓謂之「叔父」，異姓謂之「叔舅」，於外曰「侯」，於其國曰「君」。牧尊於大國之君而謂之叔父，辟「伯」也，亦以此爲尊。禮或損之而益，謂此類也。外，自其國之外。九州之中曰侯者，本爵也。二王之後不爲牧。其在東夷、北狄、西戎、南蠻，雖大曰「子」。謂九州之外長也，天子亦選其諸侯之賢者以爲之子，子猶牧也。入天子之國曰子，天子亦謂之子，雖有侯、伯之地，本爵亦無過乎子，是以同名曰子。於內自

稱曰「不穀」，與民言之謙稱。穀，善也。於外自稱曰「王老」。威遠國也。外，亦其戎狄之中。庶方小侯入天子之國曰「某人」，於外曰「子」，自稱曰「孤」。謂戎狄子、男君也。男者於外亦曰男，舉尊言之。諸侯見天子曰「臣某侯某」。見，賢遍反。○謂盛夫承命告天子辭也。其爲州牧，則曰「天子之老臣某侯某奉圭請覲」。某侯者，國名。某者，人名。其與民言，自稱曰「寡人」。謙也，於臣亦然。其在凶服，曰「適子孤」。適，音的。○凶服，亦謂未除喪。臨祭祀，內事曰「孝子某侯某」，外事曰「曾孫某侯某」。稱國者遠辟天子。死曰「薨」，亦史書策辭。復曰「某甫復矣」。某甫，且字。既葬，見天子曰「類見」。見，賢遍反。○代父受國。類，猶象也。執皮帛，象諸侯之禮見也，其禮亡。言謚曰「類」。使大夫行，象聘問之禮也。言謚者，序其行及謚所宜，其禮亡。諸侯使人使於諸侯，使者自稱曰「寡君之老」。使於、使者之使，色吏反。○繫於君，以爲尊也。

此謂諸侯之卿，上大夫。列國之大夫入天子之國曰「某士」，亦謂諸侯之卿也。三命以下，於天子爲士。曰某士者，若晉韓起聘於周，擯者曰「晉士起」。自稱曰「陪臣某」。陪，步回反。○陪，重也。於外曰「子」，子，有德之稱，魯《春秋》曰：「齊高子來盟。」於其國曰「寡君之老」，使者自稱曰「某」。使，色吏反。○使，謂使人於諸侯也。某，名也。○《曲禮》。○凡自稱，天子曰「予一人」，謙自別於人而已。伯曰「天子之力臣」。伯，上公九命，分陝者。諸侯之於天子曰「某士之守臣某」，其在邊邑曰「某屏之臣某」，其於敵以下曰「寡人」。小國之君曰「孤」，擯者亦曰「孤」。守，手又反。○邊邑，謂九州之外。大國之君自稱曰「寡人」，擯者曰「寡君」。上大夫曰「下臣」，擯者曰「寡君之老」。下大夫自名，擯者曰「寡大夫」。世子自名，擯者曰「寡君之適」。適，音的。○擯者之辭主，謂見於他國君。下大夫自名於他國君曰「外臣某」。公子曰「臣

孽」。孽，依註五葛反。○孽，當作「桀」，聲之誤。士曰「傳遽之臣」，於大夫曰「外私」。傳，陟戀反。遽，其庶反。○傳遽，以車馬給使者也。士臣於大夫者曰「私人」。大夫私事使，私人擯則稱名。使，色吏反。○私事使，謂以君命私行，非聘也。若魯成公時，晉侯使韓穿來言汶陽之田，歸之于齊之類。公士擯，則曰「寡大夫」、「寡君之老」。大夫有所往，必與公士爲賓也。賓，必刃反。○謂聘也，大聘使上大夫，小聘使下大夫。公士爲賓，謂作介也。往，之也。○《玉藻》。○國君不名卿老世婦，大夫不名世臣姪娣，士不名家相長妾。姪，大結反。娣，大計反。相，息亮反。長，丁丈反。○雖貴，於其國家猶有所尊也。卿老，上卿也。世臣，父時老臣。○君大夫之子，不敢自稱曰「余小子」，辟天子之子未除喪之名。君大夫，天子大夫有土地者。不敢與世子同名。辟僭倣也，其先之生，則亦不改。世，或爲「大」。○天子有后，有夫人，有世婦，有嬪，有妾，有妾。嬪，音

頻。○妻，八十一御妻，《周禮》謂之女御，以其御序於王之燕寢。妾，賤者。公侯有夫人，有世婦，有妻，有妾。貶於天子也，無后與嬪，去上中。天子之妃曰「后」，后之言後也。諸侯曰「夫人」，夫之言扶。大夫曰「孺人」，孺之言屬。士曰「婦人」，婦之言服。庶人曰「妻」。妻之言齊。夫人自稱於天子曰「老婦」，自稱於天子，謂畿內諸侯之夫人助祭，若時事見。自稱於諸侯曰「寡小君」，謂饗來朝諸侯之時。自稱於其君曰「小童」。自世婦以下，自稱曰「婢子」。小童，若云未成人也。婢之言卑也。於其君稱此，以接見體敵，嫌其當。○《曲禮》。○天子玉藻，十有二旒，前後邃延，龍卷以祭。旒，力求反。邃，雖醉反。卷，音衮。○祭先王之服也。雜采曰藻。天子以五采藻爲旒，旒十有二。前後邃延者，言皆出冕前後而垂也。天子齊肩，延冕上覆也，玄表纁裏。龍卷，畫龍於衣，字或作「衮」。疑畫蟠龍，故謂之卷。玄端而朝，日於東門之外，聽朔於南門之外。閏月則闔門

左扉，立于其中。朝，直遙反。闔，胡臘反。扉，音非。○端，當爲「冕」，字之誤也。玄衣而冕，冕服之下。朝日，春分之時也。東門、南門，皆謂國門也。天子廟及路寢皆如明堂制，明堂在國之陽，每月就其時之堂而聽朔焉。卒事反宿路寢，亦如之。閏月，非常月也。聽其朔於明堂門中，還處路寢門終月。凡聽朔，必以特牲告其帝及神，配以文王、武王。皮弁以日視朝，遂以食；日中而餽，奏而食。日少牢，朔月大牢。朝，直遙反。餽，音俊。少，詩照反。大，音泰。○餽，食，朝之餘也。奏，奏樂也。五飲：上水、漿、酒、醴、醕。醕，以支反。○上水，水爲上，餘其次之。卒食，玄端而居。天子服玄端燕居也。動則左史書之，言則右史書之，其書，《春秋》、《尚書》其存者。御瞽幾聲之上。瞽，音古。○瞽，樂人也。幾，猶察也，察其哀樂。○諸侯玄端以祭，祭先君也。端，亦當爲「冕」，字之誤也。諸侯祭宗廟之服，唯魯與天子同。裨冕以朝，朝，直遙反，下同。○朝天子也。裨冕：公衮，侯、伯鷩，子、男毳也。皮弁以聽朔於大廟，大，音泰。○皮



弁，下天子也。朝服以日視朝於內朝。朝服，冠玄端素裳也。此內朝，路寢門外之正朝也，天子、諸侯皆三朝。朝，辨色始入。群臣也。入，入應門也。辨，猶正也，別也。君日出而視之，退適路寢聽政，使人視大夫，大夫退，然後適小寢釋服。小寢，燕寢也。釋服，服玄端。又朝服以食，特牲，三俎，祭肺；食必復朝服，所以敬養身也。三俎，豕、魚、腊。夕深衣，祭牢肉。祭牢肉，異於始殺也。天子言日中，諸侯言夕，天子言餼，諸侯言祭牢肉，互相挾。朔月少牢，五俎四簋。簋，音軌。○五俎，加羊與其腸胃也。朔月四簋，則日食稻粱各一簋而已。子卯稷食菜羹。食，音嗣。○忌日貶也。夫人與君同庖。庖，步交反。○不特殺也。君無故不殺牛，大夫無故不殺羊，士無故不殺犬、豕。故，謂祭祀之屬。君子遠庖廚，凡有血氣之類弗身踐也。遠，于萬反。○踐，當爲「翦」，聲之誤也。翦，猶殺也。○《玉藻》。○王之五冕，皆玄冕朱裏延紐，紐，女九反。○冕服

有六，而言五冕者，大裘之冕蓋無旒，不聯數也。延冕之覆在上，是以名焉。紐，小鼻在武上，笄所貫也，今時冠卷當簪者，廣表以冠繼，其舊象與？五采纁十有二，就皆五采玉十有二，玉笄朱紘。纁，音藻。笄，古兮反。紘，音宏。○纁，雜文之名也，合五采絲爲之繩，垂于延之前後各十二，所謂邃延也。就，成也。繩之每一匝而貫五采玉，十二旒則十二玉也，每就閒蓋一寸。朱紘，以朱組爲紘也。紘一條，屬兩端於武。纁不言皆，有不皆者。此爲衾衣之冕十二旒，則用玉二百八十八；鷩衣之冕纁九旒，用玉二百一十六；毳衣之冕七旒，用玉百六十八；希衣之冕五旒，用玉百二十；玄衣之冕三旒，用玉七十二。諸侯之纁旒九就，璫玉三采，其餘如王之事，纁旒皆就，玉璫玉笄。旒，音留。璫，亡貧反。璫，吐練反。○侯，當爲「公」，字之誤也。三采，朱、白、蒼也。其餘，謂延紐皆玄覆朱裏，與王同也，出此則異。纁旒皆就，皆三采也，每纁九成，則九旒也。公之冕用玉百六十二。玉璫，塞耳者。故書「璫」作「璫」。鄭司農云：纁，當爲「藻」。纁，占字也；藻，今字也，同物同音。璫，惡玉名。王之皮弁，會五采玉璫、象邸玉笄。會，如字，

一古外反。璫，音其。邸，丁禮反。○故書「會」作「體」，鄭司農云：「讀如馬會之會，謂以五采束髮也。」《士喪禮》曰：「檜用組，乃笄。」檜讀與體同，書之異耳。說曰：以組束髮乃著笄，謂之檜。沛國人謂反紒爲體。璫，讀如綦車轂之綦。玄謂：會，讀如大會之會。會，縫中也。璫，讀如薄借綦之綦。綦，結也。皮弁之縫中，每貫結五采玉十二以爲飾，謂之綦，《詩》云「會弁如星」，又曰「其弁伊綦」是也。邸，下祗也，以象骨爲之。王之弁經，弁而加環經。經，徒結反。○弁經，王弔所服也，其弁如爵弁而素，所謂素冠也。而加環經，環經者，大如總之麻經，纏而不糾，《司服》職曰：「凡弔事，弁經服。」諸侯及孤卿大夫之冕，韋弁、皮弁、弁經，各以其等爲之。各以其等，纁旒玉璫，如其命數也。冕則侯伯纁七就，用玉九十八；子男纁五就，用玉五十。纁玉皆三采。孤纁四就，用玉三十二；三命之卿纁三就，用玉十八；再命之大夫藻再就，用玉八。藻玉皆朱綠。韋弁、皮弁，則侯、伯璫飾七，子、男璫飾五，玉亦三采。孤則璫飾四，三命之卿璫飾三，再命之大夫璫飾二，玉亦二采。弁經之弁，其辟積如冕纁之就然。庶人弔者素委貌，一命之大夫冕而無旒。士變冕

爲爵弁，其韋弁、皮弁之會無結飾，弁經之弁不辟積。《玉藻》曰：「君未有命，不敢即乘服。」不言冠弁，冠弁兼於韋弁、皮弁矣。不言服弁，服弁自天子以下無飾無等。○《弁師》。○王之吉服：祀昊天上帝，則服大裘而冕，祀五帝亦如之；享先王則衮冕；享先公，饗射，則鷩冕；祀四望山川則毳冕；祭社稷五祀則希冕；祭群小祀則玄冕。鷩，必滅反。毳，昌銳反。希，陟里反。○六服同冕者，首飾尊也。先公，謂后稷之後，大王之前，不啻至諸釐。饗射，饗食賓客與諸侯射也。群小祀，林澤墳衍、四方百物之屬。鄭司農云：大裘，羔裘也。衮，卷龍衣也。鷩，裨衣也。毳，麕衣也。玄謂：《書》曰：「予欲觀古人之象，日月星辰、山龍華蟲作繢，宗彝藻火、粉米黼黻希繡。」此古天子冕服十二章，舜欲觀焉。華蟲，五色之蟲，《續人》職曰「鳥獸蛇」，雜四時五色以章之謂「是也」。希，讀爲緇，或作「蕭」，字之誤也。王者相變，至周而以日月星辰畫於旌旗，所謂三辰旌旗，昭其明也。而冕服九章，登龍於山，登火於宗彝，尊其

①「續」，原作「續」，據元明本、寬文本、賀本改。

神明也。九章：初一日龍，次二曰山，次三曰華蟲，次四曰火，次五曰宗彝，皆畫以爲績，次六曰藻，次七曰粉米，次八曰黼，<sup>①</sup>次九曰黻，皆希以爲繡。則衮之衣五章，裳四章，凡九也。鷩，畫以雉，謂華蟲也，其衣三章，裳四章，凡七也。毳，畫虎雉，謂宗彝也，其衣三章，裳二章，凡五也。希，刺粉米，無畫也，其衣一章，裳二章，凡三也。玄者，衣無文，裳刺黻而已，是以謂玄焉。凡冕服皆玄衣纁裳。凡

兵事，韋弁服。韋弁，以韎韋爲弁，又以爲衣裳，《春秋傳》曰晉卻至衣「韎韋之跗注」是也。今時伍伯緹衣，古兵服之遺色。眠朝，則皮弁服。眠，音視。○視朝，視內外朝之事。皮弁之服，十五升白布衣，積素以爲裳。王受諸侯朝覲於廟，則衮冕。凡甸，冠弁服。甸，音田。

○甸，田獵也。冠弁，委貌，其服緇布衣，亦積素以爲裳，諸侯以爲視朝之服。《詩·國風》曰「緇衣之宜兮」，謂王服此以田。王卒食而居，則玄端。凡凶事，服弁服。服弁，喪冠也，其服斬衰、齊衰。

凡弔事，弁經服。弁經者，如爵弁而素加環經。《論語》曰：「羔裘玄冠不以弔。」經大如總之經，其服錫衰、總衰、疑衰，諸侯及卿、大夫亦以錫衰爲弔服。《喪服小記》曰：「諸侯弔，必皮弁錫衰。」則

變其冠耳。喪服舊說以爲士弔服，素委貌冠朝服，此近庶人弔服，而衣猶非也。士當事弁經疑衰，變其裳以素耳。國君於其臣弁經，他國之臣則皮弁。大夫、士有朋友之恩，亦弁經。故書「弁」作「紒」，鄭司農紒讀爲弁。而加環經，環經即弁經服。○公之服自衮冕而下，如王之

服。侯、伯之服自鷩冕而下，如公之服。子、男之服自毳冕而下，如侯、伯之服。孤之服自希冕而下，如子、男之服。卿、大夫之服自玄冕而下，如孤之服；其凶服，加以大功、小功。士之服自皮弁而下如大夫之服，其凶服亦如之，其齊服有玄端素端。鷩，必減反。毳，昌

銳反。希，陟里反。齊，側皆反。○自公之衮冕至卿大夫之玄冕，皆其朝聘天子及助祭之服。諸侯非二王後，其餘皆玄冕而祭於己。《雜記》曰：「大夫冕而祭於公，弁而祭於己。士弁而祭于公，冠而祭於己。」大夫爵弁自祭家廟，唯孤爾，其餘皆玄冠，與士同。玄冠自祭其廟者，其服朝服

①「八」，原作「一」，據元明本、寬文本、賀本改。

玄端。諸侯之自相朝聘，皆皮弁服。此天子日視朝之服。喪服，天子、諸侯齊斬而已，卿、大夫加以大功、小功，士亦如之，又加緦焉。士齊有素端者，亦爲札荒有所禱請。變素服言素端者，明異制。鄭司農云：衣有襦裳者爲端。玄謂：端者，取其正也。士之衣袂皆二尺二寸而屬幅，是廣袤等也，其袼尺二寸。大夫已上侈之，侈之者，蓋半而益一焉。半而益一，則其袼三尺三寸，袼尺八寸。○《司服》。①

○《追師》：掌王后之首服，爲副、編、次，追衡、笄，爲九嬪及外內命婦之首服，以待祭祀賓客。追，丁回反。笄，左兮反。嬪，音頻。○鄭司農云：追，冠名。《士冠禮》記曰：「委貌，周道也。章甫，殷道也。牟追，夏后氏之道也。」追師，掌冠冕之官，故并主王后之首服。副者，婦人之首服，《祭統》曰：「君卷冕立于阼，夫人副褱立于東房。」衡，維持冠者，《春秋傳》曰：「衡紼紼。」玄謂：副之言覆，所以覆首爲之飾，其遺象若今步繇矣，服之以從王祭祀。編，編列髮爲之，其遺象若今假紒矣，服之以桑也。次，次第髮長短爲之，所謂髮髻，服之以見王。王后之燕居，亦纁笄總而已。追，猶治也，《詩》云：「追琢其章。」王后之衡笄，皆以玉爲之。唯祭服有衡，垂于

副之兩旁，當耳其下以紃縣瑱，《詩》云：「玼兮玼兮，其之翟也。」鬢髮如雲，不屑髻也，玉之瑱也。」是之謂也。笄，卷髮者。外內命婦衣鞠衣、褱衣者服編，衣褱衣者服次。外內命婦非王祭祀賓客佐后之禮，自於其家則亦降焉。《少牢饋食禮》曰「主婦髮鬢，衣移袂」，《特牲饋食禮》曰「主婦纁笄宵衣」是也。《昏禮》「女次純衣」，攝盛服耳。主人爵弁以迎。移袂，褱衣之袂。凡諸侯夫人於其國，衣服與王后同。○王后褱衣，夫人揄狄。褱，讀如翟。揄，讀如搖。翟，搖，皆翟雉名，刻繒而畫之著於衣爲飾，因以爲名也，後世作字異耳。夫人，三夫人，亦侯、伯之夫人也。王者之後，夫人亦褱衣。君命屈狄，再命褱衣，一命褱衣，士褱衣。屈，音闕。褱，章彥反。褱，吐亂反。○君，女君也。屈，《周禮》作「闕」，謂刻繒爲翟，不畫也，此子、男之夫人及其卿、大夫、士之妻命服也。褱，當爲「鞠」，字之誤。禮，天子、諸侯命其臣、后，夫人亦命其妻以衣服，所謂夫尊於朝，妻榮於室。子、男之卿再命而妻鞠衣，則鞠衣、褱衣、褱衣者，諸侯之臣皆分三等，其妻以次受

①「司」上，賀本有「並」字。

此服。公之臣，孤爲上，卿，大夫次之。侯，伯，子，男之臣，卿爲上，大夫次之，士次之。祿，或作「稅」。唯世婦命於奠繭，其他則皆從男子。繭，古典反。○奠，猶獻也。凡世婦已下蠶事畢獻繭，乃命之以其服。天子之后，夫人，九嬪及諸侯之夫人，夫在其位，妻得服其服。○《玉藻》。○玄冠朱組纓，天子之冠也。緇布冠續綏，諸侯之冠也。組，總五反，下同。續，戶內反。綏，耳佳反。○皆始冠之冠也。玄冠，委貌也。諸侯緇布冠有綏，尊者飾也。續，或作「繪」。綏，或作「蕤」。玄冠丹組纓，諸侯之齊冠也。玄冠綦組纓，士之齊冠也。齊，側皆反。綦，音其。○言齊時所服也。四命以上，齊祭異冠。縞冠玄武，子姓之冠也。縞，古老反，下同。○謂父喪服，子爲之不純吉也。武，冠卷也，古者冠，卷殊。縞冠素紕，既祥之冠也。紕，婢支反。○紕，緣邊也。紕，讀如埤益之埤，既祥之冠也，已祥祭而服之也，《問傳》曰：「大祥，素縞麻衣。」垂綏五寸，惰游之士也。綏，耳佳反，下同。○惰游，罷民也，亦縞冠素紕，凶服之象也。垂長綏，明非既祥。

玄冠縞武，不齒之服也。所放不帥教者。居冠屬武，屬，章欲反。○謂燕居冠也，著冠於武，少威儀。自天子下達，有事然後綏。燕無事者去飾。五十不散送，散，悉旦反。○送喪不散麻，始衰不備禮。親沒不髦，髦，音毛。○去爲子之飾。大帛不綏。帛，當爲「白」，聲之誤也。大帛，謂白布冠也。不綏，凶服去飾。○《玉藻》。○大白冠，緇布之冠，皆不蕤。委武，玄縞而后蕤。蕤，耳佳反。○不蕤，質無飾也。大白冠，大古之布冠也，《春秋傳》曰：「衛文公大布之衣，大白之冠。」委武，冠卷也，秦人曰委，齊東曰武。玄，玄冠也。縞，縞冠也。大夫冕而祭於公，弁而祭於己。士弁而祭於公，冠而祭於己。弁，爵弁也。冠，玄冠也。祭於公，助君祭也。大夫爵弁而祭於己，唯孤爾。士弁而親迎，然則士弁而祭於己可也。迎，魚敬反。○緣類欲許之也。親迎雖亦己之事，攝盛服爾，非常也。○《雜記》。○君羔臂虎植，幣，音覓，下同。○幣，覆苓也。植，讀皆如直道而行之直，

直謂緣也。此君齊車之飾。大夫齊車，豹臂豹植，朝車，士齊車，鹿臂豹植。齊，側皆反。朝，直遙反。○臣之朝車與齊車同飾。以帛裏布，非禮也。中外宜相稱也。冕服，絲衣也，中衣用素。皮弁服，朝服，玄端，麻衣也，中衣用布。士不衣織，衣，於既反。織，音志。○織，染絲織之，士衣染繒也。無君者不貳采。大夫去位，宜服玄端玄裳。衣正色，裳閒色。閒，閒側之間。○謂冕服，玄上纁下。非列采不入公門，列采，正服。振絺綌不入公門，表裘不入公門。振，依注之忍反。絺，勅之反。綌，去逆反。○振謂爲袷，袷，禪也。表裘，外衣也。二者形且襲，皆當表之乃出。襲裘不入公門。衣裘必當楊也。纁爲繭，纁爲袍，纁，音曠。繭，古典反。纁，於粉反。袍，步羔反。○衣有著之異名也。纁，謂今之新絲也。纁，謂今纁及舊絮也。禪爲絰，禪，音丹。絰，古迴反。○有衣裳而無裏。帛爲褶。褶，音牒。○有表裏而無著。○《玉藻》。

傳：玄冠紫綬，自魯桓公始也。綬，耳

佳反。○蓋僭宋王者之後服也。綬常用纁。季康子朝服以縞，曾子問於孔子曰：「禮乎？」孔子曰：「諸侯皮弁以告朔，然後服之以視朝，若此者禮也。」縞，古老反。朝，直遙反。○朝服以縞，僭宋禮也。孔子惡指斥康子，但言諸侯之禮而已。而諸侯皮弁以告朔，卒，然後朝服以視朝，朝服明不用縞。①○朝服之以縞也，自季康子始也。亦僭宋王者之後。孔子曰：「朝服而朝，卒朔然後服之。」謂諸侯與群臣也，諸侯視朔皮弁服。曰：「國家未道，則不充其服焉。」謂若衛文公者。未道，未合於道。○《玉藻》。

唯君有黼裘以誓省，大裘非古也。黼，音甫。○僭天子也。天子祭上帝，則大裘而冕。大裘，羔裘也。黼裘，以羔與狐白雜爲黼文也。省，當爲「獮」，獮，秋田也。國君有黼裘誓獮田之禮。時大夫又有大裘也。○君衣狐白裘，錦衣以楊之。衣，於既反。楊，思歷

①「縞」下，寬文本、賀本有「○家語」。

反，下同。○君衣狐白毛之裘，則以素錦爲衣覆之，使可楊也。袒而有衣曰楊。必覆之者，裘褻也。《詩》云：「衣錦綈衣，裳錦綈裳。」然則，衣錦復有上衣明矣。天子狐白之上衣，皮弁服與？凡楊衣，象裘色也。君之右虎裘，厥左狼裘。衛尊者宜武猛。士不衣狐白。辟君也。狐之白者少，以少爲貴也。君子狐青裘豹褻，玄綃衣以楊之；褻，音袖。綃，音宵。○君子，大夫，士也。綃，綺屬也。染之以玄，於狐青裘相宜。狐青裘，蓋玄衣之裘。麕裘青豸褻，絞衣以楊之；麕，音迷。豸，音岸。絞，戶交反。○豸，胡犬也。絞，蒼黃色。孔子曰：「素衣麕裘。」羔裘豹飾，緇衣以楊之；飾，猶褻也。孔子曰：「緇衣羔裘。」狐裘，黃衣以楊之。黃衣，大蜡時臘先祖之服也，孔子曰：「黃衣狐裘。」○錦衣狐裘，諸侯之服也。非諸侯，則不用錦衣爲楊。犬羊之裘不楊，質略，亦庶人無文飾。不文飾也不楊。楊主於有文飾之事。裘之楊也，見美也。見，賢遍反。○君子於事以見美爲敬。弔則襲，不盡飾

也。喪非所以見美。君在則楊，盡飾也。臣於君所。服之襲也，充美也。充，猶覆也。所敬不主於君則襲。是故尸襲，尸尊。執玉，龜襲。重寶瑞也。無事則襲，弗敢充也。謂已致龜玉也。○並《玉藻》。○深衣三袪，袪，起魚反。○謂大夫、士也。三袪者，謂要中之數也。袪尺二寸，圍之爲二尺四寸，三之七尺二寸。縫齊倍要，縫，音逢。齊，音咨。要，一遙反。○縫，紕也，紕下齊倍要中。齊，丈四尺四寸。縫，或爲「逢」，或爲「豐」。衽當旁，衽，而審反。○衽，謂裳幅所交裂也。凡衽者或殺而下，或殺而上，是以小要取名焉。衽，屬衣則垂而放之，屬裳則縫之，以合前後上下相變。袂可以回肘。袂，面世反。肘，竹丑反。○二尺二寸之節。長中繼揜尺，其爲長衣、中衣，則繼袂揜一尺，若今褻矣。深衣，則緣而已。袷二寸，袷，音劫。○曲領也。袷尺二寸，袂口也。緣廣寸半。緣，余絹反。廣，工曠反。○飾邊也。○《玉藻》。○具父母、大父母，衣純以績。具父母，衣純以青。如

孤子，衣純以素。純，章允反。續，音會。○尊者存，以多飾爲孝。續，畫文也。三十以下無父稱孤。純袂、緣、純邊，廣各寸半。純，謂緣之也。緣袂，謂其口也。緣，緇也。緣邊，衣裳之側，廣各寸半，則表裏共二寸矣。唯袷廣二寸。○《深衣》。

傳曰：古者深衣，蓋有制度，以應規矩繩權衡。應，於證反。○言聖人制事，必有法度。短毋見膚，毋，音無，下同。見，賢遍反。○衣取蔽形。長毋被土。爲汗辱也。續衽鉤邊，衽，而審反。鉤，古侯反。○續，猶屬也。衽，在裳旁者也，屬連之不殊裳前後也。鉤，讀如鳥喙必鉤之鉤。鉤邊，若今曲裾也。續，或爲「裕」。要縫半下。要，一遙反。縫，扶用反。○三分要中，減一以益下，下宜寬也。要，或爲「優」。袷之高下，可以運肘；袷，音各。肘，竹九反。○肘不能不出入。袷，衣袂當掖之縫也。袂之長短，反詘之及肘。袂，彌世反。詘，丘勿反。○袂屬幅於衣，詘而至肘，當臂中爲節，臂骨上下各尺二寸，則袂肘以前尺二寸。肘，或爲「腕」。帶下

毋厭髀，上毋厭脅，當無骨者。厭，於甲反。髀，步戠反。脅，許劫反。○當骨，緩急難爲中也。制

十有二幅，以應十有二月。應，於證反，下同。

○裳六幅，幅分之以爲上下之殺。袂圓以應規，謂

胡下也。曲袷如矩以應方，袷，音劫。○袷，交領

也。古者方領，如今小兒衣領。負繩及踝以應

直，踝，胡瓦反。○繩，謂袷與後幅相當之縫也。踝，

跟也。下齊如權衡以應平。齊，音咨。○齊，

緝。故規者，行舉手以爲容。行舉手，謂揖讓。

負繩抱方者，以直其政，方其義也，故《易》

曰：「坤：六二之動，直以方也。」言深衣之直

方，應《易》之文也。政，或爲「正」。下齊如權衡

者，以安志而平心也。心平志安行乃正。或低

或仰，則心有異志者歟？五法已施，故聖人服

之。言非法不服也。故規矩取其無私，繩取

其直，權衡取其平，故先王貴之。貴此衣也。

故可以爲文，可以爲武，可以擯相，可以治



軍旅，完且弗費，善衣之次也。擯，必刃反。相，息亮反。完，音丸。○完且弗費，言可苦衣而易有也。深衣者，用十五升布，鍛濯灰治，純之以采。善衣，朝祭之服也。自士以上，深衣爲之次。庶人吉服，深衣而已。○《深衣》。

儀禮集傳集註卷第三十四終

## 儀禮集傳集註卷第三十五

王制之辛名器下

王朝禮十二

以玉作六瑞，<sup>①</sup>以等邦國：等，猶齊等也。

王執鎮圭，鎮，安也，所以安四方。鎮圭者，蓋以四鎮之山爲瑑飾，圭長尺有二寸。公執桓圭，公，二王之後及

王之上公。雙植謂之桓。桓，宮室之象，所以安其上也。

桓圭，蓋亦以桓爲瑑飾，圭長九寸。<sup>②</sup>侯執信圭，伯執

躬圭，信，當爲「身」，聲之誤也。身圭、躬圭，蓋皆象以人

形爲瑑飾，文有羶縛耳，欲其慎行以保身，圭皆長七寸。

子執穀璧，男執蒲璧。穀，所以養人。蒲爲席，所以

安人。一玉，蓋或以穀爲飾，<sup>③</sup>或以蒲爲瑑飾，璧皆徑五

寸。不執圭者，未成國也。○《冬官》玉人之事：「鎮圭尺

有二寸，天子守之。命圭九寸，謂之桓圭，公守之。命圭七

寸，謂之信圭，侯守之。命圭七寸，謂之躬圭，伯守之。」○注云：「命圭者，王所命之圭也，朝覲執焉，居則守之。子守穀璧，男守蒲璧，不言之者，闕耳。故書或云：「命圭五寸，謂之躬圭。」杜子春云：當爲七寸。玄謂：五寸者，璧文之闕亂存焉。以玉作六器，以禮天地四方。禮，謂始告神時薦於神坐，《書》曰「周公植璧秉圭」是也。

以蒼璧禮天，以黃琮禮地，以青圭禮東方，以赤璋禮南方，以白琥禮西方，以玄璜禮北方，

琮，才宗反。璋，音章。琥，音虎。璜，音黃。○此禮天以

冬至，謂天皇帝在北極者也；禮地以夏至，謂神在崑崙

者也；禮東方以立春，謂蒼精之帝而大昊，句芒食焉；禮

南方以立夏，謂赤精之帝而炎帝，祝融食焉；禮西方以立

秋，謂白精之帝而少昊，蓐收食焉；禮北方以立冬，謂黑精

之帝而顓頊，玄冥食焉。禮神者必象其類：璧闕象天；琮

八方象地；圭銳象春物初生；半圭曰璋，象夏物半死；琥

①「以」上，賀本有「周禮」二字。

②「寸」，原作「子」，據元明本、寬文本、賀本改。

③爲「下」，據《周禮注疏》阮校記引段玉裁說，疑脫「瑑」字。

猛象秋嚴，半壁曰璜，象冬閉藏，地上無物，唯天半見。皆有牲幣，各放其器之色。放，方往反。○幣以從爵，若人飲酒有酬幣。○《大宗伯》。○王晉大圭，執

鎮圭，纁藉五采五就以朝日。纁，音藻。藉，在夜反。朝，直遙反。○纁有五采文，所以薦玉。木爲中幹，用韋衣而畫之。就，成也。王朝日者，示有所尊，訓民事君也。天子常春分朝日，秋分夕月，《覲禮》曰：「拜日於東門之外。」故書「鎮」作「瑱」，鄭司農云：「晉讀爲摺紳之摺，謂插之於紳帶之間，若帶劍也。瑱，讀爲鎮。《玉人》職曰：『大圭長三尺，杼上終葵首，天子服之。』」鎮圭尺有一寸，天子守之。纁，讀爲藻率之藻。五就，五匝也，二匝爲一就。公執桓圭，侯執信圭，伯執躬圭，纁皆三采三就。子執穀璧，男執蒲璧，纁皆二采再就，以朝覲宗遇會同于王。信，音申。○三采，朱、白、蒼。二采，朱、綠也。鄭司農云：以圭璧見于王。《覲禮》曰：「侯氏入門右，坐奠圭，再拜稽首。」侯氏見于天子，春日朝，夏曰宗，秋曰覲，冬曰遇，時見曰會，殷見曰同。諸侯相見，亦如之。鄭司農云：亦執圭璧以相見，故邾隱公朝

於魯，《春秋傳》曰：「邾子執玉高，其容仰。」瑑圭璋璧琮，纁皆二采一就，以覲聘。瑑，直轉反。覲，他弔反。○瑑以聘后夫人，以琮享之也。大夫衆來曰覲，寡來曰聘。鄭司農云：瑑有圻鄂瑑起。四圭有邸，以祀天旅上帝。邸，丁禮反，下同。○鄭司農云：於中央爲璧，圭著其四面，一玉俱成。《爾雅》曰：「邸，本也。」圭本著於璧，故四圭有邸，圭末四出故也。或說：四圭有邸，有四角也。邸，讀爲抵欺之抵。上帝，玄天。玄謂：祀天，夏正郊天也。上帝，五帝，所郊亦猶五帝。殊言天者，尊異之也。《大宗伯》職曰：「國有大故，則旅上帝及四望。」兩圭有邸，以祀地旅四望。兩圭者，以象地數二也，儼而同邸。祀地，謂所祀於北郊，神州之神。裸圭有瓚，以肆先王，以裸賓客。裸，古亂反。瓚，才但反。○鄭司農云：於圭頭爲器，可以挹鬯裸祭，謂之瓚，故《詩》曰：「瑟彼玉瓚，黃流在中。」《國語》謂之鬯圭。以肆先王，裸先王祭也。玄謂：肆，解牲體以祭，因以爲名。爵行曰裸。漢禮：瓚槃大五升，口徑八寸，下有槃，口徑一尺。圭璧以祀日月星辰。圭其邸爲璧，取殺於上帝。璋邸

射以祀山川，以造贈賓客。射，食亦反。造，匕到反。○璋有邸而射，取殺於四望。鄭司農云：射，剡也。土圭以致四時日月，封國則以土地。以致四時日月者，度其景至不至，以知其行得失也。冬夏以致日，春秋以致月。土地，猶度地也。封諸侯以土圭度日景，觀分寸長短，以制其域所封也。鄭司農說以《玉人》職曰：「土圭尺有五寸，以致日，以土地。」以求地中，故謂之土圭。珍圭以徵守，以恤凶荒。守，手又反。○杜子春云：珍，當爲「鎮」，書亦或爲「鎮」。以徵守者，以徵召守國諸侯，若今時徵郡守以竹使符也。鎮者，國之鎮，諸侯亦一國之鎮，故以鎮圭徵之也。凶荒則民有遠志，不安其土，故以鎮圭鎮安之。玄謂：珍圭，王使之瑞節，制大小當與琬琰相依。王使人徵諸侯，憂凶荒之國，則授之，執以往，致王命焉，如今時使者持節矣。恤者，閭府庫振救之。凡瑞節，歸又執以反命。牙璋以起軍旅，以治兵守。鄭司農云：牙璋，琿以爲牙。牙齒，兵象，故以牙璋發兵，若今時以銅虎符發兵。玄謂：牙璋，亦王使之瑞節。兵守，用兵所守，若齊人戍遂，諸侯戍周。璧羨以起度。鄭司農云：羨，長也。此璧徑長尺以起度量。《玉人》職

曰：「璧羨度尺，以爲度。」玄謂：羨，不闕之貌，蓋廣徑八寸，袤一尺。駟圭璋璧琬琰之渠眉，疏璧琬以斂尸。駟，音祖。斂，力驗反。○鄭司農云：駟，外有捷盧也。駟讀爲駟疾之駟，疏讀爲沙。謂圭、璋、璧、琬、琰、璜皆爲開渠爲眉琿，沙除以斂尸，令汁得流去也。玄謂：以斂尸者，於大斂焉加之也。駟讀爲組，與「組馬」同，聲之誤也。渠眉，玉飾之溝琿也。以組穿聯六玉溝琿之中以斂尸，圭在左，璋在首，琬在右，璜在足，璧在背，琬在腹。蓋取象方明，神之也。疏璧琬者，通於天地。穀圭以和難，以聘女。穀圭，亦王使之瑞節。穀，善也，其飾若粟文然。難，仇讎。和之者，若春秋宣公及齊侯平莒及郟，晉侯使瑕嘉平戎於王。其聘女，則以納徵焉。琬圭以治德，以結好。琬，於阮反。好，呼報反。○琬圭，亦王使之瑞節。諸侯有德，王命賜之。及諸侯使大夫來聘，既而爲壇會之，使大夫執以命事焉。《大行人》職曰：「時聘以結諸侯之好。」鄭司農云：琬圭無鋒芒，故治德以結好。琰圭以易行，以除慝。琰，以冉反。行，下孟反。慝，吐得反。○琰圭，亦王使之瑞節。鄭司農云：琰圭有

鋒芒，傷害、征伐、誅討之象。故以易行除慝，易惡行令爲善者，以此圭貴讓喻告之也。玄謂：除慝，亦於諸侯使大夫來覲，既而使大夫執而命事於壇。《大行人》職曰：「殷覲以除邦國之慝。」○《典瑞》。

○天子執冒四寸，以朝諸侯。朝，直遙反。○名玉曰冒者，言德能覆蓋天下也。四寸者，方以尊接卑，以小爲貴。天子用全，上

公用龍，侯用瓚，伯用將。瓚，才但反。○鄭司農

云：全，純色也。龍，當爲「虜」，虜謂雜色。玄謂：全，純

玉也。瓚，讀爲餐，餐之屬。龍、瓚、將，皆雜名也。卑者下

尊，以輕重爲差，玉多則重，石多則輕。公、侯四玉一石，

伯、子、男三玉二石。○屨，作旦反。繼子男執皮帛。

謂公之孤也，見禮次子、男，贊用束帛，而以豹皮表之爲飾。

天子之孤，表帛以虎皮。此說玉及皮帛者，遂言見天子之

用贊。天子圭中必，必，讀如鹿車繹之繹，謂以紐約其

中央，爲執之以備失墜。四圭尺有二寸，以祀天。

郊天所以禮其神也，《典瑞》職曰：「四圭有邸，以祀天旅上

帝。」大圭長三尺，杼上終葵首，天子服之。杼，

直吕反。○王所擗大圭也，或謂之珽。終葵，椎也，爲椎於

其杼上，明無所屈也。杼，綢也。《相玉書》曰：「珽玉六寸，明白炤。」土圭尺有五寸，以致日，以土地。

致日，度景至不。夏日至之景尺有五寸，冬日至之景丈有

三尺。土，猶度也，建邦國以度其地而制其域。裸圭尺

有二寸，有瓚，以祀廟。裸之言灌也，或作「裸」，或

作「果」，裸謂始獻酌奠也。瓚，如盤，其柄用圭，有流前注。

琬圭九寸而纁，以象德。纁，音藻。○琬，猶闕也，

王使之瑞節也。諸侯有德，王命賜之，使者執琬圭以致命

焉。纁，藉也。琰圭九寸，判規，以除慝，以易

行。凡圭琰上寸半。琰圭，琰半以上，又半爲瑑飾。諸侯

有爲不義，使者征之，執以爲瑞節也。除慝，誅惡逆也。易

行，去煩苛。璧羨度尺，好二寸，以爲度。羨，音

賤。好，呼報反。○鄭司農云：羨，徑也。好，璧孔也。

《爾雅》曰：「肉倍好謂之璧，好倍肉謂之瑗，肉好若一謂之

環。」玄謂：羨，猶延，其袤一尺而廣狹焉。圭璧五寸，

以祀日月星辰。禮其神也，圭其邸爲璧，取殺於上帝。

璧琮九寸，諸侯以享天子。享，獻也。聘禮，享君

以璧，享夫人以琮。穀圭七寸，天子以聘女。納徵

加於束帛。大璋、中璋九寸，邊璋七寸，射四寸，厚寸。黃金勺，青金外，朱中。鼻寸，衡四寸，有纁。天子以巡守，宗祝以前馬。射，食亦反。勺，上灼反。衡，音橫。守，手又反。○射，琰出者也。勺，故書或作「約」，杜子春云：「當爲「勺」，謂酒尊中勺也。」鄭司農云：「鼻，謂勺龍頭鼻也。衡，謂勺柄龍頭也。玄謂：鼻，勺流也，凡流皆爲龍口也。衡，古文橫，假借字也。衡，謂勺徑也。」璋之勺，形如圭瓚。天子巡守，有事山川，則用灌焉。於大山川，則用大璋，加文飾也。於中山川，用中璋，殺文飾也。於小山川，用邊璋，半文飾也。其祈沈以馬，宗祝亦執勺以先之。禮：王過大山川，則大祝用事焉。將有事於四海山川，則校人飾黃駒。大璋亦如之，諸侯以聘女。亦納徵加於束帛也。大璋者，以大璋之文飾之也。亦如之者，如邊璋七寸，射四寸。瑑圭璋八寸，璧琮八寸，以類聘。瑑，直轉反。類，他弔反。○瑑，文飾也。類，視也。聘，問也。衆來曰類，特來曰聘。《聘禮》曰：「凡四器者，唯其所寶，以聘可也。」牙璋中璋七寸，射二寸，厚寸，以起軍旅，以

治兵守。射，食亦反。○二璋皆有鉏牙之飾於琰側。先言牙璋，有文飾也。○鉏，側魚反。駟琮五寸，宗后以爲權。駟，音祖。○駟，讀爲組，以組繫之，因名焉。鄭司農云：「以爲稱錘以起量。」大琮十有二寸，射四寸，厚寸，是謂內鎮，宗后守之。射，食亦反。○如王之鎮圭也。射，其外鉏牙。駟琮七寸，鼻寸有半寸，天子以爲權。鄭司農云：「以爲權，故有鼻也。兩圭五寸有邸，以祀地，以旅四望。邸，丁禮反。○邸謂之抵，有邸，儗其本也。瑑琮八寸，諸侯以享夫人。獻於所朝聘君之夫人也。案十有二寸，棗栗十有二列，諸侯純九，大夫純五，夫人以勞諸侯。栗，古栗字。勞，力報反。○純，猶皆也。鄭司農云：「案，玉案也。夫人，天子夫人。玄謂：案，玉飾案也。夫人，王后也。記時諸侯僭稱王，而夫人之號不別，是以同王后於夫人也。玉案十二以爲列，王后勞朝諸侯皆九列，聘大夫皆五列，則十有二列者，勞二王之後也。棗栗實於器，乃加於案。《聘禮》曰：夫人使下大夫勞

以二竹簋方。玄被，纁裏，有蓋，實棗烝棗擇兼執之以進。璋邸射，素功，以祀山川，以致稍餼。稍，所教反。餼，許既反。① ○邸射，剡而出也。致稍餼，造賓客，納稟食也。鄭司農云：素功，無瑑飾也。餼，或作「氣」，杜子春云：當爲餼。○《玉人》。○《贊大行》曰：圭，公九寸，侯，伯七寸，子，男五寸，博三寸，厚半寸，剡上，左右各寸半，玉也。藻，三采六等。剡，以冉反。○《贊大行》者，《書說》大行人之禮者名也。藻，薦玉者也。三采六等，以朱、白、蒼畫之再行也。子，男執璧，作此贊者失之矣。○《雜記》。○笏，天子以球玉，諸侯以象，大夫以魚須文竹，士竹，本象可也。須，音班。○球，美玉也。文，猶飾也。大夫，上飾竹以爲笏，不敢與君並用純物也。② 見於天子，與射無說笏。人太廟說笏，非古也。見，賢遍反。說，音脫，下同。○言凡吉事，無所說笏也。大廟之中，唯君當事說笏也。小功不說笏，當事免則說之。免，音問。○免，悲哀哭踊之時，不在於記事也。小

功輕不當事，可以摺笏也。既摺必盥，雖有執於朝，弗有盥矣。摺，音薦。盥，音管。朝，直遙反。○摺笏，輒盥爲必執事。凡有指畫於君前，用笏；造受命於君前，則書於笏。笏畢用也，因飾焉。畫，胡麥反。造，七到反。○畢，盡也。笏度二尺有六寸，其中博三寸，其殺六分而去一。殺，色界反。去，起呂反。○殺，猶杼也。天子杼上終葵首，諸侯不終葵首，大夫，士又杼其下首，廣二寸半。天子摺珽，方正於天下也。摺，音薦。珽，他頂反。○此亦笏也，謂之珽，珽之言珽然無所屈也，或謂之大圭，長三尺，杼上終葵首。終葵首者，於杼上又廣其首，方如椎頭，是謂無所屈，後則恒直。《相玉書》曰：「珽玉六寸，明白炤。」諸侯荼，前詘後直，讓於天子也。詘，丘勿反，下同。○荼，讀爲舒遲之舒，舒懦者所畏在前也。詘，謂闕殺其首，不爲椎頭。諸侯唯天子詘焉，是以謂笏爲荼。大夫

① 「許」，原作空格，據寬文本、賀本補。

② 「物」上，原有「玉」字，據寬文本、賀本刪。

前詘後詘，無所不讓也。大夫奉君命出入者也，上有天子，下有己君，又殺其下而闇。○《玉藻》。○聘人

以珪，問士以璧，召人以瑗，絕人以玦，反絕以環。瑗，爲眷反。玦，音訣。○聘人以珪，謂使人聘他

國以圭璋也。問，謂訪其國事，因遺之也。衛侯使工尹襄問子貢以弓，是其類也。《說文》曰：「瑗者，大孔璧也。」

《爾雅》：「好倍肉謂之瑗，肉倍好謂之璧。」《禮記》曰：「君

召臣以三節。《周禮》：「珍圭以徵守。」鄭云：以徵召守國

之諸侯，若今徵郡守以竹使符也。然則天子以珍圭召諸侯，諸侯召臣以瑗歟？玦，如環而缺。肉好若一謂之環。

古者臣有罪，待放於境。三年不敢去，與之環則還，與之玦則絕，皆所以見意也。反絕，謂反其將絕者。此明諸侯以

玉接人臣之禮也。○《荀子·大略》。○天子素帶，

朱裏終辟。辟，婢支反，下同。○謂大帶也。而素

帶，終辟。大夫素帶，辟垂。士練帶，率下

辟。居士錦帶，弟子縞帶。并紐約用組，率，

音律。縞，古老反。并，必政反。組，女九反。組，音祖。

○而素帶終辟，謂諸侯也。諸侯不朱裏，合素爲之，如今衣

帶爲之，下天子也。大夫亦如之。率，緯也，士以下皆褻不

合而緯積，如今作幘頭爲之也。辟，讀如裋冕之裋，裋謂以

繒采飾其側。人君充之，大夫裋其組及末，士裋其末而已。

居士，道藝處士也。此自「而素帶」亂脫在是耳，宜承「朱裏

終辟」。三寸，長齊于帶。紳長制，士三尺，有

司二尺有五寸。子游曰：「參分帶下，紳居

二焉。」紳，韞，結，三齊。韞，音必。○三寸，謂約

帶組組之廣也。長齊于帶，與紳齊也。紳，帶之垂者也，言

其屈而重也。《論語》曰：「子張書諸紳。」有司，府史之屬

也。三分帶下而三寸，則帶高於中也。結，約餘也。此又

亂脫在是，宜承「約用組」。結，或爲「衿」。大夫大帶

四寸。雜帶：君朱綠，大夫玄華，士緇辟二

寸，再繚四寸。凡帶有率無箴功。繚，音了。

箴，音針。○雜，猶飾也，即上之裋也。君裋帶，上以朱，下

以綠終之。大夫裋垂，外以玄，內以華。華，黃色也。士裋

垂之下，外內皆以緇，是以緇帶。大夫以上以素，皆廣四

寸。士以練，廣二寸，再繚之。凡帶，有司之帶也，亦緯之

如士帶矣。無箴功，則不裋之。士雖緯帶裋，亦用箴功。



凡帶不裨，下士也。此又亂脫在是，宜承「紳鞶結三齊」。肆束及帶，勤者有事則收之，走則擁之。肆讀爲肆。肆，餘也。餘束，約紐之餘組也。勤，謂執勞辱之事也。此亦亂脫在是，宜承「無箴功」。童子之節也，緇布衣，錦緣，錦紳，并紐，錦束髮，皆朱錦也。緣，余絹反。并，必政反。紐，女九反。○童子，未冠之稱也。《冠禮》曰：「將冠者采衣紒也。」○《玉藻》。○麻者不紳，執玉不麻，麻不加於采。吉凶不相干也。麻，謂經也。紳，大帶也。喪以要經代大帶也。麻不加於采，衣采者不麻，謂弁經者必服弔服是也。采，玄纁之衣。○《雜記》。○鞶：君朱，大夫素，士爵韋。鞶，音必。○此玄端服之鞶也，鞶之言蔽也。凡鞶以韋爲之，必象裳色，則天子、諸侯玄端朱裳，大夫素裳，唯上玄裳、黃裳、雜裳也。皮弁服皆素鞶。○鞶殺，直，殺，色界反。○目鞶制。天子直，四角直，無鞶殺。公、侯前後方，殺四角使之方，變於天子也。所殺者，去上下各五寸。大夫前方後挫角，挫，作卧反。○鞶其上角，變於君也。鞶以下爲前，以上爲後。士前後正。士賤，與君同，不

嫌也。正，直、方之間語也。天子之上則直，諸侯之士則方。鞶，下廣二尺，上廣一尺，長三尺，其頸五寸，肩，革帶，博二寸。廣，工曠反。長，直亮反。頸，吉井反。○頸五寸，亦謂廣也。頸中央，肩兩角，皆上接革帶以繫之。肩與革帶廣同，凡佩繫於革帶。○《玉藻》。○又曰：鞶長三尺，下廣二尺，上廣一尺，會去上五寸。紕以爵韋六寸，不至下五寸，純以素，紕以五采。會，古外反。紕，婢支反。純，章允反。紕，音巡。○會，謂上領縫也。領之所用，蓋與紕同，在旁曰紕，在下曰純。素，生帛也。紕六寸者，中執之，表裏各三寸也。純紕所不至者五寸，與會去上同。紕，施諸縫中，若今時繅也。○《雜記》。○一命緼韍幽衡，再命赤韍幽衡，三命赤韍蔥衡。緼，音溫。韍，音弗。○此玄冕爵弁服之鞶，尊祭服，異其名耳。韍之言亦蔽也。緼，赤黃色之閒色，所謂韍也。衡，佩玉之衡也。幽，讀爲黝。黑謂之黝，青謂之蔥。①《周禮》：「公、

①「之」，原作「如」，據寬文本、賀本改。

侯、伯之卿三命，其大夫再命，其士一命。子、男之卿再命，其大夫一命，其士不命。」○天子佩白玉而玄組綬，公、侯佩山玄玉而朱組綬，大夫佩水蒼玉而純組綬，世子佩瑜玉而綦組綬，士佩瑀而緼組綬。組，音祖。綬，音受，下同。瑜，羊朱反。綦，音其，下同。瑀，而究反。玼，武巾反。緼，音溫。○玉有山玄、水蒼者，視之文色所似也。綬者，所以貫佩玉，相承受者也。純，當爲「緼」，古文緼字或作絲旁才。綦，文雜色也。緼，赤黃。○君在不佩玉，左結佩，右設佩。謂世子也。出所處而君在焉，則去德佩而設事佩，辟德而示即事也。結其左者，若於事未有能也。結，結其綬，不使鳴也。居則設佩，謂所處而君不在焉。朝則結佩。朝，直遙反。○朝於君亦結左。齊則結結佩而爵韞。齊，側皆反。績，側耕反。韞，音必。○績，屈也。結又屈之，思神靈不在事也。爵韞者，齊服玄端。凡帶必有佩玉，唯喪否。喪主於哀去飾也。凡，謂天子以至士。君子無故，玉不去身。○古之君子必佩玉，比德焉。君子，士以上。右徵角，左宮羽。徵，

側里反。○玉聲所中也。徵、角在右，事也，民也，可以勞。宮、羽在左，君也，物也，宜逸。趨以《采齊》，齊，依註疾私反。○路門外之樂節也。門外謂之趨。齊，當爲楚薺之薺。行以《肆夏》，登堂之樂節。周旋中規，中，丁仲反，下同。○反行也宜闕。折還中矩，折，之設反。還，音旋。○曲行也宜方。進則揖之，退則揚之，然後玉鏘鳴也。鏘，七羊反。○揖之，謂小俛見於前也。揚之，謂小仰見於後也。鏘，聲貌。故君子在車則聞鸞和之聲，行則鳴佩玉，是以非辟之心無自入也。辟，音僻。○鸞在衡，和在式。自，由也。○以上並《玉藻》。

傳曰：子貢問於孔子曰：「敢問君子貴玉而賤珉者何也？爲玉之寡而珉之多與？」珉，亡貧反。爲，于僞反，下同。與，音餘。○珉，石似玉，或作「玼」也。孔子曰：「非爲珉之多故賤之也，玉之寡故貴之也。夫昔者，君子比德於玉焉：溫潤而澤，仁也；夫，音

扶。○色柔溫潤似仁也。潤，或爲「濡」。縝密以栗，知也；縝，音軫。知，音智。○縝，緻也。栗，堅貌。廉而不剡，義也；剡，九衛反。○剡，傷也。義者，不苟傷人也。垂之如隊，禮也；隊，真位反。○禮尚謙卑。叩之其聲清越以長，其終詘然，樂也；詘，其勿反。○樂作則有聲，止則無也。越，猶揚也。詘，絕止貌也。《樂記》曰：「止如槩木。」瑕不揜瑜，瑜不揜瑕，忠也；瑕，音遐。揜，音掩。瑜，羊朱反。○瑕，玉之病也。瑜，其中間美者。玉之性，善惡不相揜，似忠也。孚尹旁達，信也；孚，讀爲浮。尹，讀爲竹箭之筠。浮筠，謂玉采色也。采色旁達，不有隱翳，似信也。孚，或作「玆」，或爲「扶」。○翳，於計反。氣如白虹，天也；精神見於山川，地也；虹，音紅。見，賢遍反。○精神，亦謂精氣也。虹，天氣也。山川，地所以通氣也。圭璋特達，德也；特達，謂以朝聘也。璧琮則有幣，有德者無所不達，不有須而成也。天下莫不貴者，

道也。道者，人無不由之。《詩》云：「言念君子，言，我也。溫其如玉。」故君子貴之也。」

《聘義》。

王及后之服屨，赤舄、黑舄、赤纁、黃纁、青句、素屨、葛屨。纁，於力反。句，音劬。○屨自明矣，必連言服者，著服各有屨也。複下曰舄，禪下曰屨。古人言屨以通於複，今世言屨以通於禪，俗易語反與？舄屨有絢、有纁、有純者，飾也。鄭司農云：赤纁、黃纁，以赤黃之絲爲下緣。《士喪禮》曰：「夏葛屨，冬皮屨，皆纁緇純。」禮家說纁，亦謂以采絲礫其下。玄謂：凡屨舄各象其裳之色，《士冠禮》曰「玄端黑屨，青絢纁純，素積白屨，緇絢纁純，爵弁纁屨，黑絢纁純」是也。王吉服有九，舄有三等，赤舄爲上，冕服之舄。《詩》云：「王錫韓侯，玄衮赤舄。」則諸侯與王同，下有白舄、黑舄。王后吉服六，唯祭服有舄，玄舄爲上，禕衣之舄也，下有青舄、赤舄，鞠衣以下皆屨耳。句，當爲「絢」，聲之誤也。絢纁純者同色，今云赤纁、黃纁、青絢，雜互言之，明舄屨衆多，反覆以見之。凡舄之飾，如纁之次。赤纁者，王黑舄之飾；黃纁者，王后玄舄之飾；青絢者，王白舄之飾。言纁必有絢純，言絢亦有纁純，三者相

將。王及后之赤舄皆黑飾，后之青舄白飾。凡屨之飾，如繡次也。黃屨白飾，白屨黑飾，黑屨青飾。鉤謂之拘，著舄屨之頭以爲行戒。縹，縫中紉。純，緣也。天子、諸侯，占事皆舄，其餘唯服冕衣翟著舄耳。士爵弁纁屨，黑絢縹純，尊祭服之屨，飾從纁也。素屨者，非純吉，有凶去飾者。言葛屨，明有用皮時。

**外内命夫命婦之命屨、功屨、散屨。**散，素但反。○命夫之命屨，纁屨。命婦之命屨，黃屨以下。功屨，次命屨，於孤卿、大夫則白屨黑屨，九嬪、内子亦然。世婦、命婦以黑屨爲功屨。女御、士妻、命屨而已。士及士妻謂再命受服者。散屨，亦謂去飾。○《天官·屨人》。

**○王之五路：**一曰玉路，錫，樊纓十有再就，建大常，十有二旂以祀；錫，音陽。

樊，步干反。旂，音留，下同。○王在焉曰路。玉路，以玉飾諸末。錫，馬面當盧，刻金爲之，所謂鏤錫也。樊，讀如繫帶之繫，謂今馬大帶也。鄭司農云：纓謂當胸，《士喪禮》上篇曰：「馬纓三就。」禮家說曰：纓當胸，以削革爲之。三就，三重三匝也。玄謂：纓，今馬鞅。玉路之樊及纓，皆以五采屬飾之十二就。就，成也。大常，九旗之畫日月者，正幅爲終，旂則屬焉。

**金路，鉤，樊纓九就，建大**

**旂以賓，同姓以封；**金路，以金飾諸末。鉤，婁頤之鉤也，金路無錫有鉤，亦以金爲之。其樊及纓，以五采屬飾之而九成。大旂，九旗之畫交龍者。以賓，以會賓客。同姓以封，謂王子母弟率以功德出封。雖爲侯、伯，其畫服猶如上公，若魯、衛之屬。其無功德，各以親疏食采畿内而已。故書「鉤」爲「拘」，杜子春讀爲鉤。

**象路，朱，樊纓**

**七就，建大赤以朝，異姓以封；**朝，直遙反。○象

路，以象飾諸末。象路無鉤，以朱飾勒而已。其樊及纓，以五采屬飾之而七成。大赤，九旗之通帛。以朝，以日視朝。異姓，王甥舅。

**革路，龍勒，條纓五就，建大白以**

**即戎，以封四衛；**條，依注他刀反。○革路，鞅之以

革而漆之，無他飾。龍，驪也。以白黑飾革，雜色爲勒。條，讀爲條。其樊及纓，以條絲飾之而五成。不言樊字，蓋

脫爾。以此言條，知玉路、金路、象路飾樊纓，皆不用金玉、象矣。大白，殷之旗，猶周大赤，蓋象正色也。即戎，謂

兵事。四衛，四方諸侯守衛者，蠻服以內。

**木路，前樊**

**鵠纓，建大麾以田，以封蕃國。**鵠，戶毒反。麾，許危反。○木路，不鞅以革，漆之而已。前，讀爲緇翦之

翦，翦，淺黑也。木路無龍勒，以淺黑飾韋爲樊，鵠色飾韋爲纓，不言就數，飾與革路同。大麾，不在九旗中，以正色言之則黑，夏后氏所建。田，四時田獵。蕃國，謂九州之外夷服、鎮服、蕃服。杜子春云：鵠，或爲「結」。王后之五路：重翟，錫面朱總；厭翟，勒面纁總；安車，彫面鷩總，皆有容蓋；重，直龍反。錫，音陽。厭，於涉反。纁，戶對反。鷩，烏兮反。○重翟，重翟雉之羽也。厭翟，次其羽使相迫也。勒面，謂以如王龍勒之韋，爲當面飾也。彫者畫之，不龍其韋。安車，坐乘車，凡婦人車皆坐乘。故書「朱總」爲「纁」，「鷩」或作「繫」。鄭司農云：錫，馬面錫。纁，當爲「總」，書亦或爲「總」。鷩，讀爲鷩鷩之鷩。鷩總者，青黑色，以纁爲之，總著馬勒直兩耳與兩鑣。容，謂幘車，山東謂之裳幘，或曰幘容。玄謂：朱總、纁總，其施之如鷩總，車衡輶亦宜有焉。纁，畫文也。蓋如今小車蓋也，皆有容有蓋，則重翟、厭翟謂蔽也。重翟，后從王祭祀所乘。厭翟，后從王賓饗諸侯所乘。安車無蔽，后朝見於王所乘，謂去飾也。《詩·國風·碩人》曰：「翟蔽以朝。」謂諸侯夫人始來，乘翟蔽之車，以朝見於君，盛之也。此翟蔽，蓋厭翟也，然則王后始來乘重翟乎？

翟車，貝面組總，有握；組，音祖，下同。握，一作「輶」。○翟車，不重不厭，以翟飾車之側輒。貝面，貝飾勒之當面也。有握，則此無蓋矣，如今駟車是也，后所乘以出桑。輶車，組輶，有輶，羽蓋。輶，音晚。輶，所甲反。○輶車不言飾，后居宮中從容所乘，但漆之而已。爲輶輪，人輶之以行。有輶，所以禦風塵。以羽作小蓋，爲輶日也。故書「輶」爲「駟」，杜子春云：當爲「輶」，書亦或爲「駟」。王之喪車五乘：木車，蒲蔽，犬禭，尾囊，疏飾，小服皆疏；乘，繩證反。禭，莫歷反，下同。囊，音羔。○木車，不漆者。鄭司農云：蒲蔽，謂羸蘭車，以蒲爲蔽，天子喪服之車，漢儀亦然。犬禭，以犬皮爲覆笠。故書「疏」爲「搢」，杜子春讀搢爲沙。玄謂：蔽，車旁禦風塵者。犬，白犬皮，既以皮爲覆笠，又以其尾爲戈戟之旄。羸布飾二物之側爲之緣，若攝服云。服讀爲服，小服，刀劍短兵之衣。此始遭喪所乘，爲君之道尚微，備姦臣也。《書》曰以「虎賁百人逆子釗」，亦爲備焉。素車，焚蔽，犬禭，素飾，小服皆素；焚，扶云反。○素車，以白土塗車也。焚讀爲殯，殯麻以爲蔽。其禭服以素纁爲緣。

此卒哭所乘，爲君之道益著，在車可以去戈戟。藻車，

藻蔽，鹿淺褙，革飾；故書「藻」作「輶」，杜子春輶讀

爲華藻之藻，直謂華藻也。玄謂：藻，水草，蒼色，以蒼土

聖車，以蒼繒爲蔽也。鹿淺褙，以鹿夏皮爲覆簑，又以所治

去毛者緣之。此既練所乘。駢車，萑蔽，然褙，髹

飾；駢，莫江反。萑，音九。髹，香求反。○故書「駢」作

「龍」，「髹」爲「軟」，杜子春云：龍讀爲駢，軟讀爲漆坑之漆，

直謂髹漆也。玄謂：駢，車邊側有漆飾也。萑，細葦席也，

以爲蔽者。漆則成蕃，即吉也。然，果然也。髹，亦多黑少

之色韋也。此大祥所乘。漆車，藩蔽，犴褙，雀飾。

犴，音岸。○漆車，黑車也。藩，今時小車藩，漆席以爲之。

犴，胡犬。雀，黑多赤少之色韋也。此禫所乘。服車五

乘：孤乘夏篆，卿乘夏縵，大夫乘墨車，士乘

棧車，庶人乘役車。五乘之乘，繩證反。篆，直轉反。

縵，莫干反。棧，仕板反。○服車，服事者之車。故書「夏

篆」爲「夏緣」。鄭司農云：夏，赤也。緣，緣色。或曰：夏

篆，篆讀爲主瑑之瑑。夏篆，轂有約也。玄謂：夏篆，五采

畫轂約也。夏縵，亦五采畫，無瑑爾。墨車，不畫也。棧

車，不革輓而漆之。役車，方箱可載任器以共役。凡良

車，散車不在等者，其用無常。給遊燕及恩惠之

賜。「不在等者」，謂若今輜車後戶之屬，作之有功有沽。

○《春官·巾車》。○日月爲常，交龍爲旂，通帛

爲旛，雜帛爲物，熊虎爲旗，鳥隼爲旟，龜蛇

爲旐，全羽爲旖，析羽爲旛。旛，之然反。隼，息

允反。旛，音餘。旐，音兆。旖，音遂。○通帛，謂大赤，從

周正色，無飾。雜帛者，以帛素飾其側。白，殷之正色。全

羽，析羽，皆五采，繫之於旛旖之上，所謂注旛於干首也。

凡九旗之帛皆用絳。大閱則王建大常，諸侯建

旂，孤卿建旛，大夫、士建物，師都建旗，州里

建旗，縣鄙建旐，道車載旖，旂車載旛。仲冬

教大閱，司馬主其禮。自王以下治民者，旗畫成物之象。

王畫日月，象天明也。諸侯畫交龍，一象其升朝，一象其下

復也。孤卿不畫，言奉王之政教而已。大夫、士雜帛，言以

先王正道佐職也。師都，六鄉、六遂大夫也。謂之師都，

都，民所聚也。畫熊虎者，鄉、遂出軍賦，象其守猛，莫敢犯

也。州里縣鄙，鄉遂之官，互約言之。①鳥隼象其勇捷也，龜蛇象其扞難辟害也。道車，象路也，王以朝夕燕出入旂車，木路也，王以田以鄙。全羽，析羽五色，象其文德也。大閱，王乘戎路，建大常焉。玉路，金路不出。皆畫其象焉，官府各象其事，州里各象其名，家各象其號。事、名、號者，徽識所以題別衆臣，樹之於位，朝各就焉。《覲禮》曰「公侯伯子男皆就其旂而立」，此其類也。或謂之事，或謂之名，或謂之號，異外內也，三者旌旗之細也。《士喪禮》曰：「爲銘，各以其物。亡則以緇，長半幅，纁末，長終幅，廣三寸，書名於末。」此蓋其制也。徽識之書，則云：某某之事，某某之名，某某之號。今大閱禮，象而爲之。兵凶事，若有死事者，亦當以相別也。杜子春云：畫當爲書。玄謂：畫，畫雲氣也，異於在國軍事之飾。○《司常》。○王弓、弧弓，以授射甲革楯質者；夾弓、庾弓，以授射豸侯鳥獸者；唐弓、大弓，以授學射者、使者、勞者。射，食亦反。楯，張林反。夾，古洽反。庾，一作「庚」。豸，音岸。使，所吏反。○王、弧、夾、庾、唐、大六者，弓異體之名也。往體寡，來體多，曰王、弧。往體多，來體寡，曰夾、庾。往體來

體若一，曰唐、大。甲革，革甲也，《春秋傳》曰：「蹲甲而射之。」質，正也，樹楯以爲射正。射甲與楯，試弓習武也。豸侯五十步，及射鳥獸，皆近射也。近射用弱弓，則射大侯者用王、弧，射參侯者用唐、大矣。學射者弓用中，後習強弱則易也。使者、勞者弓亦用中，遠近可也。勞者，勤勞王事，若晉文侯、文公受王弓矢之賜者。故書，楯「爲」報，鄭司農云：「楯」字或爲「報」，非是也。《圉師》職曰：「射則充楯質。」又此《司弓矢》職曰：「澤，共射楯質之弓矢。」言射楯質自有弓，謂王、弧弓也。以此觀之，言報質者非其矢報皆從其弓。報，音服。○從弓數也，每弓者一報百矢。凡弩：夾、庾利攻守，唐、大利車戰、野戰。攻城壘者與其自守者相迫近，弱弩發疾也。車戰、野戰，進退非強則不及。弩無王、弧、王、弧恒服弦，往體少者，使矢不疾。凡矢：枉矢、絜矢利火射，用諸守城車戰；殺矢、鏃矢用諸近射田獵；矰矢、莠矢用諸弋射；恒矢、庫矢用諸散射。

①「互」，原作「玄」，據元明本、寬文本、賀本改。

枉，紆往反。繫，戶結反。鏃，音侯。鏃，音增。弗，音弗。弋，以隻反。恒，胡登反。庫，方二反。散，素旦反。○此八矢者，弓弩各有四焉。枉矢，殺矢，鏃矢，恒矢，弓所用也。繫矢，鏃矢，弗矢，庫矢，弩所用也。枉矢者，取名變星，飛行有光，今之飛矛是也，或謂之兵矢。繫矢象焉。二者皆可結火以射敵，守城，車戰，前於重，後微輕，行疾也。殺矢，言中則死。鏃矢象焉，鏃之言候也。二者皆可以司候射敵之近者及禽獸，前尤重，中深而不可遠也。結繳於矢謂之鏃。鏃，高也。弗矢象焉，弗之言剋也。二者皆可以弋飛鳥，剋羅之也，前於重，又微輕，行不低也，《詩》云：「弋鳬與雁。」恒矢，安居之矢也。庫矢象焉。二者皆可以散射也，謂禮射及習射也，前後訂其行平也。凡矢之制：枉矢之屬五分，二在前，三在後，殺矢之屬三分，一在前，二在後，鏃矢之屬七分，三在前，四在後，恒矢之屬，軒輶中，所謂志也。鄭司農云：庫矢，讀爲人罷短之罷。玄謂：庫讀如痺病之痺，痺之言倫比。○《司弓矢》。○守邦國者用玉節，守都鄙者用角節。謂諸侯於其國中，公、卿、大夫、王子弟於其采邑，有命者，亦自有節以輔之。玉節之制，以玉爲之，以命數爲小大。角，用犀角，

其制未聞。凡邦國之使節：山國用虎節，土國用人節，澤國用龍節，皆金也，以英蕩輔之。使，色吏反。○使節，卿大夫聘於天子、諸侯，行道所執之信也。土，平地也。山多虎，平地多人，澤多龍，以金爲節鑄象焉。必自以其國所多者，於以相別，爲信明也。今漢有銅虎符。杜子春云：蕩，當爲「帑」，謂以函器盛此節，或曰：英蕩，畫函。門關用符節，貨賄用璽節，道路用旌節，皆有期以反節。門關，司門、司關也。貨賄者，主通貨賄之官，謂司市也。道路者，主治五涂之官，謂鄉、遂大夫也。凡民遠出至於邦國，邦國之民若來入由門者，司門爲之節；由關者，司關爲之節；其商，則司市爲之節；其以徵令及家徙，則鄉、遂大夫爲之節。唯時事而行，不出關，不用節也。變司市言貨賄者，璽節主以通貨賄，貨賄非必由市，或資於民家焉。變鄉、遂言道路者，容公邑及小都大都之吏，皆主治五涂，亦有民也。符節者，如今宮中諸官詔符也。璽節者，今之印章也。旌節，今使者所擁節是也。將送者，執此節以送行者，皆以道里日時課，如今郵行有程矣，以防容姦，擅有所通也。凡節有法式，藏於掌節。凡通達於天下者，必有節以傳輔之。



必有節，言遠行無有不得節而出者也。輔之以傳者，節爲信耳，傳說所齋操及所適。無節者，有幾則不達。闕土內之。○《地官·掌節》。

傳曰：昔殷紂亂天下，脯鬼侯以饗諸侯，以人肉爲薦羞，惡之甚也。是以周公相武王以伐紂。武王崩，成王幼弱，周公踐天子之位以治天下。六年，朝諸侯於明堂，制禮作樂，頒度量，而天下大服。相，息亮反。朝，直遙反。量，音亮。○踐，猶履也。頒，讀爲班。度，謂丈尺高卑廣狹也。量，謂豆、區、斗、斛、筐、筥所容受。○區，烏侯反。筐，音匡。筥，紀呂反。七年，致政於成王。成王以周公爲有勳勞於天下，致政，以王事歸授之。王功曰勳，事功曰勞。是以封周公於曲阜，地方七百里，革車千乘，乘，繩證反。○曲阜，魯地。上公之封地方五百里，加魯以四等之附庸，方百里者二十四，并五五二十五，積四十九，開方之得七百里。革車，兵車也。千乘，成國之賦也，《詩·魯頌》曰：「王謂叔父，建爾元子，俾侯于

魯，大啟爾宇，爲周室輔。乃命魯公，俾侯于東。錫之山川，土田附庸。」又曰：「公車千乘，朱英綠騰。」命魯公世世祀周公以天子之禮樂。同之於周，尊之也。魯公，謂伯禽。是以魯君孟春乘大路，載弧韞，旂十有二旒，日月之章，祀帝于郊，配以后稷，天子之禮也。弧，音胡。韞，音獨。旂，其衣反。旒，力求反。○孟春，建子之月，魯之始郊日以至。大路，殷之祭天車也。弧，旌旗所以張幅也，其衣曰韞。天子之旌旗畫日月。帝，謂蒼帝靈威仰也。昊天上帝，魯不祭。季夏六月，以禘禮祀周公於大廟，牲用白牡，尊用犧象山罍，鬱尊用黃目，灌用玉瓚大圭，薦用玉豆雕篚，爵用玉琖仍雕，加以璧散璧角，俎用梡嶸。升歌《清廟》，下管《象》。朱干玉戚，冕而舞《大武》；皮弁素積，裼而舞《大夏》。《昧》，東夷之樂也；《任》，南蠻之樂也。納夷蠻之樂於大廟，言廣魯於天下也。禘，

大計反。大廟之大，音泰。犧，素何反。疊，音雷。瓚，才但反。簋，息緩反。璣，側眠反。散，先旦反。椀，苦管反。歲，居衛反。裼，星歷反。昧，音妹。任，而林反。○季夏，建巳之月也。禘，大祭也。周公曰大廟，魯公曰世室，群公稱宮。白牡，殷牲也。尊，酒器也。犧尊，以沙羽爲畫飾。象尊，象骨飾之。鬱尊，鬱鬯之器也。黃目，黃彝也。① 灌，酌鬱尊以獻也。瓚，形如槃，容五升，以大圭爲柄，是謂圭瓚。簋，籩屬也，以竹爲之，雕刻飾其直者也。爵，君所進於尸也。仍，因也，因爵之形爲之飾也。加，加爵也。散，角，皆以璧飾其口也。椀，始有四足也，歲爲之距。《清廟》，《周頌》也。《象》，謂《周頌·武》也，以管播之。朱干，赤大盾也。戚，斧也。冕，冠名也。諸公之服，自衮冕而下，如王之服也。《大武》，周舞也。《大夏》，夏舞也。《周禮·昧師》：「掌教昧樂。」《詩》曰：「以雅以南，以籥不僭。」廣，大也。君卷冕立于阼，夫人副褱立于房中。君肉袒迎牲于門，夫人薦豆籩。卿大夫贊君，命婦贊夫人，各揚其職。百官廢職，服大刑。卷，古本反。褱，音輝。袒，音誕。○副，首飾

也，今之步搖是也，《詩》云：「副笄六珈。」《周禮·追師》：「掌王后之首服，爲副。」褱，王后之上服，唯魯及王者之後夫人服之，諸侯夫人則自揄翟而下。贊，佐也。命婦，於內則世婦也，於外則大夫之妻也。祭祀，世婦以下佐夫人。揚，舉也。大刑，重罪也。是故夏禘，秋嘗，冬烝，春社，秋省，而遂大蜡，天子之祭也。禘，音藥。蜡，仕嫁反。○不言春祠，魯在東方，王東巡守以春，或闕之。省，讀爲獮。獮，秋田名也。春田祭社，秋田祀枋。② 大蜡，歲十二月索鬼神而祭之。大廟，天子明堂。庫門，天子臯門。雉門，天子應門。言廟及門如天子之制也。天子五門，臯、庫、雉、應、路。魯有庫、雉、路，則諸侯三門與？臯之言高也，《詩》云：「乃立臯門，臯門有伉。」乃立應門，應門將將。振木鐸於朝，天子之政也。鐸，大各反。朝，直遙反。○天子將發號令，必以木鐸警衆。山節藻梲，復廟重檐，刮楹達鄉，反

① 「象尊」、「鬱尊」、「黃目」，原脫，據賀本補。  
「祭社」、「秋田」，原脫，據賀本補。

圻出尊，崇圻康圭疏屏，天子之廟飾也。

稅，專悅反。復，音福。重，直龍反。檐，以占反。刮，

古八反。鄉，許亮反。圻，丁念反。○山節，刻櫛盧爲

山也。藻稅，畫侏儒柱爲藻文也。復廟，重屋也。重

檐，重承壁材也。刮，刮摩也。鄉，牖屬，爲夾戶窻也。

每室八窻爲四達。反圻，反爵之圻也。出尊，當尊南

也。唯兩君爲好，既獻反爵於其上。禮，君尊於兩楹之

閒。崇，高也。康，讀爲亢龍之亢，又爲高圻亢所受圭

奠于上焉。屏謂之樹，今桴思也，刻之爲雲氣蟲獸，如

今闕上爲之矣。鸞車，有虞氏之路也。鉤車，

夏后氏之路也。大路，殷路也。乘路，周

路也。鉤，古侯反。乘，繩證反。○鸞，有鸞和也。

鉤，有曲輿者也。大路，木路也。乘路，玉路也。漢祭

天，乘殷之路也，今謂之桑根車也，《春秋傳》曰：「大路

素。」鸞，或爲「樂」也。有虞氏之旅，夏后氏之

綏，殷之大白，周之大赤。四者旌旗之屬也。

綏，當爲「綏」，讀如冠蕤之蕤。有虞氏當言綏，夏后氏

當言旂，此蓋錯誤也。綏，謂注旄牛尾於杠首，所謂大

麾。《書》云：「武王左杖黃鉞，右秉白旄以麾。」《周

禮》：「王建大旂以賓，建大赤以朝，建大白以即戎，建大

麾以田也。」夏后氏駱馬黑鬣，殷人白馬黑

首，周人黃馬蕃鬣。夏后氏牲尚黑，殷白

牡，周騂剛。駱，音洛。鬣，力輒反。蕃，音煩。騂，

息營反。○順正色也。白馬黑鬣曰駱。殷黑首爲純白

凶也。騂剛，赤色。泰，有虞氏之尊也。山罍，

夏后氏之尊也。著，殷尊也。犧象，周尊

也。著，直略反。○泰用瓦。著，著地無足。爵，夏

后氏以琖，殷以斚，周以爵。斚，古雅反。○

斚，畫禾稼也，《詩》曰：「洗爵奠斚。」灌尊，夏后氏

以雞夷，殷以斚，周以黃目。其勺，夏后氏

以龍勺，殷以疏勺，周以蒲勺。勺，市灼反。

○夷，讀爲彝，《周禮》：「春祠夏禴，裸用雞彝、鳥彝。」

「秋嘗冬烝，裸用斚彝、黃彝。」龍，龍頭也。疏，通刻其

頭。蒲，合蒲如鸛頭也。土鼓，黃桴、葦籥，伊耆

氏之樂也。黃，苦對反。桴，音浮。葦，于鬼反。○

黃，當爲「山」，聲之誤也。籥，如笛三孔。伊耆氏，古天

子有天下之號也，今有姓伊耆氏者。拊搏，玉磬，拊擊，大琴大瑟，中琴小瑟，四代之樂器也。拊，音甫。搏，音博。拊，居八反。○拊搏，以韋爲之，充之以糠，形如小鼓。拊擊，謂祝故。皆所以節樂者也。四代，虞、夏、殷、周也。魯公之廟，文世室也。武公之廟，武世室也。此二廟象周有文王、武王之廟也。世室者，不毀之名也。魯公，伯禽也。武公，伯禽之玄孫也，名敖。米廩，有虞氏之庠也。序，夏后氏之序也。瞽宗，殷學也。類宮，周學也。廩，力甚反。類，音判。○庠、序，亦學也。庠之言詳也，於以考禮詳事也，魯謂之米廩。虞帝上孝，今藏粢盛之委焉。序，次序王事也。瞽宗，樂師瞽矇之所宗也。古者有道德者使教焉，死則以爲樂祖，於此祭之。類之言班也，於以班政教也。崇鼎，貫鼎，大璜，封父龜，天子之器也。璜，音黃。父，音甫。○崇、貫、封父，皆國名。文王伐崇，古者伐國，遷其重器，以分同姓。大璜，夏后氏之璜，《春秋傳》曰：「分魯公以夏后氏之璜。」越棘，大弓，

天子之戎器也。越，國名也。棘，戟也，《春秋傳》曰：「子都拔棘。」夏后氏之鼓足，殷楹鼓，周縣鼓。縣，音玄。○足，謂四足也。楹，謂之柱，貫中上出也。縣，縣之簣虞也。《殷頌》曰：「植我蕤鼓。」《周頌》曰：「應輅縣鼓。」垂之和鐘，叔之離磬，女媧之笙簧。夏后氏之龍簋虞，殷之崇牙，周之璧琫。有虞氏之兩敦，夏后氏之四璉，殷之六瑚，周之八簋。俎，有虞氏以梲，夏后氏以巖，殷以棋，周以房俎。夏后氏以楬豆，殷玉豆，周獻豆。有虞氏服韍，夏后氏山，殷火，周龍章。有虞氏祭首，夏后氏祭心，殷祭肝，周祭肺。夏后氏尚明水，殷尚醴，周尚酒。有虞氏官五十，夏后氏官百，殷二百，周三百。有虞氏之綏，夏后氏之綢練，殷之崇牙，周之璧琫。凡四代之服、器、官，魯兼用之，是故魯王禮也。天下以爲有道之國，是故天下資禮樂焉。《明

堂位》。○昭公將攻季氏，告子家駒曰：「季氏爲無道，僭於公室久矣，吾欲攻之，何如？」子家駒曰：「諸侯僭於天子，大夫僭於諸侯，久矣！」昭公曰：「吾何僭矣哉？」子家駒曰：「設兩觀，乘大路，朱干玉戚以舞《大夏》，八佾以舞《大武》，此皆天子之禮也。」<sup>①</sup>

儀禮集傳集註卷第三十五終

① 「也」下，賀本有「昭公二十五年春秋公羊傳」十一字。

## 儀禮集傳集註卷第三十六

王制之壬師田

王朝禮十三

《周禮·大宗伯》：以軍禮同邦國；同，謂威其不協僭差者。軍禮之別有五。大師之禮，用衆也；用其義勇。大均之禮，恤衆也；均其地政、地守、地職之賦，所以憂民。大田之禮，簡衆也；古者因田習兵，閱其車徒之數。大役之禮，任衆也；築宮邑，所以事民力強弱。大封之禮，合衆也。正封疆溝塗之固，所以合聚其民。○《大司馬》：凡制軍，萬有二千五百人爲軍。《小司徒》：會萬民之卒伍而用之：五人爲伍，五伍爲兩，四兩爲卒，五卒爲旅，五旅爲師，五師爲軍。以

起軍旅，以作田役，以比追胥。比，毗志反。○用，謂使民事之。伍、兩、卒、旅、師、軍，皆衆之名。兩，二十五人。卒，百人。旅，五百人。師，二千五百人。軍，萬二千五百人。此皆先王所因農事定軍令者也，欲其恩足相卹，義足相救，服容相別，音聲相識。作，爲也。役，功力之事。追，逐寇也。野，九夫爲井，四井爲邑，四邑爲丘，四丘爲甸，四甸爲縣，四縣爲都，以任地事而令貢賦，凡稅斂之事。賦，謂出車徒、給繇役也。《司馬法》曰：「六尺爲步，步百爲晦，晦百爲夫，夫三爲屋，屋三爲井，井十爲通。通爲匹馬，三十家，七一人，徒二人。通十爲成，成百井，二百家，革車一乘，士十人，徒二十人。十成爲終，終千井，三千家，革車十乘，士百人，徒二百人。十終爲同，同方百里，萬井，三萬家，革車百乘，士千人，徒二千人。」○《族師》：五家爲比，十家爲聯。五人爲伍，十人爲聯。四閭爲族，八閭爲聯。使之相保相受，刑罰慶賞，相及相共。比，毗志反。聯，音連。○相共，猶相救相調。若作民而師田行役，則合其卒伍，簡其兵器，以鼓鐸

旗物帥而至，掌其治令、戒禁、刑罰。鐸，徒各反。○亦於軍因爲卒長。○《大司馬》：凡制軍，

萬有二千五百人爲軍。王六軍，大國三軍，次國二軍，小國一軍，軍將皆命卿。二千有五

百人爲師，師帥皆中大夫。五百人爲旅，旅帥皆下大夫。百人爲卒，卒長皆上士。二十五人爲兩，兩司馬皆中士。五人爲伍，伍皆有長。將，子亮反。帥，所類反。長，丁丈反。○軍，

師、旅、卒、兩、伍，皆衆名也。伍一比，兩一問，卒一族，旅一黨，師一州，軍一鄉。家所出一人。將、帥、長、司馬者，其師吏也。言軍將皆命卿，則凡軍帥不特置選於六官六鄉之吏。自卿以下，德任者使兼官焉。以九伐之灋正邦國：諸侯有違王命，則出兵以征伐之，所以正之也。諸侯之於國，如樹木之有根本，是以言伐云。馮弱犯寡，則眚之；馮，皮冰反。眚，所景反。○馮，猶乘陵也，言不字小而侵侮之。眚，猶人眚瘦也，《王霸記》曰：「四面削其地。」賊賢害民，則伐之，《春秋傳》曰：

「粗者曰侵，精者曰伐。」又曰：「有鐘鼓曰伐。」則伐者，兵入其竟，鳴鐘鼓以往，所以聲其罪。暴內陵外，則壇之；壇，音善。○內謂其國，外謂諸侯。壇，讀如同壇之堦，《王霸記》曰：「置之空壇之地。」鄭司農云：壇，讀從憚之以威之憚，書亦或爲「壇」。玄謂：置之空壇，以出其君，更立其次賢者。野荒民散，則削之；荒，蕪也。田不治，民不附，削其地，明其不能有。負固不服，則侵之；負，猶恃也。固，險可依以固者也。不服，不事大也。侵之者，兵加其竟而已。用兵淺者，《詩》曰：「密人不恭，敢距大邦。」賊殺其親，則正之；「正之」者，執而治其罪，《王霸記》曰：「正，殺之也。」《春秋》：僖公二十八年冬，「晉人執衛侯，歸之于京師」，坐殺其弟叔武。放弑其君，則殘之；放，逐也。殘，殺也。《王霸記》曰：「殘滅其爲惡。」犯令陵政，則杜之；令，猶命也，《王霸記》曰：「犯令者，違命也。陵政者，輕政法不循也。杜之者，杜塞使不得與鄰國交通。」外內亂，鳥獸行，則滅之。行，下孟反。○《王霸記》曰：「悖人倫，外內無以異於禽獸，不可親百姓，則誅滅去之也。」《曲禮》曰：「夫唯禽

獸無禮，故父子聚麀。」○中春教振旅，司馬以旗致民，平列陳，如戰之陳。中，音仲，下同。陳，直覲反。○以旗者，立旗期民於其下也。兵者守國之備。孔子曰：「以不教民戰，是謂棄之。」兵者凶事，不可空設，因蒐狩而習之。凡師出曰治兵，入曰振旅，皆習戰也。四時各教民以其一焉，春習振旅，兵入收衆專於農。平，猶正也。辨鼓鐸鐃鐃之用：王執路鼓，諸侯執賁鼓，軍將執晉鼓，帥帥執提，旅帥執鞀，卒長執鐃，兩司馬執鐸，公司馬執鐃。鐸，徒各反。鐃，直各反。鐃，女交反。賁，扶云反。帥，所類反。提，徒兮反。鞀，蒲兮反。○《鼓人》職曰：「以路鼓鼓鬼享，以賁鼓鼓軍事，以晉鼓鼓金奏。以金鐃止鼓，以金鐸通鼓，以金鐃節鼓。」鄭司農云：辨鼓鐸鐃鐃之用，謂鉦鐸之屬。鐃，讀如濁其源之濁。鐃，讀如謹曉之曉。提，讀如攝提之提。謂馬上鼓，有曲木提持立馬髦上者，故謂之提。杜子春云：公司馬，謂五人爲伍，伍之司馬也。玄謂：王不執賁鼓，尚之於諸侯也。伍長謂之公司馬者，雖卑同其號。以教坐作進退疾徐疏數之節，數，音朔。○習戰法。

遂以蒐田，有司表貉，誓民，鼓，遂圍禁，火弊，獻禽以祭社。蒐，所留反。貉，莫駕反。○春田爲蒐。有司，大司徒也。掌大田役治徒庶之政令。表貉，立教而貉祭也。誓民，誓以犯田法之罰也。誓曰：無干車，無日後射，立旌遂圍禁。旌弊爭禽而不審者，罰以假馬。禁者，虞衡守禽之厲禁也。既誓，令鼓而圍之，遂蒐田。火弊，火止也。春田主用火，因焚萊，除陳草，皆殺而火止。獻，猶致也，屬也。田止，虞人植旌，衆皆獻其所獲禽焉。《詩》云：「言私其縱，獻肩于公。」春田主祭社者，土方施生也。鄭司農云：貉讀爲馮，馮謂師祭也，書亦或爲「馮」。中夏教芟舍，如振旅之陳。群吏撰車徒，讀書契，辨號名之用，帥以門名，縣鄙各以其名，家以號名，鄉以州名，野以邑名，百官各象其事，以辨軍之夜事。其他皆如振旅。芟，蒲未反。撰，息轉反。○芟，讀如萊沛之沛。芟舍，草止之也，軍有草止之法。撰，讀曰筭。筭車徒，謂數擇之也。讀書契，以簿書校錄軍實之凡要。號名者，徽識所以相別也。鄉遂之屬謂之名，家之屬謂之號，百官之屬



謂之事。在國以表朝位，在軍又象其制而爲之，被之以備死事。帥，謂軍將及師帥、旅帥至伍長也。以門名者，所被徽識如其在門所樹者也。凡此言「以」也、「象」也，皆謂其制同耳。軍將皆命卿。古者軍將蓋爲營治於國門，魯有東門襄仲，宋有桐門右師，皆上卿爲軍將者也。縣鄙，謂縣正、鄙師至鄰長也。家，謂食采地者之臣也。鄉以州名，亦謂州長至比長也。野，謂公邑大夫。百官，以其職從王者。此六者，皆書其官與名氏焉。門則襄仲、右師明矣，鄉則南鄉甄，東鄉爲人是也。其他象此，云某某之名，某某之號，某某之事而已，未盡聞也。鄉，遂大夫，文錯不見，以其素信于民，不爲軍將，或爲諸帥，是以闕焉。夜事，戒夜守之事。草止者慎於夜，於是主別其部職。遂以苗田，如蒐之灋。車弊，獻禽以享禘。禘，餘略反。○夏田爲苗，擇取不孕任者，若治苗去不秀實者云。車弊，驅獸之車止也。夏田主用車，示所取物希者，皆殺而車止。《王制》曰：「天子殺則下大綏，諸侯殺則下小綏，大夫殺則止佐車，佐車止則百姓田獵。」禘，宗廟之夏祭也。冬夏田，主于祭宗廟者，陰陽始起，象神之在內。中秋教治兵，如振旅之陳。辨旗物之用：王載大常，諸侯

載旂，軍吏載旗，師都載旛，鄉遂載物，郊野載旐，百官載旗，各書其事與其號焉。其他皆如振旅。灋，之然反。旐，音兆。旗，音餘。○軍吏，諸軍帥也。師都，遂大夫也。鄉遂，鄉大夫也。或載旛，或載物，衆屬軍吏無所將也。郊，謂鄉、遂之州長、縣正以下也。野，謂公邑大夫。載旐者，以其將義卒也。百官，卿大夫也。載旗者，以其屬衛王也。凡旌旗，有軍衆者畫異物，無者帛而已。書，當爲「畫」，事也，號也，皆畫以雲氣。遂以獮田，如蒐田之灋。羅弊，致禽以祀禘。禘，音方。○秋田爲獮。獮，殺也。羅弊，罔止也。秋田主用罔，中殺者多也，皆殺而罔止。禘，當爲「方」，聲之誤也。秋田主祭四方，報成萬物，《詩》曰：「以社以方。」中冬教大閱，春辨鼓鐸，夏辨號名，秋辨旗物，至冬大閱，簡軍實。凡頒旗物以出軍之旗，則如秋；以尊卑之常，則如冬。司常佐司馬時也。大閱備軍禮，而旌旗不如出軍之時，空辟實。前期，群吏戒衆庶，脩戰法。群吏，鄉師以下。虞人萊所田之野爲表，百步則一，爲三表，又五十步爲一表。田之日，司馬建旗于

後表之中，群吏以旗物鼓鐸鐃，各帥其民而致。質明弊旗，誅後至者，乃陳車徒如戰之陳，皆坐。鄭司農云：「虞人萊所田之野，芟除其草萊，令車得驅馳。」《詩》曰：「田卒污萊。」玄謂：「萊，芟除可陳之處。後表之中五十步，表之中央，表所以識正行列也。四表積二百五十步，左右之廣，當容三軍，步數未聞。致，致之司馬。質，正也。弊，仆也。皆坐，當聽誓。群吏聽誓于陳前，斬牲以左右徇陳，曰：『不用命者斬之。』」群吏，諸軍帥也。陳前，南面鄉表也。《月令》：

季秋，「天子教于田獵，以習五戎。司徒搢扑，北面以誓之。」此大閱禮，實正歲之中冬，而說季秋之政，於周爲中冬，爲《月令》者失之矣。斬牲者，小子也。凡誓之大略，《甘誓》、《湯誓》之屬是也。中軍以鼙令鼓，鼓人皆三鼓，司馬振鐸，群吏作旗，車徒皆作。鼓行鳴鐃，車徒皆行，及表乃止。三鼓擁鐸，群吏弊旗，車徒皆坐。擁，音鹿。○中軍，中軍之將也。天子六軍，三三而居一偏，群吏既聽誓，各復其部曲。中軍之將令鼓，鼓以作其上衆之氣也。鼓人者，中軍之將、師

帥、旅帥也。司馬，兩司馬也。振鐸以作衆，作，起也。既起，鼓人擊鼓以行之，伍長鳴鐃以節之。伍長，一曰公司馬。及表，自後表前至第二表也。三鼓者，鼓人也。鄭司農云：「擁，讀如弄。玄謂：如涿鹿之鹿，掩上振之爲擁。擁者，止行息氣也。」《司馬法》曰：「鼓聲不過聞，鼙聲不過闕，鐸聲不過琅。」又三鼓，振鐸，作旗，車徒皆作。鼓進鳴鐃，車驟徒趨，乃表乃止，坐作如初。驟，士救反。○趨者，赴敵尚疾之漸也。《春秋傳》曰：「先人有奪人之心。」及表，自第二前至第三。乃鼓，車馳徒走，及表乃止。及表，自第三前至前表。鼓戒三闕，車三發，徒三刺。闕，苦穴反。○鼓戒，戒攻敵。鼓壹闕，車壹轉，徒壹刺，三而止，象服敵。乃鼓，退，鳴鐃且卻，及表乃止，坐作如初。卻，起略反。○鐃，所以止鼓。軍退，卒長鳴鐃以和衆。鼓人爲止之也。退，自前表至後表。鼓鐸則同習戰之禮，出入一也，異者廢鐃而鳴鐃。遂以狩田，以旌爲左右和之門。群吏各帥其車徒以敍和出，左右陳車徒，有司平之。旗居卒閒以分地，前後有屯百步，有

司巡其前後。險野人爲主，易野車爲主。狩，

手又反。分，扶問反。易，以豉反。○冬田爲狩，言守取

之，無所擇也。軍門曰和，今謂之壘門，立兩旌以爲之。敍

和出，用次第出和門也。左右，或出而左，或出而右。有司

平之，鄉師居門，正其出入之行列也。①旗，軍吏所載。分

地，調其部曲疏數。前後有屯百步，車徒異群相去之數也。

車徒畢出和門，鄉師又巡其行陳。鄭司農云：險野人爲

主，人居前，易野車爲主，車居前。既陳，乃設驅逆

之車，有司表貉于陳前。驅，起具反。○驅，驅出

禽獸，使趨田者也。逆，逆要，不得令走。設此車者，田僕

也。中軍以鼙令鼓，鼓人皆三鼓，群司馬振

鐸，車徒皆作，遂鼓行，徒銜枚而進。大獸公

之，小禽私之，獲者取左耳。群司馬，謂兩司馬

也。枚，如箸，銜之，有繡結項中，軍法止語，爲相疑惑也。

進，行也。鄭司農云：大獸公之，輪之於公。小禽私之，以

自畀也。《詩》云：「言私其豨，獻肩于公。」一歲爲豨，二歲

爲豨，三歲爲特，四歲爲肩，五歲爲慎。此明其獻大者於

公，自取其小者。玄謂：慎，讀爲廕。《爾雅》曰：「豕生三

曰豨。」豕牝曰豨，廕牝曰廕。②獲，得也。得禽獸者取左

耳，當以計功。及所弊，鼓皆駢，車徒皆譟。駢，

胡楷反。譟，素報反。○鄭司農云：及所弊，至所弊之處。

玄謂：至所弊之處，田所當於止也。天子諸侯蒐狩有常，

至其常處，吏士鼓譟，象攻敵寇勝而喜也。疾雷擊鼓曰駢。

譟，謹也。《書》曰：「前師乃鼓譟。」亦謂喜也。○鼓，音

符。徒乃弊，致禽饁獸于郊，人獻禽以享烝。

饁，余輒反。○徒乃弊，徒止也。冬田主用衆，物多衆得取

也。致禽饁獸于郊，聚所獲禽，因以祭四方神於郊，《月令》

季秋「天子既田，命主祠祭禽四方」是也。人又以禽祭宗

廟。及師，大合軍，以行禁令，以救無辜，伐

有罪。師，所謂王巡狩若會同，司馬起師，合軍以從，所

以威天下，行其政也。不言大者，未有敵，不尚武。若大

師，則掌其戒令，涖大卜，帥執事涖釁主及軍

器。釁，許慎反。○大師，王出征伐也。涖，臨也。臨大

卜，卜出兵吉凶也，《司馬法》曰：「上卜下謀，是謂參之。」

①「行」，原脫，據賀本補。

②「牝」字，原作「牡」，據寬文本、賀本改。

主，謂遷廟之主及社主在軍者也。器，鼓鐸之屬。凡師既受甲，迎主于廟及社主，祝奉以從，殺牲以血塗主及軍器，皆神之。及致，建大常，比軍衆，誅後至者。比，毗志反。○比，或作「庀」。鄭司農云：致，謂聚衆也。庀，具也。玄謂：致，鄉師致民於司馬。比，校次之也。及戰，巡陳眡事而賞罰。眡，音視。○事，謂戰功也。若師有功，則左執律，右秉鉞，以先愷樂獻于社。鉞，音越。○功，勝也。律所以聽軍聲，鉞所以爲將威也。先，猶道也。兵樂曰愷。獻于社，獻功于社也。《司馬法》曰：「得意則愷樂，愷歌，示喜也。」鄭司農云：故城濮之戰，《春秋傳》曰：「振旅愷以入于晉。」若師不功，則厭而奉主車。厭，於涉反。○鄭司農云：厭，謂厭冠，喪服也。軍敗，則以喪禮。故秦伯之敗於殽也，《春秋傳》曰：「秦伯素服郊次，鄉師而哭。」玄謂：厭，伏冠也。奉，猶送也，送主歸於廟與社。○《司常》：國之

大閱，贊司馬頒旗物：王建大常，諸侯建旂，孤卿建旛，大夫士建物，師都建旗，州里建旗，縣鄙建旐，道車載旂，旂車載旌。仲冬教大

閱，司馬主其禮。自王以下治民者，旗畫成物之象。王畫日月，象天明也。諸侯畫交龍，一象其升朝，一象其下復也。孤卿不畫，言奉王之政教而已。大夫士雜帛，言以先王正道佐職。師都，六鄉、六遂大夫也，謂之師都，都民所聚也。畫熊虎者，鄉、遂出軍賦，象其守猛，莫敢犯也。州里縣鄙，鄉遂之官，互約言之。鳥隼，象其捷勇也。龜蛇，象其扞難辟害也。道車，象路也，王以朝夕燕出入。旂車，木路也，王以田以鄙。全羽，析羽，五色，象其文德也。大閱，王乘戎路，建大常焉。玉路、金路，不出。○《巾

車》：木路，前樊鵠纓，建大麾以田。前，音翦。樊，步干反。鵠，戶毒反。麾，吁爲反。○木路，不輓以革，漆之而已。前，讀爲緇翦之翦，淺黑也。木路無龍勒，以淺黑飾韋爲樊，鵠色飾韋爲纓。不言就數，飾與革路同。大麾，不在九旗中，以正色言之則黑，夏后氏所建。田，四時田獵。○《田僕》：掌馭田路，以田以鄙。馭，音御。○田路，木路也。田，田獵也。鄙，循行都鄙。掌佐車之政，佐，亦副。設驅逆之車，驅，起御反。○驅，驅禽使前趨獲，逆衙還之，使不出圍。○衙，五嫁反。令

獲者植旌，以告獲也。植，樹也。及獻比禽。比，毗

志反。○田弊，獲者各獻其禽。比，種物相從次數之。凡

田，王提馬而走，諸侯晉，大夫馳。提，猶舉也。

晉，猶抑也。使人扣而舉之抑之，皆止奔也。馳，放不扣。

○《司几筵》：甸役，則設熊席，右漆几。甸，

音田。○謂王甸有司祭表貉所設席。○《迹人》：掌

邦田之地政，爲之厲禁而守之。田之地，若今苑

也。凡田獵者受令焉，令，謂時與處也。禁麋卵

者與其毒矢射者。麋，音迷。卵，力管反。○爲其天

物且害心多也。①麋，麋鹿子。○《肆師》：凡師甸

用牲于社宗，則爲位。甸，音田。○社，軍社也。

宗，遷主也。○《甸祝》：掌四時之甸。師甸，

致禽于虞中，乃屬禽。及郊，饁獸，舍奠于祖

禰，乃斂禽。稠牲，稠馬，皆掌其祝號。屬，音

燭。饁，于輒反。舍，音釋。稠，音誅。祝，之秀反。○師

田，謂起大眾以田也。致禽于虞中，使獲者各以其禽來致

于所表之處。屬禽，別其種類。饁，饋也，以所獲獸饋於

郊，薦於四方群兆，人又以奠于祖禰，薦且告反也。斂禽，

謂取三十人腊人也。○《典瑞》：牙璋以起軍旅，

以治兵守。鄭司農云：牙璋，瑑以爲牙。牙齒，兵象，

故以牙璋發兵，若今時以銅虎符發兵。玄謂：牙璋，亦王

使之瑞節。兵守，用兵所守，若齊人戍遂，諸侯戍周。

○《小宗伯》：若大師，則帥有司而立軍社，

奉主車。有司，大祝也。王出軍，必先有事於社及遷廟，

而以其主行。社主曰軍社，遷主曰祖。《春秋傳》曰：「軍

行拔社釁鼓，祝奉以從。」曾子問曰：「天子巡狩，以遷廟

主行，載于齊車，言必有尊也。」《書》曰：「用命賞于祖，不

用命戮于社。」社之主，蓋用石爲之。奉，謂將行。若軍

將有事，則與祭，有司將事于四望。軍將有事，

將與敵合戰也。鄭司農云：則與祭，謂軍祭表禡軍社之

屬。小宗伯與其祭事。玄謂：與祭有司，謂大祝之屬，蓋

司馬之官實典焉。○《大祝》：大師，宜于社，造

于祖，設軍社，類上帝。國將有事于四望，及

①「物」，原作「牧」，據寬文本、賀本改。

軍歸獻于社，則前祝。大，並音泰。造，七報反。○鄭司農說「設軍社」以《春秋傳》曰所謂「君以師行，被社鼙鼓，祝奉以從」者也。則前祝，大祝自前祝也。玄謂：前祝者，王出也，歸也，將有事於此神，大祝居前，先以祝辭告之。○《大師》：大師執同律以聽軍聲，而詔吉凶。上大音泰，下大如字。○大師，大起軍師。兵書曰：「王者行師出軍之日，授將弓矢。士卒振旅，將張弓大呼，大師吹律合音。商則戰勝，軍士強；角則軍擾多變，失土心；宮則軍和，士卒同心；徵則將急，數怒，軍士勞；羽則兵弱，少威明。」鄭司農說以師曠曰：「吾驟歌北風，又歌南風。南風不競，多死聲，楚必無功。」○《大史》：大師，抱天時，與大師同車。大史與大師之大，音泰。○鄭司農云：大出師，則大史主抱式以知天時，處吉凶。史官主知天道，故《國語》曰：「吾非瞽史，焉知天道。」○《鼓人》：掌教六鼓四金之音聲，以節聲樂，以和軍旅，以正田役。以鼗鼓鼓軍事，以鼙鼓鼓役事。凡軍旅，夜鼓鼙。鼗，扶云反。鼙，音羔。鼙，千歷反。○鼙，夜戒守鼓也。《司馬法》曰：

「昏鼓四通爲大鼙，夜半三通爲晨戒，日明五通爲發眊。」軍動則鼓其衆，動且行。田役亦如之。○《挈壺氏》：凡軍事，縣壺以序聚櫜。縣，音玄。櫜，音託。○鄭司農云：縣壺以爲漏，以序聚櫜，以次更聚擊櫜備守也。玄謂：擊櫜，兩木相敲，行夜時也。○《銜枚氏》：軍旅令銜枚。爲其言語以相誤。○《環人》：掌致師，致師者，致其必戰之志。古者將戰，先使勇力之士犯敵焉。《春秋傳》曰：「楚許伯御樂伯，攝叔爲右，以致晉師。許伯曰：『吾聞：致師者，御摩旌摩壘而還。』樂伯曰：『吾聞：致師者，左射以鼓，代御執轡，御下捫馬，掉鞅而還。』攝叔曰：『吾聞：致師者，右入壘，折馘，執俘而還。』皆行其所聞而復之。」察軍慝，慝，吐得反。○慝，陰姦也。視軍中有爲慝者，則執之。環四方之故，卻其以事謀來侵伐者，所謂折衝禦侮。巡邦國搏謀賊，搏，音博。謀，音牒。○謀賊，反閒爲國賊。訟敵國，敵國兵來，則往之與訟曲直，若齊國佐如師。揚軍旅，爲之威武以觀敵，《詩》云：「維師尚父，時維鷹揚。」降


圍邑。降，戶江反。○圍邑欲降者，受而降之。《春秋傳》曰：「齊人降鄆。」○《大司寇》：大軍旅，洊戮于社。社，謂社主在軍者也。鄭司農說以《書》曰：「用命賞于祖，不用命戮于社。」○《大司樂》：王師大獻，則令奏愷樂。愷，可亥反。○天子將出征，類乎上帝，宜乎社，造乎禰，禡於所征之地。造，七報反。禰，乃禮反。禡，馬怕反。○禡，師祭也，爲兵禱，其禮亦亡。受命於祖，告祖也。受成於學，定兵謀也。出征執有罪，反釋奠于學，以訊馘告。馘，古獲反。○釋菜奠幣，禮先師也。訊馘，所生獲斷耳者，《詩》曰：「執訊獲醜。」又曰：「在頻獻馘。」馘，或爲國。○《王制》：○兵車不式，尚威武，不崇敬。武車綏旌，綏，耳佳反。○盡飾也。綏，謂垂舒之也。武車，亦兵車。德車結旌。不盡飾也。結，謂收斂之也。德車，乘車。史載筆，士載言。謂從於會同，各持其職以待事也。筆，謂書具之屬。言，謂會同盟要之辭。前有水，則載青旌；前有塵埃，則載鳴鳶；前有車騎，則載飛

鴻；前有士師，則載虎皮；前有摯獸，則載貔貅。載，音戴。埃，烏來反。鳶，悅專反。貔，婢支反。貅，許求反。○載，謂舉於旌首以警衆也。禮：君行師從，卿行旅從。①前驅舉此，則士衆知所有。所舉各以其類象。青，青雀，水鳥。鳶，鳴則將風。鴻，取飛有行列也。士師，謂兵衆。虎，取其有威勇也。貔貅，亦摯獸也。《書》曰：「如虎如貔。」士，或爲仕。行，前朱鳥而後玄武，左青龍而右白虎。招搖在上，急繕其怒，以此四獸爲軍陳，象天也。急，猶堅也。繕，讀曰勁。又畫招搖星於旌旗上，以起居堅勁軍之威怒，象天帝也。招搖星，在北斗杓端，主指者。進退有度，度，謂伐與步數。左右有局，各司其局。局，部分也。○《曲禮》。

### 戰陳圖

《後漢志》云：「立秋之日，斬牲獬劉，肆孫、吳六十四陣。」今按：諸葛亮魚復平沙石磧八陳如左：

①「卿」，原作「知」，據元明本、賀本改。





《風后握機》文曰：天陳、地陳、風陳、雲陳、虎翼陳、蛇蟠陳、飛龍陳、鳥翔陳、八陳。四爲正，四爲奇。陳，去聲。蟠，蒲官反。○公孫洪曰：①

世有八卦陳法，其中既不用奇、正，似非風后所傳，未可參用。餘奇爲握機，或總稱之。先出遊軍，定兩端，天有衡，地有軸，前後有衝，風附於天，雲附於地。衡有重列，各四隊。重，直龍反。前後之衝，各二隊。風居四維，故有圓軸單列各二隊，前後之衝各三隊。雲居四角，故有方。天居兩端，地居中間，總爲八陳。陳訖，遊軍從後躡敵，躡，昵輒反。或驚其左，或驚其右。聽音望麾，以出四奇。麾，吁爲反。天地之前衝爲虎翼，風爲蛇蟠，圍繞之義也。虎居於中，張翼以進。蛇居兩端，向敵而蟠以應之。天地之後衝爲飛龍，雲爲鳥翔，突擊之義也。龍居於中，張翼以

進，鳥掖兩端，向敵而翔以應之。虛實二壘，皆逐天文氣候，向背山川利害，隨時而行，以正合以奇勝。○金鼓旌旗數，角音二：初警衆，末收衆。革音五：一持兵，二結陳，三行，四趨走，五急鬪。金音五：一緩鬪，二止鬪，三退，四背，五急背。麾法五：一玄，二黃，三白，四青，五赤。旗法八：一天玄，二地黃，三風青，一作赤。四雲白，五天前，上玄下赤。六天後，上玄下白。七地前，上黃下赤。八地後。上黃下青。二革一金爲天，三革三金爲地，二革三金爲風。三革二金爲雲，四革三金爲龍，三革四金爲虎，四革五金爲鳥，五革四金爲蛇，此八陳各用金鼓之制。其金革之間加一角音者，在天爲兼風，在地爲兼雲，在龍爲兼鳥，在虎爲兼蛇；加二角音者，全師

①「洪」，當作「弘」，因避諱而改，下「公孫洪」同。

進東；加三角音者，全師進南；加四角音者，全師進西；加五角音者，全師進北。鞞音不止者，行伍不整。鞞，徒刀反。行，戶郎反。金革既息，而角音不止者，師並旋。三十二隊天衝，八隊天前衝，八隊天後衝，十六隊風。二十四隊地軸，十二隊地前衝，十二隊地後衝。十六隊雲。以天地前衝爲虎翼，天地後衝爲飛龍，風爲蛇蟠，雲爲鳥翔。天地以下，八重以列。或曰：握機望敵，即引其後，以犄角前列不動。犄，舉綺反。○公孫洪曰：司馬氏陳法依此而前列，先進以次之。或合而爲一，因離而爲八，各隨師之多少，觸類而長。長，丁丈反。天或圓布不動，前爲右，後爲左，天地四望之屬是也。天居兩端，其次風，其次雲，左右相向是也。公孫洪曰：此爲靜。地方布風雲，各在前後衝之前。天居兩端，其次地居中間，兩地爲比是也。公孫洪曰：此爲動爲從，

天陳變爲地陳，或即張形布勢，破敵攻圍，不定其形，故爲動也。縱布天一，天二次之。縱布地四，次於天後。縱布四風，挾天地之左右，天地前衝居其右，後衝居其左，雲居兩端，虛實二壘，則此是也。縱，子容反。○公孫洪曰：人多傳韓信注

釋「天或圓布」以下與此微有差異，而范蠡、樂毅之說相雜。今亦錯綜於其中，其部隊或二，或五，或三十，或五十，陳圖如此，變通由人。一本自「或五十」以下云「變通之理，寄之明哲，不復備載。近古以來，其文不滿尺，多憑口訣以相傳授，予今於難解之處增字以發明之」。○按此法，六十四陳，天衝十六陳居兩端，地軸十二陳居中間，天前衝四陳居右，後衝四陳居左，地前衝六陳居前，後衝六陳居後。風八陳附天，雲八陳附地，合爲八陳。天衝并前後衝二十四陳，合風八陳，爲三十二陽。地軸并前後衝二十四陳，合雲八陳，爲三十二陰。遊軍二十四陳，在六十四陳之後。凡行軍、結陳、合戰，設疑補闕，全在遊兵。天地之前衝爲虎翼，風爲蛇蟠。兵家先陰，以右爲前，又風從虎，虎與蛇皆陰類，同位西北也。天地之後衝爲飛龍，雲爲鳥翔。兵家後陽以左爲後，又雲從龍，龍與鳥皆陽類，同位東南也。以天

地風雲爲四正，以龍虎鳥蛇爲四奇，所謂八陳也。每以二陳相從，一陳之中又有兩陳，一戰一守，故又有三十二隊天衡，二十四隊地軸等數也。中外有輕重之權，陰陽有剛柔之節，彼此有虛實之地，主客有先後之數。輕重之權，剛柔之節者，家計也。以實擊虛，以先奪後者，合變也。我易而敵常險，我簡而敵常繁，兵法所謂致人而不致於人，此其機要也。○先王之治，順天之道，設地之宜，官民之德，而正名治物。立國辨職，以爵分祿，諸侯說懷，海外來服，獄弭而兵寢，弭，縣婢反。聖德之治也。其次，賢王制禮樂法度，乃作五刑。興甲兵以討不義。巡狩省方，狩，手又反。省，悉井反。會諸侯，考不同。其有失命亂常、背德背，布內反。逆天之時，而危有功之君，徧告于諸侯，徧，音遍。彰明有罪，乃告于皇天上帝、日月星辰，禱于后土四海神祇，山川塚社。告，都皓反。祇，翹移反。塚，知隴反。乃造于先王，造，七報反。然後冢宰徵師于諸侯曰：某國爲不道，征之。以某年月日師至于

某國，會天子正刑。冢宰與百官布令於軍曰：「人罪人之地，無暴神祇，無行田獵，無毀土功，無燔牆屋，燔，音煩。無伐林木，無取六畜、禾黍、器械。畜，許六反。械，戶戒反。見其老幼，奉歸勿傷；雖遇壯者，不校勿敵；敵若傷之，醫藥歸之。」既誅有罪，王及諸侯脩正其國，舉賢立明，正復厥職。《司馬法》。○天下有道，禮樂征伐自天子出。必以歲之孟秋，賞軍帥武人於朝，帥，所類反。朝，直遙反。簡練傑俊，任用有功，命將選士，以誅不義。將，子亮反。於是孟冬以級授軍，司徒搢扑北面而誓之，搢，音薦。○以等級授其鞭扑。誓于社以習其事。先期五日，大史誓于祖廟，大，音泰。擇吉日齋戒，告于郊社稷宗廟。既筮，則獻兆於天子。天子使有司以牲特告社，告以所征之事而受命焉。舍奠于帝學以受成，舍，音釋。○成，謂師律已成定。然後乃類上帝柴于郊

以出，以齊車遷廟之主及社主行。大司馬職奉之，齊，側皆反，下同。○言以大司馬奉所遷廟社之主。無遷廟主，則以幣帛皮圭告于祖禰，禰，乃禮反。謂之主命，亦載齊車。凡行主皮圭幣帛，皆每舍奠焉而後就館。言廟社行主及皮圭幣帛之主命每所至之地，則先舍奠而後就館，示有尊也。舍，當作釋。主車止于中門之外，外門之內，廟主居于道左，社主居于道右，其所經名山大川，皆祭告焉。○及至敵所，將戰，大史卜戰日，卜右御。先期三日，有司明以敵人罪狀，告之史，史定誓命。戰日，將帥陳列車甲卒伍于軍門之前，有司讀誥誓，使周定三令五申既畢，遂禱戰祈克于上帝。然後即敵，將士戰，全已克敵。史擇吉日，復禱於所征之地，禱，馬怕反。○禱，師祭名也。柴於上帝，祭社奠祖以告克者，不頓兵傷士也，戰不克則不告也。○凡類禱，皆用甲、丙、戊、庚、壬之剛日。有

司簡功行賞，不稽于時。其用命者，則加爵受賜于祖奠之前；其奔北犯令者，則加刑罰戮于社主之前。《書》稱：「用命則賞于祖，弗用命則戮于社。」然後鳴金振旅，有司徧告捷于時所有事之山川。○既至，舍于國外，三日齊，以特牛親格于祖禰，然後人，設奠以反主。舍，音赦。齊，側皆反。禰，乃禮反。○設奠反其主於廟於社。若主命，則卒奠斂玉埋之于廟兩階間。言埋玉則幣帛焚之。反社主如初迎之禮，舍奠于帝學，以訊馘告，大享於群吏，用備樂饗，有功於祖廟舍爵策勳焉，謂之飲至，此天子親征之禮也。舍奠之舍，音釋。馘，古獲反。舍爵之舍，音捨。○並《孔叢子·問軍禮》。○曾子問曰：「古者師行必以遷廟主行乎？」孔子曰：「天子巡守，以遷廟主行，載于齊車，言必有尊也。今也取七廟之主以行，則失之矣。齊，側皆反。○齊車，金路。當七廟、五廟無虛主。虛主者，唯

天子崩，諸侯薨，與去其國，與祫祭於祖，爲無主耳。」祫，音洽。○曾子問曰：「古者師行無遷主，則何主？」孔子曰：「主命。」問曰：「何謂也？」孔子曰：「天子、諸侯將出，必以幣帛皮圭告于祖禰，遂奉以出，載于齊車以行，每舍奠焉而后就舍，以脯醢禮神，乃敢即安也。所告而不以出，即埋之。反必告，設奠。」並《禮記·曾子問》。○乘兵車，出先刃，入後刃，不以刃鄉國也。軍尚左，左，陽也，陽主生，將軍有廟勝之策。左將軍爲上，貴不敗績。卒尚右。右，陰也，陰主殺。卒之行伍以右爲上，示有死志也。○《少儀》。○有虞氏戒於國中，欲民體其命也。夏后氏誓於軍中，欲民先成其慮也。殷誓於軍門之外，欲民先意以待事也。周將交刃而誓之，以致民志也。夏后氏正其德也，未用兵之刃，故其兵不雜。殷，義也，始用兵之刃矣。周，力也，盡用兵之刃矣。夏賞於朝，貴善也。殷

戮於市，威不善也。周賞於朝，戮于市，勸君子懼小人也。三王彰其德，一也。朝，直遙反。○《司馬法》。○戎車，<sup>①</sup>夏后氏曰鉤車，先正也；殷曰寅車，先疾也；周曰元戎，先良也。旂，夏后氏玄首，人之執也；殷白，天之義也；周黃，地之道也。章，夏后氏以日月，尚明也；殷以虎，尚威也；周以龍，尚文也。《司馬法》。○天子命將出征，親絜齊盛服，設奠于祖以詔之。將，子亮反。絜，音潔。齊，側皆反。○詔，告之。大將先入，軍吏畢從，皆北面再拜稽首而受。稽，音啟。○受所命。天子當階，南面命授之節鉞，大將受。鉞，音越。○謂受所賜節鉞。天子乃東向西面而揖之，謂轉南面自東，遂西面而揖。示弗御也。謂既揖已，則不御坐。然後告太社，冢宰執蜃宜於社之右。蜃，時軫反。○《左

①「戎車」，原脫，據賀本補。

傳云：「戎有受脤。」脤，祭社之肉，盛以蜃器。南面授

大將，大將北面稽首再拜而受之，承所頒賜于軍吏。頒，音班。其出不類，其克不馮，馮，馬

怕反。戰之所在有大山川則祈焉，禱克于五帝。捷則報之，振旅復命，簡異功勤，親告廟告社而後適朝。朝，直遙反。○《孔叢子·問軍禮》。

○祈勝之禮：命勇謀之將以禦敵，先使之迎于適所從來之方，爲壇祈克于五帝，衣服隨其方色，執事人數從其方之數，從其方之數，則北方七人，南方九人，東方十一人，西方十三人。牲則用

其方之牲。祝史告于社稷宗廟邦域之內名山大川，君親素服誓衆于大廟，曰：大，音泰。

「某人不道，侵犯大國，二三子尚皆同心比力，比，毗志反。死而守。」將帥稽首再拜受命。

將，子亮反。帥，所類反，下同。稽，音啟。既誓，將帥

勒士卒陳于廟之右，陳，去聲。君立大廟之庭，

祝史立于社，百官各警其事御于君以待命。

乃大鼓于廟門，詔將帥命卒習射三發，擊刺三行，告廟用兵于敵也。五兵備效，乃鼓而出以即敵，此諸侯應敵之禮也。應，於證反。

○《孔叢子·儒服》篇。○帥師者受命於廟，受脤於社。脤，時忍反。○脤，宜社之肉，盛以蜃器。○將

帥受命者將率人，軍吏畢入，皆北面再拜稽首受命，天子南面而授之鉞，東行西面而揖之，示弗御也。將，子亮反。帥，率，並所類反。稽，音啟。

○將居軍中之禮：介冑在身，執銳在列，

雖君父不拜，若不幸軍敗，則駟騎赴告，不載囊輶。將，子亮反。冑，直又反。駟，音日。囊，音羔。輶，丑亮反。○《大雅》曰：「載囊弓矢。」囊，輶也。輶，弓

衣。天子素服哭于庫門之外三日，大夫素服

哭于社亦如之，亡將失城則皆哭七日。軍敗

三日哭，將亡城失則七日哭，蓋輕重之差。天子使使

迎于軍，命將帥無請罪。然後將帥結草自

縛，袒右肩而入，蓋喪禮也。帥，所類反。○並

《孔叢子》。○齊桓公既立參國伍鄙之法，見《制國》篇。問於管子曰：「吾欲從事於諸侯，其可乎？」欲行伯道，討不義也。管子對曰：「未可！國未安。」桓公曰：「安國若何？」管子對曰：「脩舊法，伯王之法。擇其善者而業用之。業，猶創也。遂滋民，與無財，遂育也。滋，長也。貧無財者，振業之也。而敬百姓，則國安矣。」桓公曰：「諾。」遂修舊法，擇其善者而業用之。遂滋民，與無財，而敬百姓。國既安矣，桓公曰：「國安矣，其可乎？」管子對曰：「未可！君若正卒伍，脩甲兵，」《周禮》：五人爲伍，百人爲卒。今管子亦以五人爲伍，而以二百人爲卒。則大國亦將正卒伍，脩甲兵，則難以速得志矣。君有攻伐之器，小國諸侯有守禦之備，則難以速得志矣。君若欲速得志於天下諸侯，則事可以隱令，可以寄政。」事，戎事也。隱，匿也。寄，託也。匿軍令，託於國政，若有征伐，鄰國不知。

也。桓公曰：「爲之若何？」管子曰：「作內政而寄軍令焉。」內政，國政也。因治政以寄軍令也。桓公曰：「善。」管子於是制國：五家爲軌，軌爲之長；長，丁丈反，下同。○軌中一人爲之長也。十軌爲里，里有司；爲立有司。四里爲連，連爲之長；十連爲鄉，鄉有良人焉。賈侍中云：良人，鄉士也。昭謂：良人，鄉大夫也。以爲軍令：爲軍掌令。五家爲軌，故五人爲伍，軌長帥之；居則爲軌，出則爲伍，所謂寄政也。十軌爲里，故五十人爲小戎，里有司帥之；小戎，兵車也。此有司之所乘，故曰小戎。《詩》云：「小戎優收。」古者戎車一乘，步卒七十二人，今齊五十人。四里爲連，故二百人爲卒，連長帥之；十連爲鄉，故二千人爲旅，鄉良人帥之；五鄉一帥，故萬人爲一軍，五鄉之帥帥之。一帥，之帥，並所類反。○五鄉，每一軍爲五鄉也。鄉帥，卿也。萬人爲軍，齊制也，周則萬二千五百人爲軍。帥，長也。三軍，故有中軍之鼓，有

國子之鼓，有高子之鼓。春以獫狁旅，獫，色牛反。○春田曰獫。振，整也。旅，衆也。《周禮》：「仲春教振旅，遂以獫田也。」秋以獫治兵。獫，息典反。○秋田曰獫，《周禮》：「仲秋教治兵，遂以獫田也。」是故卒伍整於里，軍旅整於郊。內教既成，令勿使遷徙。遷徙，猶改更也。伍之人祭祀同福，死喪同恤，恤，憂也。禍災共之。人與人相疇，家與家相疇，疇，匹也。世同居，少同游。故夜戰聲相聞，足以不乖；晝戰目相視，足以相識；其歡欣足以相死。少，詩照反。○致死以相救也。居同樂，行同和，死同哀。是以守則同固，戰則同彊。君有此士也三萬人，以方行於天下，樂，音洛。○方，猶橫也。以誅無道，以屏周室。屏，猶蕃也。天下大國之君莫之能禦也。禦，當也。○《齊語》。○荀卿子曰：「仁人之兵聚則成卒，散則成列，卒，卒伍。列，行列。言動皆有備也。延則若莫邪之長刃，嬰之者斷，兌則若

莫邪之利鋒，當之者潰，邪，于嗟反。○兌，猶聚也，與隊同，謂聚之使短。潰，壞散也。《新序》作銳，則若莫邪之利鋒也。圜居而方正，則若盤石然，觸之者角摧。摧，徂回反。○圜居方正，謂不動時也，則如大石之不可移動也。○王者之軍制：將死鼓，將，子亮反。○死，謂不棄之而奔亡也。《左傳》曰：「師之耳目，在吾旗鼓也。」御死轡，百吏死職，士大夫死行列。聞鼓聲而進，聞金聲而退，順命爲上，有功次之。轡，音秘。行，戶江反。○軍之所重在順命，故有功次之。令不進而進，猶令不退而退也，其罪惟均。令，教令也。言使之不進而進，猶令不退而退，其罪同也。不殺老弱，不獵禾稼，獵，與「躐」同，踐也。服者不禽，格者不舍，犇命者不獲。服，謂不戰而退者，不追禽之。格，謂相拒捍者。犇命，謂奔走來歸其命者，不獲之爲囚俘也。凡誅，非誅其百姓也，誅其亂百姓者也。百姓有扞其賊，則是亦賊也。謂爲賊之扞蔽也。以故順刃者生，蘇刃者



死，犇命者貢。順刃，謂不戰，偕之而走者。蘇，讀爲倖。倖，向也。謂相向格鬪者。貢，謂來歸命者獻於上將也。○王者有誅而無戰，城守不攻，兵革不擊。德義未加，所以敵人不戰，故不攻擊也，且恐傷我之士卒也。上下相喜則慶之。敵人上下相愛悅，則慶賀之，況侵伐乎？不屠城，屠，謂毀其城，殺其民，若屠者然也。不潛軍，不留衆，不久留暴露於外也。師不越時。古者行役不踰時也。故亂者樂其政，不安其上，欲其至也。樂，音洛。○東征西怨之比。○並《荀子》。○宋人弑昭公，趙宣子請師於靈公以伐宋，發令於大廟，召軍吏而戒樂正，大，音泰。○正，長也。軍吏，主師旅。樂正，主鐘鼓。令三軍之鐘鼓必備。趙同曰：「國有大役，不鎮撫民而備鐘鼓，何也？」宣子曰：「大罪伐之，小罪憚之。憚，懼也。襲侵之事，陵也。輕曰襲。無鐘鼓曰侵。陵，以大陵小也。是故備鐘鼓，聲其罪也；以聲張其罪。戰以錙于、丁寧，儆其民

也。錙，音純。○錙于，形如碓頭，與鼓角相和。丁寧者，謂鉦也。儆，戒也。唐尚書云：錙于，鐃也。非也，鐃與錙于各異物。襲侵密聲，爲慙事也。慙，音暫。○慙其無備也。今宋人弑其君，罪莫大焉！明聲之，猶恐其不聞也。吾備鐘鼓，爲君故也。」爲，于僞反。○爲欲尊明君道。乃使旁告于諸侯，治兵振旅，鳴鐘鼓以至於宋。《晉語》。○吳侵陳，斬祀殺厲，祀，神位有屋樹者。厲，疫病。吳侵陳，以魯哀元年初。師還出竟，陳大宰嚭使於師，夫差謂行人儀曰：「是夫也多言，盍嘗問焉？」還，音旋。竟，音境。太，音泰。嚭，音鄙反。使，色吏反。盍，胡閏反。○大宰，行人官名也。夫差，吳子光之子。盍，何不也。嘗，猶試也。夫差修舊怨，庶幾其師有善名。大宰嚭曰：「古之侵伐者不斬祀，不殺厲，不獲二毛。獲，謂係虜之。二毛，鬢髮斑白。今斯師也殺厲與？其不謂之殺厲之師與？」與，音餘，下

同。○欲微切之，故其言似若不審，然正言殺厲重人。曰：「反爾地，歸爾子，則謂之何？」子謂所獲民臣。曰：「君王討敝邑之罪，又矜而赦之，師與有無名乎？」又微勸之終其意。○《檀弓》。○戎，昭果毅以聽之之謂禮。聽，謂常存於耳，著於心，想聞其政令。殺敵爲果，致果爲毅。易之，戮也。《左傳》宣公二年。○工尹商陽與陳弃疾追吳師，及之，工尹，楚官名。弃疾，楚公子弃疾也。以魯昭八年帥師滅陳，縣之，楚人善之，因號焉。至十二年，楚子狩於州來，使蕩侯、潘子、司馬督、囂尹午、陵尹喜圍徐以懼吳，於時有吳師。陳，或作「陵」，楚人聲。陳弃疾謂工尹商陽曰：「王事也，子手弓，而可手弓。」子射諸。」射，食亦反，下同。○商陽仁，不忍傷人，以王事勸之。射之，斃一人，韞弓。斃，音敝，下同。韞，且亮反。○不忍復射。斃，仆也。韞，韞也。又及，謂之，又斃二人。每斃一人，揜其目。止其御曰：「朝不坐，燕不與，殺三人亦足以反

命矣。」朝，直遙反。與，音預。○朝，燕於寢，大夫坐於上，士立於下，然則商陽與御者皆士也。兵車參乘，射者在左，戈盾在右，御在中央。孔子曰：「殺人之中，又有禮焉。」善之。子路怫然進曰：「人臣之節，當君大事，唯力所及，死而後已，夫子何善此？」子曰：「然如汝言也，吾取其有不忍殺人之心而已。」《禮記·檀弓》、《家語·子貢問》。○子路問於孔子曰：「臧武仲率師與邾人戰，于狐貍遇，敗焉，師人多喪而無罰，古之道然與？」孔子曰：「凡謀人之軍師，敗則死之，謀人之國邑，危則亡之。」貍，音臺。喪，息浪反。與，音餘。○利己亡衆，非患也。言亡之者，雖辟賢，非義退。古之正也。其君在焉者，有詔則無討。」詔，君之教也，有君教則臣無討。○古之爲軍也，軍有左右，闕從補之，左右，左右部也。闕，缺也。

①「討」下，元明本、賀本有「○家語子貢問」。

成而不知，是以寡敗。不知，敵不知有闕。若以下貳上，闕而不變，敗弗補也。變，更也。變非聲章，弗能移也。聲，金鼓也。章，旌旗也。移，動也。聲章過數則有釁，有釁則敵人。釁，許慎反。○釁，隙也。軍法，進退旂鼓有數，<sup>①</sup>過則有隙，敵見隙而犯己也。敵人而凶，救敗不暇，誰能退敵。敵之如志，國之憂也。可以陵小，難以征大。以下享貳上可以侵陵，小國難以征大國。<sup>②</sup>○古者賢王明民之德，盡民之善，故無廢德，無簡民。賞無所生，罰無所試。有虞氏不賞不罰而民可用，<sup>③</sup>至德也。夏賞而不罰，至教也。殷罰而不賞，至威也。周以賞罰，德衰也。賞不踰時，欲民速得爲善之利也。罰不遷列，欲民速覩爲不善之害也。大捷不賞，上下皆不伐善。上苟不伐善，則不驕矣；下苟不伐善，必亡等矣。上下不伐善若此，讓之至也。大敗不誅，上下皆以不善在己。上苟以不善

在己，必悔其過；下苟以不善在己，必遠其罪。遠，于萬反。<sup>④</sup>上下分惡若此，讓之至也。古者戍軍三年不興，覩民之勞也。上下相報若此，和之至也。得意則愷歌，示喜也。愷，可亥反。偃伯靈臺，答民之勞，示休也。○古者以仁爲本，以義治之之謂正，正不獲意則權，權出於戰，不出於中人。是故殺人安人，殺之可也。攻其國，愛其民，攻之可也。以戰止戰，雖戰可也。故仁見親，義見說，說，音悅。智見恃，勇見方，信見信。內得愛焉，所以守也；外得威焉，所以戰也。戰道：不違時，不歷民病，所以愛吾民也。不加喪，不因凶，所以愛夫其民也。冬夏不興師，所以兼

①「旂」，元明本、寬文本、賀本作「旗」。

②「大國」下，寬文本有「○家語」。

③「氏」，原脫，據元明本、寬文本、賀本補。

④「萬」，原作「重」，據寬文本、賀本改。

愛民也。故國雖大，好戰必亡；天下雖安，忘戰必危。天下既平，天子大愷，春蒐秋獮。諸侯春振旅，秋治兵，所以不忘戰也。愷，可亥反。蒐，所留反。獮，息典反。古者逐奔不過百步，縱綏不過三舍，是以明其禮也。不窮不能而哀憐傷病，是以明其仁也。成列而鼓，是以明其信也。爭義不爭利，是以明其義也。又能舍服，是以明其勇也。舍，音捨。知終知始，是以明其智也。六德以時合教，以爲民紀之道也，自古之政也。《司馬法》。○天子之義，必純取法天地，而觀於先聖。士庶之義，必奉於父母而正於君長。長，丁丈反。故雖有明君，士不先教，不可用也。古之教民必立貴賤之倫經，使不相陵，德義不相踰，材技不相掩，勇力不相犯，故力同而意和也。古者國容不入軍，軍容不入國，故德義不相踰。上貴不伐之士。不伐之士，上之器也。苟不伐

則無求，無求則不爭。國中之聽，必得其情，軍旅之聽，必得其宜，故材技不相掩。從命爲士上賞，犯命爲士上戮，故勇力不相犯。既致教其民，然後謹選而使之。事極修則百官給矣，教極省則民興良矣，習貫成則民體俗矣，教化之至也。古者逐奔不遠，縱綏不及。不遠則難誘，不及則難陷。以禮爲固，以仁爲勝。既勝之後，其教可復，是以君子貴之也。《司馬法》。○古者國容不入軍，軍容不入國。軍容入國則民德廢，國容入軍則民德弱。故在國言文而語溫，在朝恭以遜。朝，直遙反。修己以待人，不召不至，不問不言，難進易退。易，以豉反。在軍抗而立，在行遂而果。介者不拜，兵車不式，城上不趨，危事不齒。故禮與法，表裏也；文與武，左右也。《司馬法》。○天子、諸侯無事則歲三田，三田者，夏不田，蓋夏時也。《周禮》春曰蒐，夏曰苗，秋曰獮，冬曰

狩。一爲乾豆，二爲賓客，三爲充君之庖。君尊宗廟敬賓客，故先人而後己，取其下也。又分別殺之三等，故自左膘而射之，達過於右肩隅爲上殺，以其貫心死疾，肉最繁美，故以爲乾豆也。射右耳本箋云「射，當爲『達』」，亦自左射之。達右耳本而死者爲次殺，以其遠心，死稍遲，肉已微惡，故以爲賓客也。不言自左者，蒙上文可知。射左股髀而達過於右脅髓爲下殺，以其中脅死最遲，肉又益惡，充君之庖也。凡射獸，皆逐後從左廂而射之，達於右髓。獨言射左髀，則上殺達於右隅，當自左脅也，次殺右耳本，當自左肩隅也。不言自左，舉下殺之射左髀，可推而知也。無事而不田曰不敬，田不以禮曰暴天物。不敬者，簡祭祀，略賓客。天子不合圍，諸侯不掩群。爲盡物也。天子殺則下大綏，諸侯殺則下小綏，綏，耳佳反。○綏，當爲「綏」。綏，有虞氏之旌旗也。下，謂弊之。大夫殺則止佐車，佐車止則百姓田獵。佐車，驅逆之車。國君春田不圍澤，大夫不掩群，士不取麇卵。生乳之時重傷其類。獺祭魚，然後虞人入澤梁，豺祭獸，然

後田獵，鳩化爲鷹，然後設罝羅，草木零落，然後入山林。昆蟲未蟄，不以火田，罝，音尉。○取物必順時候也。梁，絕水取魚者。罝，小網也。昆，明也，明蟲者得陽而生，得陰而藏。不麇，不卵，不殺胎，不妖夭，麇，音迷。卵，力管反。妖，於表反。夭，烏老反。○重傷未成物妖，斷殺少長曰夭。不覆巢。覆，敗也。○《王制》。○田者，大艾草以爲防，艾，音義。①○言田獵者必大芟殺野草以爲防限，作田獵之場，擬殺圍之處。或舍其中，舍，②音赦。○或復止舍其中，謂未田之前，誓士戒衆，故教示戰法當在其間止舍也。其防之廣狹無文。褐纏旃以爲門，旃，諸延反。○既爲防限，③當設周衛而立門焉。乃以織毛褐布纏通帛旃之竿以爲門之兩傍，其門蓋南開，並爲二門，用四旃四褐也。裘纏質以爲櫛，櫛，魚列反。○又以裘纏

①「艾」，原作「又」，據元明本、寬文本、賀本改。

②「舍」，原作「含」，據寬文本、賀本改。

③「限」，原作「院」，據寬文本、賀本及上文改。

樁質以爲門中之闌。闌，車軌之裏兩邊約車輪者。閒容

握，驅而入，擊則不得入，其門之廣狹，兩軸頭去旗

竿之間，各容一握。握，人四指爲四寸，是門廣於軸八寸也。入此門，當馳走而入，不得徐也。以教戰，試其能否，故令驅焉。若驅之，其軸頭擊著門傍旗竿，則不得入也，所以罰不工也。

左者之左，右者之右，然後焚而射焉。以天子六軍分爲左右，雖同舍防內，令三軍各在一方，取左右相應。其屬左者之左門，屬右者之右門，不得越離部伍，以此故有二門也。教戰既畢，士卒出和，乃分地爲屯。既陳車驅卒，奔驅禽內之於防，然後焚燒此防草，在其中而射之。天子發，然後諸侯發。諸侯發，然後大夫、士發。天子發，抗大綏；諸侯發，抗小綏。獻禽於其下，抗，苦浪反。綏，耳佳反。○

發，謂發矢射之也。其天子發，則先抗舉其大綏；諸侯發，則舉其小綏。必舉此綏爲表，天子、諸侯殺時，因獻其禽於其下也。抗綏，謂既射舉之因置虞旗於其中，受而致禽焉，受禽獵止則弊之，故《王制》曰：「天子殺則下大綏，諸侯殺則下小綏。」注云：「下，謂弊之。」是殺禽已訖，田止而弊

綏也。各舉始終之一，故與此不同也。故戰不出頃，

田不出防，不逐奔走，古之道也。戰不出所期之

頃，田不出所芟之防。不逐奔走，謂出於頃防者，不逐之，古之道也。○《詩·車攻》「東有甫草」注疏文。○傳

曰：已有三牲，必田狩者，孝子之意。以爲己之所養，不如天地自然之性逸豫肥美。禽獸多則傷五穀，因習兵事，又不空設，故因以捕禽獸，所以共承宗廟，示不忘武備。又因爲田除害鮮者，何也？秋取嘗也。鮮，音仙。○取禽嘗祭。秋取嘗何以也？習鬪也。

習鬪也者，男子之事也。然而戰鬪不可不習，故於搜狩閑之也。閑之者，貫之也。貫之也者，習之也。已祭取餘獲陳于澤，搜，所留反。狩，手又反。○澤，射宮也。然後卿大夫相與射。命中者，雖不中取也；命不中者，雖中

①「云」，原作「去」，據元明本、寬文本、賀本改。

不取，中，丁仲反。何以也？所以貴揖讓之取，而賤勇力之取也。曷之取於國中，勇力之取也；今之取於澤，揖讓之取也。○魯隱公將如棠觀魚者，臧僖伯諫曰：「凡物不足以講大事，臧僖伯，公子彊也。僖，謚也。大事，祀與戎。其材不足以備器用，則君不舉焉。材，謂皮革、齒牙、骨角、毛羽也。器用，軍國之器。君，將納民於軌、物者也，故講事以度軌量謂之軌，取材以章物采謂之物。不軌不物，謂之亂政。亂政亟行，所以敗也。度，徒各反。亟，欺冀反。○言器用衆物不入法度，則爲不軌不物，亂敗之所起。故春蒐、夏苗、秋獮、冬狩，獮，息典反。狩，手又反。○蒐，索，擇取不孕者。苗，爲苗除害也。獮，殺也，以殺爲名，順秋氣也。狩，圍守也，冬物畢成，獲則取之，無所擇也。皆於農隙以講事也。各隨時事之間。三年而治兵，入而振旅。雖四時講武，猶復三年而大習。出曰治兵，始治其事；入曰振旅，治兵禮畢，整衆而還。

振，整也。旅，衆也。歸而飲至，以數軍實。數，色主反。○飲於廟，以數車徒、器械及所獲也。昭文章，車服旌旗。明貴賤，辨等列，等列行伍。順少長，少，詩照反。長，丁丈反。○出則少者在後，還則在前，還則在後，所謂順也。習威儀也。鳥獸之肉不登於俎，俎，祭宗廟器。皮革、齒牙、骨角、毛羽不登於器，謂以飾法度之器。則公不射，古之制也。若夫山林川澤之實，器用之資，阜隸之事，官司之守，非君所及也。」射，食亦反。夫，音扶。阜，才早反。○士臣阜，阜臣與，與臣隸。言取此雜猥之物以資器備，是小臣有司之職，非諸侯之所親也。○隱五年《左氏傳》。○昔周辛甲之爲大史也，命百官，官箴王闕，大，音泰。箴，音針，下同。○辛甲，周武王太史。闕，過也。使百官各爲箴辭，戒王過。於《虞人之箴》：虞人掌田獵。曰：「芒芒禹跡，畫爲九州，畫，胡麥反。○芒芒，遠貌。畫，分也。經啟九道。啟，開九州之道。民有寢廟，獸有茂草，各有攸處，德用

不擾。人神各有所歸，故德不亂。在帝夷羿，冒于原獸，羿，五計反。○冒，貪也。亡其國恤，而思其麀牡，麀，音憂。○言但念獵。武不可重，重，猶數也。用不恢于夏家，恢，枯回反。○羿以好武，雖有夏家而不能恢大之。獸臣司原，敢告僕夫。」獸臣，虞人。告僕夫，不敢斥尊。○《左》襄四年。○宣王料民於大原，大，音泰。○料，數也。大原，地名也。仲山父諫曰：「民不可料也。夫古者不料民而知其少多，司民協孤終，父，音甫。夫，音扶。○司民，掌登萬民之數，自生齒以上皆書於版。協，合也。無父曰孤。終，死也。合其民籍，以登于王也。司商協名姓，司商，掌賜族受姓之官。商，金，聲清。謂人始生，吹律合之，定其姓名。司徒協旅，司徒，掌合師旅之衆也。司寇協姦，司寇，刑官，掌合姦民，以知死刑之數。場協人，場人掌場圃，委積珍物，斂而藏之也。廩協出，廩，力錦反。○廩人掌九穀出用之數也。是則少多、死生、出入、往來者皆可知也。於是乎又審

之以事：事，謂因藉田與蒐狩以簡知其數也。王治農於藉，藉，藉於千畝田也。搜于農隙，搜，所留反。○春田曰搜。搜，擇也。禽獸懷妊未著，搜而取之也。農隙，仲春既耕之後。隙，閒也。耨穫亦於藉，耨，奴邁反。穫，戶郭反。○言王亦至，於藉考課之。獮於既烝，獮，息典反。○秋田曰獮。獮，殺也，順時始殺也。烝，升也。《月令》：「孟秋乃升穀，天子嘗新。」既升，謂仲秋也。狩於畢時，狩，手又反。○冬田曰狩，圍守而取之。畢時，時務畢也。是皆習民數者也，又何料焉？習，簡習也。不謂其少而大料之，是示少而惡事也。惡，烏路反，下同。○言王不謂其衆少而大料數之，是示以寡少，又厭惡政事，不能修之意也。臨政示少，諸侯避之。示天下寡弱，諸侯將避遠王室，不親附也。治民惡事，無以賦令。」言厭惡政事，無以賦令也。○《周語》。○傳曰：春曰蒐，蒐，所留反，下同。夏曰苗，秋曰獮，獮，息典反，下同。冬曰狩。狩，手又反，下同。苗者謂何？曰：苗者，



毛也。取之不圍澤，不掠群，取大禽不麝，  
麝，音迷，下同。不卵，卵，力管反。不殺孕重者。  
孕，以證反，下同。春蒐者不殺小麝及孕重者，  
 冬狩皆取之。百姓皆出，不失其時，不抵禽，  
不詭遇，詭，占委反。逐不出防，此苗獮蒐狩之  
 義也。故苗獮蒐狩之禮，簡其戎事也。故苗  
 者毛取之，蒐者搜索之，狩者守留之。夏不  
 田何也？曰：天地陰陽盛長之時，長，丁丈  
 反。猛獸不攫，攫，厥縛反。鷙鳥不搏，鷙，音至。  
搏，音博。蝮螫不螫。蝮，方六反。螫，且邁反。螫，音  
釋。鳥獸蟲蛇且知應天，應，於證反。而況人乎  
 哉？是以古者必有豢牢。豢，音患。其謂之  
 畋何？畋，音田。聖人舉事，必反本五穀者，  
 以奉宗廟、養萬民也。去禽獸害稼穡者，去，  
起居反。故以田言之，聖人作名號而事義可  
 知也。○禮：聖主之於禽獸也，見其生不食  
 於死，聞其聲不嘗其肉，隱弗忍也。故遠庖

廚，仁之至也。遠，于萬反。不合圍，不掩群，  
 不射宿，射，食亦反。不涸澤。涸，曷各反。豺不  
 祭獸，不田獵；豺，音柴。獮不祭魚，不設網  
 罟；獮，他達反。罟，音古。鷹隼不鷙，隼，息允反。  
鷙，音至。畦而不逮，不出穎羅；草木不零落，  
 斧斤不入山林；昆蟲不螫，不以火田；螫，直  
立反。不麝，麝，音迷。不卵，卵，力管反。不剝  
 胎，剝，空乎反。不夭，夭，烏老反。魚肉不入廟  
 門，鳥獸不成毫毛不登庖廚。取之有時，用  
 之有節，則物莫不多。○湯見祝網者置四  
 面，其祝曰：「從天墜者，從地出者，從四方  
 來者，皆離吾網。」湯曰：「嘻，盡之矣！非  
 桀其孰爲此？」湯乃解其三面，置其一面，更  
 教之祝曰：「昔蛛蝥作網，蛛，音朱。蝥，莫侯反。  
 今之人循序，欲左者左，欲右者右，欲高者  
 高，欲下者下，吾取其犯命者。」其憚害物也  
 如是，漢南之國聞之，曰：「湯之德及鳥獸

矣！四十國歸之。《詩》曰：「王在靈囿，麀

鹿攸伏，麀，音憂，下同。麀鹿濯濯，白鳥皤皤。

皤，《詩》作「鵠」，戶各反。王在靈沼，於仞魚躍。」

於，音鳥。言德至也。聖主所在，魚鼈禽獸猶

得其所，況於人民乎？故仁人行其禮，則

天下安而萬理得矣。逮至德渥澤洽，渥，乙角

反。調和大暢，則天清澈，澈，直列反。地富燠，

燠，於文反。物時熟，民心不挾詐賊，氣脈淳

化，攫齧搏擊之獸鮮，毒蠹猛虻之蟲密，毒

山不蕃，草木少薄矣。鑠乎大仁之化也！

攫，厥縛反。齧，魚結反。搏，音博。蠹，丑略反，下同。

虻，丁宵反。蕃，音煩。鑠，式灼反。○並《賈誼新書》。

○凡土功，龍見而畢務，戒事也；見，賢遍反，下

同。○謂今九月，周十一月，龍星，角亢晨見東方，三務始

畢。戒民以土功事。火見而致用，大火，心星，次角

亢。見者，致築作之物。水昏正而栽，栽，才代反。○

謂今十月，定星昏而中，於是樹板幹而興作。日至而

畢。日南至，微陽始動，故土功息。○《左》莊公二十

年。○士彌牟營成周，計丈數，牟，莫侯反。○計

所當城之丈數。揣高卑，揣，初委反。○度高曰揣。

度厚薄，仞溝洫，度，待洛反。仞，而慎反。洫，況域

反。○度深曰仞。物土方，議遠邇，物，相也。相取

土之方面，遠近之宜。量事期，知事幾時畢。計徒

庸，知用幾人功。慮材用，知費幾材用。書餼糧，

餼，音侯。○知用幾糧食。以令役於諸侯。屬役

賦丈，屬，之欲反。○付所當城尺寸。書以授帥，帥，

所類反。○帥，諸侯之大夫。而效諸劉子。效，戶孝

反。○效，致也。韓簡子臨之，以爲成命。臨履其

事，以命諸侯。經所以不書魏舒。○《左》昭三十二年。

○楚令尹蔦艾獵城沂，蔦，于委反。沂，角依反。○

艾獵，孫叔敖也。沂，楚邑。使封人慮事，封人，其時

主築城者。慮事，謀慮計功。以授司徒。司徒掌役。

①「所」，原作「心」，據寬文本、賀本改。

量功命日，命作日數。分財用，財用，築作具。平  
 板幹，幹，楨也。稱畚築，畚，音本。○量輕重。畚，盛  
 土器。程土物，爲作程限。議遠邇，均勞逸。略基  
 趾，趾，音止。○趾，城足。略，行也。具餼糧，餼，音  
 侯。○餼，乾食也。度有司。度，待洛反。○謀監主。  
 事三旬而成，十日爲旬。不愆于素。愆，起虔反。  
 ○不過素所慮之期也。傳言叔敖之能使民。○《左》宣公  
 十一年。○宋災，樂喜爲司城以爲政，樂喜，子罕  
 也，爲正卿。知將有火災，素戒爲備火之政。使伯氏司  
 里。伯氏，宋大夫。司里，里宰。火所未至，徹小  
 屋，塗大屋，徹，直列反。○大屋難徹，就塗之。陳畚  
 掘，具緇缶，畚，音本。掘，九錄反。緇，古杏反。缶，方  
 九反。○畚，箕籠。掘，土聲。緇，汲索。缶，汲器。備  
 水器，盆鑒之屬。量輕重，計人力所任。蓄水潦，  
 積土塗，巡丈城，繕守備，蓄，敕六反。潦，音老。  
 守，手又反。○巡，行也。丈，度也。繕，治也。行度守備  
 之處，恐因災有亂。表火道。火起，則從其所趨標表

之。使華臣具正徒，華，户化反。○華臣，華元子，爲  
 司徒。正徒，役徒也，司徒之所主也。令隧正納郊  
 保，奔火所。隧，音遂。○隧正，官名也。五縣爲隧，納  
 聚郊野保守之民，使隨火所起往救之。使華閱討右  
 官，官庀其司。閱，音悅。庀，芳婢反，下同。○亦華  
 元子，代元爲右師。討，治也。庀，具也，使其具官屬。向  
 戍討左，亦如之。向，式亮反。○向戍，左師。使樂  
 過庀刑器，亦如之。過，市專反。○樂過，司寇。刑  
 器，刑書。使皇郕命校正出馬，工正出車，備甲  
 兵，庀武守。郕，音云。校，戶教反。守，手又反，下同。  
 ○皇郕，皇父充石之後。校正主馬，工正主車，使各備其  
 官。使西鉏吾庀府守，鉏，牀魚反。吾，音魚。○鉏  
 吾，大宰也。府，六官之典。令司宮、巷伯儆宮。  
 儆，音景。○司宮，奄臣。巷伯，寺人。皆掌宮內之事。  
 二師令四鄉正敬享，二師，左右師也。鄉正，鄉大  
 夫。享，祀也。祝宗用馬于四墉，祀盤庚于西門  
 之外。墉，音容。○祝，大祝。宗，宗人。墉，城也。用

馬祭于四城以懷火。盤庚，殷王，宋之遠祖。城，積陰之氣，故祀之。凡天災有幣無牲，用馬，祀盤庚，皆非禮。

○《左》襄九年。○魯司鐸火，鐸，徒各反。○司鐸，官

名。火踰公宮，桓，僖災。桓公，僖公廟。救火者

皆曰顧府。言常人愛財。南宮敬叔至，命周人

出御書，俟於宮，敬叔，孔子弟子南宮閱。周人，司周

書典籍之官。御書，進於君者也。使待命於宮。曰：

「庀女，而不在，死。」庀，匹婢反。女，音汝。○庀，

具也。子服景伯至，命宰人出禮書，景伯，子服何

也。宰人，冢宰之屬。以待命。命不共，有常刑。

共，音恭。○待求之命。校人乘馬，巾車脂轄，校

戶教反。乘，繩證反，下同。轄，戶瞎反。○校人，掌馬

巾車，掌車。乘馬，使四四相從，爲駕之易。百官官備，

府庫慎守，官人肅給。國有火災，恐有變難，故慎爲

備。濟濡帷幕，鬱攸從之。鬱攸，火氣也。濡物於

水，出用爲濟。蒙茸公屋，茸，七人反。○以濡物冒覆

公屋。自大廟始，外內以悛。大，音泰。悛，七全

反。○悛，次也。先尊後卑，以次救之。助所不給。

有不用命，則有常刑，無赦。公父文伯至，命

校人駕乘車。父，音甫，下同。○乘車，公車。季桓

子至，御公立于象魏之外，象魏，門闕。命救火

者傷人則止，財可爲也。命藏《象魏》，《周禮》

正月縣教令之法于象魏，使萬民觀之，故謂其書爲《象魏》。

曰：「舊章不可忘也。」富父槐至，曰：「無備

而官辦者，猶拾瀋也。」瀋，戶審反。○槐，富父終生

之後。瀋，汁也。言不備而責辦，不可得。於是乎去

表之藁，去，起呂反。藁，古老反。○表，表火道。風所

向者，去其藁積。道還公宮。開除道，周匝公宮，使火

無相連。○《左》哀二年。○鄭火作，子產辭晉公

子、公孫于東門，晉人新來，未入，故辭不使前也。

使司寇出新客，新來聘者。禁舊客勿出于宮。

爲其知國情，不欲令去。使子寬、子上巡群屏攝，

至于大宮。大，音泰。○二子，鄭大夫。屏攝，祭祀之

位。大宮，鄭祖廟。巡行宗廟，不得使火及之。使公孫

登徙大龜，登，開卜大夫。使祝史徙主祐於周

廟，告于先君。禘，音石。○禘，廟主石函。周廟，厲王廟也。有火災，故合群主於祖廟，易救護。使府人、庫人各徹其事。徹，音景，下同。○徹，備火也。商成公徹司宮，商成公，鄭大夫。司宮，巷伯、寺人之官。出舊宮人，寘諸火所不及。寘，之豉反。○舊宮人，先公宮女。司馬、司寇列居火道，備非常也。行火所燬。燬，許靳反。○燬，炙也。城下之人伍列登城。爲部伍登城，備姦也。明日，使野司寇各保其徵，野司寇，縣士也。火之明日，四方乃聞災，故戒保所徵役之人。郊人助祝史除於國北，爲祭處於國北者，就大陰禳火。禳火于玄冥、回祿，玄冥，水神。回祿，火神。祈于四墉。墉，音容。○墉，城也。城積土，陰氣所聚，故祈祭之，以禳火之餘災。書焚室而寬其征，與之材。征，賦稅也。二日哭，國不市。示憂戚，不會市。使行人告於諸侯。《左》昭十八年。

儀禮集傳集註卷第三十六終

## 儀禮集傳集註卷第三十七

### 王制之癸刑辟

### 王朝禮十四

舜曰：「皋陶，蠻夷猾夏，寇賊姦宄。」音遙。猾，戶八反。宄，音軌。○猾，亂也。夏，華夏。群行攻劫曰寇，殺人曰賊，在外曰姦，在內曰宄，言無教所致。汝作士，五刑有服，士，理官也。五刑：墨、劓、剕、宮、大辟。服，從也。言得輕重之中正。五服三就。既從五刑，謂服罪也。五流有宅，五宅三居。謂不忍加刑，則流放之。若四凶者，五刑之流各有所居。五居之差，有三等之居。大罪，四裔，次九州之外，次千里之外。惟明克允。」○象以典刑，象，法也。法用常刑，用不越法。流宥五刑，宥，音又。○宥，寬也。以流放之法寬五刑。鞭作官刑，以鞭爲治官府之刑。扑作教

刑，扑，普卜反。○扑，夏楚也。不勤道業則撻之。金

作贖刑。贖，石欲反。○金，黃金。誤而入刑，出金以贖

罪。眚災肆赦，怙終賊刑。眚，所景反。怙，音戶。

○眚，過。災，害。肆，緩。賊，殺也。過而有害，當緩赦

之。怙姦自終，當刑殺之。欽哉，欽哉，惟刑之恤

哉！舜陳典刑之義，勅天下，使敬之憂欲得中。<sup>①</sup>

○《周禮·大司徒》：以鄉八刑糾萬民：一

曰不孝之刑，二曰不睦之刑，三曰不婣之刑，

四曰不弟之刑，五曰不任之刑，六曰不恤之

刑，七曰造言之刑，八曰亂民之刑。婣，音因。

○糾，猶割察也。不弟，不敬師長。造言，詭言惑衆。亂

民，亂名改作，執左道以亂政也。鄭司農云：任謂朋友相

任，恤謂相憂。○《大司寇》：掌建邦之三典，以

佐王刑邦國，詰四方。詰，起占反。○典，法也。

詰，謹也。《書》曰：「王亳荒度，作詳刑以詰四方。」一曰

①「中」下，寬文本、賀本有「○以上尚書虞書」。

刑新國用輕典，新國者，新辟地立君之國。用輕法者，爲其民未習於教。二曰刑平國用中典，平國，承平守成之國也。用中典者，常行之法。三曰刑亂國用重典。亂國，篡弑叛逆之國。用重典者，以其化惡伐滅之。以五刑糾萬民：刑，亦法也。糾猶察異之。一曰野刑，上功糾力；功，農功。力，勤力。二曰軍刑，上命糾守；守，手又反。○命，將命也。守，不失部伍。三曰鄉刑，上德糾孝；德，六德也。善父母爲孝。四曰官刑，上能糾職；能，能其事也。職，職事脩理。五曰國刑，上愿糾暴。愿，愼也。暴，當爲「恭」，字之誤也。以圜土聚教罷民。罷，音皮。○圜土，獄城也。聚罷民其中，困苦以教之爲善也。民不慙作勞，有似於罷。凡害人者，寘之圜土而施職事焉，以明刑恥之。害人，謂爲邪惡，已有過失，麗於法者。以其無故犯法，寘之圜土繫教之，庶其困悔而能改也。寘，置也。施職事，以所能役使之。明刑，書其罪惡於大方版，著其背。其能改者，反于中國，不齒三年。

反于中國，謂舍之還於故鄉里也。《司圜》職曰：「上罪三年而舍，中罪二年而舍，下罪一年而舍。」不齒者，不得以年次列於平民。其不能改而出圜土者，殺。出，謂逃亡。以兩造禁民訟，入束矢於朝，然後聽之。造，七報反。朝，直遙反。○訟，謂以財貨相告者。造，至也。使訟者兩至，既兩至，使人束矢，乃治之也。不至，不入束矢，則是自服不直者也。必入矢者，取其直也。《詩》曰：「其直如矢。」古者一弓百矢，束矢，其百个與？以兩劑禁民獄，入鈞金三日，乃致于朝，然後聽之。劑，子隨反。朝，直遙反。○獄，謂相告以罪名者。劑，今券書也。使獄者各賞券書，既兩券書，使人鈞金，又三日，乃治之重刑也。不券書，不入金，則是亦自服不直者也。必入金者，取其堅也。三十斤曰鈞。以嘉石平罷民。罷，音皮。○嘉石，文石也。樹之外朝門左。平，成也，成之使善。凡萬民之有罪過，而未麗於灋而害於州里者，桎梏而坐諸嘉石，役諸司空。重罪，旬有三日坐，替役。其次九日坐，九月役。其次七日坐，七月役。其次五日

坐，五月役。其下罪三日坐，三月役。使州里任之，則宥而舍之。桎，音質。桎，古毒反。耜，音基。宥，音又。舍，音捨。○有罪過，謂邪惡之人所罪過者也。麗，附也。未附於法，未著於法也。木在足曰桎，在手曰梏。役諸司空，坐日訖，使給百工之役也。役月訖，使其州里之人任之，乃赦之。宥，寬也。以肺石達窮民。肺石，赤石也。窮民，天民之窮而無告者。凡遠近惇獨老幼之欲有復於上，而其長弗達者，立於肺石三日，士聽其辭，以告于上而罪其長。惇，其營反。長，丁丈反。○無兄弟曰惇，無子孫曰獨。復，猶報也。上，謂王與六卿也。報之者，若上書詣公府言事矣。長謂諸侯，若鄉、遂大夫。○《小司寇》：以五聲聽獄訟，求民情：一曰辭聽，觀其出言，不直則煩。二曰色聽，觀其顏色，不直則赧然。三曰氣聽，觀其氣息，不直則喘。四曰耳聽，觀其聽聆，不直則惑。五曰目聽。觀其眸子，視不直則眊然。以八辟麗邦瀾附刑罰：辟，法也。杜子春讀麗爲羅。玄

謂：麗，附也。《易》曰：「日月麗乎天。」故書「附」作「付」，附猶著也。一曰議親之辟，鄭司農云：若今時宗室有罪先請是也。二曰議故之辟，故，謂舊知也。三曰議賢之辟，鄭司農云：若今時廉吏有罪先請是也。玄謂：賢，有德行者。四曰議能之辟，能，謂有道藝者。《春秋傳》曰：「夫謀而鮮過，惠訓不倦者，叔向有焉。社稷之固也，猶將十世宥之，以勸能者，今壹不免其身，以棄社稷，不亦惑乎？」五曰議功之辟，謂有大勳力立功者。六曰議貴之辟，鄭司農云：若今時吏墨綬有罪先請是也。七曰議勤之辟，謂憔悴以事國。八曰議賓之辟。謂所不臣者，三恪二代之後與？○《士師》：掌五禁以左右刑罰：一曰宮禁，二曰官禁，三曰國禁，四曰野禁，五曰軍禁。皆以木鐸徇之于朝，書而縣于門閭。左，音佐。右，音佑。鐸，大各反。朝，直遙反。縣，音玄。○左右，助也。助刑罰者，助其禁民爲非也。宮，王宮也。官，官府也。國，城中也。占之禁書亡矣，今宮門有符籍，官府有無故擅入，城門有離載下帷，野有田律，軍有躡謹夜行之禁，其物可言



者。以五戒先後刑罰，毋使罪麗于民。一曰誓，用之于軍旅；二曰誥，用之于會同；三曰禁，用諸田役；四曰糾，用諸國中；五曰憲，用諸都鄙。先後，猶左右也。誓，誥，於《書》則《甘誓》、《湯誓》、《大誥》、《康誥》之屬。禁，則《軍禮》曰：「無干車，無自後射。」此其類也。糾，憲，未有闕焉。掌士之八成：一曰邦汭，汭，上灼反。○鄭司農云：汭，讀如酌酒尊中之酌。國汭者，斟酌盜取國之密事，若今時刺探尚書事。二曰邦賊，爲逆亂者。三曰邦諜，諜，音牒。○爲異國反間。四曰犯邦令，干冒王教令者。五曰撝邦令，撝，音矯。○稱詐以有爲者。六曰爲邦盜，竊取國之寶藏者。七曰爲邦朋，朋黨相阿，使政不平者。故書「朋」作「備」。鄭司農云：朋，讀爲朋友之朋。八曰爲邦誣。誣，罔君臣，使事失實。○《鄉士》：掌國中，各掌其鄉之民數而糾戒之。鄉士八人，言各者，四人而分主三鄉。聽其獄訟，察其辭，察，審也。辯其獄訟，異其死刑之罪而要

之，旬而職聽于朝。要，遙反。朝，直遙反，下同。○辯異，謂殊其文書也。要之，爲其罪法之要辭，如今劾矣。十日乃以職事治之於外朝，容其自反覆。司寇聽之，斷其獄，弊其訟于朝，群士司刑皆在，各麗其法，以議獄訟。麗，附也，各附致其法以成議也。獄訟成。士師受中，協日刑殺，肆之三日。受中，謂受獄訟之成也。鄭司農云：士師受中，若今二千石受其獄也。中者，刑罰之中也，故《論語》曰：「刑罰不中，則民無所措手足。」協日刑殺，協，合也，和也，和合支幹善日，若今時望後利日也。「肆之三日」，故《春秋傳》曰：「三日棄疾請尸。」《論語》曰：「肆諸市朝。」玄謂：士師既受獄訟之成，鄉士則擇可刑殺之日，至其時而往洩之，尸之三日乃反也。若欲免之，則王會其期。免，猶赦也。期，謂鄉士職聽于朝，司寇聽之日，王欲赦之，則用此時，親往議之。○《遂士》：掌四郊。異其死刑之罪而要之，二旬就郊而刑殺，各於其遂，肆之三日。就郊而刑殺者，遂士也。遂士擇刑殺日，至其時往洩之，如鄉士爲之矣。言各於其遂者，四郊六遂，遂處

不同。若欲免之，則王令三公會其期。令，猶命也。王欲赦之，則用遂士職聽之時，命三公往議之。○《縣士》：掌野。異其死刑之罪而要之，三旬刑殺，各就其縣，肆之三日。亦謂縣士。若欲免之，則王命六卿會其期。期，亦謂縣士職聽之時。○餘並如《鄉士》。○《司刑》：掌五刑之灋，以麗萬民之罪：墨罪五百，劓罪五百，宮罪五百，剕罪五百，殺罪五百。劓，截其鼻也。音月。○墨，黥也。先刻其面，以墨室之。劓，截其鼻也。今東西夷或以墨、劓爲俗，古刑人亡逃者之世類與？宮者，丈夫則割其勢，女子閉於宮中，若今宦男女也。剕，斷足也。周改臙作刑。殺，死刑也。《書傳》曰：「決關梁、踰城郭而略盜者，其刑臙。男女不以義交者，其刑宮。觸易君命，革輿服制度，姦宄盜攘傷人者，其刑劓。非事而事之，出入不以道義，而誦不詳之辭者，其刑墨。降畔寇賊，劫略奪攘擄虐者，其刑死。」此二千五百罪之目略也。其刑書則亡，夏刑大辟二百，臙辟三百，宮辟五百，劓、墨各下。周則變焉，所謂刑罰世輕世重者也。鄭司農云：漢孝文帝

十三年除肉刑。○《司刺》：掌三刺、三宥、三赦之灋，以贊司寇聽獄訟：刺，殺也。訊而有罪，則殺之。宥，寬也。赦，舍也。壹刺曰訊群臣，再刺曰訊群吏，三刺曰訊萬民；訊，言。壹宥曰不識，再宥曰過失，三宥曰遺忘；忘，音妄。○鄭司農云：不識，謂愚民無所識，則宥之。過失，若今律過失殺人，不坐死。玄謂：識，審也。不審，若今仇讎當報。甲見乙誠以爲甲而殺之者。過失，若舉刃欲斫伐而軼中人者。遺忘，若開帷薄忘有在焉，而以兵刃投射之。壹赦曰幼弱，再赦曰老旹，三赦曰憊愚。旹，亡報反。憊，勅江反。○憊，生而癡騃童昏者。鄭司農云：幼弱、老旹，若今時律今年未滿八歲、八十以上，非手殺人，他皆不坐。○《呂刑》曰：墨辟疑赦，其罰百鍰，閱實其罪。辟，婢亦反。鍰，戶關反。閱，音悅，下並同。○刻其額而涅之曰墨刑。疑則赦，從罰。六兩曰鍰，鍰，黃鐵也。閱實其罪，使與罰各相當。劓辟疑赦，其罰惟倍，閱實其罪。劓，魚器反。○截鼻曰劓刑。倍百爲二百鍰。剕辟疑赦，其罰倍差，閱實其罪。剕，

扶謂反。○則足曰剗。倍差，謂倍之又半，爲五百鍰。宮辟疑赦，其罰六百鍰，閱實其罪。宮，淫刑也，男子割勢，婦人幽閉，次死之刑。序五刑，先輕轉至重者，事之宜。大辟疑赦，其罰千鍰，閱實其罪。死刑也。五刑疑各人罰，不降相因，古之制也。墨罰之屬千，劓罰之屬千，剗罰之屬五百，宮罰之屬三百，大辟之罰其屬二百，五刑之屬三千。別言罰屬，合言刑屬，明刑、罰同屬，互見其義以相備。○臧文仲言於僖公曰：「刑五而已，無有隱者，隱乃諱也。」隱，謂鳩也。大刑用甲兵，賈侍中云：謂諸夏不式王命，以六師移之。昭謂：甲兵，謂臣有大逆，則被甲聚兵而誅之，若今陳軍也。其次用斧鉞，鉞，音越。○斧鉞，軍戮也。《書》曰：後至者斬。中刑用刀鋸，鋸，音據。○割剗用刀，斷截用鋸，亦有大辟，故《周語》曰：「兵在其頸。」其次用鑽笞，鑽，子端反。笞，疾各反。○鑽，臠刑也。笞，黥刑也。薄刑用鞭扑，以威民也。扑，普卜反。○鞭，官刑也。扑，教刑也。故

大者陳之原野，謂甲兵、斧鉞也。小者致之市朝，朝，直遙反。○刀鋸以下也。其死刑，大夫以上尸諸朝，士以下尸諸市。五刑三次，是無隱也。五刑：甲兵、斧鉞、刀鋸、鑽鑿、鞭扑也。次，處也。三處：朝、野、市也。婦人無刑，無黥、刖之刑。雖有刑不在市朝。朝，直遙反。○謂犯死刑者，猶不暴尸。○《魯語》。○冉有問於孔子曰：「古者三皇五帝不用五刑，信乎？」孔子曰：「聖人之設防，貴其不犯也。制五刑而不用，所以爲至治也。凡民之所以爲姦邪竊盜、靡法妄行者，生於不足，不足生於無度，無度則小者偷惰，大者侈靡，各不知節。是以上有制度則民知所止，民知所止則不犯，故雖有姦邪賊盜、靡法妄行之獄，而無陷刑之民。不孝者生於不仁，不仁者生於喪祭之禮不明。喪祭之禮，所以教仁愛也。能致仁愛，則服喪思慕祭祀，不懈人子饋養之道。懈，戶買反。養，以尚反。○言孝子奉

祭祀不敢懈，與生時饋養之道同之也。喪祭之禮明，則民孝矣，故雖有不孝之獄，而無陷刑之民。弑上者生於不義，<sup>①</sup>義所以別貴賤、明尊卑也。別，彼列反，下同。貴賤有別，尊卑有序，則民莫不尊上而敬長。長，丁丈反，下同。朝聘之禮者，所以明義也。朝，直遙反。義必明則民不犯，故雖有弑上之獄，而無陷刑之民。鬪變者生於相陵，相陵者生於長幼無序而遺敬讓。遺，忘也。鄉飲酒之禮者，所以明長幼之序而崇敬讓也。長幼必序，民懷敬讓，故雖有變鬪之獄，而無陷刑之民。淫亂者生於男女無別，男女無別則夫婦失義。婚禮聘享者，所以別男女明夫婦之義也。男女既別，夫婦既明，故雖有淫亂之獄，而無陷刑之民。此五者，刑罰之所從生，各有源焉。不豫塞其源而輒繩之以刑，是謂爲民設罅而陷之也。罅，疾正反。刑罰之源生於嗜慾不節，夫

禮度者所以禦民之嗜慾而明好惡順天道。夫，音扶。好，惡，並去聲。禮度既陳，五教畢修，而民猶或未化，尚必明其法典以申固之。尚，猶也。申，令固其教也。其犯姦邪靡法妄行之獄者，則飭制量之度；量，音亮。有犯不孝之獄者，則飭喪祭之禮；有犯弑上之獄者，則飭朝覲之禮；朝，直遙反。有犯鬪變之獄者，則飭鄉飲酒之禮；有犯淫亂之獄者，則飭婚聘之禮。三皇五帝之所以化民者如此，雖有五刑不用，<sup>②</sup>不亦可乎？孔子曰：「大罪有五而殺人爲下，逆天地者罪及五世，誣文武者罪及四世，逆人倫者罪及三世，誣鬼神者罪及二世，手殺人者罪止其身，故曰大罪有五而殺人爲下矣。」○冉有問於孔子曰：「先王

①「弑」，原作「殺」，據寬文本、賀本改。  
②「不」，原作「之」，據寬文本、賀本改。

制法，使刑不上於大夫，禮不下於庶人。然則大夫犯罪不可以加刑，庶人之行事不可以治於禮乎？」孔子曰：「不然。凡治君子，以禮御其心，所以厲之以廉恥之節也。故古之大夫，其有坐不廉污穢而退放之者，不謂之不廉污穢而退放，則曰簠簋不飭；飭，整齊也。有坐淫亂男女無別者，別，彼列反，下同。不謂之淫亂男女無別，則曰帷幕不修也；有坐罔上不忠者，不謂之罔上不忠，則曰臣節未著；有坐罷輒不勝任者，不謂之罷輒不勝任，則曰下官不職；罷，音皮。勝，音升。○言其下官不稱於其職，不斥其身也。有坐干國之紀者，不謂之干國之紀，則曰行事不請。言不請而擅行。此五者，大夫既自定有罪名矣而猶不忍斥，然正以呼之也，既而爲之諱，爲，于僞反。所以媿恥之。是故大夫之罪其在五刑之域者，聞而譴發，譴，詰戰反。○譴，譴讓也。發，始發露。則

白冠鵲纓盤水加劍，造乎闕而自請罪，君不使有司執縛牽掣而加之也。其有大罪者，聞命則北面再拜，跪而自裁，君不使人掙引而刑殺之也。掙，昨沒反。曰：「子大夫自取之耳，吾遇子有禮矣。」以刑不上大夫，而大夫亦不失其罪者，教使然也。凡所謂禮不下庶人者，以庶人遽其事而不能充禮，故不責之以備禮也。」冉有跪然免席曰：「言則美矣，求未之聞。」退而記之。並《家語》。○仲弓問於孔子曰：「雍聞：至刑無所用政，至政無所用刑。至刑無所用政，桀、紂之世是也；至政無所用刑，成、康之世是也。信乎？」孔子曰：「聖人之治，化也，必刑政相參焉。太上以德教民，而以禮齊之；其次以政事導民，以刑禁之，刑不刑也。化之弗變，導之弗從，傷義以敗俗，於是乎用刑矣。順五刑必

即天倫，<sup>①</sup>即，就也。就天倫，謂合天意。行刑罰則輕無赦。行刑罰之官雖輕，猶不得作威作福。刑，例也。例，成也。壹成而不可更，故君子盡心焉。仲弓曰：「古之聽訟，尤罰麗於事，不以其心，可得聞乎？」例，音刑。更，古行反。○尤，過也。麗，附也。怪過人罰之，必以事相當，而不與其心也。孔子曰：「凡聽五刑之訟，必原父子之情，立君臣之義，以權之意論輕重之序、慎測淺深之量以別之，悉其聰明，致其忠愛以盡之。大司寇正刑明辟以察獄訟，必三訊焉。量，音亮。別，彼列反。辟，婢亦反。○一曰訊群臣，二曰訊群吏，三曰訊萬民也。有指無簡，則不聽也。簡，誠也。有意無其誠者，不論以爲罪也。附從輕，赦從重。附人之罪，以輕爲比。赦人之罪，以重爲比。疑獄則泛與衆共之，疑則赦之，皆以小大之比成之。是故爵人必於朝與衆共之，刑人必於市與衆棄之。古者公家不畜刑人，大夫弗養

也，士遇之塗弗與之言，屏諸四方，唯其所之，弗及與政，弗欲生之也。」仲弓曰：「聽獄，獄之成，成何官？」孔子曰：「成獄成於吏，吏以獄之成告於正。比，毗志反。朝，直遙反。○吏，獄官。吏正，獄官長。正既聽之，乃告大司寇，聽之，乃奉於王。王命三公卿士參聽棘木之下，參，七南反。○外朝法：左九棘，孤卿大夫位焉；右九棘，公、侯、伯、子、男位焉；面三槐，三公位焉。然後乃以獄之成疑于王。王三宥之，以聽命，君王尚寬宥罪，雖已定，猶三宥之。不可得輕，然後刑之者也。而制刑焉，所以重之也。」仲弓曰：「其禁何禁？」孔子曰：「巧言破律，巧，賣法令者也。遁名改作，變言與物名也。執左道以亂政者，殺。左道，亂也。作淫聲，淫，逸也，惑亂人之聲。造異服，非所常見。設奇伎奇器以蕩上心者，

①「順」，原作「顙」，據寬文本，賀本改。

殺。怪異之伎，可以眩曜人心之器蕩動。行僞而堅，行，下孟反。○行詐僞而守之堅也。言詐而辯，學非而博，順非而澤，順其非而滑澤。以惑衆者，殺。假於鬼神、時日、卜筮以疑衆者，殺。此四誅者不以聽。」不聽棘木之下。仲弓曰：「其禁盡於此而已？」孔子曰：「此其急者，其餘禁者十有四焉。命服命車不粥於市，粥，音育，下同。○粥，賣。珪璋璧琮不粥於市，宗廟之器不粥於市，兵車旂旗不粥於市，犧牲秬鬯不粥於市，戎器兵甲不粥於市，用器不中度不粥於市，布帛精麤不中數廣狹不中量不粥於市，姦色亂正色不粥於市，文錦珠玉之器雕飾靡麗不粥於市，衣服飲食不粥於市，璋，音章。琮，才宗反。旂，子盈反。犧，許宜反。秬，音巨。鬯，勅亮反。中，丁仲反，下同。量，音亮。○賣成衣服，非侈必僞，故禁之。禁賣熟食，所以屬恥也。果實不時不粥於市，五木不中伐不粥於市，鳥獸魚鼈不中殺不粥

於市。凡執此禁以齊衆者，不赦過也。」《家語》。○孔子爲魯司寇，有父子訟者，孔子拘之，《家語》作「同狴執之」。三月不別。其父請止，<sup>①</sup>孔子舍之。季孫聞之不說，曰：「是老也欺予，別，彼列反。舍，音捨。○老，大夫之尊稱。《家語》是「老」作「司寇」。曩告余曰：曩，乃黨反。『國家必先以孝。』余今戮一不孝以教民孝，不亦可乎，又舍之！」冉子以告，孔子慨然歎曰：「慨，苦代反。『嗚呼！上失其道而殺其下，非禮也。』<sup>②</sup>不教其民而聽其訟，殺不辜也。三軍大敗，不可斬也；獄犴不治，不可刑也；犴，音岸。何者？上教之不行，罪不在民故也。夫慢令謹誅，賊也；夫，音扶。徵斂無時，暴也；不教而責成功，虐也。政無此三者，然

①「止」，元明本、寬文本、賀本作「正」。

②「禮」，原作「理」，據元明本、寬文本、賀本改。

後刑可即也。《書》云：「義刑義殺，勿庸以即汝心，惟曰未有順事。」言必教而後刑也。」既陳道德以先服之，《荀子》作「既陳之以道，上先服之」。而猶不可尚賢以勸之，又不可即廢之，又不可而後以威憚之，《荀子》作「若不可，廢不能以憚之」。<sup>①</sup>若是二年而百姓正矣。邪民不從，然後俟之以刑，則民知罪矣。《詩》云：「天子是毗，俾民不迷。」是以威厲而不試，刑錯而不用。錯，上數反。今世則不然，亂其教，煩其刑，使民迷惑而陷焉，又從而制之，故刑彌煩而盜不勝也。勝，音升。夫三尺之限，夫，音扶。空車不能登者何哉？峻故也。百仞之山，重載陟焉何哉？陵遲故也。今世俗之陵遲久矣，雖有刑法，民能勿踰乎？《詩》曰：「周道如砥，砥，音紙。其直如矢。君子所履，小人所視。眷焉顧之，眷，音卷。潛焉出涕。」潛，所姦反。涕，音體。豈不哀哉！」《家語》、

《荀子》。○溫之會，晉人執衛成公歸之于周。溫，晉之河陽。成公，衛文公之子，成公鄭也。晉文公討不服，衛成公恃楚而不從，聞楚師敗于城濮，衛侯懼，出奔，使元咺奉弟叔武以受盟于踐土。或愬元咺曰：立叔武矣。衛侯殺其子角，咺不廢命，奉叔武以守國。晉人復衛侯，先期入。叔武將沐，聞君至，喜，捉髮走出，前驅射而殺之，元咺出奔晉。會于溫，討不服。衛侯與元咺訟，不勝，故晉侯執之，歸之于京師。在魯僖公二十八年。晉侯請殺之，王曰：「不可！」夫政自上下者也，夫，音扶，下同。○當從王出也。上作政，而下行之不逆，故上下無怨。言君臣不相怨。今叔父作政而不行，無乃不可乎？不行，謂不順也。言晉侯不行德政，而聽元咺之愬，欲殺衛侯也。夫君臣無獄，獄，訟也。無是非曲直之義也。今元咺雖直，而不可聽也。君臣皆獄，父子將獄，是無上下也。而叔父聽之，一逆矣。又為臣殺其君，其安

①「憚」，原作「畢」，據寬文本、賀本改。



庸刑？咍，況遠反。爲，于僞反。○庸，用也。刑，法也。布刑而不庸，再逆矣。一合諸侯，而有再逆政，余懼其無後。無後，無以復合諸侯也。不然，余何私於衛侯？」晉人乃歸衛侯。在魯僖三十年也。晉侯使盪衍酖，衛侯不死，魯僖爲請於王及晉侯，皆納玉十穀，於是歸之也。○《周語》。○仲弓問古之刑教與今之刑教，孔子曰：「古之刑省，今之刑繁。其爲教，古有禮然後有刑，是以刑省；今無禮以教而齊之以刑，刑是以繁。《書》曰：『伯夷降典，折民惟刑。』折，之設反，下同。○《書·呂刑》之文。言堯命伯夷下禮典以教民，而斷折以法。謂先禮以教之，<sup>①</sup>然後繼以刑折之也。夫無禮則民無恥，而正之以刑，故民苟免。」夫，音扶。○孔子適衛，衛將軍文子問曰：「文子，衛卿，名彌牟。」「吾聞魯公父氏父，音甫。○公父氏，魯大夫季氏。不能聽獄，信乎？」孔子答曰：「不知其不能也。夫公父氏之聽獄，

有罪者懼，無罪者恥。」夫，音扶。文子曰：「有罪者懼，是聽之察、刑之當也。當，丁浪反。無罪者恥，何乎？」孔子曰：「齊之以禮，則民恥矣；刑以止刑，則民懼矣。」文子曰：「今齊之以刑，刑猶弗勝，勝，音升。何禮之齊？」孔子曰：「以禮齊民，譬之於御則轡也；轡，音秘，下同。以刑齊民，譬之於御則鞭也。執轡於此而動於彼，御之良也。無轡而用策，則馬失道矣。」捨轡而用策，則馬失道。去禮而任刑，則民忘生。文子曰：「以御言之，左手執轡，右手運策，不亦速乎？若徒轡無策，馬何懼哉？」孔子曰：「吾聞古之善御者，執轡如組，兩驂如舞，非策之助也。組，音祖。驂，七南反。○《鄭風·大叔于田》篇言「驂服和諧，中節如組」者，如織組之爲。是以先王盛於禮而薄於刑，故民從

①「先」，原作「下」，據寬文本、賀本改。

命。今也廢禮而尚刑，故民彌暴。」文子曰：「吳、越之俗無禮而亦治，何也？」孔子曰：「夫吳、越之俗，男女無別，同川而浴，民輕相犯，故其刑重而不勝，由無禮也。夫，音扶。別，彼列反。勝，音升，並下同。中國之教，爲外內以別男女，異器服以殊等類，故其民篤而法，其刑輕而勝，由有禮也。」○孔子曰：「民之所以生者，衣食也。上不教民，民匱其生，飢寒切於身而不爲非者，寡矣。故古之於盜，惡之而不殺也。惡，烏路反。今不先其教而一殺之，是以罰行而善不反，刑張而罪不省，夫赤子知慕其父母，由審故也。夫，音扶。況爲政，興其賢者而廢其不賢，以化民乎？知審此二者，則上盜先息。」上盜，猶大盜。《書》曰「茲殷罰有倫」，《周書·康誥》之文。言此殷家刑罰有倫理者，亦當兼用之。子張問曰：「何謂也？」孔子曰：「不失其理之謂也。今諸侯不同德，每

君異法，折獄無倫，以意爲限，是故知法之難也。」子張曰：「古之知法者與今之知法者異乎？」孔子曰：「古之知法者能遠，遠，謂能止其源，以禮教先之也。今之知法者不失有罪。不失有罪，其於恕寡矣。既不先禮，復不以情，惟法爲得。能遠則於獄，其防深矣。寡恕近乎濫，濫，盧瞰反。防深治乎本。《書》曰：『惟敬五刑，以成三德。』言敬刑所以爲德矣。」《周書·呂刑》之文。言教以惟敬五刑，所以成剛、柔、正直之三德。○《書》曰「非從惟從」，《周書·呂刑》云：「察辭于差，非從惟從。」言察囚辭當差錯，不可從其僞辭，必審從所本之意。孔子曰：「君子之於人也，有不語也，無不聽也。有不語則已，語則無不聽，在審其真僞焉。況聽訟乎，必盡其辭矣。夫聽訟者，或從其情，或從其辭，夫，音扶。辭不可從，必斷以情。斷，丁亂反。《書》曰：『人有小罪，非眚，乃惟終，自作不典。式爾，有厥罪小，乃不可不

殺。乃有大罪，非終，乃惟眚災。適爾，既道極厥辜，時乃不可殺。」眚，所景反。○《周書·康誥》之文。眚，過也。災，害也。典，常也。式，用也。適，從也。既，盡也。言人有小罪非過誤，<sup>①</sup>乃惟終，自作不常用犯汝，厥罪雖小，乃不可不殺也。乃有大罪，非終，乃惟過誤，雖有其害，從汝盡聽訟之道，以極其罪，是亦不可殺，必以罰有論焉。○曾子問聽獄之術，孔子曰：

「其大法有三焉，治必以寬，寬之之術歸於察，夫寬則民慢，慢則姦僞生焉，故明之以察。察之之術歸於義。夫察甚則或過乎暴，故以義爲質。是故聽而不寬是亂也，夫聽太亟則失於詳，故事之是否亂焉。寬而不察是慢也，察而不中義是私也，中，丁仲反。○私，謂刑失其正，若私曲然。私則民怨。故善聽者雖不越辭，辭不越情，情不越義，夫善聽者，得辭則審之以情，得情則斷之以義。《書》曰：

「上下比罰，無僭亂辭。」比，毗志反。○《周書·呂刑》之文。言上下比方其罪，無聽僭亂之辭以自疑。

○《書》曰「哀敬折獄」，《周書·呂刑》之文。言當哀人之所犯而敬斷其獄。仲弓問曰：「何謂也？」孔子曰：「古之聽訟者察貧窮，哀孤獨及鰥寡老弱不肖而無告者，雖得其情，必哀矜之。死者不可生，斷者不可屬。鰥，占頑反。屬，之欲反。○屬，續也。若老而刑之，<sup>②</sup>謂之悖，弱而刑之，謂之克，不赦過，謂之逆，悖，必內反。○泉陶云：「宥過無大，刑故無小。」是則過雖大可有焉。此云不赦過爲逆，是逆於道矣。率過以小罪，謂之枳。枳，音紙，一作「痕」。○枳，猶傷也。夫過則宜宥，若率以爲小罪，亦傷乎義焉，況爲之大罪耶？故宥過赦小罪，老弱不受刑，先王之道也。《書》曰「大辟疑赦」，辟，婢亦反。○《周書·呂刑》之文。言大辟死刑疑則亦赦。又曰「與其殺不辜，寧失不經」。《大

①「非」，原脫，據寬文本、賀本補。

②「老」，原作「先」，據元明本、寬文本、賀本改。

禹謨》之文。言寧失不常之罪，不枉不辜之人。《書》曰「若保赤子」，《周書·康誥》之文。言愛民若安嬰孩赤子然，不使失其欲。子張問曰：「聽訟可以若此乎？」孔子曰：「可哉！古之聽訟者惡其意，不惡其人，惡，烏路反，下同。○言不疾其人，但疾其意之所由起。」求所以生之，不得其所以生，乃刑之。君必與衆共焉，愛民而重棄之也。是所謂刑人于市，與衆棄之也。今之聽訟者，不惡其意而惡其人，求所以殺，是反古之道也。」蓋以喜怒愛惡而爲之刑，非反古而何？○孟氏之臣叛，武伯之家臣。武伯問孔子曰：「如之何？」答曰：「臣人而叛，天下所不容也。其狀自反，子姑待之。」姑，且也。三旬，果自歸孟氏，武伯將執之，訪於夫子，夫子曰：「無也。子之於臣，禮意不至，是以去子。夫禮不交則意不通，意不通則疑所以生，疑生則去矣。今其自反，罪以反除，又何執焉？」此所謂過而能改，善莫大焉。

故李廣殺降兵，世稱其非也。子脩禮以待之，則臣去子將安往？」武伯乃止。並《孔叢子》。○楚聲子曰：「善爲國者，賞不僭而刑不濫。賞僭，則懼及淫人；刑濫，則懼及善人。若不幸而過，寧僭無濫。與其失善，寧其利淫。無善人，則國從之。《詩》曰：『人之云亡，邦國殄瘁。』無善人之謂也。濫，力暫反。殄，徒典反。瘁，在醉反。○《詩·大雅》。殄，盡也。瘁，病也。故《夏書》曰：『與其殺不辜，寧失不經。』懼失善也。不經，不用常法。《商頌》有之曰：『不僭不濫，不敢怠遑。命于下國，封建厥福。』《詩·商頌》。言殷湯賞不僭差，刑不濫，不敢怠解自寬暇，故能爲下國所命爲天子。此湯所以獲天福也。古之治民者，勸賞而畏刑，樂行賞而憚用刑。恤

① 「言不疾」至「所由起」，原作「非喜怒其人但疾其意之有險害」，據寬文本、賀本改。

民不倦。賞以春夏，刑以秋冬。順天時。是以將賞，爲之加膳，加膳則飫賜，爲于僞反，下同。飫，於據反。○飫，饜也。酒食賜下，無不饜足，所謂加膳也。此以知其勸賞也。將刑，爲之不舉，不舉則徹樂，不舉盛饌。此以知其畏刑也。夙興夜寐，朝夕臨政，此以知其恤民也。三者，禮之大節也。」《左》襄二十六年。○鄭人鑄刑書，鑄刑書於鼎，以爲國之常法。叔向使詒子產書曰：詒，以之反。○詒，遺也。「始吾有虞於子，虞，度也，言準度子產以爲己法。今則已矣。已，止也。昔先王議事以制，不爲刑辟，懼民之有爭心也。猶不可禁禦，是故閑之以義，爭，音諍，下並同。辟，婢亦反，下同。○閑，防也。糾之以政，糾，舉也。行之以禮，守之以信，奉之以仁；奉，養也。制爲祿位，以勸其從；勸從教。嚴斷刑罰，以威其淫。斷，丁亂反，下同。○淫，放也。懼其未也，故誨之以忠，聳之以行，聳，息勇反。行，下孟反。

○聳，懼也。教之以務，時所急。使之以和，臨之以敬，蒞之以彊，施之於事爲蒞。斷之以剛；義斷恩。猶求聖哲之上，明察之官，上，公、王也。官，卿、大夫也。忠信之長，慈惠之師，民於是乎可任使也，而不生禍亂。民知有辟，則不忌於上。長，丁丈反。○權移於法，故民不畏上。並有爭心，以徵於書，而微幸以成之，微，古堯反。○因危文以生爭，緣微幸以成其巧僞。弗可爲矣。爲，治也。夏有亂政而作《禹刑》，商有亂政而作《湯刑》，周有亂政而作《九刑》。三辟之興，皆叔世也。今吾子相鄭國，作封洫，立謗政，制參辟，鑄刑書，將以靖民，不亦難乎？《詩》曰：『儀式刑文王之德，日靖四方。』又曰：『儀刑文王，萬邦作孚。』如是，何辟之有？民知爭端矣。將棄禮而徵於書，相，息亮反。洫，況域反。參，七南反。○以刑書爲微。錐刀之末，將盡爭之。錐，音佳。爭，如字。○錐，刀末，

喻小事。亂獄滋豐，賄賂並行。終子之世，鄭其敗乎？盼聞之：「國將亡，必多制。」賄，呼罪反。盼，黑乙反。○數改法。其此之謂乎！復書曰：「若吾子之言，僑不才，不能及子孫，吾以救世也。既不承命，敢忘大惠。」僑，音喬。○《左》昭六年。○子產有疾，謂子大叔曰：「我死，子必爲政。唯有德者能以寬服民，其次莫如猛。夫火烈，民望而畏之，故鮮死焉。水懦弱，民狎而翫之，大，音泰。夫，音扶。鮮，息淺反。懦，乃亂反。翫，音玩。○狎，輕也。則多死焉，故寬難。」疾數月而卒。大叔爲政，不忍猛而寬。鄭國多盜，取人於萑苻之澤，大叔悔之曰：「吾早從夫子，不及此。」興徒兵以攻萑苻之盜，盡殺之，盜少止。仲尼曰：「善哉！政寬則民慢，慢則糾之以猛。萑，音丸。苻，音蒲。糾，居黝反，下同。○糾，猶攝也。猛則民殘，殘則施之以寬。寬以濟猛，猛以濟寬，政是以

和。《詩》曰「民亦勞止，汔可小康。惠此中國，以綏四方」，施之以寬也。「毋從詭隨，以謹無良。式遏寇虐，慘不畏明」，糾之以猛也。「柔遠能邇，以定我王」，平之以和也。又曰「不競不綏，不剛不柔，布政優優，百禄是遒」，和之至也。」及子產卒，仲尼聞之出涕曰：「古之遺愛也！」汔，許乙反。從，子用反。詭，九委反。遏，於葛反。慘，七感反。綏，音求。遒，在由反。

○《左》昭二十年。

儀禮集傳集註卷第三十七終

